

CHYOIYÚNG CHYUMLAIKÁ

DANGSHIKAQ ASIK

CHYOIYÚNG CHYUMLAIKÁ

DANGSHIKAQ ASIK

Zaiwa

THE UNITED BIBLE SOCIETIES

THE NEW TESTAMENT

In The Zaiwa Language

© United Bible Societies, 2009

ATSI 262 – 2009 – 5M

ISBN 978-1-921445-40-8

(First Printing)

Quotations of the New Testament, Zaiwa language, in any form, must obtain written permission from the Bible Society of Myanmar, if the quoted material is inclusive of at least 1,000 verses, or a copy of any book wholly or partially, which amounts to 50% of the book quoted. For any long quotation, notice of copyright must appear as follows:
Text copyright © 2009 United Bible Societies. Used by permission.

LAIKÁ BUK MÁ BO É PÊ

Dangshikaq Asik

<i>Laiká Buk Myìng</i>	<i>Tot é Dong</i>	<i>Laiká Myoq</i>
Mahte	Mht	1
Markuq	Mrk	64
Lukaq	Luk	104
Yohan	Yhn	172
Lagyo	Lagyo	223
Romaq	Rom	284
1 Korinhtuq	1 Ko	312
2 Korinhtuq	2 Ko	339
Galatiq	Gal	357
Ehpesu	Ehp	367
Hpilipi	Hpp	376
Kolose	Kol	383
1 Htesaloni	1 Hte	390
2 Htesaloni	2 Hte	396
1 Timohti	1 Tm	400
2 Timohti	2 Tm	407
Tituq	Tit	412
Hpilemon	Hpm	415
Hebre	Hbr	417
Yakuq	Yak	438
1 Petruq	1 Pt	445
2 Petruq	2 Pt	453
1 Yohan	1 Yhn	458
2 Yohan	2 Yhn	466
3 Yohan	3 Yhn	467
Yude	Yud	468
Shingran	Shr	471

DANGSHIKAQ AXAU MÁ É LAIKÁ BUK MYÌNG

Laiká Buk Myìng

Apûn Awang Laiká
 Htoq Lô Laiká
 Nhões Jaú Laiká
 Gyung So Laiká
 Tarâ Lhoq Pun Laiká
 Yoshuq Laiká
 Tarâ Agyì Laiká
 Ruhta Laiká
 1 Samuelaq Laiká
 2 Samuelaq Laiká
 1 Hkohkâm Laiká
 2 Hkohkâm Laiká
 1 Hkohkâm Labaû Laiká
 2 Hkohkâm Labaû Laiká
 Ezra Laiká
 Nehemia Laiká
 Eshta Laiká
 Yobaq Laiká
 Hkya-on Kungtôn Laiká
 Sânghkyang Laiká
 Hpaqchyî Shit Kyo Laiká
 Sholumon É Jihkyang Laiká
 Esai-aq Laiká
 Yeremiaq Laiká
 Ngaùhkyang Sâng Laiká
 Ezekela Laiká
 Danielaq Laiká
 Hosea Laiká
 Yoelaq Laiká
 Amo Laiká
 Obedia Laiká
 Yonaq Laiká
 Mihka Laiká
 Nahum Laiká
 Habaku Laiká
 Zehpaniaq Laiká
 Hagi Laiká
 Zahkariq Laiká
 Malahkiq Laiká

Tot é Dong

Apûn
 Htoq Lô
 Nhões
 Gyung So
 Tarâ Pun
 Ysh
 Tarâ Agyì
 Ruhta
 1 Sam
 2 Sam
 1 Hko
 2 Hko
 1 Hko Labaû
 2 Hko Labaû
 Ezz
 Nhm
 Est
 Yob
 Hkya-on
 Sânghkyang
 Hpaqchyî
 Shol
 Esai
 Yer
 Ngaù
 Ezk
 Dan
 Hos
 Yol
 Amo
 Obd
 Yon
 Mihka
 Nah
 Hbk
 Zhp
 Hag
 Zhk
 Mal

MAHTE

é Gabú Danglù Laiká

(The Gospel of Matthew)

Yesuq É Byùxik Shap Kyô É Hkyô

Luk 3:23-38

- 1** Abraham é awut ashín, Dawiq é yhangzo yhangshu,^a Yesuq Hkrisduq é byùxik labaû gi, a-ô mâ é eq rajung za nghut lhê.
- 2** Abraham gi, Isak lé hkû;
Isak gi, Yakup lé hkû;
Yakup gi, Yudaq eq yhanggu yhangmâng pé lé hku é nghut lhê;
- 3** Yudaq gi, Hparet eq Zera lé hkû, haú nhik é yhângnu gi, Tamar nghut ri.
Hparet gi, Hesrun lé hkû;
Hesrun gi, Ram lé hkû;
- 4** Ram gi, Aminada lé hkû;
Aminada gi, Nashon lé hkû;
Nashon gi, Salamun lé hkû;
- 5** Salamun gi, Buaq lé hkû;
Buaq é yhângnu gi, Rahap nghut ri.
Buaq gi, Obet lé hkû;
Obet é yhângnu gi, Ruhtaq nghut ri.
Obet gi, Yese lé hkû;
- 6** Yese gi, Hkohkâm Dawiq lé hkû;
Dawiq gi, Sholumon lé hkû;
Sholumon é yhângnu gi, Uriaq yhangmyi dut wú sù nghut ri.
- 7** Sholumon gi, Rehoboam lé hkû;
Rehoboam gi, Abiyaq lé hkû;
Abiyaq gi, Asa lé hkû;
- 8** Asa gi, Yehoshaphat lé hkû;
Yehoshaphat gi, Yoram lé hkû;
- Yoram gi, Uzi-aq lé hkû;
- 9** Uzi-aq gi, Yohtam lé hkû;
Yohtam gi, Ahaza lé hkû;
Ahaza gi, Hezekiaq lé hkû;
- 10** Hezekiaq gi, Manase lé hkû;
Manase gi, Amon lé hkû;
Amon gi, Yosiaq lé hkû;
- 11** Yosiaq gi, Babelon má shúm dut huí é hkûn, Yehkoniasq eq yhanggu yhangmâng pé lé hku é nghut ri.
- 12** Babelon má shúm dut huí é htâng má,
Yehkoniasq gi, Shalahtila lé hkû;
Shalahtila gi, Zerubabelaq lé hkû;
- 13** Zerubabelaq gi, Abiut lé hkû;
Abiut gi, Eliakim lé hkû;
Eliakim gi, Azor lé hkû;
- 14** Azor gi, Zaduk lé hkû;
Zaduk gi, Ahkim lé hkû;
Ahkim gi, Eliut lé hkû;
- 15** Eliut gi, Eliaza lé hkû;
Eliaza gi, Mahtan lé hkû;
Mahtan gi, Yakup lé hkû;
- 16** Yakup gi, Mariq é yhanglâng Yosep lé hku é nghut ri;
Mariq gi, Hkrisduq gâ é Yesuq lé hku é sù nghut ri.
- 17** Haú mù, Abraham é pyat mai Dawiq é pyat jé shoq gi, byùxik raxe myi xik; Dawiq pyat mai Babelon má shúm dut huí é hkûn jé shoq gi, byùxik raxe myi xik; shúm dut huí é hkûn mai Hkrisduq^b é pyat jé shoq gi, byùxik raxe myi xik nghut ri.

^a 1:1 Awut ashín eq yhangzo yhangshu gâ é lé, Chyúmdang ra-am má, “yhangzo” ga le bo tô lhê. ^b 1:17 Grik dong Hkrisduq gâ é gi, xù but hui Sù gâ é lichyúm nghut mù, Hebre dong Mesaia gâ é eq rajung za nghut lhê.

Yesuq Hku Lé Lo É Hkyô*Luk 2:1-7*

- ¹⁸ Yesuq Hkrisduq hku lé lo é hkyô gi, a-ô mâ é eq rajung za nghut ri: Yesuq é yhangnu Mariq gi, Yosep èq dúng tô é sù nghut ri; nghut kôlhang, yhangnhik a zùm shi má, yhang gi, Chyoiyúng Woi-nyí mai zogúng dut bê nghut ri.
- ¹⁹ Yhâng é yhumsîng hpó Yosep gi, ding-mán sù nghut luí, yhang lé byu pé hí má hoq a kâm lhoq hpu nau é yanmai, tsik za lhoq kâng pyám rã dã ri.
- ²⁰ Nghut kôlhang, yhang haú su myit nyi é hkûn, yhupmoq má, haú Yhum-sîng é maumang lagyo gi, yhang lé, lé htoq shit luí, “Dawiq é yhangzo yhangshu Yosep ê, haú náng é yhum-sîng myhí Mariq lé hâng yù rã hkyô lé, hkâ-myit chiq; haí mù gâ le, yhang wun tô é zoshâng gùng gi, Chyoiyúng
- ²¹ Woi-nyí dông lo é nghut lhê. Yhang gi, yuqzo rayuq hkû rã nghut luí, nàng gi, zoshâng haú lé, Yesuq nghû myìng myhíng byi ra rã nghut lhê; hkâsu mù gâ le, Yhang gi, Yhâng é byu pé lé, yhangmoq é yubak mara mai hkyi yù rã sù nghut lhê.” ga taí ri.
- ²² Shí hkyô banshoq gi, Garai Gasâng èq, haú myiqhtoi dông taí é dang lé
- ²³ lhoq dik é nghut ri. Myiqhtoi dang haú gi, “Haú zomyi gyíng gi, zogúng dut luí, yuqzo rayuq hkû rã nghut lhê; Yhâng é myìng lé gi, Emanuelaq ga kó rã nghut lhê.”^a gâ ri. Hau é lichyúm gi, “Garai Gasang gi, nga-nhúng eq rahá nghut nyi lhê.” gâ é nghut lhê.
- ²⁴ Yosep gi, yhup bún lo é hkûn, haú Yhumsîng é maumang lagyo taí é eq rajung za, Mariq lé, yhangmyi dông
- ²⁵ yhúm má shuí yù bê nghut ri. Nghut kôlhang, yhang gi, yuqzo haú hku é hkûn jé shoq, Mariq eq gungsho a

zùm nghut ri. Yuqzo haú lé, yhang gi, Yesuq ga myhíng byí ri.

Buihtoq Hkyam Mã É Hpaqchyí Bò Bang

- 2** Herut hkohkâm up nyi é u lé, Yuda mau mã é Betlehem wã mã Yesuq lé hku é nghut ri. Hau htâng, buihtoq hkyam mã é hpaqchyí bò bang gi, Yerusalem wã mó mã jé lé
- ² kômù, “Haú hku lé lô bê Yudaq byu pé é Hkohkâm gi, hkâmá nghut lhê lú? Yhâng é kyí lé, buihtoq hkyam mã ngamoq myàng luí, Yhang lé noq rã matú jé lé é nghut lhê.” ga luí, myí akô nghut ri.
- ³ Herut hkohkâm gi, haú hkyô lé wó gyo jáng myit myô nyi ri; hau htoq agó, Yerusalem wã mó mã é lhung-lhâng bang le, myit myô bum akô
- ⁴ nghut ri. Haú mù luí, yhang gi, byu pé é hkyangjong agyi pé eq tarã sará pé banshoq lé, ji tsíng yù mù, haú Hkrisduq hkâmá hku lé lô rã nghut é
- ⁵ hkyô lé myí ri. Haú hkûn, yhangmoq gi, “Yuda mau Betlehem wã mã nghut lhê. Hkâsu mù gâ le, shí hkyô eq séng luí, haú myiqhtoi kã tô é má,
- ⁶ ‘Yudaq mau mã é Betlehem wã ê, nàng gi, Yudaq mau mã é wã pé má, je tiq sù a nghut; hkâsu mù gâ le, ngá é Israelaq byu pé lé upzúng rã Zau gi, náng chyáng mai htoq lô rã nghut lhê.’^b
- ga bo tô ri.” ga tũ taí akô.
- ⁷ Hau htâng, Herut gi, haú hpaqchyí bò bang lé haq ji yù mù, kyí lé htoq shit é ahkyíng lé, yhangmoq chyáng mai hkyak wó myí sê yù bê nghut ri.
- ⁸ Haú mù, yhang gi, “Nungmoq, zoshâng haú lé rago ê ho wú keq. Ngò le, Yhang lé ê wó noq rã matú, Yhang

^a 1:23 Esai 7:14 ^b 2:6 Mihka 5:2

lé nungmoq ê myâng eq yang, ngo lé lo shit kyo keq.” ga taí luí, haú bang lé Betlehem wà shut nhang kat bê nghut ri.

- ⁹ Yangmoq gi, haú hkohkam é dang lé gyô yu é htâng má, htoq e ló bekô nghut ri. Haú buihotoq hkyam má yangmoq myang é kyí gi, haú zonú nyi é ahtoq ang ang má ló nô é jé shoq, yangmoq é hí má e ló byí ri.
- ¹⁰ Yangmoq gi, kyí haú lé myàng jáng, gyai yang gabú bum akô nghut ri.
- ¹¹ Yangmoq gi, haú yhúm má wang e ló kô é hkún, zonú eq yhângnu Mariq lé myàng kômù, hkyihput htuq luí, haú zonú lé noqkuq akô; hau htâng, yangmoq é sutdek pé lé le hpóng luí, hîng, namngón jung loban eq mura^a pé lé yù mù, Yang lé chyunghuq
- ¹² byí akô nghut ri. Yangmoq gi, Herut chyáng a dum taú ló râ matú, yhupmoq má, yangmoq lé sidiq byí é hui kômù, hkyô gó hkat đông yangmoq é mau shut taú ló bekô nghut ri.

Egutuuq Ming Shut Hfang E É Hkyô

- ¹³ Yangmoq ló byuq é htâng má, haú Yhumsing é maumang lagyo rayuq gi, Yosep lé yhupmoq má htoq shit mù, “Toq aq! Haú zoshâng eq yhângnu lé, Egutuq ming shut shuí hfang é aq. Ngò, nang lé dum ji yu é ahkyíng jé shoq, haú má nyi nyi keq. Haí mù gâ le, Herut gi, zoshâng haú lé sat râ matú, ho nyi bê nghut ri.” ga taí ri.
- ¹⁴ Haú mù, yang gi, toq luí, myín lé yang, zôshang me lé shuí chûng mù, Egutuq ming shut e ló bê nghut ri.
- ¹⁵ Yangmoq gi, Herut shi é jé shoq, haú má nyi nyi akô. Haú gi, “Ngá zo lé, ngò, Egutuq ming mai wut htoq yú bê nghut lhê.”^b ga, haú Yhumsing èq

myiqhtoi đông taí é dang lé lhoq dik é ru nghut lhê.

- ¹⁶ Herut gi, yang lé, hpaqchyí bò bâng èq mhaú pyâm tô é lé sé jáng, nhikmo-yo bê nghut ri; haú mù, yang gi, haú hpaqchyí bò bâng chyáng mai wó sê yu é ahkyíng lé sôn wú mù, Betlehem wà eq hau é awui ayàm mâ é wà pé má nyi é, í zân mai a-ô mâ é yuqzo pé banshoq lé, sat
- ¹⁷ pyám nhang ri. Haú gi,
 “Ramaq gâ é jowò má, yón kuq é eq ngau garú é htê lé wó gyô ri;
 Rahkelaq gi, yang zô pé a nyi byuq lo kô é yanmai, ngau nyi é eq nhik a wó tít dut ri.”^c
- ¹⁸ ga luí, myiqhtoi Yerehiaq đông taí tô é dang lé lhoq dik é nghut ri.

Nazaret Wà Má Dum Taú Lo É Hkyô

- ¹⁹ Herut shi byuq é htâng, Egutuq ming má, haú Yhumsing é maumang lagyo gi, Yosep chyáng yhupmoq
- ²⁰ đông lé htoq shit mù, “Toq aq, haú zôshang me lé shuí chûng mù, Israelaq ming má taú ló aq; hkâsu mù gâ le, haú zoshâng lé sat naú bang shi byuq bekô nghut ri.” ga taí ri.
- ²¹ Haú mù, Yosep gi, zôshang me lé shuí chûng mù, Israelaq ming shut
- ²² taú ló bê nghut ri. Nghut kôlhâng, yang gi, Yuda mau má, Arhkela-uq, yhângwa Herut é hkó má xoq up nyi é hkyô lé wó gyo jáng, haú má a wám ló lo nghut ri. Yhupmoq má sidiq byí é hui é eq rajung za, yang gi, Galile mau shut e ló mù, Nazaret gâ é wà má
- ²³ ló nyi nyi bê nghut ri. Haú mù, “Yang lé, Nazaret wà byù ga râ nghut lhê.” ga luí, haú myiqhtoi pé đông taí tô é dang lé lhoq dik é nghut ri.

^a 2:11 Mura gi, chi wó kut jung xú nghut lhê.

^b 2:15 Hos 11:1 ^c 2:17 Yer 31:15

**Wui-myhup Sará Yohan
Shui Hen É Hkyô**

Mrk 1:1-8; Luk 3:1-18; Yhn 1:19-28

3 Haú yoq má, Wui-myhup Sará Yohan htoq lô mù, Yuda mau mâ é yoso má hko kyô é gi, “Myit lhîng keq; hkâsu mù gâ le, mauhkûng mingdán gi, chyâng lò bê^a nghut ri.” gâ ri. Haú yuq gi,

“Haú yoso má, byù rayuq garû taí é htê gi,

‘Haú Yhumsing é matú, hkyô hen to keq; Yhâng é matú, hkyô lhoq nyhang to keq.’ gâ ri.”^b

ga myiqhtoi Esai-aq taí tô é sù yuq nghut ri.

⁴ Yohan gi, gola-uoq shomaú èq saí é mebu wut mù, yhâng é hpyidum má gi, shokuq hpyihit hit ri. Yhâng é zoshuq gi, dinggám eq yosô⁵ byo-î pé nghut ri. Yerusalem wà mó mâ é bang, Yuda mau banshoq mâ é bang eq Yodan làng awui ayàm lhunglhang mâ é bang gi, yhâng⁶ chyáng htoq e bum akô. Yhangmoq gi, yhumsing é mara lé yín yû kô-lú, yhâng chyáng mai Yodan làng má wui-myhup hkâm yu bum akô nghut ri.

⁷ Nghut kôlhâng, yhang gi, yhang wui-myhup hkâm byí é jang má, Hparishe pé eq Saduke pé myo myo lé lo nyí kô é lé myàng jáng, yhangmoq lé taí é gi, “Duq htân lhangmuì amyû pé ê, jé lô rà yubak dam mai wó hfang lut kó sháng gaq ga, nungmoq⁸ lé ó yuq taí pûn é lhú? Myit lhîng hkyô⁹ eq gingdán é ashi pé zui keq. ‘Nga-moq gi, Abraham é yhangzo yhangshû pé nghut lhê.’ nghû luí, yhumsing é i-myyit unghkaú má hkâlum to kó. Hkâsu mù gâ le, ngò, nungmoq lé taí

kyo kôlé, Garai Gasang gi, luqgok shí pé mai, Abraham é matú yhangzô pé¹⁰ wó hpan htoq kat lhê. Ahkuí lhang, Garai Gasang gi, Yhâng é wazung lé haú sikgâm wang pé má tô to bê nghut ri; haú mù, ge é ashi a zui é agàm hkangmó lé gi, htuoq lhêng pyám mù, myi má dú kat pyám rà nghut lhê.

¹¹ Ngò gi, nungmoq myit lhîng kó sháng gaq nghû, wui èq za wui-myhup hkâm byí lhê. Nghut kôlhâng, ngá htoq má wum-o a-tsam je bo é sù rayuq, ngá htâng má jé lé lô shirâ nghut luí, ngò gi, Yhâng é hkyî-tsung chûng byi rà lhang a gingdán; Yhang gi, Chyoiyúng Woi-nyí má le, myi má le, nungmoq lé wui-myhup hkâm¹² byi rà nghut lhê. Yhang gi, loq má byò chung to mù, guq chyârâng mâ é guq bùm lé hik sân pyám luí, já é guq cham lé gi, guqchyí má tsîng kat to mù, guqsôm lé kúm gi, hkâ-nhám le shi byuq a sê é myí èq nyhê hkyô pyám rà nghut lhê.” gâ ri.

Yesuq, Wui-myhup Hkâm Yu É Hkyô

Mrk 1:9-11; Luk 3:21-22

¹³ Haú hkûn, Yesuq gi, Yohan chyáng wui-myhup hkâm yù rà ga, Galile mau¹⁴ mai Yodan làng má jé lé lo ri. Nghut kôlhâng, Yohan gi, “Ngò sheq Náng chyáng wui-myhup hkâm yù rà sù ru nghut lhê nhîng! Nàng sheq ngá chyáng lé lo lhê lhú?” ga luí, lhom taí hkûm ri.

¹⁵ Haú hkûn, Yesuq gi, “Dingmán hkyô banshoq lé, nga-nhúng lhoq dik rà é yanmai, Ngo lé wui-myhup hkâm byi laq.” ga tû taí ri. Haú mù, Yohan le, gyo byi bê nghut ri.

^a 3:2 *Mauhkûng mingdán gi, chyâng lò bê gâ é lichyúm gi, Garai up rà ahkýng chyâng lò bê gâ é nghut lhê.* ^b 3:3 Esai 40:3

- ¹⁶ Yesuq gi, wui-myhup hkâm yù eq yhang, wui mai htoq lo ri. Haú hkûn, mauhkûng bóng lô mù, Garai Gasâng é Woi-nyí gi, hpûngkyui gunghkyâng sù é dông mai, Yhâng ahtoq má lé gyó nô tô é lé, Yhang myang kat ri.
- ¹⁷ Haú hkûn, “Shí yuq gi, Ngò chyt-dap é Ngá zo nghut lhê; Yhâng é ahtoq má Ngò gabú myit ngón nyi lhê.” ga mauhkûng mai danghtê htoq lo ri.

Yesuq, Gúnglaú Huí É Hkyô

Mrk 1:12-13; Luk 4:1-13

- 4** Hau htâng má, Chyoiyúng Woi-nyí gi, Yesuq lé, nat Tsadán èq gunglaú é hui nhâng rá matú, yoso shut shuí ê ri. Yesuq gi, zoshuq gám é myi xê nyí myi xê myin jé jáng, zò-mut hui bê nghut ri. Haú hkûn, gunglaú sù gi, Yhâng chyáng lé mù, “Nàng, Garai Gasâng é Yhangzo nghut le gi, luqgok shí pé lé muk dut nhâng aq.” ga taí ri.
- ⁴ Haú jáng, Yesuq gi, “Byù gi, muk èq za asak duì rá a nghut; Garai Gasâng é nhut mai htoq lo é mungdang hkangmó èq sheq asak duì rá nghut lhê.”^a ga luí, Chyúmdang má kê tô ri.” ga yhang lé tú taí ri.
- ⁵ Haú hkûn, nat Tsadán gi, Yesuq lé, chyoiyúng myuq^b má shuí ê mù, noqkuq yhum je myhang é shúhtâng
- ⁶ htoq má yap nhang to luí, “Nàng, Garai Gasâng é Yhangzo nghut le gi, byam gyó kat wú aq. Hkâsu mù gâ le,
 ‘Náng é matú, Garai Gasang gi,
 Yhâng é maumang lagyô pé lé taí to rá nghut mù,
 luqgok má Náng é hkyí a ló htung shoq,

- yhangmoq é loq èq Nang lé lhom bún yú kó rá nghut lhê.’^c ga luí, Chyúmdang má kê tô ri.” ga taí ri.
- ⁷ Nghut kôlháng, Yesuq gi, “‘Haú Yhumsîng, nungmoq é Garai Gasang lé, wó chyam wú rá a nghut.’^d ga luí le, Chyúmdang má kê tô ri.” ga, yhang lé tú taí ri.
- ⁸ Nat Tsadán gi, Yesuq lé, gyai yhang myhang é bùm htoq má shuí doq ló mù, mingkan má joq é mingdán pé banshoq eq haú pê é hkikhkâm
- ⁹ hkyô lé tún shit ri. Hau htâng, yhang gi, “Nàng hkyihput htuq mù, ngo lé noq é nghut jáng, shí pé banshoq, Nang lé ngò byi rá.” ga, Yesuq lé taí ri.
- ¹⁰ Haú hkûn, Yesuq gi, “Tsadán nàng, ló byuq aq! Hkâsu mù gâ le, ‘Haú Yhumsîng náng é Garai Gasang lé za, nàng noqkuq dojaú ra rá nghut lhê.’^e ga luí, Chyúmdang má kê tô ri.” ga, yhang lé taí ri.
- ¹¹ Haú mù, nat Tsadán gi, ló byuq bê nghut luí, maumang lagyô pé gi, Yesuq lé, lé dojaú nyi akô nghut ri.

Yesuq Mungdang Hko Hi Ló É Hkyô

Mrk 1:14-15; Luk 4:14-15

- ¹² Yesuq gi, Wui-myhup Sará Yohan htóng gyó é hkyô lé wó gyo jáng, Galile mau shut dum taú ló bê nghut ri.
- ¹³ Yhang gi, Nazaret wà mai htoq ló mù, Zebulun eq Nahtali mau mâ é nhông yàm má joq é Kaperna-um wà má ló
- ¹⁴ nyi nyi ri. Haú gi, miyiqhtoi Esai-aq laiká má,
- ¹⁵ “Zebulun mau eq Nahtali mau, wuimau má é hkyô, Yodan làng yàm, tûngbau pé nyi é Galile mau ê,

^a 4:4 Tarâ Pun 8:3 ^b 4:5 chyoiyúng myuq gi, Yerusalem lé gâ lhê. ^c 4:6 Hkya-on 91:11-12

^d 4:7 Tarâ Pun 6:16 ^e 4:10 Tarâ Pun 6:13

- 16 mauchut hkaû má nyi nyi é bang,
maubó mó lé myàng bê nghut
ri;
shí wup hkaû má nyi to bâng
é matú, maubó lô bê nghut
ri.”^a
ga kê tô é dang lé lhoq dik râ matú
nghut ri.
- 17 Haú hkûn mai, Yesuq gi, “Myit
lhîng keq! Mauhkûng mingdán gi,
chyâng lò bê nghut ri.” ga, mungdang
hko hi e lô bê nghut ri.

Yesuq É Chángzo Hí Dut Bang

- 18 Yesuq gi, Galile nhông yàm má
hkyô sô wún é hkûn, Petruq gâ é Si-
mun eq yhanggu Andre nhiktâng lé
myang ri. Yhangnhik tâng gi, ngozo
kóng zo su nhik nghut mù luí, nhông
19 má gùn dú nyi akô nghut ri. Haú
mù, Yhang gi, haú nhiktâng lé, “Ngá
htâng cháng keq; Ngò, nungnhik lé,
byù lé châng kóng su nhik dut nhâng
20 râ nghut lhê.” ga tái ri. Haú hkûn,
yhangnhik gi, radá dâm, gùn pé lé tô
pyâm to luí, Yhang htâng cháng bekô
nghut ri.
- 21 Yesuq gi, jowò haú mai xoq sô e
lô le, Zebedi é yhangzo, Yakuq eq
yhanggu Yohan nhiktâng lé myang ri.
Yhangnhik gi, yhangnhik é yhângwa
Zebedi eq rahá, lhaí hkaû má gùn
hpo nyi akô. Yhangnhik lé, Yesuq wut
22 kat jáng, yhangnhik gi, radá dâm,
yhangnhik é yhângwa eq lhaí haú lé,
tô pyâm to kôluí Yesuq htâng cháng
bekô nghut ri.

Nò Bang Lé, Yesuq Lhoq Gê Byí É Hkyô

Luk 6:17-19

- 23 Yesuq gi, Galile mau ramau gón má
htoq ê mù, tarajong pé má, mhoq-

- shit luí, mauhkûng mingdán eq sêng é
gabú danglù lé, hko kyo uchyang, byu
pê chyáng mâ é nòhpyo ajung jung
hui bang eq nolì nojàng amyû myû
24 dap bang lé, lhoq gê byí wún ri. Yesuq
eq sêng é hkyô ludang gi, Suriq ramau
gón má byo myín lô mù, byu pé gi,
awáng nòhpyo ajung jung huí é bang,
hkê-nhò jamjaú nyi é bang, nat gang
wang júng é bang, mhûngtuq tuq é
bang, gùngjum shi é bang lé, shuí lé lô
kôluí, Yhang gi, haú bang lé lhoq gê
25 byí ri. Galile mau, Dekapoli,^b Yeru-
salem, Yuda mau eq, Yodan làng tû
tap mâ é byù moq mó gi, Yesuq htâng
châng bum akô nghut ri.

Hkungsô Wó É Tará

Luk 6:20-23

- 5** Yesuq gi, byù moq mó lé myàng
jáng, bùm má doq lô luí, lô zung
tô ri. Haú hkûn, Yhâng é chángzô pé
2 gi, Yhâng chyáng lé lô kôjáng, Yhang
nhut hkum hpóng luí, yhangmoq lé
mhoqshit é gi:
- 3 “Woi-nyí má, asho awui dut é
bang gi, hkungsô wó nyi ri;
hkâsu mù gâ le, mauhkûng
mingdán gi, yhangmoq é
mingdán nghut nyi ri.
- 4 Myit iyon huí é bang gi, hkungsô
wó nyi ri; hkâsu mù gâ le,
yhangmoq gi, nhik lhoq tîng é
hui kó râ nghut lhê.
- 5 I-myt nú-nhâm é bang gi,
hkungsô wó nyi ri; hkâsu
mù gâ le, yhangmoq gi,
mingkan lé wó sîng kó râ
nghut lhê.
- 6 Dingmán hkyô lé mut shit nyi é
bang gi, hkungsô wó nyi ri;
hkâsu mù gâ le, yhangmoq gi,

^a 4:16 Esai 9:1-2 ^b 4:25 Dekapoli gâ é gi, Grik đông myuq raxê lé gâ lhê.

- nhik dik shoq myàng zo kó rà nghut lhê.
- 7 Shogyo nhikmyin myit bo é bang gi, hkungsô wó nyi ri; hkâsu mù gâ le, yhangmoq gi, shogyo nhikmyîn yu é hui kó rà nghut lhê.
- 8 Myit sansêng é bang gi, hkungsô wó nyi ri; hkâsu mù gâ le, yhangmoq gi, Garai Gasang lé myàng kó rà nghut lhê.
- 9 Nguingón hkyô sô xoq byî é bang gi, hkungsô wó nyi ri; hkâsu mù gâ le, yhangmoq gi, Garai Gasâng é yhangzô pé gâ é hui kó rà nghut lhê.
- 10 Dingmán hkyo é yanmai zing-ri huí é bang gi, hkungsô wó nyi ri; hkâsu mù gâ le, mauhkûng mingdán gi, yhangmoq é nghut nyi ri.
- 11 Ngá é yanmai, byu pé èq, nungmoq lé rhoi é, zing-rí é, a teng a mán é dông agè ashop é dang amyû myû taí tso kô é hkûn, nungmoq hkungsô wó nyi ri.
- 12 Nguingón gabú nyî keq, hkâsu mù gâ le, nungmoq é matú kô é chyunghuq gi, mauhkûng mingdán má joq tô ri. Nungmoq é hí lhê é myiqhtoî pé lé le, yhangmoq gi, haú dông zing-rí lai lo wú bekô nghut ri.

Xo Eq Maubó

Mrk 9:50; Luk 14:34-35

- 13 Nungmoq gi, myidàm htoq mâ é zo nghut nyi lhê. Nghut kôlhang, xo gi, mán kân byuq jáng, haú lé hai èq dum wó lhoq ngam yù rà lhú? Shinggan shut dú pyám mù, byu pé èq nâng pyeq pyâm é mai lai luí, hai akyû le bò rà a nghut lo.

- 14 Nungmoq gi, mingkân é maubó nghut akô; bùm htoq mâ é myuq lé gi, wó nghop to rà a nghut. Myibung lé tap mù, mûng èq nghop tô é ó a kut wú kó; haú su kut rà malaî, yhúmhaú má lúng tô é bang yuq hkangmó myoq wó myâng rà matú, tsungjang má kúm
- 15 tsung to rà nghut lhê. Haú eq rajung za, byu pé gi, nungmoq é ge é muzó pé lé byu-myàng luí, mauhkûng htoq mâ é nungmoq é Îwa lé hkya-on kó sháng gaq, nungmoq é maubó lé yhangmoq é hí má duq nhang to keq.

Tarâ Lhoq Dik É Hkyô

- 17 Ngò gi, myiqhtoî pé é dang eq jep é tarâ lé lhoq hpyoq pyám rà matú, jé lé é nghut nhô hkâ-ngâm kó; haú pé lé lhoq dik rà matú sheq jé lé é ru nghut
- 18 lhê. Ngò, nungmoq lé teng za taí kôlé, mauhkûng eq myigùng byuq byuq le lhang, haú pé a ban lhoq dik dik gi, jep é tarâ mâ é tiq dik é dangjí eq myi-hkyet zo ralhüm lhang byuq byuq rà
- 19 a nghut. Jep é tarâ shí pé mâ é tiq dik é dang rahkun lé lu lai luí, góbang lé le, haú su kut rà matú mhoq byî é sù ó yuq nghut kôle, mauhkûng mingdán má tiq dik sù gâ é hui rà nghut lhê; nghut kôlhang, jep é tarâ shí pé lé châng kut luí, mhoq byi sù kúm gi, mauhkûng mingdán má, hkik sù gâ é
- 20 hui rà nghut lhê. Ngò, nungmoq lé taí kôlé, nungmoq dingmán é hkyô má, haú Hparishe pé eq tarâ sará pé dingmán é htoq je a gyaú le gi, mauhkûng mingdán má, nungmoq wó wâng kó rà a nghut.

Byù Hkâsat

- 21 'Byù hkâsat,^a sat é sù gi, jéyáng é hui rà nghut lhê' ga, hí hpyang lhê

^a 5:21 Htoq Lô 20:13

é bang lé taí tô é dang, nungmoq wó
²² gyô wú bê nghut lhê. Nghut kôlhang,
 Ngò, nungmoq lé taí kôlé, gumang ra-
 yuq yuq lé nhikjum yô é sù gi, jéyáng
 é hui râ nghut lhê. Hau htoq agó, gu-
 mang hpó lé, ‘Byù gang’^a ga taí é sù
 gi, Yudaq byìn tú wapdoq má jéyáng
 é hui râ nghut lhê; ‘Byù bam ê’ ga wut
 é sù gi, ngaraí myi eq gingdán nyi ri.

²³ Haú mù, hkungga gyap má, nàng
 hkungga nhông râ dâ é hkûn, náng
 é gumang rayuq yuq, nang lé mara
 hun é hkyô rajung jung joq é lé, myit
²⁴ bûn kat é nghut jáng, náng é hkungga
 lé, haú hkungga gyap hí má tô pyâm
 to mù, náng é gumang hpó haú yuq
 eq hí nguínón hkyô ló yú luí sheq,
 hkungga lé nhông byi aq.

²⁵ Nang lé yui tsuq sù gi, nang lé tarâ
 rûng má dé e ló é hkûn, hkyô má ru
 nghut nyi ashî u lé, yhang eq ngui-
 ngón hkyô hí hân yù aq. Haú a nghut
 jáng, haú yuq gi, nang lé, tarâ agyi
 chyáng ê ap pyám mù, haú tarâ agyì
 gi, nang lé htóng hkyô pyám râ matú,
 htóng suwún hpó é loq má ap pyám râ
²⁶ nghut lhê. Ngò, nang lé teng za taí lé,
 yuichyîn haú a ban xap xap gi, htóng
 haú mai nàng wó htoq ló râ a nghut.

Su-myi Sulàng Lú É Hkyô Eq Séng Luí Mhoqshit É Dang

²⁷ ‘Su-myi sulàng hkâlú’^b gâ é dang
 lé, nungmoq wó gyo wú bê nghut lhê.
²⁸ Nghut kôle, Ngò, nungmoq lé taí kôlé,
 myiwe rayuq lé shut nau é myit èq
 wú é sù gi, yhâng é myit hkaú má,
 myiwe haú yuq eq su-myi sulàng lú
²⁹ hkyô kut é sù nghut bê. Haú mù, náng
 é loqyo myoq èq, nang lé mara kut
 shut nhang é nghut le gi, haú lé lap
 choq yú mù, dú pyám aq. Hkâsu mù

gâ le, náng é ragùngdu gón ngaraí
 ming gyó râ htoq má, náng é gung-
 sho rajung jung za htên byuq é nghut
³⁰ le gi, náng é matú je ge ri. Haú eq ra-
 jung za, náng é loqyo loq èq, nang lé
 mara kut shut nhang é nghut le gi, haú
 lé hpyit yú mù, dú pyám aq. Hkâsu
 mù gâ le, náng é ragùngdu gón ngaraí
 ming gyó râ htoq má, náng é gungsho
 rajung jung za htên byuq é nghut le
 gi, náng é matú je ge ri.

Myi Làng Gâng É Hkyô Eq Séng Luí Mhoqshit É Hkyô

Mht 19:9; Mrk 10:11-12; Luk 16:18

³¹ ‘Yhumsing é yhangmyi lé kâng é sù
 gi, lhoq kang laiká byi râ dut lhê.’^c gâ
³² é dang joq lhê. Nghut kôlhang, Ngò,
 nungmoq lé taí kôlé, myiwe dông mai
 làng shut é a nghut é za, yhumsing é
 yhangmyi lé kâng é sù gi, myiwe haú
 lé sulàng lú sù dut nhâng bê nghut ri;
 hau htoq agó, yhumsing yhanglàng eq
 gang bê myiwe lé hâng yu é sù le,
 su-myi lú é sù dut bê nghut ri.

Danggidiq

³³ Hau htoq agó, ‘Danggidiq a zùng
 hkâmû; Yhumsing lé byí tô é dang-
 gididq eq rajung za cháng aq.’ ga luí,
 hí hpyang lhê é bang lé, taí tô é dang
 lé nungmoq wó gyô wú bê nghut lhê.
³⁴ Nghut kôlhang, Ngò, nungmoq lé taí
 kôlé, hai èq le hkâdakâm kó: mau-
 hkûng lé lang luí le, hkâdakâm kó;
 hkâsu mù gâ le, haú gi, Garai Gasâng
³⁵ é zùng tanghkuq nghut lhê; myigùng
 lé lang luí le, hkâdakâm kó; hkâsu mù
 gâ le, haú gi, Garaí é hkyí nang jang
 nghut lhê; Yerusalem lé lang luí le,
 hkâdakâm kó; hkâsu mù gâ le, haú
 gi, Hkôhkâm mó é myuq nghut lhê.

^a 5:22 Byù gang gâ é lé, Grik dông “Raka” gâ lhê. ^b 5:27 Htoq Ló 20:14 ^c 5:31 Tarâ Pun 24:1

³⁶ Hau htoq agó, yhumsing é ulhûm èq le, hkâdakâm kó; hkâsu mù gà le, xâm rahkat lé lhang hpyû shoq noq shoq, ³⁷ nàng wó kut é a nghut. Náng é dang lé, ‘nghut lhê’ lé gi, ‘nghut lhê’ nghû, ‘a nghut é’ lé gi, ‘a nghut’ nghû, taí aq; haû mai lai é gi, haû agè ashop su chyáng mâ é nghut ri.

Lató Hpuq É Hkyô

Luk 6:29-30

³⁸ ‘Myoqjí matú myoqjí xap, zui matú zui xap’^a gà é dang lé, nungmoq wó ³⁹ gyô wú bê nghut lhê. Nghut kôlhang, Ngò, nungmoq lé taí kôlé, agè ashop kut é sù lé lató hkâhpuq. Náng é loqyo bowâm má pyuq byi sù lé, loqpaí ⁴⁰ hkyam le hkâm byi shi aq. Byù rayuq yuq, nang lé mara tsuq mù, náng é buzo lé yu pyám byí é nghut jáng, ⁴¹ bumó lé le, hkyut byi shi aq. Byù rayuq yuq, nang lé zik mù, radéng ê nhâng jáng, yhang eq rahá í déng ⁴² châng ê byi aq. Nang lé dung sù lé, byi aq; náng chyáng mai chyí naû sù lé le, nunghtáng hkâlhik pyám.

Gyè Lé Chyitdap Râ É Hkyô

Luk 6:27-28, 32-36

⁴³ ‘Náng é chyangnâm mâ é bang lé gi, chyitdap mù, náng é gyè lé gi, a jú kut aq’^b gà é dang lé, nungmoq wó ⁴⁴ gyô wú bê nghut lhê. Nghut kôlhang, Ngò, nungmoq lé taí kôlé, nungmoq gi, mauhkûng htoq mâ é nungmoq é Íwâ é yhangzô pé wó dut kó sháng gaq, nungmoq é gye pé lé chyitdap mù, nungmoq lé zing-ri bâng é matú ⁴⁵ kyúdung byi keq; hkâsu mù gà le, Yhang gi, agè ashop bâng é ahtoq má le, gè bâng é ahtoq má le, bui tsò byi nhâng mù, dingmán bâng é ahtoq má

le, a dingmán bâng é ahtoq má le, mau ⁴⁶ wô byi nhâng Sù nghut ri. Nungmoq lé chyitdap é bang lé za chyitdap kô le gi, nungmoq é matú hai chyunghuq wó kó râ lú? Kang guq bang lhang, ⁴⁷ haû su kut lhê a nghut kó lú? Hau htoq agó, nungmoq é gumang wui lé za shi-kyám kô le gi, nungmoq kut é muzó gi, góbâng htoq má haí wá lak-lai râ lú? Tûngbaù pé lhang haû su ⁴⁸ kut lhê a nghut kó lú? Haû mù, mau-hkûng htoq mâ é nungmoq é Íwa gum-jup é su, nungmoq le gumjup nyí keq.

Alu Byí É Hkyô

6 Nungmoq dingmán é hkyô lé, byu pé myàng sháng gaq nghû, byu pé hí má a kut shit loshoq, sidiq nyí keq. Haû su kut é nghut jáng, mauhkûng htoq mâ é nungmoq é Íwâ chyáng mai, chyunghuq wó yú kó râ a nghut. ² Haû mù, haû gegùn labyoq kut bang gi, byu pé èq shigyau é hui sháng gaq ga, tarajong pé hká, hkyô pé hká kut é su, nàng gi, alu byí é hkûn, tut htê su hkâlhoq htoq. Ngò, nungmoq lé teng za taí kôlé, haú bang gi, yhangmoq é chyunghuq lé hkúm shoq wó ³ yú bekô nghut lhê. Ra châ to bang lé nàng alu byí é hkûn, náng é loqyo loq kut é hkyô lé, loqpaí loq lé lhang ⁴ hkâsé nhâng. Haú hkûn, nàng alu byí é lé, ó a châng sé râ nghut lhê. Haû jáng sheq, ó a sé loshoq kut é hkyô lé myang é sù, náng é Íwa gi, nang lé chyunghuq shigyau râ nghut lhê.

Kyúdung É Hkyô

Luk 11:2-4

⁵ Nungmoq kyúdung le, gegùn labyoq kut bang su hkâkut kó; hkâsu mù gà le, yhangmoq gi, byu

^a 5:38 Htoq Ló 21:24 ^b 5:43 Nhung 19:18

- pé byu-myàng shoq ga, tarajong pé eq hkyô kang pé má yap mù, kyûdung râ ô nau akô. Ngò, nungmoq lé teng za taí kôlé, haú bang gi, yhangmoq é chyunghuq lé wó yû bekô
- ⁶ nghut ri. Nghut kôlhang, nàng kyûdûng le, náng é gok hkaû má wang ló mù, hkum myhî pyám luí, a byu-myang é náng é Íwâ chyáng dung aq. Haú jáng, ó a byu-myang é lé myàng sù, náng é Íwa gi, nang lé jeju dum tau byi râ nghut
- ⁷ lhê. Haú mù, kyûdûng le, tûngbaù pé su kut luí, dang puq hkâhtau kó; hkâsu mù gâ le, yhangmoq gi, dang hîng chín luí dung jáng sheq, gyo byi nhô ngam akô nghut ri.
- ⁸ Haú bang su hkâkut kó; hkâsu mù gâ le, nungmoq é Íwa gi, nungmoq râ é hkyô lé, nungmoq a dung shi mai sê to Sù nghut lhê.
- ⁹ Haú mù, nungmoq kyûdûng le, 'Mauhkûng htoq tsáng myhâng mâ é ngamoq é Áwa ê, Náng é myìng gi, chyoiyúng nyí sháng gaq,
- ¹⁰ Náng é mingdán jé lô sháng gaq, Nàng ô nau é hkyô, mauhkûng htoq má dik é su, myigùng htoq má le dik sháng gaq ô.
- ¹¹ Ngamoq nyí wuí râ é zoshuq lé, ngamoq lé hkû-nyí byi laq.
- ¹² Ngamoq lé shut é bâng é mara lé ngamoq hkyut pyám byí é su, ngamoq é mara lé le hkyut pyám byi laq.
- ¹³ Ngamoq lé, agúng alaú hkyô má a wàng nhang é za, agè ashop jang mai hkyi yù laq ô. (Hkâsu mù gâ le, kô dik é up sîng hkyô, a-tsam eq hpungwup shìngkang gi, pyat dedu

ahtum abyuq Náng chyáng ru joq nyi ri ô! Amen.)'^a

- ¹⁴ nghû dung keq. Supê èq, nungmoq lé kut shut é mara lé, nungmoq hkyut pyám byí é nghut le gi, mauhkûng htoq mâ é nungmoq é Íwa le, nungmoq lé mara hkyut pyám byi râ nghut
- ¹⁵ lhê. Nghut kôlhang, haú bâng é mara lé, nungmoq a hkyut pyám byí é nghut le gi, nungmoq é Íwa le, nungmoq é mara lé hkyut pyám byi râ a nghut.

Zoshuq Gám É Hkyô

- ¹⁶ Nungmoq gi, zoshuq gám é hkûn, gegùn labyoq kut bang su myoqdong hkâlhoq nyhui kó; hkâsu mù gâ le, haú bang gi, yhangmoq zoshuq gám é hkyô lé, tûn shit râ matú myoqdong lhoq nyhuí shit akô nghut ri. Ngò, nungmoq lé teng za taí kôlé, haú bang gi, yhangmoq é chyunghuq wó
- ¹⁷ yû bekô nghut ri. Nungmoq kúm gi, zoshuq gám é hkûn, nungmoq zoshuq gám é hkyô lé, byu pê hí má de de a dut é za, nungmoq a byu-myang é Íwa za myàng sháng gaq, myoq chí
- ¹⁸ pyám luí, u xû but keq; haú jáng sheq, ó a sé loshoq kut é hkyô lé myang é Sù, nungmoq é Íwa gi, nungmoq lé chyunghuq shigyaú râ nghut lhê.

Mauhkûng Htoq Mâ É Sutzè

Luk 12:33-34

- ¹⁹ Jàngkon, jogyik èq wó lhoq htên pyâm é eq hkaú su èq le wó wang hkaú yu pyám byí é myigùng htoq má, nungmoq é matú, sutzè lé hkâhkong
- ²⁰ to kó. Jàngkon, jogyik èq le a wó lhoq htên pyâm é eq, hkaú su èq le a wó wang hkaú yu pyám byí é mauhkûng htoq má sheq, nungmoq é matú sutzè
- ²¹ hkong to keq. Hkâsu mù gâ le, náng é

^a 6:13 Chyúmlaiká ra-am má, shí túm a bo é nghut lhê.

sutzè joq jang má, náng é i-myt le jé nyi rà nghut lhê.

- ²² Myoqjí gi, gungdû é myibung nghut nyi ri. Náng é myoqjí ge é nghut le gi, náng é gungdu gón má maubó byíng
- ²³ mui to rà nghut lhê. Nghut kôlhang, náng é myoqjí a ge é nghut le gi, náng é gungdu gón gi, mauchut tuq dut nyi rà nghut lhê. Náng chyáng bo é maubó gi, mauchut byuq é nghut jáng, mauchut haû gi, hkâ-í yhang htû rà lhâ!
- ²⁴ Ó yuq nghut kôle, yhumsîng í yuq lé wó dojaú rà a nghut. Hkâsu mù gà le, yhang gi, rayuq lé a jú kut mù, rayuq lé gi, chyitdap rà nghut lhê; haû a nghut jáng, rayuq lé lhumzui mù, rayuq lé gi, hpau a tap kut rà nghut lhê. Nungmoq gi, Garai Gasang lé le, ngunzè lé le, radá dâm wó dojaú kó rà a nghut.

Hkâ-myt Chiq Kó

Luk 12:22-31

- ²⁵ Haû mù luí, Ngò, nungmoq lé táí kôlé, nungmoq é asak matú haí zo haí shuq rà eq nungmoq é gungdû matú haí wut haí tsang rà lé, hkâ-myt chiq kó. Asak gi, zoshuq htoq má, gungdu gi, mebû htoq má, je ahkyak lhê a
- ²⁶ nghut kó lhú? Maulat mâ é nghoqzô pé lé wú wú keq; yhangmoq gi, kyô hkyó kyô shu a kut é htoq agó, chyí pé má le haí a tsîng kat to kô é nghut le lháng, mauhkûng htoq mâ é nungmoq é Íwa gi, yhangmoq lé, byi tso byi huq nyi lhê. Nungmoq gi, nghoq haú pé htoq má je riyhang hpau dap
- ²⁷ nyi lhê a nghut kó lhú? Nungmoq má, ó yuq wá, myit chiq é èq, yhumsîng é asak lé radúng kô wó jat yù kó rà lhú?
- ²⁸ Haû nghut le nhîng, haí mù, mebû matú myit chiq akò lhú? Myigùng má

yuq tô é htutbó ban pé hkâsu kut kô lo é lé, myit wú keq. Haú pé gi, mù le a zui, hkyîng le a duí kó nghut ri.

- ²⁹ Nghut kôlhang, Ngò, nungmoq lé táí kyo kôlé, hkohkâm Sholumon hpung kô dik u lé wut é mebu lháng, ban
- ³⁰ haû rabó lé a hkyit nghut ri. Lumjîng myit tiq é bang ê, hkû-nyí joq mù, napmá myihkyóm má dú kat pyám hui rà nghut é yosô mhan pé lé za lháng, Garai Gasang haû su kut hut é nghut le gi, nungmoq lé je riyhang
- ³¹ hut rà a nghut kó lhú? Haû mù, ‘Haí zo rà lhi?’ ‘Haí shuq rà lhi?’ ‘Haí wut rà lhi?’ nghû hkâ-myt chiq myhîng
- ³² kó. Tûngbaù pé kúm gi, haú pé banshoq lé châng hkat ho nyi akò; nghut kôlhang, mauhkûng htoq mâ é nungmoq é Íwa gi, haú pé lé nungmoq
- ³³ rà é hkyô, sé byí nyi lhê. Nghut kôlhang, Yhâng é mingdán eq dingmán hkyô lé hí hô keq, haû jáng, haú pé banshoq, nungmoq lé puq byi
- ³⁴ rà nghut lhê. Haû mù, napmá lhê é matú hkâ-myt chiq kó; hkâsu mù gà le, napmá gi, yhâng é yhang myit chiq rà nghut lhê. Hkû-nyí é wuîhke hkyô gi, hkû-nyí é matú gé bê nghut ri.

A Jéyáng Râ Hkyô

Luk 6:37-38, 41-42

- 7** Nungmoq jéyáng é a hui kó sháng
- ² gaq, ó lé le, hkâjéyáng kó. Hkâsu mù gà le, nungmoq jéyáng é su, nungmoq le, jéyáng é hui kó rà nghut é htoq agó, nungmoq lik byí é bung èq, nungmoq lé dum lik byi rà nghut lhê.
- ³ Yhumsîng myoq hkaû má lúng tô é siktúm lé lháng a myit wú é nhîng, haí mù luí, nunggu nungmâng é myoq-
- ⁴ wàng lé myang lhê lhú? Yhumsîng é myoq má siktúm lhúng to luí nhîng,

‘Náng myoq má lúng tô é myoqwàng lé, ngò choq pyám byi lé.’ nghû luí, náng é gumang hpó lé hkâsu wó tai

⁵ rã lú? Gegùn labyoq kut sũ ê, náng é myoq má lúng tô é siktúm lé hí choq pyám aq. Haũ jáng sheq, nunggu nungmãng é myoq má wang tô é myoqwàng choq pyám byi rã matú, nãng san za myàng rã nghut lhê.

⁶ Hkúi pé lé, yunglhô é zê hkâbyi kó; waq pê hí má, nungmoq é palhé wuizo lé hkâdú byi kó. Haũ su kut jáng, haũ bang gi, zè haũ pé lé nãng pyeq pyám mù, nungmoq lé dum taũ ngat lò rã nghut lhê.

Dung Keq, Hô Keq, Hkum Má Kok Keq

Luk 11:9-13

⁷ Dung keq, haũ jáng, nungmoq lé byi rã nghut lhê; hô keq, haũ jáng, nungmoq myàng kó rã nghut lhê; hkum má kok keq, haũ jáng, nungmoq lé hpóng

⁸ byi rã nghut lhê. Hkâsu mù gã le, ó yuq nghut kôle, dung sũ wó rã; hô sũ myàng rã; hkum kok sũ lé gi, hpóng byi rã nghut lhê.

⁹ Nungmoq má, ó yuq wá, yhumsing yhangzo muk dũng le, luqgok byi kó

¹⁰ rã lú? Ngozo dũng le, lhangmuí^a byi

¹¹ kó rã lú? Agè ashop é bang nungmoq lháng gi, nungmoq é zo wuí lé, ge é chyunghuq dat byi kô le nhĩng, mauhkũng htoq tsáng myhâng mã é nungmoq é Íwa gi, Yhang lé dũng é bang lé, je riyhang ge é chyung-

¹² huq byi rã nghut lhê! Haũ mù, hai hkyô má nghut kôlháng, nungmoq gi, yhumsĩng ô nau é dõng supé lé kut nhãng nau é su, yhangmoq lé le kut byi keq. Haĩ mù gã le, haũ gi, jep é tarã eq myiqhtoi pé é dang lo jup tô é nghut ri.

Chyap É Hkúmdong Eq Lam É Hkúmdong

Luk 13:24

¹³ Chyap é hkúmdong mai wàng keq. Hkâsu mù gã le, lam é hkúmdong eq hkyô mó gi, htên byoq hkyô shut shuí e é nghut mù luí, haũ dõng wàng

¹⁴ bang gi, myô akô nghut ri. Chyap é hkúmdong eq hkyô zo kúm gi, asak hkyô shut shuí e é nghut mù luí, haũ lé myang ho é bang gi, shaũ akô nghut ri.

Agàm Eq Ashi

Luk 6:43-45

¹⁵ Nungmoq chyáng jé lé lo é myiqhtoi pyoq pé lé, sidiq nyi keq; yhangmoq gi, sau-kuq wut mù, nungmoq chyáng jé lé kôlháng, myaq zo myaq shuq nau

¹⁶ é wamhkuí pé nghut akô. Yhangmoq é muzó jizó lé wú mù, nungmoq gi, yhangmoq lé wú sé kó rã nghut lhê. Zubyap mai tsibiyiq shi, zugâm mai

¹⁷ maihpáng-shi wó yu wú akô lú? Ge é agàm gi, ge é ashí zui mù, a ge é

¹⁸ agàm gi, a ge é ashí za dat zui ri. Ge é agàm gi, a ge é ashí a wó zui, a ge é agàm le, ge é ashí a wó zui nghut ri.

¹⁹ Ge é ashí a zui é shigâm hkgámó lé gi, htuoq pyám mù, myi má dú kat

²⁰ pyám rã nghut lhê. Haũ mù, yhangmoq é muzó jizó lé wú mù, nungmoq gi, yhangmoq lé wú sé kó rã nghut lhê.

²¹ Ngo lé, ‘Yhumsĩng ê, Yhumsĩng ê,’ ga, wut é bang yuq hkgámó gi, mauhkũng mingdán mã myang wàng kó rã a nghut; haũ mauhkũng htoq mã é Ngá Wa ô nau é dõng kut sũ za sheq,

²² myang wàng rã nghut lhê. Haũ bui-nyí má, byù myo myo gi, ‘Yhumsĩng ê, Yhumsĩng ê, Náng é myìng mai, nga-moq gi, myiqhtoi le htoi bê; nat gang

^a 7:10 Garai Gasang gi, lhangmuí a zo rã matú, Yudaq byu pé lé hkunmó hkyô tô é nghut lhê.

lé hkat htoq bê; laklaí kumlhá ajung jung lé, kut bê a nghut lúí?’ ga lúí,
²³ Ngo lé myi kó râ nghut lhê. Haú hkûn, Ngò gi, ‘Nungmoq lé, Ngò hkâ-nhám le a sé; agè ashop hkyô kut é bang nungmoq, Ngá chyáng mai gâng ló byuq keq.’ nghû, yhangmoq lé san za tû taí kat râ nghut lhê.

Hpaqchyí Bò Sû Eq Ngok Sû

Luk 6:47-49

²⁴ Haú mù, Ngá é dang shí pé lé wó gyô yù lúí, châng kut é sù gi, hpaqchyí bò mù, lunghtân htoq má, yhûm saí é sù eq wuí nyi ri. Mau wô, wuí je, laidun lò mù, yhûm haú lé lo htung kôlhang, yhûm haú gi, a htên byoq byuq râ nghut lhê; hkâsu mù gâ le, yhûm haú gi, lunghtân htoq má tsuq
²⁶ tô é yanmai nghut ri. Nghut kôlhang, Ngá é dang lé, wó gyô yù mù, a cháng sù gi, semuî-jàng má, yhûm saí é byù
²⁷ ngok eq wuí nyi râ nghut lhê. Mau wô, wuí je, laidun wò yup dut lò mù, yhûm haú lé lo htung jáng, yù whuí a mù loshoq htên byoq byuq râ nghut lhê.” gâ ri.
²⁸ Yesuq mungdang ban taí é hkûn, shiwa byu pé gi, Yhang mhoqshit é
²⁹ hkyô lé maú hong bum akô; hkâsu mù gâ le, Yhang gi, yhangmoq é tarâ sará pé eq a pung é za, ahkáng ayá wó sù rayuq su, mhoqshit é yanmai nghut ri.

Manggâm Dap É Byù Rayuq

Mrk 1:40-45; Luk 5:12-16

8 Yesuq gi, bùm htoq mai gyó lo é hkûn, byù moq mó gi, Yhâng
² htâng châng bum akô nghut ri. Haú hkûn, manggâm dap é byù rayuq gi, Yhâng é hí má, lé mù, hkyihput htug lúí, “Yhumsîng ê, Nàng dóng é nghut le gi, ngo lé Nàng wó lhoq sân-yúng byi râ nghut lhê.” ga taí ri.

³ Yesuq gi, loq lhâm kat mù, haú yuq lé ê záng lúí, “Ngò dóng lhê, sân-yúng aq hkoi.” ga taí kat ri. Haú hkûn jáng, haú yuq é manggâm gi, ge byuq bê
⁴ nghut ri. Haú hkûn, Yesuq gi, “Nàng, shí hkyô ó lé le hkâtaí kyo. Nghut kô-lhang, náng é gungdu lé, hkyangjong hpô chyáng ló tûn shit mù, yhangmoq é matú saksé dut sháng gaq, Mo-sheq taí tô é eq rajung za, hkungga ló nhông byi aq.” ga haú yuq lé taí kat ri.

Gyezau Hpô É Lumjîng Myit

Luk 7:1-10; Yhn 4:43-54

⁵ Yesuq, Kaperna-um wà má wang e ló le, Romaq gyezau hpó rayuq gi,
⁶ Yhâng chyáng lé jé mù, “Yhumsîng ê, ngá é dui-nhâng zoshâng gi, gùngjum shi é htoq agó, yhûm má gyái no jam-jau leq tô ri.” ga garúm lé dung ri.
⁷ Haú hkûn, Yesuq gi, yhang lé, “Ngò, lé lhoq gê byi râ.” ga taí kat ri.
⁸ Gyezau hpó haú, Yhang lé dum tû taí é gi, “Yhumsîng ê, Nàng, ngá é laishîn-htâng má, lé nang râ lháng ngò má a gingdán. Nàng, dang rahkun za taí kat laq; haú hkûn, ngá é dui-nhâng
⁹ zoshâng ge ló râ nghut lhê. Hkâsu mù gâ le, ngò le ahkáng ayá wó é zau rayuq é a-ô mâ é zau nghut lhê; ngá é a-ô má le gyezô pé nyi lhê; rayuq lé, ‘É aq!’ nghu le, yhang e ló lhê; góyuq lé, ‘Lò aq!’ nghu le, yhang lo lhê; ngá jûn lé le, ‘Shí kut aq!’ nghu le, yhang kut lhê.” gâ ri.
¹⁰ Yesuq gi, dang haú lé wó gyo jáng, maú byuq lúí, Yhâng htâng cháng bang lé, “Ngò, nungmoq lé teng za taí kôlé, Israelaq amyû má lháng, shí í lumjîng é sù lé, Ngò, rayuq lé le a
¹¹ myàng wú é nghut lhê. Ngò, nungmoq lé taí kôlé, buihotoq buiwàng hkyam mâ é byu pé myo myo gi, mauhkúng mingdán má, Abraham, Isak, Yakup

pé eq rahá, zoshuq poí mó má myang
 12 zùng kó râ nghut lhê. Nghut kôlhang,
 mingdán haú má wàng âng é bang
 kúm gi, shinggan mauchut hkaú shut
 dú pyâm é hui luí, haú jowò má ngau-
 byi ngaú nhap eq zuì kyik kyik shoq
 hpuzô nyi bùm bekô râ nghut lhê.” ga
 taí ri.

13 Hau htâng, Yesuq gi, gyezau lé, “Ló
 aq hkoi! Nàng lumjínng é eq rajung za,
 dut râ nghut lhê.” ga taí ri. Haú-u má
 yhang, haú dui-nhâng zoshâng gi, ge
 byuq bê nghut ri.

Byù Myo Myo Lé Lhoq Gê Byí É Hkyô

Mrk 1:29-34; Luk 4:38-41

14 Yesuq gi, Petruq é yhùm má jé wang
 e é hkûn, Petruq é yhâng-aumó gyai
 yhang no leq tô é lé, ê myang ri.

15 Yesuq gi, yhâng é loq má ê záng kat é
 hkûn, Petruq yhâng-aumó gi, nõhpyo
 ge byuq mù, toq luí, Yhang lé wó gaí
 tso gaí huq bê nghut ri.

16 Myinhâng mauchut lô jáng, nat
 gang wang júng nyi é bang myo myo
 lé, Yhâng chyáng shuí lé lo akô. Yhang
 gi, agè ashop é nat gâng pé lé dâng
 èq hkat htoq pyám mù, nõhpyo huí é
 17 bang banshoq lé lhoq gê byí ri. Haú
 gi,

“Yhang gi, nga-nhûng é noli
 nojàng lé yu pyám byi mù,
 nga-nhûng é noli nojàng
 lé, wùn waq pyám byi bê
 nghut ri.”^a

ga, myiqhtoi Esai-aq taí tô é dang lhoq
 dik râ matú nghut ri.

Yesuq Htâng Cháng Râ Bang

Luk 9:57-62

18 Yesuq gi, Yhâng é lhínghkyuq má
 byù moq mó zup míng nyi é lé myàng
 jáng, Yhâng é chángzô pé lé, nhông

hé hpoq shut gû dap ê sháng gâ ri.
 19 Haú hkûn, tarâ sará rayuq gi, lé lô mù,
 “Sará ê, ngò gi, Nàng hká e le hká
 cháng râ nghut lhê.” ga Yhang lé lé
 taí ri.

20 Haú jáng, Yesuq gi, “Wamhkuí pé
 gi, hkyûng wó akô; nghoq pé le,
 nghoqsut wó akô. Nghut kôlhang, haú
 Byu Yhangzo gi, u nghê jowò lháng a
 wó nghut ri.” ga lhom taí kat ri.

21 Haú hkûn, chángzo rayuq gi,
 “Yhumsîng ê, ngá wa lé lô yhùm
 pyám râ ahkáng hí byi shilaaq.” ga taí
 kat ri.

22 Nghut kôlhang, Yesuq gi, “Shí bê
 bang gi, shí bê bang yhangchang
 yhùm lhum kó sháng gaq, nàng gi,
 Ngá htâng cháng aq.” ga dum taú
 taí ri.

Laidun Lhoq Zím É Hkyô

Mrk 4:35-41; Luk 8:22-25

23 Hau htâng, Yesuq lhaí hkaú má
 wàng mù, Yhâng é chángzô pé
 le, Yhâng htâng châng wàng bekô
 24 nghut ri. Haú hkûn, nhông má
 byodan-htik laidun mó lò mù, wuì-
 lhêng pé gi, lhaí má bat ûm lò bê
 nghut ri. Nghut kôlhang, Yesuq gi,
 25 yhup myhí tô ri. Chángzô pé gi, Yhâng
 chyáng jé ê mù, Yhang lé nhaú pun
 luí, “Yhumsîng ê, hkyi yù laq ô!
 Nga-nhúng myup ló nyi ri.” ga taí akô.

26 Yhang gi, “Lumjínng myit shaú é
 bang ê! Haí mù, haú-í gyuq bum akô
 lhú?” ga taí kat ri. Hau htâng, Yhang
 gi, toq luí, laidun eq wuìlhêng pé lé
 tân kat jáng, banshoq zím byuq bê
 nghut ri.

27 Byù haú bang gi, maú hong byuq
 kômù, “Shí yuq gi, hkasú é byù lhà?
 Laí eq wuìlhêng pé lháng gi, Yhâng
 é dang lé gyo byí ri myhi-nhung!” ga

^a 8:17 Esai 53:4

luí, rayuq eq rayuq myí lhûm bum akô nghut ri.

**Nat Wang Júng Su Nhik Lé,
Lhoq Gê Byí É Hkyô**

Mrk 5:1-20; Luk 8:26-39

- ²⁸ Yesuq gi, Gadara byu pê é mau hpoq má jé dap ló jáng, nat gang wang júng é byù í yuq gi, lupdùng mai htoq lé lo kômù, Yhang lé lé huí akô. Haú nhik gi, haú hkyô mai ó lháng a wám lai loshoq wuí é su nhik nghut
- ²⁹ akô. Yhangnhik gi, Yesuq lé, “Garaí Yhangzo ê, Nàng, ngamoq eq haí sêng lhê lú? Ahkyíng a jé shimá, ngamoq lé zing-ri râ matú jé lé lo é nghut lhê lú?” ga taí garú akô.
- ³⁰ Haú mai a lúm wê é jowò má, waq rajùm mó gi, myí dú but zô nyi bum
- ³¹ akô nghut ri. Nat gâng pé gi, Yesuq lé, “Nàng, ngamoq lé hkat htoq râ nghut jáng, hê waq pê chyáng wàng nhâng laq.” ga dúng akô.
- ³² Yesuq gi, “Htoq ló keq!” ga taí kat ri. Haú mù, yhangmoq gi, htoq ló luí, waq pê chyáng wàng mù, waq haú jûm gi, gampyoq mai nhông hkaú shut din yán wang ló kôluí, wuí hkaú má myup shi byuq bekô nghut ri.
- ³³ Waq zúng bang gi, myuq hkaú shut hfang din wang ló kômù, dut lai lo é hkyô banshoq lé le, nat gang wang júng huí su nhik hkâsu dut é hkyô lé
- ³⁴ le, ló taí kyo akô nghut ri. Haú mù, rawa bang gi, Yesuq lé hui râ matú htoq lé lo bùm kômù, Yhang lé myàng jáng, yhangmoq é mau mai htoq ló byuq râ matú, chôm dúng tôngbán akô nghut ri.

Gungjum Shí Sû Lé Lhoq Gê Byí É Hkyô

Mrk 2:1-12; Luk 5:17-26

9 Yesuq gi, lhai má wàng mù, yhumsing é wà shut jî dap ló bê

- ² nghut ri. Byù ra-am gi, gùngjum shí sù rayuq lé, taphkang mai Yhâng chyáng waq lé lo akô. Yesuq gi, yhangmoq é lumjúng myit lé byu-myàng jáng, haú gùngjum shí sù lé, “Ngá zo ê, nhik hkâ-ngê; náng é yubak mara lé hkyut pyám byi bê.” ga taí ri.
- ³ Haú hkûn, tarâ sará pé ra-am gi, yhangmoq é i-myyit hkaú má, “Byù shí yuq gi, Garai Gasang lé rhoí dang taí nyi ri.” ga myit nyi bum akô nghut ri.
- ⁴ Yesuq gi, yhangmoq myit nyi é hkyô lé sé mù, “Nungmoq é i-myyit hkaú má, haú su agè ashop é dông haí mù
- ⁵ myit nyi akô lú? ‘Náng é yubak mara lé hkyut pyám byi bê.’ nghû taí râ eq ‘Toq luí, hkyô so aq.’ nghû taí râ má, hká hkun je taí lui lhê lú?”
- ⁶ Nghut kôlháng, haú Byu Yhangzo gi, mingkan htoq má, mara hkyut byi râ ahkáng wó Sû nghut é lé, nungmoq lé sé nhâng nau lhê.” ga taí luí, haú gùngjum shí sù lé, “Toq aq, náng é taphkang yu chûng luí, yhûm taú ló
- ⁷ aq hkoi.” ga taí kat ri. Haú mù, haú yuq gi, toq mù, yhûm shut ló byuq bê
- ⁸ nghut ri. Byù hpûng mó gi, haú hkyô lé myàng kôjáng, gyuq maú kômù, byu pé lé haú su é ahkáng ayá byi tô é Garai Gasang lé hkya-on kungton bum akô nghut ri.

Mahte lé shuí yu é hkyô

Mrk 2:13-17; Luk 5:27-32

- ⁹ Yesuq gi, haú jowò mai sô e ló é hkûn, kang guq zúm má zung tô é Mahte ga sù lé myàng mù, “Ngá htâng cháng aq.” ga taí jáng, haú yuq gi, toq luí, Yhâng htâng cháng bê nghut ri.
- ¹⁰ Yesuq gi, Mahte é yhûm má myin-zang zô nyi é hkûn, kang guq bang myo myo eq yubak dap bang myo myo lé jé kômù, Yhang eq Yhâng é chángzô pé eq rahá zo shuq bum akô.

- ¹¹ Haû lé, Hparishe pé myàng kôjáng, Yhâng é chángzô pé lé, “Nungmoq é sará gi, haî mù luî, kang guq bang eq yubak dap bang eq rahá zo shuq nyi lhê lhú?” ga myî akô.
- ¹² Yesuq gi, haû su ga kô é lé wó gyo jáng, “Wángzán bang gi, chi sará a ra kó; nõhpyo hui bang za sheq ru rã lhê.
- ¹³ ‘Ngò ô nau é gi, hkungga nhông hkyô a nghut, shogyo nhikmyin hkyô sheq ru nghut lhê.’^a gâ é lichyúm lé mhoy yû keq. Hkâsu mù gâ le, Ngò gi, dingmán bang lé wut yù rã matú jé lé é a nghut, yubak dap bang lé ji yù rã matú sheq jé lé é ru nghut lhê.” ga tũ taî kat ri.

Zoshuq Gám É Eq Sêng É Hkyô

Mrk 2:18-22; Luk 5:33-39

- ¹⁴ Hau htâng, Wui-myhup Sará Yohan é chángzô pé gi, Yesuq chyáng jé lé kômù, “Ngamoq eq Hparishe pé gi, zoshuq gám gám kut lhê; nghut kôle, Náng é chángzô pé gi, haî mù a gám kô é lhú?” ga luí, lé myî akô.
- ¹⁵ Haû mù, Yesuq tũ taî é gi, “Bíng pé gi, lusik eq rahá nghut nyi to ashí hkûn, hkâsu ge yón kó rã lhú? Lusik lé, yhangmoq chyáng mai shuí yu pyâm é hkyíng jé rã nghut lhê; haû hkûn kúm gi, yhangmoq zoshuq gám kó rã nghut lhê.
- ¹⁶ Ó yuq le, mebu xau má pán sik èq a lhaq hpo wú kó; hkâsu mù gâ le, pán sik kun byuq jáng, mebu xau le je
- ¹⁷ lhoq cheq pyám rã nghut lhê. Tsibiyiq wing asik lé le, shokuq htûng axau má ó a kat wú kó. Kat é nghut jáng, tsibiyiq wing asik soq htân luí, htûng buq goq byuq mù, tsibiyiq wing le yui shun byuq, htûng le htên byuq, dut rã nghut lhê. Haû mù, tsibiyiq wing

asik lé, shokuq htûng sik má kat jáng sheq, haû í jûng é a hten rã nghut lhê.” gâ ri.

Shí Bê Myiwe Zo Eq No É Myiwe Myhí

Mrk 5:21-43; Luk 8:40-56

- ¹⁸ Yesuq haû su ga taî nyi é hkûn, suwún rayuq jé lé lô mù, Yhâng é hí má hkyihput htûq luí, “Ngá zo byizo gi, ahkuí za shi byuq bê. Nghut kôlháng, Nàng lé mù, yhâng é ahtoq má loq lé ke byi laq, haû jáng, yhang, asak dum dui lò rã nghut lhê.” ga taî ri. Yesuq gi, toq mù, Yhâng é chángzô pé eq rahá, haû yuq htâng châng e ló akô.
- ²⁰ Haû hkûn, raxe í zân yhang, suí yui nyi é myiwe myhí rayuq gi, Yhâng é nunghtáng má huí lé mù, Yhâng é
- ²¹ bushi htâng má ê záng kat ri. Myiwe myhí haû gi, yhang gûng yhang, “Ngò, Yhâng é buhtâng má ê wó záng jáng gi, ge byuq rã nghut lhê.” ga, wó myit é yanmai nghut ri.
- ²² Yesuq gi, lhing wú kat luí, yhang lé myàng jáng, “Ngá zo ê, nhik hkâ-ngê, náng é lumjíng myit gi, nang lé lhoq gê byi bê nghut ri.” ga taî ri. Haû hkûn jáng yhang, myiwe myhí haû gi, ge byuq bê nghut ri.
- ²³ Yesuq gi, suwún hpô é yhûm má jé wang ló é hkûn, sampyí mut bang eq garu garín dut nyi é bang lé, ê myâng mù, yhangmoq lé, “Hui keq. Myiwe zo gi, shi byuq é a nghut, yhup myhí tô é sheq ru nghut lhê.” ga taî jáng, yhangmoq gi, Yhang lé wuizui kut pyám byí akô. Yesuq gi, byù hpûng lé, shinggan shut htoq ló nhâng mù, Yhang wang ê luí, myiwe zo haû lé loq èq zuí kat jáng, myiwe zo haû gi, dum dui toq
- ²⁶ lo ri. Haû hkyô é danglù gi, ramau gón yhang jam ló byuq bê nghut ri.

^a 9:13 Hos 6:6

**Myoqjit Í Yuq Eq Nhut Jit Sû
Rayuq Lé, Lhoq Gê Byî É Hkyô**

²⁷ Yesuq gi, haú jowò mai xoq e ló nyi le, Yhâng é htâng má, myoqjit í yuq gi, châng ðin uchyang, “Dawiq é Yhangzo ê, ngá-nhik lé shogyô yù laq ô!” ga wut taí akô.

²⁸ Yesuq gi, yhúmhkaú má jé wang ló é hkûn, myoqjit su nhik châng wang lò kômù, haú nhik lé, “Ngò wó kut byî é lé, nungnhik lumjínng akô luq?” ga myî ri.

Haú hkûn, yhangnhik gi, “Lumjínng lhê ô, Yhumsíng ê.” ga tú taí akô.

²⁹ Hau htâng, Yhang gi, haú nhik é myoqjí má ê záng htung luí, “Nungnhik lumjínng é eq rajung za dut sháng

³⁰ gaq.” ga taí ri. Haú mù, yhangnhik gi, myoq wó myàng bekô nghut ri. Yesuq gi, “Shí hkyô, ó lé le hkâsé nhâng kó.” ga, yhangnhik lé htân htân si-
³¹ diq byî ri. Nghut kôlháng, yhangnhik gi, haú hkyô lé, haú mau ramau gón yhang taí pyo ló bekô nghut ri.

³² Haú nhik htoq ló nyi kô é hkûn, nat gang wang júng luí, dang a wó nyô sù rayuq lé, Yesuq chyáng shuí lé lo
³³ akô. Nat gang lé hkat htoq pyâm é hkûn, nhutjit sù haú gi, dang wó nyô bê nghut ri. Byù hpúng mó gi, haú lé wú maú byuq kômù, “Shí su dut é hkyô lé, Israelaq amyû má radàm lháng a myang wú.” ga taí bum akô.

³⁴ Nghut kôlháng, Hparishe pé kúm gi, “Nat gâng pê é zaú é wum-o a-tsam èq za, nat gâng pé lé hkat htoq pyâm é nghut ri.” ga taí bum akô nghut ri.

Mû Zui Byù Shaú Ri

³⁵ Yesuq gi, myuq pé eq wà pé ban-shoq má wàng luí, haú pé mâ é tara-

jong pé má mhoqshit é eq, mauhkûng mingdán hkyô eq sêng é gabú danglù lé hko kyo uchyang, nõhpyo ajung jung eq nolì nojàng hui bang yuq
³⁶ hkangmó lé, lhoq gê byî wún ri. Yesuq gi, byù moq mó lé myàng jáng, wú shogyô nyi ri. Hkâsu mù gâ le, yhangmoq gi, sau zúng sù a nyi é sau pé su, awui ahke dut é eq byo myín
³⁷ bûm kô é yanmai nghut ri. Haú mù, Yhang gi, Yhâng é chángzô pé lé, “Kyôshû yù râ myo shoq joq kôlháng,
³⁸ mû zui râ byù gi, shaú nyi ri. Haú mù, haú kyô Yhumsíng lé, Yhâng é kyô yô má, kyô shu byù myo myo nhâng byi râ matú, dung keq.” ga taí ri.

Raxe Í Yuq Lé Nhang Htoq Kat É Hkyô

Mrk 3:13-19, 6:7-13, 9:41, 13:9-13;

Luk 6:12-16, 9:1-6, 12:2-9,

51-53, 14:26-27, 21:12-17

10 Yesuq gi, Yhâng é chángzo raxe í yuq lé wut yù mù, agè ashop é nat pé lé wó hkat htoq râ eq, nolì nojàng eq nõhpyo ajung jung lé wó lhoq gê râ ahko ahkáng yhangmoq lé byî ri.

² Haú lagyo raxe í yuq é myìng gi, (Petruq ga sù) Simun eq yhanggu Andre; Zebedi é yhangzô nhiktang Ya-
³ kuq eq yhanggu Yohan; Hpìlip eq Barhtolume; Htomaq eq kang guq sù Mahte; Alhpe é yhangzo Yakuq,
⁴ Htade, Zelutuq^a dut é Simun eq, Yesuq lé ap pyám râ sù, Yudaq Iskarut pé nghut akô.

⁵ Yesuq gi, haú bang raxe í yuq lé dangsâng mù, nhang htoq kat ri. Yhang sang kat é dang gi, “Tûngbaù pê chyáng le hkâ-ê kó; Samariq wà

^a **10:4** Zelutuq gâ é lichyúm gi, yhumsíng zui saí é hkyô má gyai yhang myit lòm shirong é sù lé ga lhê. Haú u lé, Israelaq byu pé gi, mingdán luthkyô wó râ matú shikut nyi é hpúng bang lé, Zelutuq gâ lhê.

- ⁶ rawà má le hkâwâng kó. Haû byuq byuq é sau pé su nghut nyi é Isra-
⁷ elaq byu pê chyáng sheq ê keq. Nung-
 moq gi, ê mù, 'Mauhkûng mingdán gi,
 chyâng lò bê nghut ri.' nghu é danglù
⁸ lé hko kyo keq. Nò bang lé lhoq gê
 byi, shí bê bang lé lhoq dui toq, mang-
 gâm dap bang lé lhoq san lhoq yúng
 byi, nat gâng pé lé hkat htoq pyám,
 kut keq. Láí láí wó é lé, láí láí byi keq.
⁹ Nungmoq é hpyihit má, hîng, ngùn eq
¹⁰ gyi pé hkâkat chûng kó; hkyowui é
 matú, etap, mebu htaí, hkyî-tsung eq
 dumbáng pé hkâyü chûng kó; hkâsu
 mù gà le, mù zui sù gi, zoshuq wó gíng
 lhê.
¹¹ Hká wâ hká dum má jé wang ló le le,
 haú mâ é gingdán é byù lé hô mù, haú
 mai htoq ló é hkûn jé shoq, haú yuq é
¹² yhûm má za nyi nyi keq. Haú yhûm
 má wang é hkûn, shichyên yù keq.
¹³ Haú yhûm gi, gingdán é nghut jáng,
 nungmoq shimân byî é hkyô, yhang-
 moq chyáng joq nyi sháng gaq; a ging-
 dán é nghut jáng, nungmoq chyáng
¹⁴ dum taû lò sháng gaq. Nungmoq lé a
 lhom hap yu é eq nungmoq é dang
 lé a lhom gyo byi kô é nghut jáng,
 haú yhûm haú wâ mai htoq ló é hkûn,
 nungmoq é hkyiwa má dap é hpuilhaú
¹⁵ lé ko hkyô pyâm to keq. Ngò, nung-
 moq lé teng za taí kôlé, tarâ jéyáng
 é buinyi má, haú wâ gi, Sodom eq
 Gomoraq myuq htoq má je hpuzo râ
¹⁶ nghut lhê. Wamhkuï hpúng má nhang
 hâng kat é sau pé lé su, Ngò, nungmoq
 lé nhang kat é nghut lhê. Haú mù,
 lhangmuï su hpaqchyî bò luí, hpûng-
 kyui su nú-nhâm nyi keq.
¹⁷ Byu pé lé sidiq keq; hkâsu mù gà
 le, yhangmoq gi, nungmoq lé, tarâ
 rûng pé má ê ap pyám kó râ nghut

- é htoq agó, yhangmoq é tarajong pé
 má, nungmoq lé nhuq bat kó râ nghut
¹⁸ lhê. Nungmoq gi, Ngá é yanmai, mau-
 zau wuï eq hkohkam pê é hí má shuí
 jé é hui luí, yhangmoq é hí má le,
 tûngbaù pê é hí má le, saksé myang
¹⁹ hkám kó râ nghut lhê. Nghut kôlhang,
 nungmoq lé ap pyám kô é hkûn, nung-
 moq hkâsu taí râ eq haí taí râ lé,
 hkâ-myit chiq kó. Haú hkûn taí râ
 dang, nungmoq wó kó râ nghut lhê.
²⁰ Hkâsu mù gà le, haú gi, nungmoq é
 dang a nghut, nungmoq é Yhângwâ é
 Woi-nyí sheq, nungmoq dông taí râ ru
 nghut lhê.
²¹ Nhiktâng gi, nhiktâng yhangchang,
 îwa gi, yhangzo lé, shí shoq ap pyâm
 lhum kó râ nghut lhê; zo wuï gi,
 mó wuï lé gumlau toq mù, sat pyám
²² nhâng kó râ nghut lhê. Byù lung-
 lhang bang gi, Ngá é yanmai, nung-
 moq lé a nguï kut kó râ nghut lhê;
 nghut kôlhang, jihûm jé shoq wó
 hkam jân nyi é sù gi, hkyi yu é hui râ
²³ nghut lhê. Rawò má zing-ri é hui jáng,
 rawò shut hfang ê keq. Ngò, nung-
 moq lé teng za taí kôlé, Israelaq byu
 pê é myuq pé má, nungmoq a ban
 wang ngap shimá, haú Byu Yhangzo
 jé râ nghut lhê.
²⁴ Jongzo gi, sará htoq, dui-nhâng zo-
 shâng gi, yhumsing htoq, gyaú râ a
²⁵ nghut. Jongzo gi, yhâng é sará su,
 dui-nhâng zoshâng gi, yhâng é yhum-
 sîng su, wó dut jáng gé bê. Yhumsîng
 hpó lé lháng Bezebulaq^a ga kô le gi,
 Yhâng é yhumbyù wuï lé gi, je riyhang
 nghû kó râ a nghut lhú?
²⁶ Haú mù, yhangmoq lé hkâgyuq kó.
 A byông htoq loshoq wó zaú nghop tô
 é haí le a joq râ nghut lhê; a sé loshoq
 wó haq tô é le, haí a joq râ nghut lhê.

^a 10:25 Bezebulaq gà é gi, Tsadán é myíng rajà nghut lhê.

²⁷ Ngò, nungmoq lé mauchut hkaû má taí é hkyô lé, myoq myàng maubó má taí kyo keq; Ngò, nungmoq lé dangsoq soq kyo é hkyô lé, yhumhkûng htoq
²⁸ mai taí pyô keq. Gungdu lé za wó sat pyám mù, woi-nyí lé a wó sat bang lé, hkâgyuq kó. Woi-nyí lé le, gungdu lé le, ngaraî ming má wó lhoq htên
²⁹ é Sû lé sheq, gyuq nyi keq. Johkyáng í du lé, gyi htingchap rachap èq wó ûng pyâm lhê a nghut kó lú? Nghut kôlhang, haû radu lhang, nungmoq é Íwâ é myit èq a nghut jáng, myigùng
³⁰ má wó byit gyó rà a nghut. Nungmoq é ulhum mâ é xâm banshoq lé lhang,
³¹ nghap to gù nghut lhê. Haû mù, hkâgyuq kó; nungmoq gi, haû johkyáng myo myô htoq má lhang gù je bo é bang nghut lhê.
³² Byu pê hí má, Ngo lé lhom yín yu é sù ó yuq lé nghut kôle, mauhkûng htoq mâ é Ngá Wâ é hí má, Ngò lhom
³³ yín yû rà nghut lhê. Byu pê é hí má, Ngo le he-ngik pyâm é sù ó yuq lé nghut kôle, mauhkûng htoq mâ é Ngá Wâ é hí má, Ngò he-ngik pyám rà nghut lhê.
³⁴ Ngo lé, haû myidàm htoq má simsaq hkyô byi rà matú lé lo é sù su hkâ-ngâm kó. Ngò gi, simsaq hkyô byi rà matú lé lo é a nghut, sâm byi rà matú sheq lé lo é ru nghut lhê.^a
³⁵ Hkâsu mù gà le,
 ‘Yuzqo gi, yhangwa eq, byizo gi, yhangnu eq, dumó gi, yhangmhoí eq, byoq lhum kó rà nghut lhê.
³⁶ Yhumsing é yhumbyù wui gi, yhumsing é gyè taù dut rà nghut lhê.’^b
 gà tô é matú sheq, Ngò jé lé é ru nghut lhê.

³⁷ Ngo lé chyt é htoq yhumsing é înu îwa lé je chyt é sù ó yuq nghut kôle, Ngá é chángzo kut rà gingdán sù a nghut; Ngo lé chyt é htoq yhumsing é zo wui lé je chyt é sù ó yuq nghut kôle, Ngá é chángzo kut rà gingdán
³⁸ sù a nghut; Yhumsing é tapzîng lé a waq é za, Ngá htàng châng é sù ó yuq nghut kôle, Ngá é chángzo kut rà gingdán sù a nghut. Yhumsing é asak lé ha
³⁹ bûn é sù ó yuq nghut kôle, asak sum rà nghut lhê; Ngá é yanmai, yhumsing é asak sùm pyâm é sù ó yuq nghut kôle, asak wó rà nghut lhê.
⁴⁰ Nungmoq lé hap yù sù gi, Ngo lé hap yu é sù nghut bê; Ngo lé hap yù sù gi, haû Ngo lé nhang kat Sù lé hap
⁴¹ yu é sù nghut bê. Myiqhtoi rayuq lé, myiqhtoi dông lhom hap yu é sù ó yuq nghut kôle, myiqhtoi rayuq é chyunghuq lé wó yû rà nghut lhê; dingmán sù rayuq lé, dingmán sù dông lhom hap yu é sù ó yuq nghut kôle, dingmán sù rayuq é chyunghuq lé wó yû
⁴² rà nghut lhê. Shí, tiq bang mâ é rayuq yuq lé, Ngá é chángzo nghut é yanmai, uchyam ragóm byi huq é sù gi, Ngò, nungmoq lé teng za taí kôlé, yhang é chyunghuq lé hkyak myang hkam yù rà za nghut lhê.” gà ri.

Yesuq Eq Wui-myhup Sará Yohan

Luk 7:18-35

11 Yesuq gi, Yhang é chángzo raxe í yuq lé dang ban pying é htàng má, Galile mau mâ é wà pé má mhoqshit rà matú eq hko kyo rà matú, haû jowò mai htoq e ló bê nghut ri.
² Wui-myhup Sará Yohan gi, Hkrisduq kut nyi é hkyô lé, htóng
³ hkaû má wó gyo jáng, “Nàng gi, haû jé lé lô rà Sù nghut lhê lú?

^a 10:34 Yesuq gi, simsaq hkyô byi sù nghut lhê. Nghut kôlhang, Yhang é yanmai, byu pé mabyoq htoq rà nghut é hkyô lé sé mù, haû su ga taí é nghut lhê. ^b 10:36 Mihka 7:6

Haû a nghut jáng, ngamoq gi, gó-yuq lé láng ra shirâ lúhú?” ga, yhâng é chángzô pé lé myí nhang kat ri.

- ⁴ Yesuq tû taí é gi, “Nungmoq wó gyo wó myang é hkyô, Yohan lé ló taí kyo
- ⁵ keq; myoqjit bang, myoq wó myâng bekô; hkyí hten bang le, wó so bekô; manggâm dap bang le, lhoq gê byí é hui bekô; nojit bang le, wó gyo bekô; shí bê bang le, lhoq dui toq é hui bekô; myùng bâng é matú, gabú danglù hko
- ⁶ kyô nyi bê nghut lhê. Ngá é yanmai, Ngo lé lum shut é hkyô a bò sù gi, hkungso wó nyi ri.” ga taí ri.
- ⁷ Yohan é chángzô pé taú ló kô é u lé, Yohan eq séng luí, byù moq mó lé Yesuq taí é gi; “Nungmoq gi, haí lé hpuq wú râ matú, haú yoso shut e akô lúhú? Lài èq hik nhùn é jamgàm
- ⁸ lé wú râ matú nghut akô lúhú? Haû a nghut jáng, haí lé wú râ matú e akô lúhú? Nú-nhâm é mebu wut sù lé wú râ matú e akô lúhú? A nghut. Nú-nhâm é mebu wut bang gi, hkohkâm-wâng pé
- ⁹ má sheq rû nyi lhê. Haû nghut lé gi, haí lé wú râ matú ê kô é lúhú? Myiqhtoi rayuq lé lúhú? Haû kúm nghut ri; Ngò, nungmoq lé taí kôlé, Yohan gi, myiqhtoi htoq lháng gyaú sù nghut
- ¹⁰ lhê. Haú yuq é hkyô lé, Chyúmdang má kâ tô é gi,
 ‘Wú aq, Náng é hkyô lajang láng râ matú, Ngá é lagyo lé, Náng é hí má Ngò nhang kat rá nghut lhê.’^a
- ¹¹ gâ ri. Ngò, nungmoq lé teng za taí kôlé, myiwe wui mai hku kat é bang má, Wui-myhup Sará Yohan htoq je kô é rayuq lháng a htoq wú shi; nghut kôlháng, Garai Gasâng é mauhkúng mingdán má je tiq dik sù gi, Yohan
- ¹² htoq je kô lhê. Wui-myhup Sará Yohan é buinyi mai ahkuí jé shoq, mau-

hkúng mingdán gi, lú chyín wang nyi é hui mù, sarhé pé gi, haú lé

¹³ wó yû bekô nghut ri. Hkâsu mù gâ le, Yohan é ahkyíng jé shoq, haû myiqhtoi pé banshoq eq tarâ gi, haú hkyô eq séng luí, myiqhtoi htoí to

¹⁴ gù nghut lhê. Nungmoq hap yù nau é nghut jáng, Yohan gi, haú jé lé lô

¹⁵ râ ga sù Eliyaq nghut lhê.^b Gyô yù râ nohkyap dap sù gi, gyô yù sháng gaq.

- ¹⁶ Shí ipyat lhê é byu pé lé, Ngò, hai
- ¹⁷ eq taí kê wú râ lúhú? Yhangmoq gi,
 ‘Nungmoq é matú, ngamoq sampyí mut byi kôlháng, nungmoq gi, a gó kó; ngamoq, ngaú hkyangsâng kôlháng, nungmoq gi, a ngaú kó.’

ga luí, gài pé má zùng mù, góbang lé wut taí lhùm nyi é zoshâng wui

¹⁸ eq wuí akô. Hkâsu mù gâ le, Yohan gi, jé lé mù, a zo a shuq kut jáng le, yhangmoq gi, yhang lé, ‘Yhang gi, nat

¹⁹ gang dap sù nghut ri.’ ga taí akô. Haû Byu Yhangzo jé lé luí, zo mù shuq mù kut jáng le, ‘Shí yuq gi, zo myoq shuq myoq noq sù eq, kang guq bang eq yubak dap bâng é buinùm hpó nghut ri.’ ga dum taí akô. Nghut kôlháng, hpaqchyí byéng-yá gi, yhâng é muzó èq saksé tûn shit nyi ri.” gâ ri.

Myit A Lhing É Wà Mó Pê Hkyô

Luk 10:13-15

- ²⁰ Hau htàng, Yesuq gi, laklaí kum-lhá pé je myo kut shit bê nghut kôlháng, myit a lhing é myuq pé lé tân
- ²¹ é gi, “Kurazin wà mó ê! Nàng dingnyé wó ri! Bet-saida wà mó ê! Nàng dingnyé wó ri! Nungmoq chyáng lé kut shit é laklaí kumlhá pé lé, Turuq myuq eq Sidun myuq má kut shit é

^a 11:10 Mal 3:1 ^b 11:14 Mal 4:5

ru nghut le gi, yhangmoq, noq noq mai myit lhng mù, jimê tũ wut lhê, myiwap kyaq gyũn lhê kut bekô râ
²² nghut lhê. Ngò, nungmoq lé taí kôlé, tarâ jéyáng é buinyi má, nungmoq gi, Turuq myuq eq Sidun myuq htoq má
²³ je hpuzo kó râ nghut lhê. Dum mù, Kaperna-um wà nàng ê, nàng gi, mauhkũng jé shoq waq toq é hui râ lúh?
 A nghut, mosumhkung má sheq gyó râ nghut lhê. Náng chyáng kut shit é laklaí kumlhá lé, haũ Sodom wà má kut shit é ru nghut le gi, myuq haũ hkũ-nyí jé shoq joq nyí râ nghut
²⁴ lhê. Ngò, nungmoq lé taí kôlé, tarâ jéyáng é buinyi má, Sodom wà hpuzô é gi, náng htoq shau râ nghut lhê.”
 gâ ri.

Nú Nyí Bàng É Matú Bánno Jang

Luk 10:21-22

²⁵ Haũ u lé, Yesuq taí é gi, “Mauhkũng eq myigung é Yhumsing, Áwa ê, Nàng gi, haũ pé lé, hpaqchyí byéng-yá bò bang eq myit hpaqchyí sé bång é hí má nghop to lúí, zoshàng wuì lé tũn shit bê nghut é yanmai, Ngò,
²⁶ Nang lé hkya-on lhê ô. Nghut bê, Áwa ê, haũ gi, Nàng ô nau é hkyô nghut ri.
²⁷ Ngá Wa gi, lhunglhang lé Ngá é loq má ap byí to bê. Haũ Zo lé, Áwa mai lai lúí ó le a sé; Áwa lé le, haũ Zo eq haũ Zo mai sé nhàng râ matú hkyin yu é bang mai lai lúí ó a sé.
²⁸ Nú é eq wòlai wun é lhunglhang bang ê, Ngá chyáng lé keq; Ngò, nungmoq lé bánno nhàng râ nghut lhê.
²⁹ Ngò gi, myit nú-nhâm é eq myit lhoq nyhum é sú nghut é yanmai, Ngá é kandang lé waq keq; Ngá chyáng mai mhoq yũ keq; haũ hkũn, nungmoq é asak woi-nyí bánno kó râ nghut lhê.

³⁰ Haĩ mù gâ le, Ngá é kandang gi, waq lui é htoq agó, Ngá é wò le sòm lhê.”
 gâ ri.

Bánno Buinyi É Yhumsing

Mrk 2:23-28, 3:1-6; Luk 6:1-5, 6-11

12 Haũ yoq lhê é Bánno buinyi ra-nyí má, Yesuq gi, Yhàng é chángzô pé eq rahá yò hkaũ mai sò lai ló nyi ri. Yhàng é chángzô pé gi, zòmut é yanmai, kyôshi ratsuí lang-
² shap yũ mù, zô akô nghut ri. Hpari-she pé gi, haũ lé myàng kôjáng, “Wú aq! Náng é chángzô pé gi, Bánno buinyi má a ge kut jung lé kut nyi akô.”
 ga taí kat akô.
³ Haũ hkũn, Yesuq tũ taí é gi, “Dawiq lháng gi, yhàng htàng châng é bang eq rahá zòmut huí é hkũn hkâsu kut é hkyô lé, nungmoq a nghap wú kó lúh?
⁴ Dawiq gi, Garai Gasàng é yhúmhaũ má wang ê mù, hkyangjông pé mai lai lúí, ó le a ge zô é, kyàng tô é muk lé, yhang eq yhàng htàng châng é bang
⁵ yũ zo kô é a nghut kó lúh? Hau htoq agó, Bánno buinyi má, hkyangjông pé gi, noqkuq yhúmhaũ má Bánno buinyi é tarâ lé shut kôlhang mara a wó é lé, haũ tarâ laiká má nungmoq a
⁶ nghap wú kó lúh? Ngò, nungmoq lé taí kôlé, haũ noqkuq yhũm htoq je ko
⁷ sũ gi, shí má nghut nyi lhê. ‘Ngò ô nau é gi, hkungga nhông hkyô a nghut, shogyo nhikmyin hkyô sheq ru nghut lhê’^a gâ é lichyúm lé nungmoq sé kô é ru nghut le gi, mara a bò bang lé mara
⁸ hũn kó râ a nghut. Hkâsu mù gâ le, haũ Byu Yhangzo gi, haũ Bánno buinyi é Yhumsing nghut lhê.” gâ ri.
⁹ Hau htàng, Yhang gi, haũ jowò mai e ló mù, yhangmoq é tarajong má
¹⁰ wang e ló ri. Loq rahkyam ajum shi byuq é byũ rayuq le, haũ má nyi tô ri.

^a 12:7 Hos 6:6

Yhangmoq gi, Yesuq lé, “Bánno buinyi má, nõhpyo lhoq gê byi le, tarâ wang lhê lú?” ga myi é dông, Yhang lé mara hûn râ hkyô ho akô nghut ri.

11 Haú hkûn, Yesuq gi, “Nungmoq chyáng mâ é ó yuq wá, yhumsing é sau radu, Bánno buinyi má dong gyó

12 tô le, a xe htoq yu é nyi kó râ lú? Byù gi, saú htoq má hpauđap dik é nghut lhê! Haú mù, Bánno buinyi má ge é hkyô kut le, tarâ wang lhê.” ga yhangmoq lé tû taí ri.

13 Hau htâng, Yhang gi, haú loq jum shí sù lé, “Náng é loq nyhang kat aq.” ga taí kat jáng, haú yuq gi, loq nyhang kat jáng, loq haú gi, a no é loq su ge

14 byuq bê nghut ri. Hparishe pé kúm gi, htoq ló kômù, Yesuq lé hkâsu kut wó sat pyám râ hkyô lé, chôm hpyê lhúm bum akô nghut ri.

Garai Hkyin Tô É Dui-nhâng Zoshâng

15 Yesuq gi, haú hkyô lé sé jáng, haú jowò mai htoq ló bê nghut ri. Byù myo myo le, Yhâng htâng châng bùm kômù, Yhang gi, nõhpyo hui bang

16 banshoq lé lhoq gê byi lú, Yhang ó yuq nghut é hkyô lé, a taí byông htoq râ matú, yhangmoq lé taí hkûm tô ri.

17 Haú gi, myiqhtoi Esai-aq é nhut dông mai taí tô é dang lé lhoq dik râ matú nghut ri. Dang haú pé gi,

18 “Shí yuq gi, Ngò chyt, Ngò myit nguì lú, hkyin tô é Ngá é dui-nhâng zoshâng nghut lhê; Ngò gi, Ngá é Woi-nyí, Yhang lé kat byi râ nghut mù, Yhang gi, tarâ dingmán é hkyô lé byù myú banshoq pé má taí kyo râ nghut lhê.

19 Yhang gi, haí a hpuq tû é htoq agó, a garu râ nghut lhê;

Yhâng é htê lé, hkyô mó pé má wó gyo râ a nghut.

20 Yhang gi, tarâ dingmán é hkyô lhoq ung é hkûn jé shoq, nâng chap pyám bê jam gàm lé le, lhoq hkyui râ a nghut, myihkau za htoq nyi bê myi lé le, lhoq sat pyám râ a nghut.

21 Byù myú chângjup gi, Yhâng é myìng má myit myoqbyù kó râ nghut lhê.”^a

gâ ri.

Yesuq Eq Bezebulaq

Mrk 3:20-30; Luk 11:14-23, 12:10, 6:43-45

22 Hau htâng, agè ashop é nat gang wang júng lú, myoqjit nhutjit é byù rayuq lé, Yesuq chyáng shuí lé lô kô-jáng, Yesuq gi, haú yuq lé lhom lhoq gê byi ri; haú mù, haú yuq gi, dang le wó nyô, myoq le wó myâng dut bê

23 nghut ri. Byù hpûng mó gi, haú lé wú maú byuq kômù, “Shí yuq, Dawiq é Yhangzo za gi, nghut lhê laq?” ga taí bum akô.

24 Nghut kôlhâng, Hparishe pé gi, haú lé wó gyo kôjáng, “Shí yuq gi, nat gâng pê é zau Bezebulaq^b é wum-o a-tsam èq za nat gâng pé lé wó hkat htoq é nghut ri.” ga taí bum akô nghut ri.

25 Yhangmoq myit nyi é hkyô lé Yesuq sé mù, yhangmoq lé taí é gi, “Hká mingdán nghut kôle, ahkaú má byoq gâng lhúm nyi kô é nghut jáng, htên byoq byuq râ za nghut lhê; haú eq rajung za, myuq ralhúm nghut nghut, yhumhtu ralhúm nghut nghut, yhangchang byoq lhúm nyi kô é nghut jáng, haú gi, wó gîng nyi râ a nghut.

26 Tsadán gi, Tsadán lé hkat htoq pyám é nghut jáng, yhumsing gùng yhum-

^a 12:21 Esai 42:1-4 ^b 12:24 Bezebulaq gâ é gi, Tsadán é myìng rajà nghut lhê.

sing lhoq hpyoq nyi gù bê nghut ri. Haû su nghut jáng, yhang é mingdán

²⁷ gi, hkâsu kut wó gîng to râ lú? Haû mù luí, Ngò gi, Bezebulaq é wum-o a-tsam eq za nat gâng pé lé hkat htoq é nghut jáng, nungmoq é byu pé gi, ó yuq é wum-o a-tsam eq hkat htoq pyám kô é nghut lhê lú? Haû su nghut jáng, haû bang gi, nungmoq lé tarâ jéyang bang dut kó râ nghut lhê.

²⁸ Nghut kôlhang, Ngò gi, Garai Gasâng é Woi-nyí eq nat gâng pé lé hkat htoq pyâm é nghut jáng, Garai Gasâng é mingdán gi, nungmoq chyáng jé bê nghut ri.

²⁹ Ó yuq nghut kôle, wum-o bò sù lé hí tuí zing pyâm é a nghut le gi, yhang é yhûm má lú wâng mù, yhang é sutzè lé hkâsu wó lú yû râ lú? Haû yuq lé hí tuí zing pyám jáng sheq, yhang é sutzè lé wó lú yû râ nghut lhê.

³⁰ Ngá hkyam shut a dap sù gi, Ngo lé gyè kut sù nghut lhê; Ngò eq rahá a shûm tsing sù gi, lhoq pyo

³¹ pyâm é sù nghut nyi ri. Haû mù, Ngò, nungmoq lé taí kôlé, byu pé é yubak mara hkanmó eq Garai Gasang lé rhoí dang taí pyâm é lhung-lháng gi, mara hkyut byí é wó hui râ nghut lhê. Nghut kôlhang, haû Chyoiyúng Woi-nyí lé rhoí dang taí pyâm é gi, mara hkyut byí é hui râ

³² a nghut. Haû Byu Yhangzo lé dang dông shut é sù gi, mara hkyut byí é wó hui râ nghut lhê; nghut kôlhang, haû Chyoiyúng Woi-nyí lé dang taí shut é sù gi, shí ipyat má le, htang pyat má le, mara hkyut byí é hui râ a nghut.

³³ Ashi lé wú luí, agàm lé sé râ nghut é yanmai, agàm lé lhoq gê jáng, ashi le gè râ nghut lhê; agàm lé a lhoq gê

³⁴ jáng, ashi le gè râ a nghut; Duq htân lhangmuí amyû ê, nungmoq gi, agè

ashop é bang nghut to kôluí nhîng, dang gè hkâsu wó taí kó râ lú? Hkâsu mù gâ le, i-myt unghkaû má byîng mui tô é lé za, nhut mai taí htoq lo

³⁵ é nghut lhê. Ge é sù gi, yhumsing é i-myt unghkaû mâ é sutdò mai ge é zè pé lé lhoq htoq shit lhê. Agè ashop é sù gi, yhumsing é i-myt unghkaû mâ é agè ashop é sutdò mai, agè ashop é zè pé lé lhoq htoq shit lhê. Ngò, nungmoq lé taí kôlé, byû gi, yhumsîng taí kat é akyû a bo é dang pé é matú, tarâ jéyang é buinyi má taí sân kyo ra kó

³⁷ râ nghut lhê. Hkâsu mù gâ le, yhum-sîng mara lut râ le, ó le ó taí é dang pé mai; mara byí é hui râ le, ó le ó taí é dang pé mai, nghut râ nghut lhê.” gâ ri.

Limik Kumlhá Lé Dung Kô É Hkyô

Mrk 8:11-12; Luk 11:29-32, 11:24-26

³⁸ Hau htàng má, Hparishe pé eq tarâ sará pé ra-am gi, “Sará ê, ngamoq gi, Nàng, limik kumlhá kut shit râ lé myàng nau ri.” ga Yhang lé dúng akô.

³⁹ Haû mù, Yhang tû taí é gi, “Agè ashop é eq lhum a zuí é ipyat shí gi, limik kumlhá dung nyi ri myhi-nhung! Myiqhtoi Yonaq é kumlhá mai lai luí,

⁴⁰ gotú haí le tûn shit râ a nghut. Hkâsu mù gâ le, Yonaq gi, ngo mó é wam-dau hkaû má sum nyí sum myîn lúng é su, haû Byu Yhangzo le, myigùng káng má sum nyí sum myîn lúng râ

⁴¹ nghut lhê. Ninewe wà byû wuî gi, Yonaq mungdang hko kyô é hkûn myit lhîng kô é nghut mù, tarâ jéyang é buinyi má, ipyat shí mâ é bang eq rahá toq lò luí, ipyat shí mâ é bang lé mara hûn kó râ nghut lhê; haû Yonaq htoq ko sù gi, ahkuí shí má jé nyi

⁴² to bê. Maupyí mâ é hkohkâm myhí gi, maumyí ló htàng é mai lé lô mù, Sholumon é hpaqchyí dang lé, lé gyô

yù bê nghut mù, haù tarâ jéyáng é buinyì má, ipyat shí mâ é bang eq rahá toq lô luí, ipyat shí mâ é bang lé mara hún râ nghut lhê; haù Sholumon htoq ko sù gi, ahkuí shí má jé nyì to bê.

- ⁴³ Haù agè ashop é nat gi, byù rayuq chyáng mai htoq lô mù, kyuq huí é jowò pé má sô yông e lô luí, no râ jowò hkat ho wú le, a myang hô
- ⁴⁴ nghut ri. Haù hkûn, yhang gi, ‘Ngò nyi laí lo é yhûm má dum taù lô wú râ.’ ga taí ri. Yhang dum taù jé lô wú le, yhûm haù lé, ó le a sing yu hpyuq é htoq agó, san za rago dut to láng é
- ⁴⁵ lé lô myang ri. Haù jáng, yhang gi, dum taù ê mù, yhâng htoq je wuí é nat nyhit nat lé shuí lò luí, haù má lo wang nyi to bekô. Haù mù, haù yuq é nyì yap sâmlai gi, hí lhê htoq má je wuí lò bê nghut ri; agè ashop é ipyat shí le, haù eq rajung za dut râ nghut lhê.” gâ ri.

Yesuq É Yhângnu Eq Yhanggû Pé

Mrk 3:31-35; Luk 8:19-21

- ⁴⁶ Yesuq, shiwa byu pé lé dang rû nyo nyi ashí hkûn, yhângnu eq yhanggu pé gi, Yhang lé nyò naù kômù, shinggan má lé yap tô akô nghut ri. Haù mù, Yesuq lé, “Náng nu eq nunggu pé gi, Nang lé nyò naù mù, shinggan má láng yap bum akô.” ga taí kyô akô.
- ⁴⁸ Haù hkûn, Yhang gi, “Ô pé gi, Ngá nu eq Ngá gu pé nghut akô lhú?” ga tú
- ⁴⁹ taí kat ri. Hau htâng, Yhang gi, Yhâng é chángzô pé lé loq tun luí, “Wú keq, shí bang gi, Ngá nu eq Ngá é gumang
- ⁵⁰ wuì nghut bê. Hkâsu mù gâ le, mauhkûng htoq mâ é Ngá Wa ô nau é hkyô châng é sù ó yuq nghut kôle, Ngá gu Ngá mang, Ngá gu Ngá nhá, Ngá nu chyat nghut bê.” ga xox taí ri.

Kyôshi Sân É Dangtú

Mrk 4:1-20; Luk 8:4-15

- 13** Haù nyí má yhang, Yesuq gi, yhúmhmaù mai htoq lô mù,
- ² wuì nhông yàm má ê zung tô ri. Byù hpûng mó gi, Yhâng é lhîngkyuq má zup zîng lé bûm kô é yanmai, Yhang gi, lhaí hkaù má doq zùng tô ri. Shiwa byu pé kúm gi, gin-gau htoq má yap
- ³ tô bum akô. Hau htâng, Yhang gi, haù bang lé, dangtú pé dông myo myo taí é má, “Kyô hkyó sù rayuq gi, kyôshi
- ⁴ san râ ga htoq e lô ri. Yhang, kyôshi sân kat é hkûn, ra-am gi, hkyô má gyó ang mù, nghoq pê èq lé hte zô pyám ri.
- ⁵ Ra-am gi, myi-tse a htu é luqgok yò pé má gyó ang mù, myi-tse a htu é
- ⁶ yanmai, lui za yuq htoq lô kôle, amyit a wó chin hing é nghut mù, bui htoq lô jáng, lhap kyuq pyám bê nghut ri.
- ⁷ Dum ra-am gi, zugyóm hkaù má gyó ang luí, zubyap haù pé kô lò mù, wup
- ⁸ pyâm ri. Ra-am dum nghut jáng, myì-hpún bo é jang má gyó ang luí, ashi zuí lo é gi, sân kat é htoq rashô tú, hkyuq xê tú, sum xê tú, myô jat lo é
- ⁹ nghut ri. Gyô yù râ nohkyap dap sù gi, gyô yù sháng gaq.” ga le taí ri.
- ¹⁰ Haù hkûn, chángzô pé gi, Yhâng chyáng lé mù, “Nàng gi, haí mù, shí bang lé, dangtú dông taí lhê lhú?” ga myí akô.
- ¹¹ Haù jáng, Yhang tú taí é gi, “Mauhkûng mingdán eq sêng é sê gyo wuí é hkyô pé lé sê gyo râ ahko ahkáng, nungmoq lé byí to bê, nghut kôlhang, yhangmoq lé gi, a byi shí é nghut lhê.
- ¹² Wó to sù lé gi, yhang agùn agó wó râ matú, jat byi shirâ nghut lhê. A wó su chyáng mai kúm gi, yhang wó tô é lé lháng yu pyám byi shirâ nghut lhê.
- ¹³ Yhangmoq gi, wú to kôlhang, a myàng kó; gyô nyì kôlhang, a wó gyo, a sê gyo kó nghut é yanmai, yhangmoq lé

- Ngò dangtú dông táí râ é nghut lhê.
- ¹⁴ Haû gi,
 ‘Nungmoq gi, wó gyô tô nyì
 kôlhang, sê gyo kó râ a nghut;
 myang tô nyì kôlhang, wú sé kó
 râ a nghut.
- ¹⁵ Hkâsu mù gâ le, byù shí bang gi,
 myit nhikshi jit byuq bê;
 yhangmoq é nohkyap gi, a wó
 gyo kó,
 myoqjí le chûm byuq bekô
 nghut ri.
 Haû su a nghut le gi, yhangmoq,
 myoq myàng no gyo mù,
 i-myt bun bóng luí, lhíng lò
 kômù,
 Ngò, yhangmoq lé yâ gè byi berâ
 nghut lhê.’^a
 gâ é, Esai-aq é myiqhtoi dang lé lhoq
¹⁶ dik é nghut ri. Nghut kôlhang, nung-
 moq é myoq gi, wó myàng mù, nung-
 moq é nohkyap gi, wó gyô é yan-
 mai, nungmoq gi, hkungsô wó nyi ri.
¹⁷ Hkâsu mù gâ le, Ngò, nungmoq lé
 teng za táí kôlé, nungmoq wó myàng,
 wó gyô é pé lé, myiqhtoi pé eq ding-
 mán bang myo myo gi, myàng nàu
 gyo nàu kôlhang, a wó myàng, a wó
 gyo kó nghut ri.
¹⁸ Ahkuí, kyôshi san sù eq sêng é
 dangtú é lichyúm lé rago gyô wú keq;
¹⁹ Hkyô má gyó âng é kyôshi gi, mau-
 hkûng mingdán eq sêng é danglù lé
 wó gyo kôlhang, a sê gyô é yanmai,
 haû agè ashop sù lé lò mù, yhâng é
 i-myt hkaû má san kat tô é kyôshi lé,
 lé yu pyám byí é hui sù lé gá nau é
²⁰ nghut lhê. Luqgok yò pé má gyó âng
 é kyôshi gi, mungdang lé wó gyo jáng,
 radá dâm gabú myit èq hap yù kô-
²¹ lhang, amyit a wó chin é yanmai, ra-
 zup zo za yuq mù, mungdang é yan-
 mai, wuîhkê é eq zing-rí é hui kôjáng,

- hân hân htak ló byuq é sù lé gá nau
²² é nghut lhê. Zugyóm má gyó âng é
 kyôshi gi, haû mungdang lé wó gyô
 yù kôlhang, shí ipyat lhê é myit wui
 myit hke hkyô pé eq hkyô shuí ngoq
 jung ngùn hîng zèhkoq èq hup pyâm
 é yanmai, ashi a wó zuí é sù lé gá nau
²³ é nghut lhê. Nghut kôlhang, myìhpún
 bo é jang má gyó âng é kyôshi kúm gi,
 mungdang lé wó gyo mù, sê gyô yu é
 sù lé gá nau é nghut lhê. Haû yuq ashi
 zuí é gi, san kat é htoq rashô tú, hkyuq
 xê tú, sum xê tú, myô jat lo é nghut ri.

Myoqgàm Dangtú

- ²⁴ Yesuq, yhangmoq lé dangtú dông
 xoq taí kyô é gi, “Mauhkûng mingdán
 gi, ge é kyôshi lé, yò má san kat sù
²⁵ rayuq eq du ri. Byu pé yhup myhí tô
 bum é u lé, yhâng é gyé gi, lé jé mù,
 guq gàm gyoro má, myoqshi lé sân to
²⁶ hkó luí, taû ló byuq bê nghut ri. Guq
 gàm yuq lò mù, guq nhâm htoq lo é
 hkûn, myoqgàm le bo yuq htoq lo ri.
²⁷ Yhumsîng hpô é dui-nhâng zoshâng
 wui gi, yhâng chyáng lé jé mù, ‘Yhum-
 sîng ê, ge é kyôshi lé za yò má sân tô
 é a nghut lhu? Myoqgàm pé gi, hkâ-
²⁸ mai htoq lo é lhu?’ ga myi kôjáng, haû
 yhumsîng hpô gi, ‘Gumlau gye èq kut
 é nghut ri.’ ga tú taí ri.
 Haû jáng, dui-nhâng zoshâng wui
 gi, ‘Ngamoq, myoq haû pé lé ê nut
 pyám râ lé, nàng ô nau ri lhu?’ ga myí
 akô.
²⁹ Haû hkûn, yhang gi, ‘Hká nut pyám
 kó; hkâsu mù gâ le, nungmoq, myoq
 haû pé lé nut é hkûn, guq gàm pé lé
 le bo záng nut pyám kó râ nghut lhê.
³⁰ Kyôshu yoq jé shoq rahá yuq to kó
 sháng gaq; haû hkûn, myoqgàm pé lé
 hí hkyin tsîng yù mù, nyhê hkyô pyám
 râ matú hkyom dîng to luí, guq lé kúm

^a 13:15 Esai 6:9-10

gi, shû yù mù, ngá é chyî má tsing kat to râ matú, kyô shu bang lé ngò taí râ nghut lhê.' ga tû taí ri." gâ ri.

Angshi Cham Eq Múnchi Dangtú

Mrk 4:30-34; Luk 13:18-21

³¹ Hau htâng, Yesuq gi, yhangmoq lé gotú dangtú ralhum dum xoq taí é gi; "Mauhkûng mingdán gi, byù rayuq èq, yhâng hkyâm má hô tô é angshi ³² cham eq wuí ri. Angshi cham haú gi, kyômyui jí banshoq htoq má je tiq é nghut kôle, yuq kô lò jáng, hkyâm má hô é mhan-haq hpoqnoq gàm banshoq htoq má je kô é agàm dut lò mù, akoq pé má, maulat nghoq zô pé lé wó zung nô bum lhê." gâ ri.

³³ Yhang, gotú dangtú dum xoq taí é gi, "Mauhkûng mingdán gi, myiwe rayuq èq sungô mún sum bûng má yu nyhó luí, haú pé banshoq lé wó lhoq dau nhang é múnchi eq wuí ri." gâ ri.

³⁴ Yesuq gi, byù moq mó lé, haú pé banshoq dangtú dông mai chyat taí ri; yhangmoq lé, dangtú a bo é haí lhang

³⁵ a taí wú nghut ri. Haú gi,
"Ngá nhut lé hpóng mù, dangtú
dông mai taí râ;
mingkan lé sâng-hi hpan é mai
zaú tô é hkyô pé lé taí sân kyo
râ nghut lhê."^a

ga, myiqhtoi dông taí tô é dang lo dik é nghut ri.

Myoqgàm Dangtú Lé Taí Sân Kyô É Hkyô

³⁶ Hau htâng má, Yesuq gi, byù moq mó mai htoq ló mù, yhúmhkaú má wang ló ri. Haú hkûn, Yhâng é chángzô pé gi, Yhâng chyáng lé lò kômù, "Yò mâ é myoqgàm dangtú eq

sêng é hkyô lé taí sân kyo laq." ga taí akô.

³⁷ Haú jáng, Yhang tû taí é gi, "Ge é kyôshi san sù gi, haú Byu Yhangzo ³⁸ nghut ri. Yò gi, mingkan nghut ri; ge é kyôshi gi, mauhkûng mingdán é yhangzô pé nghut akô. Myoqgàm pé kúm gi, haú Tsadán é yhangzô ³⁹ pé nghut akô; haú lé châng hkat sân é gumlau gyè gi, nat Tsadán nghut ri. Kyôshu yoq gi, mingkan htûm é ahkyíng nghut ri; kyô shu bang gi, maumang lagyô pé nghut akô.

⁴⁰ Haú myoqgàm pé lé, nut yù mù, myi má nyhê pyâm é su, haú mingkan htûm é ahkyíng má dut râ nghut ⁴¹ lhê. Haú Byu Yhangzo gi, Yhâng é maumang lagyô pé lé nhâng râ nghut lhê; haú mù, haú bang gi, hkyô lhoq nghoq nhang é bang banshoq eq agè ashop hkyô kut é bang lunglhang lé, Yhâng é mingdán mai hkyin she htoq ⁴² yù mù, gyúng nyi é myibung hkyúng hkaú má dú kat pyám kó râ nghut lhê; hau má, ngaubyi ngàu nhap eq zui kyik kyik shoq hpuzô nyi kó râ ⁴³ nghut lhê. Haú hkûn, dingmán bang gi, yhangmoq Yhângwâ é mingdán má búi su duqbó nyi kó râ nghut lhê. Nohkyap dap sù gi, gyô yù sháng gaq.

Haq Tô É Sutzè Dangtú

⁴⁴ Mauhkûng mingdán gi, yò má haq tô é sutzè eq wuí ri. Sutzè haú lé myang é sù gi, haú lé saí haq to mù, gabú myit èq taú ló luí, yhang wó é banshoq lé ûng pyám mù, yò haú lé wui yu ri.

⁴⁵ Dum, mauhkûng mingdán gi, réng é palhé lé châng ho wún é hpugá hpó ⁴⁶ eq wuí ri. Yhang gi, gyai hpaú é palhé

^a 13:35 Hkya-on 78:2

lé myàng jáng, yhang wó é banshoq lé
ló ùng pyám mù, haú lé wui yu ri.

Gùn Lé Dangtú Yu É Hkyô

⁴⁷ Mauhkûng mingdán gi, nhông má,
ngožo ajà jà lé wó dú nghop yu é
⁴⁸ gùn eq le wuí ri. Gùn haú má ngožo
byíng jáng, ngo kóng bang gi, wui
yàm má she htoq yû mù, zung to
luí, ge é pé lé gi, ngo-pyap má guq
kat yû lui, a ge é pé lé gi, dú pyâm
⁴⁹ akô. Haú eq rajung za, mingkan htûm
é ahkyíng má le, maumang lagyô
pé gi, gyó lé lô mù, agè ashop é
bang lé, dingmán bâng chyáng mai
⁵⁰ gam htoq yû lui, ngaubyi ngaù nhap
eq zuì kyik kyik shoq hpuzô nyi râ
nghut é, gyúng nyi é myibung hkyûng
hkaú má dú kat pyám kó râ nghut
lhê.

⁵¹ Shí hkyô banshoq lé nungmoq sê
gyo bekô lú?” gâ ri.

Haú hkûn, yhangmoq gi, “Sê gyo
bê.” ga tû taí akô nghut ri.

⁵² Hau htâng, Yesuq gi, yhangmoq
lé, “Mauhkûng mingdán eq séng lui
mhoq yû bê é tarâ sará ó nghut kôle,
yhang mhoq é hkyô gi, yhumsing é
sut-púnglhung hkaú mai zè sik zè xau
lé yu htoq é yhumsing hpó rayuq eq
wuí ri.” ga dum taí ri.

Myiqhtoi, Myoqdong A Wó Dut É Jang

Mrk 6:1-6; Luk 4:16-30

⁵³ Yesuq gi, dangtú haú pé lé ban
taí jáng, haú jowò mai htoq e ló bê
⁵⁴ nghut ri. Yhang gi, Yhâng é yhummau
má jé ló jáng, byu pé lé, yhangmoq
é tarajong má mhoqshit ri; haú hkûn,
yhangmoq gi, gyô maú byuq kôluí,
“Byù shí yuq gi, hpaqchyí byéng-yá
shí eq hpungwup a-tsam mó shí pé
lé, hkâmai wó yu é nghut lhê lhà?”

⁵⁵ Yhang gi, laksíma hpô é yhangzo a

nghut lú? Yhângnû é myíng gi, Ma-
riq gâ lhê a nghut lú? Yhanggû
pé gi, Yakuq, Yosep, Simun eq Yu-
daq gâ é bang a nghut kó lú?

⁵⁶ Yhâng nhammó pé le, nga-nhung eq
rahá nghut nyi lhê a nghut kó lú?
Haú su nghut le nhîng, haú pé ban-
shoq lé, Yhang hkâmai wó yu é
nghut lhê lhà?” ga myí bùm kômù,
⁵⁷ Yesuq lé myit a ngón dut bùm bekô
nghut ri.

Yesuq kúm gi, yhangmoq lé, “Myiq-
htoi rayuq gi, yhumsing é yhummau
eq yhumsing é yhûm má za, myoq-
dong a lhaq wó wú é nghut lhê.” ga
tû taí kat ri.

⁵⁸ Yhangmoq lumjîng myit a bò kô é
yanmai, Yesuq gi, haú má, laklaí kum-
lhá myo myo a kut shit lo nghut ri.

Wui-myhup Sará Yohan

Shi Byuq É Hkyô

Mrk 6:14-29; Luk 9:7-9

14 Haú hkûn, mauzau Herut gi,
¹ Yesuq eq séng é ludang lé wó
² gyo jáng, yhâng a-ô mâ é bang lé,
“Shí yuq gi, Wui-myhup Sará Yohan
nghut ri-nhung; Yhang gi, shi é mai
dum dui toq lo é nghut mù, hpungwup
a-tsam haú pé lé wó kut é nghut ri.”
ga taí ri.

³ Herut haú su gâ é gi, yhanggu Hpi-
lip é yhangmyi Herudíaq é yanmai,
Yohan lé chyup tuí yû mù, htóng hkyô
⁴ pyâm é yanmai nghut ri. Hkâsu mù gâ
le, Yohan gi, yhang lé, “Nàng, myiwe
haú lé hâng yu é gi, tarâ a wang
é nghut lhê.” ga taí byí nyi é yan-
⁵ mai nghut ri. Herut gi, Yohan lé sat
pyám naú kôlhang, mingbyû wui lé
gyuq é yanmai, a wám sat nghut ri;
haí mù gâ le, yhangmoq gi, Yohan
lé myiqhtoi tsuq nyí kô é yanmai
nghut ri.

6 Nghut kôlhang, Herut é hkû ladu hkyúm buinyì má, Herudiaq é yhangzo byizo gi, yhangmoq é hí má gó shit é lé, Herut gi, gyai yhang wú
 7 myit nguì mù, byizo haú lé, yhang haí dung le haí byi râ ga dakam é dang-
 8 gidiq byí ri. Byizo haú gi, yhangnu hpaqchyí byí é lé gyô yù mù, “Shí, bó má, Wui-myhup Sará Yohan é ulhum lé, kat byi laq.” ga, He-
 9 rut lé dúng ri. Mauzau hpó gi, myit a ngón dut byuq kôlhang, yhang dakam tô é danggidiq é yanmai le, bíng pè é myoqdong lé tê nau é yanmai le, yhang dúng é lé, byi râ
 10 matú, htóng hkaú má lúng tô é Yohan é ulhum lé hpyit râ hkunmó hkyô
 11 kat bê nghut ri. Yohan é ulhum lé bó má kat luí, myiwe zo haú lé byi jáng, myiwe zo haú gi, haú lé yhangnú
 12 chyáng yu ló byí ri. Haú mù, Yohan é chángzô pé gi, yhang é mâng lé lé yú luí, myhup pyám bekô nghut ri. Hau htâng, yhangmoq gi, Yesuq lé ló taí kyô akô nghut ri.

Byù Ngo Hkyíng Lé Byi Tsô É Hkyô

Mrk 6:30-44; Luk 9:10-17; Yhn 6:1-14

13 Yesuq gi, haú hkyô lé wó gyo jáng, haú mai lhaí ji mù, tsím tsâm é jowò shut Yhang baú e ló ri. Haú lé, byu pé wó gyô bùm kôjáng, wà mó pé mai htoq lé lô kômù, hkyí hkyô Yhang
 14 htâng châng e ló akô nghut ri. Yesuq gi, lhaí mai gyó dap ló é hkûn, byù moq mó nyi to láng é lé myàng jáng, yhangmoq lé wú shogyo luí, nò bang lé lhoq gê byí ri.
 15 Myinhâng jé lô jáng, haú chángzô pé gi, Yhang chyáng lé kômù, “Shí má gi, tsím tsâm é jowò nghut é htoq agó, buì le gym ló bê nghut mù, shiwa byu pé gi, wà pé shut ló luí, yhangmoq

é matú zôjung ló wó wuì kó sháng gaq, yhangmoq lé nhang kat aq hkoi.” ga taí akô.

16 Haú hkûn, Yesuq gi, “Yhangmoq ló a ra. Nungmoq, yhangmoq lé rajung jung byi tso keq.” ga tú taí kat ri.
 17 Haú su ga jáng, yhangmoq gi, “Muk ngo long eq ngozo í du za ru wó lhê.” ga dum tú taí akô.
 18 Haú jáng, Yesuq gi, “Yu lò keq.” ga
 19 tú taí mù, shiwa byu pé lé, wàhu yò má zùng nhang ri. Hau htâng, Yhang gi, haú muk ngo long eq ngozo í du lé yù mù, mauhkûng shut tu wú to luí, jeju ban hkya-on jáng, muk lé hpê gàm mù, chángzô pé lé byí ri. Haú chángzô pé gi, shiwa byu pé lé gàm
 20 byí akô nghut ri. Yhangmoq banshoq bang zô gyí bùm kô é htâng má, haú chángzô pé gi, zô myhit tô é pé lé, raxe í mung byíng shoq wó guq tsíng yu
 21 ashí kô nghut ri. Haú má zô é bang gi, myiwe wuì eq zoshâng wuì lé a nghap lhôm é za, yuqgè baú ngo hkyíng kô bo ri.

Yesuq, Wui Htoq Má Sô É Hkyô

Mrk 6:45-56; Yhn 6:15-21

22 Yesuq gi, haú shiwa byu pé lé byo ló nhang nyi é hkûn jáng, chángzô pé lé lhaí má wang ji nhâng mù, tú tap shut dap ló lángh nhâng ri.
 23 Shiwa byu pé lé nhang pyâm é htâng má, Yhang gi, kyúdung râ ga, Yhang baú bùm shut doq e ló ri. Myinhâng chutshúm zó jé shoq, Yhang baú haú
 24 má nyi nyi ri. Haú u lé, lhaí gi, gin-gau mai tsómra wê é jowò má jé é hkûn, laí tau mut é yanmai, wuìlheng èq gyai yhang lo bat nhûn é hui zô ri.
 25 Htang napsûn maubó zó sum hkyíng eq hkyuq hkyíng gyoro má, Yesuq gi, nhông htoq má so mù,

- ²⁶ yhangmoq chyáng lé lo ri. Haú mù, chángzô pé gi, Yesuq nhông htoq má sô nyi é lé myàng kô-jáng, gyuq dân kômù, “Sobyô ô!” ga gyuq nán é èq taí garû akô nghut ri.
- ²⁷ Haú jáng yhang, Yesuq gi, yhangmoq lé, “Hkâgyuq kó! Ngò ru nghut lhê; myit wum lhoq kóng keq.” ga nyo kat ri.
- ²⁸ Haú hkûn, Petruq gi, “Yhumsîng ê, Nàng yhang ru nghut le gi, ngo lé, wui htoq mai sô lé lô nhâng laq.” ga taí kat ri.
- ²⁹ Haú jáng, Yesuq gi, “Lé lô aq.” ga tû taí kat ri.
Haú mù, Petruq gi, lhaí mai gyó mù, wui htoq mai Yesuq chyáng sô e
- ³⁰ ló ri. Nghut kôlhang, yhang gi, laidun htan é lé myang kat jáng, wú gyuq luí, wui má nop ló nyí mù, “Yhumsîng ê, ngo lé hkyi yù laq.” ga wut garû kat ri.
- ³¹ Yesuq gi, radá dâm yhâng é loq lhâm kat luí, Petruq lé lêng zing to mù, “Lumjîng myit shau sô ê, nàng haí mù úng-âng lhê lú?” ga taí ri.
- ³² Yhangnhik, lhaí má wàng kôjáng,
- ³³ laidun le zîm byuq bê nghut ri. Hau htâng, haú lhaí má lúng tô é bang gi, Yhang lé paí gop mù, “Nàng gi, gè gè yhang, Garai Gasâng é Yhangzo nghut bê.” ga taí akô nghut ri.
- ³⁴ Yhangmoq gi, gû dap ló kômù, Genesarat mau má jé wang ló bekô
- ³⁵ nghut ri. Haú mau mâ é bang gi, Yesuq lé wú sé kôjáng, awui ayàm mâ é bang banshoq lé kyô kat akô. Haú mù, byu pé gi, nòhpyo hui bang
- ³⁶ lhunglhang lé, shuí lé lô kômù, nòhpyo hui bang lé, Yhâng é bushi htâng má za lhang záng nhâng rã matú dúng tóngbán akô; Yhang lé záng é lhung-

lhang bang gi, lhoq gê byí é huí bekô nghut ri.

Sansêng É Hkyô Eq A Sansêng É Hkyô

Mrk 7:1-23

- 15** Hau htâng má, Hparishe pé eq tarâ sará pé ra-am gi, Yerusalem và mó mai Yesuq chyáng jé lé
- ² lô kômù, “Náng é chángzô pé gi, haí mù luí, íchyi íwa pè é htunglí lé a cháng kut akô lú? Yhangmoq gi, loq hí a chí é zang zô akô nghut ri.” ga, lé taí akô.
- ³ Haú jáng, Yesuq tû taí é gi, “Nungmoq gi, haí mù, nungmoq é htunglí é yanmai, Garai Gasâng é hkunmó
- ⁴ lé a cháng kô é lú? Hkâsu mù gà le, Garai Gasang gi, ‘Nungmoq é ínu íwa lé, hkungga keq.’^a ga le, ‘Ínu íwa lé, nhîng é sô ó yuq nghut kôle, sat pyâm é hui rã lhê.’^b ga le, taí tô é
- ⁵ nghut lhê. Nghut kôlhang, nungmoq taí é gi, ‘byù rayuq yuq, yhumsîng é yhângnu yhângwa lé byi âng é zè lé, Garai Gasang lé byi rã chyunghuq
- ⁶ nghut lhê ga taí é nghut jáng, haú yuq gi, yhângwa lé hkungga nó a ra.’ gà akô nghut ri. Haú dông mai, nungmoq gi, nungmoq é htunglí é yanmai, Garai Gasâng é mungdang lé he-ngik
- ⁷ pyâm akô nghut ri. Gegùn labyoq kut bang ê! Nungmoq eq séng luí, myiqhtoi Esai-aq htoí tô é dang gi, têng ri.
- ⁸ Myiqhtoi dang haú gi,
‘Byù shí bang gi, nhut htoq mai
za Ngo lé hkunggâ akô;
yhangmoq é myit nhiklhum gi,
Ngò eq wê gâng nyi akô.
- ⁹ Yhangmoq, Ngo lé noqkuq nyi kô é gi, akôm má za nghut nyi ri; hkâsu mù gà le, yhangmoq é mhoqshit hkyô pé gi, byù dông

^a 15:4 Htoq Ló 20:12 ^b 15:4 Htoq Ló 21:17

- mai mhoqshit é hkyô pé za
nghut nyi ri.’^a
gâ é nghut lhê.” gâ ri.
- ¹⁰ Hau htâng, Yesuq gi, shiwa byu pé
lé, Yhâng chyáng wut yù luí, “Gyô yù
¹¹ mù, sé lo keq. Nhut má wang lo é hái
jung le, byù lé a sanséng dut nhang é
a nghut, nhut mai htoq lo é pé sheq,
byù lé a sanséng dut nhang é ru nghut
lhê.” ga tái ri.
- ¹² Haú hkûn, haú chángzô pé gi,
Yhâng chyáng lé lô kôluí, “Hparishe
pé gi, shí hkyô lé wó gyo mù, nhik-yô
nyi bùm kô é lé, Nàng sê lhê lú?” ga
myi kôjáng,
- ¹³ Yhang gi, “Mauhkûng htoq tsáng
myhâng mâ é Ngá Wa a hô tô é agàm
hkanmó gi, apûn eq roq nut pyâm
¹⁴ é hui râ nghut lhê. Yhangmoq é yan-
mai, myit hkâ-myo kó; yhangmoq gi,
myoqjit bang nghut kôle, myoqjit é
bang lé hkyô-u she é bang nghut akô.
Myoqjit yhangchang hkyô-u she lhûm
é nghut le gi, í yuq é yhang dong-
hkonng má byit gyó kó râ za nghut
lhê.” ga tû tái ri.
- ¹⁵ Haú hkûn, Petruq gi, “Ngamoq lé,
dangtú hau é lichyúm tái sân kyo
¹⁶ laq.” ga tái jáng, Yesuq gi, “Nung-
moq, ahkuí le haú-í yhang go nyi
¹⁷ ashi kô luq? Nhut má wang lo é hái
jung le, wamdau hkaú má jé wang
ló mù, gungdu mai dum htoq ló é
¹⁸ nghut lhê. Nghut kôlhang, nhut mai
htoq lo é gi, myit nhiklhum mai htoq
lo é nghut mù, byù lé a sanséng dut
¹⁹ nhang ri. Hkâsu mù gâ le, myit nhik-
lhum mai htoq lo é gi, agè ashop
é dông myit é hkyô pé, byù sat é
hkyô, su-myi sulàng lú hkyô, ashop
é dông gungsho zùm yap é hkyô,
hkaú é hkyô, a tengmán é saksé hkâm
é hkyô, lumù gansang é hkyô pé

- ²⁰ nghut ri. Haú pé gi, byù lé a sanséng
dut nhang é hkyô pé nghut ri; loq a
chí e za zo shuq é gi, byù lé a san-
séng a dut nhang é nghut lhê.” ga
tái ri.

**Hkanan Myiwe Myhí
Rayuq É Lumjínng Myit**

Mrk 7:24-30

- ²¹ Hau htâng, Yesuq gi, haú mai Tu-
ruq eq Sidun mau shut htoq e ló bê
²² nghut ri. Haú hkûn, haú mau má nyi é
Hkanan myiwe myhí rayuq gi, Yhâng
chyáng lé jé mù, “Dawiq é Yhangzo,
Yhumsîng ê, ngo lé shogyô yù laq
ô! Ngá byizo gi, nat gang wang júng
mù, gyai yhang nò gyín nyi ri.” ga tái
garú ri.
- ²³ Nghut kôlhang, Yesuq gi, dang ra-
hkun le a tû tái nghut ri. Haú mù,
Yhâng é chángzô pé gi, Yhâng chyáng
lé jé kômù, “Myiwe myhí haú lé ló
nhang pyám aq; haí mù gâ le, yhang
gi, nga-nhûng é htâng má châng garú
nyi ri.” ga tái akô.
- ²⁴ Yesuq gi, “Byuq byuq é sau pé su
nghut nyi é Israelaq byu pè chyáng
sheq, Ngo lé nhang kat é ru nghut
lhê.” ga tái ri.
- ²⁵ Haú hkûn, myiwe myhí haú gi,
Yhâng é hí má lé mù hkyihput htuq
luí, “Yhumsîng ê, ngo lé garúm yù laq
ô!” ga tái ri.
- ²⁶ Yesuq gi, “Zô wui chyáng mâ é
zoshuq lé yù mù, hkuí pé lé byi
tsô é jung a nghut.” ga tû tái jáng,
²⁷ myiwe myhí haú gi, “Yhumsîng ê, haú
kúm nghut ri; nghut kôlhang, hkuí pé
lhang, yhumsîng hpô é zohpoq mai
gyó é zang cham zang htâng lé, zô akô
mhaí.” ga dum tái ri.
- ²⁸ Haú mù, Yesuq gi, “Myiwe zo ê,
náng é lumjínng myit gi, kô nyi ri!

^a 15:9 Esai 29:13

Nàng dúng é hkyô lé gyo byi bê nghut lhê.” ga tâi ri. Haú hkûn jáng, myiwe myhí hau é byizo le ge byuq bê nghut ri.

Byù Myi Hkyîng Lé Byi Tsô É Hkyô

Mrk 8:1-10

- ²⁹ Yesuq gi, haú mai htoq ló luí, Galile nhông yàm má ê jé mù, bùm shut doq
- ³⁰ ló luí, ló zung nyi ri. Haú hkûn, byù moq mó gi, hkyî hten bang, myoqjit bang, gung-yùn bang, nhut jit bang eq nò bang gotû myo myo lé shuí lé lô kômù, Yhâng é hkyî wang má lé nyhi to kô é nghut luí, Yhang gi, haú
- ³¹ bang lé lhoq gê byí ri. Haú shiwa byu pé gi, nhut jit bang dang wó nyò kô é lé le, gung-yùn bang ge byuq é le le, hkyî hten bang hkyô wó sô é lé le, myoqjit bang myoq wó myang é lé le, myàng kôjáng, wú maú kômù, Isra-elaq é Garai Gasang lé hkyâ-ôn bum akô nghut ri.
- ³² Yesuq gi, Yhâng é chángzô pé lé wut yù mù, “Ngò, shí bang lé wú shogyô ri; yhangmoq gi, Ngò eq rahá nghut nyi é sum nyí bò bê, haí le a myàng zo kó nghut ri. Yhangmoq, hkyolat má mut yut ló yut kó abe, yhangmoq zòmut to gû lé, Ngò a nhang kat naù.” ga tâi ri.
- ³³ Haú hkûn, Yhâng é chángzô pé gi, “Isú é yoso má nhîng, byù shí myhò bang lé luq shoq byi tso râ zoshuq gi, hkarâ é wó râ lhú?” ga myí akô.
- ³⁴ Yhang gi, “Nungmoq, muk hkâ-myhó long wó akô lhú?” ga tau myi jáng, yhangmoq gi, “Muk nyhit long eq ngo-nú zo ratsuí wó lhê.” ga tâi ri akô.
- ³⁵ Haú mù, Yhang gi, byù hpûng lé,
- ³⁶ myigùng htoq má zùng nhang ri. Hau htâng, Yhang gi, haú muk nyhit long eq ngozo lé yù mù, jeju ban hkyâ-on jáng, myhik hpé luí, haú chángzô pé

- lé byi jáng, yhangmoq gi, byù hpûng
- ³⁷ lé gàm byí akô nghut ri. Yhangmoq lhunglhâng bang zô gyí bùm kô é htâng má, haú chángzô pé gi, amyit ahtâng lé nyhit mung byíng shoq wó
- ³⁸ guq tsîng yu ashí kô nghut ri. Haú hkûn zô é bang má, myiwe wuì eq zoshâng wuì lé a nghap lhôm é za, yuqgè wuì baú myi hkyîng yuq bo ri.
- ³⁹ Yesuq gi, byù hpûng lé ló nhang pyâm é htâng má, lhaí má wang ji mù, Magadan mau shut dap e ló bê nghut ri.

Kumhá Dung Kô É Hkyô

Mrk 8:11-13; Luk 12:54-56

16 Hparishe pé eq Saduke pé gi, Yesuq chyáng lé jé kômù, Yhang lé chyam wú é dông, mau-hkûng mâ é kumhá kut shit râ matú, dúng akô.

- ² Haú mù, Yhang gi, yhangmoq lé, “Nungmoq gi, myinhâng jé jáng, ‘Mau hpong râ nghut lhê, hkâsu mù
- ³ gâ le, mauhkûng ne ri.’ ga le, nap-kyó lé nghut jáng, ‘Hkû-nyí laidun lò râ nghut lhê, hkâsu mù gâ le, mau-hkûng nè mù, noq ri.’ ga le, lhaq tâi akô. Nungmoq gi, mauhkung é isâm lé wú mù sê gam hkoq yû kô é nghut kôlhâng, shí ipyat lhê é kumhá lé gi,
- ⁴ a sê gam hkoq yû kó nghut ri. Agè ashop é eq lhum a zuí é ipyat shí gi, limik kumhá lé ho nyi akô; nghut kô-lhâng, Yonaq é kumhá mai lai luí, gotû haí le tún shit râ a nghut.” ga tâi ri. Hau htâng, Yesuq gi, yhangmoq chyáng mai htoq ló bê nghut ri.

Hparishe Pé Eq Saduke Pê É Múnchi

Mrk 8:14-21

- ⁵ Yhangmoq, nhông hé hpoq shut gû dap ló kô é hkûn, haú chángzô pé gi, muk yu chûng râ lé tô-myhí pyâm akô.

- ⁶ Haú hkûn, Yesuq gi, “Hparishe pé eq Saduke pê é múnchi lé, sidíq luí, koi pyâm nyí keq.” ga, yhangmoq lé taí kat ri.
- ⁷ Yhangmoq gi, “Nga-nhúng, muk a yu chung é yanmai, haú su ga taí é nghut ri.” ga luí, taí lhum bum akô nghut ri.
- ⁸ Yhangmoq haú su taí lhúm nyí kô é lé Yesuq sé jáng, yhangmoq lé, “Lum-jíng myit shaú é bang ê, muk a bo é hkyô lé, haí mù taí lhúm nyi akô lúhú?”
- ⁹ Ahkuí jé shoq, nungmoq gi, a sê gyo shi kó lúhú? Muk ngo lông èq byù ngo hkyíng lé byi tsô é htâng, nungmoq hkâ-myhó mung wó dum guq tsíng yù
- ¹⁰ kô é lé le, muk nyhit lông èq byu myi hkyíng lé byi tsô é htâng, nungmoq hkâ-myhó mung wó dum guq tsíng yù kô é lé le, nungmoq a myit bun kó
- ¹¹ lúhú? Ngò gi, muk eq séng luí taí é a nghut é lé, nungmoq, hkâsu mù a sê gyo kô é lúhú? Hparishe pé eq Saduke pê é múnchi lé koi pyám keq nghú taí
- ¹² é ru nghut lhê.” ga taí ri. Haú hkûn sheq, Yhang taí é gi, muk má chung é múnchi lé koi pyám râ matú taí é a nghut e za, Hparishe pé eq Saduke pê é mhoqshit hkyô lé koi pyám râ matú taí é ru nghut é lé, yhangmoq sê gyô akô nghut ri.

Yesuq Lé, Petruq Yín Yu É Hkyô

Mrk 8:27-30; Luk 9:18-21

- ¹³ Yesuq gi, Kesare-Hpiliپی và mó nâm mã é mau má jé é hkûn, Yhâng é chángzô pé lé, “Haú Byu Yhangzo gi, ó yuq nghut lhê ga, byu pé taí akô lúhú?” ga myí ri.
- ¹⁴ Haú hkûn, yhangmoq gi, “Ra-am gi, Wui-myhup Sará Yohan ga, góbang gi, Eliyaq ga, dum ra-am gi, Yeremiaq, a

- nghut jáng, gotû myiqhtoi rayuq yuq nghut ri ga, taí akô.” ga tû taí kô-
¹⁵ jáng, Yhang gi, “Haú jáng, nungmoq gi, Ngo lé ó yuq nghut lhê nghu akô lúhú?” ga, yhangmoq lé xoq myí ri.
- ¹⁶ Haú hkûn, Simun Petruq gi, “Nàng gi, rû dui nyi é Garai Gasâng é Yhangzo, Hkrisduq^a nghut ri.” ga tû taí ri.
- ¹⁷ Haú mù, Yesuq tû taí é gi, “Yonaq é yhangzo Simun ê, nàng gi, hkungsô wó nyi ri; hkâsu mù gâ le, nang lé haú hkyô tûn shit é gi, byù mai a nghut, mauhkûng htoq má nyi é Ngá é Íwa
¹⁸ mai tûn shit é ru nghut lhê. Ngò, nang lé taí lé, nàng gi, Petruq^b nghut luí, luqgok shí má, Ngò, Ngá é noqkuq hpúng lé xuq to râ nghut mù, haú moming hkúmdong pé gi, hpúng haú lé
¹⁹ wó ùng râ a nghut. Mauhkûng ming-dán é zoqshi pé lé, Ngò, nang lé ap byi râ nghut lhê; myigùng htoq má, nàng tuí to má tuí to lé, mauhkûng htoq má le, tuí to râ nghut lhê; myigùng htoq má, nàng lhoq lhut má lhoq lhut lé, mauhkûng htoq má le, lhoq lhut byi
²⁰ râ nghut lhê.” gâ ri. Hau htâng, Yhang Hkrisduq nghut é hkyô lé, ó lé le a taí kyo râ matú, Yhâng é chángzô pé lé taí hkûm kat ri.

**Yesuq Gi, Yhang Shí Râ
 Lé Hí Te Taí É Hkyô**

Mrk 8:31-9:1; Luk 9:22-27

- ²¹ Yesuq gi, Yhang Yerusalem và mó má ló mù, suwún wuí, hkyangjong agyi pé eq tarâ sará pê é loq má, zing-rí é myo myo hui zo luí, sat pyâm é hui ra râ nghut kôle, sum nyí nghú râ buinyí má, lhoq toq yu é hui râ nghut é hkyô lé, haú hkûn mai, Yhâng é chángzô pé lé taí kyo hi ló bê nghut ri.

^a 16:16 *Hkrisduq* gâ é gi, Mesaia lé ga lhê, haú é lichyúm gi, “hkyin yù hui sù” gâ é nghut lhê.

^b 16:18 Grik dòng *Petruq* gâ é gi, luqgok lé gâ é nghut lhê.

- ²² Haû mù, Petruq gi, Yhang lé ra hkyam shut shuí htoq yû mù, “Yhum-sîng ê, haû hkyô Náng chyáng hkâ-nhám le a dut sháng gaq.” ga Yhang lé tâi ri.
- ²³ Yesuq gi, lhing wú kat mù, Petruq lé, “Tsadán nàng, Ngá chyáng mai hpâng aq! Nàng gi, Garai Gasang eq sêng é hkyô lé a myit e za, byù eq sêng é hkyô lé za myit é sù nghut mù, Ngá é matú myit leqbat jowò nghut ri.” ga tâi ri.
- ²⁴ Hau htâng, Yhang gi, Yhâng é chángzô pé lé, “Ngá htâng cháng nau sù ó yuq nghut kôle, yhumsing gùng yhumsîng he-ngik pyám mù, yhumsing é tapzîng lé waq chûng luí, cháng ra râ nghut lhê. Hkâsu mù gâ le, yhumsing é asak lé hkyi yù nau sù ó yuq nghut kôle, asak sum râ nghut lhê; nghut kôlhang, Ngá é yanmai, yhumsing é asak sùm pyâm é sù kúm gi, asak wó yû râ nghut lhê. Byù gi, mingkan gón lé wó sing to kôlhang, yhumsing é asak woi-nyí sùm byuq é nghut le gi, yhang é matú, hai akyû bò râ lú? Byù gi, yhumsing é asak woi-nyí lé, hai èq wó htaí yù râ lú?”
- ²⁷ Haû Byu Yhangzo gi, Yhâng Wâ é hpungwup shingkang bo é èq, Yhâng Wâ é maumang lagyô pé eq rahá jé lé lô râ nghut lhê; haú hkûn, Yhang gi, yuq hkangmó lé, yhumsîng kut lai bê eq rajung za akyû byi râ nghut
- ²⁸ lhê. Ngò, nungmoq lé teng za taí kôlé, ahkuí shí má yap to bang ra-am gi, haû Byu Yhangzo, Yhâng é mingdán eq jé lé lo é lé, a myang é za shí kó râ a nghut.” ga tâi ri.

Yesuq, Isâm Htaí Lo É Hkyô

Mrk 9:2-13; Luk 9:28-36

17 Hkyuq nyí lai htâng má, Yesuq gi, Petruq lé le, Yakuq eq

- ychanggu Yohan nhiktâng lé le, shuí chûng mù, yhangmoq baú myhang é
- ² bùm ralhùm má doq ló akô. Haú má, yhangmoq é myoq hí tê má, Yesuq é ihpyô isâm htaí byuq mù, Yhâng é myoqdong gi, bui su duqbó tô é eq, Yhâng é mebu gi, maubó su hpyu zan
- ³ tô ri. Haú hkûn jáng, Mosheq eq Eliyaq gi, yhangmoq é hí má htoq shit mù, Yesuq eq dâng nyo lhum nyi akô.
- ⁴ Haû mù, Petruq gi, Yesuq lé, “Yhumsîng ê, shí jowò má nga-nhúng nyi le ge ri. Nàng ô nau é nghut le gi, Náng é matú ralhùm, Mosheq é matú ralhùm, Eliyaq é matú ralhùm kut, ngò zúm sùm lhum saí bá.” ga tâi ri.
- ⁵ Petruq dang ru tâi nyi ashí le, duqbó é mhut gi, yhangmoq lé htup zîng lô mù, mhut hkaú mai htoq lo é htê gi, “Shí yuq gi, Ngò chyitdap é Ngá Zo nghut lhê; Yhang má Ngò myit dik nyi lhê. Yhâng é dang gyo keq.” gâ ri.
- ⁶ Haû su gâ é htê lé, chángzô pé wó gyo kôjáng, yhangmoq gi, gyuq nán mù, myigùng má gop bùm bekô
- ⁷ nghut ri. Nghut kôlhang, Yesuq gi, yhangmoq chyáng jé lé lô mù, yhangmoq lé loq èq záng kat luí, “Toq keq,
- ⁸ hkâgyuq kó.” ga tâi ri. Yhangmoq tu wú kat kô le, Yesuq mai lai luí, ó lé le a myàng lo kó nghut ri.
- ⁹ Bùm mai taú gyó lô kô é hkûn, Yesuq gi, “Ahkuí nungmoq myang é hkyô lé, haû Byu Yhangzo shi é mai lhoq dui toq yu é a hui hui gi, ó lé le hkâtaí kyo kó.” ga, yhangmoq lé taí hkûm tô ri.
- ¹⁰ Haû jáng, chángzô pé gi, “Eliyaq hí lé ra râ nghut lhê ga, tarâ sará pé haí mù taí kô é lú?” ga, Yesuq lé myí akô.
- ¹¹ Haú hkûn, Yesuq gi, “Eliyaq hí lé luí, lhunglhang lé hen lajâng to râ gâ

- ¹² é gi, têng lhê. Nghut kôlhang, Ngò, nungmoq lé taí kôlé, Eliyaq gi, jé lé bê nghut lhê; nghut kôle, yhangmoq gi, yhang lé a lhom wú sé kômù, yhangmoq ô nau é dông banshoq kut bekô nghut ri. Haû eq rajung za, haû Byu Yhangzo le, yhangmoq é loq má hpuzo râ nghut lhê.” ga tû taí ri.
- ¹³ Haú hkûn sheq, Yhang taí nyi é gi, Wui-myhup Sará Yohan eq sêng é hkyô nghut é lé, haû chángzô pé sê gyô akô nghut ri.

**Nat Wang Júng Sû Lé
Lhoq Gê Byi É Hkyô**

Mrk 9:14-32; Luk 9:37-45

- ¹⁴ Yhangmoq, byù moq mó pê chyáng dum taù jé lô kô é hkûn, byù rayuq gi, Yesuq chyáng lé jé mù, hkyihput
- ¹⁵ htuq luí, “Yhumsîng ê, ngá é yuqzo lé shogyô yù laq; yhang gi, mhûngtuq tuq luí, gyai yhang jamjaû nyi ri. Myi-hkyóm má le, wuì má le, anum num
- ¹⁶ lêng wàng wàng dut nyi ri. Yhang lé, Náng é chángzô pê chyáng shuí ê kô-lhang, yhangmoq a wó lhoq gê byi kô nghut ri.” ga taí ri.
- ¹⁷ Haû mù, Yesuq gi, “Lumjîng myit a bo é eq agê ashop é amyû pé ê, Ngò gi, hkâ-myháng jé shoq nungmoq eq rahá nyi mù, wó jân nyi râ lhú? Yuqgè zo haú lé, Ngá chyáng shuí lé lô keq.”
- ¹⁸ ga tû taí kat ri. Yesuq gi, nat gang lé tân kat jáng, nat gang haû gi, yuqgè zo haú yuq chyáng mai htoq lô byuq bê nghut mù, haú hkûn jáng, yuqgè zo haû gi, ge byuq bê nghut ri.
- ¹⁹ Hau htâng, chángzô pé gi, ó a nyi é u má, Yesuq chyáng lé lô kômù, “Ngamoq gi, haí mù, nat haú lé a wó hkat htoq é lhú?” ga, lé myi kôjáng,
- ²⁰ Yhang gi, “Nungmoq é lumjîng myit

- shaû é yanmai nghut ri. Ngò, nungmoq lé teng za taí kôlé, nungmoq é lumjîng myit angshi cham í za hkâ-lháng bò kô é nghut le gi, bùm shí lé, ‘Hé shut htot lô aq.’ ga taí le, htot râ nghut lhê. Nungmoq a wó kut é haí
- ²¹ lháng joq râ a nghut. Shí jung gi, kyûdung é eq zoshuq gám é dông za a nghut jáng, a htoq lô é nghut lhê.”^a ga dum tû taí ri.
- ²² Yhangmoq, Galile mau má rahá zup nyi kô é hkûn, Yesuq gi, yhangmoq lé, “Haû Byu Yhangzo gi, byu pê é loq má ap pyâm é hui zo râ nghut lhê.
- ²³ Haú bang gi, Yhang lé sat pyám kó râ nghut lhê; nghut kôlhang, Yhang gi, shi é htâng sum nyí nghû râ nyí má lhoq dui toq é hui râ nghut lhê.” ga taí ri. Haû mù, haû chángzô pé gi, gyai yhang gyô yón nyi bekô nghut ri.

Noqkuq Yhûm Hkansê Kat É Hkyô

- ²⁴ Yesuq eq Yhâng é chángzô pé gi, Kaperna-um wà má jé kô é hkûn, noqkuq yhûm hkansê hkyuî bang gi, Petruq chyáng lé jé kômù, “Nungmoq é sará gi, noqkuq yhûm hkansê a kat lhú?” ga myí akô.
- ²⁵ Petruq gi, “Kat lhê.” ga tû taí ri. Hau htâng, Petruq yhúmhkaû má wang lô le, Yesuq hí lhom taí é gi, “Simun ê, mingkan hkohkam pé gi, kang eq hkansê pé lé, ô pê chyáng mai guq yu akô lhú? Yhumsing byu pê chyáng mai lhú? Haû a nghut jáng, góbâng chyáng mai lhú? Nàng, hkâsu wó myit lhê lhú?” gâ ri.
- ²⁶ Haû mù, Petruq gi, “Góbâng chyáng mai nghut ri.” ga tû taí jáng, Yesuq gi, “Haû su nghut le gi, yhumsing byu pé
- ²⁷ gi, lut akô nghut ri. Nghut kôlhang, yhangmoq é i-myit a ngón a dut kó

^a 17:21 Chyúmbun shí gi, chyúmding myo myo má a bo é nghut lhê.

sháng gaq, nhông má ê mù, ngo-nhe ê hkyó aq. Sâng-hi wó nhê yu é ngozô é nhut lé lêng há kat jáng, ngùn hting-chap rachap lé myàng râ nghut lhê. Haú lé yù mù, Ngá é matú eq náng é matú, yhangmoq lé ló byi aq.” ga taí ri.

Kô Dik Sû Gi, Ó Yuq Nghut Lhê Lhú?

Mrk 9:33-37, 42-48; Luk 9:46-48, 17:1-2

18 Haú hkûn, haú chángzô pé gi, Yesuq chyáng lé jé kômù, “Mauhkûng mingdán má, kô dik sû gi, ó yuq nghut lhê lhú?” ga myî akô.

- ² Yesuq gi, zoshâng zo rayuq lé wut yù mù, yhangmoq é gung gûng má
- ³ shap to luí, taí é gi, “Ngò, nungmoq lé teng za taí kôlé, nungmoq gi, myit htaí lhik luí, zoshâng zo wuí su dut kô é za a nghut jáng, mauhkûng mingdán má hkâ-nhám le wó
- ⁴ wâng kó râ a nghut. Haú mù, zoshâng zo shí yuq su, yhumsing é i-myt wó lhoq nyhum é sû ó yuq nghut kôle, mauhkûng mingdán má, kô dik sû nghut ri.
- ⁵ Shí sû é zoshâng lé, Ngá é myìng mai hap yu é sû ó yuq nghut kôle,
- ⁶ Ngo lé hap yu é sû nghut bê. Nghut kôlhang, Ngo lé lumjîng é zoshâng wuí mâ é rayuq yuq lé, mara kut shut nhang é sû gi, yhâng é lingzing má luqluí long mó tuí hut byi luí, nik é wuimau má, dú hkyô pyâm é huí é nghut le gi, yhâng é matú je gè râ nghut lhê.
- ⁷ Haú mingkan gi, byu pé lé mara kut shut nhâng jang joq é yanmai, dingnyé wó ri. Haú mara kut shut nhâng hkyô gi, htoq lugù bê; nghut kôlhang, haú lé lhoq htoq sû gi, dingnyé wó ri.
- ⁸ Náng é loq èq, a nghut jáng, náng é

hkyi èq, nang lé mara kut shut nhang é nghut le gi, haú lé hpyit dú pyám aq. Ahtum abyuq é myi má, hkyî hkúm loq hkúm gû dú hkyô pyâm é hui râ htoq má, hkyî loq a hkúm é za, asak wó yu é nghut le gi, náng é matú je

⁹ ge ri. Náng é myoqjí èq, nang lé mara kut shut nhang é nghut le gi, haú lé lap choq yù mù, dú pyám aq; myoqjí í jí dap gû ngaraí myi má dú hkyô pyâm é hui râ htoq má, myoq rájí eq za, asak wó yu é nghut le gi, náng é matú je ge ri.

Byuq Byuq É Sau

Luk 15:3-7

- ¹⁰ Shí sû é zoshâng zo wuí mâ é rayuq lé lhang a wú tiq râ matú, sidiq nyi keq. Hkâsu mù gà le, Ngò, nungmoq lé taí kôlé, mauhkûng mâ é yhangmoq é maumang lagyô pé gi, mauhkûng htoq mâ é Ngá Wâ é myoqdong lé,
- ¹¹ hkâ-nhám le myang nyi akô. (Hkâsu mù gà le, haú Byu Yhangzo gi, byuq byuq bê bang lé hkyi yù râ matú, jé lé é nghut lhê.)^a
- ¹² Byù rayuq gi, sau rashô du wó é nghû sháng, sau haú gû mâ é radu byuq byuq é nghut jáng, haú gaú xe gaú du lé, bùm pé má nyhi pyâm to luí, byuq byuq é sau lé a châng ho é nyi râ lhú? Haú lé, nungmoq hkâsu
- ¹³ wó myit ngam akô lhú? Ngò, nungmoq lé teng za taí kôlé, yhang gi, haú byuq byuq é sau haú lé myang ho é hkûn, a lám byuq é sau gaú xe gaú dû é matú gabú é htoq má, haú dû
- ¹⁴ matú je riyhang gabú ri. Haú eq rajung za, mauhkûng htoq mâ é nungmoq é Íwa gi, shí tiq bang mâ é rayuq htên byoq byuq râ lé lhang, ô nau é a nghut.

^a 18:11 Bun zo shí gi, chyúmding myo myo má a bo é nghut lhê.

**Mara Kut Shut É Gumang
Hpó Lé Hkâsu Kut Râ Hkyô**

- ¹⁵ Náng é gumang hpó, nang lé mara kut shut é nghut jáng, yhâng chyáng ê mù, nungnhik baú za nghut é hkûn, yhâng é mara lé tân shit aq. Yhang, náng é dang lé gyô é nghut jáng, nàng gi, gumang rayuq dum wó bê nghut ri.
- ¹⁶ Nghut kôlhang, yhang, náng é dang lé a gyô é nghut jáng, ‘Mara hun é hkyô hkangmó lé, saksé í yuq sum yuq lòm jáng, wó lhoq teng sháng gaq.’^a gâ tô é eq rajung za, nàng, gotû byù ra-í yuq
- ¹⁷ lé shuí chûng aq. Yhang gi, haú bâng é dang lé le a lhom yu é nghut jáng, haú hkyô lé, noqkuq hpúng má shit kyo aq; hpûng é dang lé le a gyô é nghut jáng, yhang lé, a lumjín é byù rayuq dông le, kang guq sù rayuq dông le sôn pyám aq.
- ¹⁸ Ngò, nungmoq lé teng za taí kôlé, myigùng htoq má, nungmoq tuí to má tuí to lé, mauhkûng htoq má le, tuí to râ nghut lhê; myigùng htoq má, nungmoq lhoq lhut má lhoq lhut lé, mauhkûng htoq má le, lhoq lhut byi râ nghut lhê.
- ¹⁹ Ngò, nungmoq lé dum taí kôlé, myigùng htoq má, nungmoq mâ é í yuq myit hui luí, haí lé dung kôlhang, mauhkûng htoq mâ é Ngá Wa gi, haú
- ²⁰ nhik lé gyo byi râ nghut lhê. Hkâsu mù gâ le, Ngá myíng lé lang luí, í yuq sum yuq zup zíng é jang hkâmá nghut kôlhang, haú bâng é gyoro má Ngò nyi lhê.” gâ ri.

**Shogyo Nhikmyin A Sê
É Jùn Hpó É Dangtú**

- ²¹ Haú hkûn, Petruq gi, Yesuq chyáng huí ê mù, “Yhumsîng ê, ngá é gumang, ngo lé mara kut shut é nghut le, yhang

lé hkâ-myhó dâm mara hkyut byi ra râ lhú? Nyhit dâm jé shoq hkyut byi ra râ lhí?” ga myí ri.

- ²² Haú jáng, Yesuq tô taí é gi, “Ngò, nang lé taí lé, nyhit dâm za a nghut, nyhit xe nyhit tú dâm hkyut byi râ lhê.
- ²³ Mauhkûng mingdán gi, yhumsîng é dui-nhâng zoshâng wui é jihpán lé jep nau é hkohkâm rayuq eq du ri. Yhang gi, jihpán lé jep hi ló é u lé, yhâng chyáng ngùn wan myo myo chyín dap
- ²⁵ to sù lé shuí lé lo akô. Haú yhumsîng hpó gi, haú yuq chyín a wó xap é yan-mai, chyín wó yû râ matú, yhang lé le, yhangmyi lé le, yhangzo banshoq eq yhang wó é zèhkoq banshoq lé le, ûng pyám râ hkunmó hkyô kat ri.
- ²⁶ Haú mù, dui-nhâng zoshâng haú yuq gi, yhâng é hí má hkyihput htuq luí, ‘Ngo lé myit hîng byi shi laq; banshoq lé, ngò xap râ.’ ga dúng
- ²⁷ tôngbán ri. Haú dui-nhâng zôshang é yhumsîng hpó gi, haú yuq lé wú shogyo luí, chyín banshoq lhut pyám byi mù, nhang kat ri.
- ²⁸ Nghut kôlhang, dui-nhâng zoshâng haú gi, htoq ló mù, yhang lé, denari^b rashô chyín dap tô é dui-nhâng zoshâng luzúm rayuq lé myàng jáng, haú yuq é lingzing má gyaq myhik zing to mù, ‘Ngo lé dap tô é chyín hân xap aq!’ ga taí ri.
- ²⁹ Haú hkûn, yhâng é luzúm dui-nhâng zoshâng haú gi, yhâng é hí má hkyihput htuq luí, ‘Ngo lé myit hîng byi shi laq; ngò xap râ.’ ga dúng tôngbán ri.
- ³⁰ Nghut kôlhang, yhang gi, a gyo byí e za, yhâng é chyín dum wó xap é hkûn jé shoq, haú yuq lé htóng hkyô
- ³¹ pyám nhâng ri. Gotû dui-nhâng zoshâng wui gi, haú hkyô lé myàng kô-

^a 18:16 Tarâ Pun 19:15 ^b 18:28 Denari rachap gi, ra-nyí lhê é byù rayuq é zuihpau eq wuí ri.

jáng, i-myyit wú nô kôluí, yhangmoq é yhumsing hpó lé, haú hkyô banshoq ló taí kyô akô.

- ³² Haú mù, haú yhumsing hpó gi, dui-nhâng zoshâng haú lé wut hâng yù mù, ‘Agè ashop é dui-nhâng zoshâng ê, nàng, ngo lé dúng tôngbán é yanmai, nàng, ngo lé dap é chyîn banshoq lé, ngò lhut pyám byi bê
- ³³ nghut lhê mhaí. Haú su é nhing, ngò, nang lé shogyô yu é su, náng é luzúm dui-nhâng zoshâng lé, nàng ge shogyô yu lhê a nghut lú?’ ga taí
- ³⁴ lú, yhang gi, nhikjum yo mù, yhâng é chyîn ban xap é hkûn jé shoq, jamjau hui zo râ matú, yhang lé, htóng suwún pè chyáng ap byí pyám bê nghut ri.
- ³⁵ Nungmoq é gumang wui lé, nungmoq é myit mai mara a wó hkyut byi kô é nghut jáng, mauhkûng htoq tsáng myhâng mâ é Ngá Wa le, nungmoq lé haú dông kut râ nghut lhê.” gâ ri.

Myi Làng Gâng É Hkyô

Mrk 10:1-12

- 19** Yesuq gi, mhoqshit é dang haú pé lé ban taí jáng, Galile mau mai htoq ló mù, Yodan làng tû tap mâ
- ² é Yuda mau má ê jé ri. Byù moq mó gi, Yhâng htâng cháng kô é nghut mù, Yhang gi, haú bang má é nõhpyo hui bang lé, haú má lhoq gê byí ri.
- ³ Haú hkûn, Hparishe pé ra-am gi, Yhâng chyáng lé jé kômù, Yhang lé chyam wú é dông, “Byù rayuq gi, hai hkyô mai nghut nghut, yhumsing é yhangmyi lé lhoq kâng pyâm le, tarâ wang lhê lú?” ga myí akô.
- ⁴ Haú jáng, Yhang tû taí é gi, “A-nham sâng-hi lé, Hpân Sû, ‘byu hpan é hkûn, yuqgè eq myiwe lé hpan
- ⁵ é nghut lhê.’^a ‘Hau é yanmai, yuqgè

- gi, yhumsing é înu îwâ chyáng mai htoq lú, yhangmyi eq rahá rading ralhûm za kut nyí mù, yhangnhik gi, gungsho ralhûm za dut byuq kó râ nghut lhê.’^b ga kê tô é lé, nungmoq a
- ⁶ nghap wú kó lú? Haú mù lú, yhangnhik gi, í yuq a nghut lô e za, rayuq za dut bê nghut ri. Haú mù lú, Garai Gasang lhoq tsâm tô é lé, byù gi, a lhoq kang sháng gaq.” gâ ri.
- ⁷ Haú hkûn, yhangmoq gi, “Haú lé nhing, yuqgè rayuq gi, lhoq kang laiká za ká byi mù, yhangmyi lé wó nhang pyâm lhê ga, haí mù, Mosheq, hkunmó hkyô tô lhê lú?” ga, Yhang lé dum taú myí akô.
- ⁸ Haú mù, Yesuq gi, “A-nham sâng-hi mai gi, haú dông a nghut. Nghut kôlhâng, nungmoq é myit nhiklhûm htân kô é yanmai, nungmoq é yhangmyi pé lé lhoq kang râ ahkáng, Mosheq byí tô é ru nghut lhê. Ngò, nungmoq lé taí kôlé, sulàng lú é za a nghut jáng, yhumsing é yhangmyi lé kâng pyám mù, myiwe gotû dum hâng yu é sù ó yuq nghut kôle, su-myi lú é sù dut bê.” ga, yhangmoq lé dum tû taí ri.
- ¹⁰ Haú hkûn, haú chángzô pé gi, “Myi làng hkyô má haú dông ru nghut le gi, a yu le lháng je ge nyo ri.” ga taí akô.
- ¹¹ Haú mù, Yesuq gi, “Yuq hkanmó gi, dang haú lé wó hap yu é a nghut, wó hkâm râ jeju wó é bang za sheq,
- ¹² wó hap yu é nghut lhê. Byù ra-am gi, înu unghkaú mai yang, yuqgè a jé gû hku lé lo é bang nghut akô; ra-am gi, góbâng èq kut é yanmai, yuqgè a jé dut byuq akô; ra-am nghut jáng, mauhkûng mingdán é matú, yuqgè a jé râ dông kut yu pyâm akô nghut ri. Shí hkyô lé wó hap yù sù gi, hap yù sháng gaq.” ga dum taí ri.

^a 19:4 Apûn 1:27 ^b 19:5 Apûn 2:24

Zoshâng Wui Eq Yesuq*Mrk 10:13-16; Luk 18:15-17*

- 13 Hau htâng, Yesuq mai zoshâng wui htoq má loq ke mù, shimân byi sháng gaq ga, zoshâng wui lé Yhâng chyáng shuí lé lo akô. Haû chángzô pé kúm gi, haû shuí lé lô bang lé lhom tân hkâm akô nghut ri.
- 14 Nghut kôlhang, Yesuq gi, “Haû zoshâng wui lé, Ngá chyáng lé nhâng keq; yhangmoq lé hkâhkâm zing to kó; hkâsu mù gâ le, mauhkûng mingdán gi, haû sù é bâng é mingdán ru nghut lhê.” ga taí kat ri. Yhang gi, zoshâng wui htoq má loq ke shimân byi mù, haú jowò mai htoq lô bê nghut ri.

Sùt Wó É Zorâm Rayuq É Hkyô*Mrk 10:17-31; Luk 18:18-30*

- 16 Byù rayuq gi, Yesuq chyáng lé jé mù, “Sarâ ê, ahtum abyuq é asak wó yû râ matú, ge é muzó haí kut ra râ lhú?” ga myí ri.
- 17 Haû jáng, Yesuq gi, “Ge é hkyô eq séng luí, haí mù Ngo lé myí lhê lhú? Ge é Sù gi, rayuq za nyi lhê. Nàng, asak dui é má wàng nau é nghut le gi, jep é tarâ pé lé cháng aq.” ga tû taí ri.
- 18 Haú yuq gi, “Hká gû lé lhú?” ga dum myi jáng, Yesuq gi, “Byù hkâsat, su-myi hkâlú, hkâhkau, a teng a mán 19 é saksé hkâhkâm, nángnu nángwa lé hkungga aq,^a ga le, ‘náng gûng lé nàng chyitdap e su, náng é chyang-nâm mâ é bang lé le chyitdap aq.’^b ga le bo tô ri.” ga taí kat ri.
- 20 Haú hkûn, zorâm hpó haû gi, “Haú pé banshoq lé, ngò cháng bê nghut lhê; haí kut râ ashí lhú?” ga dum taú myí ri.

- 21 Yesuq gi, “Nàng, gumjup sù dut nau le gi, lô mù, nàng wó é sutzè pé lé ûng pyám luí, myùng bang lé byí pyám aq; haû jáng, nàng, mauhkûng htoq má sutzè wó râ nghut lhê; haû mù, Ngá htâng lé cháng aq.” ga tû taí ri.
- 22 Zorâm hpó haû gi, sutzè gyai wó sù nghut é yanmai, dang haú lé wó gyo jáng, gyai yhang myit a ngón é èq lô byuq bê nghut ri.
- 23 Hau htâng, Yesuq gi, Yhâng é chángzô pé lé, “Ngò, nungmoq lé teng za taí kôlé, sutzè wó bang gi, mauhkûng mingdán wó wâng râ gyai yhang wuí ri. Hau htoq agó, Ngò, nungmoq lé taí kôlé, sutzè wó sù rayuq, Garai Gasâng é mingdán má wó wâng râ htoq, gola-uq radu âpno mai wó wang lai râ gi, je luí râ nghut lhê.” ga taí ri.
- 25 Haû chángzô pé gi, haû su gâ é lé wó gyo kôjáng, haû ru nghut le gi, ó yuq za hkyi yu é hui râ nghut lhê lhú?” ga Yhang lé myí akô nghut ri.
- 26 Haú hkûn, Yesuq gi, yhangmoq lé wú kat mù, “Haú hkyô lé byù mai gi, wó kut râ a nghut; nghut kôlhang, Garai Gasang gi, lhunglhang lé wó kut é Sù nghut lhê.” ga taí ri.
- 27 Haú hkûn, Petruq gi, Yhang lé, “Ngamoq gi, wó é gû lhunglhang lé tô pyâm to luí, Náng htâng cháng bê nghut lhê. Ngamoq, haí wá wó râ nghut lhê lhú?” ga myí kat ri.
- 28 Haú mù, Yesuq tû taí é gi, “Ngò, nungmoq lé teng za taí kôlé, lhunglhang lé asik dum saí dut nhang é má, haû Byu Yhangzo gi, Yhâng é hpungwup bo é hkohkâm-tanghkuq má zùng tô é hkûn, Ngá htâng châng é bang nungmoq le, hkohkâm-tanghkuq raxe í lhùm htoq má zùng to kômù, Isra-

^a 19:19 Htoq Lô 20:12-16; Tarâ Pun 5:16-20^b 19:19 Nhong 19:18

elaq amyû raxe í hú lé jéyáng kó râ
²⁹ nghut lhê. Ngá é yanmai, yhumsing
 é yhûm, nhiktâng wuì, înu îwa, zo
 dù wuì eq yò pé rajung jung lé tô
 pyâm tô é sù ó yuq nghut kôle, ra-
 shô tú akyû myo jat shoq wó râ nghut
 é htoq agó, ahtum abyuq é asak le,
³⁰ wó yû râ nghut lhê. Nghut kôlhang, hí
 nghut nyi é bang myo myo gi, htâng
 gyó byuq kó râ nghut mù, htâng gyó
 nyi bang yuq gi, hí bekô râ nghut
 lhê.

**Tsibiyiq Hkyâm Mû Zui Bang
 Lé Dangtú Yu É Hkyô**

20 Hkâsu mù gâ le, mauhkûng
 mingdán gi, yhumsing é tsi-
 byiq hkyâm má mû zui nhâng râ
 langchyang ê lûng râ ga, napsûn noq
 le htoq e ló é hkyâm yhumsing eq
² du ri. Yhang gi, ra-nyí é matú de-
 nari rachap byi râ dông, haú bang
 eq myit huí yù mù, yhangmoq lé,
 yhâng é tsibiyiq hkyâm má nhang
 hâng kat ri.
³ Napkyó gau hkyíng^a kô má, yhang
 gi, htoq e ló le, hai mû le a kut é
 za, gài má yap tô é bang ra-am lé
⁴ ê myang ri. Haú mù, yhang gi, haú
 bang lé, ‘Nungmoq le, ngá é hkyâm
 má mû ê zui keq; byi âng é ahpau,
 ngò, nungmoq lé byi râ nghut lhê.’
 ga taí jáng, yhangmoq gi, e ló bekô
 nghut ri.
⁵ Hau htâng, yhang gi, raxe í hkyíng
 má le, myinhâng sum hkyíng kô má
 le, dum htoq ê mù, haú eq rajung za
⁶ langchyang pé ê lung kat ri. Myin-
 htâng ngo hkyíng kô má, yhang dum
 htoq e ló wú le, góbang ra-am le
 yap tô bum é lé, ê myâng mù, haú
 bang lé, ‘Nungmoq gi, haí le a kut

é za, ra-nyí buí haí mù shí má yap
⁷ tô bum akô lúhú?’ ga myi jáng, haú
 bang gi, ‘Ngamoq lé, ó yuq èq le a
 lûng kô é yanmai nghut lhê.’ ga tú taí
 akô.

Haú hkûn, yhang gi, ‘Nungmoq le,
 ngá é hkyâm má mû ê zui keq.’ ga
 taí ri.

⁸ Myinhâng jé jáng, tsibiyiq hkyâm
 yhumsing gi, yhâng é mû shuí u sù lé,
 ‘Haú langchyang pé lé ji yù mù,
 je htâng má lung yu é bang mai
 hí luí, sâng-hi lung yu é bang jé
 shoq, mû zui hpau byi aq.’ ga
 taí ri.

⁹ Myinhâng ngo hkyíng má mû wàng
 bang le, denari rachap chap wó yu
¹⁰ bum akô. Haú mù, je hí má mû wàng
 bang gi, yhangmoq je myo wó nhô
 ngam akô. Nghut kôlhang, yhang-
 moq le, rayuq denari rachap chap
¹¹ za wó akô nghut ri. Yhangmoq gi,
 haú myhó za wó yu bùm kô é yan-
¹² mai, haú hkyâm yhumsing lé, ‘Shí
 bang gi, je htâng má mû lé wâng mù,
 nayí rahkum za mû zui kôlhang, nàng
 gi, ra-nyí buigyùm chap buí htân yò
 má mû zuí é bang ngamoq eq ra-
 jung za byí ri.’ ga mara hûn dang taí
 akô.

¹³ Nghut kôlhang, haú hkyâm yhum-
 sîng gi, haú bang mâ é rayuq lé, ‘Bui-
 nùm hpó ê, ngò, nang lé a tarâ é
 dông kut é a nghut. Denari rachap
 byi râ nghû, nàng eq ngò myit huí
¹⁴ to bê a nghut lúhú? Nàng wó âng é
 lé yu chûng mù, ló aq. Je htâng má
 mû lé wang é sù lé le, nang lé byí é
¹⁵ myhó, ngò byí nau ri. Ngá é ngùn lé,
 ngò kut nau é su a ge kut lúhú? Ngò,
 ge é kut le, nàng manôn ri lúhú?’ ga
 taí ri.

^a 20:3 Chyúmdang ra-am má, sum hkyíng ga chung tô é gi, Yudaq byu pé é ahkyíng nghut lhê. Yudaq byu pé é ahkyíng gi, napkyó hkyuq hkyíng mai nghap hi lhê.

¹⁶ Haû mù luí, htâng gyó nyí bang gi, hí bekô râ nghut mù, hí nghut nyí bang gi, htâng gyó byuq kó râ nghut lhê.” gâ ri.

**Yesuq Gi, Yhang Shí Râ
Hkyô Lé Dum Taí Ri**

Mrk 10:32-34; Luk 18:31-34

¹⁷ Ahkuí, Yesuq gi, Yerusalem wà mó shut doq ló nyi é u lé, haû chángzo raxe í yuq lé, gotû kut wut yù mù,
¹⁸ “Nga-nhúng gi, Yerusalem wà mó shut doq ló nyi lhê; haû Byu Yhangzo gi, hkyangjong agyi pé eq tarâ sará pé é loq má ap byí pyâm é hui râ nghut lhê; haû bang gi, Yhang lé, shí râ mara byi kó râ nghut é htoq agó,
¹⁹ jóng pyâm é, nhuq bat é eq tapzîng má jén sat pyâm é hui râ matú, haû tûngbau pé é loq má ap pyám kó râ nghut lhê. Nghut kôlhang, Yhang gi, sum nyí nghû râ buinyi má, lhoq dui toq é dum hui râ nghut lhê.” ga taí ri.

Zô Nhik Matú Ínu Èq Dung Byí É Hkyô

Mrk 10:35-45

²⁰ Hau htâng má, Zebedi é yhangzô nhiktang é yhângnu gi, yhangzô nhik eq rahá jé lé lô kômù, rajung dung râ matú, Yesuq é hí má hkyihput htug nyi ri.
²¹ Haû mù, Yesuq gi, “Nàng, haí ô nau ri lhú?” ga yhang lé myi jáng, yhang gi, “Náng é mingdán má, shí ngá zô nhiktâng lé, Náng é loqyò hkyam má rayuq, loqpaí hkyam má rayuq kut, zùng râ ahkáng byi laq.” ga taí ri.
²² Haû hkûn, Yesuq gi, “Nungnhik haí dúng nyi é lé, nungnhik a sé kó nghut ri. Ngò shuq râ góm^a lé, nungnhik wó

shuq kó râ lhú?” ga myi jáng, yhang-nhik tâng gi, “Wó shuq lhê.” ga tû taí akô nghut ri.

²³ Haû mù, Yesuq gi, yhangnhik lé, “Ngò shuq râ góm lé, nungnhik shuq ra kó râ za nghut lhê. Nghut kôlhang, Ngá é loqyò, loqpaí hkyam má zùng râ ahkáng lé gi, Ngò byí jung a nghut. Jowò haú pé gi, Ngá Wa hen to byi bâng é matú za ru nghut lhê.” ga taí ri.
²⁴ Gotû chángzo raxê yuq gi, haú hkyô lé wó gyo kôjáng, haú nhiktâng lé
²⁵ nhik-yô akô nghut ri. Haû mù, Yesuq gi, yhangmoq banshoq bang lé wut tsîng yù luí, “Tûngbau pé lé uphkaung é ga bang gi, tûngbau pé lé up zô nyi kô é hkyô lé le, haû eq rajung za, yhangmoq é ming up suwún wuí le, yhumsing é ahkáng ayá lé chûng mù, up zô nyi kô é hkyô lé le, nungmoq
²⁶ sê lhê. Nungmoq chyáng gi, haû su a dut kó sháng gaq; haû Byu Yhangzo lháng gi, dojaú é lé hkam yù râ matú jé lé é a nghut é za, dojaú râ matú eq byù myo myô é matú, shihtáí gunglik hkungga dông, Yhâng é asak lé byi pyám râ matú sheq, jé lé é ru
²⁷ nghut é su, nungmoq má, byù mó dut nau sù ó yuq nghut kôle, nungmoq é dui-nhâng zoshâng dut ra râ
²⁸ nghut lhê. Hau htoq agó, nungmoq má ushuq dut nau sù ó yuq nghut kôle, nungmoq é jùn dut ra râ nghut lhê.” ga taí ri.

**Myoqjit Í Yuq Myoq
Dum Myang É Hkyô**

Mrk 10:46-52; Luk 18:35-43

²⁹ Yesuq eq Yhâng é chángzô pé gi, Yeriho myuq mai htoq ló nyí kô é hkûn, byù moq mó gi, yhangmoq é

^a 20:22 Góm gâ é gi, hui zo râ jamjau hkyô lé nghû nau é nghut lhê.

- ³⁰ htâng má châng e ló bum akô. Haú hkyô yàm má zung tô é myoqjit í yuq gi, Yesuq laí ló nyi é hkyô lé wó gyo kôjáng, “Dawiq é Yhangzo, Yhumsîng ê, ngá-nhik lé shogyô yù laq ô!” ga, wut garû kat akô nghut ri.
- ³¹ Byù moq mó gi, yhangnhik zîm byuq râ matú tân hkúm kôlhang, yhangnhik gi, “Dawiq é Yhangzo, Yhumsîng ê, ngá-nhik lé shogyô yù laq ô!” ga, je riyhang htê mó èq wut garû kat akô nghut ri.
- ³² Haú mù, Yesuq gi, yap kat mù, “Ngò, nungnhik lé haí kut byi râ ô nau akô lhú?” ga, yhangnhik lé wut myí kat ri.
- ³³ Haú hkûn, yhangnhik gi, “Yhum-sîng ê, ngá-nhik myoq myàng nau ri.” ga tû taí akô.
- ³⁴ Yesuq gi, yhangnhik lé wú shogyô luí, yhangnhik é myoqjí má ê záng byí ri. Haú hkûn jáng, yhangnhik gi, myoq wó myàng kômù, Yhâng htâng cháng bekô nghut ri.

**Yesuq, Yerusalem Wà Mó
Má Wang E Ló É Hkyô**

Mrk 11:1-11; Luk 19:28-38; Yhn 12:12-19

- 21** Yesuq eq Yhâng é chángzô pé gi, Yerusalem wà mó eq chyâng lo nyi kô é hkûn, Tsanlun Bùm má é Bethpage wà má jé ló kôjáng,
- ² Yesuq gi, chángzo í yuq lé, “Nung-nhik, hí má é wà má ê keq; wà haú má, logúng zîng radu lé, logúng zo eq rahá túi to lánng é lé, ê myàng kó râ nghut lhê; haú lé hpyi yù mù, Ngá chyáng
- ³ she lò keq. Byù rayuq yuq, nungnhik lé rajung jung gâ lò jáng, ‘Shí í du lé, haú Yhumsîng chúng râ ri.’ gâ nghú tû taí keq; haú jáng, yhang, radá dâm

nhâng byi râ nghut lhê.” ga Yesuq taí luí, nhang kat ri.

- ⁴ Haú gi, myiqhtoi dang lhoq dik râ
- ⁵ matú dut lo é nghut ri. Myiqhtoi dang haú gi,
- “Zi-un byizo^a lé, shí su nghú keq; ‘Wú aq, náng é hkohkâm gi, nú-nhâm é myit eq logúng htoq má ji mù, nghut bê, logúng zo htoq má ji mù, náng chyáng lé lô bê nghut ri.’”^b

gâ ri.

- ⁶ Haú chángzô nhik gi, e ló mù, Yesuq taí kat é eq rajung za ê kut bekô
- ⁷ nghut ri. Yhangnhik gi, logúng me lé she lò mù, yhangnhik é buhîng pé lé, haú logúng mê é htoq má ke
- ⁸ byi kôjáng, Yesuq gi, doq jî ri. Byù moq mó má é myo myo gi, yhangmoq é buhîng lé, hkyô má hkyut hkanng byí akô; ra-am gi, mhandíng pé lé zân hkyô yù mù, hkyô má hkanng
- ⁹ byí akô nghut ri. Yhâng é hí má htâng má châng sô nyi bum é bang gi,

“Dawiq é Yhangzo gi, hosana^c nghut nyí sháng gaq ô!”

“Haú Yhumsîng é myîng mai jé lé lô Sû gi, hkungso wó nyí sháng gaq ô!”^d

“Htoq tsáng myhâng má, hosana nghut nyí sháng gaq ô!” ga luí, taí garû bum akô nghut ri.

- ¹⁰ Yesuq, Yerusalem wà mó má wang ló é hkûn, rawà gón é bang gi, ga-byông lo bùm kômù, “Shí yuq gi, ó wá nghut lhê lhà?” ga luí, myi lhum bum akô.
- ¹¹ Haú hkûn, byù moq mó gi, “Shí yuq gi, Galile mau, Nazaret wà byù Yesuq

^a 21:5 Zi-un byizo gâ é lychyúm gi, Yerusalem byu pé gâ é nghut lhê. ^b 21:5 Zhk 9:9

^c 21:9 Hebre dang má, *hosana* gâ é gi, “ahkuí hkyi yù laq” gâ é nghut lhê. Nghut kôlhang, bun zo 9 má gi, hkyá-on dang dông chung é nghut lhê. ^d 21:9 Hkyá-on 118:26

gâ é myiqhtoi nghut lhê.” ga taí akô nghut ri.

**Yesuq, Noqkuq Yhûm Lé Lhoq
Sansêng Pyâm É Hkyô**

Mrk 11:15-19; Luk 19:45-48; Yhn 2:13-22

- ¹² Yesuq gi, noqkuq yhûm má wang ê mù, haú mâ é zè ung zè wuì kut nyi é bang banshoq lé, hkat htoq pyám luí, ngùn htaí zo bâng é siboí pé eq hpûngkyui ung zo bâng é tanghkuq
- ¹³ pé lé, tu mhuq pyám byí ri. Haú hkûn, Yhang gi, “Ngá yhûm gi, kyûdung yhûm ga râ nghut lhê.”^a ga kâ to kôlhang, nungmoq gi, jowò shí lé ‘damaq hkyûng’^b kut nyi akô.” ga, yhangmoq lé taí ri.
- ¹⁴ Yesuq, noqkuq yhûm má nyi tô é hkûn, myoqjit bang eq hkyí hten bang Yhâng chyáng lé lô kômù, Yhang gi,
- ¹⁵ haú bang lé lhom lhoq gê byí ri. Nghut kôlhang, hkyangjong agyi pé eq tarâ sará pé gi, Yhang kut é mauhpo muzó pé lé le, “Dawiq é Yhangzo gi, hosana nghut sháng gaq.” ga, noqkuq yhûm má zoshâng wuì garû nyi bùm kô é lé le, myàng kôjáng, wú nhik-yô bum akô nghut ri.
- ¹⁶ Haú mù, yhangmoq gi, “Zoshâng shí bang haí taí nyi kô é lé, Nàng wó gyô lhê lú?” ga, Yesuq lé myi kôjáng, Yhang gi, “Wó gyô ri. Nungmoq gi, ‘Zoshâng wuì eq nyheqnú pé é nhut mai hkyá-on kungtôn rá matú, nàng lajàng to bê nghut ri.’^c ga kâ tô é lé, Chyúmdang má a nghap wú kó lú?” ga yhangmoq lé taí ri.
- ¹⁷ Hau htâng má, Yhang gi, haú bang lé nyhi to luí, wà hkaú mai htoq ló mù, Behtani wà má ê jé luí, haú myín, haú má bíng yu ri.

**Maihpáng Gâm Nyhuí
Kyuq Shi Byuq É Hkyô**

Mrk 11:12-14, 20-24

- ¹⁸ Yhang gi, htang napkyó noq le, Yerusalem wà mó shut dum taú ló é hkûn, hkyô má zòmut hui bê nghut ri.
- ¹⁹ Haú mù, Yhang gi, hkyô yàm má yuq tô é maihpáng gâm lé myang kat mù, chyâng e wú le, ahaq mai lai luí, haí lé le a myàng nghut ri. Haú mù, Yhang gi, shigâm haú lé, “Nàng má, hkâ-nhám le ashi a zui sháng gaq.” ga taí kat ri. Haú hkûn jáng, agham haú gi, nyhuí kyuq shi ló byuq bê nghut ri.
- ²⁰ Haú chángzô pé gi, haú lé myàng kôjáng, maú byuq kômù, “Maihpáng gâm shí gi, haí mù haú-í hân nyhuí kyuq shi ló lhê là?” ga myí akô.
- ²¹ Yesuq gi, “Ngò, nungmoq lé teng za taí kôlé, nungmoq, úng-âng é myit a bo é za, lumjínng kô é nghut le gi, maihpáng gâm má Ngò kut é muzó lé, nungmoq wó kut kó râ nghut é htoq agó, bùm shí lé, ‘Htot mù, wuimau má ló gyó wàng aq.’ ga taí jáng, taí é eq
- ²² rajung za dut râ nghut lhê. Nungmoq, lumjínng myit èq dung kô é nghut jáng, haí dúng le le wó yú kó râ nghut lhê.” ga tú taí ri.

**Yesuq É Ahkáng Ayá Lé
Myí Chyam É Hkyô**

Mrk 11:27-33; Luk 20:1-8

- ²³ Yesuq gi, noqkuq yhûm wàng hkaú má wang ê mù, mhoqshit nyi é hkûn, hkyangjong agyi pé eq mingbyu é suwún wuì gi, Yhâng chyáng lé jé kômù, “Hai ahko ahkâng èq, Nàng, shí pé lé kut nyi lhê lú? Ahko ahkáng shí, Nang lé ó yuq byí é lú?” ga myí akô.
- ²⁴ Haú hkûn, Yesuq gi, “Ngò le, nungmoq lé rajung myí wú kôlé, nungmoq

^a 21:13 Esai 56:7 ^b 21:13 Yer 7:11 ^c 21:16 Hkyá-on 8:2

wó tũ táí kô é nghut jáng, hai ahko ahkâng èq, Ngò, shí pé kut é hkyô lé
²⁵ táí kyo rá nghut lhê. Yohan byî é bap-
 tisma gi, ó yuq é ahko ahkâng mai
 nghut lhê lú? Mauhkûng mai lú? A
 nghut jáng, byu chyáng mai lú?” ga
 taũ myî kat ri.

Haũ hkûn, yhangmoq, chôm hpyê
 lhum kô é gi, “‘Mauhkûng mai nghut
 lhê.’ nghũ, nga-nhúng táí jáng le, ‘Haũ
 nghut le nhîng, haũ mù, yhang lé a
²⁶ lumjîng kô é lú?’ ga rá nghut; ‘Byu
 chyáng mai nghut lhê.’ nghũ jáng le,
 yhangmoq lhunglhâng bang gi, Yo-
 han lé, myiqhtoi rayuq ga lumjîng
 bûm kô é nghut lhê yanmai, haũ bang
 lé, nga-nhúng gyuq rá lhê nghut.” gâ
 akô.

²⁷ Haũ mù, yhangmoq gi, Yesuq lé,
 “Ngamoq a sé.” ga tũ táí akô.

Haũ hkûn, Yesuq gi, “Haũ jáng, Ngò
 le, hai ahko ahkâng èq shí pé kut é
 hkyô lé, nungmoq lé a táí kyo.” ga,
 yhangmoq lé táí ri.

Yuqzô Nhiktâng Lé Dangtú Yu É Hkyô

²⁸ Yesuq xoq táí é gi, “Nungmoq hkâsu
 wó myit akô lú? Byũ rayuq gi, yuqzo
 í yuq wó ri. Yhang gi, ko sũ yuq
 chyáng ê mù, ‘Ngá zo ê, nàng, hkũ-nyí
 tsibiyiq hkyâm má mù ê zui aq.’ ga
²⁹ táí jáng, yuqzo haũ gi, ‘Ngò a kâm
 ê.’ ga tũ táí ri; nghut kôlhâng, htâng
 má, yhang gi, myit dum lhîng mù, ê
 bê nghut ri.

³⁰ Hau htâng, yhângwa gi, yhang zo
 tiq sũ yuq chyáng ê mù, rajung za ga
 ê dum táí jáng, yuqzo haũ gi, ‘Ê rá,
 âwa!’ ga yín yũ kôlhâng, a ê kut ri.

³¹ Haũ nhiktâng mâ é hká yuq sheq,
 yhângwa ô nau é hkyô lé kut sũ
 nghut ri lú?” gâ ri.

Haũ hkûn, yhangmoq gi, “Ko sũ
 nghut ri.” ga tũ táí akô.

Haũ mù, Yesuq gi, yhangmoq lé,
 “Ngò, nungmoq lé teng za táí kôlé,
 kang guq bang eq shiwa myhî pé gi,
 Garai Gasâng é mingdán má, nung-
 moq a wàng shimá, wang ló nyi bùm
³² kó rá nghut lhê. Hkâsu mù gâ le, Yo-
 han gi, nungmoq chyáng lé jé mù,
 dingmán hkyô lé tũn shit kôlhâng,
 nungmoq gi, yhang lé a jîng kut akô
 nghut ri; nghut kôlhâng, haũ kang guq
 bang eq shiwa myhî pé gi, yhâng dang
 lé jîng akô nghut ri. Nungmoq gi, haũ
 hkyô lé myang é nghut kôlhâng, myit
 a lhîng kô é htoq agó, yhang lé a lum-
 jîng shi kó nghut ri.

Tsibiyiq Hkyâm Saí Bang Lé Dangtú Yu É Hkyô

Mrk 12:1-12; Luk 20:9-19

³³ Gotũ dangtú lé gyô wũ shi keq;
 hkyâm yhumsîng rayuq gi, tsibiyiq
 hkyâm ralhũm saí to mù, lhîngkyuq
 kyâm to luí, tsibiyiq wing pyik htoq rá
 donghkong dũ to mù, machya ralhũm
 saí tô ri. Hau htâng, yhang gi, hkyâm
 haũ lé, hkyâm saí zo bâng chyáng
 ngho byî to mù, gó ming shut e ló
³⁴ byuq bê nghut ri. Kyôshu yoq jé jáng,
 yhang gi, yhang eq sêng é tsibiyiq shi
 ê yũ rá matú, yhâng é dui-nhâng zo-
 shâng wuì lé, haũ hkyâm saí zo bâng
 chyáng nhang kat ri.

³⁵ Haũ hkyâm saí zo bang gi, dui-
 nhâng zoshâng wuì lé, lhom chyup
 yũ kômù, rayuq lé gi, lhom nhuq
 bat, rayuq lé gi, lhom sat pyám, ra-
 yuq lé gi, luqgok èq lhom dú sat
³⁶ pyám, kut akô nghut ri. Hau htâng
 má, yhang gi, hí dam lhê htoq je myo
 shoq gotũ dui-nhâng zoshâng wuì
 lé dum nhang kat le le, haũ hkyâm
 saí zo bang gi, hí lhê bang lé su
³⁷ lhom dum kut akô nghut ri. Ló htâng
 má, yhang gi, ‘Ngá zo lé gi, yhang-

moq lhom hkungga kó râ nghut lhê.’
ga, yhang zo lé, haú bang chyáng
nhang kat ri.

³⁸ Nghut kôlhang, haú hkyâm saí zo
bang gi, yhang zo lé myàng kôjáng,
‘Shí yuq gi, silí wunlí sing yù râ sù
nghut lhê; lé keq, yhang lé sat pyám
mù, yhang é silí wunlí lé yu pyám
byi sháng.’ ga, rayuq eq rayuq taí
³⁹ lhûm bum akô nghut ri. Haú mù,
yhangmoq gi, yhang lé, chyup yû luí,
hkyâm shinggan shut dú htoq kômù,
sat pyám bekô nghut ri.

⁴⁰ Haú mù luí, tsibiyiq hkyâm yhum-
sîng lé jé é hkûn lé, haú hkyâm saí zo
bang lé hkâsu kut nhô ngam akô lhú?”
ga Yesuq myí ri.

⁴¹ Haú hkûn, haú hkyangjong agyi pé
eq suwún wuí gi, “Haú agè ashop
bang lé gi, agè ashop é dông sat pyám
râ nghut lhê. Haú tsibiyiq hkyâm lé gi,
kyô shu yoq má, yhang é gambùm lé
byi râ bang lé, htot ngho byí pyám râ
nghut lhê.” ga, tû taí akô nghut ri.

⁴² Haú jáng, Yesuq dum taí é gi,
“Chyúmdang má,

‘Yhûm saí băng èq hkyin htoq
pyâm é luqgok gi, htungchyûn
mâ é ahkyak dik é luqgok dut
bê.

Shí hkyô gi, haú Yhumsîng kut é
nghut luí, nga-nhông é myoq
hí má mauhpo dut bê nghut
ri.’^a

ga bo tô é lé, nungmoq a nghap wú kó
lhú?

⁴³ Haú mù, Ngò, nungmoq lé taí kôlé,
Garai Gasâng é mingdán lé, nungmoq
chyáng mai yù mù, hau é ashi wó zui
râ byuhú lé byí pyám râ nghut lhê.

⁴⁴ Luqgok haú má gyó záng é sù gi, gyuí
gyop byuq râ nghut lhê. Luqgok hau

èq gyó nhê záng é sù le, nhê pyeq
pyâm é hui râ nghut lhê.” ga ri.

⁴⁵ Hkyangjong agyi pé eq Hparishe pé
gi, haú Yesuq taí é dangtú pé lé wó
gyo kôjáng, yhangmoq lé taí nyi é
⁴⁶ hkyô lé, sê gyô akô nghut ri. Haú mù,
yhangmoq gi, Yhang lé chyup yû râ
hkyô ho nyi akô; nghut kôlhang, byu
pé gi, Yhang lé, myiqhtoi rayuq ga
myit lum to kô é yanmai, yhangmoq
gi, haú bang lé gyuq akô nghut ri.

Myiháng Poí Dangtú Pé

Luk 14:15-24

22 Yesuq, dangtú pé dông yhang-
² moq lé dum taí é gi, “Mau-
hkông mingdán gi, yhumsing yhangzô
é matú myiháng poí hen lajâng to byí
³ é hkohkâm rayuq eq du ri. Hkohkâm
hpó haú gi, yhang ji tô é bang, haú poí
má lé lô râ matú, yhang é dui-nhông
zoshâng wuì lé è tsing taí nhang ri;
nghut kôlhang, haú bang gi, a lé kut
akô nghut ri.

⁴ Hau htâng má, yhang gi, gotú
dui-nhông zoshâng wuì lé, ‘Ngò haí
le hen to bê; ngá é no eq xu-myum
é gau-nyháú pé lé sat mù, jung
hkanmó rì rì nghut to bê. Myiháng
poí má lé lò keq hkoi nghû, haú ji tô é
bang lé è taí keq.’ ga pyîng luí, nhang
kat ri.

⁵ Nghut kôlhang, haú ji to huí é bang
gi, dang haú lé haí su a gyô ngàm
kômù, rayuq gi, yohtung shut, rayuq
gi, hpugá dinggá hkyô shut è byuq
⁶ bekô nghut ri. Ra-am dum nghut jáng,
yhang é dui-nhông zoshâng wuì lé
lhom chyup yû kômù, nhuq bat luí,
⁷ sat pyám byí akô nghut ri. Haú mù,
hkohkâm gi, nhikjum yo luí, yhang é
gyezô pé lé, haú byù sat bang lé sat

^a 21:42 Hkya-on 118:22-23

pyám nhâng mù, yhangmoq é myuq lé nyhê hkyô pyám nhang ri.

- ⁸ Hau htâng má, yhang gi, yhâng é dui-nhâng zoshâng wuì lé, ‘Myiháng poí gi, rì rì nghut to bê; nghut kô-lhang, haû ji to huí é bang gi, lé
- ⁹ râ a gingdán kó nghut ri. Haû mù, hkyô kang pé má ê luí, myang é yuq hkgangmó lé, poí má lé râ matú ê jì
- ¹⁰ keq.’ ga taí ri. Haû jáng, dui-nhâng zoshâng haû bang gi, hkyô kang pé má htoq ê luí, myang é byù gè byù gang lunglhang lé ji tsíng yù kô é nghut mù, myiháng poí gi, bíng pé zung byíng bùm bê nghut ri.
- ¹¹ Nghut kôlhâng, bíng haû bang lé, hkohkâm hpó, lé wang wú é hkûn, myiháng poí wàng hking a wut tô é byù rayuq lé, yhang byu-myang ri.
- ¹² Haû mù, yhang gi, haû yuq lé, ‘Bui-nùm hpó ê, nàng gi, myiháng poí wàng hking le a wut é nhîng, shí má hkâsu kut wang lo é lúhú?’ ga myi jáng, haû yuq gi, haí le a dat tú taí lo nghut ri.
- ¹³ Haû hkûn, hkohkâm hpó gi, yhâng é dui-nhâng zoshâng wuì lé, ‘Yhâng é hkyî loq má tui luí, haû ngaubiyi ngàu nhap eq zuì kyik kyik shoq hpuzô nyì râ nghut é shinggan mauchut hkaû má, dú htoq pyám keq.’ gâ ri.
- ¹⁴ Hkâsu mù gâ le, byù myo myo gi, ji yu é hui kôlhâng, hkyin yù huí é bang gi, shaû ri.” gâ ri.

Kehtaq Lé Kang Kat Byí É Hkyô

Mrk 12:13-17; Luk 20:20-26

- ¹⁵ Hau htâng má, Hparishe pé gi, htoq ló kômù, Yhâng é dang pé má mara chyup râ hpaqchyí dâ akô nghut ri.
- ¹⁶ Yhangmoq gi, Herut é byu pé eq rahá, yhangmoq é chángzô pé lé, Yesuq chyáng nhang kat akô. Haû bang gi, Yesuq chyáng lé jé kômù, “Sarâ é,

Nàng gi, tengmán sù nghut é eq, Garai Gasâng é hkyô lé, tengmán é dông mhoqshit é sù nghut é lé le, Nàng gi, ó haí ga râ lé le haí su a ngàm sù nghut é yanmai, ó yuq é myoqdong lé le a tê byi sù nghut é hkyô lé le, ngamoq sê

¹⁷ lhê. Haû mù, hkoséng Kehtaqaq lé kang kat byí le gi, ge lhê lúhú? A gè lúhú? Nàng, hkâsu wó myit é hkyô taí kyô wú aq.” ga taí akô nghut ri.

- ¹⁸ Yesuq kúm gi, yhangmoq é agè ashop hkyô lé sé byi mù, “Gegùn labyoq kut bang ê, nungmoq gi, haí mù, Ngo lé lé chyam wú akô lúhú?
- ¹⁹ Kang kat râ ngùn htingchap rachap, Ngo lé byí wú keq.” ga taí kat ri. Haû hkûn, yhangmoq gi, denari rachap yù
- ²⁰ byí akô. Haû mù, Yhang gi, yhangmoq lé, “Shí má, ó yuq é alhò eq masat laiká dap tô ri lúhú?” ga myi jáng,
- ²¹ yhangmoq gi, “Kehtaqaq é nghut ri.” ga tú taí akô. Haû mù, Yhang gi, yhangmoq lé, “Kehtaqaq é lé gi, Kehtaqaq lé byi keq; Garai Gasâng é lé gi, Garai Gasang lé byi keq.” ga taí kat ri.
- ²² Haû su gâ é lé, wó gyo kô-jáng, haû bang gi, maú byuq kômù, Yhâng chyáng mai htoq ló byuq bekô nghut ri.

Saduke Pé, Yesuq Lé Myí Chyam É Hkyô

Mrk 12:18-27; Luk 20:27-40

- ²³ Haû nyí má yhang, haû dum dui toq hkyô a joq gâ é Saduke pé gi, Yesuq chyáng lé jé kômù, dangmyi lé myí
- ²⁴ akô. Yhangmoq myi kô é gi, “Sarâ ê, ‘Myiwe wó é byù rayuq gi, zo dù a dap é za shi byuq é nghut jáng, yhanggu gi, yhangmâng é awut ashín xoq byi râ matú, yhâng rhat lé chui gon ra râ nghut lhê.’ ga, nga-nhúng lé, Mo-
- ²⁵ sheq taí tô é nghut lhê. Hí hpyang lé, ngamoq chyáng, gumang nhiktâng

wùi nyhit yuq nyi akô. Lagám yuq gi, myiwe yù luí, zo dù a dap é za yhangmyi lé shi lhuí pyâm to bê nghut ri.

²⁶ Haú eq rajung za, Lanong, Lalaq mai Lahkâ jé shoq, chuimó háu lé gon luí, ó le zo dù a dap é za shi ló byuq bùm

²⁷ bekô nghut ri. Ló htáng má, myiwe myhí háu le châng shi ló byuq bê

²⁸ nghut ri. Haú mù luí, háu dum dui toq é buinyí má, myiwe myhí háu gi, háu nhiktâng wùi nyhit yuq mâ é hká yuq é yhangmyi nghut râ lhuí? Hkâsu mù gâ le, yhang gi, háu nhiktâng wùi banshoq bâng é yhangmyi dut wú bê sù nghut ri.” gâ akô.

²⁹ Háu hkûn, Yesuq gi, yhangmoq lé, “Nungmoq gi, Chyúmdang eq Garai Gasâng é wum-o a-tsam lé a sé kô é yanmai, hkyô nghoq akô nghut ri.

³⁰ Háu dum dui toq é buinyí má gi, myi byi myi yú hkyô joq lo râ a nghut; yhangmoq gi, mauhkûng htoq mâ é maumang lagyô pé su dut byuq kó râ

³¹ nghut lhê. Shi é mai dum dui toq bang

³² eq séng luí, Garai Gasang gi, ‘Ngò gi, Abraham é Garai Gasang, Isak é Garai Gasang, Yakup é Garai Gasang nghut lhê.’^a ga, nungmoq lé taí tô é lé, nungmoq a nghap wú kó lhuí? Yhang gi, shi to bâng é Garai Gasang a nghut; dui nyí bâng é Garai Gasang sheq ru nghut lhê.” ga taí ri.

³³ Byù moq mó gi, dang háu wó gyo kôjáng, Yhang mhoqshit é hkyô lé maú byuq bum akô nghut ri.

Ahkyak Dik É Jep É Tarâ

Mrk 12:28-34; Luk 10:25-28

³⁴ Saduke pé lé, Yesuq lhoq zím pyâm é hkyô lé, Hparishe pé wó gyo kôjáng, yhangmoq gi, Yesuq chyáng zup zîng

³⁵ lé bum akô. Yhangmoq má bo é tarâ

sará rayuq gi, Yesuq lé chyam wú é

³⁶ dông, “Sará ê, jep é tarâ má, hká lhum gi, je ahkyak dik lhê lhuí?” ga myí ri.

³⁷ Háu mù, Yesuq gi, “‘Háu Yhumsîng náng é Garai Gasang lé, náng é myit nhiklhum banshoq, náng é asak woi-nyí lhum gón, náng myit é hkyô banshoq èq, chyitdap râ lhê.’^b gâ é

³⁸ nghut lhê. Tarâ háu gi, je hí lhum eq je ahkyak dik é lhum nghut lhê.

³⁹ Hau htang lhum le háu eq du é nghut mù, ‘Náng gûng lé náng chyitdap é su, náng é chyangnâm mâ é bang lé

⁴⁰ le chyitdap aq.’^c gâ é nghut lhê. Tarâ háu í lhum gi, jep é tarâ banshoq eq myiqhtoi laiká banshoq é dangchyûng nghut lhê.” ga, yhang lé taí kat ri.

Hkrisduq Gi, Ô Yuq É Yhangzo?

Mrk 12:35-37; Luk 20:41-44

⁴¹ Hparishe pé zup zîng to kô é hkûn,

⁴² Yesuq gi, yhangmoq lé, “Nungmoq gi, Hkrisduq eq séng luí hkâsu myit ngam akô lhuí? Yhang gi, ó yuq é yhangzo nghut lhê lhuí?” ga myi jáng, yhangmoq gi, “Dawiq é yhangzo nghut ri.” ga tú taí akô.

⁴³ Háu mù, Yhang gi, yhangmoq lé, “Háu hkûn, Dawiq gi, Woi-nyí dông mai, Yhang lé, ‘Yhumsîng’ ga, háu mù wut lhê lhuí? Hkâsu mù gâ le, Dawiq taí é gi,

⁴⁴ ‘Háu Yhumsîng Garai gi, ngá é Yhumsîng lé, “Ngò, náng é gumlau gye pé lé, náng é hkyiwa ô má tô pyâm é hkyíng jé shoq, Ngá é loqyo hkyam shut zung nyí shi aq.” ga taí ri.’^d

⁴⁵ gâ ri. Háu mù, Dawiq yhang lhang, Hkrisduq lé, ‘Yhumsîng’ gâ é nghut

^a 22:32 Htoq Ló 3:6 ^b 22:37 Tarâ Pun 6:5 ^c 22:39 Nhong 19:18 ^d 22:44 Hkya-on 110:1

le gi, yhangzo za hkâsu ge nghut râ
⁴⁶ lú?” ga taí ri. Haû mù, ó yuq le,
 dang rahkun lháng a wó tû taí lo kô
 é nghut mù luí, haú nyí mai, ó yuq
 lháng Yhang lé dangmyi a wám myi
 lo kô nghut ri.

**Tarâ Sará Pé Eq Hparishe
 Pé Lé Sidiq Râ Hkyô**

Mrk 12:38-40; Luk 11:37-52, 20:45-47

23 Hau htâng, Yesuq gi, byù moq
 mó eq Yhâng é chángzô pé lé
² taí é má, “Tarâ sará pé eq Hparishe
 pé gi, Mosheq é tanghkuq má zung
³ akô. Haû mù, yhangmoq mhoqshit é
 hkyô chângjup lé, nungmoq châng kut
 ra kó râ nghut lhê. Nghut kôlháng,
 yhangmoq kut é dông gi, hkâkut kó;
 hkâsu mù gâ le, yhangmoq gi, yhang-
 moq taí é dông a kut kô nghut ri.
⁴ Yhangmoq gi, byu pé é goqsân má wò-
 lai ke byi kôlháng, yhangmoq yhang
 gi, wò haú pé lé bo waq râ matú,
 loqnyhui lháng a kâm lhoq tuí kô
 nghut ri.
⁵ Yhangmoq kut é hkyô lhunglháng
 gi, byu pé myàng râ matú za kut
 shit é nghut akô; haú chyúmbun bo é
 showuí-htúng pé lé lhoq kô yù kômù,
 buhíng pé mâ é banbyaú pé lé lhoq
⁶ hing yu akô nghut ri; yhangmoq gi,
 poí pé mâ é réng é jowò pé eq tara-
 jong pé mâ é ahkyak dik é zùng jang
 pé má, myang zùng râ lé ô nau nyi
⁷ akô; yhangmoq gi, gài pé má lhom
 shi-kyâm yù kó râ eq, byu pé mai,
 yhangmoq lé, ‘Rabai’^a ga lhom wut
 kó râ lé ô nau nyi bum akô.
⁸ Nungmoq kúm gi, ‘Rabai’ ga wut râ
 lé hkâ-ô nau kó; hkâsu mù gâ le, nung-
 moq gi, sará rayuq za wó lhê nghut
 é htoq agó, nungmoq banshoq bang

⁹ gi, gumang chyat ru nghut lhê. Haû
 mù, myidàm htoq má, ó yuq lé le,
 ‘âwa’ hkâ-nghú kó; hkâsu mù gâ le,
 mauhkûng htoq mâ é Íwa rayuq za,
¹⁰ nungmoq é Íwa nghut lhê. Hau htoq
 agó, ‘sará’ ga wut râ lé, hkâ-ô nau kó;
 hkâsu mù gâ le, Hkrisduq za, nung-
¹¹ moq é Sará nghut lhê. Nungmoq mâ
 é je gyaú sù gi, nungmoq é dui-nhâng
¹² zoshâng dut râ nghut lhê. Hkâsu mù
 gâ le, yhumsing gùng lé waq toq sù
 ó yuq nghut kôle, lhoq nyhum pyâm
 é hui râ nghut lhê, yhumsing gùng lé
 lhoq nyhúm sù kúm gi, waq toq é hui
 râ nghut lhê.

¹³ Gegùn labyoq nghut é, tarâ sará pé
 eq Hparishe pé ê, nungmoq gi, ding-
 nyé wó ri. Hkâsu mù gâ le, nungmoq
 gi, byu pé hí má, mauhkûng mingdán
 hkyô lé xaú tô akô; nungmoq yhang
 le a wàng kó, wàng nau nyi bang lé
¹⁴ le a wàng nhâng kó nghut ri. (Ge-
 gùn labyoq nghut é, tarâ sará pé eq
 Hparishe pé ê, nungmoq gi, dingnyé
 wó ri. Hkâsu mù gâ le, nungmoq gi,
 chuimó pé é yhúm-yò pé lé hpyoq zo
 hpyoq shuq é eq kyú hîng hîng dúng
 shit mhaú é bang nghut akô; haú mù,
 dam byí é je myo hui zo kó râ nghut
 lhê.)^b

¹⁵ Gegùn labyoq nghut é, tarâ sará pé
 eq Hparishe pé ê, nungmoq gi, ding-
 nyé wó ri. Hkâsu mù gâ le, nungmoq
 gi, byù rayuq lé nungmoq é noqkuq
 htúng má wó lhoq lhiq yú râ matú,
 myí hkyô, wui hkyô, châng jón wún
 kômù, wó lhoq lhiq yu é sù lé gi, nung-
 moq su ngaraí byù í tú shuí dut akô
 nghut ri.

¹⁶ Hkyô-u she é myoqjit pé ê, nung-
 moq gi, dingnyé wó ri. Nungmoq gi,
 ‘Noqkuq yhúm lé lang luí dakam é

^a 23:7 Aramaik dang dông *rabai* gâ é gi, sará gâ é lichyúm nghut lhê. ^b 23:14 Chyúmding
 ra-am má gi, bun zo 14 shí a bo é nghut lhê.

sû gi, haî a ra; noqkuq yhûm mâ é hîng lé lang mù dakam é sù kúm gi, ¹⁷ cháng ra bê.' ga lhaq taî akô. Myoq-jit é byù nâ pé ê! Haû hîng eq hîng lé lhoq yúnglhô é noqkuq yhûm gi, ¹⁸ hká lhum je ahkyak lhê lú? Hau htoq agó, nungmoq gi, 'Haû hkungga gyap lé lang luî dakam é sù gi, haî a ra, nghut kôlhang, haû hkungga zè lé lang mù dakam é sù gi, cháng ra bê.' ¹⁹ ga le, lhaq taî akô nghut ri. Myoqjit pé ê! Haû hkungga zè eq hkungga zè lé lhoq yúnglhô é hkungga gyap gi, ²⁰ hká lhum je ahkyak lhê lú? Haû mù, haû hkungga gyap lé lang luî dakam é sù gi, haû hkungga gyap eq hau é ahtoq má ke tô é zè banshoq lé lang ²¹ luî dakam é sù dut bê nghut ri. Noqkuq yhûm lé lang luî dakam é sù gi, haû noqkuq yhûm eq haû má nyi é Sù lé lang luî dakam é sù dut bê nghut ri. ²² Hau htoq agó, mauhkûng lé lang luî dakam é sù gi, Garai Gasâng é tanghkuq eq haû má zung é Sù lé lang luî dakam é sù dut bê nghut ri. ²³ Gegùn labyoq nghut é, tarâ sará pé eq Hparishe pé ê, nungmoq gi, dingnyé wó ri. Hkâsu mù gà le, nungmoq gi, xunmân nghut é gau-tsáng shingtón, bantsaí, hpakkyí pé mâ é xê gambùm ragambùm lé gi, byî nyi kômù, je ahkyak é tarâ nghut é, tarâ rap-rá hkyô, shogyo nhikmyin hkyô eq lhumzui hkyô pé lé gi, lhaî pyâm tô akô nghut ri. Hî lhum lé kut é su, ²⁴ htang lhum lé le kut râ lhê. Hkyô-u she é myoqjit pé ê! Nungmoq, pyup lé gi, jân pyám kômù, gola-uq lé gi, myui pyâm akô nghut ri. ²⁵ Gegùn labyoq nghut é, tarâ sará pé eq Hparishe pé ê, nungmoq gi, dingnyé wó ri. Hkâsu mù gà le, nungmoq gi, zo hkoq shuq góm pé lé ahtoq shut za chí yúng mù, ahte má gi, lú zo lú

shuq é eq yhumsing maiwáng zat é ²⁶ myit byíng zan tô ri. Hparishe myoq-jit pé ê! Zo hkoq shuq góm é ahte lé hí chí yúng pyám keq, haû jáng, ahtoq le sânyúng râ nghut lhê. ²⁷ Gegùn labyoq nghut é, tarâ sará pé eq Hparishe pé ê, nungmoq gi, dingnyé wó ri. Hkâsu mù gà le, nungmoq gi, but hpyu tô é lup pé eq du akô; haû pé gi, ahtoq má wú yúng kôlhang, ahkaû má gi, mâng bup showui pé eq achaoq achyut é chângjup byíng tô é ²⁸ nghut ri. Haû eq rajung za, nungmoq gi, byu pé hí má, ahtoq pyâm dingmán é su kut shit kôlhang, ahkaû má gi, gegùn labyoq kut é eq agè ashop é hkyô pé byíng zan tô ri. ²⁹ Gegùn labyoq nghut é, tarâ sará pé eq Hparishe pé ê, nungmoq gi, dingnyé wó ri. Hkâsu mù gà le, nungmoq gi, myiqhtoî pé é lup lé luptsuq tsuq kômù, dingmán bâng é lup pé lé mhón ³⁰ byi kôluí, 'Ngamoq gi, ngamoq é îchyí îwa pé é ipyat má nyi âng é ru nghut le gi, haû myiqhtoî pé é sui lhoq shun é bang má, ngamoq bo lôm râ a nghut.' ³¹ ga lhaq taî akô. Haû su mù, nungmoq gi, haû myiqhtoî pé lé sat pyám bâng é awut ashín pé nghut é hkyô lé, nungmoq gùng nungmoq saksé hkam yu ³² nyi akô nghut ri. Haû mù, nungmoq é îchyí îwa pé hi tô é muzó lé, banshoq châng kut pán keq! ³³ Lhangmuí pé ê, duq htân lhangmuí amyû pé ê! Ngarai ming é dam byi hkyô mai, hkâsu wó hpang lut kó ³⁴ râ lú? Hau é yanmai, myiqhtoî pé, hpaqchyî bò bang eq chyúm sará pé lé, Ngò, nungmoq chyáng nhang kat râ nghut lhê. Haû bang mâ é ra-am lé gi, nungmoq lhom sat pyám mù, tapzîng má jén pyám kó râ nghut lhê; ra-am lé gi, nungmoq é tarajong pé má, nhuq bat kômù, ra-myuq htâng

ra-myuq châng hkak zing-rî wún kó râ
³⁵ nghut lhê. Hau é yanmai, haû ding-
 mán sù Abelaq é sui mai hî luí, noq-
 kuq yhûm eq hkungga gyap gyoro
 má nungmoq sat pyâm é, Berehkiak é
 yhangzo Zahkariq é sui jé shoq, myi-
 dàm htoq má shun pyâm é dingmán
 bang banshoq é sui gi, nungmoq é
³⁶ ahtoq má jé lô râ nghut lhê. Ngò,
 nungmoq lé teng za taí kôlé, shí hkyô
 banshoq gi, ipyat shi é ahtoq má jé râ
 nghut lhê.
³⁷ Yerusalem ê, Yerusalem ê, myiqhtoí
 pé lé sat pyám pyám kut mù, náng
 chyáng nhang kat é bang lé luqgok èq
 dú sat sat kut é myuq nàng ê, woq-
 zìng gi, yhangzô pé lé, yhâng é dùng
 hkaû má tsíng lhûng yu é su, nungzô
 pé lé, Ngò, hkâ-myhó dâm shuí tsíng
 yù naù kôlhang, nàng a dóng nghut ri.
³⁸ Wú keq, nungmoq é yhûm gi, nung-
 moq é matú chamchyuiyui dut pyâm
³⁹ to berâ nghut lhê. Hkâsu mù gâ le,
 Ngò, nungmoq lé taí kôlé, ‘Yhumsing
 é myìng mai jé lé lo é Sù gi, hkungsô
 wó nyí sháng gaq.’^a ga, nungmoq a
 taí taí gi, Ngo lé wó myâng kó râ a
 nghut lo.” gâ ri.

Ló Htâng Buinyì Má Dut Lò Râ Hkyô

Mrk 13:1-31; Luk 21:5-33

24 Yesuq gi, noqkuq yhûm mai
 htoq e ló é u lé, Yhâng é
 chángzô pé gi, Yhâng é nàm má huí lé
 lô kômù, haû noqkuq yhum é loqmú
² pé lé tûn shit akô. Haú hkûn, Yesuq
 gi, yhangmoq lé, “Haú pé banshoq lé,
 nungmoq myang lhê a nghut kó lú?
 Ngò, nungmoq lé teng za taí kôlé, luq-
 gok haú pé gi, rachâm htoq racham
 lháng a kê lhum loshoq, hpoyq hpyi
 pyâm é hui râ nghut lhê.” ga taí ri.

³ Yesuq gi, Tsanlun Bùm má zung tô
 é hkûn, haû chángzô pé gi, yhangmoq
 baú Yhâng chyáng lé jé kômù, “Haú
 hkyô pé gi, hkâ-nhám dut lò râ lú?
 Nàng gyó lé râ hkûn eq ló htâng bui-
 nyì má, hkasû é kumlhá htoq lô râ
 nghut lhê lú? Ngamoq lé taí kyô wú
 laq.” ga, Yhang lé myí akô.

⁴ Haú hkûn, Yesuq, yhangmoq lé tû
 taí é gi, “Nungmoq lé, ó yuq èq le a wó
 shuí nghoq sháng gaq, sidiq nyi keq.

⁵ Hkâsu mù gâ le, ‘Ngò gi, haû Hkrisduq
 nghut lhê.’ ga, Ngá myíng lé lêng é
 byù myo myo pô htoq lô mù, byù
 myo myo lé hkyô shuí nghoq kó râ
 nghut lhê. Nungmoq gi, majan dut nyi

⁶ é hkyô eq majan eq sêng é danglám pé
 lé, wó gyo kó râ nghut lhê; nghut kô-
 lhang, hkâgyuq dàn kó. Haú hkyô pé
 gi, dut lò râ za nghut lhê; nghut kô-
 lhang, ló htâng é buinyì gi, a nghut

⁷ shi. Byù ra-myû eq ra-myû, mingdán
 ralhûm eq ralhûm majan zân lhûm lò
 kó râ nghut lhê. Jowò myo myo má,
 mutmó gyó é pé eq layàng nún é pé

⁸ dut lò râ nghut lhê. Haú pé gi, wú-
 hke jamjau hkyo é apûn awang za ru
 nghut ashí.^b

⁹ Haú hkûn, nungmoq gi, zing-rî é eq
 sat pyâm é hui zo râ matú, ap pyâm é
 hui kó râ nghut lhê. Byù myú lhung-
 lhang bang gi, Ngá é yanmai, nung-

¹⁰ moq lé a ngui kut kó râ nghut lhê. Haú
 u lé, byù myo myo gi, lumjìng myit
 lé tô pyám kômù, rayuq eq rayuq a
 ngui lhum dut é htoq agó, rayuq eq
 rayuq ap pyâm lhum kó râ nghut lhê.

¹¹ Hau htoq agó, myiqhtoí pyoq pé myo
 myo pô htoq lô kômù, byù myo myo lé

¹² hkyô shuí nghoq kó râ nghut lhê. Agè
 ashop é hkyô myô jat lo é yanmai, byù
 myo myô é chyitdap myit gi, kân ló

^a 23:39 Hkya-on 118:26 ^b 24:8 Esai 19:2

- ¹³ byuq râ nghut lhê; nghut kôlhang, ji-htâm jé shoq wó hkam jân nyi é sù
- ¹⁴ gi, hkyi yu é hui râ nghut lhê. Byù myû banshoq má saksé dut râ matú, haû mingdán eq sêng é gabú danglù lé, mingkan gón má hko kyo râ nghut lhê. Hau htâng má sheq, ló htum buinyi jé râ nghut lhê.
- ¹⁵ Haû mù luí, myiqhtoi Danielaq dông mai taí tô é eq rajung za, ‘haû lhoq hten lhoq hpyoq é achayut hkyô’^a gi, chyoiyúng jowò má shap tô é lé, nungmoq myàng kó râ nghut lhê. (Chyúmlaiká nghap sù gi, sê gyo sháng gaq). Haú hkûn, Yuda mau má nyi é bang gi, bùm pé shut hpang doq
- ¹⁷ ló kó sháng gaq. Yhumhkûng htoq má nyi tô é sù gi, yhúmhaû má é zè haí lé le, a ló gyó wang yù lo sháng gaq.
- ¹⁸ Yò má nyi tô é sù gi, yhâng é buhíng
- ¹⁹ lé a ló taú yu nyi lo sháng gaq. Haú buinyi pé má, zogúng dut é myiwe eq naú huq ashí nghut é înu wui gi, gyai yhang wuîhke jamjau kó râ nghut
- ²⁰ lhê. Haú nungmoq hpâng râ buinyi gi, gyoqmyò,^b a nghut jáng, Bánno buinyi má a ang râ matú, kyûdûng nyi
- ²¹ keq. Hkâsu mù gâ le, mingkan lé joq é hkûn mai ahkuí jé shoq, hkâ-nhám le a dut wú shí é wuîhke jamjau mó gi, haú buinyi pé má dut lò râ nghut lhê; haú sù é hkyô gi, htângnùng má hkâ-nhám le dum dut lo râ a nghut.
- ²² Buinyi haú pé lé lhoq shaú pyâm é za a nghut le gi, ó yuq le asak wó lut râ a nghut; nghut kôlhang, Garai Gasang èq hkyin yù hui bâng é matú gi, buinyi haú pé lé, lhoq shaú
- ²³ pyám byi râ nghut lhê. Haú ahkýng má, byù rayuq yuq mai, nungmoq lé, ‘Wú keq, shí má Hkrisduq nyi ri.’ ga, haú a nghut jáng, ‘Wú keq, Yhang hê
- má nyi ri.’ ga taí jáng, nungmoq hkâ-jíng kó. Hkâsu mù gâ le, Hkrisduq pyoq pé eq myiqhtoi pyoq pé pô htoq lô mù, wó dut é nghut jáng, hkyin yù hui bang lé lháng, wó lhoq nghoq shoq ga, kumlhá mó pé eq laklaí kumlhá pé lé kut shit kó râ nghut lhê.
- ²⁵ Gyo keq, shí hkyô a dut shimá, Ngò, nungmoq lé taí kyô nyi gù nghut lhê.
- ²⁶ Haû mù, rayuq yuq èq, nungmoq lé, ‘Yhang gi, yoso má nyi ri.’ gâ jáng le, hkâ-ê kó; ‘Yhang gi, shí gok hkaû má lúng tô ri.’ ga jáng le, hkâjíng kó.
- ²⁷ Hkâsu mù gâ le, bui htoq hkyam má lhap hpyat é gi, bui wang hkyam má lháng jé shoq duqbó é su, haú Byu Yhangzo jé lé é hkûn le, dut râ nghut
- ²⁸ lhê. Màng leq é jang má, langdâ pé, lé zíng bùm râ nghut lhê.
- ²⁹ Buinyi haú pé má é wuîhke jamjau lai eq yhang,
‘Bui gi, noq byuq mù, lhamó gi, a tsò dut byuq râ nghut lhê;
kyi pé gi, mauhkûng mai byit gyó lo bùm mù, mauhkûng má é wum-o a-tsam pé gi, lhoq nhún é huí bùm kó râ nghut lhê.’^c
- ³⁰ Haú hkûn, haú Byu Yhangzò é kumlhá gi, mauhkûng má htoq shit lô râ nghut mù, myidàm htoq má é byù myû lunglhang gi, yón ngau bùm kó râ nghut lhê. Haú Byu Yhangzo gi, mauhkûng mai, mhut ji mù, hpungwup a-tsam mó eq le, hpungwup shingkâng eq le, gyó lé lo é lé, yhangmoq byu-myàng kó râ nghut lhê. Hau htâng má, Yhang gi, Yhâng é mau-mang lagyô pé lé, tut htê mó èq nhang kat luí, yhangmoq gi, maumyí chyún myi chyún eq mauhkûng ra-

^a 24:15 Dan 9:27, 11:31, 12:11 ^b 24:20 Israelaq mau má gi, gyoqmyò lé hkyô htoq le gyai wuîhke é ahkýng nghut lhê. ^c 24:29 Esai 13:10, 34:4

hkyam mai, gó hkyam htum shoq mâ é, Yhang hkyin yu tô é bang lé shuí tsing yù kó râ nghut lhê.

- ³² Maihpáng gâm lé wú mù, mhog yû keq; agàm mai a-nyuq nyún lô mù, ahaq htut lô jáng, bui nyé nám chyâng
- ³³ lò bê lé, nungmoq sê lhê. Haû eq rajung za, shí hkyô banshoq^a lé, nungmoq myàng kôjáng, Yhang gi, chyáng bê nghut mù, hkúmdong má lhang nghut nyí bê hkyô lé, nungmoq sé
- ³⁴ lo keq. Ngò, nungmoq lé teng za taí kôlé, shí pyat mâ é byu pé a ban shi byuq shimá, haû hkyô pé^b banshoq dut byuq râ nghut lhê. Mauhkûng eq myigùng gi, a joq lo dut byuq râ nghut lhê; nghut kôlhang, Ngá é dang gi, ru joq nyí râ nghut lhê.

Haû Buinyi Eq Ahkyíng Lé, Ó Le A Sé

Mrk 13:32-37; Luk 17:26-30, 34-36, 12:35-48

- ³⁶ Buinyi eq ahkyíng haú lé gi, ó yuq le a sé; mauhkûng htoq mâ é mau-mang lagyô pé lhang a sé; haû Zo le
- ³⁷ a sé; haû Íwa za ru sê lhê. Noaq é tsín pyat má dut é su, haû Byu Yhangzo lé
- ³⁸ lo é hkûn le, dut râ nghut lhê. Hkâsu mù gâ le, dowuí a dítng shí é buinyi pé má, byu pé gi, Noaq, wui-sanghpo mó hkaû má wang é hkûn jé shoq, zo zo shuq shuq, myi byi myi yû, kut nyi
- ³⁹ bum akô nghut ri; yhangmoq gi, dowuí dítng lô mù, yhangmoq banshoq lé úm sat pyâm é hkûn jé shoq, haû dut lò râ lé, a sé kó dut bùm é su, haû Byu Yhangzo lé lo é hkûn le, dut râ
- ⁴⁰ nghut lhê. Haú hkûn, yò má rahá nyi tô é byù í yuq mâ é rayuq gi, shuí yu é hui mù, rayuq gi, myit gyó to râ nghut
- ⁴¹ lhê. Luquíu chòm lhang nyi é myiwe í yuq mâ é rayuq gi, shuí yu é hui mù,

rayuq gi, myit gyó pyâm to râ nghut lhê.

- ⁴² Haû su mù, haû nungmoq é Yhum-síng gi, hká nyí jé lé lô râ lé, nungmoq a sê kô é yanmai, sidiq machya nyí
- ⁴³ keq. Myín hká u má hkau sù jé lé lô râ lé, yhumsíng sê é ru nghut le gi, yhang é yhúm má a wó hput wâng nhâng loshoq, yhang machya nyí râ nghut é
- ⁴⁴ lé, nungmoq sê gyô nyí keq. Haû mù, nungmoq le rí rí nghut nyí keq; hkâsu mù gâ le, haû Byu Yhangzo gi, a bûn nùng má jé lé lô râ nghut lhê.
- ⁴⁵ Yhumsíng hpô é dui-nhâng zoshâng wui lé, uphkâng râ eq ahkyíng jé jáng zoshuq gàm byi râ matú, yhum-síng hpô èq mù nhang tô é, lhum-zui luí, hpaqchyí bo é dui-nhâng zo-
- ⁴⁶ shâng gi, ó yuq nghut râ lú? Yhum-síng hpó dum taú lo é hkûn, haû su kut nyí lhang é dui-nhâng zoshâng
- ⁴⁷ gi, hkungsô wó nyi ri. Ngò, nungmoq lé teng za taí kôlé, yhumsíng hpó haû gi, yhang é sutzè banshoq, dui-nhâng zoshâng haú yuq lé ap to
- ⁴⁸ râ nghut lhê. Nghut kôlhang, laqma mù, dui-nhâng zoshâng haú yuq gi, agè ashop sù nghut luí, 'Ngá é yhum-síng hpó jé lô râ gyai myáng ashí.' ga, yhang é i-myt unghkaú má myit
- ⁴⁹ yù mù, gotú dui-nhâng zoshâng luzúm wuí lé nhuq bat é htoq agó, í shuq wut bang eq rahá zo zo shuq shuq
- ⁵⁰ kut nyi é nghut le gi, dui-nhâng zoshâng hau é yhumsíng hpó gi, yhang a myitngam tô é buinyi eq yhang a sê tô é ahkyíng má jé lô mù,
- ⁵¹ yhang lé jap pyám luí, gegùn labyoq kut bang hkâm zô é, ngaubyi ngàu nhap eq zui kyik kyik shoq hpuzô nyí râ jowò má hkyô pyám râ nghut lhê.

^a 24:33 *Shí hkyô banshoq* gâ é gi, Yesuq jé lé râ hí má dut râ hkyô pé lé taí é nghut lhê.

^b 24:34 *Haû hkyô pé gâ* é gi, Yerusalem noquq yhúm htên byoq râ lé taí é nghut lhê.

Zomyi Raxê Yuq Lé Dangtú Yu É Hkyô

- 25** Haú hkûn, mauhkûng ming-dán gi, myibung yu chûng mù, lusik lé te yù râ ga, htoq e ló é zomyi raxê yuq eq pûng râ nghut lhê.
- ² Haú bang má, ngo yuq gi, nhik a gying kó; ngo yuq gi, nhik gyîng akô
- ³ nghut ri. Haú nhik a gyîng é bang gi, myibung yu chûng kôlhang, xû
- ⁴ a yu chûng kó nghut ri. Nghut kôlhang, haú nhik gyîng é bang kúm gi, yhangmoq é myibung lé le, xû bo é
- ⁵ bông lé le yu chung akô nghut ri. Lusik jé lé lô râ myáng nyi é yanmai, yhangmoq banshoq bang gi, yhup mui lò kômù, yhup myhî byuq bekô nghut ri.
- ⁶ Myín gunggàm jé jáng, ‘Lusik jé bê ô! Yhang lé te yù râ matú, htoq lé lô keq hkoì ô!’ ga, garú é htê htoq lo ri.
- ⁷ Haú hkûn, zomyi haú bang banshoq gi, toq lô mù, yhangmoq é myibung lé
- ⁸ hen lajâng akô nghut ri. Haú nhik a gyîng bang gi, ‘Ngamoq lé, xû ratsuí byi kó laq; hkâsu mù gâ le, ngamoq é myibung shi lô nyi ri.’ ga, haú nhik gying bâng chyáng dúng akô.
- ⁹ Haú hkûn, haú nhik gying bang gi, ‘Nungmoq eq ngamoq é matú ga jáng, luq râ a nghut. Haú mù, nungmoq é matú, xû ung bâng chyáng ê wui yù keq.’ ga tû taí kat akô.
- ¹⁰ Yhangmoq, xû wui e ló kô é hkûn, lusik gi, jé lé lô mù, haú rì rì hen tô é zomyi wui gi, yhang eq rahá myiháng poí má wang lô bekô. Hkum le myhî byuq bê nghut ri.
- ¹¹ Hau htâng má, hau htâng gyó tô é zomyi wui gi, tau jé lô kômù, ‘Yhumsîng ê! Yhumsîng ê! Ngamoq lé, hkum hpóng byi laq ô!’ ga taí akô.
- ¹² Nghut kôlhang, haú lusik gi, ‘Ngò, nungmoq lé teng za taí kôlé, nungmoq lé ngò a sé.’ ga tû taí kat ri.

- ¹³ Haú mù luí, haú Byu Yhangzo jé lé râ buinyì eq ahkyíng lé, nungmoq a sé kô é yanmai, sidiq machya nyi keq.

Dui-nhâng Zoshâng Sum Yuq Lé, Dangtú Yu É Hkyô

Luk 19:11-27

- ¹⁴ Mauhkûng mingdán gi, byù rayuq byìn we htoq râ hen nyi é nghut mù, yhâng é dui-nhâng zoshâng wui lé wut yù luí, yhâng é sutzè lé ap byí to sù eq
- ¹⁵ pung ashî nghut ri. Yhang gi, yhangmoq é a-tsam má cháng luí, rayuq lé gi, í joí, htâng rayuq lé gi, rajoí kut byí to mù, byìn we shut htoq lô byuq bê nghut ri.
- ¹⁶ Ngùn ngo joí wó yù sù gi, haú hkûn jáng htoq lô mù, hpugá gá luí, ngùn
- ¹⁷ ngo joí wó myat yù bê nghut ri. Haú eq rajung za, ngùn í joí wó yù sù le,
- ¹⁸ í joí wó myat yù bê nghut ri. Nghut kôlhang, rajoí za wó yù sù gi, htoq e ló mù, myigùng má du luí, yhâng yhumsîng hpô é ngùn lé haq myhup tô ri.
- ¹⁹ Hau htâng tsómra myáng jáng, dui-nhâng zoshâng haú bâng é yhumsîng hpó gi, dum taú jé lô mù, yhangmoq é ngùn chyarâng lé, lo jep ri.
- ²⁰ Ngùn ngo joí wó yù sù gi, amyat ngo joí lé le yu lé lô mù, ‘Yhumsîng ê, nàng, ngo lé, ngùn ngo joí ap tô é nghut lhê. Wú aq, amyat ngo joí wó ho jat yù bê.’ ga taí ri.
- ²¹ Haú hkûn, haú yhumsîng hpó gi, ‘Arâ! Nghut bê. Nàng gi, kyet é eq lumgíng é dui-nhâng zoshâng nghut ri! Tiq é mú má lháng wó lum é sù nghut é yanmai, ngò, nang lé, kô é mú lé le ap byi râ nghut lhê. Nàng yhumsîng hpô é gabú hkyô má bo wang lòm aq hkoì!’ ga tû taí ri.
- ²² Haú eq rajung za, í joí wó yù sù le, lé lô mù, ‘Yhumsîng ê, nàng, ngo lé ngùn

í jói ap tô é nghut lhê. Wú aq, amyat í jói wó ho jat yù bê.' ga, lé tái ri.

²³ Haú hkûn, haú yhumsîng hpó gi, 'Arâ! Nghut bê. Nàng gi, kyet é eq lumgîng é dui-nhâng zoshâng nghut ri! Tiq é mù má lháng wó lum é sù nghut é yanmai, ngò, nang lé, kô é mù lé le ap byi râ nghut lhê. Náng yhumsîng hpô é gabú hkyô má bo wang lòm aq hkoi!' ga tui tái ri.

²⁴ Hau htâng, rajoí wó yù sù le, lé lô mù, 'Yhumsîng ê, nàng gi, byù wui nghut mù, yhumsîng a hô tô é jang mâ é shù yù nau é htoq agó, yhumsîng, kyôshi a sân hkyô tô é jang mâ é tsîng yù nàu sù nghut é lé, ngò sê

²⁵ lhê. Haú mù, ngò gi, gyuq luí, htoq ê mù, náng é ngùn lé, myigùng má ê haq myhup tô é nghut lhê. Wú aq, shí gi, nàng é ngùn nghut lhê.' ga tái ri.

²⁶ Haú mù, yhumsîng hpó gi, yhang lé, 'Agè ashop é eq lagôn é dui-nhâng zoshâng ê! Ngò gi, yhumsîng a hô tô é jang mâ é shù yù nau é eq, yhumsîng, kyôshi a sân hkyô tô é jang mâ é tsing yù nàu sù nghut é lé, nàng sê to

²⁷ gù nghut le nhîng, ngá é ngùn lé, ngò dum taú jé lô jáng, aráng eq amyat wó yù shoq, ngùn hpún kat jang má, haí mù a kat tô é lú?

²⁸ Haú mù, haú ngùn rajoí lé, náng chyáng mai yù luí, raxê jói wó to sù lé,

²⁹ byí pyám nhâng râ nghut lhê. Hkâsu mù gâ le, wó sù ó yuq lé nghut kôle, yhang agùn agó wó râ matú, jat byi râ nghut lhê. A wó su chyáng mai kúm gi, yhang wó tô é lé lháng yu pyám byi

³⁰ shirâ nghut lhê. Haú mù, haú akyû a bo é dui-nhâng zoshâng lé gi, ngau-byi ngau nhap eq zuí kyik kyik shoq hpuzô nyí râ jowò nghut é, shinggan mauchut hkaú má dú htoq pyám keq.' gâ ri.

Sau Eq Bainám

³¹ Haú Byu Yhangzo gi, Yhâng é hpungwup shingkang mai, maumang lagyo lunglhang bang eq rahá jé lé lo é hkûn, Yhâng é hpungwup shingkang bo é hkohkâm-tanghkuq htoq

³² má zùng râ nghut lhê. Haú hkûn, byù myû chângjup gi, Yhâng é hí má zîng lé lo bùm kó râ nghut mù, Yhang gi, sau zúng sù mai, sau eq bainám lé gotú tui kut gam hkoq é su, byu pé lé

³³ gam hkoq pyám râ nghut lhê. Yhang gi, sau pé lé, loqyo hkyam shut, bainám pé lé, loqpaí hkyam shut kut, nyhi to râ nghut lhê.

³⁴ Hau htâng má, haú Hkohkâm gi, Yhâng é loqyo hkyam shut mâ é bang lé, 'Ngá Wâ chyáng mâ é shimân jeju hkam yu é hui bang ê, lé keq; mingkan lé hpan é hkûn mai, nungmoq é matú ga hen lajâng tô é muí mingdán má

³⁵ wang ló keq. Hkâsu mù gâ le, Ngò zò-mut é u lé, nungmoq, Ngo lé byi tso kô é nghut lhê; Ngò wuìshit é u lé, nungmoq, Ngo lé byi huq kô é nghut lhê; Ngò bíng kut wún é u lé, nungmoq, Ngo lé lhom hkulum yù kô é nghut

³⁶ lhê; Ngò gùngchín dut é u lé, nungmoq, Ngo lé byi hut kô é nghut lhê; Ngò nõhpyo huí é u lé, nungmoq, Ngo lé wú gon kô é nghut lhê; Ngò htóng lúng é u lé, nungmoq, Ngo lé lé kum kô é nghut lhê.' ga tái râ nghut lhê.

³⁷ Haú hkûn, haú dingmán bang gi, Yhang lé, 'Yhumsîng ê, Nàng zòmut huí é lé, ngamoq, hkâ-nhám myàng luí, byi tsô wú é lú? Nàng wuìshit é lé, ngamoq, hkâ-nhám myàng luí, byi

³⁸ huq wú é lú? Nàng bíng kut wún é lé, ngamoq, hkâ-nhám myàng luí, lhom hkulum wú é lú? Nàng gùngchín dut é hkûn, ngamoq, hkâ-nhám byi hut

³⁹ wú é lú? Nàng nõhpyo huí é lé le, htóng lúng é lé le, ngamoq, hkâ-nhám

myàng luí, lé gon lé kûm wú é l hú?’
ga myi kó râ nghut lhê.

⁴⁰ Háu hkûn, háu hkohkâm gi, ‘Ngò, nungmoq lé teng za taí kôlé, shí, Ngá gumang wui mâ é je tiq sù lé, nungmoq kut byí é hkyô haí le, Ngo lé kut byí é nghut bê.’ ga tû taí râ nghut lhê.

⁴¹ Háu htâng má, Yhang gi, Yhâng é loqpaí hkyam shut mâ é bang lé, ‘Dingnyé wó é bang ê, Ngá chyáng mai gâng ló mù, nat Tsadán eq yhâng é maumâng pè é matú hen tô é, ahtum
⁴² abyuq é myi má wang ló keq. Hkâsu mù gâ le, Ngò zòmut é u lé, nungmoq, Ngo lé a byi tso kó; Ngò wuìshit é u lé,
⁴³ nungmoq, Ngo lé a byi huq kó; Ngò bíng kut wún é u lé, nungmoq, Ngo lé a lhom hkulum yù kó; Ngò gùngchín dut é u lé, nungmoq, Ngo lé, mebu a byi hut kó; Ngò nõhpyo huí é eq htóng lúng é u lé, nungmoq, Ngo lé a gon kó nghut ri.’ ga taí râ nghut lhê.

⁴⁴ Háu hkûn, yhangmoq gi, ‘Yhumsîng ê, nàng zòmut wuìshit é, bíng kut wún é, gùngchín dut é, nõhpyo huí é eq htóng lúng é lé, ngamoq, hkâ-nhám myàng luí, a wú gon kut wú é l hú?’ ga taú myi kó râ nghut lhê.

⁴⁵ Háu hkûn, Yhang gi, ‘Ngò, nungmoq lé teng za taí kôlé, shí bang mâ é je tiq sù lé, nungmoq, a kut byí é hkyô haí le, Ngo lé a kut byí é nghut bê.’ ga, yhangmoq lé tû taí râ nghut lhê.

⁴⁶ Háu mù luí, háu bang gi, ahtum abyuq mara dam byí é má wang ló kó râ nghut lhê; háu dingmán bang kúm gi, ahtum abyuq é asak má wang ló kó râ nghut lhê.” ga Yesuq taí ri.

Yesuq Lé, Sat Râ Da Kô É Hkyô

Mrk 14:1-2, Luk 22:1-2; Yhn 11:45-53

26 Yesuq gi, háu hkyô pé lé ban taí é htâng má, Yhâng é
² chángzô pé lé, “Nungmoq sê tô é eq

rajung za, í nyí laí é htâng má, Lhoqlhai Poí jé râ nghut mù, háu Byu Yhangzo gi, tapzîng má jén sat é hui râ matú, ap pyám é hui râ nghut lhê.” ga taí ri.

³ Háu u lé, hkyangjong agyi pé eq suwún wui gi, Kayahpaq gâ é hkyangjong mó rayuq é yhumwàng má zup
⁴ zîng to kômù, Yesuq lé haq chyup yû râ eq sat pyám râ hkyô lé, hpyê
⁵ lhúm bum akô nghut ri. Nghut kôlhang, yhangmoq gi, “Byu pé gabyông lò kó abe, poí gyoro má gi, a kut shi sháng.” ga, taí lhúm akô nghut ri.

Yesuq, Xû Hut Gyun Huí É Hkyô

Mrk 14:3-9; Yhn 12:1-8

⁶ Yesuq gi, Behtani wà má nyi é manggâm dap wú sù Simûn é yhúm
⁷ má nyi tô é hkûn, myiwe myhí rayuq gi, gyai hpaú é namngón xû bo é luq hpyû bông yu lé lô mù, Yesuq zo shuq nyi é hkûn, namngón xû háu lé, Yhâng é ulhum má hut gyun byí ri.

⁸ Háu hkyô lé, háu chángzô pé myàng kôjáng, wú nhik-yo kômù, “Haí mù luí, háu lé aha agó kut pyám lhê l hú?
⁹ Xû háu lé, ahpaú myo myô èq úng pyám mù, myùng bang lé byí le ge lhê mhaí!” ga taí kat akô.

¹⁰ Yesuq gi, háu hkyô lé sé luí, “Haí mù, myiwe zo háu lé, i-myt lhoq myô nyi akô l hú? Yhang gi, Ngá é ahtoq má ge é hkyô kut bê nghut ri.

¹¹ Háu myùng bang gi, nungmoq eq rahá hkâ-nhám le nyi râ nghut lhê; nghut kôlhang, Ngò gi, nungmoq eq rahá
¹² ayang nyi nyi râ sù a nghut. Yhang, Ngá gûng má namngón xû hut gyûn é gi, Ngá gûng lé yhum râ matú, hen
¹³ lajâng é hkyô nghut ri. Ngò, nungmoq lé teng za taí kôlé, háu gabú danglù lé, mingkan gón hko kyô é jowò hkangmó má, yhang lé myit

bùn é dông, yhang kut é hkyô shí lé, taí kyo bekô râ nghut lhê.” ga taí kyo ri.

**Yesuq Lé, Yudaq Èq
Ung Zô Pyâm É Hkyô**

Mrk 14:10-11; Luk 22:3-6

- 14 Hau htâng, haú chángzo raxe í yuq má bo é Yudaq Iskarut ga sù gi, hkyangjong agyi pê chyáng ê mù, 15 “Ngò, Yesuq lé nungmoq é loq má ap byí é nghut jáng, nungmoq, ngo lé haí byi kó râ lhú?” ga myí ri. Haú mù, yhangmoq gi, yhang lé ngùn denggá 16 sum xê chap nghap byí akô. Haú hkùn mai, Yudaq gi, Yesuq lé ap pyám râ hkyô ho nyí bê nghut ri.

Yhumsing É Myinzang

Mrk 14:12-26; Luk 22:7-23; Yhn 13:21-30

- 17 Múnchi a kat é Muk Zo Poí sâng-hi nyí má, haú chángzô pé gi, Yesuq chyáng lé lô kômù, “Nàng zo râ Lhoqlhai Poí zoshuq lé, ngamoq hkâmá món to râ lhú?” ga myí akô. 18 Haú mù, Yhang gi, “Myuq hkaú shut wang ló mù, byù rayuq chyáng ê luí, haú yuq lé, ‘Ngá é ahkýng chyáng bê; Ngá é chángzô pé eq rahá, Ngò, náng é yhúm má Lhoqlhai Poí kut râ nghut lhê.’ gâ Sará taí ri nghú, ê taí keq.” 19 ga pying kat ri. Haú mù, haú chángzô pé gi, Yesuq pying kat é eq rajung za ê taí kômù, Lhoqlhai Poí lé món to bekô nghut ri. 20 Myinhâng jé lô jáng, Yesuq gi, haú chángzo raxe í yuq eq rahá, zohpoq 21 má zung tô ri. Yhangmoq zô nyi bùm kô é u lé, Yesuq gi, “Ngò, nungmoq lé teng za taí kôlé, nungmoq mâ é rayuq sù gi, Ngo lé ap pyám râ nghut lhê.” ga taí ri. 22 Haú hkùn, yhangmoq gi, gyai gyô yón kômù, rayuq htâng rayuq,

“Yhumsing ê, ngò a nghut hkaí?” ga, Yhang lé chôm myí akô.

- 23 Haú hkùn, Yesuq gi, “Ngò eq rahá, hkoq shí má loq lap bê sù gi, Ngo lé 24 ap pyám râ sù nghut lhê. Haú Byu Yhangzo gi, Yhang eq séng luí kâ tô é eq rajung za, shí râ za nghut lhê. Nghut kôlhâng, haú Byu Yhangzo lé ap pyâm é sù gi, dingnyé wó ri; haú yuq gi, a hku lé le lháng, je ge ri.” ga dum taí kat ri. 25 Hau htâng, Yhang lé ap pyám râ sù, Yudaq gi, “Rabai ê, ngò a nghut hkaí?” ga myi jáng, Yesuq gi, “Nàng nghut ri.” ga tû taí kat ri. 26 Yhangmoq zô nyí kô é u lé, Yesuq gi, muk lé yù mù, jeju hkya-on luí, muk lé myhik hpé mù, “Shí gi, Ngá é gungsho nghut lhê; yù mù zo keq.” ga taí uchyang, Yhâng é chángzô pé lé gàm byí ri. 27 Hau htâng, Yhang gi, góm lé le, yù mù, jeju hkya-on luí, yhangmoq lé byi mù, taí é gi, “Nungmoq banshoq bang, 28 shuq keq. Shí gi, yubak mara hkyut pyám byi râ, byù myo myô é matú htoq pyâm é, dangshikaq eq sêng é 29 Ngá sui nghut lhê. Ngò, nungmoq lé taí kôlé, ahkuí mai gi, Ngò, Ngá Wâ é mingdán má, nungmoq eq rahá tsi-biyiq wing asik lé shuq é buinyí a jé jé, tsibiyiq wing lé dum shuq râ a nghut lo.” ga taí ri. 30 Yhangmoq gi, hkya-on mahkôn ralhúm ban hkôn jáng, Tsanlun Bùm shut htoq e ló bekô nghut ri.
- Petruq He-ngik Râ Lé, Te Taí É Hkyô**
Mrk 14:27-31; Luk 22:31-34; Yhn 13:36-38
- 31 Hau htâng má, Yesuq gi, yhangmoq lé, “Nungmoq lhunglhâng bang gi, hkû-myín yhang jáng, Ngá é yanmai, myit lingbat kó râ nghut lhê; hkâsu mù gâ le,

‘Haû sau zúng sù lé, Ngò bat sat pyám mù, sau hpúng mà é sau pé gi, lhoq pyo pyâm é hui kó râ nghut lhê.’^a

³² ga kê tô ri. Nghut kôlhang, Ngò gi, lhoq dui toq é huí htâng má, Galile mau shut, nungmoq é hí má e ló láng râ nghut lhê.” gâ ri.

³³ Haû hkûn, Petruq gi, “Náng é yan-mai, góbang banshoq myit lingbat kô-lhang, ngò gi, hkâ-nhám le myit lingbat râ a nghut.” ga tû taí ri.

³⁴ Yesuq gi, “Ngò, nang lé teng za taí lé, hkû-myîn yhang jáng, woq a tûn shimá, nang, Ngo lé sum dâm he-ngik pyám râ nghut lhê.” ga tû taí ri.

³⁵ Nghut kôlhang, Petruq gi, “Ngò, Nang eq rahá shí râ dut kôlhang, Nang lé ngò he-ngik pyám râ a nghut.” ga saí taí ri. Haû chángzô pé góbang banshoq le, haû su ga châng taí bum akò nghut ri.

**Get-samane Gâ É Jowò
Má Kyûdûng É Hkyô**

Mrk 14:32-42; Luk 22:39-46

³⁶ Hau htâng má, Yesuq gi, Yhâng é chángzô pé eq rahá Get-samane gâ é jowò má é kômù, yhangmoq lé, “Ngò, hé má é mù, kyûdûng nyi é u lé, nungmoq shí má zùng láng keq.” ga taí ri.

³⁷ Yesuq gi, Petruq eq Zebedi yhangzô nhik lé shuí chûng ri. Yhang gi, myit gyai a ngón é eq myit wui nhik hkyik ³⁸ dut lò bê nghut ri. Hau htâng, Yhang gi, yhangmoq lé, “Ngò gi, shí râ í yhang myit yón nyi ri; nungmoq gi, Ngò su machyâ luí, shí má láng nyi keq.” ga taí ri.

³⁹ Yesuq gi, haû mai ratsuí zo sô é mù, myigùng má ngóm gop to luí, “Áwa ê, wó dut é nghut le gi, góm^b shí lé, Ngá

chyang mai lhaí pyám byi laq. Nghut kôlhang, Ngò ô nau é đông a nghut, Nang ô nau é đông sheq nghut sháng gaq.” ga kyûdûng ri.

⁴⁰ Hau htâng, Yhang gi, Yhâng é chángzô pé chyang dum taú lo le, yhangmoq yhup myhí to kô é lé lo myàng ri. Haû mù, Yhang gi, Petruq lé, “Nungmoq gi, hkyíng hkum rahkum za lhang, Ngò eq rahá a wó machya nyi kó lú? Gunglaú é a hui sháng gaq, machyâ luí, kyûdûng nyi keq. Haû woi-nyí gi, kâm nyi kôlhang, gungsho gi, wum nyhôm nyi ri.” ga taí ri.

⁴² Yhang gi, radàm dum ê mù, “Áwa ê, góm shí lé, Ngò a shuq é a wó lai râ nghut jáng gi, Nang ô nau é đông nghut sháng gaq hkoí.” ga kyû dum dûng ri.

⁴³ Yhang dum taú lo le, yhangmoq gi, myoqkuq lai kô é yanmai, yhup myhí ⁴⁴ to láng kô é lé, lo dum myàng ri. Haû mù, Yhang gi, yhangmoq lé tô pyâm to mù, sum dâm nghû râ dàm dum ê luí, hí lé dûng é dang lé roq é dum dûng ri.

⁴⁵ Haû mù, Yhang gi, haû chángzô pé chyang dum taú jé lô mù, yhangmoq lé, “Nungmoq gi, ahkuí jé shoq yhup ngón nyi ashí kó lú? Wú keq! Haû ahkyíng gi, jé bê nghut luí, haû Byu Yhangzo gi, yubak dap bâng é loq má ⁴⁶ ap pyâm é hui râ nghut bê. Toq keq! Ló losháng hkoí! Ngo lé ap pyám râ sù gi, jé lé bê nghut ri.” ga taí ri.

Yesuq, Chyup Yû Huí É Hkyô

Mrk 14:43-50; Luk 22:47-53; Yhn 18:3-12

⁴⁷ Yesuq, dáng nyo nyi ashí u lé, haû chángzo raxe í yuq má bo é Yudaq gi, jé lé lo ri; haû hkyangjong agyi pé

^a 26:31 Zhk 13:7 ^b 26:39 Góm gâ é gi, Yesuq, jamjau hui râ hkyô eq shí râ hkyô lé, taí nau é nghut lhê.

eq mingbyu é suwún wui chyáng mai nhang kat é bang nghut é, shâm eq dumbáng pé chung tô é byù moq mó

⁴⁸ le, yhang eq rahá nghut akô. Yesuq lé ap pyám rà sù gi, haú bang lé, “Ngò, bopuq puq é sù gi, haú yuq nghut bê; Yhang lé chyup yù keq.” ga kumlhá

⁴⁹ byì tô ri. Yudaq gi, Yesuq chyáng hkyê za ê mù, “Rabai ê, wángzán nyi lèhê lú?” ga taí luí, Yhang lé bopuq puq byì ri.

⁵⁰ Haú hkún, Yesuq gi, “Buinùm hpó ê, nàng kut rà muzó lé kut aq hkoi.” ga tû taí kat ri.

Hau htàng, yhangmoq gi, hí shut huí ê luí, Yesuq lé chòm zuí zìng mù, chyup yù bekô nghut ri. Haú mù, Yesuq eq rahá nyi bang mâ é rayuq gi, shâm she htoq yù mù, hkyangjong mó é dui-nhâng zôshang é nohkyap lé pyoq hkyô kat byi bê nghut ri.

⁵² Haú jáng, Yesuq gi, haú yuq lé, “Náng é shâm lé, xàng pyám aq; hkâsu mù gà le, shâm shê sù gi, ó yuq nghut

⁵³ kôle, sham èq shí rà nghut lèhê. Ngò gi, Ngá Wa lé dung jáng, Yhang gi, radá dâm, maumang lagyo dap pé raxe í dap htoq myo shoq nhang kat byi rà nghut é lé, nungmoq a sé kó lú?

⁵⁴ Nghut kôlhang, haú su nghut é nghut jáng, shí hkyô dut lò rà nghut lèhê ga Chyúmdang pé má bò tô é hkyô gi, hkâsu wó dik lò rà lú?” ga taí kat ri.

⁵⁵ Hau htàng, Yhang gi, byù moq lé, “Nungmoq gi, damyaq rayuq lé chyup é su, Ngo lé chyup rà matú, shâm eq dumbáng pé chùng mù, lé lo akô lú? Ngò gi, nyi wuí, noqkuq yhâm má zùng mù, mhoqshit nyi kôlhang, nungmoq, Ngo lé a chyup yù kô é

⁵⁶ nghut lèhê. Nghut kôlhang, shí su dut é hkyô pé banshoq gi, haú myiqhtoí pé kâ tô é hkyô pé lo dik rà matú dut é nghut ri.” ga taí ri. Haú hkún, haú

chángzô pé banshoq gi, Yesuq lé tô pyâm to kôluí, hfang byo byuq bekô nghut ri.

**Yudaq Byìn Tú Wapdoq
Má Jep Huí É Hkyô**

*Mrk 14:53-65; Luk 22:54-55,
63-71; Yhn 18:13-14, 19-24*

⁵⁷ Yesuq lé chyup yu é bang gi, haú tarâ sará pé eq suwún wuí zup zìng nyi é jang, hkyangjong mó Kayahpaq

⁵⁸ é yhâm má, Yhang lé shuí e akô. Petruq gi, hkyangjong mó é yhumwàng hkaú má châng jé wàng shoq, we we mai Yesuq htàng châng tô ri. Yhang gi, hkâsu dut lò rà lé myàng naù luí, wàng hkaú má wang ê mù, zúng bang eq rahá zung tô ri.

⁵⁹ Haú hkyangjong agyi pé eq Yudaq byìn tú wapdoq mâ é góbang gi, Yesuq lé sat pyám nhâng rà matú, a têng é

⁶⁰ saksé ho nyi akô. A têng é saksé myo myo htoq lô kôlhang, wó sat rà í é saksé a myàng kó nghut ri.

Ló htáng má, byù í yuq gi, lé lô

⁶¹ kômù, “Shí yuq gi, ‘Ngò gi, haú Garai Gasâng é noqkuq yhâm lé lhoq hten pyám mù, sum nyi gyoro má dum wó saí lèhê,’ ga taí sù nghut ri.” ga taí akô.

⁶² Haú hkún, haú hkyangjong mó gi, toq yap mù, “Nàng, haí le a tû taí luq? Shí bang, Nang lé mara hun nyi é saksé gi, hká dông nghut lèhê lú?” ga,

⁶³ Yesuq lé myí ri. Nghut kôlhang, Yesuq gi, jit le a ga nyi tô ri.

Haú mù, hkyangjong mó gi, Yhang lé, “Haú rû dui nyi é Garai Gasâng é myìng lé lang luí, ngò, Nang lé myí wú lé: Nàng gi, Garai Gasâng é Yhangzo, Hkrisduq nghut lèhê luq, ngamoq lé

⁶⁴ taí kyô wú aq.” ga taí jáng, Yesuq gi, “Nàng taí é eq rajung za nghut lèhê. Ngò, nungmoq banshoq lé taí kôlé, nungmoq gi, ahkuí mai htàng hpyang

má, haú Byu Yhangzo gi, a-tsam bo dik Su é loqyo hkyam má zung tô é lé le, mhuthtui ji mù, mauhkung mai lé lo é lé le, nungmoq myàng kó rã nghut lhê.” ga taí ri.

- 65 Haú hkûn, hkyangjong mó gi, yhang é bu lé lãng cheq pyám mù, “Yhang gi, Garai Gasang lé rhoi dang taí bê nghut ri! Nga-nhúng, hai saksé rã ashí lhú? Yhang, Garai Gasang lé rhoi dang taí é lé, nungmoq, ahkuí wó gyo bekô nghut lhê. Nungmoq hkâsu wó myit akô lhú?” ga myi jáng, yhangmoq gi, “Yhang gi, shí gíng sũ nghut lhê.” ga tũ taí akô nghut ri.

- 67 Hau htâng má, yhangmoq gi, Yesuq é myoqdong má sôkan byé gyun luí, loqtsup èq htui byí akô nghut ri. Gó-bang gi, Yhang lé bo-pyuq pyuq byi 68 luí, “Hkrisduq Nàng, Nàng lé bat sũ ó yuq nghut é lé, myiqhtoi htoí wú aq.” ga taí akô.

Yesuq Lé, Petruq He-ngik Pyâm É Hkyô

Mrk 14:66-72; Luk 22:56-62;

Yhn 18:15-18, 25-27

- 69 Petruq gi, wãng hkaú má nyi tô é u lé, dui-nhâng zoshâng myhí rayuq gi, yhâng chyáng lé jé mù, “Nàng le, haú Galile byù Yesuq eq rahá nyi sũ nghut ri.” ga taí ri.
- 70 Nghut kôlhang, Petruq gi, haú bang banshoq é hí má yhang, “Nàng haí taí nyi é lé, ngò a sé.” ga he kat ri.
- 71 Hau htâng, yhang gi, wãng hkúmdong shut htoq e ló le, haú jowò má, dui-nhâng zoshâng myhí góyuq le, yhang lé myàng mù, “Shí yuq gi, Nazaret wà byù Yesuq eq rahá nyi sũ nghut ri.” ga, haú mâ é bang lé taí kat ri.
- 72 Haú hkûn, yhang gi, “Byù haú yuq lé, ngò a sé!” ga dakam é dông he pyâm ri.

- 73 Hau htâng razup zo má, haú jowò má yap to bang gi, Petruq chyáng huí é kômù, “Nàng le, haú bang má bò sũ yhang nghut ri; nãng é dangtê lé sê gyô ri.” ga taí akô.

- 74 Haú hkûn, yhang gi, yhânggùng yhang nhing luí, “Haú yuq lé, ngò a sé.” ga dakâm dang taí ri.

Haú-u yhang, woq tũn bê nghut ri.

- 75 Haú mù, Petruq gi, “Woq a tũn shi má, nãng, Ngo lé sum dâm he pyám rã nghut lhê.” ga, Yesuq, yhang lé taí é dang lé, myit bũn kat mù, shinggan shut htoq ê luí, gyai yhang ê ngau ri.

Yudaq Juíshi É Hkyô

Mrk 15:1; Luk 23:1-2, Yhn 18:28-32

27 Napsũn noq le, hkyangjong agyi pé banshoq bang eq mingbyu é suwún wuí gi, Yesuq lé sat pyám nhâng rã matú chôm myit hpyit yú 2 bekô nghut ri. Haú mù, yhangmoq gi, Yhang lé tuí yù luí, shuí htoq ê kômù, mauzau Pilat chyáng ê ap byí akô nghut ri.

- 3 Yesuq lé ap pyâm é sũ Yudaq gi, Yesuq lé jéyáng doqdân é hkyô lé myang sé jáng, nungngham wó mù, haú ngùn sum xê chap lé, hkyangjong agyi pé eq suwún wui chyáng ló dum 4 taú byí ri. Haú mù, yhang gi, “Mara a bò Su é sui lé, ngò ap pyám bê nghut é yanmai, ngò mara wó bê.” ga taí jáng, yhangmoq gi, “Haú hkyô, nga-moq eq haí sêng lhê lhú? Haú gi, nãng eq sheq ru sêng lhê.” ga lhom taí kat akô nghut ri.

- 5 Haú mù, Yudaq gi, ngùn haú lé, noqkuq yhúmhaú má dú pyâm to luí, htoq ló mù, yhang gũng yhang ê juíshi byuq bê nghut ri.

- 6 Haú hkyangjong agyi pé gi, ngùn chap haú pé kui yù luí, “Shí gi, sui hpau ngùn nghut lhê yanmai, alu si-

7 dek má a ge kat.” ga taí akô. Haû mù, yhangmoq gi, tungbaù pê é lupdùng kut râ matú, au saí zo su é maumyí lé, ngùn hau èq wui hpyit yû râ dông, 8 chôm myit hpyit to bekô nghut ri. Hau é yanmai, ahkuí jé shoq, haú jowò lé, sui myigùng ga myhîng tô akô 9 nghut ri. Haû gi, “Haû Israelaq byu pé mai, Yhang lé gù hpyit tô é ngùn sum xê chap lé, yhangmoq yù mù, haû Yhumsîng Garai, ngo lé pying tô é eq 10 rajung za, haû au saí zo su é maumyí lé, yhangmoq wui yù bekô nghut ri.” ga myiqhtoi Yeremiaq taí tô é dang lo dik é nghut ri.

Yesuq Lé, Pilat Myí Jep Wú É Hkyô

*Mrk 15:2-15; Luk 23:3-5,
13-26 Yhn 18:33-19:16*

11 Haú u lé, Yesuq gi, mauzau hpô é hí má yap tô é nghut mù, haû mauzau hpô gi, Yhang lé, “Nàng gi, Yudaq byu pê é hkohkâm nghut lê lú?” ga myi jáng, Yesuq gi, “Nàng taí é eq rajung za nghut lê.” ga tû taí ri. 12 Haû hkyangjong agyi pé eq suwún wuí gi, Yhang lé, mara hûn kôjáng, 13 Yhang gi, haí le a tû taí nghut ri. Haú hkûn, Pilat gi, Yhang lé, “Yhangmoq, Nang lé mara hûn saksé haû-í hkâm nyi kô é lé, Nàng a wó gyo lú?” ga saí myí ri. Nghut kôlhang, Yesuq gi, dang rahkun lháng a tû taí é yanmai, haû mauzau hpô gi, gyai maú byuq bê nghut ri. 15 Haû Lhoqlhai Poí u lé, mingbyú wui ô nau é má cháng luí, haû mauzau hpô gi, htóng byú rayuq yuq lé nhâng byí 16 é htúng joq ri. Haú u lé, a gè myìng htoq é htóng byú, Barabaq ga sù rayuq 17 nyi ri. Haû mù, byù moq mó zup zîng lò kô é hkûn, Pilat gi, yhangmoq lé, “Nungmoq é matú, hká yuq lé lhut byi nhâng nau akô lú? Barabaq luq? Haû

a nghut jáng, Hkrisduq gâ é Yesuq lé 18 luq?” ga myí ri. Yhang haû su ga myí é gi, yhangmoq, Yesuq lé manôn kôluí, yhâng chyáng lé ap byi kô é hkyô lé sê é yanmai nghut ri.

19 Pilat gi, tarâ jéyáng tingnyâng htoq má zung tô ashî hkûn, yhangmyi gi, “Haû mara a bò Sû lé, haí le hkâ-kut; hkâsu mù gâ le, hkû-nyí za lháng, yhupmoq má, haú yuq é yanmai, ngò tsómra hpuzò pyám bê nghut lê.” ga, yhâng chyáng dang pying kat ri.

20 Nghut kôlhang, haû hkyangjong agyi pé eq suwún wuí gi, Barabaq lé dúng htoq yû râ eq Yesuq lé sat pyám nhâng râ matú, shiwa byu pé lé wum byi bekô nghut ri.

21 Haû mauzau hpô gi, “Shí í yuq mâ é hká yuq lé, nhâng byi nhâng nau akô lú?” ga myi jáng, yhangmoq gi, “Barabaq!” ga tû taí akô nghut ri.

22 Haû mù, Pilat gi, “Haû jáng gi, Hkrisduq gâ é Yesuq lé, ngò hkâsu kut râ lú?” ga dum myí kat jáng, yhangmoq banshoq bang gi, “Yhang lé tap-zîng má jén sat pyám aq!” ga dum tû taí akô nghut ri.

23 Nghut kôlhang, yhang gi, “Haí mù luí lú? Yhang gi, hai mara kut shut bê lú?” ga dum myi jáng, yhangmoq gi, htê mó èq, “Yhang lé tapzîng má jén sat pyám aq!” ga je riyhang garú lo bum akô nghut ri.

24 Pilat gi, hká dông le a dat kut lô é eq byu pé gabyông lò kó râ nghut é hkyô lé myàng luí, uchyam yù mù, shiwa byu pê hí má loq chi luí, taí é gi, “Shí yuq é sui gi, ngò eq haí a séng; nungmoq eq za ru sêng lê.” gâ ri.

25 Haû shiwa byù lhunglhâng bang gi, “Yhâng é sui gi, ngamoq eq ngamoq é yhangzo yhangshû pê htoq má joq nyi sháng gaq.” ga, dum tû taí kat akô nghut ri.

²⁶ Haú hkûn, Pilat gi, Barabaq lé nhâng byi bê nghut ri. Yesuq lé kúm gi, nhuq bat nhâng mù, tapzîng má jén sat pyám râ matú ap byí kat bê nghut ri.

Yesuq Lé, Gyezô Pé Rhoi É Hkyô

Mrk 15:16-21; Yhn 19:2-3

²⁷ Hau htâng, mauzau hpô é gyezô pé gi, Yesuq lé, mauzau hpô é yhum-wàng mó hkaú má shuí wang ló kômù, Yhâng é lhîngkyuq má, gyedap gón
²⁸ lé ji tsîng tô akô. Yhangmoq gi, Yesuq é mebu hkyut pyám byi kôluí, zam
²⁹ zam ne é buhîng hut byi kômù, zujanmaú ralhum saí yù kôluí, Yhâng é ulhum má tsung byí akô nghut ri. Yhangmoq gi, jàm-yang rahkat lé, Yhâng é loqyo loq má kat byi kômù, Yhâng é hí má hkyihput htuq kôluí, “Yudaq byu pê é hkohkâm hpó ê! Chyung hîng xê hîng nyí sháng gaq
³⁰ ô!” ga, jihpoi dang taí akô. Yhangmoq gi, Yhang lé sôkan byé gyun luí, Yhâng é loq mai jàm-yang lú yù mù, Yhâng é ulhum má dum bat bat kut
³¹ akô nghut ri. Yhangmoq gi, Yhang lé rhoi jihkyoí ban kut yù kôjáng, Yhang wut tô é buhîng lé hkyut yù kômù, Yhâng é mebu lé dum hut byi luí, tapzîng má jén sat pyám râ matú, Yhang lé shuí htoq e ló bekô nghut ri.

Yesuq Lé Jén Pyám É Hkyô

Mrk 15:22-32; Luk 23:27-43; Yhn 19:17-27

³² Yhangmoq htoq e ló nyi le, Kuruni myuq byú nghut é Simun ga sù lé myàng kômù, yang lé, zik luí tapzîng waq nhang akô nghut ri. Yhangmoq gi, Golgahta gâ é jowò má jé e ló bekô nghut ri. Golgahta gâ é lichyúm gi, ugyap joq é jowò lé gâ é
³⁴ nghut lhê. Haú má jé jáng, yangmoq

gi, Yesuq lé, hkô jung eq nyhô tô é tsibiyiq wing lé byi huq akô; nghut kôlhang, Yhang gi, haú lé chyam wú mù, a shuq byi kut pyám ri. Yhangmoq gi, Yesuq lé tapzîng má jén tap tô é htâng, Yhâng é mebu lé lháng, hkyín shosé shé é dông gam yu pyám
³⁵ byí akô. Hau htâng, yangmoq gi, haú jowò má zung to mù, Yhang lé
³⁷ zúng nyi akô nghut ri. Yhâng é u htoq má, “SHÍ YUQ GI, YUDAQ BYU PÊ É HKOHKÂM, YESUQ NGHUT LHÊ.” ga, Yhang lé mara hun é laiká kâ tap
³⁸ tô akô. Haú hkûn, Yhang eq rahá, damyaq í yuq lé le, Yhâng é loqpaí hkyam shut rayuq, loqyo hkyam shut rayuq kut, tapzîng htoq má jén tap
³⁹ tô akô nghut ri. Hkyô sô lai ló é bang gi, nyhap é dông u-ngut ngut
⁴⁰ mù, taí kô é gi, “Noqkuq yhúm lé hpoyoq pyám luí, sum nyí gyoro má dum wó saí lhê ga Sù ê! Nàng, Garai Gasâng é Yhangzo nghut le gi, Náng gûng nàng hkyi yù luí, tapzîng mai gyó lo wú aq mhaí!” ga akô nghut ri.

⁴¹ Haú eq rajung za, hkyangjong agyi pé, tarâ sará pé eq suwún wú le, Yhang lé rhoi jihkyoí kut mù, taí kô
⁴² é gi, “Shí yuq gi, góbang lé hkyi yù sù nghut kôlhang, Yhânggùng yang gi, a wó hkyi yù nghut ri myhi-nhung! Yhang gi, Israelaq byu pê é hkohkâm nghut lhê lhà! Ngamoq wó lumjîng râ matú, Yhang, tapzîng mai
⁴³ gyó lo wú sháng gaq. Yhang gi, Garai Gasang lé lumhkaú sù nghut lhê mù, Garai ô nau é sù nghut le gi, ahkuí Yhang lé hkyi yù sháng gaq; hkâsu mù gâ le, Yhang gi, ‘Ngò, Garai Gasâng é Yhangzo nghut lhê.’ ga taí ri.” ga bum akô nghut ri.
⁴⁴ Haú eq rajung za, Yhang eq rahá tapzîng má jén to huí é damyaq í

yuq le, Yhang lé rhoi dang taí akô nghut ri.

Yesuq Soqkang Byit É Hkyô

Mrk 15:33-41; Luk 23:44-49; Yhn 19:28-30

- ⁴⁵ Nyí-káng raxe í hkyíng mai myinhtâng sum hkyíng jé shoq, ramau gón mauchut tuq dut byuq bê nghut ri.
- ⁴⁶ Myinhtâng sum hkyíng kô má, Yesuq gi, “Eloi, Eloi, lama sabakhtani?” ga, htê mó èq garû kat ri. Hau é lichyúm gi, “Ngá Garai ê, Ngá Garai ê, Nàng, haí mù, Ngo lé tô pyâm tô lhê lúhú?” gâ é nghut ri.^a
- ⁴⁷ Haú nâm má yap tô é bang ra-am gi, haú lé wó gyo kôjáng, “Yhang gi, myiqhtoi Eliyaq lé wut nyi ri.” ga taí akô.
- ⁴⁸ Haú hkûn jáng, yhangmoq mâ é rayuq gi, din e ló mù, wuimaù lé ê yu ri. Yhang gi, haú lé tsibiyiq wing chyîn má jum yù luí, jàm-yang má tuí tap mù, Yesuq shuq râ matú yhun
- ⁴⁹ byí ri. Góbang gi, “Yhang lé, Eliyaq, lé hkyi yu lhê laq, nga-nhúng chôm lánq wú sháng.” ga taí akô nghut ri.
- ⁵⁰ Haú hkûn, Yesuq gi, htê mó èq dum garû kat luí, Yhâng é soqkang byit bê nghut ri.
- ⁵¹ Haú u lé, haú noqkuq yhûm mâ é pán-gyang gi, ahtoq mai a-ô í hkyam byáng goq byuq bê nghut ri. Myigùng le nún lô mù, luqgok pé le goq byuq
- ⁵² bê nghut ri. Lup pé gi, bóng lô mù, shi byuq bê é chyoiyúng bang myo myo
- ⁵³ gi, lhoq dui é hui akô. Haú bang gi, Yesuq dum dui toq é htâng, lup mai htoq lô kômù, chyoiyúng myuq^b má wang ê luí, byù myo myô hí má htoq shit akô nghut ri.
- ⁵⁴ Shô up gyezau hpó eq, yhang eq rahá Yesuq lé zúng nyi é bang gi, la-

yàng nún é eq dut lo é hkyô banshoq lé myàng kôjáng, gyuq dân kômù, “Yhang gi, gè gè yhang, Garai Gasâng é Yhangzo nghut ri-nhung!” ga taí akô nghut ri.

- ⁵⁵ Myiwe wuì myo myo le, we we mai wú nyi bum akô. Haú bang gi, Yesuq râ é má garúm râ matú, Galile mau mai Yhang htâng châng lé é
- ⁵⁶ bang nghut akô. Haú bang má, Magadalaq wà mâ é Mariq, Yakuq eq Yose nhiktâng é yhângnu Mariq eq Zebedi é yhangzô nhiktang é yhângnú pé le bo akô nghut ri.

Yesuq Lé, Myhup Pyâm É Hkyô

Mrk 15:42-47; Luk 23:50-56; Yhn 19:38-42

- ⁵⁷ Myinhtâng jé lô jáng, Yesuq é chángzo dut bê nghut é, sùt wó sù, Aramahti myuq byù Yosep ga sù lé
- ⁵⁸ lo ri. Yhang gi, Pilat chyáng ê mù, Yesuq é gungsôm lé ê dung jáng, Pilat gi, yhang lé byi râ matú hkunmó
- ⁵⁹ hkyô kat bê nghut ri. Yosep gi, gungsôm lé yù mù, pán yúng èq htup yup
- ⁶⁰ luí, luqgok lé kyúng tô é, yhâng é lup sik hkaú má ê kat tô ri. Hau htâng, yhang gi, luphkum má, luqlông èq lhêng chí pyâm to luí, ló byuq bê
- ⁶¹ nghut ri. Magadalaq wà mâ é Mariq eq goyuq Mariq gi, lup hí má zung tô akô nghut ri.

Lup Zúng É Hkyô

- ⁶² Haú Hên Lajang Buinyì laí é htâng nyí lé, hkyangjong agyi pé eq Hpari-
- ⁶³ she pé gi, Pilat chyáng ê mù, “Yhum-síng ê, Yhang, asak dui nyi ashí hkûn, ‘Sum nyí nghú râ buinyì má, Ngò dum dui toq lô rá.’ ga, haú byù mhaú taí
- ⁶⁴ é dang lé, ngamoq bún nyi lhê. Haú mù, haú sum nyí nghú râ buinyì jé

^a 27:46 Hkya-on 22:1 ^b 27:53 Chyoiyúng myuq gâ é gi, Yerusalem wà mó lé gâ é nghut lhê.

shoq, lup lé rago za zúng nhang to aq. Haú a nghut jáng, Yhâng é chángzô pé, màng lé lé hkaú yu ló mù, Yhang shi é mai dum dui toq lô bê ga, byu pé lé taí kó rã nghut lhê. Shí, ló htâng dàm mhaú é hkyô gi, sâng-hi dàm htoq je wui rã nghut lhê.” ga, lé taí akô nghut ri.

- ⁶⁵ Haú hkûn, Pilat gi, “Nungmoq sê é dông, lup lé haí a dut loshoq, gyezô pé lé zúng nhang to keq.” ga tú taí
⁶⁶ kat ri. Haú mù, yhangmoq gi, ê luí, lup lé gau shoq ga, luqgok má dizik htung mù, lup zúng byú nyhi to bekô nghut ri.

Dum Dui Toq Lô É Hkyô

Mrk 16:1-8; Luk 24:1-12; Yhn 20:1-10

28 Bánno buinyì lai jáng, rabat é sâng-hi nyí maubó zó má, Magadalaq wà mà é Mariq eq goyuq Mariq gi, lup má ê wú rã ga, e ló akô.

- ² Haú hkûn, layàng mó nún lo ri; hkâsu mù gâ le, Yhumsíng Garaí é maumang lagyo rayuq gi, mauhkûng mai gyó lé lô mù, lup má ê luí, haú luqlong lé tu lheng mù, hau ahtoq má
³ zung tô ri. Yhâng é isâm gi, lhap su duqbó mù, Yhâng é mebu gi, gyo su
⁴ hpyu zan tô ri. Zúng nyi é bang gi, yhang lé lúm wú gyuq kômù, pyik pyik nán luí, shí gùng su dut bùm bekô nghut ri.
⁵ Haú maumang lagyo gi, myiwe haú nhik lé, “Hkâgyuq kó! Haú tapzìng má jén sat huí é Yesuq lé, nungnhik ho nyi
⁶ kô é lé, ngò sê lhê. Yhang gi, shí má a nyì lo; Yhang taí tô é eq rajung za, lhoq dui toq é hui bê nghut ri. Yhang
⁷ lé lheq é jowò lé, lé wú keq. Haú mù, hân taú ló luí, Yhâng é chángzô pé lé, ‘Yhang, shi é mai lhoq dui toq é hui bê nghut ri; nungmoq é hí má,

Galile mau shut ló láng berã. Nungmoq, Yhang lé, haú má ló myàng kó rã nghut lhê.’ ngù ló taí kyo keq. Nungnhik lé, ngò taí é lé matsíng chùng keq.” ga taí kat ri.

- ⁸ Haú mù luí, myiwe myhí haú nhik gi, gyuq kôlháng, gyai gabú é myit èq lup mai hân taú ló mù, Yhâng é chángzô pé lé ló taí kyo rã matú, din
⁹ ló bê nghut ri. Haú hkûn, Yesuq gi, radá dâm yhangnhik lé lhom tê mù, “Wángzán nyí kó sháng gaq.” ga taí ri. Haú mù, yhangnhik gi, huí ê luí, Yhâng é hkyí má po zing to mù, Yhang
¹⁰ lé noqkuq akô. Haú hkûn, Yesuq gi, yhangnhik lé, “Hkâgyuq kó. Ngá é gumang wui lé, Galile mau shut e ló keq ngù ló taí kyo keq; haú má, yhangmoq, Ngo lé myàng kó rã nghut lhê.” ga taí kat ri.

Zúng Nyi É Gyezô Pé Taí É Danglù

- ¹¹ Myiwe haú nhik hkyô má ru nghut nyi ashí le, lup zúng é gyezô pé ra-am gi, myuq hkaú má wang ló mù, dut lai lo é hkyô banshoq lé, haú hkyangjong
¹² agyi pé lé ló taí kyo akô nghut ri. Haú hkyangjong agyi pé gi, suwún wui eq huí lhum luí, hpyê lhúm é htâng má, haú gyezô pé lé, ngùn myo myo tsup
¹³ byi mù, “‘Myín lé, ngamoq yhup myhí tô é hkûn, Yhâng é chángzô pé lé lô mù, màng lé, lé hkaú yu ló bekô nghut
¹⁴ ri.’ ngù taí keq. Shí hkyô lé, haú mauzau hpó wó gyô é nghut jáng, yhang myit ngón shoq, ngamoq taí rã nghut lhê; haú hkûn, nungmoq gi, hai manghkáng a htoq rã nghut lhê.” ga taí
¹⁵ kat ri. Haú mù, gyezô pé gi, ngùn haú pé lé yù luí, yhangmoq lé taí kat é eq rajung za kut bekô nghut ri. Haú su mù, haú hkyô gi, Yudaq byu pé má taí pyo myhín ló bê nghut mù, ahkuí jé shoq taí nyi bum akô nghut ri.

Chángzô Pé Kut Râ Sasana Muzó*Mrk 16:14-18; Luk 24:36-49;**Yhn 20:19-23; Lagyo 1:6-8*

- ¹⁶ Hau htâng má, haû chángzo raxe ra-yuq gi, yhangmoq lé, Yesuq ê nhang tô é Galile mau mâ é bùm shut
- ¹⁷ e ló bekô nghut ri. Yhangmoq gi, Yesuq lé myàng kôjáng, noqkuq akô; nghut kôlhang, ra-am gi, a dê jíng
- ¹⁸ kó nghut ri. Hau htâng, Yesuq gi, yhangmoq chyáng lé lô mù, “Mau-hkûng eq myigùng htoq mâ é ahkáng

- ayá banshoq, Ngo lé byî to bê nghut
- ¹⁹ lhê. Haû mù, nungmoq gi, htoq ê luî, byù myû chângjup lé, Ngá é chángzô pé dut nhâng mù, haû Íwa, Yhangzo, Chyoiyúng Woi-nyí é myìng lang luî,
- ²⁰ wui-myhup hkám byi mù, nungmoq lé, Ngò hkunmó hkyô tô é lhunglhang lé châng kut râ matú, yhangmoq lé mhoqshit keq. Ngò gi, mingkan pyat htúm é hkûn jé shoq lhang, nungmoq eq rahá ru nghut nyî râ nghut lhê.” ga pyìng tô ri.

MARKUQ

é Gabú Danglù Laiká

(*The Gospel of Mark*)

Yesuq É Matú Hkyô Htong Byí É Hkyô

Mht 3:1-12; Luk 3:1-18; Yhn 1:19-28

1 Haú Garai Gasâng é Yhangzo, Yesuq Hkrisduq eq sêng é gabú danglù hi é hkyô gi, haú myiqhtoi Esai-aq laiká má:

“Náng é hkyô lajang lángrâ matú, Ngá é lagyo lé, Náng é hí má Ngò nhang kat râ nghut lhê.”^a

ga luí le,

³ “Haú yoso má, byù rayuq garú taí é htê gi,

“Haú Yhumsing é matú, hkyô hen to keq; Yhâng é matú hkyô lhoq nyhang to keq.”^b

ga luí le, kâ tô é eq rajung za nghut lhê. Haú mù, Wui-myhup Sará Yohan gi, yoso hkaú má jé lé luí, wui-myhup hkám byí nyi é eq, yubak mara hkyut pyám byí é hui râ matú myit lhing mù, wui-myhup hkám yù râ hkyô lé,

⁵ hko kyô nyi ri. Haú hkûn, Yuda mau jowò hkanmó mâ é bang eq Yerusalem wà mó mâ é banshoq bang gi, yhâng chyáng htoq e bum akò. Yhangmoq gi, yhumsing é mara lé yín yû kôluí, yhâng chyáng mai Yodan làng má wui-myhup hkám yu bum akò

⁶ nghut ri. Yohan gi, gola-uq shomaú èq saí é mebu wut mù, yhâng é hpyidum má gi shokuq hpyihit hit ri; yhang gi, dinggám eq yosò byo-î pé lé zo sù nghut ri. Yhang taí kyô é dang gi, “Ngá htoq má wum-o a-tsam je bo é sù rayuq, ngá htàng má jé lé râ nghut lhê; ngò gi, yhâng é hkyí-tsung tui lé hpyí râ lháng a gingdán é

⁸ nghut lhê. Ngò gi, nungmoq lé, wui èq za wui-myhup wó hkám byi lhê; nghut kôlhâng, Yhang gi, Chyoiyúng Woi-nyí má nungmoq lé wui-myhup hkám byi râ nghut lhê.” gâ ri.

Yesuq, Wui-myhup Hkám Yu É Hkyô Eq Gunglaú Huí É Hkyô

Mht 3:13-17, 4:1-11; Luk 3:21-22, 4:1-13

⁹ Haú yoq má, Yesuq gi, Galile mau Nazaret wà mai lé jé mù, Yohan chyáng Yodan làng má wui-myhup hkám yu ri. Yesuq gi, wui mai htoq lo é u lé, mauhkúng bóng lo é lé le, Woi-nyí gi, hpûngkyui gungkyâng sù é dông mai, Yhang ahtoq má gyó lé lo é lé le, Yhang myang kat ri. Haú hkûn, “Nàng gi, Ngò chyitdap é Ngá zo nghut lhê; Náng é ahtoq má Ngò gabú myit ngón nyi lhê.” ga mauhkúng mai danghtê htoq lo ri.

¹² Haú hkûn jáng, Woi-nyí gi, Yhang lé ¹³ yoso shut wang e ló nhang ri. Haú mù, Yhang gi, yoso má myi xê nyí nyi luí, Tsadán èq gunglaú é huí ri; tân jung yosò zè pé le, Yhang eq rahá nghut nyi ri; maumang lagyo pé gi, Yhang lé, lé dojaú nyi akò nghut ri.

Sâng-hi Lhê É Chángzô Pé

Mht 4:12-22; Luk 4:14-15, 5:1-11

¹⁴ Yohan htóng gyó é htàng má, Yesuq ¹⁵ gi, Galile mau má ló jé mù, “Ahkyíng gi, jé bê; Garai Gasâng é mingdán gi, chyâng lò bê nghut ri; myit lhing mù, haú gabú danglù lé lumjíng keq hkoi.” ga luí, Garai Gasâng é gabú danglù lé hkò kyo wún ri.

^a 1:2 Mal 3:1 ^b 1:3 Esai 40:3

- ¹⁶ Yesuq gi, Galile nhông yàm mai sô laí ló le, Simun eq yhanggu Andre nhiktâng, nhông má gùn dú nyí kô é lé, myang ri; haú nhik gi, ngozo
- ¹⁷ kóng zo su nhik nghut akô. Haú mù, Yesuq gi, haú nhiktâng lé, “Ngá htâng cháng keq; Ngò, nungnhik lé, byù lé châng kóng su nhik dut nhâng
- ¹⁸ râ nghut lhê.” ga taí ri. Haú hkûn, yhangnhik gi, radá dâm, gùn pé lé tô pyâm to luí, Yhang htâng cháng bekô nghut ri.
- ¹⁹ Yesuq gi, radun zo dum sô e ló é hkûn, Zebedi é yhangzo, Yakuq eq yhanggu Yohan nhiktâng, lhaí hkaú
- ²⁰ má gùn hpo nyí kô é lé, myang ri. Haú hkûn, Yhang gi, radá dâm, yhangnhik tâng lé wut kat jáng, yhangnhik tâng gi, yhangnhik é yhângwa Zebedi eq langchyâng pé lé, lhaí hkaú má nyhi pyâm to kôluí, Yhang htâng cháng bekô nghut ri.

Nat Lé, Yesuq Hkat Htoq Pyâm É Hkyô

Luk 4:31-37

- ²¹ Yhangmoq gi, Kaperna-um wà má e akô; Bánno buinyì nyí jé jáng, Yesuq gi, tarajong má wang ê mù, mhoqshit hi ló bê nghut ri. Shiwa byu pé kúm gi, Yhang mhoqshit é hkyô lé mauhong bum akô; hkâsu mù gâ le, Yhang gi, tarâ sará pé eq a pung é za, ahkáng ayá wó sù rayuq su, yhangmoq lé mhoqshit é yanmai nghut ri.
- ²³ Haú u lé, agè ashop é nat wang júng é byù rayuq tarajong má bo lom nyí
- ²⁴ luí, wut garû kat é gi, “Nazaret wà byù Yesuq ê, ngamoq gi, Nàng eq haí sêng lhê lhú? Ngamoq lé lhoq hten râ matú, Nàng jé lé é nghut lhê lhú? Nàng gi, Garai Gasâng é Chyoiyúng Sù nghut é lé, ngò sê lhê.” gâ ri.
- ²⁵ Haú hkûn, Yesuq gi, “Hkâjop, yhâng chyáng mai htoq ló aq.” ga

²⁶ yhang lé tân kat ri. Haú hkûn, agè ashop é nat haú gi, byù haú yuq lé wum kat langhtân nhâng luí, htê mó èq garu uchyang htoq ló byuq bê nghut ri.

- ²⁷ Shiwa byù banshoq bang gi, gyai yhang maú byuq kômù, rayuq eq rayuq, “Shí yuq é dang gi, hkasú é dang wá nghut lhê lhú? Ahko ahkáng bo é đông mhoqshit é hkyô asik nghut ri-nhung! Yhang gi, agè ashop é nat pé lé hkunmó hkyó jáng, haú bang lháng gyo byí akô nghut ri.” ga luí,
- ²⁸ taí lhùm bum akô nghut ri. Yesuq eq sêng é ludang gi, Galile mau jàm shoq, yang é đông byo myín ló bê nghut ri.

Byù Myo Myo Lé, Yesuq Lhoq Gê Byí É Hkyô

Mht 8:14-17; Luk 4:38-41

- ²⁹ Yhangmoq gi, tarajong mai htoq luí, haú hkûn jáng, Yakuq eq Yohan nhik le mù, Simun eq Andre nhiktâng é
- ³⁰ yhùm má wang e ló bekô nghut ri. Simún é yhâng-aumô gi, gyai yhang nò leq tô é nghut mù luí, yhangmoq gi, Yesuq lé haú yuq no é hkyô lhom taí
- ³¹ kyô akô nghut ri. Haú mù luí, Yesuq gi, yhâng chyáng huí ê mù, yhâng é loq má zui luí tu tsung ri; haú hkûn jáng, nò ge byuq luí, yhang gi, yhangmoq lé gaí tso gaí huq bê nghut ri.
- ³² Haú nyí buiwang é htâng má, byu pé gi, no é bang eq nat gang wang júng nyí é bang banshoq lé, Yesuq chyáng shuí lé lo bum akô nghut ri.
- ³³ Rawa bang, hkúmdong nàm má lé zup
- ³⁴ zing tô akô. Haú mù, Yesuq gi, awáng nòhpyo ajung jung huí é bang myo myo lé lhoq gê byí ri; nat gang myo myo lé le, hkat htoq pyâm ri; nghut kôlhang, Yhang ó nghut é lé nat gang haú bang sé kô é yanmai, nat gang haú bang lé dang a taí nhâng nghut ri.

- ³⁵ Yesuq gi, htang napkyó mau lháng a bó shimá, toq mù, gaú é jowò ralhum
- ³⁶ má htoq ê luí, kyú ê dúng ri. Simun eq yhâng é luzúm wuí kúm gi, Yhang
- ³⁷ lé châng hô kômù, Yhang lé myang hô kôjáng, “Yuq hkanmó gi, Nang lé châng hkat ho nyi akô.” ga luí, taí kyô akô nghut ri.
- ³⁸ Háu hkún, Yesuq gi, yhangmoq lé, “Awui ayàm mâ é wà pé má le, ngò, mungdang wó hkô râ matú ê sháng, hau é matú ngò lé é ru nghut lhê.” ga
- ³⁹ tû taí ri. Háu mù luí, Yhang gi, Galile mau ramau gón, tarajong pé má mungdang hkat hko wún é htoq agó, nat gâng pé lé le hkat htoq pyám byí wún ri.

**Manggâm Dap Sû Lé, Yesuq
Lhoq Gê Byí É Hkyô**

Mht 8:1-4; Luk 5:12-16

- ⁴⁰ Manggâm dap é byù rayuq gi, Yesuq chyáng lé mù, hkyihput htuq luí, “Nàng dóng é nghut le gi, ngò lé Nàng wó lhoq sân-yúng byi râ nghut lhê.” ga dung wut ri.
- ⁴¹ Háu hkún, Yesuq gi, yhang lé wú shogyo luí, loq lhâm kat mù, háu yuq lé é záng luí, “Ngò dóng lhê, ⁴² sân-yúng aq hkoi.” ga taí ri. Háu hkún jáng, manggâm ana byuq byuq luí, yhang gi, gè bê nghut ri.
- ⁴³ Yesuq gi, “Nàng, shí hkyô ó lé le ⁴⁴ hkâtaí kyo. Nghut kôlhang, náng é gungdu lé, hkyangjong hpô chyáng ló tûn shit mù, nàng sân-yúng bê hkyô lé yhangmoq é matú saksé dut sháng gaq, Mosheq tarâ tô tô é eq rajung za, hkungga ló nhông byi aq.” ga, yhang lé gyai yhang sidiq byi mù, radá dâm
- ⁴⁵ nhang kat bê nghut ri. Nghut kôlhang, háu yuq gi, htoq ló mù, háu hkyô lé je taí pyo myhîn ló bê nghut ri. Hau é yanmai, Yesuq gi, wà hkaú má de

de a ge wang ló lo mù, shinggan mâ é chamchyuyi dut é jowò má za nyi nyi ri. Nghut kôlhang, byu pé gi, jowò hkanmó mai Yhâng chyáng ru zing lé nyi bum ashí kó nghut ri.

**Gùngjum Shí Sû Lé, Yesuq
Lhoq Gê Byí É Hkyô**

Mht 9:1-8; Luk 5:17-26

- 2** Buinyi hkâ-myháng a myáng má, Yesuq gi, Kaperna-um wà má dum wang lò jáng, Yhang yhâm dum taú jé lô bê gâ é hkyô lé, byu pé wó gyô bum
- ² akô nghut ri. Háu mù, byù myo myo zing lé lô kôluí, yhúmhaú má jowò a joq lô é htoq agó, hkumtot má lháng a joq lo nghut ri; Yesuq gi, yhang-
- ³ moq lé mungdang hko kyô nyi ri. Háu hkún, byù myi yuq gi, gùngjum shí sù rayuq lé chôm dang waq luí, Yhâng
- ⁴ chyáng lé lo akô. Yhangmoq gi, byù lûm myô chyîn chyap to mù, byù háu yuq lé Yesuq chyáng a wó shuí jé é kô é yanmai, Yesuq é u htoq mâ é yhum-hkûng lé dong htông yù luí, gùngjum shí sù lé taphkang eq roq hkyô kat akô
- ⁵ nghut ri. Yesuq gi, yhangmoq é lum-jíng myit lé byu-myàng jáng, gùngjum shí sù lé, “Ngá zo ê, náng é yubak mara lé hkyut pyám byi bê.” ga taí ri.
- ⁶ Háu hkún, tarâ sará pé ra-am gi, háu má zung to kôluí, yhangmoq é i-myt
- ⁷ unghkaú má, “Byù shí yuq gi, haí mù luí háu su gâ lhê laq? Yhang gi, Garai Gasang lé rhoi dang taí nyi ri; Garai Gasang mai lai luí, ó yuq wá mara wó hkyut byi râ lhú?” ga luí, myit són wuí nyi bum akô nghut ri.
- ⁸ Yesuq gi, yhangmoq é unghkaú má myit wú nyí kô é hkyô lé, radá dâm Yhang é myit mai sé mù, “Nungmoq é i-myt hkaú má, haí mù háu su nghú myit són wuí nyi bum akô lhú?”

- ⁹ Haû gùngjum shî sù lé, ‘Náng é yubak mara lé hkyut pyám byi bê.’ nghû taí é dang eq, ‘Toq aq, náng é taphkang lé yù mù, hkyô so aq.’ nghû taí râ má, hká hkun je taí lui lhê lúhú?
- ¹⁰ Nghut kôlháng, haû Byu Yhangzo^a gi, mingkan htoq má, mara hkyut byi râ ahkáng wó Sù nghut é lé, nungmoq lé sé nhâng nau lhê.” ga, yhangmoq
- ¹¹ lé taí kat ri. Hau htâng, Yhang gi, haû gùngjum shî sù lé, “Ngò, nang lé taí bá, toq aq, náng é taphkang lé yu chûng luí, yhûm taú ló aq hkoi.” ga
- ¹² taí ri. Haú yuq gi, toq mù, yhâng é taphkang lé yu chûng luí, yhangmoq ban-shoq bang wú tsuq tô é myoq hí mai sô htoq ló byuq bê nghut ri. Hau é yanmai, yuq hkanmó gi, mauhong bùm kômù, “Isû é hkyô gi, hkâ-nhám lháng a myàng wú shi.” ga, Garai Gasang lé hkya-on kungton bum akô nghut ri.

Lewiq (Mahte) Lé Wut Yu É Hkyô

Mht 9:9-13; Luk 5:27-32

- ¹³ Yesuq gi, nhông yàm má radàm dum htoq e ri. Haú hkûn, byù moq mó gi, Yhâng chyáng jé lé lo bùm kômù, Yhang gi, haú bang lé lhom mhoqshit
- ¹⁴ nyi ri. Yhang gi, sô yông ló nyi é hkûn, kang guq zúm má zung tô é, Alhpe yhangzo Lewiq lé myang kat luí, “Ngá htâng cháng aq.” ga taí ri. Haú hkûn, Lewiq gi, toq luí, Yhang htâng cháng bê nghut ri.
- ¹⁵ Yesuq gi, Lewiq é yhûm má myinzang ê zô nyi é hkûn, kang guq bang myo myo eq yubak dap bang le, Yhang eq Yhâng é chángzô pé eq rahá zo shuq bum akô. Hkâsu mù gâ le, Yhang htâng châng é bang gi, ajùm
- ¹⁶ ayò nghut é yanmai nghut ri. Tará sará nghut é Hparishe pé ra-am gi, yu-

- bak dap bang eq kang guq zo bang le mù rahá, Yesuq zang zô nyi é lé myàng kôjáng, Yhâng é chángzô pé lé, “Yhang gi, haí mù luí, kang guq bang eq yubak dap bang eq rahá zo shuq nyi lhê lúhú?” ga myí bum akô nghut ri.
- ¹⁷ Haû su ga myi kô é lé Yesuq wó gyo jáng, Yhang gi, yhangmoq lé, “Wángzán bang gi, chi sará a ra kó, nõhpyo hui bang za sheq ru râ lhê. Haû eq rajung za, Ngò gi, dingmán bang lé wut yù râ matú jé lé é a nghut, yubak dap bang lé ji yù râ matú sheq jé lé é ru nghut lhê.” ga taí kat ri.

Zoshuq Gám É Eq Sêng É Hkyô

Mht 9:14-17; Luk 5:33-39

- ¹⁸ Yohan é chángzô pé eq Hparishe pé gi, zoshuq gám nyi akô nghut ri. Haû mù, ra-am gi, Yesuq chyáng jé lé kômù, “Wui-myhup Sará Yohan é chángzô pé eq Hparishe pê é chángzô pé gi, zoshuq gám akô; nghut kôlháng, náng é chángzô pé gi, haí mù a gám kô é lúhú?” ga luí, myí akô nghut ri.
- ¹⁹ Haú hkûn, Yesuq tû taí é gi, “Bíng pé gi, lusik eq rahá nghut nyi tô ashí hkûn, zoshuq hkâsu wó gám râ lúhú? Yhangmoq gi, lusik eq rahá nghut nyi é u lé, zoshuq gám kó râ a nghut.
- ²⁰ Nghut kôlháng, lusik lé yhangmoq chyáng mai shuí yu pyâm é hkyíng jé râ nghut lhê; haú buinyi pé má kúm gi, yhangmoq, zoshuq gám kó râ nghut lhê.
- ²¹ Ó yuq le, mebu xau má pán sik èq a lhaq hpo wú kó; haû su kut é nghut jáng, pán sik gi, kun byuq mù, mebu xau le je lhoq cheq pyám râ nghut lhê.
- ²² Haû eq rajung za, tsibiyiq wing asik lé le, shokuq htûng axau má ó a kat wú kó. Kat é nghut jáng, tsibiyiq wing

^a 2:10 Byu Yhangzo gâ é gi, Yesuq Yhânggùng yhang lé le taí é nghut lhê, Mesaia lé le taí é nghut lhê.

asik gi, htông lé lhoq buq goq nhâng luí, tsibiyiq wing eq shokuq htông htên byuq râ nghut lhê. Haú mù, tsibiyiq wing asik gi, shokuq htông sik má za ge kat é nghut lhê.

Bánno Buinyi É Yhumsîng

Mht 12:1-14; Luk 6:1-11

- ²³ Bánno buinyi ra-nyí má, Yesuq gi, Yhâng é chángzô pé eq rahá yò hkaú mai sô lai ló é hkûn, Yhâng é chángzô pé gi, kyôshi ratsuí langshap yu akô
- ²⁴ nghut ri. Haú mù, Hparishe pé gi, Yesuq lé, “Wú aq, Bánno buinyi má a ge kut jung lé, haí mù, náng é chángzô pé kut nyi akô lú?” ga taí akô.
- ²⁵ Haú hkûn, Yesuq gi, yhangmoq lé, “Dawiq lháng gi, yhâng htâng châng é bang eq rahá zòmut hui luí, zoshuq râ tô é hkûn, hkâsu kut é hkyô lé, nungmoq hkâ-nhám le a nghap wú kó lú?”
- ²⁶ Abiahta, hkyangjong mó kut nyi é u lé, Dawiq gi, Garai Gasâng é yhúm-hkaú má wang ê mù, hkyangjông pé mai lai luí, ó le a ge zô é, kyâng tô é muk lé yù zo mù, yhang htâng châng é bang lé le ratsuí tsuí byi tso é nghut lhê.” ga tû taí ri.
- ²⁷ Hau htâng, Yhang gi, yhangmoq lé, “Bánno buinyi gi, byù é matú kut tô é nghut lhê; byù gi, Bánno buinyi é matú a nghut. Haú mù, haú Byu Yhangzo gi, haú Bánno buinyi é Yhumsîng lháng nghut lhê.” ga xoq taí ri.
- 3** Yesuq gi, tarajong má radàm dum wang e le, loq raloq ajum shi byuq
- ² é byù rayuq nyi to láng ri. Haú hkûn, haú má nyi tô é bang ra-am gi, Bánno buinyi má, Yesuq mai haú yuq lé lhoq gê byi râ lú ga, mara hún râ matú
- ³ gyám wú nyi akô nghut ri. Yesuq gi, haú loq jum shí sù lé, “Banshoq bâng é hí má, toq yap shit aq.” ga taí kat ri.

- ⁴ Hau htâng, Yhang gi, haú má nyi tô é bang lé, “Bánno buinyi má, ge é muzó kut râ, a ge é muzó kut râ, byù asak hkyî râ eq byù sat râ hkyô pé má, hká lhum kut le sheq tarâ wang lhê lú?” ga myí kat jáng, yhangmoq kúm gi, jit le a ga kó nghut ri.
- ⁵ Haú mù, Yhang gi, nhik-yô nau é myit èq haú bang lé lhîng wú mù, yhangmoq myit htan é hkyô lé, wú yón luí, haú loq jum shí sù lé, “Náng é loq nyhang kat aq.” ga taí kat jáng, haú yuq gi, loq nyhang kat luí, yhâng é loq gi, shoq za ge byuq bê
- ⁶ nghut ri. Hau htâng má, Hparishe pé gi, htoq ló kômù, Yesuq lé hkâsu kut wó sat pyám râ hkyô lé, Herut é byu pé eq chôm hpyê lhûm bum akô nghut ri.

Byù Ajùm Ayò, Yesuq Htâng Cháng Kô É Hkyô

- ⁷ Yesuq gi, Yhâng é chángzô pé eq rahá, nhông shut dum e ló le, Galile mau mâ é byù ajùm ayò gi, Yhang htâng châng e ló bum akô nghut ri.
- ⁸ Hau htoq agó, Yuda mau mâ é bang, Yerusalem wà mó mâ é bang, Idu-mia mau mâ é bang, Yodan làng hé hpoq mâ é bang, Turuq myuq eq Sidun myuq awui ayàm jé shoq mâ é bang, ajùm ayò gi, Yhang kut nyi é hkyô banshoq lé wó gyo kôjáng, Yhâng chyáng jé lé bum akô nghut ri.
- ⁹ Yesuq gi, byù myo myo lé lhoq gê
- ¹⁰ byí é yanmai, nõhpyo hui to bang gi, Yhang lé wó záng shoq ga, chyín chyap wang ló bum akô. Byù lûm myo luí, Yesuq gi, Yhang lé a nhê pyet pyám sháng gaq ga, Yhâng é chángzô pé lé lhai ralhum hen to
- ¹¹ nhang ri. Agè ashop é nat pé gi, Yhang lé myàng hkangmó, Yhâng é hí má lêng ngop to luí, “Nàng gi, Garai Ga-

sâng é Yhangzo nghut ri.” ga luí,
¹² taí garú akô. Nghut kôlhang, Yesuq
 gi, Yhang ó yuq nghut é hkyô lé a
 taí byông htoq râ matú, tân hkúm
 kat ri.

**Lagyo Kut Râ Byù Raxe Í
 Yuq Hkyin Yu É Hkyô**

Mht 10:1-4; Luk 6:12-16

¹³ Yesuq gi, bùm shut doq ló mù,
 Yhang ô nau é bang lé ji kat luí, haú
 bang gi, Yhâng chyáng jé lé lo bum
¹⁴ akô nghut ri. Haú hkûn, Yesuq gi,
 byù raxe í yuq lé hkyin yù luí, la-
 gyo ayá byí ri; haú bang gi, Yhang eq
 rahá nyi râ matú le, mungdang hkô râ
¹⁵ matú Yhang nhang htoq kat râ eq, nat
 gâng pé lé hkat htoq râ ahko ahkáng
 wó râ matú le, nghut akô nghut ri.
¹⁶ Haú raxe í yuq gi, Simun (Yesuq
 mai Petruq ga myìng myhíng byi
¹⁷ sù); Zebedi é yhangzô nhiktâng Ya-
 kuq eq yhanggu Yohan (Yháng nhik-
 tâng lé Yesuq mai Buanerga ga myìng
 myhíng byí ri; hau é lichyúm gi, mau-
¹⁸ gum zô nhik gâ é nghut lhê.); Andre,
 Hpilip, Barhtolume, Mahte, Htomaq,
 Alhpe é yhangzo Yakuq, Htade, Ze-
¹⁹ lutuq^a dut é Simun eq, Yhang lé ap
 pyám râ sù, Yudaq Iskarut pé nghut
 akô.

Yesuq Eq Bezebulaq

Mht 12:22-32; Luk 11:14-23, 12:10

²⁰ Hau htâng, Yesuq gi, yhûm má
 wang ló le, byù ajùm ayò dum zíng lé
 lô kômù, Yhang eq Yhang é chángzô
 pé gi, zang zo hkyíng lháng a wó kó
²¹ nghut ri. Yhâng é yhumbyù wui gi,
 haú hkyô lé wó gyo kôjáng, “Yhang,
 myit a gying lo nghut ri.” ga luí,

Yhang lé hung shuí yù râ matú, e akô
 nghut ri.

²² Yerusalem wà mó mai gyó lé lo é
 tarâ sará pé gi, “Shí yuq gi, Beze-
 bulaq gâ é nat gâng pé é zau lúng sù
 nghut ri-nhung! Yhang gi, nat zaù é
 wum-o a-tsam èq za, nat gâng pé lé
 hkat htoq pyâm é nghut ri.” ga taí
 bum akô nghut ri.

²³ Haú mù luí, Yesuq, yhangmoq lé
 wut yù mù, dangtú dong taí é gi,
 “Tsadán gi, Tsadán lé hkâsu kut wó
²⁴ hkat htoq râ lú? Mingdán ralhumi gi,
 ahkaú má byoq gâng lhûm nyi kô é
 nghut jáng, mingdán haú wó gíng nyi
²⁵ râ a nghut. Yhumhtu ralhumi má le,
 ikun byù yhangchang byoq gâng lhûm
 nyi é nghut le gi, yhumhtu haú wó
²⁶ gíng nyi râ a nghut. Haú eq rajung
 za, Tsadán le, yhânggùng yhang lhoq
 hpyoq luí, gam hkoq nyi é nghut le
 gi, yhang wó nyi nyi râ a nghut, htûm
²⁷ byuq râ za nghut lhê. Ó yuq nghut
 kôle, wum-o bò sù lé hí tui zing pyâm
 é a nghut le gi, yhâng é yhûm má
 lú wâng mù, yhâng é sutzè lé wó lú
 yù râ a nghut: Haú yuq lé hí tuí zing
 pyám jáng sheq, yhâng é sutzè lé wó
²⁸ lú yù râ nghut lhê. Ngò, nungmoq lé
 teng za taí kôlé, byu pé kut shut é
 mara banshoq eq rhoí dang taí pyâm
 é pé lé gi, mara wó hkyut pyám byí
²⁹ lhê. Nghut kôlhang, haú Chyoiyúng
 Woi-nyí lé rhoí dang taí pyâm é sù
 gi, hkâ-nhám le, mara hkyut byí é wó
 hui râ a nghut; haú yuq gi, ahtum
 abyuq yubak wó sù nghut nyi ri.”
 gâ ri.

³⁰ Yhang haú su ga taí é gi, yhangmoq
 mai, “Yhang gi, agè ashop é nat wó sù
 nghut ri.” ga kô é yanmai nghut ri.

^a 3:18 *Zelutuq* gâ é lichyúm gi, yhumsíng zui saí é hkyô má gyai yhang myit lòm shirong é sù
 lé gâ lhê. Haú u lé, Israelaq byu pé gi, mingdán luthkyô wó râ matú shikut nyi é hpúng bang lé,
 Zelutuq gâ lhê.

Yesuq É Yhângnu Eq Yhanggu Pé*Mht 12:46-50; Luk 8:19-21*

- ³¹ Hau htâng, Yesuq é yhângnu eq yhanggu pé gi, jé lé mù, yhûm hkun má yap to kôluí, Yesuq htoq lô râ matú, byù rayuq lé wang taí nhang
- ³² akô nghut ri. Byù ajùm ayò gi, Yhâng é lhîngkhyuq má zung tô akô; haú bang gi, Yhang lé, “Wú aq, náng nu eq nunggu pé gi, nang lé hui naú luí, shinggan má láng bum akô.” ga taí kyô akô nghut ri.
- ³³ Haú hkûn, Yhang gi, “Ô pé gi, Ngá nu eq Ngá gu pé nghut akô l hú?” ga myi kat ri.
- ³⁴ Hau htâng, Yhang gi, Yhâng é lhîngkhyuq má zung hkyuq tô é bang lé wú mù, taí é gi, “Shí bang gi, Ngá nu eq
- ³⁵ Ngá é gumang wui nghut bê! Garai Gasang ô nau é hkyô châng é sù ó yuq nghut kôle, Ngá gu, Ngá mang, Ngá nhá, Ngá nu chyat nghut bê.” gâ ri.

Kyôshi Sân É Dangtú*Mht 13:1-23; Luk 8:4-15*

- 4** Yesuq gi, nhông yàm má radàm dum mhoqshit hi ló bê nghut ri. Haú hkûn, Yhâng é lhîngkhyuq má byù moq mó lûm yán zîng lé lo bùm kô é yanmai, Yhang gi, nhông hkaú mâ é lhaí má wang zung tô ri; haú u lé, byù moq mó gi, nhông yàm gin-gau htoq má nyi míng bum akô nghut ri.
- ² Yhang gi, haú bang lé, dangtú pé dông myo myo mhoqshit byí nyi ri; Yhang
- ³ mhoqshit é má, “Gyo wú keq! Kyô hkyó sù rayuq gi, kyôshi san râ gâ
- ⁴ htoq e ló ri. Yhang, kyôshi sân kat é hkûn, ra-am gi, hkyô má gyó ang mù, nghoq pê èq lé hte zô pyám ri.
- ⁵ Ra-am gi, myi-tse a htu é luqgok yò pé má gyó ang mù, myi-tse a htu é yanmai, luí za yuq htoq ló kôle,

- ⁶ amyit a wó chîn hing é nghut mù, buí htoq lô jáng, lhap kyuq pyám
- ⁷ bê nghut ri. Dum ra-am gi, zugyóm hkaú má gyó ang luí, zubyap haú pé kô lò mù, wup pyám é yanmai,
- ⁸ ashi a wó zui nghut ri. Nghut kô-lhang, ra-am gi, myihpún bo é jang má gyó âng é yanmai, yuq kô lò mù, ashi sum xê tú, hkyuq xê tú, rashô tú l háng, zui myô lo é nghut ri.” gâ ri.

- ⁹ Hau htâng, Yesuq dum taí é gi, “Gyo yù râ nohkyap dap sù gi, gyô yù sháng gaq.” gâ ri.

- ¹⁰ Yhang baú za nghut nyi é hkûn, haú lagyo raxe í yuq eq Yhang nàm má nyi tô é bang gi, dangtú haú eq
- ¹¹ sêng é hkyô lé, lé myí akô. Haú hkûn, Yhang, yhangmoq lé taí kyô é gi, “Garai Gasâng é mingdán eq sêng é sê gyo wuí é hkyô lé sé gyo râ ahko ahkáng, nungmoq lé byí to lugù nghut bê. Nghut kôlhâng, góbâng é matú gi, jung hkgangmó lé dangtú dông chyat
- ¹² taí é nghut lhê. Haú mù luí,

‘Yhangmoq gi, myang nyi kôlhâng, a wú sé kó, gyô nyi kôlhâng, a sê gyo kó; sé wú sê gyo kô é ru nghut le gi, lhîng taú lò mù, mara hkyut pyám byí é hui kó râ nghut lhê!’^a

gâ ri.” ga tô ri.

- ¹³ Hau htâng, Yhang, yhangmoq lé dum xoq taí é gi, “Nungmoq, dangtú shí lé a sê gyo kô é nghut le gi, gotú dangtú pé lé hkâsu kut ung sê gyo kó
- ¹⁴ râ l hú? Yò mù zui sù san kat é kyôshi
- ¹⁵ gi, mungdang nghut lhê. Byù ra-am gi, hkyô má gyó âng é kyôshi eq wuí akô; yhangmoq gi, mungdang lé wó gyô yu é hkûn yhang, Tsadán gi, lé mù, yhangmoq chyáng mâ é mungdang lé

^a 4:12 Esai 6:9-10

¹⁶ lé yù pyám byî ri. Ra-am gi, luqgok yò pé má gyó âng é kyôshi eq wuí akô; yhangmoq gi, mungdang lé wó gyó jáng, radá dâm gabú myit èq hap

¹⁷ yù akô. Nghut kôlhang, yhangmoq gi, amyit a wó chîn é yanmai, razup zo za yuq kômù, mungdang é yanmai, wuî-hke é eq zing-rî é pé hui kôjáng, hân

¹⁸ hân htak ló byuq kó râ nghut lhê. Dum ra-am nghut jáng, zugyóm hkaû má gyó âng é kyôshi eq wuí akô; yhangmoq gi, mungdang lé wó gyô yù kô-

¹⁹ lhang, shí ipyat lhê é myit wui myit hke hkyô, hkyô shuí nghoq jung ngùn hîng zèhkoq eq gotû zè pé lé ô nau é hkyô pé, yhangmoq chyáng wang lò jáng, haû mungdang lé hup pyâm é yanmai, ashi a wó zui dut kó râ

²⁰ nghut lhê. Ra-am kúm gi, myìhpún bo é jang má gyó âng é kyôshi eq wuí akô; yhangmoq gi, haû mungdang lé gyô yù mù, lhom yù luí, sân kat é htoq sum xê tú, hkyuq xê tú, rashô tú lhang myo shoq ashi zui lò kó râ nghut lhê.” gâ ri.

Myibung Htún É Hkyô

Luk 8:16-18

²¹ Yesuq, yhangmoq lé xoq taí é gi, “Nungmoq gi, myibung lé yù mù, tsungjang má a tsung e za, mûng èq nghop tô é, a nghut jáng, yhupchong ô má tsung tô é, ó yuq wá kut wú akô

²² lú? Hkâsu mù gâ le, haq tô é zè haí jung le htoq ze lò râ eq, zaú tô é pé haí jung le byông htoq lô râ nghut lhê.

²³ Gyô yù râ nohkyap dap sù ó yuq nghut kôle, gyô yù sháng gaq.” gâ ri.

²⁴ Hau htoq agó, Yhang dum taí é gi, “Nungmoq gi, wó gyô yu é hkyô lé rago myit wú keq; nungmoq lik byî é bung èq, nungmoq lé dum lik byi râ nghut lhê; hau htoq lhang myo shoq

²⁵ wó kó râ nghut lhê. Hkâsu mù gâ le,

wó to sù lé gi, jat byi shirâ, a wó su chyáng mai kúm gi, yhang wó tô é lé lhang yu pyám byi shirâ nghut lhê.” gâ ri.

Kyôshi Yuq Kô Lo É Dangtú

²⁶ Hau htâng, Yhang dum xoq taí é gi, “Garai Gasâng é mingdán gi, byù ra-yuq mai, myigùng má sân kat é kyô-

²⁷ shi eq wuí ri. Byù haû yuq gi, myín lé yhup tô é nghut nghut, nyí lé toq lo é nghut nghut, kyôshi gi, zui htoq lô mù, yuq kô lo nyi ri; nghut kô-

²⁸ lhang, yhang gi, hkâsu kut yuq lo nyi é hkyô lé a sé nghut ri. Myigùng gi, yhang baú yhang, kyôshi lé, sânghi má abum bum nhâng, hau htâng má a-nhâm htoq nhâng mù luí, ashi zui

²⁹ shoq kut é nghut lhê. Kyôshi myhíng jáng, kyô shu yoq jé bê nghut é yanmai, yhang gi, zaiyik èq yâm yù râ nghut lhê.” gâ ri.

Angshi Cham Lé Dangtú Yu É Hkyô

Mht 13:31-32; Luk 13:18-19

³⁰ Yesuq dum xoq taí é gi, “Garai Gasâng é mingdán lé, hai èq lhoq whuí wú râ lú? Haí jung dangtú yù mù,

³¹ shit wú râ lú? Garai Gasâng é mingdán gi, angshi cham eq wuí ri. Angshi cham haû gi, myigùng má hô é kyô-

³² myui jí pé má je tiq é nghut lhê. Nghut kôlhang, ho mù, yuq kô lô jáng, xun hkyâm má hô é mhan-haq hpoqnoq gàm banshoq htoq má je kô é agàm dut lò mù, akoq kô lò luí, hau é buishûm hkaû má, maulat nghoq zô pé lé wó zung nô nyi é nghut lhê.” gâ ri.

³³ Haû sù é dangtú myo myo dông mai, Yesuq gi, yhangmoq wó sê gyô é myhó, mungdang hko kyô nyi ri.

³⁴ Yhang gi, yhangmoq lé, dangtú a bo é haí lhang a taí wú nghut ri; nghut kôlhang, Yhang eq chángzô pé

baú nghut nyi é hkûn kúm gi, jung hkanq mó é lichyúm lé taí sân kyô ri.

Laidun Mó Lé, Yesuq Lhoq Zím Pyâm É Hkyô

Mht 8:23-27; Luk 8:22-25

- ³⁵ Haú nyí, myinhêng lé, Yesuq gi, Yhâng é chángzô pé lé, “Nga-nhúng nhông hé hpoq shut dap e ló sháng.”
- ³⁶ ga taí ri. Haú hkûn, chángzô pé gi, byù moq mó lé nyhi pyâm to luí, Yhang zung tô é lhaí mai yhang, Yhang lé shuí gû dap ló bekô; gotû lhaí pé le, yhangmoq eq rahá bo gû dap ló
- ³⁷ akô nghut ri. Haú u lé, laidun mó jé lô mù, wuìhêng hta toq lô luí, lhaí má lo bat hâng é yanmai, wuì byíng
- ³⁸ lô bê nghut ri. Haú hkûn, Yesuq gi, lhaí htâng má uhkuq hkuq mù yhup myhí tô ri; haú chángzô pé gi, Yhang lé nhaú pun luí “Sarâ ê, nga-nhúng myup shi ló râ dut é lé, nàng a chiq byi lú?” ga taí akô nghut ri.
- ³⁹ Yesuq gi, toq mù, laidun lé tan luí, wuìhêng lé, “Zim aq.” ga taí kat jáng, haú laidun num ló byuq luí, banshoq zím byuq bê nghut ri.
- ⁴⁰ Hau htâng, Yhang gi, Yhâng é chángzô pé lé, “Haí mù, haú-í gyuq bum akô lú? Nungmoq gi, lumjíng myit a bò shi kó lú?” ga taí ri.
- ⁴¹ Yhangmoq gi, gyai yhang gyuq dan bùm kômù, “Shí yuq gi, hkasû é byù nghut lê là? Lài eq wuìhêng pé lhang gi, Yhâng é dang lé gyo byí ri-nhung!” ga luí, rayuq eq rayuq myí lhum bum akô nghut ri.

Nat Gang Hkat Htoq Pyâm É Hkyô

Mht 8:28-34; Luk 8:26-39

- 5** Yhangmoq gi, nhông hé hpoq má é Gerase byu pê é mau má jé dap e
- ² ló akô. Yesuq lhaí mai htoq ló é hkûn, agè ashop é nat wang júng é byù ra-

- yuq gi, lupdùng mai htoq lé lô mù,
- ³ Yhang lé lhom huí ri. Haú yuq gi, lupdùng má za nyi é sù nghut ri; yhang lé, ó yuq èq le, shamtoq-tuí èq lhang a
- ⁴ wó tuí zing wú kó nghut ri. Hkâsu mù gâ le, adàm dàm, yhâng é loq eq hkyí má shamtoq-tuí èq tuí tô wú kôlhâng, yhang gi, loq mâ é shamtoq-tui pé lé lhang hpyit pyâm pyâm kut mù, hkyí mâ é shamtoq kyum lé lhoq hkyop pyâm pyâm kut ri. Yhang lé, ó yuq èq
- ⁵ le a wó hkuq yù kó nghut ri. Yhang gi, nyí myín aga lupdùng eq bùm pé má puk garu uchyang, yhumsing gùng lé luqgok èq dún cheq wún ri.
- ⁶ Yhang gi, Yesuq lé, we mai myang kat jáng, din e lô mù, Yhâng é hí
- ⁷ má hkyihput htuq ngop luí, htê mó èq, “Myhang htâng é Garaí Yhangzo Yesuq ê! Nàng gi, ngò eq haí sêng lê lú? Nàng gi, ngo lé a zing-ri râ matú, Garai Gasâng hí má danggidiq
- ⁸ byi laq.” ga taí garû ri. Haí mù gâ le, Yesuq gi, yhang lé, “Agè ashop é nat nàng ê, byù shí yuq chyáng mai htoq ló aq.” ga taí kat é yanmai nghut ri.
- ⁹ Hau htâng, Yesuq gi, “Náng myíng haí gâ lê?” ga, yhang lé myi jáng, yhang gi, “Ngamoq gi, myo myo nghut é yanmai, Legio gâ lê.” ga tú
- ¹⁰ taí ri. Hau htâng, yhang gi, haú jowò mai yhangmoq lé a kôn pyâm râ matú, Yesuq lé dum dung dung kut nyi ri.
- ¹¹ Haú u lé, waq rajùm mó gi, bùm yàm má dú but zô nyi bum akô
- ¹² nghut ri. Haú mù luí, nat gâng pé gi, “Ngamoq lé, waq pê chyáng nhang kat luí, yhangmoq chyáng wàng nhâng
- ¹³ laq.” ga luí, Yesuq lé dung akô. Haú hkûn, Yesuq gi, yhangmoq lé ahkáng byí kat jáng, haú agè ashop é nat pé gi, haú yuq chyáng mai htoq ló kô-luí, waq pê chyáng wang ló byuq bekô nghut ri. Haú mù, haú í hkyíng kô bo

é waq hpúng gi, gampyoq mai nhông hkaû shut rut din yán wang ló kôluí, myup shi byuq bekô nghut ri.

- ¹⁴ Waq zúng bang gi, hpang din wang ló kômù, myuq hkaû mâ é bang eq awui ayàm mâ é bang lé, haú hkyô ló shit kyo kô é yanmai, byù haú bang gi, dut lai lò bê hkyô lé, ê htoq ¹⁵ wú akô nghut ri. Yhangmoq gi, Yesuq chyáng jé lé kô é hkûn, nat gang myo myo wang júng wú é sù, mebu wut luí, byù gè rayuq su zung to lánng é lé myàng kômù, gyuq dan bùm bekô ¹⁶ nghut ri. Haú hkyô lé myang é bang gi, nat gâng pé wang júng sù eq waq pé chyáng hkâsu dut é hkyô, góbang ¹⁷ lé tai kyo akô nghut ri. Hau htàng, byu pé gi, Yesuq lé yhangmoq é mau mai htoq ló byuq râ matú, chôm dúng tóngbán akô nghut ri.
- ¹⁸ Yesuq lhai hkaû má wang ló é u lé, haú nat gâng pé wang júng lai lò bê sù gi, Yesuq htàng cháng râ matú, ¹⁹ Yesuq lé dung tóngbán ri. Nghut kô-lhang, Yesuq gi, yhang lé ahkáng a byi e za, “Nàng, yhùm shut sheq ló mù, haú Yhumsing, nang lé hkâ-í kut byi bê hkyô eq hkâsu kut shogyo nhik-myin yu é hkyô lé, náng é yhumbyù buinùm ji-myi wui lé ló tai kyo aq.” ²⁰ ga tai kat ri. Haú mù, byù haú yuq gi, ló luí, yhang lé Yesuq hkâ-í kut byi bê hkyô lé, Dekapoli^a mau bang lé ló tai kyô ri. Haú hkûn, wó gyô é bang ban-shoq gi, mauhong bum akô nghut ri.

Shi Byuq Bê Myiwe Zo Eq No É Myiwe Myhi Rayuq É Hkyô

Mht 9:18-26; Luk 8:40-56

- ²¹ Yesuq gi, lhai ji mù, nhông he hpoq shut dum dap jé ló mù, Yhang, nhông yàm má nyi tô é u lé, byù ajùm ayò

- gi, Yhâng é lhinghkyuq má lé zîng ²² bum akô nghut ri; haú hkûn, Ya-iruy gâ é, tarajong má up bang mâ é rayuq gi, haú má lé luí, Yesuq lé myang kat jáng, Yhâng é hkyî wang má paí ²³ gop to mù, “Ngá zo byizo gi, kâng byit ló nyi ri; yhang ge lò mù asak dum duí shi sháng gaq, nàng lé mù, yhâng é ahtoq má loq lé ke byi laq.” ²⁴ ga, wum kat dúng tóngbán nyi ri. Haú mù, Yesuq gi, haú yuq htàng châng e ló ri; byù ajùm ayò le, Yhâng é awui ayàm má châng chyîn chyap wún bum akô.
- ²⁵ Haú hkûn, raxe í zân suí yui nyi é myiwe myhí rayuq le haú hpúng má ²⁶ bo tô ri. Yhang gi, chi sará myo myô pé chyáng yhang wó é ngunzè ban-shoq lhoq pán mù, nò hkâm luí yâ wú kôlhang, ge é hkyô a joq é htoq agó, ²⁷ je lhang wuîhke lò ri. Yhang gi, Yesuq é hkyô lé wó gyo jáng, byù hpúng mai Yesuq é nunghtáng má huí lé mù, ²⁸ Yhâng é bu má ê záng kat ri. Hai mù luí gâ le, yhang gi, “Ngò, Yhang é bu má za lhang ê wó záng é nghut le gi, ge byuq râ nghut lhê.” ga wó myit é ²⁹ yanmai, haú su kut é nghut ri. Haú hkûn jáng, yhâng chyáng suí yui é kân byuq luí, yhang gi, hpuzô nyi é mai wó lut bê hkyô lé, yhanggùng má sê gyô kat bê nghut ri.
- ³⁰ Yesuq gi, Yhâng é gùng mai hpung-wup a-tsam htoq ló é lé, radá dâm châng sê kat luí, byù moq mó shut lhing wú mù, “Ngá é bu má ó yuq záng bê lú?” ga myi kat ri.
- ³¹ Haú hkûn, Yhâng é chángzô pé gi, “Náng é lhinghkyuq má byù ajùm ayò chyîn chyap nyi é lé, myang to luí nhing, ‘Ngo lé, ó yuq záng bê lú?’ nghú myi lhê lú?” ga tû tai kat akô.

^a 5:20 Dekapoli gâ é gi, Grik dông myuq raxê lé gâ lhê.

³² Nghut kôlhang, Yesuq gi, Yhang lé lé záng sù lé myàng râ matú, ho
³³ lhing wú nyi ashî nghut ri. Haú hkûn, myiwe myhí haú gi, yhâng chyáng hkâsu dut laí lò bê hkyô lé sê é yan-mai, Yesuq é hí má lé mù, gyuq nán é èq Yhang é hkyî wang má ngóm gop to luí, yhâng chyáng dut laí lò bê hkyô
³⁴ banshoq lé taí kyô ri. Haú mù, Yesuq gi, myiwe myhí haú lé, “Byizo ê, náng é lumjínng myit gi, nàng lé lhoq gê byi bê nghut ri; náng é nõhpyo ge byuq bê nghut ri; nõgón za ló aq hko!” ga taí ri.
³⁵ Yesuq gi, dang ru taí nyi ashî hkûn, tarajong má up sù Ya-irug é yhûm mai byù ra-am jé lé mù, “Nang é byizo gi, shi byuq bê; haí mù luí, haú sará lé lhoq hkyik nyi lhê lú?” ga luí, lé taí kat akô.
³⁶ Yesuq gi, haú bang taí é dang lé gyô lhaí pyám mù, “Hkâgyuq, za lumjínng aq.” ga, haú tarajong má up sù lé taí kat ri.
³⁷ Hau htâng, Yhang gi, Petruq, Yakuq eq Yakuq é yhanggu Yohan pé mai lai luí, ó yuq lé le, Yhang htâng
³⁸ a cháng nhâng nghut ri. Yhangmoq, haú tarajong má up sù é yhûm má jé lé kô é hkûn, Yesuq gi, byu pé garu garín ga yón ngau gabyông nyi bum
³⁹ é lé, myàng ri. Yhang gi, yhúmhaú shut wang ló mù, haú bang lé, “Haí mù, yón ngau gabyông nyi bum akô lú? Haú zoshâng gi, shi byuq é a nghut, yhup myhí tô é sheq ru nghut
⁴⁰ lhê.” ga taí ri. Nghut kôlhang, yhangmoq gi, Yhang lé wuizui kut pyám byí akô.
 Yhang kúm gi, haú bang banshoq lé hkat htoq pyám mù, zoshâng é yhângnu yhângwa nhik eq Yhâng é chángzô pé lé za shui luí, zoshâng lé lhez tô é gok má wang e akô nghut ri.

⁴¹ Yesuq gi, myiwe zo hau é loq má zui to mù, “Talihta ku-mi” (haú é lichyúm gi, “Myiwe zo ê, nõg, nang lé taí bá, toq aq.” gâ é nghut lhê.) ga taí ri.
⁴² Myiwe zo haú gi, haú hkûn jáng, toq luí, sô wún ri (yhang gi, asak raxe í zân bò bê sù nghut ri.). Yhangmoq gi, haú sù dut é hkyô lé gyai yhang maú
⁴³ byuq bùm bekô nghut ri. Yhang gi, haú hkyô ó lé le a sé nhâng râ matú, yhangmoq lé taí hkúm kat luí, myiwe zo haú lé, zô jung byi tso râ matú le, yhangmoq lé taí ri.

**Yhumsing Wà Má
Myoqdong A Wó É Hkyô**

Mht 13:53-58; Luk 4:16-30

6 Yesuq gi, haú jowò mai htoq e ló mù, Yhâng é yhum mau shut taú ló ri; Yhâng é chángzô pé le, Yhang eq
² rahá bo châng ló akô nghut ri. Bánno buinyì jé jáng, Yhang gi, tarajong má mhoqshit hi ló ri; wó gyô é bang myo myo gi, gyô maú byuq kôluí, “Byù shí yuq gi, haú pé lé hkâmá mhoq yu é lhà? Yhang wó yu é hpaqchyí byéng-yá gi, hkasú é wá nghut mù luí, laklaí kumlhá lé lháng kut lhê laq?
³ Shí yuq gi, Mariq é yhangzo, laksîma hpó nghut lhê, a nghut lú? Yhang gi, Yakuq, Yose, Yudaq, Simun pé é yhangmang nghut lhê, a nghut lú? Yhâng nhammó pé le, nga-nhúng eq rahá nghut nyi lhê, a nghut kó lú?” ga luí, Yhang lé myit a nõgón dut bùm bekô nghut ri.
⁴ Yesuq, yhangmoq lé taí é gi, “Myiq-htoi rayuq gi, yhumsing é yhum mau, yhâng é buinùm ji-myi wui eq yhum-sing é yhûm má za, myoqdong a lhaq
⁵ wó wú é nghut lhê.” gâ ri. Yhang gi, nõ byù ra-am lé loq ke byi mù, lhoq gê byí é mai lai luí, gotú laklaí kumlhá haí le, haú má a wó kut shit nghut ri.

⁶ Haû mù, Yesuq gi, yhangmoq lumjínq myit a bò kô é hkyô lé, maú nyi ri. Hau htâng, Yhang gi, Nazaret wà mai htoq ló mù, rawà htâng rawà má châng mhoqshit wún ri.

**Lagyo Raxe Í Yuq Lé
Nhang Htoq Kat É Hkyô**

Mht 10:5-15; Luk 9:1-6

- ⁷ Yesuq gi, haû lagyo raxe í yuq lé wut yù mù, agè ashop é nat pé lé ùng râ a-tsam byi luí, í yuq yuq kut nhang htoq kat ri.
- ⁸ Yhang, yhangmoq lé châng pying kat é dang gi, “Hkyowui é matú má, dumbáng mai lai luí, zoshuq le, etap le, ngùn le, gotú haí le, hkâyü chûng kó; hkyî-tsung kúm gi, tsûng chûng keq; nghut kôlhang, bu í dung hkâwut
- ⁹ chûng kó. Hká má nghut kôlhang, rayhûm yhûm má nungmoq wang bíng kô é nghut le gi, haú wâ mai dum htoq ló é buinyì jé shoq, haú yhûm má za
- ¹⁰ nyi nyi keq. Jowò rawò wò mâ é bang, nungmoq lé a lhom hap yù, a lhom gyo byi kô é nghut jáng, nungmoq lé yhangmoq a lhom hap yu é saksé dut sháng gaq, nungmoq é hkyiwa má dap é hpuilhau lé ko hkyô pyâm to mù, haú jowò mai htoq ló keq.” gâ ri.
- ¹¹ Haû mù, yhangmoq gi, htoq e ló luí, myit lhîng râ é hkyô, byu pé lé hkô
- ¹² kyô akô. Hau htoq agó, yhangmoq gi, nat gâng pé myo myo lé hkat htoq pyám byi mù, no é bang myo myo lé le xû but byi luí, lhoq ge byi akô nghut ri.

Yohan, Ulhum Hpyit Huí é Hkyô

Mht 4:1-12; Luk 9:7-9

- ¹⁴ Yesuq é myîng hû lo é yanmai, Herut hkohkâm gi, Yesuq é hkyô lé wó gyo bê nghut ri. Byù ra-am gi, “Shí yuq gi, haû shi byuq bê Wui-myhup

Sará Yohan dum dui toq lo é nghut lhê abe, hau é yanmai, yhang gi, hpungwup a-tsam haú pé lé wó kut é nghut ri.” ga luí, taí bum akô nghut ri.

- ¹⁵ Ra-am gi, “Yhang gi, Eliyaq nghut ri.” ga taí akô nghut ri.

Dum, ra-am taí kô é gi, “Yhang gi, hí hpyang lhê é myiqhtoí pé su, myiqhtoí rayuq nghut ri.” gâ ri.

- ¹⁶ Herut kúm gi, haú lé wó gyo jáng, “Ngò, ulhum hpyit pyám byî é Yohan gi, shi é mai dum dui toq bu-nhung!” ga taí ri.

- ¹⁷ Herut gi, yhanggu Hpilip é yhangmyi Herudiaq lé hâng yu pyâm é hkyô é yanmai, Yohan lé chyup tuí yù nhâng mù, htóng hkyô pyám nhang

- ¹⁸ wú é sù nghut lhê. Hkâsu mù gâ le, Yohan gi, Herut lé, “Nàng, nunggu é yhangmyi lé hâng yu é gi, tarâ a wang é nghut lhê.” ga luí, taí byi nyi

- ¹⁹ é yanmai nghut ri. Haû mù, Herudiaq gi, Yohan lé gyai a jú dut byuq luí, sat pyám naû kôlhang, a wó sat dut

- ²⁰ nyi ri. Haí mù gâ le, Herut gi, Yohan, dingmán chyoiyúng é sù nghut é lé sé mù luí, yhang lé gyuq hkungga mù, yhang lé búng nyi é yanmai nghut ri. Yhang gi, Yohan é dang pé lé wó gyo jáng, gyô nhúng nhâng byuq kôlhang, yhang taí é dang pé lé ru gyô nau nyi ashî nghut ri.

- ²¹ Nghut kôlhang, Herut gi, yhâng é hkû ladu hkyúm buinyì má, byù mó pé, gyezau pé, Galile mau suwún wui pé lé, ji yù mù zoshuq poí mó kut é yanmai, haú nyi gi, Herudiaq é matú,
- ²² buinyì gè dut bê nghut ri. Herudiaq é yhangzo byizo gi, wang lé lô mù, gó shit é hkûn, Herut eq yhâng é bíng pé gi, myit ngón bum akô nghut ri.

Haû mù, hkohkâm gi, myiwe zo haú lé, “Nàng ô nau é haí nghut kôle, dung aq, ngò nàng lé byi râ nghut lhê.” ga,

- ²³ dakam é danggidiq byî ri. Hau htoq agó, yhang gi, myiwe zo haû lé, “Nàng dung é haî nghut kôle, ngò byi râ; ngá é mingdán rawuí gû lhang, byi râ nghut lhê.” ga, dakam é danggidiq byî ri.
- ²⁴ Haû hkûn, myiwe zo haû gi, htoq ló mù, yhang nu lé, “Haî dúng le gè râ laq?” ga myi jáng, yhangnu gi, “Wui-myhup Sará Yohan é ulhum dung aq.” ga tû taî kat ri.
- ²⁵ Myiwe zo haû gi, radá dâm hân hân wang ló mù, hkohkâm lé, “Ahkuî yhang, Wui-myhup Sará Yohan é ulhum lé, bó má kat mù byi laq.” ga, dúng tôngbán ri.
- ²⁶ Haû su ga jáng, hkohkâm gi, myit gyai yhang a ngón dut byuq kôlhang, yhang dakam tô é danggidiq é yanmai le, bíng pê é myoqdong lé tê nau é yanmai le, myiwe zo haû taî é dang
- ²⁷ lé a kâm he pyám lo nghut ri. Haû mù, hkohkâm gi, zúng é gyezo rayuq lé, Yohan é ulhum é hpyit lô râ matú, radá dâm hkunmó hkyó mù nhang kat ri. Haû mù, haû yuq gi, htóng hkaû má ê luî, Yohan é ulhum lé, é hpyit
- ²⁸ mù, bó má kat luî, myiwe zo haû lé lo byî ri; myiwe zo haû gi, ulhum haû
- ²⁹ lé, yhangnú chyáng yu ló byî ri. Yohan é chángzô pé gi, haû hkyô lé wó gyo kôjáng, yhang é mâng lé lé yû luî, lup má ló myhup pyám bekô nghut ri.

Byù Ngo Hkyîng Lé Byi Tsô É Hkyô

Mht 14:13-21; Luk 9:10-17; Yhn 6:1-14

- ³⁰ Lagyo pé gi, Yesuq chyáng dum jé zîng lò kômù, yhangmoq kut laî lo é hkyô pé eq mhoqshit bê hkyô pé ban-shoq, Yhang lé taî kyô akô nghut ri.
- ³¹ Hau htâng, byù myo myo gi, yhangmoq chyáng htoq htoq wàng wàng kut

nyí kô é yanmai, yhangmoq gi, zang zo ahkyíng lhang a wó kó nghut ri. Haû mù, Yesuq gi, chángzô pé lé, “Nga-nhúng, tsím tsâm é jowò ralhummá ê mù, ê nô yù sháng.” ga taî ri.

- ³² Haû mù, yhangmoq gi, yhangmoq baú lhaî racham má ji mù, tsím tsâm
- ³³ é jowò shut e ló akô nghut ri. Nghut kôlhang, yhangmoq e ló é lé châng myang é bang myo myo gi, yhangmoq lé wú sé kôluî, wà hkangmó mai hkyî hkyô châng din é kômù, yhangmoq é
- ³⁴ hí má jé to lánng akô nghut ri. Yesuq gi, lhaî mai gyó dap ló é hkûn, byù moq mó nyi to lánng lé myàng jáng, yhangmoq gi, zúng sù a nyi é sau pé su dut kô é yanmai, yhangmoq lé wú shogyo luî, myo myo mhoqshit byî hi ló bê nghut ri.
- ³⁵ Bui gyum ló yâm jé jáng, Yhang é chángzô pé gi, lé lô kômù, Yhang lé, “Shí má gi, tsím tsâm é jowò nghut é
- ³⁶ htoq agó, bui le gyum ló bê; yhangmoq gi, awui ayàm mâ é yhúm pé eq wà pé má, zoshuq ló ho wui zo kó sháng gaq, yhangmoq lé ló nhâng aq hkoi.” ga taî akô nghut ri.
- ³⁷ Haû hkûn, Yhang gi, “Nungmoq, yhangmoq lé rajung jung byi tso keq.” ga tû taí jáng, yhangmoq gi, “Shí myhó é bang zo râ matú, ngamoq gi, é luî, denari^a í sho èq muk é wuí byi ra râ luq?” ga dum taû myí akô nghut ri.
- ³⁸ Nghut kôlhang, Yhang gi, “Nungmoq chyáng muk hkâ-myhó wó akô? Ê wú wú keq.” ga myí ri. Haû mù, yhangmoq gi, myang hô jáng, “Muk ngo long eq ngozo í du wó lhê.” ga, dum tû taî akô nghut ri.
- ³⁹ Hau htâng, Yesuq gi, ban-shoq bang lé ahpúng hpúng kut wàhu yò má zùng nhâng râ matú, Yhang é chángzô

^a 6:37 Denari rachap gi, byù rayuq é ra-nyí lhê é zuihpau eq wuí ri.

- ⁴⁰ pé lé taí kat ri. Haú mù, shiwa byu pé gi, rashô shô kut le, ngo xê xê kut le, ahpúng hpúng zung tô bùm bekô
- ⁴¹ nghut ri. Yesuq gi, haú muk ngo long eq ngozo í du lé yù mù, mauhkúng shut tu wú to luí, jeju ban hkya-on jáng, muk lé hpê gam ri. Hau htâng, Yhang gi, byu pé hí má châng hkat to byi râ matú, Yhâng é chángzô pé lé byí ri. Ngozo í du lé le, Yhang yù mù, banshoq bang lé gàm byí ri.
- ⁴² Yhangmoq banshoq bang gi, zô gyí
- ⁴³ bùm bekô nghut ri. Hau htâng, haú chángzô pé gi, zô myhit tô é muk eq ngozo lé, raxe í mung byíng shoq wó
- ⁴⁴ guq tsíng yu ashí kó nghut ri. Haú hkún, zô é bang gi, yuqgè wuì baú lháng, byù du ngo hkyíng nghut ri.

Yesuq, Wuì Htoq Má Sô É Hkyô

Mht 14:22-33; Yhn 6:15-21

- ⁴⁵ Yesuq gi, haú shiwa byu pé lé byo ló nhang nyi é hkún jáng, Yhâng é chángzô pé lé lhaí má wang ji nhâng mù, tû tap mâ é Bet-saida wà mó shut
- ⁴⁶ dap ló lánng nhang ri. Yhangmoq lé shi-kyâm kat é htâng, Yhang gi, kyû-dung râ ga, Yhang baú bùm shut doq e ló bê nghut ri.
- ⁴⁷ Buigyum htâng, lhaí gi, nhông gùng má jé tô é u lé, Yesuq gi, Yhang baú za myì htoq má nyi tô ashí nghut ri.
- ⁴⁸ Lài tau mut é yanmai, haú chángzô pé gi, lhaí lhu wuìhkê nyi kô é lé, Yesuq myang ri. Napsún maubó zó sum hkyíng eq hkyuq hkyíng gyoro má, Yesuq gi, nhông htoq má so mù, yhangmoq shut e ló luí, yhangmoq é nàm mai lai ló râ dâ ri.
- ⁴⁹ Nghut kôlhâng, yhangmoq gi, Yhang, nhông htoq má sô nyi é lé myang kô-jáng, sobyô su ngàm kômù, kyek garú
- ⁵⁰ bum akô nghut ri. Hkâsu mù gâ le, yhangmoq banshoq bang gi, Yhang lé

myàng kôluí, gyuq dàn kô é yanmai nghut ri.

- Nghut kôlhâng, Yhang, radá dâm yhangmoq lé dâng nyo kat é gi, “Hkâ-gyuq kó. Ngò ru nghut lhê; zim za nyì
- ⁵¹ keq.” gâ ri. Hau htâng, Yhang gi, lhaí htoq má yhangmoq eq rahá é doq ji jáng, lai gi, zím byuq bê nghut ri; haú mù, yhangmoq gi, gyai yhang mau-
- ⁵² hong byuq bùm bekô nghut ri. Hkâsu mù gâ lé, yhangmoq gi, muk gam é laklai kumlhá eq séng luí a sê gyo kô é htoq agó, myitbun a bóng kô é yanmai nghut ri.
- ⁵³ Yhangmoq gi, gû dap ló kômù, Genesarat mau má jé wang lò jáng, lhaí lé haú má ló shap tô akô nghut ri.
- ⁵⁴ Yhangmoq lhaí mai gyó é hkún jáng, byu pé gi, Yesuq lé lhom wú sê
- ⁵⁵ akô nghut ri. Haú mù, yhangmoq gi, haú mau ramau gón má din jón mù, nò bang lé taphkang mai waq luí, Yesuq nyi rí gâ é jowò hkangmó má,
- ⁵⁶ shuí lé lo bum akô nghut ri. Yesuq jé é wà hkangmó, myuq hkangmó, awui ayàm mâ é wà hkangmó pé má, yhangmoq gi, nò byù lé gai pé má lé lheq to kôluí, Yhâng é bushi htâng má za lháng, haú bang lé byi záng nhâng râ matú, Yhang lé dúng tôngbán akô. Yhang lé záng é lunglhang bang gi, lhoq gè byí é huì akô nghut ri.

A Sanséng Dut Nhang É Hkyô Pé

Mht 15:1-20

- 7** Haú Hparishe pé eq tarâ sará pé ra-am gi, Yerusalem wà mó mai jé lé lô kômù, Yesuq é nàm má lé
- ² zup zíng bum akô. Haú hkún, Yhâng é chángzô pé ra-am gi, htungli dông a chí pyâm é, a sanséng é loq èq zo shuq nyí kô é lé, yhangmoq myang akô
- ³ nghut ri. (Hparishe pé eq Yudaq byù banshoq bang gi, yhangmoq é íchyí

- îwâ pê é htûngli lé châng é bang nghut lhê mù luí, loq hí a chí é gi, haí le a
- ⁴ zô wú kó nghut ri. Yhangmoq gi, gài pé mai taú lò jáng le, gùng hí a chí pyâm é, zojung a zo kó nghut é htoq agó, góm pé, hkoq pé, gyi chôkon pé lé chí é htûngli gotû pé lé le, châng akô nghut ri.)
- ⁵ Haú mù, Hparishe pé eq tarâ sará pé gi, Yesuq lé, “Náng é chángzô pé gi, haí mù luí, îchýi îwa pê é htûngli lé a châng e za, a sansêng é loq èq zo shuq nyi akô lúhú?” ga myí akô.
- ⁶ Haú hkûn, Yesuq gi, yhangmoq lé, “Gegùn labyoq kut bang ê, nungmoq eq séng luí myiqhtoi Esai-aq htoí tô é dang má,
‘Byù shí bang gi, nhut htoq mai za Ngo lé hkunggâ akô; yhangmoq é myit nhiklhum gi, Ngò eq wê gâng nyi akô.
- ⁷ Yhangmoq gi, akôm má za, Ngo lé noqkuq nyi akô; hkâsu mù gâ le, yhangmoq é mhoqshit hkyô pé gi, byù dông mai mhoqshit é hkyô pé za nghut nyi ri.’^a
- ⁸ ga kâ tô é gi, têng ri. Nungmoq gi, Garai Gasang tô tô é hkunmó lé tô pyám luí, byu é htûngli lé za, myhik zing tô akô nghut ri.” ga luí tû taí ri.
- ⁹ Hau htâng, Yhang xoq taí é gi, “Nungmoq gi, yhumsing é htûngli lé za cháng râ matú, Garai Gasâng é hkunmó lé he-ngik pyâm é má, hpaq-chýi gyaí bo akô nghut ri. Hkâsu mù gâ le, Mosheq gi, ‘Nungmoq é înu îwa lé, hkungga keq.’^b ga le, ‘Înu îwa lé, nhîng é sù ó yuq nghut kôle, sat pyâm é hui râ lhê.’^c ga le,
- ¹¹ kâ tô é nghut lhê. Nghut kôlhang, nungmoq taí é gi, byù rayuq yuq, yhumsing é yhângnu yhângwa lé byi âng é zè lé, Korban za (Garai Gasang lé byi râ chyunghuq) nghut lhê
- ¹² gá nhang akô. Haú mù, haú yuq lé, yhângnu yhângwâ é matú, haí a kut byi nhâng lô é dông dut bê nghut ri.
- ¹³ Haú dông mai, nungmoq gi, nungmoq chung gyó lo é htûngli é yanmai, Garai Gasâng é mungdang lé he-ngik pyâm akô; haú sù é hkyô myo myo lé le, nungmoq kut akô nghut ri.” gâ ri.
- ¹⁴ Yesuq gi, shiwa byu pé lé Yhâng chyáng dum wut yù mù, taí é gi, “Nungmoq banshoq bang, ngò taí é lé
- ¹⁵ gyô yù mù, sé lo keq; Shinggan mai wang lo é haí jung le, byù lé a sanséng dut nhang é a nghut, nghut kôlhang, byu é unghkaú mai htoq ló é zè kúm gi, byù lé a sanséng dut nhang
- ¹⁶ lhê.” gâ ri. (Gyo râ nohkyap dap é sù gi, gyô yù sháng gaq.)” ga taí ri.^d
- ¹⁷ Yhang gi, byù moq mó mai htoq ló mù, yhúmhaú má jé wang ló é hkûn, Yhâng é chángzô pé gi, dangtú haú eq séng luí, Yhang lé lhom myí akô
- ¹⁸ nghut ri. Haú mù, Yhang gi, yhangmoq lé, “Nungmoq gi, haú-í yhang go akô luq? Shinggan mai wang lo é haí jung le, byù lé a sanséng nhâng wó dut râ a nghut é hkyô lé, a sé kó
- ¹⁹ lúhú? Hkâsu mù gâ lé, haú gi, byu é myit nhiklhum hkaú má wang ló é a nghut e za, wamdaú hkaú má sheq wang ló é nghut mù, shinggan shut dum lhoq htoq pyâm é nghut lhê.” ga taí ri. (Yhang isu ga taí é gi, zoshuq lhunglhang sansêng lhê gá nau é dông nghut ri.)
- ²⁰ Hau htoq agó, Yhang xoq taí é gi, “Byù mai htoq ló é haí jung le, byù lé a sanséng nhâng wó dut é nghut

^a 7:7 Esai 29:13 ^b 7:10 Htoq Ló 20:12 ^c 7:10 Htoq Ló 21:17 ^d 7:16 Bun zo shí gi, Chýúmllaiká ra-am má bo lhê, ra-am má a bò.

- ²¹ lhê. Hkâsu mù gâ lé, ahkaû mai htoq lo é gi, byu pê é myit mai htoq lô é nghut mù, agè ashop é dông myit é hkyô pé, ashop é dông gungsho zùm yap é hkyô, hkaû é hkyô, byù sat é
- ²² hkyô, su-myi sulàng lú hkyô, myoq-noq é hkyô, agè ashop é hkyô, mhaú zô é hkyô, achaq achyut zùm yap lhûm é hkyô, manon é hkyô, lumù gansang é hkyô, gumrong é hkyô eq ngha é hkyô pé htoq lò é nghut lhê;
- ²³ Agè ashop é hkyô shí pé banshoq gi, byu é unghkaû mai htoq lo é nghut mù, byù lé a sanséng dut nhang ri.” gâ ri.

Tûngbaù Myiwe Myhí Rayuq É Lumjîng Myit

Mht 15:21-28

- ²⁴ Yesuq gi, haú jowò mai htoq lô mù, Turuq eq Sidun maukyo shut e lô luí, yhûm ralhum má wang ê ri; Yhang nyi é hkyô lé, ó yuq lé lé a sé nhâng naù kôlhang, a wó zaú to nghut ri.
- ²⁵ Haú mù, agè ashop é nat wang júng tô é myiwe zo rayuq é yhângnu gi, Yhang nyi tô é hkyô lé wó gyô é hkûn jáng, Yhâng chyáng jé lé mù, Yhâng é hkyí wang má lé paí gop to
- ²⁶ luí, yhang zô chyáng mai nat gang lé hkat htoq pyám byi râ matú, Yhang lé dúng tôngbán ri. Myiwe haú gi, Suru-Hpiniki mau mâ é Grik byuhú nghut ri.
- ²⁷ Yesuq gi, “Zo wu^a hí zô gyi kó sháng gaq; haí mù gâ le, zô wui chyáng mâ é zoshuq lé yù mù, hkuí pé^b lé byi tsô é jung a nghut.” ga yhang lé taí kyô ri.
- ²⁸ Haú hkûn, yhang gi, “Yhumsîng ê! Haú kúm nghut ri; nghut kôlhang, si-boí ô mâ é hkuí lháng, zô wui é zô

myhit shuq htâng lé, ge zo lhê a nghut lhú?” ga dum tû taí ri.

- ²⁹ Haú mù, Yesuq gi, yhang lé, “Nàng tû taí é dang hau é yanmai, lô lo aq hkoi; haú nat gang gi, nung zô chyáng mai htoq lô byuq bê nghut ri.” ga taí kat ri.
- ³⁰ Myiwe myhí haú gi, yhûm má dum taú jé lo é hkûn, yhang zo chong htoq má leq to lánng é lé le, nat gang htoq byuq bê nghut é lé le, lo myang ri.

Nojit É Eq Dang A Hkyang É Sû Lé Lhoq Gê Byí É Hkyô

- ³¹ Yesuq gi, Turuq mau mai dum htoq lô mù, Sidun mai sô laí lô luí, Dekapoli mau hkaû dông laí byit mù, Galile nhông shut gyó jé lô ri. Haú hkûn,
- ³² byù ra-am gi, nojit é eq dang a hkyang é byù rayuq lé, Yhâng chyáng shuí lé lô kômù, haú yuq é ahtoq má loq ke byi râ matú, Yhang lé dúng tôngbán akô nghut ri.
- ³³ Yesuq gi, haú yuq lé baú za byù hpúng mai shuí htoq yú mù, yhâng é nohkyûng má loqnyhui htaú háng byi luí, sôkan byé tik yú mù, haú
- ³⁴ yuq é shô má htau byí ri. Hau htâng, Yhang gi, mauhkûng shut tu wú mù, soq mó shê luí, “Ehpahta!” (Lichyúm gi, “Bóng aq hkoi!”) ga luí, haú yuq
- ³⁵ lé taí kat ri. Haú hkûn, haú yuq é nohkyap le bóng byuq luí, shô le nyhôm byuq mù, balang hkyâng hkyâng dang wó nyô bê nghut ri.
- ³⁶ Yesuq gi, haú hkyô ó lé le a taí kyo râ matú, yhangmoq lé hkúm kôlhang, yhangmoq gi, je hkúm le, je taí pyo
- ³⁷ akô nghut ri. Byu pé gi, gyai yhang mauhong byuq bùm kôluí, “Yhang gi, haí lé le, ge é dông chyat kut ri; nojit sù lé, wó gyo shoq, dang a hkyâng sù

^a 7:27 Zo wu^a gâ é gi, Yudaq byu pé lé gâ é nghut lhê. ^b 7:27 Hkuí pé gâ é gi, tûngbaù pé lé gâ é nghut lhê.

lé, wó nyô shoq, kut byi bê nghut ri.”
ga luí, taí bum akô nghut ri.

Byù Myi Hkyîng Lé Byi Tsô É Hkyô

Mht 15:32-39

8 Haú yoq má, gotû byù moq mó gi, lé zîng bum akô; haú bang zo-shuq langhpyut to kô é yanmai, Yesuq gi, Yhâng é chángzô pé lé wut yù mù, “Ngò, shí bang lé wú shogyo ri; yhangmoq gi, Ngò eq rahá nghut nyi é sum nyí bò bê, haí le a myàng zo kó nghut ri. Yhangmoq chyáng mâ é ra-am gi, mau we mai lé é bang nghut é yanmai, yhangmoq lé, zòmút gû yhûm shut nhang kat é nghut le gi, hkyolat má mutyut yut é ló hui kó râ nghut lhê.” ga taí ri.

⁴ Haú hkûn, Yhâng é chángzô pé gi, Yhang lé, “Ísu é yoso má nhîng, shí myhô bang lé luq shoq byi tso râ zo-shuq gi, hkâmá ê yû râ lú?” ga taí akô.

⁵ Yesuq gi, “Nungmoq, muk hkâm-myhó long wó akô lú?” ga taí myi jáng, yhangmoq gi, “Nyhit long.” ga, dum tû taí akô nghut ri.

⁶ Haú mù, Yhang gi, byù hpûng lé myigùng htoq má zùng nhang to luí, muk haú nyhit long lé yù mù, jeju ban hkya-on jáng, myhik hpé luí, haú bang lé gàm byi râ matú, Yhâng é chángzô pé lé byî kat ri; haú mù, yhangmoq gi, haú bang lé gàm byî

⁷ akô nghut ri. Yhangmoq gi, ngo-nú zo ratsuí le wó akô nghut ri; haú mù, Yhang gi, ngozo haú pê é matú jeju hkya-on luí, chángzô pé lé dum gàm

⁸ byí nhang ri. Yuq hkgámó zô gyî bùm kô é htàng má, haú chángzô pé gi, amyit ahtàng lé nyhit mung byíng shoq wó guq tsîng yu ashî kó nghut ri.

⁹ Zô é bang gi, byù myi hkyîng kô nghut ri; Yesuq gi, haú bang lé, nhang kat luí, Yhâng é chángzô pé eq rahá, lhaí má wang ji mù, Dalamanuhta mau má ê jé akô nghut ri.

¹¹ Hparishe pé gi, lé mù, Yesuq eq dang htîng htîng lhûm akô; hau htoq agó, yhangmoq gi, mauhkûng mâ é kumlhá lé dúng é dông, Yhang lé

¹² chyam wú akô nghut ri. Yesuq gi, myit nò-kying kying luí, yhangmoq lé taí é gi, “Haí mù luí, shí ipyat lhê é byu pé gi, limik kumlhá dúng akô lú? Ngò teng za taí kôlé, shí ipyat mâ é bang lé, hai kumlhá le tûn shit râ a nghut.”

¹³ gâ ri. Hau htâng, Yhang gi, yhangmoq lé pyâm to mù, lhaí má dum taí wang ló luí, tû tap shut gû dap e ló bê nghut ri.

Hparishe Pé Eq Herut É Múnchi

Mht 16:5-12

¹⁴ Haú chángzô pé gi, muk yu chûng râ lé tô-myhî pyám kôluí, lhaí hkaú má muk ralong za ru wó akô nghut ri.

¹⁵ Yesuq gi, yhangmoq lé, “Nungmoq gi, Hparishe pé eq Herut é múnchi^a lé, sidiq luí, koi pyâm nyi keq.” ga taí ri.

¹⁶ Haú hkûn, yhangmoq gi, “Nga-nhûng chyáng muk a bo é yanmai, haú su ga taí é nghut ri.” ga luí, rayuq eq rayuq taí lhûm bum akô nghut ri.

¹⁷ Haú su ga taí lhûm nyi kô é lé Yesuq sé jáng, yhangmoq lé, “Nungmoq gi, muk a bo é hkyô lé, haí mù taí lhûm nyi akô lú? Ahkuí jé shoq, nungmoq gi, a byu-myàng, a sê gyo shi kó lú? Nungmoq é

myit nhiklhum gi, ru htan nyi ashî kó lú? Myoq dap to kôluí nhîng, a myàng kó lú? Nohkyap dap to kô-

¹⁸ luí nhîng, a wó gyo kó lú? Ngò, muk

^a 8:15 Shî má taí é múnchi gi, Hparishe pé eq Herut é mhoqshit hkyô lé, lhoq pyo é lé gâ lhê.

ngo long lé myhik hpé mù, byù ngo hkyîng lé byi tsô é hkûn, zô myhit shuq htâng lé, nungmoq hkâ-myhó mung wó guq tsîng yu é lé, bun ashî kó lhú?" ga myi jáng, yhangmoq gi, "Raxe í mung." ga tû taî akô.

- ²⁰ Dum, Yesuq gi, "Ngò, muk nyhit long lé myhik hpé mù, byù myi hkyîng lé byi tsô é hkûn, zô myhit tô é ajap azo lé, nungmoq hkâ-myhó mung wó guq tsîng yù kô é lhú?" ga myi jáng, yhangmoq gi, "Nyhit mung." ga dum tû taî akô.
- ²¹ Haú hkûn, Yesuq gi, "Haú nghut le nhîng, ahkuî le, a sê gyo shi kó lhú?" ga, yhangmoq lé myî ri.

**Myoqjit Sû Rayuq Lé
Lhoq Gê Byî É Hkyô**

- ²² Yhangmoq gi, Bet-saida wà mó má jé lò kô é hkûn, byù ra-am gi, myoqjit é byù rayuq lé, Yesuq chyáng shuí lé lô mù, haú yuq lé záng byi râ matú,
- ²³ dúng tôngbán akô. Yesuq gi, myoqjit sù haú yuq é loq lé zui mù, wà shinggan shut shuí htoq lô luí, yhâng é myoq má sôkan byé tik byi mù, loq ke byi luí, "Nàng, rajung jung lé myang ri lhú?" ga myî kat ri.
- ²⁴ Haú jáng, yhang gi, tu wú kat luí, "Byu pé gi, siggâm su dut luí, hkyô sô wún é lé, ngò myang ri." ga taî ri.
- ²⁵ Hau htâng, Yesuq gi, haú yuq é myoq má Yhâng é loq dum ke byî ri; haú hkûn, haú yuq é myoq gi, bóng lô mù, ge byuq luí, haí lé le san za myàng
- ²⁶ bê nghut ri. Yesuq gi, haú yuq lé, "Wà hkaú má hkâwang lô lo." ga taî luí, yhâng é yhûm shut lô nhang kat bê nghut ri.

Hkrisduq Ga, Petruq Yín Yu É Hkyô

Mht 16:13-20; Luk 9:18-21

- ²⁷ Yesuq eq Yhâng é chángzô pé gi, Kesare-Hpilipi wà mó awui ayàm má é wà pé shut e ló é hkûn, hkyô má, Yesuq gi, chángzô pé lé, "Byu pé gi, ngo lé ó yuq nghut lhê ga, taî akô lhú?" ga myî ri.
- ²⁸ Haú hkûn, yhangmoq gi, "Ra-am gi, Wui-myhup Sará Yohan ga, góbang gi, Eliyaq ga, dum ra-am gi, myiqhtoi rayuq yuq nghut ri ga taî akô." ga, Yhang lé tû taî akô.
- ²⁹ Yesuq gi, "Nungmoq gi, ngo lé ó yuq nghut lhê nghu akô lhú?" ga, yhangmoq lé xoq myi jáng, Petruq gi, "Nàng gi, Hkrisduq^a nghut ri." ga tû taî ri.
- ³⁰ Yesuq gi, haú hkyô ó lé le a taî kyo râ matú, yhangmoq lé taî hkúm ri.

**Byu Yhangzo Gi, Sat Pyâm É Hui
Luí, Dum Dui Toq Râ Hkyô**

Mht 16:21-28; Luk 9:22-27

- ³¹ Hau htâng, Yhang gi, yhangmoq lé mhoqshit é má, "Haú Byu Yhangzo gi, zing-rî é myo myo hui zo luí, suwún wuî, hkyangjong agyi pé, tarâ sará pê èq he-ngik pyâm é hui mù, sat pyâm é hui ra râ nghut lhê; nghut kôlhâng, sum nyî nghû râ buinyî má, dum dui
- ³² toq râ nghut lhê." gâ ri. Yesuq gi, haú hkyô lé san za dut shoq taî nyi é yan-mai, Petruq gi, Yhang lé rahkyam shut shuí htoq yù mù, Yhang lé tân ri.
- ³³ Nghut kôlhâng, Yesuq gi, Yhâng é chángzô pé lé lhing wú kat mù, Petruq lé, "Tsadán nàng, Ngá chyáng mai hpâng aq! Nàng gi, Garai Gasang eq sêng é hkyô lé a myit e za, byù eq sêng é hkyô lé za myit é sù nghut ri." ga tân kat ri.

^a 8:29 Grik dong *Hkrisduq* gâ é gi, xû but hui Sù gâ é lichyúm nghut mù, Hebre dong "Mesaia" gâ é eq rajung za nghut lhê.

³⁴ Hau htâng, Yhang gi, byù moq mó eq Yhâng é chángzô pé lé wut yù mù, taí é gi, “Ngá htâng cháng naú sù ó yuq nghut kôle, yhumsing gùng yhumsing he-ngik pyám mù, yhum-sing é tapzîng lé waq chûng luí, cháng ra râ nghut lhê. Hkâsu mù gà le, yhumsing é asak lé hkyi yù naú sù ó yuq nghut kôle, asak sum râ nghut lhê; nghut kôlhang, Ngá é yanmai le, haú gabú danglù é yanmai le, yhum-sing é asak sùm pyâm é sù kúm gi, ³⁵ asak hkyi yu é hui râ nghut lhê. Byù gi, mingkan gón lé wó sing to kô-lhang, yhumsing é asak woi-nyí sùm byuq é nghut le gi, yhâng é matú, hai ³⁶ akyû bò râ lú? Byù gi, yhumsing é asak woi-nyí lé, hai èq wó htaí yù râ ³⁷ lú? Yubak mara myô é eq su-myi su-làng shut é ipyat shí má, Ngò eq Ngá é dang lé hoq pyâm é sù ó yuq lé le, haú Byu Yhangzo gi, Yhâng Wâ é hpung-wup shingkan bo é èq, haú chyoi-yúng maumang lagyô pé eq rahá jé lé é hkûn, hoq pyám râ nghut lhê.”^a gà ri.

9 Hau htâng, Yesuq gi, yhangmoq lé, “Ngò, nungmoq lé teng za taí kôlé, shí má yap tô é bang ra-am gi, Garai Gasâng é mingdán, hpungwup a-tsâm èq jé lé lo é lé, a myang é za shí kó râ a nghut.” ga taí ri.

Yesuq É Iphyô Isâm Htaí Lo É Hkyô

Mht 17:1-13; Luk 9:28-36

² Hkyuq nyí laí htâng má, Yesuq gi, Petruq lé le, Yakuq eq Yohan lé le, shuí chûng mù, yhangmoq baú myhang é bùm ralhúm má doq ló akô; haú hkûn, yhangmoq é myoq hí tē má, Yesuq é iphyô isâm htaí lo ri. ³ Hau htoq agó, Yhâng é mebu gi, wik

wik duq hpyu zan lo ri; myidàm htoq má, ó yuq le haú-í hpyû shoq a wó ⁴ xaú hpyu wú é nghut lhê. Eliyaq eq Mosheq gi, yhangmoq é hí má htoq shit mù, Yesuq eq dâng nyo lhùm nyi akô.

⁵ Haú mù, Petruq gi, Yesuq lé, “Rabai ê, shí jowò má nga-nhúng nyi le ge ri; haú mù, Náng é matú ralhúm, Mosheq é matú ralhúm, Eliyaq é matú ralhúm kut, ngamoq lé, zúm sùm lhúm ⁶ saí nhâng laq.” ga taí ri. Hkâsu mù gà le, yhangmoq gi, gyai yhang gyuq dan bùm kô é yanmai, Petruq gi, haí taí râ le a sé mù, haú su gà é nghut ri.

⁷ Hau htâng, mhut htoq lô luí, yhangmoq lé htup zîng lô mù, mhut hkaú mai htoq lo é htê gi, “Shí yuq gi, Ngò chyitdap é Ngá Zo nghut lhê; Yhâng é dang gyo keq.” gà ri.

⁸ Haú hkûn jâng, chángzô pé gi, lhîngkyuq má wú kat le, Yesuq za yhangmoq eq rahá nghut nyi é mai lai luí, ó lé le, a myàng lo kó nghut ri.

⁹ Yhangmoq, bùm mai taú gyô lô kô é hkûn, Yesuq gi, haú Byu Yhangzo shi é mai a dum dui toq toq gi, yhangmoq myang é hkyô lé, ó lé le a taí kyo râ ¹⁰ matú taí hkûm tô ri. Chángzô pé gi, dang haú lé myit má kat to kôluí, “Shi é mai dum dui toq râ.” gà é lichyúm lé, rayuq eq rayuq myí lhùm bum akô nghut ri.

¹¹ Hau htâng, yhangmoq gi, “Eliyaq hí lé ra râ nghut lhê ga, tarâ sará pé haí mù taí kô é lú?” ga, Yesuq lé myí akô.

¹² Haú hkûn, Yesuq gi, “Eliyaq hí jé lé é gi, teng bê nghut luí, lhunglhang lé dum lajâng tô é nghut ri. Nghut kôlhang, haú Byu Yhangzo gi, myo myo hpuzo luí, he-ngik pyâm é hui ra nghut lhê ga le, Chyúmdang má kê to

^a 8:38 Yer 3:8; Ezk 23:37; Hos 2:2-10

¹³ ashî, a nghut kó lhú? Ngò, nungmoq lé taí kôlé, Eliyaq gi, jé lé bê nghut mù, yhang eq séng luí Chyúmdang má kâ tô é eq rajung za, yhangmoq gi, ô nau é dông banshoq kut bekô nghut ri.” ga tû taí ri.

Nat Dap É Yuqgè Zo Rayuq Lé Lhoq Gê Byî É Hkyô

Mht 17:14-20, 22-23; Luk 9:37-45

¹⁴ Yhangmoq gi, chángzô pê chyáng dum taú jé lô kô é hkûn, haú bang é lhîngkyuq má byù moq mó zîng lé é lé le, tarâ sará pé, haú bang eq dang htíng htíng lhûm nyi kô é lé le, ¹⁵ myang akô. Haú má nyi tô é lhung-lhâng bang gi, Yesuq lé myang kat é eq, maú byuq kôluí, din ê mù, é shi-kyâm akô nghut ri.

¹⁶ Haú hkûn, Yesuq gi, yhangmoq lé, “Nungmoq gi, yhangmoq eq haí lé dang htíng htíng lhûm nyi akô lhú?” ga myí ri.

¹⁷ Byù hpúng hkaú mâ é rayuq tû taí kat é gi, “Sará ê! Nhut jit nhang é nat wang júng tô é ngá é yuqzo lé, ¹⁸ Náng chyáng shuí lé lo lhê. Nat haú gi, yhâng chyáng wàng hkanmó, yhang lé myí htoq má lhoq leqbat nhang ri; haú mù, yhang gi, nhut mai guttsú htoq lhê, zui kyik kyik lhê, langhtan lo lhê, dut ri; hau é yanmai, nat haú lé hkat htoq pyám byi râ matú, Náng é chángzô pé lé dúng wú kôlhâng, yhangmoq a wó dut kó nghut ri.” gâ ri.

¹⁹ Haú hkûn, Yesuq gi, “Lumjîng myit a bo é amyú pé ê, Ngò gi, hkâ-myháng jé shoq nungmoq eq rahá nyi mù, wó jân nyi râ lhú? Yuqgè zo haú lé, Ngá chyáng shuí lé lô keq.” ga taí kat ri.

²⁰ Haú mù, yhangmoq gi, yuqgè zo haú lé shuí lé lo akô; nat haú gi, Yesuq lé myang kat é eq yhang, yuqgè zo haú

lé langhtân nhang ri; yuqgè zo haú gi, myigùng má lêng leq luí goleng leng mù, nhut mai tsû-myup htoq nyi ri.

²¹ Haú hkûn, Yesuq gi, yhângwa lé, “Yhang, isu dut é hkâ-myháng myáng bê lhú?” ga myi jáng, yhâng wa gi, ²² “Zoshâng hkûn mai nghut bê. Nat haú gi, yhang lé lhoq sat pyám naú mù, myi má le, wui má le, anum num lêng wàng nhang wú bê nghut lhê; nghut kôlhâng, Náng, rajung jung wó kut byî é nghut le gi, ngá hpe lé shogyo yù laq, garúm yú laq.” ga tû taí ri.

²³ Yesuq gi, “Nàng, wó kut byî é nghut le gi, nghû, haí mù taí lhê lhú? Lumjîng myit bò su é matú gi, haí le wó dut lhê.” ga, yhang lé taí ri.

²⁴ Haú zôshang é yhângwa gi, radá dâm, “Ngò lumjîng lhê; nghut kôlhâng, ngá é lumjîng myit gi, shaú ashî nghut é yanmai garúm yú laq.” ga taí garú ri.

²⁵ Yesuq gi, byù hpúng din zîng lé lô kô é lé, myàng jáng, haú agè ashop é nat lé, “Nojit, nhutjit nhang é nat ê! Ngò, nang lé hkunmó hkyô lhê, yhâng chyáng mai htoq ló aq; hkâ-nhám le, yhâng chyáng hkâdum wàng lo.” ga tân kat ri.

²⁶ Haú hkûn, nat haú gi, garu mù, zoshâng haú lé wum kat langhtân nhâng luí, htoq ló byuq bê. Zoshâng haú gi, shí mâng gùng su dut byuq é yanmai, byù myo myo gi, “Yhang shí bê nghut ri.” ga taí akô. Nghut kôlhâng, Yesuq gi, zôshang é loq má zui luí, tu toq kat ri; haú mù, zoshâng gi, yap to bê nghut ri.

²⁷ Yesuq gi, zôshang é loq má zui luí, tu toq kat ri; haú mù, zoshâng gi, yap to bê nghut ri.

²⁸ Yesuq, yhúm hkaú má wang ló é htâng, Yhâng é chángzô pé gi, “Nga-moq gi, haí mù, nat haú lé a wó hkat htoq é lhú?” ga, tsik za Yhang lé myí akô.

- ²⁹ Yesuq gi, “Haú jung nat lé gi, kyû-dûng é dông za a nghut jáng, wó hkat htoq râ a nghut.” ga, yhangmoq lé tú taí ri.
- ³⁰ Yhangmoq gi, haú jowò mai htoq ló mù, Galile mau mai laí ló akô; nghut kôlhang, Yesuq gi, ó lé le a
- ³¹ sé nhâng naù nghut ri. Haí mù gà le, Yhang gi, “Haú Byu Yhangzo gi, byu pê é loq má ap pyâm é hui râ nghut lhê; haú bang gi, Yhang lé sat pyám kó râ nghut lhê; nghut kôlhang, Yhang gi, shi é htâng sum nyí nghû râ nyí má, dum dui toq râ nghut lhê.” ga, Yhâng é chángzô pé lé mhoqshit
- ³² byí nyi é yanmai nghut ri. Yhâng é chángzô pé gi, dang haú lé a sê gyo kôlhang, Yhâng chyáng a wám myi kó nghut ri.

Kô Dik Sû Gi, Ó Yuq Nghut Lhê Lhú?

Mht 18:1-5; Luk 9:46-48

- ³³ Yhangmoq gi, Kaperna-um wà má jé e akô nghut ri. Yesuq gi, yhúm-hkaú má nyi tô é hkûn, chángzô pé lé, “Hkyô má, nungmoq, hai hkyô lé dang chyin chyín lhum kô é lhú?” ga
- ³⁴ myí ri. Nghut kôlhang, yhangmoq gi, zim za nyi tô akô; hkâsu mù gà le, ko dik sû gi, ó yuq nghut lhê nghû é hkyô lé, hkyolat má, yhangmoq dang chyin chyín lhum kô é yanmai nghut ri.
- ³⁵ Yesuq gi, zùng mù, haú chángzo raxe í yuq lé, wut yù luí, “Kô dik naù sû ó yuq nghut kôle, tiq dik sû eq ban-shoq bâng é dui-nhâng zoshâng dut ra râ nghut lhê.” ga taí ri.
- ³⁶ Hau htâng, Yhang gi, zoshâng rayuq lé shuí yù mù, yhangmoq é gung gûng má shap to luí, dum bún yù mù,
- ³⁷ yhangmoq lé taí é gi, “Shí sû é zoshâng lé, Ngá é myìng mai hap yu é sû ó yuq nghut kôle, Ngo lé hap yu é sû nghut bê; Ngo lé hap yu é sû ó

yuq nghut kôle, Ngo lé za hap yu é a nghut, Ngo lé nhang kat é Sû lé hap yu é le nghut lhê.” gà ri.

Nga-nhúng Lé Gyè A Kut É Sû Gi, Nga-nhúng É Hkyam Shut Nghut Lhê Gà É Hkyô

Luk 9:49-50

- ³⁸ Haú hkûn, Yohan gi, “Sarà ê! Náng é myìng lang luí, nat gâng pé lé hkat pyám byí wún é byù rayuq lé, nga-moq myang ri. Yhang gi, nga-nhúng chyáng a lòm sû nghut é yanmai, yhang lé ngamoq hkûm pyâm é nghut lhê.” ga taí ri.
- ³⁹ Yesuq kúm gi, “Yhang lé hkâhkúm kó; Ngá myìng lé lang luí, laklaí kum-lhá kut é sû gi, razup za má, Ngò eq séng luí, a ge é hkyô pé lé taí râ
- ⁴⁰ a nghut; Hkâsu mù gà le, nga-nhúng lé gyè a kut é sû gi, nga-nhúng é
- ⁴¹ hkyam shut nghut lhê. Ngò, nungmoq lé teng za taí kôlé, nungmoq gi, Hkrisduq eq sêng é bang nghut lhê gà é yanmai, ngá é myìng lé lang luí, nungmoq lé, uchyam ragóm byi huq é sû ó yuq nghut kôle, zuihpau lé hkyak myang hkam yù râ za nghut lhê.

Mara Shut Nhang É Hkyô

Mht 18:6-9; Luk 17:1-2

- ⁴² Ngo lé lumjîng é zoshâng wui mà é rayuq lé, mara kut shut nhang é sû gi, yhâng é lingzing má luqlú long mó tuí hut byi luí, wuimau má ê dú hkyó pyâm é huí é nghut lé gi, yhang é matú
- ⁴³ je gè râ nghut lhê. Náng é loq èq, nang lé mara kut shut nhang é nghut le gi, haú lé hpyit dú pyám aq; loq í loq dap luí, hkâ-nhám le, myiduoq a dat shum é ngaraí ming wàng râ htoq má, loq raloq eq za ahtum abyuq é asak wó râ shut wàng le gi, náng é matú je

- ⁴⁴ ge ri. (Haù ngaraî ming gi, ‘yhangmoq lé hkê nyi é luq le a shî, myidug le a shûm’ é jowò nghut lhê.)^a Náng é hkyi èq, nang lé mara kut shut nhang é nghut le gi, haù lé hpyit dú pyám aq; hkyî í hkyî dap luí, hkâ-nhám le, myidug a dat shum é ngaraî ming má dú hkyô pyâm é hui râ htoq má, hkyî rahkyî za dap luí, ahtum abyug é asak wó râ shut wang le gi, náng é matú
- ⁴⁶ je ge ri. (Haù ngaraî ming gi, ‘yhangmoq lé hkê nyi é luq le a shî, myidug le a shûm’ é jowò nghut lhê.) Náng é myojí èq, nang lé mara kut shut nhang é nghut le gi, haù lé lap choq pyám aq; myojí í jí dap gû, ngaraî ming má dú hkyô pyâm é hui râ htoq má, myoq rají eq za, Garai Gasâng é mingdán má wang le gi, náng é matú je ge ri.
- ⁴⁸ (Haù ngaraî ming gi, ‘yhangmoq lé hkê nyi é luq le a shî, myidug lé a shûm’ é jowò nghut lhê.)^b
- ⁴⁹ Hkâsu mù gà le, hkungga sho lé xo kat luí lhoq sansêng é su, myi gi, yuq hkanmó lé lhoq sansêng râ nghut lhê.^c
- ⁵⁰ Xo gi, ge lhê. Nghut kôlhâng, xomân kân byuq jáng gi, hkâsu kut dum wó lhoq ngam yù râ lhú? Nungmoq gi, xo su ngam nyi mù, rayuq eq rayuq nguingón nyi keq.” ga taí ri.

Myi, Làng Gâng É Hkyô

Mht 19:1-12; Luk 16:18

10 Hau htâng má, Yesuq gi, Kaperna-um mai htoq ló mù, Yuda mau mâ é maukyo má ê jé luí, Yodan làng tú tap má dap ló bê nghut ri; byù myo myo gi, Yhâng chyáng dum zîng lé lô kôluí, Yesuq gi,

Yhang lhaq kut nyi é eq rajung za, haù bang lé mhoqshit byí ri.

- ² Hparishe pé ra-am gi, lé jé kômù, “Byù rayuq, yhumsing é yhangmyi lé lhoq kâng pyâm le, tarâ wang lhê lhú?” ga myí é dong, Yhang lé chyam wú akô.
- ³ Yesuq gi, “Mosheq gi, nungmoq lé, hkâsu ga hkunmó hkyó tô é lhú?” ga taú myí ri.
- ⁴ Haù hkûn, yhangmoq gi, “Yuqgè rayuq gi, lhoq kang laiká ká mù, yhangmyi lé wó nhang pyâm lhê ga, Mosheq, ahkáng byí tô ri.” ga tú taí akô.
- ⁵ Yesuq dum tú taí é gi, “Nungmoq é myit nhiklhum htân kô é yanmai, Mosheq gi, tarâ haù lé kâ tô é nghut lhê.
- ⁶ Nghut kôlhâng, mau htoq xâng hkun lé, Garai Gasang gi, ‘yuqgè eq myiwe lé hpan é nghut lhê’.^d ‘Hau é yanmai, yuqgè gi, yhumsing înu îwâ chyáng mai htoq luí, yhangmyi eq rahá rading ralhûm za kut nyí mù, yhangnhik gi, gungsho ralhûm za dut byuq kó râ nghut lhê.’^e Haù mù luí, yhangnhik gi, í yuq a nghut lo é za, rayuq za dut bê nghut ri. Haù mù luí, Garai Gasang lhoq tsûm tô é lé, byù gi, a lhoq kang sháng gaq.” gà ri.
- ¹⁰ Yhumhkaú má, yhangmoq nyi tô é hkûn lé, chángzô pé gi, haù hkyô eq séng luí, Yhang lé dum saí myí akô. Haù hkûn, Yhang gi, “Yhumsing é yhangmyi lé kâng pyám mù, myiwe gotú dum hâng yu é sù ó yuq nghut kôle, su-myi lú é sù dut bê nghut mù, yhangmyi lé shut é sù nghut bê.
- ¹² Myiwe rayuq le, yhumsing é yhanglâng lé kâng pyám mù, yuqgè góyuq eq dum hâng é nghut le gi, sulâng lú é hkyô lé kut bê nghut ri.” ga tú taí ri.

^a 9:44 Bun zo 44, 46, gi, Chyúmlaiká myo myo má a bo é nghut lhê. ^b 9:48 Esai 66:24

^c 9:49 Nhong 2:13 ^d 10:6 Apùn 1:27 ^e 10:8 Apùn 2:24

Zoshâng Wuì Eq Yesuq É Hkyô*Mht 19:13-15; Luk 18:15-17*

- ¹³ Byu pé gi, zoshâng wuì lé Yesuq záng byi sháng gaq ga, Yesuq chyáng shuí lé lo akô; nghut kôlhang, chángzô pé gi, yhangmoq lé lhom tân hkûm
- ¹⁴ akô nghut ri. Haú lé Yesuq myàng jáng, Yhang gi, wú nhik-yo naú luí, “Haú zoshâng wuì lé, Ngá chyáng lé nhâng keq; yhangmoq lé hkâhkûm zing to kó; hkâsu mù gâ le, Garai Gasâng é mingdán gi, haú su é
- ¹⁵ bâng é mingdán ru nghut lê. Ngò, nungmoq lé teng za taí kôlé, ó yuq nghut kôle, Garai Gasâng é mingdán lé, zoshâng su kut a lhom hap yu é nghut le gi, mingdán haú má wó wâng râ a nghut.” ga yhangmoq
- ¹⁶ lé taí ri. Hau htâng, Yesuq gi, zoshâng wuì lé bún yû mù, yhangmoq ahtoq má loq ke luí, shimân byí ri.

Sùt Wó É Zorâm Rayuq É Hkyô*Mht 19:16-30; Luk 18:18-30*

- ¹⁷ Yesuq gi, hkyô dum so xoq e lô é hkûn, byù rayuq gi, din lé lô mù, Yhâng é hí má hkyihput htúq luí, “Ge é Sará ê, ahtum abyuq é asak wó yû râ matú, ngò haí kut ra râ l hú?” ga myí ri.
- ¹⁸ Haú mù, Yesuq gi, “Haí mù, Ngo lé ge é Sará nghu lê l hú? Garai Gasang
- ¹⁹ mai lai luí, ge é ó yuq le a nyì. Jep e tarâ má, ‘Byù hkâsat, su-myi sulàng hkâlú, hkâhkau, a teng a mán é saksé hkâhkâm, hkâmô zo, nángnu nánngwa lé hkungga aq!’^a ga bo tô é lé, nàng sê lê.” ga tû taí ri.
- ²⁰ Haú hkûn, haú yuq gi, “Sará ê, haú pé banshoq lé, ngò, zoshâng hkûn mai cháng bê nghut lê.” ga taí ri.

²¹ Yesuq gi, haú yuq lé wú tsuq to mù, yhang lé chyitdap luí, taí é gi, “Nàng kut râ rajung râ tô ashí; lô mù, nàng wó miwó lé ûng pyám luí, myùng bang lé byí pyám aq; haú jáng, nàng, mauhkûng htoq má sutzè wó râ nghut lê; haú mù, Ngá htâng lé cháng aq.” gâ ri.

²² Haú yuq gi, dang haú lé wó gyo jáng, sutzè gyai wó sù nghut é yanmai, myoqdong shum byuq mù, gyai yhang myit a ngón é èq lô byuq bê nghut ri.

²³ Yesuq gi, lnhingkyuq byu wú mù, Yhâng é chángzô pé lé, “Sutzè wó bang gi, Garai Gasâng é mingdán má wàng râ matú, haú-í yhang wuì ri-nhung!” ga taí ri.

²⁴ Chángzô pé gi, Yhang taí é dang é yanmai, mauhong bum akô nghut ri. Nghut kôlhang, Yesuq dum xoq taí é gi, “Zo wuì ê, Garai Gasâng é mingdán má wàng râ matú, haú-í yhang wuì ri-nhung! Sutzè wó sù rayuq, Garai Gasâng é mingdán má wó wàng râ htoq, gola-ug radu âpno mai wó wang lai râ gi, je lui râ nghut lê.” gâ taí ri.

²⁶ Haú hkûn, chángzô pé gi, je riyhang maú byuq kômù, rayuq eq rayuq, “Haú su ru nghut le gi, ó yuq za hkyi yu é hui râ nghut lê l hú?” ga, taí l hûm bum akô nghut ri.

²⁷ Haú hkûn, Yesuq gi, yhangmoq lé wú kat mù, “Haú hkyô lé, byù mai gi, wó kut râ a nghut; nghut kôlhang, Garai Gasang gi, wó dut lê; hkâsu mù gâ le, Garai Gasang gi, lhunglhang lé wó kut é Sù nghut lê.” ga taí ri.

²⁸ Haú hkûn, Petruq gi, Yhang lé, “Ngamoq gi, wó é gû lhunglhang lé tô pyâm to luí, Náng htâng cháng bê nghut lê.” ga taí ri.

^a 10:19 Htoq Lô 20:12-16

29 Haù mù, Yesuq tû taí é gi, “Ngò, nungmoq lé teng za taí kôlé, Ngá é yanmai le, gabú danglu é yanmai le, yhumsing é yhùm, gumang gu-nhá, ìnu ìwa, zo dù wuì eq yò pé lé tó pyâm
 30 tó é sù ó yuq nghut kôle, shí pyat lhê é yhùm pé, gumang gu-nhá wuì, ìnu pé, zo dù wuì eq yò pé lé, rashô tú wó hkam yù luí, zing-rî é hkyô pé lé le hui kó râ nghut é htoq agó, htang pyat má le, ahtum abyuq é asak wó
 31 yù râ nghut lhê. Nghut kôlhang, hí nghut nyi é bang myo myo gi, htâng gyó byuq kó râ nghut mù, htâng gyó nyi bang yuq gi, hí bekô râ nghut lhê.” gâ ri.

**Yesuq, Yhang Shí Râ Hkyô
 Lé Dum Taí É Hkyô**

Mht 20:17-19; Luk 18:31-34

32 Yhangmoq gi, Yerusalem wà mó shut doq ló nyi kô é u lé, Yesuq gi, yhangmoq é hí má sô tó ri; haù hkùn, htâng má sô é bang gi, gyuq nyi bùm kô é u lé, haù chángzô pé gi, maù byuq bum akô nghut ri; Yesuq gi, haù chángzo raxe í yuq lé gotú kut dum wut yù mù, Yhâng chyáng dut lò râ hkyô, yhangmoq lé taí kyô
 33 é gi, “Wú keq, nga-nhúng gi, Yerusalem wà mó shut doq ló nyi lhê; haù Byu Yhangzo gi, hkyangjong agyi pé eq tará sará pê é loq má ap byí pyâm é hui râ nghut lhê; haù bang gi, Yhang lé, shí râ mara byi luí, tûngbaù pê é loq má ap byí pyám kó râ
 34 nghut lhê. Haù bang gi, Yhang lé, wuì-zuì kut pyâm é, sòkan byé gyùn é, nhuq bat é kut yù mù, sat pyám kó râ nghut lhê. Hau htâng sum nyí má, Yhang dum dui toq lô râ nghut lhê.” gâ ri.

Yakuq eq Yohan nhik dung é hkyô

Mht 20:20-28

35 Hau htâng má, Zebedi é yhangzo Yakuq eq Yohan nhik gi, Yesuq chyáng lé kômù, “Sará ê, ngá-nhik dúng é gù banshoq, Nàng kut byi râ lé, ngá-nhik ô nau ri.” ga taí akô.
 36 Haù hkùn, Yhang gi, “Ngò, nung-nhik lé haì kut byi râ ô nau akô lú?” ga myí ri.
 37 Yhangnhik gi, “Náng é hpungwup shingkang hkaù má, ngá-nhik tâng lé, Náng é loqyò hkyam má rayuq, loq-paí hkyam má rayuq kut, zùng nhâng laq.” ga tû taí akô.
 38 Nghut kôlhang, Yesuq gi, “Nung-nhik haì dúng nyi é lé, nungnhik a sé kó nghut ri. Ngò shuq râ góm^a lé, nungnhik wó shuq kó râ lú? Ngò hkam yù râ baptisma lé, nungnhik wó hkam yù kó râ lú?” ga yhangnhik lé tû taí ri.
 39 Haù hkùn, yhangnhik gi, “Nga-nhik wó dut lhê.” ga tû taí kôjáng, Yesuq gi, “Ngò shuq râ góm lé, nungnhik shuq kó râ nghut lhê; ngò hkam yù râ baptisma lé le, nungnhik hkam yù
 40 kó râ nghut lhê. Nghut kôlhang, Ngá é loqyò, loqpaí hkyam má zùng râ ahkáng lé gi, Ngò byí jung a nghut. Jowò haù pé gi, hen to byí é hui bâng matú za nghut lhê.” ga yhangnhik lé taí ri.
 41 Haù su gâ é hkyô lé, haù gotú chángzo raxê yuq wó gyo kôjáng, yhangmoq gi, Yakuq eq Yohan nhik lé
 42 nhik-yô akô nghut ri. Yesuq gi, yhangmoq banshoq bang lé wut tsing yù luí, “Tûngbaù pé lé uphkan é ga bang gi, tûngbaù pé lé up zò nyi kô é hkyô lé le, haù eq rajung za, yhangmoq é ming up suwún wuì le, yhumsing é

^a 10:38 Góm eq baptisma gâ é gi, jamjau hui râ eq shí râ lé, taí nau é nghut lhê.

ahkáng ayá lé chûng mù, up zô nyi kô
⁴³ é hkyô lé le, nungmoq sê lhê. Nghut
 kôlhang, nungmoq chyáng gi, haú su
 a dut kó sháng gaq, nungmoq má, byù
 mó dut naù sù ó yuq nghut kôle, nung-
⁴⁴ moq é dui-nhâng zoshâng dut ra râ
 nghut lhê. Hau htoq agó, nungmoq
 má ushuq dut naù sù ó yuq nghut kôle,
 banshoq bâng é jùn dut ra râ nghut
⁴⁵ lhê. Hkâsu mù gâ le, haú Byu Yhangzo
 lhang gi, dojaú é lé hkam yù râ matú
 jé lé é a nghut e za, dojaú râ matú eq
 byù myo myô é matú, shihtai gung-
 lik hkungga dông, Yhâng é asak lé byi
 pyám râ matú sheq, jé lé é ru nghut
 lhê.” ga, yhangmoq lé tai ri.

**Myoqjit Sù Barateme, Myoq
 Dum Myang É Hkyô**

Mht 20:29-34; Luk 18:35-43

⁴⁶ Hau htâng, yhangmoq gi, Yerihko
 wà má jé ló akô nghut ri. Yesuq eq
 Yhâng é chángzô pé gi, byù moq mó
 eq rahá, wà mai htoq ló nyi kô é
 hkûn, Barateme (Teme é yhangzo) gâ
 é myoqjit sù rayuq gi, hkyô yàm má
⁴⁷ dung zô zung tô ri. Yhang gi, Nazaret
 wà byù Yesuq lai ló é lé wó gyo jáng,
 “Dawiq é Yhangzo Yesuq ê, ngo lé
 shogyo yù laq ô!” ga garû kat ri.
⁴⁸ Haú mù, byù myo myo gi, zim za
 nyi râ matú yhang lé tân hkûm akô;
 nghut kôlhang, yhang gi, “Dawiq é
 Yhangzo ê, ngo lé shogyo yù laq ô!”
 ga, je riyhang garû kat ri.
⁴⁹ Haú mù luí, Yesuq gi, yap nô kat
 mù, “Yhang lé ji kat keq.” ga tai jáng,
 yhangmoq gi, “Myit ngón aq hkoi;
 Yhang, nàng lé ji nyi ri; toq aq.”
⁵⁰ ga myoqjit sù haú lé tai akô. Haú
 hkûn, haú yuq gi, yhâng é buhîng lé
 hkyut pyám mù, byam chyù luí, Yesuq
 chyáng lé jé ri.

⁵¹ Yesuq gi, yhang lé, “Ngò, nang lé
 haí kut byi râ ô nau ri lú?” ga myi
 jáng, yhang gi, “Sarâ ê, ngò myoq
 myàng nau ri.” ga tai tai ri.

⁵² Yesuq gi, “Ló aq hkoi, nàng é lum-
 jîng myit gi, nàng lé lhoq gê byi bê
 nghut ri.” ga tai kat é hkûn jáng,
 yhang gi, myoq wó myàng mù, Yesuq
 e ló é hkyô shut cháng e ló bê nghut ri.

**Yesuq, Yerusalem Wà Mó
 Má Wang Ló É Hkyô**

Mht 21:1-11; Luk 19:28-40; Yhn 12:12-19

11 Yesuq eq Yhâng é chángzô
 pé gi, Yerusalem wà mó eq
 chyâng lo nyi kô é hkûn, Tsanlun
 Bùm mâ é Bethpage wà eq Behtani wà
 má jé ló kôjáng, Yesuq gi, Yhâng é
² chángzo í yuq lé, “Nungnhik, hí mâ
 é wà má ê keq; wà haú má wang
 é hkûn jáng, ó le a jî wú shî é lo-
 gúng zo tuí to lánng é lé, ê myàng
 kó râ nghut lhê; haú lé hpyi yù mù,
³ Ngá chyáng she lò keq. Byù rayuq
 yuq mai, ‘Haí mù, haú su kut nyi akô
 lú?’ ga nungnhik lé lhom myi jáng,
 ‘Shí du lé, haú Yhumsîng râ ri ga, ra-
 zup má dum taú dé byi râ nghut lhê.’
 nghû tú tai keq.” ga pyîng luí, nhang
 kat ri.

⁴ Haú nhik gi, e ló mù, hkyô mó yàm
 mâ é hkumdong nàm má tuí tô é lo-
 gúng zo radu lé, ê myàng kôluí, haú
⁵ lé tuí hpyi nyi akô. Haú hkûn, haú má
 yap tô é bang ra-am gi, “Haí mù, lo-
 gúng tuí hpyi nyi akô lú?” ga myí
⁶ akô. Haú jáng, yhangnhik gi, Yesuq
 pyîng kat é eq rajung za tai kyo kô-
 jáng, yhangmoq gi, she ló râ ahkáng
⁷ byí kat akô nghut ri. Yhangnhik, lo-
 gúng zo haú lé Yesuq chyáng she jé lo
 é hkûn, logúng hau é gùng htoq má,
 yhangmoq é buhîng pé buí jáng, hau

⁸ é ahtoq má, Yesuq doq jî ri. Byù myo myo gi, yhangmoq é buhîng pé lé, hkyô má hkyut hkang byî akô; ra-am gi, yò pé má zân yu é mhandîng lé
⁹ hkang byî akô nghut ri. Hí má so bang eq htâng má châng é bang gi,

“Hosana!”^a

Haù Yhumsîng é myîng mai jé lé lô Sû gi, hkungsô wó nyî sháng gaq ô!

¹⁰ Jé lé lô râ nghut é, nga-nhûng é îwa Dawîq é mingdán gi, hkungsô wó nyî sháng gaq ô!

Htoq tsáng myhâng má hosana nghut sháng gaq ô!”^b

ga luí, taí garû bum akô nghut ri.

¹¹ Yesuq gi, Yerusalem wà mó má jé mù, noqkuq yhûm má wang ê luí, lhînghkyuq mâ é jung hkangmó lé wú ri; nghut kôlhang, bui gyum lô bê nghut é yanmai, Yhâng é chángzo raxe í yuq eq rahá, Behtani wà shut htoq e lô bekô nghut ri.

Maihpáng Gâm Ashi A Zui Râ Matú Taí É Hkyô

Mht 21:18-19

¹² Hau htang nyî, yhangmoq, Behtani wà mai htoq lô kô é hkûn, Yesuq gi, zo
¹³ mut bê nghut ri. Yhang gi, ahaq wúm é maihpáng gâm ragàm lé, we we mai byu-myang kat jáng, agàm haù má ashi zúí lhê laq ga ê jé wú le, ahaq mai lai luí, haí le a myàng nghut ri.

Haí mù gâ le, maihpáng-shi zui yâm
¹⁴ a nghut é yanmai nghut ri. Haù mù, Yesuq gi, shigâm haù lé, “Ahkuí mai gi, náng chyáng mâ é ashi, ó yuq le a myàng zo lo kó sháng gaq.” ga taí ri. Yhâng é chángzô pé gi, haù su ga taí é dang lé wó gyô yu akô nghut ri.

Yesuq, Noqkuq Yhûm Lé Lhoq Sansêng Pyâm É Hkyô

Mht 21:12-17; Luk 19:45-48; Yhn 2:13-22

¹⁵ Yhangmoq, Yerusalem wà mó má jé é hkûn, Yesuq gi, noqkuq yhûm má wang ê mù, haù mâ é zè ung zè wuì kut nyi é bang lé, hkat htoq pyâm luí, ngùn htaí zo bâng é sibôi pé eq hpûngkyui ung zo bâng é tanghkuq
¹⁶ pé lé tu mhuyq pyâm byî ri. Hau htoq agó, Yhang gi, ó yuq lé nghut kôle, ung zè lé noqkuq yhûm mai a waq lai
¹⁷ nhâng kut pyâm ri. Yesuq, yhangmoq lé mhoqshit é gi,

“Ngá yhûm gi, byù myú lhunglhâng bâng é matú, kyúdung yhûm ga râ nghut lhê.”^c

ga kê tô é a nghut kó lú? Nghut kôlhang, nungmoq gi, ‘damaq hkyûng’ kut pyâm bekô nghut ri.” gâ ri.^d

¹⁸ Hkyangjong agyi pé eq tarâ sará pé gi, haù lé wó gyo kômù, Yhang lé hkâsu kut wó sat pyâm râ hkyô ho nyi akô; nghut kôlhang, shiwa byu pé gi, Yhang mhoqshit é hkyô má, myit zîng zuq bùm kô é yanmai, yhangmoq gi, Yhang lé gyuq bum akô nghut ri.

¹⁹ Myinhâng jé jáng, Yesuq eq Yhâng é chángzô pé gi, wà hkaù mai htoq lô bekô nghut ri.

Maihpáng Gâm Nyhuí Shi Byuq É Hkyô

Mht 21:20-22

²⁰ Htang napkyó, yhangmoq sô laí lô le, maihpáng gâm gi, amyit mai yhang nyhuí kyuq shi byuq é lé myang akô.

²¹ Petruq gi, myit bún kat luí, “Rabai ê, wú aq! Nàng nhîng pyâm é maihpáng gâm gi, nyhuí shi byuq bê nghut ri.” ga luí, Yesuq lé taí ri.

^a 11:9 Hebre dang má, *hosana* gâ é gi, “ahkuí hkyi yù laq” gâ é nghut lhê. Nghut kôlhang, bun zo 9, 10 má gi, hkyá-on dang dông chung é nghut lhê. ^b 11:10 Hkyá-on 118:25-26

^c 11:17 Esai 56:7 ^d 11:17 Yer 7:11

- ²² Haú hkûn, Yesuq gi, “Garai Gasang
²³ lé lumjínq keq. Ngò, nungmoq lé teng
 za taí kôlé, ó yuq nghut kôle, i-myyit
 má úng-âng é hkyô a bo é za, yhum-
 sîng taí é hkyô gi, dut lò râ nghut lhê
 ga lumjínq kô é nghut le gi, bùm shî
 lé, ‘Htot mù, wuimau má ló gyó wâng
 aq.’ ga taí le lháng, haú hkyô dut byi
²⁴ râ nghut lhê. Haú mù luí, Ngò, nung-
 moq lé taí kôlé, nungmoq haí dúng le
 le wó yú râ nghut lhê nghú lumjínq kô
 é nghut le gi, wó yú kó râ za nghut lhê.
²⁵ Mauhkûng htoq mâ é nungmoq é Íwa
 gi, nungmoq é mara lé hkyut pyám
 byi sháng gaq, nungmoq gi, kyútdúng
 yap tô é hkûn lé, rayuq yuq, nungmoq
 lé shut é mara bo é nghut jáng, mara
²⁶ hkyut pyám byi keq; (Nghut kôlhang,
 nungmoq mai mara a hkyut pyám byí
 é nghut le gi, mauhkûng htoq mâ é
 nungmoq é Íwa le, nungmoq é mara
 lé hkyut pyám byi râ a nghut.)” ga tú
 taí ri.^a

**Yesuq É Ahko Ahkáng Lé
 Myí Chyam É Hkyô**

Mht 21:23-27; Luk 20:1-8

- ²⁷ Yhangmoq, Yerusalem wà mó má
 dum jé mù, Yesuq gi, noqkuq yhûm
 wàng hkaú má sô yông wún é u lé,
 hkyangjong agyi pé, tarâ sará pé eq
 suwún wuí gi, Yhâng chyáng lé jé
²⁸ kômù, “Hai ahko ahkâng èq, Nàng,
 shí pé lé kut nyi lhê lhú? Haú su kut
 râ ahko ahkáng, Nang lé ó yuq byí é
 lhú?” ga myí akô.
²⁹ Haú jáng, Yesuq gi, “Ngò le, nung-
 moq lé rajung myí wú kôlé, tú taí wú
 keq; haú hkûn, hai ahko ahkâng èq,
 Ngò, shí pé kut é hkyô lé taí kyo râ
³⁰ nghut lhê. Yohan byí é bapstisma gi,
 mauhkûng mai lhú? A nghut jáng, byu

chyáng mai lhú? Taí wú keq!” ga taú
 myí kat ri.

- ³¹ Haú hkûn, yhangmoq chôm hpyê
 lhum kô é gi, “‘Mauhkûng mai nghut
 lhê’ nghú nga-nhúng taí jáng le, ‘Haú
 nghut le nhîng, haí mù, yhang lé a
³² lumjínq kô é lhú?’ ga râ nghut; ‘Byu
 chyáng mai nghut lhê.’ nghú jáng
 le....” gâ ri. (Yohan gi, myiqhtoi rayuq
 gè gè nghut lhê ga, lhunglhâng bang
 lumjínq bûm kô é yanmai, yhang-
 moq gi, haú byu pé lé gyuq bum akô
 nghut ri.)
³³ Haú mù, yhangmoq gi, Yesuq lé,
 “Ngamoq a sé.” ga tú taí akô.
 Haú hkûn, Yesuq gi, “Haú jáng, Ngò
 le, hai ahko ahkâng èq shí pé kut é
 hkyô lé, nungmoq lé a taí kyo.” ga,
 yhangmoq lé taí ri.

**Tsibiyiq Hkyâm Saí Bang
 Lé Dangtú Yu É Hkyô**

Mht 21:33-46; Luk 20:9-19

- 12** Hau htâng, Yesuq, dangtú
 dông yhangmoq lé taí é gi,
 “Byù rayuq gi, tsibiyiq hkyâm ra-
 hkyam saí to mù, lhînghkyuq kyâm
 to luí, tsibiyiq wing pyik htoq râ
 donghkong dû to mù, machya ra-
 lhum saí tô ri. Hau htâng, yhang gi,
 hkyâm haú lé, hkyâm saí zo bâng
 chyáng ngho byí to mù, gó ming shut
² e ló byuq bê nghut ri. Kyôshu yoq jé
 jáng, yhang gi, yhang yù âng é tsi-
 byiq shi ê yú râ matú, dui-nhâng
 zoshâng rayuq lé, hkyâm saí zo
³ bâng chyáng nhang kat ri. Nghut kô-
 lhang, haú bang gi, haú yuq lé lhom
 chyup bat luí, loq kôm taú nhang
⁴ kat akô. Haú mù, yhang gi, gotú
 dui-nhâng zoshâng rayuq lé, yhang-
 moq chyáng dum nhang kat ri;

^a 11:26 Bun zo shî gi, Chyúmlaiká ra-am má za bo lhê.

yangmoq gi, haú yuq lé le, ulhum má lhom bat cheq byi kôluí, hoq lhoq
⁵ hpû kat akô nghut ri. Hau htâng, ra-yuq lé dum nhang kat jáng, haú yuq lé gi, lhom sat pyâm akô; Yhang gi, góbang myo myo lé le, yangmoq chyáng nhang kat ashî nghut ri; yangmoq kúm gi, ra-am lé lhom bat, ra-am lé lhom sat pyám, kut akô nghut ri.

⁶ Ló htáng má, yang gi, yang chyt-dap é zo lé nhang kat râ za ru nghut alô; haú mù, yang gi, ‘Ngá zo lé gi, yangmoq lhom hkungga kó râ nghut lhê.’ ga, yangzo lé nhang kat ri.

⁷ Nghut kôlhang, haú bang gi, ‘Shí yuq gi, silí wunlí sing yù râ sù nghut lhê; lé keq, yang lé sat pyám sháng, haú jáng sheq, silí wunlí pé lé nga-nhúng wó yù râ nghut lhê.’ ga rayuq eq rayuq taí lhûm bum akô.

⁸ Haú mù, yang lé chyup yù luí, sat pyám mù, hkyâm shinggan shut dú htoq pyâm akô nghut ri.

⁹ Haú jáng, tsibiyiq hkyâm yhumsîng gi, yangmoq lé hkâsu kut râ lhú? Yhang gi, ê mù, haú hkyâm saí zo bang lé sat pyám luí, hkyâm haú lé, góbang lé htot ngho byí pyám râ

¹⁰ nghut lhê. Chyúmdang má,
 ‘Yhûm saí bâng èq hkyin htoq pyâm é luqgok gi, htungchyûn mâ é ahkyak dik é luqgok dut bê.

¹¹ Shí hkyô gi, haú Yhumsîng kut é nghut luí, nga-nhûng é myoq hí má mauhpo dut bê nghut ri.’ ga bò tô é lé, nungmoq a nghap wú kó lhú?”^a
 gâ ri.

¹² Hau htâng, yangmoq gi, dangtú haú, yangmoq lé lhoq ang luí taí é hkyô lé, sé kô é yanmai, Yhang lé chyup yù râ matú hkyô ho nyi akô. Nghut kôlhang, yangmoq gi, byù moq mó lé gyuq kô é yanmai, Yhang lé nyhi pyâm to luí, htoq ló byuq bekô nghut ri.

Kehtaq^b Lé Kang Kat Byí É Hkyô

Mht 22:15-22; Luk 20:20-26

¹³ Hau htâng má, yangmoq gi, Yesuq é dang má mara hô luí Yhang lé chyup yù râ matú, Hparishe pé ra-am eq Herut é byu pé ra-am lé, Yesuq chyáng nhang kat akô.

¹⁴ Haú bang gi, Yhâng chyáng lé jé kômù, “Sarâ ê, Nàng gi, tengmán sù nghut é lé, ngamoq sê lhê. Nàng gi, ó haí ga râ lé le haí su a ngàm sù nghut é yanmai, ó yuq é myoqdong lé le a tê byí é za, Garai Gasâng é hkyô lé, tengmán é dong mhoqshit é sù nghut ri. Haú mù, Kehtaq lé kang
¹⁵ kat byí le gi, ge lhê lhú? Ngamoq kat ra râ lhú? A kat ra râ lhú?” ga Yhang lé taí akô.

Yesuq kúm gi, yangmoq, gegùn labyoq kut nyí kô é lé sé mù, “Nungmoq gi, haí mù, Ngo lé lé chyam wú akô lhú? Denari ngùn rachap yu lé
¹⁶ keq, ngò wú wú bá.” ga taí kat ri. Haú hkûn, yangmoq yu jé lô jáng, Yhang gi, “Shí má, ó yuq é alhô eq masat laiká dap tô ri lhú?” ga myí ri.

Yangmoq gi, “Kehtaq é nghut ri.” ga tú taí akô.

¹⁷ Haú mù, Yesuq gi, yangmoq lé, “Kehtaq é lé gi, Kehtaq lé byi keq; Garai Gasâng é lé gi, Garai Gasang lé byi keq.” ga taí jáng, yangmoq gi, maú byuq bùm bekô nghut ri.

^a 12:11 Hkya-on 118:22-23 ^b 12:13 Kehtaq gâ é gi, “hkoséng” gâ é nghut lhê.

**Saduke Pé, Yesuq Lé
Myí Chyam É Hkyô**

Mht 22:23-33; Luk 20:27-40

- 18 Haú dum dui toq hkyô a joq gâ é Saduke pé gi, Yesuq chyáng lé jé
- 19 kômù, dangmyi lé myí akô. Yhangmoq myi kô é gi, “Sarâ ê, myiwe wó é byù rayuq gi, zo dù a dap é za shi byuq é nghut jáng, yhanggu gi, yhangmang é awut ashín xoq byi râ matú, yhâng rhat lé chui gon ra râ nghut lhê ga, nga-nhúng lé, Mosheq kâ to
- 20 byí ri. Hí hpyang lé, gumang nhiktâng wuì nyhit yuq nyi akô. Lagám yuq gi, myiwe yù luí, zo dù a dap é za shi ló byuq bê nghut ri. Lanong yuq gi, yhangmang mó é chui lé gon mù, zo dù a dap é za shi ló byuq bê. Lalaq yuq le, haú eq rajung za dut byuq
- 22 bê nghut ri. Haú nhiktâng wuì nyhit yuq gi, zo dù a dap é chyat shi ló byuq bùm bekô nghut ri. Htâng má, myiwe myhí haú le châng shi ló byuq
- 23 bê nghut ri. Haú mù luí, haú dum dui toq é buinyì má, myiwe myhí haú gi, hká yuq é yhangmyi nghut râ lhú? Hkâsu mù gâ le, yhang gi, haú nyhit yuq é yhangmyi dut wú bê sù nghut ri.” gâ akô.
- 24 Yesuq gi, yhangmoq lé, “Nungmoq hkyô ngoq é gi, Chyúmdang eq Garai Gasâng é wum-o a-tsam lé, a sé kô é yanmai nghut lhê, a nghut kó lhú?
- 25 Haú shi byuq bê bang dum dui toq é hkûn gi, myí byi myí yú hkyô joq lo râ a nghut; yhangmoq gi, mauhkûng htoq mâ é maumang lagyô pé su dut
- 26 byuq kó râ nghut lhê. Shi é mai dum lhoq dui toq é hkyô eq séng luí, Mosheq kâ tô é laiká má lháng, haú nyé duq nyi é mhanpúng mai, Garai Gasang gi, yhang lé, ‘Ngò gi, Abraham

é Garai Gasang, Isak é Garai Gasang, Yakup é Garai Gasang nghut lhê.’^a ga kâ tô é lé, nungmoq a nghap wú kó

27 lhú? Garai Gasang gi, shi bê bâng é Garai Gasang a nghut, dui nyì bâng é Garai Gasang sheq ru nghut lhê. Nungmoq gi, shut dik bekô nghut ri.” ga taí ri.

Ahkyak Dik É Jep É Tarâ

Mht 22:34-40; Luk 10:25-28

- 28 Tarâ sarâ rayuq gi, lé lô mù, yhangmoq taí htíng lhum nyì kô é lé, lé wó gyô ri. Yhang gi, haú bang lé, Yesuq rago tû taí nyi é lé myàng jáng, Yesuq lé, “Jep é tarâ banshoq má, hká lhum gi, ahkyak dik lhê lhú?” ga myí ri.
- 29 Haú jáng, Yesuq gi, “Ahkyak dik é jep é tarâ gi, ‘Israelaq byu pé ê, gyo wú keq! Nga-nhúng é Yhumsíng Garai Gasang za, Garai Gasang nghut lhê.
- 30 Haú Yhumsíng náng é Garai Gasang lé, náng é myit nhiklhum banshoq, náng é asak woi-nyí lhum gón, nàng myit é hkyô banshoq, náng é wum-o banshoq èq, chyitdap râ lhê.’^b gâ é
- 31 nghut lhê. Hau htang lhum gi, ‘Náng gûng lé nàng chyitdap é su, náng é chyangnâm mâ é bang lé le chyitdap aq.’^c gâ é nghut lhê. Shí í lhûm htoq kô é tarâ gotú a joq lo.” ga yhangmoq lé tû taí ri.
- 32 Haú hkûn, tarâ sarâ haú yuq gi, “Gyo naú bê, Sarâ ê! Garai Gasang rayuq za nghut lhê, gotú a nyì lo ga nàng taí é gi, têng ri. Garai Gasang lé, náng é myit nhiklhum banshoq èq le, náng é sê gyo é nyan banshoq èq le, náng é wum-o banshoq èq le, chyitdap râ lhê gâ é eq, náng gûng lé nàng chyitdap é su, náng é chyangnâm mâ é bang lé le chyitdap râ lhê gâ é gi, myi nyhé

^a 12:26 Htoq Ló 3:6 ^b 12:30 Tarâ Pun 6:4-5 ^c 12:31 Nhong 19:18

hkungga eq gotû hkungga pé banshoq htoq má, je ahkyak lhê.” ga taî ri.

- ³⁴ Yesuq gi, yhang hpaqchyî bo é dông tû taî nyi é lé myàng jáng, “Nàng gi, Garai Gasâng é mingdán eq a we lo nghut ri.” ga yhang lé taî kat ri. Haú hkûn mai gi, ó yuq le, Yhang lé dang-myi a wám myi lo kó nghut ri.

Hkrisduq Gi, Ó Yuq É Yhangzo?

Mht 22:41-46; Luk 20:41-44

- ³⁵ Yesuq, noqkuq yhûm má mhoqshit nyi é hkûn lé taî é dang gi, “Haî mù, haú tarâ sará pé gi, Hkrisduq lé, Dawiq é yhangzo za nghut lhê gâ akô
³⁶ lhú? Dawiq gi, Chyoiyúng Woi-nyí èq taî nhang é má,

‘Haú Yhumsîng Garai gi, ngá é Yhumsîng lé, “Ngò, náng é gumlau gye pé lé, náng é hkyiwa ô má tô pyâm é hkyíng jé shoq, Ngá é loqyo hkyam shut zung nyi shi aq.” ga taî ri.’^a

- ³⁷ gâ ri. Haú mù, Dawiq yhang lháng, Hkrisduq lé, Yhumsîng gâ é nghut le gi, yhangzo za hkâsu ge nghut râ lhú?” gâ ri.

Byù hpûng mó gi, Yhâng é dang lé, gabú myit èq gyô nyi bum akô nghut ri.

- ³⁸ Yesuq gi, mhoqshit uchang taî é má, “Tarâ sará pé lé sidiq nyi keq. Yhangmoq gi, réng é buhîng wut chûng mù, sô yông wún luí, gai pé má lhom shi-kyâm yù râ lé le, tara-jong pé mâ é ahkyak dik é zùng jang pé eq poí pé mâ é réng é zùng jowò pé má myang zùng râ lé le, ô nau nyi
⁴⁰ bum akô. Yhangmoq gi, chuimó pê é yhûm-yò pé lé hpyoq zo hpyoq shuq kôluí, kyû hîng hîng dîng shit mhaú

é bang nghut akô. Haú su é bang gi, dam byî é je riyhang hui zo kó râ nghut lhê.” gâ ri.

Chuimó Myhí Kat É Alu Ngùn

Luk 21:1-4

- ⁴¹ Yesuq gi, alu sidek nàm má zung to mù, noqkuq yhûm mâ é alu sidek haú má, byù moq mó ngùn kat nyi é lé wú nyi ri. Sùt wó bang myo myo gi, ngùn ga-myhó myhó kat bum akô.
⁴² Haú hkûn, myung é chuimó myhí rayuq gi, lé mù, gyi htingchap ngùn zo í chap lé kat ri.
⁴³ Yesuq gi, Yhâng é chángzô pé lé wut yù mù, “Ngò, nungmoq lé teng za taî kôlé, shî myung é chuimó myhí gi, góbang banshoq htoq má je myo
⁴⁴ kat bê nghut ri. Haú góbang banshoq gi, yhumsîng agùn agó wó é mâ é lé, lé kat akô; yhang kúm gi, myùng sù nghut kôle, yhâng é asak lé baú râ ngùn banshoq lé, kat bê nghut ri.” ga taî ri.

Ló Htâng Buinyi Má Dut Lò Râ Hkyô

Mht 24:1-21, 29-35; Luk 21:5-33

13 Yesuq, noqkuq yhûm mai htoq ló é hkûn, Yhâng é chángzo rayuq gi, “Sarâ ê, wú aq; hkâ-í ko é luq-gok pé! Hkâ-í hkik é yhûm pé!” ga Yhang lé taî kat ri.

- ² Haú hkûn, Yesuq gi, “Nàng, yhûm mó shí pé lé myàng lhê a nghut lhú? Luqgok shí pé gi, rachâm htoq racham lháng a kê lhum loshoq, hpyoq hpyi pyâm é hui râ nghut lhê.” gâ tû taî ri.
³ Yesuq gi, Tsanlun Bùm má, noqkuq yhûm shut hû mù zung tô é hkûn, Petruq, Yakuq, Yohan eq Andre pé gi,
⁴ Yhâng chyáng lé jé kômù, “Haú hkyô pé gi, hkâ-nhám dut lò râ lhú? Haú

^a 12:36 Hkya-on 110:1

dut lò rà hkûn, hkasû é kumlhá htoq lô rà nghut lhê lú? Ngamoq lé taí kyô wú laq.” ga Yhang lé baú myí akò nghut ri.

- ⁵ Haú mù, Yesuq gi, yhangmoq lé, “Nungmoq lé, ó yuq èq le a wó shuí
- ⁶ ngoq sháng gaq, sidiq nyí keq. Hkâsu mù gâ le, ‘Ngò gi, haú yuq^a nghut lhê.’ ga, Ngá myîng lé lîng é byù myo myo pô htoq lô mù, byù myo myo lé
- ⁷ shuí ngoq kó rà nghut lhê. Nungmoq gi, majan dut nyí é hkyô eq majan eq sêng é danglâm pé lé, wó gyo kôjáng, hkâgyuq dàn kó. Haú hkyô pé gi, dut lò rà za nghut lhê; nghut kôlhang, ló
- ⁸ htâng é buinyí gi, a nghut shi. Byù ra-myû eq ra-myû, mingdán ralhum eq ralhum majan zân lhûm lò kó rà nghut lhê. Jowò myo myo má, layàng nún é, mutmó gyó é pé dut lò rà nghut lhê. Haú pé gi, wuîhke jamjau hkyo é apûn awang za ru nghut ashî.
- ⁹ Nungmoq gùng nungmoq sidiq nyí keq. Hkâsu mù gâ le, yhangmoq gi, nungmoq lé, tarâ rûng pé má é ap pyám kó rà nghut é htoq agó, tara-jong pé má nungmoq lé nhuq bat kó rà nghut lhê. Hau htoq agó, nungmoq gi, Ngá mying é yanmai, mauzau wuî eq hkohkam pé é hí má, saksé dông yap
- ¹⁰ ra kó rà nghut lhê. Haú gabú danglû gi, amyû banshoq lé hí hko kyo ra
- ¹¹ rà nghut lhê. Nungmoq gi, chyup yu é hui luî, jep huí é hkûn, haí taí rà lé, hkâ-myit chiq kó. Ahkyíng jé jáng, nang lé myit htoq lô nhang é dong za taí aq; hkâsu mù gâ le, dang haú pé gi, nungmoq taí é a nghut, haú Chyoiyúng Woi-nyí èq taí nhang é ru nghut lhê.
- ¹² Nhiktâng gi, nhiktâng yhangchang, îwa gi, yhangzo lé, shî shoq ap pyâm

lhum kó rà nghut lhê; zo wuî gi, mó wuî lé gumlau toq mù, sat pyám

¹³ nhâng kó rà nghut lhê. Byù lung-lhâng bang gi, Ngá é yanmai, nungmoq lé a nguî kut kó rà nghut lhê; nghut kôlhang, jihtûm jé shoq wó hkam jân nyí é sù gi, hkyi yu é hui rà nghut lhê.

- ¹⁴ ‘Haú lhoq hten lhoq hpyoq é achayut hkyô^b gi, yhang a nyí âng é jowò má yap tô é lé, nungmoq myàng kôjáng (laiká nghap é sù gi, sê gyo sháng gaq), Yuda mau má nyí é bang gi, bùm pé shut hfang doq ló kó sháng
- ¹⁵ gaq. Yhumhkûng htoq má nyí tô é sù gi, yhúmhkaû mâ é zè haí lé le, a ló
- ¹⁶ gyó wang yù lo sháng gaq. Yò má nyí tô é sù gi, yhâng é buhîng lé a ló taú yu
- ¹⁷ nyí lo sháng gaq. Haú buinyí pé má, zogùng dut é myiwe wuî eq naú huq ashî nghut é înu wuî gi, hkâ-í yhang wuîhke bekó nghut ri myhi-nhung.
- ¹⁸ Haú hkyô gi, gyoqmyò má a dut sháng
- ¹⁹ gaq, kyúdüng nyí keq. Hkâsu mù gâ le, Garai Gasang, mingkan lé hpan tô é hkûn mai ahkuí jé shoq, hkâ-nhám le a dut wú shî é wuîhke jamjau mó gi, haú buinyí pé má dut lò rà nghut lhê; haú su é hkyô gi, htângnùng má hkâ-nhám le dum dut lo rà a nghut.
- ²⁰ Buinyí haú pé lé, haú Yhumsîng Garai mai a lhoq shaú é nghut le gi, ó yuq le asak wó lut rà a nghut. Nghut kôlhang, Yhang hkyin yù bê nghut é, hkyin yù hui bâng é matú gi, buinyí haú pé lé, Yhang lhoq shaú pyám byi
- ²¹ bê nghut ri. Haú ahkyíng má, byù rayuq yuq mai, nungmoq lé, ‘Wú keq, shî má Hkrisduq nyí ri.’ ga le, ‘Wú keq, Yhang hê má nyí ri.’ ga le, taí
- ²² jáng, nungmoq hkâjîng kó. Hkâsu mù gâ le, Hkrisduq apyoq pé eq myiqhtoi

^a 13:6 Haú yuq gâ é gi, Hkrisduq lé gâ é nghut lhê. ^b 13:14 Dan 9:27, 11:31, 12:11

pyoq pé pô htoq lô mù, wó dut é nghut jáng, hkyin yù hui bang lé lhang, wó lhoq nghoq shoq ga, kumlhá pé eq lak-laí kumlhá pé lé kut shit kó rã nghut

²³ lhê. Haù mù, nungmoq sidiq nyi keq; ahkyíng a jé shi mai, ngò, nungmoq lé, jung hkanmó taí kyô nyi gù nghut lhê.

²⁴ Buinyi haù pé má, wuñhke jamjau haù pé lai é htang,

‘Bui gi, noq byuq mù, lhamó gi, a tsò dut byuq rã nghut lhê;

²⁵ kyí pé gi, mauhkung mai byit gyó

lo bùm mù, mauhkung mã

é wum-o a-tsam pé gi, lhoq

nhùn é huí bùm kó rã nghut

lhê.’^a

²⁶ Haù hkùn, haù Byu Yhangzo gi, mhut ji mù, hpungwup a-tsam mó eq

le, hpungwup shingkang eq le, gyó lé lo é lé, byu pé byu-myàng kó rã

²⁷ nghut lhê. Hau htang má, Yhang gi, Yhâng é maumang lagyô pé lé nhang

kat mù, maumyí chyùn hkanmó eq myigùng htum shoq, mauhkung htang

shoq mai, Yhang hkyin yu tô é bang lé shuí tsing yù nhâng rã nghut

lhê.

²⁸ Maihpáng gãm lé wú mù, mhoy yú keq; agàm mai a-nyuq nyún lô mù, ahaq htut lô jáng, bui nyé nám chyâng

²⁹ lò bê lé, nungmoq sê lhê. Haù eq rajung za, shí hkyô pé dut nyi é lé, nungmoq myàng kôjáng, Yhang gi,

chyáng bê nghut mù, hkúmdong mã lhang nghut nyi bê hkyô lé, nung-

³⁰ moq sé lo keq. Ngò, nungmoq lé teng za taí kôlé, shí pyat mã é byu pé a ban shi byuq shimá, haù hkyô pé

³¹ banshoq dut byuq rã nghut lhê. Mauhkung eq myigùng gi, a joq lo dut byuq rã nghut lhê; nghut kôlhang,

Ngá é dang gi, ru joq nyi rã nghut lhê.

Haù Buinyi Eq Ahkyíng Lé, Ó Le A Sé

Mht 24:36-44

³² Buinyi eq ahkyíng haù lé gi, ó yuq le a sé; mauhkung htoq mã é mau-

mang lagyô pé lhang a sé; haù Zo le

³³ a sé; haù Íwa za ru sê lhê. Haù mù, nungmoq gi, ahkyíng haù hkâ-nhám

jé rã lé, a sé kô é yanmai, sidiq nyi

³⁴ keq! Machya nyi keq! Haù gi, byù rayuq, yhâng é dui-nhâng zoshâng wui

lé, ó le ó eq sêng é mù lé gàm byí to

mù, hkum zúng sù lé le, machya nyi rã matú pying to luí, yhâng yhúm lé,

haù dui-nhâng zoshâng wui chyáng ap pyâm to mù, byìn we shut htoq ló

byuq é sù eq pung ri.

³⁵ Haù mù, haù Yhumsing hpó gi, myinhâng laq, myín gunggàm laq, woqtún hkun laq, maubó zó laq,

hkâ-nhám jé lô rã lé nungmoq a sê kô é yanmai, sidiq machya nyi keq.

³⁶ Haù a nghut jáng, Yhang, dàn loq tung tau jé lo é hkùn, nungmoq yhup myhí

tô é lé, lo myang pyám rã nghut lhê.

³⁷ Ngò, nungmoq lé, ‘sidiq machya nyi keq,’ nghu taí é eq rajung za, yuq hkanmó lé le, taí é nghut lhê.” ga taí ri.

Yesuq, Xù But Byi Huí É Hkyô

Mht 26:1-16; Luk 22:1-6; Yhn 11:45-53, 12:1-8

14 Ahkuí, haù Lhoqlhai Poí eq múnchi a kat é Muk Zo Poí jé

rã í nyi za ru ra alò hkùn, hkyang-jong agyi pé eq tarã sará pé gi, Yesuq

lé hkâsu kut wó haq chyup yú mù, sat pyám rã matú, hkyô ho nyi akò

² nghut ri. Nghut kôlhang, yhangmoq gi, “Byu pé gabyông lô kó abe, poí

^a 13:25 Esai 13:10, 34:4

gyoro má gi, a kut shi sháng.” ga taí akô.

- ³ Yesuq gi, Behtani wà má nyi é manggâm dap wú sù Simûn é yhûm, siboí má nghe zung tô é hkûn, myiwe myhí rayuq gi, nardu amyit mai za saí yu é, gyai hpaû é namngón xû bo é alabasta (luq hpyû) bông yu lé lô mù, bông haú lé lâng hkyui luí, namngón xû haú lé Yesuq é ulhum má hut gyun byí ri.
- ⁴ Haú má nyi tô é bang ra-am gi, wú nhik-yô é myit èq, rayuq eq rayuq taí lhum kô é gi, “Haí mù, namngón xû lé aha agó kut pyâm lhê laq? Haú namngón xû lé, denari^a sùm sho èq ung luí, myùng bang lé byí le ge lhê mhaí!” gâ akô. Yhangmoq gi, myiwe myhí hau lé le, gyai chôm tân akô.
- ⁶ Nghut kôlhang, Yesuq gi, yhangmoq lé, “Myiwe zo haú lé, hkâtân nyi kó; haí mù, yhang lé i-myt lhoq myo nhang nyi akô lú? Yhang gi, Ngá é ahtoq má ge é hkyô kut bê nghut ri. Haú myùng bang gi, nungmoq eq rahá hkâ-nhám le nyi râ nghut lhê mù, nungmoq garúm nau é hkûn, yhangmoq lé wó garúm lhê. Nghut kôlhang, ngò gi, shí má nungmoq eq rahá ayang nyi nyi râ sù a nghut.
- ⁸ Yhang gi, yhang wó dut é í kut bê nghut ri. Yhang, Ngá gûng má, namngón xû hut gyûn é gi, Ngá gûng lé yhum râ matú, hí hen lajâng tô é ru
- ⁹ nghut lhê. Ngò, nungmoq lé teng za taí kôlé, haú gabú danglù lé mingkan gón hko kyô é jowò hkangmó má, yhang lé myit bûn é dông, yhang kut é hkyô shí lé, taí kyo bekô râ nghut lhê.” ga taí kyo ri.
- ¹⁰ Hau htâng, haú chángzo raxe í yuq má bo é Yudaq Iskarut gi, Yesuq lé

- ap pyám râ ga, hkyangjong agyi pê chyáng e ri. Haú bang gi, haú hkyô lé lhom wó gyo kôjáng, gyô gabú luí, yhang lé ngùn byi râ ga, danggidiq byí akô. Haú mù, yhang gi, Yesuq lé ap pyám râ hkyô ho nyi bê nghut ri.

Yhumsing É Myinzang

Mht 26:17-30; Luk 22:7-23; Yhn 13:21-30

- ¹² Haú htungli joq é eq rajung za, Lhoqlhai Poí hkungga sauzo jaú byí é, múnchi a kat é Muk Zo Poí sâng-hi nyí má, Yesuq é chángzô pé gi, Yesuq lé, “Nàng zo râ Lhoqlhai Poí lé, ngamoq hkâmá ê món to râ lú?” ga myí akô.
- ¹³ Haú mù, Yhang gi, chángzo í yuq lé, “Nungnhik, myuq hkaú shut wang ló keq, wui yambú waq é byù rayuq lhom hui râ nghut lhê; haú hkûn, nungnhik gi, yhâng htâng cháng keq.
- ¹⁴ Haú yuq, wang ló é yhûm mâ é yhumsing lé, ‘Ngò, Ngá é chángzô pé eq rahá, Lhoqlhai Poí lé zo râ bíng wap hkâmá nghut lhê lú ga, Sará myí nhang kat ri.’ ngû taí keq.
- ¹⁵ Haú hkûn, hen to gû nghut é, ahtoq mâ é wap mó lé lhom tân shit râ nghut lhê. Wap haú má, nga-nhûng é matú ê hen to keq.” ga taí luí, nhang kat ri.
- ¹⁶ Chángzo haú nhik gi, htoq e ló mù, myuq hkaú má wang e ló le, Yesuq taí kat é eq roq za ê myâng kômù luí, Lhoqlhai Poí lé, món to bekô nghut ri.
- ¹⁷ Myinhâng jé lô jáng, Yesuq gi, haú chángzo raxe í yuq eq rahá, haú má lé
- ¹⁸ jé bekô nghut ri. Yhangmoq gi, siboí má nghê mù, zô nyi bùm kô é u lé, Yesuq gi, “Ngò, nungmoq lé teng za taí kôlé, Ngò eq rahá zô nyi é bang nungmoq mâ é rayuq sù gi, Ngo lé ap pyám râ nghut lhê.” ga taí ri.

^a 14:5 Denari rachap gi, byù rayuq é ra-nyí lhê é zuihpau eq wuí ri.

- 19 Haú hkûn, yhangmoq gi, gyô yón kômù, rayuq htâng rayuq, “Ngò, a nghut hkaí?” ga Yhang lé myí akô.
- 20 Haú hkûn, Yhang gi, “Haú yuq gi, haú raxe í yuq mâ é rayuq nghut lhê. Ngò eq rahá, hkoq shí má
- 21 muk jùmzo sù nghut lhê. Haú Byu Yhangzo gi, Yhang eq séng luí kâ tô é eq rajung za, shí râ za nghut lhê. Nghut kôlhang, haú Byu Yhangzo lé ap pyâm é sù gi, dingnyé wó ri; haú yuq gi, a hku lé le lháng, je ge ri.
- 22 Yhangmoq zo nyi kô é u lé, Yesuq gi, muk lé yù mù, jeju hkya-on luí, muk lé myhik hpé mù, “Shí gi, Ngá é gungsho nghut lhê; yù mù zo keq.” ga taí uchyang, Yhâng é chángzô pé lé gàm byí ri.
- 23 Hau htâng, Yhang gi, góm lé le, yù mù, jeju hkya-on luí, yhangmoq lé byí ri; yhangmoq banshoq bang gi, haú lé yù shuq akô nghut ri.
- 24 Yesuq gi, yhangmoq lé, “Shí gi, byù myo myô é matú htoq pyâm é, dangshikaq eq sêng é Ngá sui nghut lhê.
- 25 Ngò, nungmoq lé teng za taí kôlé, Ngò, Garai Gasâng é mingdán má, tsi-biyiq wing asik lé shuq é buinyi a jé jé, tsi-biyiq wing lé dum shuq râ a nghut lo.” ga taí ri.
- 26 Yhangmoq gi, hkya-on mahkôn ralhüm ban hkôn jáng, Tsanlun Bùm shut htoq e ló bekô nghut ri.

**Petruq He-ngik Râ Hkyô
Lé, Te Taí É Hkyô**

Mht 26:31-35; Luk 22:31-34; Yhn 13:36-38

- 27 Yesuq gi, yhangmoq lé, “Nungmoq lhunglhang bang gi, myit lingbat kó râ nghut lhê; hkâsu mù gâ le,

- ‘Haú sau zúng sù lé, Ngò bat sat pyám mù, sau pé gi, lhoq pyo pyâm é hui kó râ nghut lhê.’^a
- 28 ga kâ tô ri. Nghut kôlhang, Ngò gi, lhoq dui toq é huí htâng má, Galile mau shut, nungmoq é hí má e ló láng râ nghut lhê.” ga taí ri.
- 29 Haú hkûn, Petruq gi, “Góbang banshoq myit lingbat kôlhang, ngò gi, myit lingbat râ a nghut.” ga taí kat ri.
- 30 Haú mù, Yesuq gi, “Ngò, nàng lé teng za taí lé, hkû-nyí, hkû-myín yhang jáng, woq í dâm a tûn shimá, nàng, Ngo lé sum dâm he-ngik pyám râ nghut lhê.” ga tû taí ri.
- 31 Nghut kôlhang, Petruq gi, “Ngò, Nàng eq rahá shí râ dut kôlhang, Nang lé ngò he-ngik pyám râ a nghut.” ga zuq zuq taí ri. Góbang banshoq le, haú su ga châng taí bum akô nghut ri.

**Get-samane Gâ é Jowò
Má Kyûdûng É Hkyô**

Mht 26:36-46; Luk 22:39-46

- 32 Yhangmoq gi, Get-samane gâ é jowò má jé ló kômù, Yesuq gi, Yhâng é chángzô pé lé, “Ngò, kyû ê dúng nyi é u lé, shí má zùng láng keq.” ga taí ri.
- 33 Yesuq gi, Yhang eq rahá Petruq, Yakuq, Yohan pé lé, shuí chùng ri. Haú hkûn, Yhang gi, myit gyai a ngón é eq myit wúihke é hui mù, yhangmoq lé, “Ngò gi, shí râ í yhang myit yón nyi ri; nungmoq gi, machyâ luí, shí má láng nyí keq.” ga taí ri.
- 35 Yesuq gi, haú mai ratsuí zo sô ê mù, myigùng má gop byên to luí, ahkýing haú lé ge lhoq lhaí pyám byí le gi, Yhâng chyáng mai lhoq lhaí pyám byí râ matú, “Aba,^b Áwa ê, Nàng gi, haí le wó dut é Sù nghut lhê. Góm^c shí

^a 14:27 Zhk 13:7 ^b 14:36 Aba gâ é gi, Aramaik dang dông “Áwa” gâ é lichyúm nghut lhê.

^c 14:36 Góm gâ é gi, Yesuq, jamjau hui râ hkyô eq shí râ hkyô lé, taí nau é nghut lhê.

lé, Ngá chyáng mai yu pyám byi laq. Nghut kôlhang, Ngò ô nau é dông a nghut, Nàng ô nau é dông sheq nghut sháng gaq.” ga kyûdûng ri.

- ³⁷ Hau htâng, Yhang gi, Yhâng é chángzô pê chyáng dum taû lo le, yhangmoq yhup myhî to kô é lé lo myang ri. Haû mù, Yhang gi, Petruq lé, “Simun, nàng yhup ngón nyi lhê lú? Razup za lháng a wó machya ³⁸ nyi lú? Gunlaú é a hui sháng gaq, machyâ luí, kyûdûng nyi keq. Haû woi-nyí gi, kâm nyi kôlhang, gungsho gi, wum nyhôm nyi ri.” ga taí ri.
- ³⁹ Yesuq gi, radàm dum ê mù, hí lé ⁴⁰ dúng é dang lé za, ê dung ri. Yhang dum taû lo le, yhangmoq gi, myoqkuq lai kô é yanmai, yhup myhî to láng kô é lé, lo dum myang ri. Yhangmoq gi, Yhang lé haí taí râ a sé dut byuq akò nghut ri.
- ⁴¹ Yesuq gi, sum dâm nghû râ lhîng má, yhangmoq chyáng dum taû jé lô mù, yhangmoq lé, “Nungmoq gi, ahkuí jé shoq yhup ngón nyi ashî kó lú? Gé bê! Haû ahkyíng gi, jé bê nghut luí, haû Byu Yhangzo gi, yubak dap bâng é loq má ap pyâm é hui râ ⁴² nghut bê. Toq keq! Lô losháng hkoí! Ngo lé ap pyám râ sù gi, jé lé lô bê nghut ri.” ga taí ri.

Yesuq, Chyup Yû Huí É Hkyô

Mht 26:47-56; Luk 22:47-53; Yhn 18:3-12

- ⁴³ Yesuq, dâng nyo nyi ashî u lé, haû chángzo raxe í yuq má bo é Yudaq gi, haû hkyangjong agyi pé, tarâ sará pé eq suwún wui chyáng mai nhang kat é bang nghut é, shâm eq dumbáng pé chung tô é byû moq mó eq rahá jé lé lo ri.
- ⁴⁴ Yesuq lé ap pyâm râ sù gi, yhangmoq lé, “Ngò bopuq puq é sù gi, haû yuq nghut bê; Yhang lé chyup yû mù,

zúng shuí ló keq.” ga kumhá byí to ⁴⁵ bê nghut ri. Yudaq gi, Yesuq chyáng hkyê za ê mù, “Rabai ê.” ga taí luí, ⁴⁶ Yhang lé bopuq puq byí ri. Haû hkûn, yhangmoq gi, Yesuq lé chôm zú zing ⁴⁷ mù, chyup yû bekò nghut ri. Haû mù, nàm má yap tô é byû rayuq gi, yhâng é shâm lé she htoq yû mù, hkyangjong mó é dui-nhâng zôshang é nohkyap lé pyoq hkyô kat byi bê nghut ri.

- ⁴⁸ Yesuq gi, yhangmoq lé, “Nungmoq gi, damyaq rayuq lé chyup é su, Ngo lé chyup râ matú, shâm eq dumbáng pé ⁴⁹ chûng mù, lé lo akò lú? Ngò gi, nyí wuí, nungmoq eq rahá nyi luí, noqkuq yhûm má mhoqshit byí nyi kôlhang, nungmoq, Ngo lé a chyup yû kô é nghut lhê. Nghut kôlhang, Chyúmdang pé gi, dik ra râ nghut lhê.” ga ⁵⁰ taí ri. Haû hkûn, haû chángzô pé gi, Yesuq lé tô pyâm to kôluí, hfang byo byuq bekò nghut ri.
- ⁵¹ Buhîng za wut é zorâm rayuq gi, Yesuq htâng cháng wún ri. Yhangmoq gi, haû yuq lé, wó kyaq zui kô é hkûn, ⁵² yhang gi, buhîng lé hkyut hkyô pyâm to mù, gùngchîn hfang ló byuq bê nghut ri.

Yudaq Byìn Tú Wapdoq Má Jéyáng Huí É Hkyô

*Mht 26:57-68; Luk 22:54-55,
63-71; Yhn 18:13-14, 19-24*

- ⁵³ Yhangmoq gi, Yesuq lé, hkyangjong mó chyáng shuí e akò; haû hkyangjong agyi pé lhunglhang bang, suwún wuí eq tarâ sará pé le, lé zup zing ⁵⁴ bum akò. Petruq gi, hkyangjong mó é yhumwàng hkaú má châng jé wâng shoq, we we mai Yesuq htâng châng tô ri. Yhang gi, haû má, zúng bang eq rahá, myihkyóm yâm má gyoq gang zung tô ri.

⁵⁵ Haû hkyangjong agyi pé eq Yudaq byîn tú wapdoq gón gi, Yesuq lé sat râ saksé hô kôlhang, haî le a

⁵⁶ myàng kó nghut ri. Byù myo myo gi, a têng é saksé hkám kôlhang, yhangmoq é dang gi, a tsûng lhum kó nghut ri.

⁵⁷ Hau htâng, ra-am gi, toq yap mù,

⁵⁸ a têng é saksé hkám kô é gi, “Yhang gi, ‘Byu loq èq saî é noqkuq yhûm shî lé, Ngò hpyoq hpyi pyám mù, sum nyí gyo-ro má, byu loq èq a saî é, gotû ralhûm dum saî râ nghut lhê.’ ga taî é

⁵⁹ lé, ngamoq wó gyô ri.” ga akô. Nghut kôlhang, yhangmoq é saksé gi, a tsûng lhum kó nghut ri.

⁶⁰ Hau htâng má, hkyangjong mó gi, yhangmoq é hí má toq yap mù, “Nàng, haî le a tû taî luq? Shí bang, Nang lé mara hun nyi é saksé gi, hká dông nghut lhê lú?” ga luî, Yesuq lé myî ri.

⁶¹ Nghut kôlhang, Yesuq gi, jit le a ga nyi tô ri.

Haû mù, hkyangjong mó gi, Yesuq lé, “Nàng gi, hkungsô wó Su é yhangzo, Hkrisduq nghut lhê lú?” ga dum myî ri.

⁶² Haú hkûn, Yesuq gi, “Nghut lhê; haû ngò Byu Yhangzo gi, a-tsam bo dik Su é loqyo hkyam^a má zung tô é lé le, mhuthtui ji mù, mauhkûng mai lé lo é^b lé le, nungmoq myàng kó râ nghut lhê.” ga taî ri.

⁶³ Haú hkûn, hkyangjong mó gi, yhâng é bu lé lêng cheq pyám mù, “Nga-nhúng, hai saksé râ ashî lú?”

⁶⁴ Yhang, Garai Gasang lé rhoî dang taî é lé nungmoq wó gyo bê nghut lhê. Nungmoq hkâsu wó myit akô lú?” ga myî ri; yhangmoq banshoq bang gi, shî gíng sù nghut ri ga, chôm myit huí

⁶⁵ akô. Haû mù, ra-am gi, Yhang lé sôkan byé gyun é eq, myoq má nghop pyám byi luî, loqtsup èq htui byî lhê kut mù, “Nang lé ó yuq htui é, myiq-htoi htoî wú aq.” ga taî akô. Haû zúng bang gi, Yhang lé shuí yù mù, nhuq bat akô nghut ri.

Yesuq Lé, Petruq He-ngik Pyâm É Hkyô

Mht 26:69-75; Luk 22:56-62;

Yhn 18:1-18, 25-27

⁶⁶ Petruq gi, wàng hkaû má nyi tô é u lé, haû hkyangjong mó é dui-nhâng

⁶⁷ zoshâng myhí rayuq jé lé lo ri. Haú yuq gi, Petruq gyoq gang nyi é lé myàng jáng, yhang lé rago wú mù, “Nàng le, Nazaret wà byù Yesuq eq rahá nyi sù nghut ri.” ga taî ri.

⁶⁸ Nghut kôlhang, yhang gi, “Nàng taî é hkyô lé, ngò, sé le a sé, gyo le a sê gyo.” ga he pyám luî, wâng hkúmdong shut htoq e ló bê nghut ri.^c

⁶⁹ Dui-nhâng zoshâng myhí haû gi, Petruq lé, haú má dum myàng jáng, awui ayàm má yap tô é bang lé, “Shí yuq le, haû hpúng má lom é sù rayuq

⁷⁰ nghut ri.” ga dum taî ri. Petruq gi, radàm dum he pyâm ri; hau htâng razup zo má, haû nàm má yap tô é bang gi, Petruq lé, “Nàng gi, Galile byù rayuq nghut é yanmai, haú hpúng mâ é byù rayuq hkyak nghut lhê.” ga taî akô.

⁷¹ Haú hkûn, yhang gi, yhânggùng yhang nhing luî, “Haû nungmoq taî é byù lé, ngò a sé.” ga dakam ri.

⁷² Haú u yhang, woq radàm dum tun kat bê nghut ri. Haû mù, Petruq gi, “Woq í dâm a tûn shimá, nàng, Ngo lé sum dâm he pyám râ nghut lhê.” ga, Yesuq, yhang lé taî é dang lé, myit bûn kat mù, wum kat ngau ri.

^a 14:62 *Loqyo hkyam* gá é gi, ahko ahkáng wó é jowò lé gá é nghut lhê. ^b 14:62 *Mhuthtui ji mù, mauhkûng mai lé lo é gá é gi*, Danielaq 7:14 má bò lhê. ^c 14:68 *Chyúmding ra-am má Haú hkûn jáng, woq tûn bê nghut ri* gá é le bo ri.

Pilat Hí Má Yesuq Jé Nyi É Hkyô

*Mht 27:1-2, 11-26; Luk 23:1-5,
13-25; Yhn 18:28-19:16*

- 15** Haû napkyó noq za má, hkyangjong agyi pé gi, suwún wuî, tarâ sará pé, Yudaq byìn tú wapdoq gón bang eq rahá kut, chôm bóng yû kômù, Yesuq lé tuí yû luí, shuí htoq ê kômù, mauzau Pilat chyáng ê ap byî akô nghut ri.
- ² Pilat gi, Yesuq lé, “Nàng gi, Yudaq byu pê é hkohkâm nghut lhê lú?” ga myi jáng, Yesuq gi, “Nàng taí é eq rajung za nghut lhê.” ga, tú taí ri.
- ³ Haû hkyangjong agyi pé gi, Yhang lé mara gyai myo shoq chôm hun akô.
- ⁴ Haû mù, Pilat gi, Yesuq lé, “Wú aq, yhangmoq, nàng lé mara haû myhó hun nyi le, nàng, haí le a tú taí lú?” ga myí ri.
- ⁵ Nghut kôlhang, Yesuq gi, haí le a tú taí kut jáng, Pilat gi, maú byuq bê nghut ri.
- ⁶ Haû Lhoqlhai Poí u lé, mingbyû wui dúng é htóng byû rayuq yuq lé, mauzau mai lhaq lhoq htoq byi byi kut é
- ⁷ htûng joq ri. Haû hkûn, Barabaq gâ é byû rayuq gi, gumlau gabyông é hkûn, byû sat é gumlau bang eq rahá, htóng
- ⁸ gyô tô ri. Byû hpûng mó gi, doq lé lô mù, mauzau Pilat lé, yhang lhaq kut é eq rajung za, yhangmoq lé kut byi râ matú, dúng akô.
- ⁹ Haû mù, yhang gi, “Yudaq byu pê é hkohkâm lé nhang htoq kat byi râ lé, nungmoq ô nau akô lú?” ga myí ri.
- ¹⁰ Pilat, haû su ga myí é gi, haû hkyangjong agyi pé, Yesuq lé manôn kôluí, yhâng chyáng lé ap byi kô é hkyô
- ¹¹ lé sê é yanmai nghut ri. Nghut kôlhang, haû hkyangjong agyi pé gi, Barabaq lé sheq nhâng byi râ matú, Pilat chyáng dung kó sháng gaq ga,

haû byû moq mó lé i-myyit lhoq toq byí akô.

- ¹² Pilat gi, “Haû jáng, nungmoq mai Yudaq byu pê é hkohkâm ga sù yuq lé, ngò hkâsu kut râ lú?” ga yhangmoq lé myí ri.
- ¹³ Haû hkûn, yhangmoq gi, “Yhang lé tapzîng má jén sat pyám aq.” ga chôm garu akô.
- ¹⁴ Haû jáng, Pilat gi, “Haí mù luí lú? Yhang haí kut shut bê lú?” ga dum myi jáng, yhangmoq gi, htê mó èq, “Yhang lé tapzîng má jén sat pyám aq.” ga je riyhang garú lo bum akô nghut ri.
- ¹⁵ Pilat gi, haû byû moq mó lé nhik dik nhâng nau é yanmai, Barabaq lé gi, nhang kat byi mù, Yesuq lé gi, nhuq bat nhâng mù, tapzîng má jén sat pyám râ matú, ap byí kat bê nghut ri.

Gyezô Pé Gi, Yesuq Lé Rhoi É Hkyô

Mht 27:27-30; Yhn 19:2, 3

- ¹⁶ Gyezô pé gi, Yesuq lé, Pretori yhumwàng (mauzau hpó é yhumwàng) mó hkaû má shuí wang ló kômù, gyedap
- ¹⁷ gón lé ji tsîng yu akô. Hau htâng, yhangmoq gi, Yesuq lé buhîng nè radung hut byi mù, zujanmaú saí yù kôluí, Yhâng é ulhum má tsung byí
- ¹⁸ akô. Hau htâng, yhangmoq gi, “Yudaq byu pê é hkohkâm hpó ê! Chyung hîng xê hing nyi sháng gaq ô!” ga wut
- ¹⁹ garú akô. Hau htoq agó, yhangmoq gi, Yhâng é ulhum má dumbáng èq adàm dàm bat kômù, sôkan byé gyun luí, Yhâng hí má hkyihput htuq mù,
- ²⁰ paí mhaû akô nghut ri. Yhangmoq gi, Yhang lé rhoi jihkyoî ban kut yû kôjáng, Yhang wut tô é buhîng nè lé hkyut yû kômù, Yhâng é mebu lé dum hut byi luí, tapzîng má jén sat pyám râ matú, Yhang lé shuí htoq e ló bekô nghut ri.

Yesuq Lé Jén Pyâm É Hkyô

Mht 27:31-44; Luk 23:27-43; Yhn 19:17-27

- ²¹ Alesander eq Ruhpu nhiktang é yhangwa, Kuruni myuq byû nghut é Simun ga sù gi, yosô wà mai lò mù, haú jowò mai laí lò ri. Haú hkûn, gyezô pé gi, yhang lé, tapzîng waq nhang akô nghut ri. Yhangmoq gi, Yesuq lé, Golgahta gâ é jowò má shuí e akô (Golgahta gâ é gi, ugyap joq é jowò lé gâ é nghut ri). Hau htâng, yhangmoq gi, Yhang lé, mura^a eq nyhô tô é tsibiyiq wing huq akô; nghut kôlhang, Yhang gi, a lhom shuq byi nghut ri. Hau htâng má, yhangmoq gi, Yhang lé tapzîng má jén tap to kôluí, Yhâng é mebu pé lé, hkyîn shosé shê mù, âng é dông gam yu pyám byí akô nghut ri.
- ²⁵ Yhangmoq, Yesuq lé tapzîng má jén tap pyâm é hkûn gi, napkyó gau hkyíng nghut bê nghut ri. Hau htoq agó, Yhang lé mara hun é dông kê tap to kô é gi, “YUDAQ BYU PÊ É HKOHKÂM” gâ ri. Yhangmoq gi, damyaq í yuq lé le, Yhâng é loqyo hkyam shut rayuq, loqpaí hkyam shut rayuq kut, tapzîng htoq má jén tap tô akô nghut ri. (Haú gi, “Yhang gi, yubak dap bâng chyáng nghap lhôm é hui bê nghut ri.”^b gâ é Chyúm-dang lé lhoq dik é nghut ri.)^c Hkyô sô laí lò é bang gi, nyhap é dông u-ngut ngut mù, taí kô é gi, “Noqkuq yhûm lé hpoyq pyám luí, sum nyí gyoro má dum wó saí lhê ga Sù ê! Náng gùng nàng hkyi yù luí, tapzîng mai gyó lò wú aq mhaí!” ga akô nghut ri.
- ³¹ Haú eq rajung za, hkyangjong agyi pé eq tarâ sará pé le, yhangmoq hkaú má, “Shí yuq gi, góbang lé hkyi yù sù

nghut kôlhang, Yhânggùng yhang gi, a wó hkyi yù nghut ri myhi-nhung!³² Nga-nhúng wó myâng mù, lumjîng râ matú, shí, Israelaq byu pé é hkohkâm, Hkrisduq gi, tapzîng mai gyó lo wú sháng gaq.” ga, Yhang lé rhoí dang taí akô. Yhang eq rahá tapzîng má jén tap to huí é su nhik le, Yhang lé rhoí dang taí akô nghut ri.

Yesuq, Shi É Hkyô

Mht 27:45-56; Luk 23:44-49; Yhn 19:28-30

- ³³ Nyí-káng raxe í hkyíng mai myinhtâng sum hkyíng jé shoq, ramau gón mauchut tuq dut byuq bê nghut ri.
- ³⁴ Myinhtâng sum hkyíng jé é hkûn, Yesuq gi, “Eloi, Eloi, lama sabakhtani.”^d ga, htê mó èq garú kat ri. Haú é lichyúm gi, “Ngá Garai ê, Ngá Garai ê, Nàng, haí mù, Ngo lé tô pyâm tô lhê lhú?” gâ é nghut ri.
- ³⁵ Haú nâm má yap tô é bang ra-am gi, haú lé wó gyo kôjáng, “Gyô wú keq. Yhang gi, myiqhtoi Eliyaq lé wut nyi ri.” ga, taí akô.
- ³⁶ Haú hkûn, byù rayuq gi, din e lò mù, wuimaù lé tsibiyiq wing chyîn má jum yù luí, jàm-yang má tuí tap mù, Yesuq shuq sháng ga yhun byi luí, “Eliyaq gi, lé lò mù, Yhang lé lé lhoq hkyô yù abe, nga-nhúng chôm láng wú sháng.” ga taí ri.
- ³⁷ Yesuq gi, htê mó èq garú kat luí, kâng byit byuq bê nghut ri.
- ³⁸ Noqkuq yhûm mâ é pán-gyang gi, ahtoq mai a-ô í hkyam byáng dut byuq bê nghut ri. Yesuq é hí má yap tô é shô up gyezau hpó gi, Yesuq é garu htê lé wó gyo mù, Yhang hkâsu kut shi é lé myàng jáng, “Shí yuq gi, gè gè yhang, Garai Gasâng é Yhangzo nghut ri-nhung!” ga taí ri.

^a 15:23 Mura gi, chi wó kut jung xù nghut lhê. chyúmding axau ra-am pé má za bo é nghut lhê.

^b 15:28 Esai 53:12 ^c 15:28 Bun zo shí gi,

^d 15:34 Hkya-on 22:1

⁴⁰ Myiwe wuì ra-am gi, we we mai wú nyi bum akô. Haú bang má, Magadalaq wà mà é Mariq, Yakuq tiq sù yuq eq Yose nhiktang é yhangnu Mariq eq Salome pé le bo akô nghut ri.

⁴¹ Haú bang sum yuq gi, Galile mau má, Yesuq htâng cháng mù, Yhâng rà é hkyô pé lé châng kut byî é bang nghut akô. Yesuq eq rahá, Yerusalem wà mó má doq lé lo é myiwe wuì, góbang myo myo le haú má nyi tô bum akô nghut ri.

Yesuq Lé, Myhup Pyâm É Hkyô

Mht 27:57-61; Luk 23:50-56; Yhn 19:38-42

⁴² Haú nyí gi, Hên Lajang Buinyì (Bánno buinyì é hí nyí) nghut ri. Haú

⁴³ mù, myinhâng jé lô jáng, Yudaq uphâng hpúng má bo é, aróng wó é, Garai Gasâng é mingdán lé láng nyi é sù, Aramahti wà byù Yosep gi, myit wum lhoq kîng yù mù, Pilat chyáng wàng

⁴⁴ luí, Yesuq é gungsôm lé ê dîng ri. Pilat gi, Yesuq shí bê gâ é hkyô lé wó gyo jáng, maú byuq ri; haú mù, yhang gi, shô up gyezau lé wut yù mù, Yesuq shí

⁴⁵ teng bê lúhú ga myí ri. Shí teng bê hkyô lé, shô up gyezaú chyáng mai wó sê yù jáng, Pilat gi, Yesuq é gungsôm lé

⁴⁶ yù rà ahkáng, Yosep lé byi kat ri. Haú mù, Yosep gi, pán yúng lé wui yù luí, gungsôm lé yu hkyô mù, htup yup luí, luqgok lé kyûng tô é lup hkaú má ê kat tô ri. Hau htâng, yhang gi, luphkum má, luqlông èq lhêng chí pyâm tô ri.

⁴⁷ Magadalaq wà mà é Mariq eq Yose é yhangnu Mariq gi, Yesuq lé, hkámá lheq tô é lé, ê myang akô nghut ri.

Dum Dui Toq Lo É Hkyô

Mht 28:1-8; Luk 24:1-12; Yhn 20:1-10

16 Bánno buinyì lai jáng, Magadalaq wà mà é Mariq, Yakuq é yhangnu Mariq eq Salome pé gi,

Yesuq é gùng má, ê but byi rà matú

² namngón jung é wui akô. Bánno buinyì htang napkyó bui htoq lo é hkûn yhang, yhangmoq gi, lup shut e ló

³ akô. Yhangmoq gi, “Luphkum mà é luqgok lé, ó yuq chyûn lhêng pyâm byi rà lúhú?” ga, rayuq eq rayuq taí lhum akô.

⁴ Nghut kôlhâng, yhangmoq tu wú kat kô é hkûn, luqlong haú gi, lhoq lhêng to láng é lé, myàng akô nghut ri; luqlong haú gi, gyai kô é nghut lhê.

⁵ Yhangmoq gi, lup hkaú má wang é kô é hkûn, hpyu é buhîng wut é zorâm rayuq, loqyo hkyam má zung tô é lé, myàng kôjáng, gyuq dan bum akô.

⁶ Haú hkûn, haú yuq gi, “Hkâgyuq dàn kó! Nungmoq gi, haú tapzîng má jén sat huí é, Nazaret wà byù Yesuq lé ho akô, a nghut lúhú? Yhang dui toq ló bê! Yhang gi, shí má a nyi lo. Yhang lé,

⁷ lheq tô é jowò lé wú wú keq. Ahkuí, nungmoq gi, ló mù, ‘Yesuq gi, nungmoq hí má, Galile mau shut so láng rà nghut lhê. Nungmoq lé, Yhang taí tô é eq rajung za, nungmoq gi, Yhang lé haú má ló myâng kó rà nghut lhê.’ nghû, Yhâng é chángzô pé eq Petruq lé ló taí kyo keq.” ga lhom taí kat ri.

⁸ Haú mù, myiwe myhí haú bang gi, byòdàn gyuq nán é eq, lup mai hfang htoq ló akô; yhangmoq gi, lûm gyuq byuq kô é yanmai, ó yuq lé lé, haí le a taí kó nghut ri.

(Bun zo 9 mai 20 jé shoq gi, chyúmding axau ra-am pé má a bo é nghut lhê.)

Yesuq Htoq Shit É Hkyô

Mht 28:9-10, 16-20; Luk 24:13-53; Yhn 20:11-23; Lagyo 1:6-11

⁹ Yesuq gi, Bánno buinyì htang nap-sûn lé, Yhang dui toq é htâng, Yhang mai nat gang nyhit du hkat htoq pyâm

- byi bê sù, Magadalaq wà mà é Mariq
- ¹⁰ lé hí htoq shit ri. Mariq haù gi, ló mù, haù Yesuq eq nyi laí lò bê bang, yón ngau nyì kô é hkûn, haù hkyô lé ló
- ¹¹ taí kyô ri. Yhangmoq gi, Yesuq dum duì bê gâ é hkyô lé le, Yhang lé, Mariq myang é gâ é hkyô lé le, wó gyo kôlhang, a jíng kó nghut ri.
- ¹² Hau htâng má, Yesuq gi, yosô wà shut htoq e ló nyi é chángzo í yuq lé, gotû gunghkyâng dong htoq shit ri.
- ¹³ Haù nhik gi, taù lò mù, gotû chángzô pé lé haù hkyô lò shit kyo akô; nghut kôlhang, yhangmoq gi, haù lé le a jíng byi kó nghut ri.
- ¹⁴ Hau htâng má, Yesuq gi, haù chángzo raxe rayuq baù za zang zô nyì kô é hkûn, yhangmoq chyáng lé htoq shit ri. Yhangmoq chyáng lumjínng myit a bò kô é yanmai le, Yhang dui toq é htâng má, Yhang lé myang é bang taí kyo kô é dang lé, a jíng é za myit htan to kô é yanmai le, Yhang gi, yhangmoq lé tân ri.
- ¹⁵ Hau htoq agó, Yesuq gi, yhangmoq lé, “Mingkan jàm shoq htoq ê mù, waxâng zo wuí lhungháng lé, haù
- ¹⁶ gabú danglù hko kyo keq. Lumjínng mù, wui-myhup hkâm yu é sù ó yuq nghut kôle, hkyi yu é hui râ nghut lhê. Nghut kôlhang, a lumjínng é sù ó yuq nghut kôle, mara byí é hui râ nghut
- ¹⁷ lhê. Lumjínng é bang wó kut shit râ kumlhá pé gi, Ngá é myíng lé lang luí, nat gâng pé lé wó hkat htoq kó râ eq laklaí é myíng pé lé dat nyò kó
- ¹⁸ râ nghut lhê; yhangmoq gi, lhangmuì pé lé le, wó kui zui kó râ nghut lhê; muí shi jung duq lé, shuq kôlhang, haí dut kó râ a nghut. Nò bâng é htoq má, yhangmoq é loq ke byi jáng, nò bang ge byuq kó râ nghut lhê.” ga taí ri.
- ¹⁹ Haù Yhumsíng Yesuq gi, yhangmoq lé dang ban taí é htâng má, mauhkûng shut shuí toq yu é hui luí, Garai Gasâng é loqyo hkyam má zung to
- ²⁰ bê nghut ri. Hau htâng, haù chángzô pé gi, htoq ê mù, jowò hkangmó má mungdang ê hko kyô akô nghut ri; haù Yhumsíng gi, yhangmoq eq rahá nghut nyí mù luí, Yhâng é mungdang têng é hkyô lé tân shit râ matú, yhangmoq lé, kumlhá pé wó kut é a-tsam byí é nghut ri. Amen.

LUKAQ

é Gabú Danglù Laiká

(The Gospel of Luke)

1 Aróng wó dik é sù Htohpilúq ê, ngamoq chyáng dut lai lò bê hkyô pé lé, sâng-hi mai yhumsing myoq èq yhang, myang é bang eq, mungdang wùn waq é bang mai shap kyô gyó lò ² mù luí, byù myo myo gi, shikut luí ³⁻⁴ kâ to bekô nghut ri. Ngò le haú pé banshoq lé awang mai ahpyo hpyot jihkúm nuququq ho myí yù luí, nàng wó sê yu to bê hkyô pé gi, je lhoq gîng é dut sháng gaq nghú, náng é matú banshoq tok za kâ kat byi râ lé, ngò wó myit ri.

Wui-myhup Sará Yohan Hku Lé Lô Râ Gâ É Hkyô

⁵ Yuda mau má Herut hkohkâm up é u lé, Abiyaq hkyangjong hpúng má Zahkariq ga sù hkyangjong rayuq nyi ri. Yhang myi gi, Arun amyú mâ ⁶ é, Elizabet ga sù nghut ri. Haú nhik gi, Yhumsîng Garaî é jep é tarâ eq htûngtarâ banshoq lé, rago za cháng mù, Garai Gasâng é hí má dingmán ⁷ é su nhik nghut akô. Nghut kôlhâng, Elizabet gi, baùdung dung sù nghut é yanmai, yháng nhâm gi, zo dù a dap kó. Yhangnhik gi, asak ipyat le ko bekô nghut ri.

⁸ Ahkuí, Zahkariq gi, dum lhing hkyuq lo é hkyangjong mù lé, yhâng é hpúng eq rahá, Garai Gasâng é hí ⁹ má lé zui le, haú Yhumsing é noququq yhûm ahkaú má namngón hkungga é wang nyhé râ matú, hká yuq nghut râ lé hkyangjông pê é htûngli eq rajung za byù hkyín shosé she wú é ¹⁰ hkûn, yhâng chyáng âng ri. Haú mù yhang namngón hkungga lé nyhé é u

lé, shiwa byù banshoq gi, yhumpán má, kyûdung nyi akô.

¹¹ Haú hkûn, Yhumsîng Garaî é mau-mang lagyo gi, namngón jung nyhé é hkungga gyap é loqyo hkyam má, Za-
¹² hkariq lé, lé yap shit ri. Zahkariq gi, maumang lagyo haú lé myàng jáng,
¹³ dan gyuq nyi ri. Nghut kôlhâng, mau-mang lagyo gi, “Zahkariq ê, hkâgyuq, náng é kyûdung dang lé Garai Gasang gyo byi bê. Haú mù luí, náng é yhum-sîng myhí Elizabet gi, náng é matú yuqzo rayuq bau byi berâ nghut lhê; nàng gi, yhang lé Yohan nghú myhíng
¹⁴ byi ra râ nghut lhê. Yhang gi, náng é matú gabú hpo eq nguingón é hkyô dut berâ nghut lhê. Yhang lé baú lo é yanmai, byù myo myo le gabú lo bùm
¹⁵ berâ nghut lhê. Hkâsu mù gâ le, yhang gi, haú Yhumsîng Garaî é hí má ahko ahkáng wó mù luí, byù mó dut râ sù nghut lhê. Yhang gi, tsibiyiq wing eq îhpe lé ge shuq râ sù a nghut; yhâng nû é unghkaú mai yhang, Chyoiyung Woi-nyí èq byíng nyí râ sù nghut lhê.
¹⁶ Yhang gi, Israelaq yhangzo yhangshù pé myo myo lé, Yhumsîng yhangmoq é Garai Gasâng chyáng lhing lò nhâng râ sù nghut lhê. Íwâ pê é myit nhik-lhum lé gi, zô wui shut, nyo é a gyo bang lé gi, dingmán bâng é hpaq-chyí hkyô shut lhing lò nhâng luí, haú Yhumsîng jé lé râ matú hen tô é byù myú dut nhâng râ matú, Yohan gi, Eli-yaq é woi-nyí wum-o wó é eq, Yhum-sing é hí má e lo râ nghut lhê.” ga luí, yhang lé tai ri.
¹⁸ Haú hkûn, Zahkariq gi, “Haú hkyô lé ngò hkâsu kut wó sé râ lú? Ngò le

mang byuq bê, ngâ é yhumsîng myhí le asak ipyat ko bê.” ga luí, maumang lagyo lé tâ taí ri.

- ¹⁹ Maumang lagyo haú gi, “Ngò gi, Garai Gasang eq rahá nyi é sù Gabrielaq nghut lhê. Nang lé gabú danglù shí tâ kyo aq ga luí, Yhang, ngo lé nhang kat
- ²⁰ é nghut lhê. Ahkyíng jé jáng, ngá dang gi, gè gè dut lò râ nghut lhê. Dang shí pé lé nàng a lumjíng é yanmai, mù haú dut lo é buinyì jé shoq, nàng gi, nhut jit byuq râ nghut lhê.” ga luí, yhang lé tâ taí ri.
- ²¹ Haú u, shiwa byu pé gi, Zahkariq noqkuq yhûm ahkaú má haú-í myáng shoq lúng byuq é hkyô lé láng maú nyi
- ²² akô. Zahkariq dum htoq lo le, dang a wó nyo byuq mù shiwa byu pé lé loq lik za lik shit nyi ri. Haú mù luí, yhangmoq gi, noqkuq yhûm ahkaú má yhang myoqwup shing-rán rajung jung myàng ang bê lé, wú sê yu akô nghut ri.
- ²³ Ahkuí, Zahkariq gi, hkyangjong jong âng é buinyì ngap jáng, yhûm
- ²⁴ shut dum taú ló byuq bê. Hau htàng má, yhâng é yhumsîng myhí Elizabet gi, zogûng dut lò mù luí, hká le a htoq e za lhamó ngo hkyap yhúmhaú
- ²⁵ má lúng byuq ri. Haú hkûn, yhang gi, “Byu pé hí má ngò hui zô é hoq hpu hkyô lé, Garai Gasang gi, myàng byi luí, shí su dut nhang é dõng mai huí sêng pyám byí é buinyì má, Yhang ge é hkyô lé, ngo lé tân shit bê nghut ri.” ga taí ri.

Yesuq Hku Lé Lô Berâ Gâ É Hkyô

- ²⁶ Ahkuí, Elizabet zogûng dut é lhamó hkyuq hkyap jé jáng, Garai Gasang gi, maumang lagyo Gabrielaq lé Galile mau, Nazaret wà má nyi é, zo-

myi gyíng rayuq chyáng nhang kat ri.

- ²⁷ Zomyi hau é myìng gi, Mariq gâ ri; yhang gi, Dawiq amyû mâ é Yosep gá
- ²⁸ su èq dîng tô é zomyi nghut ri. Mau-mang haú gi, Mariq chyáng jé jáng, “Mariq ê, nguínón nyí sháng gaq; Nàng, hkungsô wó nyi ri; Haú Yhum-sîng Garai gi, nàng eq rahá nyi nyi ri ò!” ga taí ri.
- ²⁹ Mariq gi, dang haú lé gyo sing nán mù, shí su gâ é dang gi, haí jung gá naú é nghut lhê lhú ga luí, myit maú
- ³⁰ nyi ri. Haú hkûn, haú maumang lagyo gi, “Mariq ê, hkâgyuq, nàng gi, Garai Gasâng é hí má myoqdong wó
- ³¹ bê nghut ri. Wú aq, nàng zogûng dut lò mù luí, yuqzo rayuq bau râ nghut lhê. Yhâng é myìng lé gi, ‘Yesuq’ nghû luí, nàng myhíng byi ra râ nghut
- ³² lhê. Yhang gi, hpung bô sù dut râ nghut mù, Myhang htáng htúm Su é Yhangzo gâ é hui râ nghut lhê. Yhum-sîng Garai Gasang gi, yhang lé, yhâng é íchyí îwa Dawiq é hkohkâm tang-
- ³³ hkuq lé, byi râ nghut mù luí, Yhang gi, Yakup yhûm^a lé hkâ-nhám le ru-up nyi râ nghut lhê. Yhâng é mingdán le htum nghu é joq râ a nghut.” ga luí, yhang lé tâ ri.
- ³⁴ Haú hkûn, Mariq gi, “Ngò gi, zomyi gyíng ru nghut ashí, haú gi, hkâsu wó dut râ lhú?” ga luí, maumang lagyo lé tâ taí ri.
- ³⁵ Haú maumang lagyo gi, “Chyoi-yúng Woi-nyí náng é ahtoq má jé lé mù, Myhang htáng htúm Su é wum-o a-tsam gi, nàng lé shum gum to byi luí, haú baú lò râ Chyoiyúng sù le gi, Garai Gasâng é Yhangzo ga kó râ
- ³⁶ nghut lhê. Hau htoq agó, wú aq, náng é amyû suisho baùdung myhí Elizabet lháng, mang bê le yuqgè zo wun to

^a 1:33 Yakup yhûm nghu e gi, Israelaq amyû lé gâ lhê.

bê. Ahkuî, zogûng dut é lhamó hkyuq
 37 hkyap wàng bê nghut ri. Hkâsu mù gà
 le, Garai Gasang a wó kut é haî le a
 joq.” ga luî, yhang lé tâ taî ri.

38 Haú hkûn, Mariq gi, “Yhumsing é
 jùnmyhí ngò nghut nyi lhê; náng é
 dang eq rajung za ngá chyáng dut lò
 sháng gaq.” ga tâ taî ri. Hau htâng,
 maumang lagyo gi, yhâng chyáng mai
 lô byuq bê.

Elizabeth Lé Mariq Ê Huî É Hkyô

39 Hau htâng hkâ-í a myáng má, Ma-
 riq gi, Yuda mau bum mau mâ é wà
 40 rawà shut hân hân e lô luî, Zakhariq
 é yhûm má wàng mù, Elizabeth eq huî
 41 nyo lhûm ri. Mariq é danghtê lé Eli-
 zabet wó gyo jáng, yhâng é unghkaû
 mâ é zoshâng gi, byam chyû lo ri.
 42 Elizabeth le, Chyoiyúng Woi-nyí byíng
 to mù luî, Mariq lé htê mó èq tâi
 é gi, “Myiwe banshoq má, nàng gi,
 hkungsô wó dik sù nghut ri. Náng é
 unghkaû mâ é zoshâng le hkungsô wó
 43 nyi ri ô! Ngá Yhumsing é yhângnu ngá
 chyáng jé lé é jeju gi, hai é yanmai
 44 nghut bê lú? Wú aq, náng danghtê
 lé wó gyo kat jáng, ngá unghkaû mâ é
 zoshâng gi, gabú luî byam chyû nyi ri.
 45 Haú Yhumsîng taî é dang gi, gè gè dik
 lò râ nghut lhê ga luî, lumjîng é myiwe
 gi, hkungsô wó nyi ri.” gà ri.

Mariq É Hkya-on Dang

46 Haú hkûn, Mariq gi,
 “Ngá é i-myt mai haú Yhumsîng
 lé hkya-on nyi lhê,
 47 ngá é woi-nyí le, Garai Gasang
 ngá é hkyi yù Sù má gabú nyi
 lhê.
 48 Ngò Yhâng é jùnmyhí myit
 nyhum nyi é lé, Yhang myàng
 byi bê nghut ri.

Wú aq, ahkuî mai ipyat dedu má,
 ngo lé gi, hkungsô wó nyí sù,
 gà nyi bekô râ nghut lhê.

49 hkâsu mù gà le, Wum-o Bo Dik
 é Garai Gasang gi, ngo lé
 mauhpo mù mó kut byi bê
 nghut ri,

Yhâng é myîng gi, chyoiyúng nyi
 ri ô.

50 Yhang lé gyuq hoq nyí bâng
 é ahtoq má, Yhang shogyo
 nhikmyîn é hkyô gi,
 pyat bán hkangmó jé shoq
 hkâ-nhám le joq nyi râ nghut
 lhê.

51 Yhâng é wum-o bo é loq èq
 mauhpo mù mó pé lé tân shit
 bê.

Yhumsîng myit é hkyô má
 nghutbûn nyi é bang lé, Yhang
 lhoq pyo pyám bê.

52 Zaugun suwún wú lé gi, zau
 zûng tanghkuq mai lhoq hkyô
 pyám mù,
 i-myt nyhûm bang lé gi, lhoq
 myhâng bê nghut ri.

53 Zòmút hui bang lé gi, ge é zoshuq
 gyi shoq byi tso mù,
 sutzè wó bang lé gi, akôm nhang
 kat bê nghut ri.

54-
 55 Nga-nhûng é îchyí îwâ pé lé taî tô
 é dang eq rajung za, Abraham
 eq yhangzo yhangshu pé lé,
 hkâ-nhám le shogyo nhikmyîn
 nyi râ gà e lé myit bûn nyi é
 yanmai,
 Yhâng é dui-nhâng zoshâng
 Israelaq byu pé lé hku baú nyi
 ri.”

ga luî, tâ ri.

56 Mariq gi, Elizabeth chyáng lhamó
 sum hkyap kô nyi mù luî, yhûm shut
 dum taû lò byuq bê.

Wui-myhup Sará Yohan Baú É Hkyô

- 57 Hau htâng, Elizabet gi, zoshâng bau râ buinyì jé mù, yuqgè zo bau bê.
- 58 Yhang lé haú-í kô é jeju Yhumsîng tûn shit é hkyô lé, yhâng é yhumkyo bui-nùm wuì eq mung moq gumang wuì wó gyo kojáng, yhang eq rahá gabú nyi akô.
- 59 Ahkuí shit nyí jé jáng, yhangmoq gi, zoshâng haú lé ahpyo-kuq hpyit byi râ matú lé kôluí, yhâng wâ é myîng eq rajung za, Zahkariq ga
- 60 myhíng byi râ dâ akô. Nghut kôlhang, yhâng nu gi, “A nghut, Yohan nghû sheq myhíng râ nghut lhê.” ga tû taí ri.
- 61 Yhangmoq gi, “Náng é amyû sui-sho má le, haú su gâ é myîng rayuq le a bo wú shi.” ga luí, yhang lé taí akô.
- 62 Haú hkûn, zoshâng haú lé hkâsu nghû myhíng nau lhê laq ga, yhâng
- 63 wa lé loq lik lik shit mù myí akô. Zahkariq gi, kê jung longpá dúng yù mù, “Yhâng é myîng gi, Yohan nghut lhê.” ga kê shit ri. Haú mù, lhunglhâng
- 64 bang gi, maú byuq bum akô. Haú hkûn jáng, Zahkariq gi, nhut hkum bóng lô mù, dang wó nyô lui, Garai Gasang lé hkyá-ôn nyi ri. Haú
- 65 su dut é hkyô lé, wó gyô é awui ayàm lhînghkyuq mâ é lhunglhâng bang gi, gyuq maú byuq bùm kômù, Yuda mau bum mau ramau gón taí
- 66 pyo ló bum akô. Wó gyô é lhunglhâng bang gi, haú hkyô lé yhum-sing é i-myt unghkaú má kat to mù, “Zoshâng shí gi, hkâsu dut lò râ sù nghut lhê lhú?” ga myit wú nyi akô. Haí mù gâ le, haú Yhumsing é loq gi, yhang eq rahá nghut nyi é yanmai nghut ri.

Zahkariq É Myiqhtoi Dang

- 67 Haú hkûn, zôshang é yhângwa Zahkariq gi, Chyoiyúng Woi-nyí byíng lô mù, myiqhtoi dang dong taí é gi,
- 68 “Haú Yhumsîng, Israelaq é Garai Gasang lé hkyá-on sháng ô! Haí mù gâ le, Yhang gi, Yhâng é amyû lé, lé kûm wú mù luí, lé hkyi yù bê nghut ri.
- 69 Garai Gasang gi, Yhâng é dui-nhâng zoshâng, Dawiq é amyû mai nga-nhûng é matú wum-o bo é hkyi yu é hkyuí^a lé, yuq htoq lô nhâng bê.
- 70 Shí hkyô gi, a-nham pyat mai yhâng é chyoiyúng myiqhtoi pê é nhut mai taí tô é eq rajung za nghut ri.
- 71 Haú hkyuí gi, nga-nhúng lé nga-nhúng é gye pê chyáng mai le, a nguì a naù bang banshoq é loq mai le, hkyi yù râ nghut lhê.
- 72 Íwa Garai gi, nga-nhúng é íchyí íwa pé lé shogyo nhikmyin hkyô lé tûn shit râ matú, Yhang byí tô é chyoiyúng dangshikaq lé a tô-myhí nghut ri.
- 73 Haú gi, nga-nhúng é chyiké Abraham lé byi tô é danggidiq nghut lhê.
- 74-75 Nga-nhúng lé gye pê loq mai hkyi yù râ eq, nga-nhúng asak dui tô é buinyì banshoq má, Yhâng é hí má a gyuq a kyum é za, chyoiyúng é eq dîngmán é hkyô mai, Yhang lé wó dojaú nyí nhâng râ matú, Yhang jé lé é nghut lhê.
- 76 Ngá zo ê, nàng gi, Yhumsing é hí má, e ló mù luí, Yhâng é hkyô

^a 1:69 Hkyi yu é hkyuí gi, Yhumsîng Yesuq lé taí é nghut ri.

- lé hen lajang byi râ sù nghut é yanmai,
nang lé Myhang htáng htúm Su é myiqhtoi ga kó râ nghut lhê.
- 77 Nàng gi, Garai Gasâng é byu pé lé, yhangmoq é yubak mara hkyut pyám byî é dong, hkyi yu é hui râ hkyô lé taí kyo râ sù nghut lhê.
- 78 Haí mù gâ le, Garai Gasâng é shogyo nhikmyin é yanmai, napsún bui^a gi, mauhkûng mai nga-nhúng chyáng htoq lé lô râ nghut lhê.
- 79 Yhang gi, mauchut hkaû^b eq shí wup hkaû má lúng to bang lé builoq su duqbó byi râ eq, nga-nhúng lé nguingón simsaq é hkyô shut shuí e lô râ sù nghut lhê.
- 80 Zoshâng haú gi, kô lò mù, woi-nyí wum-o bo lò luí, Israelaq byu pé chyáng htoq shit lo é buinyì jé shoq, yoso pé má nyi nyi ri.

**Betlehem Wà Mó Má
Yesuq Hku Lo É Hkyô**

Mht 1:18-25

- 2** Buinyì haú pé má, Romaq hkoséng ming banshoq mâ é byù lhunglhâng bang gi, myìng jihpán kat râ matú, hkoséng Kehtaq Augustuq² chyáng mai mungdang htoq ri. Jihpán haú lé sâng-hi dàm guq hi é gi, Kuireni ga sù Suriq mau má mauzau kut nyi é³ hkûn nghut ri. Haú hkûn, byù du jup gi, myìng jihpán kat râ matú, ó le ô é wà shut ló bum akô.
- 4 Haú mù, Yosep le Dawiq é awut ashín nghut é yanmai, Galile mau Nazaret wà mai, Yuda mau mâ é Betle-

- 5 hem gâ é Dawiq é wà shut, yhang dúng tô é myiwe Mariq eq rahá myìng kat lhóm râ matú jé doq ló akô; Mariq kúm gi, gungloq laí to bê nghut ri.
- 6 Haú Betlehem má nyi tô ashí le, Mariq gi, zo hkû râ buinyì jé mù, zo mún yuqzo lé bau bê. Yhang gi, zoshâng haú lé panchoq èq htup mù no tso langhkang má lheq tô ri; haí mù gâ le, bíng yhúm má yhangmoq nyì râ jowò a joq lo é yanmai nghut ri.

**Sau Zúng Bang Yesuq
Chyáng Jé Lé É Hkyô**

- 8 Ahkuí, haú ginwáng mâ é sau zúng zo bang gi, sau zúng jang má yhangmoq é sau hpúng lé, myín lé zúng nyi⁹ akô. Haú hkûn, Yhumsîng é maumang lagyo gi, yhangmoq é hí má lé htoq yap shit to mù, Yhumsing é hpungwup shingkang gi, awui ayàm má duqbang lò luí, yhangmoq gyai gyuq bum akô.
- 10 Maumang lagyo gi, “Hkâgyuq kó, byù lhunglhâng bâng é matú, gyai yhang gabú é danglù, ngò nungmoq chyáng¹¹ wun lé lo lhê. Hkû-nyí lhê buinyì má, Hkrisduq^c nghu é Yhumsîng nghut é hkyi yù Sù gi, Dawiq é wà má nungmoq é matú hku to bê. Nungmoq é matú kumlhá gi, zoshâng nyheqnú rayuq panchoq èq htup mù, no tso langhkang má lheq to lánq ra nghut lhê.” ga luí, yhangmoq lé taí ri.
- 13 Haú hkûn jáng yhang, mauhkûng bang rajùm rayò htoq lô mù, maumang lagyo haú eq rahá Garai Gasang lé hkya-ôn é dang gi,
- 14 “Htoq tsáng myhâng má, Garai Gasang gi, hpungwup shingkang bo nyì sháng gaq ô!

^a 1:78 *Napsún bui* gâ é gi, Yesuq lé taí é nghut lhê. ^b 1:79 *Mauchut hkaû* gâ é gi, Garai lé a sé mù woi-nyí má shi tô é bang lé gâ lhê. ^c 2:11 Grik dong *Hkrisduq* gâ é gi, xú but hui Sù gâ é lichyúm nghut mù, Hebre dong “Mesaia” gâ é eq rajung za nghut lhê.

Myigùng htoq má le, Yhang ô
nau é byu pé má, nguingón é
gi, hkâ-nhám le joq nyí sháng
gaq ô!”

gâ akô.

- ¹⁵ Maumang lagyô pé, yhangmoq chyáng mai, mauhkûng shut dum ló byuq jáng, sau zúng bang gi, “Sà! Betlehem wà mó má jé shoq yhang, nga-nhúng ê mù, ahkuí za Yhumsing nga-nhúng lé lé shit kyô laí ló bê hkyô lé ê gôn wú sháng.” ga luí, rayuq eq rayuq taí lhúm akô.
- ¹⁶ Hau htâng, yhangmoq gi, hân hân ê luí, Mariq eq Yosep lé le, no tso langhkang má lheq tô é zoshâng nyheqnú
- ¹⁷ lé le, ê myàng akô. Zoshâng haú lé, yhangmoq myàng kôjáng, zoshâng haú eq séng luí yhangmoq lé, lé taí
- ¹⁸ kyô é dang lé, taí pyô kat bekô. Wó gyô é bang banshoq gi, haú sau zúng bang taí kyô é dang lé, maú byuq bum
- ¹⁹ akô. Mariq kúm gi, dut lo é hkyô pé eq wó gyô é dang banshoq lé nghkaú má matsing yù mù luí, nik nik myit wú
- ²⁰ nyi ri. Sau zúng bang gi, yhangmoq lé maumang lagyo taí kyô kat é dang eq rajung za, wó gyô yù, wó myang yu é hkyô pé banshoq é yanmai, Garai Gasang lé hkya-on kungtôn uchang dum taú ló bekô nghut ri.

**Yesuq Lé, Noqkuq Yhúm
Má Shuí E É Hkyô**

- ²¹ Zoshâng haú, shit nyí jé mù ahpyo-kuq hpyit byi rá buinyí má, yhang nghkaú má a lúng shi mai maumang lagyo myhíng tô é myìng eq rajung za, yhang lé, “Yesuq” ga luí, myhíng byí akô.
- ²² Mosheq é tarâ eq rajung za, yhangmoq é lhoq san lhoq sêng é buinyì

byíng jáng, Yhumsing é tarâ má, “Zomún yuqzo hkangmó gi, haú Yhumsing é hí má chyoiyúng sù wó nghú rá matú, Yhumsing chyáng ê ap byi

²³ rá lhê.”^a gâ é eq, “Hpûngkyui razúm, haú a nghut jáng, nghoqmyhú zo í du,”^b hkungga byi rá lhê ga kê tô é

²⁴ eq rajung za, Mariq eq Yosep gi, zoshâng haú lé shui mù Yerusalem wà mó shut ê akô.

- ²⁵ Haú hkûn, Simeon gâ é mangzo rayuq, Yerusalem wà mó má nyi ri. Haú yuq gi, dingmán é eq tarâ cháng sù nghut mù, Israelaq lé nhik lhoq títng rá ahkyíng lé lánng nyí sù nghut ri; haú Chyoiyúng Woi-nyí le, yhâng é ahtoq
- ²⁶ má nyi nyi ri. Yhang gi, haú Yhumsing Hkrisduq lé a myang é za, shí rá a nghut, ga Chyoiyúng Woi-nyí èq tûn
- ²⁷ shit tô é hui sù nghut lhê. Yhang gi, Chyoiyúng Woi-nyí èq shui mù, noqkuq yhúmhaú má ê jé nyi tô é hkûn lé, Mariq eq Yosep gi, zoshâng Yesuq lé htûng tarâ eq rajung za kut byi rá matú, noqkuq yhúmhaú má shuí
- ²⁸ wang ló kôjáng, Simeon gi, zoshâng lé loq èq lhom bún yù mù, Garai Gasang lé hkya-ôn é dang gi,

- ²⁹ “Yhumsing ê, náng é danggidig gi, dik bê nghut ri; hkû-nyí náng é jùn ngò gi, nguingón é èq wó shi ló berâ nghut lhê.
- ³⁰ Haí mù gâ le, byù lhunglhâng bâng é matú, nàng lajang tô é hkyi yù hkyô lé, ngá myoq èq yhang wó myàng bê.
- ³¹ Haú gi, byù myú chângjup wó myàng rá matú, nàng lajang to byí é nghut mù,
- ³² tûngbaù pé lé, tengmán hkyô má bui su duqbó mù hpông shit rá matú le, náng é amyú Israelaq

^a 2:22 Htoq Lô 13:2, 12 ^b 2:23 Nghong 12:8

é hpungwup shingkâng matú
le nghut nyi ri.”

gâ ri.

- ³³ Yhângnu eq yhângwâ nhik gi, zoshâng Yesuq é hkyô lé Simeon taí é
- ³⁴ yanmai, maú byuq akô. Simeon gi, yhangmoq lé shimân byi mù, Yhâng nu Mariq lé, “Wú aq, zoshâng shí gi, Israelaq ming mâ é byù myo myô é matú lingbat jowò eq myo myô é matú kô lò myhang lò râ hkyô le, byù myo myo taí he pyám râ kumlhá matú le, hkyin tô é hui sù nghut ri.
- ³⁵ Haú mù, byù myo myô é unghkaú má, myit mi-myt lé lhoq htoq shit râ nghut lhê. Náng é myit nhiklhum má, shâm chún èq htaú kyâng kat é su gâ é lé, nàng hui zo râ nghut lhê.” ga taí ri.
- ³⁶ Ashe amyû mâ é Hpanuelaq é yhangzo, Annaq gâ é myiqhtoi myhí rayuq nyi ri; yhang gi, ipyat gyai ko bê. Yhang gi, zomyî pyat mai, yhanglâng eq nyhit zân za nyi luí, shit xe myi zân jé shoq chuimó mó nyi to sù nghut ri. Myiwe haú gi, noqkuq yhûm mai a htoq ê za, nyí myín a ga noqkuq dojaú nyí mù, zoshuq gám
- ³⁸ luí kyûdúng nyi ri. Simeon dang ban taí jáng, Annaq gi, hui lé lô mù, Garai Gasâng jeju lé hkya-on luí, Yerusalem wà mó lé Garai Gasang hkyi yù râ gâ é lé, myit lum to bang lhunglhang lé, zoshâng hau é hkyô taí kyô ri.
- ³⁹ Yosep eq Mariq gi, kut râ pé lé haú Yhumsing é tarâ joq é dông ban kut jáng, Galile mau mâ é yhangmoq wà
- ⁴⁰ Nazaret shut dum taú ló bekô. Zoshâng haú gi, kô lò mù, wum-o bò lo é eq, hpaqchyí byéng-yá le byíng nyi ri. Garai Gasâng jeju le, Yhâng é ahtoq má joq nyi ri.

**Noqkuq Yhúmhkaú Má Zoshâng
Yesuq Jé Nyi É Hkyô**

- ⁴¹ Yhângnu yhângwâ nhik gi, Lhoqlhai Poí jé hkgangmó, zàn wui Yerusalem wà mó má ê ê kut akô. Yesuq raxe í zân jé jáng, poí haú, ê bo lòm ra htungli joq é eq rajung za, yhangme wui yhanghpe wui doq ló
- ⁴² akô. Haú poí buinyi lai luí, dum taú lo é hkûn, zoshâng Yesuq gi, Yerusalem wà mó má nyi gyó tô ri; nghut kôlhang, yhângnu yhângwâ nhik gi, a
- ⁴³ sé kó. Yesuq lé rahá lo é luzúm wui chyáng bò râ su ngàm kômù luí, Yosep eq Mariq gi, ra-nyí buigyum chap sô ló bê htâng má, mung moq wui eq, sê lhúm é buinùm ji-myi wui chyáng
- ⁴⁴ Yhang lé châng ho akô. Yhangnhik gi, Yesuq lé a myàng kôjáng, Yhang lé châng hô uchyang, Yerusalem wà
- ⁴⁵ mó má dum taú jé e ló bekô. Ahkuí, sum nyí nghû râ nyí sheq, noqkuq yhúmhkaú má, tarâ sará pê é gung gûng má zùng to mù, yhangmoq é dang lé gyo yù luí, dum taú myi myi kut nyi é lé, yhangnhik ê myàng akô.
- ⁴⁶ Yhâng é dang wó gyô é bang banshoq gi, Yhâng é u-nuq nyau é hkyô lé le, Yhang tú taí é dang lé le, maú nyi akô.
- ⁴⁷ Yhang lé myàng jáng, yhangnhik maú byuq kômù luí, yhângnu gi, “Ngá zo ê, haí mù luí ngá-nhik lé isu kut lhê lhú? Wú aq, náng wa eq ngá-nhik gi, myit myo myit chiq é èq, nàng lé jaq châng ho pyám bê.” ga luí, Yhang lé taí ri.
- ⁴⁸ Yhang gi, “Haí mù luí, ngo lé châng ho akô lhú? mauhkûng mâ é ngá Wâ é yhûm má ngò nyi râ lhê le gi, nungnhik a sé kó lhú?” ga luí, yhangnhik
- ⁴⁹ lé tú taí ri. Nghut kôlhang, yhangnhik gi, Yesuq taí é dang lichyúm lé, a sê gyo kó.

- ⁵¹ Yesuq kúm gi, yhangnhik eq rahá Nazaret wà shut taû jé gyó ló luí, yhangnhik nyo é dang lé gyo mù nyì tô ri. Yhângnu Mariq gi, dut laí lò bê hkyô pé banshoq lé, yhâng é myit
- ⁵² nhiklhum má matsîng tô ri. Yesuq gi, hpaqchyí byéng-yá kûng zet lo é eq, gunghkyâng kô myhang lò mù, Garai Gasâng é hí má le, byu hí má le, myoq-dong wó lo nyi ri.

**Wui-myhup Sará Yohan
Mhoqshit É Hkyô**

Mht 3:1-12; Mrk 1:1-8; Yhn 1:19-28

- 3** Romaq hkoséng Kehtaq Tiberuq gi, hkó zung é raxe ngo zân nghut é hkûn, Yuda mau má Pontu Pilat gi, mauzau ayá má; Galile mau má, Herut gi, mauzau ayá má; Ituri eq Tra-kuni mau má, Herut yhanggu Hpilip gi, mauzau ayá má; Abili mau má,
- ² Lusanu gi, mauzau ayá má; Anna eq Kayahpaq gi, hkyangjong mó mú má, kut nyi akô. Haú hkûn, Garai Gasâng é mungdang gi, yoso má nyi tô é, Zahkariq é yhangzo Yohan chyáng jé
- ³ lé ri. Haú mù, yhang gi, Yodan làng yàm jowò hkanqmó má, sô jón wún luí, yubak mara hkyut pyám byí é hui râ matú myit lhîng mù, wui-myhup hkâm^a yù râ hkyô lé, hko kyô nyi ri.
- ⁴ Haú gi, myiqhtoi Esai-aq laiká má, “Haú yoso má, byù rayuq garú taí é htê gi, “Haú Yhumsing é matú, hkyô hen to keq, Yhâng é matú hkyô lhoq nyhang to keq;
- ⁵ wuîhkung langhkop hkanqmó lé lhoq pyíng ra râ nghut lhê;

bùm eq wingkáng hkanqmó lé hpyit pyám ra râ nghut lhê; agoí aguq é hkyô hkat hkanqmó lé lhoq nyhâng ra râ nghut lhê;

ahkung ahkop dut é hkyô hkat hkanqmó lé lhoq rhá ra râ nghut lhê.

- ⁶ Haú hkûn, byù banshoq gi, Garai Gasâng é hkyi yù hkyô lé myàng râ nghut lhê.”^b ga luí, kê tô é eq rajung za nghut ri.
- ⁷ Shiwa byù rajùm rayò gi, Yohan é loq má wui-myhup hkâm yù râ ga luí htoq lé lô kôjáng, Yohan taí é gi, “Duq htan é lhangmuì amyú pé^c ê, jé lô râ yubak dam mai wó hpanq lut kó sháng gaq ga, nungmoq lé ó yuq taí pûn é
- ⁸ lhú? Myit lhîng hkyô eq gingdán é ashi zui keq. ‘Nga-nhúng gi, Abraham é yhangzo yhangshû pé nghut lhê.’^d nghû luí, yhumsing é i-myt unghkaû má hkâtaí kó. Hkâsu mù gâ le, ngò, nungmoq lé taí kyo kôlé, Garai Gasang gi, luqgok shí pé mai, Abraham é matú yhangzò pé wó hpan htoq kat
- ⁹ lhê. Ahkuí lháng, Garai Gasang gi, Yhâng é wazung lé haú siggâm wang pé má tô to bê nghut ri; haú mù, ge é ashi a zui é agàm hkanqmó lé gi, htuq lhêng pyám mù, myi má dú kat pyám râ nghut lhê.” gâ ri.^e
- ¹⁰ Haú hkûn, shiwa byu pé gi, “Haú nghut le gi, ngamoq hkâsu kut le gè râ lhú?” ga luí, yhang lé myí akô.
- ¹¹ Yhang gi, “Bu í dung wó sù gi, bu a wó sù lé, gàm byi sháng gaq; zo shuq wó sù le, a wó sù lé, gàm byi sháng gaq.” ga luí, yhangmoq lé tû taí kat ri.

^a 3:3 Wui-myhup hkâm gâ é gi, baptisma lé gâ é nghut lhê. ^b 3:6 Esai 40:3-5 ^c 3:7 Lhangmuì amyú pé gâ é gi, Lukaq 3:7-10 má bo é Hparishe eq Saduke pé lé taí é nghut ri. ^d 3:8 Nga-nhúng gi, Abraham é yhangzo yhangshû pé nghut lhê gâ é gi, Abraham é yhangzo yhangshu nghut é yanmai, Garai Gasang jéyáng é lé a hui râ ga, myit yu é hkyô nghut ri. ^e 3:9 Bun zo shí lhâm é lichyúm gi, myit a lhîng bang lé, Garai Gasang jéyáng é buinyi jé râ nghut lhê ga naú é nghut ri.

- ¹² Kang guq bang le, wui-myhup hkâm yù râ ga lé lô mù, “Sarâ ê, ngamoq gi, hkâsu kut le ge râ lhu?” ga luí, yhang lé myí akô.
- ¹³ Yhang gi, “Nungmoq hkyui yù râ masat tô é htoq lai shoq hkâyû kó.” ga luí, yhangmoq lé taí ri.
- ¹⁴ Gyezô pé ra-am le, “Ngamoq gi, hkâsu kut le gè râ lhu?” ga luí, yhang lé lé myí akô.
Yohan gi, “Ó lé le hkâkyuq zo ko; a tara é dông mara le hkâhûn kó; nungmoq wó e ahpau èq gé bûn nyí keq.” ga luí, yhangmoq lé taí ri.
- ¹⁵ Shiwa byu pé kúm gi, Hkrisduq lé myit láng nyi tô é bang nghut é yanmai, Yohan lé haú yuq nghut lhê laq ga yhumsing é i-myit unghkaú má myit wú nyi bum akô. Haú hkûn, banshoq bang lé Yohan taí é gi, “Ngò gi, nungmoq lé, wui èq za wui-myhup hkâm byí lhê; nghut kô-lhang, ngá htoq má wum-o a-tsam je bo é sù rayuq jé lé lô râ nghut lhê. Ngò gi, yhang é hkyí-tsung tui lé hpyí râ lhang a gingdán; Yhang gi, Chyoiyúng Woi-nyí má le, myi má le, nungmoq lé wui-myhup hkâm byi râ nghut
- ¹⁷ lhê. Yhang gi, loq má byò chung to mù, guq chyaráng mâ é guq bùm lé hik sân pyám luí, já é guq cham lé gi, guqchyí má tsing kat to mù, guqsôm lé kúm gi, hkâ-nhám le shi byuq a sê é myí èq nyhê hkyô pyám râ nghut
- ¹⁸ lhê.” gâ ri.^a Haú mù, Yohan gi, byù haú bang lé gotú dang myo myo èq lhoq pun lhoq kying mù, gabú danglù lé hko kyô nyi ri.
- ¹⁹ Nghut kôlháng, hkâ-myháng a myáng má mauzau Herut gi, yhanggû é yhangmyi Herudiaq lé lú yu é hkyô eq, yhang kut shut é gotú a

ge é mù banshoq é yanmai, Yohan gi, yhang lé tân mhoqshit bê
²⁰ nghut ri. Mara haú pê htoq agó, Herut dum kut jat yu é mara gi, Yohan lé htóng má lhung kat é nghut ri.

Yesuq, Wui-myhup Hkâm Yu É Hkyô

Mht 3:13-17; Mrk 1:9-11

- ²¹ Yohan lé htóng má a lhung kat shimá, byù myo myo gi, wui-myhup hkâm yu nyí kô é hkûn, Yesuq le Yohan chyáng wui-myhup hkâm yù mù, kyûdûng nyi le, mauhkûng búng
- ²² lô mù, haú Chyoiyúng Woi-nyí gi, hpûngkyui gunghkyâng sù é dông mai Yhâng ahtóq má lé gyó nô ri. Haú hkûn, “Nàng gi, Ngò chyitdap é Ngá zo nghut lhê; Náng é ahtóq má Ngò gabú myit ngón nyi lhê.” ga mauhkûng mai danghtê htoq lo ri.

Yesuq É Byù Xik Shap Kyô É Hkyô

Mht 1:1-17

- ²³ Yesuq gi, Yhang mù zuí hi é hkûn, asak sum xê zàn kô nghut bê; Yhang lé byù hkyam dông gôn wú jáng, Yhang gi, Yosep é yhangzo nghut ri; Yosep gi, Heli é yhangzo, Heli
- ²⁴ gi, Mahtat é yhangzo, Mahtat gi, Lewiq é yhangzo, Lewiq gi, Melahki é yhangzo, Melahki gi, Yannai é yhangzo, Yannai gi, Yosep é yhangzo,
- ²⁵ Yosep gi, Matahtiaq é yhangzo, Matahtiaq gi, Amo é yhangzo, Amo gi, Nahum é yhangzo, Nahum gi, Esali é yhangzo, Esali gi, Nagai é yhangzo,
- ²⁶ Nagai gi, Maat é yhangzo, Maat gi, Matahtiaq é yhangzo, Matahtiaq gi, Semai é yhangzo, Semai gi, Yosek é yhangzo, Yosek gi, Yodaq é yhangzo,
- ²⁷ Yodaq gi, Yohan é yhangzo, Yoanan gi, Resa é yhangzo, Resa gi, Zeru-

^a 3:17 Haú eq rajung za, Hkrisduq gi, a ge é byu pé eq ge é byu pé lé gam hkoq pyám râ nghut lhê.

babelaq é yhangzo, Zerubabelaq gi, Shalahtila é yhangzo, Shalahtila gi, ²⁸ Neri é yhangzo, Neri gi, Melahki é yhangzo, Melahki gi, Adi é yhangzo, Adi gi, Kusam é yhangzo, Kusam gi, Elamadam é yhangzo, Elamadam ²⁹ gi, Era é yhangzo, Era gi, Yoshuq é yhangzo, Yoshuq gi, Elieze é yhangzo, Elieze gi, Yorim é yhangzo, Yorim gi, Mahtat é yhangzo, Mahtat gi, Lewiq é ³⁰ yhangzo, Lewiq gi, Simeon é yhangzo, Simeon gi, Yudaq é yhangzo, Yudaq gi, Yosep é yhangzo, Yosep gi, Yonam é yhangzo, Yonam gi, Elia- ³¹ kim é yhangzo, Eliakim gi, Mela é yhangzo, Mela gi, Menaq é yhangzo, Menaq gi, Matahta é yhangzo, Matahta gi, Nahtan é yhangzo, Nahtan gi, ³² Dawiq é yhangzo, Dawiq gi, Yese é yhangzo, Yese gi, Obet é yhangzo, Obet gi, Bua é yhangzo, Bua gi, Salamun é yhangzo, Salamun gi, Nashon ³³ é yhangzo, Nashon gi, Aminada é yhangzo, Aminada gi, Arni é yhangzo, Arni gi, Hesrun é yhangzo, Hesrun gi, Hparet é yhangzo, Hparet gi, Yudaq é yhangzo, Yudaq gi, Yakup é ³⁴ yhangzo, Yakup gi, Isak é yhangzo, Isak gi, Abraham é yhangzo, Abraham gi, Htara é yhangzo, Htara gi, ³⁵ Nahura é yhangzo, Nahura gi, Seruk é yhangzo, Seruk gi, Re-u é yhangzo, Re-u gi, Hpelek é yhangzo, Hpelek gi, Ebera é yhangzo, Ebera gi, Shela é ³⁶ yhangzo, Shela gi, Kainan é yhangzo, Kainan gi, Arhpaza é yhangzo, Arhpaza gi, Shem é yhangzo, Shem gi, Noaq é yhangzo, Noaq gi, Lamek é yhangzo, Lamek gi, Mehtusela é yhangzo, Mehtusela gi, Eruk é ³⁷ yhangzo, Eruk gi, Yaret é yhangzo, Yaret gi, Mahelela é yhangzo, Mahe-

³⁸ lela gi, Kainan é yhangzo, Kainan gi, Enu é yhangzo, Enu gi, Shet é yhangzo, Shet gi, Adam é yhangzo, Adam gi, Garai Gasâng é yhangzo nghut ri.

Yesuq Lé Tsadán Gunglaú É Hkyô

Mht 4:1-11; Mrk 1:12-13

4 Yesuq gi, Chyoiyúng Woi-nyí èq byíng mù, Yodan làng mai dum taú lo é hkûn, Chyoiyúng Woi-nyí gi, ² Yhang lé yoso shut shuí e ri. Haú má, Yesuq gi, buinyí myi xê nyí jé shoq, nat Tsadán èq gunglaú é huí ri. Bui-nyí haú gyoro má, Yesuq gi, haí le a zô é yanmai, zòmut hui bê nghut ri. ³ Haú mù luí, nat Tsadán gi, “Nàng, Garai Gasâng é Yhangzo nghut le gi, luqgok shí lé muk dut nhâng aq.” ga luí, Yhang lé taí ri. ⁴ Haú hkûn, Yesuq gi, “Byù gi, muk èq za asak duí rà a nghut.’ ga luí, Chyúmdang má kê tô ri.”^a ga yhang lé tú taí ri. ⁵ Hau htâng, nat Tsadán gi, Yesuq lé, gyai yhang myhang é bùm htoq má shuí doq ló mù, mingkan má joq é mingdán pé banshoq lé razup má ⁶ za tûn shit luí, “Shí ahkáng ayá banshoq eq haú mingdán é hkikhkâm hkyô banshoq, ngò nang lé wó byí lhê; hkâsu mù gâ le, haú pé banshoq gi, ngo lé ap byí to bê nghut mù, ngò byí nau é sú ó yuq lé nghut kôlhang, byi rà ⁷ nghut lhê. Haú mù, Nàng, ngo lé noq é nghut jáng, shí pé banshoq Náng é dut rà nghut lhê.” ga, Yesuq lé taí ri. ⁸ Haú hkûn, Yesuq gi, “Haú Yhum-síng náng é Garai Gasang lé za, nàng noqkuq dojaú ra rà nghut lhê.’^b ga luí, Chyúmdang má kê tô ri.” ga luí, yhang lé tú taí ri.

^a 4:4 Tarâ Pun 8:3 ^b 4:8 Tarâ Pun 6:13

- 9 Nat Tsadán gi, Yesuq lé Yerusalem wà mó má shuí ê mù, noqkuq yhum je myhang é shùhtàng htoq má yap nhang to luí, “Nàng, Garai Gasâng é Yhangzo nghut le gi, shí mai byam
- 10 gyó kat wú aq. Hkâsu mù gà le, ‘Nang lé upzúng byí nyí râ matú, Garai Gasang gi, Yhâng é maumang lagyô pé lé taí to râ nghut mù,
- 11 luqgok má náng é hkyí a ló htung shoq, yhangmoq é loq èq Nang lé lhom bún yú kó râ nghut lhê.’^a ga luí, Chyúmdang má kâ tô ri.” ga
- 12 taí ri. Nghut kôlhâng, Yesuq gi, “‘Haú Yhumsîng, nungmoq é Garai Gasang lé, wó chyam wú râ a nghut.’^b ga luí, Chyúmdang má bo tô ri.” ga, yhang lé tû taí ri.
- 13 Nat Tsadán gi, gunlaú é hkyô pé banshoq ban kut jáng, ahko ahkáng láng wú uchyang yhâng chyáng mai byam gâng nyi byuq ri.

**Yesuq Lé Nazaret Wà Bang
He-ngik Pyâm É Hkyô**

Mht 4:12-17, 13:53-58; Mrk 1:14-15, 6:1-6

- 14 Yesuq kúm gi, Chyoiyúng Woi-nyí wum-o byíng é èq Galile mau shut dum taú lo ri. Háu mau jowò hkgámó má, Yhâng é hkyô lé taí pyo
- 15 ló bùm bekô. Yhangmoq é tarajong pé má, Yesuq mhoqshit byi mù, lhunglhâng bang gi, Yhang lé taí hkya-ôn nyi bum akô.
- 16 Hau htâng má, Yhang nyi kô lo é Nazaret wà má dum taú jé ló bê; Yhang gi, hkâ-nhám le kut nyi é eq rajung za, Bánno buinyì^c lé tarajong

- má wang ê mù, laiká nghap râ ga toq
- 17 yap é hkûn, Yhang lé myiqhtoi Esai-aq chyúmding byi kôjáng, Yhang chyúmding haú lé hpông kat le,
- 18 “Yhumsîng é Woi-nyí gi, ngá é ahtoq má nyi nyi ri; hkâsu mù gà le, asho awuí é bang lé gabú danglù hkô kyo râ matú, Yhang ngo lé hkyin yú bê.
- Htóng lúng bang lé lhoq htoq râ hkyô eq, myoqjit bang lé myoq dum myàng nhâng râ hkyô hkô kyo râ matú le, zik zo huí é bang lé nhang kat nhâng râ eq,
- 19 Yhumsîng, Yhâng é byu pé lé hkyi yù râ ahkyíng zanwut lé hkô kyo râ matú le, Yhang, ngo lé nhang kat bê nghut ri.”^d ga luí, kâ tô é jowò lé myang záng mù nghap ri.
- 20 Hau htâng, Yesuq gi, chyúmding haú lé ding mù, shuí-u sù lé tau byí pyám luí, dum zung tô ri; tarajong má é byù lhunglhâng bang gi, Yesuq lé
- 21 chôm wú tô é hkûn, Yesuq gi, “Nungmoq é nohkyap má, ahkuí wó gyô é Chyúmdang shí gi, hkû-nyí yhang lo dik bê.” ga luí, yhangmoq lé taí hi kat ri.
- 22 Lhunglhâng bang gi, Yhang ge é hkyô lé saksé hkám byi kômù, Yhâng é nhut mai htoq é jeju bo é dang lé le, maú kôluí, “Shí yuq gi, Yosep é yhangzo a nghut lhú?” ga taí bum akô.
- 23 Háu mù luí, Yesuq gi, “Nungmoq gè gè yhang, ‘Chi sará ê, yhumsing gùng lé lhoq ge yù aq.’^e gà é sanghkyang èq

^a 4:11 Hkya-on 91:11-12 ^b 4:12 Tarâ Pun 6:16 ^c 4:16 Bánno buinyì gà é gi, Yudaq byu pé nòmu é buinyì lé gà lhê. Ahkui lhê é dōng ga jáng, Bánno buinyì gi, bat htoq hkyuq nyí lé âng ri. ^d 4:19 Esai 61:1-2 ^e 4:23 *Chi sará ê, yhumsing gùng lé lhoq ge yù aq* gà é sanghkyang gi, “Mesaia nghut le gi, mauhpo mù wó tûn shit râ nghut lhê.” gà é nghut lhê.

le, 'Nàng, Kaperna-um và má kut shit wú é hkyô ngamoq wó gyo bê, haú eq rajung za, nàng, náng é yhum mau má le, kut shit wú aq.' ga luí le, ngo lé taí kó rã nghut lhê." ga taí ri.

- ²⁴ Yhang dum xoq taí é gi, "Ngò, nungmoq lé teng za taí kôlé, myiqhtoi ó yuq le yhumsing é yhum mau má
- ²⁵ myoqdong wó wú é a nghut. Ngò, nungmoq lé teng za taí kôlé, Eliyaq é pyat lé, Israelaq ming má chuimó
- ²⁶ myo myo nyi bum akô. Nghut kô-lhang, haú ming má súm zan eq lhamó hkyuq hkyap yhang, mau a wò dut byuq mù, mutmó gyó tô é hkûn, Garai Gasang gi, yhangmoq mâ é rayuq chyáng le, Eliyaq lé a nhang kat é za, Sidun mau Zarephta và mâ é, chuimó myhí rayuq chyáng sheq nhang kat
- ²⁷ byí é nghut lhê. Myiqhtoi Elisha é pyat má le, Israelaq ming má, mang-gâm dap é byù myo myo nyi kô-lhang, yhangmoq chyáng mâ é rayuq le wó sân-yúng yù kô é a nghut; Suriq byù Naman ga sù tûngbaù hpó za sheq wó sân-yúng é nghut lhê." ga taí ri.
- ²⁸ Tarajong hkaù mâ é lhunglhang bang gi, haú hkyô lé wó gyo kôjáng, gyai yhang nhik-yo nau bùm kômù,
- ²⁹ toq yap luí, Yhang lé và mai hkat htoq mù, yhangmoq é và xuq tô é bùm gùng htoq mâ é gampyoq má, ê chyûn hpyit hkyô pyám rã ga shuí e
- ³⁰ ló akô. Nghut kôlhang, Yesuq kúm gi, byù hpûng haú mai so hkoq htoq ló byuq bê nghut ri.

**Agè Ashop É Nat Lé
Yesuq Hkat Htoq É Hkyô**

Mrk 1:21-28

- ³¹ Hau htâng, Yesuq gi, Galile mau má é Kaperna-um và má jé ê mù, Bánno buinyi má byu pé lé mhoqshit hi ló bê

³² nghut ri. Yhangmoq gi, Yhang mhoqshit é hkyô lé mauhong nyi akô; hkâsu mù gâ le, Yhang gi, ahko ahkáng bo é dang dông taí nyi é yanmai nghut ri.

³³ Yesuq, tarajong hkaù má mhoqshit byí nyi é hkûn, nat gang wang júng é byù rayuq htê mó o mó èq taí é gi,

³⁴ "Ê, Nazaret và byù Yesuq ê, ngamoq gi, Nàng eq haí sêng lhê lúhú? Ngamoq lé lhoq hten rã matú, Nàng jé lé é nghut lhê lúhú? Nàng gi, Garai Gasâng é Chyoiyúng Sù nghut é lé, ngò sê lhê." gâ ri.

³⁵ Haú hkûn, Yesuq gi, "Hkâjop, yhâng chyáng mai htoq ló aq." ga yhang lé tân kat jáng, nat gi, haú yuq le yhangmoq é gung gung má lhoq lheq to mù, a nò nhang é za, yhâng chyáng mai htoq ló byuq ri.

³⁶ Haú mù luí, shiwa byù banshoq bang gi, gyai yhang mau byuq kômù, rayuq eq rayuq, "Shí yuq é dang gi, hkasú é dang wá nghut lhê lúhú? Yhang gi, ahkáng ayá èq le, wum-o bo é èq le, agè ashop é nat pé lé hkunmó hkyó jáng, haú bang htoq ló byuq akô." ga

³⁷ taí lhùm bum akô. Haú hkûn, haú mau mâ é awui ayàm jowò hkangmó má jàm shoq, Yhâng é hkyô lé taí pyo hù ló bùm bekô nghut ri.

Yesuq Nòhpyo Lhoq Gê Byí É Hkyô

Mht 8:14-17; Mrk 1:29-34

³⁸ Yesuq gi, haú tarajong mai toq ló mù, Simun é yhùm má wang ló ri. Simun é yhâng-aumó gi, ali gyai nyé no nyi é nghut mù luí, lhoq gê byí rã matú, Yesuq lé garúm dung byí akô.

³⁹ Yesuq gi, Simun é yhâng-aumó nàm má yap to mù, nòhpyo haú lé tân kat jáng, Simun é yhâng-aumó gi, ge ló byuq bê; haú hkûn jáng, yhang gi, toq mù, yhangmoq lé gaí tso gaí huq bê nghut ri.

- ⁴⁰ Bui wang ló jáng, nõhpyo hui bang eq awáng nõhpyo ajung jung dap é bang lhunglhang lé, Yesuq chyáng shuí lé lô kômù, yhangmoq rayuq htâng rayuq é ahtoq má Yesuq gi, loq
- ⁴¹ ke byi luí, lhoq gê byí ri. Nat gâng pé gi, Yesuq lé, “Nàng gi, Garai Gasâng é Yhangzo nghut ri.” ga luí, wut tái mù byù myo myô chyáng mai htoq ló byuq akô; Yesuq gi, Hkrisduq nghut é hkyô lé, yhangmoq sé kô é yanmai, yhangmoq lé dang a wó tái loshoq, Yesuq tân pyâm ri.
- ⁴² Maubó lô jáng, Yesuq gi, htoq ló mù, gaú é jowò yoso hkaú má ê nyi tô ri; shiwa byu pé kúm gi, Yhang lé hkat hô kômù, myang hô kôjáng, yhangmoq chyáng mai a ló byuq râ matú
- ⁴³ châng hkâm wú akô. Nghut kôlhang, Yesuq gi, “Garai Gasâng é mingdán é gabú danglù lé, gó wâ pé má le ngò hko kyo râ râ ashí, haú é matú, Garai Gasang gi, ngo lé nhang kat bê nghut
- ⁴⁴ lhê.” ga luí, yhangmoq lé tái ri. Haú mù, Yesuq gi, Yuda mau mâ é tara-jong pé má, hko kyô wún nyi ri.

Sâng-hi Ji Yù Hui É Chángzô Pé

Mht 4:18-22; Mrk 1:16-20

- 5** Radàm má lé, Yesuq gi, Genesarat nõng yàm má yap tô le, Garai Gasâng é mungdang gyo râ ga, shiwa byu pé, Yhâng chyáng chyín chyap
- ² wang lé lô kô é hkûn, nõng gin-gau yàm má lhai razúm joq tô é lé, Yhang myang kat ri. Ngogûn dú bang kúm gi, lhai mai htoq mù, yhangmoq é gùn pé
- ³ lé chí nyi akô. Yesuq gi, Simûn é lhai má wàng mù gin-gau mai rachyit lhoq kang nhâng luí, haú lhai htoq má zung to mù, shiwa byu pé lé mhoqshit tái kyô nyi ri.
- ⁴ Dang ban tái jáng, Yesuq gi, Simun lé, “Wui nik é shut hui luí, ngozo wó

kông yù râ matú, nungmoq é gùn pé lé dú hkyô kat keq.” ga tái ri.

- ⁵ Simun gi, “Yhumsîng ê, ngamoq amàn ra-myin mau shikut wú kô-lhang, haí le a wó; nghut kôlhang, náng dang é yanmai, ngò gùn dú hkyô kat râ nghut lhê.” ga tû tái ri.
- ⁶ Gùn pé lé hkyô kat kôjáng, yhangmoq gi, ngozo gyai myo shoq lé wó kông yù kômù, gùn lhang jeq ló râ su
- ⁷ dut é yanmai, lhai gó lhum mâ é luzúm wui lé, lé garúm yù râ matú loq lik lik kat kôjáng, haú bang lé lô mù, haú lhai í lhum aluq myup ló shoq ngozo lé kat pyíng bekô.
- ⁸ Simun Petruq gi, haú lé myàng jáng, Yesuq é hkyí wang má hkyihput htuq mù, “Yhumsîng ê, ngá chyáng mai ló byuq aq, haí mù gâ le, ngò gi, yubak
- ⁹ dap é byù nghut nyi lhê.” ga tái ri. Haí mù luí gâ le, Simun le, yhang eq nyi tô é lhunglhang bang le, haú su ngozo wó yu é yanmai, maú nyi bùm kômù
- ¹⁰ nghut ri. Simûn é luzúm nhik, Zebedi é yhangzo Yakuq eq Yohan le, haú su chôm maú byuq akô.

- Hau htâng, Yesuq gi, “Hkâgyuq, ahkuí mai nàng gi, byù lé châng kóng sù dut râ nghut lhê.” ga luí, Simun
- ¹¹ lé tái ri. Yhangmoq gi, wuiyàm má jé jáng, lhai pé eq yhangmoq é zè ban-shoq lé tô pyâm to luí, Yesuq htâng châng bekô nghut ri.

Manggâm Dap Bang Lé Yesuq Lhoq Gê Byí É Hkyô

Mht 8:1-4; Mrk 1:40-45

- ¹² Radàm lé, Yesuq gi, wà rawà má nyi tô lé, ragùngdú é manggâm dap é byù rayuq lé lo ri; haú yuq gi, Yesuq lé myàng jáng, hkyihput htuq luí, “Yhumsîng ê, Nàng dóng é nghut le gi, ngo lé Nàng wó lhoq sân-yúng byi râ nghut lhê.” ga dúng wut ri.

- ¹³ Yesuq gi, loq lhâm kat mù, haú yuq lé ê záng luí, “Ngò dóng lhê, sân-yúng aq hkoi.” ga taí ri; haú hkûn jáng, haú yuq é manggâm gi, ge byuq bê nghut ri.
- ¹⁴ Yesuq gi, “Nàng, shí hkyô ó lé le hkâtaí kyo. Nghut kôlhang, náng é gungdu lé, hkyangjong hpô chyáng ló tân shit mù, nàng sân-yúng bê hkyô lé yhangmoq é matú saksé dut sháng gaq, Mosheq tarâ tô tô é eq rajung za, hkungga ló nhông byi aq.” ga, yhang lé taí hkûm kat ri.
- ¹⁵ Nghut kôlhang, Yesuq é hkyô gi, je riyhang taí pyo hû jam ló mù luí, shiwa byù rajùm rayò gi, Yhâng é dang gyo râ matú le, yhangmoq é nò-hpyo lhoq gê byí nhâng râ matú le, lé zup míng tô akô. Yesuq kúm gi, Yhang baú tsik za yoso shut htoq ê mù, kyú ê dung dung kut ri.

**Gùngjum Shí Sû Lé, Yesuq
Lhoq Gê Byí É Hkyô**

Mht 9:1-8; Mrk 2:1-12

- ¹⁷ Ra-nyí lé, Yesuq mhoqshit nyi é hkûn, Hparishe pé eq tarâ sará pé le, Yesuq nâm má zung tô akô; haú bang gi, Galile mau wà hkyap hkanmó mâ é bang eq Yuda mau, Yerusalem wà mó mâ é bang nghut akô. Yhumsîng Garaí é wum-o a-tsam le nòhpyo lhoq gê râ matú Yesuq eq rahá nghut nyi ri. Haú hkûn, byù ra-am gi, gùngjum shí sù rayuq lé taphkang mai waq lé lô kômù, haú yuq lé, yhúmhaú má nyi tô é Yesuq é hí má, wó lheq byi shoq
- ¹⁹ ga hkyô ho nyi akô. Byù lúm myô chyîn chyap to mù, haú nò sù lé hká dông le a wó shuí wàng kô-luí, haú yhumhkûng htoq shut waq

- doq ló mù, haú yuq lé taphkang eq roq, shiwa hpong gung gûng, Yesuq é hí ang ang má hkyô hang kat akô.
- ²⁰ Yesuq gi, yhangmoq é lumjîng myit lé byu myàng jáng, “Byù nàng ê! Nàng é yubak mara lé hkyut pyám byi bê.” ga taí ri.
- ²¹ Haú hkûn, Hparishe pé eq tarâ sará pé gi, “Shí su ga luí, Garai Gasang lé rhoí dang taí é sù gi, ó yuq wá nghut lhê lú? Garai Gasang za a nghut jáng, yubak mara wó hkyut pyám byi sù gi, ó yuq wá nghut lhê lú?” ga luí, myit són wuí nyi bum akô.
- ²² Yesuq gi, yhangmoq myit són wuí nyi é hkyô lé sé mù, “Nungmoq é i-myt hkaú má, haí mù shí pé lé myit són wuí nyi akô lú? ‘Nàng é yubak mara lé hkyut pyám byi bê.’ nghú taí râ eq, ‘Toq luí, hkyô so aq.’ nghú taí râ má, hká hkun je taí lui lhê lú? Nghut kôlhang, haú Byu Yhangzo^a gi, mingkan htoq má, mara hkyut byi râ ahkáng wó Sù nghut é lé, nungmoq lé sé nhâng nau lhê.” ga mù, haú gùngjum shí sù lé, “Ngò, nàng lé taí bá, toq aq, náng é taphkang yu chûng luí, yhúm taú ló aq hkoi.” ga taí ri. Haú hkûn jáng, yhang gi, yhangmoq é hí má toq yap mù, yhâng é taphkang waq chûng luí, yhâng é yhúm shut Garai Gasang lé hkya-on kungtôn uchyang
- ²⁵ ló byuq bê. Byù banshoq bang gi, gyai maú byuq kômù luí, Garai Gasang lé hkya-on kungton akô nghut ri. Yhangmoq gyai gyuq maú dik é èq le, “Hkú-nyí, nga-nhúng, mauho amú pé lé myàng bê.” ga taí nyi akô.

^a 5:24 *Byu Yhangzo* gâ é gi, Yesuq Yhânggùng yhang lé le taí e nghut lhê, Mesaia lé le taí é nghut lhê.

**Yesuq Gi, Lewiq É Yhâm Má Yubak
Dap Bang Eq Rahá Zo Shuq É Hkyô**

Mht 9:9-13; Mrk 2:13-17

- ²⁷ Hau htâng má, Yesuq sô e ló le, Lewiq gâ é kang guq sù rayuq yhâng é kang guq zúm má zung tô é lé é myàng mù, haú yuq lé, “Ngá htâng ²⁸ cháng aq.” ga taí ri. Lewiq gi, haú má é zè banshoq lé tô pyâm to mù, toq luí, Yhâng htâng cháng bê nghut ri.
- ²⁹ Hau htâng, Lewiq gi, yhâng é yhâm má Yesuq é matú zoshuq poí mó kut byí ri; poí haú má kang guq bang myo myo eq byù góbang le, yhangmoq eq ³⁰ rahá za zô zung nyi bum akô. Haú mù luí, Hparishe pé eq yhangmoq hpúng má é tarâ sará pé kúm gi, “Nungmoq gi, haí mù luí kang guq bang eq yubak dap bang eq rahá zo shuq nyi akô lú?” ga, Yhâng é chángzô pé lé mara hún dang taí akô.
- ³¹ Yesuq gi, yhangmoq lé, “Wángzán bang chi sará a ra kó, nõhpyo hui ³² bang za sheq ru râ lhê. Ngò gi, dingmán bang lé wut yù râ matú jé lé é a nghut, yubak dap bang myit lhing râ matú sheq jé lé é ru nghut lhê.” ga tũ taí ri.

**Zoshuq Gám Hkyô Eq Séng
Luí, Yesuq Taí É Hkyô**

Mht 9:14-17; Mrk 2:18-22

- ³³ Dum, yhangmoq gi, “Yohan é chángzô pé gi, zoshuq gám mù kyûdung dung kut akô; Hparishe pé é chángzô pé le, haú su kut akô; nghut kôlhang, náng é chángzô pé gi, haí mù zô nyi shuq nyi akô lú?” ga Yesuq lé taí akô.
- ³⁴ Yesuq, yhangmoq lé tũ taí é gi, “Bíng pé gi, lusik eq rahá nghut nyi to ashí hkûn, yhangmoq lé zo shuq

³⁵ wó gám nhâng râ lú? Nghut kôlhang, lusik^a lé yhangmoq chyáng mai shuí yu pyâm é hkyíng jé râ nghut lhê; haú buinyi pé má kúm gi, yhangmoq, zoshuq gám kó râ nghut lhê.” gâ ri.

- ³⁶ Dangtú dông mai le, Yesuq, yhangmoq lé taí é gi, “Mebu sik má é lêng cheq yû mù, mebu xau má hpo é gi, ó a kut wú kó; haú su kut é nghut jáng, mebu sik lé le lêng cheq pyâm é dut mù, pán jap sik le mebu xau ³⁷ eq du lhum râ a nghut. Tsibiyiq wing asik lé le, shokuq htung axau má ó a kat wú kó. Kat é nghut jáng, tsibiyiq wing asik gi, htung lé lhoq buq goq nhâng mù, tsibiyiq wing le yui shun byuq, htung le htên byuq, dut ³⁸ râ nghut lhê. Haú su a dut shoq gi, tsibiyiq wing asik lé, shokuq htung ³⁹ asik má kat ra râ nghut lhê. Tsibiyiq wing axau shuq nyí bê sù gi, asik lé a shuq nau nghut râ; hkâsu mù gâ le, ‘Axau sheq je nghâm ri.’ ga taí râ.” gâ ri.

**Bánno Buinyi Má, Yesuq É Chángzô
Pé Kyôshi Shap Zô É Hkyô**

Mht 12:1-8; Mrk 2:23-28

- 6** Bánno buinyi ra-nyí má, Yesuq gi, Yhâng é chángzô pé eq yò hkaú mai sô lai ló é hkûn, Yhâng é chángzô pé gi, kyôshi ratsuí langshap yû mù, ² loq èq nè hpuq zô akô. Haú mù luí, Hparishe pé ra-am gi, “Bánno buinyi má a ge kut jung lé, nungmoq gi, haí mù luí haú su kut akô lú?” ga taí akô.
- ³ Yesuq gi, yhangmoq lé, “Dawiq lháng gi, yhâng htâng châng é bang eq rahá zòmút huí é hkûn, hkâsu kut é hkyô lé, nungmoq a nghap wú kó

^a 5:35 *Lusik* gâ é gi, Yesuq lé taí nau é nghut lhê.

- ⁴ lú? Dawiq gi, Garai Gasâng é yhûm^a hkaû má wang ê mù, hkyangjông pé mai lai luí, ó le a ge zô é, kyâng tô é muk lé yù zo mù, yhâng htâng châng é bang lé le, byi tsô é a nghut kó lú?”
- ⁵ ga tû taí ri. Hau htâng, Yhang gi, “Haû Byu Yhangzo gi, haû Bánno buinyi é Yhumsîng nghut lhê.” ga yhangmoq lé taí ri.

**Loq Jum Shî Sû Lé Yesuq
Lhoq Gê Byî É Hkyô**

Mht 12:9-14; Mrk 3:1-6

- ⁶ Gotû Bánno buinyi má le, Yesuq gi, tarajong má wàng mù mhoqshit nyi é hkûn, loqyo loq ajum shi byuq
- ⁷ é byù rayuq haú má nyi tô ri. Haú hkûn, tarâ sará pé eq Hparishe pé gi, Bánno buinyi má nõhpyo lhoq gê byi râ lú ga luí, Yhang lé mara wó hûn
- ⁸ shoq ga gyám wú nyi akô. Yesuq kúm gi, yhangmoq é i-myt lé sé sù nghut luí, loq jum shî sù lé, “Toq mù, ban-shoq bâng é hí má, yap shit aq.” ga taí kat ri. Haú yuq le, toq mù yap tô ri.
- ⁹ Haú hkûn, Yesuq gi, “Ngò nungmoq lé myí wú kôlé, Bánno buinyi má, ge é muzó kut râ, a ge é muzó kut râ, byù asak hkyí râ eq lhoq hten râ pé má hká lhum kut le sheq tarâ wang lhê lú?” ga luí, yhangmoq lé taí ri.
- ¹⁰ Hau htâng má, yhangmoq banshoq lé lhing wú mù, haú loq jum shî sù lé “Náng é loq nyhang kat aq.” ga taí kat é hkûn lé, yhang le loq nyhang kat luí, yhâng é loq gi, shoq
- ¹¹ za ge byuq bê nghut ri. Nghut kô-lhang, yhangmoq gi, myoq chum nhô chik yhang nhik-yo naú kômù luí, “Yesuq lé hkâsu wá kut pyám râ lú?”

ga luí, rayuq eq rayuq taí lhûm nyi akô.

**Raxe Í Yuq Lé Lagyo
Ga Myhîng Yu É Hkyô**

Mht 10:1-4; Mrk 3:13-19

- ¹² Haú yoq ra-nyí má, Yesuq gi, kyû-dung râ ga bùm shut htoq e ló luí, ra-myin mau Garai Gasang lé kyû-dûng nyi ri. Maubó jáng Yhâng é chángzô pé lé wut yù mù, yhangmoq chyáng mâ é raxe í yuq lé hkyin yù
- ¹³ luí, lagyo pé ga myhîng to byî ri. Haú bang gi, Yesuq èq Petruq ga myîng myhîng byî é Simun eq, yhanggu Andre, Yakuq eq Yohan, Hpilip eq
- ¹⁴ Barhtolume, Mahte eq Htomaq, Alhpe é yhangzo Yakuq eq Zelutuq^b dut é
- ¹⁵ Simun, Yakuq é yhangzo Yudaq eq, Yesuq lé ap pyám râ sù Yudaq Iskarut pé nghut akô.

**Hkungsô Wó É Hkyô Eq
Dingnyé Wó É Hkyô**

Mht 4:23-25, 5:1-12

- ¹⁷ Yesuq gi, yhangmoq eq rahá gyó ló mù, janggyú má yap tô é hkûn; Yhâng é chángzo moq mó le mù, Yuda mau banshoq mâ é bang, Yerusalem wà mó mâ é bang, wuîshuq lung-aú ayàm mâ é Turuq myuq eq Sidun myuq mâ é bang, rajùm rayò
- ¹⁸ gi, Yhâng é dang gyô yù râ eq yhangmoq é nõhpyo lhoq gê nhâng râ matú, rahá za zup míng tô akô. Agè ashop é nat èq zing-ri huí é bang le ge
- ¹⁹ byuq akô. Yhâng é gùng mai htoq é wum-ô èq byù banshoq lé lhoq gê byî nyi é yanmai shiwa byu pé le Yhang lé wó záng shoq ga, ho nyi akô.

^a 6:4 *Garai Gasâng é yhûm* nghu é gi, Yerusalem wà mó má joq é saksé zúm lé gà é nghut lhê.

^b 6:15 *Zelutuq* gà é lichyúm gi, yhumsîng zui saí é hkyô má gyai yhang myit lòm shirong é sù lé gà lhê.

- 20 Haú hkûn, Yesuq gi, Yhâng é chángzô pé lé wú kat luí taí é gi, “Myùng bang nungmoq gi, hkungsô wó nyi ri, hkâsu mù gâ le, Garai Gasâng é mingdán^a gi, nungmoq é mingdán nghut nyi ri.
- 21 Ahkuí, zòmut wuìshit huí nyi é bang nungmoq gi, hkungsô wó nyi ri, hkâsu mù gâ le, nungmoq nhik dik shoq myàng zo kó rà nghut lhê. Ahkuí, ngau nyì bang nungmoq gi, hkungsô wó nyi ri, hkâsu mù gâ le, nungmoq myang wuì kó rà nghut lhê.
- 22 Haú Byu Yhangzô é yanmai nungmoq lé su èq a nguì é, lhoq hpyoq lhoq kâng é, hoq hpu nhang é, agè ashop nghut é dong jihpoi gamhkui huí é hkûn, nungmoq gi, hkungsô wó nyi ri.
- 23 Haú hkûn lé, gabú byam chyù nyì keq, hkâsu mù gâ le, wú keq, nungmoq é matú kô é chyunghuq gi, mauhkûng mingdán má joq tô ri. Ngò, nungmoq lé taí lhê, hkâsu mù gâ le, yhangmoq é íchýí îwa pé le myiqhtoí pé^b lé haú su kut wú bekô.”
- 24 Nghut kôlhang, sùt wó bang nungmoq gi, dingnyé wó rà, hkâsu mù gâ le, nungmoq gi, yhumsing gùng má nhik shí nhik dik é hkyô lé huí yù bekô.
- 25 Ahkuí, gyi gyi dau dau myàng zo myàng shuq nyi é bang nungmoq gi, dingnyé wó rà, hkâsu mù gâ le, nungmoq

zòmut wuìshit é hui kó rà nghut lhê.

Ahkuí, wui nyi é bang nungmoq gi, dingnyé wó rà, hkâsu mù gâ le, iyon yôn é eq ngaubyi ngau-nhap htoq é hui kó rà nghut lhê.

- 26 Byù banshoq bang, nungmoq lé ge é byù ga kôjáng, nungmoq gi, dingnyé wó rà, hkâsu mù gâ le, yhangmoq é íchýí îwâ pé le, myiqhtoi pyoq pé^c lé, haú su ga taí wú bekô.

Gye Pé Lé Chyitdap Râ Hkyô

Mht 5:38-48, 7:12

- 27 Hau htoq agó, ngá dang gyô nyì bang nungmoq lé ngò taí kôlé, nungmoq é gye pé lé chyitdap nyì keq; nungmoq lé a naù a wôm é bang lé
- 28 ge é hkyô kut keq; nungmoq lé nhâng é bang lé, shimân byi keq; nungmoq lé rhoi é bang lé kyûdung byi keq.
- 29 Nang lé bo-pyuq rahkyam shut pyuq byi sù lé, rahkyam dum hkâm byi shi aq; náng bumó hkyut yu é sù lé,
- 30 buzo le dum hkyut byi shi aq; nang lé rajung jung dúng é sù lé le, byí pyám aq; náng zè yu pyám byí é su
- 31 chyáng mai le, hkâdúng yù lo. Nungmoq ô nau é dông supé lé kut nhâng nau é su, yhangmoq lé le kut byi keq.
- 32 Nungmoq lé chyitdap é bang lé za chyitdap kô le gi, nungmoq é matú hai akyú bò kó rà lhú? Yubak dap bang le, yhumsing lé chyitdap é bang lé gi,
- 33 chyitdap nyi akô. Nungmoq lé ge é dông kut nyi é bang lé za, ge é dông kut nyí kô le gi, nungmoq é matú hai akyú bò kó rà lhú? Yubak dap bang le

^a 6:20 Garai Gasâng é mingdán gâ é gi, Garai Gasang up é lé gâ lhê. ^b 6:23 Myiqhtoi pé le zing-ri huí é yanmai, yhangmoq chyunghuq wó nyi akô. Haú eq rajung za, jamjau huí é bang nga-nhúng le chyunghuq wó rà nghut lhê. ^c 6:26 Myiqhtoi pyoq pé gi, Garai Gasang jéyáng é hui rà.

³⁴ haû su kut nyi akô. Supé lé zè chyi byî le, dum wó tau byi râ su dut é bang lé za, chyi byî le gi, nungmoq é matú hai akyû bò kó râ lúhú? Yubak dap bang lhang chyi byî é myhó dum wó yû shoq, yubak dap é bang lé chyi ³⁵ byî akô. Nghut kôlhang, nungmoq gi, nungmoq é gye pé lé chyitdap mù, ge é đông kut byî nyi keq. Dum wó taû yù râ lé myoq a byu é za, chyi ngho byi keq; haû su kut jáng, nungmoq wó é chyunghuq ko râ eq, Myhang htáng htúm Su é yhangzô pé dut râ nghut lhê; hkâsu mù gâ le, Yhang gi, jeju a dat bun bang eq agè ashop é bang ³⁶ lé ge é kut nyi ri. Nungmoq é Îwa Garai Gasang shogyo nhikmyin sê é su, nungmoq le shogyo nhikmyin nyi keq.

A Jéyáng Râ Hkyô

Mht 7:1-5

³⁷ A jéyáng é za nyi keq; haû jáng, nungmoq le jéyáng é a hui kó râ nghut lhê. A doqdân é za nyi keq; haû jáng, nungmoq le doqdân é a hui kó râ nghut lhê. Mara hkyut byi keq; haû jáng, nungmoq le mara hkyut byî é ³⁸ hui kó râ nghut lhê. Byi keq, haû jáng, nungmoq le dum byî é hui kó râ nghut lhê. Mán é búng mai byíng mui shùn shoq nhùn chyíng, dún chyíng kat mù, nungmoq é tanghkoí hkaû má lik kat byî é hui kó râ. Hkâsu mù gâ le, nungmoq lik byî é bung èq, nungmoq lé dum lik byi râ nghut lhê.” gâ ri. ³⁹ Hau htoq agó, Yhang dangtú ralhúm đông yhangmoq lé dum taí é gi, “Myoqjit sù gi, myoqjit sù lé hkyô wó tûn shit lhê lúhú? Yhangnhik í yuq é donghkong má byit gyó kó râ nghut

⁴⁰ lhê, a nghut kó lúhú? Jongzo gi, sará htoq gyaú râ a nghut; nghut kôlhang, gúm shoq mhoq yû bê sù ó nghut kôlhang, yhumsing é sará su dut râ nghut lhê.

⁴¹ Yhumsing myoq hkaû má lúng tô é siktúm^a lé lhang a myit wú é nhíng, haí mù luí, nunggu nungmâng é myoqwàng^b lé myang lhê lúhú?

⁴² Yhumsing é myoq má lúng tô é siktúm lé lhang a myàng sù nhíng, ‘Gumang hpó ê, náng myoq má lúng tô é myoqwàng lé, ngò choq pyám byi lé.’ nghû luí, náng é gumang hpó lé hkâsu wó taí râ lúhú? Gegùn labyoq kut sù ê, náng é myoq má lúng tô é siktúm lé hí choq pyám aq. Haû jáng sheq, nunggu nungmang é myoq má wang tô é myoqwàng lé choq pyám byi râ matú, nàng san za myàng râ nghut lhê.

Agàm Eq Ashi

Mht 7:17-20, 12:34-35

⁴³ A ge é ashi zuí é, ge é shigâm hkâmá le a joq. Ge é ashi zuí é, a ge é shigâm le a joq. Haû mù luí, shigâm hkangmó lé, zuí é ashi lé wú mù wó sê hkyin yu lhê. Dangké, zubyap mai maihpáng-shi ó le a myang hpoyoq yù wú, zugyóm mai le tsibiyiq shi a wó ⁴⁵ hpoyoq yu wú. Ge é sù gi, yhumsing é i-myit unghkaû mâ é sutdò mai ge é zè pé lé lhoq htoq shit lhê. Agè ashop é sù gi, yhumsing é i-myit unghkaû mâ é agè ashop é sutdò mai, agè ashop é zè pé lé lhoq htoq shit lhê. Haí mù gâ le, yhâng é i-myit unghkaû má byíng mui tô é lé za, yhâng é nhut mai taí htoq lo é nghut lhê.

^a 6:41 *Siktúm* nghu e gi, yubak mara kô é lé taí lhê. ^b 6:41 *Myoqwàng* nghu e gi, yubak mara atiq azo lé taí é nghut lhê.

**Lughtân Htoq Má Yhûm Saí Sû Eq Myi
Chîn Dum Má Yhûm Saí Su É Hkyô**

Mht 7:24-27

- ⁴⁶ Ngò taí é eq rajung za lháng a wó châng kut kô é nhîng, haí mù luí, nungmoq Ngo lé 'Yhumsîng ê, Yhumsîng ê.' nghu nyi akô lú? Ngá chyáng lé mù, ngá dang gyô yù luí, châng kut é sù ó nghut kôle, hkasû é sù eq wuí é
- ⁴⁷ lé ngò nungmoq lé shit kyo kôle. Haú yuq gi, wahpang yhûm saí le, nik nik du luí a dui é lunghtân htoq má apûn awang hi é sù eq wuí lhê. Wuí jê lò luí wuibaù pê èq yhûm haú lé lo gùn kôlhang, ging ging tíng tíng saí to bê
- ⁴⁸ nghut luí, haú lé a wó gun nhún. Ngá dang gyô yù mù, a cháng sù gi, apûn awang a saí é za myi chîn dum má wahpang yhûm saí sù eq wuí nyi ri. Wuíbaù pê èq yhûm haú lé lo gun kat é eq, haú hkûn jáng, lêng gyop byuq ri. Yhûm haú byoq hten byuq é gi, yù whuí a bò loshoq dut byuq râ nghut lhê." gâ ri.

Romaq Gyezau Rayuq É Lumjîng Myit

Mht 8:5-13; Yhn 4:43-54

- 7** Yesuq gi, shiwa byu pé lé ban mhoqshit é htâng má, Kaper-na-um wà shut wang ló ri. Haú hkûn, Romaq gyezau rayuq é chyitdap dui-nhâng zoshâng gi, shî-nò no nyi ri.
- ² Haú u lé, gyezau hpó gi, Yesuq é hkyô lé wó gyo jáng, yhâng é dui-nhâng zoshâng lé lhoq gê byi râ matú, Yesuq lé ê ji lò keq ga, Yudaq suwún wuí
- ³ lé nhang kat ri. Haú bang gi, Yesuq chyáng jé ê kô é hkûn, "Yhang gi, nàng shí hkyô kut byi râ matú gingdán
- ⁴ é sù, yhang nghut nyi ri; hkâsu mù gâ le, yhang gi, nga-nhûng amyû lé chyitdap é eq, ngamoq matú tarajong le kut byi sù nghut ri." ga luí, Yhang lé zuq

⁶ zuq dîng wut nyi akô. Haú mù luí, Yesuq gi, yhangmoq eq rahá za e ló ri.

Haú yhûm eq hká hé a wê é má jé jáng, Romaq gyezau hpó, yhâng é luzúm wuí lé taí nhang kat é gi, "Yhumsîng Yesuq ê, nàng gîng lé hkâlhoq hkyik lo. Nàng, ngá é laishîn-htâng má, lé nang râ lháng ngò má a gingdán. Haú mù, ngò, nàng chyáng jé lé râ matú gingdán é sù a nghut; Nàng, dang rahkun za taí kat laq, haú hkûn, ngá é dui-nhâng zoshâng ge ló

⁷ râ nghut lhê. Hkâsu mù gâ le, ngò le ahkáng ayá wó é zau rayuq é a-ô má é zau nghut lhê; ngá é a-ô má le gyezô pé nyi lhê, rayuq lé 'Ê aq!' nghu le, yhang e ló lhê; góyuq lé, 'Lò aq!' nghu le, yhang lò lhê; ngá jûn lé le, 'Shí kut aq!' nghu le, yhang kut lhê." gâ ri.

- ⁹ Yesuq gi, dang haú lé wó gyo jáng, haú yuq é hkyô lé maú byuq luí, Yhang htâng châng é shiwa byu pé lé lhing wú mù, "Ngò, nungmoq lé taí kôlé, Israelaq amyû má lháng, shí í lumjîng é sù lé, Ngò a myang wú."
- ¹⁰ ga taí ri. Nhang kat é bang yhûm má dum taú jé jáng, no nyi é dui-nhâng zoshâng gi, ge to lánng é lé ló myang akô.

Shí Sû Lé Dum Lhoq Tui É Hkyô

- ¹¹ Hau htâng hkâ-myháng a myáng má, Yesuq gi, Yhâng é chángzô pé eq, shiwa byù moq mó le mù rahá za
- ¹² Na-in gâ é wà shut e ló akô. Haú wà wàng hkum má jé lo é hkûn lé, chuimó myhí é yuqzo te gi, shí mù, yhâng é mâng lé waq htoq lé lo akô. Wà byù myo myo le, chuimó myhí haú eq rahá
- ¹³ châng lé lo akô. Yhumsîng gi, haú chuimó myhí lé myàng jáng, yhang lé wú shogyo luí, "Hkâ-ngaû." ga taí ri.

- ¹⁴ Yesuq gi, gung shut huí ê mù, loq èq ê záng kat ri. Haú hkûn, waq tô é bang le jâng yap to byí akô. Yhang gi, “Zo-râm ê, ngò, nang lé taí lhê, toq aq.”
- ¹⁵ ga taí ri. Haú hkûn, shí bê sù gi, toq zûng mù dang taí lo ri. Yesuq gi, zo-râm haú lé yhangnú chyáng dum ap byí ri.
- ¹⁶ Byù lhunglhâng bang gyuq maú bùm kôluí, Garai Gasang lé hkya-ôn é dang gi, “Myiqhtoi mó, nga-nhûng chyáng lé pô htoq bê nghut ri. Garai Gasang gi, Yhâng é amyú lé garúm rà ga lé kúm wú nyi ri.” ga taí nyi akô.
- ¹⁷ Haú Yesuq é hkyô eq sêng é ludang lé, Yuda mau eq haú mau awui ayàm jowò hkangmó má taí pyo myhîn lô bum akô.

**Yesuq Eq Wui-myhup
Sarâ Yohan É Hkyô**

Mht 11:1-19

- ¹⁸ Haú hkûn, wui-myhup sarâ Yohan é chángzô pé gi, haú hkyô banshoq
- ¹⁹ yhang lé lo taí kyô akô. Haú mù luí, Yohan gi, yhâng é chángzo í yuq lé ji yù mù, haú Yhumsing chyáng nhang kat luí, “Nàng gi, haú jé lé lô rà Sù nghut lhê lú? Haú a nghut jáng, ngamoq, góyuq lé lánq ra shirâ lú?” ga, myí nhang kat ri.
- ²⁰ Haú nhik gi, Yesuq chyáng jé jáng, “Nàng gi, haú jé lé lô rà sù nghut lhê lú? Haú a nghut jáng, ngamoq góyuq lé myoqbyu lánq nyí ra shirâ lú?” ga luí, Wui-myhup Sarâ Yohan gi, ngá-nhik lé nánq chyáng myí nhang kat ri.” ga taí akô.
- ²¹ Haú u yhang, Yesuq gi, nò zo hpyo zo, noli nõjàng huí é bang eq agè ashop é nat dap jun dap é byù myo myo lé, lhoq gê byí ri. Myoqjit bang myo myo lé le, myoq dum myàng

- ²² nhang ri. Haú hkûn, Yesuq gi, yhang-nhik lé, “Myàng mi-myàng, wó gyo má wó gyo, Yohan lé lô taí kyo keq; myoqjit bang, myoq wó myàng bekô; hkyí hten bang le, wó so bekô; mang-gâm dap bang le, lhoq gê byí é hui bekô; nojit bang le, wó gyo bekô; shí bê bang le, lhoq dui toq é hui bekô; myùng bâng é matú, gabú danglù hko
- ²³ kyô nyí bê nghut lhê. Ngá é yanmai, Ngo lé lum shut é hkyô a bò sù gi, hkungsô wó nyi ri.” ga taí ri.
- ²⁴ Yohan é chángzô nhik lô byuq é htàng má, Yesuq gi, Yohan eq séng luí, byù moq mó lé taí é gi, “Nungmoq gi, haí lé hpuy wú rà matú, haú yoso shut e akô lú? Lai èq hik nhûn é jamgàm
- ²⁵ lé wú rà matú nghut akô lú? Haú a nghut jáng, haí lé wú rà matú e akô lú? Nú-nhâm é mebu wut sù lé wú rà matú e akô lú? A nghut! Wú keq, gyai hpaú é mebu wut luí agùn agó wó bang gi, hkohkâm-wâng pé má sheq
- ²⁶ ru nyi lhê. Haú nghut le gi, haí lé wú rà matú ê kô é lú? Myiqhtoi rayuq lé lú? Haú kúm nghut ri. Ngò, nungmoq lé taí kôlé, Yohan gi, myiqhtoi
- ²⁷ htoq lháng gyaú sù nghut lhê. Haú yuq é hkyô lé, Chyúmdang má kâ tô é gi,
- ‘Wú aq, Nàng é hkyô lajang lánq rà matú, Ngá é lagyo lé, Nàng é hí má Ngò nhang kat rà nghut lhê.’^a
- ²⁸ gà ri. Ngò, nungmoq lé taí kôlé, myiwe wui mai hku kat é bang má, Yohan htoq je kô é rayuq lháng a nyí, nghut kôlhâng, Garai Gasâng é mingdán má je tiq dik sù gi, Yohan htoq je kô lhê.” gà ri.
- ²⁹ Míngbyù lhunglhâng bang eq kang guq bang gi, dang haú pé lé wó gyo kôjáng, Yohan byí é baptisma lé hkâm

^a 7:27 Mal 3:1

- yù kô é nghut mù luí, Garai Gasâng é dingmán é hkyô lé sê gyô yu akô.
- ³⁰ Hparishe pé eq tarâ sará pé kúm gi, Yohan byí é baptisma a hkam yù kômù luí, Garai Gasang hen lajang é hkyô lé yhumsing gung é matú he pyâm akô.
- ³¹ Yesuq dum taí é gi, “Haú mù luí, byù myú shí lé, Ngò, hai èq taí kê wú râ lhu? Yhangmoq hai eq wuí akô lhu?”
- ³² Yhangmoq gi,
 ‘Nungmoq é matú, ngamoq sampyí mut byi kôlhang, nungmoq gi, a gó kó, ngamoq ngàu hkyangsâng kôlhang, nungmoq gi, a ngàu kó.’
- ga luí, gài pé má zùng uchyang rayuq eq rayuq wut taí lhum nyi é zo-shâng wui eq wuí akô. Hkâsu mù gâ le, Wui-myhup Sará Yohan jé lé luí, muk a zo, tsibiyiq a shuq é nyi le le, ‘Yhang gi, nat gang dap sù nghut ri.’
- ³⁴ ga luí, nungmoq taí akô. Haú Byu Yhangzo jé lé luí, zo mù shuq mù kut jáng le, ‘Shí yuq gi, zo myoq shuq myoq noq sù eq, kang guq bang eq yubak dap bâng é buinùm hpó nghut ri.’ ga dum taí akô. Nghut kôlhang, hpaqchyí byéng-yá é yhangzô pé gi, hpaqchyí byéng-yá tengmán é hkyô lé saksé hkám byí nyi akô.”^a gâ ri.

**Yubak Dap É Myiwe Rayuq,
 Yesuq Lé Xú But Byí É Hkyô**

- ³⁶ Hparishe rayuq gi, Yesuq lé yhang chyáng zang zo râ matú ji kat ri. Haú mù, Yesuq gi, haú Hparishe é yhùm má wàng luí zo râ matú zung tô ri.
- ³⁷ Haú hkûn, wú keq, haú wâ mâ é yubak dap é myiwe rayuq gi, Yesuq haú

- Hparishe é yhùm má zô zung tô é lé sé jáng, gyai hpau dap é namngón xù
- ³⁸ bo é luq hpyû bông yu lé luí, Yesuq é nunghtáng hkyî wàng má ngau yap to mù, Yhâng é hkyî má ngaubyí èq záng lhoq teq byi jáng, ûxam èq but sut pyám byí ri. Dum nghut jáng, nhut èq puq luí mura lé but byí ri.
- ³⁹ Yesuq lé ji é Hparishe wá gi, haú lé myàng jáng, “Shí yuq myiqhtoi nghut le gi, Yhang lé záng htûng é sù, ó yuq nghut é eq hkâsú é yubak dap é myiwe nghut é lé, Yhang sé râ nghut lhê.” ga luí, yhâng é unghkaú má myit nyi ri.
- ⁴⁰ Yesuq gi, “Simun ê, Ngò, nang lé taí râ rajung joq ri.” ga taí ri.
 Simun le, “Sarâ ê, taí aq.” ga taí kat ri.
- ⁴¹ Haú hkûn, Yesuq gi, “Ngùn chyí zo sù rayuq chyáng, chyín dap é byù í yuq nyi ri. Rayuq gi, denari^b ngo shô chap, rayuq gi, ngo xê chap dap ri.
- ⁴² Haú nhik gi, chyín xap râ ngùn a wó kôluí, chyín yhumsing gi, yhangnhik lé xap a ra lò gâ pyâm ri. Haú mù luí, haú nhik mâ é hká yuq gi, yhang lé je chyitdap râ lhu?” ga myí ri.
- ⁴³ Simun gi, “Je myo lhoq lhut hui sù, nghut râ su ngam ri.” ga tû taí ri.
 Yesuq gi, “Nàng myit e dòng jô ri.” ga taí ri.
- ⁴⁴ Haú hkûn, Yesuq, myiwe zo haú lé lhing wú luí, Simun lé, “Nàng myiwe zo shí lé myang lhê lhu? Ngò, nàng é yhùm má wang le, hkyî chi râ uchyam, nàng a byi, yhang kúm gi, ngaubyí èq ngá hkyî lé tik byi luí, yhâng é xam èq sut pyám byi bê.
- ⁴⁵ Nàng gi, ngo lé nhut èq a puq nghut ri; yhang kúm gi, ngò yhúmhaú má wang é mai ngá hkyî má a no loshoq

^a 7:35 Nghut kôlhang, Garai Gasâng é hpaqchyí byéng-yá lé lhom hap yu é banshoq bang gi, Garai Gasâng é hpaqchyí byéng-yá haú, tengmán ri ga saksé hkám nyi akô. ^b 7:41 Denari rachap gi, ra-nyí lhê é byù rayuq é zuihpau eq wuí ri.

- ⁴⁶ puq nyi râ. Nang gi, ngá ulhum má xû a but byî wú, yhang kúm gi, ngá é hkyî má nàm ngón é mura but byi
- ⁴⁷ bê nghut ri. Haû su mù, ngò, nang lé taí lé, haû myiwe gi, je chyitdap luí, yhang wó é yubak myo myo lé hkyut pyám byî é hui bê. Shau za mara hkyut pyám byî é hui sù gi, shau za chyitdap sù nghut ri.” ga taí ri.
- ⁴⁸ Yesuq gi, myiwe haû lé le, “Ngò, náng é yubak mara hkyut pyám byi bê.” ga taí ri.
- ⁴⁹ Rahá zung tô é bang gi, “Yubak mara lhang wó hkyut pyám byi sù, shí yuq gi, ó wá nghut lhê lhu?” ga luí, myit nyi bum akò.
- ⁵⁰ Yesuq gi, “Náng é lumjín myit èq nang lé hkyi yù bê, ngón za ló aq hkoi.” ga luí, myiwe haû lé taí kat ri.

Yesuq Htâng Châng É Myiwe Wui

- 8** Hau htâng hkâ-myháng a myáng má, Yesuq gi, Garai Gasâng é mingdán hkyô eq sêng é gabú danglù lé taí kyo uchyang, Yhâng é lagyo raxe í yuq eq rahá za, rawa htâng rawà jé
- ² e ló ri. Hau htoq agó, nat gang dap é mai le, nõhpyo mai le Yesuq èq lhoq ge yu é myiwe wui, nat nyhit nat lhoq htoq pyám byi huí é, Magadalaq wà
- ³ mâ é Mariq le, Herut é ikun zum sù Kuza é yhumsing myhí Yoanaq le, Susannaq le, gotú myiwe wui myo myo le, Yesuq eq rahá nghut akò. Haû bang gi, yhumsing wó du é í Yesuq eq lagyo pé lé byi zo byi huq nyi akò.

Kyôshi Sân É Hkyô

Mht 13:1-23; Mrk 4:1-20

- ⁴ Wà hkang wà mó mâ é bang gi, Yesuq chyáng zup zing lé lo bùm kômù shiwa byù moq mó zup ming tô é hkûn, Yesuq dangtú dông taí kyô é

- ⁵ gi, “Kyô hkyô sù rayuq gi, kyôshi san râ ga htoq e ló ri. Yhang, kyôshi sân kat é hkûn, ra-am gi, hkyô má gyó ang mù, byu èq záng nang pyeq pyâm lhê, maulat nghoq pê èq hte zo pyâm lhê
- ⁶ dut ri. Ra-am gi, luqgok yò má gyó ang mù, yuq htoq lo é hkûn, myigùng a teq é yanmai nyhuí shi byuq akò.
- ⁷ Ra-am gi, zugyóm hkaû má gyó ang luí, zubyap eq rahá yuq htoq lô mù,
- ⁸ wup pyâm é hui bê nghut ri. Nghut kôlhang, ra-am gi, myihpún bo é jang má gyó ang mù, yuq kô lò jáng, rashô tú myô jat lo ri.” ga taí ri.

Yhang haû su ga taí nyi é hkûn, “Gyô yù râ nohkyap dap sù gi, gyô yù sháng gaq!” ga le, htê mó èq taí kat ri.

- ⁹ Haû hkûn, Yhâng é chángzô pé gi, dangtú shí hai lichyúm nghut lhê lhu ga, Yhang lé myí akò. Yhang gi, “Garai Gasâng é mingdán eq sêng é sê gyo wui é hkyô pé lé sê gyo râ ahko ahkáng, nungmoq lé byî to bê. Nghut kôlhang, góbâng matú gi,
- ‘Wú to kôlhang, a myàng kó sháng,
- gyô nyi kôlhang, a sê gyo kó sháng.’^a
- ngû, ngò dangtú dông taí lhê.

- ¹¹ Ahkui lhê é dangtú shi é lichyúm gi, ísu nghut ri: kyôshi gi, Garai Gasâng
- ¹² é mungdang nghut nyi lhê. Hkyô má gyó âng é kyôshi gi, haí eq wui lhê lhu gâ le, haû mungdang lé byu pé wó gyô é htâng má, lumjín é má le, hkyi yu é má le, a jé kó sháng gaq ga luí, yhangmoq é i-myt hkaû mai nat Tsadán èq mungdang haû lé, lé yu pyâm é hui
- ¹³ bang eq wui lhê. Luqgok yò pé má gyó âng é kyôshi gi, haí eq wui lhê lhu gâ le, haû mungdang lé wó gyo jáng, gabú myit èq hap yù kôlhang, amyit a wó chín mù, rayoq rabun za lum-

^a 8:10 Esai 6:9

jíng luí, gunglaú huí é nyí má, dum
¹⁴ htak ló byuq é bang eq wuí lhê. Zú-
 gyóm má gyó âng é kyôshi gi, haí eq
 wuí lhê lhú gâ le, haú mungdang lé
 gyô yù luí, yhumsing é asak dui e ló é
 hkyô má, shí ipyat lhê é myit wui myit
 hke hkyô, ngùn zè sutgan eq mingkan
 ngón hkyô má myup byuq luí, mo é
¹⁵ ashi a zúí é bang eq wuí lhê. Hpún bo
 é myigùng má gyó é kyôshi kúm gi,
 haí eq wuí lhê lhú gâ le, haú mung-
 dang lé lhumzui luí ge é i-myt èq ban
 gyô yù mù, gíng tíng shoq zúí zìng luí,
 wó jân é i-myt èq ashi zúí é bang eq
 wuí lhê.

Myibung Htún É Hkyô

Mrk 4:21-25

¹⁶ Myibung lé tap mù, aú èq nghop tó
 é le, yhupchong ô má tó tó é le, ó a
 kut wú kó. Nghut kôlhang, wang lé lô
 bang myoq wó myâng râ matú kúm
 gi, tsungjang má tsung to to chyat kut
¹⁷ akô. Hkâsu mù gâ le, a htoqzê loshoq
 haq tó é zè haí le a joq, a sé a byông
 htoq loshoq wó záu tó é zè le haí a joq
¹⁸ nghut ri. Haú mù luí, nungmoq hkâsu
 wó gyô yu é hkyô lé sidiq nyi keq, haí
 mù gâ le, wó to sù lé gi, jat byi shirâ,
 a wó su chyáng mai kúm gi, yhang wó
 to bún é mâ é lé lhang, yu pyám byi
 shirâ nghut lhê.” ga taí ri.

Yesuq É Yhângnu Eq Yhanggu Pé

Mht 12:46-50; Mrk 3:31-35

¹⁹ Haú hkún, Yesuq é yhângnu eq
 yhanggu pé gi, Yhâng chyáng lé lô kô
 le, shiwa byu pé lúm chyûn chyap to
 kômù, Yhâng chyáng a wó wang ê kó
²⁰ nghut ri. Haú hkún, Yhang lé, “Náng
 nu eq nunggu pé gi, nang lé hui naú
 luí, shinggan má lánq yap bum akô.”
 ga taí kyo akô.

²¹ Yesuq gi, yhangmoq lé, “Garai Ga-
 sâng é mungdang lé gyô yù luí, châng
 é bang gi, Ngá nu eq Ngá gú pé nghut
 akô.” ga luí, yhangmoq lé tû taí kat ri.

Laidun Mó Lé Yesuq Lhoq Zím É Hkyô

Mht 8:23-27; Mrk 4:35-41

²² Ra-nyí lé, Yesuq gi, Yhâng é
 chángzô pé lé, “Nga-nhúng nhông
 he hpoq shut dap e ló sháng.” ga
 taí luí, lhaí má wàng mù gú dap e ló
²³ akô. Yhangmoq gú dap e ló é hkún
 lé, Yesuq gi, yhup myhî tó ri. Haú
 u lé, nhông haú má laidun mó lò
 luí, lhaí má wui byíng lô mù, yhang-
 moq myup shí râ su dut lò nyi bekô
 nghut ri.

²⁴ Haú mù, yhangmoq gi, Yesuq
 chyáng huí ê luí, Yhang lé nhaú
 pun mù, “Yhumsing ê, Yhumsing ê,
 nga-nhúng myup ló nyi ri.” ga taí akô.

Haú hkún, Yhang toq luí, laidun eq
 wuilhêng pé lé tân kat jáng, haú pé
²⁵ gi, zim za dut ló byuq bê. Haú mù,
 Yesuq gi, “Nungmoq é lumjínq myit
 gi, hkâmá nghut akô lhú?” ga luí,
 yhangmoq lé myî ri.

Yhangmoq kúm gi, gyuq maú byuq
 bùm kôluí, “Shí yuq gi, hkasú é byù
 nghut lhê lhà? Yhang hkunmó hkyó
 jáng, lài eq wuilhêng pé lhang gyo
 byi ri-nhung!” ga luí, rayuq eq rayuq
 myî lhùm bum akô nghut ri.

Nat Lé Hkat Htoq Byí É Hkyô

Mht 8:28-34; Mrk 5:1-20

²⁶ Hau htâng, yhangmoq gi, Galile
 mau tû tap mâ é Gerase byu pé é
²⁷ mau má jé dap e ló bekô. Yesuq kong
 shut doq ló le, haú wâ mâ é nat gang
 dap é sù rayuq gi, Yhang lé hui ri.
 Haú yuq gi, yhùm má le a nyi é za,
 mebu a dap é, lupdùng má myáng

- ²⁸ myáng nyi nyi sù nghut ri. Haú yuq gi, Yesuq lé myàng jáng, wut garu luí, yhâng é hkyí wang má paí gop to mù, “Myhang htâng é Garaí Yhangzo Yesuq é, Nàng gi, ngò eq haí séng lhê lú? Ngo lé a zing-ri râ matú, ngò nang lé dúng nyi lhê.” ga luí, htê mó
- ²⁹ èq taí garú nyi ri. Hkâsu mù gà le, Yesuq gi, agè ashop é nat lé haú yuq gùng mai htoq ló râ matú, tân pyâm é yanmai nghut ri. Byù haú yuq lé nat gâng èq adàm dàm wang júng hkanmó, loq eq hkyí má toqjâng tuí èq tuí shung, kyum xâng tô é eq, zúng tô é nghut kôlhang, lãng hpyit pyám pyám kut é htoq ago, nat gâng èq yhang lé yoso hkaú shut lãngmhap yù kut nyi ri.
- ³⁰ Yesuq gi, yhang lé, “Náng myíng haí gà lhê?” ga myí kat é hkûn, yhang gi, “Legio^a gà lhê.” ga tú taí ri. Haí mù gà le, yhâng chyáng nat gang myo myo
- ³¹ wang lúng tô é yanmai nghut ri. Nat jùm gi, yhangmoq lé nik dik htûm é Lasang-dong shut a kôn kat râ matú, Yesuq lé chòm dúng nyi bum akô.
- ³² Haú u lé, waq rajùm mó gi, bùm yàm má dû but zô nyi bum akô nghut ri. Haú mù, yhangmoq gi, waq pè chyáng wàng nhâng laq ga, Yesuq lé ahkáng dum dung dung kut kojáng, Yesuq gi, yhangmoq lé ahkáng byi
- ³³ kat ri. Haú mù luí, nat gang jùm gi, byù haú yuq chyáng mai htoq ló kô-luí, waq pè chyáng wàng byuq bekô nghut ri. Haú hkûn, waq haú jûm gi, gampyoq mai nhông hkaú shut rut din yán wang ló kôluí, myup shi byuq bekô nghut ri.
- ³⁴ Waq zúng bang gi, haú su dut é lé myàng jáng, h pang din ló kômù, myuq hkaú mâ é bang eq awui ayàm

- mâ é bang lé ló taí kyô akô nghut ri.
- ³⁵ Haú mù, wó gyô é bang gi, haú hkyô lé wú râ matú htoq lé lo akô. Yhangmoq gi, Yesuq chyáng jé lé kô é hkûn, nat gang htoq byuq hui sù, Yesuq é hkyí wang má mebu wut to luí, byù gè rayuq su zùng to lãng é lé myàng kômù, gyuq dan bùm bekô nghut ri.
- ³⁶ Nat dap sù lé hkâsu kut luí lhoq ge yu é hkyô lé myang é bang gi, góbang lé taí kyô akô nghut ri. Haú hkûn, Gerase byu pè é mau mâ é lhunglhâng bang gi, gyuq dan dik kôluí, Yesuq lé yhangmoq é mau mai htoq ló byuq râ matú, chòm dúng tóngbán akô. Haú mù luí, Yesuq gi, taú ló byuq râ matú lhaí má wàng bê nghut ri.
- ³⁸ Nat htoq byuq huí é sù gi, Yesuq htâng cháng râ matú, Yesuq lé dúng
- ³⁹ tóngbán ri. Nghut kôlhang, Yesuq gi, “Nàng, yhûm shut sheq ló mù, Garaí Gasang, nang lé hkâ-í kut byi bê hkyô lé, ló taí kyo aq.” ga luí, yhang lé ló nhâng bê nghut ri. Haú hkûn, yhang htoq ló mù, Yesuq yhang lé hkâ-í kut byi bê hkyô lé, haú wà rawà bang lé ló taí kyô ri.

**Ya-iruoq É Yhangzo Byizô É
Hkyô Eq, Yesuq É Bu Lé Lé
Záng É Myiwe Rayuq É Hkyô**

Mht 9:18-26; Mrk 5:21-43

- ⁴⁰ Ahkuí, Galile byu pé gi, Yesuq dum taú lò râ lé lãng nyí kô é nghut mù, Yhang dum taú gú dap lo é hkûn gabú
- ⁴¹ myit eq lhom te yu akô. Haú hkûn, Ya-iruoq gà é tarajong má up sù rayuq gi, jé lé lô mù, Yesuq é hkyí wang má hkyihput htuq luí, yhâng yhûm má lé
- ⁴² râ matú ji nyi ri. Hkâsu mù gà le, raxe í zân bò bê é, yhangzo byizo te gi, shi ló nyi é yanmai nghut ri.

^a 8:30 Legio gà é lichyúm gi, gyezo 4000 eq 6000 gyoro bo é gyedap lé taí ri.

Haù mù, Yesuq Chávez e ló le, shiwa byu pé gi, Yhang lé záng htung lo bum akô. Haù u lé, raxe í zân sui yuî luî ngunzè lhunglháng ban pyám shoq chi sará pè chyáng yâ wú kôlhang, hká yuq le a wó yâ gè byi é^a myiwe myhí rayuq le haù hkaù má bo tô ri. Myiwe haù gi, Yesuq é nunghtáng má huî lé mù, Yhâng é bushi htâng má ê záng kat eq, suí yui é ana gi, ge byuq bê nghut ri.

⁴⁵ Haù hkûn, Yesuq gi, “Ngo lé, ó yuq záng bê lú?” ga luî myi jáng, lhunglhâng bang gi, a sé ga he nyi bùm kô é hkûn lé, Petruq gi, “Yhumsíng ê, shiwa byu pé gi, náng é lhinghkyuq mai náng chyáng chyîn chyap wang lo bùm kô é yanmai, nang lé záng bekô râ nghut lhê?” ga taí ri.

⁴⁶ Yesuq gi, “Byù rayuq ngo lé lé záng mù, ngá chyáng mâ é hpungwup a-tsam htoq ló é lé, ngò châng sé kat ri.” ga taí ri.

⁴⁷ Haù jáng, myiwe myhí haù gi, yhang a wó haq zaú to lô é hkyô lé sé jáng, req req nán lé lô mù, Yesuq é hkyî wang má ngóm gop kat luî, haì mù Yhang lé záng é hkyô eq, hká dông ge ló byuq é hkyô pé lé, shiwa byù banshoq bâng é hí má Yesuq lé taí kyô nyi ri. Yesuq gi, “Ngá zo ê, náng é lumjínng myit gi, nang lé lhoq gè byi bê nghut ri, ngón za ló aq hkoì!” ga luî, myiwe haù lé taí kat ri.

⁴⁹ Yesuq gi, dang ru taí nyi ashí hkûn, tarajong má up sù Ya-iruoq é yhûm mai byù rayuq jé lé lô luî, “Nung zo gi, shi byuq bê, haù sará lé hkâlhoq hkyik nyí lo.” ga luî, Ya-iruoq lé taí kyô ri.

⁵⁰ Yesuq gi, dang haù lé wó gyo jáng, “Hkâgyuq, za lumjínng aq, haù jáng,

yhang ge byuq râ nghut lhê.” ga luî, Ya-iruoq lé taí ri.

⁵¹ Yesuq gi, Ya-iruoq é yhûm má jé é hkûn lé, Petruq, Yohan, Yakuq, eq haù myiwe zô é yhângnu eq yhângwa mai lai luî, yhûm haù má, ó lé le a wàng nhâng kut ri. Haù u lé, lhunglhâng bang zoshâng hau é yanmai, ngaubyi ngau-nhap èq yón nyi akô. Yesuq kúm gi, “Hkâ-ngau kó, yhang shi byuq é a nghut, yhup myhí tô é sheq ru nghut lhê.” ga luî, yhangmoq lé taí ri.

⁵³ Zoshâng gi, shi byuq bê lé yhangmoq sé kôluî, yhangmoq gi, Yesuq lé wuizui kut pyám byí akô. Yhang kúm gi, myiwe zo hau é loq má zuí to mù, ⁵⁴ “Zoshâng ê, toq aq.” ga taí kat ri. Haù mù luî, yhâng woi-nyí dum taù wàng mù, haù hkûn jáng toq yap ri. Haù jáng, Yesuq gi, zoshâng haù lé zôjung byi keq, ga yhangmoq lé taí kat ri.

⁵⁶ Haù myiwe zô é yhângnu eq yhângwa nhik gi, gyai maú byuq akô. Nghut kôlhang, Yesuq gi, haù dut é hkyô ó lé le a taí kyo râ matú, yhangnhik lé taí hkûm tô ri.

Lagyo Raxe Í Yuq Lé Nhang Htoq Kat É Hkyô

Mht 10:5-15; Mrk 6:7-13

9 Yesuq gi, haù lagyo raxe í yuq lé wut yù mù, nat gang banshoq lé wó hkat htoq pyám râ matú eq, noli nojàng wó lhoq gè râ matú, yhangmoq lé wum-o a-tsam eq ahko ahkáng ² byí ri. Hau htâng má, Garai Gasâng é mingdán hkyô hko kyo râ eq, nõhpyo lhoq gè byi râ matú nhang htoq kat ri. ³ Yesuq gi, yhangmoq lé, “Hkyowui é matú, dumbáng, etap, zoshuq, ngùn eq, bu htaí lháng hkâwún hkâchúng

^a 8:43 Ngunzè lhunglháng ban pyám shoq chi sará pè chyáng yâ wú kôlhang, hká yuq le a wó yâ gè byi gá é, Chyúmdang ra-am má gi, bo lhê; ra-am má gi, a bò.

⁴ kó. Nungmoq hká yhûm má wàng kô-lhang, haú wâ mai dum htoq ló é bui-nyì jé shoq, haú yhûm má za nyi nyi
⁵ keq. Nungmoq lé a lhom hap yu é bang lé gi, yhangmoq é wâ mai htoq ló é hkûn, nungmoq lé a lhom hap yu é saksé dut sháng gaq, nungmoq é hkyiwa má dap é hpuilhaú lé yhangmoq é myoq hí má ko hkyô pyâm to
⁶ keq.” ga taí kat ri. Haú mù, yhangmoq gi, htoq e ló luí, wâ hkanq wâ mó má haú gabú danglù hko kyo uchyang, hká jé hkâmá nõhpyo lhoq gê byí wún akô.

Herut Maú Úng-âng É Hkyô

Mht 14:1-12; Mrk 6:14-29

⁷ Haú su dut é hkyô banshoq lé, mau-zau Herut wó gyô yù luí myit wú nyi ri. Hkâsu mù gâ le, ra-am gi, Yohan
⁸ shi é mai dum dui toq lô bê ga, ra-am gi, Eliyaq dum pô htoq lo ri ga, haú mai, ra-am gi, hí hpyang lhê é myiq-htoi rayuq yuq dum dui toq lô bê ga
⁹ luí, taí bùm kô é yanmai nghut ri. Herut gi, “Yohan é ulhum lé, ngò hpyit pyám nhâng bê, nghut kôlháng, shí í wá taí byông bùm kô é gi, ó wá nghut lhê lhu?” ga luí, Yesuq lé myàng shoq ga ho nyi ri.

Byù Ngo Hkyîng Lé Yesuq Zoshuq Byi Tsó É Hkyô

Mht 14:13-21; Mrk 6:30-44; Yhn 6:1-14

¹⁰ Lagyô pé dum taú lo é hkûn, yhangmoq kut lai lo é hkyô pé, Yesuq lé taí kyô akô. Haú hkûn, Yesuq gi, yhangmoq lé shuú chûng mù, Bet-saida gâ é
¹¹ wâ mó shut tsik za e ló byuq ri. Shiwa byu pé gi, haú hkyô lé châng sé kômù, Yhâng htâng châng e ló akô. Yesuq le yhangmoq lé lhom hap yù mù, Garai Gasâng é mingdán hkyô lé taí kyo luí, nõhpyo gè naú bang lé, lhoq gê byí ri.

¹² Buigyùm zó má, lagyo raxe í yuq gi, Yhâng chyáng huí ê mù, “Haú shiwa byu pé lé, awui ayàm mâ é yhûm pé eq wâ pé má ló mù, zoshuq hô zo luí ló yhup kó sháng gaq, ló nhâng aq. Hkâsu mù gâ le, ahkuí nga-nhúng gi, yoso má nghut nyi ri.” ga luí, Yhang lé taí akô.

¹³ Haú hkûn, Yesuq gi, “Nungmoq, yhangmoq lé rajung jung byi tso keq.” ga tû taí ri.

Yhangmoq gi, “Shí myhò bang lé tso râ zoshuq a é wui le gi, nga-moq chyáng muk-yo muk ngo long eq ngozo í du mai lai luí, haí le a wó nghut ri.” ga taí akô. (Hkâsu mù gâ le, yuqgè wui baú lháng ngo hkyîng kô nghut ri.)

¹⁴ Nghut kôlháng, Yesuq gi, “Shí bang lé rahpúng má ngo xê xê kô kut luí, zùng nhang to keq.” ga luí, Yhâng e chángzô pé lé taí ri. Yhangmoq lé

¹⁵ Yesuq taí é eq rajung za, banshoq

¹⁶ bang lé zùng nhang to bekô. Haú hkûn, Yesuq gi, haú muk ngo long eq

ngozo í du lé yù mù, mauhkûng shut tu wú to luí, jeju ban hkya-on jáng,

haú lé ajap jap hpé luí, shiwa byu pé lé, châng to byi râ matú, Yhâng é

¹⁷ chángzô pé lé byi kat ri. Haú hkûn, yhangmoq banshoq bang zô gyí bùm

kô é htâng má, haú chángzô pé gi, zô myhit tô é pé lé, raxe í mung byíng

shoq wó guq tsíng yu ashí kô nghut ri.

Yesuq Gi, Hkrisduq Nghut Lhê Ga Petruq Taí É Hkyô

Mht 16:13-28; Mrk 8:27-9:1

¹⁸ Radàm lé, Yesuq gi, Yhang baú kyû-dûng nyi é hkûn, chángzô pé le, Yhang eq rahá nghut akô. Hau htâng, Yhang gi, yhangmoq lé, “Shiwa byu pé gi, ngo lé ó yuq nghut lhê ga, taí akô lhu?” ga myí ri.

¹⁹ “Ra-am gi, Wui-myhup Sará Yohan ga; góbang gi, Eliyaq ga; dum ra-am gi, hí hpyang lhê é myiqhtoi rayuq yuq dum dui toq lo é nghut ri ga, taí akô.” ga luí, yhangmoq tû taí akô.

²⁰ Dum, Yhang gi, yhangmoq lé, “Nghut kôlhang, nungmoq gi, ngo lé ó yuq nghut lhê nghu akô lú?” ga myí ri.

Haú hkûn, Petruq gi, “Nàng gi, Garai Gasang nhâng byí é Hkrisduq nghut ri.” ga tû taí ri.

²¹ Shí hkyô ó lé le a taí kyo sháng gaq ga, Yesuq, yhangmoq lé taí hkûm

²² pyâm ri. Haú mù, Yhang gi, “Haú Byu Yhangzo gi, zing-rí é myo myo hui zo luí, suwún wuí, hkyangjong agyi pé, tará sará pê èq he-ngik pyâm é hui mù, sat pyâm é hui ra râ nghut lhê, hau htâng sum nyí nghû râ buinyí má, lhoq toq yu é hui râ nghut lhê.” ga taí ri.

²³ Hau htâng, banshoq bang lé Yhang dum xoq taí é gi, “Ngá htâng cháng naú sù ó yuq nghut kôle, yhumsing gùng yhumsing he-ngik pyâm mù, nyí wuí yhumsing é tapzîng lé waq chûng^a luí, cháng ra râ nghut lhê.

²⁴ Hkâsu mù gâ le, yhumsing é asak lé hkyi yù naú sù ó yuq nghut kôle, asak sum râ nghut lhê; nghut kôlhang, Ngá é yanmai, yhumsing é asak sum pyâm é sù kúm gi, asak hkyi yu é hui râ

²⁵ nghut lhê. Byù gi, mingkan gón lé wó sing to kôlhang, yhumsing é asak woi-nyí sùm byuq é nghut le gi, yhang

²⁶ é matú, haí akyû bò râ lú? Ngò eq Ngá é dang lé, lhom hap yù râ lé hoq é sù ó yuq lé le, haú Byu Yhangzo gi, yhumsing é hpungwup shinggang eq, Yhâng Wâ é hpungwup shinggang, haú chyoiyúng maumang lagyô pê é

hpungwup shinggang èq jé lé é hkûn, ²⁷ hoq pyâm râ nghut lhê. Ngò, nungmoq lé teng za taí kôlé, shi má yap tô é bang ra-am gi, Garai Gasang é mingdán lé a myang é za shí kó râ a nghut.” gâ ri.

**Mosheq Eq Eliyaq Yesuq Lé
Hui Nyo É Hkyô**

Mht 17:1-8; Mrk 9:2-8

²⁸ Dang haú taí é htâng, shit nyí kô nghut jáng, Yhang gi, kyûdung râ

ga Petruq, Yohan, Yakuq pé lé shuí chûng mù, bùm shut doq ló ri. Kyû

dûng nyí le, Yesuq é myoqdong gi, ihpyô isâm htaí lò mù, Yhâng é mebu

³⁰ gi, lhap su duq bang lo ri. Haú hkûn, wú keq, Mosheq eq Eliyaq gi, hpungwup shinggang eq htoq lé lò luí, Yesuq

³¹ eq dâng nyo lhûm nyi akô. Yhangmoq gi, Garai Gasang myit tô é hkyô Yeru-

salem wà mó má Yesuq shí hkâm é dông mai dik lò râ nghut é hkyô lé

³² taí lhûm nyi akô. Petruq eq yhâng luzúm nhik gi, yhup mui nyi akô; nghut kôlhang, yhangmoq bûn lo é hkûn

lé, Yesuq é hpungwup shinggang lé le, Yhang eq rahá yap to su nhik lé

³³ le, myang kat akô. Haú nhik Yesuq chyáng mai gâng ló nyi é hkûn, Pe-

truuq gi, Yesuq lé, “Yhumsing ê, shí jowò má nga-nhúng nyi le ge ri, haú

mù, Nàng é matú ralhûm, Mosheq é matú ralhûm, Eliyaq é matú ralhûm

kut, ngamoq lé, zúm sùm lhum saí nhâng laq.” ga taí kat kôlhang, yhang

haí taí nyi é lé, yhang a sé.

³⁴ Petruq dang taí nyi ashí hkûn lé, mhut jé mù, yhangmoq lé htup zing lo nyi ri. Mhut haú htup lo nyi é yan-

mai, yhangmoq gi, gyuq byuq akô.

³⁵ Haú mhut hkaú mai htoq lo é htê gi,

^a 9:23 Tapzîng lé waq chûng nghu é gi, Yesuq é yanmai jamjau huí é lé taí é nghut lhê.

“Shí yuq gi, Ngá zo nghut lhê; Ngò hkyin yu é Sû le nghut lhê; Yhâng é dang gyo keq.” gâ ri. Dang htê haû zim jáng, Yesuq yhang baú nyi tô é lé, yhangmoq myang akô. Yhangmoq myang é hkyô lé, buinyi haû bun haû yoq má, ó lé le a taí kyô é zim za nyi byuq akô.

Nat Gang Dap É Yuqgè Zo Rayuq Lé Lhoq Gê Byí É Hkyô

Mht 17:14-18; Mrk 9:14-27

- ³⁷ Hau htâng nyí, yhangmoq bùm haû mai gyó ló kô le, byù moq mó gi, ³⁸ Yesuq lé lhom te yu akô. Haû hkûn, byù hpúng haû mâ é byù rayuq wut ³⁹ garû htoq ló é gi, “Sarâ ê, wú aq, ngá é zo te yuqzo gi, nat wang júng mù dàn so dàn loq garû lo lhê, guttsû gi, agut gut dut shoq langhtân nhang lo lhê kut mù, nat gi, yhang lé gyai myáng ⁴⁰ shoq zing-rî yù yù kut nyi ri. Nat haû lé hkat pyám byi kó laq nghû luí, Náng é chángzô pé lé ngò dúng wú kôlhang, yhangmoq a wó hkat pyám byi kó. Haû mù, ngá zo lé lhoq gê byi râ matú, ngò gi, nang lé gyai myit lum é eq dúng kat lhê.” gâ ri.
- ⁴¹ Haû mù luí, Yesuq gi, “Lumjíng myit a bo é eq agè ashop é amyú pé ê, Ngò gi, hkâ-myháng jé shoq nungmoq eq rahá nyi mù, wó jân nyi râ l hú? Nung zo lé, shí shut shuí lé lô aq.” ga tû taí ri.
- ⁴² Zoshâng haû, lé lo nyi le lháng, nat gang gi, yhang lé lhoq lhêng to mù langhtân nhang ashí. Yesuq kúm gi, haû agè ashop é nat lé tân kat luí, zoshâng haû lé lhoq gê byi mù, yhâng ⁴³ wa lé dum ap byí ri. Nyi mi-nyí gi, Garai Gasâng é kô dik é hpungwup a-tsam lé maú hong nyi bum akô.
- Lhunglhâng bang gi, Yesuq kut é muzó haû lé maú nyi bùm kô le, Yesuq

- ⁴⁴ gi, “Haû Byu Yhangzo gi, byu pé é loq má ap pyâm é hui zo râ nghut lhê. Dang shí hkun lé nungmoq é no má rago gyô wun to keq.” ga luí, chángzô pé lé taí ri. Yhangmoq kúm gi, dang ⁴⁵ haû lé a sê gyo kó, hkâsû mù ga le, haû gi, yhangmoq é matú a sê gyo sháng gaq ga luí, nghop tô ashí yanmai nghut ri. Dang hau é lichyúm lé, Yesuq chyáng yhangmoq a wám myi kó nghut ri.

Ó Yuq Gi, Kô Dik Sû Nghut Râ L hú?

Mht 18:1-5; Mrk 9:33-40

- ⁴⁶ Hau htâng, lagyô pé gi, hká yuq sheq, kô dik sù nghut lhê l hú ga, rayuq eq rayuq taí myíng myô lhûm nyi akô. Yesuq kúm gi, yhangmoq é unghkaû má myit nyi é hkyô lé sé byi luí, zoshâng rayuq lé shuí yù mù, Yhâng ⁴⁸ nàm má shap to luí, “Shí zoshâng lé Ngá é myíng mai hap sù ó yuq nghut kôle, Ngo lé hap yu é sù nghut bê; Ngo lé hap yù sù ó yuq nghut kôle, haû Ngo lé nhang kat é Sû lé hap yu é le nghut lhê. Haû mù luí, nungmoq ban-shoq má, je tiq sù gi, je ko sù nghut lhê.” ga luí, yhangmoq lé taí ri.
- ⁴⁹ Haû hkûn, Yohan gi, “Yhumsîng ê, Náng é myíng láng luí, nat gâng pé lé hkat pyám byí wún é byù rayuq lé, ngamoq myang ri. Yhang gi, ngamoq chyáng a lòm sù nghut é yanmai, yhang lé ngamoq hkúm pyâm é nghut lhê.” ga taí ri.
- ⁵⁰ Yesuq kúm gi, “Yhang lé hkâhkúm kó, nungmoq é gyè hkyam shut a nyi sù gi, nungmoq é hkyam shut nyi sù nghut lhê.” ga luí, yhang lé taí ri.

Samariq Wà Bang Yesuq Lé A Lhom Hap Yu É Hkyô

- ⁵¹ Ahkuí, Yesuq gi, Yhang lé mauhkûng shut shuí toq yù râ buinyi

chyang lò bê nghut mù, Yerusalem và mó shut ê râ lé myit hpyit to luí, Yhâng é hí má lagyo nhang
⁵² kat ri. Lagyo haú bang gi, Yhâng matú râ é hkyô lajang láng râ ga, Samariq và rawà má wang ló akô.
⁵³ Nghut kôlhâng, Yesuq gi, Yerusalem và mó shut laí e ló é sù nghut é yanmai, haú wâ bang gi, Yhang lé
⁵⁴ a lhom hap yù kó. Haú hkún, lagyo Yakuq eq Yohan nhik gi, haú lé myàng jáng, “Yhumsîng ê, yhangmoq lé lhoq htên pyám râ matú, ngá-nhik mauhkung mai myi wut hkyó le, a gè lhú?” ga luí, Yesuq lé myí akô.
⁵⁵ Yhang kúm gi, lhing wú luí yhang-nhik lé, tân pyâm ri, haú mù luí,
⁵⁶ yhangmoq gi, gó wâ shut e ló byuq akô.

**Yesuq É Htâng, Hkâsu
 Kut Cháng Râ Hkyô**

Mht 8:19-22

⁵⁷ Yhangmoq haú hkyô má e ló kô le, byù rayuq gi, “Nàng hká e le hká ngò cháng râ.” ga luí, Yesuq lé taí ri.
⁵⁸ Yesuq gi, haú yuq lé, “Wam-hkuí pé gi, hkyúng wó akô, nghoq pé le, nghoqsut wó akô. Nghut kôlhâng, haú Byu Yhangzo gi, ulhum to jang lháng a wó é nghut ri.” ga taí pyám ri.
⁵⁹ Dum rayuq lé, “Ngá htâng cháng aq.” ga taí jáng, haú yuq gi, “Yhumsîng ê, ngá wa lé, ló yhúm pyám râ ahkáng hí byi shi laq.” ga taí ri.
⁶⁰ Yesuq gi, yhang lé, “Shí bê bang^a gi, shí bê bang yhangchang yhúm lhum kó sháng gaq; nghut kôlhâng, nàng gi, Garai Gasâng é mingdán hkyô lé, ê hko kyo aq.” ga taí ri.

⁶¹ Byù rayuq dum, Yhang lé, “Yhumsîng ê, ngò le náng htâng cháng râ, nghut kôlhâng, ngá yhumbyù lé hí hkyang ló shit to râ ahkáng byi shi laq.” ga taí ri.
⁶² Yesuq gi, “Yò hpuq li zui mù htâng shut lhing wú sù ó yuq nghut kôlhâng, Garai Gasâng é mingdán eq a gingdán.” ga luí, yhang lé taí ri.

**Yesuq, Chángzô Pé Nyhit Xê Yuq
 Lé, Nhang Htoq Kat É Hkyô**

10 Hau htâng má, Yhumsîng gi, gotú chángzô pé nyhit xê yuq^b lé hkyin yù mù, Yhang e ló râ và eq jowò hkangmó shut í yuq razúm zúm kut luí, Yhâng é hí má ê nhang
² kat ri. Yesuq gi, yhangmoq lé, “Kyô^c shù yù râ myo shoq joq kôlhâng, mù zui râ byù gi, shaú nyi ri. Haú mù, haú kyô Yhumsîng lé, Yhâng é kyô yò má, kyô shu byù^d myo myo nhâng byi râ
³ matú, dung keq. Nungmoq e ló keq! Wamhkuí hpúng má nhang hâng kat é sau zô pé lé su, Ngò, nungmoq lé
⁴ nhang kat é nghut lhê. Ngùn htung eq, etap, hkyí-tsung pé hkâyú chùng kó, hkyô má ó lé le hkâshichyên kún nyi kó.
⁵ Nungmoq gi, hká yhúm má wàng e ló kô le, ‘Shi yhúm nguingón nyí
⁶ sháng gaq.’ nghú luí, hí taí keq. Haú yhúm má nguingón hkyô eq gingdán sù nyi é nghut le gi, nguingón hkyô haú gi, haú yuq é ahtoq má joq to râ nghut lhê. Haú a nghut jáng, nguingón hkyô haú gi, nungmoq chyáng
⁷ dum taú lo byuq râ nghut lhê. Haú yhúm má nyi to mù, yhangmoq haí byí le haí zo haí shuq keq; hkâsu mù

^a 9:60 *Shí bê bang* gâ é gi, woi-nyí má shi to bang lé gâ lhê. ^b 10:1 Chyúmdang ra-am má gi, chángzo nyhit xê í yuq ga le kâ tô ri. ^c 10:2 *Kyô* nghú é gi, Yesuq lé lumjáng nàu kôlhâng taí kyo râ bang a nyi luí láng tô é bang nghut ri. ^d 10:2 *Kyô shu byù* nghu é gi, Yesuq é hkyô gabú danglù lé taí kyo bang nghut ri.

gâ le, mû zui sî gi, zuihpau wó yû gíng lhê; haú mù, nungmoq rayhum htâng rayhûm hkâhtot nyi wún kó.

- ⁸ Nungmoq hká wà má wang ló kô-lhang, yhangmoq lhom hap yù kô é nghut le gi, nungmoq é hí má yhangmoq htung to byî é zoshuq lé, zo
- ⁹ keq, shuq keq. Haú mâ é nò bang lé lhoq gê byi mù, ‘Garai Gasâng é mingdán gi, nungmoq eq chyâng lò bê nghut ri.’ nghû luí, yhangmoq lé
- ¹⁰ taí kyo keq. Nghut kôlháng, nungmoq hká wà má wang ló kô le, yhangmoq a lhom hap yu é nghut le gi, haú wà
- ¹¹ mâ é hkyô mó má htoq ê mù, ‘Nungmoq é hkyî má dap tô é nungmoq wà mâ é hpuilhaú lháng, nungmoq lé hkyang pû tsô nyi râ matú nungmoq ko hkyô pyâm to byi bê. Nghut kôlháng, Garai Gasâng é mingdán gi, chyâng lò bê hkyô lé, sé to keq.’
- ¹² nghû luí taí keq. Ngò, nungmoq lé taí kôlé, haú buinyi^a lé, haú wâ gi, Sodom wà htoq má je hpuzo râ nghut lhê.
- ¹³ Kurazin wà mó ê! Nàng dingnyé wó ri! Bet-saida wà mó ê! Nàng dingnyé wó ri! Nungmoq chyáng lé kut shit é laklaí kumlhá pé lé, Turuq myuq eq Sidun myuq má kut shit é ru nghut le gi, yhangmoq, noq noq mai myit lhíng mù, jimê tû wut lhê, myiwap kyaq gyûn lhê kut zung ngûng to bekô
- ¹⁴ râ nghut lhê. Haú mù, tarâ jéyáng é nyí jé jáng, nungnhik gi, Turuq myuq eq Sidun myuq htoq má je hpuzo^b kó
- ¹⁵ râ nghut lhê. Dum mù, Kaperna-um wà nàng ê, nàng gi, mauhkûng jé shoq waq toq é hui râ lhú? A nghut, mosumhkung má sheq gyó râ nghut lhê.” ga taí ri.

¹⁶ Hau htâng má, chángzô pé lé dum xoq taí é gi, “Nungmoq é dang gyo sî gi, ngá é dang gyo sî le nghut bê; nungmoq lé he-ngik é sî gi, ngo lé le he-ngik é sî nghut bê; ngo lé he-ngik é sî gi, ngo lé nhang kat sî lé le, he-ngik é sî nghut bê.” gâ ri.

Nyhit Xê Yuq Dum Taú Jé Lo É Hkyô

- ¹⁷ Hau htâng, haú chángzo nyhit xê yuq gi, gabú myit eq dum taú lò mù, “Yhumsîng ê, náng é myíng lé lang jáng, nat gâng pé lháng ngamoq é dang lé gyô bum akô.” ga taí akô.
- ¹⁸ Haú su ga taí kôjáng, Yesuq tû taí é gi, “Tsadán gi, mauhkûng htoq mai lhap hpyat é su byit gyó lo é lé ngò
- ¹⁹ myang kat bê. Wú keq! Ngò gi, nungmoq lé, lhangmuí eq gogok pé lé wó nang râ eq gumlau gyè pé é wum-o a-tsam banshoq lé wó ûng râ ahko ahkáng lé byi bê nghut mù luí, hai eq le nungmoq lé wó lhoq hten râ a nghut
- ²⁰ lo. Nghut kôlháng, nat pé nungmoq é dang gyô é lé za hkâgabú nyí kó, mauhkûng htoq mâ é asak jihpán laiká buk má nungmoq é myíng bo to bê lé sheq gabú nyí keq.” ga taí ri.
- ²¹ Haú u lé, Yesuq gi, Chyoiyúng Woi-nyí má gabú é myit byíng lô mù, “Mauhkûng eq myigung é Yhumsîng, Áwa ê, Nàng gi, haú pé lé, hpaqchyí byéng-yá bò bang eq myit hpaqchyí sé bâng é hí mai haq nghop to luí, zoshâng wui lé tûn shit bê nghut é yanmai, Ngò, Nang lé hkya-ôn lhê ô. Nghut bê, Áwa ê, haú gi, Nàng ô nau é hkyô nghut ri.
- ²² Ngá Wa gi, lhunglháng lé Ngá é loq má ap byi to bê. Garai Gasang Yhangzo ó nghut é gi, Áwa Garai Ga-

^a 10:12 Haú buinyi gâ é gi, Garai Gasâng tarâ jéyáng é buinyi lé gâ lhê. ^b 10:14 Nungnhik je hpuzô é hkyô gi, mauhpo kumlhá myo myo myang é nghut kôlháng, myit a lhíng kô é yanmai nghut ri.

sang mai lai luí ó le a sé; Áwa ó nghut é lé le, haú Zo eq haú Zo mai sé nhâng râ matú hkyin yu é bang mai lai luí, ó a sé.” ga taí ri.

- ²³ Hau htâng má, Yhâng é chángzô pè shut lhing wú luí, yhangmoq lé baú za haq taí kat é gi, “Nungmoq byu-myàng é hkyô pé lé, myang é ²⁴ myoq pé gi, hkungsô wó nyi ri. Hkâsu mù gâ le, Ngò, nungmoq lé taí kôlé, nungmoq wó myàng, wó gyô é pé lé, myiqhtoí pé eq hkohkam pé myo myo gi, myàng naù gyo naù kôlhang, a wó myàng, a wó gyo kó nghut ri.” ga taí ri.

Gè É Samariq Byù

- ²⁵ Haú hkûn, wú keq, tarâ sará rayuq gi, toq luí, Yesuq lé, “Sarâ ê, ahtum abyuq é asak lé wó yú shoq, ngò hkâsu kut râ râ lhê lhú?” ga luí, Yhang lé myí chyam wú ri.
- ²⁶ Yesuq gi, “Mosheq é tarâ má hkâsu ga kê tô ri lhú? Nàng haú lé hkâsu nghap yu nyi lhê lhú?” ga luí, yhang lé myí ri.
- ²⁷ Haú yuq gi, “‘Haú Yhumsîng náng é Garai Gasang lé, náng é myit nhik-lhum banshoq, náng é asak woi-nyí lhum gón, náng é wum-o banshoq, náng myit é hkyô banshoq èq, chyitdap râ lhê;’^a ‘náng gûng lé nàng chyitdap é su, náng é chyangnâm mâ é bang lé le chyitdap aq.’^b” ga tû taí ri.
- ²⁸ Yesuq gi, “Nàng tû taí é dang jô ri; haú su yhang kut aq, haú jáng nàng gi, asak duì râ nghut lhê.” ga yhang lé taí ri.
- ²⁹ Nghut kôlhang, haú yuq gi, yhâng gungdu dingmán é lé, tûn shit naù luí, “Ngá é chyangnâm mâ é sù gi, ó yuq nghut lhê lhú?” ga luí, Yesuq lé myí ri.

- ³⁰ Yesuq tû taí é gi, “Byù rayuq gi, Yerusalem wà mó mai Yeriho wà shut gyó ló le, damyaq eq htûng huí ri. Damyaq haú bang gi, yhâng é mebu pé lé hkyut shang pyám byi kôluí, rayúm gyut shoq bat nha mù, aluq shoí shí jáng sheq tô pyâm to kôluí ló ³¹ byuq bekô. Haú u lé, hkyangjong rayuq gi, haú hkyô mai laí âng ló le, haú damyaq hui sù lé myàng jáng, koi laí ³² ló byuq ri. Haú eq rajung za, Lewiq rayuq le, haú mai laí ló é hkûn, haú yuq lé myàng jáng, koi laí ló byuq ri. ³³ Nghut kôlhang, Samariq byù rayuq le, haú mai laí ló é hkûn, haú yuq leq tô é lé myàng jáng, wú shogyo luí yhâng ³⁴ chyáng huí ê mù, yhâng é dàm má, xú eq tsibiyiq wing shoq gyun luí, rago za htup byi mù, yhâng é logúng má, haú yuq lé bún ke luí, bing-yhûm ralhûm má jé shoq shuí ló mù, gôn la- ³⁵ jang byí ri. Htang nyí lé, yhang gi, haú bing-yhûm yhumsîng lé ngùn Denari í chap shê byi mù, taí é gi, ‘Shí yuq lé wú lajang byi laq, yhâng gùng má nàng myo chung záng é banshoq lé ngò dum taú lò jáng, lo xap râ.’ gâ ri.” gâ ri.

- ³⁶ Hau htâng, tarâ sará lé, “Nàng gi, byù haú bang sum yuq má damyaq huí sù é chyangnâm mâ é dông nghut sù gi, hká yuq nghut râ su ngam ri lhú?” ga luí, Yesuq myí ri.
- ³⁷ Haú tarâ sará gi, “Haú yuq lé shogyo sù nghut ri.” ga taí ri.
Yesuq gi, “Nàng le haú dông ló kut aq.” ga luí, yhang lé taí kat ri.

Mariq Eq Mahtaq Nhik Chyáng Yesuq Ê Jé É Hkyô

- ³⁸ Ahkuí, Yesuq eq Yhâng é chángzô pé hkyô xoq sô e ló kô le, wà rawà

^a 10:27 Tarâ Pun 6:5 ^b 10:27 Nhong 19:18

má jé wang ló é hkûn, Mahtaq gâ é myiwe rayuq gi, Yesuq lé yhâng yhûm
³⁹ má lhom te yu ri. Mahtaq gi, Mariq gâ é yhanggu myiwe zo rayuq wó ri. Mariq haû gi, Yhumsîng Yesuq é hkyî wang má zung to mù, Yhang mhoqshit
⁴⁰ é dang lé gyô nyi ri. Mahtaq kúm gi, saí tso saí huq é amû myo luí, gyin bûn nyi ri. Haû mù luí, yhang huí ê mù, “Yhumsîng ê, ngá gu gi, saí tso saí huq é amû má, ngo lé baú za rap kut tô é lé, nàng a bo myàng byi lhú? Ngo lé, lé garúm sháng gaq, yhang lé taí byi laq.” ga luí, Yesuq lé taí ri.
⁴¹ Haú hkûn, Yhumsîng gi, “Mahtaq, Mahtaq, nàng gi, muzó lé za ma nyi mù, myit myo myit chiq é huí nyi ri.
⁴² Nghut kôlháng, je ahkyak é hkyô gi, rahkat za nghut lhê. Mariq kúm gi, haû je ge é hkyô lé hkyin yù bê nghut ri. Haû lé yhâng chyáng mai wó yu pyám byi râ a nghut.” ga luí, yhang lé tû taí ri.

Yesuq Mhoqshit É Kyûdung Dang

Mht 6:9-13; 7:7-11

11 Ra-nyí lé, Yesuq gi, jowò rawò má kyûdung nyi ri. Yhang kyû ban dung jáng, Yhâng é chángzo rayuq gi, “Yhumsîng ê, Yohan gi, yhâng é chángzô pé lé kyûdung râ hkyô mhoq byí é su, ngamoq lé le mhoq byi laq.” ga Yhang lé taí ri.
² Haú hkûn, Yhang gi, “Nungmoq kyûdung le, ‘Mauhkûng htoq tsáng myhâng mâ é ngamoq é Áwa ê, Náng é myìng gi, chyoiyúng nyí sháng gaq. Náng é mingdán jé lô sháng gaq.
³ Ngamoq nyí wuí râ é zoshuq lé, ngamoq lé nyí wuí byi laq.
⁴ Ngamoq lé shut é byù banshoq bâng é mara lé, ngamoq hkyut

pyám byí é yanmai, ngamoq é mara lé le hkyut pyám byi laq.

Ngamoq lé, agúng alaú hkyô má hkâwâng nhâng.’
 nghû keq.” ga luí, yhangmoq lé mhoqshit ri.

⁵ Yesuq yhangmoq lé dum taí é gi, “Dangké, nungmoq chyáng mâ é rayuq sù gi, buinùm wó é nghû sháng, yhang gi, gunggàm yoq má haú yuq chyáng ê luí, ‘Buinùm hpó ê, ngo lé muk sùm long byam chyi byí kat laq,
⁶ haí mù gâ le, ngá buinùm rayuq byìn we mai ngá chyáng jé nyi tô ri. Ngò gi, yhang lé byi tso râ haí le a joq byam
⁷ dut tô ri.’ ga taí é hkûn, yhúmhaú shut mâ é sù gi, ‘Ngo lé, hkâlê lhoq hkyik lo, hkum le myhî pyám bê, ngá zoshâng wui le ngò eq rahá yhupjang má yhup to bekô. Ngò, nang lé haí le
⁸ a wó toq yû byi lo.’ ga tu kat ri. Ngò, nungmoq lé taí kôlé, buinùm nghut é yanmai za gi, muk a kâm toq byi lo kôlháng, zuq zuq dúng nyi é yanmai, haú yuq lé, yhang ra châ é banshoq toq yû byi râ nghut lhê.
⁹ Haú mù, ngò, nungmoq lé dum taí kôlé, dung keq, haú jáng, nungmoq lé byi râ nghut lhê; hô keq, haú jáng, nungmoq myàng kó râ nghut lhê; hkum má kok keq, haú jáng, nungmoq
¹⁰ lé hpóng byi râ nghut lhê. Hkâsu mù gâ le, ó yuq nghut kôle, dung sù wó râ; hô sù myàng râ; hkum kok sù lé gi, hpóng byi râ nghut lhê.
¹¹ Nungmoq íwâ pé má, ó yuq wá, yhumsing yhangzo muk dúng le, luq-gok byi kó râ lhú? Ngozo dúng le,
¹² lhangmuí byi kó râ lhú? Woq-ú dúng
¹³ le, gogok byi kó râ lhú? Agè ashop é bang nungmoq lháng gi, nungmoq é zo wuí lé, ge é chyunhuq dat byi kô le nhîng, mauhkûng htoq tsáng myhâng

mâ é nungmoq é Îwa gi, Yhang lé dúng é bang lé, je riyhang haû Chyoiyung Woi-nyí byi râ nghut lhê.” ga taí ri.

**Mara Hûn É Dang Lé
Yesuq Tû Taí É Hkyô**

Mht 12:22-30, 43-45; Mrk 3:20-27

- ¹⁴ Radàm lé, Yesuq gi, byù rayuq lé dang a wó nyô shoq kut tô é nat gang lé, haú yuq chyáng mai hkat htoq pyâm ri. Nat haû htoq ló byuq é htâng má, dang a wó nyô sù gi, dang wó nyo nyi é yanmai, byù moq mó gi, ¹⁵ chôm maú byuq bum akô. Nghut kôlhâng, yhangmoq chyáng mâ é ra-am gi, “Yhang gi, nat gâng pè é zau Bezebulaq é wum-o a-tsam èq za, nat gâng pé lé wó hkat pyâm é nghut ri.” ga taí ¹⁶ bum akô nghut ri. Ra-am le, Yhang lé, mauhkûng mâ é kumlhá tûn shit wú laq ga dúng chyam wú akô. ^a
- ¹⁷ Yesuq kúm yhangmoq myit nyi é hkyô lé sé mù taí é gi, “Ikun byoq é mingdán hká lhum nghut kôle, hten byuq râ za nghut lhê; haû eq rajung za, ikun byù yhangchang rayuq eq rayuq byoq lhûm é yhûm htu gi, byoq ¹⁸ gâng lhum râ za nghut lhê. Nat pé le yhangmoq yhangchang byoq gâng lhûm nyi kô é nghut le gi, Tsadán é mingdán gi, hkâsu kut wó gîng to râ lhú? Ngò isu nghu taí é gi, nungmoq ngo lé Bezebulaq é wum-o a-tsâm èq za, nat gâng pé lé hkat pyâm ri ga kô é ¹⁹ yanmai nghut lhê. Ngò gi, Bezebulaq é wum-ô èq za, nat gâng pé lé hkat htoq é nghut jáng, nungmoq é chángzô pé gi, ó yuq é wum-o a-tsâm èq za, nat gâng pé lé hkat pyâm kô é nghut lhê

lhú? Haû mù luí, yhangmoq gi, nungmoq lé jéyáng é bang dut bekô râ nghut lhê. Nghut kôlhâng, Ngò gi, Garai Gasâng é wum-ô èq nat gâng pé lé hkat htoq pyâm é nghut jáng, Garai Gasâng é mingdán^b gi, nungmoq chyáng jé bê nghut ri.

- ²¹ Wum-o bo é sù rayuq gi, yhâng é yhûm lé, shâm, lhâm chûng luí zúng tô é nghut jáng, yhâng é sutzè pé gi, rago za wó joq to râ nghut lhê. ²² Nghut kôlhâng, yhâng htoq wum je bo é sù lé luí, haú yuq lé, lé zân ung pyâm é nghut le gi, yhang lum tô é shâm, lhâm lé, hkyom yu pyám byi luí, yhâng é sutzè pé lé, gam yu pyám byi râ nghut lhê. ^c
- ²³ Ngá hkyam shut a dap sù gi, Ngo lé gyè kut sù nghut lhê. Ngò eq rahá a shuí tsing sù gi, lhoq pyo pyâm é sù nghut nyi ri.
- ²⁴ Haû agè ashop é nat gi, byù rayuq chyáng mai htoq ló mù, kyuq huí é jowò pé má sô yông e ló luí, no râ jowò hkat ho wú le, a myang hô nghut ri. Haú hkûn, yhang gi, ‘Ngò nyi laí lo é yhûm má dum taû ló wú râ.’ ²⁵ ga taí ri. Yhang dum taû jé ló wú le, yhûm haû gi, shum pyám mù san za ²⁶ rago dut to lánng é lé ló myang ri. Haû jáng, yhang gi, dum taû ê mù, yhâng htoq je wuí é nat nyhit nat lé shuí lò luí, haú má lo wàng nyi to bekô. Haû mù, haú yuq é nyi yap sâmlai gi, hí lhê htoq má je wuí lò bê nghut ri.” ga taí ri.
- ²⁷ Haû su ga, Yesuq taí nyi é hkûn, haû shiwa hpong mâ é, myiwe zo rayuq htê mó o mó èq Yhang lé taí é gi, “Nang lé wun é ûng wam eq nàng

^a 11:16 Byu pé gi, Yesuq lé Garai Gasang nhang kat é hkyô lé saksé myàng naù luí, mauhpo kumlhá dúng nyi akô. ^b 11:20 Garai Gasâng é mingdán gâ é gi, byù htoq má le, nat htoq má le, Garai Gasâng yhang uphâng é lé gâ é nghut lhê. ^c 11:22 Haû eq rajung za, Yesuq gi, Tsadán lé zân ûng bê nghut é yanmai, agè ashop é nat pé lé byu pè chyáng mai, wó hkat pyám bê nghut ri.

shuq é nauwang gi, hkungsô wó nyi ri ô!” ga ri.

- ²⁸ Yesuq gi, “Garai Gasâng é mungdang gyô yù luí châng kut é bang gi, je riyhang hkungsô wó kó râ nghut lhê.” ga taí ri.

Mauhpo Kumhá Lé Dung Kô É Hkyô

Mht 12:38-42; Mrk 8:12

- ²⁹ Shiwa byu pé jat myô zup zîng lo é hkûn lé, Yesuq taí é gi, “Shí ipyat lhê é byu pé gi, agè ashop é bang nghut akô. Yhangmoq gi, limik kumlhá dîng nyi bùm kôlhang, Yonaq é kumlhá mai lai
- ³⁰ luí, gotú haí le tûn shit râ a nghut. Yonaq gi, Ninewe wà byu pé hí má kumlhá^a dut é su, haú Byu Yhangzo gi, shí pyat lhê é byu pé hí má, kumlhá dut
- ³¹ râ nghut lhê. Maupyí mâ é hkohkâm myhí gi, maumyí lô htâng é mai lé lô mù, Sholumon é hpaqchyí dang lé, lé gyô yù bê nghut mù, haú tarâ jéyáng é buinyi má, shí ipyat mâ é byu pé eq rahá toq lô luí, yhangmoq lé mara hûn râ nghut lhê. Wú keq, Sholumon htoq ko sù gi, ahkuí shí má jé nyi to bê.
- ³² Ninewe wà byu pé gi, Yonaq, mungdang hko kyô é hkûn myit lhîng kô é nghut mù, tarâ jéyáng é buinyi má, shí ipyat eq rahá toq lô luí, yhangmoq lé mara hûn kó râ nghut lhê. Wú keq, Yonaq htoq ko sù gi, ahkuí shí má jé nyi to bê.

Myibung Su Duqbó Râ Hkyô

Mht 5:15, 6:22-23

- ³³ Myibung lé tuq mù go pyâm é jowò má tô tô é le, mûng eq nghop tô é le, ó a kut wú kó. Nghut kôlhang,

wang lé lô bang myoq wó myâng râ matú kúm gi, tsungjang má tsung to

³⁴ to chyat kut akô. Náng é myoq gi, náng gungdú é myibung^b nghut nyi ri. Náng é myoqjí ge é nghut le gi, náng é gungdu gón má maubó byíng mui to râ nghut lhê. Nghut kôlhang, náng myoq a ge é nghut le gi, náng é gungdu gón gi, mauchut tuq dut nyi

³⁵ râ nghut lhê. Haú mù, náng chyáng bo é maubó gi, mauchut byuq é, a chut byuq é lé wú nyí aq. Nàng lumjîng é hkyô eq nàng myit é hkyô gi, mauchut tuq a dut sháng gaq, sidiq nyi

³⁶ aq. Náng é ragùngdu gón má duqbó é nghut le gi, rawò má le mauchut é jowò a joq é za, myibung nang lé duqbó byí nyi é su, náng gungdu gón má duqbó nyí râ nghut lhê.” ga taí ri.

Hparishe Pé Eq Tarâ Sará Pé Lé, Yesuq Mara Hun É Hkyô

Mht 23:1-36; Mrk 12:38-40; Luk 20:45-47

- ³⁷ Yesuq haú su ga ban taí é htâng má, Hparishe rayuq gi, yhang eq zang rahá zo râ matú, Yesuq lé ji ri. Haú mù, Yesuq gi, haú yhûm má wang ê mù zang zo râ ga siboí nàm má zung
- ³⁸ tô ri. Nghut kôlhang, Hparishe wá gi, zang zo râ hí má Yesuq loq a chí é lé, myàng luí maú nyi ri.^c
- ³⁹ Haú mù luí, Yhumsîng Yesuq yhang lé taí é gi, “Nungmoq Hparishe pé gi, góm eq zanghkoq lé ahtoq shut za chí yúng nyí kômù, nungmoq é unghkaú má gi, lú zo lú shuq é eq agè ashop é
- ⁴⁰ hkyô pé byíng zan tô ri. Byù bâm pé è, ahte^d lé le, ahtoq^e lé le, saí sù gi, Garai Gasang rayuq za nghut é lé, a sé kó

^a 11:30 Kumhá gi, Yonaq, ngozô wamdaú má sum nyí lúng é su, Yesuq le, shí bê mai sum nyí nghú râ nyí má, dum dui toq lô râ hkyô lé taí nau é nghut ri. ^b 11:34 Myibung ga é gi, tengmán é mungdang lé wó sê yu é a-tsam lé, taí é nghut ri. ^c 11:38 Yudaq htûng tarâ má gi, zang a zo shi má loq chi râ lhê. ^d 11:40 Ahte ga é gi, i-myt unghkaú lé taí ri. ^e 11:40 Ahtoq ga é gi, gungdu lé taí ri.

⁴¹ lhu? Nghut kôlhang, ahte má bo é zè pé lé, ra châ é bang lé byî pyám keq; haú hkûn, nungmoq é matú banshoq gi, sân-yúng lô râ nghut lhê.

⁴² Hparishe pé ê, nungmoq gi, dingnyé wó ri, hkâsu mù gà le, nungmoq gi, gau-tsáng, shingtón pé eq zangxun mhan-haq ajù jù mâ é, xê gambùm ragambùm lé gi, Garai Gasang lé byi nyî kômù, tarâ dingmán é hkyô eq Garai Gasang chyitdap é hkyô lé gi, lhaî pyâm tô akô. Xê gambùm ragambùm byî é lé le cháng luí, tarâ dingmán é hkyô eq Garai Gasang lé chyitdap é hkyô lé le, kut nyî râ lhê.

⁴³ Hparishe pé ê, nungmoq gi, dingnyé wó ri, hkâsu mù gà le, tarajong pé mâ é ahkyak dik é zùng jang pé lé le, gai pé má hkunggâ é èq shichyên é dang lé le, nungmoq ô nau nyi bum akô.

⁴⁴ Nungmoq gi, dingnyé wó ri, hkâsu mù gà le, nungmoq gi, ahkô a dong lo mù, byu pé a sé luí, ahtoq mai sô laí é lupdùng eq du akô.” ga taí ri.

⁴⁵ Haú hkûn, tarâ sará rayuq gi, “Sará ê, nàng haú su gà é gi, ngamoq lé le rhoi lhôm nyi é nghut bê.” ga Yhang lé tû taí ri.

⁴⁶ Haú su ga jáng, Yesuq gi, “Nungmoq tarâ sará pé le, dingnyé wó ri. Hkâsu mù gà le, nungmoq gi, byu pé lé, wùn waq râ wuí é noqkuq htúng tarâ wòlai lé wùn nhâng luí, yhum-sîng yhang gi, wò haú lé loqnyhuí èq lháng, a bo záng wú kó nghut ri.

⁴⁷ Nungmoq gi, dingnyé wó ri, hkâsu mù gà le, nungmoq gi, nungmoq é îchyí îwâ pé sat pyâm é myiqhtoî pé

⁴⁸ é lup lé luptsuq tsuq akô. Haú mù luí, nungmoq gi, nungmoq é îchyí îwa pé é muzó lé, myit bo huí é bang nghut nyi akô. Hkâsu mù gà le, yhangmoq gi, myiqhtoî pé lé sat pyâm mù, nungmoq gi, lup haú pé lé luptsuq tsuq akô.

⁴⁹ Haú mù luí, Garai Gasang, Yhâng é hpaqchyî byéng-yá mai taí é gi, ‘Myiqhtoî pé eq lagyô pé lé, ngò yhangmoq chyáng nhang kat râ nghut lhê; haú bang mâ é ra-am lé gi, yhangmoq lhom sat pyâm mù, ra-am lé gi,

⁵⁰ zing-ri kó râ nghut lhê.’ gà ri. Haú su mù luí, mau htoq xâng hkûn lhê é, Abelaq é sui mai, hkungga gyap eq noqkuq yhùm gyoro má sat pyâm huí é Zahkariq é sui jé shoq, shun pyâm é myiqhtoî pé é sui banshoq bâng é manglat gi, shí pyat mâ é byu pé lé

⁵¹ hûn râ nghut lhê. Ngò, nungmoq lé taí kôlé, manglat haú pé lé gi, shí pyat mâ é byu pé lé, gè gè yhang hûn râ nghut lhê.

⁵² Tarâ sará pé ê, nungmoq gi, dingnyé wó ri, hkâsu mù gà le, nungmoq gi, byu pé Garai Gasang lé sé ra zoqshi lé yu pyâm byi kômù, yhum-sîng yhang le a sé, sé naú bang lé le, hkûm zing tô akô nghut ri.” ga taí ri.

⁵³⁻⁵⁴ Yesuq haú mai htoq ló é hkûn, tarâ sará pé eq Hparishe pé gi, Yhang lé gye kut mù, Yhâng é dang má mara wó myâng shoq ga, wuí é dangmyi myo myo myi luí, gyám wú nyi akô nghut ri.

Gegùn Labyoq Kut É Bang Lé Sidiq Râ Hkyô

Mht 10:28-33, 12:32, 10:19-20

12 Haú u, byù hkyîng mun zup zîng lò mù, rayuq eq rayuq lháng záng nâng lhum shoq dut nyi é hkûn, Yesuq, Yhâng é chángzô pé lé taí hi é gi, “Gegùn labyoq kut é Hparishe pé é múnchi lé koi sidiq pyám keq.

² A byông htoq loshoq wó zaú nghop tô é, haí le a joq râ nghut lhê; a sé loshoq wó haq tô é le, haí a joq râ nghut lhê.

³ Haú mù luí, nungmoq, mauchut hkaú má haq taí é dang banshoq lé, myoq

myàng maubó má wó gyô bùm kó rá nghut lhê. Gok hkaû má, dangsoq soq é lé le, yhumhkûng htoq mai taí pyo bùm bekô rá nghut lhê.

- ⁴ Ngá buinùm wuî ê, Ngò, nungmoq lé taí kôlé, gungdu lé za wó sat pyám mù, woi-nyí lé haí le a wó kut é bang
- ⁵ lé, hkâgyuq kó. Nghut kôlhang, nungmoq ó lé za gyuq rá é lé gi, Ngò, nungmoq lé taí kyo kôlé, gungdu lé sat pyâm é htâng má, woi-nyí lé nga-raí ming shut wó hkyô kat pyâm é a-tsam wó sù lé kúm gi, gyuq keq. Nghut bê, Ngò, nungmoq lé taí kôlé,
- ⁶ haú yuq lé za, gyuq nyî keq. Johkyáng ngo du lé, gyi htingchap í chap èq wó ûng pyâm lhê a nghut kó lú? Haú johkyáng radu lé lhang, Garai Gasang
- ⁷ gi, tô-myhí pyâm é a nghut. Garai Gasang gi, nungmoq é ulhum mâ é xâm banshoq lé lhang, nghap to gù nghut lhê. Haú mù, hkâgyuq kó; nungmoq gi, haú johkyáng myo myô htoq má lhang gù je bo é bang nghut lhê.
- ⁸ Ngò, nungmoq lé taí kôlé, byu pè hí má Ngo lé lhom yín yu é sù ó yuq nghut kôle, Garai Gasâng é maumang lagyô pè é hí má, haú Byu Yhangzo gi, haú yuq lé lhom yín yû rá nghut
- ⁹ lhê. Nghut kôlhang, byu pè é hí má Ngo lé he-ngik pyâm é sù lé chyaú gi, Garai Gasâng é maumang lagyô pè é hí má, he-ngik pyám rá nghut lhê.
- ¹⁰ Haú Byu Yhangzo lé dang dông shut é sù gi, mara hkyut byí é wó hui ra nghut lhê; nghut kôlhang, haú Chyoiyúng Woi-nyí lé rhoi dang taí pyâm é sù gi, mara hkyut byí é hui rá a nghut.
- ¹¹ Byu pé nungmoq lé jéyáng rá matú tarajong pé má le, agyî suwún wuî eq ahkáng ayá wó bâng é hí má le, shuí e ló kô é hkûn, hkâsu kut rá lé le, hkâsu nghû tú taí rá lé le, hkâ-myyit
- ¹² chiq kó. Hkâsu mù gâ le, haú u lé

yhang, Chyoiyúng Woi-nyí gi, nungmoq hkâsu taí rá hkyô lé mhoqshit byi rá nghut lhê.” ga taí ri.

Hpaqchyî A Bo É Sahtê Hpó Lé Dangtú Yu É Hkyô

- ¹³ Haú hkûn, shiwa hpúng hkaû mai, byù rayuq gi, “Sarâ ê, ngá-nhik tâng wó é muizè pé lé chôm gam lhum rá matú, ngá mang lé bo taí byi laq.” ga luí, Yesuq lé taí ri.
- ¹⁴ Yesuq gi, “Byù nàng ê, nungnhik tang ahtoq má tarâ agyî kut luí, ikun zè gàm byi rá gi, ngo lé ó hkyin tô é
- ¹⁵ lú?” ga luí, yhang lé tú taí ri. Yesuq yhangmoq lé taí é gi, “Myoqnoq é hkyô banshoq mai, nungmoq é i-myyit lé hkûm zìng luí, koi sidiq nyî keq. Hkâsu mù gâ le, byu é asak gi, agùn agó é sutzè má bo é a nghut.” gâ ri.
- ¹⁶ Dangtú ralhüm dông mai le, yhangmoq lé Yesuq taí é gi, “Sahtê rayuq gi, yhâng é yò pé má guqzo muilhum
- ¹⁷ gyaí já ri. Haú mù luí, yhâng é ung-hkaû má myit é gi, ‘Ngò hkâsu kut wú rá lhi? Ngá é guqzo muilhum pé lé kat to rá jowò a wó lo dut to bê.’ gâ ri.
- ¹⁸ Dum nghut jáng, yhang gi, ‘Ngò ìsu kut wú rá abe, ngá é chyî xau pé lé hpyoq pyám luí, je kô é chyî pé lé saí rá nghut lhê. Chyî haú pé má ngá é guqzo muilhum pé eq sutzè banshoq
- ¹⁹ lé, tsîng kat to luí, ngá é i-myyit lé ìsu nghû taí rá, “I-myyit ê, zanwut myáng myáng é matú, zè gè myo myo ngò tsîng to bê. I-myyit nàng zim za kut nyî aq hkoî. Zo mù, shuq mù, ngón ngón nyî aq.” ga’ gâ ri.
- ²⁰ Nghut kôlhang, Garai Gasang gi, ‘Byù gò ê, náng é asak lé, hkû-myîn yhang, wup yu pyám byí é nghut jáng, nàng tsing hkong tô é zè pé gi, ó yuq é matú dut rá lú?’ ga luí, yhang lé taí ri.

²¹ Haû eq rajung za, yhumsing é matú sutzè hkong to mù luí, Garai Gasâng é hí má myung nyi sù gi, haú yuq su nghut râ nghut lhê.” gâ ri.

**Myit A Chiq É Za Garai
Lé Lumjǐng Râ Hkyô**

Mht 6:25-34, 19-21

²² Yesuq, Yhâng é chángzô pé lé dum taí é gi, “Haû mù luí, Ngò, nungmoq lé taí kôlé, nungmoq é asak matú haí zo haí shuq râ eq nungmoq é gungdú matú haí wut haí tsang râ lé, hkâ-myyit ²³ chiq kó. Asak gi, zoshuq htoq má, gungdu gi, mebû htoq má, je ahkyak ²⁴ lhê. Nghonoq pê é hkyô lé myit wú keq; yhangmoq gi, kyô hkyô kyô shu a kut kó; guqchyí eq sutdek lé a wó kó, nghut kôlhang, Garai Gasang gi, yhangmoq lé, byi tso byi huq nyi lhê. Nungmoq gi, nghoq haú pê htoq má je riyhang hpaudap nyi lhê a nghut ²⁵ kó lú? Nungmoq má, ó yuq wá, myit chiq é èq, yhumsing é asak lé radúng ²⁶ kô wó jat yù kó râ lú? Haû su mù luí, tiq dik é hkyô lé lhang, nungmoq a wó kut kô é nhǐng, haí mù luí gotú hkyô pé lé, myit myô nyi akô lú? ²⁷ Htutbó ban^a pé hkâsu kut kô lo é lé, myit wú keq. Haú pé gi, mù le a zui, hkyíng le a duí kó nghut ri. Nghut kôlhang, Ngò, nungmoq lé taí kyo kôlé, Hkôhkâm Sholumon hpúng kô dik u lé wut é mebu lhang, ban haû rabó lé ²⁸ a hkyit nghut ri. Lumjǐng myit tiq é bang ê, hkû-nyí joq mù, napmá myihkyóm má dú kat pyám hui râ nghut é yosô mhan pé lé za lhang, Garai Gasang haû su kut hut é nghut le gi, nungmoq lé, je riyhang hut râ a nghut ²⁹ kó lú? Nungmoq gi, haí zo haí shuq râ lé hkâho nyi kó; haû eq séng luí

³⁰ lé hkâ-myyit chiq nyí kó. Hkâsu mù gâ le, Garai Gasang lé a sé bang gi, haú hkyô banshoq lé châng hkat ho nyi akô; nghut kôlhang, nungmoq é Íwa Garai Gasang gi, haú pé lé nungmoq râ é hkyô, sé byí nyi lhê. Nungmoq kúm gi, Yhâng é mingdán lé ho nyi keq, haú jáng, haú pé, nungmoq lé puq byi râ nghut lhê. ³¹ Sau hpúng zô pé ê, hkâgyuq ko, hkâsu mù gâ le, nungmoq é Íwa Garai Gasang gi, Yhâng é mingdán nungmoq lé byí nau nyi ri. Nungmoq wó é ³² zè pé lé ûng pyám luí, myùng bang lé byi keq, yhumsing é matú a dat xau a dat wôm é ngunhtung saí luí, hkau sù lé a jé, manot èq le a wó zô é sutzè lé mauhkung htoq má hkong to keq. ³³ Hkâsu mù gâ le, náng é sutzè joq jang má, náng é i-myyit le jé nyí râ nghut lhê. ³⁴

**Yesuq Dum Jé Lé Lô Râ Hkyíng Lé
Machya Nyí Râ Hkyô**

Mht 24:45-51

³⁵ Nungmoq gi, hpyihit hit luí, (mù zui râ matú rì rì kut to keq); nungmoq é myibung lé tuq to mù, myiháng poí mai dum taú lò luí, hkúm lo kok é, yhumsing hpó lé radá dâm hkum lhom wó hpông hâng yù shoq, láng tô é dui-nhâng zoshâng wuì su ³⁶ kut nyí keq. Haû yhumsing jé lo le, machya nyí láng é dui-nhâng zoshâng wuì gi, hkungsô wó nyi râ. Hkâsu mù gâ le, ngò, nungmoq lé teng za taí kôlé, haû yhumsing hpó gi, yhangmoq lé yuq zung to nhâng luí, yhang gi, dui-nhâng zoshâng su hpyihit hit mù, ³⁷ saí tso saí huq râ nghut lhê. Gunggàm yoq lé nghut kôlhang, woq tân hkûn lé nghut kôlhang, haû su kut ³⁸

^a 12:27 Htutbó ban gi, yúng dik é yosô ban nghut lhê.

machya nyi é lé, yhumsîng hpó lo myang é nghut le gi, dui-nhâng zoshâng haú bang hkungsô wó nyi ri.

³⁹ Yhumsîng hpó rayuq, hká u má hkau sù lé lô râ lé, sê tô é ru nghut le gi, yhang machya nyi luí, yhâng yhûm lé a wó hput htong nhâng râ nghut

⁴⁰ é lé, bûn sê nyi keq. Haú mù, nungmoq le rì rì nghut nyi keq; hkâsu mù gâ le, haú Byu Yhangzo gi, a bûn nùng má jé lé lô râ nghut lhê.” gâ ri.

⁴¹ Haú hkûn, Petruq gi, “Yhumsîng ê, dangtú shî gi, ngamoq lé za, taí é nghut lhê lhú? Haú a nghut jáng, lhunglhâng bang lé taí é dông nghut lhê lhú?” ga myí ri.

⁴² Haú jáng, Yesuq gi, “Lumgíng é eq hpaqchyí bo é sùt zum sù gi, hká yuq nghut lhê lhú? Haú yuq gi, yhâng yhumsîng é dui-nhâng zoshâng wuì lé ahkýng jé jáng zoshuq gàm byi râ matú, yhumsîng hpô èq hkyin to

⁴³ sù dut râ nghut lhê. Yhumsîng hpó dum taú lo é hkûn, haú su kut nyi láng é dui-nhâng zoshâng gi, hkungsô

⁴⁴ wó nyi ri. Ngò, nungmoq lé teng za taí kôlé, yhumsîng hpó haú gi, yhâng é sutzè banshoq, dui-nhâng zoshâng

⁴⁵ haú lé ap to râ nghut lhê. Nghut kôlhâng, dui-nhâng zoshâng haú gi, yhâng é i-myt unghkaú má, ‘Ngá é yhumsîng hpó jé lô râ gyai myáng ashí.’ ga myit pyám mù, dui-nhâng zoshâng luzúm wuì myiwe, yuqgè lé nhuq bat é eq, zo yê shuq yê í shuq

⁴⁶ wut nyi é nghut jáng, dui-nhâng zoshâng hau é yhumsîng hpó gi, yhang a myitbyu tô é buinyi eq yhang a sé tô é ahkýng má jé lô mù, yhang lé jap pyám luí a lumjíng bang eq rahá nyhi pyám râ nghut lhê.

⁴⁷ Yhumsîng hpô é i-myt lé sê to kôlhâng, yhang ô nau é dông a cháng, rì rì le a hen tô é dui-nhâng zoshâng gi, yhâng yhumsîng èq nhuq bat é lé,

⁴⁸ myo myo hui zo râ nghut lhê. Nghut kôlhâng, a sé mù kut shut sù kúm gi, shau za bat é hui râ nghut lhê. Haú eq rajung za, Garai Gasang gi, myo shoq wó yú su chyáng mai, myo shoq dúng yù râ nghut lhê. Myo myo ap byí tô é hui su chyáng mai, je myo shoq dum dúng yù râ nghut lhê.

Nguingón Nhâng Râ A Nghut, Lhoq Kang Nhâng Râ Ru Nghut Lhê

Mht 10:34-36

⁴⁹ Ngò jé lé é gi, myigùng htoq má, myi nyé nhâng râ matú nghut lhê. Myi haú dap to láng é nghut le gi, ngò ô nau é hkyô jup byíng bê.

⁵⁰ Nghut kôlhâng, ngò hkam yù râ é baptisma^a rajung joq ashí, haú a hkam yù yù gi, ngò gyai yhang hkâm zo

⁵¹ wuì nyi ri. Ngò jé lé é gi, myidàm htoq má simsaq hkyô byi râ matú nghut nhô ngam akô lhú? Haú dông a nghut, Ngò, nungmoq lé taí kôlé, byu pé lé lhoq pyô lhoq kang râ matú

⁵² sheq ru nghut lhê. Haú su mù, ahkuí mai rayhûm za mâ é byù ngo yuq gi, rayuq eq rayuq yhangmoq yhangchang byoq gâng lhum mù, sum yuq rahú, í yuq rahú, í yuq rahú, sum yuq rahú dut lo bùm bekô râ nghut

⁵³ lhê. Yhângwa gi, yhâng é yuqzo eq, yuqzo gi, yhângwa eq, yhângnu gi, yhâng é byizo eq, byizo gi, yhângnu eq, yhangmhoí gi, yhâng dumó eq, yhâng dumó gi, yhangmhoí eq kut, ngá é yanmai, rayuq eq rayuq byoq gâng lhum bùm bekô râ nghut lhê.” ga taí ri.

^a 12:50 Shî mâ é baptisma gi, Yesuq, ajung jung hpuzo mù shî hkâm é hkyô lé taí é nghut lhê.

**Dut Lò Râ Hkyo É Kumhá Lé
Sê Gam Hkoq Râ Lhê**

Mht 16:2-3, 5:25-26

- ⁵⁴ Hau htâng shiwa byu pé lé, Yhang taí é gi, “Nungmoq gi, buiwàng hkyam shut mhut htup é lé myàng jáng, ‘Maú wo lò berâ.’ ga radá dâm lhaq taí taí mu akô, haú eq rajung za le, dut lò lò mu ri. Dum nghut jáng, maupyí shut mâ é lài lo le, ‘Bui htân berâ.’ ga lhaq taí taí mu akô, haú eq ⁵⁵ rajung za le dut lò lò mu ri. Gegùn labyoq kut bang ê, nungmoq gi, myigùng eq mauhkung é kumhá lé, sê gam hkoq yu nyi akô. Haú su nghut kô le nhîng, haí mù luí, shí ipyat mâ é kumhá lé gi, a sê gam hkoq dut tò akô lhú?
- ⁵⁷ Haú eq rajung za, haí mù haú dingmán é hkyó lé yhumsîng yhang yhang ⁵⁸ a wó doqdân yù kô é lhú? Dangké, nang lé yui tsuq sù eq rahá, tarâ agyì wá chyáng e ló le, hkyô má yhang eq ngón shoq byìn hpyé huí yù aq. Haú a nghut jáng, yui yhumsîng gi, nang lé tarâ agyì chyáng é dé pyám luí, tarâ agyì gi, htóng hkyó su chyáng, nang lé ap pyám luí, yhang gi, nang lé htóng ⁵⁹ má lhûng pyám râ nghut lhê. Ngò, nang lé taí lé, yuichyín haú a ban xap xap gi, htóng haú mai nàng wó htoq ló râ a nghut.” ga taí ri.

Myit A Lhîng Jáng Shi Hten Byuq Râ

- 13** Haú hkûn, haú má nyi é byù ra-am gi, mauzau Pilat èq Galile byù ra-am lé sat mù yhangmoq é sui eq yhangmoq nóng jaú é hkungga lé nyhò pyâm é hkyô, Yesuq lé lé taí ² kyô akô. Yesuq gi, “Galile byù haú bang haú su kut hui zo kô é yanmai, yhangmoq gi, gotû Galile byu pé banshoq htoq má, yubak je myô akô nghû, nungmoq myit ngam akô

- ³ lhú? Haú su a nghut! Ngò, nungmoq lé taí kôlé, nungmoq le, myit a lhîng kô é nghut le gi, banshoq bang haú eq rajung za shi hten byuq kó ⁴ râ nghut lhê. Haú htoq agó, Siloam wà mâ é machya gyop gyó luí, nhê sat huí é byù raxe shit yuq gi, Yerusalem wà mó mâ é byù banshoq bang htoq má mara je kô akô nghû, nungmoq myit ngam nyi akô lhú? Haú su a nghut! Ngò, nungmoq lé taí kôlé, nungmoq le, myit a lhîng kô é nghut le gi, banshoq bang haú eq rajung za shi hten byuq kó râ nghut lhê.” ga taí ri.
- ⁶ Yesuq dangtú dông dum taí é gi, “Byù rayuq gi, yhâng é tsibiyiq hkyâm má, maihpáng gâm ragàm hô tô ri. Yhang agàm haú má, ashi ê ho wú ⁷ le, zui tô é a myàng nghut ri. Haú hkûn, yhang gi, ‘Wú aq, ngò sum zân tup maihpáng gâm haú má ashi ê ho wú le, a myàng nghut ri; haú lé htuq pyám aq. Haí mù, maumyí aha agó kut yuq nhang tô lhê lhú?’ ga luí, tsibiyiq hkyâm zúng sù lé taí ri.
- ⁸ Hkyâm zúng sù gi, ‘Yhumsîng ê, hkûzân za gi, yuq tô wú shi sháng gaq, shigâm hau é lhîngkyuq má ngò du lhîng to mù, myihpún kat luí bóm ⁹ byi wú shirâ. Htang zàn má ashi zui é nghut le gi, yuq to sháng gaq, ashi a zui é nghut le kúm gi, htuq pyám râ nghut lhê.’ ga luí, hkyâm yhumsîng lé tú taí ri.” gâ ri.

**Bánno Buinyì Má Gùng Loq Hten
Sù Lé, Lhoq Gê Byí É Hkyô**

- ¹⁰ Bánno buinyì lé, Yesuq gi, tara- ¹¹ jong ralhum má, mhoqshit nyi ri. Haú hkûn, haú má raxe shit zân tup nat dap luí, gùng loq lhoq hten huí é myiwe rayuq le nyi tô ri. Yhang gi, dàngngóm luí, gungdu ratsuí lháng

- a wó lhoq nyhâng lô é sù nghut ri.
- ¹² Yesuq gi, myiwe haû lé myàng jáng, yhâng chyáng wut yù mù, “Myiwe myhí ê, nàng, nòhpyo mai gè berâ.”
- ¹³ ga luí, yhâng é ahtoq má loq ke byî ri. Haú hkûn jáng, myiwe haû gi, nyàng za dum wó yap luí, Garai Gasang lé hkya-ôn nyi ri.
- ¹⁴ Haû mù, Bánno buinyì lé, Yesuq nòhpyo lhoq gê byî é yanmai, tarajong má up sù gi, wú nhik-yo luí, “Mù wó zuí é buinyì hkyuq nyí joq tô le, buinyì haú pé má, lé wó lhoq ge yù lhê. Haû mù, Bánno buinyì má gi, hkâkut kó.” ga luí, shiwa byu pé lé taí kat ri.
- ¹⁵ Haú hkûn, Yhumsîng Yesuq gi, “Gegùn labyoq kut bang ê, nungmoq yuq hkangmó gi, Bánno buinyì lé, yhumsîng é no, logúng pé lé, hkup mai hpông htoq yù mù uchyam byi huq
- ¹⁶ huq kut akô a nghut lhú? Haû nghut le gi, raxe shit zân gón Tsadán èq túi to huí é, Abraham é yhangzo yhangshu myiwe zo shí lé, Bánno buinyì má Tsadán loq mai, hkyut byi a gíng rà lhú?” ga tú taí ri.
- ¹⁷ Haû su ga taí jáng, Yhang eq i-myt shai lhum é bang banshoq gi, hoq hpû byuq bum akô. Shiwa byù banshoq bang kúm gi, Yhang kut é mauhpo amû banshoq é yanmai, gabú nyi bum bekô nghut ri.

Angshi Cham Eq Munchi Dangké

Mht 13:31-33, Mrk 4:30-32

- ¹⁸ Haú hkûn, Yesuq taí é gi, “Garai Gasâng é mingdán gi, haí eq wuí lhê lhú?”
- ¹⁹ Ngò hai eq taí kê wú rà lhú? Haû gi, byù rayuq mai, yhâng é hkyâm má hô tô é angshi cham eq wuí ri. Angshi cham haû gi, yuq kô lò mù agàm mó

dut lò jáng, hau é akoq pé má, mau-lat nghoq zô pé wó zung nô yu akô.” gâ ri.

- ²⁰ Yhang dum xoq taí é gi, “Garai Gasâng é mingdán lé, ngò hai eq taí kê
- ²¹ wú rà lhú? Haû gi, myiwe zo rayuq èq sunsô mún sum bûng má yu nyhó luí, haú pé banshoq lé wó lhoq daú nhang é múnchi eq wuí ri.” gâ ri.

Chyap É Hkúmdong

Mht 7:13-14, 21-23

- ²² Hau htâng, Yesuq gi, Yerusalem wà mó shut laí e ló uchyang, rawà bàn rawà má wàng mù, mhoqshit byî ri.
- ²³ Haú hkûn, byù rayuq gi, “Yhumsîng ê, hkyi yu é hui rà bang gi, shau za nghut rà lhú?” ga luí, Yesuq lé myí ri.
- ²⁴ Yesuq gi, “Chyap é hkúmdong mai, Garai Gasâng é mingdán má wó wàng shoq shikut keq. Hkâsu mù gâ le, ngò, nungmoq lé taí kôlé, byù myo myo gi, wó wàng shoq ga shikut wú kó rà. Nghut kôlhâng, a wó wàng kó rà
- ²⁵ nghut lhê. Yhumsîng hpó, ^a hkum toq myhí pyâm é htâng má sheq, nungmoq gi, hkúmdong hí má yap to mù, hkum lé kok uchyang, ‘Yhumsîng ê, ngamoq lé hkum hpóng byi laq ô!’ ga luí, wut dung jáng, haú yuq gi, ‘Nungmoq ó nghut é lé le, hkarâ é bang nghut é lé le, ngò a sé.’ ga tú taí rà nghut lhê.
- ²⁶ Haû jáng, nungmoq gi, ‘Ngamoq gi, nàng eq rahá zo wú shuq wú bê bang nghut lhê; ngamoq é wà hkyô pé má le, nàng mhoqshit byî wú bê nghut lhê.’ ga taí bekô rà.
- ²⁷ Nghut kôlhâng, yhumsîng hpó kúm gi, ‘Nungmoq ó nghut é lé le, hkarâ é bang nghut é lé le, ngò a sé. Age ashop đông kut é bang banshoq ê, ngá

^a 13:25 Yhumsîng hpó gi, Garai nghut lhê. Yhûm gi, Garai é mingdán lé taí é nghut lhê.

chyáng mai gâng ló byuq keq.’ ga tú taí kat rã nghut lhê.

- ²⁸ Garai Gasâng é mingdán má, Abraham, Isak, Yakup pé eq myiqhtoí pé banshoq bang nyi to kô é lé, nungmoq wó myâng kôlhang, nungmoq gi, shinggan shut hkat pyâm é hui luí, haú jowò má ngaubyi ngaú nhap eq zui kyik kyik shoq hpuzô nyi bùm
- ²⁹ bekô rã nghut lhê. Hau hkûn, buih-toq, buiwàng, maupyí, mautsûng mã é mingdán myo myo mai byu pé lé luí, Garai Gasâng é mingdán zoshuq poí mã myang zùng kó rã nghut lhê.
- ³⁰ Haú hkûn, ahkuí htâng gyó nyí bang gi, hí bekô rã; ahkuí hí to bang gi, htâng gyó bekô rã.” ga luí, yhangmoq lé taí ri.

**Yerusalem Wà Mó Eq Séng
Luí, Yesuq Taí É Hkyô**

- ³¹ Haú u lé, Hparishe pé ra-am gi, Yesuq chyáng lé luí, “Shí jowò mai htoq ló byuq aq. Hkâsu mù gâ le, Herut gi, nang lé sat rã hen nyi ri.” ga luí, Yhang lé taí akô.
- ³² Haú jáng, Yesuq gi, “‘Hkû-nyí, napmá,^a ngò nat gang hkat pyám luí, nò zo hpyo zo lhoq gê byi rã nghut lhê; sum nyí nghû rã buinyì^b mã sheq, ngá mú bàn rã nghut lhê.’ nghû luí, agè ashop é wamhkui haú
- ³³ lé ló taí kyo keq. Haí wá dut kôlhang, hkû-nyí, napmá, sânghe nyí, ngò gi, e ló rã dut ashí. Hkâsu mù gâ le, myiqhtoí pé gi, Yerusalem wà mó mai lai luí gotú jowò mã a shi wú kó nghut ri.
- ³⁴ Yerusalem ê, Yerusalem ê, myiqhtoí pé lé sat pyám pyám kut mù, náng chyáng nhang kat é bang lé, luqgok èq

dú sat sat kut é myuq nàng ê, woqzìng gi, yhangzô pé lé, yhâng é dùng hkaú mã tsìng lhûng yu é su, nungzô pé lé, Ngò hkâ-myhó dâm shuí tsìng yù nàu

³⁵ kôlhang, nàng a dóng nghut ri. Wú keq, nungmoq é yhûm gi, nungmoq é matú chamchyuyiui dut pyâm to berã nghut lhê; Ngò, nungmoq lé taí kôlé; ‘Yhumsìng é myìng mai jé lé lo é Sù gi, hkungsô wó nyí sháng gaq.’^c nghû, nungmoq a taí taí gi, Ngo lé wó myâng kó rã a nghut lo.” ga luí, yhangmoq lé taí ri.

**Hparishe Rayuq É Yhûm Má
Yesuq Jé Nyi É Hkyô**

- 14** Bánno buinyì ra-nyí mã, Yesuq gi, zang zo rã ga Hparishe suwún rayuq é yhûm má, ê wang nyi tô le, haú mã é bang gi, Yhang lé gyui
- ² gyui chòm wú nyi bum akô. Haú u lé, wui wam ana dut sù rayuq gi, Yesuq
- ³ é hí mã jé nyi tô ri. Haú mù, Yesuq gi, “Bánno buinyì mã nòhpyo lé lhoq gê byí é gi, tarã wang lhê lhú, a wang é lhú?” ga luí, tarã sarã pé eq Hparishe pé lé myí kat ri. Nghut kôlhang, yhangmoq gi, zim za dut byuq akô. Haú hkûn, Yesuq gi, nòhpyo hui sù lé, zui to mù, lhoq gê byi luí, nhang kat ri.
- ⁵ Hau htâng, Yesuq gi, yhangmoq lé, “Nungmoq chyáng mã é rayuq yuq gi, yhumsing é yhangzo rayuq yuq, haú a nghut jáng, no myang radu du, Bánno buinyì mã, wuihtung mã byit gyó le, haú hkûn jáng, a xe htoq yu é za, wó nyí kó rã nghut lhê lhú?” ga
- ⁶ myí kat ri. Yhangmoq kúm gi, dang haú hkun lé, haí le a wó tú taí kó nghut ri.

^a 13:32 *Hkû-nyí, napmá* gâ é gi, Yesuq mingkan htoq mã mú zui rã ahkýing lé taí é nghut lhê.

^b 13:32 *Sum nyí nghû rã buinyì* gâ é gi, Yesuq mingkan htoq mã mú ban zui é buinyì lé taí é nghut lhê. ^c 13:35 Hkya-on 118:26

- ⁷ Haú hkûn, Yesuq gi, ji tô é bang jé réng é zùng jowò pé hkyin yu nyí kô é lé myàng jáng, yhangmoq
- ⁸ lé dangtú dông taí é gi, “Byù rayuq yuq nang lé, myiháng poí má ji é nghut jáng, je réng é jowò má hkâ-ê zùng. Hkâsu mù gà le, náng htoq je aróng wó sù lé le, ji to shirâ
- ⁹ abe. Ji tô é nghut jáng gi, nungnhik lé ji tô é yhumsîng hpó lé lô mù, ‘Shí yuq lé jowò hui byi aq.’ ga luí, náng lé lé taí jáng, nàng hoq hpu luí, hkyî htàng shut huí zùng ra râ
- ¹⁰ nghut lhê. Haú mù luí, supé nang lé ji le, hkyî htàng má ê zûng aq; haú hkûn, nang lé jì sù lé mù luí, ‘Bui-nùm hpó ê, shí je réng é jowò má huí doq zùng aq.’ ga luí, nang lé taí jáng, nàng eq rahá zung tô é bîng lhunglhâng bâng é hí má, nàng gi,
- ¹¹ myoqdong wó râ nghut lhê. Hkâsu mù gà le, yhumsîng gùng lé waq toq é sù ó yuq nghut kôle, lhoq nyhum pyâm é hui râ nghut lhê; yhumsîng gùng lé, lhoq nyhum é sù kúm gi, waq toq é hui râ nghut lhê.” ga taí ri.
- ¹² Hau htàng, Yesuq yhang lé ji é yhumsîng hpó lé taí é gi, “Napzang, a nghut jáng, myinxûn lé nàng byi tso nau le gi, náng é buinùm wui, âgu âmâng pé, mungmoq wui, sùt wó é yhumkyo chang pé lé hkâjî tso. Haú bang lé jì tsô é nghut jáng gi, yhangmoq nang lé dum jì tsô é èq,
- ¹³ jeju dum tau kó râ nghut lhê. Nghut kôlhâng, nàng poí kut mù, byi tso byi huq nau é nghut le gi, myùng bang, hkyî gyui loq hten bang eq
- ¹⁴ myoqjit é bang lé, jì tso aq. Haú su kut jáng, nàng hkungsô wó nyí râ nghut lhê. Yhangmoq nang lé jeju a wó tau kôlhâng, dingmán bang dum dui toq lo é buinyí má, hau é akyû

lé, nàng wó hkam yù râ nghut lhê.” ga ri.

Zoshuq Poí Mó Lé Dangtú Yu É Hkyô

Mht 22:1-10

- ¹⁵ Yesuq eq rahá zô zung tô é byù rayuq gi, dang haú wó gyo jáng, “Garaí Gasâng é mingdán má é zoshuq poí má wó zo râ sù gi, hkungsô wó nyí sù nghut râ.” ga luí, Yesuq lé taí ri.
- ¹⁶ Yesuq haú yuq lé tû taí é gi, “Byù rayuq gi, myinzang byi tso râ ga, zoshuq poí mó ralhûm hen to mù, byù myo
- ¹⁷ myo lé ji tô ri. Zang byi tso râ yàm jé jáng, yhâng é dui-nhâng zoshâng lé, ji tô é bâng chyáng ‘Lé keq hkoi, zoshuq jin to bê.’ ga ê châng wut nhang ri.
- ¹⁸ Nghut kôlhâng, haú bang banshoq gi, zoshuq poí má a ê râ dông chyat he pyâm akô. Rayuq sù gi, ‘Ngò yohtung rahkyang wui tô lhê; haú lé ê wú râ dut ri. Haú mù, ngo lé ahkáng byi shi laq.’ ga yhang lé taí ri.
- ¹⁹ Dum rayuq le, ‘Ngò, nohtó ngo zúm wui tô lhê; haú pé lé dui nhang chyam wú râ dut ri; ngo lé ahkáng byi shi laq.’ ga taí wô ho ri.
- ²⁰ Dum rayuq le, ‘Ngò myiwe hâng tô é a myáng shi mù, a wó lé.’ ga taí wô ho ri.
- ²¹ Haú jáng, dui-nhâng zoshâng taú lò mù, yhâng é yhumsîng lé haú hkyô banshoq lò taí kyô ri. Haú hkûn, yhumsîng hpó gi, nhikmó gyô yo mù, ‘Wà má é hkyô mó hkyô zo hkat hkangmó má hân hân ê mù luí, myùng bang, hkyî gyui loq hten bang eq myoqjit bang lé, ê ji lò aq.’ ga luí, yhâng é dui-nhâng zoshâng lé nhang kat ri.
- ²² Hau htàng má, dui-nhâng zoshâng gi, ‘Yhumsîng ê, nàng nhang é eq rajung za ban kut bê; nghut kôlhâng, zùng râ jowò gi, mân tô ashí.’ ga taí ri.

²³ Haû su ga jáng, yhumsîng hpó gi, 'Ngá yhûm byíng râ matú, wà yàm hkyô pé eq hkyâm yàm hkyô pé má htoq ê mù, myang é bang lé a wó le wó shoq ê tsing shuí lò aq. Nang lé ngò tai lé, hí lé ji to huí é bang rayuq lhang, ngá é zoshuq poi lé wó chyim wú râ a nghut.' ga luí, yhang é dui-nhang zo-shang lé tai ri." gâ ri.

Yesuq É Chángzo Wó Dut Râ Matú

Mht 10:37-38, 5:13, Mrk 9:50

²⁵ Byù hpûng mó Yesuq eq rahá e ló kô é hkûn, Yesuq gi, haú bang ²⁶ lé lhing wú luí, "Ngá chyáng lé sù ó yuq nghut kôle, yhumsing é înu, îwa, yhangmyi, yhangzo eq, yhanggu, yhangmang, yhang nhammó pé lé le, haû htoq agó, yhumsing é asak lé le, ngo lé chyitdap é htoq má je chyitdap ²⁷ sù gi, ngá é chángzo a wó dut. Yhumsing é tapzîng lé a waq é za, Ngá htang châng é sù ó yuq nghut kôle, Ngá é chángzo a wó dut. ²⁸ Dangké, nungmoq chyáng mâ é byù rayuq yuq, tsehtung yhûm ralhûm saí nau le, yhang gi, yhûm haû ban saí râ matú, ngùn hkâ-myhó bàn râ eq yhang wó tô é ngùn luq a luq é lé, zùng mù luí, hí a sôn wú é byù nyi ²⁹ kó râ lhu? Laq má mù, apûn awang gi, saí hi to mù luí, a wó lhoq pân é nghut ³⁰ jáng, myàng é bang banshoq èq, 'Shí yuq gi, apûn awang gi, saí hi to mù luí, banshoq a wó saí pân lo nghut ri.' ga luí, yhang lé jóng pyám bekô râ nghut lhê. ³¹ Dangké, hkohkâm rayuq gi, gyè zan râ hen le, gyezo í mun eq lé sù hko-hkâm lé, gyezo ramûn eq za lhom wó zân ûng râ, a wó zân ûng râ lé, zùng mù luí, hí a myit wú é nyi râ lhu? A ³² ûng râ dut le gi, gyè pé we we má nyi tô ashî hkûn lé, lagyo suwún pé lé

nhang kat luí, simsaq râ matú hting-
³³ râm pyám ra râ nghut lhê. Haû eq rajung za, nungmoq chyáng mâ é ó yuq nghut kôlhang, yhumsîng wó é zè banshoq lé, a pyám to sù gi, ngá é chángzo wó dut râ a nghut.

³⁴ Xo gi, gè lhê. Nghut kôlhang, xomân kân byuq jáng gi, haû lé hai èq dum ³⁵ wó lhoq ngam yù râ lhu? Haû gi, myi-gung matú le, myihpún kut râ matú le, akyû a bò lo. Haû mù luí, shinggan shut kúm gi, dú pyám sê akô.

Gyo râ nohkyap dap sù gi, gyô yù sháng gaq." ga tai ri.

Byuq Byuq É Sau

Mht 18:12-14

15 Ra-nyí lé, Yesuq é dang gyo kó râ ga, kang guq bang eq yubak dap bang gi, Yhang chyáng lé zîng ² bum akô. Haú hkûn, Hparishe pé eq tarâ sará pé gi, "Shí yuq gi, yubak dap bang lé lhom hap yù mù, yhangmoq eq rahá za, zo shuq nyi ri." ga tai put nyi bum akô. ³ Haû mù, Yesuq yhangmoq lé dangtú ⁴ dông tai é gi, "Nungmoq má, sau rashô du wó luí radu byuq byuq é nghut le, gaú xe gaú du lé yoso mhan yô má nyhi pyám to mù, byuq byuq é sau haû lé, myàng shoq a châng ho ⁵ yu é, ó yuq wá nyi kó râ lhu? Byuq byuq é sau haú lé myang hô jáng, gyaí gau é i-myt èq goqsân htoq má ⁶ bún kê chûng mù, yhûm má jé jáng, yhang é buinûm ji-myi wui eq, yhumkyo chang pé lé ji yù mù, 'Ngá é byuq byuq é sau lé, ngò dum myang ho yù bê, ngò eq rahá chôm gabú sháng.' ga ⁷ tai râ nghut lhê. Haû eq rajung za, Ngò, nungmoq lé tai kôlé, myit lhing a râ é dingmán bang gaú xe gau yuq lé gabú é htoq, myit lhing é yubak dap sù rayuq é yanmai, mauhkûng htoq

má, je riyhang gabú jowò dut râ nghut lhê.

Byuq Byuq É Ngùn Chap

- ⁸ Dum nghut jáng, dangtú rallhum gi, myiwe rayuq, ngùn raxê chap wó é má, rachap byuq byuq é nghut le, yhang gi, myibung tap mù rayhum ê shum luí, myang yù shoq rago za, ho ⁹ wú râ a nghut l hú? Haú lé ho myàng jáng le, yhang é buinùm ji-myi wuì eq yhumkyo chang pé lé ji yù mù, ‘Byuq byuq é ngá ngùn chap lé dum myang ho yù bê, ngò eq rahá chòm gabú ¹⁰ sháng.’ ga tái râ nghut lhê. Haú eq rajung za, Ngò, nungmoq lé tái kôlé, myit lhing é yubak dap sù rayuq é yanmai, Garai Gasâng é maumang lagyô pé hí má, gabú jowò dut râ nghut lhê.” gâ ri.

Byuq Byuq É Yuqzo

- ¹¹ Yesuq xoq tái é gi, “Byù rayuq gi, ¹² yuqzo í yuq wó ri. Haú nhik mâ é tiq sù yuq gi, yhang wa lé, ‘Áwa ê, ngò wó gíng é sutzè, ngo lé gàm byi laq.’ ga dung jáng, yhang wa le yhangnhik tâng lé sutzè gàm byi kat ri. ¹³ Hau htâng hkâ-myháng a myáng má, yhangzo tiq sù yuq gi, sutzè banshoq hkyom yu chùng mù, mau we shut ê luí, haú jowò má, mingkan ngón hkyô châng é má yhang wó é ngunzè banshoq lé langsâ pyám bê. ¹⁴ Haú su kut ngunzè wó mi-wó lé ban langsâ pyám é htâng má, haú mau má mutmó gyo é yanmai, yhang gi, ¹⁵ asho awui dut lo nyi bê nghut ri. Haú mù, haú mau mâ é byù rayuq chyáng, langchyáng ê kut le, haú yuq gi, yhang lé waq rém jang shut nhang kat mù, ¹⁶ waq lé lhom zúng nhang ri. Haú hkûn, yhang gi, waq jùm zô é shigyang cham

pé lé lháng, zo naú shoq dut kôlhang, ó yuq le a byi zo kó nghut ri.

- ¹⁷ Haú mù, yhang myit bûn lo é gi, ‘Ngá wâ chyáng nyi é langchyáng pé gi, agùn agó myàng zô nyi kó râ nghut lhê. Nghut kôlhang, ngò gi, shí jowò má, zo mut wuìshit é eq shi ló râ dut ¹⁸ bê. Ahkuí, ngò toq mù, ngá wâ chyáng taú ló luí, “Áwa ê, ngò gi, Garai Gasang lé le, nang lé le, shut bê. Ahkuí ¹⁹ mai ngò gi, nung zo nghû râ a gíng lo, hau é yanmai, náng é langchyáng rayuq dông za ngo lé nyi nhâng laq.” ²⁰ nghû luí, ló tái râ.’ gâ ri. Hau htâng, yhang toq luí, yhang wâ chyáng ló le, yhang we we má ru nghut ashí hkûn mai, yhang wa gi, yhang lé lhom myàng jáng, wú shogyo luí, din ê mù, yhangzô é lingzing má ê po pyik dap to luí, bopuq puq byi ri. ²¹ Haú hkûn, yhangzo gi, ‘Áwa ê, ngò gi, Garai Gasang lé le, nang lé le, shut bê. Ahkuí mai, ngò gi, nung zo nghû râ a gíng lo.’ ga luí, yhang wa lé dúng tôngbán ri. ²² Yhângwa kúm gi, yhang é langchyáng pé lé, ‘Réng dik é mebu hân hân yu lé mù, yhang lé hut byi keq; yhang é loq má, loqchyop chyop byi keq; hkyi má le hkyi-tsung tsung byi ²³ keq. Tsô myum tô é nojúng zo le yu sat keq. Haú mù, nga-nhúng gi, zoshuq poí kut mù chòm ngón sháng. ²⁴ Haú mù gâ le, ngá zo shí yuq gi, shi byuq é mai, ahkuí dum duì bê; byuq byuq é mai le, ahkuí dum myàng bê.’ ga tái ri. Haú mù, yhangmoq gi, ngón ngón zo shuq ló bekô. ²⁵ Haú u lé, yhangzo ko sù yuq kúm gi, yò má nyi tô ri. Yhang gi, yò mai yhúm shut jé lo nyi é hkûn, zìng út bat ²⁶ luí gó nyi é htê lé lò wó gyô ri. Haú mù, langchyáng rayuq lé wut yù luí,

- ²⁷ haú hkyô lé yhang myî wú le, lang-chyáng haú gi, ‘Nung gu dum taú jé lô bê. Haú mù, náng wa gi, nung gu wáng wáng zán zán dum taú jé lo é lé lhom myàng luí, tsô myum tô é nojûng zo lé sat bê nghut ri.’ ga taí kyô ri.
- ²⁸ Dang haú lé wó gyo jáng, yhang gi, gyô nhik-yo luí, yhúmhaú shut a wàng lo kut ri. Haú mù, yhâng wa htoq ê luí, yhang lé ê chyuoq ri.
- ²⁹ Yhangzo kúm gi, ‘Wú aq, ngò, shí-myháng shílo náng é jùn dông kut luí, hkâ-nhám le náng dang lé a lu laí wú. Nghut kôlhang, ngò ngá é luzúm wuí eq ngón kún râ matú, bainám zo radu lhang radám le nàng a
- ³⁰ byi wú shi. Shiwa myhî pé eq zum yap wún luí, náng é sutzè lé lhoq pân pyám é sù nung zo haú dum taú jé lô jáng kúm gi, tsô myum tô é nojûng zo lé, yhâng é matú nàng sat byi bu-nhung!’ ga luí, yhâng wa lé tú taí ri.
- ³¹ Yhângwa gi, ‘Ngá zo ê, nàng gi, hkâ-nhám le ngò eq rahá yhang nyi nyi lhê mù, ngá é sutzè joq mijoq ban-shoq gi, náng é chyat nghut lhê. Nghut kôlhang, shí nung gu gi, shi byuoq é mai ahkuí dum duí bê; byuoq byuoq é mai le, dum myàng bê. Haú mù, gabú hpo nghut bê.’ ga luí, yhang lé taí ri.”

Hpaqchyí Ge Dâ É Sùt Zum Sù

- 16** Yesuoq, Yhâng é chángzô pé lé taí é gi, “Sahtê rayuoq chyáng sùt zum sù rayuoq nyi ri. Haú yuoq gi, yhâng yhumsing é sutzè pé lé jai hpyuoq pyám ri ga, yhâng yhumsing é hí má, yhang lé mara lé hun akô.
- ² Haú hkún, sahtê hpó gi, yhang lé wut yù mù, ‘Nàng é hkyô lé ngò wó gyo

bê. Haú gi, hkâsu lhú? Nàng sùt zúm é eq séng luí kut tô é jihpán laiká lé lò shit wú aq. Hkâsu mù gâ le, ahkuí mai nàng gi, sùt zum sù wó kut lo râ a nghut lo.’ ga taí ri.

- ³ Haú jáng, sùt zum sù gi, ‘Ahkuí, ngò hkâsu kut lo râ lhú? Ngá é yhumsing gi, ngo lé sùt zum ayá mai lhoq hkyô pyám bê. Myí du myí hkop zo râ le ngò wum a bò; dung zo dung shuoq râ le ngò hoq ri. Ngo lé sùt zúm é ayá mai hkyô pyám htâng má, supé ngo lé yhangmoq é yhúm má lhom hap yù râ matú, hkâsu kut râ hkyô lé
- ⁵ ngò sé bê.’ ga wó myit rot jáng, yhang gi, yhâng yhumsing hpó lé chyín dap tô é bang rayuoq htâng rayuoq lé wut yù mù, sâng-hí yuoq lé, ‘Ngá yhumsing hpó chyáng nàng chyín hkâ-myhó dap
- ⁶ tô lhê lhú?’ ga myi jáng, haú yuoq gi, ‘Xú rashô pûng dap lhê.’ ga tú taí ri.

Haú jáng, sùt zum sù gi, ‘Náng é jihpán yù luí, hân zùng mù, ngo xê pûng kut kê to aq.’ ga yhang lé taí ri.

- ⁷ Dum rayuoq lé, ‘Nàng hkâ-myhó dap tô lhê lhú?’ ga myi jáng, haú yuoq gi, ‘Sungso rashô búng dap lhê.’ ga tú taí ri. Sutzum sù gi, haú yuoq lé, ‘Náng é jihpán má shit xê búng kut kê to aq.’ ga taí ri.
- ⁸ Haú a dingmán é sùt zum sù lé, yhumsing hpó gi, hpaqchyí ge da sù nghut ri ga hkya-ôn ri. Ngò shí lé taí é gi, mingkan zo wuí gi, yhangmoq é mingkan eq sêng é hkyô pé má, maubó gung é yhangzo pé^a htoq hpaqchyí je bò kô é yanmai nghut lhê.
- ⁹ Haú mù luí, Ngò nungmoq lé taí kyo kôle, a tara é sutzè pé èq buinùm ho nyi keq, haú mù, sutzè haú htúm byuoq jáng, nungmoq lé, ahtum abyuoq joq tô

^a 16:8 Maubó gung é yhangzô pé nghu é gi, Garai Gasâng é yhangzô pé lé taí é nghut lhê.

é yhûm má, lhom hap yu é hui kó rá nghut lhê.

- ¹⁰ Tiq é mû má wó lum é sù ó yuq nghut kôlhang, mû mó má le wó lûm rá nghut lhê. Tiq é mû má lhum a zuí é sù ó yuq nghut kôlhang, mû mó má le
- ¹¹ lhumzui rá a nghut. Haû mù, mingkan sutzè má lhang nungmoq lé a wó lûm kô é nghut le gi, haû tengmán é sutzè lé, nungmoq chyáng ó yuq wá kâm ap
- ¹² byi rá lú? Supé é sutzè má, nungmoq lé a wó lûm kô é nghut le gi, nungmoq sîng âng é sutzè lé, nungmoq chyáng ó yuq wá kâm ap byi rá lú?
- ¹³ Dui-nhâng zoshâng ó yuq nghut kôlhang, yhumsîng í yuq lé wó dojaú rá a nghut. Hkâsu mù gâ le, yhang gi, rayuq lé a jú kut mù, rayuq lé, chyt-dap rá nghut lhê; haû a nghut jáng, rayuq lé gi, lhumzui mù, rayuq lé gi, hpau a tap kut rá nghut lhê. Nungmoq gi, Garai Gasang lé le, ngunzè lé le, radá dâm wó dojaú kó rá a nghut.” ga taí ri.
- ¹⁴ Ngùn myoqnoq é Hparishe pé gi, dang haû banshoq lé wó gyo kôjáng, Yesuq lé wuizui kut pyám byí akô. Haû mù luí, Yesuq gi, yhangmoq lé, “Nungmoq gi, byu pé hí má yhumsing gùng lé yhumsîng dingmán bang su kut shit mhaû é bang nghut akô; nghut kôlhang, Garai Gasang gi, nungmoq é i-myt unghkaû lé sé sù nghut lhê. Byù é hí má hpaudap é pé gi, Garai Gasâng é hí má achayut é nghut nyi ri.
- ¹⁶ Jep é tarâ^a eq myiqhtoí pê é dang, ahko ahkáng wó tô é ahkýing gi, wui-myhup sará Yohan jé lé é buinyì jé shoq nghut bê. Haû hkýing mai gi, Garai Gasâng é mingdán hkyô gabú danglù lé, hko kyô nyì mù, yuq du jup

gi, haû hkyô má htûng chying wang

¹⁷ ló bum akô. Jep é tarâ mâ é tiq dik é dangjí eq myihkyet zo ralhumm lé wó lhoq hten rá htoq, mauhkûng eq myigùng hten rá gi, je luí rá nghut lhê.

- ¹⁸ Dangké, yhumsing é yhangmyi lé kâng pyám mù, myiwe gotû dum hâng yu é sù ó yuq nghut kôle, su-myi lú é sù nghut bê; yhumsing é yhanglâng eq gang bê myiwe lé hâng yu é sù le, su-myi lú é sù dut bê nghut ri.” ga taí ri.

Sahtê Hpó Eq Lazaruq

- ¹⁹ Yesuq dum xoq taí é gi, “Radàm lé, sahtê rayuq gi, nè é eq nú-nhâm é mebu wut mù luí, nyí nyí bui bui zo
- ²⁰ ngón shuq ngón nyi ri. Yhâng é hkúmdong má gi, ragùngdú é jeq byi tô é Lazaruq gâ é dung zo sù rayuq lé, lé
- ²¹ nyhi tô akô. Haû yuq gi, sahtê wá é siboí mai gyó é agyó ahtâng lé, wú zô nau nyi ri. Hkui pé le yhâng é dâm pé má, lé yoq byí nyi akô.
- ²² Htâng má, haû dung zo sù shi byuq jáng, maumang lagyô pé gi, mauhkûng má nyi é Abraham é tanghkoí má yhang lé shuí ló byí akô. Sahtê wá le shi byuq luí, yhûm pyám bekô
- ²³ nghut ri. Sahtê wá gi, ngaraí ming má dik shoq hpuzô nyì mù luí, tu wú kat le, we we má Abraham lé le, yhâng é tanghkoí mâ é Lazaruq lé le, myàng
- ²⁴ kat ri. Haû mù, yhang gi, ‘Áwa Abraham ê, ngo lé shogyo yù laq ô. Ngò gi, shí myi htum má achyí aku nyé é hui zô nyi ri. Haû mù, Lazaruq gi, yhâng é loqnyhui ù èq wuì má tik yù mù, ngá é shô má wuì ra-poq zo hkâlhang lé tik cham byi sháng gaq, yhang lé ngá chyáng nhang kat byi laq ô!’ ga luí, dúng wut nyi ri.

^a 16:16 *Jep é tarâ* gâ é gi, Garai Gasang, Mosheq mai nga-nhúng lé byí tô é tarâ lé gâ lhê.

- ²⁵ Haú hkûn, Abraham gi, 'Ngá zo ê, asak dui tô é u lé, nàng nyì ngón yuqyo tô é hkûn, Lazaruq gi, asho awui dut é lé, bûn nyì aq. Ahkuí, yhang kúm gi, shí má lo nyi byán to bê; nàng chyaú gi, jamjau hui zô nyì
- ²⁶ bê. Haú mai gotû gi, shí mai nungmoq chyáng dap lé naú bang a wó dap shoq le, haú mai ngamoq chyáng ó a wó dap lé râ matú le, ngamoq eq nungmoq é gyoro má, nik dik é langhkung mó èq kyo pyâm to bê nghut ri.' ga tâ ri.
- ²⁷ Sahtê wá gi, 'Âwa ê, haú nghut le gi, ngò, nang lé dúng nau ri. Ngá gû pé ngo yuq nyi ashí; yhangmoq le îsu hpuzô é jowò má a jé sháng gaq,
- ²⁸ yhangmoq myit lhîng shoq ló tâ pun râ matú, Lazaruq lé ngá wâ yhûm shut nhang kat byi laq ô!' ga luí, dîng wut ngau nyi ri.
- ²⁹ Abraham gi, 'Yhangmoq chyáng, Mosheq eq myiqhtoí pé nyi lhê; haú bâng dang lé gyô yù kó sháng gaq.' ga tâ ri.
- ³⁰ Sahtê wá gi, 'Âwa Abraham ê, haú su a nghut. Shi byuq é bang mâ é rayuq yuq yhangmoq chyáng dum taú lo é nghut le kúm gi, yhangmoq myit lhîng kó râ nghut lhê.' ga tâ ri.
- ³¹ Abraham gi, 'Mosheq eq myiqhtoí pé é dang lé yhangmoq a gyo kô é nghut le gi, shi byuq é bang mâ é rayuq yuq dum dui toq ló mù, ló taí kyo kôlhang, kâm gyo kó râ a nghut.' ga luí, yhang lé tâ tâ ri." gâ ri.

Mara Hkyut É Hkyô Eq Lumjîng Myit

Mht 18:6-7, 21-22; Mrk 9:42

17 Yesuq, Yhâng chángzô pé lé taí é gi, "Byu pé lé mara kut shut nhang é hkyô gi, joq htoq lô râ za nghut lhê. Nghut kôlhang, mara kut shut nhang é hkyô lé lhoq htoq é sù

- gi, dingnyé wó râ. Zoshâng shí bang mâ é rayuq lé, mara kut shut nhang é sù gi, yhâng é lingzing má luquí long mó tuí hut byi luí, wuimau má ê dú hkyô pyâm é huí é nghut le gi, yhang é
- ³ matú je gè râ nghut lhê. Nungmoq gi, yhumsîng gûng yhumsîng sidiq keq.

Nunggu nungmang nàng lé mara kut shut é nghut le gi, yhang lé tan luí, mhoqshit aq; yhang myit lhîng é nghut le gi, yhang lé mara hkyut pyâm

⁴ byi aq. Ra-nyí má za, yhang nang lé nyhit dâm shut mù, 'Ngò myit lhîng bê.' ga luí, nang lé nyhit dâm dum tôngbán le, tôngbán hkangmó, nàng, yhâng é mara lé hkyut pyâm byi aq." gâ ri.

- ⁵ Haú hkûn, lagyô pé gi, "Ngamoq é lumjîng myit lé lhoq ko byi laq." ga Yhumsîng lé dîng akô.

⁶ Haú jáng, Yhumsîng gi, "Nungmoq é lumjîng myit angshi cham í za hkâ-lháng bò kô é nghut le gi, shí hangwâ gàm lé, 'Sikgâm ê, amyit eq roq bún luí, wuishuq lung-aú má, ê yuq to aq ô.' gâ le, nungmoq é dang lé sikgâm haú gyo byi râ nghut lhê.

- ⁷ Dangké, nungmoq mâ é rayuq yuq chyáng, yò hpuy é, a nghut jáng, sau zúng é dui-nhâng zoshâng rayuq nyi é nghut le, dui-nhâng zoshâng haú yohitung pá mai jé lo é hkûn, yhang lé, 'Hân zûng mù zang zo aq.' ga luí, ó
- ⁸ yuq wá taí kó râ lú? Haú dui-nhâng zoshâng lé sheq, 'Ngò zo râ myinzang lajang aq. Ngò bàn zo shoq hpyidum má hpyihit hit mù, xun zang wú nyí aq. Ngò bàn zo jáng sheq nàng wó zo râ nghut lhê.' ga luí, taí râ a nghut kó
- ⁹ lú? Taí mitaí banshoq lé, dui-nhâng zoshâng ban zui saí byí é nghut kô-lhang, yhang lé jeju bûn é dang ó yuq
- ¹⁰ wá taí wú akô lú? Haú eq rajung za, nungmoq gi, taí mitaí ban kut jáng

sheq, ‘Nga-nhúng gi, jeju bun a gíng é dui-nhâng zoshâng pé nghut nyi lhê; kut râ é mù lé za lhoq pân é bang nghut lhê.’ nghû taí keq.” ga taí ri.

**Manggâm Dap Bang Raxê Yuq Lé,
Yesuq Lhoq Gê Byî É Hkyô**

- 11 Ahkuí, Yesuq gi, Yerusalem wà mó shut e ló nyi le, Samariq mau eq Ga-
12 lile mau gyoro mai lai e ló ri. Yhang, wà rawà shut wang ló é hkûn, mang-
gâm dap é byù raxê yuq eq huí ri. Haú bang gi, we mai yap to mù, Yesuq lé,
13 “Yesuq, Zau ê, ngamoq lé shogyô yù laq ô.” ga luí, wut garû bum akô.
14 Yesuq gi, yhangmoq lé myàng jáng, “Nungmoq é gungdu lé, hkyangjông pè chyáng ló tûn shit keq.” ga yhang-
moq lé taí ri. Yhangmoq gi, hkyô má ru sô nyi ashî le hláng, sân-yúng ló byuq bekô.
15 Yhangmoq chyáng mâ é rayuq gi, yhumsing gungdu ge byuq é lé myàng jáng, Yesuq chyáng dum taú ê mù, htê mó èq Garai Gasang lé hkya-ôn é eq,
16 Yesuq é hkyî wang má paí gop to luí, Yhang lé jeju hkya-ôn nyi ri. Haú yuq gi, Samariq byù nghut ri.
17 Haú mù, Yesuq gi, “Sân-yúng byuq é gi, raxê yuq a nghut lú? Gau yuq
18 gi, hká ló byuq bekô? Shí tûngbaù rayuq mai lai luí, dum taú lé mù Garai Gasang lé hkya-ôn é byù, rayuq le a
19 nyi lo kó lú?” ga taí ri. Hau htâng, Yesuq gi, haú yuq lé, “Toq mù ló aq, náng é lumjúng myit gi, nang lé lhoq sân-yúng byi bê nghut ri.” ga taí ri.

Garai Gasâng É Mingdán Jé Lô Râ Hkyô
Mht 24:23-28, 37-41

- 20 Radàm lé, Hparishe pé gi, Garai Gasâng é mingdán hkâ-nhám jé râ hkyô, Yesuq lé myî akô. Haú jáng, Yesuq gi, “Garai Gasâng é mingdán jé lé râ gi,

myoq èq wú luí myàng râ a nghut.

- 21 Garai Gasâng é mingdán gi, nungmoq yuq jup é ahkaú má nghut nyi é yan-mai, ‘Wú keq, shí má joq ri, mhó má joq ri.’ ga luí le, byu pé gi, wó taí kó râ a nghut.” ga luí, yhangmoq lé tû taí ri.
22 Chángzô pé lé le Yesuq taí é gi, “Haú Byu Yhangzô é buinyî ra-nyî lé, nungmoq myàng nau dik é ahkyíng jé râ. Nghut kôlhang, nungmoq gi, Byu Yhangzo lé wó myàng kó râ a nghut.
23 Haú buinyî má, byu pé gi, nungmoq lé, ‘Yhang shí má nyi ri.’ haú a nghut jáng, ‘Yhang hê má nyi ri.’ ga taí kó râ nghut lhê. Nghut kôlhang, hkâ-ê; hkâ-cháng kó. Hkâsu mù gà le, maumyî rahkyam má hpyat é maulhap gi, mau-myî gó hkyam jé shoq duqbó é su, haú Byu Yhangzo dum jé lé é buinyî má le
24 dut râ nghut lhê. Nghut kôlhang, haú su a dut htoq shimá, Yhang gi, zing-rí é myo myo lé le, ipyat shi mâ é byu pé èq he-ngik pyâm é lé le, hui shirâ nghut lhê.
25 Noaq é tsín pyat má dut é su, haú Byu Yhangzo jé lé é buinyî má le
26 dut râ nghut lhê. Byu pé gi, Noaq, wuì-sanghpo mó hkaú má wang é hkûn jé shoq, zo zo shuq shuq, myi byi myi yû, myiháng kut luí, nyi nyi bum akô. Haú hkûn, dowuí dítng lô mù, yhangmoq banshoq lé lo lhoq htên pyám bê nghut ri.
27 Haú eq rajung za, Lot é pyat má le, byu pé gi, zo mù, shuq mù, ung zo wuì zo, ho zo ho shuq, yhúm kut luí
28 nyi nyi akô. Nghut kôlhang, Sodom wà mai Lot htoq ló é buinyî má, mau-hkûng mai, myi eq hang gi, mau su wò gyó lô luí, lhunglhang lé lhoq htên pyám bê nghut ri.
29 Haú Byu Yhangzo, lé htoq shit é buinyî má le, haú eq rajung za dut
30 râ nghut lhê. Haú buinyî má, yhum-

hkûng^a htoq má nyi tô é sù gi, yhúm-hkaû mã é zè lé, a ló gyó wang yù lo sháng gaq. Yò má nyi tô é sù gi, haû eq rajung za, yhúm shut a taû ló lo sháng gaq. Lot é yhangmyi^b lé bûn nyi keq.

³² Yhumsing é asak duì hkyô hô sù ó yuq nghut kôle, asak sum râ nghut lhê; asak sum pyâm é sù kúm gi, asak wó duì râ nghut lhê. Ngò, nungmoq lé taí kyo kôlé, haû myín lé, yhupjang ralhúm má byù í yuq nyi to kô le, rayuq gi, shuí yu é hui mù, rayuq gi, myit gyó to râ nghut lhê. Myiwe í yuq luí má rahá za chôm luí nyi tô le; rayuq gi, shuí yu é hui mù, rayuq gi, myit gyó pyâm to râ nghut lhê. Yohtung má byù í yuq nyi to le, rayuq gi, shuí yu é hui luí, rayuq gi, myit gyó pyâm to berâ nghut lhê.” gâ ri.

³⁷ Haú hkûn, chángzô pé gi, “Yhumsing Yesuq ê, haû gi, hká gyo má dut râ lhú?” ga luí, Yesuq lé myi kôjáng, Yhang gi, “Màng leq é jang má, langdâ pé, lé zîng bùm râ nghut lhê.” ga luí, yhangmoq lé tû taí ri.

Chuimó Myhí Eq Tarâ Agyi É Hkyô Lé Dangtú Yù É Hkyô

18 Yesuq, Yhâng é chángzô pé lé, myit wum a gyú é za, hkâ-nhám le kyûdung nyi râ hkyô lé, dangtú dông mhoqshit é gi, “Wà rawà má, Garai Gasang lé le a gyuq hoq, byù lé le haí su a ngàm é tarâ agyì rayuq nyi ri. Haú wâ má chuimó myhí rayuq le nyi ri. Yhang gi, haû tarâ agyì wá chyáng ê luí, ‘Ngò eq amû htoq sù lé, yhâng é mara eq rajung za, jéyáng byi laq.’ ga luí, ê dum taí taí kut nyi ri.

⁴ Nghut kôlhang, tarâ agyì wá gi, ahkyíng rayoq zo jé shoq tarâ a jéyáng

byi é tô tô ri. Hau htâng má, yhang gi, ‘Ngò, Garai Gasang lé le a gyuq a hoq, byù lé le haí su a ngàm, nghut kôlhang, chuimó myhí shí yuq é amû lé, ngò a jéyáng a doqdan byi é nghut le gi, yhang dum lé lé kut mù, ngo lé myit hpêbù nhâng râ dut ri. Haû mù, ngò yhâng é amû lé jéyáng byi râ.’ ga, yhâng é unghkaû má myit yu ri.” gâ ri.

⁶ Haû mù luí, Yhumsing Yesuq gi, “A ding a mán é tarâ agyì wá taí é dang mai mhoq yù keq. Garai Gasang gi, Yhang lé nyi myín wut dúng nyi é, Yhang hkyin yu to bê bang lé, tarâ é dông a kut byi é gi, myáng myáng nyi to râ lhú? Ngò, nungmoq lé taí kôlé, Garai Gasang gi, yhangmoq lé hân yhang tengmán é dông jéyáng byi berâ nghut lhê. Nghut kôlhang, haû Byu Yhangzo jé lé é buinyi má, lumjín hkyô lé gi, mingkan htoq má myang wú shirâ lhú?” ga taí ri.

Hparishe Eq Kang Guq Sù Kyûdung É Hkyô

⁹ Yhumsing gùng lé dingmán bun luí, byù góbang lé wú tiq é bang ra-am lé, Yesuq dangtú dông taí é gi, “Byù í yuq kyûdung kó râ ga, noqkuq yhúm má doq e akô. Rayuq gi, Hparishe, rayuq gi, kang guq sù nghut ri. Hparishe hpó gi, yap to luí, ‘Garai Gasang ê, ngò gi, byù góbang su lú zo lú shuq é hkyô le a kut, agè ashop é hkyô le a cháng, su-myi le a lú é htoq agó, shí kang guq sù su le, a nghut é yanmai, ngò nàng lé jeju bûn lhê ô! Ngò gi, rabat má zoshuq í dâm gám nyi lhê; ngò wó yu é gû mã é xê gambùm ragambùm le kat nyi lhê.’ ga luí, yhang baú yhang gotú kut dúng nyi ri.

^a 17:31 Yudaq byu pé é yhumhkûng gi, rá é nghut lhê mù, nyi kún jang kut akô. ^b 17:32 Lot é yhangmyi gi, Sodom wâ shut dum taû lhing wú é yanmai, Garai Gasang lhoq hten pyâm é hui sù nghut lhê.

¹³ Kang guq sù kúm gi, we we má yap to mù, mauhkûng shut lháng a wám tu wú é za, wànggàng bat luí, ‘Garai Gasang ê, shí yubak dap sù ngo lé, shogyô yù laq ò!’ ga dúng ri.

¹⁴ Ngò, nungmoq lé taí kôlé, kang guq sù kúm gi, Garai Gasâng é hí má mara hkyut san byí é lé wó yú luí, yhûm shut dum taù ló bê; nghut kôlhang, Hparishe wá gi, a wó nghut ri. Hkâsu mù gâ le, yhumsing gùng lé waq toq sù ó yuq nghut kôle, lhoq nyhum pyâm é hui râ nghut lhê; yhumsing gùng lé lhoq nyhum é sù kúm gi, waq toq é hui râ nghut lhê.” ga taí ri.

**Zoshâng Wuí Lé Yesuq
Shimân Byí É Hkyô**

Mht 19:13-15; Mrk 10:13-16

¹⁵ Byu pé gi, zonú wuí lé Yesuq záng htung byi sháng gaq ga, Yhâng chyáng shuí lé lo bum akô. Chángzô pé gi, haú lé myàng jáng, lhóm tân hkûm ¹⁶ akô nghut ri. Nghut kôlhang, Yesuq gi, zoshâng wuí lé, wut yù luí, “Haú zoshâng wuí lé, Ngá chyáng lé nhâng keq; yhangmoq lé hkâhkûm zing to kó; hkâsu mù gâ le, Garai Gasâng é mingdán gi, haú sù é bâng é mingdán ru nghut lhê. Ngò, nungmoq lé ¹⁷ teng za taí kôlé, Garai Gasâng é mingdán lé, zoshâng su kut a lhóm hap yu é nghut le gi, mingdán haú má gè gè yhang wó wâng râ a nghut.” ga taí ri.

Ayá Wó É Sahtê Hpó

Mht 19:16-30; Mrk 10:17-31

¹⁸ Ayá wó é byù rayuq le, Yesuq lé, “Ge é Sará ê, ahtum abyuq é asak wó yú râ matú, ngò haí kut ra râ lú?” ga myí ri.

¹⁹ Yesuq gi, “Haí mù, Ngo lé ge é Sará nghu lhê lú? Garai Gasang mai lai ²⁰ luí, ge é ó yuq le a nyí. Jep é tarâ má, ‘Su-myi sulàng hkâlú, byù hkâsat, hkâhkau, a teng a mán é saksé hkâhkám, nángnu nángwa lé hkungga aq.’^a gâ é dang pé lé, nàng sé gû bê.” ga luí, yhang lé tû taí ri.

²¹ Haú yuq gi, “Haú pé banshoq lé, ngò, zoshâng hkûn mai cháng bê nghut lhê.” ga taí ri.

²² Yesuq gi, dang haú lé wó gyo jáng, “Nàng kut râ rajung râ tô ashí; nàng wó miwó lé ûng pyám luí, myùng bang lé byí pyám aq; haú jáng, nàng, mauhkûng htoq má sutzè wó râ nghut lhê; haú mù, Ngá htàng lé cháng aq.” ga luí, yhang lé taí ri.

²³ Haú yuq gi, dang haú lé wó gyo jáng, sutzè gyai wó sù nghut é yanmai, gyai yhang myit a ngón dut byuq ri.

²⁴ Yesuq gi, haú yuq lé wú luí, “Sutzè wó bang gi, Garai Gasâng é mingdán má wàng râ matú, haú-í yhang wuí ²⁵ ri-nhung! Sutzè wó sù rayuq, Garai Gasâng é mingdán má wó wâng râ htoq, gola-uq radu âpno mai wó wang lai râ gi, je luí râ nghut lhê.” ga taí ri.

²⁶ Dang haú lé wó gyô é bang gi, “Haú su ru nghut le gi, ó yuq za hkyi yu é hui râ nghut lhê lú?” ga myí bum akô nghut ri.

²⁷ Haú hkûn, Yesuq gi, “Byù a wó kut é hkyô lé, Garai Gasang gi, wó kut lhê.” ga taí kyô ri.

²⁸ Haú hkûn, Petruq gi, Yesuq lé, “Wú aq, ngamoq gi, wó miwó tô pyâm to luí, Náng htàng cháng bê nghut lhê.” ga taí jáng,

²⁹ Yesuq gi, “Ngò, nungmoq lé teng za taí kôlé, Garai Gasâng é mingdán é yanmai, yhumsing é yhûm, yhum-

^a 18:20 Htoq Ló 20:12-16

sing é yhangmyi, yhumsing é âgu âmang, yhumsing é înu îwa, yhumsing é yhangzô pé lé, pyâm to sù ó yuq
³⁰ nghut kôle, shí pyat má, akyû myo myo wó hkam yù râ htoq agó, htang pyat má le, ahtum abyuq é asak a wó yu é gi, a nyi râ nghut lhê.” ga luí, yhangmoq lé taí ri.

**Yesuq, Yhang Shí Hkám Râ
Lé Dum Taí É Hkyô**

Mht 20:29-34; Mrk 10 46-52

³¹ Yesuq gi, Yhâng é lagyô pé raxe í yuq lé gotû kut wut yù mù, “Gyô wú keq, nga-nhúng gi, Yerusalem wà mó shut doq ló nyi é nghut lhê. Haú má jé jáng, haú Byu Yhangzo eq séng luí, myiqhtoí pé kâ tô é banshoq gi, dik lò
³² berâ nghut lhê. Hkâsu mù gâ le, Byu Yhangzo gi, tûngbaù pé é loq má ap pyâm é hui luí, haú bâng èq Yhang lé, wuizui kut pyâm é, rhoí rip e, sôkan byé gyûn é, nhuq bat é kut yû mù, sat
³³ pyám kó râ nghut lhê. Hau htâng sum nyí nghû râ buinyi má, Yhang gi, dum dui toq lô râ nghut lhê.” ga luí, yhangmoq lé taí ri.
³⁴ Lagyo pé gi, dang haú pé rahkun lé lháng a sê gyo kó; dang hau é lichyúm gi, yhangmoq é hí má zaú nghop tô é nghut é yanmai, Yhang haí taí nyi é hkyô pé lé yhangmoq a sé kó nghut ri.

**Dung Zo É Myoqjit Sù Lé, Yesuq,
Myoq Dum Myàng Nhang É Hkyô**

³⁵ Ahkuí, Yesuq Yerihko wà nàm má jé lo nyi le, myoqjit é byù rayuq gi, hkyô yàm má zùng mù, dung zô nyi ri.
³⁶ Yhang gi, byù rajùm rayò sô laí ló é htê lé wó gyo jáng, haú haí dut nyi é
³⁷ hkyô lé, myi kat ri. Haú hkûn, yhangmoq gi, “Nazaret wà byù Yesuq laí ló ri.” ga luí, yhang lé taí kyo akô.

³⁸ Haú su gâ é lé wó gyo jáng, yhang gi, “Dawiq é Yhangzo Yesuq ê, ngo lé shogyo yù laq ô!” ga wut dúng kat ri.

³⁹ Hí má laí ló é bang gi, zim za nyi râ matú yhang lé tân hkûm akô; nghut kôlhang, yhang gi, “Dawiq é Yhangzo ê, ngo lé shogyo yù laq ô!” ga, je riyhang htê mó o mó èq wut dúng kat ri.

⁴⁰ Haú mù, Yesuq gi, yap kat mù, byù haú yuq lé Yhâng chyáng shuí lé lô nhang kat ri. Myoqjit sù Yhâng nàm
⁴¹ má jé lé jáng, Yesuq gi, “Ngò, nàng lé haí kut byi râ ô nau ri lhu?” ga, yhang lé myi kat ri.

Haú yuq gi, “Yhumsing ê, ngò myoq myàng nau ri.” ga tû taí ri.

⁴² Hau hkûn, Yesuq gi, “Náng myoq myàng sháng gaq! Náng é lumjng myit gi, nang lé lhoq gê byi bê
⁴³ nghut ri.” ga, yhang lé taí ri. Haú yuq gi, haú hkûn jáng, yhang myoq wó myàng mù, Garai Gasang lé hkya-on uchyang Yesuq htâng cháng bê. Lhunglhang bang haú lé myàng kôjáng, Garai Gasang lé hkya-ôn nyi bum akô.

Yesuq Eq Zake

19 Yesuq gi, Yerihko wà má wàng
² mù, sô laí ló nyi ri. Haú hkûn, haú wâ má, Zake gâ é kang guq agyi rayuq nyi ri; haú yuq gi, sutzè wó
³ sù nghut ri. Yhang gi, Yesuq hká yuq nghut é lé myàng nau kôlhang, nyhùm sù nghut é htoq agó, byù rajùm rayò chyín chyap tô é yanmai, a wó myàng
⁴ nghut ri. Haú mù, yhang gi, Yesuq lé wó myàng shoq ga, Yesuq laí ló râ hkyô hí shut din é mù, hkohúm gâm htoq má é doq zung tô ri.
⁵ Yesuq gi, haú jowò má jé jáng, tu wú kat luí, “Zake ê, hân gyó lô aq; hkû-nyí ngò náng yhùm má bíng râ

- ⁶ nghut lhê.” ga taî ri. Haû jáng, Zake gi, hân hân gyó lô mù, gabú dik é èq Yesuq lé lhom hkulum yu ri.
- ⁷ Haû má nyi bang banshoq gi, haû lé myàng jáng, “Yhang gi, yubak dap sù rayuq chyáng bíng kut râ ga wang e lô bê.” ga luí, mara hûn dang taî nyi bum akô.
- ⁸ Zake kúm gi, toq yap mù, “Yhum-sîng Yesuq ê, ngò wó é sutzè rawuí gû myùng bang lé gàm byî pyám râ; ngò záng mop zô pyâm é byù rayuq yuq nyi le gi, myi tú dum tau byi râ.” ga Yhumsîng Yesuq lé taî ri.
- ⁹ Haú hkûn, Yesuq gi, “Shí yuq le, Abraham é yhangzo^a rayuq nghut é yanmai, hkû-nyí shí yhûm má hkyi yù
- ¹⁰ hkyô jé bê, hkâsu mù gâ le, haû Byu Yhangzo gi, byuq byuq bê bang lé, hkat hô mù hkyi yù râ matú, jé lé sù nghut lhê.” ga luí, Zake lé taî ri.

**Hkohkam É Dui-nhâng
Zoshâng Raxê Yuq**

Mht 25:14-30

- ¹¹ Haú hkyô lé, yhangmoq gyô nyi bùm kô é hkûn, Yesuq gi, Yerusalem wà mó má jé râ chyâng lò bê nghut é yanmai le, Garai Gasâng é mingdán gi, radá dâm htoq shit lô berâ ga, byu pé myit ngam tô bùm kô é yanmai le, dangtú ralhûm dông dum taî jat é gi,
- ¹² “Aróng wó sù byù rayuq gi, hkohkâm ayá ê hkam yù luí, dum taû lò râ ga, wê é ming shut ê râ matú hen nyi ri.
- ¹³ Haú mù, yhang gi, Yhâng é dui-nhâng zoshâng raxê yuq lé wut yù mù, rayuq lé ngùn rajoí joí ap byi luí, ‘Ngò dum taû jé lô shoq, shi èq hpugá gá nyí láng keq.’ ga luí, yhangmoq lé pying tô ri.
- ¹⁴ Yhâng é mingbyû wui kúm gi, yhang lé a ngui bum é nghut mù luí,

yhang e lô é htâng má, ‘Shí yuq nga-moq ahtoq má up nyi râ lé, ngamoq a ô naù.’ ga luí, ê taí râ matú lagyo châng nhang kat akô.

- ¹⁵ Nghut kôlhâng, yhang kúm gi, hkohkâm ayá wó hkam yù luí, dum taû jé lô jáng, yhang ngùn ap byî tô é dui-nhâng zoshâng wui lé, hpugá gá luí, amyat hkâ-myhó wó ho jat bê hkyô lé sé naù luí, yhangmoq lé wut nhang kat ri.
- ¹⁶ Haú hkûn, sâng-hí yuq gi, lé mù luí, ‘Yhumsîng ê, ngò, náng é ngùn rajoí mai, amyat raxê joí wó ho jat yù bê.’ ga taî ri.
- ¹⁷ Haú hkûn, yhumsîng hpó gi, ‘Arâ! Nghut bê, kyet é dui-nhâng zoshâng ê, nàng gi, je tiq é mù má lháng wó lum é sù nghut é yanmai, wà raxê lé upzo lo aq hkoi.’ ga luí, yhang lé taî ri.
- ¹⁸ Htang yuq le, lé mù luí, ‘Yhumsîng ê, ngò, náng é ngùn rajoí mai, amyat ngo joí wó ho jat yù bê.’ gâ ri.
- ¹⁹ Yhumsîng gi, haú yuq lé, ‘Nàng gi, wà ngo wâ lé up lo aq hkoi.’ ga taî ri.
- ²⁰ Dum rayuq le, lé mù luí, ‘Yhumsîng ê, náng é ngùn rajoí lé a byuq shoq, ngò panchoq èq htup tô lhê; wú aq, shí
- ²¹ nghut lhê. Nàng gi, yhumsîng yhang a tô tô é zè pé lé yù nau é eq, yhumsîng yhang a hô tô é yò mai yâm yù nau é sù, byù wui nghut é yanmai, nang lé ngò gyuq ri.’ ga taî ri.
- ²² Haú hkûn, yhumsîng gi, ‘Agè ashop é dui-nhâng zoshâng ê, náng nhut mâ é dang eq rajung za, ngò, nang lé jé-yáng râ nghut lhê. Ngò gi, yhumsîng yhang a tô tô é zè pé lé yù nau é eq, yhumsîng yhang a hô tô é yò mai yâm yù nau é sù, byù wui nghut é hkyô
- ²³ lé, nàng sê to gù nghut le nhîng, ngá ngùn lé, ngò dum taû jé lô jáng, aráng

^a 19:9 Abraham é yhangzo nghû é lichyúm gi, Abraham su Garai Gasang lé lumjîng é sù lé gâ lhê.

eq amyat wó yû shoq, ngùn hpún kat jang má, haî mù a kat tô é lúhú? ga yhang lé taî ri.

²⁴ Hau htâng, yhumsîng hpó gi, ayàm má yap tô é bang lé, 'Haû ngùn rajoî lé yhâng chyáng mai taû yù luí, raxê joí wó sù lé jat byi keq.' ga taî ri.

²⁵ Haú bang gi, 'Yhumsîng ê, yhang gi, raxê joí wó to bê lé nhîng.' ga akô.

²⁶ Haû jáng, yhang gi, 'Ngò, nungmoq lé taí kôlé, wó sù^a ó yuq le, jat byî é hui shirâ nghut lhê; a wó su chyáng mai kúm gi, yhang wó tô é lé lháng, ²⁷ yu pyám byi shirâ nghut lhê. Ahkuí, yhangmoq ahtoq má ngò hkohkâm kut râ lé a ô nau é, ngá é gyè pé lé, shí má shuí lé mù, ngá hí má sat pyám keq.' ga hkûnmó hkyô kat ri." gâ ri.

Yesuq Logúng Ji Mù, Yerusalem Wà Mó Shut Wang E Lô É Hkyô

Mht 21:1-11; Mrk 11:1-11; Yhn 12:12-19

²⁸ Yesuq gi, shí hkyô pé lé ban tai jáng, hí má so luí, Yerusalem wà mó ²⁹ shut doq ló nyi ri. Yesuq gi, Yhâng é chángzô pé eq Tsanlun Bùm mâ é Bethpage wà eq Behtani wà má jé ló kojáng, Yhâng é chángzo í yuq lé, ³⁰ "Nungnhik, hí mâ é wà má ê keq; wà haú má wang é hkûn jáng, ó le a jî wú shí é logúng zo tuí tô lánng é lé, ê myâng kó râ nghut lhê; haû lé hpyi yù ³¹ mù, Ngá chyáng she lò keq. Byù rayuq yuq mai, 'Haû haî mù hpyi nyi akô?' ga nungnhik lé myi kôjáng, 'Shí du lé, haû Yhumsîng râ ri gâ.' nghû tú tai keq." ga pyîng luí, nhang kat ri.

³² Nhang kat é sù nhik ê jé lé, Yesuq taí kat é dông yhang, dut to lánng é ³³ lé ê myang akô. Yhangnhik logúng zo haú lé hpyi nyi kô é hkûn, yhumsîng

wù gi, "Haû logúng zo lé, haî mù hpyi nyi akô lúhú?" ga luí, yhangnhik lé myí akô.

³⁴ Haû jáng, yhangnhik gi, "Shí du lé haû Yhumsîng râ ri gâ." ga taí akô.

³⁵ Yhangnhik gi, haû logúng zo lé Yesuq chyáng she lò mù, yhangmoq é buhîng pé lé logúng ahtoq má buí luí, ³⁶ Yesuq lé doq ji nhang akô. Haû su kut, Yhang ji e ló nyi le, byu pé gi, yhangmoq é buhîng pé lé hkyô má hkang byí akô.

³⁷ Ahkuí, Tsanlun Bùm hkêgyó gyó ló é jowò eq chyáng lo é mai gi, chángzô pé banshoq bang, yhangmoq myang é laklaí kumlhá pé é yanmai, gabú myit mai htê mó o mó èq Garai Gasang lé hkya-on kô é dang gi,

³⁸ "Haû Yhumsîng é myîng mai jé lé lo é hkohkâm gi, hkungsô wó nyí sháng gaq ô!^b Mauhkûng htoq má, nguîngón nyí sháng gaq ô!

Htoq tsáng myhâng má, Garai Gasang gi, hpungwup shingkang bo nyí sháng gaq ô!"

gâ akô.

³⁹ Haû mù luí, haû byù hpûng hkaú má bo é Hparishe pé ra-am gi, "Sarâ ê, náng é chángzô pé lé tân pyám aq." ga luí, Yesuq lé taí akô.

⁴⁰ Haú hkûn, Yesuq gi, "Ngò, nungmoq lé taí kôlé, shí bang zim za nyi kó nghut le gi, luqgok pé garû lô râ nghut lhê." ga tú tai ri.

⁴¹ Ahkuí, Yesuq, Yerusalem wà mó eq chyáng lò luí, wà mó haû lé myàng jáng, haû wà mó é matú ngàu mù, taí ⁴² é gi, "Wà nàng ê! Hkû-nyí lhê é bui-nyí má, nguîngón é hkyô lé nàng bûn sé tô é nghut le gi, gè râ wá! Ahkuí

^a 19:26 Wó sù nghu é gi, yhumsîng a-tsam lé rago dat chûng sù lé taí é nghut lhê.

^b 19:38 Hkya-on 118:26

kúm gi, haú hkyô lé nghop to bê nghut
⁴³ mù luí, nàng a sé lo nghut ri. Hkâsu
 mù gà le, náng chyáng Garai Gasang
 lé kúm jé é hkûn, nàng a bun a sé
 wú kat é yanmai, náng é gyè pé gi,
 awui ayàm má gyewap xuq mù, náng
 é lêng hkyuq mai nang lé lom tô é
⁴⁴ buinyì jé lô râ nghut lhê. Haú hkûn,
 nang lé lhoq htên pyám luí, nung zo
 pé lé le, haú ahkaú má yhang dún nhê
 pyet sat pyám bekô râ; nàng gi, luqgok
 racham htoq má racham lhang a kê
 lhum loshoq, dut byuq râ nghut lhê.”
 gà ri.

**Yesuq, Noqkuq Yhûm
 Lé Sêng Pyâm É Hkyô**

Mht 21:12-17; Mrk 11:15-19; Yhn 2:13-22

⁴⁵ Ahkuí, Yesuq gi, Yerusalem noq-
 kuq yhûm má wàng mù, ung zo ung
 shuq é bang lé, “Ngá yhûm gi, kyû-
 dung yhûm dut râ nghut lhê.”^a ga kê
⁴⁶ to kôlhang, nungmoq gi, jowò shí lé
 ‘damaq hkyûng’^b kut akô.” ga tai
 uchyang, hkat htoq pyâm ri.
⁴⁷ Yhang gi, nyí wuí noqkuq yhûm
 má mhoqshit nyi ri. Hkyangjong agyì
 pé, tarâ sará pé eq, byu pé é suwún
 wuí kúm gi, Yhang lé wó sat pyám
⁴⁸ râ hkyô ho nyi akô. Nghut kôlhang,
 byù banshoq bang gi, Yhâng mhoq-
 shit é dang lé gyo nau nyì kô é yan-
 mai, wó sat râ hkyô lé, a myang hô kó
 nghut ri.

**Yesuq É Ahko Ahkáng
 Lé Myí Chyam Wú É Hkyô**

Mht 21:23-27; Mrk 11:27-33

20 Ra-nyí lé, Yesuq gi, noqkuq
 yhûm wàng hkaú má, byu pé
 lé mhoqshit nyi é eq, gabú danglù
 hko kyô nyi é hkûn, hkyangjong agyi
 pé gi, tarâ sará pé, suwún wuí eq

rahá kut, Yhâng chyáng lé jé kômù,
² “Hai ahko ahkâng èq Nàng shí pé lé
 kut nyi lhê lhú? Ahko ahkáng shí,
 Nang lé ó yuq byí é lhú? Ngamoq
 lé tai kyô wú aq.” ga Yhang lé myí
 akô.

³ Haú hkûn, Yhang gi, “Ngò le, nung-
⁴ moq lé rajung myí wú kôlé; Yohan byí
 é bapisma gi, mauhkûng mai lhú? A
 nghut jáng, byu chyáng mai lhú? Ngo
 lé tai kyô wú keq?” ga yhangmoq lé
 myí ri.

⁵ Haú hkûn, yhangmoq chôm hpyê
 lhum kô é gi, “‘Mauhkûng mai nghut
 lhê.’, nghû nga-nhúng tai jáng le, ‘Hai
 mù, yhang lé a lumjúng kô é lhú?’
⁶ ga râ nghut; ‘Byu chyáng mai nghut
 lhê.’ nghû jáng le, shiwa byù ban-
 shoq gi, Yohan lé, myiqhtoi rayuq ga
 lumjúng to kô é yanmai, yhangmoq,
 nga-nhúng lé luqgok èq dú sat kó râ
 nghut.” ga akô.

⁷ Haú mù, yhangmoq gi, “Hkâmai
 nghut é lé, ngamoq a sé.” ga tû tai akô.

⁸ Yesuq gi, “Haú jáng, Ngò le, hai
 ahko ahkâng èq shí pé kut é hkyô lé,
 nungmoq lé a tai kyo.” ga, yhangmoq
 lé tai ri.

**Tsibiyiq Hkyâm Yhumsing Eq
 Hkyâm Saí Zo Bang**

Mht 21:3-46; Mrk 12:1-12

⁹ Byu pé lé, Yesuq dangtú dông xoq
 tai kyô é gi, “Byù rayuq gi, tsibiyiq
 hkyâm ralhûm saí to mù, hkyâm saí
 zo bang chyáng ngho byí to luí, gó
 ming shut myáng myáng è nyi byuq ri.
¹⁰ Kyôshu yoq jé jáng, yhang gi, hkyâm
 saí zo bang èq, hkyâm mâ é tsibiyiq
 shi pé lé lhom byí kat sháng gaq ga,
 dui-nhâng zoshâng rayuq lé yhang-
 moq chyáng nhang kat ri. Nghut kô-
 lhang, hkyâm saí zo bang gi, haú

^a 19:45 Esai 56:7 ^b 19:46 Yer 7:11

yuq lé lhom bat mù, loq kôm taû
¹¹ nhang kat akô. Gotû dui-nhâng zo-
 shâng rayuq lé, yhangmoq chyáng
 dum nhang kat ri. Nghut kôlhâng,
 yhangmoq gi, haú yuq lé le, lhom bat
 mù, hoq lhoq hpu luí, loq kôm dum
¹² taû nhang kat akô. Sum yuq nghû râ
 dui-nhâng zoshâng lé dum nhang kat
 ri. Yhangmoq gi, haú yuq lé le bat
 cheq luí, hkyâm mai hkat htoq kat
 akô.

¹³ Haú hkûn, tsibiyiq hkyâm yhumsîng
 gi, ‘Ngò hkâsu kut wú râ lú? Ngò
 chyitdap é ngá zo lé, nhang kat wú râ
 nghut ri. Yhang lé kúm gi, yhangmoq
 lhom hkungga kó abe.’ ga taí ri.

¹⁴ Hkyâm saí zo bang gi, yhumsîng
 hpô é yhangzo lé myàng kôjáng, ‘Shí
 yuq gi, silí wunlí sing yù râ sù nghut
 lhê; nga-nhúng, silí wunlí haú pé wó
 yû shoq, yhang lé sat pyám sháng.’
 ga rayuq eq rayuq taí lhûm bum
¹⁵ akô. Haú mù, yhang lé hkyâm shing-
 gan shut dú htoq kômù, sat pyâm
 akô.

Haú su kut kôjáng, tsibiyiq hkyâm
 yhumsîng gi, yhangmoq lé hkâsu kut
¹⁶ râ lú? Yhang gi, ê mù, haú hkyâm saí
 zo bang lé sat pyám luí, hkyâm haú
 lé góbang lé htot ngho byí pyám râ
 nghut lhê.” gâ ri.

Dang haú lé wó gyo bang gi, “Haú
 su gi, hkâ-nhám le a dut sháng gaq ô!”
 gâ akô.

¹⁷ Hau htâng, Yesuq gi, yhangmoq lé
 byu wú luí, “Haú jáng gi,
 ‘Yhûm saí bâng èq hkyin htoq
 pyâm é luqgok gi, htungchyûn
 mâ é ahkyak dik é luqgok dut
 bê.’^a

ga Chyúmdang má kê tô é gi, haí gá
¹⁸ nau é nghut lhê lú? Luqgok^b haú má

gyó záng é sù ó yuq nghut kôle, gyuf
 gyop byuq râ nghut lhê. Luqgok hau
 èq gyó nhê záng é sù le, nhê pyeq
 pyâm é hui râ nghut lhê.” ga taí ri.

¹⁹ Tarâ sará pé eq hkyangjong agyi pé
 gi, dangtú shí gi, yhangmoq lé lhoq
 ang luí taí é hkyô lé, sé kô é yanmai,
 haú hkûn jáng lháng Yhang lé chyup
 yû râ matú hkyô ho nyi akô. Nghut
 kôlhâng, byu pé lé gyuq mù a chyup
 shi kó nghut ri.

**Kang Kat É Hkyô Eq
 Séng Luí Myi É Dang**

Mht 22:15-22; Mrk 12:13-17

²⁰ Haú mù, yhangmoq gi, Yesuq é
 dang má mara wó chyup yû shoq
 ga, gegùn labyoq kut bang lé jowú
 nhang nyi akô. Haú gi, ahkáng ayá
 wó é mauzaú chyáng Yhang lé wó
²¹ ap pyám râ matú nghut ri. Haú jowú
 bang gi, “Sará ê, nàng gi, dîng dîng
 mán mán taí mhoqshit é eq, byu é
 myoqdong lé a tê byí é za, Garai
 Gasâng é hkyô lé, tengmán é dông
 mhoqshit é sù nghut é lé, ngamoq
²² sê lhê. Hkoséng Kehtaq lé, ngamoq
 kang kat râ gi, tarâ wang lhê lú? A
 wang é lú?” ga luí, Yhang lé myí wú
 akô.

²³ Nghut kôlhâng, Yesuq gi, haú bâng
 é myit goí é hkyô lé sé mù luí, yhang-
²⁴ moq lé, “Ngo lé, ngùn rachap tûn shit
 wú keq. Ó yuq é alhô eq masat laiká
²⁵ dap tô ri lú?” ga myi jáng, yhangmoq
 gi, “Kehtaq é nghut ri.” ga akô.

Haú hkûn, Yesuq gi, “Haú nghut
 jang, Kehtaq é lé gi, Kehtaq lé byi keq;
 Garai Gasâng é lé gi, Garai Gasang lé
 byi keq.” ga yhangmoq lé taí ri.

²⁶ Yhangmoq gi, byu pé hí má, Yhâng
 é dang má mara a wó ho myang é eq,

^a 20:17 Hkya-on 118:22 ^b 20:18 Luqgok nghu é gi, Yesuq lé taí ri.

Yhang tû taí é dâng é yanmai, maú hong byuq kôluí, zim byuq akô.

**Dum Dui Toq Lô Râ Hkyô Eq
Séng Luí Myí É Dang**

Mht 22:23-33; Mrk 12:18-27

- ²⁷ Haú hkûn, haú dum dui toq hkyô a joq gâ é Saduke pé ra-am gi, Yesuq
²⁸ chyáng lé jé kômù, “Sará ê, myiwe wó é byù rayuq gi, zo dù a dap é za shi byuq é nghut jáng, yhanggu gi, yhangmâng é awut ashín xoq byi râ matú, yhâng rhat lé chui gon ra râ nghut lhê ga, nga-nhúng lé, Mosheq
²⁹ kê to byí ri. Hí hpyang lé, gumang nhiktâng wùi nyhit yuq nyi akô. Lagám yuq gi, myiwe yù luí, zo dù a dap
³⁰ é za shi ló byuq bê nghut ri. Lanong yuq le, yhangmang mó é chui lé gon mù, zo dù a dap é za shi ló byuq bê.
³¹ Hau htâng, Lalaq yuq mai Lahká yuq jé shoq, chuimó haú lé rayuq htâng rayuq dum gon gon kut kôlhang, zo dù a dap é chyat shi ló byuq bùm bekô
³² nghut ri. Ló htâng má, myiwe myhí haú le châng shi ló byuq bê nghut ri.
³³ Haú mù luí, haú dum dui toq é buinyi má, myiwe myhí haú gi, haú nhiktâng wùi mâ é hkâ yuq é yhangmyi nghut râ lúhú? Hkâsu mù gâ le, yhang gi, haú nyhit yuq é yhangmyi dut wú bê sù nghut ri.” ga luí, Yhang lé myí wú akô.
³⁴ Haú hkûn, Yesuq gi, “Shí mingkan htoq mâ é byu pé gi, ikun kut é eq
³⁵ myi byi myi yú kut nyi bum akô. Shi é mai dum dui toq râ eq, haú pyat má nyi râ gíng bâng é matú gi, ikun kut é eq myi byi myi yú hkyô joq lo râ
³⁶ a nghut. Haú bang gi, maumang lagyô pé su dut byuq luí, a dat shí lo

- kô râ nghut lhê. Yhangmoq gi, dum dui toq lô su é yhangzô pé^a nghut é yanmai, Garai Gasâng é yhangzô pé
³⁷ nghut bekô. Haú nyé duq nyi é mhan-púng eq séng luí, Mosheq èq kê tô é má lhang, Yhumsîng gi, ‘Ngò gi, Abraham é Garai Gasang, Isak é Garai Gasang, Yakup é Garai Gasang nghut lhê.’^b ga bo tô é yanmai, shi é bang dum dui toq lô râ hkyô lé tûn shit to
³⁸ bê nghut ri. Garai Gasang gi, shi bê bâng é Garai Gasang a nghut, dui nyi bâng é Garai Gasang ru nghut nyi lhê; hkâsu mù gâ le, lhunglhang bang gi, Garai Gasâng é hí má dui nyi é bang chyat nghut akô.” ga yhangmoq lé tû taí ri.
³⁹ Haú hkûn, tarâ sará pé ra-am gi,
⁴⁰ “Sará ê, nàng taí é jô ri.” ga akô. Haú mù, yhangmoq gi, Yhang lé haí le a wám myí jat lo kó nghut ri.

Hkrisduq Gi, Ó Yuq É Yhangzo?

Mht 22:41-46; Mrk 12:35-37

- ⁴¹ Hau htâng, Yesuq gi, yhangmoq lé, “Byu pé gi, Hkrisduq lé, Dawiq é yhangzo nghut lhê, ga hkâsu mù taí akô lúhú? Dawiq yhang yhang lhang gi,
⁴²⁻⁴³ Hkya-on Kungtôn Laiká má, ‘Haú Yhumsîng Garai gi, ngá é Yhumsîng lé, “Ngò, náng é gyè pé lé, náng é hkyí nang tanghkuq kut pyám byí é hkyíng jé shoq, Ngá é loqyo hkyam^c shut zung nyi shi aq.” gâ ri.’^d
⁴⁴ ga kê tô ri. Haú mù, Dawiq yhang lhang, Hkrisduq lé, Yhumsîng gâ é nghut le gi, Hkrisduq gi, yhangzo za hkâsu ge nghut râ lúhú?” ga taí ri.

^a 20:36 Dum dui toq lô su é yhangzô pé gâ é gi, Yesuq lé lumjîng luí, shi é htâng má dum dui toq lo é bang lé gâ lhê. ^b 20:37 Htoq Lô 3:6 ^c 20:42-43 Loqyo hkyam nghu é gi, ahko ahkáng wó é jowò nghut lhê. ^d 20:42 Hkya-on 110:1

Tarâ Sará Pé Lé Sidiq Râ Hkyô*Mht 23:1-36; Mrk 12:38-40; Luk 11:37-54*

- ⁴⁵ Byù banshoq gyô nyi é u lé, Yesuq,
⁴⁶ Yhâng é chángzô pé lé taí é gi, “Tarâ sará pé lé sidiq nyi keq. Yhangmoq gi, réng é buhîng wut chûng mù, sô yông wún luí, gai pé má hkunggâ é èq shichyen râ lé le, tarajong pé mâ é ahkyak dik é zùng jang pé eq poí pé mâ é je réng é zùng jowò pé má myang zùng râ lé le, ô nau nyi
⁴⁷ bum akô. Yhangmoq gi, chuimó pê é yhûm-yò pé lé hpyoq zo hpyoq shuq kôluí, kyû hîng hîng dîng shit mhaû é bang nghut akô. Haû sù é bang gi, je riyhang htan é đông dam byí é hui zo kó râ nghut lhê.” gâ ri.

Chuimó Myhí Kat É Alu*Mrk 12:41-44*

- 21** Yesuq tu wú kat é hkûn lé, noqkuq yhûm mâ é alu sidek má, wó bang alu kat nyi bùm kô é lé
² myang ri. Dum nghut jáng, gyi htingchap ngùn zo í chap za kat é, myung é chuimó myhí rayuq lé le myang ri.
³ Haû mù, Yhang gi, “Ngò, nungmoq lé teng za taí kôlé, shí myung é chuimó myhí gi, góbang banshoq htoq má je
⁴ myo kat bê nghut ri. Hkâsu mù gâ le, haû góbang banshoq gi, yhumsîng agùn agó wó é mâ é lé, lé kat akô; yhang kúm gi, myùng sù nghut kôle, yhâng asak lé baú ra ngùn lhunglhang lé kat bê nghut ri.” ga taí ri.

Ló Htûm Buinyi Má Dut Lò Râ Hkyô*Mht 24:1-21, 29-35; Mrk 13:1-19, 24-31*

- ⁵ Noqkuq yhûm lé, yúng é luqgok pé èq le, alu chyunghuq pé èq le, mhôn tô ri ga, chángzô pé ra-am hkya-ôn bùm
⁶ kôjáng, Yesuq gi, “Nungmoq myang nyi é shí pé gi, luqgok rachâm htoq racham lhang a kê lhum loshoq, hpyoq

hpyi pyâm é buinyi jé râ nghut lhê.” ga taí ri.

- ⁷ Haû su ga jáng, yhangmoq gi, “Sará ê, haû nghut le gi, haû hkyô pé gi, hkâ-nhám dut lò râ lú? Haû dut râ chyâng lò jáng, hkasû é kumlhá htoq lò râ nghut lhê lú?” ga, Yhang lé myí akô.
⁸ Haû hkûn, Yhang gi, “Nungmoq gi, hkyô shuí nghoq é a hui kó sháng gaq, sidiq nyi keq. Hkâsu mù gâ le, ‘Ngò gi, Mesaia nghut lhê.’ ga le, ‘Ahkying chyâng lò bê.’ ga le, Ngá myíng lé láng é byù myo myo pô htoq lô kó râ nghut lhê. Nghut kôlhang, nungmoq
⁹ gi, yhangmoq htâng hkâcháng kó. Majan htoq é eq, gumlau toq é hkyô lé, wó gyo kôjáng, hkâgyuq hkâ-kyûm kó, haû hkyô pé hí dut lò râ nghut lhê. Nghut kôlhang, ló htâng é buinyi gi, haû hkûn jáng dut râ a nghut shi.” ga taí ri.
¹⁰ Hau htâng, Yhang, yhangmoq lé dum taí é gi, “Ra-myû eq ra-myû, mingdán ralhûm eq ralhûm majan zân
¹¹ lhûm lò kó râ nghut lhê. Jowò myo myo má, layàng mó nún lo é, noli nõjàng myô lo é eq mutmó gyó lo é pé, dut lò râ nghut lhê; gyuq chiq jung pé eq kumlhá mó le, mauhkûng htoq mai htoq shit lò râ nghut lhê.
¹² Nghut kôlhang, haû hkyô banshoq a dut shimá, Ngá myíng é yanmai, byu pé gi, nungmoq lé chyup yû luí, zing-rí yù mù, tarajong pé eq htóng pé má ap pyám kó râ nghut lhê, hau htoq agó, nungmoq gi, hkohkam pé eq zau pé chyáng ê ap byí é le,
¹³ hui kó râ nghut lhê. Haû su é pé mai, nungmoq gi, ngò eq séng luí, saksé wó hkám râ hkyô htoq lô berâ
¹⁴ nghut lhê. Nghut kôlhang, hkâsu nghû lhom tû taí râ hkyô lé, hí mai a myit wuí nyi râ lé, nungmoq myit hpyit

¹⁵ to keq. Hkâsu mù gâ le, nungmoq é gye pé lhunglhâng bang, haí le a wó lhom tû taí loshoq, ngò, nungmoq lé dang eq hpaqchyí byi râ nghut

¹⁶ lhê. Nghut kôlhâng, nungmoq gi, înu îwâ pé, âgu âmâng pé, mungmoq eq buinùm ji-myi wui èq lháng, ap pyâm é hui kó râ nghut lhê. Yhangmoq gi, nungmoq chyáng mâ é ra-am lé lháng, sat pyám kó râ nghut lhê.

¹⁷ Byù lhunglhâng bang gi, Ngá é yanmai, nungmoq lé a nguì kut kó râ

¹⁸ nghut lhê. Nghut kôlhâng, nungmoq é xâm rahkat lháng wó htên byuq

¹⁹ râ a nghut.^a Nungmoq gi, wó jân é hkyô mai, asak lé wó yû kô râ nghut lhê.

²⁰ Yerusalem wà mó lé gye hpúng mó èq lóm tô é lé, nungmoq myàng jáng, wà mó haù htên byuq râ ahkyíng

²¹ chyâng lò bê lé, bûn sê nyi keq. Haù hkûn lé, Yuda mau má nyi é bang gi, bùm pé shut hfang doq ló kó sháng gaq; haù wà hkaù má nyi é bang le, hfang htoq kó sháng gaq; wà tiq wà zo pé má nyi é bang le, wà hkaù shut a

²² wàng kó sháng gaq. Hkâsu mù gâ le, Chyúmdang má kê to má kê to banshoq dik lò râ matú, buinyi haù pé gi, mara dam byí é buinyi pé dut râ nghut

²³ lhê. Haù buinyi pé má, zogúng dut é myiwe wui eq naú huq ashí nghut é înu wui gi, gyai yhang wuîhke kô râ nghut lhê; hkâsu mù gâ le, shí ming ahtoq má wuîhke mó eq, shí amyú ahtoq má Garai Gasang nhikmó-yô

²⁴ é jé lô râ nghut lhê. Yhangmoq gi, shâm lhâm èq sat pyám hui lhê eq, ming hkan ming mó má chyup shuí ló é le hui kó râ nghut lhê. Tûngbau pé lé byí tô é buinyi ahkyíng htáng shoq, Yerusalem wà mó gi, tûngbau

pê èq nâng zik tô é hui râ nghut lhê.

²⁵ Haù hkûn, bui, kyî, lhamó pé má, kumlhá htoq shit râ nghut lhê. Wui-shuq lung-aù mâ é wuîlhêng pê é mying é htê mó é yanmai, myigùng htoq má, byù myû chângjup gi, hkâsu kut râ a sé loshoq maú é eq myit wui myit hkê é hui bekô râ nghut lhê. Byu pé gi, mingkan htoq má dut lò râ é hkyô pé lé, a jé shi mai myit gyuq kô é yanmai, moq byuq ló bûm kó râ nghut lhê; hkâsu mù gâ le, mauhkûng mâ é wum-o a-tsam pé gi, lhoq nhûn é huí bùm kô râ nghut lhê.

²⁶ Haù hkûn, haù Byu Yhangzo gi, mhut ji mù, hpungwup a-tsam mó eq le, hpungwup shingkang mó eq le, gyó lé lo é lé, yhangmoq byu-myàng kó

²⁷ râ nghut lhê. Haù hkyô pé dut hi lò jáng, ulhum tû mù wú kat keq, hkâsu mù gâ le, nungmoq lé hkyi yù râ buinyi gi, chyâng lò bê nghut ri.” gâ ri.

²⁸ Yhang, yhangmoq lé dangtú dông xoq taí é gi, “Maihpáng gâm eq sik-

²⁹ gâm banshoq lé wú wú keq. Sikbu nyún lo é lé myàng jáng, bui nyé nám chyâng lò bê ga luí, nungmoq yhang

³⁰ dat wú sê akô. Haù eq rajung za, haù hkyô pé dut nyi é lé, nungmoq myàng kôjáng, Garai Gasâng é mingdán gi, chyáng bê nghut é hkyô lé, nungmoq sé lo keq.

³¹ Ngò, nungmoq lé teng za taí kôlé, shí pyat mâ é byu pé a ban shi byuq shimá, haù hkyô pé banshoq

³² dut byuq râ nghut lhê. Mauhkûng eq myigùng gi, a joq lo dut byuq râ nghut lhê; nghut kôlhâng, Ngá é dang gi, ru joq nyi râ nghut

³³ lhê.

^a 21:18 Shí má gi, asak woi-nyí a shí râ hkyô lé taí é nghut lhê.

- ³⁴ “Nghut kôlhâng, zo myo shuq myô é, î shuq wut é, mingkan htoq mâ é myit wui myit hkê é pê eq, nungmoq é i-myt wò laí nyi luí, haú ngò jé lé é buinyì gi, lhaí bik lo é su, nungmoq ahtoq má byodàn tung a jé lò sháng gaq, sidiq nyi keq. Hkâsu mù gâ le, buinyì haú gi, mingkan htoq má nyi é byù banshoq bâng é ahtoq má, haú su jé lò râ nghut lhê. Haú mù luí, haú dut lò râ hkyô banshoq mai, nungmoq wó lut lai mù, haú Byu Yhangzô é hí má, wó yap gîng é bang dut sháng gaq, hkâ-nhám le kyûdung luí, ahkýing hkangmó má machya nyi keq.” gâ ri.
- ³⁷ Yesuq gi, nyí wuí noqkuq yhûm má mhoqshit nyí luí, myìn wuí Tsanlun Bùm gâ é bùm shut htoq ê mù, ê nyi to to kut ri. Byù banshoq bang gi, Yhang mhoqshit é dang gyo râ ga, napsûn noq noq mai noqkuq yhûm má jé lé bum akô nghut ri.

Yesuq Lé, Yudaq Êq Ung Zô É Hkyô

Mht 26:1-5, 14, 16; Mrk 14:1-2, 10-11; Yhn 11:45-53

- 22** Ahkuí, Lhoqlhai Poí gâ é Azuma (múnchi a kat é Muk Zo Poí) jé râ chyâng lò bê. Haú mù, hkyangjong agyi pé eq tarâ sará pé gi, Yesuq lé hkâsu kut wó sat pyám râ hkyô, ho nyi akô; hkâsu mù gâ le, yhangmoq gi, mingbyû wui lé gyuq bùm kô é yanmai nghut ri. Haú hkûn, lagyo raxe í yuq má bo é Iskarut gâ é Yudaq chyáng Tsadán wàng mù luí, yhang gi, htoq ê mù Yesuq lé hkâsu kut ap pyám râ hkyô lé hkyangjong agyi pé, noqkuq yhûm zúng é gyezau pé eq, é hpyê ri. Haú mù, yhangmoq gi, gyô nguì luí, Yudaq lé ngùn byi râ hkyô myit hui bekô. Yudaq le hap yù luí, byù hpúng má a nghut é hkûn,

Yesuq lé ap pyám râ hkyô ho nyi bê nghut ri.

Lhoqlhai Poí Lé Món É Hkyô

Mht 26:17-30; Mrk 14:12-26; Yhn 13:21-30

- ⁷ Ahkuí, haú Lhoqlhai Poí mâ é sauzo shigu hkungga sat nhông byi râ é
- ⁸ Azuma buinyì jé bê. Haú hkûn, Yesuq gi, Petruq eq Yohan lé, “Nga-nhúng zo râ matú Lhoqlhai Poí ê món láng keq.” ga luí, nhang kat ri.
- ⁹ Haú nhik gi, “Hkâmá ê món to nhâng nau ri lú?” ga luí, Yhang lé myí akô.
- ¹⁰ Haú hkûn, Yesuq gi, “Nungnhik, myuq hkaú shut wang e ló le wui yambú waq é byù rayuq lhom hui râ nghut lhê; haú yuq chyáng châng ló luí, yhang wang ló é yhûm má châng wàng mù, yhumsing lé, ‘Ngò Ngá é chángzô pé eq rahá, Lhoqlhai Poí zo râ bíng wap hkâmá nghut lhê lú ga, Sará myí nhang kat ri.’” nghu táí keq.
- ¹² Haú hkûn, hen tô é ahtoq mâ é wap mó lé, nungnhik lé lhom tân shit râ nghut lhê; wap haú má ê món to keq.” ga táí kat ri.
- ¹³ Haú chángzo nhik htoq e ló le, Yesuq táí kat é eq roq za ê myâng kômù, Lhoqlhai Poí lé món to bekô nghut ri.

Yhumsing É Myinzang

- ¹⁴ Ahkuí, ahkýing jé jáng, Yesuq eq Yhâng é chángzô pé rahá za zohpoq má zung tô akô. Haú hkûn, Yesuq gi, “Ngò wúhke jamjau hpuzô é a hui shi má, Lhoqlhai Poí shí lé nungmoq eq rahá zo râ lé, Ngò gyai ô nau nyi lhê.
- ¹⁵ Hkâsu mù gâ le, ngò, nungmoq lé táí kôlé, Garai Gasâng é mingdán má poí shí a ló dik dik gi, ngò haú lé dum zo râ a nghut ló.” ga luí, yhangmoq lé táí ri.

- 17 Hau htâng, Yesuq gi, góm lé yù mù jeju ban hkya-on jáng, “Góm shí lé yù luí, nungmoq yhangchang gàm
- 18 shuq lhum keq. Ngò, nungmoq lé taí kólé, ahkuí mai gi, Ngò, Garai Gasâng é mingdán a jé jé tsibiyiq wing lé dum shuq râ a nghut lo.” ga taí ri.
- 19 Hau htâng, Yhang gi, muk lé yù mù, jeju hkya-on luí, muk lé myhik hpé mù, yhangmoq lé byi uchyang, “Shí gi, nungmoq é matú byí pyâm é, Ngá é gungdu nghut lhê; Ngo lé bûn nyí râ matú, shí su kut nyí keq.” ga taí ri.
- 20 Haú eq rajung za, myinzang ban zo jáng, góm lé le yù mù, “Góm shí gi, nungmoq é matú htoq pyâm é, Ngá é sui má xuq tô é dangshikaq asik
- 21 nghut lhê. Nghut kôlhang, wú keq, Ngo lé ap pyám râ sù gi, zang bó
- 22 shí má ngò eq rahá nyi tô ri. Haú Byu Yhangzo gi, hkyin to huí é eq rajung za shí râ nghut lhê; nghut kôlhang, Yhang lé ap pyâm é sù gi, dingnyé wó ri.” ga taí ri. Haú su ga jáng,
- 23 lagyô pé gi, yhangmoq má shí hkyô kut râ sù gi, hká yuq nghut râ lhú ga, rayuq eq rayuq myí lhum bum akô.
- 24 Haú htoq agó, yhangmoq mâ é hká yuq sheq je kô lhê lhú ga le, rayuq eq rayuq taí htíng lhúm bum
- 25 akô. Haú mù luí, Yesuq gi, “Tûngbaù pé é hkohkam pé gi, yhangmoq byù myú pé é ahtoq má up zô nyí kô é nghut luí, byu pé gi, ahkáng ayá wó é bang lé jeju yhumsing pé ga
- 26 luí, taí hkungga nyi bum akô. Nungmoq kúm gi, haú su hkâkut kó. Nungmoq má je ko sù gi, asak je tiq é sù su, up é sù le, dui-nhâng zoshâng
- 27 su nghut nyí sháng gaq. Hká yuq sheq je kô lhê lhú? Zô zung nyí sù lhú? Haú a nghut jáng, saí tsô é sù lhú? Zô zung nyí é sù sheq nghut ri. Nghut kôlhang, ngò gi, nungmoq mâ é saí tso sù su za nghut nyi lhê.
- 28 Nungmoq kúm gi, Ngò jamjau huí nyi le, Ngò eq rahá nyi nyi é bang
- 29 nghut nyi akô. Haú su mù, Ngá wa gi, Ngo lé, mingdán ap byí é su, Ngò le, nungmoq lé mingdán ap byi râ
- 30 nghut lhê. Haú mù, Ngá é mingdán mâ é, Ngá é zangbó má, nungmoq wó zo kó râ nghut lhê; nungmoq le hko-hkâm-tanghkuq má zung to mù, Isra-elaq amyú raxe í hú lé jéyáng kó râ nghut lhê.

**Yesuq Lé, Petruq (Simun)
He-ngik Pyâm Râ Hkyô**

Mht 26:31-35; Mrk 14:27-31; Yhn 13:36-38

- 31 Simun, Simun ê, wú aq, sungso cham lé shaí é su, nungmoq lé wó shaí shoq ga, Tsadán wá gi, ahkáng
- 32 dung bê. Nghut kôlhang, náng é lumjín myit a hten sháng gaq nghú, Ngò, náng é matú kyúdung byi bê; nàng dum lhing bûn lò jáng, nung gu nung mâng pé lé wum-o lhoq ging byi aq.” ga taí ri.
- 33 Haú hkûn, Simun gi, “Yhumsing ê, htóng wâng kôlhang, shí kôlhang, ngò gi, nàng eq rahá cháng râ matú myit hpyit to bê.” ga tú taí ri.
- 34 Yesuq gi, “Petruq ê, nang lé Ngò taí lé, hkû-nyí^a lháng woq a tún shi má, nàng, Ngo lé a sé ga luí sum dâm he-ngik pyám râ nghut lhê.” ga taí ri.
- 35 Hau htâng, Yesuq, yhangmoq lé taí é gi, “Ngò, nungmoq lé ngunhtûng, jihhtûng, hkyí-tsung a wùn a chûng nhang é za, nhang kat é nghut hkûn,

^a 22:34 Yudaq byu pé é ra-nyí gi, myinhâng búi wang é mai, htang nyí búi wang é jé shoq nghut lhê. Shí mâ é *hkû-nyí* gi, nga-nhûng é matú myín âng ri.

nungmoq chyáng haí ra akò lúhú?” ga myi jáng, yhangmoq gi, “Haí le a ra lo.” ga taí akò.

- ³⁶ Haú hkûn, Yhang gi, “Ahkuí kúm gi, ngunhtûng wó sù gi, yù wun sháng gaq, jihûng wó sù le, yù wùn sháng gaq, shâm a wó sù gi, bumó ung lúí
- ³⁷ wuì sháng gaq. Hkâsu mù gâ le, Ngò, nungmoq lé taí kôlé, Ngò eq séng lúí Chyúmdang má kâ tô é gi, dut lò berâ nghut lhê; ‘Haú yuq gi, yubak mara wó bang má nghap lhôm to bê.’^a ga kâ tô é dang gi, Ngá chyáng dik lò râ nghut lhê.” ga lúí, yhangmoq lé taí ri.
- ³⁸ Haú mù, lagyô pé gi, “Yhumsîng ê, wú aq, shí má shâm í hkyam joq tô ri.” ga taí kôjáng, Yesuq gi, “Gé bê.” ga lúí, yhangmoq lé taí ri.

**Tsanlun Bùm Má Yesuq
Kyûdûng É Hkyô**

Mht 26:36-46; Mrk 14:32-42

- ³⁹ Ahkuí, Yesuq gi, htoq lúí, gó hkun é eq rajung za, Tsanlun Bùm shut htoq e ló bê nghut ri; Yhâng é chángzô pé
- ⁴⁰ le Yhang htâng châng e ló akò. Haú jowò má jé jáng, Yhang gi, “Nungmoq, gunglaú é a hui sháng gaq, kyûdûng nyi keq.” ga lúí, yhangmoq lé
- ⁴¹ taí to mù, chángzô pé nyi é mai luqgok radú we kô gâng e ló lúí, hkyihput htuq mù, “Áwa ê, Náng ô nau é nghut le gi, góm^b shí lé Ngá chyáng mai lhaí pyám byi laq. Nghut kôlhang, Ngò ô nau é dông a nghut, Nàng ô é dông sheq nghut sháng gaq.” ga kyûdûng ri. Haú hkûn, mauhkûng mai maumang lagyo rayuq htoq lé lúí, Yhang lé i-myt nhik lé taí tîng ri.
- ⁴⁴ I-myt hkaú má dik shoq hkâm zo wuì é yanmai, Yhang je riyhang kyûdung

wum kat nyi ri; Yhâng é buibù le, sui hkyí sui pat su myigùng má yui gyó ri.

- ⁴⁵ Haú mù, kyû ban dung jáng, Yhang toq lúí, chángzô pê chyáng ló wú le, yhangmoq gi, myit yón mù lúí, yhup
- ⁴⁶ myhî to kô é lé ló myâng mù, “Haí mù yhup nyi akò lúhú? Toq keq! Gunglaú é a hui sháng gaq, kyûdûng nyi keq.” ga lúí, yhangmoq lé taí ri.

Yesuq Lé Chyup É Hkyô

Mht 26:47-56; Mrk 14:43-50; Yhn 18:3-11

- ⁴⁷ Haú su ga, ru taí nyi ashî le, wú keq, haú chángzo raxe í yuq má bo é Yudaq gi, hkyô hí mù byù rajùm rayò lé shuí lé lô lúí, yhang gi, Yesuq lé bopuq puq
- ⁴⁸ râ ga huí lé lo ri. Haú mù lúí, Yesuq gi, “Yudaq ê, nàng gi, haú Byu Yhangzo lé bopuq puq é èq gyè pê chyáng ap pyâm lhê lúhú?” ga lúí, yhang lé lhom myî ri.
- ⁴⁹ Haú hkûn, Yesuq htâng cháng bang gi, haí dut lò râ lé bûn sé kô é yanmai, “Yhumsîng ê, ngamoq gi, sham èq zân
- ⁵⁰ le, gè râ lúhú?” ga myí akò. Yhangmoq chyáng mâ é rayuq gi, hkyangjong mó é dui-nhâng zoshâng lé zân kat lúí, yhâng é loqyo nohkyap byit byuq bê nghut ri.
- ⁵¹ Yesuq kúm gi, “Gé bê. Yhangmoq ô nau é su nghut kó sháng gaq.” ga tû taí mù, haú yuq é nohkyap lé ê záng lúí lhoq gè byî ri.
- ⁵² Yesuq gi, Yhang lé chyup râ ga jé lé é hkyangjong agyi pé, noqkuq yhûm zúng é zau pé eq agyi suwún wuì lé, “Nungmoq gi, damyaq rayuq lé chyup é su, shâm, dumbáng eq
- ⁵³ kut lúí, lé lo akò lúhú? Ngò gi, nyí wuì, noqkuq yhûm má nungmoq eq rahá nyi kôlhang, nungmoq Ngo lé

^a 22:37 Esai 53:12 ^b 22:42 góm gâ é gi, Yesuq jamjau hui râ hkyô eq shí râ hkyô lé, taí nau é nghut lhê.

chyup yû râ ga a hen wú kó; ahkuí gi, mauchut èq up^a nyi bê yanmai, nungmoq é ahkyíng nghut nyi ri.” ga taí ri.

**Yesuq Lé, Petruq Èq
He-ngik Pyâm É Hkyô**

*Mht 26:57-58, 67-75; Mrk 14:53-54,
66-72; Yhn 18:12-18, 25-27*

- ⁵⁴ Háu hkûn, yhangmoq gi, Yhang lé chyup yû mù she ló luí, hkyangjong mó é yhûm shut shuí wang ló akô. Pe-
⁵⁵ trug le we we mai châng tô ri. Ahkuí, yhangmoq gi, wàng hkaú má myi mut yû luí zung tô bum é hkûn, Petruq le
⁵⁶ yhangmoq é ahkaú má bo tô ri. Lang-chyáng myhí rayuq gi, myihkyom yâm má Petruq zung tô é lé, myang kat mù, yhang lé rago wú tsuq to luí, “Shí yuq le Yesuq eq rahá nyi sù nghut ri.” ga taí ri.
⁵⁷ Háu hkûn, Petruq gi, “Myiwe myhí ê, nàng taí é sù lé, ngò a sé.” ga he pyâm ri.
⁵⁸ Hau htâng hkâ-myháng a myáng má, byù rayuq gi, yhang lé dum myàng luí, “Nàng le yhangmoq chyáng bo nyi sù nghut ri.” ga taí kat jáng, Petruq gi, “Byù hpó ê, ngò a nghut.” ga tú taí ri.
⁵⁹ Hkyíng hkum rahkum kô myáng jáng, rayuq le, “Gè gè yhang, shí yuq gi, Yhang eq rahá nyi wún sù nghut ri; haí mù gâ le, yhang gi, Galile byù le nghut ri.” ga zuq zuq taí ri.
⁶⁰ Petruq gi, “Byù hpó ê, nàng taí nyi é hkyô lé, ngò a sé.” ga tú taí ri. Háu su ga ru taí nyi ashí le, woq tân bê
⁶¹ nghut ri. Háu hkûn, Yesuq gi, lhíng luí, Petruq lé wú kat ri. Háu mù, Petruq gi, “Hkû-nyí lháng, woq a tân shi má, nàng Ngo lé sum dâm he pyám

râ nghut lhê.” ga luí, Yhumsîng yhang
⁶² lé taí é dang lé bûn kat ri. Háu mù, yhang gi, shinggan shut htoq ê luí, gyai yhang ê ngau nyi ri.

Gyezô Pé Yesuq Lé Rhoi É Hkyô

- ⁶³ Yesuq lé zúng nyi é bang gi, Yhang lé rhoi luí nghap myíng nghap htê mu
⁶⁴ nyi akô. Yhangmoq gi, Yhâng é myoq-dong nghop pyám byi luí, “Nang lé bat sù gi, ó yuq nghut ri lhú? Myiq-
⁶⁵ htoi htoi wú aq.” ga myí akô. Yhangmoq gi, Yhang lé nyhap é dang ajung jung dông taí rhoi nyi akô.

**Suwún Wui É Hí Má
Yesuq Jé Nyi É Hkyô**

Mht 26:59-66; Mrk 14:55-64; Yhn 18:19-24

- ⁶⁶ Napkyó myoqmyàng jáng, mingbyû wui é suwún hpúng bang eq rahá, hkyangjong agyi pé, tarâ sará pé, zup hpong kut nyi é má, Yesuq lé shuí ê
⁶⁷ mù, “Nàng Hkrisduq nghut é têng le gi, ngamoq lé taí kyo laq.” gâ akô.
Yesuq gi, “Ngò gi, Hkrisduq nghut lhê nghû taí kôlhang, nungmoq jíng
⁶⁸ kó râ a nghut. Ngò, nungmoq lé myi kôlhang, nungmoq gi, tú taí kó râ a
⁶⁹ nghut. Nghut kôlhang, ahkuí mai haú Byu Yhangzo gi, a-tsam bo dik é Garai Gasâng é loqyò hkyam má wó zung nyi berâ nghut lhê.” ga luí, yhangmoq lé taí ri.
⁷⁰ Háu hkûn, yhangmoq banshoq bang gi, “Haú nghut le gi, Nàng, Garai Gasâng é Yhangzo nghut lhê lhú?” ga myí akô.
Yesuq gi, “Nungmoq taí é eq rajung za Ngò nghut lhê.” ga luí, yhangmoq lé tú taí ri.
⁷¹ Háu hkûn, yhangmoq gi, “Nga-nhúng haí jung saksé wá râ nyi ashí

^a 22:53 Mauchut èq up gâ é gi, Tsadán èq up é lé gâ ri.

lhú? Yhâng é nhut mai yhang, taí htoq kat é dang lé, nga-nhúng wó gyo bê nghut lhê.” ga akô.

Yesuq Lé Mara Hun É Hkyô

Mht 27:1-2, 11-14; Mrk 15:1-5; Yhn 18:28-38

- 23** Haú hkûn, zup zîng tô é bang banshoq gi, htoq mù, Yesuq lé mauzau Pilat chyáng shuí wang ê luí,
- ² “Shí yuq gi, mingbyû wùi lé hkyô shuí ngoq é eq, hkoséng Kehtaq chyáng kang kat râ hkyô lé le hkûm to luí, Yhânggùng yhang gi, haú Hkrisduq nghû é hkohkâm nghut lhê ga luí, taí nyi é lé ngamoq myang ri.” ga luí, Yhang lé mara hun akô.
- ³ Haú hkûn, Pilat gi, Yesuq lé, “Nàng gi, Yudaq byu pê é hkohkâm nghut lhê lhú?” ga myi jáng, Yesuq gi, “Nàng taí é eq rajung za nghut lhê.” ga tû taí ri.
- ⁴ Pilat gi, “Shí yuq lé hûn râ mara ngò a myàng.” ga luí, hkyangjong agyi pé eq shiwa byu pé lé taí ri.
- ⁵ Nghut kôlhang, haú bang gi, “Shí yuq gi, Yuda mau gón má yhang mhoqshit é dông mai, mingbyû wùi é i-myt lé shuí gabyông ri. Haú gi, Galile mau mai ahkuí shí má jé shoq nghut bê nghut ri.” ga zuq zuq taí bum akô.
- ⁶ Pilat gi, haú su ga kô é lé wó gyo jáng, Yesuq Galile byû nghut é, a
- ⁷ nghut é hkyô lé myí wú ri. Yesuq gi, Herut up é mau mâ é byû nghut é lé Pilat sé jáng, haú u lé Yerusalem wà mó má nyi tô é Herut chyáng, ê dé kat nhang ri.
- ⁸ Herut gi, Yesuq lé myàng jáng, gyai yhang gabú pyâm ri. Hkâsu mù gâ le, Yhâng é hkyô lé wó gyô wú mù, Yhang laklaí kumlhá ralhûm lhum kut shit râ lé, wó myàng shoq ga, myit myoqbyu nyi é nghut luí, Yhang lé myàng nau é gyai yhang myáng bê

- ⁹ nghut ri. Haú mù, yhang gi, Yesuq lé dangmyi myo myô èq myí wú kô-lhang, Yesuq gi, dang rahkun lhang a
- ¹⁰ tû taí byi nghut ri. Hkyangjong agyi pé eq tarâ sará pé gi, yap to mù, Yhang
- ¹¹ lé mara gyai yhang chôm hun akô. Herut eq yhâng é gyezô pé gi, Yesuq lé rhoí jihkyoí kut mù, atam é dông taí hpoí kô luí, réng é mebu hut byi mù, Pilat chyáng dum taú dé nhang kat
- ¹² akô. Haú nyí jáng, hí hpyang gyè dut lhûm é Herut eq Pilat gi, buinùm dut byuq bekô nghut ri.

Yesuq Lé Sat Râ Matú Doqdân É Hkyô

Mht 27:15-26; Mrk 15:6-15; Yhn 18:39-19:16

- ¹³ Haú hkûn, Pilat gi, hkyangjong agyi pé eq zau suwún wuí, mingbyû wùi lé
- ¹⁴ wut tsîng to mù, “Shí yuq gi, mingbyû wùi lé hkyô shuí ngoq ri ga, Yhang lé nungmoq ngá chyáng shuí lé lô bekô. Ahkuí, wú keq, nungmoq é hí má, Yhang lé ngò myí wú le, Yhang má nungmoq hun é mara
- ¹⁵ lé ngò a myàng nghut ri. Hau htoq agó, Herut le, hai mara le a myàng mú, shí yuq lé nga-nhûng chyáng dum dé kat byi bê nghut ri; haú mù luí, wú keq, shí yuq gi, shí gíng é mara haí le a kut shut nghut ri.
- ¹⁶ Haú mù, ngò, Yhang lé dam byi luí, nhang pyám râ.” ga luí, yhangmoq lé taí ri.
- ¹⁷ Nghut kôlhang, Lhoqlhai Poí hkangmó má, Pilat gi, mingbyû wùi lé htongbyû rayuq yuq nhang
- ¹⁸ kat byi byi kut é yanmai, yhangmoq banshoq bang gi, “Shí yuq lé gi, yu pyám aq; Barabaq lé kúm gi, nhang kat byi laq.” ga
- ¹⁹ luí, chôm wut garu bum akô. Barabaq gi, wà htum má gumlau kut é eq byû sat é yanmai, htóng gyó nyí sù nghut ri.

- ²⁰ Pilat gi, Yesuq lé nhang pyám nau é nghut mù luí, yhangmoq lé dum puq
- ²¹ taí ri. Nghut kôlhang, yhangmoq gi, “Yhang lé tapzîng má jén tap pyám aq, jén tap pyám aq!” ga luí, wut taí garú nyi bum akô.
- ²² Haú mù luí, sum dâm nghû râ hkûn, Pilat dum taí é gi, “Haí mù luí lúhú? Yhang gi, hai mara kut shut bê lúhú? Yhang má shí gíng é mara lé ngò a myàng, haú mù, ngò, Yhang lé bat, nhuq, mhoqshit luí, nhang pyám râ.” ga luí, yhangmoq lé taí ri.
- ²³ Yhangmoq gi, Yesuq lé tapzîng má wó jén sat pyám shoq ga, zuq zuq htê mó o mó èq dîng wut nyi akô nghut é yanmai, wó taí ung yù bekô nghut ri.
- ²⁴ Haú mù luí, Pilat gi, yhangmoq dîng é eq rajung za myit hpyit doqdan byí ri.
- ²⁵ Haú su mù, yhang gi, yhangmoq dîng é eq rajung za, wà htum má gumlau kut é eq byù sat é mai, htóng gyó nyí sù lé nhang kat byi luí; Yesuq lé gi, yhangmoq ô nau é dông ap byi kat bê nghut ri.
- Yesuq Lé Tapzîng Htoq
Má Jén Tap É Hkyô**
- Mht 27:31-44; Mrk 15:21-32; Yhn 19:17-27*
- ²⁶ Yhangmoq gi, Yesuq lé shuí htoq ló kô é hkûn, yosô wà mai lo é, Kuruni myuq byú nghut é Simun ga sù lé, chyup yú mù, tapzîng waq nhâng luí, Yesuq htâng má cháng nhang akô.
- ²⁷ Byù rajum rayò gi, Yhang htâng má châng e ló bum akô. Yhang é yanmai ngaubyi ngaù nhap eq iyon yôn é myiwe zo wui le haú má bo tô ri.
- ²⁸ Yesuq gi, yhangmoq shut lîng wú luí, “Yerusalem byizo wui ê, Ngá é yanmai hkâ-ngau nyí kó, nungmoq gi, yhumsing gùng eq yhumsing é zo dù wui é matú sheq ngaù nyí keq.
- ²⁹ Hkâsu mù gâ le, ‘Zogûng a dut wú é eq naú a huq wú é baùdung myhí pé gi, hkungsô wó nyi ri.’ ga luí, taí é buinyì gi, jé lô râ nghut lhê.
- ³⁰ Haú buinyì má, byu pé gi, bùm pé lé,
‘Ngamoq ahtoq má byoq nhé aq!’
ga luí le, kong pé lé,
‘Ngamoq ahtoq má nghop aq!’^a
ga luí le, wut taí bùm bekô râ nghut
- ³¹ lhê. Byu pé gi, sikgâm jûm tô ashí le isu kut kô é nghut le gi, màn jáng gi, hkâsu wá dut lò râ lúhú?” ga taí ri.
- ³² Haú hkûn, damyaq í yuq lé le, sat pyám râ ga, Yesuq eq rahá shuí htoq
- ³³ ló akô. Ahkuí, Ugyap nghu é kong má jé jáng, Yesuq lé tapzîng htoq má jén tap tô é hkûn, damyaq í yuq lé le, loq-pai loqyò shut kut luí tapzîng má jén
- ³⁴ tap tô akô. Haú hkûn, Yesuq gi, “Áwa ê, yhangmoq lé mara hkyut pyám byi laq; hkâsu mù gâ le, yhangmoq kut é hkyô lé yhangmoq a sé kó nghut ri.” ga taí ri. Gyezô pé gi, Yhâng é mebu pé lé lháng, hkyîn shosé she é dông gam yu pyám byí akô.
- ³⁵ Míngbyú wui gi, yap to mù tu wú nyi akô. Zau suwún wui Yhang lé nyhap é gi, “Yhang gi, byù góbang lé hkyi yu é sù nghut ri. Yhang gi, Garai Gasang hkyin yu é sù Hkrisduq nghut le gi; Yhânggùng yhang le hkyi yu wú sháng gaq.” ga akô.
- ³⁶ Gyezô pé le, huí ê mù, rhoí nyaú nyaú akô. Yhangmoq gi, chyîn wing lé
- ³⁷ yhun byi kôluí, “Nàng gi, Yudaq byu pé é hkohkâm nghut é nghut le gi, Náng gûng yhang nàng, hkyi yu wú aq.” ga Yhang lé taí akô.
- ³⁸ Yhâng é ulhum ahtoq má le, (Grik dông le, Latin dông le, Hebre dông le) “SHÍ YUQ GI, YUDAQ BYU PÊ É HKO-HKÂM.” gâ é laiká kâ tap tô akô.

^a 23:30 Hos 10:8

- ³⁹ Tapzîng htoq má bat tap lhâng to huí é damyaq rayuq gi, “Nàng gi, Hkrisduq nghut lhê, a nghut lhu? Haú Náng gûng nàng le, ngá-nhik lé le, hkyi yù aq.” ga luí, Yhang lé rhoi ri.
- ⁴⁰ Damyaq góyuq sù kúm gi, “Nàng le shí yuq eq rajung za jén tô é hui luí nhîng, Garai Gasang lé a gyuq
- ⁴¹ lhu? Nga-nhik gi, yhumsîng kut shut é mara eq rajung za, jéyáng hui zo gíng é sù nhik nghut lhê; shí yuq kúm gi, hai mara lé kut shut wú sù a nghut.” ga luí, haú yuq lé tân kat ri.
- ⁴² Hau htâng, yhang Yesuq lé taí é gi, “Yesuq ê, Nàng, Náng é mingdán má jé ló jáng, ngo lé myit bun laq ô.” gâ ri.
- ⁴³ Haú hkûn, Yesuq gi, “Ngò, nang lé teng za taí lé, hkû-nyí yhang nàng Ngò eq rahá hparadisu^a má nyí râ nghut lhê.” ga luí, yhang lé tû taí kat ri.

Yesuq Soqkang Byit É Hkyô

Mht 27:45-56; Mrk 15:33-41; Yhn 19:28-30

- ⁴⁴ Haú ahkyíng gi, nyí káng raxe í hkyíng nghut luí, myinhâng sum hkyíng jé shoq ramau gón mauchut
- ⁴⁵ tuq dut byuq bê nghut ri;^b hkâsu mù gâ le, builoq shum byuq é yan-mai nghut ri. Noqkuq yhûm mâ é pán-gyang le, í hkyam byáng dut byuq
- ⁴⁶ bê nghut ri. Haú hkûn, Yesuq gi, “Áwa ê, Ngò, Ngá é woi-nyí náng é loq má ap byí lhê.” ga htê mó èq garû kat ri. Haú su ga ban taí eq, Yhang kâng byit bê nghut ri.
- ⁴⁷ Shô up gyezau hpó gi, haú su dut é lé myàng jáng, “Shí yuq gi, gè gè yhang, dîngmán sù nghut ri.” ga luí, Garai Gasang lé hkya-on kungton ri.
- ⁴⁸ Haú hkyô lé wú râ ga, lé zîng tô é byù lhunglhâng bang le, haú su dut

- é hkyô pé lé myàng kôjáng, myit yón kôluí, wànggàng bat mù, dum taú ló
- ⁴⁹ byuq bekô. Nghut kôlhang, Yhang lé sê é bang eq Galile mau mai Yhang htâng châng é myiwe wui gi, we we má yap to mù, haú hkyô pé lé byu wú nyi akô.

Yesuq É Màng Lé Lup Hkaú Má Kat É Hkyô

Mht 27:57-61; Mrk 15:42-47; Yhn 19:38-42

- ⁵⁰ Haú hkûn, Yuda mau Aramahti gâ é myuq má, Yosep gâ é sù rayuq nyi ri. Haú yuq gi, nhik bo é sù eq dingmán é sù nghut é htoq agó, Garai Gasâng é mingdán jé râ hkyô lé myit
- ⁵¹ myoqbyu to sù le, nghut mù luí, yhang gi, Yudaq uphkâng hpúng mâ é rayuq nghut kôlhang, hpyé lhûm é hkyô má le, zui saí é hkyô má le, myit a bo
- ⁵² huí lom é sù nghut ri. Yhang gi, Pilat chyáng wàng luí, Yesuq é gung-sôm lé dîng yu ri. Haú mù, gung-sôm haú lé tapzîng mai hkyut hkyô yù luí, pán yúng èq htup yup mù, ó lé lháng a kat wú shí é, luqgok lé kyûng tô é luqgok lup hkaú má kat
- ⁵⁴ tô ri. Haú nyí gi, Hên Lajang Buinyí nghut luí, Bánno buinyí jé râ za nghut bê.
- ⁵⁵ Galile mau mai Yesuq eq rahá htoq lé lo é myiwe zo wui le, Yosep htâng má châng ê luí, lup haú lé le, Yesuq é gungsôm lé le, hkâsu kut tô tô é lé, ê
- ⁵⁶ myang akô. Hau htâng, yhangmoq gi, yhûm shut taú lò mù, Yesuq é gùng sôm lé but byi râ matú, namngón é jung eq mura xû lé hen tô akô. Bánno buinyí má kúm gi, tarâ joq é eq rajung za, yhangmoq yuban bân nyi bum akô nghut ri.

^a 23:43 Hparadisu nghu é gi, mauhkûng mingdán lé taí ri. ^b 23:44 Nga-nhûng é nyí káng raxe í hkyíng gi, Yudaq byù pé é napkyó hkyuq hkyíng nghut lhê; yhangmoq é gau hkyíng gi, nga-nhûng é myinhâng sum hkyíng nghut bê.

Yesuq, Dum Dui Toq É Hkyô*Mht 28:1-10; Mrk 16:1-8; Yhn 20:1-10*

24 Bánno buinyì htang napsûn noq le, miywe wuì gi, yhangmoq hen tô é namngón jung pé lé yu chûng mù, lup shut e ló akô. Yhangmoq gi, lup mâ é luqhkum lêng bóng to lánq é lé, ê myâng kômù, wang e wú kô le, haù Yhumsîng Yesuq é gung-sôm lé, a myàng lo kó nghut ri. Yhangmoq maù úng-âng nyi bùm kô é hkûn, radá dâm maulhap su duqbó é mebu wut é byù í yuq, yhangmoq é nàm má yap tô akô. Haù mù, miywe haù bang gi, gyuq dan bum kôluí, myigùng shut myoqdong ngóm gop tô bum é u lé, haù nhik gi, “Nungmoq gi, dui sù lé, shi to bâng chyáng haí mù ho nyi akô lú? Yesuq gi, shí má a nyì lo; Yhang dui toq lo bê! Yhang gi, nungmoq eq rahá Galile mau má nyi tô ashí hkûn lé, ‘Haù Byu Yhangzo gi, yubak dap bâng é loq má ap pyâm é hui luí, tapzîng má jén sat to huí é htâng, sum nyí nghù é buinyì má lhoq dui toq yu é hui râ nghut lhê.’ ga nungmoq lé taí tô é dang lé myit bun keq.” ga luí, yhangmoq lé taí ri. Haù hkûn, yhangmoq gi, Yesuq é dang lé bûn kat bekô nghut ri.

⁹ Yhangmoq gi, lup mai dum taù lò mù, lagyo raxe rayuq eq gotú lhunglhâng bang lé, haù hkyô banshoq lo taí kyô akô. Lagyo pé lé lo taí kyo bang gi, Magadalaq wà mâ é Mariq, Yoanaq, Yakuq é yhângnu Mariq eq, yhangmoq eq rahá nyi é miywe gó-bang le nghut akô. Lagyo pé kúm gi, yhangmoq é dang lé dangsôm su ngam pyám kôluí, a jîng byi kó nghut ri. Nghut kôlhâng, Petruq gi, toq luí lup má din jé ê mù ngóm wú kat le, màng htup é pán leq tô é lé za myàng mù luí, haù su dut é hkyô lé

maù é èq, yhûm shut dum taù lò byuq bê nghut ri.

Chángzo Í Yuq Lé Yesuq Htoq Shit É Hkyô*Mrk 16:12-13*

¹³ Haù ra-nyí má za, Yesuq é chángzô pé mâ é í yuq gi, Yerusalem wà mó mai nyhit déng kô wê é Ema-u gâ é wà shut e ló akô. Yhangnhik gi, dut laí ló é hkyô pé banshoq lé, rayuq eq rayuq taí lhûm nyi akô. Yhangnhik gi, haù hkyô pé lé rayuq eq rayuq taí hpyê lhûm e ló kô le, Yesuq gi, yhangnhik chyáng jé lé lô mù, yhangnhik eq rahá sô nyi ri. Nghut kôlhâng, yhangnhik gi, myoq hpuq hpuq pyám byí é hui kômù, Yhang lé a sê wú byuq kó nghut ri.

¹⁷ Hau hkûn, Yesuq gi, yhangnhik lé, “Nungnhik hkyô so uchyang taí lhûm lé lo é gi, haí jung wá nghut akô lú?” ga myi kat jáng, yhangnhik gi, myoqdong shûm kut luí, hkyîng yap tô akô.

¹⁸ Yhangnhik mâ é Hklupa gâ é sù gi, “Nàng gi, Yerusalem wà mó má lé bíng nyí luí nhîng, shí gyoro lé haù wà má dut lo é hkyô pé lé, a sê é bíng gi, Nàng baù za wá nghut lhê lú?” ga myi kat ri.

¹⁹ Yhang gi, “Haí jung lú?” ga dum myí é hkûn lé, yhangnhik gi, “Nazaret wà byù Yesuq é hkyô nghut lhê; haù yuq gi, Garai Gasâng é hí má le, byù lhunglhâng bâng é hí má le, nhut shô hpaqchyí a-tsam eq hkyí loq a-tsam má wum-o bo é sù myiqhtoi nghut ri.

²⁰ Nghut kôlhâng, hkyangjong agyi pé eq ngamoq é zau suwún wui èq haù yuq lé sat pyám râ matú ap byí pyám kômù, yhangmoq gi, Yhang lé tapzîng má jén sat pyám bekô nghut ri.

²¹ Nga-moq kúm gi, haù yuq lé, Israelaq byù myú lé hkyi yù râ sù nghut lhê nghù

luí, myit myoqbyu nyi bum lhê. Nghut kôlhang, haú su dut laí ló é gi, hkû-nyí
²² sum nyí lháng bò bê. Hau htoq agó, hkû-
 nap noq le, lup má ê wú é, nga-
 moq hpúng má é myiwe wui ra-am gi,
²³ ngamoq lé, lo lhoq maú akô. Yhang-
 moq gi, Yesuq é gungsôm lé a myàng
 jáng dum taú lò mù, ‘Haú Yhumsîng
 dui nyi ri.’ ga luí, taí kyô é maumang
 lagyo htoq shit é shing-rán lé, myang
²⁴ é hkyô lé lo taí kyô akô. Haú mù, nga-
 moq é luzúm wui ra-am gi, lup má
 ê wú kô le, myiwe wui taí é eq ra-
 jung za, dut to lánq é lé ê myàng akô.
 Nghut kôlhang, haú yuq lé gi, yhang-
 moq a myàng kó gâ.” ga luí, Yhang lé
 taí kyô akô.

²⁵ Haú hkûn, Yhang gi, “Myiqhtoí pé
 taí é dang banshoq lé lumjîng râ matú,
 hpaqchyí a bo é eq ngha é sù nhik ê,
²⁶ Hkrisduq gi, haú su é wuihke jamjau
 hkâm zô yu é htâng má sheq, Yhâng
 é hpungwup shingkang má wó wang
 nyi to râ, a nghut kó lhú?” ga luí,
²⁷ yhangnhik lé myí ri. Yhang gi, yhang-
 nhik lé, Mosheq kê tô é eq myiqhtoí
 pé banshoq bang kê tô é Chyúmdang
 pé mai, Yhang má âng é dang banshoq
 é lichyúm lé, taí hpông kyô ri.

²⁸ Ahkuí, yhangmoq, haú nhik e ló é
 wà má chyâng lò kôjáng, Yesuq gi,
²⁹ laí ló râ su kut ri. Haú hkûn, yhang-
 nhik gi, “Nga-nhik eq rahá wang bíng
 sháng; hkâsu mù gâ le, buigyùm bê
 mù, mau le chut lô bê nghut ri.” ga
 luí, Yhang lé wum kat chôm lung nyi
 akô. Haú mù luí, Yesuq gi, yhangnhik
 eq rahá wang bíng bê nghut ri.

³⁰ Yesuq gi, zang zo râ ga, yhangnhik
 eq rahá zung tô é hkûn, muk lé yù
 luí, jeju hkya-on mù, myhik hpé luí,
³¹ yhangnhik lé gàm byí ri. Haú hkûn,
 yhangnhik é myoq bóng lô luí, Yesuq
 nghut é lé bûn sé kat bekô. Yesuq kúm

gi, yhangnhik chyáng mai byuq byuq
³² bê nghut ri. Haú mù, yhangnhik gi,
 “Yhang gi, hkyô má ngá-nhik eq dang
 nyo lhúm é eq Chyúmdang é lichyúm
 taí hpông shit é hkûn, ngá-nhik gi,
 i-myt unghkaú má, achyí aku dut bê a
 nghut lhú?” ga luí, yhangnhik yhang-
 chang taí lhúm akô.

³³ Yhangnhik gi, toq mù, radá dâm
 Yerusalem wà mó shut dum taú ló kô
 le, lagyo raxe rayuq eq, yhangmoq eq
 rahá nyi é bang zup míng to kô é lé ló
³⁴ myang akô. Haú bang gi, “Haú Yhum-
 sîng gi, teng za yhang dum dui toq ló
 bê; Simun lé lháng htoq shit bê nghut
³⁵ ri.” ga taí lhúm nyi bum akô. Haú
 hkûn, yhangnhik gi, hkyô má dut laí
 ló é hkyô pé eq, muk hpê é hkûn má
 Yesuq lé bûn sé kat é hkyô lé, taí kyô
 akô nghut ri.

Chángzô Pé Lé Yesuq Htoq Shit É Hkyô

Mht 28:16-20; Mrk 16:14-18;

Yhn 20:19-23; Lagyo 1:6-8

³⁶ Yhangmoq haú hkyô lé chôm taí nyi
 tô bum ashí le, Yesuq gi, Yhang gûng
 yhang, yhangmoq é agùng má yap to
 luí, “Nungmoq nuingón yuqyo nyi
 sháng gaq.” ga luí, yhangmoq lé taí ri.

³⁷ Yhangmoq kúm gi, gyuq dan byuq
 bùm kômù, sobyô lé myàng bê ga
³⁸ myit yu pyâm bum akô. Haú mù luí,
 Yhang gi, “Nungmoq gi, haí mù dan
 nyi bum akô lhú? Haí mù nungmoq é
 i-myt unghkaú má úng-âng nyi bum
³⁹ akô lhú? Ngá é loq eq Ngá é hkyí lé
 wú wú keq. Ngò yhang nghut nyi lhê.
 Ngo lé sop wú keq. Sobyô nghú é gi,
 ngo lé nungmoq myang é su, sho eq
 showui showang bo é a nghut.” ga luí,
 yhangmoq lé taí kyô ri.

⁴⁰ Yhang gi, haú su ga taí mù, Yhâng
⁴¹ é hkyí loq lé tân shit ri. Yhangmoq
 gi, gabú é eq maú nyi bùm kômù, a

wó jǐng shì dut tō é hkûn lé, Yesuq gi, “Nungmoq shí má zôhpo rajung jung wó akô lhú?” ga luí, yhangmoq lé myi kat ri. Haú hkûn, yhangmoq gi, nyhîn nyhoq tō é ngozo rahtung lé, byî akô.

⁴³ Yhang gi, haú lé yù mù, yhangmoq é hí má zô shit ri.

⁴⁴ Hau htâng, Yhang, yhangmoq lé taí é gi, “Mosheq é tarâ eq, myiqhtoi laiká pé má le, Hkya-on Kungtôn Laiká pé má le, Ngò èq séng luí kê to má kê to banshoq gi, dik râ chyat nghut lhê nghû luí, nungmoq eq rahá nyi to ashî hkûn lé, Ngò, nungmoq lé taí kyô tō é pé gi, shí nghut bê.” ga taí ri.

⁴⁵ Hau htâng, Yhang gi, Chyúmdang pé lé sê gyo shoq ga, yhangmoq é

⁴⁶ i-myt hkum hpóng byî ri. Haú mù, Yhang gi, “Hkrisduq gi, wuîhke jam-jau hui zo mù, sum nyí nghû râ bui-nyì má, shi é mai dum dui toq lô râ

⁴⁷ hkyô lé le, Yerusalem wà mó mai hí luí, byù myû chângjup lé, Yhâng é myìng lé lang luí yubak mara hkyut pyám byi râ hkyô eq myit lhîng râ hkyô lé le, hko kyo râ hkyô lé, kê

⁴⁸ to bê nghut ri. Nungmoq gi, shí pê

⁴⁹ é saksé pé nghut nyi akô. Ngá Wa byî tō é danggidiq^a lé, Ngò, nungmoq é ahtoq má nhang kat râ nghut lhê; nungmoq kúm gi, htoq tsáng myhâng mâ é wum-o a-tsam wó yu é bui-nyì jé shoq, Yerusalem wà mó má láng nyî keq.” ga luí, yhangmoq lé taí ri.

**Yesuq Mauhkûng Shut Shuí
Toq Yu Huí É Hkyô**

Mrk 16:19-20; Lagyo 1:9-11

⁵⁰ Hau htâng, Yhang gi, yhangmoq lé Behtani wà yàm shut shuí htoq ê mù, Yhâng é loq tu toq luí, shimân byî ri.

⁵¹ Haú su kut shimân byî nyi ashî le, Yhang gi, yhangmoq chyáng mai gâng ló byuq luí, mauhkûng shut shuí toq

⁵² yu é hui bê nghut ri. Yhangmoq kúm gi, Yhang lé noqkuq kômù luí, gyai gabú é myit èq Yerusalem wà mó shut

⁵³ dum taú ló akô. Yhangmoq gi, noqkuq yhûm má nyi to mù, Garai Gasang lé hkya-on kungton nyi bum akô nghut ri.

^a 24:49 Ngá Wá byi tō é danggidiq nghu é gi, Chyoiyúng é Woi-nyí lé taí ri.

YOHAN

é Gabú Danglù Laiká

(*The Gospel of John*)

Haù Mungdang, Xàngzo Byù Gùng Lé Dut É Hkyô

- 1** A-nham sâng-hi má, Mungdang joq ri; Mungdang haù gi, Garai Gasang eq rahá nghut luí, haù Mungdang yhang Garai Gasang nghut ri.
- ² Yhang gi, a-nham sâng-hi má, Garai Gasang eq rahá nghut nyi ri.
- ³ Nyì mi-nyì, joq mijoq gi, Yhang đông mai hpan tô é chyat nghut lâ; Yhang đông mai a hpan é gi, haì
- ⁴ lhang a joq nghut ri. Asak chyungxe gi, Yhang má nghut lâ mù, asak haù
- ⁵ gi, byu pê é matú maubó nghut ri. Haù maubó gi, mauchut má duqbó byì nyì kôlhàng, mauchut gi, haù lé a hap yù
- ⁶ nghut ri. Garai Gasang mai nhang kat é, Yohan gà é byù rayuq jé lé ri.
- ⁷ Yhang gi, maubó haù eq sêng é hkyô lé, saksé hkám byi luí, yhang é yanmai byù lhunglhang bang wó lumjínng kó sháng gaq ga, saksé rayuq đông jé lé
- ⁸ é sù nghut ri. Yhang gi, haù maubó a nghut; maubó haù lé saksé hkám byi râ matú za sheq jé lé é ru nghut lâ.
- ⁹ Byù yuq jup lé duqbó byi é, maubó akying haù gi, mingkan htoq má jé nyi to bê.
- ¹⁰ Yhang gi, mingkan htoq má nyi to bê nghut ri; mingkan lé gi, Yhang đông mai hpan tô é nghut kôlhàng, mingkan haù gi, Yhang lé a wú sé
- ¹¹ nghut ri. Yhang gi, yhumsing mau má jé lé kôlhàng, Yhang é amyù pé gi, Yhang lé a lhom hap yù kó nghut ri.
- ¹² Nghut kôlhàng, Yhang gi, Yhang lé lhom hap yù luí, Yhang é mying lé lumjínng é bang lhunglhang lé, Garai Gasang é yhangzô pé dut râ ahkáng

¹³ byi bê nghut ri. Haù bang gi, sui sho đông hku kat é le a nghut, byù ô nau é đông hku kat é le a nghut, gungsho ô nau é đông hku kat é le a nghut e za, Garai Gasang chyáng mai hku kat é bang ru nghut lâ.

¹⁴ Haù Mungdang gi, xàngzo byù gùng lé dut luí, ngamoq chyáng nyi wú bê nghut lâ. Ngamoq gi, haù jeju eq tengmán hkyô bying tô é, Yhang é hpungwup shingkang lé myang wú bê nghut lâ; haù gi, haù Íwâ é zote rayuq đông, Yhang wó yu é hpungwup shingkang nghut ri.

¹⁵ Wui-myhup Sará Yohan gi, Yhang eq sêng é hkyô lé saksé hkám é hkân, garú taí é gi, “Ngá é htàng má jé lé é Sù gi, ngá é hí mai nyi to bê sù nghut é yanmai, ngá htoq je gyaú sù nghut ri.’ nghù, ngò taí é sù gi, shí yuq nghut

¹⁶ bê.” gà ri. Yhang é gumjup é jeju ahkaù mai, nga-nhúng banshoq bang gi, shimân jeju lé ralhùm htoq ralhùm

¹⁷ myang yu nyi bê nghut lâ. Hkâsu mù gà lé, haù jep é tarâ gi, Mosheq é loq đông mai byì é nghut lâ; jeju eq tengmán hkyô kúm gi, Yesuq Hkrisduq é

¹⁸ yanmai lé joq é nghut lâ. Garai Gasang lé, ó yuq èq le a myang wú wú é nghut lâ; nghut kôlhàng, haù Íwâ é tanghkoí má lúng tô é, Yhang Zo zote gi, Garai Gasang é gùng lé lhoq htoq shit bê nghut ri.

Wui-myhup Sará Yohan Hko Kyô É Hkyô

Mht 3:1-12; Mrk 1:1-8; Luk 3:15-17

- ¹⁹ Yerusalem wà mó mâ é Yudaq byu pé gi, hkyangjông pé eq Lewiq byu

- pé lé, Yohan ó yuq nghut é hkyô myí nhang kat kô é hkûn, Yohan saksé hkâm é gi, a-ô mâ é hkyô pé nghut ri.
- ²⁰ Yhang gi, a hê a zaú tô e za, “Ngò gi, Hkrisduq^a a nghut.” ga lhom taí kyô ri.
- ²¹ Haú hkûn, yhangmoq gi, “Haú nghut jáng, nàng gi, ó yuq nghut lhê lú? Nàng gi, Eliyaq lú?” ga myi kô-jáng, yhang gi, “A nghut.” ga taí ri; “Nàng gi, haú Myiqhtoi nghut lhê lú?” ga dum myi kôjáng, yhang gi, “A nghut.” ga tú taí ri.
- ²² Haú mù, yhangmoq gi, “Ngamoq lé nhang kat bâng chyáng ló wó taí kyo râ matú, nàng gi, ó yuq nghut lhê lú? Náng gûng lé nàng hkâsu nghú lhê lú? Taí kyô wú laq.” ga dum myí akô.
- ²³ Haú hkûn, Yohan gi, myiqhtoi Esai-aq é dang eq rajung za, “Ngò gi, haú yoso má, ‘Yhumsing é matú hkyô lhoq nyhang to keq.’ gâ é htê lé, garú taí é sù nghut lhê.”^b ga tú taí ri.
- ²⁴ Hparishe pé mai nhang kat é bang
- ²⁵ ra-am gi, yhang lé, “Nàng gi, haú Hkrisduq le a nghut, Eliyaq le a nghut, Myiqhtoi le a nghut é nhîng, haí mù luí, wui-myhup hkám byi nyi lhê lú?” ga dangmyi myí akô.
- ²⁶ Haú hkûn, Yohan tú taí é gi, “Ngò gi, wui èq za wui-myhup hkám byi lhê; nghut kôlhang, nungmoq a sê é sù rayuq nungmoq chyáng yap tô ri.
- ²⁷ Yhang gi, ngá htâng má lé é sù yuq nghut bê; ngò gi, Yhâng é hkyí-tsung tui lé hpyí râ lhang a gingdán é nghut ri.” gâ ri.
- ²⁸ Shí pé banshoq gi, Yohan wui-myhup hkám byi nyi é, Yodan làng hé hpoq mâ é Behtani wà má dut é hkyô pé chyat nghut ri.

Yesuq Gi, Garai Gasâng É Sauzo Nghut É Hkyô

- ²⁹ Hau htang nyí, Yohan gi, yhâng chyáng Yesuq lé lo nyi é lé myàng luí, taí é gi, “Mingkan byu pê é yubak mara lé yu pyám byí é Garai Gasâng
- ³⁰ é Sauzo lé, wú keq! Shí yuq gi, ‘Ngá é htâng má jé lé é Sù gi, ngá é hí má nyi bê sù nghut é yanmai, ngá htoq je gyaú Sù nghut ri.’ nghú, ngò taí é sù
- ³¹ yhang nghut bê. Ngò gi, Yhang ó yuq nghut é lé a sê é nghut lhê, nghut kô-lhang, Yhang lé, Israelaq byu pé wó sé kó sháng gaq nghú, ngò lé jé mù, wui èq wui-myhup hkám byi nyi é nghut lhê.” gâ ri.
- ³² Hau htâng, Yohan saksé hkâm é gi, “Haú Woi-nyí gi, mauhkûng mai hpûngkyui gunghkyâng sù é đông mai gyó lé mù, Yhâng chyáng lé nô tô
- ³³ é lé, ngò myàng ri. Ngò gi, Yhang ó yuq nghut é lé a sê é nghut kô-lhang, wui èq wui-myhup hkám byi râ matú, ngo lé nhang kat é Sù, ngo lé taí kyô é gi, ‘Haú Woi-nyí gyó lé lô mù, ó yuq chyáng lé nô tô é lé, nàng myàng jáng, haú yuq gi, haú Chyoi-yúng Woi-nyí má wui-myhup hkám
- ³⁴ byi râ sù nghut lhê.’ gâ ri. Haú eq rajung za ngò myàng bê nghut luí, shí yuq gi, Garai Gasâng é Yhangzo nghut lhê nghú, ngò saksé hkâm lhê.” gâ ri.

Sâng-hi Lhê É Chángzô Pé

- ³⁵ Hau htang nyí, Yohan gi, yhâng é chángzo í yuq eq rahá, haú má dum
- ³⁶ nyi tô akô. Haú hkûn, yhang gi, Yesuq laí ló nyi é lé myang kat jáng, “Hê, Garai Gasâng é sauzo lé, wú keq!” ga taí kat ri.
- ³⁷ Chángzo haú í yuq gi, yhang haú su gâ é lé wó gyo kôjáng, Yesuq é

^a 1:20 Grik dong *Hkrisduq* gâ é gi, xû but hui Sù gâ é lichyúm nghut mù, Hebre dong “Mesaia” gâ é eq rajung za nghut lhê. ^b 1:23 Esai 40:3

³⁸ htâng cháng bekô nghut ri. Yesuq gi, lhing wú kat le, yhangnhik châng tô é lé myàng luí, “Nungnhik haí o akô lú?” ga myi jáng, yhangnhik gi, “Rabai ê, Nàng hkâmá nyi lhê lú?” ga taú myí kat akô nghut ri. (Rabai gâ é gi, Sará gâ é lichyúm nghut lhê.)

³⁹ Haú hkûn, Yhang gi, “Lé keq, haú jáng, nungnhik myàng kó rã nghut lhê.” ga tũ taí ri.

(Haú-u gi, raxê hkyíng^a kô nghut ri.) Haú mù luí, yhangnhik gi, châng ê mù, Yhang hkâmá nyi é lé, ê myàng kôluí, haú nyí buigyùm shoq, Yhang eq rahá ê nyi nyi akô nghut ri.

⁴⁰ Yohan taí é dang lé wó gyo luí, Yesuq htâng châng é su nhik mâ é rayuq gi, Simun Petruq é yhanggu Andre nghut ri. Andre gi, yhangmang Simun lé hí myàng luí, “Nga-nhik gi, Mesaia lé myàng bê.” ga yhang lé taí kyô ri. (Mesaia gâ é lichyúm gi,

⁴¹ Hkrisduq gâ é nghut lhê.) Hau htâng, yhang gi, yhangmang lé Yesuq chyáng shuí e ri.

Yesuq gi, Simun lé lhom myàng jáng, “Nàng gi, Yohan é yhangzo Simun nghut ri; Kehpa^b gâ é myìng lé, nàng wó yú rã nghut lhê.” ga taí ri. (Kehpa gâ é lichyúm gi, Petruq gâ é nghut lhê.)

Hpilip Eq Nahtanelaq Lé Hkyin Yu É Hkyô

⁴³ Hau htang nyí, Yesuq gi, Galile mau shut ê rã matú, myit hpyit yú bê nghut ri. Yhang gi, Hpilip lé myàng jáng, “Ngá htâng cháng aq.” ga taí ri.

⁴⁴ Hpilip gi, Andre eq Petruq nhik nyi é Bet-saida wà mó mâ é byù nghut ri.

⁴⁵ Yhang gi, Nahtanelaq lé myàng jáng, “Mosheq mai tarâ laiká má kâ tô é eq myiqhtoí pé mai le lhoq ang luí kâ tô é sũ, Yosep é yhangzo, Nazaret wà byù Yesuq lé, ngamoq myàng bê.” ga yhang lé taí kyô ri.

⁴⁶ Haú hkûn, Nahtanelaq gi, “Nazaret wà ô! Haú mai, ge é jung haí wa wó htoq lhê lú?” ga myi jáng, Hpilip gi, “Ru lé wú aq.” ga yhang lé taí ri.

⁴⁷ Yesuq gi, Yhâng chyáng Nahtanelaq lé lo nyi é lé myàng jáng, yhang lé lhoq ang luí, “Wú keq, shí yuq gi, mhaú é myit a bo é sũ, Israelaq byù akyíng rayuq nghut ri.” ga taí ri.

⁴⁸ Haú hkûn, Nahtanelaq gi, “Nàng, ngo lé hkâsu kut sê é lú?” ga myi jáng, Yesuq gi, “Nang lé, Hpilip eq a wut yú shimá, nàng, maihpáng gâm ô má ru nyi tô ashí hkûn, Ngò, nang lé myàng bê nghut lhê.” ga tũ taí ri.

⁴⁹ Haú mù, Nahtanelaq gi, “Rabai ê, Nàng gi, Garai Gasâng é Yhangzo nghut ri; Nàng gi, Israelaq byu pé é Hkohlâm le nghut ri.” ga taí ri.

⁵⁰ Haú hkûn, Yesuq gi, “Ngò, nang lé, maihpáng gâm ô má myang é ngú taí kyô é yanmai, nàng lumjíng lhê a nghut lú? Hau htoq je kô é muzó pé lé, nàng myàng rã nghut lhê.” ga taí ri.

⁵¹ Hau htâng, Yesuq xoq taí é gi, “Ngò, nungmoq lé teng za taí kôlé, mauhkûng bóng lô luí, haú Byu Yhangzô ahtoq má, Garai Gasâng é maumang lagyô pé doq ló gyó lô kut nyí kô é lé, nungmoq myàng kó rã nghut lhê.” gâ ri.

Wuì Lé Tsibiyiq Wing Dut Nhang É Hkyô

2 Hau htâng, í nyí ngú rã nyí má, Galile mau mâ é Hkanaq wà mó

^a 1:39 Raxê hkyíng gi, myinhâng myi hkyíng záng ri. ^b 1:42 Aramaik dang đông Kehpa gâ é eq Grik dang đông “Petruq” gâ é lichyúm gi, luqgok gâ é nghut lhê.

- má, myiháng poî ralhú joq ri. Haú má Yesuq é yhângnu le, bo lom ri.
- ² Yesuq eq Yhâng é chángzô pé lé le, myiháng poî haú má ji akô nghut ri.
- ³ Tsibiyiq wing jaú tûm to kô é hkûn, Yesuq é yhângnu gi, “Yhangmoq, tsi-biyiq wing a wó lo kó nghut ri.” ga, Yesuq lé taí ri.
- ⁴ Haú hkûn, Yesuq gi, “Ânu ê,^a haú, nàng gi, Ngò eq haí sêng lhê lhu? Ngá é ahkýng a jé shi é nghut lhê.” ga tû taí ri.
- ⁵ Nghut kôlhang, Yhâng nu gi, haú dui-nhâng zoshâng wuì lé, “Yhang haí taí le, haí kut keq.” ga taí ri.
- ⁶ Haú nàm má, í sum xê galan kô wang é luqgok wúng hkyuq cham joq tô ri; haú gi, Yudaq byu pé mai, lhoq san lhoq yúng hkíng é matú, chung é jung wúng nghut ri.
- ⁷ Yesuq gi, haú dui-nhâng zoshâng wuì lé, “Wúng haú pé má wuì lhoq pyíng keq.” ga taí ri; haú mù, yhangmoq gi, wúng haú pé má byíng shoq shoq lhoq pyíng bekô nghut ri.
- ⁸ Hau htàng, Yhang gi, yhangmoq lé, “Ahkuí, ratsuí hkû yù mù, poî-up lé yu ló byi keq.” ga taí jáng, yhangmoq gi, yu ló byi akô nghut ri.
- ⁹ Poî-up hpó gi, wuì mai dut é tsibiyiq wing haú lé, shuq chyam wú ri; wuì hkam é dui-nhâng zoshâng wuì gi, tsi-biyiq wing haú hkâmai lo é hkyô lé sê to kôlhang, yhang gi, a sé nghut ri. Haú mù, yhang gi, lusik lé, ji yù
- ¹⁰ luí, “Yuq hkangmó gi, tsibiyiq wing mún lé hí jaú mù, bíng pé shuq gyí bùm jáng sheq, tsibiyiq wing apyâng lé ru yu htoq lhê; nghut kôlhang, nàng gi, nghâm é tsibiyiq wing lé, ahkuí jé shoq wó hkong tô ri-nhung!” ga taí ri.

- ¹¹ Galile mau mâ é Hkanaq wà mó má, Yesuq tûn shit é limik kumlhá gi, Yhang kut é limik kumlhá pé mâ é sâng-hí dàm nghut ri. Yhang gi, Yhâng é hpungwup shingkang lé, haú dông lhoq htoq shit é nghut mù luí, Yhâng é chángzô pé gi, Yhang lé lumjíng bum akô nghut ri.

Noqkuq Yhûm Lé Lhoq Sansêng Pyâm É Hkyô

Mht 21:12-13; Mrk 11:15-17; Luk 19:45-46

- ¹² Hau htàng má, Yesuq gi, Yhâng nu, Yhâng gu yuqzo pé eq Yhâng é chángzô pé le mù, Kaperna-um wà má gyó ló ri; yhangmoq gi, haú má buinyi myi ngò nyi nyi akô nghut ri.
- ¹³ Yudaq byu pé é Lhoqlhai Poí jé rà nghut é hkûn, Yesuq gi, Yerusalem wà
- ¹⁴ mó má doq ló ri. Haú hkûn, noqkuq yhûm wàng má, nojûng, sau, hpûngkyui pé lé ûng nyi é bang lé le, siboi má ngùn htaí zô zung nyi é bang
- ¹⁵ lé le, Yhang ló myàng ri. Haú mù, Yhang gi, tui lé, nhuq râ wase saí yù mù, banshoq bang lé le, sau eq nojûng lé le, haú noqkuq yhûm wàng mai hkat htoq luí, ngùn htaí zo bâng é ngùn htingchap lé gi, tû hut pyâm byi mù, yhangmoq é siboi lé gi, tu
- ¹⁶ mhuq pyâm byi ri; haú hpûngkyui ung zô é bang lé le, “Zè shi pé lé yu htoq ló keq! Ngá Wá é yhûm lé, hpugá jowò hkâkut kó!” ga luí nhik-yô ri.
- ¹⁷ Haú mù, Yhâng é chángzô pé gi, “Ngò, Náng é yhûm lé chyitdap kâng tuí é hkyô gi, Ngo lé myi su nyhê jôm pyâm râ nghut lhê.”^b ga kê tô é lé, myit bûn kat akô nghut ri.
- ¹⁸ Yudaq byu pé gi, Yhang lé, “Nàng, shí pé kut râ ahko ahkáng wó é hkyô

^a 2:4 Ânu ê gâ é lé, Grik dông gi, “Myiwe myhí ê” ga bo tô é nghut lhê. ^b 2:17 Hkya-on 69:9

lé saksé tân shit râ matú, ngamoq lé, haí jung limik kumlhá wó tân shit râ lú?” ga chôm myí akô nghut ri.

¹⁹ Haú hkûn, Yesuq gi, “Noqkuq yhûm shí lé nungmoq hpyoq pyám keq, sum nyí gyoro má, Ngò, haú lé dum tu shap râ nghut lhê.” ga, yhangmoq lé tû taí ri.

²⁰ Haú Yudaq byu pé gi, “Noqkuq yhûm shí lé, myí xe hkyuq zân tup saí é ru nghut lhê; sum nyí gyoro má za, Nàng wó tu shap râ lú?” ga tu myí

²¹ akô nghut ri. Nghut kôlháng, Yesuq taí é noqkuq yhûm gi, Yhâng é gùng

²² lé lhoq ang luí taí é nghut ri. Haú mù, Yhang, shi é mai lhoq dui toq huí é hkûn sheq, Yhâng é chángzô pé gi, Yhang haú su ga taí é dang lé myit bun kômù, Chyúmdang lé le, Yesuq taí é dang pé lé le, lumjínng akô nghut ri.

²³ Haú Lhoqlhai Poí nghut é u lé, Yerusalem wà mó má Yesuq nyi nyi é hkûn, byù myo myo gi, Yhang kut shit é limik kumlhá pé lé myàng kômù, Yhang lé lumjínng bum akô nghut ri.

²⁴ Nghut kôlháng, Yesuq gi, byù lhunglhang bâng é myit lé sê é yanmai, yhangmoq chyáng, Yhânggùng lé a ap

²⁵ to nghut ri. Yhang gi, byu é i-myit unghkaú má haí lúng tô é lé sê é yanmai, byù yhangchang saksé hkám byí é a ra nghut ri.

Nikodimu Lé, Yesuq Mhoqshit É Hkyô

3 Nikodimu gâ é Hparishe rayuq nyi ri; yhang gi, Yudaq byu pé é byìn tú wapdoq má bo é sù nghut ri.

² Yhang gi, myín lé, Yesuq chyáng lé mù, “Rabai ê, Nàng gi, Garai Gasâng chyáng mai lé é sará rayuq nghut é lé, ngamoq sê lhê. Hkâsu mù gâ le, Nàng kut shit é limik kumlhá pé gi, Garai

Gasang a lom é nghut jáng, ó yuq le wó kut râ a nghut.” ga taí ri.

³ Haú hkûn, Yesuq gi, yhang lé, “Ngò, nàng lé teng za taí kyo lé, ó yuq nghut kôle, dum hku é hui sù za a nghut le gi, Garai Gasâng é mingdán lé wó myâng râ a nghut.” ga tû taí ri.

⁴ Haú jáng, Nikodimu gi, “Ipyat kó bê é byù gi, dum hkû é hkâsu kut wó hui râ lú? Ínû é unghkaú má dum wàng mù, dum hku é hui râ gi, gè gè yhang wó dut râ a nghut!” ga taí ri.

⁵ Haú hkûn, Yesuq gi, “Ngò, nàng lé teng za taí kyo lé, ó yuq nghut kôle, wuì eq Woi-nyí mai hku kat é hui sù za a nghut le gi, Garai Gasâng é ming-

⁶ dán má wó wàng râ a nghut. Gungsho mai hku kat é gi, gungsho nghut ri; Woi-nyí mai hku kat é kúm gi, woi-nyí

⁷ nghut ri. ‘Nungmoq gi, dum hku é hui râ lhê’ nghû Ngò taí é dang lé, nàng

⁸ hkâmaú nyí. Haú, laì gi, yhang nau é shut ló lhê. Laì lò htê lé nàng wó gyo kôlháng, laì hkâmai lo é eq, hká shut ló é lé, nàng sé râ a nghut; haú Woi-nyí mai hku kat huí é sù, ó yuq nghut kôle, haú eq rajung za nghut lhê.” ga tû taí ri.

⁹ Haú hkûn, Nikodimu gi, “Haú gi, hkâsu wó dut râ lú?” ga myí ri.

¹⁰ Yesuq tû taí é gi, “Nàng gi, Isra-elaq byu pé é sará rayuq nghut to luí nhíng, haú hkyô pé lé a sê gyo

¹¹ lú? Ngò, nang lé teng za taí kyo lé, ngamoq gi, ngamoq sê é hkyô lé taí mù, ngamoq myang wú bê lé saksé hkâm lhê; nghut kôlháng, nungmoq gi, ngamoq é saksé lé a hap yù kó

¹² nghut ri. Ngò gi, nungmoq lé, mingkan eq sêng é hkyô lé taí kyô le háng, a lumjínng kô é nghut le gi, mauhkúng mingdán eq sêng é hkyô lé taí kyô é nghut le gi, hkâsu kut wó lumjínng kó

- ¹³ rã lhu? Mauhkung mingdãn mai gyó lo é sũ, haũ Byu Yhangzo mai lai luĩ, mauhkung mingdãn mã ó yuq lhang
- ¹⁴ wó doq ló wú é a nghut. Mosheq gi, yoso mã lhangmuĩ lé tu shap tô é su, haũ Byu Yhangzo le tu shap tô é hui
- ¹⁵ ra rã nghut lhê. Haũ mù, haũ Byu Yhangzo lé lumjĩng é yuq hkangmó gi, ahtum abyuq é asak wó yũ rã nghut lhê.
- ¹⁶ Hkãsu mù gã le, Garai Gasang gi, mingkan lé gyai yhang chyitdap é yanmai, Yhang Zo lé lumjĩng é sũ ó yuq nghut kôle, htên byoq é a huĩ e za, ahtum abyuq é asak wó yũ sháng gaq ga, rayuq za é Yhâng é Zote lé
- ¹⁷ byĩ pyãm bê nghut ri. Hkãsu mù gã le, Garai Gasang gi, mingkan lé mara byi rã matú, Yhang Zo lé mingkan htoq mã nhang kat é a nghut é za, Yhang é yanmai mingkan hkyi yu é hui rã matú sheq nhang kat é ru nghut
- ¹⁸ lhê. Yhang lé lumjĩng é sũ gi, mara byĩ é hui rã a nghut; nghut kôlhang, Yhang lé a lumjĩng é sũ kúm gi, Garai Gasang é Yhangzo zote lé a lumjĩng é sũ nghut é yanmai, mara byĩ
- ¹⁹ é huĩ to gũ bê nghut ri. Maubó gi, mingkan htoq mã lé jé to bê; nghut kôlhang, byu pé kut é hkyô gi, agè ashop hkyô nghut é yanmai, yhangmoq gi, maubó lé chyit rã malaĩ, mauchut lé chyit akô nghut ri; haũ gi, mara byĩ é hui rã hkyô yhang
- ²⁰ nghut ri. Agè ashop hkyô kut é sũ ó yuq nghut kôle, maubó lé a nguĩ nghut ri; haũ yuq gi, yhang kut é hkyô lhoq byông htoq kat rã lé gyuq é yanmai, haũ maubó shut lé lô rã a nghut.
- ²¹ Nghut kôlhang, haũ tengmán hkyô dông asak dui é sũ ó yuq le, yhum-sĩng kut é hkyô gi, Garai Gasang lom é hkyô lé, san za byu-myàng sháng

gaq ga, haũ maubó shut lé lo ri.”
gã ri.

**Yesuq Eq Séng Luĩ, Wui-myhup Sará
Yohan Saksé Hkãm É Hkyô**

- ²² Hau htâng mã, Yesuq gi, Yhâng é chángzô pé eq rahá, Yuda mau shut wang ló mù, haũ mã rayoq zo nyĩ
- ²³ luĩ, wui-myhup hkãm byĩ ri. Haũ u lé, Yohan gi, Salim nãm mã é E-nun gã é jowò mã, wuĩ gyai myo joq é yanmai, wui-myhup hkãm byĩ nyi ri; byu pé gi, abyit alan lé lò kômù, wui-myhup lé hkãm yu nyi bum akô
- ²⁴ nghut ri. (Haũ gi, Yohan lé htông a lhoq hkyó shĩ é hkun lhê é hkyô
- ²⁵ nghut ri.) Haũ hkũn, Yohan é chángzô pé ra-am eq Yudaq byù rayuq gi, lhoq san lhoq yúng hking eq séng luĩ, dang htĩng htĩng lhũm bum akô
- ²⁶ nghut ri. Hau htâng, yhangmoq gi, Yohan chyáng lé luĩ, “Rabai ê, Yodan làng hé hpoq shut nàng eq rahá nyĩ luĩ, nàng èq saksé hkãm byĩ é Sũ gi, ahkuĩ, wui-myhup hkãm byĩ nyi é nghut mù, yuq hkangmó gi, Yhâng chyáng e bum akô nghut ri mhaĩ.” ga, yhang lé taĩ akô.
- ²⁷ Haũ eq séng luĩ, Yohan tũ taĩ é gi, “Byù rayuq gi, mauhkung mai byĩ é za a nghut jáng, haĩ le wó hap
- ²⁸ yũ rã a nghut. ‘Ngò gi, Hkrisduq a nghut, Yhang é hí mã nhang kat huĩ é sũ za nghut lhê.’ nguĩ, ngò taĩ é lé, nungmoq yhang saksé nghut bum
- ²⁹ akô. Myisik wó é sũ gi, lusik nghut ri. Lusik lé, lánng yap tô é luzúm hpó gi, lusik é htê lé wó gyô é yanmai, gyai yhang gabú nyi ri. Haũ sũ é gabú hkyô gi, ngá é gabú hkyô nghut mù, ngò mã
- ³⁰ byĩng jup nyĩ bê nghut ri. Yhang gi, kô jat lò ra rã nghut lhê; ngò gi, yom ló ra rã nghut lhê.

- ³¹ Ahtoq mai lé é Sû gi, lhunglhâng é ahtoq má nghut ri; myigùng htoq má é sù kúm gi, myigùng htoq eq sêng é nghut luí, myigùng htoq eq sêng é dông za taí ri; mauhkông mai lé é Sû gi, lhunglhâng é ahtoq má nghut ri.
- ³² Yhang gi, wó myâng wó gyô é hkyô lé, saksé hkám kôlhâng, Yhang hkâm é saksé lé, ó yuq le a hap yù kó nghut ri.
- ³³ Yhâng é saksé lé hap yu é sù kúm gi, haú Garai Gasang gi, tengmán sù nghut ri ga, saksé shit é sù nghut bê.
- ³⁴ Garai Gasâng èq nhang kat é hui Sù gi, Garai Gasâng é mungdang lé taí ri; hkâsu mù gâ le, Garai Gasang gi, haú Woi-nyí lé, laké a kat e za byí é yan-mai nghut ri. Haú Íwa gi, Zo lé chyt-dap luí, jung hkangmó lé Yhâng é loq
- ³⁵ má ap byi bê nghut ri. Haú Zo lé lum-jíng é sù ó yuq nghut kôle, ahtum abyuq é asak wó lhê; nghut kôlhâng, haú Zo lé he-ngik pyâm é sù ó yuq nghut kôle, asak haú lé myàng râ a nghut; hkâsu mù gâ le, Garai Gasâng é nhikmo-yo hkyô gi, yhâng chyáng ru joq nyi ri.” gâ ri.

Yesuq Eq Samariq Myhí Huí É Hkyô

- 4** Yesuq gi, Yohan htoq má, chángzo je lhoq myô é eq wui-myhup hkám byí nyi ri gâ é hkyô lé, haú Hparishe pé wó gyô akô nghut ri.
- ² (Nghut kôlhâng, gè gè ga jáng, Yesuq gi, Yhang wui-myhup hkám byí é a nghut, Yhâng é chángzô pé sheq ru
- ³ nghut akô.) Haú hkyô lé, Yesuq sé jáng, Yhang gi, Yuda mau mai htoq mù, Galile mau shut dum taú ló bê nghut ri.
- ⁴ Ahkuí, Yesuq gi, Samariq mau mai
- ⁵ sô láí ló râ dut bê nghut ri. Haú mù, Yhang gi, Yakup mai yhang zo Yo-

sep lé byí é maumyí rajap eq chyâng lhúm é, Suhka ga myhîng é, Samariq mau má é wà mó ralhum má lo jé ri.

- ⁶ Haú má, Yakup é wuìtung le joq to luí, Yesuq gi, hkyô sô ngu é yanmai, wuìtung hau é nàm má zung gyô tô ri. Haú u gi, nyí-káng raxe í hkyíng^a nghut bê nghut ri.
- ⁷ Haú hkún, Samariq myiwe myhí rayuq wuì lé hkam ri; Yesuq gi, yhang lé, “Ngo lé wuì byi shuq laq.” ga taí ri.
- ⁸ (Haú u gi, Yhâng é chángzô pé, zoshuq wuì râ matú wà hkaú shut e byuq kô é ahkyíng nghut ri.)
- ⁹ Haú Samariq myiwe myhí gi, Yhang lé, “Nàng gi, Yudaq byù rayuq nghut to luí nhîng, ngò Samariq myiwe myhí chyáng, haí mù shuq wuì dúng lhê lhú?” ga taí ri. (Hkâsu mù gâ le, Yudaq byu pé gi, Samariq byu pé eq a zùm yap kó nghut ri.)
- ¹⁰ Haú hkún, Yesuq gi, yhang lé, “Nàng gi, haú Garai Gasâng é chyung-huq lé le, nang lé wuì dung sù ó yuq nghut é lé le, sê é nghut le gi, noq mai Yhang lé dúng tôngbán luí, Yhang gi, nang lé asak-wuì byi berâ nghut lhê.” ga tú taí ri.
- ¹¹ Myiwe myhí haú gi, “Yhumsîng ê, Nàng gi, wuì hkâm râ zè haí le a wó, wuìtung le nik ri; haú asak-wuì lé,
- ¹² Nàng hkâmâ é wó yú râ lhú? Ngamoq é íwa Yakup gi, ngamoq lé wuìtung shí byí to bê nghut lhê; yhang yhang le, yhang zo pé le, yhang rém é dusak pé le, wuìtung shí mâ é wuì shuq bekô nghut ri; Nàng gi, Yakup htoq je kô lhê lhú?” ga Yhang lé taí ri.
- ¹³ Yesuq gi, “Wuì shí lé shuq é sù ó yuq le, wuìshit é dum hui râ nghut
- ¹⁴ lhê. Nghut kôlhâng, Ngò byí é wuì lé shuq é sù ó yuq nghut kôle, wuì-

^a 4:6 Nyí-káng raxe í hkyíng gi, Yudaq byu pé é hkyuq hkyíng nghut ri.

shit é hkâ-nhám a hui lo râ nghut lhê. Ngò byí é wui haû gi, haû yuq má, ahtum abyuq é asak matú wuibúm dut râ nghut lhê.” ga yhang lé tû taí ri.

¹⁵ Myiwe myhí haû gi, Yhang lé, “Yhumsîng ê, ngò gi, wui le a shit lo, shí má wui hkâm le a lé ra lo sháng gaq, wui haû ngo lé byi laq.” ga taí ri.

¹⁶ Haû hkûn, Yesuq gi, “Ló mù, nung làng lé ló wut lò aq.” ga, yhang lé taí ri.

¹⁷ Yhang gi, “Ngò, làng a wó.” ga taí jáng, Yesuq gi, yhang lé, “Nàng, làng a wó gâ é gi, têng ri. Hkâsu mù gâ le, nàng gi, yuqgè ngo yuq wó wú bê sî nghut ri; nàng, ahkuí wó tô é yuqgè le nung làng a nghut. Nàng gi, têng é dang taí bê nghut ri.” ga taí ri.

¹⁹ Haû hkûn, myiwe myhí haû gi, “Yhumsîng ê, Nàng gi, myiqhtoi rayuq nghut é hkyô lé, ngò wú sé bê.

²⁰ Ngamoq é îchyí îwâ pé gi, bùm shí má noqkuq kô é nghut lhê; nghut kôlhang, nungmoq Yudaq byu pé gi, Yerusalem wà mó za noqkuq jowò nghut lhê ga taí akô nghut ri.” ga taí ri.

²¹ Haû hkûn, Yesuq taí é gi, “Myiwe myhí ê, Ngo lé jíng aq; bùm shí má le a nghut, Yerusalem wà mó má le a nghut e za, haû Îwa lé noqkuq râ

²² ahkyíng, jé lò nyí bê nghut ri. Nungmoq Samariq byu pé gi, yhumsîng lhang a sê é lé, noqkuq akô; ngamoq kúm gi, ngamoq sê é lé noqkuq lhê; hkâsu mù gâ le, hkyi yù hkyô gi, Yudaq amyû mai lo é nghut lhê.^a Nghut

²³ kôlhang, haû têng é đông noqkuq é bang gi, woi-nyí mai le, tengmán hkyô mai le, haû Îwa lé noqkuq râ ahkyíng gi, jé lo nyí bê nghut luí, ahkuí lhang jé to bê nghut ri; hkâsu mù gâ le,

haû Îwa gi, haû su kut noqkuq é bang
²⁴ lé ô nau ri. Garai Gasang gi, woi-nyí nghut lhê; haû mù, Yhang lé noqkuq é bang gi, woi-nyí mai le, tengmán hkyô mai le, noqkuq ra râ nghut lhê.” ga taí ri.

²⁵ Myiwe myhí haû gi, “Hkrisduq gâ é Mesaia jé lé râ nghut é lé gi, ngò sê lhê. Yhang jé lé jáng, nga-nhúng lé banshoq taí sân kyo râ nghut lhê.” ga taí ri.

²⁶ Hau htâng, Yesuq gi, “Nàng eq dang nyo nyi é sù ngò gi, haû yuq nghut lhê.” ga taí ri.

Haû Chángzô Pé Dum Taû Jé Lo É Hkûn Lhê Hkyô

²⁷ Haû u lé, Yhâng é chángzô pé gi, dum taû jé lo bum akô; yhangmoq gi, Yesuq, myiwe rayuq eq dáng nyo nyi é lé lo myàng luí, maú byuq bum akô. Nghut kôlhang, “Nàng, haí ô ri lú?” ga le, “Haí mù Yhang eq dáng nyo nyi lhê lú?” ga le, Yhang lé ó yuq a myi kó nghut ri.

²⁸ Hau htâng, myiwe myhí haû gi, yhâng é wui yambú lé tô pyâm to luí, wà shut taû wang ló mù, wà byù
²⁹ wui lé ló taí kyô é gi, “Ngò kut laí lò bê hkyô pé lhunglhang lé, taí kyô é byù rayuq lé, lé wú keq! Yhang gi,
³⁰ Hkrisduq nghut lhê abe?” gâ ri. Haû mù, yhangmoq gi, wà mai htoq lé luí, Yesuq chyáng lé lo bum akô nghut ri.

³¹ Haû u lé, Yhâng é chángzô pé gi, Yhang lé, “Rabai ê, zoshuq zo aq.” ga chôm taí akô.

³² Haû hkûn, Yhang gi, yhangmoq lé, “Nungmoq a sê é jung zoshuq zo râ Ngò wó lhê.” ga tû taí ri.

³³ Haû mù, Yhâng é chángzô pé gi, “Yhang lé, rayuq yuq èq zoshuq lé dé

^a 4:22 Bun zo shí má, Yesuq taí nau é gi, hkyi yù hkyô lé, Garai Gasang gi, Yudaq byu pé đông danggidiq byi to é nghut é lé taí nau é nghut ri.

byí é abe?” ga, rayuq eq rayuq taí lhûm bum akô.

- ³⁴ Haú hkûn, Yesuq taí é gi, “Ngo lé nhang kat Sû ô nau é hkyô lé kut râ eq Yhâng é muzó jizó lé lhoq pán râ hkyô
- ³⁵ gi, Ngá é zoshuq nghut bê. ‘Kyôshu yoq jé râ gi, lhamó myi hkyap râ ashî.’ ga, nungmoq lhaq taí lhê a nghut kó lhú? Ngò, nungmoq lé taí kôlé, nungmoq é myoq hpóng luí, haú yò pé má wú kat wú keq! Kyôshi gi, myhíng luí,
- ³⁶ kyô shu yoq gi, jé to bê nghut ri. Haú kyô hkyô sù eq kyô shu sù gi, rahá wó gabú kó sháng gaq ga, ahkuí lháng, haú kyô shu sù gi, yhâng é zuihpau lé myang yù luí, ahtum abyuq é asak é matú, kyôshi shù tsíng to bê nghut ri.
- ³⁷ Haú su mù, ‘Rayuq gi, sân hkyó, gó-yuq gi, shù yù.’ gâ é sanghkyang gi,
- ³⁸ têng ri. Nungmoq a zui saí tô é jang mâ é shù yù râ matú, nungmoq lé Ngò nhang kat bê nghut lhê. Góbang gi, haú má wum kat zui saí to bê nghut mù, nungmoq gi, haú bang zui saí é akyú lé shu yù bekô nghut ri.” gâ ri.

**Samariq Byù Myo Myo
Lumjíng Kô É Hkyô**

- ³⁹ “Yhang gi, ngò kut lai lò bê hkyô lhunglháng lé, taí kyô ri.” ga luí, myiwe myhí haú saksé hkâm é yanmai, haú wâ mâ é Samariq byù myo myo gi, Yesuq lé lumjíng bùm bekô
- ⁴⁰ nghut ri. Haú mù, Samariq byu pé gi, Yesuq chyáng lé jé kômù, yhangmoq eq nyí râ matú, Yhang lé lung kô é yanmai, Yhang gi, í nyí bo nyí bê
- ⁴¹ nghut ri. Yhâng é dang pê é yanmai, byù myo myo gi, lumjíng bang dut jat lò bekô nghut ri.
- ⁴² Yhangmoq gi, myiwe myhí haú lé, “Ahkuí, ngamoq lumjíng é gi, nàng taí é dang yanmai za a nghut lo; ngamoq yhang wó gyo bê nghut é htoq agó, shí

yuq gi, gè gè yhang, mingkan é hkyi yù Sû nghut é lé, ngamoq sé bê nghut é yanmai nghut lhê.” ga chôm taí akô nghut ri.

**Mingsuwún Hpó É Yhangzo Lé
Lhoq Gê Byí É Hkyô**

Mht 8:5-13; Luk 7:1-10

- ⁴³ Í nyí lai jáng, Yesuq gi, haú mai Galile mau shut htoq e ló bê nghut ri.
- ⁴⁴ “Myiqhtoi gi, yhumsing é mau má myoqdong a wó wú é nghut lhê.” ga, Yesuq yhang saksé hkâm é nghut lhê.
- ⁴⁵ Yesuq gi, Galile mau má jé é hkûn, Galile byu pé gi, Yhang lé lhom hku-lum yu akô; yhangmoq gi, Yerusalem wà mó má, Lhoqlhai Poí ê lòm kô é nghut é yanmai, poí u lé, Yesuq kut é hkyô lhunglháng lé, myàng kô é bang nghut ri.
- ⁴⁶ Yesuq gi, Yhang mai haú wui lé tsi-biyiq wing dut nhang é, Galile mau mâ é Hkanaq wà mó má, ê dum kûm ri. Haú ming suwún rayuq é yhangzo yuqzo gi, Kaperna-um wà má
- ⁴⁷ no nyi ri. Yesuq gi, Yuda mau mai Galile mau má jé lé bê gâ é hkyô lé, ming suwún haú wó gyo jáng, yhang gi, Yesuq chyáng ê mù, shí-nò no nyi é yhangzo lé, lé lhoq gê byi râ matú, Yhang lé dúng tôngbán ri.
- ⁴⁸ Haú hkûn, Yesuq gi, yhang lé, “Byù nungmoq gi, limik kumlhá pé eq mau-hpo muzó pé lé za a myàng kô é nghut le gi, hkâ-nhám lé lumjíng kó râ a nghut.” ga taí ri.
- ⁴⁹ Mingsuwún haú gi, “Yhumsíng ê, ngá zo a shí shimá gyó lé laq.” ga taí ri.
- ⁵⁰ Haú hkûn, Yesuq gi, “Nàng wó ló bê; nung zo byùn râ nghut lhê.” ga tú taí ri.
- Suwún haú gi, Yesuq taí é dang haú lé gyô jíng luí, tau ló bê nghut ri.

- ⁵¹ Yhang gi, hkyô má ru nghut nyi ashî hkûn, yhâng é dui-nhâng zoshâng wui gi, yhang lé lé hui luî, zoshâng haû gè byuq é hkyô, lé taî kyô akô nghut ri.
- ⁵² Yhang gi, yhang zo hkâ-nhâm gè byuq é ahkyíng lé myi wú é hkûn, yhang-moq gi, “A-nyí nap nyí hkyuí rahkyíng má, gùng nyé é chàm ló byuq bê nghut ri.” ga taî kyô akô.
- ⁵³ Haû hkûn, ahkyíng haû gi, “Nung zo byùn râ nghut lhê.” ga, yhang lé, Yesuq taî é ahkyíng nghut é lé, haû yhângwa bûn sé bê nghut ri. Haû mù, yhang eq yhâng yhumbyù banshoq bang gi, lumjíng bekô nghut ri.
- ⁵⁴ Haû gi, Yesuq, Yuda mau mai Galile mau má lé jé é htâng, í dâm nghû râ dá kut shit é limik kumlhá nghut ri.

**Wuihtum Yàm Má, Nòhpyo
Lhoq Gê Byí É Hkyô**

- 5** Hau htâng a myáng má, Yudaq byu pê é poî ralhum joq é yan-mai, Yesuq gi, Yerusalem wà mó má ² doq ló ri. Ahkuî, haû Yerusalem wà mó é Sau Hkúmdong nàm má, Hebre myíng dông gi, Betzahta ga myhîng é wuihtum ralhum joq ri; hau é lhîng-hkyuq má, jiropp ngo lhum joq tô ri.
- ³ Jirop haû pé má, myoqjit bang, hkyî hten bang, gùngjum shî bang ajùm ayò leq tô bum akô. (Haû bang gi, wui dui nún râ lé lág tô é bang nghut ⁴ akô. Hkâsu mù gà le, haû Yhumsing é maumang lagyo gyó lé lé kut mù, wui lé, lé lhu nhún jáng, wuihtum haû má hí wó wang é sù gi, haî jung ana wa dap to kôlhâng, ge byuq é huî é ⁵ yanmai nghut ri.)^a Súm xe shit zân tup no nyi é byù rayuq le, haû má bo ⁶ tô ri. Yesuq gi, haû yuq no leq tô é lé myàng mù, haû su no nyi é gyai

myáng bê nghut é hkyô lé sé jáng, yhang lé, “Nàng, gè nau ri lú?” ga myî ri.

- ⁷ Nò sù haû yuq gi, “Yhumsîng ê, wui dui nún lo é hkûn, wuihtum má wàng râ matú, ngo lé garúm râ byù ó a nyi; ngò wàng râ nghû jáng, góyuq hí, ngá hí má wàng wàng dut ri.” ga tû taî ri.
- ⁸ Hau htâng, Yesuq gi, yhang lé, “Toq aq! Nàng é taphkang yu chûng luî, sô ⁹ ló aq.” ga taî ri. Haû yuq gi, radá dâm nò ge byuq bê nghut luî, yhâng é taphkang yù mù, sô ló bê nghut ri.
- Haû nyí gi, Bánno buinyì nghut ri.
- ¹⁰ Haû mù, Yudaq byu pé gi, haû nò ge byuq é hui sù lé, “Hkû-nyí gi, Bánno buinyì nyí nghut é yanmai, nàng, taphkang waq é gi, tarâ lu lai bê nghut ri.” ga taî akô.

- ¹¹ Nghut kôlhâng, yhang tû taî é gi, “Haû ngo lé lhoq gê byi sù gi, ngo lé, ‘Nàng é taphkang yu chûng mù, sô ló aq.’ ga taî é nghut lhê.” gâ ri.
- ¹² Haû mù, yhangmoq gi, “‘Nàng é taphkang yu chûng mù sô ló aq.’ ga, nang lé taî é sù gi, ó yuq wá nghut ri lú?” ga myî akô.
- ¹³ Nghut kôlhâng, haû ó yuq nghut é lé, nò ge byuq é hui sù gi, a châng sê kat nghut ri; hkâsu mù gà le, Yesuq gi, haû mâ é byù moq mó má wang nyó ló byuq é yanmai nghut ri.
- ¹⁴ Htâng má, Yesuq gi, haû yuq lé noqkuq yhûm má myàng jáng, “Wú aq, nàng wángzán bê nghut ri; hí lhê htoq má je wuîhke é hkyô a hui zo sháng gaq, mara hkâkut shut lo.” ga ¹⁵ luî, yhang lé taî ri. Haû yuq gi, htoq ló mù, yhang lé lhoq gê byí é sù gi, Yesuq nghut ri ga, Yudaq byu pé lé taî kyô ri.

^a 5:4 Bun zo 3 lhum mâ é ahtang túm eq bun zo 4 lhum gi, chýúmding myo myo má a bo é nghut lhê.

Asak Wó Yú Râ Hkyô

- ¹⁶ Haû mù, Yudaq byu pé gi, Bánno buinyì nyí má, Yesuq, haû hkyô kut é yanmai, Yhang lé gunjang lo akô nghut ri. Haû hkûn, Yesuq gi, yhangmoq lé, “Ngá Wa gi, hkû-nyí jé shoq, hkâ-nhám le mù zuí nyi é nghut mù, Ngò le mù zuí nyi lhê.” ga taí ri.
- ¹⁷ Haû mù luí, Yesuq gi, Bánno buinyì lé lhoq htên é htoq agó, Garai Gasang lé lháng, Yhâng Wa ga wut é dông, yhumsing gùng lé, Garai Gasang eq lhoq whuí é yanmai, Yudaq byu pé gi, Yhang lé sat pyám râ matú, je riyhang shikut lo akô nghut ri.
- ¹⁸ Yesuq, yhangmoq lé tû taí é gi, “Ngò, nungmoq lé teng za taí kôlé, haû Zo gi, yhumsing é myit dông haí le a wó kut; Yhâng Wa kut é hkyô lé myang é gù za wó kut é nghut lhê; hkâsu mù gà le, haû Íwa kut é hkyô lé za, haû Zo châng kut é yanmai nghut lhê. Hkâsu mù gà le, haû Íwa gi, Zo lé chyitdap é nghut luí, Yhang kut é hkyô lhunglháng, haû Zo lé tûn shit ri; nungmoq maú hông shoq, shí pé htoq je ko é hkyô pé lé lháng, haû Zo lé tûn shit shirâ nghut
- ²⁰ lhê. Haû Íwa gi, shí bê bang lé lhoq dui toq mù, yhangmoq lé asak byí é eq rajung za, haû Zo le, Yhang byí nau é bang lé, asak byi râ nghut lhê.
- ²¹ Hau htoq agó, haû Íwa lé hkunggâ é eq rajung za, haû Zo lé le, lhunglhâng bang hkungga kó sháng gaq ga, haû Íwa gi, ó yuq lé le a jéyáng e za, jéyáng é hkyô lhunglháng, haû Zo
- ²² lé lum to bê nghut ri. Haû Zo lé a hkunggâ é sù gi, haû Yhang lé nhang kat é sù Íwa lé le, a hkunggâ é sù nghut ri.
- ²³ Ngò, nungmoq lé teng za taí kôlé, Ngá dang lé gyo luí, Ngo lé nhang

- kat é Sù lé lumjíng é sù, ó yuq nghut kôle, mara byí é a hui e za, ahtum abyuq é asak wó é nghut lhê; haû yuq gi, shi é mai lut luí, asak dui bê sù
- ²⁴ nghut ri. Ngò, nungmoq lé teng za taí kôlé, haû Garai Gasâng é Yhangzô é htê lé, shi byuq bê bang wó gyo râ ahkyíng gi, jé lo nyi bê nghut ri; ahkuí lháng jé to bê nghut ri. Htê haû lé gyô é bang gi, asak dui kó râ
- ²⁵ nghut lhê. Hkâsu mù gà le, Garai Gasang gi, Yhânggùng má yhang, asak bo é eq rajung za, Yhang Zo lé le, Yhânggùng má yhang, asak bò nhang
- ²⁶ é yanmai nghut ri. Hau htoq agó, Yhang gi, haû Byu Yhangzo nghut é yanmai, Garai Gasang gi, tarâ jéyáng râ ahko ahkáng, Yhang lé byi bê
- ²⁷ nghut ri.
- ²⁸ Shí hkyô lé hkâ-maú hong nyi kó: lup pé má lúng tô é bang banshoq gi, Yhâng é htê lé wó gyo kôluí, htoq ló râ
- ²⁹ ahkyíng jé lò râ nghut lhê. Ge é hkyô kut é bang gi, asak dui râ matú, dui toq kó râ nghut lhê; agè ashop hkyô kut é bang gi, mara byí é hui zo râ
- ³⁰ matú, dui toq kó râ nghut lhê. Ngò gi, Ngá myit dông mai haí le a wó kut é nghut lhê; Ngò wó gyô yu é eq rajung za sheq, jéyáng é nghut luí, Ngò jéyáng é hkyô gi, tengmán lhê; hkâsu mù gà le, Ngò gi, Ngò ô nau é dông châng é a nghut e za, Ngo lé nhang kat é Sù ô nau é dông châng é sheq ru
- ³¹ nghut lhê.
- Yesuq Eq Séng Luí, Saksé Hkâm É Hkyô**
- ³¹ Ngá gûng lé ngò saksé hkâm é nghut jáng, ngò za saksé hkâm é hkyô gi,
- ³² teng râ a nghut. Ngá é hkyô lé saksé hkâm byí é Sù (Ngá Wa) góyuq nyi lhê; Ngò eq séng luí, haû yuq hkâm é saksé gi, têng é hkyô lé, Ngò sê lhê.

³³ Nungmoq gi, Yohan^a chyáng byù nhang kat wú bekô nghut ri; yhang gi, haù tengmán hkyô lé saksé hkám

³⁴ byi bê nghut lhê. Ngò gi, xângzo byu pé mai saksé hkám byi râ lé, ra luí a nghut, nghut kôlhang, nungmoq hkyi yu é wó hui râ matú sheq, haù su nghú

³⁵ taí é ru nghut lhê. Yohan gi, duq nyi é myibung su duqbó byí é nghut mù luí, nungmoq gi, haù duqbó é hkaù má, rayoq zo ngón nau nyi akô nghut ri.

³⁶ Nghut kôlhang, Ngò wó é saksé gi, Yohan byí é saksé htoq je kô lhê; hkâsu mù gâ le, ahkuí Ngò zui saí nyi é muzó gi, Ngò lhoq pán râ matú, haù Íwa, Ngo lé ap byí tô é nghut luí, haù Íwa, Ngo lé nhang kat é hkyô

³⁷ lé, saksé hkám byí nyi ri. Hau htoq agó, haù Ngo lé nhang kat é sù Íwa le, Ngò eq séng luí saksé hkám byí ri; nungmoq gi, Yhâng é htê lé le, a wó gyô wú kó; Yhâng é gunghkyâng

³⁸ lé le, a myang wú kó; haù Yhâng é mungdang le, nungmoq chyáng a bò kó nghut ri; hkâsu mù gâ le, nungmoq gi, Yhang nhang kat é Sù lé a lumjín

³⁹ g kô é yanmai nghut ri. Nungmoq gi, haù Chyúmdang mai ahtum abyuq é asak wó yú râ nghut lhê ga myit yù kô é yanmai, haù Chyúmdang má ho wú akô nghut ri; nghut kôlhang, Chyúmdang haù gi, Ngò eq séng luí saksé

⁴⁰ hkám byí ri; nghut kôlhang, asak wó yú râ matú, nungmoq gi, Ngá chyáng a kâm lé kó nghut ri.

⁴¹ Ngò gi, byu èq hkya-ôn é lé a lhom

⁴² yu é nghut lhê. Nghut kôlhang, nungmoq lé gi, Ngò sê lhê; nungmoq é i-myt hkaù má, Garai Gasang lé chyt-dap é myit a bò kó nghut ri. Ngò gi,

⁴³ Ngá Wá é myìng mai jé lé é sù nghut kôlhang, nungmoq gi, Ngo lé a lhom

hap yù kó; yhâng myìng yhang lang é byù, gotù rayuq jé lé é ru nghut le gi, haù yuq lé, nungmoq lhom hap yù

⁴⁴ kó râ nghut lhê. Nungmoq gi, rayuq eq rayuq hkya-ôn lhùm é lé za hap yù luí, rayuq za nghut é Garai Gasâng chyáng mai lo é hkya-ôn lé gi, a hô kô é bang nhîng, hkâsu kut wó lumjín g kó râ lhú?

⁴⁵ Nghut kôlhang, haù Íwâ é hí má, Ngò, nungmoq lé mara hûn nhô hkâ-ngâm kó; nungmoq lé mara hun é sù gi, haù nungmoq mai myit myoq-

⁴⁶ byu tô é Mosheq ru nghut lhê. Mosheq lé nungmoq gè gè yhang lumjín g kô é ru nghut le gi, Ngo lé le lumjín g kó râ nghut lhê; hkâsu mù gâ le, Mosheq gi, Ngá é hkyô lé kâ tô é sù nghut ri.

⁴⁷ Nghut kôlhang, nungmoq gi, yhang kâ tô é pé lé lháng a lumjín g kô é nhîng, Ngá dang lé, hkâsu kut wó lumjín g kó râ lhú?” gâ ri.

**Byù Ngo Hkyîng Lé
Zoshuq Byi Tsô É Hkyô**

Mht 14:13-21; Mrk 6:30-44; Luk 9:10-17

6 Hau htâng a myáng má, Yesuq gi, Tiberi nhông le gâ é, Galile nhông he hpoq shut gú dap ló bê nghut ri.

² Haù hkún, byù ajùm ayò gi, haù nò bâng htoq má, Yhang kut shit é li-mik kumlhá pé lé myàng kô é yanmai, Yhang htâng châng e ló bum akô

³ nghut ri. Yesuq gi, bùm shut doq ló mù, Yhâng é chángzô pé eq rahá zung

⁴ tô ri. Yudaq byu pé é Lhoqlhai Poí gi, chyâng lo nyi bê nghut ri.

⁵ Yesuq gi, tu wú kat le, byù ajùm ayò Yhâng shut lé lo bùm kô é lé byu-myang kat luí, Hpilip lé, “Shí bang zo râ muk, nga-nhúng, hkâmá

⁶ ê wó wuí râ lhú?” ga taí ri. Yesuq,

^a 5:33 Yohan shí yuq gi, Wui-myhup Sará Yohan nghut lhê.

haû su ga taí é gi, yhang lé chyam wú râ matú za nghut ri; hkâsu mù gà le, hkâsu kut râ hkyô gi, Yhâng é myit má bo to gù bê nghut ri.

- 7 Hpilip gi, Yhang lé, “Denari^a í sho èq muk wui le lháng, rayuq ratsuí tsuí ngap râ a nghut.” ga tû taí ri.
- 8 Haú hkûn, Yhâng é chángzo nghut é, Simun Petruq é yhanggu Andre gi,
- 9 Yhang lé, “Muk-yo muk ngo long eq ngozo í du wó é yuqgè zo rayuq, shí má nyi ri; nghut kôlhang, byù shí myhô bang lé luq shoq, hkâsu kut wó gâm byi râ lhu?” ga taí htoq kat ri.
- 10 Yesuq gi, “Haû shiwa byu pé lé, zùng nhâng keq.” ga taí ri. Jowò haû gi, mhán htu é jang nghut mù, yuqgè wui baú lháng, ngo hkyîng kô zung tô
- 11 bùm bekô nghut ri; hau htâng, Yesuq gi, muk long pé lé yù mù, jeju hkya-on luí, zung tô é bang lé, yhangmoq o é myhó tsing gàm byí ri. Haû eq rajung za, ngozo lé le haû su kut ri.
- 12 Yhangmoq banshoq bang zô gyí bùm kô é htâng má Yhang gi, Yhâng é chángzô pé lé, “Myit gyó tô é ajap azo pé lé châng guq tsîng yù keq. Haí le a langsa pyám sháng gaq.” ga taí ri.
- 13 Haû mù, yhangmoq gi, zô myhit tô é muk-yo muk ngo long má é ajap azo pé lé châng guq tsîng le, raxe í mung byíng shoq wó guq tsîng yu akô nghut ri.
- 14 Haû shiwa byu pé gi, Yesuq kut é limik kumhá lé myàng kô é hkûn, “Shí yuq gi, mingkan htoq má jé lé lô râ gà é, Myiqhtoi yhang nghut ri-nhung!”
- 15 ga taí bum akô. Yesuq gi, yhangmoq lé mù, Yhang lé hkohkâm zik kut nhâng kó râ dá é hkyô lé, sê é yanmai, Yhang baú tsik za bùm shut dum haq doq lô bê nghut ri.

Yesuq, Wui Htoq Má Sô É Hkyô

Mht 14:22-27; Mrk 6:45-52

- 16 Buigyum htâng, Yhâng é chángzô pé gi, haû nhông shut gyó lô mù,
- 17 lhaí má wang ji luí, nhông hé hpoq má é Kaperna-um wà shut gù e lô akô; haú hkûn, mauchut bê nghut kôlhang, Yesuq gi, yhangmoq chyáng a
- 18 jé gyó lo shi nghut ri. Haú u lé, laidun htan lo é yanmai, wuilhêng toq lô bê
- 19 nghut ri. Yhangmoq gi, sum myi déng kô lhaí kôn e lô kô é hkûn, Yesuq gi, nhông htoq má so luí, haû lhaí shut chyâng lé lo nyi é lé myàng kômù,
- 20 gyuq dan bùm bekô nghut ri. Nghut kôlhang, Yesuq gi, “Hkâgyuq kó, Ngò ru nghut lhê.” ga yhangmoq lé taí ri.
- 21 Haû mù, yhangmoq gi, Yesuq lé gabú myit èq lhaí hkaú má shuí hâng yù nau akô. Haú hkûn, lhaí haû gi, radá dâm yhangmoq jé nau é jang wuiyàm má jé bê nghut ri.
- 22 Nhông hé hpoq má nyi tô é byù moq mó gi, haú má lhaí racham za joq laí lo é hkyô eq, lhaí haú má Yesuq a bo doq jí e za, chángzô pé baú ji htoq lô kô é hkyô lé, hau htang nyí, bûn sê kat akô
- 23 nghut ri. Haú hkûn, haû Yhumsîng, jeju hkya-on é htâng, byu pé muk zô é jowò nàm má, Tiberi myuq má é lhaí
- 24 pé jé lé bum ri. Haû byù moq mó gi, Yesuq eq Yhâng é chángzô pé, haú má a nyi lo kô é hkyô lé sé kô é yanmai, Yesuq lé châng hô râ matú lhaí haú pé má wang ji mù, Kaperna-um wà shut e lô akô nghut ri.

Yesuq, Asak Muk Nghut É Hkyô

- 25 Yhangmoq gi, nhông hé hpoq má Yesuq lé myàng kôjáng, “Rabai ê, Nàng gi, shí má hkâ-nhám jé lé é lhu?” ga, Yhang lé myí akô.

^a 6:7 Denari rachap gi, byù rayuq é ra-nyí é zuihpau eq wuí é nghut lhê.

- ²⁶ Haú hkûn, Yesuq gi, “Ngò, nungmoq lé teng za taí kôlé, nungmoq gi, limik kumlhá pé lé myàng kô é yanmai, Ngo lé hô kô é a nghut, muk gyi shoq myàng zo kô é yanmai sheq, hô
- ²⁷ kô é ru nghut lhê. Htên byuq sê é zoshuq é matú, hkâshikut kó; haú Byu Yhangzo byi râ nghut é ahtum abyuq é asak é matú, ru gîng nyi é zoshuq wó yû râ lé sheq shikut nyi keq. Yhâng chyáng gi, haú Îwa Garai Gasang mai Yhâng é saksé dizik tap to bê nghut lhê.” ga tû taí ri.
- ²⁸ Haú mù, yhangmoq gi, “Garai Gasang ô nau é muzó pé zui saí râ matú, ngamoq haí kut ra râ lú?” ga Yhang lé myî akô.
- ²⁹ Haú hkûn, Yesuq gi, “Garai Gasang nhang kat é Sû lé, lumjîng é gi, Garai Gasang ô nau é muzó nghut bê.” ga tû taí ri.
- ³⁰ Haú mù luí, yhangmoq gi, Yhang lé, “Ngamoq myoq èq wó myâng luí, Nàng lé lumjîng râ matú, Nàng, haí jung limik kumlhá kut shit râ lú?”
- ³¹ Nàng, haí jung kut shit râ lú? Haú Chyúmdang má, ‘Yhang gi, yhangmoq zo râ matú, mauhkûng mai muk byî ri.’^a ga kâ tô é eq rajung za, ngamoq é îchyí îwa pé gi, haú yoso hkaú má mannaq muk zo bekô nghut lhê.” ga taí akô.
- ³² Haú hkûn, Yesuq gi, yhangmoq lé, “Ngò, nungmoq lé teng za taí kôlé, nungmoq lé mauhkûng mai muk byî é Sû gi, Mosheq a nghut, haú Ngá Wa sheq, nungmoq lé mauhkûng mai tengmán é muk byî é Sû ru nghut lhê.
- ³³ Hkâsu mù gâ le, Garai Gasang byî é muk gi, mauhkûng mai gyó lé luí, haú mingkan lé asak byî é Sû nghut lhê.” ga taí ri.
- ³⁴ Yhangmoq gi, “Yhumsîng ê, ahkuí mai, ngamoq lé muk haú hkâ-nhám le byî nyi laq.” ga chôm taí bum akô.
- ³⁵ Haú mù, Yesuq taí kyô é gi, “Ngò gi, asak muk nghut lhê. Ngá chyáng lé é sû gi, hkâ-nhám le zòmút é hui râ a nghut; Ngo lé lumjîng é sû le, hkâ-nhám le wuîshit é hui râ a nghut.
- ³⁶ Nghut kôlhang, Ngò, nungmoq lé taí wú bê eq rajung za, nungmoq gi, Ngo lé myang wú é nghut kôlhang, a lumjîng shi kó nghut ri. Haú Îwa mai Ngo lé ap byî tô é byu lunglhang bang gi, Ngá chyáng lé kó râ nghut luí, Ngá chyáng lé é sû ó yuq lé le, Ngò gi, hkâ-nhám lé hkat htoq pyám râ a nghut. Hkâsu mù gâ le, Ngò, mauhkûng mai gyó lé é gi, Ngò ô nau é hkyô lé kut râ matú a nghut e za, Ngo lé nhang kat Sû ô nau é hkyô lé kut râ matú ru nghut lhê. Haú Ngo lé nhang kat Sû ô nau é hkyô gi, Yhang mai Ngo lé ap byî tô é bang mâ é rayuq lé lhang, Ngò, a lhoq hpyuq pyâm e za, jihtûm buinyi má yhangmoq lé dum lhoq dui toq yû râ matú ru nghut lhê.
- ⁴⁰ Hkâsu mù gâ le, Ngá Wa ô nau é hkyô gi, haú Zo lé wú mù, Yhang lé lumjîng é sû yuq hkangmó, ahtum abyuq é asak lé wó yû râ matú nghut lhê; Ngò le, jihtûm buinyi má haú bang lé lhoq dui toq râ nghut lhê.” gâ ri.
- ⁴¹ Haú mù, “Ngò gi, mauhkûng mai gyó lé é muk nghut lhê.” ga, Yesuq taí é yanmai, Yhang eq séng luí, Yudaq
- ⁴² byu pé taí put kô é gi, “Shí yuq gi, Yosep é yhangzo Yesuq a nghut lhi? Yhâng nu Yhâng wa lé, nga-nhúng sê lhê a nghut kó lú? Haú sû é nhîng, ahkuí, ‘Ngò gi, mauhkûng mai gyó lé é nghut lhê.’ ga, Yhang hkâsu kut wó taí lhê lú?” gâ bum akô.

^a 6:31 Htoq Lô 16:4

⁴³ Haú hkûn, Yesuq gi, “Nungmoq
⁴⁴ ahkaû má hkâtaî put nyî kó. Haú Ngo
 lé nhang kat é sù Íwa mai shuí jé é sù
 za a nghut jáng, ó yuq le Ngá chyáng
 wó jé lé rá a nghut; jé lé é sù lé gi,
 jihtûm buinyî má, Ngò lhoq dui toq
⁴⁵ rá nghut lhê. Myiqhtoi laiká pé má,
 ‘Yhangmoq lhunglhâng bang gi, Ga-
 rai Gasâng èq mhoq byî é hui kó rá
 nghut lhê.’^a ga kâ tô é eq rajung za,
 haú Íwâ chyáng mai gyo yù, mhoq yu
 é bang yuq hkaungmó gi, Ngá chyáng
⁴⁶ lé kó rá nghut lhê. Haú gi, rayuq yuq
 mai, haú Íwa lé myang wú bê nghû
 nau é a nghut; Garai Gasâng chyáng
 mâ é Sù za sheq, haú Íwa lé myang
⁴⁷ wú é Sù nghut lhê. Ngò, nungmoq lé
 teng za taí kôlé, lumjîng é sù gi, ahtum
⁴⁸ abyuq é asak wó lhê. Ngò gi, asak muk
⁴⁹ nghut lhê. Nungmoq é îchyí îwâ pé
 gi, haú yoso hkaû má mannaq muk zo
 bekô nghut lhê; nghut kôle, shi byuq
⁵⁰ bekô nghut ri. Nghut kôlhâng, shî gi,
 mauhkûng mai gyó lé lo é muk nghut
 lhê; haú lé zô é sù gi, a shî lo rá nghut
⁵¹ lhê. Ngò gi, mauhkûng mai gyó lé lo é,
 haú asak dui é muk nghut lhê; rayuq
 yuq, muk shî lé zô é nghut le gi, ahtum
 abyuq dui nyî rá nghut lhê; muk shî gi,
 mingkan zô wui é asak matú, Ngò byi
 rá nghut é Ngá gungsho nghut lhê.”
 ga tû taî ri.
⁵² Haú mù, haú Yudaq byu pé gi, “Byù
 shí yuq gi, nga-nhúng lé, Yhâng é
 gungsho hkâsu kut wó byi tso rá lhú?”
 ga, yhangmoq yhangchang dang htíng
 htíng lhûm bum akô.
⁵³ Haú hkûn, Yesuq gi, yhangmoq lé,
 “Ngò, nungmoq lé teng za taí kôlé,
 haú Byu Yhangzô é gungsho lé zô é eq
 Yhâng é sui lé shuq e za a nghut le gi,
⁵⁴ nungmoq asak wó kó rá a nghut. Ngá
 é gungsho lé zô é eq Ngá é sui lé shuq

é sù, ó yuq nghut kôle, ahtum abyuq
 é asak wó é nghut lhê; Ngò gi, jihtûm
 buinyî má, haú yuq lé lhoq dui toq yù
⁵⁵ rá nghut lhê. Hkâsu mù gâ le, Ngá é
 gungsho gi, zojung yhang nghut lhê;
 Ngá é sui gi, shuqjung yhang nghut
⁵⁶ lhê. Ngá é gungsho lé zô é eq Ngá é
 sui shuq é sù, ó yuq nghut kôle, Ngò
 má nghut nyî luí, Ngò le haú yuq má
⁵⁷ nghut nyî bê nghut lhê. Haú rû dui
 nyi é Íwa gi, Ngo lé nhang kat luí,
 Ngò gi, haú Íwâ é yanmai, dui nyi é
 eq rajung za, Ngá é gungsho lé zô é
 sù gi, Ngá é yanmai, dui nyi rá nghut
⁵⁸ lhê. Shî gi, mauhkûng mai gyó lé lo é
 muk nghut lhê. Nungmoq é îchyí îwâ
 pé gi, mannaq muk zo kôle, shi byuq
 bekô nghut ri; nghut kôlhâng, muk shî
 lé zô é sù gi, ahtum abyuq dui nyî rá
⁵⁹ nghut lhê.” ga taî ri. Dang haú pé gi,
 Yesuq, Kaperna-um wà mâ é tarajong
 má mhoqshit nyi é u lé, taí é dang
 nghut ri.

**Chángzô Pé Myo Myo, Yesuq Lé
Kâng Pyâm To Kô É Hkyô**

⁶⁰ Yhâng é chángzô pé myo myo gi,
 haú lé wó gyo kôjáng, “Dang shî gi,
 gyai wuí ri. Ó yuq wá wó cháng rá
 lhú?” ga taí bum akô.
⁶¹ Yesuq gi, haú eq séng luí, Yhâng é
 chángzô pé taî put nyi bùm kô é lé
 Yhâng é myit má sé luí, yhangmoq lé,
 “Dang shi é yanmai, nungmoq myit
⁶² htên bum akô lhú? Haú Byu Yhangzo
 gi, Yhang nyi laí lò bê jowò shut taú
 doq ló é lé, nungmoq myàng kô é
⁶³ nghut le gi, hkâsu nghû kó rá lhú? Haú
 Woi-nyí gi, asak byî lhê; gungsho kúm
 gi, haí le a wó dut nghut ri. Nungmoq
 lé, Ngò taí é dang pé gi, Woi-nyí le
⁶⁴ nghut lhê, asak le nghut lhê. Nghut
 kôle, nungmoq chyáng mâ é ra-am gi,

^a 6:45 Esai 54:13

a lumj́ing kó nghut ri.” ga taí ri. Hkâsu mù gà le, ô pé gi, a lumj́ing kó râ eq, ó yuq gi, Yhang lé ap pyám râ nghut é hkyô lé, Yesuq gi, sâng-hi mai sê to gù

⁶⁵ bê nghut ri. Yhang xoq taí é gi, “Haú su mù, haú Íwâ èq ahkáng byí é sù za a nghut le gi, ó yuq le Ngá chyáng wó lé râ a nghut nghû, Ngò, nungmoq lé taí kyo wú bê nghut lhê.” gà ri.

⁶⁶ Haú dàm mai, Yhâng é chángzô pé myo myo gi, Yhâng htâng a cháng lo kô e za, taú ló byuq bùm bekô nghut ri.

⁶⁷ Haú su mù, Yesuq gi, haú chángzo raxe í yuq lé, “Nungmoq le, ló byuq nau akô, a nghut lú?” ga myí ri.

⁶⁸ Haú hkûn, Simun Petruq gi, “Yhum-sîng ê, Nàng gi, ahtum abyuq é asak mungdang wó Sù nghut to bê lé nhîng, ngamoq gi, ó yuq chyáng ê shirâ lú?”

⁶⁹ Nàng gi, Garai Gasâng é Chyoiyúng Sù nghut é lé, ngamoq, lumj́ing lhê, sê nyi lhê.” ga, Yhang lé tû taí ri.

⁷⁰ Haú hkûn, Yesuq gi, “Nungmoq raxe í yuq lé, Ngò hkyin yù bê a nghut kó lú? Nghut kôle, nungmoq mâ é rayuq gi, nat nghut ri.” ga tû taí ri. (Yhang gi, haú Simun Iskarut é yhangzo, Yudaq lé taí nau é nghut ri; haú yuq gi, chángzo raxe í yuq má bò sù nghut kôle, htâng má, Yhang lé ap pyám râ sù nghut ri.)

Yesuq Eq Yhâng É Gumang Wui

7 Hau htâng má, Yesuq gi, Yhang lé sat râ matú, Yudaq byu pé ho nyi bùm kô é yanmai, Yuda mau má a kâm sô wún mù, Galile mau má sô

² lhîng wún ri. Nghut kôlhang, haú Yudaq byu pé é Saksé Zúm Poí chyâng

³ lo nyi é hkûn, Yesuq é yhanggu yuqzô pé gi, Yhang lé, “Náng é chángzô pé gi, Nàng kut é laklaí kumlhá pé lé myàng kó sháng gaq, Nàng, shí mai

htoq ló luí, Yuda mau shut e ló aq.

⁴ Myìng hu nau é sù gi, hkaú zaú luí haí le a kut wú é nghut lhê. Nàng gi, haú pé lé kut nyi bê nghut é yanmai, mingkan lé, Náng gûng tûn shit aq.”

⁵ ga taí akô. Hkâsu mù gà le, yhanggu sîng yuqzô pé lháng, Yhang lé a lumj́ing kó nghut ri.

⁶ Haú mù luí, Yesuq gi, yhangmoq lé, “Ngá é ahkyíng gi, a jé shi nghut ri; nungmoq é ahkyíng kúm gi, hká hkûn

⁷ le joq nyi ri. Haú mingkan gi, nungmoq lé a jú a wó kut kó nghut ri; nghut kôlhang, Ngo lé gi, a jú kó; haí mù gà le, yhang kut é hkyô gi, agè ashop é nghut é lé, Ngò, saksé tûn shit é yan-

⁸ mai nghut ri. Nungmoq gi, poí haú shut doq ló keq. Ngò kúm gi, Ngá é ahkyíng a jé shi nghut é yanmai, poí haú shut a doq ló shirâ nghut lhê.” ga

⁹ taí ri. Haú su ga taí luí, Yhang gi, Galile mau má nyi gyó to bê nghut ri.

¹⁰ Nghut kôlhang, Yhang gu pé, haú poí shut doq ló byuq é htâng má, Yhang gi, de de a nghut é dông, tsik za

¹¹ châng doq ló bê nghut ri. Yudaq byu pé gi, haú poí má, Yhang lé châng hô kômù, “Haú yuq gi, hkâmá nghut lhê lú?” ga, myi wún akô nghut ri.

¹² Haú byù hpûng hkaú má, Yhang eq séng luí taí lhûm bùm kô é má, ra-am gi, “Yhang gi, byù gè nghut ri.” ga taí kôjáng, ra-am gi, “A nghut, Yhang gi, byu pé lé hkyô shuí ngoq sù nghut

¹³ ri.” ga tû taí akô. Nghut kôlhang, haú Yudaq suwún wui lé gyuq kô é yanmai, ó yuq le, Yhang eq séng é hkyô lé de de a wám taí kó nghut ri.

Haú Poí Má, Yesuq Mhoqshit É Hkyô

¹⁴ Haú poí rawuí nghut ló é hkûn, Yesuq gi, noqkuq yhûm má doq ê luí,

¹⁵ mhoqshit hi ló bê nghut ri. Haú hkûn, Yudaq byu pé gi, gyô maú byuq kômù,

- “Shí yuq gi, mhoq yu é hkyô le a joq wú é wá, haû-í hkâsu mù sê lhê laq?” ga myi bum akô.
- ¹⁶ Haû mù, Yesuq tû taí é gi, “Ngò mhoqshit é dang gi, Ngá é dang a nghut; Ngo lé nhang kat Su é dang ru
- ¹⁷ nghut lhê. Rayuq yuq, Garai Gasang ô nau é hkyô lé châng kut nau é nghut jáng, Ngò mhoqshit é dang gi, Garai Gasâng chyáng mâ é nghut a nghut é eq, Ngá é myit đông taí é dang nghut a nghut é lé, yhang sê gàm hkoq yû rã
- ¹⁸ nghut lhê. Yhumsing é myit đông taí é sù gi, yhumsing é matú aróng hô sù nghut ri; nghut kôlhang, yhumsing lé nhang kat su é matú, aróng ho é sù gi, tengmán é byû nghut ri; yhang má, a tengmán é hkyô haí le a bò nghut ri.
- ¹⁹ Mosheq gi, nungmoq lé jep é tarâ byí to bê, a nghut kó lú? Nghut kôlhang, nungmoq ó yuq le, jep é tarâ haû lé a cháng kó nghut ri. Haí mù luí, Ngo lé sat nau nyi akô lú?” gâ ri.
- ²⁰ Haú hkûn, haû byû hpûng gi, “Nàng gi, nat gang wang to sù nghut ri-nhung! Nang lé, ó yuq wá sat nau nyi ri lú?” ga tû taí akô.
- ²¹ Yesuq gi, yhangmoq lé, “Ngò, lak-lá kumlhá ralhú kut jáng, nungmoq banshoq bang gi, maú byuq
- ²² bum akô. Nghut kôlhang, nungmoq gi, ahpyo-kuq hpyit byí é hkyô lé, Mosheq byí é nghut lhê ga luí, Bánno buinyi má, zoshâng lé ahpyo-kuq hpyit byí akô (gè gè ga jáng, ahpyo-kuq hpyit é hkyô gi, Mosheq chyáng mai lo é a nghut e za, îchyí îwâ pê chyáng
- ²³ mai lo é ru nghut lhê.). Haû, Mosheq é jep é tarâ lé a lhoq htên pyám sháng gaq nghú, Bánno buinyi má, zoshâng lé ahpyo-kuq hpyit byí é nghut le gi, haí mù luí, Bánno buinyi má, byû rayuq é gùng gón lé, Ngò lhoq gê byí é yanmai, Ngo lé nhikjum yô akô lú?
- ²⁴ Byû du lé wú luí hkâjéyáng kó; tengmán é đông sheq jéyáng keq.” ga taí ri.
- Yesuq Gi, Hkrisduq Nghut Lhê Lú?**
- ²⁵ Haû mù luí, Yerusalem wà mó mâ é byu pé ra-am gi, “Haû yhangmoq sat pyám nau nyi é sù gi, shí yuq a
- ²⁶ nghut lhi? Yhang gi, shí má de de dâng nyo nyi le, yhangmoq gi, Yhang lé, haí le a ga kó myhi-nhung! Yhang gi, Hkrisduq nghut lhê ga, haû ahkáng ayá wó bang gi, gè gè yhang, sê akô
- ²⁷ abe? Haû Hkrisduq jé lé é hkûn gi, Yhang hkâmai lé lo é lé, ó yuq lhang sé rã a nghut.” ga taí bum akô. Nghut kôlhang, shí yuq gi, hkâmâ é sù nghut é lé, nga-nhúng sê lhê;
- ²⁸ Haû mù, Yesuq gi, noqkuq yhûm wàng má mhoqshit uchyang, htê mó èq taí kat é gi, “Nungmoq gi, Ngo lé sê é htoq agó, Ngò, hkâmai lé é sù nghut é lé le, sê akô nghut ri. Ngò gi, Ngá myit đông shí má lé nyi tô é sù a nghut kôlhang, Ngo lé nhang kat é Sù gi, tengmán lhê; nungmoq gi, Yhang lé a
- ²⁹ sé kôlhang, Ngò gi, Yhang lé sê lhê; hkâsu mù gâ le, Ngò gi, Yhâng chyáng mai lé é sù eq Yhang mai nhang kat é sù nghut lhê.” gâ ri.
- ³⁰ Haû mù, yhangmoq gi, Yhang lé chyup rã dâ akô; nghut kôlhang, Yhâng é ahkýing a jé shi é yanmai, Yhang lé chyup rã matú, ó yuq le
- ³¹ loq a jé kó nghut ri. Nghut kôlhang, byû hpûng hkaû mâ é bang myo myo gi, Yhang lé lumjîng bûm kôluí, “Haû Hkrisduq jé lé é hkûn, Yhang gi, shí yuq htoq má, limik kumlhá pé je wó kut shit rã lú?” ga taí bum akô nghut ri.
- ³² Haû Hparishe pé gi, haû byû hpûng hkaû má, Yesuq eq sêng é hkyô lé, haû su ga dangsoq soq lhum nyi kô é hkyô lé wó gyô yu akô. Haû mù,

- haû hkyangjong agyi pé eq Hparishe pé gi, Yhang lé ê chyup râ matú, noqkuq yhûm zúng é bang lé nhang kat akô.
- ³³ Haû hkûn, Yesuq gi, “Ngò gi, nungmoq eq rahá rayoq zo za nyi râ nghut lhê; hau htâng, Ngo lé nhang kat
- ³⁴ Su chyáng taû lô râ nghut lhê. Haû hkûn, nungmoq gi, Ngo lé hô kôlhang, myang hô kó râ a nghut; Ngò nyi é jang má, nungmoq wó jé kó râ a nghut.” ga taí ri.
- ³⁵ Hau é yanmai, Yudaq byu pé, rayuq eq rayuq taí lhum kô é gi, “Shí yuq gi, Yhang lé nga-nhúng a myang hô loshoq, hká shut e byuq râ dà lhê lhú? Yhang gi, Grik byu pé má nyi byo myín tô é nga-nhúng é byu pé nyi é jowò má ê mù, Grik byu pé
- ³⁶ lé, ê mhoqshit râ dà lhê lhú? ‘Nungmoq gi, Ngo lé hô kôlhang, myang hô kó râ a nghut.’ gâ é eq, ‘Ngò nyi é jang má, nungmoq wó jé kó râ a nghut.’ gâ é, Yhang taí é dang gi, haí jung wá gá naû é nghut lhê lhú?” gâ akô.
- ³⁷ Haû lô htâng é eq je ahkyak é Poí buinyi má, Yesuq toq yap luí, htê mó èq taí é gi, “Wuì shit sù gi, Ngá chyáng
- ³⁸ lé mù, shuq sháng gaq. Ngo lé lumjín é sù ó yuq nghut kôle, haû Chyúmdang má taí tô é eq rajung za, ‘Yhâng chyáng mai asak uchyâm é wuìlàng
- ³⁹ yui htoq lô râ nghut lhê.” gâ ri. Yhang haû su gâ é gi, Yhang lé lumjín é bang myang hap yù râ nghut é, haû Woi-nyí lé taí é nghut ri. Haû hkûn jé shoq, haû Woi-nyí lé a byi kat shi nghut ri. Hkâsu mù gâ le, Yesuq gi, hpungwup shingkang dan hû é a hui nhâng shi é yanmai nghut ri.
- ⁴⁰ Yhâng é dang pé lé wó gyo kôjáng, ra-am gi, “Shí yuq gi, gè gè yhang, Myiqhtoi haû nghut ri.” ga taí akô.
- ⁴¹ Ra-am gi, “Shí yuq gi, Hkrisduq nghut ri.” ga taí akô. Góbang nghut jáng, “Hkrisduq wá Galile mau mai
- ⁴² htoq lé râ nghut lhê lhú? Haû Chyúmdang má, Hkrisduq gi, Dawiq é awut ashín mâ é nghut luí, Dawiq nyi laí lo é Betlehem wà mai htoq lô râ nghut lhê gâ é, a nghut lhú?” ga myí bum
- ⁴³ akô nghut ri. Haû mù luí, Yesuq é yanmai, shiwa byu pé gi, gàm hkoq lò
- ⁴⁴ byuq bekô nghut ri. Ra-am gi, Yhang lé chyup yù nau bùm kôlhang, Yhang lé loq a záng kó nghut ri.

**Yudaq Byu Pé Lé Shuí U É
Bang A Lumjín Kô É Hkyô**

- ⁴⁵ Hau htâng má, haû noqkuq yhûm zúng bang gi, haû hkyangjong agyi pé eq Hparishe pé chyáng taû lô kô é hkûn, haû bang gi, yhangmoq lé, “Nungmoq, haí mù luí, Yhang lé a shuí lo kô é lhú?” ga lhom myí akô.
- ⁴⁶ Haû hkûn, haû noqkuq yhûm zúng bang gi, “Shí yuq su ga taí é byù gi, ó le a nyi wú é nghut lhê.” ga taí kyô akô.
- ⁴⁷ Haû mù, haû Hparishe pé gi, “Nungmoq lé le, Yhang èq mhoq hpyoq yù
- ⁴⁸ bekô lhú? Haû zaú wui chyáng le, Hparishe pé chyáng le, Yhang lé lum-
- ⁴⁹ jín é byù bò akô lhú? A bò! Nghut kôlhang, haû jep é tarâ lé a sê é byù moq mó shí gi, nhíng pyâm é hui bekô nghut ri.” ga nhik-yô é dông tú taí kat akô nghut ri.
- ⁵⁰ Nghut kôlhang, yhangmoq hpúng má bo é, hí hkûn Yesuq chyáng e wú bê sù nghut é, Nikodimu gi,
- ⁵¹ “Nga-nhúng é tarâ gi, byù rayuq lé, yhâng é dang hí a gyô wú é eq, yhang haí kut é lé a sê e za, mara byi lhê lhú?” ga, yhangmoq lé myí ri.
- ⁵² Haû hkûn, yhangmoq gi, “Nàng le, Galile mau byù nghut lhê lhú? Galile

mau mai myiqhtoi rayuq lhang a htoq é hkyô lé, nàng gon wú aq, haú jáng sé rã nghut lhê.” ga tũ taí akô.

⁵³ Hau htâng, yuq hkgangmó gi, ó le ô yhûm shut taú ló byuq bùm bekô nghut ri.^a

Yesuq Lé, Lé Myí Chyam Wú Kô É Hkyô

² **8** Yesuq kúm gi, Tsanlun Bùm shut e ló bê nghut ri. Htang napkyó nap-sûn noq le, Yesuq gi, noqkuq yhûm wàng hkaú má dum ê luí, byu pé lhunglhang gi, Yhâng é lhínghkyuq má lé zîng bum akô; haú mù, Yhang gi, zung to luí, yhangmoq lé mhoq-shit ri. Haú hkûn, haú tarâ sará pé eq Hparishe pé gi, sulàng shut nyi é má myang chyup yu é su-myi rayuq lé shuí lé lô kômù, gung gûng má shap to ⁴ kôluí, Yesuq lé, “Sará ê, myiwe myhí shí lé, sulàng shut nyi é má myang ⁵ chyup yu é nghut lhê. Haú Mosheq é tarâ má gi, shí su é myiwe lé, luq-gok èq dú sat pyám keq ga, nga-nhúng lé hkunmó hkyô tô ri. Ahkuí, Nàng gi, hkâsu nghú rã lú?” ga myí akô. ⁶ Yhangmoq haú su ga myí é hkyô gi, Yhang lé mara wó hûn shoq ga, chyam wú rã matú nghut ri.

Nghut kôlhang, Yesuq gi, ngóm mù, myigùng má loqnyhuí èq htaú kã ⁷ nyi ri. Yhang lé, yhangmoq ru jang myí nyi kô é hkûn, Yhang gi, yap nyhang kat mù, yhangmoq lé, “Nungmoq mâ é mara a wó é sũ hí, myiwe myhí shí yuq lé luqgok èq dú sháng ⁸ gaq.” ga taí ri. Hau htâng, Yhang gi, dum ngóm luí, myigùng má kã nyi ri. ⁹ Yhangmoq gi, haú su gã é lé wó gyo kôjáng, je mang bang mai hí luí, rayuq htâng rayuq ló byuq bekô nghut luí, Yesuq baú za myit gyó tô é eq, myiwe

¹⁰ myhí haú jâng yap nân tô ri. Yesuq gi, yap nyhang kat luí, yhang lé, “Myiwe myhí ê, yhangmoq hká ló bekô lú?” Ó yuq èq le, nàng lé mara a byi kó lú?” ga myí ri.

¹¹ Yhang gi, “Yhumsîng ê, ó yuq le mara a byi kó nghut ri.” ga tũ taí ri.

Haú hkûn, Yesuq gi, “Ngò le, nàng lé mara a byi, ló aq hkoi, ahkuí mai mara hkâdum kut shut lo.” ga taí kat ri.

Yesuq, Mingkân É Maubó

¹² Yesuq gi, shiwa byu pé lé dum nyo é hkûn, “Ngò gi, mingkân é maubó nghut lhê; Ngá htâng châng é sũ ó yuq nghut kôle, mauchut hkaú má hkâ-nhám le so rã a nghut, asak maubó lé wó rã nghut lhê.” ga taí ri.

¹³ Haú mù, haú Hparishe pé gi, “Wú aq, Náng gûng Nàng saksé hkâm yu é nghut ri; Náng é saksé gi, teng rã a nghut.” ga taí akô.

¹⁴ Haú hkûn, Yesuq gi, “Ngá gûng Ngò saksé hkâm kôlhang, Ngá é saksé gi, têng lhê; hkâsu mù gã le, Ngò gi, Ngò hkâmai lé lo é eq Ngò hká shut e ló é lé, sê lhê. Nghut kôlhang, nungmoq gi, Ngò hkâmai lé lo é lé le, Ngò hká

¹⁵ shut e ló é lé le, a sé kó nghut ri. Nungmoq gi, byù hkyam dông za jéyáng akô; Ngò gi, ó yuq lé le a jéyáng é

¹⁶ nghut lhê. Nghut kôlhang, Ngò jéyáng é nghut jáng, Ngò jéyáng é hkyô gi, jô lhê; hkâsu mù gã le, Ngò gi, Ngò baú a nghut, haú Ngo lé nhang kat

¹⁷ é sũ Íwa eq rahá nghut nyi lhê. Haú nungmoq é tarâ má yhang le, í yuq mai hkâm é saksé gi, têng lhê ga kã ¹⁸ tô ri. Ngò gi, Ngá é matú saksé hkâm yù sũ nghut lhê; hau htoq agó, haú Ngo lé nhang kat é sũ Íwa le, Ngá é

^a 7:53 Yohan Laiká 7:53 mai 8:11 jé shoq gi, chyúmding axau myo myo má a bo é nghut lhê.

- matú saksé hkám byî é nghut lhê.” ga tû taî ri.
- ¹⁹ Haû mù, yhangmoq gi, Yhang lé, “Náng Wa gi, hkâmá lú?” ga myi kô-jáng, Yhang gi, “Nungmoq gi, Ngo lé le, Ngá Wa lé le, a sé kó nghut ri; nungmoq, Ngo lé sé kô é nghut le gi, Ngá Wa lé le, sé kó râ nghut lhê.” ga tû taî ri. Dang haú pé gi, haû noqkuq yhûm wàng hkaû mâ é alu kat jang nàm má, Yhang mhoqshit nyi é u lé taî é dang nghut ri. Nghut kôlháng, Yhang lé, ó yuq le a chyup kó; hkâsu mù gâ le, Yhâng é ahkýng a jé shi é yanmai nghut ri.
- ²¹ Haû mù luî, Yesuq gi, yhangmoq lé, “Ngò gi, ló byuq râ nghut lhê, haú hkûn, nungmoq Ngo lé hô kó râ, yhumsing é mara má le shî kó râ nghut lhê. Ngò ló é jang má, nungmoq wó jé kó râ a nghut.” ga, radàm dum puq taî ri.
- ²² Hau é yanmai, haû Yudaq byu pé gi, “‘Ngò ló é jang má, nungmoq wó jé kó râ a nghut.’ gâ é gi, Yhânggùng yhang sat shî râ gâ é nghut lhê lú?” ga myi bum akô.
- ²³ Nghut kôlháng, Yesuq xoq taî é gi, “Nungmoq gi, a-ô mai lo é bang nghut akô; Ngò gi, ahtoq mai lé é sù nghut lhê. Nungmoq gi, mingkan shî eq sêng é bang nghut akô; Ngò kúm gi, mingkan shî eq sêng é sù a nghut. Haû mù, nungmoq gi, yhumsing é mara má shî kó râ nghut lhê nghû, Ngò taî é nghut lhê. Ngò gi, haú Yuq nghut lhê nghû taî é lé, nungmoq a lumjíng kô é nghut jáng, nungmoq gi, gè gè yhang, yhumsing é mara má shî kó râ nghut lhê.” gâ ri.
- ²⁵ Haú hkûn, yhangmoq gi, “Nàng, ó yuq nghut lhê?” ga myi kôjáng,
- Yesuq gi, “Ngò ó yuq nghut é lé, Ngò, ²⁶ hkâ-nhám le taî nyi bê nghut lhê. Ngò gi, nungmoq eq séng luî, taî râ hkyô eq jéyáng râ hkyô, myo myo joq lhê. Nghut kôlháng, Ngo lé nhang kat é Sù gi, tengmán é Sù nghut lhê mù, Yhâng chyáng mai wó gyô yu é gû lé, Ngò, mingkan lé taî kyô lhê.” ga tû taî ri.
- ²⁷ Yesuq gi, yhangmoq lé, Yhâng Wa eq séng é hkyô taî kyô nyi é lé, yhangmoq gi, a sê gyo kó nghut ri. Haû mù ²⁸ luî, Yesuq gi, “Haû Byu Yhangzo lé nungmoq tu shap^a kat é hkûn sheq, Ngò gi, haû Yuq nghut é hkyô lé le, yhumsing myit dông haî le a kut e za, haû Íwa mhoq byî é dông za taî é hkyô lé le, nungmoq sé kó râ ²⁹ nghut lhê. Haú Ngo lé nhang kat é Sù gi, Ngò eq rahá nghut nyi lhê; Ngò gi, hkâ-nhám le, Yhang lé myit ngón nhang é hkyô chyat kut é yanmai, Yhang gi, Ngo lé baú za a tô ³⁰ pyâm to nghut ri.” ga taî ri. Yhang, haû su taî nyi é u lé lháng, byù myo myo gi, Yhang lé lumjíng bûm bekô nghut ri.

Abraham É Awut Ashín Pê Hkyô

- ³¹ Haû mù, Yesuq gi, Yhang lé lumjíng é Yudaq byu pé lé, “Ngò mhoqshit é hkyô lé châng kut nyi bekô nghut jáng, nungmoq gi, gè gè yhang, Ngá é ³² chángzô pé nghut bekô. Nungmoq gi, haû tengmán hkyô lé sé kó râ nghut luî, haû tengmán hkyô gi, nungmoq lé lhoq lhut kat râ nghut lhê.” ga taî ri.
- ³³ Haú hkûn, yhangmoq gi, “Ngamoq gi, Abraham é awut ashín pé nghut luî, ó yuq é jùn le hkâ-nhám a dut wú é nghut lhê. Haû mù, ‘nungmoq lé lhoq lhut kat râ’ nghû Nàng hkâsu kut wó taî lhê lú?” ga tû taî akô.

^a 8:28 Tu shap gâ é lichyúm gi, tapzîng htoq má jén sat pyám râ gâ é nghut lhê.

³⁴ Yesuq dum tû taí é gi, “Ngò, nungmoq lé teng za taí kôlé, mara kut shut
³⁵ é sù gi, marâ é jùn nghut lhê. Jùn gi, yhûm ikun eq hkâ-nhám le sêng nyi râ a nghut; zo kúm gi, ikun eq ahtum
³⁶ abyuq sêng lhê. Haû mù luí, haû Zo gi, nungmoq lé lhoq lhut kat é nghut jáng, nungmoq gi, gè gè yhang, lut
³⁷ berâ nghut lhê. Nungmoq gi, Abraham é awut ashín pé nghut é lé, Ngò sê lhê. Nghut kôlhang, nungmoq gi, Ngá é dang lé a lhom yù kô é yanmai,
³⁸ Ngo lé sat râ dâ akô nghut ri. Ngò gi, Ngá Wá chyáng mai myang yu é eq rajung za, nungmoq lé taí kyô nyi lhê; nungmoq le, nungmoq é îwa chyáng mai wó gyô yu é eq rajung za kut nyi akô nghut ri.” gâ ri.

³⁹ Haú hkûn, yhangmoq gi, “Ngamoq é îwa gi, Abraham nghut lhê.” ga tû taí kôjáng, Yesuq gi, “Nungmoq, Abraham é yhangzô pé nghut é nghut le gi, Abraham kut é su kut kó râ nghut
⁴⁰ lhê. Nghut kôlhang, nungmoq gi, haû Garai Gasâng chyáng mai wó gyô yu é tengmán hkyô lé taí kyo sù nghut é Ngo lé, sat pyám nau akô nghut ri. Haû sù é hkyô gi, Abraham a kut é
⁴¹ nghut lhê. Nungmoq gi, nungmoq é îwa kut é muzó lé yhang, kut nyi akô.” ga taí ri.

Haú hkûn, yhangmoq gi, “Ngamoq gi, dezo amyû a nghut; ngamoq gi, Îwa rayuq za wó lhê; haû gi, Garai Gasang nghut lhê.” ga taí he akô nghut ri.

Zô Wui É A-kyang Gi, Mó Ó Nghut É Hkyô Shit

⁴² Yesuq gi, yhangmoq lé, “Garai Gasang gi, nungmoq é Îwa nghut é nghut jáng, nungmoq gi, Ngo lé chyitdap kó râ nghut lhê; hkâsu mù gâ le, Ngò gi, Garai Gasâng chyáng mai lé jé luí,

ahkuí, shí má nyi tô é nghut lhê. Ngò gi, Ngá myit dông lé lo é a nghut, Yhang sheq Ngo lé nhang kat é ru
⁴³ nghut lhê. Nungmoq gi, haû mù Ngá é dang lé a sê gyo kô é lhú gâ le, Ngò taí é dang lé, nungmoq a wó lhom yù kô
⁴⁴ é yanmai nghut ri. Nungmoq gi, haû nungmoq é îwa nghut é nat Tsadán eq sêng é bang nghut luí, nungmoq é îwa ô nau é hkyô lé kut nau bum akô. Yhang gi, a-nham sâng-hi mai byù sat sù nghut ri. Yhang má tengmán hkyô a bo é yanmai, yhang gi, haû tengmán hkyô má a yap gîng nyi nghut ri. Yhang gi, mhaú é hkûn, yhâng é myit má bo é dông taí ri; hkâsu mù gâ le, Yhang gi, byù mhaú nghut luí, mhaú
⁴⁵ hkyô pê é îwa nghut ri. Haû su mù, Ngò, nungmoq lé, haû tengmán hkyô taí kyô é yanmai, nungmoq gi, Ngo lé
⁴⁶ a lumjîng kó nghut ri. Nungmoq mâ é ó yuq wá, Ngo lé mara bo lhê nghû saksé wó tûn shit akô lhú? Ngò gi, haû tengmán hkyô lé taí nyi é nghut le nhîng, nungmoq, Ngo lé haû mù a lum-
⁴⁷ jîng kô é lhú? Garai Gasang eq sêng é sù gi, Garai Gasang taí é dang lé gyô lhê. Nungmoq a gyo kô é gi, nungmoq, Garai Gasang eq a séng kô é yanmai nghut ri.” ga taí ri.

Yesuq Eq Abraham

⁴⁸ Haú hkûn, haû Yudaq byu pé gi, Yhang lé, “Nàng gi, Samariq byù nghut é htoq agó, nat gang wang júng to sù nghut lhê nghû, ngamoq taí é dang gi, jô lhê a nghut lhú?” ga myí akô.

⁴⁹ Yesuq gi, “Ngò gi, nat gang wang júng é hui sù a nghut; Ngò gi, Ngá Wa lé sheq hkunggâ é ru nghut lhê; nungmoq kúm gi, Ngo lé taí hpoí nyi akô
⁵⁰ nghut ri. Ngò gi, Ngá é matú aróng ho nyi é a nghut; nghut kôlhang, hô

byi Sû rayuq nyi lhê, haú yuq jéyáng
⁵¹ sháng gaq. Ngò, nungmoq lé teng za
 taí kôlé, Ngá dang lé châng é sù gi,
 hkâ-nhám le, shí râ a nghut.” ga taí ri.

⁵² Hau é yanmai, haú Yudaq byu pé gi,
 “Nàng gi, nat gang wang júng to sù
 nghut é lé, ahkuí, ngamoq sé bê! Abra-
 ham gi, shi byuq bê; haú myiqhtoí pé
 le, shi byuq bekô nghut ri; nghut kô-
 lhang, Nàng gi, ‘Ngá dang lé châng é
 sù gi, hkâ-nhám le, shí râ a nghut.’ ga
⁵³ taí ri. Nàng gi, ngamoq é îwa Abra-
 ham htoq hkik lhê lhú? Yhang gi, shi
 byuq bê; haú myiqhtoí pé le, shi byuq
 bekô nghut ri. Náng gûng nàng ó yuq
 su ngàm lhê lhú?” ga taí akô.

⁵⁴ Yesuq gi, “Ngá gûng Ngò lhoq gyaú
 yu é nghut jáng, Ngá é aróng gi, hai
 hpaudap é a nghut; nghut kôlhang,
 haú nungmoq é Garai Gasang nghut
 lhê ga nungmoq taí é sù, Ngá Wa
 gi, Ngo lé lhoq gyaú é sù ru nghut
⁵⁵ lhê. Nungmoq gi, Yhang lé a sé kó
 nghut ri; nghut kôlhang, Ngò gi, sê
 lhê. Yhang lé a sé nghú Ngò taí é
 ru nghut le gi, Ngò le nungmoq su
 byù mhaú dut râ nghut lhê; nghut kô-
 lhang, Ngò gi, Yhang lé sé luí, Yhâng
⁵⁶ é dang gyo sù nghut lhê. Nungmoq é
 îwa Abraham gi, Ngo lé râ buinyì lé
 myoqbyu gabú nyi é nghut luí, myàng
 mù, gabú bê nghut ri.” ga tû taí ri.

⁵⁷ Haú hkûn, haú Yudaq byu pé gi,
 Yhang lé, “Nàng gi, asak ngo xê zàn
 lháng a nghut shí é nhíng, Abraham
 lé myàng wú é nghut lhê lhú?” ga taí
 akô.

⁵⁸ Yesuq gi, “Ngò, nungmoq lé teng
 za taí kôlé, Abraham lháng a hkû shi
 má, Ngò nyi gù bê nghut lhê.”^a ga
⁵⁹ tû taí ri.^b Haú mù luí, yhangmoq gi,
 Yesuq lé, dú râ ga luqgok kui yu akô;

nghut kôlhang, Yesuq gi, haú noq-
 kuq yhûm mai haq htoq ló byuq bê
 nghut ri.

Myoqjit Sù Lé Lhoq Gê Byí É Hkyô

9 Yesuq gi, sô yông ló nyi é u lé, hku
 lé é mai myoqjit to gû nghut é byù
² rayuq lé myang ri. Haú hkûn, Yhâng é
 chángzô pé gi, Yhang lé, “Rabai ê, shí
 yuq, myoqjit gû hku lé é gi, ó yuq kut
 shut é yubak é yanmai nghut lhê lhú?
 Yhang kut shut é lhú? A nghut jáng,
 yhâng nu yhâng wa kut shut é lhú?”
 ga myí akô.

³ Yesuq tû taí é gi, “Haú gi, yhang
 kut shut é yanmai le a nghut, yhâng
 nu yhâng wa kut shut é yanmai le a
 nghut; haú Garai Gasâng é muzó lé,
 yhang má wó lhoq htoq shit râ matú,
⁴ haú dut é ru nghut lhê. Nga-nhúng
 gi, haú Ngo lé nhang kat Su é muzó
 lé, nyí nghut tô ashí hkûn, zui saí
 nyi ra râ dut lhê; myín jé jáng gi,
 ó yuq le, mù wó zui saí râ a nghut.

⁵ Ngò gi, mingkan htoq má nyi tô é
 u lé, mingkân é maubó nghut lhê.”
 gâ ri.

⁶ Yhang gi, haú su ga taí luí, myigùng
 má sôkan byé hkyó mù, tse-nyhaq saí
 yù luí, haú yuq é myoqjí má but byí ri.

⁷ Hau htâng, haú yuq lé, “Haú Siloam
 wuhtum má ê chí pyám aq.” ga taí ri.
 (Siloam gâ é gi, nhang é gâ é lichyúm
 nghut lhê.). Haú mù, haú yuq gi, ê chí
 mù, myoq myàng luí, yhûm shut ló bê
 nghut ri.

⁸ Haú yhâng é yhumkyo bang eq
 yhang dung zô wún é lé myang wú é
 bang gi, “Shí yuq gi, haú zung to mù,
 dung zo zo lhaq kut é sù, a nghut kó
⁹ lhú?” ga myí bum akô. Ra-am gi, “Haú
 yuq nghut lhê.” gâ bum akô.

^a 8:58 Htoq Ló 3:14 ^b 8:58 Bun zo shí má, Yesuq gi, Yhânggùng yhang Garai Gasang nghut lhê
 gâ nyi nghut ri.

Góbang gi, “A nghut, haú yuq su dut e za ru nghut lhê.” ga taí akô.

Nghut kôlhang, yang gi, “Ngò, haú yuq yang nghut lhê.” ga taí ri.

¹⁰ Haú hkûn, yangmoq gi, “Haú nghut le gi, náng myoq hkâsu kut wó myang é lhú?” ga myí akô.

¹¹ Yang gi, “Haú Yesuq gâ é byù rayuq, tse-nyhaq ratsuí saí yù luí, ngá é myoqjí má but byi mù, ‘Siloam wuìhtum má ê chí pyám aq.’ ga ngo lé taí ri; haú mù, ngò ê chí pyám é htâng má, ngá myoq wó myang é nghut lhê.” ga tú taí ri.

¹² Haú hkûn, yangmoq gi, “Byù haú yuq gi, hkâmá nyi ri lhú?” ga, yang lé myí akô.

Yang gi, “Ngò a sé.” ga taí ri.

**Myoq Dum Myang Byuq É Hkyô Lé,
Hparishe Pé Gôn Wú É Hkyô**

¹³ Yangmoq gi, haú myoqjit wú bê sù lé, Hparishe pê chyáng shuí lé akô.

¹⁴ Yesuq, tse-nyhaq saí yù mù, haú yuq é myoq lé lhoq myâng byí é buinyì

¹⁵ gi, Bánno buinyì nghut ri. Haú mù, yang, myoq hkâsu kut wó myang é hkyô lé, haú Hparishe pé le dum myí akô. Haú jáng, yang gi, “Haú yuq gi, ngá é myoqjí má tse-nyhaq but byi mù, ngò gi, ê chí pyám jáng, ngá myoq myàng bê nghut lhê.” ga tú taí ri.

¹⁶ Haú Hparishe pé ra-am gi, “Shí yuq gi, Bánno buinyì é tará lé a châng é sù nghut é yanmai, Garai Gasâng chyáng mai lé é sù a nghut.” ga taí akô.

Nghut kôlhang, ra-am gi, “Yubak dap sù rayuq gi, haú su é limik kumlhá pé lé, hkâsu wó kut htoq râ lhú?” ga myí akô. Haú mù, yangmoq gi, myit a huí lhûm bùm lò kó nghut ri.

¹⁷ Haú mù, yangmoq gi, haú myoqjit wú sù shut lhîng mù, “Nang lé myoq lhoq myâng byí é sù gi, hkasú é byù

nghut lhê nghû, nàng taí râ lhú?” ga dum myi kôjáng, “Yang gi, myiqhtoi rayuq nghut ri.” ga, yang tú taí ri.

¹⁸ Haú Yudaq byu pé gi, haú yuq myoqjit wú é hkyô lé le, ahkuí myoq dum myàng bê nghut é hkyô lé le, haú yhâng nu eq yhâng wa lé, ê ji lò nhang é hkûn jé shoq, a lumjîng kó nghut ri.

¹⁹ Haú mù, Yangmoq gi, haú yhâng nu eq yhâng wa lé, “Shí yuq gi, nung-nhik é yangzo nghut lhê lhú? Hku lé é hkûn mai, myoqjit gù nghut lhê lhú? Yang, ahkuí, hkâsu kut wó myang é lhú?” ga myí akô.

²⁰ Haú hkûn, yhâng nu eq yhâng wâ nhik gi, “Yang gi, ngá-nhik é yangzo nghut é lé le, hku lé é hkûn mai myoqjit gù nghut é lé le, ngá-nhik

²¹ sê lhê. Nghut kôlhang, yang, ahkuí hkâsu kut wó myang é hkyô lé le, yhâng é myoq lé ó yuq èq lhoq myâng byí é hkyô lé le, ngá-nhik a sé. Yang, asak wáng bê, yang lé myí wú keq, yhânggùng yang dat taí kyo râ nghut

²² lhê.” ga tú taí akô. Haú yhâng nu eq yhâng wâ nhik gi, Yudaq byu pé lé gyuq kô é yanmai, haú su ga taí kô é nghut ri; hkâsu mù gâ le, Yesuq gi, haú Hkrisduq nghut lhê ga yín yu é sù, ó yuq lé nghut kôle, haú tarajong mai lhoq htoq pyám râ nghut lhê ga, haú Yudaq suwún wuì chôm myit hpyit to
²³ bekô nghut é yanmai nghut ri. Hau é yanmai, yhâng nu eq yhâng wâ nhik gi, “Yang, asak wáng bê, yang lé myí wú keq.” ga taí kô é nghut ri.

²⁴ Haú Hparishe pé gi, myoqjit wú bê sù haú yuq lé dum ji yù mù, “Garai Gasang lé za hkyá-on waq toq aq! Haú yuq gi, yubak dap sù rayuq nghut é lé ngamoq sê lhê.” ga taí akô.

²⁵ Haú hkûn, yang tú taí é gi, “Yang gi, yubak dap sù rayuq nghut lhê luq, a nghut é luq, ngò a sé. Ngò gi, hí

lé myoqjit sù nghut kôle, ahkuí wó myâng bê nghut é lé za, ngò ru sê lhê.” ga ri.

²⁶ Hau htâng, yhangmoq gi, “Yhang, nang lé haí kut byí ri lú? Náng é myoq lé, yhang, hkâsu kut lhoq myâng byí ri lú?” ga, yhang lé myí akô.

²⁷ Háu hkûn, yhang gi, “Ahkuí za, ngò, nungmoq lé taí kyo bê le, nungmoq sheq a gyo kôluí nhîng! Nungmoq gi, haí mù dum gyô nau akô lú? Nungmoq le, Yhâng é chángzô pé dut nau akô lú?” ga taú myí ri.

²⁸ Háu mù, yhangmoq gi, yhang lé gyaí rhoí é đông mai, “Nàng gi, háu yuq é chángzo nghut ri-nhung! Nga-moq kúm gi, Mosheq é chángzô pé ru

²⁹ nghut lhê! Garai Gasang gi, Mosheq lé dâng nyo é hkyô lé, ngamoq sê lhê; nghut kôlhang, háu yuq eq séng luí, Yhang gi, hkâmai lé é sù nghut é lé lhang, ngamoq a sé.” ga taí akô.

³⁰ Háu hkûn, háu yuq gi, “Yhang, ngo lé myoq wó lhoq myang byi kôlhang, Yhang gi, hkâmai lé é sù nghut é lé, nungmoq a sé kô é gi, mauhpo yhang

³¹ nghut bê! Garai Gasang gi, yubak dap bâng é dang lé a gyo byí é hkyô lé, nga-nhúng sê lhê. Garai Gasang gi, Yhang lé noqkuq luí, Yhâng ô nau é hkyô lé, kut é sù é dang lé kúm gyo

³² byí lhê. Hku lé é hkûn mai myoqjit gù nghut é byù lé, ó yuq èq myoq lhoq myâng byí é gâ é hkyô lé, mingkan lé joq é hkûn mai, ó yuq le a wó gyô wú

³³ é nghut lhê. Háu yuq gi, Garai Gasâng chyáng mai lé é sù za a nghut le gi, haí le wó kut râ a nghut.” ga tû taí ri.

³⁴ Háu su ga jáng, yhangmoq gi, “Nàng gi, yubak htui má hku lé é sù nghut to luí nhîng, ngamoq lé wám mhoqshit lhê lú?” ga tû taí kôluí, yhang lé hkat htoq pyâm akô nghut ri.

Woi-nyí Má Myoqjit É Hkyô

³⁵ Yesuq gi, háu yuq lé yhangmoq hkat htoq pyâm é hkyô lé wó gyo luí, yhang lé myàng hui jáng, “Nàng gi, háu Byu Yhangzo lé lumjîng lhê lú?” ga myí ri.

³⁶ Háu hkûn, háu yuq gi, “Yhumsîng ê, háu gi, ó yuq nghut lhê lú? Yhang lé, ngò wó lumjîng sháng gaq, taí kyo laq.” ga myí ri.

³⁷ Yesuq gi, “Nàng, háu yuq lé myàng wú bê nghut lhê; ahkuí, nàng eq dâng nyo nyi é sù gi, háu yuq yhang nghut lhê.” ga taí ri.

³⁸ Háu mù, háu yuq gi, “Yhumsîng ê, ngò lumjîng lhê!” ga taí luí, Yhang lé noqkuq ri.

³⁹ Háu hkûn, Yesuq gi, “Háu myoq-jit bang myoq myàng kó râ hkyô eq myoq myàng bang myoqjit kó râ hkyô lé, tarâ jéyáng râ matú, mingkan shí má Ngò jé lé é nghut lhê.” ga taí ri.

⁴⁰ Yhang eq rahá nghut nyi é Hparishe pé ra-am gi, Yhang háu su ga taí é lé wó gyo kôjáng, “Hkâsu htà? Ngamoq gi, myoqjit bang dut bê lú?” ga myí akô.

⁴¹ Háu hkûn, Yesuq gi, “Nungmoq, myoqjit é bang ru nghut le gi, yubak mara a bò kó râ nghut lhê; nghut kôlhang, ahkuí, nungmoq gi, myoq myàng bang nghut lhê ga kô é yan-mai, nungmoq má yubak mara bo ashí kó nghut ri.

Sau Zúng Sù Eq Sau Hpúng

10 Ngò, nungmoq lé teng za taí kôlé, háu sau hkup má, hkúmdong mai a wang e za, gó hkyô đông doq lut wang é sù gi, hkau sù ² eq damyaq nghut ri. Háu hkúmdong mai wang é sù kúm gi, sau zúng sù ³ nghut ri. Háu hkum zúng sù gi, yhang lé hkum hpóng byí é htoq agó, háu

sau pé gi, yhang é htê lé gyo byî akô. Yhang gi, yhang é sau pé lé, mying lang luí wut yù mù, yhangmoq
⁴ lé shuí htoq htoq kut nyi ri. Yhang é sau pé banshoq lé hpông htoq yù mù, yhang gi, hí má sô ri; sau pé gi, yhang é htê lé sê gyo kô é yanmai, yhang é htâng má châng akô
⁵ nghut ri. Nghut kôlhang, yhangmoq gi, byù bíng é htâng má, hkâ-nhám lhang cháng kó rá a nghut e za, yhang chyáng mai kúm hpang byuq kó rá nghut lhê; hkâsu mù gâ le, haú byù bíng é htê lé, yhangmoq a sê gyo kô
⁶ é yanmai nghut ri.” ga taí ri. Yesuq gi, dangtú haú lé yù mù, yhangmoq lé taí kyô ri; nghut kôlhang, yhangmoq gi, Yhang haí taí kyô nyi é lé, a sê gyo kó nghut ri.
⁷ Haú mù, Yesuq dum taí é gi, “Ngò, nungmoq lé teng za taí kôlé, Ngò gi, haú sau pé wang é hkúmdong nghut
⁸ lhê. Ngá é hí má lé é lhunglhang bang gi, hkau bang eq damyaq pé nghut akô; haú sau pé kúm gi, yhangmoq é dang lé a lhom gyo byi kó nghut ri.
⁹ Ngò gi, hkúmdong nghut lhê; Ngò mai wang é sù ó yuq nghut kôle, hkyi yu é hui rá nghut lhê. Haú yuq gi, htoq htoq wàng wàng wó kut rá eq
¹⁰ mhan-yô myang hô rá nghut lhê. Haú hkau sù gi, hkau rá, sat rá eq lhoq htên pyám rá matú, lé e za nghut lhê. Ngo lé é gi, yhangmoq, asak wó yù rá eq byíngjup é asak lé wó yù rá matú sheq nghut lhê.
¹¹ Ngò gi, ge é sau zúng sù nghut lhê; haú ge é sau zúng sù gi, sau pé é matú, yhumsing é asak lé ap byi pyâm é
¹² nghut lhê. Haú langchyáng kut sù gi, sau pé lé sing é sau zúng sù a nghut; haú mù, yhang gi, haú wamhkui lé lo é lé myàng jáng, saú pé lé pyâm to mù

hpang ló byuq rá nghut lhê; haú hkûn, wamhkui gi, sau hpúng lé é htim luí,
¹³ lhoq pyo pyám rá nghut lhê. Yhang gi, langchyáng hpó nghut luí, haú sau pé é matú haí le a myit chiq byí é yanmai, hpang é nghut ri.
¹⁴ Ngò gi, haú ge é sau zúng sù nghut lhê; haú Íwa gi, Ngo lé sê é nghut luí, Ngò le, haú Íwa lé sê é eq rajung za,
¹⁵ Ngá é sau pé lé, Ngò sê lhê; Ngá é sau pé le, Ngo lé sê akô nghut ri; Ngò gi, haú sau pé é matú, yhumsing é asak
¹⁶ lé ap byí pyâm é nghut lhê. Ngò gi, sau hkup shí mâ é a nghut é gotú sau pé wó ashí; sau haú pé lé le, Ngò, shuí yù ra rá nghut lhê; sau haú pé le, Ngá é htê lé gyo kó rá nghut lhê; haú hkûn, sau hpúng rahpúng za dut luí, sau zúng sù le rayuq za, nghut rá
¹⁷ nghut lhê.^a Ngò gi, Ngá é asak lé dum wó taú yù sháng gaq nghú, yhumsing é asak lé ap byí pyâm é yanmai, Ngá Wa gi, Ngo lé chyitdap é nghut lhê.
¹⁸ Ngá é asak lé, ó yuq èq le wó yu pyâm é a nghut, Ngá é myit dông byi pyâm é ru nghut lhê. Ngò gi, yhumsing asak lé ap byi pyám rá ahko ahkáng eq haú lé dum taú yù rá ahko ahkáng wó sù nghut lhê. Haú gi, Ngá Wá chyáng mai Ngò wó yu é hkunmó nghut lhê.” gâ ri.
¹⁹ Dang haú pé é yanmai, haú Yudaq byu pé gi, myit a huí lhum dum
²⁰ dut byuq bekô nghut ri. Haú mâ é bang myo myo gi, “Yhang gi, nat gang wang júng to luí, nâ byuq bê nghut ri. Yhang é dang lé, haí mù gyô nyi akô lhú?” ga taí bum akô.
²¹ Nghut kôlhang, góbang gi, “Dang shi pé gi, nat gang wang júng tô é byù taí é dang a nghut. Nat gang gi, myoq-jit sù lé, myoq wó lhoq myâng nhâng rá lhú?” ga taí bum akô nghut ri.

^a 10:16 Esai 56:8

Yudaq Byu Pé A Lumjínng Kô É Hkyô

- ²² Yerusalem wà mó má, Ap Nóng Poí^a jé bê nghut ri. Haú gi, gyoqmyò
- ²³ nám nghut ri. Haú hkún, Yesuq gi, haú noqkuq yhúm wàng mà é, Sholumon é Jirop má sô yông wún ri. Haú u lé, haú Yudaq byu pé gi, Yhâng é lhínghkyuq má lé zínng bùm kômù, “Nàng gi, ngamoq lé hkâ-myháng jé shoq úng-áng nhang nyì rã lúhú? Nàng, Hkrisduq nghut le gi, ngamoq lé san za taí kyô pyám laq.” ga taí akô.
- ²⁵ Yesuq gi, “Ngò, nungmoq lé taí kyo bê nghut lhê; nghut kôlhang, nungmoq a lumjínng kó nghut ri. Ngá Wâ é myìng mai, Ngò kut é laklaí kumlhá haú pé gi, Ngá é matú saksé hkám
- ²⁶ byì nyi ri. Nghut kôlhang, nungmoq gi, Ngá é sau a nghut kô é yanmai,
- ²⁷ a lumjínng kó nghut ri. Ngá é sau pé gi, Ngá é htê lé dat gyô akô; Ngò gi, yhangmoq lé sê lhê; yhangmoq le,
- ²⁸ Ngá htâng châng akô nghut ri. Ngò gi, yhangmoq lé, ahtum abyuq é asak byì é nghut mù, yhangmoq gi, hkâ-nhám le htên byoq kó rã a nghut; ó yuq èq le, yhangmoq lé, Ngá é loq mai wó lú
- ²⁹ yú rã a nghut. Yhangmoq lé, Ngá é loq má ap byi tô é sù, haú Ngá Wa gi, lhunghâng htoq má je gyaú Sù nghut lhê; ó yuq èq le, yhangmoq lé, Ngá Wâ
- ³⁰ é loq mai wó lú yú rã a nghut. Ngò eq haú Íwa gi, rayuq za nghut lhê.” ga tú taí ri.
- ³¹ Haú hkún, haú Yudaq byu pé gi, Yesuq lé, dú rã matú luqgok dum kui
- ³² akô. Nghut kôlhang, Yesuq gi, yhangmoq lé, “Haú Íwâ chyáng mà é laklaí kumlhá mó pé myo myo, Ngò, nungmoq lé tûn shit bê nghut lhê. Nungmoq, Ngo lé dú rã gi, hká lhúm é yanmai nghut akô lúhú?” ga myì ri.

- ³³ Haú Yudaq byu pé gi, “Ngamoq, Nang lé dú rã gi, haú pé hká lhúm é yanmai le a nghut; Nàng gi, byù rayuq nghut to lú, Garai Gasang nghut é đông taí whuí lú, Yhang lé rhoi dang taí é yanmai, dú rã nghú lhê.” ga tú taí akô.
- ³⁴ Haú hkún, Yesuq gi, yhangmoq lé, “Nungmoq gi, garaí pé nghut akô nghú, Ngò taí bê nghut lhê.”^b ga nungmoq é tarã má kã to lhê a nghut
- ³⁵ kó lúhú? Chyúmdang haú lé gi, a ge lhoq hpyoq pyâm é nghut lú, haú Garai Gasâng é mungdang lé wó yu é bang lé, ‘garaí pé’ gâ é nghut le gi,
- ³⁶ haú Íwa mai, Yhang é matú hkyin htoq yú lú, mingkan má nhang é Sù eq séng lú gi, hká đông nghú kó rã lúhú? ‘Ngò gi, Garai Gasâng é Yhangzo nghut lhê.’ nghú taí é yanmai, Ngò gi, Garai Gasang lé taí hpoí ri nghú, nungmoq, haí mù Ngo lé mara hún
- ³⁷ akô lúhú? Ngá Wâ é muzó pé lé, Ngò kut é a nghut jáng, Ngo lé hkálumjínng
- ³⁸ kó. Nghut kôlhang, Ngò, haú pé lé kut é nghut le gi, nungmoq, Ngo lé a lumjínng kôlhang, haú muzó pé lé lumjínng keq; haú hkún, haú Íwa gi, Ngò má nghut nyi é hkyô lé le, Ngò gi, haú Íwa má nghut nyi é hkyô lé le, nungmoq wó sé lú, sê gyo kó rã nghut
- ³⁹ lhê.” ga tú taí ri. Yhangmoq gi, Yhang lé chyup rã dum hen akô; nghut kôlhang, Yhang gi, yhangmoq é loq mai wó lut ló bê nghut ri.
- ⁴⁰ Hau htâng, Yesuq gi, haú Yodan làng he hpoq mà é, Yohan, wui-myhup hkám byì hi é jowò má ló jé ri. Haú má, Yhang nyi nyi é nghut
- ⁴¹ lú, byù myo myo gi, Yhâng chyáng lé jé bum akô. Yhangmoq gi, “Yohan gi, limik kumlhá a kut wú é nghut

^a 10:22 Ap Nóng Poí gâ é gi, Garai Gasâng é yhúm lé ap nóng lé gâ lhê. ^b 10:34 Hkya-on 82:6

kôlhang, shí yuq eq séng luí, Yohan taí é hkyô lhunglhang gi, têng ri.” ga⁴² taí bum akô. Haú jowò má, byù myo myo gi, Yesuq lé lumjínng bùm bekô nghut ri.

Lazaruq Shi Byuq É Hkyô

- 11** Ahkuí, Lazaruq gâ é byù rayuq gi, no nyi ri. Yhang gi, haú Mariq eq yhangnhá Mahtaq nhik nyi é² Behtani wà má é sù nghut lhê. Mariq haú gi, Yhumsing lé namngón-xù hut gyun luí, hkyí má yhang xam èq sùt byí é sù nghut ri; yhang gi, haú no nyi³ é Lazaruq é yhangnhá nghut ri. Haú mù, haú yhangnhá nhik gi, “Yhumsing ê, Nàng chyitdap é sù gi, no nyi ri.” ga, Yesuq chyáng ê taí nhang akô.
- ⁴ Yesuq gi, dang haú lé wó gyo jáng, “Nòhpyo haú gi, shí-nò a nghut. Haú Garai Gasâng é Yhangzo gi, hau é yanmai, hpungwup shing kang wó dan hù é hui sháng gaq ga, Garai Gasâng é hpungwup shing kang é matú dut é⁵ ru nghut lhê. Yesuq gi, Mahtaq eq yhanggu Mariq lé le, Lazaruq lé le,⁶ chyitdap ri. Haú su mù, Yhang gi, haú Lazaruq no nyi ri gâ é lé, wó gyô é hkún, haú Yhang nyi é jowò má, í nyí nyi tô ashí nghut ri.
- ⁷ Hau htâng, Yhang gi, Yhâng é chángzô pé lé, “Nga-nhúng gi, Yuda mau shut dum taú ló sháng.” ga taí ri.
- ⁸ Haú hkún, yhangmoq gi, “Rabai ê, hkú-yoq za, haú Yudaq byu pé, Nang lé luqgok èq dú sat rã da kô é nghut le nhing, ahkuí, haú shut dum taú ló rã lú?” ga Yhang lé myí akô.
- ⁹ Yesuq gi, “Nyí gi, hkyíng hkum raxe í hkum bo lhê a nghut kó lú?”^a Nyí má hkyô sô é sù gi, mingkan shi é

- maubó é yanmai myoq myàng luí,¹⁰ lengbat rã a nghut. Myín lé hkyô sô é sù kúm gi, maubó lé a wó é yanmai, lengbat lhê.” ga tú taí ri.
- ¹¹ Haú su ga taí é htâng má, Yhang, yhangmoq lé xoq taí kyô é gi, “Nga-nhúng é luzúm Lazaruq yhup myhí byuq bê nghut ri; nghut kô-lhang, Ngò gi, yhang lé ê nhaú toq rã nghut lhê.” gâ ri.
- ¹² Haú hkún, Yhâng é chángzô pé gi, “Yhumsing ê, yhang yhup myhí tô é nghut le gi, ge lò rã nghut lhê.” gâ¹³ taí akô. Yesuq gi, Lazaruq shi byuq bê hkyô lé taí é nghut ri; nghut kô-lhang, Yhâng é chángzô pé gi, gè gè yhup myhí tô é lé taí é su ngam pyâm akô nghut ri.
- ¹⁴ Haú mù luí, Yesuq, yhangmoq lé san za jáng taí kyô é gi, “Lazaruq gi,¹⁵ shi byuq bê nghut lhê. Ngò haú má a nyi záng é gi, nungmoq wó lumjínng rã matú nghut luí, nungmoq é matú Ngò gabú byí ri; yhang chyáng e ló sháng hkoi.” gâ ri.
- ¹⁶ Haú mù, haú Zozùm le gâ é Htomaq gi, gotú chángzô pé lé, “Nga-nhúng le, Yhang eq rahá shí sháng gaq, châng e ló sháng.” ga taí ri.

Haú Ê-nhá Nhik Lé, Yesuq Nhik Tíng É Hkyô

- ¹⁷ Yesuq gi, jé e é hkún, haú Lazaruq lé lup má kat pyâm é myi nyí nghut¹⁸ bê hkyô lé, lhom taí kyô akô. Behtani wà gi, Yerusalem wà mó eq í déng kô¹⁹ za wê lhùm ri. Haú mù, Yudaq byu pé myo myo gi, Mahtaq eq Mariq nhik é yhanggu shi byuq é yanmai, nhik tíng byi kó rã ga lé jé nyi bum akô nghut ri.
- ²⁰ Mahtaq gi, Yesuq jé lé lo é hkyô lé wó gyo jáng, htoq ê mù, Yhang lé é

^a 11:9 Nyí gi, hkyíng hkum raxe í hkum bo lhê a nghut kó lú? gâ é gi, ahkyíng a jé shimá, muzó nó é gi, a ge é nghut lhê gâ é nghut ri.

huí ri; nghut kôlhang, Mariq gi, yhûm má nyi tô ri.

- ²¹ Mahtaq gi, Yesuq lé, “Yhumsîng ê, Nàng, shî má nyi tô é ru nghut le gi, ²² ngá gu shi byuq râ a nghut. Nghut kôlhang, ahkuí le, Garai Gasâng chyáng Nàng haí dung kôlhang, Yhang byi râ nghut é lé, ngò sê lhê.” ga taí ri.
- ²³ Yesuq gi, yhang lé, “Nung gu, dum dui toq râ nghut lhê.” ga taí ri.
- ²⁴ Haú hkûn, Mahtaq gi, “Haú jihâtum buinyi má dum dui toq é hkûn, yhang le dum dui toq râ nghut é lé, ngò sê lhê.” ga tû taí ri.
- ²⁵ Haú hkûn, Yesuq gi, yhang lé, “Ngò gi, dum dui toq hkyô eq asak nghut lhê. Ngo lé lumjîng é sù gi, shi byuq ²⁶ kôlhang, dum dui râ nghut lhê. Asak dui nyi luí, Ngo lé lumjîng é sù ó yuq nghut kôle, hkâ-nhám le shi é hui râ a nghut. Nàng gi, dang shî lé lumjîng lhê lú?” ga taí ri.
- ²⁷ Haú hkûn, yhang gi, “Yhumsîng ê, ngò lumjîng lhê. Nàng gi, haú mingkan má jé lé lô râ nghut é, Garai Gasâng é Yhangzo, Hkrisduq^a nghut é lé, ngò lumjîng lhê.” ga, Yhang lé taí kyô ri.
- ²⁸ Yhang gi, haú su ga taí é htàng má, taú ló mù, yhanggu Mariq lé, tsik za wut yù luí, “Haú Sará jé tô ri; Yhang gi, nang lé myí nyi ri.” ga ²⁹ taí kyô ri. Mariq gi, haú lé wó gyo jáng, hân za toq mù, Yesuq chyáng ³⁰ ê bê nghut ri. Haú u lé, Yesuq gi, haú wâ hkaú má a wang ló shî e za, Mahtaq eq huí é jowò má ru nyi ³¹ tô ashî nghut ri. Haú yhúmhaú má, Mariq lé nhik tîng nyi é Yudaq byu pé gi, yhang hân za toq luí, htoq ló é lé myàng kôjáng, yhang, lup má ê ngaú râ dâ lhê abe ga, myit yù

kômù, yhang htàng châng e ló bum akò nghut ri.

- ³² Mariq gi, Yesuq nyi tô é jang má jé mù, Yhang lé myàng jáng, Yhâng é hkyí wang má ngóm gop to luí, “Yhumsîng ê, Nàng, shî má nyi tô é ru nghut le gi, ngá gu shi byuq râ a nghut.” ga taí ri.
- ³³ Yesuq gi, Mariq ngaú nyi é lé le, haú yhang eq rahá lé lo é Yudaq byu pé ngaú nyi kô é lé le, myàng jáng, Yhâng é myit má gyai yhang hkâm zo wuí é ³⁴ eq myit wui myit hke dut nyi ri. Haú mù, Yhang gi, “Yhang lé, hkâmá tô tô akò lú?” ga myi jáng, yhangmoq gi, “Yhumsîng ê, lé wú wú aq.” ga tû taí akò.
- ³⁵ Yesuq gi, ngaú bê nghut ri.
- ³⁶ Haú mù, haú Yudaq byu pé gi, “Wú keq, Yhang gi, Lazaruq lé, haú-í yhang chyit ri-nhung!” ga taí akò.
- ³⁷ Nghut kôlhang, ra-am gi, “Haú myoqjit sù lé, myoq wó lhoq myâng byí é Sù gi, shí yuq lé le, a shî lo shoq a wó kut é lú?” ga taí bum akò nghut ri.

Lazaruq Lé Lhoq Dui Toq É Hkyô

- ³⁸ Yesuq gi, Yhâng é myit má radàm dum gyai yhang hkâm zo wuí é eq, lup má lé jé ri. Lup haú gi, luqhkýung dong nghut luí, luqgok rachâm eq chí ³⁹ tô akò. Haú mù, Yhang gi, “Luqgok haú lé yu pyám keq.” ga taí ri.
- Haú hkûn, haú shi byuq su é yhâng-nhá Mahtaq gi, “Yhumsîng ê, yhang lé, haú má tô tô é myi nyí lháng nghut bê yanmai, ahkuí gi, bup nàm berâ nghut lhê.” ga taí ri.
- ⁴⁰ Haú mù, Yesuq gi, “Nàng, lumjîng é nghut le gi, haú Garai Gasâng é hpungwup shingkang lé, wó myâng râ

^a 11:27 Hkrisduq lé Mesaia le gâ lhê.

nghut lhê nghû, Ngò, nang lé taí kyô wú bê a nghut lhu?” ga taí ri.

⁴¹ Haú mù luí, yhangmoq gi, luqgok haú lé yu pyâm akô. Hau htâng, Yesuq gi, mauhkung shut tu wú luí, “Áwa ê, Nàng, Ngá é dang lé gyo byí é yanmai,

⁴² Ngò, Nang lé jeju hkya-ôn lhê. Nàng gi, hkâ-nhám le, Ngá é dang lé gyo byí nyi é lé, Ngò sê lhê; nghut kôlhang, Nàng, Ngo lé nhang kat é hkyô lé, shí má yap tô é bang lumjínng kó sháng gaq nghû, yhangmoq é matú, Ngò, isu nghû taí é nghut lhê.” ga taí ri.

⁴³ Yhang gi, haú su ga taí luí, “Lazaruq ê, htoq lô aq.” ga htê mó èq wut
⁴⁴ kat ri. Haú hkûn, haú shi byuq bê sù gi, yhâng é loq hkyí pé má pân èq htup yup to gû eq, yhâng é myoqdong má hpajet èq htup to gù htoq lo ri.

Haú mù, Yesuq gi, yhangmoq lé, “Yhang lé hpyi pyám byi mù, nhang kat keq.” ga taí ri.

Yesuq Lé Sat Pyám Râ Haq Dâ É Hkyô

Mht 26:1-5; Mrk 14:1-2; Luk 22:1-2

⁴⁵ Haú mù luí, Mariq chyáng lé kûn é Yudaq byu pé myo myo gi, Yesuq kut é hkyô lé myàng jáng, Yesuq lé
⁴⁶ lumjínng bùm bekô nghut ri. Nghut kôlhang, yhangmoq chyáng mâ é ra-am gi, haú Hparishe pè chyáng ló mù, Yesuq kut é hkyô lé, ló taí kyô akô.

⁴⁷ Haú mù, haú hkyangjong agyi pé eq Hparishe pé gi, Yudaq byin tú wapdoq^a zuphpong lé ji tsíng to mù, “Byù shí yuq gi, limik kumlhá myo myo kut shit nyi ri. Nga-nhúng, hkâsu kut le

⁴⁸ gè râ lhu? Nga-nhúng, Yhang lé haú su ru kut nyi nhang é nghut jáng, yuq hkangmó gi, Yhang lé lumjínng kó râ nghut lhê; haú hkûn, Romaq byu pé gi, jé lé mù, nga-nhúng é jowò eq

nga-nhúng é byuhú lé, lé lhoq htên pyám kó râ nghut lhê.” ga taí akô nghut ri.

⁴⁹ Haú hkûn, yhangmoq chyáng mâ é, haú zân má hkyangjong mó nghut nyi é sù, Kayahpaq gi, yhangmoq lé, “Nungmoq gi, haí lháng a sé kó nghut
⁵⁰ ri-nhung! Haú byuhú gón htên byoq byuq râ htoq má, byuhú hau é matú, byù rayuq shí hkâm byi le gi, nungmoq é matú je gè râ hkyô lé, nungmoq, a myit jé kó nghut ri.” ga taí kat ri.

⁵¹ Yhang haú su ga taí é gi, yhumsing myit dông a nghut e za, haú zân má, yhang gi, hkyangjong mó nghut é eq rajung za, haú Yudaq byuhú é matú, Yesuq shí hkâm byi râ nghut é hkyô
⁵² lé le, byuhú hau é matú baú a nghut e za, haú byo myín tô é, Garai Gasâng é yhangzô pé lé, shuí tsíng yù mù, rading ralhúum za dut nhâng râ matú, shí hkâm byi râ nghut é hkyô lé le,
⁵³ myiqhtoi dang taí é ru nghut lhê. Haú nyí mai, yhangmoq gi, Yesuq lé sat râ matú chôm da bekô nghut ri.

⁵⁴ Hau é yanmai, Yesuq gi, Yudaq byu pé gyoro má, de de a sô shit wún e za, haú mai htoq luí, haú yoso eq chyâng lhúm é mau mâ é, Ehprim gà é wà má ê mù, Yhâng é chángzô pé eq rahá nyi nyi ri.

⁵⁵ Haú Yudaq byu pé é Lhoqlhai Poí jé râ za nghut é hkûn, byù myo myo gi, Lhoqlhai Poí a jé shi má, lhoq san lhoq yúng hking dông yhumsing gùng lé lhoq sân-yúng yú râ matú, yosô wà pé mai, Yerusalem wà mó
⁵⁶ shut doq ló bum akô. Haú mù, yhangmoq gi, Yesuq lé ho nyi kô é nghut luí, haú noqkuq yhúm wàng má yap to uchyang, rayuq eq rayuq, “Nung-

^a 11:47 Yudaq byin tú wapdoq lé Grik dông gi, San-hedrin gà lhê.

moq, hkâsu wó myit akô lhú? Yhang gi, Poí má a lé lô râ gà lhê lhà?” ga
⁵⁷ myí lhúm bum akô. Nghut kôlhang, haú hkyangjong agyi pé eq Hparishe pé gi, Yesuq lé wó chyup yú râ matú, Yesuq hkâmá nyi é lé, sê é sù ó yuq nghut kôle, yhangmoq lé lo shit kyo râ lhê ga dangmó hkyó tô akô nghut ri.

**Yesuq, Namngón-xú
 But Byi Huí É Hkyô**

Mht 26:6-13; Mrk 14:3-9

12 Haú Lhoqlhai Poí jé râ hkyuq nyí râ ashí hkûn, Yesuq gi, Yhâng èq shi é mai lhoq dui toq yu é sù, Lazaruq nyi é Behtani wà má
² ló jé ri. Haú má, Yesuq lé hkunggâ é dông myinzang byi tsô akô; Mahtaq gi, zoshuq jáu ri; Lazaruq gi, haú Yesuq eq rahá siboí má zô zung nyí
³ bang mã é rayuq nghut ri. Haú hkûn, Mariq gi, haú nardu amyit mai za saí yu é, gyai hpaú é namngón-xú raxe í rûng kô yu lé mù, Yesuq é hkyí má hut gyun byi luí, yhâng é uxam èq sùt byí ri. Haú mù, yhâm haú gi, namngón-xú shôm byíng to bê nghut ri.
⁴ Nghut kôlhang, Yesuq lé ap pyám râ nghut é, Yhâng é chángzo rayuq nghut
⁵ sù, Yudaq Iskarut gi, “Haú myùng bang lé byí pyám râ matú, haú namngón-xú lé denari sum sho èq haí mù
⁶ a ûng pyâm é lhú?” ga taí ri. Yhang haú su ga taí é gi, myùng bang lé chiq byí é yanmai taí é a nghut, yhang gi, ngùn htung chùng sù nghut luí, haú má kat tô é ngùn lé, yhumsing é matú lhaq yu chùng chùng kut é, hkau sù nghut é yanmai taí é nghut ri.
⁷ Yesuq gi, “Nghut shang gaq; yhang gi, Ngo lé myhup yhum râ buinyi é

matú, namngón-xú shí lé hkong to
⁸ byí é nghut lhê. Haú myùng bang gi, nungmoq eq rahá hkâ-nhám le nyí râ nghut lhê; nghut kôlhang, Ngò gi, nungmoq eq rahá ayang nyi nyí râ sù a nghut.” ga tû taí ri.
⁹ Haú u lé, Yudaq byu pé ajùm ayò gi, haú má Yesuq nyi é lé sé kôluí, lé lo akô; haú bang gi, Yesuq é yanmai za lé kô é a nghut, haú Yhâng èq shí bê mai lhoq dui toq yu é Lazaruq lé, lé myâng naù kô é yanmai
¹⁰ le nghut ri. Haú mù, haú hkyangjong agyi pé gi, Lazaruq lé le, sat pyám râ
¹¹ matú chôm hpyé lhúm akô. Hkâsu mù gà le, yhâng é yanmai, haú Yudaq byu pé myo myo gi, Yesuq chyáng lhing ló kômù, Yhang lé lumjíng bûm kô é yanmai nghut ri.

**Yesuq, Yerusalem Wà Mó
 Má Wang E Lô É Hkyô**

Mht 21:1-11; Mrk 11:1-11; Luk 19:28-40

¹² Hau htang nyí, haú Poí má lé jé é byù moq mó gi, Yerusalem wà mó shut Yesuq jé doq ló é hkyô lé, wó
¹³ gyô bum akô. Haú mù, yhangmoq gi, byùm-haq pé yu chùng mù, Yhang lé ê tê uchyang,
 “Hosana!^a
 Haú Yhumsing é myèng mai jé lé lô Sù gi, hkungsô wó nyí sháng gaq ô!
 Haú Israelaq byu pè é Hkohkâm gi, hkungsô wó nyí sháng gaq!”^b
¹⁴ ga, taí garú bum akô nghut ri. Haú hkûn, Yesuq gi, logúng zo radu lé myàng luí, doq jî ri;
¹⁵ haú gi, “Zi-un byizo^c ê, hkâgyuq; wú keq, nungmoq é hkohkâm

^a 12:13 Hebre dang má, *hosana* gà é gi, “ahkuí hkyi yù aq” gà é nghut lhê. Nghut kôlhang, bun zo shí má gi, hkya-on dang dông chung é nghut lhê. ^b 12:13 Hkya-on 118:25-26 ^c 12:15 Hebre myíng dông *Zi-un byizo* gà é gi, Yerusalem mã é byu pé lé gà é nghut lhê.

gi, logúng zo má ji mù lé lo nyi ri.”^a

ga, kê tô é eq rajung za nghut ri.

¹⁶ Haú pé banshoq lé, Yhâng é cháng-zô pé gi, sâng-hi lé a sê gyo kó; nghut kôlhang, Yesuq gi, hpungwup shingkang dan hu huí é htâng má za sheq, haú pé gi, Yhang eq séng luí kê tô é hkyô lé le, haú eq rajung za, Yhang lé, yhangmoq mai kut bê hkyô lé le, bûn sê kat akô nghut ri.

¹⁷ Haú Yesuq gi, lup hkaú mã é Lazaruq lé wut luí, shi é mai lhoq dui toq yu é hkûn, Yhang eq rahá nghut é shiwa hpúng gi, haú hkyô lé, saksé

¹⁸ hkám byí nyi akô. Haú mù, byù myo myo gi, Yesuq tân shit é limik kum-lhá hau é hkyô lé, wó gyo kê é yan-mai, Yhang lé hui râ matú htoq e akô.

¹⁹ Hau é yanmai, haú Hparishe pé gi, “Wú keq, nga-nhúng, hkâsu yhang a ge kut lo nhung! Haú mingkan gón gi, Yhâng htâng châng bùm bekô.” ga, rayuq eq rayuq tái lhúm bum akô nghut ri.

**Yesuq, Yhang Shí Râ
Hkyô Lé Te Tái É Hkyô**

²⁰ Haú hkûn, noqkuq râ matú Poí mã doq ló é bang má, Grik pé ra-am le

²¹ bo tô akô. Yhangmoq gi, Galile mau, Bet-saida wà mó mã é Hpilip chyáng lé jé kômù, “Âhkaú ê, ngamoq gi, Yesuq lé myàng nau ri.” ga, dung

²² tôngbán akô. Haú mù, Hpilip gi, Andre lé, ê tái kyô ri; Andre eq yháng nhik gi, Yesuq lé, ê tái kyô akô.

²³ Haú mù, Yesuq gi, “Haú Byu Yhangzo gi, hpungwup shingkang dan hú é hui râ matú, ahkyíng jé bê

²⁴ nghut ri. Ngò, nungmoq lé teng za tái kôlé, sungso racham gi, myigùng mã gyó luí, shi byuq e za a nghut jáng,

acham roq za dut nyi râ nghut lhê. Nghut kôlhang, shi byuq é nghut le gi, ashi myo myo lhoq htoq râ nghut lhê.

²⁵ Haú yhumsing é asak lé chyitdap é sù gi, asak sùm byuq râ nghut lhê. Mingkan shí mã, haú yhumsing é asak lé a jú é sù kúm gi, ahtum abyuq é asak matú, yhumsing é asak lé wó sing to

²⁶ râ nghut lhê. Ngo lé dojaú é sù ó yuq nghut kôle, Ngá htâng cháng râ lhê; Ngò, hkâmá nyi le, Ngá é dui-nhâng zoshâng le nyi râ nghut lhê. Ngá Wa gi, haú Ngo lé dojaú é sù lé, shigyau râ nghut lhê.

²⁷ Ahkuí, Ngò, myit wuîhke nyi ri; Ngò hkâsu nghú tái râ lhi? ‘Áwa ê, ahkyíng shí mai Ngo lé lhoq lhut yù laq.’ nghú tái râ lhu? Nghut kôle, Ngò gi, ahkyíng shi é matú za sheq jé lé

²⁸ é ru nghut lhê. Áwa ê, Náng é myìng lé hpungwup shingkang dan hu nhâng aq hkoil!” ga tái ri.

Haú hkûn, “Ngò gi, Ngá é myìng lé hpungwup shingkang dan hu nhâng bê nghut luí, dum dan hu nhâng shirâ nghut lhê.” gâ é htê, mauhkung mai

²⁹ htoq lo ri. Haú mã nyi tô é byù moq mó gi, haú lé wó gyo kêjáng, “Maugum gum ri.” gâ bum akô; ra-am gi, “Yhang lé, maumang lagyo rayuq nyo ri.” ga tái bum akô nghut ri.

³⁰ Haú hkûn, Yesuq gi, “Danghtê shí gi, Ngá é matú a nghut, nungmoq é matú ru nghut lhê. Ahkuí gi, mingkan shí lé jéyáng râ ahkyíng nghut bê; mingkan shi é zau gi, ahkuí hkat htoq

³¹ pyâm é hui râ nghut lhê. Nghut kôlhang, Ngò gi, myigùng mai tu shap kat é huí é hkûn, byù lhunglhang bang lé, Ngá chyáng shê yù râ nghut lhê.”

³² ga tái ri. Yhang haú su ga tái é gi, Yhang hkâsu kut shí râ nghut é hkyô lé shit é nghut ri.

^a 12:15 Zhk 9:9

³⁴ Haú hkûn, haú byù moq mó gi, “Haú tarâ laiká má, Hkrisduq gi, ahtum abyuq dui nyì râ nghut lhê gâ é lé sheq, ngamoq wó gyô wú é ru nghut le nhîng, ‘Haú Byu Yhangzo gi, tu shap é hui ra râ nghut lhê.’ nghû, Nàng hkâsu kut wó taí lhê lúhú? Haú Byu Yhangzo gi, ó yuq nghut lhê lúhú?” ga, myî akô.

³⁵ Haú mù, Yesuq gi, yhangmoq lé, “Nungmoq chyáng, haú maubó joq nyì râ ahkyíng gi, a lûm myáng lo nghut ri. Mauchut gi, nungmoq chyáng a hkyit jé sháng gaq, nungmoq chyáng, haú maubó joq nyi ashî hkûn sô nyì keq; hkâsu mù gâ le, haú mauchut má sô nyi é sù gi, yhang hká shut e ló nyi é lé, a sé nghut ri.

³⁶ Nungmoq gi, maubó é yhangzô pé wó dut kó sháng gaq, haú maubó joq nyi ashî hkûn, haú lé lumjíng keq.” ga taí ri. Yesuq gi, dang haú ban taí jáng, yhangmoq chyáng mai htoq ló luí, haq byuq bê nghut ri.

**Yudaq Byu Pé, A Lumjíng
Ru Dut Nyí Kô É Hkyô**

³⁷ Yesuq gi, yhangmoq é hí má, limik kumlhá haú pé banshoq kut shit kô-lhang, yhangmoq gi, Yhang lé a lumjíng shi kó nghut ri. Haú gi,

“Yhumsíng ê, nga-nhûng é danglù lé, ó yuq wá lumjíng byí wú é lúhú? Haú Yhumsíng é loq^a gi, ó yuq lé htoq shit wú é lúhú?”^b

ga, myiqhtoi Esai-aq taí tô é dang lo dik é nghut ri.

³⁹ Yhangmoq a wó lumjíng kô é hkyô gi, Esai-aq taí é dang má,

⁴⁰ “Yhang gi, yhangmoq é myoqjí lé lhoq chit byi luí, yhangmoq é

i-myt lé lhoq htan to byi bê nghut ri;

haú mù, yhangmoq gi, myoqjí èq a wó myâng, i-myt èq a wó sé gyo, Ngò, yhangmoq lé yâ ge byi râ matú, a wó lhing taú lò kó dut râ nghut lhê.”^c

⁴¹ ga le bo tô é yanmai nghut lhê. Esai-aq gi, Yesuq é hpungwup shingkang lé myang é yanmai, Yhang eq sêng é hkyô lé, haú su ga taí é nghut ri.

⁴² Nghut kôlháng, haú uphkâng bang myo myo lháng gi, haú u má, Yesuq lé lumjíng bum akô. Nghut kôle, yhangmoq gi, Hparishe pé èq tarajong mai lhoq htoq pyâm é hui râ lé, gyuq kô é yanmai, yhangmoq lumjíng bê hkyô

⁴³ lé a yín yu bùm kó nghut ri. Hkâsu mù gâ le, yhangmoq gi, Garai Gasâng chyáng mâ é aróng lé, ô nau é htoq má, byu pé chyáng mâ é aróng lé, je ô nau kô é yanmai nghut ri.

⁴⁴ Haú mù, Yesuq, htê mó èq taí é gi, “Ngo lé lumjíng é sù gi, Ngo lé baú lumjíng é a nghut; haú Ngo lé nhang

⁴⁵ kat é Sù lé le, lumjíng é nghut lhê. Ngo lé myang é sù gi, haú Ngo lé nhang
⁴⁶ kat é Sù lé le myang é nghut lhê. Ngò gi, Ngo lé lumjíng é sù ó yuq le, mauchut hkaú má a nyì sháng gaq nghû, maubó dông mingkan má lé jé é nghut lhê.

⁴⁷ Ngò gi, Ngá é dang lé wó gyo luí, a châng é sù ó yuq lé le, jéyáng râ a nghut; hkâsu mù gâ le, Ngò gi, mingkan lé jéyáng râ matú jé lé é a nghut; haú mingkan lé hkyi yù râ matú sheq,

⁴⁸ jé lé é ru nghut lhê. Ngo lé he-ngik luí Ngá é dang lé a hap yu é sù lé, jéyáng râ Sù rayuq nyi lhê; Ngò taí é danghkun haú gi, haú jihtúm buinyi má, haú yuq lé mara byi râ nghut lhê.

^a 12:38 *Yhumsíng é loq* gâ é gi, Yhumsíng é hpungwup a-tsam lé gâ é nghut lhê.

^b 12:38 Esai 53:1 ^c 12:40 Esai 6:10

⁴⁹ Hkâsu mù gâ le, Ngò gi, Ngá é myit dông taí é a nghut; nghut kôlhang, Ngò haí taí râ eq hkâsu nghû taí râ lé gi, haú Ngo lé nhang kat é sù Íwa mai, Ngo lé hkunmó hkyô to bê nghut ⁵⁰ lhê. Haú Yhâng é hkunmó gi, ahtum abyuq é asak nghut é lé, Ngò sê lhê. Haú mù luí, Ngò, haí taí kôlé, haú Íwa mai Ngo lé taí kyô é lé za, taí é nghut lhê.” gâ ri.

Chángzô Pé É Hkyí Chi Byí É Hkyô

13 Haú Lhoqlhai Poí jé râ hí má za, Yesuq gi, Yhang, mingkan shí mai Yhâng Wâ chyáng htot ló râ ahkyíng jé bê hkyô lé, sê ri. Yhang gi, mingkan má nyi é, Yhâng é byu pé lé chyitdap nyi é nghut luí, jihítum jé shoq Yhâng é chyitdap myit lé shit râ nghut lhê.

- ² Myinzang zô nyi bùm kô é u lé, nat Tsadán gi, Simun é yhangzo Yudaq Iskarut chyáng, Yesuq lé ap pyám râ ³ myit kat byí to gû nghut ri. Yesuq gi, haú lhunglhang lé Íwa mai Yhâng é loq má ap byi to bê nghut é lé le, Yhang gi, Garai Gasâng chyáng mai lé é sù nghut luí, Garai Gasâng chyáng dum taú ló râ sù nghut é lé le, sê ri. ⁴ Haú mù, Yhang gi, zohpoq mai toq luí, Yhâng é bumó lé hkyut pyám mù, hpyidum má hpajet ralhúm èq hpyi- ⁵ hit hit tô ri. Hau htâng, Yhang gi, jirung má uchyam hut kat mù, Yhâng é chángzô pé é hkyí chi byi luí, haú Yhâng é hpyidum má hit tô é hpajet èq sut huí byí ri. ⁶ Yhang gi, Simun Petruq chyáng jé jáng, Simun Petruq gi, “Yhumsîng ê, Nàng gi, ngá hkyí lé chi byi râ nghut lhê lúhú?” ga myí ri. ⁷ Haú hkûn, Yesuq gi, “Ngò, haí kut nyi é hkyô lé, ahkuí, nàng sê gyo râ

a nghut; nghut kôlhang, htâng má sê gyo râ nghut lhê.” ga tû taí ri.

- ⁸ Petruq gi, “Ngá hkyí lé, Nàng, hkâ-nhám le wó chi byi râ a nghut.” ga taí jáng, Yesuq gi, “Nàng lé, Ngò a chi byí é nghut jáng, nàng gi, Ngò eq séng râ a nghut.” ga tû taí ri. ⁹ Haú hkûn, Simun Petruq gi, “Yhumsîng ê, haú su nghut jáng gi, ngá é hkyí lé baú za a nghut, ngá é loq eq ulhum lé le chi byi laq!” ga tû taí ri. ¹⁰ Yesuq gi, “Gùng chi bê sù gi, hkyí za chi jáng, ragùngdû é sanséng bê nghut ri. Nungmoq gi, sanséng bekô; nghut kôlhang, yuq hkangmó gi, san- ¹¹ sêng é a nghut.” ga tû taí ri. Hkâsu mù gâ le, Yhang gi, Yhang lé ap pyám râ sù ó yuq nghut é lé, sê é yanmai, “Nungmoq gi, sanséng é bang chyat a nghut.” ga taí é nghut ri. ¹² Yesuq gi, yhangmoq é hkyí lé ban chi byi jáng, Yhâng é bumó lé wut mù, Yhâng é jowò má ló dum zùng luí, yhangmoq lé myi é gi, “Nungmoq gi, ahkuí, ngò kut byí é hkyô lé, sê ¹³ gyo akô lúhú? Nungmoq, Ngo lé, ‘Sará’ ga le, ‘Yhumsîng’ ga le, wut kô é gi, a shut; hkâsu mù gâ le, Ngò gi, haú ¹⁴ yuq yhang nghut lhê. Ngò, nungmoq é Sará eq Yhumsîng nghut sù lhang, nungmoq é hkyí lé chi byí é nghut le gi, nungmoq le, rayuq eq rayuq é hkyí ¹⁵ lé chi byí lhum râ dut lhê. Nungmoq gi, Ngò, nungmoq lé kut byí é su kut kó sháng gaq nghû, Ngò, nungmoq lé ¹⁶ alik kut shit tô é nghut lhê. Ngò, nungmoq lé teng za taí kôlé, dui-nhâng zoshâng gi, yhumsîng htoq je kô é a nghut; lagyo gi, nhang kat é sù htoq je ¹⁷ kô é a nghut. Ahkuí, nungmoq gi, haú pé lé sé bekô nghut luí, châng kut kô é nghut jáng, hkungsô wó kó râ nghut lhê.

Yesuq Lé Ap Pyám Râ Lé, Te Taí É Hkyô

¹⁸ Ngò gi, nungmoq banshoq bang lé lhoq ang luí taí é a nghut; Ngò hkyin yu é bang lé gi, Ngò sê lhê. Nghut kô-lhang, ‘Haú ngá é muk lé bo zô é sù gi, ngo lé, yhang é hkyihtáng la-nhik èq nâng htíng râ nghut lhê.’^a gâ é Chyúmdang lé, lhoq dik râ matú ru nghut lhê.

¹⁹ Haú a dut htoq shimá, Ngò, nungmoq lé taí kyô nyi é gi, haú dut é hkûn, Ngò gi, haú Yuq^b nghut é lé, nungmoq wó lumjínng kó râ matú nghut lhê.

²⁰ Ngò, nungmoq lé teng za taí kôlé, Ngò nhang kat é sù lé, lhom hap yu é sù ó yuq nghut kôle, Ngo lé hap yu é nghut bê; Ngo lé hap yu é sù ó yuq nghut kôle, haú Ngo lé nhang kat é Sù lé hap yu é nghut bê.” gâ ri.

²¹ Yesuq gi, haú su ga taí é htâng má, myit wúhke nyi mù, saksé hkâm é gi, “Ngò, nungmoq lé teng za taí kôlé, nungmoq mâ é rayuq sù gi, Ngo lé ap pyám râ nghut lhê.” gâ ri.

²² Haú mù, Yhang é chángzô pé gi, ó yuq lé taí záng nyi é hkyô lé, rago a sé kô é yanmai, rayuq eq rayuq wú tsuq

²³ lhûm bum akô nghut ri. Haú Yesuq chyitdap é chángzo rayuq gi, Yesuq é tanghkoí nâm má leq nge zung tô ri.

²⁴ Haú mù, Simun Petruq gi, chángzo haú yuq lé, loq lik kat mù, “Yhang, ó yuq lé lhoq ang luí, taí nyi é hkyô lé, myi wú aq.” ga taí ri.

²⁵ Haú mù, chángzo haú gi, Yesuq é tanghkoí má saí leq nge zung mù, “Yhumsîng ê, haú gi, ó yuq nghut lhê lhú?” ga, Yhang lé myí ri.

²⁶ Yesuq gi, “Ngò, muk jap zo shí lé jum yù mù, byí é sù gi, haú yuq nghut lhê.” ga tû taí luí, muk jap zo haú lé jum yù mù, Simun é yhangzo Yudaq

²⁷ Iskarut lé byí ri. Yudaq gi, muk haú lé yù zo kat é eq, Tsadán gi, yhang chyáng wàng bê nghut ri.

Haú mù, Yesuq gi, “Nàng kut râ é hkyô lé, hân kut aq hkoí.” ga yhang

²⁸ lé taí kat ri. Nghut kôlhâng, yhang lé, Yesuq haú su ga haí mù taí é hkyô lé, zohpoq haú má nyi tô é bang gi, ra-

²⁹ yuq lháng a sê gyo kó nghut ri. Haú Yudaq gi, ngùn zum sù nghut é yanmai, ra-am gi, haú Poí má râ é hkyô lé, ê wuí râ matú, Yesuq taí ri ga luí le, myùng bang lé rajung jung byí nhang ri ga luí le, myit yu bum akô

³⁰ nghut ri. Yudaq gi, muk haú lé lhom yù eq, htoq ló byuq bê nghut ri. Haú u gi, mauchut bê nghut ri.

Petruq He-ngik Pyám Râ Lé, Yesuq Te Taí É Hkyô

Mht 26:31-35; Mrk 14:27-31; Luk 22:31-34

³¹ Haú yuq htoq ló byuq jáng, Yesuq taí é gi, “Ahkuí, haú Byu Yhangzo gi, hpungwup shingkang dan hû é nghut luí, Garai Gasang gi, haú Byu Yhangzô é yanmai, hpungwup shingkang dan hu bê nghut ri. Garai Gasang gi, haú Byu Yhangzô é yanmai, hpungwup shingkang dan hû é nghut jáng, Yhang le, Yhang má haú Zo lé hpungwup shingkang dan hu nhâng râ nghut lhê; radá dâm dan hu nhâng râ nghut lhê.

³² Ngá zo pé ê, Ngò, nungmoq eq rahá nyi râ gi, razup za ru nghut alô. Nungmoq gi, Ngo lé hô kó râ nghut lhê; nghut kôlhâng, ‘Ngò ló é jang má, nungmoq wó jé kó râ a nghut.’ ngû, haú Yudaq byu pé lé, Ngò taí é eq rajung za, ahkuí, nungmoq lé le, Ngò taí lhê.

³³ Ngò, nungmoq lé, hkunmó asik byi to kô lé, nungmoq yhangchang chyit-

^a 13:18 Hkya-on 41:9 ^b 13:19 Haú Yuq gâ é gi, Hkrisduq lé gâ é nghut lhê.

dap lhum keq. Ngò, nungmoq lé chytidap é su, nungmoq yhangchang chytidap lhum râ dut lhê. Nungmoq yhangchang chytidap lhum kô é nghut jáng, nungmoq gi, Ngá é chángzô pé nghut é hkyô lé, byù lhunglhang bang sé kó râ nghut lhê.” gâ ri.

³⁶ Haú hkûn, Simun Petruq gi, “Yhumsîng ê, Nàng, hká shut ló râ lú?” ga, Yhang lé myi jáng, Yhang gi, “Ngò ló é jang má, nungmoq, ahkuí a wó châng kó râ nghut lhê. Nghut kôlhang, htâng má gi, nungmoq cháng ra kó râ nghut lhê.” ga tû taí ri.

³⁷ Petruq gi, “Yhumsîng ê, haí mù luí, ahkuí ngò Náng htâng a wó châng é lú? Ngò gi, Náng é matú, shí hkám râ rì rì nghut lhê.” ga taí ri.

³⁸ Haú mù, Yesuq taí é gi, “Nàng gi, gè gè yhang, Ngá é matú shí hkám râ lú? Ngò, nàng lé teng za taí lé, woq a tûn shimá, nàng, Ngo lé sum dâm he-ngik pyám râ nghut lhê.

Yesuq, Yhâng É Chángzô Pé Lé Nhik Tîng É Hkyô

14 Nungmoq é i-myt nhiklhum lé, myit wui myit hkê hkâdut nhâng kó. Garai Gasang lé lùm ² keq; Ngo lé le lùm keq. Ngá Wâ é yhûm má, nyi jowò myo myo joq lhê; a joq é ru nghut le gi, noq mai, Ngò, nungmoq lé taí kyo râ nghut lhê. Ngò, haú má ló é gi, nungmoq é nyi jowò ló hên lág râ matú ru ³ nghut lhê. Ngò gi, ló mù, nungmoq é matú nyi jowò ló hen é nghut jáng, Ngò nyi é jang má nungmoq le wó nyi shoq, Ngò eq rahá nyi râ matú, Ngò dum taú lé mù, nungmoq lé, lé ⁴ shuí yù râ nghut lhê. Ngò ló é jang má jé é hkyô lé, nungmoq sê lhê.” gâ ri.

Yesuq Za Hkyô

⁵ Haú hkûn, Htomaq gi, Yhang lé, “Yhumsîng ê, Nàng hká shut ló é lé lhang, ngamoq a sê le nhîng, hkyô haú lé, ngamoq hkâsu kut wó sé râ lú?” ga myí ri.

⁶ Yesuq gi, “Ngò gi, hkyô nghut lhê; haú tengmán hkyô eq asak le nghut lhê. Ngò mai za a nghut jáng, ó yuq ⁷ le, Íwâ chyáng wó jé é a nghut. Nungmoq, gè gè yhang, Ngo lé sé kô é nghut le gi, Ngá Wa lé le, nungmoq sé kó râ nghut lhê. Ahkuí mai, nungmoq gi, Yhang lé sé kô é htoq agó, myàng le myang wú bekô nghut lhê.” ga tû taí ri.

⁸ Haú hkûn, Hpilip gi, “Yhumsîng ê, ngamoq lé, haú Íwa tûn shit laq, haú hkûn, ngamoq nhik shí râ nghut lhê.” ga taí ri.

⁹ Yesuq tû taí é gi, “Hpilip ê, Ngò, nungmoq eq shí myáng lhang nyi lò bê le nhîng, nàng, Ngo lé a sé lú? Ngo lé myang é sù gi, haú Íwa lé myàng bê nghut ri; haú nghut le nhîng, ‘Ngamoq lé, haú Íwa tûn shit laq.’ ngû, ¹⁰ nàng hkâsu wó taí lhê lú? Ngò gi, haú Íwa má nghut nyí luí, haú Íwa gi, Ngò má nghut nyi é hkyô lé, nàng a lumjîng lú? Ngò, nungmoq lé taí é dang haú pé gi, Ngá é myit mai taí é a nghut; haú Ngò má lúng nyi é ¹¹ Íwa sheq, Yhâng é mù zuí nyi é ru nghut lhê. Ngò gi, haú Íwa má nghut nyí luí, haú Íwa gi, Ngò má nghut nyi lhê ngû é lé lumjîng keq; haú a nghut jáng, kut shit é limik kumhá pé dông za lhang, lumjîng keq. ¹² Ngò, nungmoq lé teng za taí kôlé, Ngo lé lumjîng é sù gi, Ngò kut é muzó lé kut râ nghut lhê. Ngò gi, haú Íwâ chyáng ló râ nghut é yanmai, haú yuq gi, hau htoq je kô é muzó pé lé lhang kut râ nghut lhê.

¹³ Haû Yhangzô é yanmai, Íwâ é hpungwup shingkan wó hû ló shoq, Ngá é myìng lé lang luí, nungmoq haí jung dung kôlhang, Ngò gyo byi râ nghut
¹⁴ lhê. Nungmoq gi, Ngá é myìng lé lang luí, haí dung kôlhang, Ngò gyo byi râ nghut lhê.

Choyiýung Woi-nyí Byi Râ Danggidiq

¹⁵ Nungmoq gi, Ngo lé chyitdap kô é nghut jáng, Ngò hkyô tô é hkunmó pé
¹⁶ lé, cháng kó râ nghut lhê. Haû Íwa gi, nungmoq eq ahtum abyuq nyi nyi râ nghut é, hpaqchyí byi Sû gotû rayuq, nungmoq lé byi râ matú, Ngò gi, haû Íwa lé dung râ nghut lhê.
¹⁷ Haú yuq gi, tengmán é Woi-nyí nghut lhê. Haû mingkan gi, Woi-nyí haû lé a myàng a sê é yanmai, Yhang lé a wó hap yu é nghut lhê. Nghut kôlhang, Yhang gi, nungmoq eq rahá nyi nyi é nghut luí, nungmoq má nyi to râ Sû nghut é yanmai, nungmoq
¹⁸ gi, Yhang lé sê akô. Ngò gi, nungmoq lé, chuizô pé dông pyâm to râ a nghut; nungmoq chyáng Ngò dum
¹⁹ jé lé râ nghut lhê. Adê myáng má, haû mingkan gi, Ngo lé a myàng lo râ nghut lhê; nghut kôlhang, nungmoq gi, Ngo lé myàng kó râ nghut lhê. Hkâsu mù gâ le, Ngò gi, asak dui nyi é nghut mù, nungmoq le duì kó
²⁰ râ nghut lhê. Ngò gi, Ngá Wâ chyáng nghut nyi é lé le, nungmoq gi, Ngò má nghut nyi é lé le, Ngò gi, nungmoq má nghut nyi é lé le, haú buinyi
²¹ má, nungmoq sé kó râ nghut lhê. Ngá é hkunmó pé lé wó mù, châng kut é sù ó yuq nghut kôle, Ngo lé chyitdap é sù nghut ri. Ngo lé chyitdap é sù lé gi, Ngá Wa chyitdap râ nghut lhê; Ngò le, haú yuq lé chyitdap luí, Ngá gûng lé yhang, yhang lé shit râ nghut lhê.” gâ ri.

²² Hau htàng, (Yudaq Iskarut a nghut sù) Yudaq gi, “Yhumsîng ê, Nàng gi, haû mingkan lé Náng gûng a shit e za, ngamoq lé shit râ nghut é gi, haí mù nghut lhê lú?” ga myí ri.

²³ Haú hkûn, Yesuq tû taí gi, “Rayuq yuq, Ngo lé chyitdap é nghut le gi, Ngá dang lé gyo râ nghut lhê. Ngá Wa le, haú yuq lé chyitdap râ nghut luí, Ngá hpe gi, haú yuq chyáng lé mù,
²⁴ yhang eq rahá nyi râ nghut lhê. Ngo lé a chyitdap é sù gi, Ngá dang lé gyo râ a nghut. Nàng wó gyô é dang shí pé gi, Ngá myit mai taí é a nghut; dang haú pé gi, Ngo lé nhang kat é Sû, haû Íwâ é ru nghut lhê.

²⁵ Ngò gi, shí pé banshoq lé, nungmoq eq rahá nyi tô ashí u lé taí bê nghut
²⁶ lhê. Nghut kôlhang, Ngá é myìng dông, haû Íwa nhang kat râ nghut é, hpaqchyí byi Sû nghú é, haû Choyiýung Woi-nyí gi, nungmoq lé, jung hkanmó mhoq byi râ eq, Ngò, nungmoq lé taí kyo bê hkyô lunglhang, nungmoq lé lhoq pun râ nghut lhê.

²⁷ Ngò gi, nungmoq chyáng, nguínón hkyô tô to byi bê; Ngá é nguínón hkyô, Ngò, nungmoq lé byí é nghut lhê. Ngò gi, mingkan byí é dông, nungmoq lé byí é a nghut. Nungmoq é i-myt nhiklum lé, myit wui myit hke é eq gyuq kyûm é hkâdut nhâng kó.

²⁸ ‘Ngò gi, ló byuq luí, nungmoq chyáng dum taú lé râ nghut lhê.’ nghú, Ngò taí é lé, nungmoq wó gyô yù bê nghut lhê. Nungmoq, Ngo lé chyitdap kô é nghut le gi, haû Íwâ chyáng Ngò ló râ nghut é hkyô lé, nungmoq gabú kó râ nghut lhê; hkâsu mù gâ le, haû Íwa gi, Ngá htoq je ko Sû
²⁹ nghut lhê. Haû dut é hkûn, nungmoq lumjîng kó sháng gaq nghú, ahkuí, haú a dut shimá, Ngò, nungmoq lé taí

³⁰ kyô é nghut lhê. Ahkuî mai, Ngò gi, nungmoq lé, dang myo myo wó nyô râ a nghut lo; hkâsu mù gâ le, mingkan shi é zau gi, jé lé lo nyî bê nghut ri. Haú yuq gi, Ngo lé up râ ahkáng haí a
³¹ wó é sù nghut ri. Nghut kôlhang, haú Íwa lé Ngò chyitdap é hkyô, mingkan sé sháng gaq nghû, Ngò gi, Ngá Wa hkyô tô é hkunmó eq roq za kut nyi lhê.

Toq keq, e ló sháng hkoi.

Tsibiyiq Nuî Eq Akoq Pê É Hkyô

15 Ngò gi, haú tsibiyiq nuî akyîng nghut lhê; Ngá Wa gi, tsibiyiq
² hkyâm yhumsîng nghut lhê. Yhang gi, ashi a zuí é akoq hkanmó lé, Ngá chyáng mai kyik pyám luí, ashi zuí é akoq hkanmó lé kúm gi, ashi je myo zui sháng gaq ga, shang pyám byî ri.
³ Nungmoq gi, Ngò, nungmoq lé taí é mungdang hau é yanmai, sanséng gû
⁴ nghut bekô nghut ri. Ngò má nyi nyî keq; Ngò le, nungmoq má nyi nyî râ nghut lhê. Akoq hkanmó gi, tsibiyiq nuí má nui nyi é za a nghut jáng, yhang baú ashi wó zuí é a nghut. Haú eq rajung za, nungmoq le, Ngò má nyi nyi e za a nghut jang, ashi wó zui kó râ a nghut.
⁵ Ngò gi, tsibiyiq nuí nghut lhê; nungmoq gi, akoq pé nghut akô. Byù rayuq yuq, Ngò má nyi nyi é nghut luí, Ngò gi, yhang má nyi nyi é nghut jáng, haú yuq gi, ashi myo myo zui râ nghut lhê; hkâsu mù gâ le, Ngò mai gang jáng, nungmoq gi, haí le a wó kut kô
⁶ é nghut lhê. Ngò má a nyi nyi é sù gi, haú dú pyâm é hui luí, kyuq shi byuq é akoq eq wuí ri; haú sù é akoq pé gi, byu pé èq guq yù mù, myihkyóm má dú kat pyâm é hui luí, nyé gyó byuq
⁷ râ nghut lhê. Nungmoq gi, Ngò má nyi nyi luí, Ngá é dang pé gi, nungmoq má

bo nyi é nghut le gi, nungmoq ô nau é haí nghut kôlhang, dung keq; haú hkûn, nungmoq lé byi râ nghut lhê.

⁸ Nungmoq gi, haú ashi ga-myhó zuí é dông, Ngá Wá é hpungwup shingkan lé lhoq htoq shit é nghut luí, Ngá é chángzô pé nghut é hkyô lé tân shit nyî bekô nghut ri.

⁹ Haú Íwa gi, Ngo lé chyitdap é su, Ngò gi, nungmoq lé chyitdap é nghut lhê. Ahkuî, Ngá é chyitdap myit má

¹⁰ gîng nyî keq. Ngò gi, Ngá Wá é hkunmó lé châng é nghut luí, Yhâng é chyitdap myit má gîng nyi é su, Ngá é hkunmó lé, nungmoq châng nyi kô é nghut jáng, nungmoq gi, Ngá é chyitdap myit má gîng nyi kó râ nghut lhê.

¹¹ Nungmoq má Ngá é gabú hkyô joq nyi râ eq, nungmoq é gabú hkyô wó byîng jup râ matú, Ngò, nungmoq lé, dang

¹² shí pé taí é nghut lhê. Ngò, nungmoq lé chyitdap é su, nungmoq yhangchang chyitdap lhum keq; haú gi, Ngá

¹³ é hkunmó nghut lhê. Haú yhumsing é luzúm wui é matú, yhumsing é asak ap byî pyâm é chyitdap myit htoq kô é, chyitdap myit gi, ó yuq chyáng le a

¹⁴ bò nghut ri. Ngò hkyô tô é hkunmó pé lé, nungmoq châng kut é nghut jáng, nungmoq gi, Ngá é luzúm wuí

¹⁵ nghut bekô. Ngò gi, Ngá Wá chyáng mai Ngò wó gyô yu é hkyô lhunglháng, nungmoq lé sé nhâng bê nghut é yanmai, nungmoq lé, dui-nhâng zo-

shâng wui nghû, a wut lô e za, luzúm wuí nghû wut é nghut lhê; hkâsu mù gâ le, dui-nhâng zoshâng gi, yhâng

yhumsîng hpô é muzó lé a châng sé
¹⁶ nghut ri. Nungmoq, Ngo lé hkyin yu é a nghut, Ngò sheq, nungmoq lé, htoq e ló mù, gîng nyi é ashi zui râ matú

hkyin masat tô é ru nghut lhê. Hau hkûn sheq, Ngá é myîng lé lang mù, haú Íwá chyáng nungmoq haí jung

dung kôle, Yhang byi râ nghut lhê.
¹⁷ Nungmoq yhangchang chyitdap lhum keq; haû gi, Ngá é hkunmó nghut lhê.

**Haû Mingkan Gi, Chángzô
 Pé Lé A Jú É Hkyô**

¹⁸ Haû mingkan, nungmoq lé a jú é nghut jáng, Ngo lé hí a jú kut bê nghut
¹⁹ é lé, sé nyi keq. Nungmoq gi, haû mingkan eq sêng é bang nghut é nghut jáng, haû mingkan gi, yhang eq sêng é bang nungmoq lé chyitdap râ nghut lhê. Nghut kôlhang, nungmoq lé gi, Ngò, haû mingkan mai hkyin htoq yû bê nghut luí, nungmoq gi, haû mingkan eq a séng lo kô é yanmai, mingkan gi, nungmoq lé a jú é nghut ri.
²⁰ ‘Dui-nhâng zoshâng gi, yhâng é yhum-sing htoq je kô é a nghut.’ nghû, Ngò, nungmoq lé taí é dang pé lé bûn nyi keq. Ngo lé lhang, yhangmoq zing-rí yû bekô nghut le gi, nungmoq lé le, zing-ri kó râ nghut lhê. Ngò mhoqshit é hkyô lé, yhangmoq cháng kô é nghut le gi, nungmoq mhoqshit é lé
²¹ le, cháng kó râ nghut lhê. Nghut kôlhang, yhangmoq gi, Ngá é mying é yanmai, nungmoq lé haû su kut kó râ nghut lhê; hkâsu mù gâ le, haû Ngo lé nhang kat é Sû lé, yhangmoq a sé
²² kôluí nghut ri. Yhangmoq lé, Ngò a lé nyo wú é nghut le gi, yhangmoq mara bò kó râ a nghut; nghut kôlhang, ahkuí gi, yhangmoq mara wó
²³ taí hkyut râ a nghut lo. Ngo lé a jú é sù
²⁴ gi, Ngá Wa lé le a jú é sù nghut ri. Haû ó yuq lhang a wó kut é muzó lé, Ngò, yhangmoq chyáng a kut é nghut le gi, yhangmoq mara bò kó râ a nghut; ahkuí kúm gi, laklaí kumlhá haû pé lé yhangmoq myang nyi kôlhang, Ngò
²⁵ eq Ngá Wa lé a jú kô é nghut ri. Haû

gi, ‘Yhangmoq gi, jungúyô má Ngo lé a jú kut akô nghut ri.’^a ga, yhangmoq é tarâ má kê tô é dang lé lhoq dik é nghut ri.

²⁶ Haû Íwâ chyáng mâ é, Ngò nhang kat râ nghut é, Íwâ mai htoq lé lo é tengmán é Woi-nyí nghut é, haû hpaqchyí byi Sû jé lé é hkûn, Ngá é hkyô
²⁷ lé saksé hkám byi râ nghut lhê. Nungmoq le, Ngò eq rahá sâng-hi mai nyi bekô nghut é yanmai, saksé hkám byi ra kó râ nghut lhê.

16 Nungmoq gi, myit lingbat jowò a joq kó sháng gaq nghû, haû pé banshoq lé, Ngò, nungmoq
² lé taí kyo bê nghut lhê. Yhangmoq gi, nungmoq lé, tarajong mai hkat htoq pyám kó râ nghut lhê; ó yuq nghut kôle, yhang mai nungmoq lé sat pyâm é hkûn, yhang gi, haû dông mai Garai Gasang lé dojaú nyi lhê ga myit yu é ahkyíng,
³ gè gè yhang, jé râ nghut lhê. Yhangmoq gi, haû Íwâ lé le, Ngo lé le, a sé kô é yanmai, haû su kut kó râ nghut
⁴ lhê. Nghut kôlhang, nungmoq lé, Ngò sidiq byí é hkyô lé, ahkyíng jé jáng nungmoq bûn nyi kó sháng gaq nghû, Ngò haû hkyô taí kyô é nghut lhê. Ngò gi, nungmoq eq rahá nghut nyi é yanmai, haû hkyô lé, hí hkûn nungmoq lé a taí kyô é nghut lhê.

Chyoiyúng Woi-nyí é muzó

⁵ Nghut kôlhang, ahkuí, Ngò gi, Ngo lé nhang kat Su chyáng ló râ nghut lhê. Nghut kôlhang, nungmoq ó yuq le, ‘Nàng, hká shut ló râ lú?’ ga, Ngo
⁶ lé a myi kó nghut ri. Ngò, nungmoq lé, haû hkyô pé taí kyô é yanmai, nungmoq é i-myt unghkaú má iyon
⁷ hkyô byíng to bekô nghut ri. Nghut

^a 15:25 Hkya-on 35:19, 69:4

kôlhang, Ngò, nungmoq lé teng za tai kôlé, Ngò ló byuq é gi, nungmoq é matú je gè râ hkyô ru nghut lhê. Ngò ló byuq e za a nghut jáng, haû hpaq-chyî byi Sû gi, nungmoq chyáng lé râ a nghut; Ngò ló jáng sheq, Yhang lé, Ngò, nungmoq chyáng nhang kat⁸ byi râ nghut lhê. Yhang jé lé é hkûn, Yhang gi, haû mara wó é eq séng luí le, dingmán hkyô eq séng luí le, tarâ jéyáng hkyô eq séng luí le, haû ming-⁹ kan lé tân shit râ nghut lhê. Haû yubak mara wó é eq séng luí ga jang, byu pé gi, Ngo lé a lumjínng kô é yanmai nghut ri. Haû dingmán hkyô eq séng luí ga jang, Ngò gi, haû Íwâ chyáng ló râ nghut luí, nungmoq, Ngo lé a myàng lo kó râ nghut é yanmai¹¹ nghut ri. Haû tarâ jéyáng hkyô eq séng luí ga jang, mingkan shi é zau gi, mara byí é huí é nghut é yanmai nghut ri.

¹² Ngò gi, nungmoq lé tái râ hkyô myo myo wó ashî; nghut kôlhang, ahkuí, nungmoq wó hkâm kó râ a¹³ nghut. Nghut kôlhang, haû tengmán é Woi-nyí jé lé é hkûn, Yhang gi, tengmán hkyô lunglhang lé shuí sé râ nghut lhê. Yhang gi, Yhâng myit dông tái râ a nghut; Yhang, wó gyô yu é hkyô lé za tái luí, dut lò râ hkyô pé lé le, nungmoq chyáng tái¹⁴ pyô râ nghut lhê. Yhang gi, Ngò wó é lé, yù mù, nungmoq lé tái kyô é eq sé nhang é dông, Ngá é hpungwup shingkan lé hú ló nhâng râ¹⁵ nghut lhê. Haû Íwa wó é lunglhang gi, Ngá é chyat nghut lhê. Hau é yanmai, haû Woi-nyí gi, Ngò wó é lé yù mù, nungmoq lé sé nhâng râ nghut lhê nghû, Ngò tái é nghut lhê.

¹⁶ Adê myáng má, nungmoq gi, Ngo lé a myàng lo kó râ nghut lhê; hau htâng,

dum adê myáng má, nungmoq gi, Ngo lé myàng kó râ nghut lhê.” gâ ri.

**Changzô Pê É Iyon Hkyô Gi,
Gabú Hkyô Taú Dut Râ**

¹⁷ Yhâng é chángzô pé ra-am gi, “Adê myáng má, nungmoq gi, Ngo lé a myàng lo kó râ nghut lhê; hau htâng, dum adê myáng má, nungmoq gi, Ngo lé myàng kó râ nghut lhê.” gâ é eq ‘Ngò gi, Íwâ chyáng ló râ nghut é yanmai nghut lhê.’ ga, Yhang tái é gi, hái jung gá nau é nghut lhê lú?” ga, rayuq eq rayuq myí lhúm bum akô.¹⁸ Hau htoq agó, yhangmoq gi, “Adê myáng má, gâ é gi, Yhang hái jung gá nau lhê lú? Nga-nhúng gi, Yhang hái tái nau é lé a sê gyo.” ga, tái lhúm bum akô nghut ri.

¹⁹ Yesuq gi, yhangmoq myi nau kô é hkyô lé sê ri; haû mù, Yhang, yhangmoq lé tái é gi, “Adê myáng má, nungmoq gi, Ngo lé a myàng lo kó râ nghut lhê; hau htâng, dum adê myáng má, nungmoq gi, Ngo lé myàng kó râ nghut lhê.” nghû, Ngò tái é lé, hái jung gá nau lhê laq nghû, rayuq eq rayuq²⁰ myi lhum nyi akô lú? Ngò, nungmoq lé teng za tái kôlé, haû mingkan gi, gabú nyi é u lé, nungmoq gi, ngaú é eq iyon yón é hui kó râ nghut lhê. Nungmoq gi, iyon yón é hui kó râ nghut lhê; nghut kôlhang, nungmoq é iyon hkyô gi, gabú hkyô taú dut râ nghut lhê.

²¹ Myiwe gi, zoshâng hkû râ nghut jáng, zohkû-nò nò râ ahkyíng jé bê nghut é yanmai, myit chiq nyi ri; nghut kôlhang, zoshâng lé wó hku htoq kat é hkûn gi, mingkan htoq má zoshâng rayuq wó hku to bê nghut luí, yhang gabú é yanmai, haû no hpu é hkyô²² lé a bun byuq lo nghut ri. Haû eq rajung za, ahkuí gi, nungmoq iyon yón é ahkyíng nghut ri; nghut kôlhang, Ngò,

nungmoq lé dum huí é hkûn, nungmoq gi, gabú kó râ nghut lhê; nungmoq é gabú hkyô haú lé, nungmoq chyáng mai ó yuq èq le wó yu pyám

²³ byi râ a nghut. Haú buinyì má, nungmoq gi, Ngo lé, haí le a dung lo kó râ nghut lhê. Ngò, nungmoq lé teng za taí kôlé, nungmoq gi, Ngá myíng lang luí, Ngá Wâ chyáng haí dung

²⁴ kôle, Yhang byi râ nghut lhê. Ahkuí jé shoq, nungmoq gi, Ngá myíng lé lang luí, haí le a dúng wú shi kó nghut ri. Dung keq, haú hkûn, nungmoq myang hap yù kó râ nghut luí, nungmoq é gabú hkyô gi, byíng jup lò râ nghut lhê.

²⁵ Ngò gi, nungmoq lé, dangtú dông haú pé taí kyo bê nghut lhê; nghut kôlhang, Ngò gi, dangtú a chûng lô e za, haú Íwa eq sêng é hkyô, nungmoq lé san za taí kyô é ahkyíng jé râ

²⁶ nghut lhê. Haú buinyì má, nungmoq gi, Ngá é myíng lé lang luí dung kó râ nghut lhê. Ngò gi, nungmoq é matú, haú Íwâ chyáng dung byi râ nghut taí

²⁷ nyi é a nghut. Hkâsu mù gâ le, nungmoq gi, Ngo lé chyitdap kô é eq, Ngò gi, Íwa Garai Gasâng chyáng mai jé lé é Sû nghut é lé, nungmoq lumjíng kô é yanmai, haú Íwa yhang, nungmoq lé chyitdap é nghut lhê. Ngò gi, haú Íwâ chyáng mai htoq lé mù, mingkan má lé jé wang é nghut lhê; ahkuí, Ngò gi, mingkan mai htoq mù, haú Íwâ chyáng dum taú lò râ nghut lhê.” gâ ri.

²⁸ Ngò gi, nungmoq lé, dangtú dông haú pé taí kyo bê nghut lhê; nghut kôlhang, Ngò gi, dangtú a chûng lô e za, haú Íwa eq sêng é hkyô, nungmoq lé san za taí kyô é ahkyíng jé râ

²⁹ nghut lhê. Haú buinyì má, nungmoq gi, Ngá é myíng lé lang luí dung kó râ nghut lhê. Ngò gi, nungmoq é matú, haú Íwâ chyáng dung byi râ nghut taí

³⁰ nyi é a nghut. Hkâsu mù gâ le, nungmoq gi, Ngo lé chyitdap kô é eq, Ngò gi, Íwa Garai Gasâng chyáng mai jé lé é Sû nghut é lé, nungmoq lumjíng kô é yanmai, haú Íwa yhang, nungmoq lé chyitdap é nghut lhê. Ngò gi, haú Íwâ chyáng mai htoq lé mù, mingkan má lé jé wang é nghut lhê; ahkuí, Ngò gi, mingkan mai htoq mù, haú Íwâ chyáng dum taú lò râ nghut lhê.” gâ ri.

³¹ Haú hkûn, Yesuq é chángzô pé gi, “Ahkuí, Nàng gi, dangtú a chûng é dông, san za taí kyô nyi é nghut bê!

³² Nàng gi, lunglhang lé sê é sù nghut é lé le, Nàng lé, ó yuq èq le dangmyi myi nó a râ é hkyô lé le, ahkuí, ngamoq wó sé bê. Hau é yanmai, Nàng gi, Garai Gasâng chyáng mai lé é sù

nghut é lé, ngamoq lumjíng lhê.” ga taí bum akô.

³¹ Haú hkûn, Yesuq tû taí é gi, “Nungmoq, ahkuí lumjíng bekô lúh? Nghut kôlhang, nungmoq gi, lhoq pyo pyâm é hui luí, Ngo lé baú za tô pyâm to kômù, ó le ô yhûm shut ló byuq râ ahkyíng jé lo nyi bê nghut ri; ahkuí lhang jé to bê. Nghut kôlhang, Ngò gi, Ngò baú za a nghut; hkâsu mù gâ le, Ngá Wa gi, Ngò eq rahá nghut nyi lhê.

³² Nungmoq gi, Ngò má nguínón hkyô wó kó sháng gaq nghut, Ngò gi, haú hkyô pé lé taí kyô é nghut lhê. Nungmoq gi, mingkan shí má, wúhke hkyô hui kó râ nghut lhê; nghut kôlhang, myit wum lhoq kíng keq. Ngò gi, mingkan lé ung pyám bê nghut lhê.” gâ ri.

Yesuq Kyûdûng É Hkyô

17 Yesuq gi, haú su ga taí é htàng má, mauhkûng shut tu wú luí, kyûdûng é gi, “Áwa ê, ahkyíng jé bê nghut ri; haú Nung Zo gi, Nang lé hpungwup shingkang wó hu nhâng sháng gaq, Nung Zo lé hpungwup

² shingkang hû ló nhâng laq ô! Hkâsu mù gâ le, Nàng mai Yhang lé ap byi tô é bang banshoq lé, Yhang, ahtum abyuq é asak wó byi sháng gaq ga, Nàng gi, byù lunglhang bang lé up râ ahkáng, Yhang lé byi tô é yanmai

³ nghut ri. Nàng za tengmán é Garai Gasang nghut é eq Nàng nhang kat é sù Yesuq Hkrisduq lé, sê é gi, ahtum

⁴ abyuq é asak nghut lhê. Ngò gi, Nàng, Ngo lé wùn waq nhang é muzó lé lhoq pán é dông, myidàm htoq má, Náng é hpungwup shingkang lé lhoq htoq

⁵ shit bê nghut lhê. Áwa ê, haú mingkan lhang a joq shí mai, Ngò, Nàng eq rahá chôm wó é hpungwup shingkang èq, ahkuí, Náng é myoq hí má,

Ngo lé hpungwup shingkang dan hu nhâng laq.

**Chángzô pé matú, Yesuq
kyúdung byí é hkyô**

- ⁶ Mingkan mai, Nàng, Ngo lé hkyin htoq yú byí é bang lé, Ngò gi, Náng é myìng lhoq htoq shit bê nghut lhê. Yhangmoq gi, Náng é byu pé nghut bekô; Nàng gi, yhangmoq lé, Ngá é loq má ap byi bê nghut luí, yhangmoq gi, Náng é dang lé châng kut bekô
⁷ nghut ri. Nàng, Ngo lé byí é lhunglháng gi, Náng chyáng mâ é nghut é lé, ahkuí, yhangmoq sé bekô nghut ri.
⁸ Hkâsu mù gâ le, Nàng, Ngo lé byi kat é mungdang pé lé, Ngò, yhangmoq lé byi bê nghut luí, yhangmoq gi, haú pé lé hap yù bekô nghut ri; Ngò gi, Náng chyáng mai lé é sù nghut é lé le, yhangmoq hkyak sê akô; Nàng, Ngo lé nhang kat é hkyô lé le, yhangmoq
⁹ lumjínng bekô nghut ri. Ngò gi, yhangmoq é matú kyúdung byí lhê. Ngò gi, haú mingkan byu pê é matú dung byi nyi é a nghut; Nàng, Ngo lé ap byi tô é bâng é matú sheq dung byí nyi é ru nghut lhê; hkâsu mù gâ le, yhangmoq
¹⁰ gi, Náng é byu pé nghut akô. Ngò wó é lhunglháng gi, Náng é chyat nghut mù, Nàng wó é lhunglháng le, Ngá é chyat nghut lhê. Haú mù, Ngò gi, yhangmoq má hpungwup shingkang
¹¹ hú é hui bê nghut lhê. Ngò gi, Nàng chyáng lò râ nghut lhê mù, mingkan htoq má nyi nyi râ a nghut lo; nghut kôlhang, yhangmoq gi, mingkan htoq má nyi nyi shirâ nghut lhê; chyoiyúng é Áwa ê! Ngá hpe gi, ragùng za nghut é su, yhangmoq le ragùng za wó dut nyi kó sháng gaq, Nàng, Ngo lé byi é, haú Náng myìng é a-tsam èq yhangmoq lé upzúng nyi aq. Ngò gi, yhangmoq eq rahá nghut nyi é u lé, yhang-

moq lé upzúng bê nghut luí, Nàng, Ngo lé byí é myìng hau èq, yhangmoq lé rago zúng bê nghut lhê. Haú Chyúmdang lhoq dik sháng gaq ga, haú bang mâ é htên byoq hui râ sù mai lai luí, ó yuq le a byuq byuq é nghut lhê.

- ¹³ Ngò gi, ahkuí, Náng chyáng lò râ nghut bê; nghut kôlhang, Ngá é gabú hkyô gi, yhangmoq chyáng byíng jup sháng gaq nghú, Ngò gi, haú pé lé
¹⁴ mingkan má taí é nghut lhê. Ngò gi, yhangmoq lé, Náng é mungdang byi bê nghut lhê; haú mingkan gi, yhangmoq lé a jú nghut ri; hkâsu mù gâ le, Ngò gi, mingkan mâ é a nghut é su, yhangmoq le, mingkan mâ é a nghut
¹⁵ kô é yanmai nghut ri. Ngò kyúdung é gi, Nàng, yhangmoq lé mingkan mai shuí htoq yú râ matú dúng é a nghut, haú agè ashop su chyáng mai, yhangmoq lé upzúng yú râ matú sheq dúng
¹⁶ é ru nghut lhê. Ngò gi, mingkan mâ é a nghut é su, yhangmoq le, mingkan mâ é a nghut kó. Yhangmoq lé, haú tengmán hkyo èq lhoq sân-yúng yú laq; Náng é mungdang gi, tengmán
¹⁸ hkyô nghut ri. Nàng, Ngo lé, mingkan má nhang hâng kat é su, Ngò le, yhangmoq lé, mingkan má nhang
¹⁹ hâng kat é nghut lhê. Yhangmoq lé, tengmán hkyô má wó lhoq sân-yúng yú kó sháng gaq nghú, Ngò gi, yhangmoq é matú, yhumsing gùng lé lhoq sân-yúng yu é nghut lhê.

**Lumjínng Bang Lhunglhâng É Matú,
Yesuq Kyúdung Byí É Hkyô**

- ²⁰ Ngò gi, yhangmoq é matú baú za kyúdung byí é a nghut; Yhangmoq é danglu é yanmai, Ngo lé lumjínng kó râ bâng é matú le, Ngò kyúdung byí
²¹ é nghut lhê. Haú mù, yhangmoq ban-shoq bang gi, rading ralhum za dut

- nyì kó sháng gaq. Haû mingkan gi, Nàng, Ngo lé nhang kat é hkyô lé wó lumjínng sháng gaq; Áwa, Nàng gi, Ngò má nyi nyi mù, Ngò gi, Nàng má nyi nyi é su, yhangmoq le, ngá hpe má nyi
- ²² nyi kó sháng gaq. Ngá hpe gi, ragùng za nghut é su, yhangmoq le, rading ralhum za dut nyì kó sháng gaq nghû, Ngò gi, Nàng, Ngo lé byí é hpungwup shingkang lé, yhangmoq lé byi bê
- ²³ nghut lhê. Nàng, Ngo lé nhang kat bê hkyô eq Nàng, Ngo lé chyitdap é su, yhangmoq lé chyitdap é hkyô lé, haû mingkan wó sé râ matú, yhangmoq gi, gumjup shoq rading ralhum za wó dut kó sháng gaq nghû, Ngò gi, yhangmoq má nyi nyi luí, Nàng gi, Ngò má nyi nyi é nghut lhê.
- ²⁴ Áwa ê, haû mingkan lhang a joq shi mai, Nàng, Ngo lé chyitdap luí byi tô é hpungwup shingkang haû lé, Nàng, Ngo lé byi tô é bang, wó myàng kó râ matú le, Ngò nyi é jang má, Ngò eq rahá wó nyí kó râ matú le, Ngò ô nau ri.
- ²⁵ Dingmán é Áwa ê, haû mingkan gi, Nang lé a sé kôlhang, Ngò gi, Nang lé sê lhê; Nàng, Ngo lé nhang kat é hkyô lé gi, yhangmoq sé akô nghut ri.
- ²⁶ Nàng, Ngo lé chyitdap é chyitdap myit gi, yhangmoq má wó joq nyi râ matú le, Ngò gi, yhangmoq má wó nyi nyi râ matú le, yhangmoq lé, Ngò, Nang é hkyô sé nhâng bê nghut luí, xoq mù sé nhang nyi shirâ nghut lhê.” gâ ri.

Yesuq Chyup Yú Huí É Hkyô

Mht 26:47-56; Mrk 14:43-50; Luk 22:47-53

18 Yesuq gi, haû su ga kyû-dúng é htàng má, Yhâng é chángzô pé eq rahá, Kedron wuihkung mai lâi byit dap ló luí, haû hpoq má joq é hkyâm ralhum má wang e akô nghut ri.

- ² Hkyâm haû gi, Yesuq eq Yhâng é chángzô pé lhaq hui hui kut é jowò nghut é yanmai, haû Yesuq lé ap pyám
- ³ râ sù Yudaq le sê ri. Haû mù, Yudaq gi, haû hkyangjong agyi pé eq Hparishe pê chyáng mai nhang kat é noqkuq yhûm zúng bang ra-am eq gyezo rajùm lé, haû jowò shut shuí wang lé lo ri. Haû bang gi, myihu, myibung eq shâm lhâm pé chung lé lo akô.
- ⁴ Yesuq gi, Yhang má dut lò râ hkyô lhunglhang lé sé gû nghut mù, htoq ê luí, yhangmoq lé, “Nungmoq, ó yuq lé ho akô lhu?” ga myí ri.
- ⁵ Haû hkûn, yhangmoq gi, “Nazaret wà byù Yesuq lé ho lhê.” ga tû taí kôjáng, Yesuq gi, “Ngò gi, haû yuq nghut lhê.” ga taí ri. (Yesuq lé ap pyám sù Yudaq le, yhangmoq eq rahá yap
- ⁶ tô ri.) “Ngò gi, haû yuq nghut lhê.” ga Yesuq taí kat é hkûn jáng, yhangmoq gi, nungzut zut mù, myigùng má lêng leq ló bum akô nghut ri.
- ⁷ Yhang gi, “Nungmoq, ó yuq lé ho akô lhu?” ga, yhangmoq lé dum myí kat jáng, yhangmoq gi, “Nazaret wà byù Yesuq lé ho lhê.” ga taí akô.
- ⁸ Haû hkûn, Yesuq gi, “Ngò gi, haû yuq nghut lhê nghû, nungmoq lé taí kyo bê nghut lhê; nungmoq, Ngo lé hô kô é nghut le gi, shí bang lé ló nhang
- ⁹ pyám keq.” ga tû taí ri. Haû gi, “Nàng, Ngo lé byí tô é bang rayuq le lhang, Ngò, a lhoq hpyuq pyám.” ga, Yhang taí tô é dang dik râ matú nghut ri.
- ¹⁰ Haû hkûn, Simun Petruq gi, shâm wun tô é nghut luí, shâm shê mù, haû hkyangjong mó é dui-nhâng zôshang é loqyo nohkyap lé zân hpyit kat byí ri. (Dui-nhâng zoshâng haû yuq é mying gi, Malhku gâ ri.)
- ¹¹ Haû mù, Yesuq gi, Petruq lé, “Náng é shâm lé, shambyâng má xâng pyám

aq! Haú Îwa, Ngo lé byî é góm^a lé, Ngò a shuq é wó nyî râ lúhú?” ga taí kat ri.

Yesuq Lé, Anna Chyáng Shuí E É Hkyô

Mht 26:57-58; Mrk 14:53-54; Luk 22:54

- 12 Hau htâng, gyezo haú jûm eq yhangmoq é gyezau hpó, Yudaq byu pè é mingsuwún wuf gi, Yesuq lé
- 13 chyup yû mù, tuí akò nghut ri. Yhangmoq gi, haú zân má é hkyangjong mó Kayahpaq é yhâng-tsa Anna chyáng hí, Yhang lé shuí ló akò nghut ri.
- 14 Kayahpaq gi, byu pè é matú rayuq shî hkám byî le je gè râ nghut lhê ga, haú Yudaq byu pé lé hpaqchyî byî é sù yuq nghut ri.

Yesuq Lé, Petruq Sâng-hi Dam He-ngik Pyâm É Hkyô

Mht 26:69-70; Mrk 14:66-68; Luk 22:55-57

- 15 Simun Petruq eq gotû chángzo rayuq gi, Yesuq htâng châng e ló akò nghut ri. Gotû chángzo haú yuq gi, hkyangjong mó lé rago sê lhê nghut mù luí, hkyangjong mó é yhumwàng hkaú shut, Yesuq é htâng má châng
- 16 wang ló ri. Petruq kúm gi, hkúmdong shinggan má láng yap tô ri. Haú hkyangjong mó lé rago sê é sù, gotû chángzo haú yuq gi, taú htoq ló mù, hkum zúng é myiwe myhí lé taí luí, Petruq lé shuí hâng yu ri.
- 17 Haú hkûn, haú hkum zúng é myiwe myhí gi, Petruq lé, “Nàng gi, haú yuq é chángzô pé mâ é rayuq a nghut lúhú?” ga myi jáng, yhang gi, “Ngò a nghut.” ga tú taí ri.
- 18 Haú u lé, gyoq é yanmai, dui-nhâng zoshâng wuf eq noqkuq yhûm zúng bang gi, yhangmoq gyoq gân râ matú myigyê èq mut tô é myihkyóm má,

gyoq gang yap nyi bum akò. Petruq le, yhangmoq eq rahá gyoq gang yap tô ri.

Yesuq Lé, Hkyangjong Mó Myí Choq Wú É Hkyô

Mht 26:59-66; Mrk 14:55-64; Luk 22:66-71

- 19 Haú u lé, haú hkyangjong mó gi, Yesuq lé, Yhâng é chángzô pé hkyô eq Yhâng mhoqshit é hkyô eq séng luí myí ri.
- 20 Haú hkûn, Yesuq gi, “Haú mingkan htoq má, Ngò, de de taí bê nghut lhê. Ngò gi, haú Yudaq byu pé banshoq bang chôm zîng é, tarajong pé má le, noqkuq yhûm má le, ayang mhoqshit é nghut lhê. Ngò gi, haq zaú luí taí é
- 21 hkyô haí le a joq. Nàng, haí mù Ngo lé myi lhê lúhú? Haú, Ngò taí é lé wó gyô é bang lé myi aq; Ngò haí taí é hkyô lé, yhangmoq gè gè sê akò nghut ri.” ga tú taí ri.
- 22 Yesuq haú su ga taí jáng, haú nàm má nyi tô é noqkuq yhûm zúng sù rayuq gi, Yhang lé pyuq kat luí, “Hkyangjong mó lé wá, Nàng, haú su nghû dang tú lhê lúhú?” ga taí ri.
- 23 Haú hkûn, Yesuq gi, “Ngò taí shut é nghut le gi, shut é hkyô lé saksé tân shit aq. Nghut kôhang, Ngò gi, têng é dông ru taí le nhîng, nàng, haí mù
- 24 Ngo lé pyuq lhê lúhú?” ga tú taí ri. Hau htâng, Anna gi, Yhang lé tuí to gù, haú hkyangjong mó Kayahpaq chyáng dé kat nhang ri.

Yesuq Lé, Petruq Xoq He-ngik Pyâm É Hkyô

Mht 26:71-75; Mrk 14:69-72; Luk 22:58-62

- 25 Haú Simun Petruq gyoq gang yap tô é hkûn, “Nàng gi, Yhâng é chángzô pé mâ é rayuq a nghut lúhú?” ga, yhang lé

^a 18:11 Góm lé shuq gâ é gi, jamjau hui râ eq shî hkám râ lé, taí nau é nghut lhê.

myi kôjáng, yhang gi, “Ngò a nghut.” ga, dum he pyâm ri.

- ²⁶ Haû Petruq êq nohkyap zân hpyit pyám byî é huí su é buinùm nghut é sù, haû hkyangjong mó é dui-nhâng zoshâng rayuq gi, yhang lé, “Haû hkyâm má, nàng, Yhang eq rahá nghut nyi é lé, ngò a myang é su ngam ²⁷ lhê lú?” ga taí ri. Haú hkûn, Petruq gi, xoq he pyám ri; haú u yhang, woq tûn bê nghut ri.

**Pilat É Myoq Hí Má, Yesuq Jé
Nyi É Hkun Lhê Hkyô**

Mht 27:1-2, 11-14; Mrk 15:1-5; Luk 23:1-5

- ²⁸ Hau htâng, yhangmoq gi, Yesuq lé, Kayahpaq chyáng mai, haû mauzau hpô é yhúmwàng shut shuí e ló akô. Haú u gi, napsûn noq ashî nghut ri. Yhangmoq gi, agot a-û a dut e za, htûngli dông Lhoqlhai Poí lé wó zo râ matú, yhúmhkaú má a wàng kó ²⁹ nghut ri. Haû mù luí, mauzau Pilat gi, yhangmoq chyáng htoq ê mù, “Shí yuq lé, nungmoq hai mara hûn nau akô lú?” ga myí ri.
- ³⁰ Haú hkûn, yhangmoq gi, “Shí yuq, a ge é muzó kut é a nghut le gi, Yhang lé, náng é loq má ngamoq lé ap byi râ a nghut.” ga tû taí akô.
- ³¹ Pilat gi, “Yhang lé, nungmoq yhang shuí ló mù, nungmoq é tarâ dông ló jéyáng keq.” ga taí jáng, haû Yudaq byu pé gi, “Nghut kôlhâng, ngamoq gi, ó yuq lé sat râ ahkáng le a wó é nghut lhê.” ga tû taí akô ³² nghut ri. Haû su dut é hkyô gi, Yesuq, Yhang hká dông shí râ ga taí é dang lé lhoq dik râ matú nghut lhê.
- ³³ Haû mù, Pilat gi, yhúmhkaú má taú wang ló mù, Yesuq lé wut yù luí, “Nàng gi, Yudaq byu pé é hkohkâm nghut lhê lú?” ga myí ri.

³⁴ Haú hkûn, Yesuq gi, “Haû gi, náng é myit dông taí é nghut lhê lú? A nghut jáng, góbang mai, nang lé, Ngá é hkyô taí kyo luí nghut lhê lú?” ga taú myí ri.

³⁵ Pilat gi, “Ngò gi, Yudaq byù nghut lhê lú? Haû Náng é byù myú eq Náng é hkyangjong agyi pé sheq, Nang lé, ngá loq má ap byî é ru nghut lhê. Nàng gi, haí kut é nghut lhê lú?” ga dum myí ri.

³⁶ Haú hkûn, Yesuq gi, “Ngá é mingdán gi, mingkan shí eq a séng. Mingkan shí eq séng é ru nghut le gi, haû Yudaq byu pé, Ngo lé a wó chyup yô lo shoq, Ngá é dui-nhâng zoshâng wui, Ngo lé chôm hung yù kó râ nghut lhê. Nghut kôlhâng, Ngá é mingdán gi, mingkan shí eq a séng é ru nghut lhê.” ga taí ri.

³⁷ Haû mù, Pilat gi, “Haû jáng, Nàng gi, hkohkâm nghut bê lú?” ga myi jáng, Yesuq gi, “Ngo lé, hkohkâm nghut lhê ga, nàng taí nyi é jô ri. Gè gè ga jáng, Ngò gi, hau é yanmai hku lé lo é sù nghut lhê; haû tengmán hkyô lé saksé hkám râ matú, Ngò, mingkan htoq má jé lé é nghut lhê. Haû tengmán hkyô eq séng é sù ó yuq le, Ngá é dang lé gyô ri.” ga tû taí ri.

³⁸ Haú hkûn, Pilat gi, “Tengmán hkyô gâ é gi, haí jung lú?” ga myí ri. Yhang gi, haú su ga myi luí, haû Yudaq byu pé chyáng dum htoq ê mù, “Shí yuq chyáng mara hûn râ hkyô, ³⁹ ngò a myàng nghut ri. Nghut kôlhâng, haû Lhoqlhai Poí u lé, nungmoq é matú, ngò, htóng byù rayuq nhang htoq kat byi byi kut é htûng, nungmoq wó akô. Haú mù, ‘Yudaq byu pé é hkohkâm’ lé, nhang htoq kat byi râ lé, nungmoq ô nau akô lú?” ga myí ri.

⁴⁰ Haú hkûn, yhangmoq gi, “Haú yuq lé a nghut! Barabaq lé sheq nhâng byi

aq.” ga, garû kat akô. Barabaq gi, da-myaq nghut ri.

**Yesuq Lé, Tapzîng Má Jén
Sat Râ Matú Doqđân É Hkyô**

Mht 27:15-31; Mrk 15:6-20; Luk 23:13-25

19 Haû mù luí, Yesuq lé lãng she yù mù, nhuq bat râ matú, Pi-
lat hkunmó hkyô ri. Haû gyezô pé gi, zujanmaú saí yù kôluí, Yesuq é ullhum má tsung byi kômù, Yhang lé,
buhîng nè hut byi akô nghut ri. Hau htâng, yhangmoq gi, Yhâng chyáng dum huí ê ê kut luí, “Yudaq byu pé é hkohkâm ê! Chyung hîng xê hing nyì sháng gaq ô!” ga taí kômù, Yhâng é myoqđong má pyuq byi akô nghut ri.

⁴ Pilat gi, haû Yudaq byu pé chyáng radàm dum htoq ê mù, “Wú keq, shí yuq chyáng mara hûn râ hkyô, ngò a myang é lé nungmoq sé sháng nghû, Yhang lé, ngò nungmoq chyáng
⁵ shuí htoq lé byi lhê.” ga taí ri. Yesuq gi, haû zumuq tsûng tô é eq bu nè hîng wut to mù htoq lé jáng, Pilat gi, yhangmoq lé, “Wú keq, Yhang, shí yuq nghut lhê.” ga taí ri.

⁶ Haû hkyangjong agyi pé eq yhangmoq é noqkuq yhûm zúng bang gi, Yhang lé myang kat kôjáng, “Yhang lé tapzîng má jén sat pyám aq! Yhang lé tapzîng má jén sat pyám aq!” ga garû bum akô.

Nghut kôlhang, Pilat gi, “Nungmoq shuí yù mù, tapzîng má jén sat keq. Ngò gi, Yhâng chyáng mara hûn râ hkyô a myàng.” ga tũ taí ri.

⁷ Haû hkûn, haû Yudaq byu pé gi, “Ngamoq chyáng tarâ rahkat joq lhê; tarâ haû dông ga jang, Yhang gi, shí gíng bê nghut ri; hkâsu mù gâ le, Yhang gi, Garai Gasâng é Yhangzo haû nghut lhê gâ ri.” ga xoq taí akô.

⁸ Pilat gi, dang haû lé wó gyo jáng,
⁹ je gyô gyuq luí, yhúmhmaû shut dum wang ló mù, Yesuq lé, “Nàng, hkâmâ é sũ nghut lhê lhú?” ga myí ri. Nghut kôlhang, Yesuq gi, dang rahkun lhang
¹⁰ a tũ taí byi nghut ri. Haû hkûn, Pilat gi, “Nàng, ngo lé a tũ taí kut lhê lhú? Ngò gi, Nàng lé, wó lhoq lhut kat é eq tapzîng má wó jén sat pyâm é ahkáng wó sũ nghut é lé, Nàng a sé lhú?” ga myí ri.

¹¹ Yesuq gi, “Nàng lé, haû ahtoq mai ahkáng byí e za a nghut le gi, nàng, Ngo lé haí kut râ a-tsam le wó râ a nghut. Haû mù luí, Ngo lé, náng é loq má ap byí é sũ gi, mara je bo é nghut lhê.” ga tũ taí ri.

¹² Haû hkûn mai, Pilat gi, Yesuq lé lhoq lhut kat byi nau nyì bê nghut ri. Nghut kôlhang, haû Yudaq byu pé gi, “Nàng, haû yuq lé nhang pyâm é nghut jáng, nàng gi, hkoséng Kehtaq é luzúm a nghut lo; yhumsing gùng lé, hkohkâm gâ é sũ gi, hkoséng Kehtaq eq shai lhûm é sũ nghut lhê.” ga, ru jáng garû nyì bum akô nghut ri.

¹³ Haû lé wó gyo jáng, Pilat gi, Yesuq lé shuí htoq ê mù, Hebre myíng dông Gabahta gâ é Luqgok hkâng myhang to jang nghu é jowò mâ é tarâ jé-
¹⁴ yáng tanghkuq má zung tô ri. Haû u gi, Lhoqlhai Poí é matú, Hên Lajâng é Buinyì nyí-káng raxe í hkyíng nghut ri.

Pilat gi, haû Yudaq byu pé lé, “Nungmoq é hkohkâm lé wú keq.” ga taí ri.

¹⁵ Nghut kôlhang, yhangmoq gi, “Yhang lé yu pyám aq! Yhang lé yu pyám aq! Yhang lé tapzîng má jén sat pyám aq!” ga garû bum akô.

Haû hkûn, Pilat gi, “Nungmoq é hkohkâm lé wá, ngò, tapzîng má jén

sat pyám rã lúú?” ga myi jáng, haú hkyangjong agyi pé gi, “Haú hkoséng Kehta q mai lai luí, gotú hkohkâm nga-moq a wó.” ga, tũ taí akô nghut ri.

- ¹⁶ Hau htâng má, Pilat gi, Yesuq lé tapzîng má jén sat pyám rã matú, yhangmoq é loq má ap byí kat bê nghut ri. Haú mù luí, yhangmoq gi, Yesuq lé shuí ló bekô nghut ri.

Tapzîng Má Jén Pyám É Hkyô

Mht 27:32-44; Mrk 15:21-32; Luk 23:26-43

- ¹⁷ Yesuq gi, yhumsing é tapzîng lé waq mù, Hebre myíng dông Golgahta gâ é, Ugyap joq é Jowò gâ é jang má htoq jé e ri. Yhangmoq gi, haú má, Yesuq lé tapzîng htoq má jén tap pyám akô; Yhang eq rahá, gotú í yuq lé le, rahkyam shut rayuq kut jén to kô é nghut luí, Yesuq gi, gyoro má nghut ri.
- ¹⁹ Pilat le, masat laiká kã yù luí, haú tapzîng htoq má tap tô ri. Haú má gi, “YUDAQ BYU PÊ É HKOHKÂM, NAZARET WÀ BYÛ YESUQ” gâ tô ri.
- ²⁰ Yesuq lé jén tô é jowò gi, myuq eq chyâng lhûm é htoq agó, haú masat laiká gi, Hebre dông le, Latin dông le, Grik dông le, kã tô é yanmai, haú Yudaq byu pé myo myo gi, masat laiká haú lé nghap bum akô nghut ri.
- ²¹ Haú Yudaq byu pê é hkyangjong agyi pé gi, Pilat lé, “Yudaq byu pê é hkohkâm’ nghû hkâkã, ‘Ngò gi, Yudaq byu pê é hkohkâm nghut lhê ga, Yhang taí ri.’ nghû luí sheq kã aq.” ga taí akô.
- ²² Haú hkûn, Pilat gi, “Ngò kã é dông, ngò kã to bê nghut lhê.” ga tũ taí ri.
- ²³ Haú gyezô pé gi, Yesuq lé tapzîng má jén tap pyám é htâng má, Yhâng é mebu pé lé yù mù, myí hkyam gãm luí, rayuq rahkyam yu akô; haú ahte

bu lé le, gãm rã dã akô; nghut kô-lhang, haú gi, hkyupshi a bo e za, awang mai ahyo hpyot kut woq tô é nghut ri.

- ²⁴ Haú mù, yhangmoq gi, “Bu shí lé gi, a lãng cheq e za, ó yuq myang yù ang rã laq, hkyín shosé she wú sháng.” ga, rayuq eq rayuq taí lhum akô.

Haú gi,

“Yhangmoq, Ngá é mebu lé chôm gãm yù kó rã; Ngá é ahtê bú é matú, hkyín shosé shê kó rã nghut lhê.”^a

gã é Chyúmdang lé lhoq dik rã matú dut é nghut lhê. Haú mù, gyezô pé gi, haú su kut bekô nghut ri.

- ²⁵ Haú Yesuq é tapzîng nãm má gi, Yhângnu, Yhângnú é yhanggu byizo eq, Klopa é yhangmyi Mariq eq Magadalaq wà mã é Mariq pé, yap tô bum akô. Yesuq gi, Yhang nãm má, Yhang chyitdap é chángzo eq Yhâng nu yap tô é lé myang kat jáng, Yhâng nu lé, “Ânu ê^b nung zo lé wú aq.” ga taí mù,
- ²⁷ chángzo haú lé le, “Náng nu lé wú aq.” ga taí ri. Haú hkûn mai, chángzo haú yuq gi, Yesuq é yhângnu lé, yhâng é yhûm shut shuí ló bê nghut ri.

Yesuq Soqkâng Byit É Hkyô

Mht 27:45-56; Mrk 15:33-41; Luk 23:44-49

- ²⁸ Hau htâng, Yesuq gi, ahkuí, muzó bàn bê nghut é lé sé luí, haú Chyúmdang lhoq dik rã matú, “Ngò, wuít shit ri.” ga taí ri. Haú má, tsibiyiq wing chyín rayambú joq tô ri; haú mù, yhangmoq gi, wuítmau lé tsibiyiq wing chyín haú má jum yù luí, jãm-yang ahyo má tuít tap mù, Yhâng é nhut-wuí jé shoq yhun byí akô nghut ri.
- ³⁰ Yesuq gi, tsibiyiq wing chyín haú lé shuq yù mù, “Mú bàn bê.” ga taí ri.

^a 19:24 Hkya-on 22:18 ^b 19:26 Ânu ê, gã é lé, Grik dông gi, “myiwe myhí ê” ga bo tô é nghut lhê.

Yhang, haû su ga taí eq yhang, ulhum nghuq ló mù, kâng byit bê nghut ri.

- ³¹ Htang nyí gi, ahkyak é Bánno buinyì nghut luí, haú nyí gi, Hên Lajang Buinyì nghut ri. Haû mù, Yudaq byu pé gi, Bánno buinyì má, màng pé lé tapzîng htoq má a joq to nhâng naù kô é yanmai, hkyí pé lé bat hkyuí pyám mù, màng pé lé yù hkyô pyám nhâng râ matú, Pilat chyáng dúng tôngbán akô. Haû mù luí, gyezô pé gi, lé mù, Yesuq eq jén hui su nhik mâ é, rayuq é hkyí lé hí bat hkyuí pyám mù, rayuq é hkyí lé dum bat hkyuí pyám akô
- ³³ nghut ri. Nghut kôlhang, yhangmoq gi, Yesuq chyáng jé é hkûn, Yhang shi to lánng bê nghut é lé myàng kômù, Yhâng é hkyí lé a bat hkyui byi kô
- ³⁴ nghut ri. Nghut kôlhang, gyezo rayuq gi, Yesuq é namcham má lham èq htaû kat byi jáng, radá dâm sui eq wuì yui
- ³⁵ htoq lo ri. Haû lé myàng é sù gi, saksé hkám byí ri; yhâng saksé hkâm é hkyô gi, tengmán ri. Haû yhang taí kyô é hkyô gi, têng é lé, yhang sé mù, nungmoq le wó lumjîng kó sháng gaq ga, saksé hkám byí é nghut ri. Haú hkyô pé dut é gi, “Yhâng é showui rahkat lháng a lhoq hkyui râ nghut lhê.”^a gâ é Chyúmdang haû lhoq dik râ matú
- ³⁷ nghut lhê. Chyúmdang gotû ralhüm má le, “Yhangmoq èq htau htông é sù lé, yhangmoq tu wú kó râ nghut lhê.”^b gâ é bo tô ashí nghut ri.

Yesuq Lé, Myhup Yhum É Hkyô

Mht 27:57-61; Mrk 15:42-47; Luk 23:50-56

- ³⁸ Hau htâng, Yesuq é chángzo dut nyi é Aramahti myuq byú Yosep gi, haú Yudaq byu pé lé gyuq é yanmai, tsik za Pilat chyáng Yesuq é gungsôm lé, lé dúng ri. Pilat èq ahkáng byí kat jáng,

- yhang gi, gungsôm haû lé, lé yu ló bê
- ³⁹ nghut ri. Yhang gi, hí hkûn, myín lé, Yesuq lé ê huí é sù, Nikodema eq rahá lé é nghut ri; Nikodema gi, mura eq achyo nyhô tô é namngón jung sum
- ⁴⁰ xê joí kô yu lé ri. Yhangnhik gi, Yesuq é gungsôm lé yù mù, Yudaq byu pé é màng yhum htông eq rajung za, namngón jung eq rahá, pán yúng èq htup
- ⁴¹ yup to byí akô. Haû Yesuq lé tapzîng má jén sat pyâm é jowò nàm má, hkyâm ralhüm joq ri; ó yuq lé le a lheq wú shí é, lup sik ralhüm hkyâm hkaû
- ⁴² má joq tô ri. Haú nyí gi, Yudaq byu pé é Hên Lajang Buinyì nghut é yanmai le, lup haû le chyâng é yanmai le, yhangnhik gi, Yesuq lé, haú má ê lheq tô akô nghut ri.

Lup Akôm

Mht 28:1-10; Mrk 16:1-8; Luk 24:1-12

- 20** Bánno buinyì htâng, napsûn noq le mau a bó shimá, Magadalaq wà mâ é Mariq gi, haû lup má ê jé le, lup hkum mâ é luqlong huí
- ² hpyuq to lánng é lé myang ri. Haû mù, yhang gi, Simun Petruq eq Yesuq chyitdap é chángzo góyuq chyáng din jé ló mù, “Haû Yhumsîng lé, lup mai yu htoq ló byuq bekô; hkâmá ê kat to kô é lé, ngamoq a sé.” ga taí ri.
- ³ Haû mù, Petruq eq chángzo haû gi,
- ⁴ lup shut e ló akô. Yhangnhik í yuq é din akô; nghut kôlhang, chángzo haû gi, Petruq htoq má wó dîn luí, lup
- ⁵ má hí din jé e ri. Haû mù, yhang gi, ahkaû shut ngóm wú kat é hkûn, haû pán yúng htui leq tô é lé myang ri; nghut kôlhang, yhang gi, a wang é
- ⁶ nghut ri. Hau htâng, Simun Petruq gi, châng jé luí, lup hkaû shut wang e ri; haú hkûn, yhang gi, haú má pán

^a 19:36 Htoq Ló 12:46; Gyung So 9:12, Hkya-on 34:20 ^b 19:37 Zhk 12:10

⁷ yúng htui joq tô é lé le, haú Yesuq é ulhum má htup é panchoq lé le, myang ri. Panchoq haú gi, pán yúng htui eq rahá a nghut e za htui jup
⁸ leq tô ri. Haú lup má hí jé é chángzo le, ahkaú má wang ê luí, myàng jáng,
⁹ lumjáng bê nghut ri. (Yesuq gi, shi é mai dum dui toq lô râ nghut lhê ga bo tô é Chyúmdang lé, yhangnhik gi, a sê
¹⁰ gyo shi kó nghut ri.) Hau htàng, haú chángzô nhik gi, yhûm taú ló bekô nghut ri.

Magadalaq Wà Má É Mariq Lé, Yesuq Htoq Shit É Hkyô

Mrk 16:9-11

¹¹ Nghut kôlhang, Mariq gi, lup shing-gan má ngau yap tô ri. Yhang gi, ngàu uchyang lup hkaú má ngóm wú kat ri.
¹² Haú hkûn, yhang gi, Yesuq é gungsôm lheq tô é jang má, hpyu é mebu wut é maumang lagyo í yuq hkyí htàng shut rayuq, umhtúng shut rayuq, zung to kô é lé, myang ri.
¹³ Yhangnhik gi, “Myiwe myhí ê, nàng, haí mù ngau nyi lhê lhú?” ga myi kôjáng, yhang gi, “Ngá é Yhum-síng lé yù ló hpyuq kôluí, Yhang lé hkâmá ló lheq to kô é lé, ngò a sê é yanmai nghut lhê.” ga tû taí ri.
¹⁴ Haú su ga luí, yhang, lhing wú kat é hkûn, Yesuq yap tô é lé myàng kô-lhang, Yesuq nghut é lé yhang a wú sé nghut ri.
¹⁵ Yesuq gi, “Myiwe myhí ê, nàng, haí mù ngau nyi lhê lhú? Nàng gi, ó yuq lé ho wún lhê lhú?” ga myi jáng, yhang gi, hkyâm saí zo sù su ngam pyám mù, “Sarâ ê, nàng, Yhang lé waq htot pyâm é nghut le gi, hkâmá ê lheq tô é, ngo lé taí kyo laq, ngò, Yhang lé yu ló râ.” ga taí ri.
¹⁶ Haú hkûn, Yesuq gi, yhang lé, “Mariq ê” ga wut kat ri.

Mariq gi, Yhâng shut lhîng mù, He-bre myíng dông, “Raboni!” ga wut kat ri. (Haú gi, “Sarâ ê” gâ é lichyúm nghut ri.)

¹⁷ Yesuq gi, “Ngo lé hkâzáng shi; hkâsu mù gâ le, Ngò gi, haú Íwâ chyáng a taú doq ló shí é nghut lhê. Nàng gi, Ngá é gumang wui chyáng ló mù, yhangmoq lé, ‘Ngò gi, Ngá Wa eq nungmoq é Yhângwa, Ngá é Garai Gasang eq nungmoq é Garai Gasang nghut su chyáng doq ló zó nghut lhê.’ gâ ri nghû, ló taí kyo aq.” ga, yhang lé taí kat ri.
¹⁸ Magadalaq wà má é Mariq gi, chángzô pê chyáng ló mù, “Yhumsíng lé, ngò myàng bê!” ga taí luí, yhang lé shit kat é pé lé, taí kyô ri.

Yesuq, Yhâng É Chángzô Pé Lé Htoq Shit É Hkyô

Mht 28:16-20; Mrk 16:14-18; Luk 24:36-49

¹⁹ Haú nyí, Bánno buinyí htang myìn lé, haú chángzô pé gi, Yudaq byu pé lé gyuq kô é yanmai, hkum tsing myhí pyám mù, zîng tô bum kô é u lé, Yesuq gi, lé jé mù, yhangmoq é agùng má yap to luí, “Nungmoq nguingón yuqyo nyí sháng gaq!” ga taí ri. Yhang gi, haú su ga taí é htàng má, yhangmoq lé, Yhâng é loq pé eq namcham lé tûn shit ri. Chángzô pé gi, haú Yhumsíng lé myàng kôjáng, gyai gabú bùm bekô nghut ri.
²¹ Yesuq gi, “Nungmoq nguingón yuqyo nyí sháng gaq! Haú Íwa gi, Ngo lé nhang kat é su, Ngò gi, ahkuí, nungmoq lé nhang kat é
²² nghut lhê.” ga dum taí ri. Haú su ga taí mù, Yhang gi, yhangmoq é ahtoq má soq mut luí, “Haú Chyoi-
²³ yúng Woi-nyí lé hap yù keq. Ó yuq é mara pé lé nghut kôle, nungmoq hkyut byí é nghut jáng, mara

haú pé gi, hkyut pyám byî é hui râ nghut lhê; nungmoq a hkyut byî é nghut jáng, mara haú pé gi, hkyut pyâm é hui râ a nghut.” ga taí ri.

Htomaq Lé, Yesuq Htoq Shit É Hkyô

²⁴ Haú chángzo raxe í yuq má bo é, Zo-zûm le gâ é Htomaq gi, Yesuq lé jé é hkûn, haú chángzô pé eq rahá a nyi to
²⁵ nghut ri. Haú mù luí, gotû chángzô pé gi, yhang lé, “Haú Yhumsîng lé, nga-moq myàng bê.” ga taí kyô akô.

Nghut kôlhang, yhang gi, yhangmoq lé, “Ngò gi, Yhâng é loq pé mâ é shamtoq zuhkô lé myàng mù, ngá é loqnyhuí èq joí wú é eq, Yhâng é namcham má, ngá é loq èq myang lap wú é za a nghut jáng, haú lé ngò lumjîng râ a nghut.” ga taí ri.

²⁶ Rabat myáng jáng, chángzô pé gi, haú yhúmhaú má dum nyi tô akô; Htomaq le, yhangmoq eq rahá nghut nyi ri. Haú hkum pé myhî to kôlhang, Yesuq gi, lé jé mù, yhangmoq é agùng má yap to luí, “Nungmoq nguingón
²⁷ yuqyo nyì sháng gaq!” ga taí ri. Hau htâng, Yhang gi, Htomaq lé, “Náng é loqnyhui, shî má lé joí mù, Ngá é loq pé lé wú aq. Náng é loq lhâm kat mù, Ngá é namcham má lé lap wú aq. A lùm hkâkut, lumjîng nyì aq.” ga taí ri.

²⁸ Haú hkûn, Htomaq gi, “Ngá é Yhumsîng, ngá é Garai Gasang ê!” ga Yhang lé taí ri.

²⁹ Yesuq gi, yhang lé, “Nàng gi, Ngo lé myang é yanmai, lumjîng é a nghut lhú? A myàng kôlhang, lumjîng é bang gi, hkungsô wó nyi ri.” ga taí ri.

³⁰ Laiká buk shî má a kê tô é limik kumlhá pé gotû myo myo lé le, Yesuq gi, Yhâng é chángzô pê hí má kut
³¹ shit bê nghut ri. Nghut kôlhang, Yesuq gi, Garai Gasâng é Yhangzo Hkrisduq nghut é lé, nungmoq wó lumjîng râ

matú eq, lumjîng é yanmai, nungmoq Yhâng é myìng má asak wó kó râ matú, shí hkyô pé lé kê tô é nghut lhê.

Ngozo Wó Chyup Yu É Limik Kumlhá

21 Hau htâng má, Yesuq gi, Ti-beri nhông yàm má, Yhâng é chángzô pé lé dum htoq shit ri. Yhang htoq shit é hkyô gi, a-ô mâ é dông
² nghut ri. Simun Petruq, Zozûm le gâ é Htomaq, Galile mau Hkanaq wà mó mâ é Nahtanelaq, Zebedi é yhangzo nhik eq gotû chángzo í yuq pé gi, rahá
³ nyi to bum akô. Haú hkûn, Simun Petruq gi, yhangmoq lé, “Ngò gi, ngozo kóng ê râ.” ga taí jáng, yhangmoq gi, “Ngamoq le châng lé râ.” ga taí akô. Haú mù luí, yhangmoq gi, htoq ê mù, haú lhaí má wàng bekô nghut ri; nghut kôlhang, haú myîn, radu lhang a wó kóng kó nghut ri.

⁴ Htang napkyó maubó lo é hkûn, Yesuq gi, wuiyàm má yap tô ri; nghut kôlhang, haú chángzô pé gi, Yesuq nghut é lé a wú sé kó nghut ri.

⁵ Yesuq gi, yhangmoq lé, “Luzúm wui ê, nungmoq, ngozo wó akô lhú?” ga, wut myi kat jáng, yhangmoq gi, “A wó.” ga tû taí akô.

⁶ Haú hkûn, Yhang gi, “Nungmoq é gùn lé, haú lhai é loqyo hkyam shut dú hkyô kat keq; haú jáng, nungmoq wó kông yù kó râ nghut lhê.” ga taí ri. Haú mù, yhangmoq gi, gùn dú hkyô kat é hkûn, ngozo lùm myô é yanmai, haú gùn lé lhang a wó lhang yù lo kó nghut ri.

⁷ Haú mù luí, haú Yesuq chyitdap é chángzo gi, Petruq lé, “Yhumsîng ru nghut ri.” ga taí ri. Simun Petruq gi, “Yhumsîng ru nghut ri.” gâ é lé wó gyo eq yhang, yhang gi, mebu hkyut pyâm tô é yanmai, bu-hîng mó lé, yhâng é gùng má baí-

yup yù mù, wuì hkaû má byam wang
⁸ ló bê nghut ri. Haû chángzo góbang gi, wuiyàm eq ngo xê làm kô za wê é yanmai, ngozo byíng tô é gùn lé, wuiyàm shut lhaî mai she jé lo akô
⁹ nghut ri. Yhangmoq gi, wuiyàm má jé dap ló kô é hkûn, myigye gyúng é myihkyóm htoq má ngozo nyhîn tô é lé le, muk ratsuí joq tô é lé le, myang akô.
¹⁰ Yesuq gi, yhangmoq lé, “Haû, ahkuî za nungmoq wó kông yu é ngozo, ra-am yù lé keq.” ga taî ri.
¹¹ Haû mù, Simun Petruq gi, lhaî má doq ji luí, kô é ngozo rasho ngó xe sùm du yhang bo é gùn lé, dùng yàm má she htoq tô ri. Ngozo haû myhó myo
¹² kôlhang, gùn gi, a jeq nghut ri. Yesuq gi, yhangmoq lé, “Napzang lé zo keq.” ga taî ri. Chángzô pé gi, Yhang, haû Yhumsîng nghut é lé sé kô é yanmai, ó yuq lhang, “Nàng, ó yuq nghut lhê?”
¹³ ga, a wám myi kó nghut ri. Yesuq gi, lé mù, muk lé ê yù luí, yhangmoq lé
¹⁴ byî ri; ngozo lé le, haû su kut ri. Yesuq gi, shi é mai lhoq dui toq yû huí é htâng, Yhâng é chángzô pé lé htoq shit é má, shî gi, sum dâm nghû râ dàm nghut ri.

Yesuq Eq Petruq

¹⁵ Yhangmoq bàn zô bùm kô é htâng má, Yesuq gi, Simun Petruq lé, “Yohan é yhangzo Simun ê, nàng gi, shí bang htoq má, Ngo lé teng za je chyt-dap lhê lú?” ga myi jáng, yhang gi, “Nghut lhê; Yhumsîng ê, ngò, Nàng lé chyt-dap é hkyô lé, Nàng sê lhê.” ga tû taî ri. Haû hkûn, Yesuq gi, “Ngá é sau zô pé lé, baú aq.” ga, yhang lé taî ri.
¹⁶ Hau htâng, Yesuq gi, “Yohan é yhangzo Simun ê, nàng gi, Ngo lé teng

za chyt-dap lhê lú?” ga dum myi jáng, yhang gi, “Nghut lhê; Yhumsîng ê, ngò, Nàng lé chyt-dap é hkyô lé, Nàng sê lhê.” ga tû taî ri. Haû hkûn, Yesuq gi, “Ngá é sau pé lé, rém aq.” ga taî ri.

¹⁷ Dum radàm, Yesuq gi, yhang lé, “Yohan é yhangzo Simun ê, nàng gi, Ngo lé chyt lhê lú?” ga myi ri.

Haû hkûn, Petruq gi, “Nàng gi, ngo lé chyt-dap lhê lú?” ga, yhang lé Yesuq èq sùm dam dàm taí é yanmai, yhâng myit nò luí, “Yhumsîng ê, Nàng gi, lhunglhang lé sê lhê; ngò, Nàng lé chyt-dap é hkyô lé, Nàng sê lhê.” ga taî ri.

Haû hkûn, Yesuq gi, “Ngá é sau pé lé, baú aq. Ngò, nàng lé teng za taí lé, nàng, zorâm nghut é hkûn gi, yhumsîng gùng yhumsîng hpyihit baí-yup^a yù mù, ê nau é jowò hkanmó má wó ê é nghut lhê; nghut kôlhang, nàng mang jáng gi, loq í loq lham luí, nang lé góyuy èq hpyihit baí-yup byi mù, nàng a ê nau é jowò shut shuí ê râ nghut lhê.” ga taî ri.

¹⁹ (Yesuq haû su ga taí é gi, haû Petruq, hkâsu kut shi é đông mai, Garai Gasâng é hpungwup shingkan lé dan hu nhâng râ nghut é lé, taí nau é nghut ri.) Hau htâng, Yesuq gi, yhang lé, “Ngá htâng cháng aq.” ga taî ri.

²⁰ Haû hkûn, Petruq gi, lhang wú kat le, haû Yesuq chyt-dap é chángzo, yhangmoq htâng châng wún é lé myàng ri. Chángzo haû gi, hí hkûn, myinzang zô é u lé, Yesuq chyáng leq nè mù, “Yhumsîng ê, Nàng lé ap pyám râ sù gi, ó yuq lú?” ga, myi
²¹ wú é sù nghut ri. Petruq gi, haû yuq lé myàng jáng, Yesuq lé, “Yhumsîng

^a 21:18 Hpyihit baíyup gâ é lichyúm gi, mebu wut luí ri ri kut tô é lé gâ lhê.

ê, shí yuq gi, hkâsu dut râ l hú?" ga myî ri.

- ²² Yesuq gi, "Ngò jé lé é hkûn jé shoq, Ngò, yhang lé dui nyî nhâng nau é nghut le gi, nàng eq haî sêng lhê l hú? Nàng gi, Ngá htâng cháng aq." ga tû
- ²³ taî ri. Dang hau é yanmai, chángzo haú yuq a shî râ nghut lhê gâ é danglám gi, haú gumang wui chyáng byo myín to bê nghut ri. Nghut kô-lhang, Yesuq gi, haú yuq a shî râ hkyô lé taî é a nghut, "Ngò jé lé é hkûn jé shoq, Ngò, yhang lé dui nyî

nhâng nau é nghut le gi, nàng eq haî sêng lhê l hú?" ga, taî é ru nghut lhê.

- ²⁴ Shí pé lé saksé hkám mù, shí pé lé kê tô é sù gi, chángzo haú yuq nghut lhê. Yhâng é saksé gi, têng é lé, ngamoq sê lhê.
- ²⁵ Yesuq gi, gotû muzó myo myo le kut ashî nghut ri. Muzó haú pé lhum jup lé, kê htoq yu é ru nghut le gi, kê tô é laiká buk haú pé gi, mingkan gón má l háng ngo râ a nghut nghû, ngò wó myit ri.

LAGYO

Laiká

(Acts)

Yesuq, Mauhkûng Má Shuí Yù Huí É Hkyô

- 1** Htohpiuq ê, Yesuq yhang hkyin yu tô é lagyô pé lé, Chyoiyúng Woi-nyí wum-o èq dang ban pying tô é htàng má, Garai Gasang yhang lé mauhkûng shut shuí yu é buinyi jé shoq, Yhang kut shit é hkyô pé eq, mhoqshit é hkyô pé banshoq lé, hí lhê é laiká buk má ngò kê kat bê nghut lhê. Yesuq gi, shí hkâm é htàng má, Yhang dui toq bê hkyô lé, lungíng é saksé myo myô èq yhangmoq lé tân shit mù, buinyi myi xê nyí gyoro má yhangmoq chyáng lé htoq shit shit kut luí, Garai Gasâng é mingdán hkyô lé hko kyô ri. Yhang, yhangmoq eq rahá zup tô é hkûn, hkunmó hkyô é gi, “Nungmoq gi, Yerusalem wà mó mai a htoq é za, ngá chyáng mai wó gyô yu é, ngá wâ ê danggidq byi tô é chyunghuq lé lánq nyí keq. Hkâsu mù gâ le, Yohan gi, wui èq wui-myhup hkám byí é nghut lhê; nghut kôlhang, nungmoq kúm gi, buinyi hkâ-myháng a myáng má, Chyoiyúng Woi-nyí mai bapisma wó hkam yù kó râ nghut lhê.” gâ ri.
- 6** Lagyô pé gi, Yhang eq rahá chôu zup míng tô é hkûn, Yhang lé, “Yhum-síng ê, nàng, haú Israelaq byu pé lé mingdán dum xuq byi râ gi, ahkuí yhang nghut bê lhú?” ga myí akô.
- 7** Yesuq gi, “Áwa gi, Yhâng é ahkáng ayá èq kut to bê é ahkyíng yam-yoq pé lé, nungmoq sé nó a ra. Nghut kô-lhang, Chyoiyúng Woi-nyí nungmoq

chyáng jé jáng, nungmoq gi, wum-o a-tsam wó yù mù luí, Yerusalem wà mó eq Yuda mau banshoq, Samariq mau eq maumyí htàng shoq, ngá é saksé pé dut kó râ nghut lhê.” ga luí, yhangmoq lé taí ri.

- 9** Dang haú ban taí é htàng má, yhangmoq wú nyi le, Yhang gi, mauhkûng shut shuí yu é hui mù, yhangmoq hí mai Yhang lé a myàng loshoq, mhut èq htup ló byuq bê nghut ri.
- 10** Yesuq doq ló nyi é u lé, yhangmoq mauhkûng shut ru wú tsuq nyi bum ashí le, hpyu é mebu wut é byù í yuq gi, radá dâm yhangmoq nàm má htoq yap lò mù, “Galile byu pé ê, haí mù luí mauhkûng shut wú tsuq nyi akô lhú? Nungmoq é hí mai mauhkûng shut shuí yù huí é, haú Yesuq mauhkûng shut doq ló é u lé, nungmoq myang kat é su, Yhang dum jé lé râ nghut lhê.” ga taí akô.

Yudaq É Jowò Má, Mahtiaq Lé Hkyin Kat É Hkyô

- 12** Hau htàng má, yhangmoq gi, Tsanlun Bùm mai, Yerusalem wà mó shut taú ló bekô.^a Haú gyoro gi, Bánno buinyi má ge sô é í za wê ri. Yhangmoq jé ló kôjáng, yhangmoq nyi nyi kô é yhûm ahtuq pyâm mâ é wap shut doq ló akô; haú bang gi, Petruq, Yohan, Yakuq, Andre, Hpilip eq Htomaq, Barhtolume eq Mahte, Alhpe é yhangzo Yakuq, Zelutuq dut é Simun, góyuq Yakuq é yhangzo Yudaq pé nghut akô. Yhangmoq lung-

^a 1:12 Tsanlun bùm eq Yerusalem gyoro gi, déng rawuí hkup kô we ri.

lhang bang gi, miyiwè wuì le, Yesuq é yhangnu Mariq le, yhanggu pé le kut mù, i-miyit rahkat za kyû chòm dung dung kut nyi akô.

¹⁵ Buinyì haú yoq má, Petruq gi, lum-jíng é gumang gu-nhá^a wuì rasho í xê yuq kô zup zíng tô é gung gúng má, ¹⁶ toq yap mù, “Gumang gu-nhá wuì ê, Yesuq lé chyup é bang lé hkyô shuí hí é sù Yudaq eq séng luí, hí hpyang Dawiq é nhut mai Chyoiyúng Woi-nyí taí tô é Chyúmdang gi, dik byuq bê ¹⁷ nghut ri. Yhang gi, nga-nhúng má nghap lhôm é hui mù, hpúng sará ayá wó bê sù nghut kôlháng shí hkyô dut bê nghut ri.” ga taí ri.

¹⁸ (Yudaq gi, yhang kut é agè ashop é muzó mai wó é ahpau éq myigùng ratóng wui yu é htàng, haú má yhang, a-nghop dông byit gyó mù wam buq goq luí, ù banshoq buq myín byuq ¹⁹ bê nghut ri. Haú hkyô lé Yerusalem wà mó má nyi é lhunglhang bang wó gyo kôjáng, myigùng haú lé yhangmoq é myíng dông, ‘Akeladama’ ga myhíng akô; haú gi, ‘Sui myigùng’, gá é nghut ri.)

²⁰ Petruq xoq taí é gi, “Hkâsu mù gá le, Hkya-on Kungtôn Laiká má, ‘Yhâng é jowò chamchyuiyùì dut byuq sháng gaq; haú má ó le a nyì kó sháng gaq.’^b ga luí le, dum

‘Yhang wó é ayá lé byù góyuq wó yu pyám byi sháng gaq.’^c

²¹⁻²² ga luí le, bo tô ri. Haú mù luí, Yohan baptisma byí hi é hkún mai, Yesuq lé nga-nhúng chyáng mai shuí yu é buinyì jé shoq, Yhumsíng Yesuq nga-nhúng eq rahá htoq htoq wàng wàng kut nyi é buinyì banshoq pé

má, nga-nhúng eq yhang zum nyì sù rayuq lé, hkyin kat râ dut ri. Haú yuq gi, Yesuq dum dui toq é hkyô lé nga-nhúng eq rahá saksé dut râ sù nghut lhê.” gá ri.

²³ Haú hkún, yhangmoq gi, Yustu ga le myhíng é, Barsabaq gá é Yosep eq ²⁴⁻²⁵ Mahtiaq nhik lé hkyin tô akô. Haú mù, yhangmoq kyúdung kô é gi, “Byù banshoq é i-miyit lé sê é Yhumsíng ê, Yudaq Iskarut gi, yhang ló gíng é jowò shut ló râ ga, tô pyám tô é yhâng é lagyo ayá é matú shí nhik mâ é nàng hkyin tô é sù lé tún shit laq ò.” ga ²⁶ akô. Hau htàng, yhangmoq, byù hkyín shosé she le, Mahtiaq chyáng ang bê. Haú mai, Mahtiaq lé gi, haú lagyo raxe rayuq má jat kat bê nghut ri.

Chyoiyúng Woi-nyí Jé Gyó Lo É Hkyô

2 Penteko-ti^d buinyì jé jáng, lum-jíng bang banshoq gi, jowò ralhú má za, chòm zup míng nyi tô ² akô. Haú hkún, laidun mó lo é su gá é htê gi, byodàn ratung, mauhkúng mai mying htoq lô mù luí, yhangmoq zing tô é yhúm byíng shoq dut ³ to bê nghut ri. Myishâm su dut é le byò myín htoq lô mù, yhangmoq yuq jup é ahtoq má jé to bùm bê ⁴ nghut ri. Yhangmoq lhunglhang bang gi, Chyoiyúng Woi-nyí byíng lo bùm kômù, Woi-nyí éq taí nhang é eq rajung za, laklaí dang dông nyo lo bum akô.

⁵ Haú u lé, mauhkúng ô má joq é mingdán hkingmó mâ é, tarâ hkunggá é Yudaq byu pé gi, Yerusalem wà mó má bíng nyi bum akô. ⁶ Haú mying é htê lé wó gyo kôjáng, byù rajùm rayò zíng lé lô kômù,

^a 1:15,16 Gumang gu-nhá gá é lé, Grik má gi, gumang za gá to lhê.

^b 1:20 Hkya-on 69:25 ^c 1:20 Hkya-on 109:8

^d 2:1 Penteko-ti gá é gi, Lhoqlhai Poí laí é htàng ngo xê nyí jé é buinyì má, kut é poi lé gá lhê.

- ó le ô é myíng dông sê gyô yù kô é yanmai, maú úng-âng byuq bùm kô-
⁷ luí, maú bùm uchyang taí kô é gi,
 “Wú keq, ahkuí dang taí nyi é byù shí bang lhunglhang gi, Ga-
⁸ lile byu pé chyat a nghut kó lú? Haú
 nghut é wa, hkâsu mù nga-nhúng
 ó le ô é yhumsing mau mâ é myíng
⁹ dông sê gyô yu lhê lú? Parhti,
 Medi, Elam mau mâ é bang eq Mesopotamiaq mau, Yuda eq Kapadokia
¹⁰ mau, Pontuq eq Asia, Hprugi eq Pamhpuli,
 Egutuq ming má nyi é bang eq Kuruni myuq nâm má nyi é Li-
 bya ming mâ é bang, Romaq myuq mai lé bíng nyi é Yudaq byu pé eq Yu-
 daq noqkuq htûng má lhing wang
¹¹ lò bang, Kreti zinlóng eq Arabiq mau mâ é bang, nga-nhúng gi,
 yhangmoq hko kyô é Garai Gasâng é mauhpo muzó hkyô lé, yhum-
 sing mau mâ é myíng dông yhang
¹² wó sê gyô yu ri-nhung.” gâ ri. Yhangmoq banshoq bang gi, maú úng-âng
 byuq kômù, “Shí gi, haí wá nghut lhê lú?” ga le, rayuq eq rayuq myí lhúm
 bum akô.
¹³ Nghut kôlhang, byù ra-am gi, “Shí bang gi, î shuq wut é bang nghut akô.”
 ga luí, taí jihpoi bum akô nghut ri.

Petruq Hko Kyô É Mungdang

- ¹⁴ Haú hkûn, Petruq gi, lagyo góbang raxe rayuq eq toq yap mù, htê mó èq byù haú bang lé taí é gi, “Yudaq byu pé eq Yerusalem wà mó má nyi nyi é lhunglhang bang ê, rago gyô wú keq! Ngò, nungmoq lé, shí hkyô taí kyo
¹⁵ kôlé. Shí bang gi, nungmoq sù-ngam é dông, shuq wut é bang a nghut; hkâsu mù gâ le, ahkuí gi, napkyó gau hkyíng
¹⁶ za ru nghut ashí. Shí hkyô kúm gi,

- myiqhtoi Yoelaq taí tô é eq rajung za
¹⁷ dut é nghut ri. Yhang taí tô é gi,
 ‘Garai Gasang îsu gâ ri: Ló htâng é buinyì pé má, Ngò Ngá é Woi-nyí lé byù lhunglhang bâng é ahtoq má hut gyun rà nghut lhê.
 Haú mù, nungmoq é yuqzo byizô pé gi, myiqhtoi htoi kó rà; nungmoq é zorâm wui gi, myoqwup shing-rán myàng kó rà; nungmoq é hpaú mâng pé gi, yhupmoq myàng kó rà nghut lhê.
¹⁸ Buinyì haú pé má, Ngá é dui-nhâng zoshâng hpô pé eq dui-nhâng zoshâng myhí pé é ahtoq má lhang, Ngò Ngá é Woi-nyí lé hut gyun mù luí, yhangmoq gi, myiqhtoi htoi kó rà nghut lhê.
¹⁹ Ngò gi, ahtoq mauhkûng htoq má mauhpo muzó pé lé, a-ô myigùng htoq má, kumlhá pé lé, sui eq, myi eq, myihkau dùm pé èq kut mù tân shit rà.
²⁰ Haú Yhumsing é kô hkikhkam é buinyì a jé shimá, bui gi, mauchut byuq, lhamó gi, sui dut byuq é hí dut rà nghut lhê.
²¹ Haú hkûn, Yhumsing é myíng lé lhang é bang yuq hkanngó gi, hkyi yu é hui kó rà nghut lhê.’^a
 gâ ri.
²² Israelaq byu pé ê, dang shí lé gyô yù keq, nungmoq sê é eq rajung za, Nazaret wà byù Yesuq nungmoq é hí má tân shit é, laklaí kumlhá, mauhpo muzó eq kumlhá pé gi, Yhang lé Garai Gasang nhang kat é saksé

^a 2:21 Yol 2:28-32

²³ dut bê nghut ri. Shí yuq gi, Garai Gasang myit hpyit tô é hkyô eq, hí te sê é hpaqchyí dông, nungmoq chyáng ap pyâm é hui mù, nungmoq gi, agè ashop byu pê é loq èq, Yhang lé tapzîng htoq má jén sat
²⁴ pyám nhâng bekô nghut ri. Nghut kô-lhang, haû shî-nò hkyô gi, Yhang lé wó hkâm zing jung a nghut é yanmai, Garai Gasang gi, Yhang lé shî-nò jamjau mó mai, lhut pyám byi luí
²⁵ lhoq dui toq yû bê nghut ri. Dawiq gi, shí yuq eq séng luí taí é má,

‘Haû Yhumsîng gi, ngá é myoq hí má hkâ-nhám le nyi nyi é lé ngò myâng bê.

Yhang ngá é loqyo hkyam má nyi nyi é yanmai, ngo lé wó lhoq nhún râ a nghut lo.

²⁶ Haû mù, ngá i-myt gi, nuingón nyí luí, ngá nhut shô gabú hkyá-ôn nyi ri; ngá é gungdu le myit myoqbyù jowò má nyi nyi râ nghut lhê.

²⁷ Hkâsu mù gâ le, nàng, ngá é woi-nyí lé mosumhkung má tô pyâm to râ a nghut. Nàng, náng é Chyoiyúng Sû lé bup byuq é hui nhâng râ a nghut.

²⁸ Nàng, ngo lé asak dui é hkyô sé nhâng bê. Náng é myoq hí má, nàng, ngo lé gabú hkyô lhoq pyíng byi râ nghut lhê.’^a

gâ ri.

²⁹ Gumang wuì ê, nga-nhûng é îchyi íké Dawiq kâng byit mù, myhup pyám hui bê hkyô lé le, yhâng é lup gi, hkû-nyí jé shoq nga-nhûng chyáng joq tô é lé le, ngò, nungmoq lé a gyuq a

³⁰ kyum wám taí lhê. Dawiq gi, myiq-htoi rayuq nghut é yanmai, yhâng é awut ashín mâ é rayuq lé, yhâng é hkohkâm tanghkuq má zùng nhâng râ ga Garai Gasang byi tô é danggidiq
³¹ lé sê to mù, ‘Hkrisduq^b gi, mosumhkung má pyâm to a hui râ eq, Yhâng é gungsho a bup byuq é za, dum dui toq ló râ nghut lhê.’, gâ é hkyô
³² lé te sê to luí taí tô ri. Garai Gasang gi, haû Yesuq lé lhoq dui toq yû bê. Ngamoq banshoq bang gi, haû
³³ hkyo é saksê pé nghut nyi ri. Haû mù, Garai Gasang gi, Yesuq lé Yhâng é loqyo hkyam má lhoq toq to bê. Yesuq gi, Garai Gasang byi tô é danggidiq Chyoiyúng Woi-nyí lé hkam yù mù, hut hkyô kat bê nghut é yanmai, ahkuí nungmoq shí su wó myâng,
³⁴⁻³⁵ wó gyo bekô nghut ri. Hkâsu mù gâ le, Dawiq gi, mauhkûng htoq tsáng myhâng má a doq ló wú kôlhâng, yhang gi,

‘Haû Yhumsîng Garai gi, ngá é Yhumsîng lé,

“Ngò, náng é gye pé lé, náng é hkyí nang tanghkuq kut pyám byí é hkyíng jé shoq, Ngá é loqyo hkyam shut zung nyi shi aq.” gâ ri.’^c

ga luí, taí ri.

³⁶ Hau é yanmai, Garai Gasang gi, nungmoq èq tapzîng má jén sat pyám é haû Yesuq lé, Yhumsîng eq Hkrisduq dut nhang é hkyô, Israelaq byu pé lhunglhâng bang hkyak sê nyi kó sháng gaq ô.” gâ ri.

Sâng-hi Lumjîng É Bang

³⁷ Yhangmoq gi, haû lé wó gyô bùm kôjáng, yhangmoq é i-myt má záng kô é nghut mù luí, “Gumang wuì ê,

^a 2:28 Hkya-on 16:8-11 ^b 2:31 Grik dong *Hkrisduq* gâ é gi, xû but hui Sû gâ é lichyúm nghut mù, Hebre dong *Mesaia* gâ é eq rajung za nghut lhê. ^c 2:34 Hkya-on 110:1

ngamoq hkâsu kut lo râ lú?” ga luí, Petruq eq lagyo góbang lé myí akô.

³⁸ Petruq gi, “Nungmoq yuq hkgamó myit lhîng mù, Yesuq Hkrisduq é myîng mai wui-myhup hkâm yù keq; Haú jáng, nungmoq é yubak hkyut pyám byí é hui kó râ nghut lhê. Haú hkûn, Chyoiyúng Woi-nyí gâ é chyunghuq lé, nungmoq wó yú kó râ

³⁹ nghut lhê. Hkâsu mù gâ le, danggidiq haú gi, nga-nhûng é Yhumsîng Garai Gasang ji yù râ bang banshoq nghut é, nungmoq eq nungmoq é yhangzo yhangshú pé eq le, mau we má nyí é lhunglhâng bang eq le, sêng lhê.” ga luí, yhangmoq lé taí kyô ri.

⁴⁰ Yhang gi, dang gotú myo myô èq le saksé hkâm mù, “Shí agè ashop é amyú mai wó lut htoq lo keq ô!” ga luí, yhangmoq lé lhoq pun lhoq

⁴¹ kyîng ri. Dang haú lé guq yu é bang gi, wui-myhup hkâm yu bùm kôluí, haú nyí má byù sum hkyîng kô jat wàng lo bum bekô nghut ri.

Lumjîng Bang Zùm Yap É Hkyô

⁴² Haú bang gi, lagyo pé mhoqshit é hkyô, zùm yap é hkyô, muk hpê gam é hkyô^a eq akyú dúng é hkyô má, i-myit rahkat za chôm châng nyi akô.

⁴³ Lagyo pé kut shit é mauhpo muzó eq limik kumlhá pé myo myô é yanmai, lhunglhâng bang gi, gyuq maú nyi

⁴⁴ bum akô nghut ri. Lumjîng é lhunglhâng bang gi, rawò má za zup zîng to mù, azíng zè banshoq lé chôm

⁴⁵ chung nyi akô. Yhangmoq gi, yhum-sing é sutzè pé lé, úng pyám mù, yuq hkgamó lé, yhang râ tô é eq rajung

⁴⁶ za gàm byí akô. Yhangmoq gi, nyí wuí myit rahkat zâ èq noqkuq yhûm wàng má nyi nyi akô. Yhumsing é yhûm pé

⁴⁷ má le muk hpê gam é hkûn, Garai Gasang lé hkya-on kungtôn uchyang, gabú é eq myit huí é èq chôm zo chôm shuq nyi bum akô; byù banshoq bâng é hí má le myoqdong wó bum akô. Haú Yhumsîng gi, nyí wuí yhangmoq chyáng hkyi yù hui bang jat lò nhang ri.

Hkyí Hten Sû Rayuq Lé, Petruq Lhoq Gê Byí É Hkyô

3 Ahkuí, Petruq eq Yohan gi, myin-htâng zó sum hkyíng lhê é kyû-dung nám má, noqkuq yhûm shut doq e ló akô. Haú hkûn, ínû unghkaú mai hkyí hten lugù dut é byù rayuq lé, noqkuq yhûm má wang lé lô bâng chyáng mai dung zo sháng gaq ga, Yúngl hó hkum ga myhîng é hkúmdong má nyí hkgam nyí mó waq lé

² lô mù, lé nyhi to to kut akô. Yhang gi, Petruq eq Yohan, noqkuq yhûm haú má wang e ló é lé, myàng luí,

⁴ lhom dúng nyi ri. Petruq eq Yohan kúm gi, yhang lé chôm wú tsuq to mù,

⁵ “Nga-nhik lé tu wú aq.” gâ akô. Haú mù, yhang, yhangnhik chyáng mai rajung jung wó yú râ lé myit myoq-byù luí, yhangnhik lé rago za saí wú tô ri.

⁶ Petruq kúm gi, “Ngùn, hîng gi, ngò a wó; nghut kôlhâng, ngò wó é nang lé byi lé: Nazaret wà byù Yesuq Hkrisduq é myîng mai toq sô ló aq.”

⁷ ga taí uchyang, yhâng é loqyo loq má zui mù lâng toq kat ri; haú hkûn jáng, yhâng é hkyí kochang-chap pé wúm

⁸ bo lò bê nghut ri. Haú mù, yhang gi, radá dâm toq yap mù sô kat luí, so uchyang, byàm uchyang Garai Gasang lé hkya-on mù, yhangnhik eq rahá noqkuq yhûm má wang ló ri.

^a 2:42 Muk hpê gam hkyô gâ é lé lichyúm í dông wó yu lhê - radông gi, rahá chôm zo chôm shuq é lé gâ lhê; radông gi, Poído chôm zô é lé gâ lhê.

⁹ Yhang sô e lô nyi é eq Garai Gasang lé hkyá-on kungton nyi é lé, lhunglhâng
¹⁰ bang chôm myang akô. Haú yuq gi, noqkuq yhum é Yúngl hó hkum gâ é hkúmdong má zung to mù, dung zo sù nghut é lé yhangmoq matsîng kô é nghut mù luí, yhâng chyáng dut lò bê hkyo é yanmai, maú hong byuq bum akô nghut ri.

Petruq Hkô Kyô É Mungdang

¹¹ Petruq eq Yohan chyáng haú dung zo sù byìn châng tô é hkûn, shiwa byu pé gi, wú maú uchyang, Sholumon jiroshut, yhangmoq chyáng din
¹² yán wang lé lo bum akô. Petruq haú lé myàng jáng, shiwa byu pé lé taí é gi, “Israelaq byu pé ê, shí yuq é hkyô lé haí mù luí maú nyi akô lhú? Nga-nhik é dingmán hkyô eq wum-o a-tsâm èq, shí yuq lé wó so nhang é su ngâm luí, ngá-nhik lé wú tsuq bum akô lhú? Haú dông a nghut. Abraham, Isak eq Yakup pê é Garai Gasang, nga-nhông é íchyí îwa pê é Garai Gasang gi, Yhâng é dui-nhâng zoshâng Yesuq lé hpungwup shingkaq lhoq htoq byí é nghut ri; nungmoq kúm gi, Yhang lé sat hui shoq ga ap pyám kômù luí, Pilat zau hpó mai Yhang lé nhang pyám râ ga myit to bê lé, nungmoq gi, Yhâng é hí má yhang, Yhang lé he-ngik pyám akô nghut ri.
¹⁴ Haú chyoiyúng dingmán é Sù lé nungmoq he-ngik pyám kômù, byù sat sù lé
¹⁵ sheq dúng htoq yú kôluí, Asak Yhum-sîng lé gi, sat pyám bekô. Garai Gasang kúm gi, haú yuq lé shi é mai lhoq dui toq yú bê nghut ri; ngá-nhik gi,
¹⁶ haú hkyo é saksé nghut nyi lhê. Yesuq é myîng lé lumjîng é yanmai, haú lumjîng myit mai za, shí nungmoq myang

é sê é sù lé wum-o lhoq pyîng byi bê nghut ri; nghut bê, Yesuq lé lumjîng é yanmai, shí yuq lé, nungmoq banshoq bâng é hí má, gumjup shoq lhoq ge to byi bê nghut ri.

¹⁷ Ahkuí, gumang wui ê, nungmoq é uphkâng bang kut é su, nungmoq le haú hkyô lé a sé mù kut pyâm é hkyô
¹⁸ lé ngò sê nyi lhê. Nghut kôlhâng, haú hkyô gi, Garaí é Hkrisduq shî-nò jam-jau hui râ nghut lhê ga luí, myiqhtoi banshoq bang lé hí hí mai taí nhang tô é Garai Gasang yhang, lhoq dik é nghut ri. Hau é yanmai, haú Yhumsing chyáng mâ é nguîngón é ahkyíng yàm yoq jé lô râ matú le,
²⁰ nungmoq é matú hkyin tô é Hkrisduq nghut é Yesuq lé, Yhang nhang kat byi râ matú le, nungmoq é yubak mara hkyut pyám byí é hui râ matú le, nungmoq gi, myit lhîng mù Garai Gasang chyáng lhîng lò keq. Garai Gasang gi, a-nham pyat mai, Yhâng é chyoiyúng myiqhtoi pê é nhut mai, taí nhang to bê eq rajung za, nyi mi-nyì, joq mijoq lé asik dum saí é pyat jé shoq, Yesuq lé mauhkûng htoq má nyi
²² nhang to râ nghut lhê. Hkâsu mù gâ le, Mosheq taí tô é le, ‘Haú Yhumsîng Garai Gasang gi, nungmoq é yhanggu yhangmâng pê chyáng mai, nungmoq é matú ngò sù é myiqhtoi rayuq pô htoq lô nhâng râ nghut lhê; haú yuq taí mitaí nungmoq gyo ra râ nghut
²³ lhê. Myiqhtoi hau é dang lé a gyo sù ó yuq nghut kôlhâng, yhumsing é byù myú mai chyung hpyit pyâm é hui râ nghut lhê.’^a gâ ri.
²⁴ Gè gè yhang, Samuelaq mai, yhâng é htâng má châng pô htoq lo é myiqhtoi pé banshoq bang hko kyô lo é má le, buinyì shí pé eq séng mù taí

^a 3:23 Tarâ Pun 18:15, 18-19

²⁵ to bekô nghut ri. Nungmoq gi, haû myiqhtoî pê é dang silí wunlí eq, Garai Gasang mai, Abraham lé, ‘Náng é awut ashîn é yanmai, mingkan htoq mâ é byù myû chângjup hkungsô wó kó râ nghut lhê!’^a gâ é eq rajung za, nungmoq é îchýí îwâ pé eq tô tô é danggidiq lé wó hkam yù râ bang nghut akô. Garai Gasang gi, nungmoq yuq hkangmó lé yhumsîng agè ashop ê hkyô mai wó lhing taû lò nhang é dông, shimân byi râ matú, Yhâng é dui-nhâng zoshâng lé pô htoq lò nhâng luí, nungmoq chyáng hí nhang kat byi bê nghut ri.” gâ ri.

**Petruq Eq Yohan Nhik
Chyup Huí É Hkyô**

4 Hkyangjông pé, noqkuq yhûm zúng é suwún hpó eq Saduke pé gi, Petruq eq Yohan shiwa byu pé lé dâng nyo nyi é hkûn, htoq lé lô kômù, ² yangnhik, shiwa byu pé lé mhoqshit é eq, Yesuq é yanmai shi byuq bê bang Yesuq má dum dui toq lô râ gâ é hkyô lé taí nyi kô é yanmai, yangmoq gyai yang myit myô nyi bum ³ akô. Haû mù, yangmoq gi, yangnhik lé chyup yû luí, myinhtâng mauchut lô bê nghut é yanmai, htang napkyó jé shoq htóng má lhûng tô akô. ⁴ Nghut kôlhang, mungdang lé wó gyô yu é bang myo myo gi, lumjîng kômù luí, yuqgè ngo hkyîng kô jé shoq myô jat lò bekô nghut ri.

**Yudaq Byin Tú Wapdoq Má,
Yhangnhik Lé Myí Jep Wú É Hkyô**

⁵ Htang nyí, yangmoq é zau wuí, suwún wuí eq tarâ sará pé gi, Yerusalem wà mó má chôm huí zup akô. ⁶ Hkyangjong mó Anna, Kayahpaq, Yo-

han, Alesander pé eq hkyangjong mó é amyû pé banshoq le, haû má bo tô ⁷ akô. Haû mù, yangmoq gi, Petruq eq Yohan lé gung gûng má nyhi to luí, “Nungnhik gi, haí a-tsam, ó yuq é myîng mai mô shí lé kut akô lhú?” ga myí akô.

⁸ Haú hkûn, Petruq gi, Chyoiyúng Woi-nyí byíng tô é nghut mù luí, yangmoq lé taí é gi, “Mingbyû wui ⁹ é zaugun suwún wuí ê, hkyí hten sù shí yuq lé lhoq gê byí é jeju yanmai, yang hkâsu kut lhoq ge yù huí é hkyô lé, hkû-nyí nungmoq ngá-nhik lé myí ¹⁰ gôn wú naú kô é nghut le gi, nungmoq lhunglhang bang eq Israelaq byu pé banshoq lé sé nhâng kôlé, nungmoq èq tapzîng má jén sat pyám mù, Garai Gasâng èq shi é mai lhoq dui toq yu é, Nazaret wà byù Yesuq Hkrisduq é myîng mai, shí yuq gi, nungmoq é hí má îsu wáng wáng zán zán yap tô é nghut ri.

¹¹ ‘Yhûm saí bang nungmoq hkyin htoq pyám é luqgok gi, htungchyûn mâ é ahkyak dik é luqgok dut bê.’^b

gâ é gi, Yesuq lé taí é dông nghut ri.

¹² Hkyi yù hkyô gi, Yhang mai lai luí gotû a nyi lo, hkâsu mù gâ le, nga-nhúng hkyi yu é hui râ matú, mauhkûng a-ô má, Yhâng é myîng mai lai luí, xângzo byu pé lé byí tô é myîng gotû a joq lo é yanmai nghut ri.” gâ ri.

¹³ Yhangmoq kúm gi, Petruq eq Yohan nhik a gyuq a kyum taí é lé myàng kôjáng, yangnhik, jong a doq wú é, mayû byù za nghut é hkyô lé sé to kô é yanmai, maú nyi bum akô; nghut kôlhang, hí hpyang Yesuq eq zum wún wú sù nhik nghut é lé, yangmoq bûn

^a 3:25 Apûn 22:18, 26:4 ^b 4:11 Hkya-on 118:22

- 14 kat akô nghut ri. Hau htoq agó, lhoq gê byí é hui sù le, yangnhik eq rahá yap tô é lé, yangmoq myàng kô é nghut mù luí, taí rã hkyô haí le a joq
- 15 lo kó nghut ri. Haú mù, yangnhik lé, haú Yudaq byìn tú wapdoq^a mai lhoq htoq to mù, yangmoq rayuq eq
- 16 rayuq hpyê lhum kô é gi, “Shí nhik lé hkâsu kut lé gè rã lhuí? Yangnhik kut shit e laklaí kumlhá gi, Yerusalem wà mó má nyí é lunglhang bâng é hí má de za dut bê nghut é yanmai, nga-nhúng haú lé a wó hê lo nghut ri.
- 17 Nghut kôlhang, mingbyú wuì má shí hkyô je riyhang a byo myín ló sháng gaq, ahkuí mai myìng haú lé lang mù ó lé le a taí kyo lo rã matú, yangnhik lé kyuq hkúm pyám sháng.” gâ bum akô.
- 18 Haú mù, yangnhik lé dum wut hâng yù luí, Yesuq é myìng lé lang mù, haí le hkâtaí, hkâ-mhoqshit kó
- 19 ga chôm hkâm akô. Petruq eq Yohan kúm gi, “Garai Gasâng é mungdang lé gyo rã htoq má, nungmoq é dang gyo le gi, Garai Gasâng é hí má gè rã, a gè rã lé, nungmoq yang doqdân yù keq.
- 20 Nga-nhik kúm gi, myàng yù, wó gyô yù bê é hkyô pé lé, a taí é, a wó nyí nghut lhê.” ga luí, yangmoq lé dum tú taí akô.
- 21 Haú hkûn, yangmoq gi, dut laí lò bê hkyô é yanmai, shiwa byu pé Garai Gasang lé hkya-on kungton nyi bùm kôluí, yangnhik lé dâm byi rã hkyô a myàng kó ê nghut mù luí, yangnhik lé dum tân kyuq luí nhang pyám bekô
- 22 nghut ri. Hkâsu mù gâ le, haú laklaí kumlhá đông lhoq gê byi huí é sù gi, asak myi xê zàn chyân bê sù nghut é yanmai nghut ri.

Lumjáng Bâng É Kyûdung Dang

- 23 Yangnhik gi, nhang kat pyâm é hui kôjáng, yangnhik é luzúm wui chyáng taú ló kômù, hkyangjong agyi pé eq suwún wui èq yangnhik lé hkyîm é dang banshoq lé, ló taí kyo
- 24 akô nghut ri. Haú hkyô lé wó gyo kôjáng, yangmoq gi, myit rahkat zâ èq yhumsing é htê lhoq ko mù, Garai Gasang lé kyûdung kô é gi, “Mau-hkûng eq myigùng, wuìshuq lung-aú eq, haú pé má, nyí mi-nyí lé hpan tô é, ahko ahkáng lunglhang wó é Yhum-
- 25 sîng ê, Nàng, náng é dui-nhâng zoshâng, ngamoq é íchyí íké Dawiq é nhut mai, Chyoiyúng Woi-nyí èq taí tô é gi,
- ‘Haí mù luí, tûngbau amyú pé gi, nhikjum yô akô? haí mù luí, byu pé gi, akôm dâ pyám akô lhuí?
- 26 Haú Yhumsîng eq Yhâng é Hkrisduq lé gumlau toq rã matú, mingkan hkohkâm pé gi, toq mù, zau suwún wuì eq rahá zup zîng bum akô.’^b
- 27 gâ ri. Gè gè yang, Herut eq Pontu Pilat nhik gi, tûngbau pé eq Isra-elaq byu pé le mù, wà mó shí má chôm zîng to kôluí, nàng xù but byi é sù,^c náng é Chyoiyúng dui-nhâng zoshâng Yesuq lé gumlau toq rã dâ
- 28 nyi akô. Náng é wum-o a-tsam eq nàng ô nau é đông dut rã matú, hí hkûn mai nàng myit hpyit doqdân tô é hkyô lé, yangmoq gi, kut pyám bekô
- 29 nghut ri. Yhumsîng ê, ahkuí yangmoq taí kyuq nyi é dang lé myàng byi laq ô! Náng é dui-nhâng zoshâng wuì, a gyuq a kyum é myit èq náng é dang lé taí rã matú wum-o byi laq!

^a 4:15 Yudaq byìn tú wapdoq lé Grik đông gi, San-hedrin gâ lhê. ^b 4:26 Hkya-on 2:1-2

^c 4:27 Xù but é hkyô gi, Yudaq byu pé htung đông xù but byi jáng, rajung jung kut rã matú hkyin masat yu é hkyô nghut lhê. Xù but byi é sù gi, Grik đông Mesaia gâ é nghut lhê.

- ³⁰ Náng é wum-o bo é loq lâhm kat luí, nolí nojàng lé lhoq gê byi mù, náng é Chyoiyúng dui-nhâng zoshâng Yesuq é myìng mai, limik kumlhá eq mau-hpo muzó pé lé kut shit laq ô!” gâ akô.
- ³¹ Haû su, kyû ban dung kôjáng, yhangmoq zîng tô é jowò gi, dui nún lô mù, yhangmoq lhunghâng bang gi, Chyoiyúng Woi-nyí byíng lô luí, Garai Gasâng é mungdang lé a gyuq a kyum é za taí bùm bekô nghut ri.

**Azîng Zê Lé Chôm Gam
Chûng Kô É Hkyô**

- ³² Haû lumjîng é lhunghâng bang gi, i-myit rahkat za nghut nyi akô; ó yuq le, yhumsîng wó é zè lé ngá é a gâ é za, banshoq eq chôm gam chung nyi
- ³³ akô. Lagyo pé le, haû Yhumsîng Yesuq dum dui toq é hkyô lé a-tsam mó èq saksé hkâm nyi kô é nghut mù luí, yhangmoq banshoq bâng é ahtoq má
- ³⁴ jeju myo myo joq nyi ri. Yhangmoq chyáng a wó a lom é byù rayuq le a nyi kó. Hkâsu mù gâ le, maumyî ratóng wó é, a nghut jáng, yhûm wó é bang ó yuq nghut kôlhâng, haú pé lé adàm dàm ûng pyám luí wó yu é ngùn
- ³⁵ le gi, lagyo pé é hkyî wang má lé to byî akô. Haû mù luí, a wó a lòm sù ó yuq lé le ra tô é eq rajung za gàm byî akô nghut ri.
- ³⁶ Haû hkûn, Barnaba ga luí lagyo pé èq myhîng byi é, Kupru ming mâ é Lewiq byù Yosep le, yhang wó é maumyî ratóng lé ung luí, wó yu é ngùn lé lagyo pé é hkyî wang má, lé to byî ri.
- ³⁷ Barnaba gâ é dang lichyúm gi, myit wum byí su é yhangzo gâ é lichyúm nghut lhê.

Anani Eq Sahpira Nhik É Hkyô

5 Nghut kôlhâng, Anani ga sù gi, yhangmyi Sahpira eq rahá, yháng

- nhâm wó é maumyî ratóng lé ûng
- ² pyám luí, yhangmyi le bo sê é dông, ngùn haû ra-am lé gi, haq myhit yu to mù, ra-am lé za lagyo pé é hkyî wang má lé to byî akô.
- ³ Haû mù luí, Petruq gi, “Anani ê, Chyoiyúng Woi-nyí lé mhaû pyám râ matú eq, maumyî hpau mâ é ra-am lé haq yu to râ matú, haî mù luí, náng é myit má Tsadán le byíng nhang tô
- ⁴ lhê lhú? Maumyî haû joq tô le, náng é zè nghut lhê a nghut lhú? Wó ung é ngùn le náng é zè nghut ashî, a nghut lhú? Haî mù luí, náng haú dông dâ lhê lhú? Byù lé mhaû é a nghut, Garai Gasang lé mhaû pyám bê nghut ri.” ga taí ri.
- ⁵ Anani gi, dang haû lé wó gyo jáng, lêng mù, shi byuq bê nghut ri. Haú hkyô lé wó gyô é bang banshoq le, gyai yhang gyuq bùm bekô nghut ri.
- ⁶ Haú hkûn, zorâm wui gi, toq mù, yhâng é mâng lé htup luí, ê waq
- ⁷ myhup pyám akô. Hau htâng, sum hkyíng kô myáng jáng, yhangmyi le, wang lé lo ri. Haû su dut é hkyô lé gi, yhang a sé nghut ri.
- ⁸ Haú hkûn, Petruq gi, “Ngo lé taí kyô wú aq. Nungnhik ûng é maumyî hpau gi, shí gû za nghut lhê lhú?” ga myi jáng, yhang gi, “Nghut lhê, haú gû za nghut bê.” ga tû taí ri.
- ⁹ Petruq gi, “Nungnhik gi, haû Yhumsîng é Woi-nyí lé îsu kut chyam wú râ matú, hkâsu mù chôm myit huí akô lhú? Wú aq, náng é yhumsîng hpó lé é myhup pyám bang gi, haû hkúmdong má jé bê; yhangmoq gi, nang lé le waq htoq pyám kó râ nghut lhê.” ga taí ri.
- ¹⁰ Radá dâm, yhang le lagyo hpô é hkyî wang má lêng shi byuq bê. Zorâm wui le wang lo wú le, myiwe haû shi to lág é lé myàng kôluí, waq é mù, yhanglang é nàm má, ê myhup

¹¹ pyám bekô. Hau é yanmai, haú hkum lhê é hpúng byù banshoq bang eq, haú su dut ê hkyô lé wó gyo má wó gyô é bang gi, gyai yhang gyuq bùm bekô nghut ri.

**Byù Myo Myo Lé, Lagyo Pé
Lhoq Gê Byí É Hkyô**

¹² Ahkuí, lagyo pé gi, mingbyù wui é hí má limik kumlhá eq mauhpo muzó myo myo lé, kut shit nyi akô. Haú lumjínq bang gi, i-myt rahkat zâ èq, Sholumon jiroq má chòm hui hui kut
¹³ bum akô. Shiwa byu pé gi, yhangmoq lé hkunggâ nyi bùm kôlhang, yhangmoq lé a wám ê zum bùm kó. Nghut kôlhang, haú Yhumsínq lé lumjínq é myiwe yuqgè wui gi, myo sheq myô jat lò kômù, yhangmoq chyáng je myô
¹⁵ jat lò bê nghut ri. Haú mù luí, byu pé gi, Petruq laí lo é hkûn, yhang é wupzo za lhang rayuq yuq é ahtoq má zang sháng gaq ga, nõhpyo huí é bang lé, wà mâ é hkyô yàm má waq htoq ê mù, yhuphpú pé eq taphkang pé má
¹⁶ lhez tò akô. Hau htoq agó, Yerusalem awui ayàm mâ é wà pé mai le, byù ajùm ayò gi, no é bang eq agè ashop é nat wang zing-ri huí é bang lé shuí jé lé bum akô; haú bang lhungháng gi, lhoq gê lhoq yô byí é huí bum akô nghut ri.

Lagyo Pé Zing-ri Huí É Hkyô

¹⁷ Hkyangjong mó eq yhang é luzúm wui, Saduke hpúng mâ é byu pé kúm gi, gyai yhang wú manon bùm kôluí, toq mù, lagyo pé lé chyup yú luí, wà mâ é htóng má lhung tô akô.
¹⁹ Nghut kôlhang, haú myín lé, Yhumsínq é maumang lagyo rayuq gi, htóng hkum pé lé hpông pyám mù, yhangmoq lé shuí htoq yú uchyang, “Nungmoq htoq lò mù, noqkuq yhùm má é

yap to luí, dui é asak hkyô sik eq sêng é danglù banshoq, shiwa byu pé lé taí kyo keq.” ga taí ri.

²¹ Napsûn myoqmyàng zó lé, yhangmoq gi, noqkuq yhùm má wàng mù yhangmoq wó gyô yu é eq rajung za, shiwa byu pé lé, mhoqshit hi lò akô.

Haú u lé, hkyangjong mó eq yhang é luzúm wui gi, Israelaq byu pé é suwún wui lhungháng bang lé ji yù mù, Yudaq byìn tú wapdoq chòm zung yú luí, lagyo pé lé é shuí yú râ matú htóng shut byù nhang kat akô. Haú bang kúm gi, htong má jé é hkûn, lagyo pé lé a myàng kôjáng, dum taú lò mù lo taí kyo kô é gi, “Htóng hkum le ging ging myhí to lánq ri, htóng zúng bang le hkum yâm má yap tô akô. Nghut kôlhang, hpông wú le, ahkaú má ó le a nyi to lo nghut ri.” gâ ri. Noqkuq yhùm zúng é zau hpó eq hkyangjong agyì wui gi, dang haú lé wó gyo kôjáng, “Shí hkyô haí dut lô râ lú?” ga, gyai gyuq maú bum akô.

²⁵ Haú hkûn, byù rayuq wang lé lò mù, “Wú keq, nungmoq èq htóng má lhung tô é bang gi, noqkuq yhùm má yap to mù byu pé lé mhoqshit nyi bum akô.” ga luí, yhangmoq lé taí kyô ri.
²⁶ Haú mù luí, zau hpó haú gi, yhang é a-ô mâ é bang eq ê mù, lagyo pé lé é shuí yu akô. Nghut kôlhang, shiwa byu pé luqgok èq dú lò kó râ lé gyuq kô é yanmai, htân htân a wám kut kó nghut ri.

²⁷ Lagyo pé lé shuí jé lò kôjáng, Yudaq byìn tú wapdoq hí má yhangmoq lé nyhi tô akô. Haú hkûn, hkyangjong mó gi, “Yesuq é myìng lé lang luí a mhoqshit râ matú, nungmoq lé, htan é hkunmó hkyô to bê nghut lhê. Nghut kôle, nungmoq mhoqshit é hkyô gi, Yerusalem wà mó jàm shoq, nungmoq kut bekô nghut luí, Yesuq é sui lé, nga-

moq é ahtoq má ke byi râ dô nyi akô.”
ga luí, yhangmoq lé taí akô.

- ²⁹ Háu hkûn, Petruq eq gotû lagyo pé tû taí kô é gi, “Ngamoq gi, byù dang lé gyo ra htoq má Garai Gasâng é mungdang lé je luí gyo râ dut lhê.
³⁰ Nga-nhông é îchyi îwâ pê é Garai Gasang gi, nungmoq èq tapzîng má lhâng sat pyâm é Yesuq lé, shi e mai lhoq
³¹ dui toq kat bê nghut ri. Israelaq amyû lé, myit lhîng hkyô eq mara hkyut byi hkyô hpóng byi râ matú, up é ahkáng wó Sû eq hkyi yù Sû kut nhâng râ ga, Garai Gasang gi, Yhang lé, Yhâng é loqyo loq^a má waq toq to bê nghut ri.
³² Ngamoq le shí hkyo é saksé pé nghut nyi lhê; mungdang lé gyô yù luí châng é bang lé Garai Gasang byi tô é Chyoiyúng Woi-nyí le, shí pê é saksé nghut lhê.” ga akô.

Gamalelaq Hpaqchyí Byí É Hkyô

- ³³ Yhangmoq gi, dang haû lé wó gyo kôjáng, lûm gyo nhik-yo naû kômù, lagyo pé lé sat pyám râ lháng myit
³⁴ akô. Nghut kôlhâng, mingbyû ban-shoq bâng é hí má aróng wó é tarâ sará Gamalelaq gâ é Hparishe rayuq, haû Yudaq byìn tú wapdoq má toq yap mù, lagyo pé lé razup zo lhoq htoq
³⁵ to nhâng luí, yhang taí é gi, “Israelaq byu pé ê, shí bang lé hkâsu kut râ
³⁶ hkyô, rago za hí myit wú keq. Hkâsu mù gâ le, hí hpyang Htudaq gâ é byù rayuq pô htoq lô mù, yhânggùng yhang byù mó rayuq yuq nghut lhê ga taí jáng, byù myi shô kô yhâng chyáng châng wú bekô. Yhang sat pyâm é hui luí, yhang htâng châng é lhunglhâng bang le byo myín byuq kômù, haí le a wó kut dut byuq akô nghut ri.
³⁷ Hau htâng, myìng jilpán guq yu é bui-

nyí má, Yudaq gâ é Galile byù rayuq pô htoq mù, mingbyû wui lé yhâng hkyam shut mhoq hpyoq yu ri. Yhang le sat pyâm é hui mù, yhang htâng châng é lhunglhâng bang le, byo myín
³⁸ byuq bekô nghut ri. Ahkuí le, shí bang lé haí le hkâgon ko, yhangmoq kâm é dông nghut nyí kó sháng gaq; yhangmoq kut nyi é hkyô eq dô nyi é hkyô pé gi, byù myit dông kut é nghut jáng,
³⁹ htên byoq byuq râ za nghut lhê. Nghut kôlhâng, Garai Gasâng chyáng mâ é nghut le gi, nungmoq wó lhoq hkyíng pyám kó râ a nghut. Garai Gasâng é gyè sheq dut lò kó râ nghut lhê.” gâ ri.
⁴⁰ Dang haû lé yhangmoq gyô htuk bum akô. Haû mù, lagyo pé lé wut yù mù luí, nhuq bat yù kômù, Yesuq é myìng lé lang luí mhoqshit é hkyô a ge kut râ nghut lhê ga taí kômù, nhang pyâm akô nghut ri.

- ⁴¹ Lagyo pé kúm gi, Yesuq é myìng é yanmai ru hpuzô é hkyô gi, gingdán nyi ri, ga myit yù kômù, Yudaq byìn tú wapdoq haû mai gabú myit
⁴² èq htoq lô bekô. Hau htâng, yhangmoq gi, nyí wui làng noqkuq yhùm má le, rayhùm htâng rayhùm má le, Yesuq gi, Hkrisduq nghut é hkyô gabú danglù lé mhoqshit hkô kyô nyi akô nghut ri.

Garúm Râ Byù Nyhit Yuq Lé Hkyin Yu É Hkyô

- 6** Ahkuí, chángzô pé myô jat lo nyi é buinyi pé má, Grik dang nyo é Yudaq byu pé gi, yhangmoq é chuimó myhí pé lé, nyí wui lhê é gàm tso gàm huq é hkyô má rago a wó kut kô é yanmai, Hebre myíng mu é Yudaq byu pé lé mara hân dang taí bum
² akô. Háu hkûn, lagyo raxe í yuq gi,

^a 5:31 *Garai é loqyo loq gâ é gi, hpautap hkungga gíng é jowò lé taí nau é nghut lhê.*

chángzô pé lunglhang bang lé wut yù mù, “Ngamoq, Íwa Garai Gasâng é mungdang hko kyô é muzó lé rap pyâm to mù, zangbó amù lé za lajang nyi é nghut le gi, a htuk râ nghut lhê.

³ Haù mù luí, gumang wuì ê, Chyoiyúng Woi-nyí byíng é eq hpaqchyí byéng-yá bo é nhik bo byù nyhit yuq lé nungmoq chyáng mâ é hkyin to keq. Haù bang lé muzó shí lhum hun ⁴ to râ nghut lhê. Ngamoq kúm gi, kyû-dúng é hkyô eq mungdang hkô é hkyô lé za, noqzuq tung kut nyí râ nghut lhê.” ga taí akô.

⁵ Dang haù lé shiwa byù lunglhang bang gyô htuk kômù luí, lumjínng myit kô é, Chyoiyúng Woi-nyí byíng é Stehpan ga sù eq, Hpilip, Prokoru, Nikanora, Timun, Parmena, Yudaq noqkuq htûng má lhing wang lò bê sù Antioku và mó mâ é Nikolaq pé lé hkyin yù ⁶ mù, lagyô pê chyáng shuí ló akô; lagyô pé gi, kyûdung byi kômù, yhangmoq lé loq ke byí akô nghut ri.

⁷ Garai Gasâng é mungdang gi, je myô jam lò luí, Yerusalem và mó má chángzô pé gyai myô jat lawán lo é htoq agó, hkyangjông pé myo myo le, haù lumjínng hkyô má châng nyi bum akô.

Stehpan Chyup Yú Huí É Hkyô

⁸ Ahkuí, Stehpan gi, Garai Gasâng é jeju chyunghuq eq wum-o a-tsam byíng nyi é nghut mù, byu pê é hí má mauhpo muzó pé eq limik kum-⁹ lá mó pé tân shit ri. Haù hkûn, lut-hkyô ga bâng é tarajong eq sêng é Kuruñi, Alesander eq Kiliki, Asia mau mâ é bang ra-am gi, toq mù, Stehpan eq ¹⁰ dang chyin chyin lhúm akô. Nghut kô-lhang, Stehpân é dang gi, Chyoiyúng

Woi-nyí lom é hpaqchyí dang nghut é yanmai, yhangmoq a ûng kó nghut ri.

¹¹ Haù mù, yhangmoq gi, “Shí yuq, Mosheq eq Garai Gasang lé rhoi dang taí nyi é lé, ngamoq wó gyô ri.” ga luí, mhaù taí nhâng râ byù haq lung tô akô.

¹² Haù mù, yhangmoq gi, mingbyù wuì eq nhik bô suwún wuì, tarâ sará pé lé, chun htau mù, Stehpan lé chyup yù nhâng luí, Yudaq byìn tú wapdoq ¹³ má shuí nyhi tô akô. Mhaù é saksé byu pé lé le lhoq hâng kat luí, haù bang gi, “Shí yuq, shí chyoiyúng jowò^a eq jep é tarâ lé shut shai é dang ru taí nyi ri.

¹⁴ Nazaret và byù Yesuq ga sù gi, jowò shí lé hpoyoq pyám mù, nga-nhúng lé Mosheq èq byí tô é htunghking lé htaí pyám râ nghut lhê ga luí, yhang taí é dang lé ngamoq wó gyô é nghut lhê.” ga taí akô.

¹⁵ Haù Yudaq byìn tú wapdoq má zung to bang banshoq, yhang lé chôm wú tsuq nyí kô é hkûn, yhâng é myoqdong gi, maumang lagyô é myoqdong su dut é lé, yhangmoq myang akô nghut ri.

Stehpan Taí É Dang

7 Haù hkûn, hkyangjong mó gi, “Dang haù pé têng lhê lhú?” ga luí, yhang lé myi jáng,

² Stehpan tú taí é gi, “Gumang wuì eq íwa wuì ê, gyô wú keq, nga-nhúng lunglhang bâng é îchyí Abraham gi, Haran và má a ló nyí shi lé, Mesopotamiaq mau má nyi tô ashí hkûn, hpungwup shingkang bo é Garai Gasang gi, yhâng chyáng lé htoq shit mù, ³ ‘Náng é ming eq náng é amyú mai htoq ló luí, ngò tân shit râ ming shut e ló aq.’^b ga luí, yhang lé taí ri.

^a 6:13 *Shí chyoiyúng jowò* gi, Yerusalem noqkuq yhúm lé gâ lhê. ^b 7:3 Apùn 12:1

- ⁴ Haú mù, yhang gi, Hkaldea byu pê é mau mai htoq lô luí, Haran wà má lô nyi nyi ri. Yhâng wa shi byuq é htâng má, Garai Gasang gi, ahkuí, nungmoq nyi nyi é ming shí má yhang
- ⁵ lé htot lô nhâng bê nghut ri. Garai Gasang gi, shí ming má yhang lé silí wunlí nghû râ, hkyí rahkô nang í é myigùng lháng a byí é nghut kô-lhang, yhang, zodù lháng a wò shi mai, yhang lé le, yhâng é awut ashín pé lé le, maumyí shí byi râ ga dang-
- ⁶ gidiq byí to bê nghut ri. Hau htoq agó, shí hkyô lé Garai Gasang xoq taí é gi, 'Náng é awut ashín pé, tûngbau míng má bíng nyí mù, haú ming bâng èq myi shô zàn jùn zô é eq zing-ri é
- ⁷ lé hui kó râ. Nghut kôlhâng, yhangmoq lé jùn zô é amyú lé le, ngò jé-yáng râ nghut lhê.'^a gâ ri. 'Haú hkûn, yhangmoq gi, haú ming mai htoq lô mù, jowò shí má ngo lé noqkuq kó râ nghut lhê.'^a ga le, Garai Gasang
- ⁸ taí ri. Hau htâng, yhang lé ahpyo-kuq hpyit byi râ hkyô eq sêng é dangshikaq le, byí ri. Haú mù, Abraham gi, Isak lé hku é htâng shit nyí buinyí má ahpyo-kuq hpyit byí ri; Isak gi, Yakup lé hkû mù, Yakup gi, íchyí íwa achyûng raxe í yuq lé hku kat bê nghut ri.
- ⁹ Haú íchyí íwâ pé gi, Yosep lé manôn kôluí, Egotuq ming shut jùn dông úng kat akô. Nghut kôlhâng, Garai Gasang gi, yhang eq rahá nghut nyí
- ¹⁰ mù luí, wuîhke jamjau banshoq mai yhang lé lhoq lhut yú mù, Egotuq hkohkâm Hpara-uq é hí má le myoqdong wó, hpaqchyí byéng-yá le bò nhang é yanmai, hkohkâm haú gi, Egotuq ming eq, yhâng é hkohkâm-wâng banshoq lé up nhang ri.
- ¹¹ Haú u lé, Egotuq ming eq Hkanan ming banshoq má mutmó gyó lô mù, wuîhke jamjau mó hui bekô. Nga-nhûng é íchyí íwâ pé le zoshuq a myang hô zo lo dut byuq bekô
- ¹² nghut ri. Ahkuí, Yakup gi, Egotuq ming má guqzo joq é hkyô lé wó gyo jáng, nga-nhûng é íchyí íwâ pé lé
- ¹³ sâng-hí dâm ê nhang ri. Htang dâm dum ê é hkûn, Yosep gi, yhanggu yhangmâng pé lé yhang ó nghut é hkyô taí kyô ri. Hpara-uq le Yosep é yhumbyù ikun hkyô lé sê yù byi bê
- ¹⁴ nghut ri. Hau htâng, Yosep gi, yhâng wa Yakup eq yhumbyù banshoq nyhit xe ngo yuq lé, yhâng chyáng pying
- ¹⁵ yù bê nghut ri. Yakup le Egotuq ming má jé gyó lô luí, yhang eq nga-nhûng é íchyí íwâ pé gi, banshoq haú ming
- ¹⁶ má shí lô byuq bekô nghut ri. Yhangmoq é mâng lé gi, Shehkem wà má yu taú lô mù, Shehkem wà mâ é Hamora é yhangzo yhangshu pê chyáng mai, Abraham èq ngùn byi mù wui hpyit tô é lupdùng má lô myhup tô akô nghut ri.
- ¹⁷ Abraham lé Garai Gasang byí tô é danggidiq dik râ ahkyíng jé lo nyi é
- ¹⁸ u lé, nga-nhûng é amyú gi, Egotuq ming má Yosep lé a sê é hkohkâm pô htoq é pyat jé shoq, myoluq jebe
- ¹⁹ lò bekô nghut ri. Hkohkâm hpó haú gi, nga-nhûng é amyú htoq má a ge é hpaqchyí da luí, nyheqnú pé lé shi byuq sháng gaq ga, dú pyám nhang é dông mai nga-nhûng é íchyí íwâ pé lé zing-ri bê nghut lhê.
- ²⁰ Haú u má, Mosheq lé hkû to bê. Yhang gi, Garai Gasang é hí má gyai yúnglhô é sù nghut ri; yhang gi, yhangwâ é yhûm má lhamó sum
- ²¹ hkyap baú tô é hui mù, htot tô tô é

^a 7:7 Apûn 15:13-14

hui jáng, yhang lé Hpara-ug é byizô èq xe yù mù, zosíng kut yù luí, hku²² kô ri. Mosheq gi, Egutuq ming mâ é hpaqchyí byéng-yá banshoq lé mhooq yù luí, nhut shô a-tsam eq hkyí loq a-tsam gyai bò sù nghut ri.

²³ Yhang asak myi xê zàn jé lò jáng, yhâng é gumang Israelaq byu pé chyáng ê kûm wú râ matú wó myit²⁴ htoq kat ri. Ê jé jáng, zing-ri hui nyi é sù rayuq lé ê myâng luí, haú yuq lé búng mù, zing-rí nyi é Egutuq byù lé, loqchoq hpuq é dông sat pyâm ri.

²⁵ Mosheq gi, yhâng é byu pé lé yhâng é loq dông Garai Gasang hkyi yù hkyô byi nyi é lé, yhâng é amyû pé sê gyo byi nhô ngàm kôlháng, yhangmoq a²⁶ sê gyo byi kó nghut ri. Htang nyí lé, Israelaq byù yhangchang mabyoq htoq nyi é má, e ang mù, yhangnhik lé pyîn naù luí, 'Ahkaú nhik ê, gumang yhangchang sheq ru nghut lhê nhíng, haí mù rayuq eq rayuq byoq lhum nyi akô lhú?' ga taí ngón wú ri.

²⁷ Luzúm hpó lé zing-rí nyi sù yuq gi, 'Ngamoq é ahtoq má zau eq tarâ agyí kut râ matú, nàng lé ó yuq hkyin tô²⁸ é lhú? A-nyí nap Egutuq byù lé sat pyâm é su, ngo lé le sat pyám nau ri lhú?'^a ga luí, tû taí uchyang yhang lé²⁹ dún chyún pyâm ri. Mosheq gi, dang hau é yanmai, hpâng luí Midian ming má é nyi byuq ri. Haú má yuqzo í yuq é wó ri.

³⁰ Haú ming má myi xê zàn lai jáng, Sinaq Bùm yàm, yoso hkaú mâ é myi gyúng tô é mhanpúng mai, maumang lagyo rayuq gi, Mosheq lé htoq shit ri.

³¹ Mosheq gi, haú lé myàng jáng, hau é yanmai maú luí, wú wú râ ga huí e ló³² le, Yhumsíng é htê htoq lo é gi, 'Ngò gi, náng íchyí íwâ pé é Garai Gasang,

Abraham, Isak, Yakup é Garai Gasang nghut nyi lhê.'^b ga ri. Mosheq kúm gi, gyuq nán luí, a wám tu wú nghut ri.

³³ Haú Yhumsíng gi, 'Náng é hkyí-tsung hkyut pyám aq, nàng yap tô é jowò gi, chyoiyúng é myigùng nghut³⁴ lhê. Egutuq ming má ngá é amyû pé zik zo huí nyi é hkyô lé, ngò gè gè yhang myàng bê; yhangmoq é ngaù nhik ngaù htê lé ngò wó gyo bê; yhangmoq lé hkyi yù râ matú ngò gyó lé é nghut lhê; ahkuí, lé aq, ngò, nang lé Egutuq ming shut nhang taú kat rã.'^c ga luí, yhang lé dum taí ri.

³⁵ Yhangmoq èq, 'Nang lé zau eq tarâ agyí kut râ matú, ó yuq hkyin tô é lhú?' ga luí he-ngik pyâm é Mosheq lé yhang, mhanpúng má htoq shit é maumang lagyo dông mai, Garai Gasang gi, yhangmoq é zau eq hkyi yù sù kut nhâng luí, taú nhang kat é³⁶ nghut ri. Haú Mosheq yhang, Egutuq ming má le, Nhông Nè má le, yoso hkaú pé má le, myi xê zàn gyoro má mauhpo muzó pé eq limik kum-lhá pé tûn shit uchyang, yhâng é byù myû pé lé Egutuq ming mai shuí htoq ló ri.

³⁷ Israelaq byu pé lé, 'Nung gu nung mâng pé mai, nungmoq é matú ngò eq du é myiqhtoi rayuq lé, Garai Gasang gi, pô htoq lô nhâng râ nghut lhê.'^d ga luí, taí tô é sù le Mosheq yhang nghut ri. Yoso hkaú má nghut nyi ashí hkûn lé, shiwa byù hpúng má, Sinaq Bùm má yhang lé dang taí é maumang lagyô eq le, nga-nhûng é íchyí íwâ pé eq le rahá nghut sù gi, yhang yhang nghut nyi ri; nga-nhúng lé ap byi râ asak dui é mungdang lé lom yu é sù le, yhang nghut nyi ri.

^a 7:28 Htoq Ló 2:14 ^b 7:32 Htoq Ló 3:6 ^c 7:34 Htoq Ló 3:5, 7-8, 10 ^d 7:37 Tarâ Pun 18:15

- ³⁹ Nghut kôlhang, nga-nhông é îchyi îwâ pé kúm gi, yhang é dang lé a kâm gyo kômù, yhang lé he pyám luí, Egutuq ming shut taú nau é myit bo
- ⁴⁰ bum akô. Haú mù, Arun lé, ‘Egutuq ming mai nga-nhông lé shuí htoq lo é Mosheq gi, haú dut byuq bê hkyô lé, ngamoq a sé lo; haú mù, nga-nhông hí má so byi râ hparà lhô pé saí byi aq.’^a
- ⁴¹ ga taí akô. Haú buinyi pé má, yhangmoq gi, nojông zo lhô saí mù, alhô haú lé hkungga nhông byi uchang, yhangmoq é loq èq saí tô é muzó jizó
- ⁴² má gabú nhik dik nyi akô. Haú mù luí, myiqhtoí pé é laiká má kâ tô é gi, ‘Israelaq byu pé ê, myi xê zàn tup yoso má chung é shigu eq hkungga gi, ngo lé nhông byí é nghut akô lhú?’
- ⁴³ Nungmoq gi, nungmoq noq râ matú saí yu é alhô, Molak é zúm eq Rehpan hpara é kyí lé sheq, waq lhing wún ko é yanmai, Babelon lai shoq ngò nungmoq lé lhoq lhâm pyám râ nghut lhê.’^b
- ga luí, bo tô é eq rajung za, Garai Gasang gi, yhangmoq chyáng mai myoqdong lhing pyám mù, mauhkông htoq mâ é buí, kyí, lhamó pé lé noqkuq râ matú ap pyám bê nghut ri.
- ⁴⁴ Mosheq lé, nàng myang é azòng eq rajung za saí aq ga, Garai Gasang taí é dông saí tô é saksé zúm lé, haú yoso má nga-nhông é îchyi îwâ pé wó yú
- ⁴⁵ bekô nghut ri. Haú mù, nga-nhông é îchyi îwâ pé gi, yhangmoq é myoq hí mai Garai Gasang èq hkat htoq pyám byí é byù myú pé é mau má, Yoshuq eq rahá wang nyi ló kô é hkún, saksé zúm haú lé yu wang ló akô. Haú

- gi, Dawiq é pyat jé shoq joq to bê
- ⁴⁶ nghut ri. Dawiq kúm gi, Garai Gasâng hí má myoqdong wó sù nghut mù luí, Yakup é Garai Gasâng matú nyi jowò
- ⁴⁷ saí râ ahkáng dung kôlhang, Sholomon èq sheq saí bê nghut ri.
- ⁴⁸ Nghut kôlhang, Myhang htáng htum Sù gi, byu é loq èq za saí é yhôm má nyi é a nghut, haú hkyô eq séng luí myiqhtoi wá taí tô é gi,
- ⁴⁹ ‘Mauhkông gi, ngá é zùng tanghkuq, myigùng gi, ngá é hkyí nang jang nghut nyi lhê; ngá é matú hkasú é yhôm saí byi shi kó râ lhú? Ngò nô yù râ jang gi, hkâmá nghut kó râ lhú?’
- ⁵⁰ Haú banshoq lé ngá é loq èq baú saí tô é a nghut kó lhú? ga luí, haú Yhumsing taí ri.’^c
- gâ ri.
- ⁵¹ I-myit htân mù, i-myit eq nohkyap má ahpyo-kuq a hpyit é bang^d ê, nungmoq gi, nungmoq é îchyi îwâ pé su, Chyoiyúng Woi-nyí lé hkâ-nhám
- ⁵² le lhom he-ngik pyám nyi akô; Nungmoq é îchyi îwâ pé èq a zing-rí wú é myiqhtoi, ó yuq wá nyi lhê lhú? Haú Dingmán Sù pô htoq râ hkyô lé hko kyô é bang lé, yhangmoq sat pyám é chyat nghut akô; ahkuí, nungmoq le, haú Dingmán Sù lé ap pyám é bang eq sat pyám é bang nghut nyi akô.
- ⁵³ Maumang lagyo èq shit kyo byí é tarâ lé nungmoq wó yú kôlhang, haú lé a cháng kó nghut ri.” gâ ri.

Stehpan Lé Luqgok Èq Dú Sat É Hkyô

- ⁵⁴ Haú hkyô lé yhangmoq wó gyo kô-jáng, yhangmoq é nhiklhum má lúm htaú záng kô é yanmai, Stehpan lé, zuí wang ngat kyáng shoq wú nhik-yô

^a 7:40 Htoq Ló 32:1 ^b 7:43 Amo 5:25-27 ^c 7:50 Esai 66:1-2 ^d 7:51 I-myit eq nohkyap má ahpyo-kuq a hpyit é bang gâ é gi, Garaí dang lé a lùm a châng é bang lé gâ lhê.

- ⁵⁵ nyi akô. Stehpan kúm gi, Chyoiyúng Woi-nyí byíng mù, mauhkúng shut tu wú kat le, Garai Gasâng é hpungwup shingkanng lé le, Garai Gasâng é loqyo hkyam shut Yesuq yap tô é lé le, myang ri. Haú mù, yhang gi, “Wú keq, mauhkúng hpông tô é lé le, Garai Gasâng é loqyo hkyam shut haú Byu Yhangzo yap tô é lé le, ngò myàng ri.” ga taí kat ri.
- ⁵⁷ Haú hkún, yhangmoq gi, htê mó o mó garu uchyang, yhumsing é nohkyap xaú pyám mù, radá dâm yhang
- ⁵⁸ lé chôm htim kômù, yhang lé wà mai she htoq ló kôluí, luqgok èq chôm dú ló bekô nghut ri; saksé kut é bang gi, Sholuq gâ é zoram é hkyí wang má yhangmoq é buhíng pé lé hkyut bum tô akô.
- ⁵⁹ Luqgok èq dú nyi bùm kô é u lé, Stehpan gi, “Yhumsíng Yesuq ê, ngá é woi-nyí lé hap yù laq.” ga kyúduíng ri.
- ⁶⁰ Hau htàng, yhang gi, hkyihput htuoq mù, “Yhumsíng ê, yhangmoq kut é mara haú lé hkyut pyám byi laq.” ga luí, htê mó èq wut dúng ri; haú ban taí jáng, yhang kâng byit byuq bê nghut ri.

Hpúng Byú Lé Sholuq Zing-rí É Hkyô

8 Sholuq gi, haú má nyi to mù, Stehpan lé sat pyám é muzó má myit bo huí ri.

- Haú nyí mai, Yerusalem wà mó má é noqkuq hpúng gi, zing-ri mó huí lo é nghut mù luí, lagyo pé mai lai luí, lumjínng bang lhunglháng gi, Yuda mau eq Samariq mau jowò hkanng mó
- ² má byo myín ló bekô. Nghut kôlháng, tarâ hkunggâ é bang gi, Stehpan lé yhum pyám é htàng má, yhang é yanmai iyon mó huí nyi akô nghut ri.
- ³ Sholuq kúm gi, rayhum htàng rayhúm wàng mù, myiwe yuqgè lé she hkyut

htoq yú luí, htóng má lhúng tô é dông mai, noqkuq hpúng haú lé lhoq hpyoq ló nyi ri.

Samariq Wà Má, Gabú Danglù Hkô Kyô É Hkyô

- ⁴ Byo htoq ló é bang kúm gi, jé é jowò hkanng mó má mungdang lé hkô kyô
- ⁵ ló akô. Haú hkún, Hpilip gi, Samariq mau má é myuq ra-myúq shut e ló mù,
- ⁶ Hkrisduq é hkyô lé hkô kyô ri. Byú ajùm ayò gi, Hpilip taí kyô é hkyô lé wó gyô é eq, yhang tûn shit é limik kumlhá lé myàng kôjáng, i-myt rahkat za eq yhâng é dang chôm gyô
- ⁷ nyi bum akô. Nat wang júng é byú myo myô pê chyáng mai, agè ashop é nat pé wut garu uchyang htoq ló byuq bum akô; gùngjum shi é bang eq hkyí htên é bang myo myo le, ge
- ⁸ ló byuq bum akô. Haú mù luí, haú myuq má gabú hkyô gyai yhang wó bekô nghut ri.

Myoq Heq Sará Simun É Hkyô

- ⁹ Simun gâ é byú rayuq gi, hí lé haú myuq má myoqheq hpaqchyí kut shit mù, Samariq byu pé lé lhoq maú luí, yhâng gùng lé yhang, laklaí sù nghut
- ¹⁰ lhê gâ ri. Byú tiq ko banshoq le, “Byú shí yuq gi, ‘haú a-tsam mó’ gâ é, Garaí chyáng mai hpungwup a-tsam wó yú sù nghut ri.” ga luí, yhâng
- ¹¹ é dang lé gyô bum akô. Haú yuq gi, myáng myáng yhâng é myoqheq hpaqchyí èq yhangmoq lé lhoq maú lo é yanmai, yhâng dang lé chôm lum
- ¹² bum akô. Nghut kôlháng, Hpilip hko kyô é Garai Gasâng é mingdán hkyô eq, Yesuq Hkrisduq é myíng eq sêng é gabú danglù hkyô lé, lumjínng kôjáng, myiwe yuqgè wui-myhup hkâm
- ¹³ yu bum akô. Simun yhang yhang le lumjínng mù luí, wui-myhup hkâm yú

mù, Hpìlip htâng châng wún ri. Hpìlip é kumhá mó eq laklaí kumhá pé lé myàng jáng, yhang gi, gyai maú byuq ri.

- ¹⁴ Garai Gasâng é mungdang lé Samariq byu pé, lhom hap yù bê hkyô lé, Yerusalem wà mó má nyi é lagyo pé wó gyô bùm kôjáng, yhangmoq gi, Petruq eq Yohan nhik lé haú má nhang
- ¹⁵ kat akô. Yhangnhik gi, lé jé jáng, byù haú bang Chyoiyúng Woi-nyí wó yù rã matú kyúdung byí akô. Hkâsu mù gâ le, Chyoiyúng Woi-nyí gi, yhangmoq chyáng ó yuq é ahtoq má lé, a gyó lô shi; Yhumsing Yesuq é mying mai wui-myhup hkâm yu é za ru
- ¹⁷ nghut bùm ashí. Haú mù luí, lagyo nhik yhangmoq é ahtoq má loq ke byi jáng, yhangmoq gi, haú Chyoiyúng Woi-nyí lé wó hkâm yù bekô nghut ri.
- ¹⁸ Lagyo nhik é loq ke kat jáng Chyoiyúng Woi-nyí wó hkâm yu é lé, Simun myàng jáng, yhang gi, yhangnhik lé
- ¹⁹ ngùn ê byi wú mù, “Hká yuq é ahtoq má nghut kôlhang, ngò loq ke byi jáng, haú yuq gi, Chyoiyúng Woi-nyí wó yù rã matú, haú su é a-tsam ngo lé le byi kó laq.” ga dung ri.
- ²⁰ Petruq kúm gi, “Garai Gasâng é chyunghuq lé ngun èq wó wui yù rã nghut lhê ga luí, myit é yanmai, náng é ngùn gi, nàng eq rahá
- ²¹ htên byoq byuq sháng gaq. Nàng gi, Garai Gasâng é hí má myit a dítng sù nghut é yanmai, shí hkyô má nàng wó bo lhóm rã a nghut.
- ²² Haú mù luí, shí agè ashop é hkyô mai myit lhíng mù, Yhumsing Garaí chyáng dúng tóngbán aq. Haú hkún, náng é unghkaú má myit pyâm é hkyô lé, mara hkyut pyám byi abe.
- ²³ Nàng gi, ladu lai shoq nhikhko zo mù, yubak marâ èq tuí zing to huí

é lé, ngò myàng ri.” ga yhang lé taí ri.

- ²⁴ Haú hkún, Simun gi, “Nungnhik taí é hkyô haí le ngá chyáng a jé sháng gaq, ngá é matú haú Yhumsing chyáng kyúdung byi kó laq.” ga tú taí ri.
- ²⁵ Yhangnhik kúm gi, haú Yhumsing é mungdang lé saksé hkám mù ban hko kyo jáng, Samariq byu pé é wà myo myo má, haú gabú danglù lé hko kyo uchyang, Yerusalem wà mó shut dum taú lò bekô nghut ri.

Hpìlip Eq U-nuk Nhik É Hkyô

- ²⁶ Ahkuí, Yhumsing é maumang lagyo gi, Hpìlip lé, “Toq aq, Yerusalem wà mó mai Gaza shut ló é hkyô jé shoq, maupyí shut nyâng za e ló aq. Hkyô haú gi, yoso hkyô nghut lhê.”
- ²⁷ ga taí ri. Haú hkún, yhang toq mù e ló ri. Haú u lé, Ehtiopi ming lé up é hkohkâm myhí Kandake é hí má ahko ahkáng mó wó mù, yhâng é sutzè banshoq lé zúm é, Ehtiopi byù
- ²⁸ u-nuk rayuq gi, noqkuq rã ga Yerusalem wà mó má ê mù, dum taú lo é hkún, yhâng é myanglhêng má zùng luí, myiqhtoi Esai-aq laiká lé
- ²⁹ nghap nyi ri. Woi-nyí gi, Hpìlip lé, “Myanglhêng shut chyâng e ló aq.” ga taí ri.
- ³⁰ Haú mù, Hpìlip gi, din ê mù, myiqhtoi Esai-aq laiká nghap nyi é lé wó gyo jáng, “Nàng nghap nyi é hkyô lé sê gyo ri lhú?” ga luí, yhang lé myí ri.
- ³¹ Haú yuq gi, “Mhoqshit sù yuq a nyi le, ngò hkâsu kut sê gyo rã lhú?” ga tú taí mù, yhang eq rahá lo doq zùng aq ga Hpìlip lé lung ri.
- ³² Yhang nghap é Chyúmdang gi, “Sat rã sau lé su, Yhang lé she e ló bê nghut ri;

sau zo gi, sau maú nyhám su é hí má zim za nyi tô é su, Yhang le nhut a hpông é za nyi tô ri.

- ³³ Yhânggùng lé lhoq shôm pyâm to huí é hkûn, Yhang lé a tara é đông doqdân pyám bekô; Yhâng é asak lé myigùng htoq mai yù pyám bekô nghut mù luí, Yhâng é awut ashín lé ó yuq wó gôn kyo râ lúhú?”^a gâ ri.
- ³⁴ Haú hkûn, haú u-nuk wa gi, Hpilip lé, “Haú nghut le gi, ngo lé taí kyo laq! Myiqhtoi shí yuq gi, ó lé lhoq ang luí, taí é nghut lê lúhú? Yhânggùng lé taí é nghut lê lúhú? Haú a nghut jáng, gó-yuq é hkyô lé taí é nghut lê lúhú?” ga
- ³⁵ myí ri. Haú hkûn, Hpilip gi, Chyúm-dang haú lé yù mù, Yesuq eq sêng é gabú danglù lé taí kyô ri.
- ³⁶ Haú su e ló kô le, wui joq é má jé jáng, haú u-nuk hpó gi, “Wú aq, shí má wui joq tô ri, wui-myhup hkâm yù râ matú ngo lé hkúm râ jang
- ³⁷ haí joq ashí lúhú?” ga taí ri. Hpilip gi, “Náng i-myt banshoq èq, nàng lumjúng bê nghut le gi, hkâm yu le ge lê.” ga taí ri; yhang le, “Yesuq Hkrisduq gi, Garai Gasâng é Yhangzo nghut é lé, ngò lumjúng bê.” ga tú
- ³⁸ taí ri.^b Haú hkûn, yhâng é myang-lhêng hkying nhâng mù, yhangnhik wui má gyó wâng luí, Hpilip gi, u-nuk hpó lé wui-myhup hkâm byí ri.
- ³⁹ Wui hkaú mai htoq ló kô é hkûn, haú Yhumsing é Woi-nyí gi, Hpilip lé myhik za shuí ló byuq mù, u-nuk hpó le Hpilip lé dum a myàng lo; nghut kôlhang, yhang gi, e ló é hkyô shut gabú myit èq xoq sô e ló bê
- ⁴⁰ nghut ri. Hpilip kúm gi, Azutu wà má lo htoq jé kat mù luí, Kesare wà mó

jé shoq haú mau mâ é myuq pé wà pé hkangmó má gabú danglù hkô kyô wún ri.

Sholuq Lhik Wang Lo É Hkyô

- 9** Haú u lé, Sholuq kúm gi, Yhum-sing é chángzô pé lé hkat kyuq nha râ eq sat pyám râ ga, nhikmó-yô nyi é nghut mù luí, hkyangjong mó
- ² chyáng ê mù, Yhumsing é Hkyô lé lumjúng é myiwe yuqgè myàng mi-myàng lé chyup yù luí, Yerusalem wà mó shut wó she ló râ matú, Dama-skuq myuq mâ é tarajong pé má byi
- ³ râ laiká pé lé dúng chùng ri. Yhang e ló le, Damaskuq myuq eq chyáng ló nyi é hkûn, yhâng é lhíngkyuq má mauhkung mai dân loq tung duqbó
- ⁴ htoq ló ri. Yhang myigùng má lêng ngop tô é u lé, “Sholuq, Sholuq, nàng ngo lé haí mù zing-rí nyi lê lúhú?” ga luí, yhang lé taí é htê wó gyô ri.
- ⁵ Haú hkûn, yhang gi, “Yhumsing ê, nàng gi, ó yuq nghut lê lúhú?” ga myi jáng, haú Yhumsing gi, “Nàng zing-rí
- ⁶ nyi é Yesuq nghut lê, toq aq, myuq shut wang ló aq. Nàng zui saí râ hkyô lé lhom taí kyo râ nghut lê.” ga tú taí ri.
- ⁷ Yhang eq rahá e ló é luzúm wui gi, htê haú wó gyo kôlhang, ó yuq lé le a myàng kô é yanmai, maú hong yap tô
- ⁸ bum akô. Sholuq toq mù, myoq hpông kat wú le, haí lé le a myàng dut byuq mù luí, yhangmoq gi, yhang lé loq mai shê mù Damaskuq myuq shut shuí
- ⁹ wang ló akô. Sholuq gi, sum nyí tup myoqjit byuq mù luí, a zo a shuq é nyi byuq ri.
- ¹⁰ Damaskuq myuq má Anani gâ é chángzo rayuq nyi ri. Yhumsing gi,

^a 8:33 Esai 53:7-8 ^b 8:37 Bun zo 37 shí lé Chyúmlaiká ra-am má gi, bo lhê; ra-am má gi, a bò.

yhang lé, “Anani ê.” ga shing-rán dōng wut ri.

Yhang gi, “Yhumsîng ê, shî má nyi lhê.” ga tû taí ri.

¹¹ Haú Yhumsîng dum taí é gi, “Toq aq, Hkyô-Nyàng gâ é wà hkyô shut é mù, Yudaq é yhûm má, Tarshu byù Sholuq lé é hô aq, yhang gi, kyûdûng nyi ri. Yhang gi, Anani ga sù wang lé lô mù, yhang é myoq dum myàng sháng gaq ga, yhang é ahtoq má loq ke byî é lé, shing-rán dōng myàng bê nghut ri.” gâ ri.

¹³ Anani kúm gi, “Yhumsîng ê, shí yuq gi, Yerusalem wà mó má, náng é sân-yúng bang lé a ge é dōng hkâ-myhó kut lai lo é hkyanglù lé ngò ¹⁴ myo myo wó gyô wú bê; Shí pé má le, náng é myîng lé lêng é bang ban-shoq lé chyup râ ga, hkyangjong agyi pè chyáng mâ é ahko ahkáng wó yu to sù nghut ri.” ga tû taí ri.

¹⁵ Nghut kôlhang, Yhumsîng gi, “Ru é aq, shí yuq gi, tûngbaù pé eq yhang-moq é hkohkam pè é hí má le, Israelaq byu pè é hí má le, ngá é myîng lé wûn waq râ matú, ngò chûng râ nghû luí hkyin to sù nghut ¹⁶ lhê; Ngá myîng é yanmai hkâ-í hpuzo ra hkyô lé, Ngò, yhang lé tûn shit râ nghut lhê.” ga taí ri.

¹⁷ Hau htâng, Anani gi, jé é mù, yhûm haú má wàng luí, Sholuq é ahtoq má loq kê to mù, “Gumang Sholuq ê, náng myoq dum wó myàng mù, Chyoiyúng Woi-nyí byíng sháng gaq ga, nàng lé lo é hkyô má, nàng lé htoq shit é Yhumsîng Yesuq èq ngo lé nhang kat é nghut lhê.” ga ¹⁸ taí ri. Haú hkûn jáng, Sholuq é myoq mai akyap sù é wuí gyó byuq mù, yhang myoq dum wó myàng bê. Haú hkûn, yhang gi, toq mù ¹⁹ wui-myhup hkâm yù luí, zoshuq lé

zo mù, wum-o dum lhoq pyîng yù bê nghut ri.

Sholuq, Damaskuq Myuq Má Mungdang Hko É Hkyô

Hau htâng, yhang gi, Damaskuq myuq mâ é chángzô pé eq rahá rayoq ²⁰ zo zùm yap nyì uchyang, Yesuq gi, Gairai Gasâng é Yhangzo nghut é hkyô, haú hkûn jáng tarajong pé má hko ²¹ kyô nyì bê nghut ri. Sholuq é dang lé wó gyô é lhunglhâng bang gi, maú byuq bùm kômù, “Shí yuq gi, Yerusalem wà mó má myîng haú lêng é bang lé lhoq hten lhoq hpyoq sù nghut lhê, a nghut kó lú? Ahkuí, shî má le, haú su é bang lé chyup yù mù, hkyangjong agyi pè chyáng ²² ló ap râ da luí jé lé é sù a nghut kó lú?” ga myi bum akô. Sholuq kúm gi, a-tsam je bo lò mù, Damaskuq myuq má nyi é Yudaq byu pé lé taí hpyi kyo luí, Yesuq gi, Hkrisduq yhang nghut nyi é hkyô lé saksé tûn shit ri.

²³ Buinyí tsómra myàng é htâng má, Yudaq byu pé gi, yhang lé sat pyám ²⁴ râ matú haq dâ akô. Nghut kôlhang, yhangmoq dâ é hkyô lé Sholuq sê pyám ri. Yhangmoq gi, yhang lé wó sat pyám shoq ga, nyí lé myín lé myuq ²⁵ hkum pé má lhom nyi akô. Sholuq é chángzô pé kúm gi, myín má yhang lé shuí yù mù, manghkoq má lúng nhâng luí, wà kyám xewâm mai lhoq nyhum hkyô kat akô nghut ri.

Sholuq, Yerusalem Wà Mó Má Taú Jé Lo É Hkyô

²⁶ Hau htâng, yhang gi, Yerusalem wà mó má jé lo é hkûn, chángzô pé eq zùm yap râ matú shikut wú kôlhang, yhang gi, chángzo dut bê hkyô lé a jíng kô é yanmai, lhunglhâng bang gi,

- ²⁷ yhang lé gyuq bum akô. Barnaba kúm gi, Sholuq lé lagyo pê chyáng shuí lò mù, Sholuq, hkyô má Yesuq eq hkâsu kut huí é hkyô lé le, Yesuq eq yhang lé taí é dang wó gyô é hkyô lé le, Dama-skuq myuq má Yesuq é mying mai gyuq myit a bo é za hkâsu kut hko kyô é hkyô lé le, yhangmoq lé taí kyô ri.
- ²⁸ Haú mù, Sholuq gi, yhangmoq eq rahá Yerusalem wà mó má htoq htoq wàng wàng kut nyí uchyang, Yhumsing é mying mai a gyuq a kyum é za hko
- ²⁹ kyô nyi ri. Grik dang nyo é Yudaq byu pé eq le, taí he lhùm nyi akô; nghut kôlhang, yhangmoq gi, yhang lé sat
- ³⁰ pyám râ dá akô. Haú hkyô lé, gumang wui sé kôjáng, yhang lé Kesare wà mó má jé shoq dé mù, Tarshu myuq shut nhang kat akô nghut ri.
- ³¹ Yuda mau, Galile mau eq Samariq mau jowò hkanmó mâ é noqkuq hpúng gi, haú yoq pé má, lhoq ging lhoq tng é hkyô wó yú mù, nguingón nyi akô; haú Yhumsing lé gyuq hkunggâ é hkyô má le, Chyoiyung Woi-nyí eq lhoq pun lhoq kyíng é hkyô pé má le châng nyi mù, myô jat lo bùm bekô nghut ri.

Ainea Ge Byuq É Hkyô

- ³² Haú hkún, Petruq gi, haú mau pé má hkat kúm wún uchyang, Ludaq wà mó má nyi é sân-yung bâng chyáng
- ³³ ê jé ri. Haú wà má, gùngjum shí luí shit zân tup yhupjang mai a wó toq é Ainea gâ é byù rayuq lé ê myang ri.
- ³⁴ Haú mù, Petruq gi, “Ainea ê, Yesuq Hkrisduq, nang lé lhoq gê byi bê nghut ri, toq mù, náng é yhupphú hen yù aq.” ga luí, yhang lé taí ri. Haú hkún jáng, Ainea wó toq yap bê
- ³⁵ nghut ri. Ludaq eq Sharon pá má nyi é

lhunglhang bang gi, haú yuq lé myàng mù luí, Yhumsing Yesuq chyáng lhing wang lo bum akô.

Dorka Ga Sú Dum Dui Lo É Hkyô

- ³⁶ Ahkuí, Yopa myuq má Tabihta gâ é chángzo myiwe rayuq nyi ri; mying haú lé Grik dang đông gi, Dorka^a gâ é nghut lhê. Myiwe haú gi, ge é muzó kut nyi é sú eq, asho awuí bang lé
- ³⁷ alu byí nyi é sú nghut ri. Haú u lé, yhang gi, nõhpyo hui mù shi ló bê nghut ri. Yhâng mâng lé gi, chi mù
- ³⁸ luí ahtoq gok má jang tô akô. Ludaq wà mó gi, Yopa myuq eq chyáng é yanmai, haú myuq má Petruq nyi é lé chángzô pé wó gyo kôjáng, yhangmoq gi, byù í yuq lé nhang kat mù, “Ngamoq chyáng myap lé lô aq.” ga jì nhang kat akô.
- ³⁹ Haú hkún, Petruq gi, toq mù, haú nhik htàng châng e ló ri. Yhang jé jáng, ahtoq pyâm gok má shuí hâng yu akô. Chuimó myhí pé lhunglhang bang gi, yhâng nàm má yap mù ngàu uchyang, yhangmoq eq rahá nyi tô ashí hkún Dorka hkyup é buhíng eq gotú mebu pé lé tân shit nyi akô.
- ⁴⁰ Petruq kúm gi, lhunglhang bang lé htoq ló nhâng mù, hkyihput htuq luí, kyúdung mù, mâng shut lhing wú luí, “Tabihta ê, toq aq!” ga taí ri, haú hkún myiwe haú myoq hpóng lô mù, Petruq
- ⁴¹ lé myàng jáng, toq zung lo ri. Petruq gi, loq lhâm kat mù yhang lé lạng toq yù luí, lumjíng bang eq chuimó myhí
- ⁴² pé lé wut yù mù, duí gú ap byí ri. Haú hkyô lé, Yopa myuq mâ é bang ban-shoq wó gyô ló kômù luí, byù myo myo gi, haú Yhumsing Yesuq lé lum-
- ⁴³ jíng bum akô nghut ri. Haú mù, Petruq gi, shokuq loqmú saí é Simun ga

^a 9:36 Dorka gâ é lichyúm gi, “chochí” gâ é nghut lhê.

sû eq rahá, Yopa myuq má rayoq zo nyi nyi ri.

Koneli É Shing-rán

10 Ahkuî, Kesare wà mó má gyezo rashô up é Koneli gâ é gyezau rayuq nyi ri. Yhang gi, Itali gyedap mâ² é nghut lhê. Yhang gi, tarâ hkungga myit bò luî, yhâng é yhumbyù ban-shoq bang eq rahá Garai Gasang lé gyuq hkunggâ nyi lhê eq, myùng bang lé alu myo myo byi uchyang, Garai Gasang lé hkâ-nhám le kyû-³ dúng nyi ri. Ra-nyí lé, myinhâng sum hkyíng kô má, Garai Gasâng é mau-mang lagyo rayuq gi, yhâng chyáng jé mù, “Koneli ê.” ga luî, yhang lé wut é lé, shing-rán mai de de myang ri.

⁴ Haû mù, haû yuq lé wú tsuq to mù, “Yhumsîng ê, hai hkyô nghut lhê lhú?” ga gyuq myit eq myî ri.

Maumang kúm gi, “Náng é kyû-dung dang eq alu byí é hkyô gi, Garai Gasâng é hí má, hkungga masat⁵ dông hkyâng bê nghut ri. Ahkuî, Yopa myuq shut byù nhang kat mù, Petruq gâ é sù Simun lé ê shuí lò nhâng aq.⁶ Yhang gi, wuimau yàm mâ é, shokuq hkyup zô é Simun yhûm má bíng nyi ri.” ga taî ri.

⁷ Koneli gi, yhang eq dang taî é mau-mang lagyo ló byuq jáng, dui-nhâng zoshâng í yuq eq, yhâng chyáng hkâ-nhám le châng nyi bang mâ é, tarâ hkunggâ é gyezo rayuq lé ji yù mù,⁸ dut laî lo é hkyô banshoq, yhangmoq lé taî kyo luî, Yopa myuq shut nhang kat ri.

Petruq É Shing-rán

⁹ Htang nyí nyí-káng u lé, yhangmoq, Yopa myuq jé ló yâm má, Petruq gi,

kyûdung râ ga, yhumhkûng shut doq¹⁰ ló ri. Haû hkûn, yhang gi, zòmut luî rajung jung zô nau nyi ri; nghut kô-lhang, zoshuq ru gaí nyi ashí le, yhang moq byuq ló mù myoqwup shing-rán¹¹ myang é gi, mauhkûng bóng lô mù, hpajóng mó sù é lé, myi chyûn má zui luî myigùng shut lhoq hkyô kat é¹² azíng lé myang ri. Haû hkaû má, myigùng htoq mâ é hkyí myi hkyí dap é jung dusak ahú hú eq dô yê é jung ahú hú, mau má dang é nghoq ahú hú,¹³ lúng tô ri. “Petruq ê, toq mù, sat zo aq.” gâ é dangtê le mying htoq lo ri.

¹⁴ Petruq kúm gi, “Yhumsîng ê, haû gi, a wó dut, achauq achyut é eq a sansêng é zè lé, ngò hkâ-nhám le a zô wú.” ga tû taî ri.^a

¹⁵ Haû hkûn, “Garai Gasang lhoq san lhoq séng bê zè lé, a sanséng hkâ-nghû.” ga luî, yhang lé dum taî kat ri.

¹⁶ Haû su ga sum dâm taî é htâng má, zè haû lé radá dâm mauhkûng shut wup yu ló bê nghut ri.¹⁷ Ahkuî, Petruq gi, yhang myang é shing-rán lé haî wá nghut lhê lhú ga luî, myit maú nyi é hkûn, haû Koneli nhang kat é bang gi, Simun é yhûm lé myang hô kômù, hkumtot má yap¹⁸ to luî, Petruq gâ é sù Simun, yhûm haû má nyi a nyi é lé, wut myí wú akô.

¹⁹ Petruq gi, shing-rán haû lé ru myit wú nyi ashí le, Woi-nyí gi, “Wú aq, byù sum yuq nang lé ho nyi akô,²⁰ toq mù gyó ló aq; yhangmoq gi, ngò nhang kat é bang nghut é yanmai, myit haî a úng-âng é za, yhangmoq eq rahá bo ló aq.” ga taî ri.

²¹ Haû mù, Petruq gi, haû bâng chyáng gyó ló luî, “Nungmoq hô nyi

^a 10:14 Nhung 11 lé wú aq.

é sù gi, ngò nghut lhê, haî ra luî lé kô é lhú?" ga myî ri.

- ²² Yhangmoq taî é gi, "Dingmán é, Garai Gasang lé gyuq hkunggâ é, Yudaq amyû lhunglhâng bâng é hí má myoqdong wó é, shô up gyezau Koneli gi, nang lé yhâng é yhûm má ji hâng yù mù, nàng taî é dang gyo yù râ matú, yhang lé chyoiyúng maumang lagyô èq taî shit kyô é hkyô lé wó yû luî, ngamoq lé nhang kat é nghut lhê." ga
- ²³ akô. Haû mù luî, Petruq gi, yhangmoq lé wut hâng yù mù, bíng nhang ri. Hau htang nyi, yhang gi, toq mù, yhangmoq eq rahá bo ló ri; Yopa myuq mâ é gumang wuî ra-am le châng akô nghut ri.

Koneli Lé Petruq Huî É Hkyô

- ²⁴ Hau htang nyî, yhangmoq gi, Kesare wà mó shut wang ló akô. Koneli gi, yhâng é gumang wuî eq buinùm ji-myi wuî lé ji tsîng to mù, yhangmoq
- ²⁵ lé láng nyi ri. Petruq wang ló jáng, Koneli gi, te yù mù, yhâng é hkyî wang
- ²⁶ má paî gop noqkuq ri. Petruq kúm gi, "Toq aq, ngò le byù ru nghut lhê." ga luî, taî uchyang yhang lé tu toq ri.
- ²⁷ Haû mù, Petruq gi, yhang eq dang nyô uchyang wang ló wú le, byù myo myo zup zîng tô bum é lé myang ri.
- ²⁸ Haû hkûn, yhang gi, yhangmoq lé, "Yudaq byù rayuq gi, noqkuq htûng dông tûngbau rayuq eq a wó zùm yap é, htoq htoq wàng wàng a wó kut é hkyô lé, nungmoq sé lugù nghut akô. Nghut kôlhâng, ó yuq lé le achâq achyut dut ri, a sanséng dut ri nghû a ge taî é hkyô lé gi, Garai Gasang, ngo
- ²⁹ lé tûn shit bê. Hau é yanmai, nungmoq ngo lé ji kat é hkûn, ngò a he pyâm é za châng lé lo é nghut lhê. Haû mù luî, haî ra kô é yanmai, ngo lé ji akô nghû ngò myî nau ri." ga taî ri.

- ³⁰ Haû hkûn, Koneli gi, "Laî lò bê myi nyî nyî, myinhâng sum hkyíng má, ngá é yhûm má, ngò kyûdûng nyi le, danso loq, duqbó é mebu wut é byù rayuq ngá é hí má yap htoq
- ³¹ shit mù, 'Koneli ê, Garai Gasang gi, náng é kyûdung danghtê lé le gyo byi bê; nàng alu byî é hkyô lé le,
- ³² bun byi bê nghut ri. Hau é yanmai, Yopa myuq shut byù nhang kat mù, Petruq gâ é Simun lé ji nhâng aq. Haû yuq gi, wuimau yàm mâ é shokuq hkyup zô é Simun yhûm
- ³³ má bíng nyi ri.' ga taî ri. Haû mù luî, haû hkûn jáng ngò náng chyáng byù nhang kat bê nghut lhê. Ahkuî, nàng jé é gi, gyai gê bê nghut ri. Yhumsîng yhang nang lé taî nhang é gû banshoq gyô yù râ matú, ahkuî ngamoq lhunglhâng bang Garai Gasâng é hí má nghut nyi lhê." ga taî ri.

Petruq Hko Kyô É Mungdang

- ³⁴ Haû hkûn, Petruq dang-hi hpông é gi, "Garai Gasang, myoqdong a hkyin é hkyô lé, ahkuî ngò gè gè yhang
- ³⁵ sé bê. Byù myû chângjup má, Yhang lé gyuq hkunggâ é eq tengmán é muzó jizó saî é sù gi, Yhang é hí má
- ³⁶ myoqdong wó nyi ri. Nyî mi-nyî, joq mijoq é Yhumsîng, Yesuq Hkrisduq é yanmai, nguingón hkyô eq sêng é gabú danglù lé hko kyo sháng gaq ga, Israelaq byu pê chyáng Garai Gasang hun kat é mungdang eq rajung
- ³⁷ za, baptisma hkyô lé, Yohan hko é htâng, Galile mau mai Yuda mau banshoq má taî pyo ló é hkyô lé, nungmoq sé gû nghut nyi lhê. Haû gi,
- ³⁸ Garai Gasâng èq Chyoiyúng Woi-nyî eq wum-o a-tsam byî to bê sù, Nazaret wà byù Yesuq é hkyô nghut nyi ri. Garai Gasang yhang eq rahá

nghut nyi é yanmai, yhang gi, ge é muzó lé kut wún é eq, nat èq zing-ri huí é bang banshoq lé lhoq gê byí wún ri.

- ³⁹ Haú mù, Yudaq byu pé é ming má le, Yerusalem wà mó má le, yhang zui saí bê muzó banshoq é saksê pé gi, ngamoq nghut nyi lhê. Haú yuq lé yhang, yhangmoq sik zîng má jén
- ⁴⁰ sat pyám bekò nghut ri. Garai Gasang kúm gi, sum nyí nghû râ buinyì má, haú yuq lé lhoq dui toq kat é nghut mù luí, byù banshoq é hí má a nghut e za, saksé kut râ matú Garai Gasang hkyin to gù nghut é bang ngamoq é
- ⁴¹ hí má za htoq shit bê nghut ri. Yhang shi é mai dum dui toq ló é htâng má, ngamoq yhang, Yhang eq rahá razo
- ⁴² rashuq wó kut yu é nghut lhê. Yhang gi, asak dui é bang eq shí bê bâng é tarâ agyì kut râ matú, Garai Gasâng èq Yhang lé hkyin tô é sù nghut é hkyô lé, byu pé lé hko kyo râ eq, saksé hkám râ matú, ngamoq lé hkunmó hkyô to
- ⁴³ bê nghut ri. ‘Yhang lé lumjîng é bang yuq hkangmó gi, Yhâng é mying é yanmai, yubak hkyut pyám byí é hui kó râ nghut lhê.’ ga luí, taí é myiq-htoi banshoq gi, Yhâng é hkyô lé saksé hkam byí é bang nghut nyi akô.” ga taí ri.

Chyoiyúng Woi-nyí Lé, Tûngbau Pé Wó Hap Yu É Hkyô

- ⁴⁴ Petruq gi, haú hkyô lé ru taí nyi ashí le, dang haú wó gyô é banshoq bâng ahtoq má Chyoiyúng Woi-nyí gyó jé
- ⁴⁵ lo ri. Tûngbau pé é htoq má lháng Chyoiyúng Woi-nyí gâ é chyunghuq lé hut hkyô kat é yanmai, Petruq eq rahá lé é, ahyo-kuq hpyit bê é lumjîng bang Yudaq byu pé gi, maú bum
- ⁴⁶ akô. Hkâsu mù gâ le, yhangmoq gi, laklaí dang nyo é lé le, Garai Gasang

lé hkyô-on kô é lé le, wó gyô bùm kô é yanmai nghut ri.

- ⁴⁷ Haú mù, Petruq gi, “Ngamoq su Chyoiyúng Woi-nyí hkâm yù bê bang lé, baptisma a byi nhâng râ gi, wui lé ó
- ⁴⁸ yuq wó hkûm to râ lúh?” ga taí ri. Hau htâng, yhang gi, yhangmoq lé Yesuq Hkrisduq é myîng lang luí wui-myhup hkâm yù râ matú pyîng tô ri. Haú hkûn, yhangmoq gi, Petruq lé buinyì ra-í nyí, nyi gyó shi aq ga chôm hkûm akô.

Petruq, Yhang Kut É Muzó Lé Shit Kyô É Hkyô

- 11** Tûngbau pé le, Garai Gasâng é mungdang lhom yù bê gâ é hkyô lé, lagyo pé eq Yuda mau pé mâ é gumang wui wó gyô akô.
- ² Haú mù, Petruq, Yerusalem wà mó má doq ló é hkûn, ahyo-kuq hpyit hkyô lé myit zuq é lumjîng bang
- ³ gi, “Nàng gi, ahyo-kuq a hpyit é bâng é yhûm má wàng mù, yhangmoq eq razo rashuq kut ri.” ga luí, yhang lé mara lhom taí hun bum akô.
- ⁴ Haú hkûn, Petruq gi, haú dut lò bê hkyô lé awang mai ahyo hpyot, yhangmoq lé taí sân kyô hi kat é má,
- ⁵ “Ngò gi, Yopa myuq má kyûdûng nyi le, moq byuq ló mù shing-rán myang é gi, mauhkûng mai hpajóng mó sù é myi chyûn shut zui luí, ngá shut lhoq hkyô kat é zè gyó jé lo é lé, myang ri.
- ⁶ Haú lé rago za saí wú le, myigùng htoq má hkyî myi hkyî dap é jung dusak, yosô zè, dô yê é jung eq, mau-lat nghoqzô pé bo tô é lé, ngò myàng
- ⁷ luí, myit wú nyi é hkûn, ‘Petruq ê, toq mù, sat zo aq.’ gâ é danghtê lé, ngò wó gyô ri.
- ⁸ Ngò kúm gi, ‘Yhumsîng ê, haú gi, a wó dut, achaq achyut é eq a sansêng é

zè, ngá é nhut má hkâ-nhám le a wang wú.' nghû taí kat é nghut lhê.

- ⁹ Haú hkûn, 'Garai Gasang lhoq san lhoq yúng bê zè lé, a sanséng hkâ-nghû.' ga luí, mauhkúng mai dum taí kat ri. Haú su ga sum dâm taí é htâng má, haú pé banshoq lé mauhkúng shut dum wup yu ló bê nghut ri.
- ¹¹ Haú hkûn jáng, Kesare wà mó mai, ngá chyáng nhang kat é byù sum yuq gi, ngò nyi é yhûm hkumtot má jé nyi tô akô. Chyoiyúng Woi-nyí gi, ngo lé myit a úng-âng é za, yhangmoq htâng châng ê aq ga taí ri; shí gumang hkyuq yuq le ngò eq rahá ê mù, Kone-li é yhûm má ngamoq wang é. Haú hkûn, haú yuq gi, yhâng é yhûm má maumang lagyo lé htoq shit é hkûn, yhang hkâsu myang é hkyô lé le; maumang lagyô èq yhang lé, 'Yopa myuq shut byù nhang kat mù, Petruq gâ é sù Simun lé ê jî nhâng aq; nàng eq náng yhumbyù lhunglhâng bang hkyi yù hui râ danglù, yhang, náng chyáng wun lé lô byi râ nghut lhê.' ga taí é hkyô lé le, ngamoq lé taí kyô ri.
- ¹⁵ Ngò dang taí hi ló nyi é u lé, Chyoiyúng Woi-nyí gi, sâng-hi lé ngamoq é ahtoq má gyó lé é su, yhangmoq ahtoq má le gyó lé bê nghut ri. Haú hkûn sheq, ngò gi, 'Yohan gi, wui èq wui-myhup hkám byí ri; nungmoq kúm gi, Chyoiyúng Woi-nyí èq wui-myhup hkám byí é hui kó râ nghut lhê.' ga luí, Yhumsing taí é dang lé bûn kat ri. Haú mù luí, Yhumsing Yesuq Hkrisduq lé lumjíng é hkûn, ngamoq lé Garai Gasâng jeju chyung-huq byí é su, Yhang, yhangmoq lé le byí é nghut le gi, ngò gi, hkasú é byù nghut luí, Garai Gasang lé wó lhom hkûm pyám râ lú?" ga taí ri.
- ¹⁸ Yhangmoq gi, haú hkyô lé wó gyo kôjáng, taí jang a joq lo kômù, "Ó!

Nghut bê, Garai Gasang gi, tûngbaù pé lé le, asak duì râ matú myit lhíng hkyô byi bu-nhung!" ga luí, Garai Gasang lé chôm hkya-ôn akô nghut ri.

Antioku Wà Mã É Noqkuq Hpúng

- ¹⁹ Ahkuí, Stehpan lé sat pyám kô é htâng má, zing-ri hui kô é yanmai, byo myín ló é bang gi, Hpinisi mau, Kupru zinlóng eq Antioku wà mó jé shoq byo ló kômù, Yudaq byu pé lé baú za, mungdang haú hko kyô akô nghut ri. Nghut kôlhâng, yhangmoq mã é Kupru byù eq Kuruni byù ra-am gi, Antioku wà mó má châng jé ló kômù, Yhumsing Yesuq é gabú danglù lé, Grik pé lé le taí kyô bum akô. Haú Yhumsing é loq gi, yhangmoq eq rahá nghut nyí mù luí, byù myo myo gi, lumjíng mù, Yhumsing chyáng lhing wang lo bùm bekô nghut ri.
- ²² Haú bâng é hkyô lé, Yerusalem noqkuq hpúng é no má hkyang jé ló é nghut mù luí, yhangmoq gi, Barnaba lé Antioku wà mó jé shoq nhang kat akô. Yhang jé é hkûn, Garai Gasâng jeju bo nyi é lé myàng jáng, yhang gi, gabú luí, yhangmoq é myit nhiklhum banshoq èq haú Yhumsing má lhumzuí nyí râ matú, lhunglhâng bang lé myit wum byí ri. Hkâsu mù gâ le, Barnaba gi, byù gè nghut mù, Chyoiyúng Woi-nyí le, lumjíng myit le byíng tô é sù nghut nyi ri. Haú mù, byù myo myo gi, haú Yhumsing chyáng jat wang lo bùm bekô nghut ri.
- ²⁵ Hau htâng, Barnaba gi, Sholuq lé ê hô râ ga Tarshu myuq shut ê mù, yhang lé myàng jáng, Antioku wà mó má shuí lo ri. Haú mù, yhangnhik gi, razàn gón noqkuq hpúng haú eq rahá zum nyí kô é nghut mù luí, byù myo myo lé wó mhòqshit akô. Chángzô pé

gi, Hkristan gâ é myìng lé, Antioku wà mó má sâng-hi wó yù bekô nghut ri.

²⁷ Haú u lé, myiqhtoî pé ra-am gi, Yerusalem wà mó mai, Antioku wà

²⁸ mó má lé jé bum akô. Haú bang má é Agabu gâ é sù gi, toq yap mù, Romaq mingkan tìng má mutmó gyó lô râ nghut é hkyô lé, Woi-nyí èq tìn shit é dông taí kyô ri; (Haú gi, hko-hkâm Klodi é pyat má dut bê nghut

²⁹ lhê.) Haú mù luí, chángzô pé gi, Yuda mau má é gumang wuì lé, ó le ó wó dut é myhó garum kat râ ga, myit

³⁰ hpyit yu bum akô. Haú eq rajung za kut kômù, yhangmoq gi, chyunghuq haú pé lé Barnaba eq Sholuq nhik é loq mai suwún wui pê chyáng hun kat bekô nghut ri.

**Petruq, Htóng Mai Wó
Lut Htoq Lo É Hkyô**

12 Haú u lé, Herut hkohkâm gi, hpúng byú ra-am lé chyup yú

² mù, zing-ri râ ga ngantsâ nyi ri. Haú mù, Yohan é yhangmang Yakuq lé

³ sham èq sat pyám nhang ri. Haú hkyô lé Yudaq byu pé wú gabú é lé myàng jáng, yhang gi, Petruq lé le, jâng chyup yu ri. Haú dut é gi, mún a kat

⁴ é muk zo poí u lé nghut ri. Herut gi, Lhoqlhai Poí lai jáng sheq, mingbyú wui hí má jéyáng râ ga myit tô é yan-mai, yhang lé chyup yu é htàng má, htóng má lhung to mù, yhang lé zúng râ matú, gye myi yuq yuq kut myi hpúng lé ap tô ri.

⁵ Haú mù, Petruq gi, htóng má lúng tô ri; hpúng byú wuì kúm gi, yhang é matú Garai Gasâng chyáng kyú gyai chôm dung byí nyi akô nghut ri.

⁶ Petruq gi, Herut èq yhang lé jéyáng râ matú she htoq yú râ hí myìn lé, shamtoq-tui í hkat èq tuí é hui luí, gyezo í yuq é gyoro má yhup myhí

tô ri; zúng é bang le htóng hkum má

⁷ zúng nyi bum akô. Haú hkún, Yhum-sing é maumang lagyo rayuq lé htoq shit mù, gok haú má duqbó lo ri. Mau-mang lagyo haú gi, Petruq é namcham má ê hpuk kat mù, “Myap toq wú aq.” ga nhaú ri; haú hkún, Petruq é loq má é toqjâng tui pé le gyut gyó lô bê nghut ri.

⁸ Maumang dum taí é gi, “Hpyihit hit mù, hkyí-tsung tsung aq.” gâ ri; Petruq le taí é eq rajung za kut ri. “Náng é bumó wut mù ngá htàng cháng aq.” ga yhang lé maumang la-
⁹gyo dum taí ri. Haú hkún, yhang gi, htóng mai yhâng htàng châng htoq lô ri; nghut kôlhang, maumang lagyo kut é muzó haú gi, gè gè nghut é lé, yhang a sé mù, shing-rán myang é

¹⁰ nghut ri ga myit yu ri. Ahkuí, yhang-nhik gi, zúng tô é jowò í wô lai mù, wà má htoq é shamtoq hkum má jé jáng, hkum haú le yhang baú bóng lô mù, yhangnhik htoq luí, wà hkyô rahkat má sô lô le, maumang lagyo gi, haú hkún jáng, yhâng chyáng mai gâng lô byuq bê nghut ri.

¹¹ Ahkuí, Petruq gi, dum bün gyìng lò jáng, “Yhumsìng gi, Yhâng é mau-mang lagyo lé nhang kat mù, Herut é loq eq Yudaq byu pé myit myoqbyù tô é hkyô banshoq mai, ngo lé hkyi yù bê nghut é lé, ahkuí ngò gè gè sé bê.” ga taí ri.

¹² Haú hkyô lé myit sê kat jáng, yhang gi, byù myo myo zing mù, kyúdüng nyi é jowò, Markuq gâ é Yohan é yhângnu Mariq é yhúm má jé lô ri.

¹³ Haú mù, yhang gi, yhúm wàng hkum lé lô bat é hkún, Roda gâ é dui-nhâng zoshâng myiwe zo rayuq gi, gyô wú râ

¹⁴ ga htoq lé lo ri. Yhang gi, Petruq é htê nghut é lé sê gyô kat jáng, lùm gabú luí hkum a hpóng byi shí é za, yhúm-

hkaû shut din wang ló mù, “Petruq gi, hkum mhó lut má lo yap tô ri.” ga ló taí kyô ri.

¹⁵ Yhangmoq kúm gi, “Nàng na bê nghut ri.” ga yhang lé taí akô. Yhang gi, gè gè nghut ri ga ru taí nyi ri. Dum, yhangmoq gi, “Yhâng é maumang la-gyo nghut âng ri.” ga taí akô.

¹⁶ Nghut kôlhang, Petruq gi, hkum ru bat nyí mù, yhangmoq hpông kat é hkûn, yhang lé myàng kôjáng, chôm

¹⁷ maú byuq bum akô. Yhang gi, yhangmoq lé zim za nyí keq ga loq lik shit mù, yhang lé Yhumsing èq htóng mai hkâsu kut shuí htoq yu é hkyô lé taí kyo luí, “Shí hkyô lé Yakuq eq gumang wui lé taí kyô kat keq.” ga taí ri. Hau htâng, yhang htoq ló luí, jowò gó shut e ló bê nghut ri.

¹⁸ Ahkuí, maubó jáng, gyezô pé gi, Petruq haí dut byuq é hkyô lé a sé kô é yanmai, gyai maú gabyông bum
¹⁹ akô. Herut kúm gi, Petruq lé ho wú le a myàng jáng, zúng é bang lé myí gôn wú mù, yhangmoq lé sat pyám râ matú hkunmó hkyô ri.

Herut Hkohlâm Shi Byuq É Hkyô

Hau htâng, yhang gi, Yuda mau mai Kesare wà mó má gyó ló mù ló nyi
²⁰ nyi ri. Haú gyoro má, Herut hkohlâm gi, Turuq eq Sidun byu pé lé gyai nhik-yô nyi ri. Haú mù luí, yhangmoq gi, myit rahkat zâ èq yhâng chyáng é mù, Blastu gâ é, hkohlâm wa lum tô é suwún hpó lé é lûm hkaû mù, simsaq hkyô é dúng akô. Hkâsu mù gâ le, yhangmoq é zoshuq wó râ matú gi, Herut é ming lé lûm hkaû nyí kô é yanmai nghut ri.

²¹ Haú hkûn, ding lhûm tô é bui-nyí má, Herut gi, hkohlâm hking

wut chûng mù, hkohlâm tanghkuq má zùng luí, yhangmoq lé hkohlâm

²² mungdang byí ri. Haú jáng, mingbyú wui gi, “Htê shí gi, waxâng byu é htê a nghut, garai wá é htê sheq nghut ri.”

²³ ga garú bum akô. Radá dâm, Herut gi, Garai Gasâng é hpungwup shingakang lé a tê byí é yanmai, Yhumsing é maumang lagyo gi, yhang lé dâm byi luí, yhang gi luq èq hkê é hui mù, shi byuq bê nghut ri.

²⁴ Haú Garai Gasâng é mungdang gi, sê é bang myô jat lò mù, je riyhang byo myín lô bê nghut ri.

²⁵ Barnaba eq Sholuq nhik gi, Yerusalem wà mó má yhangnhik saí tûm nyi é muzó ban saí jáng, Markuq gâ é Yohan lé shuí chûng mù, Antioku wà mó shut taú ló bekô nghut ri.

Barnaba Eq Sholuq, Hkyin Nhang Kat Huí É Hkyô

13 Ahkuí, Antioku wà mó mâ é noqkuq hpúng má, myiqhtoí pé eq sará pé le lom nyi akô. Haú bang gi, Barnaba, Niger^a gâ é Simeon, Kuruni byú Luki, (Herut zau hpó eq zum kô lò sú) Manaen eq Sholuq pé nghut
² akô. Yhangmoq gi, zoshuq gám luí Yhumsing lé noqkuq dojaú nyi é hkûn, Chyoiyúng Woi-nyí gi, “Ngá é mù wùn waq râ matú ji tô é Barnaba eq Sholuq
³ nhik lé, hkyin to keq.” ga taí ri. Haú mù luí, yhangmoq gi, zoshuq gám luí kyúdung mù, yhangnhik ahtoq má loq ke byi kô é htâng, yhangnhik lé nhang htoq kat akô nghut ri.

Kupru Zinlóng Má Dut É Hkyô

⁴ Haú mù, yhangnhik gi, Chyoiyúng Woi-nyí èq nhang kat é eq rajung za, Seluki wà shut gyó ló mù, haú mâ

^a 13:1 Grik dong Niger gâ é gi, byú noq gâ é nghut lhê.

é lhaî ji luî, Kupru zinlóng má jé lô
⁵ luî, Salami wà mó má nyi nyi é hkûn,
 Yudaq byu pê é tarajong pé má, Ga-
 rai Gasâng é mungdang hko kyô akô.
 Markuq gâ é Yohan le yhangnhik lé
 htuqluq htuqbang kut nyi ri.

⁶ Yhangmoq gi, haû zinlóng mai lai
 byit e lô mù Pahpu wà mó jé lô
 kô é hkûn, myiqhtoi pyoq nghut sù
 Bara-Yesuq gâ é Yudaq byù myoqheq
⁷ sará rayuq eq htûng hui akô. Haú
 yuq gi, Sergi Poluq gâ é, myit hpaq-
 chyî kûng é ginwáng zau hpó é byù
 rayuq nghut lhê. Minggyi hpó haú
 gi, Garai Gasâng é mungdang gyô yù
 naù mù, Barnaba eq Sholuq nhik lé
⁸ ji yu ri. Haú hkûn, myoqheq sará gâ
 é lichyúm dông myhîng é Eluma le
 gâ é Bara-Yesuq kúm gi, ginwáng zau
 hpó lé haú lumjîng hkyô má a jau lô
 nhâng nau é nghut mù luî, yhangnhik
⁹ lé lhom he tang pyâm ri. Haú hkûn,
 Poluq le gâ é Sholuq gi, Chyoiyúng
 Woi-nyí byíng mù, yhang lé wú tsuq
¹⁰ to luî, “Myit goi é hkyô eq hpuq lô
 lhik é hkyô banshoq byíng tô é, nat
 é yhangzo nghut sù, tengmán hkyô
 hkgámó é gyè hpó ê, Yhumsing é
 tengmán hkyô lé a lhoq hpyoq é a wó
¹¹ nyî lhú? Ahkuî, wú aq, Yhumsing é
 loq gi, náng chyáng jé mù, nàng gi,
 rayoq zo builoq a wó myang é za,
 myoqjit byuq râ nghut lhê.” ga taî ri.

Haú hkûn jáng, yhâng é myoq gi,
 myhî-myhà ga luî mauchut tuq dut lò
 byuq ri; haú mù, yhang lé shê râ byù
¹² ho sop lhîng wún ri. Haú hkyô lé gin-
 wáng zau hpó myàng jáng, Yhumsîng
 eq sêng é mhoqshit é hkyô lé wú maú
 luî lumjîng bê nghut ri.

Antioku Wà Mó Má Dut É Hkyô

¹³ Hau htâng, Poluq eq yhâng luzúm
 wuí gi, Pahpu wà mó mai lhaî ji mù,

Pamhpuli mau mâ é Perga wà má jé
 lô akô. Markuq gâ é Yohan kúm gi,
 yhangmoq eq gang luî, Yerusalem wà
¹⁴ mó shut taú lú byuq bê nghut ri. Dum,
 yhangmoq gi, Perga mai toq e lô le,
 Pesidi ginwáng mâ é Antioku wà mó
 má jé lô akô. Bánno buinyî má, yhang-
 moq gi, tarajong má wang zung tô
¹⁵ akô. Haú hkûn, Mosheq é tarâ laiká eq
 myiqhtoi laiká pé lé ban nghap jáng,
 tarajong má up bang gi, “Gumang wuì
 ê, mingbyû wuì lé myit wum byi dang
 joq kô é nghut le gi, ahkuî taí lo keq.”
 ga luî, yhangmoq chyáng taí nhang
 kat ri.

¹⁶ Haú hkûn, Poluq gi, toq yap mù,
 zîm byuq kó sháng gaq ga loq tû luî,
 “Israelaq byu pé eq Garai Gasang lé
 gyuq hkunggâ é byu pé ê, chôm gyô
¹⁷ yù keq. Israelaq byu pê é Garai Ga-
 sang gi, ngamoq é îchyí îkê pé lé hkyin
 yù bê nghut mù luî, Egotuq ming má
 byùbîng dut nyi to ashî hkûn, yhang-
 moq lé kô myhâng nhâng mù, hpung-
 wup a-tsam bo é loq èq haú mau mai
¹⁸ shuí htoq lô ri. Dum, myi xê zàn kô,
 yoso pé má yhangmoq é a-kyang lé
¹⁹ jân pyám byi mù, Hkanan ming mâ é
 byuhú nyhit hú lé lhoq htên pyám luî,
 haú bâng é mingdán mâ é silí wunlí
 yhangmoq lé gàm byî ri. Haú gi, myi
 shô ngo xê zàn kô myáng ri.

²⁰ Hau htâng má, Garai Gasang gi,
 myiqhtoi Samuelaq é pyat jé shoq
²¹ tarâ agyî pé lé to byî ri. Hau htâng
 má, yhangmoq mai hkohkâm dung
 kômù, Garai Gasang gi, yhangmoq
 lé, Ben-yamyin amyû mâ é, Kisha é
 yhangzo Sholuq lé byi luî, yhang gi,
²² myi xê zàn up bê nghut ri. Hau htâng,
 Sholuq lé lhoq hkyô pyám mù, Da-
 wîq lé, yhangmoq é hkohkâm kut
 nhang ri. Dawîq é hkyô lé Yhang saksé
 hkâm é gi, ‘Ngò nhik dik é Yese é

- yangzo Dawiq lé myàng bê; yang gi, ngò kut nhang é hkyô banshoq lé kut râ nghut lhê.' gâ ri.
- ²³ Garai Gasang gi, Yhâng é danggidiq joq é eq rajung za, Israelaq byu pê é matú, haú yuq é awut ashín mai, hkyi yù Sû Yesuq lé, pô htoq nhâng bê
- ²⁴ nghut ri. Yesuq a jé lé shimá, Yohan gi, Israelaq byu pé banshoq lé myit lhíng hkyô eq sêng é bapisma hkyô
- ²⁵ lé hko kyo bê nghut ri. Dum Yohan gi, yang zuí é muzó ban ló é u lé, 'Ngo lé ó nghut é su ngâm tô akô lúhú? Ngò gi, haú yuq a nghut, wú keq, ngá é htâng má rayuq jé râ nghut lhê, haú yuq é hkyî-tsung tui hpyî râ lháng ngò a gíng.' ga taí ri.
- ²⁶ Abraham é yangzo yangshú pé eq Garai Gasang lé gyuq hkunggâ é tûng-baù, gumang wui ê, shí hkyi yù hkyô mungdang lé, nga-nhûng chyáng byi
- ²⁷ kat bê nghut ri. Yerusalem wà mó má é bang eq, yangmoq é zau suwún wui gi, Yhang hkyi yù sù nghut é lé le, Bánno buinyì hkanmó nghap é myiq-htoi pê é dang lé le, a sê gyo kô é yan-mai, Yesuq lé sat râ doqdân é hkûn, myiqhtoi pê é dang lé lhoq dik pyám
- ²⁸ bekô nghut ri. Yhâng chyáng shí gíng é mara a myàng kôlhâng, Yhang lé sat pyám nhâng râ matú, Pilat chyáng
- ²⁹ dúng akô. Yhangmoq gi, yang eq séng luí, kê to má kê to ban lhoq dik kôjáng, Yhang lé tapzîng mai yu hkyó mù, lup má kat tô akô nghut ri.
- ³⁰ Garai Gasang kúm gi, Yhang lé shi é mai lhoq dui toq yú bê nghut lhê.
- ³¹ Yhang gi, Galile mau mai Yerusalem wà mó jé shoq, hí lé Yhâng htâng châng é bâng chyáng buinyì tsómra myáng shoq htoq shit shit kut ri. Haú bang gi, ahkuí, nga-nhúng Isra-
- elaq byu pê é hí má, Yhâng é saksé dut bekô nghut ri.
- ³² Haú mù, í dam lhê é Hkya-on Kung-tôn Laiká má,
'Nàng gi, Ngá Zo nghut ri.
Hkû-nyí, Ngò gi, Náng Wa dut bê nghut lhê.'^a
- ³³ ga luí, kê tô é eq rajung za, Garai Gasang gi, íchyí îwâ pé lé byi tô é danggidiq lé, Yesuq lé lhoq dui toq byí é dông, yangmoq é yangzo yangshu ngamoq é matú, lhoq dik byí é gabú danglù lé, nungmoq chyáng ngamoq
- ³⁴ wun lé byi bê. Hau htoq agó, Yhang htên byoq é hkâ-nhám a hui shoq, shi é mai lhoq dui toq yú râ hkyô eq séng luí, Garai Gasang taí é gi,
'Dawiq lé byí tô é danggidiq eq rajung za, chyoyíung é eq lumgíng é jeju lé, ngò nungmoq lé byi râ nghut lhê.'^b
- ³⁵ gâ ri. Hkya-on Kungtôn Laiká gó wò má le,
'Náng é Chyoyíung Sû lé, Nàng htên byoq nhâng nau râ a nghut.'^c
ga taí tô ri.
- ³⁶ Ahkuí, Dawiq gi, yhâng é pyat banshoq má Garai Gasang ô nau é dông ban wùn waq jáng, shi byuq luí, íchyí îwâ pé eq rahá myhup pyám hui mù,
- ³⁷ htên byoq byuq é hui bê nghut ri. Garai Gasang lhoq dui toq yu é sù kúm gi, htên byoq huí é a nghut.
- ³⁸ Haú nghut é yanmai, gumang wui ê, haú yuq mai yubak wó hkyut pyám byí é hkyô lé, nungmoq lé hko kyô
- ³⁹ nyí é nghut é le, sê nyi keq. Hau htoq agó, Mosheq é tará eq mara hkyut san byí é a hui kôlhâng, haú yuq lé lum-jíng é bang gi, hkyô lhumjup má mara

^a 13:32 Hkya-on 2:7 ^b 13:34 Esai 55:3 ^c 13:35 Hkya-on 16:10

⁴⁰ hkyut san byî é hui râ nghut lhê. Hau é yanmai,

‘Wú keq, jihpoî é bang ê, maú
mù luí htuq byuq keq;
nungmoq é buinyî pé má ngò
rajung jung kut htoq râ nghut
lhê;

⁴¹ haú hkyô lé, rayuq yuq, nungmoq
lé hkaî kyo kôlhang, jing kó
râ a nghut.’^a

ga luí, myiqhtoî pé taí é dang, nung-
moq má a ang sháng gaq, sidiq nyî
keq.” ga hko kyô nyi ri.

⁴² Ahkuí, Poluq eq Barnaba nhik tara-
jong mai htoq ló le, htâng lhê é Bánno
buinyî má le, haú pé lé dum hkaî kyo
râ matú yhangmoq chôm dúng akô.

⁴³ Chôm byo htoq ló kô é hkûn, Yudaq
byu pé eq Yudaq noqkuq htung má
lhing wang lo é tarâ hkunggâ é byù
myo myo gi, yhangnhik é htâng má
châng bùm kô é nghut mù luí, Ga-
rai Gasâng jeju má gîng nyî râ matú,
yhangnhik gi, yhangmoq lé lhoq pun
lhoq kyîng akô nghut ri.

Tungbaù Pê Chyáng Lhing Lo É Hkyô

⁴⁴ Hau htang lhê é Bánno buinyî má,
Garai Gasâng é mungdang gyô yù
râ matú, rawa bang aluq shoí ban-
shoq, lé zup zing to bum akô. Yudaq
byu pé kúm gi, byù moq mó haú lé
myàng jáng, manon myit baú byíng
bùm kômù luí, Poluq taí é dang lé taí
hting é eq nhing pyâm akô.

⁴⁶ Poluq eq Barnaba le gyuq myit a
bo é dông taí é gi, “Garai Gasâng
é mungdang lé, nungmoq lé hí taí
kyo râ dut é yanmai, ngá-nhik taí bê
nghut lhê. Nghut kôlhang, nungmoq
gi, haú lé lhom he-ngik pyám kômù,
ahtum abyuq é asak eq gingdán é
dông yhumsing gùng lé a myit yù kô

é yanmai, wú keq, ahkuí, ngá-nhik gi,
túngbaù pé shut lhing ló berâ nghut
⁴⁷ lhê. Hkâsu mù gâ le, haú Yhumsing
gi,

‘Hkyi yù hkyô lé maumyî htuq
shoq wó chûng jé râ matú,
Ngò, nàng lé túngbaù pé é
maubó dut nhâng bê.’^b

ga luí, ngamoq lé hkunmó hkyó kat
bê.” gâ ri.

⁴⁸ Túngbaù pé gi, dang haú lé wó gyo
kôjáng, gabú é eq Yhumsing é mung-
dang lé hkyo-on kungtôn nyi bum
akô. Ahtum abyuq é asak lé wó râ
matú hkyin to huí é lhunglhâng bang
le, lumjíng bum akô nghut ri.

⁴⁹ Yhumsing é mungdang gi, haú ming
⁵⁰ gón jam lò bê nghut ri. Yudaq byu
pé kúm gi, Poluq eq Barnaba nhik lé
zing-ri râ matú, aróng wó é myiwe
wùl mâ é tarâ hkungga bang eq,
haú wà mâ é suwún wuí lé, nhik
lhoq yo kôluí, yhangnhik lé mau-
kyo mai chôm hkat htoq pyâm akô.

⁵¹ Yhangnhik gi, yhangmoq lé a nau
é hkyô tûn shit é dông, yhumsing
é hkyî mâ é hpuilhaú lé yhangmoq
chyáng ko hkyô pyâm to kômù, Ikoni
wà mó shut ló byuq bekô nghut ri.

⁵² Chángzô pé kúm gi, gabú é htoq agó,
Chyoiyúng Woi-nyí byíng nyi bum
akô nghut ri.

Poluq Eq Barnaba Nhik, Ikoni Wà Mó Má Ló Jé É Hkûn Lhê Hkyô

14 Ahkuí, Ikoni wà mó má nghut
nyi é hkûn, Poluq eq Barnaba
nhik gi, Yudaq byu pé é tarajong má
rahá wàng mù, Yudaq byù eq túngbaù
pé ajùm ayò lumjíng bùm kó shoq,
² wum kat hko kyô akô. Nghut kôlhang,
a lumjíng é Yudaq byu pé gi, lum-
jíng é gumang wuí lé a ngui râ dông

^a 13:41 Hbk 1:5 ^b 13:47 Esai 49:6

tungbaù pé lé mhoq hpyoq yû mù,
³ shuí gumlaù akô. Haù mù luí, yhang-
 nhik gi, tsómra myang shoq haù má
 nyì mù, haù Yhumsing é matú gyuq
 myit a bo é za hko kyô akô; Yhang
 Yhumsing le yhangnhik é loq mai li-
 mik kumlhá eq mauhpo muzó dut
 nhang é dông, Yhâng é jeju mung-
⁴ dang lé saksé hkám byí nyi ri. Haù
 wà má é bang kúm gi, myit byo ló
 bûm kô é nghut mù luí, Yudaq byu
 pê chyáng ra-am, lagyô pê chyáng
⁵ ra-am, lom byuq ló akô. Ahkuí, tûng-
 baù pé le, Yudaq byù eq yhangmoq é
 uphkâng bang le, yhangnhik lé rhoí
 mù luqgok èq dú sat rà ga hûm lo
⁶ bum akô. Nghut kôlhâng, yhangnhik
 gi, haù hkyô lé bûn sê kat kôjáng, Lu-
 kaoni ginwáng má é Lustra eq Derbe
 wà mó eq, hau é awui ayàm wà tiq wà
⁷ zo pé shut hfang e ló akô. Haù pé má
 le, gabú danglù xoq hko kyô wún akô
 nghut ri.

**Lustra Wà Mó Má Ló
 Jé É Hkûn Lhé Hkyô**

⁸ Ahkuí, Lustra wà mó má, înu ung-
 hkaù mai hkyî hten mù luí, hkâ-nhám
 le hkyô a wó sô wú é sù rayuq zung
⁹ tô ri. Yhang le Poluq taí é dang lé gyô
 nyi ri. Poluq gi, haù yuq lé wú tsuq kat
 é hkûn, wó lhoq gê byi hui rà nghut
 lhê gâ é lumjín myit yhâng chyáng
¹⁰ bo tô é lé, myàng byí ri. Haù mù, Po-
 luq gi, “Toq yap aq!” ga luí, htê mó èq
 yhang lé taí kat jáng, yhang gi, byam
 toq kat mù, wó so bê nghut ri.
¹¹ Haù mù, Poluq kut é muzó lé shiwa
 byu pé myàng kôjáng, yhangmoq gi,
 Lukaoni dang dông, “Nat hparà pé gi,
 byù gùng dông kut luí ngamoq chyáng
 gyô ló bekô nghut ri.” ga luí, wut garu
¹² bum akô. Hau htâng, Poluq gi, dang
 myô taí sù nghut é yanmai, yhang

lé Herme ga, Barnaba lé gi, Zeu ga
¹³ myhíng byí akô. Haù wà yàm má é
 Zeu hparà noqkuq yhûm hkyangjong
 hpó gi, wà hkum má nohtó pé eq ban
 hkóng pé yu lé mù, shiwa byu pé eq
 rahá yhangnhik lé hkungga nhông byi
 rà hen akô.

¹⁴ Nghut kôlhâng, lagyo nhik Barnaba
 eq Poluq gi, haù lé wó gyo kôjáng,
 yhumsing é mebu lâng cheq pyám
 kôluí, shiwa hpong gung gûng shut
 din wang ê kômù, garû taí kô é gi,
¹⁵ “Hkaù pé ê, haí mù haù su kut lo
 akô lhú? Nga-nhik le nungmoq eq ra-
 jung za, xângzo byù za nghut lhê,
 akyû a bo é hkyô shí pé lé tô pyâm
 to mù, mauhkûng eq myigùng, wui-
 shuq lung-aù eq haù pé má nyì mi-nyì,
 joq mijoq lé hpan to sù, rû dui nyi é
 Garai Gasâng chyáng lhing wang lò
 kó sháng gaq nghû luí sheq, nung-
 moq lé gabú danglù hko kyô é nghut
¹⁶ lhê. Garai Gasang gi, byù myû châng-
 jup lé hí hpyang lhê é pyat bán má
 ó le ó kâm é dông kut nhâng bê
¹⁷ nghut ri. Nghut kôlhâng, Yhang gi,
 mauhkûng mai mau wô nhâng luí,
 kyôshi zúí nhang é ahkyíng yam-yoq
 byi mù, nungmoq lé zoshuq agùn agó
 byí é eq, nungmoq lé i-myt ngón
 nhang nyi é dông, Yhang ge é hkyô
 lé tûn shit mù, Yhang nyi é hkyô
¹⁸ lé saksé hkám nyi ri.” ga akô. Haù
 su ga taí kô le lháng, yhangnhik lé
 shiwa byu pé mai hkungga nhông
 byi rà hkyô lé, yhangnhik gi, gyai
 wuihke luí sheq wó hkûm pyâm akô
 nghut ri.

¹⁹ Hau htâng, Antioku wà mó eq Ikoni
 wà mó pé má é Yudaq byu pé ra-am
 lé jé kômù, shiwa byu pé lé shuí-u luí,
 Poluq lé luqgok èq chôm dú kômù,
 yhang lé shi byuq bê su ngàm kô é
 yanmai, wà shinggan shut shê hkyut

²⁰ htoq pyâm akô. Nghut kôlhang, Poluq gi, yhâng é lhîngkhyuq má chángzô pé yap tô kô é hkûn, toq mù wà shut tau wang ló ri. Hau htang nyí, yhang gi, Barnaba eq rahá Derbe wà mó shut é ló bekô nghut ri.

Antioku Wà Mó Má Taû Jé Ló É Hkyô

²¹ Haú wâ má yhangnhik èq gabú danglù hkô kyo kô é yanmai, byù myo myo gi, chángzô pé dut lo akô. Hau htâng, yhangnhik gi, Lustra, Ikoni, Antioku wà mó hkyô dum taû ló

²² kômù, chángzô pé lé myit lhoq ging byi uchyang, haú lumjîng hkyô má ru gîng nyi râ matú myit wum byî akô. “Nga-nhúng gi, Garai Gasâng é ming-dán má wàng râ matú, wuîhke jam-jau myo myo hui ra râ nghut lhê.”

²³ ga le, mhoqshit akô. Yhangnhik gi, noqkuq hpúng hkangmó má, hpúng suwún kut râ bang lé hkyin yù mù, zoshuq gám luí kyûdung mù, yhangmoq lumjîng nyi é Yhumsîng Garaî

²⁴ chyáng ap byi tô akô. Hau htâng, yhangnhik gi, Pesidi ginwáng mai laî byit ló mù, Pamhpuli ginwáng má jé

²⁵ ló akô nghut ri. Haú ginwáng mâ é Perga wà mó má mungdang hko kyo luí, Atali wà mó shut laî gyó ló akô nghut ri.

²⁶ Haú mai, lhaî ji mù, ahkuí yhangnhik wùn waq laî ló bê muzó é matú, Garai Gasâng jeju má ap luí yhangnhik lé nhang kat é Antioku wà mó

²⁷ má dum jé lò bekô nghut ri. Jé lo é hkûn, yhangnhik gi, hpúng byû wui lé wut tsîng yù mù, yhangnhik dông mai Garai Gasang kut é hkyô banshoq lé le, tûngbaù pé lé haú lumjîng hkyô hkum hpóng byî é hkyô lé le, shit kyô

²⁸ akô. Haú mù, yhangnhik gi, haú wâ má chángzô pé eq tsómra myang shoq nyi nyi akô nghut ri.

Ahpyo-kuq Hpyit Hkyô Eq Sêng É Manghkáng

15 Ahkuí, Yuda mau mâ é byù ra-am gi, Antioku wà mó má lé jé mù, gumang wui lé, “Nungmoq gi, Mosheq é htûngtarâ eq rajung za, ahpyo-kuq a hpyit é nghut jáng, hkyi yu é hui râ a nghut.” ga luí, mhoqshit

² bum akô. Hau é yanmai, myit a huí lhûm é hkyô htoq lô mù, Poluq eq Barnaba nhik gi, haú bang eq gyai yhang myíng myô lhûm akô; haú mù luí, gumang wui gi, Yerusalem wà mó má nyi é lagyo pé eq suwún wui chyáng, haú hkyô lé ló hpyê lhum râ matú, Poluq, Barnaba nhik eq rahá, yhangmoq chyáng mâ é ra-am lé, nhang kat râ ga

³ hkyin tô akô. Haú mù, hpúng byû wui yhangmoq lé dé kat kôjáng, yhangmoq gi, Hpinisi mau eq Samariq mau gyoro mai sô laî ló uchyang, tûngbaù pé lhing wang lò bê hkyô lé taí kyô akô. Haú mâ é gumang wui lé gyai yhang gabú nhang akô nghut ri.

⁴ Yhangmoq, Yerusalem wà mó má jé kô é hkûn, hpúng byû wui, lagyo pé eq suwún wui gi, yhangmoq lé lhom hkûlum yù kô é nghut mù luí, yhangmoq gi, yhangmoq dông mai Garai Gasang kut é hkyô lhungháng lé, haú bang lé shit kyô akô.

⁵ Haú hkûn, Hparishe hpúng mâ é lumjîng bang ra-am gi, toq mù luí, “Tûngbaù pé lé, ahpyo-kuq hpyit nhâng râ eq, Mosheq é tarâ dông cháng nhâng râ gi, ra yhang râ lhê.” ga taí bum akô nghut ri.

Yerusalem Wà Mó Má Kut É Byìn Tú Wap Hpong

⁶ Ahkuí, lagyo pé eq hpúng suwún wui gi, shí hkyô lé chôm myit wú râ

⁷ ga, zup tô bum akô. Shí hkyô lé gyai yhang dang rhâng lhûm bùm kô é

htâng má, Petruq gi, toq mù luí, “Gu-
 mang wui ê, Garai Gasang gi, ngá
 nhut mai taí é, haú gabú danglù
 lé, tûngbaù pé gyô yù mù lumjín
 kó sháng gaq ga, hí hkûn nungmoq
 chyáng mai ngo lé hkyin yù bê hkyô
 8 lé, nungmoq sé lugù nghut bê. Haú
 mù, myit nhiklum lé sé byi sù Ga-
 rai Gasang gi, nga-nhúng lé byí é eq
 rajung za, yhangmoq lé le Chyoiyúng
 Woi-nyí byí é dông, yhangmoq lé
 hap yù bê hkyô lé saksé tûn shit bê
 9 nghut ri. Garai Gasang gi, yhangmoq
 lumjín luí, yhangmoq é myit nhik-
 lum lé lhoq san lhoq yúng byi bê
 nghut é yanmai, nga-nhúng eq yhang-
 moq é gyoro má gamhkuí é hkyô a
 10 joq nhâng lo nghut ri. Haú nghut le
 gi, íchyí íwâ pê èq le, nga-nhúng èq
 le a ung é wòlai lé, haú chángzô pê
 é lingzing má ke byí é dông mai, haí
 mù, ahkuí Garai Gasang lé chyam wú
 11 nyi akô lúhú? Nghut kôlhang, ngamoq
 gi, yhangmoq eq rajung za, Yhumsîng
 Yesuq é jeju mai za hkyi yu é huí é
 hkyô lé lumjín é bang nghut lhê.” ga
 luí, yhangmoq lé taí ri.
 12 Haú hkûn, zup míng tô é bang
 lhunglhang gi, zim za kut luí, Bar-
 naba eq Poluq nhik mai, tûngbaù pê
 chyáng, Garai Gasâng èq yhangnhik
 é loq dông limik kumlhá pé eq mau-
 hpo muzó pé kut shit é hkyô, taí kyô
 13 nyi é lé chôm gyô nyi akô. Yhangnhik
 dang ban taí kôjáng, Yakuq gi, “Gu-
 mang wui ê, ngá dang lé gyô wú keq.
 14 Garai Gasang gi, tûngbaù pê chyáng
 mai Yhâng myíng é matú byù ra-myú
 hkyin yù râ ga, yhangmoq lé sâng-hi
 mai hkâsu kut lé kûm nyi é hkyô lé,
 15 Simun taí kyo bê nghut ri. Shí hkyô
 16 gi,

‘Hau é htâng má gi, ngò dum taú
 lò mù luí, lêng gyop byuq bê
 Dawiq é yhûm^a lé dum saí râ
 nghut lhê.
 Haú byoq htên tô é pé lé saí saí
 mù, haú lé dum lhoq toq râ
 nghut lhê.
 17 Haú hkûn sheq, ngá myíng mai ji
 yu é tûngbaù pé eq, myit gyô
 tô é byù lhunglhang bang gi,
 Yhumsîng Garai lé hô kó râ
 nghut lhê ga,
 18 a-nham mau htoq xâng hkun
 mai, shí hkyô pé lé sé nhang é
 Yhumsîng Garai taí ri.’^b
 ga myiqhtoí pé kê tô é dang eq rajung
 za nghut ri.
 19 Haú mù luí, ngò taí nau é gi, tûng-
 baù pê chyáng mai Garai Gasâng shut
 lhing lo é bang lé, gotú haí le a lhoq
 20 wui é za, hparà lhô pé lé kyáng byí é
 a sansêng é zoshuq pé lé le, ashop é
 dông gungsho zùm yap é hkyô lé le,
 lingzing mai myhik sat é dusak sho
 lé le, sui lé zô é hkyô lé le, koi pyám
 râ matú za, yhangmoq lé, nga-nhúng
 21 laiká mai wó shit kat lhê. Hkâsu mù
 gâ le, gó hkûn mai yhang, Mosheq é
 tarâ lé wà hkanmó má hko kyô ló
 kômù, Bánno buinyi hkanmó tara-
 jong pé má nghap kyo kyo kut bûm
 kô é nghut lhê.” ga taí ri.

**Lumjín É Tûngbaù
 Pê Chyáng Hun Kat É Laiká**

22 Haú hkûn, lagyo pé, suwún wui
 eq, hpúng byú wui lhunglhang bang
 gi, Poluq, Barnaba nhik eq rahá An-
 tioku wà mó shut nhang kat râ byù
 lé, yhangmoq chyáng mai hkyin yù râ
 matú chôm myit hpyit akô. Haú eq
 rajung za, yhangmoq gi, gumang wui

^a 15:15,16 Dawiq é yhûm gâ é gi, Dawiq eq yhâng é awut ashín pé up é hkyô lé gâ é nghut lhê.

^b 15:18 Amo 9:11-12

chyáng mâ é nhik bô suwún nhik Bar-sabaq gâ é Yudaq eq Sila lé hkyin yu
²³ akô nghut ri. Yhangnhik é loq má, hun kat kô é laiká gi,

“Antioku wà mó, Suriq mau eq Kiliki mau pé má nyi é, tûngbaù gumang wuì ê, nungmoq é gumang wuì nghut é, ngamoq lagyô pé eq suwún wuì gi, nguingón dang shit kyô kat lhê.

²⁴ Ngamoq nhang kat é le a nghut bang ra-am gi, ngamoq chyáng mai htoq lô mù, nungmoq lé dang èq lhoq byok pyám luí, nungmoq é myit lé lhoq nhúng byí nyi é hkyô lé, ngamoq wó gyo
²⁵ bê. Haù mù, ngamoq lhunglhâng bang gi, byù ra-am lé hkyin yù
²⁶ mù, nga-nhûng é Yhumsîng Yesuq Hkrisduq é matú, yhumsîng asak lé lhâng a hâ é nga-nhúng chyit-dap é Barnaba, Poluq nhik eq rahá, nungmoq chyáng nhang kat
²⁷ râ matú chôm myit hui bê. Haù mù luí, ngamoq gi, Yudaq eq Sila lé nhang kat lhê; yhangnhik gi, laiká má bo é eq rajung za, yhangnhik é nhut mai yhang
²⁸ taí kyo kó râ nghut lhê. Nungmoq é matú gi, hparà lhó pé lé tîng byí é zoshuq eq sui, lingzing mai myhik sat é dusak sho eq ashop é dông gungsho zùm yap é hkyô pé lé, koi pyám râ hkyô mai lai luí, gotú wòwùn hûn râ hkyô a joq nghú luí, Chyoiyúng Woi-nyí le, ngamoq le, myit huí
²⁹ to bê. Nungmoq haù pé lé koi pyám nyi kôjáng gi, gè râ nghut lhê.

Nguingón wángzán nyí kó sháng gaq ô!” ga kâ tô ri.

³⁰ Yhangmoq lé nhang kat kôjáng, yhangmoq gi, Antioku wà mó má gyó jé lô kômù, hpúng byú wuì lé ji tsíng to kôluí, haù hûn kat é laiká lé ap
³¹ byí akô nghut ri. Hpúng byú wuì gi, laiká haù lé ban nghap kôjáng, wum-o byí é danglù hau é yanmai, gabú nyi
³² bum akô. Yudaq eq Sila gi, myiq-htoí nhik le nghut kômù luí, gumang wuì lé mungdang myo myô èq lhoq pun lhoq kying kômù, wum-o lhoq
³³ gîng to byí akô. Rayoq zo haù má nyi nyi kô é htâng má, gumang wuì gi, yhangmoq lé nhang kat é bâng chyáng, ngui ngui ngón ngón dum tau
³⁴ ló nhâng bekô nghut ri. (Sila kúm gi, yhang ô nau é dông nyi gyó tô ri.)^a
³⁵ Poluq eq Barnaba kúm gi, Antioku wà mó má nyi gyó to kômù, Yhumsîng Yesuq é mungdang lé, góbang myo myo eq, mhoq kyo hko kyô akô nghut ri.

Poluq Eq Barnaba Nhik Gâng Lhum É Hkyô

³⁶ Hau htâng, buinyí tsómra myáng jáng, Poluq gi, Barnaba lé, “Yhumsîng é mungdang hko kyô lai lo wú bê, wà hkyap hkangmó mâ é gumang wui chyáng taù lò luí, yhangmoq hkâsu dut nyi é hkyô lé, ló dum kúm wú
³⁷ lo goq.” ga taí ri. Barnaba gi, Markuq gâ é Yohan lé le shuí chûng nau ri.
³⁸ Nghut kôlhâng, Poluq gi, haù yuq lé a kâm shuí chûng nau nghut ri; hkâsu mù gâ le, yhang gi, Pamhpuli mau má yhangnhik lé tô pyám to mù, yhangnhik eq rahá muzó a kâm xoq zui nau
³⁹ é sù nghut é yanmai nghut ri. Hau é yanmai, yhangnhik gi, gyai yhang taí shai lhum kômù, rayuq eq rayuq gâng lhum bekô nghut ri. Barnaba

^a 15:34 Bun zo shí lhum gi, Grik Chyúmlaiká myo myo má a bô nghut lhê.

gi, Markuq lé shuí chùng luí, lhai
 ji mù Kupru zínlong shut e ló byuq
⁴⁰ bê nghut ri. Poluq kúm gi, Sila lé
 hkyin yù mù, gumang wui èq yhang
 lé Yhumsîng Garaí é jeju má ap kat
 kô é htâng má, yhangnhik gi, htoq
⁴¹ e ló byuq bekô. Haú mù, Poluq gi,
 Suriq mau eq Kiliki mau mai sô lai
 ló uchyang, haú mâ é noqkuq hpûng
 pé lé wum-o lhoq ging byí wún bê
 nghut ri.

**Poluq Eq Sila Nhhik Chyang
 Timohti Châng É Hkyô**

16 Poluq gi, Derbe wà mó má
 jé é htâng, Lustra wà mó má
 dum jé ri. Haú wà má, Timohti gâ
 é chângzo rayuq nyi ri. Yhâng nu
 gi, Yesuq lé lumjîng é Yudaq myiwe
 myhí nghut ri; yhâng wa kúm gi,
² Grik amyû nghut ri. Timohti gi, Lu-
 stra wà mó eq Ikoni wà mó má nyi
 é gumang wui èq hkyâ-ôn é hui sù
³ nghut ri. Poluq gi, hkyowuì má yhang
 lé shuí chùng naù mù luí, ahpyo-kuq
 hpyit byí ri. Hkâsu mù gâ le, yhâng
 wa gi, Grik nghut é hkyô lé haú
 mâ é Yudaq byu pé lhunglhâng bang
 sé kômù, haú bang lé myit tê byí
⁴ é yanmai nghut ri. Haú mù, yhang-
 moq gi, rawa htâng rawà mai lai ló
 uchyang, Yerusalem wà mó mâ é la-
 gyô pé eq hpúng suwún wuí, chôm
 myit hpyit tô é hkyô lé, châng kô
 sháng gaq ga, yhangmoq lé taí kyô
⁵ akô. Haú mù luí, hpúng byû wui gi,
 lumjîng hkyô má wum-o bo lò kômù,
 ra-nyí èq ra-nyí byù du myô jat lo
 nyi ri.

**Makedoni Byù Rayuq Lé, Poluq
 Shing-rán Myang É Hkyô**

⁶ Ahkuí, yhangmoq gi, Asia mau má
 mungdang ê hko kyo râ hkyô lé Chyoi-

yung Woi-nyí èq yhangmoq lé hkûm
 pyâm é yanmai, Hprugi mau eq Ga-
⁷ latiq mau dông sô lai ló mù, Musi
 mau kyo má jé ló kôjáng, Bihtuni mau
 shut wang ló râ dâ akô; nghut kô-
 lhang, Yesuq é Woi-nyí gi, yhangmoq
⁸ lé ahkáng a byi nghut ri. Haú mù,
 yhangmoq gi, Musi mau mai sô lai ló
⁹ luí, Troa myuq má gyó jé ló akô. Haú
 má, myín lé, Poluq gi, Makedoni byù
 rayuq lé yap to mù, “Makedoni mau
 shut dap lé luí, ngamoq lé le garúm
 yû laq.” ga luí, yhang lé dung wut nyi
¹⁰ é shing-rán myang ri. Shing-rán haú lé
 Poluq myang é eq, Makedoni byu pé
 lé gabú danglù hko kyo râ matú, nga-
 moq lé Garaí Gasang wut yù bê nghut
 ri nghú myit yù luí, haú hkûn yhang,
 ngamoq gi, Makedoni mau shut dap é
 râ matú rì rì kut ló bê nghut lhê.

**Ludia Gâ É Myiwe Myhí
 Hpúng Byû Dut Lo É Hkyô**

¹¹ Haú mù luí, ngamoq gi, Troa myuq
 mai Samohtake zínlong ang ang shut
 lhai ji é mù luí, htang nyí gi, Neapoli
¹² wà má jé bê nghut lhê. Haú mai lai
 jáng, Makedoni mau má, Romaq byu
 pé xuq tô é, haú ginwáng mâ é ahkyak
 wà mó nghut é, Hpilipi myuq má nga-
 moq jé mù, haú má rayoq zo nyi nyi é
 nghut lhê.
¹³ Bánno buinyí jé jáng, ngamoq gi,
 kyûdung jowò joq nhô ngam mù, wà
 hkum shinggan mâ é, wuilàng yàm
 shut htoq ê luí, haú má zîng to lánq
 é myiwe wui lé, zung gyó mù nyo
¹⁴ hi é nghut lhê. Haú dang gyo nyi é
 bang má, Garaí Gasang lé noqkuq é,
 Htuatira myuq byû, pán nê ung zo sù
 Ludia gâ é myiwe myhí rayuq bo ri;
 Yhumsîng Garaí gi, Poluq taí kyô é
 hkyô lé rago gyô yù sháng gaq ga,
 yhang lé myit hkum hpóng byí ri.

¹⁵ Yhang gi, yhang eq yhâng yhumbyù wui wui-myhup ban hkâm yù kôjáng, “Nungmoq gi, ngo lé haù Yhumsîng Yesuq má lumjîng bê sù nghut é dông, myit yù byi kô é nghut jáng, ngá yhûm má lé bíng keq.” ga luí, ngamoq lé zuq zuq ji yu ri.

Poluq Eq Sila Nhik Htóng Lúng É Hkyô

¹⁶ Ra-nyì lé, ngamoq gi, haù kyûdûng é jowò shut e ló nyi le, nat wang júng luí gumhpân hpan é jùnmyhí rayuq ngamoq lé lhom huí ri. Haù yuq gi, gumhpân hpan é dông yhâng yhum-sîng wui lé ngunzè gyai yhang hô byì ¹⁷ é sù nghut lhê. Myiwe haù gi, Poluq eq ngamoq htâng má châng to mù, “Shí bang gi, nungmoq lé hkyi yù hkyô taí kyô wún é, Myhang Htâng é Garai Gasâng é dui-nhâng zoshâng wui nghut ¹⁸ bum akô ô!” ga wut garû ri. Buinyì myo myo haù su chyat châng garû wún é yanmai, Poluq gi, gyai yhang myit hpêbu byuq mù, lhing wú kat luí, nat haù lé, “Yesuq Hkrisduq é myîng lang luí ngò nang lé hkunmó hkyô kat lhê, yhâng chyáng mai htoq ló byuq aq.” ga luí, nat haù lé, nhik-yô kat ri. Haù hkûn jáng, nat haù gi, yhâng chyáng mai htoq ló byuq bê nghut ri. ¹⁹ Ahkuí, myiwe hau é yhumsîng wui gi, ngunzè myàng zo râ myoqbyù jowò a joq lo é hkyô lé sé kôjáng, Poluq eq Sila nhik lé chyup yù mù, gài mâ é suwún wui chyáng she hkyut e ²⁰ akô. Dum, yhangmoq gi, yhangnhik lé tarâ agyì pê chyáng shuí ê mù, “Shí nhik gi, Yudaq byù nghut mù luí, ngamoq Romaq byu pé mai a ge châng é htunghking lé mhoqshit byì nyi é ²¹ dông, nga-nhûng é myuq lé gunjâng nyi akô nghut ri.” ga taí akô. ²² Haù mù luí, shiwa byu pé gi, yhangnhik lé chôm htîm akô. Tarâ agyì pé

gi, yhangnhik é mebu lé lâng hkyut pyám luí, wumchûm hkat èq bat râ ²³ matú, hkunmó hkyô kat akô. Yhangmoq gi, yhangnhik lé gyai yhang nhuq bat yu é htâng, htong má lhûng kat mù, rago za wú zúng râ matú htóng ²⁴ suwún lé hkunmó hkyô tô akô. Htóng suwún hpó gi, haù sù é hkunmó lé wó jáng, yhangnhik lé hkyî kyum hut luí, htóng mâ é, je ahtê gok má lhûng tô ri.

Htóng Suwún Hpó Hkyi Yù Huí É Hkyô

²⁵ Nghut kôlhâng, gunggàm yoq lé, Poluq eq Sila nhik gi, kyûdung luí, Garai Gasang lé mahkôn hkya-ôn nyì kô é hkûn, htóng byù góbang gi, yhangnhik é htê lé chôm gyô nyi bum ²⁶ akô. Haù hkûn, byodàn ratung layàng mó nún lô mù htóng yhûm gón le nún lô luí, hkum pé banshoq le radá dâm bóng hà lo bum ri; dum nghut jáng, yuq hkangmó mâ é toqjâng tui pé le gyut gyó byuq bê nghut ri. ²⁷ Htóng suwún hpó gi, yhup bûn lò mù, htóng hkum pé bóng hà tô bum é lé myang kat jáng, htóng byu pé ban hpang byuq bùm bekô râ nghut lhê ga myit yù luí, shâm shê mù, yhânggùng ²⁸ yhang sat shí râ dâ ri. Nghut kôlhâng, Poluq gi, “Ê, náng gûng yhang nàng haù su hkâkut, ngamoq banshoq shí má nyi tô lhê.” ga luí, htê mó èq wut garu taí kat ri. ²⁹ Haù hkûn, yhang gi, duq é myibung lé dûng yù mù, ahkaù shut din wang ló luí, Poluq eq Sila nhik é hí má gyuq ³⁰ nán é eq ngóm gop tô ri. Hau htâng, yhang gi, yhangnhik lé shuí htoq yù luí, “Sarâ nhik ê, ngò hkyi yu é hui râ matú, haí kut ra râ lhú?” ga myi kat ri. ³¹ Haù hkûn, yhangnhik gi, “Yhumsîng Yesuq lé lumjîng jáng, nàng eq náng yhumbyù lhunglhâng bang hkyi yu é hui râ nghut lhê.” ga taí

³² akô. Hau htâng, yhangnhik gi, haú htóng suwún hpó eq yhâng yhumbyù lunglhang lé, Yhumsing é mungdang hko kyô akô. Haú myîn haú u lé yhang, htóng suwún hpó gi, yhangnhik lé shuí ê mù, yhangnhik é dàm pé lé tsing chí pyám byi luí, haú htâng, yhang eq yhâng yhumbyù banshoq bang wui-myhup hkâm yù bekô nghut ri. Hau htâng, yhang gi, yhangnhik lé, yhâng é yhúmhkaú má shuí wang ló mù, zoshuq hkaq byi ri. Yhang eq yhâng yhumbyù banshoq bang gi, Garai Gasang lé wó lumjínq bekô nghut é yanmai, gyai gabú nyi bum akô nghut ri.

Haq Nhang Pyám Râ Lé A Đông É Hkyô

³⁵ Ahkuí, maubó jáng, tarâ agyì wui gi, “Haú nhik lé nhang pyám aq.” ga, htóng suwún hpô chyáng pyata pé lé ³⁶ taí nhang kat akô. Haú hkún, htóng suwún hpó gi, “Nungnhik lé nhang pyám aq ga, tarâ agyì wui mai byù nhang kat ri; haú mù, ahkuí, nungnhik gi, ngón za htoq ló lo keq.” ga luí, Poluq lé taí ri. ³⁷ Poluq kúm gi, “Nga-nhik gi, Romaq mingdán byù sheq ru nghut le wa, myí gôn wú é hkyô le a bo é, byu pé hí má ngá-nhik lé nhuq bat mù, htóng má hkyô kat kôluí nhing, ahkuí tsik za haq nhang pyám râ dâ akô nhung lhi? A wó dut, yhangmoq yhang sheq lé shuí htoq yú kó sháng gaq.” ga luí, yhangmoq lé tû taí kat ri. ³⁸ Pyata pé gi, tarâ agyì wui lé dang haú pé ló taí kyo kôjáng, tarâ agyì wui gi, Poluq eq Sila nhik Romaq mingdán byù nghut é hkyô lé wó ³⁹ gyo kôjáng, gyô gyuq kôluí, yhangmoq yhang, yhangnhik chyáng lé mù, tôngbán luí, shuí htoq yú mù, wà haú mai htoq ló byuq râ matú chôm dúng

⁴⁰ akô. Haú mù, Poluq eq Sila nhik gi, htóng mai htoq ló é htâng, Ludia é yhúm má wang ló akô; haú má, gumang wui eq le hui kômù, yhangmoq lé wum-o byi luí, htoq ló bekô nghut ri.

Htesaloni Wà Mó Má Mungdang Hko Kyô É Hkyô

17 Hau htâng, yhangmoq gi, Amhipipoli wà mó eq Apolon wà mó mai sô lai ló mù, Htesaloni wà mó má jé akô. Haú wà má gi, Yudaq ² byu pé é tarajong ralhumm joq ri. Poluq gi, yhang lhaq kut nyi é eq rajung za, tarajong má wàng luí, Bánno buinyi sum nyí yhang, Chyúmdang má bo é eq séng mù, yhangmoq eq chôm ³ ming lhum uchyang, Hkrisduq wuihke jamjau hui mù, shí bê mai dum dui toq lô râ hkyô lé taí hkoq san kyo luí, “Nungmoq lé, ngò hko kyô nyi é haú Yesuq gi, Hkrisduq nghut lhê.” ga ⁴ taí ri. Yudaq byu pé má é ra-am gi, gyô jing kômù, Poluq eq Sila nhik chyáng lé xoq yu akô; haú eq rajung za, Garai Gasang lé hkunggâ é Grik pé myo myo eq, ahkyak é myiwe wui tsómra myo shoq le, gyô jing kômù, lé xoq yu akô. ⁵ Nghut kôlhang, a gyô jing é Yudaq byu pé gi, manôn kôluí, gai má é byùgang jùm ra-am lé lung yù mù, byù moq mó tsing yù luí, rawa é shuí gabyong kômù, shiwa byu pé é hí má Poluq eq Sila nhik lé wó shuí htoq shit shoq ga, Yason é yhúm má htím ⁶ e ló akô. Nghut kôlhang, yhangnhik lé a myàng kôjáng, yhangmoq gi, Yason eq gumang wui ra-am lé, yhangmoq é wà suwún wui chyáng láng she ê kômù, “Mingkan gón lé atau ahú kut é byù shí nhik, ahkuí shí má jé jáng, Yason gi, yhâng é yhúm má

- ⁷ lhom hkûlum yu ri. Yhangmoq lung-
lhang bang gi, Yesuq gâ é hkohkâm
góyuq nyi lâ ga kôluí, hkoséng Ke-
hta q é tarâ lé lhoq shai é dông kut é
bang nghut akô.” ga taí garú bum akô.
⁸ Shiwa byu pé eq wà suwún wuí gi,
dang haú lé wó gyo kôjáng, myit wui
⁹ myit hke dut nyi bum akô. Hau htâng,
yhangmoq gi, manghkáng a lhoq htoq
râ matú Yason eq góbang lé danggidiq
zè byi nhâng mù, nhang pyám bekô
nghut ri.

**Beria Wà Mó Bang, Mungdang
Lé Lhom Yu É Hkyô**

- ¹⁰ Haú myín jáng yhang, gumang wui
gi, Poluq eq Sila nhik lé Beria wà mó
shut nhang kat akô; yhangnhik gi, haú
wà má jé jáng, Yudaq byu pé é tara-
¹¹ jong má wang ló akô nghut ri. Haú
Beria wà mó byu pé gi, Htesaloni wà
mó byu pé htoq má je riyhang nhik bo
bum akô; haú mù, danglù haú lé gyai
ô nau é myit èq hap yù mù, danglù shí
teng a têng é hkyô lé wó sé shoq ga,
nyí wuí Chyúmdang lé chôm nghap
¹² wú nyi akô nghut ri. Haú mù luí, Yu-
daq byu pé myo myo gi, lumjínq bum
akô, haú eq rajung za, aróng wó é Grik
myiwe wui eq yuqgè wui myo myo le,
lumjínq bûm bekô nghut ri.
¹³ Poluq gi, Beria wà mó má le, Ga-
rai Gasâng é mungdang hko kyô nyi
é hkyô lé, Htesaloni wà mó mâ é Yu-
daq byu pé sé kôjáng, yhangmoq gi,
haú má lé kômù, wà byù wui lé mhoq
¹⁴ hpyoq luí, gabyông lò nhang akô. Haú
hkûn, gumang wui gi, Poluq lé wui-
mau yàm jé shoq, radá dâm dé kat
akô; nghut kôlhang, Sila eq Timohti
nhik gi, Beria wà mó má nyi gyó tò

- ¹⁵ akô nghut ri. Poluq lé châng dé é bang
gi, Ahten myuq jé shoq lé dé to kômù,
Sila eq Timohti nhik lé hân hân châng
ló râ matú pying kat é dang lé wun
chûng mù, dum taú lò bekô nghut ri.

**Poluq, Ahten Myuq
Má Nyi É U Lhê Hkyô**

- ¹⁶ Ahkuí, Poluq gi, Ahten myuq má
haú nhik lé lánq nyi tô é u lé, haú
wà má rawa é hparà lhô baú dut tô
é lé myàng mù luí, yhang i-myyit gyai
¹⁷ yhang a ngón dut byuq ri. Hau é yan-
mai, yhang gi, tarajong pé má Yu-
daq byu pé eq Garai Gasang lé gyuq
hkunggâ é Grik pé eq le, gai pé má
hui mihui bang eq le, nyí wuí taí sân
¹⁸ kyô lhûm nyi akô nghut ri. Haú mù
luí, Epikuri hpaqchyí eq Sto-i hpaq-
chyí^a lé sê é, myit wú hpaqchyí bo
é bang ra-am gi, yhang eq dang chyin
chyin lhûm akô; haú hkûn, yhang gi,
Yesuq é hkyô eq dum dui toq hkyo
é gabú danglù lé hko kyô é yanmai,
ra-am gi, “Byù pyok shí yuq gi, haí
wá taí nyi lhê lhú?” ga; ra-am gi,
“Góming hparà pé é hkyô lé taí kyo
sû nghut sam ri.” ga, taí bum akô
¹⁹ nghut ri. Hau htâng, yhangmoq gi,
Aripagu gâ é byìn tú wap shut Po-
luq lé shuí doq ló mù, “Nang mhoq-
shit é hkyô asik, ngamoq lé sé nhang
²⁰ le a gè lhú? Nang èq taí é maú nhô
za gâ é hkyô lé ngamoq wó gyô ri;
haú é dang kyíng lé ngamoq sé nau
²¹ ri.” ga taí bum akô. (Ahten byu pé eq
haú má nyi é góming byu pé lung-
lhang bang gi, dang sik lù sik haú
lé taí kún gyô kún mù, yhangmoq
é ahkyíng lé lhoq pán nyi bum akô
nghut ri.)

^a 17:18 *Epikuri hpaqchyí* gi, htang pyat a joq, ahkuí ngón yú râ za ahkyak gâ é nghut lhê. *Sto-i hpaqchyí* gi, haí wá dut kôlhang i-myyit zim za kut mù, htang pyat matú chiq a ra gâ é nghut lhê.

**Poluq, Aripagu Zuphpong
Má Mungdang Hko É Hkyô**

- ²² Haú u lé, Poluq gi, Aripagu zuphpong má toq yap mù, “Ahten byu pé ê, nungmoq gi, hkyô hkat hkangmó má hparà lhô pé lé gyai yang dat gyuq hkungga kô é lé, ngò myang ri.
- ²³ Hkâsu mù gà le, ngò sô lhing wún mù nungmoq jaú é ze pé lé rago wú wú lé, ‘A sê é Garaí matú.’, ga luí, kâ tô é hkungga gyap ralhú lé myang záng ri; haú nungmoq a sê é za jaú nyi é Garaí hkyô lé, ngò, nungmoq lé hkaí kyo kôlé.
- ²⁴ Myidàm htoq eq haú má joq mijoq lé hpan tô é Garai Gasang gi, mauhkûng eq myigùng é Yhumsîng le nghut lhê mù luí, byu loq èq saí é noqkuq yhûm má nyi râ a nghut.
- ²⁵ Yhang gi, byù lunglhang bang lé asak, soq, ra mira gumjup shoq byí to sù nghut nyi é yanmai, rajung jung râ é sù lé su, byu loq èq dojaú râ
- ²⁶ sù a nghut. Yhang gi, gunchyung rayuq mai za byuhú chângjup myô lò nhâng mù, myidàm htoq jàm shoq má nyi nhâng luí, yhangmoq é matú hí hí mai ahkyíng yam-yoq eq nyi râ jowò
- ²⁷ masat to byi bê nghut ri. Yhang gi, nga-nhúng yuq hkangmó eq a we to kôle, byu pé yang lé châng hô mù, myang hô kó sháng gaq ga shí hkyô lé
- ²⁸ kut é nghut ri. Hkâsu mù gà le, nungmoq é jihkyang kat bang, ‘Nga-nhúng le yhâng é awut ashín pé nghut nyi lhê.’ ga taí tô bum é eq rajung za, nga-nhúng gi, Yhang é yanmai wó nyí, wó dui é eq ísu wó dut é nghut lhê.
- ²⁹ Haú mù, nga-nhúng gi, Garai Gasâng é yangzô pé nghut nyi é yanmai, Garaí gùng gi, byu é hpaqchyí loq èq kyûng kâ tô é hîng, ngùn, luqgok pé eq pûng lhê nghú luí hkâ-myít
- ³⁰ yù kó. Láí lò bê haú myoq a bóng shi

- é pyat lé, Garai Gasang gi, haí le a ga lhaí pyâm to kôlhang, ahkuí gi, jowò hkangmó mâ é byù lunglhang bang lé, myít lhîng keq ga hkunmó hkyô to
- ³¹ bê nghut ri. Hkâsu mù gà le, Yhang hkyin to sù mai mingkan gón lé tara é dông jéyáng râ buinyi ra-nyí masat to bê nghut ri. Shí hkyô lé, byù lunglhang bâng é hí má wó lum é saksé dut sháng gaq ga, Yhang haú yuq lé shi é mai lhoq dui toq yù bê nghut ri.” ga taí ri.
- ³² Shí é mai dum dui toq lo é hkyô lé wó gyô bùm kôjáng, ra-am gi, taí hpoí pyám byí akô; ra-am kúm gi, “Nàng shí hkyô taí é lé ngamoq dum gyô
- ³³ wú nau ashí.” ga taí akô. Hau htâng, Poluq gi, haú zuphpong mai htoq ló
- ³⁴ byuq bê nghut ri. Nghut kôlhang, byù ra-am gi, Poluq é htâng cháng kômù, lumjîng bang dut bekô nghut ri. Haú bang má, Aripagu zuphpong má bo é Dionisi ga sù le bo ri. Hau htoq agó, Damari gà é myiwe rayuq eq gotú byu pé le, bo bum akô nghut ri.

**Poluq, Korinhtuq Myuq
Má Nyi É U Lhê Hkyô**

- 18** Hau htâng má, Poluq gi, Ahten myuq mai htoq luí, Korinhtuq
- ² myuq má jé lo ri. Haú má, yang gi, Romaq myuq mai Yudaq byù lunglhang bang htoq ló byuq râ dut lhê ga, hkohkâm Klodi èq hkunmó hkyô é yanmai, a myáng shi lé Itali ming mai yangmyi Priskila eq htoq jé lo é, Pontuq mau byù nghut é, Akula gà é Yudaq byù rayuq lé hui luí, yang-
- ³ nhik chyáng ê ri. Yhangmoq gi, jonghpang saí zo bang chyat nghut kô é yanmai, muzó pûng kôluí, Poluq gi, yangnhik eq rahá nyi nyi mù, muzó
- ⁴ chôm saí akô. Bánno buinyi hkangmó, Poluq gi, tarajong má Yudaq byù eq,

- Grik pé lé, taí sâñ kyo luí, lhoq pun lhoq kyíng yu ri.
- ⁵ Ahkuí, Sila eq Timohti nhik Make-doni mau mai châng jé jáng, Poluq gi, mungdang hkô hkyô má za wum kat luí, haú Yesuq gi, Hkrisduq yhang nghut lhê ga, Yudaq byu pé lé saksé
- ⁶ hkâm kyô ri. Nghut kôlhâng, Yudaq byu pé gi, lhom he-ngik pyám kômù, yhang lé rhoí dang taí pyâm akô; haú mù, Poluq gi, yhâng mebu ko shit é dông yhangmoq lé a nau é hkyô tûñ shit uchyang, “Nungmoq é sui mara gi, nungmoq é ulhum má jé sháng gaq, ngò eq haí a séng lo; ahkuí mai, ngò gi, tûngbaù pê chyáng e ló berâ nghut lhê.” ga luí, yhangmoq lé taí ri.
- ⁷ Hau htâng, yhang gi, tarajong mai htoq luí, jong haú eq yhep nghut é, Garai Gasang lé noqkuq é Titu Yustu
- ⁸ ga su é yhûm má wang ló ri. Krispu gâ é tarajong má up sù gi, yhâng yhum-byù lhunglhâng bang eq rahá, Yhum-sing lé lumjíng akô. Korinhtuq myuq byu pé myo myo le, Poluq é dang lé gyô yù mù, lumjíng luí, wui-myhup hkâm yu bum akô nghut ri.
- ⁹ Ra-myìn lé, shing-rán ralhum má Yhumsíng mai Poluq lé taí é gi, “Hkâ-gyuq, taí aq, zim za hkâ-nyí. Ngò nàng eq rahá nghut nyi lhê, nàng lé ó yuq èq le haí wó kut râ a nghut, hkâsu mù gâ le, myuq shí má, ngá é byù myo myo
- ¹¹ nyi bum lhê.” gâ ri. Haú mù luí, Poluq gi, Garai Gasâng é mungdang mhoq-shit uchyang, razàn eq lhamó hkyuq hkyap yhang, haú myuq má nyi nyi ri.
- ¹² Galio ga sù, Ahkaia mau mâ é gin-wáng zau kut nyi é u lé, Yudaq byu pé gi, myit rahkat zâ èq Poluq lé chôm chyup yù kôluí, tarâ hpyit wap má she
- ¹³ háng kômù, “Byù shí yuq gi, jep é tarâ eq shai lhûm é dông, Garai Gasang lé noqkuq râ matú, byu pé lé mhoq hpyoq wún ri.” ga mara hûñ akô.
- ¹⁴ Haú hkûñ, Poluq tû taí râ dâ lò jáng, Galio gi, Yudaq byu pé lé, “Yudaq byu pé ê, muzó shí gi, tarâ lu laí é muzó, haú a nghut jáng, agè ashop é muzó mai, dut lo é nghut le gi, nungmoq lé
- ¹⁵ ngò gyo byi râ hkyô joq lhê. Nghut kôlhâng, muzó shí gi, nungmoq é tarâ eq séng luí, dang eq séng luí, myíng eq séng luí, taí lhum kô é hkyô nghut é yanmai, nungmoq yhang ru ló hpyit lhum keq. Haú sù é muzó má, ngò gi, tarâ agyí kut byi râ a nghut.” ga taí
- ¹⁶ mù, tarâ hpyit wap mai yhangmoq lé
- ¹⁷ hkat htoq pyám nhang ri. Haú hkûñ, yhangmoq lhunglhâng bang gi, tarajong má up sù Sositeni lé chyup yù mù, tarâ hpyit wap hí má chôm bat akô. Galio kúm gi, haú hkyô lé hai gùn a kut byi nghut ri.

**Poluq, Antioku Wà Mó Má
Dum Taú Jé É hkyô**

- ¹⁸ Poluq gi, Korinhtuq myuq má bui-nyí tsómra myáng shoq lumjíng bang eq nyi nyi ri. Hau htâng, yhang gi, haú bang lé shi-kyâm to luí, Priskila eq Akula nhik lé byinzùm kut mù, lhaí ji luí Suriq mau shut e ló akô. Hau hí má, yhang gi, danggidíq tô tô é yanmai, Kenhkrea wà má xâm nyhâm
- ¹⁹ pyâm ri.^a Yhangmoq Ehpesu myuq má jé kô é hkûñ, Poluq gi, Priskila eq Akula nhik lé nyhi pyâm to luí, yhang baú tarajong má wàng mù, Yudaq byu
- ²⁰ pé lé taí sâñ kyo byí ri. Haú mâ é bang gi, yhangmoq eq rahá rayoq zo nyi shi râ dông yhang lé dung kô é nghut kô-

^a 18:18 Xâm nyhâm pyâm é gi, Yudaq htûng dông rajung jung kut râ matú danggidíq to luí, haú lé ban kut jáng, yhumsing xâm lé nyhâm pyâm é nghut lhê.

- ²¹ lhang, yhang gi, a nô lo nghut ri. Haú mù, yhang gi, Ehpesu myuq mai lhaí ji mù htoq ló uchyang, “Garai Gasang ô nau é hkyô nghut le gi, ngò nungmoq chyáng dum jé lé râ nghut lhê.” ga, yhangmoq lé danggidiq byí tô ri.
- ²² Ahkuí, Poluq gi, Kesare wà mó má ló jé dap jáng, Yerusalem wà mó shut doq ló mù, noqkuq hpúng lé ló huí tô é htâng, Antioku wà mó má dum gyó ló ri.
- ²³ Yhang gi, haú wà má rayoq zo nyi é htâng, htoq ló mù, Galatiq mau eq Hprugi mau mai sô lai ló uchyang, rawa htâng rawà mà é chángzô pé lé wum-o lhoq ging byí ri.

Apolo Zui Saí É Muzó

- ²⁴ Ahkuí, Alesandru myuq byù nghut é sù, Apolo gâ é Yudaq byù rayuq gi, Ehpesu myuq má jé lé ri. Yhang gi, hpaqchyí bò sù nghut é htoq agó, Chyúmdang le gyai kúng é sù nghut ri.
- ²⁵ Yhang gi, Yohan é baptisma hkyô lé za sé sù nghut kôlháng, Yhumsing é hkyô lé mhoq yú bê nghut luí, Yesuq é hkyô pé lé mhoq yu to bê eq rajung za wum zuq tung ga luí, hkyak
- ²⁶ hkyak mhoqshit byí ri. Ahkuí, yhang gi, gyuq kyúm myit a bo é za tarajong má taí hi ló ri. Haú hkûn, Priskila eq Akula nhik gi, haú lé wó gyo kôjáng, yhang lé ji yù mù, Garai Gasâng é mungdang hkyô lé azó tung taí sân kyo byí akò nghut ri.
- ²⁷ Apolo gi, Ahkaia mau shut dap e ló nau é hkûn, gumang wui gi, yhang lé wum saí byi mù, yhang lé lhom hkûlum yù râ matú, chángzô pé chyáng laiká ká byí kat akò; yhang gi, jé jáng, Garai Gasâng jeju mai lumjúng bê bang lé, gyai yhang wó garúm
- ²⁸ sù dut bê nghut ri. Hkâsu mù gâ le, yhang mai, Yesuq gi, Hkrisduq yhang

nghut nyi ri ga luí Chyúmdang má tân shit uchyang, byu pê hí má Yudaq byu pé lé, wum kat wó taí ung pyâm é yan-mai nghut ri.

Poluq, Ehpesu Myuq

Má Nyi U Lhê Hkyô

- 19** Ahkuí, Apolo gi, Korinhtuq myuq má nyi tô é hkûn, Poluq gi, mau káng mai sô lai ló mù, Ehpesu myuq má jé ri. Haú má, yhang gi,
- ² chángzô pé ra-am eq hui luí, yhangmoq lé, “Nungmoq gi, lumjúng é hkûn, Chyoiyúng Woi-nyí lé, wó yú bekò lhú?” ga myí ri.
- Haú hkûn, yhangmoq gi, “Chyoiyúng Woi-nyí nyi lhê gâ é lháng, nga-moq a wó gyô wú.” ga tú taí akò.
- ³ Haú mù, Poluq gi, “Haú nghut jáng, nungmoq gi, haí jung baptisma hkam yú kô é lhú?” ga luí, yhangmoq lé myi jáng, yhangmoq gi, “Yohan é baptisma hkam yu é nghut lhê.” ga tú taí akò.
- ⁴ Haú hkûn, Poluq gi, “Yohan é baptisma nghu é gi, myit lhíng mù wui-myhup hkâm yu é hkyô lé gâ lhê. Yohan gi, yhang é htâng má jé lé râ sù, haú Yesuq lé sheq lumjúng râ lhê ga shiwa byu pé lé taí ri.” ga taí ri.
- ⁵ Yhangmoq gi, dang haú lé wó gyo kôjáng, Yesuq é myíng lang luí baptisma byí é lé, hkam yu bum akò.
- ⁶ Poluq gi, yhangmoq é htoq má loq ke byi jáng, haú Chyoiyúng Woi-nyí gi, yhangmoq htoq má jé lé mù, yhangmoq gi, laklaí dang nyo lo é htoq agó
- ⁷ myiqhtoi le htoí lo bum akò. Haú bang lhunglháng gi, yuqgè raxe í yuq kó nghut ri.
- ⁸ Hau htâng, Poluq gi, tarajong má wàng luí, gyuq kyúm myit a bo é za lhamó sum hkyap Garai Gasâng é mingdán hkyô lé taí sân kyo mù,

⁹ lhoq pun lhoq kyîng yu ri. Nghut kô-lhang, ra-am gi, myit htan lo bùm kôluí a kâm lumjîng kô é htoq agó, haû Yhumsing é Hkyô lé byu pê hí má lhoq hpoí pyám byi kôjáng, Poluq gi, yhangmoq chyáng mai htoq luí, chángzô pé lé shuí chûng mù, Turanu gá su é hpaqchyí mhoq jong má, nyí

¹⁰ wuí taí sâh kyô lhûm nyi akô. Haû su kut í zân yhang mhoqshit nyi é yan-mai, Asia mau gón mâ é Yudaq byu pé eq Grik pé lhunglhâng bang gi, Yhumsing é mungdang lé wó gyô yu bum akô nghut ri.

Skewa É Yhangzo Nyhit Yuq É Hkyô

¹¹ Garai Gasang gi, Poluq é loq dông

¹² laklaí kumlhá kut ri. Haû mù, Poluq chyáng mâ é hpajet eq hpyihit rajung jung lé, nò bâng chyáng yu ló mù, ló záng byi jáng lháng, yhangmoq é nò-hpyo ge ló byuq é eq, agè ashop é nat pé lé yhangmoq chyáng mai htoq ló byuq bum akô.

¹³ Haû u lé, nat hkat htoq wun é Yudaq byu pé ra-am gi, agè ashop é nat pé lé, “Poluq hko taí é Yesuq é myîng mai, ngò, nungmoq lé hkat htoq lhê.” ga, agè ashop é nat wang júng to bâng é ahtoq má, Yhumsing Yesuq é myîng

¹⁴ lé lang luí, hkat chyam wú akô. Skewa gâ é, Yudaq hkyangjong agyí rayuq é yuqzo nyhit yuq le haû su kut wun

¹⁵ akô. Ra-nyí lé, agè ashop é nat gi, yhangmoq lé, “Yesuq lé ngò sê lhê; Poluq é hkyô lé le ngò sê lhê; nghut kô-lhang, nungmoq gi, ó pé nghut akô?”

¹⁶ ga tû taí mù, agè ashop é nat haû wang júng é byù gi, yhangmoq htoq má byam doq jî to luí, nhuq bat yû mù yhangmoq lé ung pyâm ri. Yhangmoq gi, yhûm haû mai gùngchîn sui nê yang yang hpanq htoq ló bekô nghut ri.

¹⁷ Haû hkyô lé, Ehpesu myuq má nyi é Yudaq byu pé eq Grik pé sé kôjáng, yhangmoq lhunglhâng bang gi, chòm gyô gyuq bum akô. Yhumsing Yesuq é myîng gi, hkyá-on lhoq toq é hui bê

¹⁸ nghut ri. Lumjîng bê bang myo myo gi, lé mù, yhumsing kut shut é agè ashop hkyô lé, myo myô hí má yín yu

¹⁹ akô. Myoqheq hpaqchyí kut zô é bang le, yhangmoq é laiká lé yu lé kôluí, shiwa byu pê hí má nyhê hkyô pyâm akô. Mausau haû pê é ahpaú lé sôn wú

²⁰ le, ngùn chap ngo mun záng ri. Haû dông mai, haû Yhumsing é mungdang gi, ko lam lò mù, wum-o a-tsam je bo lò bê nghut ri.

Ehpesu Myuq Má Gabyông É Hkyô

²¹ Shí pé ban dut lai htâng má, Poluq gi, Makedoni mau eq Ahkaia mau dông sô lai ló mù, Yerusalem wà mó má ló jé râ ga myit hpyit yû luí, “Haû má ló jé tô é htâng má, ngò, Romaq myuq má le, jé wú râ dut ashí.” ga

²² taí ri. Haû mù, yhang lé htuqbang garúm é Timohti eq Erastu nhik lé hí Makedoni mau shut nhang kat luí, yhang gi, Asia mau má rayoq rabun zo nyi gyó tô ri.

²³ Haû yoq lé, haû Yhumsing é Hkyô yanmai gyai yhang gabyông lo bum

²⁴ akô. Demetri gâ é ngùn bat zo sù rayuq gi, Artemi hpara é ngùn yhûm zòng zo saí luí, mú saí luzúm wuí lé

²⁵ wó sùt nhang nyi ri. Yhang gi, yhâng é ngùn bat zo luzúm wuí eq haû jung amû kut é góbang lé le ji tsîng to mù, taí é gi, “Luzúm wuí ê, muzó shí lhûm é yanmai, nga-nhúng nyi ngón yuqyo

²⁶ nyi é hkyô lé, nungmoq sê lhê. Nghut kôle, ahkuí gi, Ehpesu myuq má za le a nghut lo, Asia mau lháng aluq jàm shoq, byu loq èq saí é zè lé, garaí pé a nghut ga, shí Poluq ga sù mai byù

myo myo lé mhoq hpyoq yû mù, hkyô shuí lhoq ngoq nyi é hkyô lé, nung-
²⁷ moq wó myâng, wó gyô nyi akô. Haû mù luí, nga-nhûng é muzó shí gi, hpoí byuq râ lé chiq râ é za a nghut, hparà myhí mó Artemi é noqkuq yhûm gi, haí a dut byuq luí, Asia mau gón eq mingkan gón mai noq é hparà myhí é shingkan hpoí byuq râ lé le myit chiq râ dut bê.” gâ ri.

²⁸ Yhangmoq gi, dang haû lé wó gyô bùm kôjáng, nhik mó gyô yo kôluí, “Ehpesu myuq byu pê é Artemi gi, kô nyi sháng gaq ô!” ga chôm garû bum
²⁹ akô. Hkâ-myháng a nghut má, rawa bang gabyông lò bekô. Shiwa byu pé gi, Poluq é byinzùm Makedoni byù Ge-u eq Aristakuq nhik lé chyup she yù mù, yhangmoq é poí wàng mó shut radá dâm chyín chyap wang ló bum
³⁰ akô. Poluq gi, moq hpúng hau hí má htoq shit naû kôlhang, chángzô pé gi, yhang lé a wàng nhâng kó nghut ri.
³¹ Poluq é luzúm wuí nghut é, haú mau mâ é suwún wuí ra-am lhang, yhang lé poí wàng hkaû má a ê râ matú, hkûm pyám nhang akô nghut ri.

³² Zîng tô é bang gi, hai hû háng le a sé lo dut byuq kômù luí, ra-am rajung ga garû bum akô. Myo mi-myo gi, haí mù luí yhangmoq haû má nyi tô é lé
³³ lhang a sê bùm kó nghut ri. Yudaq byu pé gi, Alesander lé hí má chôm chyûn htoq kat kôluí, shiwa hpong mai ra-am gi, yhang hká dông taí râ hkyô lé mhoq byi kat akô. Alesander le shiwa hpong lé taí san kyo naû luí,
³⁴ zim byuq râ matú loq tu ri. Nghut kô-lhang, Alesander, Yudaq byù nghut é lé sé kôjáng, yhangmoq lhunglhang bang gi, rahtê za kut kôluí, “Ehpesu myuq byu pê é Artemi gi, kô nyi sháng gaq ô!” ga hkyíng hkum í hkum kô garû bum akô.

³⁵ Haû, myuq chyare hpó gi, shiwa moq mó lé lhoq zim luí taí é gi, “Ehpesu myuq byu pé ê, Ehpesu myuq shí gi, Artemi myhí mó é noqkuq yhûm eq mauhkûng mai byit gyó lo é yhâng é alhô lé, wú zúng nyi é wà nghut é hkyô lé, mingkan má
³⁶ a sê é ó yuq wa nyi lhê lhú? Haû mù luí, shí hkyô pé gi, wó he pyâm jung a nghut é yanmai, zim za nyi le ge lhê, hân so hân dùn hkâkut ko.
³⁷ Shí nhik gi, noqkuq yhûm lé hpyoq zo su nhik le a nghut, nga-nhûng é hparà myhí lé lhoq hpoi su nhik le a nghut kô é le nhîng, nungmoq shuí
³⁸ lé bekô nghut ri. Demetri eq yhâng é ngùn bat zo luzúm wuí gi, rayuq yuq é ahtôq má mara hûn râ hkyô joq kô é nghut jáng, tarâ rûng pé hpông tô lhê. Tarâ agyí pé nyi lhê. Haú má yhangmoq ê kó sháng gaq.
³⁹ Nungmoq taí nau é gó hkyô rajung jung joq é nghut le kúm gi, tarâ wang zuphpong mó má chôm taí pyám râ
⁴⁰ nghut lhê. Hkû-nyí gabyông é mù shí má, mù htoq wang a bo é yanmai, nga-nhúng lé mara hûn râ chiq râ ri. Shí su kut chôm míng é hkyô lé, hai
⁴¹ é yanmai nghut lhê nghú, nga-nhúng a wó taí kyo nghut ri.” gâ ri. Shí pé ban taí é htâng má, yhang gi, shiwa moq mó lé lhoq pyo kat bê nghut ri.

Makedoni Mau Éq Grik Mau Đông Lai Ló É U Lhê Hkyô

20 Haû gabyông é hkyô zím byuq é htâng má, Poluq gi, chángzô pé lé ji yù luí, yhangmoq lé wum byi dang taí to mù, shi-kyâm to luí, Makedoni mau shut htoq e ló bê nghut ri.
² Yhang gi, haú mau mai sô lai ló uchyang, byu pé lé wum byí é dang myo myo taí luí, Grik mau má ló jé

- ³ bê. Yhang haû má lhamó sum hkyap nyi yù mù, lhaî ji luî Suriq mau shut ê râ hen nyi é hkûn, Yudaq byu pé gi, yhang lé gyám nyí kô é yanmai, yhang gi, Makedoni mau dông tau lò
- ⁴ râ lé myit hpyit bê nghut ri. Yhang eq rabyìn za châng é bang gi, Beria wà mó mâ é Purû yhangzo Sopata, Htesaloni wà mó mâ é Aristakuq eq Sekundu nhik, Derbe wà mó mâ é Ge-u, Timohti, Asia mau mâ é Tuhkiku eq
- ⁵ Trohpimu nhik pé nghut akô. Yhangmoq gi, hí so lánq luî, ngá-nhik lé Troa
- ⁶ myuq má ló lánq nyi akô. Nghut kô-lhang, ngá-nhik gi, Azuma Poî^a laî é htâng má, Hpilipi wà mó mai lhaî ji ló le, ngo nyí nghû jáng, Troa myuq má yhangmoq lé hui luî, haú má nyhit nyí chôm nyi é nghut lhê.

**Troa Wà Má, Utuhku Ga Sû
Lhoq Tui Toq Huî É Hkyô**

- ⁷ Rabat é sâng-hi nyí lé, ngamoq gi, muk hpê gàm râ matú lé chôm zup zîng tô é hkûn, Poluq gi, htang nyí ló byuq râ ga hen tô é yanmai, chángzô pé lé gunggàm jé shoq hko kyô nyi ri.
- ⁸ Ngamoq zup zîng nyi é haû ahtoq pyâm wap má, myibung myo myo le
- ⁹ duq tô ri. Poluq dang nyo hing nyi é u lé, Utuhku gâ é zorâm zo rayuq gi, hkohot hkum yâm má yhup mui zung tô ri. Haú yuq gi, yhupmó myi byuq luî, yhûm sum tsáng mai byit gyó mù, yhang lé bún toq wú le shi
- ¹⁰ byuq bê nghut ri. Haú hkûn, Poluq gi, gyó ló mù, po ngop to luî, “Hkâdân
- ¹¹ ko, yhang soq bo ashî.” ga taî ri. Haú mù, yhang gi, dum tau doq ló luî, muk lé hpé mù, zo luî, maubó shoq yhangmoq eq dang nyo kún mù htoq ló bê
- ¹² nghut ri. Zorâm zo haû lé duì gù shuí

ló kômù, nhik tîng é gyai yhang hui bekô nghut ri.

**Troa Wà Eq Melitu Wà
Gyoro Mâ É Hkyowuî**

- ¹³ Poluq gi, myî hkyô ló râ matú hen tô é yanmai, yhang lajang byí é eq rajung za, yhang lé Asu wà má lhaî lhom shuí ji râ matú, ngamoq gi, lhaî
- ¹⁴ ji mù hí ló lánq bê nghut lhê. Haú mù, yhang gi, Asu wà má ngamoq eq hui luî, ngamoq gi, yhang lé lhaî má shuí jî chûng mù, Mitulene myuq shut e
- ¹⁵ ló bê. Htang nyi, ngamoq gi, haû mai lhaî ji mù, Kiu zinlóng yâm mai laî ló luî, hau htang nyí gi, Samu zinlóng má laî dap ló luî, htang nyí gi, Melitu wà
- ¹⁶ mó má jé ló bê nghut lhê. Poluq gi, wó dut é nghut jáng, Penteko-ti buinyî lé Yerusalem wà mó má wó jé shoq gâ é yanmai, Asia mau má buinyî a kâm lhoq htum naù mù luî, Ehpesu myuq lé lhaî pyâm to râ matú, myit hpyit to bê nghut ri.

**Ehpesu Hpúng Suwún Wuî Lé,
Poluq Shi-kyâm Tô É Dang**

- ¹⁷ Poluq gi, Melitu wà mó mai Ehpesu shut byù nhang kat luî, hpúng su-
- ¹⁸ wún wuî lé ê jî nhang ri. Haú bang jé lé kôjáng, yhang yhangmoq lé taî é gi, “Ngò, Asia mau má sâng-hi jé é buinyî mai, nungmoq eq hkâsu kut
- ¹⁹ nyi nyi é ahkyíng banshoq lé le; Yudaq byu pé jeq hô luî, ngò wúihke jamjau hui zo kôlhang, haú Yhum-sing é muzó lé, ngò myit gyai lhoq nyhûm é eq ngaubyi ngaù nhap é
- ²⁰ èq wùn waq é hkyô lé le; nungmoq é matú akyû bo é hkyô banshoq lé, a myhit to loshoq taî é hkyô lé le; shiwa byu pé hí eq rayhûm

^a 20:6 Múnchi a bo é Muk zo Poî lé, Azuma Poî le gâ lhê.

htâng rayhûm má ngò nungmoq lé
²¹ mhoqshit é hkyô lé le; ngò gi, Yu-
 daq byu pé eq Grik pé lé, myit lêng
 mù Garai Gasâng chyáng lhing lò ra
 eq, nga-nhûng é Yhumsîng Yesuq lé
 lumjîng ra hkyô lé, saksé hkâm kyo
 lugù nghut bê lé le, nungmoq sê nyi
 akô.

²² Ahkuî, ngò gi, Woi-nyí má tuí tô é
 hui bê yanmai, Yerusalem wà mó má
 e ló lhê; haú má, ngò haí ló dut râ lé
²³ kúm gi, a sé nghut ri. Ngò gi, htóng
 eq wúhke jamjau hkyô ngo lé lánq
 tô ri ga, wà hkangmó má Chyoiyúng
 Woi-nyí èq lhoq pûn é hkyô lé za sê
²⁴ nyi lhê. Nghut kôlháng, ngò gi, ðìn râ
 hkyô ban ðìn râ eq, Garai Gasâng jeju
 eq sêng é gabú danglù lé saksé hkám
 râ matú, Yhumsîng Yesuq ngo lé byi
 tô é muzó lé ban wùn waq râ za nghut
 jáng, ngá asak lé ratsuí le a myit ha ló
 é nghut lhê.

²⁵ Garai Gasâng é mingdán hkyô lé
 hko kyô wún é hkûn, ngò eq huí é
 nungmoq lhunglhâng bang gi, htâng
 nùng má ngo lé a myàng lo kó râ
²⁶ nghut é lé, ahkuî ngò sê to bê. Haú
 mù luí, ó yuq nghut kôlháng, yubak
 mara má shi byuq ló é nghut le, haú
 yuq é sui chyín gi, ngò má a dap ló
 é hkyô lé, hkû-nyí, ngò saksé hkám
²⁷ tô lhê. Hkâsu mù gâ le, Garai Ga-
 sang ô nau é hkyô banshoq nung-
 moq lé hko kyo râ matú, ngò zaú
 tô é hkyô a joq wú é yanmai nghut
²⁸ lhê. Nungmoq gi, yhumsîng gùng lé
 le, nungmoq lé Chyoiyúng Woi-nyí èq
 up zúng nhang é sau hpúng^a lhung-
 lhang lé le, zúng nyí keq. Garai Ga-
 sang Yhâng suí èq wui tô é noqkuq
²⁹ hpúng lé le, rém zúng nyí keq. Ngò

ló byuq é htâng má, sau hpúng lé a
 shogyô é, ashop é wamhkui gi, nung-
 moq chyáng jé râ nghut é hkyô lé,
 ngò sê lhê. Hau htoq agó, chángzô pé
³⁰ lé wó mhoq hpyoq yû shoq ga, shut
 é ðông taí é byu pé lhang nungmoq
³¹ chyáng mai htoq lô râ nghut lhê. Haú
 mù luí, nungmoq yuq hkangmó lé,
 ngò sum zân tup ngaubyi ngau-nhap
 eq nyí myín a hkying loshoq, lhoq
 pun lhoq kyîng tô é dang pé lé, nung-
 moq gi, myit bun mù machya nyí
 keq.

³² Ahkuî, ngò gi, nungmoq lé, Garai
 Gasâng chyáng le, nungmoq lé wó
 lhoq ging lhoq tîng mù, lhoq chyoi-
 yúng é hui bê bang eq nungmoq lé silí
 wunlí wó byí é, Yhâng é jeju mung-
³³ dang má le, ap tô lhê. Ngò gi, ó yuq
 é hîng, ngùn, mebu pé lé le a myoq-
³⁴ noq wú. Ngá é loq shí í loq gi, ngò eq
 ngá htâng châng é bang ra châ é lé kut
 byi bê hkyô lé, nungmoq yhang sé gû
³⁵ nghut lhê. Ngò kut é muzó banshoq gi,
 nungmoq é alik dut bê nghut luí, shí
 su kut shikut é ðông mai, nga-nhúng
 gi, wum-o nyhóm bang lé htuq bang
 luí, ‘Lhom yu é htoq má byí é gi,
 je riyhang hkungsô wó nyi ri.’ ga luí,
 Yhumsîng Yesuq taí é dang lé bûn nyí
 sháng.” gâ ri.

³⁶ Poluq gi, haú su ga ban taí jáng,
 hkyihput htuq mù, yhangmoq lhung-
 lhang bang eq rahá za kyûdûng ri.
³⁷ Yhangmoq lhunglhâng bang gi, yhang
 lé po to luí, bopuq puq mù, chôm ngàu
³⁸ akô. Htâng nùng má, yhang lé dum
 myàng râ a nghut lo gâ é dang yan-
 mai, yhangmoq gi, je riyhang yón kuq
 bum akô. Yhang lé, lhaí má jé shoq lé
 châng dé kat akô nghut ri.

^a 20:28 Sau hpúng gâ é gi, lumjîng é bang lé gâ lhê.

Yerusalem Wà Mó Shut Doq

Ló Nyi É U Lhê Hkyô

21 Ngamoq gi, yhangmoq lé kang pyâm to luí, lhaí jî chûng mù, nyâng za Kusa zinlóng má jé é nghut lhê. Hau htang nyí gi, Rode zinlóng má jé mù, haú mai Patara wà má dum ² jé bê. Haú wâ má Hpinisi mau shut dap ló é lhaí lé, ngamoq myàng luí, ³ haú mai chôm jî chûng bê. Haú hkûn, ngamoq gi, Kupru zinlóng lé myàng jáng, hau é loqyo hkyam dông lai ló luí, Suriq mau shut e ló le, hpugá zê lé hkyó râ matú, Turuq myuq má nô ⁴ é nghut lhê. Haú wâ má, chángzô pé lé myang hô luí, yhangmoq chyáng nyhit nyí bíng yu é. Chángzo haú bang gi, Chyoiyúng Woi-nyí èq lhoq pûn é dông Poluq lé Yerusalem wà mó shut a ló râ matú, chôm hkûm ⁵ akô. Nghut kôlhang, nyhit nyí haú lai jáng, ngamoq gi, ngamoq é hkyowùì shut dum xoq sô htoq ló bê. Chángzô pé lhunglhang bang gi, yhangmoq é myi zo wùì eq rahá, ngamoq lé wà shinggan jé shoq châng dé kôluí, ngamoq gi, yhangmoq eq rahá wuiyàm má hkyihput htuq mù, kyû chôm dung ⁶ bê nghut lhê. Hau htâng, rayuq eq rayuq ban shi-kyâm lhum jáng, ngamoq gi, lhaí má wàng bê; yhangmoq gi, yhûm shut dum tau ló byuq bekô nghut ri.

⁷ Ngamoq gi, Turuq myuq mai lhaí jî chûng mù, Toleme wà má jé ló bê. Ngamoq gi, haú wâ má é gumang wùì lé shichyên yù mù, yhangmoq eq rahá ra-nyí chôm nyi kûn é nghut lhê.

⁸ Htang nyí gi, ngamoq haú wâ mai htoq ló mù, Kesare wà mó má dum jé bê. Haú wâ má, haú htuqluq htuqbang

nyhit yuq^a má bò sù, gabú danglù hko taí é Hpilip gá su é yhûm má, nga-
⁹ moq wang bíng bê nghut lhê. Yhang gi, yhang hku tô é byizo zomyi myiqhtoi myi yuq wó ri.

¹⁰ Ngamoq gi, haú yhûm má rayoq zo nyi é htâng má, Agabu gâ é myiqhtoi rayuq, Yuda mau mai jé lé ri. Yhang ¹¹ gi, ngamoq chyáng jé lé luí, Poluq é hpyihit lé yù mù, yhânggùng yhang loq eq hkyí pé má tui mù luí, taí é gi, “Shí hpyihit yhumsíng lé, Yerusalem wà mó má é Yudaq byu pé mai shí su kut lhom tui luí, tûngbau pé é loq má ap pyám kó râ nghut lhê;’ ga luí, Chyoiyúng Woi-nyí taí ri.” gâ ri.

¹² Dang haú lé wó gyo jáng, haú má é bang eq ngamoq gi, Poluq lé Yerusalem wà mó má a doq ló râ matú, gyai yhang chôm hkûm bê nghut lhê.

¹³ Nghut kôlhang, Poluq gi, “Nungmoq gi, haí mù luí ngaubyi ngau-nhap kut é eq, ngo lé myit wum gyui râ dông kut nyi akô lú? Ngò gi, Yhumsíng Yesuq é yanmai, Yerusalem wà mó má, tuí é hui râ za a nghut, shí hkâm râ matú le rì rì nghut lhê.” ga tú taí ¹⁴ pyâm ri. Yhang lé wó taí hkûm râ su a dut lo jáng, ngamoq gi, “Garai Gasang ô nau é dông nghut sháng gaq.” ngu luí, zim za chôm nyi bùm bê.

¹⁵ Hau htâng má, ngamoq gi, zè món chûng mù Yerusalem wà mó shut doq ¹⁶ ló bê nghut lhê. Kesare wà mó má é chángzô pé ra-am le, ngamoq eq rabyìn za nghut kôluí, yhangmoq gi, ngamoq lé Kupru byù Manason ga sù, hí hí lhê é chángzo rayuq é yhûm má shuí ló mù, yhâng chyáng bíng nhang akô.

^a 21:8 Lagyo 6:1-6

**Yerusalem Wà Mó Má,
Yakuq Lé Ê Huí É Hkyô**

- ¹⁷ Yerusalem wà mó má ngamoq jé é hkûn, gumang wuì gi, ngamoq lé gabú
- ¹⁸ tung lhom hkûlum yu akô. Htang nyí, Poluq eq ngamoq gi, Yakuq lé ê huí le, hpúng suwún wuì le zîng nyi to láng
- ¹⁹ akô. Poluq gi, yhangmoq eq ban shi-chyen jáng, yhang wùn waq laí lo é hpúng mú dông mai, Garai Gasâng èq tûngbaù pè chyáng kut byi bê hkyô pé lé, jihkúm nuqquq shit kyô ri.
- ²⁰ Yhangmoq gi, haú lé wó gyo kôjáng, Garai Gasang lé hkya-ôn akô. Hau htâng, Poluq lé taí kô é gi, “Âmang ê, Yudaq byu pé má lumjîng é bang hkâ-myhó hkyîng mun nghut bê lé, nàng sê lhê. Haú bang lhunglháng gi, jep é tarâ má myit zuq to bê
- ²¹ bang chyat nghut bum akô. Nghut kôlhang, yhangmoq lhunglhâng bang gi, tûngbaù pè chyáng nyó lúng tô é Yudaq byù banshoq bang lé, nàng, yhumsing yhangzo yhangshû pè é matú ahpyo-kuq hpyit a ra ngu é eq nga-nhûng é htûng tarâ lé châng nyi a ra nghû luí, Mosheq é tarâ lé tô pyám
- ²² râ dông mhoqshit ri gâ é dang lé, wó gyô yu bùm bekô nghut ri. Nàng jé bê hkyô lé, yhangmoq wó gyo berâ za nghut lhê. Ahkuí, ngamoq hkâsu
- ²³ kut lo râ lhú? Haú mù, ngamoq taí é dông kut aq, ngamoq chyáng dang-gidiq mó byi bê byù myi yuq nyi lhê.
- ²⁴ Nàng gi, haú bang lé ji yù mù, yhangmoq eq rahá lhoq san lhoq yúng yû aq, yhangmoq lé u wó wuq yù râ matú, ahpau le htoq byi aq. Haú hkûn sheq, byù lhunglhâng bang gi, yhangmoq wó gyô tô é hkyô a têng byuq é eq, nàng yhang lháng, jep é tarâ lé, châng kut nyi sù nghut é hkyô lé, sé kó râ
- ²⁵ nghut lhê. Lumjîng é tûngbaù pè é matú kúm gi, hparâ lhô pé lé tîng byi

é zoshuq, sui, lingzing mai myhik sat é dusak sho eq ashop é dông gungsho zùm yap é hkyô pé lé, yhangmoq koi pyám râ matú, ngamoq chôm doqdan luí, kâ hûn kat bê nghut lhê.” ga akô.

²⁶ Haú mù luí, Poluq gi, hau htang nyí haú bang lé ji yù luí, yhangmoq eq rahá, lhoq san lhoq yúng yû mù, noqkuq yhûm má wàng luí, yhangmoq yuq hkgangmó é matú hkungga wó byi shoq ga, yhangmoq é lhoq san lhoq yúng buinyi ngap bê hkyô lé, taí kyô ri.

Poluq Chyup Yû Huí É Hkyô

- ²⁷ Buinyi nyhit nyí haú ngap râ yàm má, Asia mau mâ é Yudaq byu pé ram gi, noqkuq yhûm má Poluq lé myàng kômù, shiwa byu pé lé shuí gabyong luí, yhang lé chyup yû mù, garû
- ²⁸ taí kô é dang gi, “Israelaq byu pé ê, garúm yû keq, shí yuq gi, nga-nhûng byuhú lé le, jep é tarâ lé le, jowò shí lé le, shut shai é dông jowò hkgangmó mâ é byù banshoq lé mhoqshit sù nghut ri. Hau htoq agó, noqkuq yhûm má Grik pé lé shuí háng é eq, chyoi-yúng jowò shí lé achayut kut é
- ²⁹ sù nghut ri.” gâ akô. (Hkâsu mù gâ le, yhangmoq gi, Ehpesu myuq byù Trohpimu ga sù eq Poluq wà hkaú má rahá nghut kô é lé, myàng kômù, haú yuq lé noqkuq yhûm shut shuí háng nhô ngam pyám kô é yanmai nghut ri.)
- ³⁰ Rawà gón gabyông lo mù, shiwa byu pé lhîngkyuq mai din lé lô kôluí, Poluq lé chyup zing to uchyang, noqkuq yhûm shinggan shut she hkyut htoq ló akô. Haú hkûn jáng, hkum pé
- ³¹ lé myhí pyâm akô nghut ri. Poluq lé yhangmoq sat râ dâ nyi kô é hkûn, Yerusalem wà gón gabyông nyi akô gâ é hkyô lé, Romaq dap up zaú é no má,

³² lò jé ri. Haû mù, yhang gi, radá dâm shô up gyezau ra-am eq gyezô pé lé shuí chûng mù, byù hpúng shut, din yán gyó ló akô. Yhangmoq gi, gyezau eq gyezô pé lé lhom myàng kôjáng, Poluq lé nhuq nyi é mai hkyîng byuq akô nghut ri.

³³ Haû hkûn, dap up zau hpó gi, Poluq chyáng é jé mù, yhang lé chyup yû luí, tojâng tui í hkat eq tuí to nhang ri; hau htâng, yhang ó yuq nghut é hkyô lé le, haí kut shut é hkyô lé le myí

³⁴ wú ri. Shiwa byu pé kúm gi, rayuq rajung ga garú bum akô. Haû mù, gyezau hpó gi, lúm garu kô é yanmai, têng é hkyô lé rago a wó sê yù jáng, Poluq lé gyewap má shuí ló nhang ri.

³⁵ Poluq gi, zumhtâng wang má jé lo é hkûn, byù moq mó lúm htim chyîn chyap lô kô é yanmai, gyezô pé gi,

³⁶ yhang lé waq doq ló akô. Shiwa byu pé gi, “Yhang lé sat pyám keq.” ga châng garú nyi akô nghut ri.

**Poluq, Yhumsing Gùng Mara A
Bo É Lé Taí Sân Kyô É Hkyô**

³⁷ Gyezô pé gi, Poluq lé gyewap má shuí wàng râ za nghut é hkûn, Poluq gi, dap up zau hpó lé, “Ngò nàng lé dang wó nyô râ lú?” ga myi jáng, dap up zau hpó gi, “Nàng, Grik myíng dat

³⁸ mu lûê lú? Nàng gi, hí hkûn gumlau kut mù, byù sat wún bang myi hkyîng lé, yoso shut shuí htoq ló é sù, Egotuq byú a nghut lú?” ga tau myí ri.

³⁹ Haû hkûn, Poluq gi, “Ngò gi, Kiliki mau Tarshu myuq mâ é Yudaq byú nghut lûê; ngò nyi é wà gi, wà chyap wà zo za a nghut, jeju mai, byù shí bang lé ngò dang táí râ ahkáng byi laq.” ga dúng ri.

⁴⁰ Gyedap up zau hpó ahkáng byi jáng, Poluq gi, zumhtâng má yap to mù, shiwa byu pé shut loq he ri. Haû hkûn,

yhangmoq lhunglhâng bang zim byuq kômù, Poluq, yhangmoq lé Hebre myíng dông taí é gi,

22 “Gumang wuì eq îwa pé ê, ahkuí, ngò mara a bò nghu taí é dang lé gyô wú shi keq.” gâ ri.

² Yhangmoq gi, yhang Hebre myíng dông taí é dang lé wó gyô bùm kôjáng, gyai yhang zím byuq bekô. Haû mù,

³ Poluq xoq taí é gi, “Ngò gi, Yudaq byú rayuq nghut lûê. Kiliki mau Tarshu myuq má choq hpyit kôlhang, wà mó shí má nyi kô lò sù nghut lûê. Ngò gi,

nga-nhûng îchyí îwa pé é jep é tarâ lé, Gamalelaq é loq má jihkúm nuqguq mhoq yû luí, hkû-nyí lûê é nungmoq lhunglhâng bang su, Garai Gasang lé

⁴ gyai myit zing zuq é sù nghut lûê. Ngò gi, shí Hkyô cháng bang lé shi é jé shoq, zing-rí wú é sù eq, myiwe yuqgè ó yuq lé nghut kôlhang, chyup yû mù

⁵ htóng má lhûng pyâm wú bê sù nghut lûê. Hkyangjong mó eq byìn tú wap suwún wuì lhunglhâng bang gi, ngá

é saksê pé nghut akô. Ngò gi, Damaskuq myuq má nyi é yhangmoq é Yudaq gumang wuì lé byi râ laiká yhangmoq chyáng mai wó yu chûng luí, haú mâ é bang lé le Yerusalem wà mó má dam byi râ matú, chyup tuí ló râ nghú, Damaskuq myuq shut e é nghut lûê.

⁶ Nyigûng tú zó lé, ngò Damaskuq myuq shut sô chyâng ló nyi é hkûn, maubó gi, ngá é lhîngkyuq má mauhkûng mai byodàn tung duqbó to bê

⁷ nghut ri. Haû mù, ngò myigùng má lêng gop tô le, wó gyô kat é dangtê gi, ‘Sholuq, Sholuq, nàng ngo lé haí mù zing-rí nyi lûê lú?’ gâ ri.

⁸ Ngò le, ‘Yhumsing ê, nàng ó nghut lûê lú?’ nghu myí kat jáng, ‘Ngò gi, nàng zing-rí wún é sù, Nazaret wà byú Yesuq nghut lûê.’ ga luí, Yhang tú taí

⁹ kat ri. Ngò eq rahá e ló é bang kúm gi,

- maubó lé myàng kôlhang, ngo lé taí é danghtë lé a sê gyo kó nghut ri.
- ¹⁰ Dum, ngò gi, ‘Yhumsîng ê, ngò haí kut ra râ lú?’ nghu myi jáng, haú Yhumsîng gi, ‘Toq mù, Dama-skuq myuq má wang ló aq, nàng kut râ matú wò byí tô é hkyô pé lhung-lháng, nang lé haú má lhom taí kyo berâ nghut lhê.’ ga ngo lé dum taí ri.
- ¹¹ Haú maubó é shingkâng é yanmai, ngò myoqjit byuq mù, ngá é byinzùm wui gi, Damaskuq myuq shut ngo lé loq mai she wang ló akô.
- ¹² Haú hkûn, Anani gâ é yuqgè rayuq ngá chyáng lé huí ri. Yhang gi, jep é tarâ lé gyuq hkunggâ é eq, haú má nyi é Yudaq byû lhunglhang bâng é hí má myoqdong gyai wó é sù nghut ri.
- ¹³ Yhang gi, ngá nâm má yap to luí, ‘Gumang Sholuq ê, náng myoq myàng aq hkoi!’ ga taí ri. Haú hkûn jáng yhang, yhang lé ngò wó myang kat bê nghut lhê.
- ¹⁴ Yhang dum xoq taí é gi, ‘Nga-nhûng íchyí íwa pê é Garai Gasang gi, nang lé, Yhang ô nau é hkyô sé sháng gaq ga luí le; Dingmán Sû lé wó myàng luí, Yhâng é nhut mâ é mung-dang lé wó gyo sháng gaq ga luí le,
- ¹⁵ hkyin to bê nghut ri. Haú mù, nàng gi, nàng myang é eq wó gyô yu é hkyô pé lé, byû lhunglhang bâng é hí má, Yhâng é matú saksé hkám byi râ
- ¹⁶ su dut râ nghut lhê. Ahkuí, nàng haí lé lánng nyi ashí lú? Toq aq, Yhâng é mying lé lang luí wui-myhup hkám yu é eq, náng é yubak mara pé lé chí sân pyám aq.’ gâ ri.
- ¹⁷ Hau htâng, ngò gi, Yerusalem wà mó má dum taú jé ló mù, noqkuq yhûm má kyû é dúng nyi le, moq byuq
- ¹⁸ ló mù, ‘Nàng, ngá é hkyô lé saksé hkám râ dang lé, yhangmoq a lhom hap yù kó râ nghut é yanmai, Yeru-

salem wà mó mai hân htoq ló aq.’ ga Yhumsîng ngo lé taí nyi é lé, myoq-wup shing-rán đông myang ri.

- ¹⁹ Haú mù, ngò gi, ‘Yhumsîng ê, tara-jong ralhûm htâng ralhûm má nang lé lumjîng bang lé, htóng má chyup lhung pyâm é eq, hkat bat lhing wún é
- ²⁰ hkyô lé, yhangmoq sê bum akô. Náng é saksé Stehpan sat hui luí suí shun u lé, ngò nâm má yhang yap to mù, haú hkyô lé myit bo hui luí, yhang lé sat pyám bâng é mebu lé zúng byí é nghut lhê.’ nghû tû taí bê.
- ²¹ Haú hkûn, Yhumsîng gi, ‘Ê aq, ngò, nang lé, wê gâng é tûngbau pè chyáng nhang kat râ.’ ga, ngo lé taí ri.” gâ ri.

**Poluq, Romaq Mingdán
Byû Nghut É Hkyô**

- ²² Shiwa byu pé gi, dang haú hkun jé za gyô yù kômù, “Shí sù é byû gi, myigùng htoq má nyi a gíng, sat pyám keq.” ga, htê mó èq garû bum akô.
- ²³ Yhangmoq gi, haú su garu uchyang, yhumsing buhîng lé hkyut dú pyâm lhê, hpuilhup lé mauhkung shut kyaq
- ²⁴ tâng lhê, kut nyí kôjáng, dap up zau hpó gi, Poluq lé gyewap má shuí hâng yù nhâng mù, yhang lé shiwa byu pé haí mù shí su ga garû bùm kô é hkyô lé wó sé shoq ga, nhuq bat nhâng luí,
- ²⁵ myí choq nhang ri. Nhuq bat râ matú shokuq tuí eq tui kôjáng, Poluq gi, nâm má yap tô é shô up gyezau lé, “Romaq mingdán byû ru nghut sù lé nhîng, lháng a jéyáng shimá, nung-moq nhuq bat le gi, tarâ wang akô lú?” ga taí ri.
- ²⁶ Rashô up gyezau gi, dang haú lé wó gyo jáng, dap up zaú chyáng ló mù, “Nàng haí kut râ dâ nyi lhê lú? Shí yuq gi, Romaq mingdán byû sheq ru nghut ri.” ga luí, yhang lé ló taí kyô ri.

²⁷ Haú mù, dap up zau gi, Poluq chyáng ê mù, “Nàng gi, Romaq mingdán byû nghut lhê lú? Taí kyô wú laq.” ga myí ri.

Poluq gi, “Ngò, Romaq mingdán byû nghut lhê.” ga tũ taí ri.

²⁸ Haú hkûn, dap up zau hpó gi, “Ngò lhang ahpau myo myo byí pyám luí sheq, Romaq mingdán byû ru wó dut é nghut lhê.” ga tũ taí jáng, Poluq gi, “Ngò kúm gi, Romaq mingdán byû dut gũ hku lé lo é sũ nghut lhê.” ga taí ri.

²⁹ Yhang lé myí choq wú râ gâ é bang gi, haú hkûn jáng, yhang chyáng mai huí zut ló bũm bekô. Gyedap up zau hpó le, Poluq gi, Romaq mingdán byû nghut é lé sé jáng, yhang lé tuí pyám bê nghut é yanmai, gyuq byuq bê nghut ri.

Yudaq Byìn Tú Wapdoq Suwún Wuí Gam Hkoq Byuq É Hkyô

³⁰ Htang nyí, dap up zau hpó gi, Yudaq byu pé mai Poluq lé hun é mara haí nghut é hkyô lé hkyak wó sé shoq ga, Poluq lé tuí hpyi pyám byi mù, hkyangjong agyi pé eq Yudaq byìn tú wapdoq suwún wuí lhunglhang lé ji tsing to luí, yhangmoq é gung gung má Poluq lé shuí wàng mù, shap to bê nghut ri.

23 Haú hkûn, Poluq gi, Yudaq byìn tú wapdoq suwún wuí lé wú tsuq to mù, “Ngá gumang wuí ê, ngò gi, hkû-nyí jé shoq Garai Gasâng é hí má sansêng é i-miyit èq asak dui ² nyí bê nghut lhê.” ga taí ri. Haú mù luí, hkyangjong mó Anani gi, Poluq nãm má yap to bang lé, yhang nhut ³ má bat byi keq gâ ri. Haú hkûn, Poluq gi, yhang lé, “But hpyu tô é xewâm^a

nàng ê, nàng lé sheq Garai Gasâng èq bat râ nghut lhê. Nàng gi, tarâ eq rajung za ngo lé jéyáng râ matú shí má zung to luí nhing, haí mù tarâ eq shut shai é dõng ngo lé bat nhang lhê lú?” ga taí ri.

⁴ Poluq nãm má yap tô é bang gi, yhang lé, “Nàng gi, Garai Gasâng é hkyangjong mó lé wám rhoi lhê lú?” ga luí, chõm taí akô.

⁵ Poluq gi, “Gumang wuí ê, yhang gi, hkyangjong mó nghut é lé ngò a sé pyám mù nghut bê. Chyúmdang má le, ‘Náng amyú lé up é sũ lé wó rhoi râ a nghut.’^b ga le kê tô é nghut lhê.” ga tũ taí ri.

⁶ Hau htang, haú zing tô é bang mâ é ra-am gi, Saduke pé, góbang gi, Hparishe pé nghut é lé, Poluq gi, sé jáng, Yudaq byìn tú wapdoq suwún wuí lé, “Gumang wuí ê, ngò gi, Hparishe awut ashín mâ é, Hparishe rayuq nghut lhê. Shí bê bang dum dui toq lô râ hkyô lé myit myoqbyù é yanmai, ngò jéyáng é huí nyi ri.” ga luí, garú ⁷ taí kat ri. Yhang haú su ga taí kat jáng, Hparishe pé eq Saduke pé gi, dang jet jet lhũm lò kômù, Yudaq byìn tú wapdoq hpong gi, gam hkoq ló byuq bekô ⁸ nghut ri. (Hkâsu mù gâ le, Saduke pé gi, dum dui toq hkyô a joq; maumang lagyo pé le, sobyo pé le, a nyí ga taí bum akô. Hparishe pé kúm gi, haú pé joq lhê ga, lumjing bang nghut akô.)

⁹ Haú mù luí, gyai yhang taí garú bum akô. Haú hkûn, Hparishe hpúng mâ é tarâ sará pé ra-am gi, toq mù, “Shí yuq chyáng hai mara le, ngamoq a myàng nghut ri. Sobyô a nghut jáng, maumang lagyo rayuq yuq, yhang lé dang taí bê nghut jáng gi, hkâsu ngũ kó râ lú?” ga luí, zuq zuq taí htng

^a 23:3 But hpyu tô é xewâm gâ é gi, gegùn labyoq kut bang lé gâ lhê. ^b 23:5 Htoq Ló 22:28

- ¹⁰ lhûm akô nghut ri. Haû su kut gyai yhang taí htîng lhûm lò kôjáng, dap up zau hpó gi, Poluq lé lêng myha pyám kó râ lé chiq é yanmai, yhangmoq chyáng gyó ê mù, Poluq lé haú bâng é gung gûng mai ê lú shuí lò luí, gyewap má shuí wang ló râ matú, gyezò pé lé nhang kat ri.
- ¹¹ Haú myîn, Yhumsîng gi, Poluq é nàm má yap to luí, “Hkâgyuq, Yerusalem wà mó má nàng ngá é hkyô lé saksé hkám bê eq rajung za, Romaq myuq má le saksé hkám ra shirâ nghut lhê.” ga, yhang lé taí ri.

Poluq Lé Sat Râ Haq Dâ É Hkyô

- ¹² Htâng napkyó, Yudaq byu pé gi, Poluq lé sat râ hpaqchyî chôm da kômù, yhang lé a wó sat sat gi, a zo a shuq râ nghut lhê ga, ó le ó dakam yu akô
- ¹³ nghut ri. Hpaqchyî shí lé chôm dâ é bang gi, myi xê yuq chyân nghut bum
- ¹⁴ akô. Yhangmoq gi, hkyangjong agyi pé eq suwún wui chyáng ê kômù, “Poluq lé a wó sat sat gi, ngamoq haí le a zo nghû, chôm dakam yu to bê
- ¹⁵ nghut lhê. Hau é yanmai, ahkuí nungmoq gi, Yudaq byìn tú wapdoq suwún wuí eq rahá kut luí, Poluq é hkyô lé rago za myí gon wú râ nghu mhaú é dông, yhang lé nungmoq chyáng wut yù râ matú, dap up zaú chyáng dúng kat keq. Haú hkûn, ngamoq gi, hkyolat má yhang lé lhom sat pyám râ rì rì kut to râ nghut lhê.” ga taí akô.
- ¹⁶ Nghut kôlhang, haú lhom haq sat kó râ gâ é hkyô lé, Poluq é yhâng nhammó é yhangzo yuqgè zo wó gyô yù luí, yhang gi, gyewap má wang é mù, Poluq lé ê taí kyô ri.
- ¹⁷ Haú hkûn, Poluq gi, shô up gyezau rayuq lé ji yù mù, “Zorâm shí lé dap

- up zaú chyáng shuí ê aq, yhang, yhang lé shit kyo râ hkyô rajung joq lhê ga.”
- ¹⁸ ga taí ri. Haú mù luí, shô up gyezau hpó gi, zorâm haú lé dap up zaú chyáng shuí ê mù, “Zorâm shí nang lé shit kyo râ hkyô rajung joq lhê gâ ri ga, yhang lé náng chyáng shuí lé râ matú, htóng byû Poluq gi, ngo lé ji yù mù taí ri.” ga, yhang lé taí ri.
- ¹⁹ Haú jáng, dap up zau hpó gi, jauwò má zorâm haú lé yhâng loq mai she ê mù, “Nàng ngo lé haí jung shit kyó nau ri lhú?” ga, yhang lé baú tsik za myí ri.

- ²⁰ Haú hkûn, zorâm haú gi, “Yudaq byu pé gi, Poluq lé rago za saí myí wú râ su kut mhaú mù, napmá, Yudaq byìn tú wapdoq má shuí yù râ matú, náng chyáng dung kó râ ga, myit
- ²¹ chôm huí to bekô nghut ri. Haú mù luí, yhangmoq ô nau é dông hkâgyo byi, hkâsu mù gâ le, Poluq lé a wó sat sat gi, haí le a zo a shuq râ nghut lhê ga, byù myi xê yuq chyân yhang, ó le ó dakam yù bekô nghut ri. Haú bang gi, yhang lé lhom chyup yù râ matú haq lhom to lánng kó râ nghut lhê. Ahkuí hláng, yhangmoq gi, mù haú kut râ matú rì rì nghut bûm bekô; náng é ahkáng lé za lánng nyi bum akô nghut ri.” ga shit kyô ri.
- ²² Haú hkûn, dap up zau hpó gi, zorâm haú lé, “Nàng, ngo lé shí hkyô shit kyo bê hkyô lé, ó yuq lé le hkâ-taí kyo.” ga, sidiq byi mù, taú nhang kat bê nghut ri.

Míngzau Hpilik Chyáng Poluq Lé Dé Kat É Hkyô

- ²³ Hau htâng, yhang gi, shô up gyezau í yuq lé ji yù mù, “Hkû-myîn sum hkyíng^a má Kesare wà mó shut ê râ

^a 23:23 Myín sum hkyíng gi, nga-nhûng é myín gau hkyíng nghut lhê.

matú, gyezô pé í shô, myang ji bang nyhit xê, lhâm chûng bang í shô kut
²⁴ mù, rì rì hen to keq. Hau htoq agó, Poluq lé mauzau Hpilik chyáng ngón za wó dé kat râ matú, yhang ji râ myang pé le lajang byi keq.” ga, yhangnhik lé pying kat ri.

²⁵ Laiká hun kat é le:

²⁶ “Aróng wó dik é mauzau Hpilik ê, ngò Klodi Lusi gi, nguingón danglù shit kyô kat lhê.

²⁷ Shí yuq lé gi, Yudaq byu pé eq chyup yû mù sat pyám râ dà nyì bekô za nghut lhê. Nghut kô-lhang, ngò gi, gyezô pé eq rahá ê wú le, yhang Romaq mingdán byû nghut é lé wó sê yu é yanmai, yhangmoq chyáng mai yhang lé

²⁸ hkyô lo é nghut lhê. Haû su mù, haî mù yhang lé mara hûn kô é hkyô lé sé nau é yanmai, yhangmoq é Yudaq byìn tú wapdoq má yhang lé shuí jé byì wú bê nghut

²⁹ lhê. Haû hkûn, yhangmoq é tarâ hkyô eq séng lúí za mara hun bùm kô é lé ngò myang ri. Nghut kô-lhang, shí gíng é eq htóng lhúng gíng é mara haî le a bò nghut ri.

³⁰ Shí yuq lé sat pyám râ hpaqchyí da kô é hkyô, ngo lé shit kyo kô é hkûn, radá dâm, yhang lé ngò náng chyáng dé nhang kat bê. Yhang lé mara hûn nau é bang lé gi, nang hí má yhang hun lhum keq nghú pying kat bê nghut lhê.” gâ ri.

³¹ Haû mù lúí, gyezô pé gi, haû pying kat é dang eq rajung za, myín lé yhang, Antipatri wà mó jé shoq Poluq lé dé kat bekô nghut ri. Htang nyí, myang ji bang lé ê châng dé

³² nhâng kômù, yhangmoq gi, gyewap shut dum taû lò bekô nghut ri. Myang

³³

ji é gyezô pé gi, Kesare wà mó má jé kô é hkûn, mauzau hpó lé laiká byi mù, Poluq lé le jâng ap byì akô nghut ri.

³⁴ Haû hkûn, mauzau hpó gi, laiká haû lé ban nghap jáng, Poluq hká mau mâ é byù nghut é hkyô lé myí wú lúí, Kiliiki mau mâ é byù nghut é lé sé jáng,

³⁵ “Nang lé mara hûn bang jé jáng sheq, náng mù lé ngò gôn wú râ.” ga taî ri. Hau htâng, yhang gi, Poluq lé Herut é hkohkâm-wâng má byam zúng byi keq ga hkunmó hkyô tô ri.

Poluq, Mara Hûn Huí É Hkyô

24 Hau htâng, ngo nyí lai jáng, hkyangjong mó Anani gi, suwún wuí ra-am eq tarâ sé sù Tertulu lé shuí gyó ló mù, mauzau hpô hí má Poluq lé mara lé taî hun bum akô.

² Haû hkûn, Poluq lé hí má ji hâng tô é nghut mù, Tertulu, yhang lé mara hûn dang taî hi é gi, “Aróng wó dik é Hpilik ê, ngamoq gi, nyì-ngón yuqyo é hkyô lé nang é yanmai gyai myáng shoq wó hkam yu bum é nghut lhê. Nàng sê up sê hkan é jeju lé, byù myû

³ shí wó hkâm zô nyi é yanmai, ngamoq gi, haû lé hkyô hkat hkanmó eq jowò hkanmó má jeju bûn é myit eq

⁴ hkam yu nyì bê nghut lhê. Nghut kô-lhang, ngò nang lé lhoq hkyik é dông a dut sháng gaq, taî râ dang ratot zo lé, myit hîng hîng to mù gyo byi laq nghú dúng tóngbán lhê ô!

⁵ Shí yuq gi, byù lé gunjang sù, mingkan gón mâ é Yudaq byu pé lhunglháng lé shuí gabyong sù eq, haû Nazaret hpúng mâ é hkyô-u shê sù nghut

⁶ é lé, ngamoq myang ri. Hau htoq agó, yhang gi, noquq yhúm lé achayut kut râ dà nyì lúí, yhang lé ngamoq chyup yû mù, (ngamoq é tarâ

⁷ dông jéyáng râ hen nyi é hkûn, dap up zau Lusi gi, lé lô mù, ngamoq é loq

mai yang lé lé lú shuí yù luí, yang lé mara hùn bang lé, náng chyáng jé keq ga hkunmó hkyô tô é nghut lhê.)

⁸ Haú mù, nàng, yang lé myí wú jáng, ngamoq yang lé hun é mara banshoq têng é hkyô lé, nàng wó sé rã nghut lhê.” gã ri.

⁹ Yudaq byu pé le, haú pé gi, têng lhê ga bo chôm taí akô nghut ri.

Poluq, Mara A Bò É Lé Taí Hung É Hkyô

¹⁰ Mingzau hpó gi, Poluq lé dang taí rã dông loq lik kat jáng, Poluq taí é gi, “Zau ê, shí mau bãng é ahtoq má, nàng zanwut myo myo jéyáng byí nyi é hkyô lé, ngò sê é yanmai, ngò gabú myit èq yhumsing matú, mara a bo é ¹¹ hkyô taí bá. Ngò, Yerusalem wà mó má noqkuq rã matú doq e é buinyi raxe í nyí lháng a chyân shi é gi, nàng ¹² luí za wó sé rã nghut lhê. Noqkuq yhùm má ngò ó yuq eq taí htíng lhùm é lé lhang, tarajong, a nghut jáng, wà hkaú hká jowò má le byu pé lé shuí gabyông é lé lhang, ngo lé mara hun ¹³ é bang gi, a myàng kó. Ahkuí, ngo lé yangmoq hun é mara pé lé, náng hí má yangmoq saksé lháng a wó ¹⁴ tũn shit kó nghut ri. Nghut kôlhang, náng hí má ngò yín yú rã hkyô rã hkat gi, yangmoq èq shut shaí hkyô ga myhíng tô é Hkyô lé cháng luí, ngamoq é íchyí íwã pê é Garai Gasang lé noqkuq nyi lhê. Jep é tarã eq myiq-htoi laiká pé má kã tô é lhunglháng ¹⁵ lé le lumjáng lhê. Ngò gi, dingmán é bang eq a dingmán bãng é dum dui toq lô rã hkyô joq é lé, yangmoq eq rajung za Garai Gasang má myit ¹⁶ myoqbyu nyi é sú nghut lhê. Haú mù luí, Garai Gasang eq byu é hí má, ngò gi, rã é hkyô a bo é za, myit é hkyô san za wó dut nyi shoq, shikut nyi lhê.

¹⁷ Zanwut tsómra laí é htàng má, ngò gi, ngá é byù myú mã é myùng bang lé chyunghuq byi rã eq alu kat rã matú, Yerusalem wà mó shut ló jé bê nghut ¹⁸ lhê. Haú su kut nyi é hkùn, ngò eq rahá hai byù moq mó le a nyi, haí jung gabyông é hkyô le a htoq, ngò noqkuq yhùm má lhoq san lhoq yúng yú bê hkyô lé za, yangmoq myang akô. Nghut kôlhang, Asia mau mã é Yudaq byù ra-am gi, haú má nyi tô é nghut lhê; yangmoq mai ngo lé mara hùn rã hkyô joq kô é nghut le gi, shí náng é hí má yangmoq lé jé kó ra nghut lhê. Haú a nghut jáng, ²⁰⁻²¹ shí má nyi tô é bang gi, ngò Yudaq byin tú wapdoq hí má yap to mù, ‘Shi byuq bãng é dum dui toq rã hkyô é yanmai, hkũ-nyí nungmoq ngo lé jé-yáng nyi akô.’ nghũ luí, garú é dang hkũn mai lai luí, ngò má gotũ mara myàng shi kô é nghut le gi, yangmoq yang taí kyo kó sháng gaq.” gã ri.

²² Hpilik gi, Hkyô haú lé rago sê lhê nghut mù, “Gyedap up zau Lusi jé jáng sheq, ngò, nungmoq é mũ lé doq-dan byi rã nghut lhê.” ga luí, yangmoq lé ahkyíng htot kat byí ri. Poluq ²³ lé le, zúng za zúng to mù, yhâng é buinũm ji-myi wui mai yang ra chà é hkyô lajang byi naũ kô é bang nyi le gi, ahkáng byi keq ga luí, shô up gye-zau lé hkunmó hkyô kat ri.

²⁴ Buinyi rayoq zo laí é htàng má, Hpilik gi, Yudaq myiwe myhí nghut é sú yangmyi Drusila eq jé lé mù, Poluq lé ji lò nhâng luí, yang, Hkrisduq Yesuq lé lumjáng hkyô taí kyô é le gyô ²⁵ yu ri. Poluq gi, dingmán hkyô, yhum-sing gùng lé hkang é hkyô eq, jé lô rã tarã dara hkyô lé mhoqshit jáng, Hpilik gi, gyô gyuq mù, “Nàng ahkuí wó ló bê, ngò jìn jáng sheq nang lé dum ji

- ²⁶ yù rã nghut lhê.” ga taí ri. Hpilik kúm gi, Poluq eq ngùn haq byi rã lé myit myoqbyù mù, yhang lé anum num ji yù luí, yhang eq nyo lhum lhum kut ri.
- ²⁷ Zanwut í zân lai jáng, Hpilik é mau-zau ayá má Porku Hpestu lé htaí kat pyâm akô. Nghut kôlháng, Hpilik gi, Yudaq byu pê é hí má myoqdong wó nau é yanmai, Poluq lé htóng má jâng lhúng pyâm to bê nghut ri.

**Poluq, Kehtaq Chyáng Jé
Rã Matú Dúng È Hkyô**

- 25** Hpestu gi, haú mau má jé é sum nyí lai jáng, Kesare wà mó mai Yerusalem wà mó shut doq ló ri.
- ² Haú hkûn, hkyangjong agyi pé eq Yudaq byù hkyô-u shê bang gi, yhang lé Poluq é hkyô lé hkyang lhom shit
- ³ kômù, yhangmoq gi, Poluq lé hkyolat má lhom haq sat pyám rã dâ to kômù luí, jeju ralhum kut byí é đông Poluq lé Yerusalem wà mó shut dé kat byi rã matú, Hpestu lé lhom dúng akô.
- ⁴ Nghut kôlháng, Hpestu gi, “Poluq lé Kesare wà mó má sheq ru lhúng tô lhê, hkâ-myháng a myáng má, ngò yhang le haú má dum taú ló rã nghut lhê.
- ⁵ Haú mù, nungmoq má é hkyô-u shê bang ra-am, ngò eq rahá gyó ló mù, haú yuq kut shut é hkyô bo é nghut jáng gi, yhang lé mara lé hún kó sháng gaq.” ga tú taí ri.
- ⁶ Hau htâng, yhang gi, shit nyi, raxê nyí kô yhangmoq chyáng nyi yù luí, Kesare wà mó má taú ló mù, htang nyí gi, tarâ tanghkuq má zùng luí, Poluq lé yhâng hí má shuí wang lò rã
- ⁷ matú hkunmó hkyô kat ri. Poluq jé jáng, Yerusalem wà mó mai gyó lo é Yudaq byu pé gi, yhâng é lhinghkyuq má yap to kôluí, saksé a wó tûn shit é

marã mó myo myo lé, yhâng é ahtòq má chòm taí hun akô nghut ri.

- ⁸ Haú hkûn, Poluq gi, “Yudaq byu pê é jep é tarâ eq shai é đông le, noqkuq yhâm lé shut é đông le, Kehtaq^a lé shut é đông le, ngò a kut wú.” ga luí, mara a bo é hkyô taí ri.
- ⁹ Nghut kôlháng, Hpestu gi, Yudaq byu pê é hí má myoqdong wó nau mù, Poluq lé, “Nàng, Yerusalem wà mó má doq ló luí, shí hkyô pé lé ngò haú má doqdan byi rã matú, nàng dóng lhê lú?” ga myí ri.
- ¹⁰ Poluq kúm gi, “Ngò gi, doqdan hui rã nghut jáng, shí doqdan é jowò, Kehtaq é tarâ hpyit wap má ahkuí yap to bê nghut lhê. Nàng sê é eq rajung za, ngò gi, Yudaq byu pé lé haí lháng a
- ¹¹ shut wú sù nghut lhê. Laqma mù, shí gíng é mara lé, ngò kut shut pyâm é nghut le gi, shí hkám rã hkyô lé ngò a he pyám; nghut kôlháng, shí Yudaq byu pé mai ngo lé mara hun é hkyô a teng é nghut jáng gi, ó yuq lháng ngo lé yhangmoq é loq má ap byi rã ahkáng wó rã a nghut, ngò gi, Kehtaq chyáng wang taí rã nghut lhê.” ga tú taí ri.
- ¹² Haú hkûn, Hpestu gi, yhâng é byìn tú wap bang eq ban hpyê lhum jáng, “Nàng Kehtaq chyáng wang taí rã ga bê nghut lhê, Kehtaq chyáng wang ló aq hko!” ga taí kat ri.

**Poluq Lé, Hkòhkâm Agripa Hí
Má Shuí Hâng Yu É Hkyô**

- ¹³ Hau htâng, buinyì hkâ-myháng a myáng má, Hkòhkâm Agripa eq yhanggu miwe zo Bernike gi, Kesare wà mó má jé lé mù, Hpestu lé lé huí
- ¹⁴ nyo akô nghut ri. Haú mù, yhangnhik tâng gi, buinyì tsómra myáng nyi nyi é

^a 25:8 Kehtaq gâ é gi, “hkoséng” gâ é nghut lhê.

htâng má sheq, Hpestu gi, haú Poluq é hkyô lé hkohkâm wa eq taí kyô lhûm é gi, “Hpilik, lhûng to lánng é htóng byû rayuq nyi ri. Ngò Yerusalem wà mó má nyi tô é hkûn, hkyangjong agyi pé eq Yudaq byu pê é suwún wuî gi, haú yuq é hkyô lé taí kyo kôluî, haú yuq lé mara byi râ matú ngo lé chôm dúng akô.

¹⁶ Haú hkûn, ngò gi, mara hun é hui sù, mara hun é bang eq chyung chyog yoq kut luî, yhangmoq hun é mara lé yhumsing matú mara a bo é hkyô a wó taí shi lé, ó yuq lé ap byi pyám râ le, Romaq htûng a joq nghû luî yhangmoq lé taí kyo bê nghut lhê.

¹⁷ Yhangmoq ngá htâng châng gyó lô kô é hkûn, ngò gi, a nô yu é za, htang nyí jáng tarâ tanghkuq má zùng luî, haú yuq lé shuí wang lò râ matú hkunmó

¹⁸ hkyô kat é. Haú hkûn, haú yuq lé yhangmoq mara chôm hun bùm kôle, ngò myit ngàm tô é su mara ralhum le

¹⁹ a hun htoq lô kó nghut ri. Yhangmoq é noqkuq htûng hkyô eq, haú dui nyi ri ga Poluq eq taí é, shi byuq bê Yesuq é hkyô lé za dang jet jet lhûm bum

²⁰ akô. Haú mù, ngò gi, haú hkyô lé hká dông gon yù râ le a sé lô é yanmai, haú hkyô lé Yerusalem wà mó má doqdân é ló hkam yù râ matú, yhang dóng a

²¹ dóng é hkyô lé myî wú le, Poluq yhang sheq, Hkoséng mó chyáng jé râ ga taí é yanmai, Kehtaq chyáng a dé kat shi é u lé, yhang lé zúng nyí shirâ matú, ngò hkunmó hkyô kat é nghut lhê.” gâ ri.

²² Haú hkûn, Agripa gi, “Ngò le haú yuq é dang gyô wú nau ri.” ga, Hpestu lé taí jáng, yhang gi, “Napmá, nàng wó myang gyo râ nghut lhê.” ga tû taí ri.

²³ Htâng nyí, Agripa eq Bernike nhik-tâng gi, shinggang bò bò za lé lô mù,

dap up zau wuî eq wà mà é agyi suwún wuî eq rahá, rûng gok mó má wang zung tô bùm kô é hkûn, Hpestu hkunmó hkyô kat jáng, Poluq lé shuí hâng tô akô. Haú hkûn, Hpestu taí é gi, “Hkohkâm Agripa eq ahkuî shî má zup zîng tô é lhunglhâng bang ê, Yerusalem wà mó eq shí wà mà é Yudaq byu pé banshoq bang, ngá chyáng lé taí kôluî, shí yuq lé asak a wó duì nhang to lo ga garû bùm é gi, ahkuî nungmoq myang é shí yuq yhang nghut bê. Nghut kôlhâng, shí yuq zui saí é má shî gíng é mara haí lé lháng ngò a myàng nghut ri. Yhang gi, Hkosêng chyáng wâng râ ga taí é yanmai, yhang lé Romaq myuq shut dé kat râ matú ngò myit hpyit to bê.

²⁶ Dé kat bá nghû jáng le, ngá é yhum-sîng Hkosêng chyáng yhang é hkyô jihkúm nuqguq kâ hun kat râ haí le a bò nghut ri. Haú mù luî, yhang lé ban myî gôn wú jáng sheq, ká râ hkyô rajung jung hkâlháng ngò myàng abe nghû, nungmoq banshoq bâng é hí má le, je riyhang nàng Hkohkâm Agripa é hí má le, yhang lé ngò lhoq htoq shit é nghut lhê. Hkâsu mù gâ le, htóng byû rayuq yuq lé dé kat é hkûn, yhang lé hun é mara a wó tûn shit lé gi, a htuk nghû luî, ngò myit lhê.” gâ ri.

Poluq É Hí Hpyang Lhê É Nyi Yap Hkyô

26 Haú hkûn, Agripa gi, Poluq lé, “Nàng, náng matú dang tai râ ahkáng wó bê.” ga taí ri.

Haú mù luî, Poluq loq tû kat mù mara a bo é hkyô taí é gi, “Hkohkâm Agripa ê, nàng gi, Yudaq byu pê é htunghking banshoq eq taí htîng lhûm é hkyô hkat hkangmó lé, gyai sê to sù nghut é yanmai, Yudaq byu pé ngo lé hun é mara hkat hkangmó lé, ngò hkû-nyí náng é hí má mara a bò é

hkyô myang taí é gi, ngá matú gabú hpo yhang nghut ri nghû myit yu nyi lhê; haú mù luí, ngá dang lé myit hing é èq gyô yù byi laq nghû, dúng tóngbán kat lhê.

- ⁴ Ngò gi, zoshâng hkûn mai, ngá amyû má le, Yerusalem wà mó má le, hkâsu kut nyi kô lo é hkyô lé, Yudaq byu pé lhunglhang bang gi, sé gû
- ⁵ nghut akô. Yhangmoq gi, ngo lé hí hkûn mai sé kô é yanmai, ngò, ngamoq é noqkuq htung mâ é tarâ htan dik é hpúng má bo é Hparishe rayuq nghut é hkyô lé, saksé hkâm naú kô é nghut jáng, yhangmoq wó hkâm lhê.
- ⁶ Nghut kôlhang, doqdân é hui zo rá matú, ahkuí ngò shí má yap tô é gi, Garai Gasang èq ngamoq é íchyí îwa pé lé byí tô é danggidiq lé myit myoq-
- ⁷ byù nyi é yanmai nghut lhê. Ngamoq é byù myû raxe í hú gi, danggidiq jeju haú lé wó hkam yù shoq ga, Garai Gasang lé nyí myín noqkuq dojaú shikut nyi bum akô; Hkohkâm wa ê, myit myoqbyù hkyô hau é yanmai, ngo lé Yudaq byu pé mara hun bum
- ⁸ akô nghut ri. Garai Gasang gi, shí bê bang lé dum lhoq tui lhê gâ é hkyô lé, a wó lûm nghû, haí mù myit yu akô lhú?
- ⁹ Ngò le, Nazaret wà byù Yesuq é mying eq shai lhûm é dông myo myo wó kut rá nghut lhê nghû, gè gè yhang
- ¹⁰ myit yu wú bê nghut lhê. Gè gè haú dông le Yerusalem wà mó má kut wú bê nghut lhê; hkyangjong agyi pé chyáng mâ é ahkáng wó yú luí, ngò gi, sân-yúng bang myo myo lé htóng má kat pyâm é eq, yhangmoq sat hui kô-jáng le, ngò myit bo huí wú bê nghut
- ¹¹ lhê. Ngò gi, tarajong banshoq má a lhung lhung yhangmoq lé dam byi luí, Yesuq lé rhoí dang taí kó shoq shikut wú bê nghut lhê; nhik mó góng

yo luí, gó mau mâ é wà pé lhang jé shoq, yhangmoq lé châng zing-rí wú bê nghut lhê.

Poluq Hpúng Byù Dut Lo É Hkyô

- ¹² Haú hkûn, radàm lé, ngò gi, hkyangjong agyi pé chyáng mai ahko ahkáng eq hkunmó lé yu chûng mù,
- ¹³ Damaskuq myuq shut e ló nyi le, Hkohkâm wa ê, nyigúng tu ló zó lé, bui htoq má je duq é maubó gi, haú hkyô má, ngò eq ngá é luzúm wui é lhung-hkyuq má, mauhkûng mai duq bó
- ¹⁴ htoq lo é lé myang ri. Haú hkûn, ngamoq banshoq bang myigúng má lêng gop tô bum le, Hebre myíng dông, 'Sholuq, Sholuq, nàng, ngo lé haí mù zing-rí nyi lhê lhú? Zuchûn lé pik le gi, náng é matú gyai yhang wui lhê.' ga luí, ngo lé taí é danghtê lé ngò wó gyô kat ri.
- ¹⁵ Haú mù, ngò gi, 'Yhumsîng ê, nàng gi, ó yuq nghut lhê lhú?' nghû luí, myi jáng, haú Yhumsîng tú taí é gi, 'Nàng
- ¹⁶ zing-rí nyi é Yesuq nghut lhê. Ahkuí toq yap aq, hkâsu mù gâ le, ahkuí, nàng, ngo lé myàng bê hkyô eq, ngò, nang lé tûn shit shirâ nghut é hkyô pé é matú, ngá é mù wùn rá byù eq saksé dut nhâng rá dông nang lé hkyin to rá nghû, ngò náng chyáng lé htoq
- ¹⁷ shit é nghut lhê. Náng é amyû pé é loq mai le, tûngbàu pé é loq mai le, ngò, nang lé hkyi yù nyi rá nghut lhê.
- ¹⁸ Yhangmoq, yubak hkyut pyám byí é jeju wó yú rá eq, ngo lé lumjîng é yanmai, lhoq sân-yúng huí é bang eq rahá silí wunlí wó hkam yù kó sháng gaq nghû, yhangmoq é myoq lhoq hpóng byi mù, mauchut hkaú mai maubó shut, Tsadán é a-tsam hkaú mai Garai Gasâng shut yhangmoq lhung ló rá matú, ngò, nàng lé yhangmoq chyáng nhang kat rá nghut lhê.' gâ ri.

Poluq Kut É Muzó Hkyô

- ¹⁹ Haú mù luí, hkohkâm Agripa ê, ngò gi, mauhkûng mâ é myoqwup shing-rán haú lé a gyô é a wó é nyí
- ²⁰ nghut lhê. Ngò gi, yhangmoq myit lhing luí, Garai Gasang shut lhing taú lò mù, myit lhing bê hkyô lé, hkyí zó loq zó đông mai tân shit kó sháng gaq nghû, sâng-hi má Damaskuq myuq má nyi é bâng chyáng mai hí luí, Yerusalem wà mó mâ é bâng chyáng má le, Yuda mau gón mâ é bâng chyáng má le, tûngbaù pè chyáng má le, hkò
- ²¹ kyo bê nghut lhê. Hau é yanmai, Yudaq byu pé gi, ngo lé noqkuq yhûm má chyup yú luí, sat pyám rà da kò
- ²² é nghut lhê. Nghut kôlháng, ngò gi, hkû-nyí jé shoq Garai Gasang èq garúm é lé wó yú luí, ahkuí shí má yap to mù, tiq ko banshoq bang lé saksé wó
- ²³ hkâm kyô é nghut lhê. Ngò taí é má, Hkrisduq gi, hpuzo luí, shí bê bang mai sâng-hi dui toq lô mù, Yhâng é amyû eq tûngbaù amyû pé lé maubó é hkyô lé wó taí kyo rà nghut lhê ga luí, dut lò rà hkyô lé, myiqhtoí pé eq Mosheq taí tô é hkyô mai lai luí, ngò gotú haí le a taí é nghut lhê.” gâ ri.
- ²⁴ Yhang haú su ga mara a bo é hkyô taí é lé, Hpestu gi, “Poluq ê, nàng na bê! Lûm mhoq myô yu é yanmai na bê nghut ri.” ga luí, htê mó eq dang lat taí hpyit kat ri.
- ²⁵ Poluq kúm gi, “Aróng wó dik é Hpestu ê, ngò gi, nâ é a nghut, ngò taí é dang gi, tengmán é dang eq dang
- ²⁶ gyíng nghut lhê. Shí hkyô lé hkohkâm wa yhang le sê to gù nghut lhê mù, yhâng é hí má ngò a gyuq a kyum taí é nghut lhê. Hkâsu mù gâ le, shí hkyô gi, nungwò má kut é a nghut é yanmai, hkohkâm wa yhang a bo sê é gi, haí le a joq ra nghut lhê nghû, ngò
- ²⁷ myit lum nyi lhê. Hkohkâm Agripa ê,

nàng gi, myiqhtoí pè é dang lé lumjíng lhê lú? Nàng lumjíng é hkyô lé ngò sê lhê.” ga tú taí ri.

- ²⁸ Haú hkûn, Agripa gi, Poluq lé, “Razup za má, nàng, ngo lé Hkristan rayuq wó dut nhâng nhô ngam ri lú?” ga taí ri.

- ²⁹ Dum Poluq gi, “Razup za má nghut nghut, myáng myáng má nghut nghut, shí shamtoq-tui pé mai lai luí, nàng za a nghut, hkû-nyí ngò taí é dang lé gyô nyi é lhunglhâng bang, ngò su dut rà matú, ngò gi, Garai Gasang lé kyûdûng nyi lhê.” ga tú taí ri.

- ³⁰ Haú hkûn, hkohkâm wa gi, ginwáng zau hpó eq Bernike le mù, haú má zùng tô é bang eq rahá toq yap ri.

- ³¹ Yhangmoq htoq lô kô é hkûn, “Shí yuq gi, sat gíng é mara eq htóng lhúng gíng é mara haí le a kut shut nghut ri.” ga, rayuq eq rayuq taí lhum bum akò nghut ri.

- ³² Agripa gi, Hpestu lé, “Shí yuq gi, yhang mai Kehtaq chyáng jé rà ga a taí tô é nghut le gi, yhang lé wó nhang pyám berâ nghut lhê.” ga taí ri.

Poluq, Romaq Myuq Shut Wui-sanghpo Mai É Ló É Hkyô

- 27** Ahkuí, ngamoq lé Itali ming shut wui-sanghpo mai gú dap lò nhâng rà matú myit hpyit to kô-luí, yhangmoq gi, Poluq eq htongbyû góbang ra-am lé, Augustuq Hkôsêng é gyewap mó mâ é, Yuliu gâ é shô up gyezaú é loq má ap byí
- ² kat akò. Haú hkûn, Asia mau mâ é wuimau gin-gau cháng luí wà pé má wang jón ló é, Adramuti myuq mai toq é wui-sanghpo má ngamoq wang ji bê nghut lhê. Htesaloni wà mó mâ é Aristakuq gâ é Makedoni byù rayuq le ngamoq eq rahá nghut lhê.

³ Htang nyí, ngamoq gi, Sidun myuq má no bê nghut lhê. Yuliu gi, Poluq lé shogyo mù, yhang chyáng rã é hkyô lé yhang é buinùm wùi mai lhom lajang byi kó sháng gaq ga, yhangmoq eq é

⁴ hui rã matú ahkáng byí kat ri. Haú mai dum toq ló é hkûn, laí tau mut é yanmai, Kupru zinlóng lé lai hkaú

⁵ uchyang jí laí ló mù, Kiliki eq Pamhpuli mau mã é wuimau dông laí byit ló le, Laiki mau mã é Mura myuq má

⁶ jé bê nghut lhê. Haú mã, shô up gyezau hpó gi, Itali ming shut dap e ló é, Alesandru myuq mã é wui-sanghpo lé myang hkyup luí, ngamoq lé haú mã

⁷ jì nhâng bê nghut ri. Haú mai buinyì myo myo yhó yhó lé za jì e ló luí, awui ahke yhang Kidu wà mó eq ang mã wó jé ló jáng, laí tau mut é yanmai, hí shut a wó laí ló lo mù, ngamoq gi, laí lé cháng luí, Kreti zinlóng lé lai hkaú mù, Salamone kongzô é tũ tap âng é

⁸ mai laí ló é nghut lhê. Haú mã é wuiyàm mai awui ahke jì ló lé, Lasea wà eq a wê lhùm é Yuqyo é Guhkan gã é jowò mã jé ri.

⁹ Ahkuí, buinyì tsómra lhoq lhai pyám luí, haú Zoshuq gám poí lai bê nghut é yanmai, wui-sanghpo mai sô wún le gi, gyuq chiq rã nám jé bê nghut ri. Haú mù, yhangmoq lé Poluq taí pun taí kyíng é gi, “Áhkaú pé ê, shí dàm lhê é wui hkyô gi, wuihke mó hui luí, wui-sanghpo eq zè pé sùm pyám rã htoq agó, nga-nhúng é asak lháng sum rã dut é hkyô lé, ngò

¹¹ byu myang ri.” gã ri. Nghut kôlháng, shô up gyezau hpó gi, Poluq é dang lé gyo rã malaí, wui-sanghpo hkàng sũ eq wui-sanghpo yhumsing é dang lé,

¹² je lum ri. Guhkan haú gi, gyoqmyò^a wó lhoq lhai rã su a dut é yanmai, myo

hpyang gi, Hponik guhkan mã wó jé le jé mù, haú mã gyoqmyò ló nyi lhai rã matú chôm myit huí akô. Guhkan haú gi, Kreti zinlóng mã maupyí buiwàng hkyam eq mautsûng buiwàng hkyam shut hu tô é jowò nghut ri.

**Wuimau Mã, Laidun
Mó Htûng Huí É Hkyô**

¹³ Maupyí shut mã é laí yhó le hik lô jáng, yhangmoq myit tô é mã hkyak nghut bê su ngam pyám kôluí, shamtoq goknghe lé lhoq toq yũ kômù, Kreti zinlóng yâm dông jì

¹⁴ e ló bê nghut lhê. Nghut kôlháng, hkâ-myháng a myáng mã, Buihtoq mautsûng laí gã é laidun mó gi, haú

¹⁵ zinlóng mai mut lò luí, wui-sanghpo lé lo mut htûng é yanmai, hí shut a wó ló lo jáng, ngamoq gi, laí mut ló é

¹⁶ shut châng yông ló bê nghut lhê. Ngamoq gi, Koda gã é zinlóng zo lé lai hkaú uchyang yông ló nyi é hkûn, haú sakhkyílhaí lé gyai shikut é èq wó lãng

¹⁷ yũ luí, wui-sanghpo ahtoq mã lãng toq to bê. Wui-sanghpo lé gi, a byoq lo shoq tuí èq tuí kíng to bê nghut lhê. Dum, yhangmoq gi, Surti gã é semuí bùm mã ló kê gyâm to rã lé chiq kô é yanmai, wui-sanghpo mã é panlong pé lé lhoq nyhum hkyô yũ mù, châng

¹⁸ yông ló bekô nghut ri. Laidun mó lùm htan é yanmai, htang nyí yhangmoq gi, hpugá zè pé lé hkyom dú hkyó

¹⁹ pyám bekô nghut ri. Sum nyí nghu é nyí mã, yhangmoq gi, wui-sanghpo zè pé lé yhumsing é loq èq yhang hkyô

²⁰ pyám bekô. Buinyì myáng myáng, bui lé le, kyí pé lé le a myàng é eq, laidun mó za ru mut nyi é yanmai, wó lut rã nghũ myit myoqbyu tô é hkyô lé, ngamoq tô pyám bê nghut lhê.

^a 27:12 Gyoqmyò lé, haú mau mã laidun mó lò lò dut mù, yông wún le gyuq chiq nám nghut lhê.

²¹ Yhangmoq zoshuq a zô é, buinyì tsómra myáng lô bê nghut mù luí, Poluq gi, yhangmoq é gung gûng má yap to mù, “Âhkaú pé ê, nungmoq ngá é dang gyo luí, Kreti zinlóng mai a htoq lô é nghut le gi, shí su htên byoq é
²² marop hui zo râ a nghut. Ahkuí nghut kôlhang, ngò taí é dang lé gyô yù mù myit wum yù keq; nungmoq mâ é hká yuq lé asak sum râ a nghut, wuì-sanghpo za sheq htên byoq byuq
²³ râ nghut lhê. Hkâsu mù gâ le, ngo lé sing é, ngò dojaú nyi é Garai Gasâng é maumang lagyo rayuq, amàn ngá é nàm má lé yap to mù, ngo lé
²⁴ taí é gi, ‘Poluq ê, hkâgyuq, Kehtaq é hí má nàng wó yap râ nghut lhê. Wuì-sanghpo shí má nàng eq rahá ji tô é lhunglhâng bâng é asak lé, Garai Gasang gi, náng é yanmai, láí láí
²⁵ byi râ nghut lhê.’ gâ ri. Hau é yanmai, âhkaú pé ê, myit wum yù keq, ngo lé taí kyô é eq rajung za dut lò râ nghut lhê nghû luí, Garai Gasang lé
²⁶ ngò lumjîng nyi lhê. Nghut kôlhang, nga-nhúng gi, zinlóng ralhumm lum má ló htung chyap to râ nghut lhê.” ga luí, yhangmoq lé i-myt taí tîng ri.
²⁷ Buinyì raxe myi nyí myín má, gung-gàm yoq lé, ngamoq gi, Adria wuimau má yông lhing wún é hkûn, sanghpo hkâng bang gi, dùng yàm eq chyâng
²⁸ lo nyi é su gâ é lé sê gyo kat akô. Haú su mù, wuì nik é lé kê wú lé, loqlam í xê kô nik é lé wó sê akô. Razup zo má dum kê wú le, loqlam raxe ngò kô za
²⁹ nik é lé myàng akô nghut ri. Haú mù luí, luqmó má ló záng htung râ lé chiq kômù, yhangmoq gi, wuì-sanghpo htâng shut mâ é shamtoq goknghe myí lhum lé lhoq hkyô kat luí, mau hân bó sháng gaq ga kyûdûng nyi bum
³⁰ akô nghut ri. Wuì-sanghpo hkâng bang gi, wuì-sanghpo lé tô pyâm to luí

hpâng râ dâ é myit eq, wuì sanghpo-u shut mâ é shamtoq goknghe pé lé lhoq hkyô râ su kut mhaú luí, sakhkyílhaí lé wuì má lhoq hkyô nyi bum akô.
³¹ Haú mù, Poluq gi, shô up gyezau eq gyezô pé lé, “Shí bang wuì-sanghpo má a nyi le gi, nungmoq wó lut râ a
³² nghut.” ga taí ri. Haú hkûn, gyezô pé gi, sakhkyílhaí lé tuí tô é tui lé zân hpyit kat kôluí, sakhkyílhaí gi, byit gyó byuq bê nghut ri.
³³ Maubó lô jáng, Poluq gi, yhangmoq banshoq bang lé zang zo râ matú myit wum byí é gi, “Nungmoq gi, myit chiq luí, zoshuq haí le a zô é, hkû-nyí raxe
³⁴ myi nyí myáng lô bê. Haú mù luí, zoshuq rajung jung zo keq! Haú gi, nungmoq wó lut râ matú nghut lhê. Nungmoq chyâng mâ é ó yuq é xâm rahkat lháng byuq râ a nghut.” gâ ri.
³⁵ Haú su ga ban taí é eq, yhang gi, muk lé yù luí, yhangmoq banshoq bâng é hí má Garai Gasâng jeju lé hkyá-on mù, muk lé hpé luí, zô hí bê nghut ri.
³⁶ Haú hkûn sheq, banshoq bang gi, myit wum wó yú kômù, zoshuq zô bùm
³⁷ bekô nghut ri. Wuì-sanghpo haú mâ é byù lhunglháng gi, í sho nyhit xe
³⁸ hkyuq yuq nghut lhê. Yuq hkangmó bàn zô gyí é htâng má, wuì-sanghpo sóm râ matú, sungso pé lé wuì má dú kat pyâm akô nghut ri.

Wuì-Sanghpo Htên Gyop Byuq É Hkyô

³⁹ Myoq san za myàng jáng, yhangmoq gi, jowò haú lé a sé kôlhang, semuí-jàng chyún ralhumm lé byu myàng kôluí, wó dut é nghut jáng, haú má sanghpo lé kôn gyam râ matú chôm
⁴⁰ doqdân yu akô nghut ri. Haú mù, yhangmoq gi, shamtoq goknghe pé lé wuimau má hkyut hkyô pyâm tô akô. Lhaishap tui lé le hkyut yù luí, wuì-sanghpo ulhum mâ é panlong lé

- lhoq toq yû mù, lài hkyô cháng luí wuiyàm shut mut ló bê nghut ri.
- ⁴¹ Nghut kôlhang, semuî lo bum tô é jowò ralhùm má, wuì-sanghpo ló htông chyap byuq luí, sanghpo u gi, a wó duí lo mù, sanghpo htâng lé gi, wuìheng èq lò bat hkyop myha pyám bê nghut ri.
- ⁴² Haú hkûn, gyezô pé gi, htongbyú pé wuili lí hfang byuq kó rà lé gyuq kô é yanmai, yhangmoq lé sat pyám
- ⁴³ rà chôm dâ akô. Nghut kôlhang, shô up gyezau hpó gi, Poluq lé hkyi yù naù luí, yhangmoq dâ é hkyô lé hkûm pyám mù, wuili dat li bang gi, wuì má byam gyó luí wuiyàm shut hí li dap ló
- ⁴⁴ kó sháng ga luí le, góbang gi, siklong eq wuì-sanghpo mâ é gotû zè pé má zui mù, gu dap ló sháng ga le, hkunmó hkyô kat ri. Haú dông mai lhunglhang bang gi, wuiyàm shut rago wó jé dap ló bekô nghut ri.

**Malata Zinlóng Má Jé
Nyi Tô É U Lhê Hkyô**

- 28** Ngamoq wó lut dap ló jáng sheq, zinlóng haú gi, Malata gâ
- ² é lé sê ri. Zinlóng byu pé gi, ngamoq lé shogyo myit gyai lhom tân shit akô. Mau ru jâng wo nyi luí gyoq é yanmai, yhangmoq gi, myi mut byi mù, ngamoq banshoq bang lé hkûlum yu
- ³ akô. Haú hkûn, Poluq gi, htang rawaq guq tsîng yù mù, myihkyóm má kat kat é hkûn, myi soq htan lò jáng, duq htân lhangmuì radu gi, htoq ló mù,
- ⁴ yhâng é loq má htê zing tô ri. Zinlóng byu pé gi, Poluq é loq má lhangmuì haú htê lhang tô é lé myàng kô-jáng, “Shí yuq gi, gè gè yhang byu sat é sù teng rà dut ri; wuì mai wó lut ló kôlhang, yhang asak dui nyi rà matú, Tengmán tarâ gi, a dóng lo nhung!” ga luí, rayuq eq rayuq taí lhum bum akô

- ⁵ nghut ri. Poluq kúm gi, lhangmuì haú lé myihkyóm má ko hkyô kat luí, haí
- ⁶ le a dut é za nyi tô ri. Yhangmoq gi, yhânggùng wâm lò berâ, haú a nghut jáng, byodàn ratung shi hkyaq lêng lò berâ, ga myit lánq nyi bum akô. Nghut kôlhang, myáng myáng lánq wú nyi bum le, yhang má haí le a dut lo é lé myàng kôjáng, yhangmoq é i-myt dum htaí pyám kôluí, shí yuq gi, hparà rayuq sheq nghut ri ga dum taí bum akô nghut ri.
- ⁷ Haú é nàm má, zinlóng agyì hpó Popli sing é maumyî pé joq tô ri. Haú yuq gi, ngamoq lé lhom te yù mù, yhâng yhôm má sum nyí yhang la-
- ⁸ lúm la-nye lhom hkûlum yu ri. Haú u lé, Popli é yhângwa gi, ali nyé no nyi é eq wuiwam shun leq tô ri. Poluq gi, haú yuq chyáng wàng mù, kyûdung byi luí, yhâng é ahtoq má loq ke byi mù, yhang lé lhoq gè byi ri.
- ⁹ Haú su dut é yanmai, zinlóng mâ é nò byù góbang banshoq le, lé luí lhoq
- ¹⁰ gè byi é hui bekô nghut ri. Yhangmoq gi, ngamoq lé a hkyô hkyô dông hkungga kôluí, ngamoq wuì-sanghpo ji mù, dum toq ló rà hkûn, ngamoq rà é gû lé châng byi kat akô nghut ri.

Romaq Myuq Má, Poluq Jé É Hkyô

- ¹¹ Lhamó sum hkyap lai jáng, Aleksandru myuq mâ é, “Hparà zozûm nhiktâng” gâ é alhô dap é wuì-sanghpo má, ngamoq wang jí htoq ló bê nghut lhê. Wuì-sanghpo haú gi, gyoqmyò lé zinlóng haú má joq laí
- ¹² é nghut ri. Surakusa wà mó má jé jáng, haú má ngamoq sum nyí nô yu
- ¹³ é nghut lhê. Haú mai jí xoq lhing ló le, ngamoq gi, Regi wà mó má jé ri. Htang nyí gi, maupyí lai hik lô mù luí, í nyí nyí má nghut jáng, Potioli wà mó

- ¹⁴ má jé lô bê nghut lhê. Haû mâ é gumang wuì ra-am eq hui luí, ngamoq lé nyhit nyí no râ matú lùng kômù, ngamoq gi, nô yù bê; hau htâng, Romaq myuq má jé lô bê nghut lhê. Haû mâ é gumang wuì gi, ngamoq jé lo nyi é hkyô lé wó gyo kôjáng, te yù râ ga, Api Gàl gâ é wà eq Bínq Yhúm Súm Lhum gâ é wà jé shoq lé akô. Poluq gi, haú bang lé lhom myàng jáng, Garai Gasang lé hkya-on kungtôn mù, myit
- ¹⁵ wum wó yù bê nghut ri. Ngamoq, Romaq myuq má jé wang lô é hkún, Poluq gi, yhang lé zúng râ gyezo rayuq eq gotú san nyí râ matú, ahkáng wó ri.

**Poluq, Romaq Myuq Má,
Mungdang Hko Kyô É Hkyô**

- ¹⁷ Buinyì sum nyí laí é htâng má, Poluq gi, haú mâ é Yudaq suwún wuì lé ji yu ri. Yhangmoq jé lé bùm kôjáng, yhang gi, “Gumang wuì ê, ngò gi, nga-nhùng é amyú lé le, íchý íwa pé é htungking lé le, shut shai é dông haí le a kut wú; nghut kôlhang, ngò gi, Yerusalem wà mó má chyup yu é hui mù, Romaq byu pé é loq má ap byí
- ¹⁸ kat é hui bê nghut lhê. Romaq zau wuì kúm gi, ngo lé ban jep gôn wú jáng, ngá chyáng shí gíng é mara lé a myàng kô é yanmai, ngo lé nhang kat nau akô
- ¹⁹ nghut ri. Nghut kôlhang, haú lé Yudaq byu pé a dóng kô é yanmai, ngò hkâsu a dat kut lo mù, Kehtaq chyáng jé râ matú dúng é nghut lhê. Haú nghut kôle, ngá amyú lé mara hún râ jowò
- ²⁰ joq é yanmai gi, a nghut. Haú mù luí, Israelaq amyú é myit myoqbyù hkyô^a é yanmai, shí shamtoq-tuí èq tuí é ngò hui zô é hkyô eq séng luí, nungmoq eq nyo kún râ matú, ngò, nungmoq lé ji

kat é nghut lhê.” ga luí, yhangmoq lé taí ri.

- ²¹ Haú hkún, yhangmoq gi, “Náng é hkyô eq séng luí Yuda mau mâ é laiká ngamoq a wó yù nghut ri. Haú mai lé é gumang wuì ó yuq le, nàng eq séng é a ge é luhkyang lé shit kyô é a bò
- ²² kó nghut ri. Nghut kôlhang, shí nàng lom é hpúng gi, jowò hkanqmó má taí he pyâm é huí é hkyô lé, ngamoq sê é yanmai, nàng byu myang é hkyô lé ngamoq gyô wú nau ri.” ga tú taí akô.
- ²³ Yhangmoq gi, yhang eq huí kún râ buinyì ding to kôluí, yhang bínq é yhúm má byù myo myo lé zíng bum akô. Haú hkún, yhang gi, napkyó mai myín htâng jé shoq, Garai Gasang é mingdán hkyô lé saksé hkâm kyô é eq, Mosheq é tarâ eq myiqhtoí pé é dang má cháng mù, yhangmoq lé shikut luí, Yesuq é hkyô taí pun taí
- ²⁴ kyíng ri. Yhang taí é hkyô lé, ra-am gi, lumjínq bum akô; ra-am kúm gi,
- ²⁵ a lumjínq kó nghut ri. Yhangmoq rayuq eq rayuq haú su myit a huí lhum bùm kô é yanmai, Poluq gi, yhangmoq lé, “Chyoiyúng Woi-nyí, Myiqhtoi Esai-aq é nhut mai nungmoq é íchý íwâ pé lé taí é dang gi, gyai yhang têng ri. Dang haú gi,
- ²⁶ ‘Byù haú hú chyáng ê mù,
“Nungmoq gyô tsuq to kôlhang,
sê gyo kó râ a nghut;
wú tsuq to kôlhang, wú sé kó râ
a nghut.”, nghú ê taí aq.
- ²⁷ Hkâsu mù gâ le, amyú shi é i-myt gi, htan byuq luí, yhangmoq é nohkyap gi, htu byuq bê nghut ri; yhangmoq é myoq gi, chum byuq bê nghut ri;

^a 28:20 Israelaq amyú é myit myoqbyù hkyô gi, Mesaia gâ é hkyi yù sù lé myoqbyù nyi é nghut lhê.

haû a nghut le gi, yhangmoq é
 myoq èq myàng mù,
 yhangmoq é nohkyap èq wó gyo
 luí,
 yhangmoq é i-myyit má sê hkyâng
 kômù,
 ngá chyáng lhing lò kôluí, ngò
 yhangmoq lé lhoq gê byi berâ
 nghut lhê.^a

gâ ri.

²⁸ Haû mù luí, shî Garai Gasâng é hkyi
 yù hkyô lé, tûngbàu pê chyáng byî
 kat bê nghut luí, yhangmoq lhom gyô
 yù berâ hkyô lé, nungmoq yhang sê

nyî keq ô!” ga luí, danghkun haû taí
 kat é htâng má, yhangmoq gi, htoq ló
²⁹ byuq bùm bekô nghut ri. (Poluq haû
 su ga taí é htâng má, Yudaq byu pé
 gi, yhangmoq yhangchang dang jet jet
 lhum uchyang ló byuq bekô nghut ri.)
³⁰ Poluq gi, yhang nghô lúng é yhûm
 má í zân tup nyi é u lé, yhâng chyáng
 lé má lé é bang lé lhom hkûlum yu ri.
³¹ Haû mù, a gyuq a kyum é za, Garai
 Gasâng é mingdán hkyô lé hko taí kyô
 é eq, Yhumsîng Yesuq Hkrisduq eq
 sêng é hkyô lé mhoqshit byî ri; yhang
 lé, ó le a hkûm zing to kó nghut ri.

^a 28:27 Esai 6:9,10

ROMAQ

Pê Chyáng Hun Kat é Laiká

(Romans)

1 Hkrisduq Yesuq é dui-nhâng zo-
shâng eq lagyo dut râ matú, Ga-
rai Gasâng èq ji yu é hui luí, chyoi-
² yúng Chyúmdang pé má, Garai Ga-
sang gi, hí hí mai Yhâng é myiqhtoí
pé dông danggidq byí to bê nghut
é, Yhâng é Yuqzô é hkyô nghut é,
Garai Gasâng é gabú danglu é matú
hkyin to huí é sũ, ngò Poluq gi, Ro-
maq myuq má nyi é, Garai Gasâng
èq chyitdap é hui luí, sân-yúng bang
dut râ matú jì yu é bang banshoq
³ lé, dang kyô kat lhê. Yhâng é Yuqzo
haú gi, byù hkyam dông ga jáng, Da-
⁴ wiq é awut ashín nghut ri; Yhang gi,
shi é mai dum dui toq é dông, Ga-
rai Gasâng é Yhangzo nghut é hkyô
lé, chyoiyúng hkyo é Woi-nyí dông
mai, hpungwup a-tsâm èq sé nhâng
bê nghut ri. Yhang gi, nga-nhúng é
Yhumsíng Yesuq Hkrisduq nghut ri.
⁵ Yhang dông mai le, Yhâng myíng é
matú le, ngamoq gi, byù myú châng-
jup mai byù ji yù mù, lumjínng hkyô lé
châng nyí nhâng râ matú, jeju eq la-
gyo ayá lé wó hkam yù bê nghut lhê.
⁶ Nungmoq le, Yesuq Hkrisduq eq séng
râ matú ji yù huí é bang má lòm bekô
nghut ri.
⁷ Nga-nhúng é Íwa Garai Gasang eq
Yhumsíng Yesuq Hkrisduq chyáng mã
é jeju eq nguínón hkyô gi, nungmoq
chyáng ru joq nyí sháng gaq ô!

Poluq, Romaq Myuq Má
Ló Kum Nau É Hkyô

⁸ Nungmoq é lumjínng hkyô lé, ming-
kan gón má tai pyo ló bê nghut é
yanmai, sân-hi má, ngò gi, Yesuq

Hkrisduq é myíng mai, nungmoq ban-
shoq bâng é matú, ngá é Garai Ga-
⁹ sang lé, jeju hkya-on lhê. Ngá é kyû-
dung dang pé má, ngò, nungmoq lé
hkâ-nhám le bûn nyi é hkyô lé, Yhâng
é Yuqzô é hkyô gabú danglù lé hko
kyô nyi é má, ngá é myit nhiklhum
banshoq èq dojaú é Garai Gasang gi,
¹⁰ ngá é saksé nghut lhê; Garai Gasang
ô nau é nghut jáng, hkâ-í a myáng
má, ngò, nungmoq chyáng wó jé lé râ
hkyô htong byi râ matú, ahkuí, ngò
kyûdúng lhê.

¹¹ Ngò gi, nungmoq lé, woi-nyí hkyô
eq sêng é chyunghuq wó gâm byi
mù, nungmoq lé wum-o wó lhoq kínng
byi râ matú, nungmoq lé gyai yhang
¹² myàng nau nyi ri. Haú su nghu é
gi, nga-nhúng rayuq eq rayuq é lum-
jínng hkyô dông mai, nungmoq eq ngò,
myit wum byí é hui râ matú nghut lhê.
¹³ Gumang wuì ê, ngò gi, haú tûngbaù
pê chyáng mai ashi wó yu é eq rajung
za, nungmoq chyáng mai le ashi wó
yú râ matú, nungmoq chyáng lé jé râ
nghû adàm dàm dà wú é nghut kô-
lhang, ahkuí jé shoq hkûm tang pyám
huí é hkyô lé, nungmoq lé sé nhâng
nau ri.

¹⁴ Ngò gi, Grik pé lé le, Grik a nghut
bang lé le, hpaqchyí bò bang lé le,
hpaqchyí a bò bang lé le, chyín dap
¹⁵ to sũ nghut lhê. Haú nghut é yanmai,
ngò gi, Romaq myuq mã é bang nung-
moq lé le, haú gabú danglù gyai yhang
hko kyo nau nyi é nghut lhê.

¹⁶ Haú gabú danglù hkyô má, ngò gi, a
hoq é nghut lhê; hkâsu mù gâ le, haú
gi, sân-hi má Yudaq byu pé, hau

htâng tûngbaù pé má, lumj́ing é sù yuq hkangmó lé hkyi yu é wó hui nhâng râ nghut é, Garai Gasâng é
¹⁷ hpungwup a-tsam nghut lhê. Hkâsu mù gà le, lumj́ing myit mai wó yù luí, lumj́ing myit má gîng nyi é, Garai Gasâng chyáng mâ é dingmán hkyô lé gi, gabú danglù háu má hpông shit bê nghut ri. Haù gi, “Haù dingmán sù gi, lumj́ing myit mai asak duì râ nghut lhê.”^a ga kê tô é eq rajung za nghut ri.

**Xângzo Byu Pê Htoq
 Má Garai Nhikmo-yô É Hkyô**

¹⁸ Haù tengmán hkyô lé, yhumsing é agè ashop hkyo èq zik hkûm pyâm é byu pé é agè ashop hkyô eq garai a bo é hkyô pé banshoq htoq má, mau-hkûng mai Garai Gasâng é nhikmo-yo
¹⁹ hkyô lé hpông shit bê nghut ri. Haù mù gà le, Garai Gasang gi, Yhang eq sêng é hkyô, yhangmoq lé san za tûn shit bê nghut é yanmai, Garai Gasang lé sé âng é hkyô gi, yhangmoq chyáng san
²⁰ za dut bê nghut ri. Hkâsu mù gà le, mau htoq xâng hkun mai, hpan tô é zè pé lé wú jáng, Yhâng é a byu-myang é isâm nghut é, ahtum abyuq é hpungwup a-tsam eq Garaí é myit sâmlai lé gi, san za wó myâng, wó sê gyô é nghut lhê. Haù mù luí, byu pé gi, mara mai wó he lut râ hkyô a joq lo nghut ri.
²¹ Haù mù gà le, yhangmoq gi, Garai Gasang lé sê to kôlhang, Yhang lé Garaí dông a shigyau kô é eq, jeju a hkyo-on kó nghut ri; yhangmoq myit é hkyô pé gi, akôm dut byuq é eq, nhik a gyíng é yhangmoq é myit nhiklhum
²² gi, chut byuq bê nghut ri. Yhangmoq gi, hpaqchyí bò bang nghut lhê ga kôlhang, a-ngok é bang dut byuq bekô
²³ nghut ri. Haù mù, htên byoq a sê é Garaí Gasâng é hpungwup shingkang lé,

htên byoq sê é byù zòng, ngoq lhô, dusak lhô eq yê jung dusak lhô pé èq, htaí lhik pyám bekô nghut ri.

²⁴ Hau é yanmai, Garai Gasang gi, yhangmoq é gungdu lé rayuq eq rayuq hpau a tap lhum kó râ matú, a sansêng é gungsho zùm-yap hkyô kut râ nghut é, yhangmoq é yut yut ô nau é i-myt má, yhangmoq lé ap pyám bê
²⁵ nghut ri. Yhangmoq gi, haù Garaí Gasâng é tengmán hkyô lé, mhaù é hkyo èq htaí lhik pyám kômù, hpân Sù lé noqkuq dojaú râ malaí, mhaù hkyô nghut é hpan tô é zè pé lé noqkuq mù, dojaú akô nghut ri. Hpân Sù haù gi, ahtum abyuq hkyo-on hui sù nghut ri. Amen.

²⁶ Haù nghut é yanmai, Garai Gasang gi, yhangmoq lé, ahoq ahí é yut yut ô nau hkyô má ap pyám bê nghut ri. Yhangmoq é myiwe wuì lháng gi, htûng akying lé tô pyám kômù, haù eq shai é dông htaí lhik pyám nyi akô
²⁷ nghut ri. Haù eq rajung za, yuqgè wuì le, myiwe wuì eq zum é htûng akying lé tô pyám kômù, rayuq eq rayuq, myi su nyé shoq yut yut ô nau lhum kômù, yuqgè yhangchang rayuq eq rayuq agot a-ù hkyô kut shut lhum kô-luí, yhangmoq kut shut é eq gingdán é yubak dam lé, yhumsing gùng yhum-síng hkam yù nyi bekô nghut ri.

²⁸ Hau htoq agó, haù Garaí Gasang lé sê é hkyô gi, akyú bo é a nghut ga yhangmoq myit yù kô é yanmai, a kut âng é hkyô kut nhâng râ matú, Garaí Gasang gi, yhangmoq lé, htên byoq sê é myit má ap pyám é nghut lhê.
²⁹ Yhangmoq gi, agè agau hkyô ajung jung, agè ashop hkyô, myoqnoq hkyô eq a jú lhûm é hkyô pé byíng jup tô é bang dut bekô nghut ri; manon é, byù sat é, mabyoq jishûm htoq é,

^a 1:17 Hbk 2:4

mhaú zô é eq myit goí bo é pé le
³⁰ byíng bum ri. Yhangmoq gi, lumu é bang, gansang é bang, Garai lé a jú é bang, byù rhoi é bang, nghutbùn é bang, gyáng é bang, agè ashop kut rà hkyô lhoq htoq é bang, mó wui é jìno
³¹ a gyô é bang nghut akô. Yhangmoq gi, a gying a hâng é bang, gidiq a zung é bang, chyt myit a bo é bang, shogyo
³² nhikmyin a sê é bang nghut akô. Haú pé lé kut é bang gi, shí gíng lhê gâ é, Garai Gasâng é dingmán tarâ joq é lé, yhangmoq sê to kôlhang, haú pé lé, yhangmoq xoq kut nyi kô é htoq agó, haú hkyô lé kut é bang lé le, hkyá-on waq toq akô nghut ri.

Garai Gasang Tarâ Jéyáng É Hkyô

2 Haú mù luí, góyuq lé tarâ jéyáng é sù nàng ê, nàng gi, mara mai wó he lut rà hkyô a joq lo; hkâsu mù gâ le, nàng yhang jéyáng nyi luí, mù haú pé lé, nàng kut nyi é yanmai, byù góbang lé jéyáng é hkûn, náng gûng
² nàng mara byí nyi bê nghut ri. Haú đông kut nyi é bang lé, Garai Gasang gi, tengmán é đông tarâ jéyáng é lé,
³ nga-nhúng sê nyi lhê. Haú mù, byù za nghut to luí, góbang lé gi, jéyáng mù, yhumsing gi, haú đông roq châng kut nyi é sù nàng ê, nàng gi, Garai Gasâng é tarâ jéyáng hkyô mai wó hfang lut
⁴ rà su ngam nyi lhê lú? Haú a nghut jáng, nàng gi, Garai Gasâng é ge é hkyo èq nang lé myit wó shuí lhing nhang é lé a sê é za, Yhâng é agùn agó é ge é hkyô lé le, myit hing é hkyô eq jân shirang é hkyô lé le, wú tiq pyâm nyi lhê lú?
⁵ Nghut kôlhang, náng é myit htân hkyô eq myit a lhing é nhiklhum é yanmai, haú Garai Gasang dingmán

é đông tarâ jéyáng shit rà nghut é, Yhâng é nhikmo-yô é buinyì má hkâm zo rà nhikmo-yo hkyô lé, yhumsing gùng yhang hkong tô nyi bê nghut ri.
⁶ Garai Gasang gi, yuq hkgangmó lé, ó le ó kut é má cháng luí, hkâm zo
⁷ nhâng rà nghut lhê. Jân shirâng mù, ge é hkyô kut nyi é đông, hpung-wup shinggang lé le, aróng eq htên byoq a sê é hkyô lé le, ho é bang lé, Yhang gi, ahtum abyuq é asak
⁸ byi rà nghut lhê. Nghut kôlhang, haú yhumsing wuízat hkyô za hô luí, tengmán hkyô lé he-ngik pyâm mù, agè ashop hkyô lé cháng bâng é matú gi, nhikmo-yo hkyô eq nhikjum yo
⁹ hkyô jé rà nghut lhê. Wuíhke hkyô eq iyon yon hkyô gi, agè ashop kut é xângzo byù yuq hkgangmó chýáng jé rà nghut lhê; sâng-hi má Yudaq byu pê chýáng jé mù, tûngbaù pê chýáng le jé
¹⁰ rà nghut lhê. Nghut kôlhang, hpung-wup shinggang, aróng eq nguingón hkyô gi, haú ge é hkyô kut é bang yuq hkgangmó chýáng jé rà nghut lhê: sâng-hi má Yudaq byu pê chýáng jé mù, tûngbaù pê chýáng le jé rà nghut
¹¹ lhê. Hkâsu mù gâ le, Garai Gasang gi, myoqdong a hkyin é Sù nghut lhê.
¹² Haú jep é tarâ lé a sê é mara kut shut é bang lhunglhang gi, jep é tarâ đông a nghut é za htên byoq kó rà nghut lhê. Haú jep é tarâ hkaú má mara kut shut é bang lhunglhang gi, jep é tarâ đông jéyáng é hui zo kó rà
¹³ nghut lhê.^a Hkâsu mù gâ le, haú jep é tarâ lé wó gyô é bang lé, Garai Gasâng é hí má dingmán bang gâ é a nghut é za, jep é tarâ lé châng kut é bang za sheq, dingmán bang gâ é hui
¹⁴ rà nghut lhê. Haú jep é tarâ lé a wó é tûngbaù pé gi, jep é tarâ hkyô lé,

^a 2:12 Haú jep é tarâ lé a sê bang gâ é gi, tûngbaù pé lé gâ é nghut luí, haú jep é tarâ hkaú má é bang gâ é gi, Yudaq byu pé lé gâ é nghut lhê.

yang baú yang châng nyi kô é hkûn, jep é tarâ lé a wó kôlhang, yhumsing gùng yhumsing é matú tarâ dut bekô nghut ri. Yhangmoq gi, haú jep é tarâ hkyô pé lé, yangmoq é i-myt ung-hkaú má kâ to bê nghut é lé, tûn shit bekô nghut mù, yangmoq é myit má hkâm zô é hkyô le, haú lé saksé hkám byi nyi é eq, yangmoq myit é hkyô gi, ahkuí mara hun kat, ahkuí mara hkyut kat kut nyi ri. Haú hkyô gi, ngò taí pyo é gabú danglù eq rajung za, byu pê é zaú nghop tô é hkyô pé lé, Hkrisduq Yesuq dông mai Garai Gasâng èq tarâ jéyang é buinyi má dut râ nghut lhê.

Yudaq Byu Pé Eq Jep É Tarâ

¹⁷ Nghut kôlhang, nàng gi, náng gûng nàng Yudaq byù rayuq nghut lhê ga mù, haú jep é tarâ lé lumhkaú nyi é eq Garai Gasang lé xoq é hkyô má nghut-
¹⁸ bûn nyi é sù; Yhâng ô nau é hkyô lé sê é eq haú jep é tarâ mhoqshit é hkyô wó yû bê nghut é yanmai, je ahkyak é hkyô lé sê gàm hkoq é sù;
¹⁹ haú jep é tarâ má, hpaqchyí eq teng-mán hkyo é alik wó sù nghut é yanmai, haú myoqjit bâng é matú hkyô-u shê sù eq mauchut hkaú mâ é bâng é
²⁰ matú maubó nghut sù; byù ngok pé lé mhoqshit sù eq zoshâng wui é sará nghut sù nghut é lé, sê gyô to sù nghut
²¹ é nghut le gi, nàng, góbang lé mhoq byi sù nhîng, yhumsing gùng yhum-sîng a mhoq yû lhú? A wó hkau ga hko taí luí nhîng, nàng gi, hkaú lhê
²² a nghut lhú? Su-myi sulàng lú hkyô a wó kut ga byu pé lé taí luí nhîng, nàng gi, su-myi sulàng lú hkyô kut lhê a nghut lhú? Hparâ lhô lé a jú dik sù nàng gi, noqkuq yhûm lé hpyoq zo hpyoq shuq nyi lhê a nghut lhú?

²³ Jep é tarâ eq séng luí nghutbun sù nàng gi, haú jep é tarâ lé lu laí é dông, Garai Gasang lé a hkungga kut
²⁴ lhê a nghut lhú? Haú gi, “Garai Gasâng é myîng gi, nungmoq é yanmai, tûngbaù pê chyáng lhoq hpoí pyâm é huí ri.”^a ga kâ tô é eq rajung za nghut ri.

²⁵ Haú jep é tarâ lé nàng châng é nghut jáng, ahpyo-kuq hpyit hkyô gi, akyû bò bê nghut ri. Nghut kôlhang, nàng, jep é tarâ lé lu laí é nghut jáng, a hpyit é eq rajung za dut bê
²⁶ nghut ri. Ahpyo-kuq a hpyit kôlhang, jep é tarâ hkyô pé lé châng é bang lé gi, ahpyo-kuq hpyit bê bang dông ge
²⁷ sôn byi lhê a nghut kó lhú? Kâ tô é tarâ lé wó mù, ahpyo-kuq hpyit hkam to gù nghut é, tarâ lu laí é sù nàng lé, gungsho má ahpyo-kuq a hpyit kôlhang, jep é tarâ lé châng é sù gi, mara hûn râ nghut lhê.

²⁸ Hkâsu mù gâ le, shinggan má za Yudaq byù nghut é sù gi, Yudaq byù kyîng a nghut; gungsho má za ahpyo-kuq hpyit é gi, ahpyo-kuq hpyit
²⁹ kyîng a nghut. Ahte myit hkaú má Yudaq byù nghut sù za, Yudaq byù kyîng nghut lhê. Kâ tô é tarâ dông a nghut é za, Woi-nyí èq myit má ahpyo-kuq hpyit é gi, ahpyo-kuq hpyit kyîng nghut bê. Haú yuq é hkya-on kungtôn hkyô gi, byù mai lo é a nghut, Garai mai lo é ru nghut lhê.

Garai É Lhumzui Hkyô

3 Haú dông ga jang, Yudaq byù rayuq dut nyi é gi, hai akyû hkâm zo râ lhú? Ahpyo-kuq hpyit
² hkyô gi, hai akyû bò râ lhú? Hkyô hkangmó má gyai akyû bò lhê! Je hí má gi, haú Garai Gasâng é mung-

^a 2:24 Esai 52:5

dang lé yhang, yhangmoq lé ap byi bê nghut ri.

- ³ Yhangmoq mâ é ra-am lumjínq myit a bo é nghut le gi, hkâsu kó lúhú? Yhangmoq lumjínq myit a bo é yan-mai, Garai Gasâng é lhumzui hkyô lé
- ⁴ akyû a bò nhâng wó dut râ lúhú? Hká dông le a wó dut!

“Haû mù, nàng dang taí é hkûn, dingmán é hkyô wó lhoq htoq râ eq, nàng jéyáng huí é hkûn, ûng râ nghut lhê.”^a

ga kâ tô é eq rajung za, byù yuq hkgangmó gi, byù-mhaú dut kôlhang, Garai Gasang gi, tengmán nyí sháng gaq.

- ⁵ Nghut kôlhang, nga-nhûng é a dingmán hkyô gi, Garai Gasâng é dingmán hkyô lé san za je lhoq htoq shit é nghut lhê; haû nghut jáng, nga-nhúng hkâsu nghû taí râ lúhú? Nga-nhúng lé Garai Gasang nhikmo-yô é hkyô gi, Yhang a tarâ mù nghut lhê lúhú? (Ngò gi, byù hkyam dông taí htîng
- ⁶ é nghut lhê.) Ratsuí lhang a nghut! Haû su ru nghut le gi, haû mingkan lé, Garai Gasang hkâsu wó jéyáng râ
- ⁷ lúhú? Rayuq yuq, “Ngò mhaû é hkyô gi, Garai Gasang tengmán é hkyô lé lhoq ko jat mù, Yhâng é hpungwup shingkan lé je wó lhoq hu nhang é nghut le nhîng, haí mù luí, ngò, yubak byù rayuq dông mara byí é hui zô nyí ra shirâ lúhú?” ga taí dang-rháng
- ⁸ râ nghut lhê. “Ge é hkyô htoq sháng gaq, nga-nhúng, agè ashop hkyô kut sháng.” nghû haí mù a taí kô é lúhú? Dang haû lé ngamoq taí é nghut lhê ga luí, ngamoq lé lumù gansang é dông byù ra-am taí akô. Haú bang gi, mara dam byí é hui zo gínq bang nghut akô.

Dingmán Byù A Nyì

- ⁹ Haû jáng, hkâsu nghû lo râ lúhú? Nga-nhúng gi, je gè bang nghut lhê lúhú? Ratsuí lhang a nghut. Yudaq byù nghut nghut, tûngbaù pé nghut nghut, yubak mara hkaû mâ é bang chyat nghut lhê nghû, ngamoq taí san kyô
- ¹⁰ wú bê nghut lhê. Chyúmdang má kâ tô é le,
“Dingmán é byù a nyì, rayuq lhang a nyì nghut ri;
- ¹¹ Sê gyô é byù rayuq le a nyì, Garai Gasang lé ho é byù le a nyì nghut ri;
- ¹² Lhunglhang bang gi, lhing ló byuq bekô; yhangmoq gi, hpau a dap bang chyat dut byuq bekô nghut ri.
Ge é kut sù ó a nyì, rayuq lhang a nyì nghut ri.”^b
- gâ ri.
- ¹³ “Yhangmoq é hkyung gi, hpông tô é lup pé nghut akô; yhangmoq é shô gi, mhaû akô.”^c
“Yhangmoq é nhutwuí pé má gi, shíduq bò lhangmuí é duq dap bum ri.”^d
- gâ tô ri.
- ¹⁴ “Yhangmoq é nhut pé gi, nhing myíng nhing htê eq myit nò danghko baú byíng zan tô ri.”^e
- gâ tô ri.
- ¹⁵ “Yhangmoq é hkyí pé gi, byù sat sui lhoq htoq râ matú, lawan nau akô;
- ¹⁶ Yhangmoq sô nyi é hkyô pé gi, htên byoq é eq wuíhké é ahkô tóng tô é nghut mù,
- ¹⁷ nguínqón é hkyô lé gi, yhangmoq a sé kó nghut ri.”^f

^a 3:4 Hkya-on 51:4

^b 3:12 Hkya-on 14:1-3

^c 3:13 Hkya-on 5:9

^d 3:13 Hkya-on 140:3

^e 3:14 Hkya-on 10:7

^f 3:17 Esai 59:7-8

gâ tô ri.

- ¹⁸ “Yhangmoq é myoq hí má Garai Gasang lé gyuq hkunggâ é hkyô, a bò kó nghut ri.”^a

gâ tô ri.

- ¹⁹ Byù yuq hkanmó é nhut gi, tù tai jang a joq dut byuq mù, mingkan gón gi, Garai Gasâng é hí má mara bo é bang dut nyi sháng gaq ga, haù jep é tarâ má tai é lhunglhang gi, jep é tarâ ô má nyi é bang lé tai é nghut é hkyô
- ²⁰ lé, nga-nhúng sê lhê. Haù mù luí, jep é tarâ lé châng é đông mai, ó yuq le, Yhâng é hí má dingmán sù gâ é wó hui râ a nghut; jep é tarâ đông gi, yubak mara bo é hkyô lé wó sê yu é za nghut lhê.

**Lumjínng Jáng, Dingmán
Sù Wó Dut É Hkyô**

- ²¹ Ahkuí kúm gi, jep é tarâ đông a nghut é za, haù jep é tarâ eq myiqhtoi laiká pé mai saksé hkâm tô é Garai Gasâng chyáng mâ é dingmán hkyô
- ²² lé, sé nhâng bê nghut ri. Garai Gasâng chyáng mâ é dingmán hkyô haù gi, Yesuq Hkrisduq lé lumjínng é đông mai nghut mù, lumjínng bang banshoq htoq má jé é nghut lhê. Gamhkuí é
- ²³ hkyô a joq. Hkâsu mù gâ le, lhunglhang bang gi, yubak mara kut shut bê bang chyat nghut mù, Garai Gasâng é hpungwup shingkang lé a hkyit
- ²⁴ hkap byuq lo kó nghut ri. Ahkuí kúm gi, Hkrisduq Yesuq mai lo é hkyi yù hkyô đông, Garai Gasâng é jejû èq, mara hkyut san byí é láí láí wó hui
- ²⁵ bê nghut ri. Garai Gasang gi, Yesuq é sui lé lumjínng bâng matú, shihtái gunglik hkungga ralhum đông, Yesuq lé byí pyám bê nghut ri. Haù gi, láí lò bê yubak mara lé lhut pyám byi shoq,

Garai Gasang myit hîng byi bê nghut é yanmai, Yhâng é tengmán hkyô lé

²⁶ tûn shit é nghut ri. Garai Gasang haù su kut é gi, Yhânggùng yhang dingmán Sù nghut é eq, Yesuq lé lumjínng é sù lé mara hkyut san byí é Sù nghut râ matú, ahkuí lhê ipyat má, Yhâng é tengmán hkyô lé shit byí é nghut lhê.

- ²⁷ Haù su nghut jáng, nghutbun jowò joq ri lú? A joq. Hai tarâ mai a joq dut byuq é lú? Haù jep é tarâ châng é yanmai nghut lhê lú? A nghut, lumjínng hkyo é yanmai sheq a joq dut
- ²⁸ byuq é nghut lhê. Hkâsu mù gâ le, byù gi, haù jep é tarâ châng é đông a nghut é za, lumjínng luí, mara hkyut san byi huí é hkyô lé, ngamoq lum nyi
- ²⁹ lhê. Garai Gasang gi, Yudaq byu pè é Garai Gasang za nghut lhê lú? Tungbaù pè é Garai Gasang le a nghut lú? Nghut lhê, tungbaù pè é Garai Gasang le nghut lhê. Hkâsu mù gâ le, Garai Gasang gi, rayuq za nghut é yanmai, rajung za lumjínng luí, ahpyo-kuq hpyit hkam é bang lé le, ahpyo-kuq a
- ³⁰ hpyit é bang lé le, Yhang, mara hkyut san byi râ nghut lhê. Haù nghut jáng, nga-nhúng gi, lumjínng myit hau èq, jep é tarâ lé lhoq hpoí pyám râ lú? Ratsuí lhang a nghut! Nga-nhúng gi, jep é tarâ haù lé lhoq ging tîng é bang ru nghut lhê.

Abraham, Mara Hkyut San Huí É Hkyô

4 Haù su nghut jáng, nga-nhúng é íchyí íwa Abraham gi, haù hkyô mai hái wó sê yu ri nghû, tai râ lú?

- ² Abraham gi, zui sai é đông mai, mara hkyut san byi huí é ru nghut le gi, yhang nghutbun jang joq râ nghut lhê; nghut kôlhâng, Garai Gasâng é hí má
- ³ gi, yhang haù đông a nghut. Chyúm-

^a 3:18 Hkya-on 36:1

dang má hkâsu gà tô ri lúhú gà le, “Abraham gi, Garai Gasang lé lumjínj bē nghut mù, yhang lé, dingmán sū ga sòn byi bē nghut ri.”^a gà ri.

- ⁴ Zui saí é sū gi, yhang é zuihpau lé, chyunghuq dōng wó yu é a nghut é za, wó yū gínj luí, wó yu é ru nghut lhê.
- ⁵ Nghut kōlhang, zui saí é hkyô dōng a nghut é za, haū agè ashop hkyô lé mara hkyut san byí é Garai Gasang lé lumhkau é sū gi, yhang é lumjínj myit é yanmai, dingmán sū ga sòn byi huí
- ⁶ é nghut lhê. Haū eq rajung za, yhang zui saí é hkyô dōng a nghut é za, Garai Gasang èq dingmán sū ga sòn byi huí é, Garai Gasang chyáng mã é shimân jeju wó é sū eq séng luí, Dawiq taí é gi,
- ⁷ “Tarâ lu lai é lé mara hkyut pyám byi huí é eq yubak mara lé nghop pyám byi huí é bang gi, hkungsô wó nyi ri.
- ⁸ Bo tô é mara lé, Yhumsing èq mara a sòn byí é hui sū gi, hkungsô wó nyi ri.”^b gà ri.
- ⁹ Haū sū é jeju gi, ahpyo-kuq hpyit hkâm bāng é matú za nghut lhê lúhú? Ahpyo-kuq a hpyit bāng é matú le nghut lhê lúhú? Hkâsu mù gà le, Abraham é lumjínj myit lé, dingmán sū ga sòn byi bē nghut lhê nghú, nga-moq taí nyi bē nghut lhê. Haū su sòn byí é gi, hkâ-nhám nghut lhê lúhú? Ahpyo-kuq hpyit hkâm é htāng má lúhú? A nghut jáng, hí má lúhú? Haū gi, ahpyo-kuq hpyit hkâm é htāng má a nghut é za, hí má ru nghut lhê.
- ¹¹ Hau htoq agó, Abraham gi, yhang, ahpyo-kuq hpyit a hkam yū shí é hkún mai, lumjínj luí wó é dingmán hkyô gà é dizik nghut é, ahpyo-kuq

hpyit masat lé myang hkam yū bē nghut ri. Haū mù, yhang gi, haū ahpyo-kuq hpyit a hkam yū kōlhang, lumjínj é lhunglhāng bang lé dingmán bang ga sòn byí é wó hui rá matú, haū bāng é íwa dut bē nghut ri.

- ¹² Haū ahpyo-kuq hpyit hkâm é za a nghut, nga-nhūng é íwa Abraham, ahpyo-kuq hpyit a hkam yū shi má wó é lumjínj hkyo é hkyî-kám lé chāng luí ahpyo-kuq hpyit bāng é íwa le, yhang nghut ri.
- ¹³ Míngkân é amyú hkūng xoq pé dut rá ga, Abraham eq yhang é awut ashín pé lé byi tô é danggidiq gi, jep é tara é yanmai a nghut é za, lumjínj hkyô mai lo é dingmán hkyô dōng ru nghut
- ¹⁴ lhê. Hkâsu mù gà le, jep é tarâ dōng nyi yap é bang gi, amyú hkūng xoq pé nghut é nghut jáng, lumjínj hkyô gi, akyú a bo é eq, danggidiq gi, hpau a dap é dut byuq lhê. Haū jep é tarâ gi, nhikmo-yo hkyô lhoq htoq é nghut lhê; nghut kōlhang, jep é tarâ a joq jáng gi, tarâ lu lai hkyô le joq rá a nghut.
- ¹⁶ Haū mù luí, danggidiq gi, Abraham é awut ashín lhunglhāng bāng chyáng, jeju mai za lo é eq gíngtíng nyi é dut shāng gaq ga, lumjínj hkyô mai lo é nghut lhê. Haū gi, jep é tarâ má lòm bāng é matú baú za a nghut, Abraham é lumjínj hkyô má lòm bāng é matú le nghut lhê. Abraham gi, nga-nhūng lhunglhāng bāng
- ¹⁷ é íwa nghut ri. “Ngò gi, nang lé, byū myú myo myô é íwa dut nhāng bē.”^c ga kê tô é eq rajung za, haū shi byuq bē bang lé wó lhoq dui é eq a joq wú é zè lé joq shoq wó kut é, yhang lumjínj é sū Garai Gasang hí má, Abraham gi, nga-nhūng é íwa nghut lhê.

^a 4:3 Apûn 15:6, 22 ^b 4:8 Hkya-on 32:1-2 ^c 4:17 Apûn 17:5

¹⁸ “Náng é awut ashín pé le, haû eq rajung za myô lò râ nghut lhê.”^a ga yhang lé taí kyô to bê eq rajung za, yhang gi, myit myoqbyù jowò haí a joq kôlhang, lumjínq luí myoqbyu nyi é nghut mù, byù myû myo myô é îwa
¹⁹ dut bê nghut ri. Yhang gi, rashô zàn kô jé byuq bê nghut mù, yhânggùnq gi, shi é gyá dut é hui zô é eq Sarah é zoyhûm shibó le shum byuq kôlhang, yhang gi, lumjínq myit a yom
²⁰ byuq nghut ri. Hau htoq agó, Garai Gasâng é danggidiq eq séng luí, a lumjínq a dut é eq hê myit mhô myit a dut é za, yhâng é lumjínq myit lé saí lhoq ging tíng mù, Garai Gasang lé
²¹ hkya-on kungtôn luí, Garai Gasang gi, Yhang byí tô é danggidiq eq rajung za wó kut râ a-tsam bò sù nghut é lé,
²² yhang myit zing nyi ri. Hau é yanmai, “Yhang lé, dingmán sù ga són byi bê
²³ nghut ri.”^b gâ tô é nghut lhê. “Yhang lé, són byi bê.” ga, kê tô é dang gi,
²⁴ yhang é matú za a nghut, nga-nhûng é Yhumsíng Yesuq lé, shi é mai lhoq dui toq yû sù Garai Gasang lé lumjínq luí, Yhang èq dingmán bang ga són byi râ
²⁵ nghut é, nga-nhûng é matú le nghut lhê. Yhumsíng Yesuq gi, nga-nhûng é yubak marâ é matú, shí hkám byi râ dông ap pyâm é hui luí, nga-nhûng, mara hkyut san byí é hui râ matú, lhoq dui toq é hui bê nghut ri.

Nguingón Hkyô Eq Gabú Hkyô

5 Haû mù luí, nga-nhûng gi, lumjínq é dông mai mara hkyut san byí é hui bê nghut é yanmai, nga-nhûng é Yhumsíng Yesuq Hkrisduq dông, Garai Gasang eq buinùm wó xoq yû bê nghut lhê. Yesuq é yanmai, nga-nhûng gi, ahkuí wó

yu to bê jeju shí má, lumjínq luí wó wâng bê nghut mù, Garai Gasâng é hpungwup shingkang lé myoqbyù luí gabú gumrong nyi lhê. Haû za a nghut, nga-nhûng gi, wuîhke jamjau hkyô pé má le gabú gumrong nyi lhê. Hkâsu mù gâ le, wuîhke jamjau hkyô gi, hkam jan hkyô
⁴ lhoq htoq ri; hkam jan hkyô gi, myit a-tsam lhoq htoq lhê; myit a-tsam gi, myoqbyu to hkyô lhoq
⁵ htoq é lé, nga-nhûng sê lhê. Myoqbyu to hkyô haû gi, nga-nhûng lé myit wum gyui nhang é a nghut; hkâsu mù gâ le, Garai Gasang gi, Yhâng é chyitdap myit lé, Yhang mai, nga-nhûng lé byí tô é Chyoiyúng Woi-nyí dông, nga-nhûng é i-myt unghkaû má hut kat byi bê nghut ri.

⁶ Hkâsu mù gâ le, nga-nhûng gi, a-tsam a bò dut tô ashí u lé, ahkying hkyak má yhang, Hkrisduq gi, yubak dap bang nghut é nga-nhûng é
⁷ matú shí hkám byi bê nghut ri. Gè gè ga jáng, dingmán su é matú shí hkám byi râ byù gi, shau râ nghut lhê; nghut kôlhang, byù gè rayuq é matú kúm gi, wám shí hkâm é byù nyi sê
⁸ lhê. Nghut kôlhang, nga-nhûng gi, yubak dap bang nghut nyi ashí hkún, nga-nhûng é matú Hkrisduq shí hkám byí é má, Garai Gasang gi, Yhâng é chyitdap myit, nga-nhûng lé shit byi bê nghut ri.

⁹ Nga-nhûng gi, ahkuí, Yhâng é sui mai mara hkyut san byí é hui bê nghut mù, Yhâng é yanmai, Garai Gasâng é nhikmo-yo hkyô mai, hkyi yu
¹⁰ é je riyhang hui râ nghut lhê. Hkâsu mù gâ le, nga-nhûng gi, Garai Gasâng é gyè pé nghut nyi ashí u le,

^a 4:18 Apûn 15:5 ^b 4:22 Apûn 15:6

Yhâng Zo shí hkám byí é dông, Garai Gasang eq buinùm wó xoq yu é hui bê nghut lhê. Wó xoq yu to bê nghut jáng, nga-nhúng gi, Yhâng é asak dông mai, gè gè yhang hkyi yu
¹¹ é hui râ nghut lhê. Haû su za a nghut, nga-nhúng gi, nga-nhúng é Yhumsîng Yesuq Hkrisduq dông mai, buinùm wó xoq yu é jeju lé, ahkuí wó yu to bê nghut mù, Yhâng é yanmai, Garai Gasang má le, gabú gumrong nyi lhê.

Shi É Gi, Adam É Yanmai, Dui É Asak Gi, Hkrisduq É Yanmai

¹² Byù rayuq dông mai, yubak mara gi, mingkan má jé wâng bê nghut luí, shí-nò hkyô gi, yubak marâ é yanmai châng jé bê nghut ri; haû dông mai, byù lunglhang bang gi, yubak dap bang chyat nghut byuq mù, shí-nò hkyô gi, byù lunglhang bâng chyáng
¹³ jé bê nghut ri. Hkâsu mù gâ le, haû jep é tarâ lé a byi shimá, yubak mara gi, mingkan má joq to bê nghut lhê. Nghut kôlhang, jep é tarâ a joq shí é hkún gi, yubak mara lé mara su a
¹⁴ ngàm shí é nghut lhê. Haû su ga kôlhang, Adam su hkunmó lé lu lai é dông mara a kut shut bâng é ahtoq má lhang, shí-nò hkyô gi, Adám é ipyat mai Mosheq é ipyat jé shoq up nyi bê nghut ri. Adam gi, jé lé lò râ su é azòng nghut ri.
¹⁵ Nghut kôlhang, jeju chyunghuq gi, haû mara kut shut é hkyô su a nghut; hkâsu mù gâ le, mara kut shut é byù rayuq é yanmai, byù myo myo shi pyâm é nghut le gi, Garai Gasâng jeju eq Yesuq Hkrisduq gâ é byù rayuq é jeju mai lo é chyunghuq gi, byù myo myô é htoq má hkâ-í yhang byíng
¹⁶ mui nyi ri-nhung! Garai Gasâng jeju chyunghuq gi, byù rayuq kut é yubak mara su a nghut; hkâsu mù gâ le, tarâ

jéyáng é hkyô gi, byù rayuq é mara má cháng mù, mara dam byí é hkyô lhoq htoq é nghut lhê; nghut kôlhang, jeju chyunghuq gi, tarâ lu lai bang myo myo má cháng mù, mara hkyut san
¹⁷ byi hkyô lhoq htoq é nghut lhê. Hau htoq agó, byù rayuq tarâ lu lai luí, haû rayuq é yanmai, shí-nò hkyô up nyi bê nghut lhê, ahkuí kúm, haû Garai Gasâng é agùn agó shimân jeju eq dingmán hkyô é chyunghuq lé hap yu é bang gi, Yesuq Hkrisduq gâ é byù rayuq dông mai, je riyhang asak duí hkyô má uphkanq nyi kó râ nghut lhê.
¹⁸ Haû mù luí, tarâ lu lai é hkyô ralhúm é yanmai, byù lunglhang bang gi, mara dam byí é hui zo kô é su, dingmán hkyô é muzó ralhúm é yanmai, byù lunglhang bang gi, asak duí hkyô eq sêng é mara hkyut san byi
¹⁹ hkyô lé wó bê nghut ri. Hkâsu mù gâ le, byù rayuq jìno a gyô é yanmai, myo myo gi, yubak dap bang dut byuq é su, byù rayuq jìno gyô é yanmai, myo myo gi, dingmán bang gâ é hui kó râ nghut lhê.
²⁰ Haû jep é tarâ jat é gi, tarâ lu lai hkyô je myo râ matú nghut lhê. Nghut kôlhang, yubak mara myô jat é hkún, jeju gi, je riyhang myô jat
²¹ lo é nghut lhê. Haû mù, yubak mara gi, shí-nò hkyô dông uphkanq bê su, jeju gi, nga-nhúng é Yhumsîng Yesuq Hkrisduq é yanmai, ahtum abyuq é asak wó byí é dingmán hkyô dông up râ nghut lhê.

Hkrisduq Eq Rading Ralhum

6 Haû nghut jáng, nga-nhúng gi, hkâsu nghú taí râ l hú? Jeju myô jat lò sháng gaq nghú, nga-nhúng, yubak mara kut xoq nyi râ l hú? Haû su a nghut sháng gaq! Nga-nhúng gi, yubak mara eq shi gang bê bang nghut

- lhê; hkâsu mù haú má wó dui nyi
³ lo râ lú? Hkrisduq Yesuq eq rading
 ralhum za dut râ matú, wui-myhup
 hkâm yù bê bang nga-nhúng ban-
 shoq gi, Yhâng é shí hkám hkyô má
 le rading ralhum za dut râ matú,
 wui-myhup hkâm yù bê nghut é lé,
⁴ nungmoq a sé kó lú? Haú mù luí,
 Hkrisduq gi, Íwâ é hpungwup shing-
 kâng èq, shí bê mai lhoq dui toq huí
 é su, nga-nhúng le, asak asik dông wó
 dui nyi sháng gaq nghû, nga-nhúng gi,
 wui-myhup hkâm é dông, Yhang eq
 rahá, shí hkâm é eq myhup yhum é
 hui bê nghut lhê.
⁵ Nga-nhúng gi, Yhang shí hkám é
 hkyô má, Yhang eq rading ralhum
 za dut bê nghut jáng, Yhâng é dum
 dui toq hkyô má le, Yhang eq rading
 ralhum za hkyak dut râ nghut lhê.
⁶ Hkâsu mù gâ le, shí bê sù gi, yubak
 mara mai lhoq lhut é hui bê nghut
 é yanmai, nga-nhúng gi, yubak marâ
 é jùn dut nó a ra lo mù luí, yubak
 mara gùng gi, lhoq htên pyâm é hui râ
 matú, nga-nhúng é byù xau gi, Yhang
 eq rahá jén sat pyâm é hui bê nghut é
 hkyô lé, nga-nhúng sê lhê.
⁸ Haú mù, nga-nhúng gi, Yhang eq
 rahá shí hkám bê nghut jáng, Yhang
 eq rahá dui nyi râ nghut lhê nghû,
⁹ lumjínghê. Hkâsu mù gâ le, Hkrisduq
 gi, shí bê mai lhoq dui toq é hui bê
 nghut mù, Yhang gi, dum wó shi lo râ
 a nghut é lé, nga-nhúng sê lhê; shí-nò
 hkyô gi, Yhang lé hkâm-nhám le wó
¹⁰ sing to râ a nghut lo. Yhang shí hkâm é
 shí-nò hkyô gi, banshoq bâng é matú,
 yubak mara eq séng luí radàm za shí
 hkám byi bê nghut ri; nghut kôlhang,
 Yhang dui nyi é asak gi, Garai Gasâng
 hí má dui nyi é nghut lhê.
¹¹ Haú eq rajung za, nungmoq gi, yu-
 bak mara eq shi gang luí, Hkrisduq

- Yesuq dông Garai Gasâng é matú
 asak dui nyi lhê nghû, sôn yù keq.
¹² Haú mù luí, nungmoq é htên byoq
 sê é gungdu má, yubak mara lé
 hkâm-uphkâng nhâng, uphkâng nhâng
 kô é nghut jáng, gungdu yut yut ô nau
 é agè ashop hkyô lé, nungmoq châng é
¹³ nghut bê. Nungmoq é gungdu showui
 showang pé lé, agè ashop hkyo é
 chùng zè pé dông yubak mara má
 hkâm-ap byí pyám kó, shí bê mai lhoq
 dui toq yù huí é bang su, yhum-sing
 gùng yhum-sing, Garai Gasâng chyáng
 kúm ap byi keq; nungmoq é gungdu
 showui showang pé lé, dingmán hkyo
 é chùng zè pé dông, Garai Gasâng
¹⁴ chyáng ap byi keq. Hkâsu mù gâ le,
 nungmoq gi, jep é tarâ hkaú má a
 nghut lô é za, jeju hkaú má nghut nyí
 bekô yanmai, yubak mara gi, nung-
 moq lé sîng sù wó dut râ a nghut lo.

Dingmán Hkyo É Jùn Pé

- ¹⁵ Haú jáng gi, hkâsu kó lú? Nga-
 nhúng gi, jep é tarâ hkaú má a nghut
 lo é za, jeju hkaú má nghut nyí bekô
 yanmai, mara wó kut shut kó râ lú?
¹⁶ Haú su a wó kut! Nungmoq gi, ra-
 yuq yuq é jìno gyo râ matú, yhum-
 sing gùng lé jùn pé dông ap pyâm
 é hkûn, shí-nò hui râ nghut é yubak
 marâ é jùn dông nghut kôlhang, ding-
 mán hkyô wó râ nghut é jìno gyo hkyô
 nghut kôlhang, nungmoq châng nyi é
 nghut le gi, nungmoq, haú é jùn dut
¹⁷ bê lé, a sé kó lú? Nungmoq gi, yubak
 marâ é jùn dut wú bê bang nghut kô-
 lhang, nungmoq hkam yu to bê mhoq-
 shit hkyô lé, nungmoq é myit nhik-
 lhum banshoq èq cháng bekô nghut é
 yanmai, Garai Gasang lé jeju hkyo-on
¹⁸ sháng. Nungmoq gi, yubak mara mai
 lhoq lhut é hui bang nghut kômù,
 dingmán hkyo é jùn dut bekô nghut ri.

¹⁹ Nungmoq gi, sê gyô é nyan má wum nyhôm é bang nghut kô é yanmai, byu pé sê gyo râ đông ngò tai râ ga jáng: nungmoq gi, nungmoq é gungdu showui showang pé lé, a sansêng é hkyô eq agè ashop hkyô myô jat nhang é má jùn đông lhang ap byi wú bekô nghut é su, ahkuí gi, chyoyúng hkyô wó yû râ matú, haú pé lé, dingmán hkyô má jùn đông ap byi ²⁰ keq. Nungmoq gi, yubak marâ é jùn dut nyi kô é hkûn, dingmán hkyo èq uphkanq é mai lut nyi kô é nghut ²¹ lhê. Ahkuí, nungmoq hoqjung nghû wú htoq é pé gi, haú u lé, hai akyû wó yû kô é lhú? Hau pé gi, shi byuq é má ²² htûm é chyat nghut ri. Nghut kôlhqng, ahkuí gi, nungmoq, yubak mara mai lhoq lhut é hui bekô nghut mù, Garai Gasâng é jùn dut bekô nghut ri; hau é akyû gi, chyoyúng hkyô wó yu é nghut mù, ahtum abyuq é asak ²³ wó râ nghut lhê. Hkâsu mù gâ le, yubak marâ é ahpau gi, shi é hkyô nghut ri; nghut kôlhqng, Garai Gasâng é chyunghuq gi, nga-nhûng é Yhum-sîng Hkrisduq Yesuq é yanmai, ahtum abyuq é asak nghut ri.

Tarâ Mai Lut É Hkyô

7 Gumang wui ê, ngò gi, tarâ lé sê é bang nungmoq lé tai nyi lhê: haú tarâ gi, byû rayuq lé, yhang, asak dui nyi é u lé za wó uphkanq é lé, nungmoq a sé kó lhú? Dangké, ikun wàng bê myiwe myhí rayuq gi, yhang é yhumsîng hpó asak dui nyi é ahkýing má, tarâ èq up zing tô é hui ri; nghut kôlhqng, yhang é yhumsîng hpó shi byuq é nghut jáng gi, haú ikun wàng tarâ mai, yhang wó lut bê nghut ri. ³ Haú nghut é yanmai, yhang é yhum-

sîng hpó asak dui nyi ashî u lé, yuqgè góyuq eq hâng lhûm é nghut jáng gi, yhang lé, sulàng lú sô ga kó râ nghut lhê. Nghut kôlhqng, yhang é yhum-sîng hpó shi byuq é nghut jáng gi, yhang, tarâ haú mai lut bê nghut luí, yuqgè góyuq eq hâng lhum kôlhqng, sulàng lú sô a nghut lo.

⁴ Haú mù luí, ngá é gumang wui ê, nungmoq le, haú shi byuq é mai lhoq dui toq yû hui bê sô Yuqgè chyáng wó xoq mù, nga-nhûng gi, Garai Gasang lé ashi wó zui byi sháng gaq ga, Hkrisduq é gungdu đông mai, jep é ⁵ tarâ eq shi gang bê nghut lhê. Hkâsu mù gâ le, nga-nhûng, yubak gungsho má nghut nyi é hkûn, nga-nhûng gi, shî-nò hkyo é ashi zui sháng gaq ga, jep é tarâ é yanmai htoq lo é yubak yut yut ô nau é hkyô gi, nga-nhûng é gungdu pé má mù zui nyi é nghut lhê. ⁶ Nghut kôlhqng, ahkuí gi, nga-nhûng lé up zing tô é jep é tarâ eq shi gang bê nghut mù, jep é tarâ mai lut bê nghut é yanmai, kâ tô é hkyô xau đông a nghut é za, Woi-nyí é hkyô sik đông nga-nhûng dojaú nyi é nghut lhê.

Jep É Tarâ Eq Yubak Mara

⁷ Haú jáng, nga-nhûng hkâsu tai râ lhú? Jep é tarâ gi, yubak mara nghut lhê lhú? Ratsuí lhang a nghut! Gè gè ga jáng, haú jep é tarâ đông mai za a nghut le, yubak mara lé, ngò wó sê é a nghut. Hkâsu mù gâ le, “myoqnoq myit hkâbô”^a ga jep é tarâ má a tai tô é nghut jáng, myoqnoq é hkyô ⁸ lé, ngò sé râ a nghut. Nghut kôlhqng, yubak mara gi, hkunmó é ahkáng lé chûng mù, ngò má myoqnoq hkyô jung hkanqmó lhoq htoq byi ri; hkâsu mù gâ le, jep é tarâ hkaú má a nghut

^a 7:7 Htoq Ló 20:17

jáng, yubak mara gi, shi é za nghut
⁹ lhê. Ngò gi, tarâ hkaû má a nghut é za
 asak dui wú bê nghut lhê; nghut kô-
 lhang, haû hkunmó htoq lô jáng, yu-
 bak mara gi, dui lò mù, ngò gi, shî
¹⁰ bê nghut lhê. Haû mù luí, asak dui
 nhâng râ matú nghut é hkunmó haû
 gi, shî-nò hkyô dut byuq é lé, ngò
¹¹ wó sê é nghut lhê. Hkâsu mù gâ le,
 yubak mara gi, hkunmó é ahkáng lé
 chûng mù, ngo lé mhaû yù luí, hau
¹² èq ngo lé shî nhang ri. Hau pé lé wú
 jáng, jep é tarâ gi, chyoyúng ri; haû
 hkunmó gi, chyoyúng, dingmán é eq
 ge é nghut ri.
¹³ Haû nghut jáng, ge é hkyô haû gi,
 ngá é matú shî-nò hkyô dut byuq bê
 lú? Haú dông a nghut! Nghut kô-
 lhang, yubak mara lé gi, yubak mara
 dông hkyak wó lhoq htoq shit râ
 matú, haû ge é hkyô dông mai, yu-
 bak mara gi, ngò má shî-nò hkyô lhoq
 htoq bê nghut luí, yubak mara gi, gè
 gè yhang agè ashop dut é lé, hkunmó
 dông mai tân shit é nghut lhê.
¹⁴ Hau htoq agó, jep é tarâ gi, woi-nyí
 eq sêng é hkyô nghut é lé, nga-nhúng
 sê lhê; nghut kôlhang, ngò má gi,
 gungsho eq sêng é hkyô za bo é nghut
 luí, yubak mara má jùn dông ung zô
¹⁵ é hui bê nghut lhê. Ngò haí kut nyi é
 hkyô lé, ngò a sé. Hkâsu mù gâ le, ngò
 kut nau é hkyô lé gi, a kut é za, ngò a
 jú é hkyô lé kut é yanmai nghut lhê.
¹⁶ Ngò a kut nau é lé kut é nghut jáng gi,
 haû jep é tarâ ge é lé, ngò myit huí é
¹⁷ nghut lhê. Ahkuí gi, haû lé ngò yhang
 kut nyi é a nghut lo, ngò má lúng tô
 é haû yubak sheq kut é ru nghut lhê.
¹⁸ Ngò má, nghut bê, ngá é yubak gung-
 sho má ge é hkyô haí le a bo é lé, ngò
 sê lhê. Hkâsu mù gâ le, ge é hkyô lé
 kut nau é myit ngò má bò kôlhang,
¹⁹ haû lé a wó kut htoq nghut ri. Hau é

yanmai, ngò kut nau é ge é hkyô lé
 gi, a kut é za, ngò a kut nau é agè
 ashop hkyô lé gi, ngò xoq kut nyi ri.
²⁰ Ahkuí, a kut nau é hkyô lé ngò kut nyi
 é nghut jáng, haû lé ngò yhang kut nyi
 é a nghut lo é za, ngò má lúng tô é haû
 yubak sheq haû lé kut nyi é ru nghut
 lhê.
²¹ Haû mù, ge é hkyô lé ngò kut nau
 é hkûn, ngò má agè ashop hkyô htoq
 lô lô mù é tarâ lé, ngò myang ri.
²² Hkâsu mù gâ le, ngò gi, Garai Ga-
 sâng é tarâ lé, ngá é i-myt unghkaû
²³ má myit nguì gabú nyi lhê. Nghut
 kôlhang, ngá é gungdu showui sho-
 wang pé má bo é gotú tarâ gi, ngá é
 i-myt tarâ eq majan zân lhum é nghut
 luí, ngá é gungdu showui showang
 hkaû má mù zui nyi é yubak é tarâ
 má, ngo lé shúmbyû dut nhang é lé,
²⁴ ngò myang ri. Ngò gi, shogyo rayhup
 dut sù nghut ri-nhung! Shî nhang é
 gungdu shî mai, ó yuq wá, ngo lé wó
²⁵ hkyi yù râ lú? Nga-nhúng é Yhum-
 sîng Yesuq Hkrisduq dông mai wó lut
 bê nghut mù, Garai Gasang lé jeju
 hkya-ôn nyi lhê!

Haû mù luí, ngò yhang, myit é dông
 gi, Garai Gasâng é tarâ lé châng lhê,
 nghut kôlhang, yubak gungsho dông
 gi, yubak é tarâ lé châng lhê.

Haû Woi-nyí Mai Asak Dui É Hkyô

8 Haû mù luí, ahkuí, Hkrisduq
 Yesuq má nghut nyí bâng é matú
 gi, mara byí é hkyô a joq lô é nghut
² lhê. Hkâsu mù gâ le, asak dui hkyô
 eq sêng é Woi-nyí é tarâ gi, Hkrisduq
 Yesuq dông, yubak mara eq shî-nò
 hkyo é tarâ mai, ngo lé lhoq lhut yù
³ bê nghut lhê. Haû jep é tarâ gi, yubak
 gungshô é yanmai, wum nyhóm luí a
 wó kut é hkyô lé, Garai Gasang gi, yu-
 bak mara hkungga dut nhâng râ matú,

yubak byu é gunghkyâng dông, Yhang Zo sîng lé nhang kat é dông kut pyám

⁴ bê nghut ri. Haû mù, Garai Gasang gi, yubak gungsho dông asak a dui é za Woi-nyí dông asak duì bang nghut é nga-nhúng má, haû jep é tarâ má bo é hkyô pé lé, wó lhoq dik râ matú, gungsho ralhùm má, mara lé doqdân pyám bê nghut ri.

⁵ Haû yubak gungsho dông asak dui é bang gi, gungsho yut yut ô nau é hkyô pé lé myit zuq nyi akô; haû Woi-nyí dông asak dui é bang kúm gi, Woi-nyí ô nau é hkyô pé lé myit zuq nyi akô

⁶ nghut ri. Haû yubak byu é myit gi, shi é hkyô nghut ri; haû Woi-nyí èq hkgang to huí su é myit kúm gi, asak eq nguìngón hkyô nghut ri. Haû yubak myit gi, Garaí é tarâ ô má a nyi é htoq agó, haû lé a wó cháng kut é yanmai, Garaí

⁸ é gye nghut ri. Haû yubak gungshô èq hkgang tô é hui bang gi, Garai Gasang lé a wó gabú nhâng kó nghut ri.

⁹ Nghut kôle, Garai Gasâng é Woi-nyí gi, nungmoq chyáng lúng nyi bê nghut jáng, nungmoq gi, haû yubak gungshô èq hkgang to huí é bang a nghut lô é za, Woi-nyí èq hkgang to huí é bang nghut akô. Rayuq yuq gi, Hkrisduq é Woi-nyí lé a wó é nghut jáng, Hkrisduq eq

¹⁰ a sêng é sù nghut lhê. Nghut kôlhang, nàng má Hkrisduq nyi nyi é nghut jáng, náng é gungdu gi, yubak marâ é yanmai shi kôlhang, náng é woi-nyí gi, dingmán hkyo é yanmai dui nyi ri. Hau htoq agó, Yesuq lé shi é mai lhoq dui toq yû Su é Woi-nyí gi, nungmoq má nyi nyi é nghut jáng, Hkrisduq Yesuq lé shi é mai lhoq dui toq yû Sû gi, nungmoq má nyi nyi é, Yhâng é Woi-nyí dông mai, nung-

moq é, shi sê é gungdu pé lé le, asak duì nhâng râ nghut lhê.

¹² Haû mù luí, Gumang wuì ê, nga-nhúng gi, yubak gungsho dông asak duì râ matú, wó wó é bang a nghut.

¹³ Hkâsu mù gâ le, haû yubak gungsho dông asak duì kô é nghut jáng, nungmoq gi, shi râ nghut lhê; nghut kôlhang, haû gungshô é shut shaí hkyô lé, Woi-nyí èq sat pyám kô é nghut jáng, nungmoq gi, asak duì râ

¹⁴ nghut lhê. Garai Gasâng é Woi-nyí èq shuí u é hui bang gi, Garai Gasâng é yhangzô pé nghut lhê. Hkâsu mù gâ le, nungmoq gi, gyuq râ matú, nungmoq lé jùn dum taù dut nhang é woi-nyí lé, a hap yu é za, nga-nhúng lé zo yín yu é Woi-nyí lé hap yu tô é bang ru nghut lhê; haû mù, nga-nhúng gi, Yhang é yanmai, “Aba,^a Áwa ê” nghú wut é nghut

¹⁶ lhê. Nga-nhúng gi, Garai Gasâng é yhangzô pé nghut é lé, Woi-nyí haû gi, nga-nhúng é woi-nyí eq rahá saksé

¹⁷ hkâm nyi ri. Ahkuí, nga-nhúng gi, zo wuì nghut bê yanmai, Hkrisduq eq rahá, Garai Gasâng é amyû hkûngxoq pé wó dut é nghut lhê. Nga-nhúng gi, Hkrisduq é wuìhke jamjau pé lé, gè gè yhang bo hui zô é nghut jáng, Yhâng é hpungwup shinggang lé le, bo myang hkam yù râ nghut lhê.

Htângnùng Lhê É Hpungwup Shinggang

¹⁸ Nga-nhúng é ahkuí lhê é wuìhke jamjau hkyô pé gi, nga-nhúng lé shit râ nghut é hpungwup shinggang eq whuí râ a gingdán nghú, ngò wó

¹⁹ myit ri. Haû hpan to huí é lhunglhang gi, Garai Gasâng é yhangzô pé lé lhoq

^a 8:15 Aba gâ é gi, Aramaik dang dông “áwa” gâ é lichyúm nghut lhê.

htoq shit byi râ lé, gyai yhang myit
²⁰ lánq nyi akô nghut ri. Hkâsu mù gà le, haû hpan to huí é lhunglhang gi, akyû a bo é chyat dut byuq bê nghut ri. Haû gi, yhumsing hkyin yu é dông a nghut é za, haû su dut nhâng Sû ô nau
²¹ é dông kut é nghut ri. Haû hpan to huí é lhunglhang gi, htên byoq byuq râ matú shúm dut é mai lhoq lhut é hui luí, Garai Gasang é yhangzo pê é hpungwup bo é luthkyô má wó wâng râ matú, myoqbyu tô é nghut lhê.
²² Haû hpan to huí é lhunglhang gi, ahkuí hkying jé shoq, zohkû-nò no é su nò-kying kying nyi kô é lé, nga-nhung sê lhê. Haû pé za a nghut,
²³ Woi-nyí é sang-hi ashí^a lé wó yû bê bang nga-nhung le, zo pé dông yín yu é jeju lé lánq uchyang, i-myt ung-hkaû má nò-kying kying é nghut lhê. Zo pé dông yín yu é jeju haû gi, nga-nhung é gungdu hkyi xe yû hkyô
²⁴ nghut lhê. Hkâsu mù gà le, nga-nhung gi, myit myoqbyû hkyô haû mai hkyi yu é hui bê nghut lhê. Nghut kô-lhang, byu-myang é lé myit myoqbyu é gi, myit myoqbyu é hkyô ratsuí le a nghut. Yhumsing myang to bê é lé, ó yuq wá myit myoqbyû shirâ
²⁵ lú? Nghut kô-lhang, nga-nhung gi, a wó shí é lé myit myoqbyu é nghut jáng, myit hîng hîng kut lánq é nghut lhê.
²⁶ Haû eq rajung za, Woi-nyí gi, nga-nhung wum nyhôm é hkyô má garúm byí ri. Nga-nhung gi, haí dung râ é lé a sé kô-lhang, haû Woi-nyí yhang gi, dang mai a wó taí htoq é nò-kying htê dông, nga-nhung é matú bo dông
²⁷ xoq byí ri. Nga-nhung é i-myt ung-hkaû lé gôn wú é Sû gi, haû Woi-nyí myit é hkyô lé sê lhê, hkâsu mù gà le,

haû Woi-nyí gi, Garai Gasang ô nau é dông, sân-yúng bâng é matú bo dông xoq byí ri.

Banshoq Lé Je Wó Ung Pyám Râ Hkyô

²⁸ Garai Gasang gi, Yhang myit sôn tô é eq rajung za, ji yû luí, Yhang lé chyitdap bâng é matú, lhunglhang lé ge é dông chyat kut é hkyô lé, nga-nhung sê lhê. Hkâsu mù gà le, Yhang
²⁹ Zo gi, gumang wuì myo myo má zomún dut sháng gaq ga, Garai Gasang gi, hí te sê tô é bang lé, Yhang Zô é sâmlai eq wó pûng nhâng râ matú, hí
³⁰ mai masat to bê nghut ri. Hau htoq agó, Yhang, hí mai masat to bê bang lé gi, ji yu ri; ji yû bê bang lé gi, mara hkyut san byí ri; mara hkyut san byí é hui bang lé gi, hpungwup shinggang bò nhang ri.
³¹ Haû jáng gi, shí hkyô eq séng luí, nga-nhung haí taí shirâ lú? Garai Gasang gi, nga-nhung hkyam shut nghut jáng, nga-nhung lé, ó yuq wá gye wám
³² kut râ lú? Yhumsing é Yhangzo lé lhang a ha bûn é za, nga-nhung banshoq bâng é matú ap byí pyám é Sû gi, Yhang lé le, lhunglhang lé le, rahá
³³ láí láí byi râ a nghut lú? Garai Gasang éq hkyin yu to bê bang lé, ó yuq wá mara wó hûn râ lú? Garai Gasang gi, mara hkyut san byi Sû nghut ri.
³⁴ Hkrisduq Yesuq gi, shí hkám luí, shí hkâm é htoq agó, shi é mai lhoq dui toq yu é hui mù, Garai Gasang é loqyo hkyam má nghut nyí luí, nga-nhung é matú bo dông xoq byí nyi bê nghut é yanmai, ó yuq wá mara wó byi râ
³⁵ lú? Hkrisduq é chyitdap myit mai, nga-nhung lé, hai eq wá wó lhoq kang râ lú? Gunjang huí é hkyo éq luq? Wuíhke huí é hkyo éq luq? Zing-ri huí

^a 8:23 Woi-nyí é sang-hi ashí gà é gi, Woi-nyí gi, Garai Gasang byí é chyunghuq pé mâ é sang-hi lhum nghut lhê.

é hkyo èq luq? Mutmó huí é hkyo èq luq? Gùng chîn dut huí é hkyo èq luq?
³⁶ Gyuyq jung èq luq? Sham èq luq? Haú gi,
 “Náng é yanmai, ngamoq, nyí wuí sat pyâm é huí nyi ri; sat râ matú nyhi tô é sau pé lé su, ngamoq lé myit pyâm akô.”^a
³⁷ ga kê tô é eq rajung za nghut ri. A wó lhoq kang; nga-nhúng lé chyt-dap Su é yanmai, nga-nhúng gi, haú pé banshoq lé je wó ung pyâm é
³⁸ nghut lhê. Hkâsu mù gâ le, shí kô-lhang, byùn kô-lhang, maumang lagyô pé nghut kô-lhang, agè ashop é nat pé nghut kô-lhang, shí ipyat nghut kô-lhang, htang pyat nghut kô-lhang, haí jung a-tsam pé nghut kô-lhang,
³⁹ htoq tsáng mâ é nghut kô-lhang, a-ô tsáng mâ é nghut kô-lhang, hpan tô é gotú haí nghut kô-lhang, nga-nhúng é Yhumsîng Hkrisduq Yesuq má bo é Garai Gasâng é chyt-dap myit mai, nga-nhúng lé wó lhoq kang pyám râ a nghut nghû, ngò gi, hkyak wó sê yu ri.

**Garai Gasang Hkyin
 Yu É Israelaq Byu Pé**

9 Ahkuí, ngò gi, Hkrisduq má teng-mán é dang taí râ; ngò a mhaú é lé, haú Chyoiyúng Woi-nyí gi, ngá é unghkaú myit má hkyak saksé hkâm
² nyi ri. Ngò gi, ngá é myit nhiklhum má, gyai yhang yón kuq nyi é eq
³ ayang hpuzô nyi lhê. Hkâsu mù gâ le, ngò gi, ngá é byuhú, ngá é gumang wui é matú, nhîng é hui luí Hkrisduq eq gang le lhang gè râ su
⁴ gâ ri. Haú bang gi, Israelaq byu pé nghut lhê. Zo yín yú huí é hkyô le, hpungwup shingkaq le, dangshikaq pé le, tarâ lé myang hap yu

é hkyô le, noqkuq yhûm má noqkuq é hkyô le, danggidiq pé lé le,
⁵ yhangmoq wó yu akô nghut ri. Haú myîng hû é îchyí îwâ pé gi, yhangmoq é îchyí îwâ pé nghut luí, byu é hkyam dông gon jáng, Hkrisduq gi, yhangmoq amyû mâ é nghut ri. Yhang gi, lhunglhang lé up é, ahtum abyuq hkya-on huí é Garai Gasang nghut ri! Amen.
⁶ Haú gi, Garai Gasâng é danggidiq akôm dut byuq bê nghû nau é a nghut. Hkâsu mù gâ le, Israelaq byu pé banshoq bang gi, Israelaq byù akying
⁷ chyat a nghut kó nghut ri. Abraham é awut ashín banshoq bang gi, yhang é zo wuí akying chyat nghû a wó taí é nghut lhê. Hau é malaí, “Isak dông mai lo é lé, náng é awut ashín nghû sôn byi râ nghut lhê.”^b gâ tô ri.
⁸ Radông taí sháng ga jáng, gungsho mai hku é zo wuí gi, Garai Gasâng é zo wuí akying a nghut kó, danggidiq eq sêng é zo wuí za sheq, Abraham é awut ashín pé dông sôn byí é
⁹ nghut lhê. Hkâsu mù gâ le, “Masat tô é ahkyíng má, ngò dum taú lé mù, Sarah gi, yuqzo hkû râ nghut lhê.”^c ga taí tô é danggidiq é yanmai nghut lhê.
¹⁰ Haú za a nghut, Rebeka é yhangzô nhiktang é îwa gi, nga-nhúng é îwa nghut su Isak rayuq za nghut lhê.
¹¹⁻¹² Nghut kô-lhang, Garai Gasang myit hpyit to mù hkyin yu é hkyô gi, muzó mai a nghut é za, hkyin ji yù Su é yanmai nghut é lé, wó gîng nyí sháng gaq ga, haú zozúm nhik a hku lé shí é htoq agó, ge é eq a ge é muzó haí lhang a kut shimá, “Haú ko sù yuq gi, tiq sù yuq lé dojaú râ nghut lhê.”^d ga, Rebeka lé taí kyô tô é nghut lhê.

^a 8:36 Hkya-on 44:22 ^b 9:7 Apûn 21:12 ^c 9:9 Apûn 18:10, 14 ^d 9:11 Apûn 25:32

- ¹³ Haû gi, “Yakup lé, ngò chyitdap lhê, nghut kôlhang, Eso lé gi, a ngui é nghut lhê.”^a ga kâ tô é eq rajung za nghut ri.
- ¹⁴ Haû nghut é yanmai, nga-nhúng hkâsu nghû taí râ? Garai Gasang gi, a tarâ é sù nghut lhê lhú? Ratsuí lhang
- ¹⁵ a nghut! Hkâsu mù gà le,
 “Ngò, shogyo nhikmyin naù sù lé, shogyo nhikmyin râ nghut lhê;
 Ngò, jeju byi naù sù lé, jeju byi râ nghut lhê.”^b
- ¹⁶ ga, Mosheq lé Yhang taí ri. Haû mù luí, haû hkyin yu é hkyô gi, byù yut yut ô nau é yanmai le a nghut, shikut é yanmai le a nghut, Garai Gasâng é shogyo nhikmyin é yanmai za nghut lhê. Hkâsu mù gà le, Chyúmdang má, “Náng chyáng Ngá é a-tsam wó tún shit râ eq mingkan gón má Ngá é mying lhoq pyo é hui râ matú sheq, Ngò, nang lé lhoq toq kat é nghut lhê.”^c ga, Hpara-uq lé taí ri. Haû mù luí, Garai Gasang gi, shogyo nhikmyin naù sù lé, shogyo nhikmyin mù, myit lhoq htân byi naù sù lé, myit lhoq htân byi ri.
- ¹⁷ Nungmoq mâ é rayuq yuq, “Haû jáng, Garai Gasang gi, ngamoq lé haî mù mara hun nyi ashí lhú? Yhang ô nau é hkyô lé, ó yuq wá wó hkûm pyâm lhê lhú?” ga, ngo lé taí kó râ
- ¹⁸ nghut lhê. Nghut kôlhang, Garai Gasang lé dang tu sù byù nang gi, ó yuq wá nghut lhê lhú? Saí to hui bê é zè pé gi, “Nàng, haî mù ngo lé shí su kut saí tô lhê lhú?” nghû saí é Sù lé wó
- ¹⁹ taí râ lhú? Tso-au saí sù gi, tsohtung ralhum mai za, hkik é tso-au pé eq a hkik é tso-au pé saí râ ahkáng wó lhê a nghut kô lhú?
- ²⁰ Nghut kôlhang, Garai Gasang lé dang tu sù byù nang gi, ó yuq wá nghut lhê lhú? Saí to hui bê é zè pé gi, “Nàng, haî mù ngo lé shí su kut saí tô lhê lhú?” nghû saí é Sù lé wó taí râ lhú? Tso-au saí sù gi, tsohtung ralhum mai za, hkik é tso-au pé eq a hkik é tso-au pé saí râ ahkáng wó lhê a nghut kô lhú?
- ²¹ taí râ lhú? Tso-au saí sù gi, tsohtung ralhum mai za, hkik é tso-au pé eq a hkik é tso-au pé saí râ ahkáng wó lhê a nghut kô lhú?
- ²² Garai Gasang gi, Yhâng é nhikmo-yo hkyô tún shit luí, Yhang é a-tsam lé sé nhâng naù kôlhang, htên byoq râ matú hen tô é, nhikmo-yo gíng é tso-au pé lé, myit hîng hîng shirang pyâm nyi é hkyô lé, taí râ
- ²³ jang haî joq ashí lhú? Hpungwup shingkâng é matú noq mai hen to bang nghut é, Yhang shogyo nhikmyin huí é bang lé, Yhâng é agùn agó é hpungwup shingkang lé sé nhâng naù mù, Yhang haû su kut é nghut jáng, taí râ
- ²⁴ haî joq ashí lhú? Haú bang gi, Yudaq byu pé mai za a nghut, tungbaù pé mai le ji yù huí é bang nga-nhúng
- ²⁵ nghut lhê. Haû eq rajung za, Hosea laiká má Yhang taí tô é gi,
 “Ngá é byù myú a nghut é bang lé, ‘Ngá é byù myú’ nghû;
 Ngò a chyit é byizo lé ‘Ngò chyit sù’ nghû wut râ nghut lhê.”^d
- ²⁶ gà ri. Haû mù,
 “‘Nungmoq gi, ngá é byù myú pé a nghut.’ nghû yhangmoq lé taí é jowò má yhang,
 yhangmoq gi, ‘Rû dui nyi é Garai Gasâng yhangzô pé’ ga wut é hui kó râ nghut lhê.”^e
- ²⁷ Esai-aq le, Israelaq byu pé eq séng luí garu taí é gi,
 “Israelaq yhangzo yhangshû pé gi, wuìshuq lung-aù yàm má é semuí su myo kôlhang,
 myit gyó tô é bang za sheq hkyi yu é hui kó râ nghut lhê.
- ²⁸ Hkâsu mù gà le, haû Yhumsîng gi, myidàm htoq má Yhâng é tarâ jéyáng hkyô lé hân hân lhoq dik lhoq htúm pyám râ nghut lhê.”^f

^a 9:13 Mal 1:2-3 ^b 9:15 Htoq Ló 33:19 ^c 9:17 Htoq Ló 9:16 ^d 9:25 Hos 2:23^e 9:26 Hos 1:10 ^f 9:28 Esai 10:22-23

gâ ri.

²⁹ Haû eq rajung za, hí lé Esai-aq taí tô é gi,

“A-tsam dik shoq bò sù haû
Yhumsîng za, nga-nhúng lé,
awut ashín a myhit to byí é
nghut jáng,

nga-nhúng gi, Sodom wà su dut
byuq luí, Gomoraq myuq eq
pung byuq râ nghut lhê.”^a

gâ ri.

Israelaq Byu Pé A Lumjîng Kô É Hkyô

³⁰ Haû mù, nga-nhúng hkâsu nghû taí râ lúhú? Dingmán hkyô lé a châng hkat é tûngbaù pé gi, haú lé wó yù bekô; haû gi, lumjîng hkyô é yanmai wó yu

³¹ é dingmán hkyô nghut ri. Nghut kô-lhang, tarâ eq sêng é dingmán hkyô lé châng hkat é Israelaq byu pé gi, haú

³² lé a wó yù kó nghut ri. Haû mù a wó yù kô é lúhú? Yhangmoq gi, lumjîng myit èq châng hkat kô é a nghut é za, muzó pé èq châng hkat kô é yanmai, a wó yù kô é nghut ri. Yhangmoq gi, “htung htê râ luqgok” má htung leng

³³ bekô nghut ri. Haû,

“Wú keq, htung leng râ luqgok eq
myit leqbat nhâng râ luqmó
cham lé, Ngò, Zi-un bùm má
lheq to luí,

Yhang lé lumhkaû sù gi,
hkâ-nhám le hoq hpu é hui râ
a nghut.”^b

ga kâ tô é eq rajung za nghut ri.

10 Gumang wuì ê, ngò gi, haû Israelaq byu pé hkyi yu é hui kó sháng gaq nghû, gyai yhang myit shirông luí, Garai Gasâng chyáng yhangmoq é matú kyûdung byí nyi
² lhê. Hkâsu mù gâ le, yhangmoq gi, Garai Gasâng é hkyô lé gyai yhang

myit zuq é bang nghut é lé, ngò saksé hkâm lhê; nghut kôlhang, yhangmoq myit zuq é hkyô gi, hpaqchyí bo é

³ dông a nghut kó. Yhangmoq gi, Garai Gasâng chyáng mai jé lé é dingmán hkyô lé a sé kômù, yhumsîng dingmán bûn é hkyô lé za ho shikut nyi kô é yanmai, Garai Gasâng é dingmán hkyô hkaû má a nyi kó
⁴ nghut ri. Hkrisduq gi, lumjîng bang yuq hkangmó, dingmán é má wó jé kó sháng gaq ga, jep é tarâ ló htûm jang dut bê nghut ri.

⁵ Mosheq gi, “Haú pé dông châng é sù gi, haú pé mai asak duì râ nghut lhê.”^c ga, jep é tarâ eq sêng é dingmán hkyô lé kâ sâh kyô tô é nghut

⁶ lhê. Nghut kôlhang, lumjîng hkyô eq sêng é dingmán hkyô gi, “Náng é myit nhiklhûm má, ‘Mauhkhûng má, ó yuq doq ló râ lúhú?’^d (Haû gi, Hkrisduq lé shuí gyó lò râ gâ nau é nghut lhê),

⁷ haû a nghut jáng, ‘Nik é jang má, ó yuq gyó wâng râ lúhú?’^e (Haû gi, Hkrisduq lé, shi é mai dui toq nhâng râ gâ nau é nghut lhê.), nghû hkâ-

⁸ taí kó.” gâ tô ri. Haû jáng, hkâsu gâ tô ri lúhú? “Haû mungdang gi, nàng eq chyâng nyi ri; náng é nhut má le, náng é myit nhiklhûm má lé nghut nyi ri.”^f gâ tô ri. Haû gi, ngamoq hko taí é lumjîng hkyô eq sêng é mungdang

⁹ nghut lhê. Haû mù, “Yesuq gi, Yhumsîng nghut ri.” nghû náng é nhut èq yín yù mù, Garai Gasang gi, Yhang lé, shi é mai dui toq nhâng bê nghut lhê nghû, náng é myit nhiklhûm má lumjîng é nghut jáng, nàng gi, hkyi

¹⁰ yu é hui râ nghut lhê. Hkâsu mù gâ le, byù gi, myit nhiklhûm má lumjîng jáng, mara hkyut san byí é hui mù, nhut mai yín yù jáng, hkyi yù

^a 9:29 Esai 1:9 ^b 9:33 Esai 8:14, 28:16 ^c 10:5 Nhong 18:5 ^d 10:6 Tarâ Pun 30:12

^e 10:7 Tarâ Pun 30:13 ^f 10:8 Tarâ Pun 30:14

¹¹ huí é nghut lhê. Haú Chyúmdang taí é gi, “Yhang lé lumhkau é sù ó yuq le, hkâ-nhám lháng hoq hpû é hui râ a nghut.”^a gâ ri. Hkâsu mù gâ le, Yudaq byù eq tûngbaù pè é gyoro má gam hkoq é hkyô haí le a joq é za, haú Yhumsîng gi, banshoq bâng é Yhumsîng nghut lhê mù, Yhang lé wut dung bang lhunglháng lé, agùn agó ¹³ shimân byí ri. Hkâsu mù gâ le, “Haú Yhumsîng é myîng lé láng é bang yuq hkanqmó gi, hkyi yu é hui râ nghut lhê.”^b gâ tô ri.

¹⁴ Haú nghut lé gi, yhangmoq a lumjîng é sù lé nhîng, hkâsu wó wut dung kó râ lú? Yhangmoq a wó gyô wú é sù lé nhîng, hkâsu wó lumjîng kó râ lú? Hko kyô é sù a nyi le nhîng, ¹⁵ hkâsu wó gyo kó râ lú? Nhang kat é a hui le gi, yhangmoq hkâsu kut wó hko kyo kó râ lú? Haú eq rajung za, “Gabú danglù pé hko kyo bâng é hkyî-kám pé gi, hkâ-í yhang yúng ri myhi-nhung!”^c ga kâ tô ri.

¹⁶ Nghut kôlháng, Israelaq byu pé banshoq bang gi, gabú danglù lé hap yù kô é a nghut. Hkâsu mù gâ le, Esai-aq gi, “Yhumsîng ê, ngamoq é danglù lé ó ¹⁷ yuq wá lumjîng é lú?”^d ga taí ri. Haú nghut mù luí, lumjîng myit gi, danglù lé wó gyô é mai lò mù, danglù gyô yu é gi, Hkrisduq é mungdang mai lo é ¹⁸ nghut lhê. Nghut kôlháng, ngò myi kó lé: yhangmoq gi, a wó gyô wú kô é nghut lhê lú? Yhangmoq gi, wó gyo gù za nghut lhê, haú eq rajung za, “Yhangmoq é htê gi, myidàm htoq banshoq má jàm bê nghut ri; yhangmoq é mungdang pé gi, mingkan htungchyûn hkanqmó má jé bê nghut ri.”^e

¹⁹ gâ tô ri. Ngò dum myi kó lé: Israelaq byu pé gi, a sê gyo kô é nghut lhê lú? Mosheq sâng-hi má taí é gi, “Byù rahú lháng a nghut bang èq, Ngò, nungmoq lé manôn nhâng râ; sê gyo nyan a bo é amyú èq, Ngò, nungmoq lé wú nhik-yo nhâng râ nghut lhê.”^f

²⁰ gâ ri. Hau htoq agó, Esai-aq a gyuq a wàm taí é gi, “Ngo lé a ho é bang gi, Ngo lé myang hô bekô nghut ri; Ngá hkyô lé a myí é bang lé, Ngò htoq shit bê nghut lhê.”^g

²¹ gâ ri. Nghut kôlháng, Israelaq byu pé eq séng luí, Yhang taí é gi, “Ngò gi, jîno a gyô é eq ngegáng-htu é byù myú lé, nyi wuí Ngá loq lham mù ji nyi lhê.”^h

gâ ri.

Israelaq Byu Pé Lé A He-ngik Pyám

11 Haú mù luí, ngò myi kó lé, Garai Gasang gi, Yhâng é byu pé lé he-ngik pyám bê nghut lhê lú? Ratsuí lháng a nghut! Ngò yhang le, Israelaq byù myú nghut luí, Abraham é awut ashín eq Ben-yamyin hú mâ é sù ² nghut lhê. Garai Gasang gi, Yhang te sê to gû nghut é, Yhâng é byu pé lé a he-ngik pyám é nghut lhê. Eliyaq eq sêng é hkyô Chyúmdang má bo tô é lé, nungmoq a sé kó lú? Garai Gasâng é hí má, yhang, Israelaq byu pé lé mara ³ hûn é gi, “Yhumsîng ê, yhangmoq gi, Náng é myiqhtoí pé lé sat pyám kô é eq Náng é hkungga gyap pé lé tu lhêng pyám akô nghut ri; ngò rayuq za myit gyó tô é nghut luí, ngo lé sat râ matú le yhangmoq ho nyi akô nghut

^a 10:11 Esai 28:16 ^b 10:13 Yol 2:32 ^c 10:15 Esai 52:7 ^d 10:16 Esai 53:1

^e 10:18 Hkya-on 19:4 ^f 10:19 Tarâ Pun 32:21 ^g 10:20 Esai 65:1 ^h 10:21 Esai 65:2

⁴ ri.”^a gâ ri. Garai Gasang gi, yhang lé, hkâsu ga tû taí é nghut lhê lú? Haû gi, “Balaq hpara é hí má hkyihput a htuq shí é byu nyhit hkyíng lé, Ngá é matú myhit to lhê.”^b gâ é nghut lhê.

⁵ Haû eq rajung za, ahkuí gi, jeju yanmai hkyin yù huí é bang za myit gyó
⁶ tô é nghut lhê. Jeju yanmai nghut é nghut le gi, muzó é yanmai a nghut lo; muzó dông ru nghut le gi, jeju gi, jeju a nghut lo.

⁷ Haû nghut jáng, hkâsu lú? Israelaq byu pé gyai ho shikut kôlháng, a wó kô é lé, hkyin htoq yù huí é bang kúm gi, wó bekô nghut ri. Góbang gi, myit
⁸ lhoq htân byí é hui akô nghut ri; haû gi,

“Garai Gasang gi, hkû-nyí jé shoq, yhangmoq lé nhikshi jit é woi-nyí lé le, a wó myang é myoqjí lé le, a wó gyô é nohkyap lé le, byí to bê nghut ri.”^c

⁹ ga kâ tô é eq rajung za nghut ri. Dawiq taí é le,

“Yhangmoq é zangbó gi, yhangmoq é matú, dumzo eq lhaí, myit leqbat jowò eq lató hpuq hkyô dut sháng gaq;

¹⁰ Yhangmoq myoq a wó myâng shoq, myoqjí lhoq chut pyám byí é hui sháng gaq; yhangmoq é nunghkûng gi, ayang wólai wun goí nhang é hui sháng gaq.”^d

gâ ri.

Tûngbaù Pé Lé Hkyi Yu É Hkyô

¹¹ Ngò dum myi kó lé: Israelaq byu pé gi, a wó dum gè râ í leqbat byuq bekô lú? Ratsuí lháng a nghut! Yhangmoq

é tarâ lu lai hkyo é yanmai, yhangmoq lé manôn nhâng râ matú, hkyi yù hkyô gi, tûngbaù pé chyáng jé byuq é nghut lhê. Nghut kôlháng, yhangmoq é tarâ lu lai hkyô gi, mingkân é matú wó sùt hkyô eq, yhangmoq sum pyâm é hkyô gi, tûngbaù pé é matú wó sùt hkyô dut é nghut jáng, yhangmoq é byíng jup hkyô gi, je riyháng kô é wó sùt hkyô dut râ nghut ri-nhung!

¹³ Nungmoq tûngbaù pé lé ngò taí nyi lhê: ngò gi, tûngbaù pé é lagyo nghut nyi é u má, ngá é hpungmû lé hpautap

¹⁴ nyi lhê. Haû gi, ngá é amyú pé lé manôn myit wó bô nhâng mù, yhangmoq ra-am lé wó hkyi yù râ lé myit myoq-

¹⁵ byu é hkyô nghut lhê. Hkâsu mù gâ le, yhangmoq lé he-ngik pyâm é hkyô gi, mingkân é matú Garai eq buinùm xoq hkyô dut bê nghut jáng, yhangmoq lé dum hap yu é hkyô gi, shi é mai dui

¹⁶ toq é dông dut bê a nghut lhi? Hau htoq agó, sâng-hí ashi dông nhông byí é mún ra-am gi, chyoiyúng é nghut jáng, muk htung gón gi, chyoiyúng é nghut lhê; haû amyit gi, chyoiyúng é nghut jáng, akoq pé le chyoiyúng é nghut lhê.

¹⁷ Haû tsanlun akoq pé^e ra-am gi, lhoq hkyui pyâm é hui luí, yosô tsanlun a-nyuq^f nghut sù nàng gi, haú pé má xoq é hui mù, haû tsanlun amyit é xú lé bo shuq lom é nghut jáng,

¹⁸ akoq haú pé lé hkâwú tiq pyám kó. Nungmoq haû su kut é nghut jáng, nungmoq gi, haû amyit lé htuq é a nghut é za, amyit haû sheq nungmoq lé htuq é hkyô lé, nungmoq myit sé

¹⁹ keq. Nungmoq kúm gi, “Ngò, haú má xoq é hui râ matú sheq, akoq haú pé gi, lhoq hkyui pyâm é huí é ru nghut

^a 11:3 1 Hko 19:10, 14 ^b 11:4 1 Hko 19:18 ^c 11:8 Tarâ Pun 29:4 ^d 11:10 Hkya-on 69:22-23 ^e 11:17 Tsanlun akoq pé gi, Israelaq byu pé lé taí nau é nghut lhê. ^f 11:17 Yosô tsanlun a-nyuq gi, tûngbaù pé lé taí nau é nghut lhê.

²⁰ lhê.” ga taí rã nghut lhê. Haû su gi, nghut lhê. Nghut kôlhang, yhangmoq gi, a lumjîng é yanmai, lhoq hkyui pyâm é hui kômù, nungmoq kúm gi, lumjîng é yanmai, wó ging tîng nyi é nghut lhê. Hká gumrong nyì, gyuq

²¹ kyum nyì keq. Hkâsu mù gâ le, Garai Gasang gi, akoq akying pé lé a ha bûn é nghut le gi, nungmoq lé le ha bun rã a nghut.

²² Haû mù luí, Garai Gasâng é shogyo nhikmyin hkyô eq htân htân kut pyâm é hkyô lé, myit wú keq: leqbat é bang lé htân htân kut pyám kôlhang, nungmoq gi, Yhâng é shogyo nhikmyin hkyô má xoq nyi nyi é myhâng, nungmoq lé gi, shogyo nhikmyin nyì rã nghut lhê. Haû a nghut jáng, nungmoq le, zân hpyit pyâm

²³ é hui rã nghut lhê. Yhangmoq gi, a lumjîng hkyô lé tô pyám kô é nghut jáng, dum xoq yu é hui kó rã nghut lhê; hkâsu mù gâ le, Garai Gasang gi, yhangmoq lé dum wó xoq yu é Sû

²⁴ nghut lhê. Haí mù gâ le, yosô tsanlun gãm akoq nghut gù nungmoq lé hpyit yû mù, htûng a nghut é dông, hô é tsanlun agãm má xoq é nghut le gi, haû akoq akying pé nghut é yhangmoq gi, ó le ó é tsanlun-ngut akying má xoq yu é lé je riyhang hui rã nghut lhê ô!

Israelaq Byu Pé Hkyi Yu É Hui Rã Hkyô

²⁵ Haû mù, gumang wuì ê, nungmoq a nghutbun kó sháng gaq nghû, zau tô é hkyô shí lé, nungmoq a sé dut rã lé, ngò a ô nau é nghut lhê: haû gi, tûngbaù pé wang lo é laké byíng é hkûn jé shoq, Israelaq byu pé ra-am gi, myit

²⁶ lhoq htan é huí é hkyô nghut lhê. Hau htâng sheq, Israelaq amyû banshoq

bang hkyi yu é hui rã nghut lhê. Haû gi,

“Hkyi yû Sû gi, Zi-un bùm mai htoq lô rã nghut lhê;
Yhang gi, Garai lé nunghtáng tô pyâm é hkyô lé, Yakup é awut ashín mai huí sêng pyám byi rã nghut lhê.

²⁷ Ngò, yhangmoq é yubak mara lé huí sêng pyám byi jáng, haû gi, yhangmoq lé Ngò byí tô é Ngá é dangshikaq nghut lhê.”^a
ga kâ tô é eq rajung za nghut ri.

²⁸ Haû gabú danglù eq séng luí ga jang, yhangmoq gi, nungmoq é matú gyè nghut akô; nghut kôlhang, hkyin htoq yû hkyô eq séng luí ga jang, yhangmoq gi, myìng hû é îchyí îwa pé é yanmai, chyitdap é huí akô nghut

²⁹ ri; hkâsu mù gâ le, Garai Gasâng é chyunghuq pé eq Yhang ji yu é hkyô lé gi, wó htaí lhik pyâm é a

³⁰ nghut. Nungmoq gi, Garai Gasâng é jîno a gyô é bang radàm dut wú kô é nghut kôlhang, yhangmoq jîno a gyô é yanmai, ahkuí kúm, shogyo nhikmyin hkyô wó hkam yû bekô nghut

³¹ é su, ahkuí, yhangmoq gi, nungmoq wó hkam yu é Garai Gasâng é shogyo nhikmyin hkyo é yanmai, shogyo nhikmyin hkyô lé wó hkam yû kó sháng gaq ga, yhangmoq le, ahkuí, jîno a gyo bang dut bekô nghut ri.

³² Hkâsu mù gâ le, Garai Gasang gi, byù lhunglhâng bang lé, shogyo nhikmyin hkyô wó tûn shit shoq ga, lhunglhâng bang lé, jîno a gyo hkyo é shúm dut nhang to bê nghut ri.

Hkya-on Kungtôn Dang

³³ Ô! Garai Gasâng é agùn agó é sùt nghut é, hpaqchyí byéng-yá

^a 11:27 Esai 59:20-21, 27:9

- eq nyan hpaqchyî gi, hkâ-í
yhang nik ri-nhung!
Yhâng é tarâ jéyáng hkyô gi, ung
sê jung a nghut nhung!
Yhang kut é hkyô pé gi, hkâ-í
yhang ho htoq wuî jung nghut
ri-nhung!
- 34 “Haû Yhumsing é myit lé, ó yuq
wá ung sê lhê lú? Yhâng é
hpaqchyî byi sù gi, ó yuq wá
dut wú é lú?”^a
gâ ri.
- 35 “Garai Gasâng èq jeju dum tau
byi râ dut shoq, ó yuq wá,
Garai Gasang lé byi wú é
lú?”^b
gâ ri.
- 36 Hkâsu mù gâ le, joq mijoq gi,
Yhâng chyáng mai nghut mù,
Yhang dông mai nghut luí,
Yhâng é matú chyat nghut ri.
Haû hpungwup shingkang gi,
Yhâng chyáng ahtum abyuq ru
joq nyî sháng gaq ô! Amen.

Dui É Hkungga Pé Dut Râ Hkyô

- 12** Haû mù luí, gumang wuî é,
nungmoq é gungdu pé lé, Ga-
rai Gasang myit nguî ô nau é eq chyoi-
yúng é, dui é hkungga dông nhông
byi keq nghû, Garai Gasâng é shogyo
nhikmyin hkyô mai, ngò, nungmoq lé
wum byi kat lhê. Haû gi, woi-nyí hkyô
dông nungmoq noqkuq dojaú é hkyô
2 nghut lhê. Mingkan shí lhûm é sâmlai
dông a cháng lo é za, myit sik wó yú râ
dông nungmoq é a-kyang lé htaí pyám
byi nhâng keq. Haû hkûn sheq, Garai
Gasâng é ge é, myit nguî é eq gumjup
é ô nau hkyô lé, nungmoq wó chyâm,
wó sê gàm hkoq yú kó râ nghut lhê.
- 3 Hkâsu mù gâ le, ngo lé byi tô é
jeju yanmai, nungmoq yuq hkgangmó

- lé ngò taí kôlé: nungmoq gi, yhumsing
gùng lé lai shoq a nghutbûn é za, ó
le ó lé, Garai Gasâng èq lumjínq myit
tsing gàm byi to bê eq rajung za, myit
4 yù gínq é í za myit yù keq. Nga-nhúng
yuq hkgangmó é gungdu ralhûm má gi,
gungdu showui showang pé myo myo
bo é nghut luí, gungdu showui sho-
wang haú pé banshoq gi, jai chûng
5 jang a pung é nghut lhê. Haû eq ra-
jung za, myo myo nghut é nga-nhúng
le, Hkrisduq má gungdu ralhûm za
dut luí, yuq hkgangmó gi, rayuq eq ra-
yuq gungsho sêng lhûm é bang chyat
6 nghut lhê. Nga-nhúng lé byi tô é jeju
yanmai, nga-nhúng wó é chyunghuq
gi, gotû tû nghut lhê. Byù rayuq é
chyunghuq gi, myiqhtoi htoí é nghut
jáng, yhâng é lumjínq hkyô eq rajung
7 za htoi sháng gaq; dojaú é nghut jáng,
dojaú sháng gaq; mhoq kyô é nghut
8 jáng, mhoq kyo sháng gaq; myit wum
byi é nghut jáng, myit wum byi sháng
gaq; ra châ é bang lé garúm byi é
nghut jáng, a ha bûn é za byi sháng
gaq; shuí u é nghut jáng, lumluq tung
shuí u sháng gaq; shogyo nhikmyin
hkyô shit é nghut jáng, gabú myit èq
kut sháng gaq.

Chyitdap Myit

- 9 Chyitdap myit má gegùn labyoq
a ge bò. Agè ashop dut é lé, nhik
noq pyám keq; ge é lé, myit tuí nyí
10 keq. Rayuq eq rayuq, gumang chyit-
dap myit mai lhumzúí lhum keq. Ra-
yuq eq rayuq, yhumsing gùng htoq
11 je hpautap lhum keq. Myit zuq hkyô
má, hkâ-nhám le wum a lhoq shôm é
za, nungmoq é woi-nyí hkyô má myit
toq nyí mù, haû Yhumsing lé dojaú
12 nyí keq. Myit myoqbyù hkyô má gabú
keq; wuîhke hkyô má hkam jan keq;

^a 11:34 Esai 40:13 ^b 11:35 Yob 41:11

- ¹³ kyûdung hkyô má lhumzui keq. Ra châ tô é Garai Gasâng é byu pé lé gàm byi keq. Bíng hkulum é lé rago kut keq.
- ¹⁴ Nungmoq lé zing-rî é bang lé shimân byi keq; shimân byi keq,
- ¹⁵ hkâ-nhing kó. Gabú é bang eq rahá bo gabú keq; yón é bang eq rahá bo yón keq. Rayuq eq rayuq byìn hpyé gohut huí nyi keq. A nghutbûn é za, nyi yap hkyô nyhûm bang eq zùm yap keq. Hpaqchyí bo é sù su hkâ-myt ngàm kó.
- ¹⁷ Ó yuq lé le, agè ashop é yanmai, agè ashop é dông lató hkâhpuq kó. Yuq hkgangmó é myoq hí má ge é lé kut râ
- ¹⁸ rago myit keq. Wó dut é nghut jáng, nungmoq wó dut é í, yuq hkgangmó eq
- ¹⁹ nguingón shoq nyi keq. Ngá é buinùm wui ê, lató a hpuq é za, Garai Gasâng é nhikmo-yo hkyô lé sheq láng nyí keq. Hkâsu mù gâ le, “Ngò sheq lató hpuq râ sù nghut lhê; ngò lató hpuq râ.”^a
- ²⁰ Haú mù,
- “Nungmoq lé gye kut sù zòmut é nghut le gi, byi tso keq; yhang wuîshit é nghut le gi, rajung jung byi huq keq.
- Haú dông kut jáng, nàng, yhâng é ulhum htoq má gyúng é myigye bum to byí é nghut lhê.”^b
- ²¹ ga le kê tô ri. Agè ashop é gi, nungmoq lé a ung pyám sháng gaq, ge é hkyo èq agè ashop é lé ung pyám keq.

Ahkáng Ayá Wó Bàng**Ô Má Nyi Râ É Hkyô**

13 Yuq hkgangmó gi, up é ahkáng ayá wó bàng é a-ô má nyi ra râ nghut lhê; hkâsu mù gâ le, Garai

- Gasâng chyáng mai za a nghut le gi, up é ahkáng ayá joq é a nghut. Joq tô é ahkáng ayá pé gi, Garai Gasâng
- ² èq byí tô é chyat nghut lhê. Hau é yanmai, up é ahkáng ayá lé gumlau toq é sù gi, Garai Gasang byí tô é up é ahkáng ayá lé gumlau toq é sù nghut ri; haú su kut é bang gi, tarâ jé-yáng é hui zo râ hkyô lé ho yù nyi é
- ³ bang nghut akô. Hkâsu mù gâ le, up-hkang é bang gi, ge é hkyô kut bàng é matú gyuq nán hpo a dut é za, shut shaí hkyô kut bàng é matú sheq dut é ru nghut lhê. Up é ahkáng wó sù lé gyuq é mai lut nau lhê a nghut lhí? Haú jáng, ge é hkyô kut aq, haú hkûn, yhang, nang lé hkya-on râ nghut lhê.
- ⁴ Hkâsu mù gâ le, yhang gi, náng é matú ge é akyû kut byi râ nghut é, Garai Gasâng é dui-nhâng zoshâng nghut lhê. Nghut kôlhang, nàng, shut shaí hkyô kut é nghut le gi, gyuq nán nyí aq; haí mù gâ le, yhang gi, shâm lé ajè wun tô é a nghut. Yhang gi, Garai Gasâng é dui-nhâng zoshâng nghut mù, shut shaí hkyô kut sù lé dam byi râ matú nhikmo-yo Su é gunglik nghut
- ⁵ lhê. Haú mù luí, dam byi râ lé chiq é yanmai za a nghut, yhumsîng nhik bô râ é yanmai le, haú up é ahkáng ayá wó bàng é a-ô má nyi râ dut lhê.
- ⁶ Nungmoq hkansê kat râ é gi, hau é yanmai le nghut lhê; hkâsu mù gâ le, haú up é ahkáng ayá wó bang gi, Garai Gasâng é dui-nhâng zoshâng wui nghut lhê mù, uphkgang é mù lé, ahkyíng byíng shoq wùn waq nyi akô
- ⁷ nghut ri. Yuq hkgangmó lé byi âng é eq rajung za byi keq: hkansê kat byi ang sù lé gi, hkansê kat byi keq; kang kat byi ang sù lé gi, kang kat byi keq;

^a 12:19 Tarâ Pun 32:35 ^b 12:20 Sângkyang 25:21-22

gyuq kyum ang sù lé gi, gyuq kyum keq; hkungga ang sù lé gi, hkungga keq.

**Rayuq Eq Rayuq
Chyitdap Lhum Râ Hkyô**

- ⁸ Rayuq eq rayuq chyitdap lhûm é chyîn mai lai luí, hai chyîn le hkâ-dap lhum kó; hkâsu mù gâ le, góyuq lé chyitdap é sù gi, haû jep é tarâ lé
- ⁹ lhoq dik bê sù nghut ri. “Su-myi sulàng lú hkyô hkâkut,” “Byù hkâsat,” “Hkâhkau,” “Hkâ-myoqnoq,”^a gâ tô é hkunmó pé eq gotû hkunmó haî nghut nghut, “Náng gûng lé náng chyitdap é su, náng é chyangnâm mâ é bang lé le chyitdap aq.”^b gâ é tarâ má lo
- ¹⁰ jup to bê nghut lhê. Chyitdap myit gi, chyangnâm mâ é byù lé a ge é haî le a kut é nghut lhê. Haû mù luí, chyitdap myit gi, haû jep é tarâ lé lhoq dik é hkyô nghut ri.
- ¹¹ Haû mù, ahkuí lhê é ahkyíng yàm-yoq lé sê gyo luí, haû hkyô lé kut keq. Nungmoq yhup mui é mai bûn gying râ ahkyíng jé bê; haî mù gâ le, nga-nhúng é hkyi yù hkyô gi, lumjíng hi é hkun lhê htoq má ahkuí je chyáng
- ¹² bê nghut ri. Haû myín ahkyíng gi, lai byuq ló râ za nghut bê; nyí ahkyíng gi, jé lô berâ nghut lhê. Haû mù luí, mauchut é muzó lé tô pyám mù, maubó
- ¹³ é gyehking lé wut to sháng. Ye lhaî é eq shuq wut é, ashop é dông gungsho zùm yap é eq shut é dông nyí zô lhúm nau é myit bo é, mabyoq jisshûm htoq é eq manon é pé a kut é za, nyí-káng lhê su, ge é a-kyang dông
- ¹⁴ nyí yap sháng. Hau htoq agó, Yhumsíng Yesuq Hkrisduq lé, mebu su wut to keq; yubak gungsho ô nau é dông lhoq dik râ matú hkâ-myit kó.

Gumang Wui Lé A Jéyáng Râ Hkyô

- 14** Lumjíng myit má wum nyhóm sù lé, myíng myo nhô zâ é hkyô pé lé a jéyáng byí é za hap yù keq.
- ² Byù rayuq é lumjíng myit gi, jung hkangmó zô ri; nghut kôlhang, lumjíng myit nyhóm sù gotû rayuq gi,
- ³ mhan-haq hpoqnoq za zô ri. Jung hkangmó zo sù gi, a zo sù lé a ge wú tiq pyám; jung hkang jung mó a zo sù gi, zo sù lé mara a ge byi; hkâsu mù gâ le, Garai Gasang gi, yhang lé hap
- ⁴ yu to bê nghut ri. Náng gi, ó yuq wá nghut mù, góyuq é dui-nhâng zoshâng lé jéyáng lhê lhú? Yhang, yap ging kôlhang, leqbat kôlhang, yhâng é yhum-sing myit za nghut lhê. Yhang gi, wó yap ging râ nghut lhê; hkâsu mù gâ le, haû Yhumsíng gi, yhang lé wó yap ging nhâng Sù nghut lhê.
- ⁵ Rayuq myit é gi, buinyí ra-nyí gi, gó nyí htoq je ge lhê gâ ri; dum rayuq myit é gi, nyí wuí rajung za nghut lhê gâ ri. Yuq hkangmó gi, yhumsíng myit yu é lé a úng-âng nyí sháng gaq.
- ⁶ Buinyí ra-nyí lé, ahkyak lhê ga myit yù sù gi, haû Yhumsing é matú kut é nghut ri. Zô é sù gi, Garai Gasang lé jeju hkya-ôn é yanmai, haû Yhumsíng lé bun luí zô nyí ri; a zo sù le, haû Yhumsíng lé bun luí Garai Gasang lé jeju hkya-ôn nyí ri. Hkâsu mù gâ le, nga-nhúng ó yuq nghut kôle, yhumsing matú za asak dui é a nghut; ó yuq nghut kôle, yhumsing matú za
- ⁸ shi é a nghut. Nga-nhúng asak dui nyí le gi, haû Yhumsing é matú dui é ru nghut lhê; nga-nhúng shi byuq le gi, haû Yhumsing é matú shi é ru nghut lhê. Haû mù, asak dui nyí kôlhang, shi byuq kôlhang, nga-nhúng gi, haû Yhumsíng eq sêng é bang nghut lhê.

^a 13:9 Htoq Ló 20:13-15 ^b 13:9 Nhong 19:18

- ⁹ Haû su mù, Hkrisduq gi, shi byuq bang eq asak dui bâng é Yhumsîng dut sháng gaq ga, shî hkám mù dum dui
- ¹⁰ toq é nghut lâ. Haû mù, nàng gi, haî mù náng é gumang hpó lé jéyáng nyi lâ lú? Haî mù náng é gumang hpó lé wú tiq nyi lâ lú? Nga-nhúng lhung-lhâng bang gi, Garai Gasâng é tarâ jéyáng tanghkuq hí má yap râ bang
- ¹¹ chyat nghut lâ. Hkâsu mù gâ le, “Haû Yhumsîng gi, ‘Ngò rû dui nyi é eq rajung za, Ngá é hí má hkyihput hkangmó htug râ nghut lâ; Garai Gasang lé, shô hkangmó èq yín yû kó râ nghut lâ.’ ga taî ri.”^a
- ¹² ga kâ tô ri. Haû mù luî, nga-nhúng yuq hkangmó gi, yhumsîng kut lai lo é hkyô lé, Garai Gasâng chyáng shit ra râ nghut lâ.
- ¹³ Haû nghut mù, nga-nhúng gi, rayuq eq rayuq tarâ jéyáng lhûm é hkyô lé tô pyám sháng. Ó yuq nghut kô-lhang, yhumsing é gumâng é hkyowuî má, myit leqbat jowò eq htung htê jowò a to byi râ matú, myit si-diq keq. Haû Yhumsîng Yesuq má nghut nyi é sù ngò gi, haî jung zoshuq nghut kôlhâng, yhang baú yhang a sansêng a dut é hkyô lé, hkyak wó sé luî, jíng nyi lâ. Nghut kôlhâng, ó yuq le, rajung jung lé a sanséng ga myit yu é nghut jáng, yhang é matú, zè haú gi, a sansêng é nghut
- ¹⁵ lâ. Nàng zô é zoshuq yanmai, náng é gumang hpó myit a ngón é nghut le gi, nàng, chyitdap myit mai sô nyi é sù a nghut lo. Hkrisduq shî hkám byi bê sù nghut é, náng é gumang hpó lé, nàng zoshuq é dông mai hkâlhoq
- ¹⁶ hten pyám. Nàng, ge ri nghú myit yu é hkyô lé, agè ashop é dông hkâtaî

- ¹⁷ pyám nhâng. Hkâsu mù gâ le, Garai Gasâng é mingdán gi, zo zo shuq shuq hkyô a nghut é za, dingmán hkyô, nguingón hkyô eq Chyoiyúng Woi-nyí
- ¹⁸ má gabú é hkyô ru nghut lâ. Haî mù gâ le, shî hkyô dông mai Hkrisduq lé dojaú é sù gi, Garai Gasang ô nau é sù eq byu pê èq hkyâ-ôn é hui sù nghut ri.
- ¹⁹ Haû mù luî, nguingón hkyô má nyi râ eq, rayuq eq rayuq wum byí lhum
- ²⁰ râ hkyô lé, shikut nyi keq. Zoshuq é yanmai, Garai Gasâng é muzó lé hkâlhoq hten pyám. Zoshuq lhunglhâng gi, sansêng é chyat nghut lâ; nghut kôlhâng, góyuq lé myit leqbat nhang é jung lé zô é sù gi, shut é nghut lâ.
- ²¹ Tsibiyiq wing shuq é eq sho zô é hkyô má nghut kôlhâng, gotû haî jung kut é nghut kôlhâng, náng é gumang hpó lé myit leqbat nhang é nghut le gi, a kut le je ge lâ.
- ²² Haû mù, haú pé eq séng luî, nàng lumjíng é haî nghut kôle, nàng eq Garai Gasâng gyoro má za joq nyi sháng gaq. Yhumsîng ge lâ gâ é èq, yhumsing gùng yhumsîng mara byi jang a
- ²³ joq é sù gi, hkungsô wó nyi ri. Nghut kôlhâng, úng-âng é myit èq zô é nghut le gi, mara byí é hui ri, haî mù gâ le, yhang zô é gi, lumjíng myit mai a nghut; lumjíng myit mai a kut é haî nghut kôlhâng, mara nghut ri.

Góyuq Lé Myit Ngón Nhâng Râ Hkyô

- 15** Lumjíng hkyô má wum-o bo é nga-nhúng gi, yhumsîng myit ngón râ hkyô lé a ho é za, wum-o a bò bâng é wum nyhóm hkyô lé, hkam
- ² jan byí nyi râ dut lâ. Nga-nhúng yuq hkangmó gi, yhumsing é chyangnâm mâ é su é ge é hkyô dut râ matú, yhang wó kô myhang lò shoq, yhang lé lhoq

^a 14:11 Esai 45:23

- ³ ngón byí nỳi sháng. Hkâsu mù gâ le, Hkrisduq lhang gi, Yhânggùng yhang lhoq ngón é a nghut; haû gi, “Nang lé rhoi bang é dang gi, Ngá chyáng gyó ke bê nghut ri.”^a ga, kâ tô é eq
- ⁴ rajung za nghut ri. Hkâsu mù gâ le, laî lò bê hkûn kâ tô é lhunglhang gi, nga-nhúng lé mhoq byi râ matú chyat kâ tô é nghut lhê; haû gi, Chyúm-dang mâ é hkam jan hkyô eq myit wum byi hkyô dông mai, nga-nhúng myit myoqbyù hkyô wó râ matú nghut lhê.
- ⁵ Haû hkam jan hkyô eq myit wum byi hkyô lé byí é Garai Gasang gi, nungmoq, Hkrisduq Yesuq é htâng châng nyi é u lé, nungmoq yhang-chang rading ralhum za dut é woi-nyí
- ⁶ byi sháng gaq; haû jáng sheq, nungmoq gi, i-myt rahkat eq nhut htê ralhum èq za, nga-nhúng é Yhumsîng Yesuq Hkrisduq é Yhângwa nghut Sû, Garai Gasang lé, wó hkya-on kungtôn kó râ nghut lhê.
- ⁷ Haû mù luí, Hkrisduq gi, nungmoq lé hap yù bê é eq rajung za, Garai Gasâng é hpungwup shingkan lé lhoq htoq shit râ matú, nungmoq le, ra-
- ⁸ yuq eq rayuq hap yu lhum keq. Hkâsu mù gâ le, ngò, nungmoq lé taí kôlé, haû myìng hû é îchyí îwâ pé lé byí tô é danggidiq pé lé lhoq ging râ matú, Hkrisduq gi, Garai Gasâng é tengmán hkya é malaî, Yudaq byu pé é dui-nhâng zoshâng dut bê nghut ri.
- ⁹ Haû mù, Garai Gasâng é shogyo nhikmyin hkya é yanmai, haû tûngbaù pé, Garai Gasang lé wó hkya-on kungtôn kó râ nghut lhê. Haû hkyô gi,
 “Haû mù luí, tûngbaù pé chyáng má, Nang lé, ngò hkya-on râ nghut lhê;

- Náng é myìng lé, ngò hkya-on mahkôn râ nghut lhê.”^b
- ¹⁰ ga kâ tô é eq rajung za nghut ri. Dum, “Tûngbaù pé ê, Yhâng é byu pé eq rahá gabú nỳi keq.”^c
- ¹¹ gâ tô ri. Dum,
 “Nungmoq tûngbaù pé lhung-lhang bang ê, haû Yhumsîng lé hkya-on keq, byù myù lhunglhang bang ê, Yhang lé hkya-on mahkôn hkôn keq.”^d
- ¹² gâ tô ashî nghut ri. Hau htoq agó, Esai-aq taí é gi,
 “Yese é Amyit gi, yuq htoq lô luí, Yhang gi, byù myù chângjup é ahtoq má up râ sù nghut lhê; tûngbaù pé gi, Yhang má myit myoqbyù kó râ nghut lhê.”^e
- gâ ri.
- ¹³ Haû myit myoqbyù hkyô byí é Garai Gasang gi, Yhang lé lum-hkau nyi é bang nungmoq lé, gabú hkyô banshoq eq nguìngón hkyô lhoq pyíng byi sháng gaq; haû jáng sheq, nungmoq gi, Chyoiyúng Woi-nyí é wum-o a-tsâm èq, myit myoqbyù hkyô wó byíng mui nỳi kó râ nghut lhê.

**A Gyuq A Wam É Za,
 Poluq Laiká Kâ É Hkyô**

- ¹⁴ Ngá é gumang wuì ê, nungmoq gi, ge é hkyô byíng jup é bang, hpaq-chyí má gumjup é bang, rayuq eq rayuq mhoqshit lhûm é má kûng é bang nghut é lé, ngá gûng ngò yhang
- ¹⁵ hkyak lumjîng lhê. Ngò gi, nungmoq lé dum lhoq pûn é dông, ahkyak é pé ra-am lé a gyuq a wàm kâ kat bê
- ¹⁶ nghut lhê. Hkâsu mù gâ le, tûngbaù pé gi, Chyoiyúng Woi-nyí dông mai lhoq sân-yúng é hui luí, Garai Gasâng

^a 15:3 Hkya-on 69:9 ^b 15:9 Hkya-on 18:49

^d 15:11 Hkya-on 117:1 ^e 15:12 Esai 11:10

^c 15:10 Hkya-on 32:43

èq hap yù gíng é hkungga wó dut kó sháng gaq ga, Garai Gasâng é gabú danglù lé hkô râ hkyangjong é wò dông, tûngbaù pè chyáng, Hkrisduq Yesuq é hpungmû wùn sù dut râ matú, Garai Gasang, ngo lé jeju byí é yanmai nghut lhê.

- ¹⁷ Haù mù luí, ngò gi, Garai Gasang lé dojaù é hkyô eq séng luí, Hkrisduq
¹⁸ Yesuq má nghutbún nyi lhê. Ngò gi, ngò taí é eq zui saí é muzó dông le, haù Woi-nyí é a-tsam chûng mù, kumlhá pé eq laklaí kumlhá pé dông le, tûngbaù pé lé, Garai Gasâng é jìno gyo shoq shuí ù é má, ngo lé Hkrisduq nhang é muzó hkyô lé taí é mai lai luí, gotú haí lé le wám taí
¹⁹ é a nghut. Haù mù luí, ngò gi, Yerusalem wà mó mai Ilurikhkam mau jé shoq é hkyô awui ayàm jàm shoq, Hkrisduq é gabú danglù lé hko kyo
²⁰ bê nghut lhê. Ngò hkâ-nhám le myit tuí nyi é hkyô gi, góyuq hi tô é apûn awang má dum a puq saí pyâm é za, Hkrisduq lé a sé shi é jowò má gabú danglù hko kyo râ hkyô nghut lhê.

- ²¹ Haù gi,
 “Yhâng é hkyô lé, taí kyô é a hui shí é bang, myàng kó râ nghut luí,
 a wó gyô wú é bang, sê gyo kó râ nghut lhê.”^a

- ²² ga kâ tô é eq rajung za nghut ri. Haù mù luí, ngò, nungmoq chyáng lé jé râ lé, anum num hkyikyo luqlhum dut nyi é gi, muzó hau é yanmai nghut lhê.

Romaq Myuq Lé Ló Kum Râ Sôn É Hkyô

- ²³ Nghut kôlhang, ahkuí gi, shí mau pé má ngò zui saí râ jowò a joq lo é nghut mù, nungmoq lé myàng nau nyi é zanwut myo myo nghut bê eq

²⁴ rajung za, ngò, Sipin ming shut ló é hkûn, nungmoq chyáng wàng râ sôn tô lhê. Ngò gi, lai ló é hkûn, nungmoq lé lò sô kum mù, nungmoq eq rayoq zo zùm yap ngón é htàng má sheq, ngá é hkyowui matú, nungmoq haù mai htuqbang kat râ lé, ngò myoqbyu

²⁵ tô lhê. Ahkuí, ngò kúm gi, Yerusalem wà mó má é sân-yúng bang lé dojaù râ matú, haù wâ shut e ló é hkyolat má
²⁶ nghut nyi lhê. Hkâsu mù gà le, Make-doni eq Ahkaia mau má é bang gi, Yerusalem wà mó má é sân-yúng bâng chyáng má é myùng bâng é matú, garúm chyunghuq hkyui tsing nau bùm

²⁷ bekô nghut ri. Yhangmoq gi, haù su kut nau bùm bekô nghut ri, gè gè ga jáng, haù gi, yhangmoq chyín dap tô é dông ru nghut lhê. Hkâsu mù gà le, haù Yudaq byu pè é woi-nyí eq sêng é shimân jeju lé, tûngbaù pé bo hkam yù bê nghut le gi, yhangmoq é sutzè shimân jeju lé, Yudaq byu pé eq chòm chûng râ chyín dap tô é dông

²⁸ nghut lhê. Haù mù luí, ngò gi, muzó shí lhum ban kut mù, garúm chyung-huq shí lé, yhangmoq wó hap yù bê lé hkyak sê é htàng má, Sipin ming shut ló râ nghut mù, lai ló uchyang, nungmoq chyáng lé sô kum râ nghut lhê.

²⁹ Ngò gi, nungmoq chyáng lé jé é hkûn, nungmoq é matú Hkrisduq é shimân jeju byíng jup é èq jé lé râ nghut é lé, ngò sê lhê.

³⁰ Gumang wui ê, ngá é matú Garai Gasâng chyáng kyúdung byí é dông, ngò wum kat yhang shikut é hkyô má nungmoq bo wàng lòm râ matú, nga-nhûng é Yhumsíng Yesuq Hkrisduq eq Woi-nyí é chyitdap myit é yanmai, ngò, nungmoq lé wum taí
³¹ tsuq kat lhê. Yuda mau má é a lum-jíng bâng chyáng mai, ngò hkyi yu

^a 15:21 Esai 52:15

é wó hui luí, Yerusalem wà mó má ngò wùn waq é muzó lé, haú má é sâ-yúng bang hap yù gíng é wó dut
³² râ matú kyû bo dung byi keq. Haú jáng sheq, ngò gi, Garai Gasang ô nau é dông mai, gabú myit èq nungmoq chyáng wó jé lé mù, nungmoq eq rahá
³³ wum-o wó yû râ nghut lhê. Haú ngui-ngón hkyo é Garai Gasang gi, nungmoq banshoq bang eq rahá rû nyi nyi sháng gaq ô. Amen.

Shi-kyám Dang

16 Ngò gi, Kenhkrea noqkuq hpúng má é hpungtê, nganhûng é gu-nhá Hpobe lé, nungmoq chyáng shichyen byi kat lhê.
² Nungmoq gi, sâ-yúng bang kut gíng é eq rajung za, haú Yhumsîng má yhang lé hap yù luí, yhang râ tô é hkyô haî nghut kôle, yhang lé htuq-bang keq. Hkâsu mù gâ le, yhang gi, byù myo myo lé le, ngo lé le, gyai yhang garúm lai bê sù nghut lhê.
³ Hkrisduq Yesuq má ngò eq mù wùn luzúm nhik nghut é, Priskila eq
⁴ Akula lé bo shi-kyám byi keq. Yhang-nhik gi, ngá é asak é matú, yhang-nhik é asak sum râ í yhang dut wú kô é nghut mù, ngò za a nghut, tûngbau pê é noqkuq hpúng pé banshoq le, yhangnhik lé jeju bûn lhê.
⁵ Yhangnhik é yhûm má chôm huí zup é noqkuq hpúng lé le, bo shi-kyám byi keq.
 Asia mau má, Hkrisduq lé sâng-hi lumjîng wang lo é, ngò chyitdap é Epanetu lé bo shi-kyám byi keq.
⁶ Nungmoq é matú gyai yhang shikut wú bê sù nghut é Mariq lé bo shi-kyám byi keq.

⁷ Ngò eq rahá htóng lúng wú bê nghut é, ngá é buinùm, Androniku eq Yunia nhik lé bo shi-kyám byi keq. Yhang-nhik gi, lagyô pé má myoqdong wó su nhik nghut é htoq agó, ngá é hí má, Hkrisduq má ngò a nyi shi le nyi bê sù nhik nghut akô.
⁸ Haú Yhumsîng má, ngò chyitdap é sù, Ampliatu lé bo shi-kyám byi keq.
⁹ Hkrisduq má, ngamoq é mù zui luzúm nghut é Orban eq ngá é chyitdap luzúm Staku lé, bo shi-kyám byi keq.
¹⁰ Hkrisduq má chyam é hui mù, wó lúm bê sù, Apele lé bo shi-kyám byi keq.
 Aristobulu eq sêng é yhumbyù wui lé bo shi-kyám byi keq.
¹¹ Ngá é buinùm Herudion lé bo shi-kyám byi keq.
 Haú Yhumsîng má nghut nyi bê bang, Narkiso é yhumbyù wui lé bo shi-kyám byi keq.
¹² Haú Yhumsîng má mù zui shikut é myiwê nhik, Truhpena eq Truhposa lé bo shi-kyám byi keq.
 Haú Yhumsîng má mù zui gyai yhang shikut é myiwe góyuq, ngá é chyitdap luzúm Persi lé bo shi-kyám byi keq.
¹³ Haú Yhumsîng má hkyin yu é hui bê sù, Ruhpu lé le, ngá nu dông nghut wú bê nghut é Ruhpû é yhângnu lé le, bo shi-kyám byi keq.
¹⁴ Asunkritu, Hpelegon, Herme, Patroba, Herma eq yhangmoq eq rahá nyi é gumang wui lé, bo shi-kyám byi keq.
¹⁵ Hpilologu, Yulia, Nerea eq yhâng é nhammó eq, Olumpa, yhangmoq eq rahá nyi é sâ-yúng bang banshoq lé, bo shi-kyám byi keq.
¹⁶ Rayuq eq rayuq, chyoiyúng bopuq é èq shi-kyám lhum keq.

Hkrisduq é noqkuq hpúng pé ban-shoq gi, nungmoq lé shi-kyám dang sang kat akô nghut ri.

¹⁷ Gumang wuì ê, nungmoq é lumjínq hkyô má, nungmoq mhoq hkam yù bê nghut é mhoqshit hkyô eq shai lhúm é, gam hkoq hkyô pé eq myit leqbat hkyô pé lhoq htoq é bang lé sidiq keq nghú, wum taí tsuq kat lhê. Yhangmoq lé koi pyám keq.

¹⁸ Hkâsu mù gâ le, haú sù é bang gi, nga-nhúng é Yhumsîng Hkrisduq lé dojaú é bang a nghut é za, yhumsing é wamdaú matú dojaú é bang nghut akô. Yhangmoq gi, myit nú-nhâm é bang lé, dang ngón dang nguí dông ¹⁹ mhaú zô akô nghut ri. Nungmoq, jìno gyo kô é hkyô lé, yuq hkangmó wó gyo bê nghut ri; haú mù, ngò gi, nungmoq é matú gyai yhang gabú nyi lhê; nghut kôlhang, ge é hkyô eq séng luí gi, nungmoq hpaqchyí bò mù, agè ashop hkyô eq séng luí gi, nungmoq a bo lòm râ lé, ngò ô nau ri.

²⁰ Nguingón hkýo é Garai Gasang gi, a myáng má, nungmoq é hkyiwa ô má Tsadán lé nang pyeq pyám râ nghut lhê.

Nga-nhúng é Yhumsîng Yesuq é jeju gi, nungmoq eq rahá nghut nyí sháng gaq ô.

²¹ Ngá é mù zui luzúm Timohti gi, nungmoq lé shi-kyám dang sang kat ri; haú eq rajung za, ngá é buinùm wuì Luki, Yason eq Sosipata pé le, shi-kyám dang sang kat akô nghut ri.

²² Laiká shí lé bo ká sù ngò Tertiu gi, haú Yhumsîng má nungmoq lé shi-kyám kat lhê.

²³ Ngo lé le, noqkuq hpúng gón lé le, bíng hkulum é sù Ge-u gi, nungmoq lé shi-kyám dang sang kat ri.

Haú wa mà é ngùnzi sù Erastu eq nga-nhúng é gumang hpó Kuartu gi, nungmoq lé shi-kyám dang sang kat akô. Nga-nhúng é Yhumsîng Yesuq Hkrisduq é jeju gi, nungmoq lhung-lhâng bang eq rahá nghut nyí sháng gaq. Amen.^a

²⁵ Byù myú chângjup bang lumjínq luí, Yhang é jìno gyo sháng gaq ga, a-nham pyat mai haq tô é hui kôlhang,

²⁶ ahkuí, ahtum abyuq é Garai Gasâng é hkunmó é yanmai, myiqhtoi laiká pé dông hpông shit é eq sé nhâng bê nghut é, sê gyo wuì é hkýo é shing-rán má cháng luí, ngá é gabú danglù eq Yesuq Hkrisduq é hkyô taí pyo é dông, nungmoq lé wó lhoq gíng tíng byí ²⁷ é, rayuq za é hpaqchyí bo sù Garai Gasâng chyáng, Yesuq Hkrisduq dông mai, hpungwup shingkang gi, ahtum abyuq ru joq nyí sháng gaq ô! Amen.

^a 16:24 Chyúmding ra-am má chyúmbun 24 shí a bo é nghut lhê.

KORINHTUQ

Pê Chyáng Hî Dàm Hun Kat é Laiká (1 Corinthians)

1 Garai Gasang ô nau é eq rajung za, Hkrisduq Yesuq é lagyo dut râ matú ji yù huí é sù ngò Poluq eq, nga-moq é gumang hpó Sositeni gi, jowò hkanmó má nga-nhûng é Yhumsîng Yesuq Hkrisduq é myîng lé lîng é bang eq rahá, choyiyúng bang dut râ matú ji yù huí é eq Hkrisduq Yesuq má lhoq sân-yúng é huí é bang nghut é, Korinhtuq myuq má é, Garai Gasâng é noqkuq hpúng lé, dang kyô kat lhê; Hkrisduq gi, ngamoq é eq yhangmoq é Yhumsîng nghut lhê.

³ Nga-nhûng é Îwa Garai Gasang eq Yhumsîng Yesuq Hkrisduq chyáng má é jeju eq nguîngón hkyô gi, nungmoq chyáng ru joq nyí sháng gaq ô.

Hkrisduq É Yanmai Wó É Jeju

⁴ Garai Gasâng jeju lé Hkrisduq Yesuq dông mai nungmoq lé byi bê nghut mù luí, ngò gi, nungmoq é matú Garai Gasang lé ayang jeju hkya-ôn ⁵ nyi lhê. Hkâsu mù gâ le, nungmoq gi, Hkrisduq dông mai, nungmoq dang taí é hkyô banshoq eq nungmoq é sumsé hpaqchyí banshoq má je lhoq ⁶ gumjup é hui bekô nghut ri. Haú gi, Hkrisduq Yesuq eq séng luí, ngamoq saksé hkâm é hkyô têng é lé, nungmoq chyáng shit nyi é nghut lhê. Haú mù, nga-nhûng é Yhumsîng Yesuq Hkrisduq dum htoq shit râ lé, nungmoq gyai myoqbyu lîng nyi é u má, nungmoq gi, woi-nyí hkyô eq séng é chyunghuq haí lé le langhpyut kó rá a ⁸ nghut. Nga-nhûng é Yhumsîng Yesuq Hkrisduq é buinyí má, nungmoq lé mara hún râ hkyô a bò shoq, Hkrisduq

gi, nungmoq lé, htáng shoq gingtîng ⁹ nhang nyi râ nghut lhê. Nga-nhûng é Yhumsîng nghut é Yhang Zo Yesuq Hkrisduq eq rahá zùm yap râ matú, nungmoq lé ji yù bê sù Garai Gasang gi, lhumzui Sù nghut ri.

Noqkuq Hpúng Má Gam Hkoq Lhûm É Hkyô

¹⁰ Gumang wui ê, nungmoq hkaú má gam hkoq lhûm é hkyô pé a joq é za, nungmoq é myit eq myit sôn wú é hkyô má gumjup shoq rading ralhûm za dut nyí sháng gaq, nungmoq lhung-lhâng bang rayuq eq rayuq byî hpyé gohut huí nyí keq nghû, ngò, nungmoq lé, nga-nhûng é Yhumsîng Yesuq Hkrisduq é myîng mai dîng tîngbán ¹¹ kat lhê. Ngá é gumang wui ê, Hkloe é yhûm byù wui gi, nungmoq hkaú má mabyoq htoq hkyô joq é lé, ngo lé ¹² hkyáng lo shit akô. Ngò haú su nghû taí é gi, nungmoq má é rayuq yuq gi, “Ngò gi, Poluq htâng châng lhê.” ga, góyuq gi, “Ngò gi, Apolo htâng châng lhê.” ga, dum rayuq gi, “Ngò gi, Kehpa htâng châng lhê.” ga, dum góyuq gi, “Ngò gi, Hkrisduq htâng châng lhê.” ga, taí bùm kô é yanmai nghut lhê.

¹³ Hkrisduq gi, gam hkoq é hui bê lhú? Ngò Poluq gi, nungmoq é matú tap-zîng má jén sat é hui bê lhú? Nungmoq gi, ngá é myîng mai wui-myhup ¹⁴ hkâm yù kô é lhú? Ngò gi, Krispu eq Ge-u nhik mai lai luí, nungmoq ó yuq lé le wui-myhup a hkâm byí wú ¹⁵ é yanmai, nungmoq ó yuq le, ngá é myîng mai wui-myhup hkâm yù bê nghû a wó taí é nghut mù, ngò, Ga-

¹⁶ rai lé jeju hkya-ôn lhê. (Stehpana é yhumbyù wui lé le, ngò wui-myhup hkám byî é nghut lhê, haû mai lai luí gotû ó lé hkám byî záng ashî laq, ¹⁷ ngò a myit bun lo nghut ri.) Hkâsu mù gà le, Hkrisduq, ngo lé nhang kat é gi, wui-myhup hkám byi râ matú a nghut, gabú danglù hko kyo râ matú sheq nhang kat é ru nghut lhê; nghut kôlhang, waxâng zô wui é hpaqchyî byéng-yá dang đông hko kyô é a nghut mù, Hkrisduq é tapzing é a-tsam gi, akôm a dut byuq é nghut lhê.

**Garai É A-tsam Eq Hpaqchyî
Byéng-yá Gi, Hkrisduq**

¹⁸ Hkâsu mù gà le, tapzing má Yesuq shî hkâm é hkyô eq sêng é danglù gi, htên byoq hui râ bâng é matú, dang-gang dut byuq ri; nghut kôlhang, hkyi yu é huí nyi bang nga-nhông é matú gi, Garai Gasâng é a-tsam nghut ri. ¹⁹ Hkâsu mù gà le, Chyúmdang má kâ tô é gi,

“Hpaqchyî bò bâng é hpaqchyî byéng-yá lé, Ngò lhoq htên pyám râ nghut lhê; nyan bò bâng é nyan lé, Ngò, ajè dut pyám nhâng râ nghut lhê.”^a

ga ri.

²⁰ Hpaqchyî byéng-yá bò bang gi, hkâmá lhú? Hpaqchyî laiká kung bang gi, hkâmá lhú? Ipyat shi é dang tái kung bang gi, hkâmá lhú? Garai Gasang gi, mingkân é hpaqchyî byéng-yá lé lhoq ngok pyám bê a ²¹ nghut lhú? Hkâsu mù gà le, Garai Gasâng é hpaqchyî byéng-yá mai ga jang, mingkan zo wuí gi, yhumsing é hpaqchyî byéng-yá đông mai Garai Gasang lé a wó sé kô é yanmai, dang-gang gà pyám byi kô é mungdang lé

hko kyô é đông lumjínng bang lé hkyi yù râ matú, Garai Gasang myit hpyit ²² é nghut lhê. Yudaq byu pé gi, limik kumlhá pé lé dúng akô; Grik byu pé gi, hpaqchyî byéng-yá lé ho akô nghut ri. ²³ Nghut kôlhang, ngamoq gi, tapzing má jén sat huí é Hkrisduq é hkyô lé hko kyô lhê. Haû gi, Yudaq byu pé é matú myit leqbat jowò eq tûngbaù pé ²⁴ é matú danggang dut byuq ri. Nghut kôlhang, Garai Gasâng èq ji yù huí é Yudaq byu pé eq Grik byu pé é matú, Hkrisduq gi, Garai Gasâng é a-tsam eq Garai Gasâng é hpaqchyî byéng-yá ²⁵ nghut ri. Hkâsu mù gà le, Garai Gasâng é ngok hkyô gà é lhang gi, byu é hpaqchyî byéng-yá htoq má je gyaú ri; Garai Gasâng é wum nyhóm hkyô gà é lhang gi, byu é wum-o htoq má je gyaú ri.

²⁶ Gumang wui è, Garai Gasang, nungmoq lé ji yu é hkûn, nungmoq hkâsu dut nyi é hkyô lé myit wú keq. Waxâng zô wui é nyi yap a-tsáng đông hpaqchyî byéng-yá bo é bang, ahkáng ayá wó é bang, zaugun suwún amyû ²⁷ mâ é bang a myô é nghut lhê. Nghut kôlhang, Garai Gasang gi, hpaqchyî byéng-yá bò bang lé lhoq lhoq hpu râ matú, mingkan mâ é ngok bang gà é lé hkyin yu é nghut lhê; Garai Gasang gi, wum bò bang lé lhoq lhoq hpu râ matú, mingkan mâ é wum nyhóm bang gà é lé hkyin yu é nghut ²⁸ lhê. Yhang gi, mingkân èq ahkyak tô é lé lhoq htên pyám râ matú, haí a nghut é lé le, mingkan mâ é aróng a bo é eq wú tiq pyám huí é lé le, ²⁹ hkyin yu é nghut lhê. Haû gi, ó yuq le, Yhâng é hí má a ge nghutbun râ ³⁰ matú nghut ri. Garai Gasâng é yanmai, nungmoq gi, Hkrisduq Yesuq má nghut nyi bekô nghut ri; Hkrisduq

^a 1:19 Esai 29:14

gi, nga-nhông é matú, Garai Gasâng chyáng mâ é hpaqchyí byéng-yá dut bê nghut ri. Haú gi, nga-nhông é ding-mán hkyô, chyoiyúng hkyô eq hkyi yù³¹ hkyô nghut ri. Haú mù luí, “Gumrong é sù gi, haú Yhumsîng má gumrông sháng gaq.”^a ga kê tô é eq rajung za nghut ri.

**Woi-nyí Mai Lo É Garai Gasâng É
Hpaqchyí Byéng-yá**

2 Gumang wui ê, ngò gi, Garai Gasang eq sêng é saksé hkyô lé nungmoq chyáng taí pyô râ matú jé lé é hkûn, dang taí kûng é eq hpaqchyí byéng-yá mó bo é đông lé é a nghut.
² Hkâsu mù gâ le, ngò, nungmoq eq rahá nyi é u lé, Yesuq Hkrisduq eq Yhang tapzîng má jén sat huí é hkyô mai lai luí, jung hkgangmó lé tô-myhí pyám râ nghú myit hpyit yù bê nghut
³ lhê. Ngò gi, nungmoq chyáng jé lé é hkûn, wum nyhôm é eq gyai yhang
⁴ gyuq nán é nghut lhê. Ngá é danglù eq ngò hko kyô é hkyô gi, hpaqchyí bo é eq mhuí yu é dang pé đông a nghut é za, Woi-nyí é a-tsâm èq nungmoq lé shit é đông ru nghut mù, nungmoq é lumjîng myit gi, byù é hpaqchyí byéng-yá má a nghut é za, Garai Gasâng é hpungwup a-tsam má nghut nyi lhê.
⁶ Nghut kôlhang, ngamoq gi, myit òng bê bang lé hpaqchyí byéng-yá đông nyo lhê; shí pyat lhê é hpaqchyí byéng-yá eq htên byoq nyi huí é shí pyat mâ é zaú wui é hpaqchyí
⁷ byéng-yá đông kúm a nghut. Ngamoq taí é gi, haq tô é eq, ahkyíng nghu é lháng a joq shi mai nga-nhông é hpungwup shingkang é matú Garai Gasang tô to byí é hpaqchyí byéng-yá nghut é, Garai Gasâng é zaú tô é hpaq-

chyí byéng-yá lé taí é ru nghut lhê.

⁸ Shí pyat lhê é zau wui gi, hpaqchyí byéng-yá haú lé rayuq lháng a sê gyo kó nghut ri; yhangmoq sê gyo kô é ru nghut le gi, hpungwup shingkang bo é Yhumsîng lé tapzîng má jén sat pyám
⁹ kó râ a nghut. Nghut kôlhang, Chyúmdang má,

“Ó yuq èq le a myang wú, ó yuq èq le a wó gyô wú, ó yuq èq le a bûn myit wú é hkyô lé, Garai Gasang gi, Yhang lé chyitdap bâng é matú lajang to byi bê nghut ri.”^b

¹⁰ ga kê tô é eq rajung za nghut ri. Nghut kôlhang, Garai Gasang gi, haú hkyô lé, Yhâng é Woi-nyí đông nga-nhúng lé hpông shit bê nghut ri.

Woi-nyí haú gi, jung hkgangmó lé ho gôn wú é nghut luí, Garai Gasâng é zaú tô é hkyô lé lháng ho gôn wú é sù
¹¹ nghut ri. Byù má lúng é woi-nyí za a nghut jáng gi, byù rayuq myit é hkyô pé lé, ó yuq wá wó sê lhê lhuí? Haú eq rajung za, Garai Gasâng é Woi-nyí za a nghut jáng, Garai Gasang myit é hkyô lé, ó yuq le wó sê é a nghut.

¹² Nga-nhúng gi, mingkân é woi-nyí lé hap yu tô é a nghut é za, Garai Gasâng èq nga-nhúng lé byí to bê jeju lé, ngamoq wó sê gyo râ matú, Garai Gasâng chyáng mâ é Woi-nyí lé sheq

¹³ hap yu tô é ru nghut lhê. Haú mù luí, ngamoq gi, waxâng zô wui é hpaqchyí byéng-yá èq mhoq byí é dang đông taí é a nghut, Garaí é Woi-nyí èq mhoq byí é dang đông taí é sheq ru nghut mù, woi-nyí eq sêng é tengmán hkyô lé woi-nyí eq sêng é dang đông taí
¹⁴ sân kyô é nghut lhê. Haú Woi-nyí lé a wó é sù gi, Garai Gasâng é Woi-nyí mai lo é hkyô pé lé a hap yu é nghut lhê; haí mù gâ le, haú pé gi, yhâng é

^a 1:31 Yer 9:24 ^b 2:9 Esai 64:4

matú ngok é hkyô nghut luí, woi-nyí hkyô đông mai haú hkyô lé a wú é yanmai, yhang gi, haú pé lé a wó sê
¹⁵ gyo nghut ri. Woi-nyí eq sêng é byù gi, lunglhang lé wó jéyáng lhê, nghut kôlhang, yhang lé kúm gi, ó yuq èq le
¹⁶ wó jéyáng é a nghut. Chyúmdang má, “Hkâsu mù gâ le, ó yuq wá, haú Yhumsing é myit lé sé mù, Yhang lé wó mhoqshit wú é lhú?”^a
 ga kê tô ri. Nghut kôlhang, nga-nhúng gi, Hkrisduq é myit lé wó é bang nghut lhê.

**Noqkuq Hpúng Má Gam
 Hkoq Lhâm É Hkyô**

3 Gumang wui ê, hí hkún, ngò gi, nungmoq lé, Woi-nyí eq sêng é bang lé đông wó taí é a nghut; mingkan eq sêng é bang đông nghut kômù, Hkrisduq má zonú su dut bang lé đông
² sheq taí wú é nghut lhê. Nungmoq gi, zoshuq apat lé a wó zo shi kó nghut é yanmai, ngò gi, nungmoq lé naú byi huq é nghut lhê.^b Ahkuí lhang, nungmoq gi, zoshuq apat lé a wó zo shi
³ kó nghut ri. Nungmoq gi, mingkan eq sêng é bang ru nghut nyi ashí kó nghut ri. Hkâsu mù gâ le, manôn hkyô eq byoq lhum hkyô gi, nungmoq chyáng joq nyi é yanmai, nungmoq gi, mingkan eq sêng é bang nghut lhê a nghut kó luq? Mingkan zo wui su nyi yap
⁴ bum lhê a nghut kó luq? Rayuq gi, “Ngò gi, Poluq htâng châng lhê.” ga, góyuq gi, “Ngò gi, Apolo htâng châng lhê.” ga taí nyi bùm kô é nghut jáng, nungmoq gi, mingkan zo wui nghut nyi bum lhê a nghut kó luq?
⁵ Apolo gi, ó wá nghut lhê? Poluq gi, ó wá nghut lhê? Nga-nhik gi, Garaí é

dui-nhâng zoshâng za nghut luí, ó le ó lé, haú Yhumsing èq hun tô é muzó eq rajung za wùn waq é nghut luí, nungmoq gi, ngá-nhik đông mai wó lum-
⁶ jing kô é ru nghut lhê. Ngò gi, gabú danglù amyui lé hô kat, Apolo gi, wui hpyun byi, nghut kôlhang, yuq kô lò nhang é gi, Garai Gasang za ru nghut
⁷ lhê. Haú mù, amyui hô kat sù eq wui hpyun byi sù gi, ahkyak mó a nghut, yuq kô lò nhang é Garai Gasang za
⁸ sheq ahkyak ru nghut lhê. Amyui hô kat sù eq wui hpyun byi su nhik myoq-byu tô é hkyô gi, rajung za nghut ri; nghut kôlhang, yhumsing shikut é eq rajung za, ó le ô é shigyaú chyung-
⁹ huq wó yú kó rã nghut lhê. Hkâsu mù gâ le, ngamoq gi, Garai Gasang é mù zui luzúm wui nghut lhê; nungmoq gi, Garai Gasang é yò, Garai Gasang é yhâm nghut nyi akô.

¹⁰ Garai Gasang, ngo lé byí to bê jeju eq rajung za, yhâm saí kung sù rayuq đông, ngò gi, yhâm apùn awang hi to bê nghut lhê; gotú byù gi, hau é ahtoq má saí toq jat nyi é nghut lhê. Nghut kôlhang, yuq hkgámó gi, yhumsing
¹¹ saí é má rago sidiq rã lhê. Hkâsu mù gâ le, hi to gù nghut é, Yesuq Hkrisduq nghu é yhâm apùn awang mai lai luí, ó yuq le, gotú yhâm apùn awang lé
¹² wó saí é a nghut. Yhâm apùn awang hau é ahtoq má, hîng, ngùn, hpau-dap luqgok pé, sik, mhan, hkowá pé lé
¹³ chúng mù saí jat kô é nghut jáng, yuq hkgámó é muzó hkâsu nghut é hkyô lé lhoq htoq shit é hui rã nghut lhê. Haí mù luí gâ le, haú Yesuq é Buinyi gi, haú lé byu-myàng nhâng mù, haú buinyi lé gi, myí èq lhoq htoq shit rã nghut lhê. Haú myi gi, yuq hkgámó saí é muzó hkasú é nghut é lé chyâm

^a 2:16 Esai 40:13 ^b 3:2 Nungmoq lé naú byi huq é, gâ é gi, lui é hkyô pé lé hí mhoq byi é lé gâ lhê.

¹⁴ rã nghut lhê. Rayuq yuq saî é yhûm gi, ru gîng nyi é nghut jáng, haú yuq gi, yhang é shigyaú chyunghuq wó yû rã nghut lhê. Nghut kôlhâng, yhûm haú nyé gyó byuq é nghut jáng, yhang gi, yhûm sôm byuq é hui zo rã nghut lhê; yhang gi, asak lut kôlhâng, myishâm mai wó lut é byù su dut rã nghut lhê.

¹⁶ Nungmoq gi, Garai Gasâng é noqkuq yhûm nghut luí, Garai Gasâng é Woi-nyí gi, nungmoq má lúng nyí bê

¹⁷ hkyô lé a sé kó lú? Rayuq yuq, Garai Gasâng é noqkuq yhûm lé lhoq htên é nghut jáng, Garai Gasang gi, haú yuq lé lhoq htên pyám rã nghut lhê. Hkâsu mù gâ le, Garai Gasâng é noqkuq yhûm gi, chyoiyúng lhê; nungmoq gi, noqkuq yhûm haú nghut akô.

¹⁸ Nungmoq gi, yhumsing gùng yhum-sîng hkâlhoq nghoq kó. Nungmoq mâ é rayuq yuq, shí ipyat mâ é byù nyi a-tsáng đông hpaqchyí byéng-yá bò sô ga myit é nghut jáng, hpaqchyí byéng-yá akying bò sô wó dut sháng gaq, yhang gi, a-ngok sô dut rã lhê.

¹⁹ Hkâsu mù gâ le, mingkan shí mâ é hpaqchyí byéng-yá gi, Garai Gasâng é hí má ngok é hkyô nghut ri. Haú gi, “Garai Gasang gi, hpaqchyí byéng-yá bò bang lé, yhangmoq é hpaqchyí má yhang myí to nhang ri.”^a ga

²⁰ kâ tô é eq rajung za nghut ri. Hau htoq agó, “Haú Yhumsîng gi, hpaqchyí byéng-yá bò bang myit é hkyô pé akôm nghut é lé sê lhê.”^b ga le kâ

²¹ tô ri. Haú mù luí, ó yuq le, byù eq sêng é hkyô má gyáng é dang a taí kó sháng gaq! Lhunglhang gi, nungmoq é chyat

²² nghut lhê. Poluq le, Apolo le, Kehpa le, mingkan le, dui nyi é hkyô le, shi é hkyô le, ahkuí lhê hkyô eq htàngnùng mâ é hkyô le, banshoq gi, nungmoq é

²³ chyat nghut ri. Nungmoq gi, Hkrisduq é nghut akô; Hkrisduq gi, Garai Gasâng é nghut ri.

Hkrisduq É Lagyô Pé

4 Haú mù luí, byu pé gi, ngamoq lé, Hkrisduq é dui-nhâng zoshâng wui đông eq Garai Gasâng é zaú tô é hkyô pé lé taí pyô rã matú ap byí tô é hui bang đông sôn yù rã lhê. Haú đông nghut jáng, ap byí tô é hui bang gi, yhumsîng lhumzui hkyô lé saksé

³ shit rã dut lhê. Nungmoq eq nghut nghut, waxâng zô wui é tarâ rûng mai nghut nghut, ngo lé jéyáng kô le, ngá é matú atiq azo za nghut lhê; gè gè ga jáng, ngá gûng ngò lhang a jéyáng

⁴ é nghut lhê. Haí mù gâ le, ngá gûng ngò mara a bò bûn é nghut kôlhâng, haú gi, ngo lé wó lhoq sân-yúng byí é a nghut. Ngo lé jéyáng é sô gi, haú

⁵ Yhumsîng nghut lhê. Haú mù, masat tô é ahkyíng a jé shimá haí lé le a jéyáng é za, haú Yhumsîng jé lé shoq, lhang nyí keq. Yhang gi, mauchut hkaú má haq tô é pé lé byu-myàng nhâng mù, byu pé é myit nhiklhum má lúng é hkyô lé lhoq htoq shit rã nghut lhê. Haú hkûn, yuq hkangmó gi, ó le ó wó gíng é hkya-ôn hkyô lé, Garai Gasâng chyáng mai wó yù rã nghut lhê.

⁶ Gumang wui ê, ngò gi, “Kâ tô é gû mai hkâlai.” gâ é sanghkyâng é lichyúm lé, ngamoq chyáng mai nungmoq wó mhoq yú sháng gaq nghû, nungmoq é akýu é matú, ngò eq Apolo má haú pé lé yù mù dangtú kut é nghut lhê. Haú hkûn, nungmoq gi, nghutbûn é đông, rayuq lé gi, wú ko, góyuq lé gi, wú shóm, a kut kó rã

⁷ nghut lhê. Ó yuq wá, nang lé, góyuq eq shaí shoq kut lhê lú? Nang hap yu

^a 3:19 Yob 5:13 ^b 3:20 Hkya-on 94:11

é a nghut le gi, wó râ lú? Nàng, hap yu é nghut le gi, a hap yu é đông hải mù nghutbùn nyi lè lú?

- ⁸ Nungmoq gi, râ é lhunglhang gum-jup bang nghut bekô nhung! Nungmoq gi, wó bang dut gù nghut bekô nhung! Ngamoq a lom é za, nungmoq gi, hkohkam pé dut bekô nhung! Ngamoq le, nungmoq eq rahá hkohkam pé wó dut sháng gaq, nungmoq gi, gè gè yhang hkohkam pé dut to bekô râ lé, ngò hkâ-í yhang ô nau nyi lè
- ⁹ ô! Nghut kôlhang, sat râ matú doq-dan huí é shúm byú pé lé su, Garai Gasang gi, lagyô pé nghut é ngamoq lé de de kut htoq shit bê nghú, ngò wó myit ri. Ngamoq gi, nyi mi-nyì, joq mijoq, maumang lagyô pé eq waxâng zô wui é hí má, wú kûn jung đông dut nhang é huí nyi gù bê nghut
- ¹⁰ lè. Ngamoq gi, Hkrisduq é yanmai ngok é bang đông sôn yu é hui kô-lhang, nungmoq kúm gi, Hkrisduq má hpaqchyí gyaí bo é bang đông dut bekô nhung! Ngamoq gi, wum nyhôm é bang đông sôn yu é hui kôlhang, nungmoq kúm gi, wúm bo é bang đông dut bekô nhung! Nungmoq gi, hkunggâ é huí akô; ngamoq kúm gi,
- ¹¹ hkunggâ é a hui nhung! Shí hkyíng shí u jé shoq, ngamoq gi, zòmut wuì-shit huí é, mebu ajeq amyhâ dut huí é, nhuq bat huí é, yhumsing é nyi jowò
- ¹² a wó é bang nghut nyi lè. Ngamoq gi, yhumsing loq èq yhang mú zui wum kat nyi lè. Ngamoq gi, nhing pyâm é hui jáng, shimân byi, zing-rí
- ¹³ é hui jáng, jân pyâm kut lè. Ngamoq gi, lumù gansang é hui jáng, dang ngón dang nguí tû nyo lè. Ngamoq gi, ahkuí jé shoq, myidàm htoq má é hpoqkyuq hpoqpyâng eq mingkân é buzaq pé đông sôn yu é huí nyi lè.

- ¹⁴ Ngò gi, nungmoq lé hoq lhoq hpu râ matú háu pé lé kâ é a nghut, ngá é chyitdap zo wuì lé đông lhoq pùn
- ¹⁵ kying râ matú ru nghut lè. Nungmoq gi, Hkrisduq má mhoqshit bang ra mun wó kô é nghut kôlhang, îwâ pé myo shoq wó kô é a nghut; hkâsu mù gâ lé, ngò gi, haú gabú danglù đông mai, Hkrisduq Yesuq má nungmoq é îwa dut é nghut lè. Haú mù luí, ngò kut é su cháng keq nghú, ngò,
- ¹⁶ nungmoq lé lung kat lè. Hau é yanmai, ngò gi, haú Yhumsing má lhumzui sù nghut é, ngò chyitdap é ngá zo đông nghut sù Timohti lé, nungmoq chyáng nhang kat é nghut lè. Yhang gi, Hkrisduq Yesuq mâ é ngá é asak ùi hkyô lé, jowò hkangmó má é noqkuq hpúng hkangmó lé ngò mhoq byí é eq rajung za, nungmoq lé lhoq pun byi râ nghut lè.
- ¹⁷ Nungmoq mâ é ra-am gi, nungmoq chyáng ngò a dum jé lé râ su ngam pyâm kômù, nghutbùn byuq
- ¹⁸ bekô nghut ri. Nghut kôlhang, haú Yhumsing gyô é nghut jáng, ngò gi, nungmoq chyáng hân za jé lé râ nghut lè; háu hkûn, ngò gi, nghutbùn é byù háu bang haí taí é hkyô lé za a nghut, yhangmoq hai a-tsam wó é hkyô lé le gôn htoq râ nghut lè.
- ¹⁹ Hkâsu mù gâ le, Garai Gasâng é mingdán gi, taí é dang má bo é a nghut,
- ²⁰ a-tsam má sheq ru nghut lè. Nungmoq hká đông ô nau akô lú? Ngò gi, nungmoq chyáng, nuichúm hkat èq, a nghut jáng, chyitdap é eq nú-nhâm é myit mai lé lô ra râ lú?

**Ashop É Đông Gungsho Zùm
Yap É Hkyô Kut É Sù Lé Lhoq
Htoq Pyâm Râ Hkyô**

5 Nungmoq chyáng, ashop é đông gungsho zùm yap é hkyô joq é lé,

hkyak taí hû lò bekô; haú gi, a lumjínq bâng chyáng lhang a dut wú é hkyô nghut é, yuqgè rayuq gi, yhangwâ é myiwe eq nyí zô lhum nyi é hkyô
² nghut ri. Nghut kôle, nungmoq gi, nghutbun nyi bum akô nhung! Haú đông a nghut é za, nungmoq gi, yón é myit tân shit mù, haú su kut é byù lé, nungmoq é hpúng mai lhoq htoq
³ pyâm le, a gè kó lhu? Ngò gi, ngá gungdu, nungmoq eq rahá a nyi to kôlhang, ngá é i-myt gi, nungmoq eq rahá nghut nyí luí, gungdu jé nyi tô é đông mai, haú hkyô kut é sù lé
⁴ jéyáng doqdan gù nghut lhê. Nungmoq gi, nga-nhông é Yhumsing Yesuq é mying mai zup zing mù, ngá é i-myt gi, nungmoq eq rahá nghut nyí luí, nga-nhông é Yhumsing Yesuq é a-tsam le, nungmoq eq rahá nghut
⁵ nyi é hkun, byù haú yuq lé, Tsadán é loq má ap byí pyám keq.^a Haú jáng, Yhumsing é buinyí má, yhang é woi-nyí gi, hkyi yu é hui râ matú, yhang é yubak gungsho gi, lhoq htên pyâm é hui râ nghut lhê.
⁶ Nungmoq é nghutbun hkyô gi, ge é a nghut. Mún^b ra tsuí zo gi, muk long gón lé wó lhoq daú nhang é lé,
⁷ nungmoq a sé kó lhu? Nungmoq gi, múnchi a bo é bang nghut nyí kô é eq rajung za, múnchi a bo é muk htung asik su wó dut kô sháng gaq, múnchi axau lé lhuí pyám keq. Hkâsu mù gâ le, nga-nhông é Lhoqlhai Poí sauzo, Hkrisduq gi, hkungga nhong é hui bê
⁸ nghut lhê. Haú mù luí, nga-nhông gi, agè agáu hkyô eq hpuzo nhâng hkyô nghut é múnchi axau bo é đông a nghut é za, lhumzui hkyô eq tengmán

hkyô é muk nghut é, múnchi a bo é muk eq, Poí haú lé kut nyí sháng.

⁹ Ashop é đông gungsho zùm yap é bang eq hkâzùm kó nghú, ngò, nungmoq lé, ngá é laiká má kâ kat byi
¹⁰ bê nghut lhê. Nghut kôlhang, mingkan shí eq sêng é, ashop é đông gungsho zùm yap é bang, myoqnoq é bang, mhaú zô é bang eq hparà noq é bang lé hkâzùm yap kó nghú é gi, a nghut. Haú su ru nghut le gi, mingkan htoq shí mai nungmoq htoq ló byuq ra kô
¹¹ râ nghut lhê. Nghut kôlhang, yhanggùng yhang gi, gumang ga kôle, ashop é đông gungsho zùm yap é, myoqnoq é, hparà noq é, lumù gansang é, í shuq wut é, mhaú zô é sù ó yuq eq le a ge zùm yap kô râ nghut lhê nghú, ahkuí, ngò, nungmoq lé kâ kat nau é nghut lhê. Haú sù é byù eq gi, rahá lhang hkâzo kó.
¹² Haú noqkuq hpúng shinggan mâ é bang lé jéyáng râ gi, ngò eq haí sêng lhê lhu? Nghut kôlhang, hpúng ahkaú mâ é bang lé nungmoq jéyáng râ dut
¹³ lhê. Hpúng shinggan mâ é bang lé gi, Garai Gasang jéyáng râ nghut lhê. Nghut kôlhang, “Haú agè agáu é sù lé, nungmoq chyáng mai lhoq htoq pyám keq.”^c gâ tô ri.

Lumjínq Bâng Hkaú Má Jéyáng Lhum É Hkyô

6 Nungmoq mâ é rayuq yuq gi, gumang góyuq eq dang-rhâng lhum tô é nghut jáng, haú hkyô lé jéyáng nhâng râ matú, haú sân-yúng bâng é hí má taí râ malaí, Garai a wó
² bâng é hí má wám taí râ lhu? Haú sân-yúng bang gi, mingkan lé jéyáng

^a 5:5 Tsadán é loq má ap byí pyám keq gâ é gi, hpúng byù wui eq a zùm yap nhâng lo râ lé taí é nghut lhê. ^b 5:6 Mún gâ é gi, yubak mara lé taí nau é nghut lhê. Lhoqlhai Poí jé jáng, Israelaq byu pé gi, yhangmoq wó é múnchi banshoq lé lhuí pyám mù, múnchi a bo é muk saí kô é nghut lhê. ^c 5:13 Tará Pun 17:7

râ nghut é hkyô lé, nungmoq a sé kó lú? Nungmoq gi, mingkan lé jé-yáng râ bang nghut kôle nhîng, tiq é mû pé lé wó jéyáng é bang a nghut

³ kó lú? Nga-nhúng gi, maumâng pé lé jéyáng râ nghut é hkyô lé, nungmoq a sé kó lú? Haû mù, shí pyat mâ é hkyô pé lé, gè gè yhang wó jé-

⁴ yáng kô râ nghut lê ô! Haû mù lúí, nungmoq gi, dang-rhâng lhûm é mû pé joq é nghut jáng, noqkuq hpúng má ahkyak a nghut é bang lé tarâ agyì kut

⁵ nhâng kô râ lú? Ngò, haû su nghû taí é gi, nungmoq lé hoq hpu nhâng râ matú nghut lê. Lumjîng bâng chyáng dang-rhâng lhûm é hkyô lé wó jéyáng râ hpaqchyí luq shoq bo é byù, nungmoq chyáng rayuq lháng a nyì dut kô

⁶ râ lú? Nghut kôlhang, nungmoq gi, gumang yhangchang rayuq eq rayuq, a lumjîng bâng é hí má lháng rûng shok lhum akô nhung!

⁷ Nungmoq hkaû má mû jéyáng lhûm é hkyô joq é nghut jáng, nungmoq gi, sum lugù nghut bê. Góyuq èq shut le lháng rû ge lê a nghut kô lú? Mhaû zô é huí le lháng rû gè lê a nghut kô

⁸ lú? Nghut kôle, nungmoq yhang gi, mhaû zo kô é eq shut kô é nghut lúí, haû gi, nungmoq é gumang wuì lé kut é nghut lê.

⁹ Agè agaú é bang gi, Garai Gasâng é mingdán mâ é shimân jeju a myang hkam yù kó râ nghut é hkyô lé, nungmoq a sé kó lú? Hkâ-nâ nyì kó. Ashop é dông gungsho zùm yap é bang le, hparà noq é bang le, su-myi sulàng lú é bang le, shiwa hpó kut é bang le, yuqgè yhangchang nyì zô

¹⁰ lhûm é mara kut shut é bang le, hkau bang le, myoqnoq bang le, î shuq wut bang le, lumù gansang é bang le, mhaû zô é bang le, Garai Ga-

sâng é mingdán mâ é shimân jeju lé

¹¹ myang hkam yù kó râ a nghut. Nungmoq mâ é ra-am gi, haû su kut kô é bang nghut akô. Nghut kôlhang, nungmoq gi, nga-nhûng é Garai Gasâng é Woi-nyí eq Yhumsîng Yesuq Hkrisduq é myìng mai, mara hkyut san byí é, lhoq sân-yúng é eq chí sân pyám byí é hui bekô nghut ri.

**Ashop É Dông Gungsho
Zùm Yap É Hkyô**

¹² “Jung hkanmó kut râ ahkáng ngò wó lê.” Nghut kôlhang, jung hkanmó gi, akyû byí é a nghut. “Jung hkanmó kut râ ahkáng ngò wó lê.” Nghut kôlhang, haí jûng èq le ngo lé

¹³ wó sing pyám râ a nghut. “Zoshuq gi, wamdaû é matú nghut mù, wamdaû gi, zoshuq é matú nghut ri.” ga nungmoq ra-am taí kó râ nghut lê. Nghut kôlhang, Garai Gasang gi, haû í jûng é lé lhoq htên pyám râ nghut lê. Gungdu gi, ashop é dông gungsho zùm yap hkyo é matú a nghut é za, haû Yhumsing é matú nghut mù, haû Yhumsîng gi, gungdú é matú

¹⁴ nghut ri. Garai Gasang gi, Yhâng é a-tsâm èq, haû Yhumsîng lé, shi é mai lhoq dui toq yû bê nghut mù, nga-nhúng lé le lhoq dui toq yû râ

¹⁵ nghut lê. Nungmoq é gungdu pé gi, Hkrisduq é gungsho showui showang pé yhang nghut é lé, nungmoq a sé kó lú? Haû nghut le nhîng, Hkrisduq é gungsho showui showang pé lé yù mù, shiwa myhí pé eq rading ralhûm za kut pyám nhâng kô râ lú? Hkâ-nhâm

¹⁶ le a ge dut nhâng! Shiwa myhí eq gungsho zum é sù gi, yhang eq gungsho ralhûm za dut bê hkyô lé, nungmoq a sé kó lú? Hkâsu mù gâ le, “Yhangnhik gi, gungsho ralhûm za

- dut kô râ nghut lhê.”^a ga taî tô ri.
- ¹⁷ Nghut kôlhang, haû Yhumsîng eq rading ralhum za dut é sù gi, woi-nyî má Yhang eq ralhum za dut bekô nghut ri.
- ¹⁸ Ashop é dông gungsho zùm yap é hkyô lé koi pyám keq. Byù rayuq kut shut é gotû mara pé banshoq gi, yhang é gungdu shinggan má nghut lhê; nghut kôlhang, ashop é dông gungsho zùm yap é hkyô kut shut é sù gi, yhumsing gùng lé mara shut é sù gi, yhumsing gùng lé mara shut é sù gi, nghut ri. Nungmoq é gungdu gi, Garai Gasâng chyáng mai nungmoq wó yû bê nghut é, nungmoq má lúng nyî é Chyoiyúng Woi-nyî é noqkuq yhûm nghut é lé, nungmoq a sé kô l hú? Nungmoq gi, yhumsîng gùng lé sing é
- ²⁰ bang a nghut. Hkâsu mù gà le, nungmoq gi, ahpau ralhum byi mù wui hpyit tô é hui bê bang nghut akô. Haû mù luí, nungmoq é gungdû èq, Garai Gasang lé, hkunggâ é hkyô shit nyî keq.

Myî Yu É Eq Sêng É Hkyô

- 7** Ahkuí, nungmoq kâ kat é hkyô pé eq séng luí ga jang, yuqgè rayuq gi, myi a yu le gè ri. Nghut kôlhang, ashop é dông gungsho zùm yap é hkyô gyai myô é yanmai, yuqgè hkangmó gi, yhumsing é myiwe wó râ lhê; myiwe hkangmó gi, yhumsing é yuqgè wó râ lhê. Haû yhumsîng hpó gi, wò joq é eq rajung za, yhang yhumsîng myhí eq zùm sháng gaq; haû dông za, yhumsîng myhí le, yhang yhumsîng hpó eq zùm sháng gaq. Haû yhumsîng myhí é gungdu gi, yhanggùng yhang za sêng é a nghut, yhang é yhumsîng hpó eq le sêng lhê. Haû eq rajung za, yhumsîng hpô é

- gungdu gi, yhanggùng yhang za sêng é a nghut, yhang é yhumsîng myhí eq
- ⁵ le sêng lhê. Nungmoq myit huí lhum luí, kyûdûng é má rago ap nóng râ ahkyíng ayoq za a nghut jáng gi, rayuq eq rayuq hkâhe lhum kó. Nungmoq yhumsing gùng lé a wó hkang é yanmai, Tsadán èq gunglaú é a hui kô sháng gaq, ahkyíng ayoq haû lai
- ⁶ jáng, rahá dum zùm keq. Ngò, haû su nghû taî é gi, hkunmó hkyô é dông a nghut, ahkáng byî kat é dông ru nghut
- ⁷ lhê. Byù banshoq bang gi, ngò su nyî râ lé ô nau ri. Nghut kôlhang, yuq hkangmó gi, ó le ô é chyunghuq lé Garai Gasâng chyáng mai wó bum akô nghut ri; rayuq gi, rajung chyunghuq, góyuq gi, gó jung chyunghuq wó bum akô.
- ⁸ Ahkuí, myiwe a yû lô é bang eq chuimó pé lé ngò taí kôlé, ngò su, haû dông jâng nyi pyám kô é nghut le, yhangmoq é matú ge é hkyô nghut ri.
- ⁹ Nghut kôlhang, yhumsing gùng lé a wó hkang kô é nghut le gi, yhangmoq, myi yû myi ló râ lhê; hkâsu mù gà le, myi su nyé luí ô nau nyî râ malaí, myi yu myi ló le je ge lhê.
- ¹⁰ Myi yû bê bang lé, ngò, hkunmó hkyó kôlé, shí gi, ngò dông hkyô é a nghut, Yhumsing chyáng mâ é ru nghut lhê: Yhumsîng myhí gi, yhang é yhumsîng hpô chyáng mai a ge gang
- ¹¹ râ nghut lhê. Nghut kôlhang, yhang gâng é nghut jáng, myi a dum ló é za nyî râ lhê, haû a nghut jáng, yhang é yhumsîng hpó eq dum xoq yû râ lhê. Yhumsîng hpó le, yhang é yhumsîng myhí lé a ge kâng pyám râ nghut lhê.
- ¹² Góbang lé ngò shí su nghû taí kôlé, shí gi, Yhumsing chyáng mâ é a nghut, ngò dông mai taî é ru nghut lhê.

^a 6:16 Apûn 2:24

Gumang rayuq yuq gi, lumj́ing s̄u a nghut é yhums̄ing myh́i wó é nghut le, myiwe haũ, yhang eq rahá nyi nau é nghut jáng, yhang lé a ge k̄ang pyám
¹³ r̄a nghut lhê. Myiwe rayuq gi, lumj́ing s̄u a nghut é yhums̄ing hpó wó é nghut le, yuqgè haũ, yhang eq rahá nyi nau é nghut jáng, yhang eq a
¹⁴ ge gang r̄a nghut lhê. Hk̄asu mù ḡa le, haũ a lumj́ing s̄u yhums̄ing hpó gi, yh̄ang yhums̄ing myh́i d̄ong mai lhoq s̄an-yúng é hui bê nghut mù, a lumj́ing s̄u yhums̄ing myh́i le, lumj́ing s̄u nghut é yh̄ang é yhums̄ing hpó d̄ong mai lhoq san lhoq yúng é hui bê nghut ri. Haũ a nghut jáng, nungmoq é zo wuĩ gi, a sanséng dut kô r̄a nghut lhê; nghut kôlh̄ang, yhangmoq gi, haũ d̄ong mai, chyoiyúng bekô nghut ri.
¹⁵ Nghut kôlh̄ang, haũ a lumj́ing s̄u ḡang ló naũ jáng gi, ḡang ló sháng gaq. Lumj́ing é yuqgè nghut nghut, myiwe nghut nghut, haũ s̄u é hkyô pé má gi, hk̄um zing tô é hkyô a joq é nghut lhê. Garai Gasang gi, nga-nhúng lé, ngu-
¹⁶ ngón shoq nyi sháng gaq ga ji yù bê nghut lhê. Yhums̄ing myh́i ê, náng é yhums̄ing hpó lé wó hkyi yù r̄a nghũ, hk̄asu wó sé r̄a lhú? Yhums̄ing hpó ê, náng é yhums̄ing myh́i lé wó hkyi yù r̄a nghũ, hk̄asu wó sé r̄a lhú?
¹⁷ Hká d̄ong nghut kôlh̄ang, yuq h̄kangmó gi, Garai Gasang, yhang lé ji yu tô é hk̄un, haũ Yhums̄ing mai yhang lé nyi nhang tô é d̄ong asak dui nyi r̄a lhê. Haũ gi, noqkuq hpúng pé banshoq má ngò tô to býi é tarâ nghut
¹⁸ lhê. Byù rayuq gi, ji yu é huĩ é hk̄un, ahpyo-kuq hpyit hkam yu to gù bê nghut jáng, ahpyo-kuq hpyit a hk̄am s̄u d̄ong a dut byuq sháng gaq. Byù rayuq gi, ji yu é huĩ é hk̄un, ahpyo-kuq hpyit a hkam yu to sh́i é nghut jáng, ahpyo-kuq hpyit a hkam yù sháng

¹⁹ gaq. Ahpyo-kuq hpyit hk̄am hkyô gi, haĩ ahkyak a nghut; ahpyo-kuq hpyit a hk̄am hkyô gi, haĩ ahkyak a nghut. Garai Gasang é hkunmó pé lé ch̄ang
²⁰ nyi é za sheq ahkyak nghut lhê. Yuq h̄kangmó gi, yhang lé Garai Gasang èq ji yu é hk̄un lhê su xoq nyi nyi
²¹ r̄a lhê. Nang gi, ji yù huĩ é hk̄un jùn dut nyi é lhú? Haũ hkyô lé hk̄a-myit chiq. Nghut kôlh̄ang, nang gi, luthkyô wó yu é nghut jáng, haũ d̄ong nyi aq.
²² Hk̄asu mù ḡa le, haũ Yhumsing èq ji yu é huĩ é hk̄un, jùn dut nyi é s̄u gi, haũ Yhumsing èq lhoq lhut yu é byù nghut bê. Haũ eq rajung za, ji yu é huĩ é hk̄un, luthkyô wó é s̄u gi, Hkrisduq
²³ é jùn nghut ri. Nungmoq gi, Garai Gasang èq ahpau byi mù wui hpyit yu é hui bê bang nghut akô. Haũ mù, byu pé é jùn hk̄adut kó. Gumang wuĩ
²⁴ ê, yuq h̄kangmó gi, yhumsing lé Garai Gasang èq ji yu é huĩ to bê d̄ong, Yh̄ang é hí má xoq nyi nyi r̄a lhê.
²⁵ Ahkuĩ, zomyi zorâm wui é hkyô taĩ kôlé. Haũ Yhumsing chyáng mã é hkunmó gi, ngò a wó; nghut kôlh̄ang, Yhumsing é shogyo nhikmyĩn é yan-
²⁶ mai, lumj́ing s̄u rayuq nghut nyi é d̄ong, ngò, nungmoq lé hkyô shit r̄a nghut lhê. Ahkuĩ hui zô é wuĩhke hkyo é yanmai, nungmoq gi, yhum-
²⁷ s̄ing nyi to é su xoq nyi nyi le je ge ri nghũ, ngò wó myit ri. Nang, myih̄ang bê a nghut lhi? Lhoq kang r̄a hk̄ada lo. Nang, myi a háng shi a nghut lhi?
²⁸ Myi hk̄ahô lo. Nghut kôlh̄ang, nang, myih̄ang é nghut le gi, mara a nghut. Zomyi gi, myi ló é nghut jáng, mara a nghut. Nghut kôlh̄ang, myih̄ang é bang gi, sh́i pyat má wuĩhke hkyô pé myo myo hui kó r̄a nghut mù, ngò, nungmoq lé haũ mai hkyi yù nau ri.
²⁹ Gumang wuĩ ê, ngò taĩ nau é li-chyúm gi, ahkyíng tot byuq bê nghut

- mù, ahkuí mai, myi wó é bang gi, a wó é bang đông nyi kó sháng gaq.^a
- ³⁰ Yón ngaú huí é bang gi, a huí é bang su; gabú é bang gi, a gabú é bang su; sutzè lé wui yu é bang gi, sutzè a wó é
- ³¹ bang su; haú mingkan zè pé lé chung é bang gi, haú pé lé a myit tuí é bang su, nghut kó sháng gaq. Hkâsu mù gâ le, shî mingkân é ahkui lhê é azông isâm gi, laí ló nyi é nghut lhê.
- ³² Ngò gi, nungmoq lé a myit myo nhâng naù. Myi a yù shí é sù gi, haú Yhumsîng lé hkâsu wó gabú nhâng râ matú, haú Yhumsîng é muzó lé myit
- ³³ chiq nyi ri. Nghut kôlhang, myi yû bê sù gi, yhâng é yhumsîng myhí lé hkâsu wó gabú nhâng râ matú, mingkan shi é muzó eq séng luí myit chiq nyi ri.
- ³⁴ Haú mù, yhâng shirong é myit gi, byo myín nyi ri. Myi a ló é myiwe nghut nghut, zomyi gyíng nghut nghut gi, yhâng é gungdu eq woi-nyí má haú Yhumsîng lé rago wó ap nóng râ matú, Yhumsîng é muzó pé eq séng luí myit chiq nyi ri. Nghut kôlhang, myi ló bê myiwe gi, yhâng é yhumsîng hpó lé hkâsu wó gabú nhâng râ matú, mingkan shi é muzó eq séng luí myit chiq
- ³⁵ nyi ri. Ngò, haú su nghú taí é gi, nungmoq é matú ge é hkyô nghut lhê; nungmoq lé tara èq zuí zing é a nghut é za, myit a byò lo shoq Yhumsîng lé wó ap nóng râ matú, jô é đông asak wó duí kô sháng gaq ngu é hkyô ru nghut lhê.
- ³⁶ Nghut kôlhang, rayuq yuq gi, yhang dúng tô é zomyi gyíng lé a htuk é đông kut nyi é su wó myit ngàm jáng, myiwe haú asak kô lo nyi mù, hâng yù râ dut bê nghú myit é nghut le gi, yhang ô nau é đông kut sháng gaq. Yhang mara kut é a nghut. Yhang-

- ³⁷ nhik gi, hâng lhum râ lhê. Nghut kôlhang, yhang gi, haú hkyô lé yhâng é myit mai wó lhoq zîm pyâm é nghut mù, yut yut ô naù hkyô é ahkaú má a nghut é za, yhumsîng ô naù é hkyô lé wó hkûm zing pyâm é sù nghut luí, haú zomyi gyíng lé a hâng yù râ matú wó myit hpyit bê sù nghut é nghut jáng, yhang gi, ge é hkyô kut
- ³⁸ bê nghut ri. Haú mù luí, zomyi gyíng haú lé hâng yu é sù gi, jô é hkyô kut bê nghut ri; nghut kôlhang, zomyi gyíng haú lé a hâng yu é sù gi, je ge é hkyô kut bê nghut ri.
- ³⁹ Myiwe rayuq gi, yhâng é yhumsîng hpó rû dui nyi nyi, yhang eq xoq tô ashí nghut lhê. Nghut kôlhang, yhâng é yhumsîng hpó shi byuq é nghut jáng, yhang gi, myi ló râ ahkáng dum wó bê nghut lhê, nghut kôle, haú yuq gi,
- ⁴⁰ Yhumsîng eq sêng é sù dut râ lhê. Ngò jéyáng é đông ga jáng, myi a dum ló é wó nyi le gi, yhâng é matú je gabú hkyô dut râ nghut lhê. Ngò le, Garai Gasâng é Woi-nyí wó sù nghú wó myit ri.

Hparà Lhò Lé Tîng Byí É Zoshuq

- 8** Ahkuí, hparà lhò pé lé tîng byí é zoshuq hkyô: nga-nhúng banshoq bang gi, haú hkyô eq séng luí sê lhê. Sê é hkyô gi, nghutbun sê lhê; nghut kôlhang, chyitdap myit gi, lhoq kô
- ² myhang lhê. Byù rayuq yuq gi, rajung jung lé sé bûn é nghut le, yhang sé âng
- ³ é lé lháng a sé shi nghut ri. Nghut kôlhang, Garai Gasang lé chyitdap é sù gi, Garai Gasâng èq sê é sù nghut ri.
- ⁴ Haú mù luí, hparà lhò pé lé tîng byí é zoshuq lé zô é eq séng luí gi: hparà lhò gi, mingkan má haí lháng a nghut é hkyô lé le, Garai Gasang gi,

^a 7:29 A wó é bang đông nyi kó sháng gaq gâ é gi, Garai mù lé je myit zuq nyi sháng gá naù é nghut lhê.

Yhang rayuq mai lai luí gotú a nyi é lé
⁵ le, nga-nhúng sê lhê. Hkâsu mù gà le, mauhkúng htoq má nghut nghut, myi-gùng htoq má nghut nghut, byù ra-am mai hparà pé ga bang nyi mù, “hparà pé” myo myo eq “yhumsing pé” myo
⁶ myo nyi kôlhang nga-nhúng é matú gi, Íwa nghut é Garai Gasang rayuq za nyi é nghut mù, lhunglhang gi, Yhang mai hpan é nghut luí, nga-nhúng gi, Yhâng é matú asak dui nyi é nghut lhê. Yesuq Hkrisduq nghu é Yhumsing rayuq za nyi é nghut mù, lhunglhang gi, Yhang đông mai hpan é nghut luí, nga-nhúng gi, Yhang đông mai asak dui nyi é nghut lhê.
⁷ Nghut kôlhang, yuq hkanmó gi, haú hkyô lé sê gam hkoq yu é a nghut. Ra-am gi, ahkuí jé shoq hparà lhô pé má mán byuq kô é yanmai, haú sù é zoshuq lé yhangmoq zô é hkûn, hparà lhô lé tîng byí é zoshuq đông myit sôn yu akô. Yhangmoq myit sôn sê é hkyô wum nyhôm é yanmai, mara wó bûn
⁸ akô nghut ri. Nghut kôlhang, zoshuq gi, nga-nhúng lé, Garai Gasâng shut shuí chyâng e é a nghut. Nga-nhúng a zô é nghut le gi, je sùm byuq ló é a nghut, zô é nghut le gi, je ge lo é a nghut.
⁹ Haú su ga kôlhang, nungmoq a htung a htê zô é hkyô gi, lumjîng myit wum nyhôm bang é matú myit leqbat jowò a dut shoq sidîq keq.
¹⁰ Hkâsu mù gà le, sumsé hpaqchyí wó é bang nungmoq gi, hparà lho é noq-kuq yhûm má zô nyi kô é lé, haú myit sôn sê é hkyô má wum nyhôm é sù rayuq yuq myang é nghut jáng, hparà lhô pé lé tîng byí é zoshuq lé, yhang wám zo râ lé wum byí é a
¹¹ dut kó râ lú? Haú mù, Hkrisduq shí hkám byi bê nghut é, wum nyhôm é gumang hpó haú yuq gi, nungmoq é

sumsé hpaqchyí èq lhoq htên pyâm é
¹² hui berâ nghut lhê. Nungmoq gi, haú hkyô đông mai, nungmoq é gumang wui lé mara kut shut é eq, yhangmoq é myit sôn sê é hkyô wum nyhôm é lé nò nhang é hkûn, Hkrisduq lé mara
¹³ kut shut é nghut bekô. Haú mù luí, ngò zô é gi, ngá é gumang hpó lé mara kut shut nhang é nghut jáng, yhang lé myit a leqbat nhâng sháng gaq, ngò, hkâ-nhám le, sho lé a zo lo râ nghut lhê.

Lagyo Rayuq É Ahko Ahkáng

9 Ngò gi, lut sù a nghut lú? Ngò gi, lagyo rayuq, a nghut lú? Ngò gi, nga-nhúng é Yhumsing Yesuq lé myang wú bê sù, a nghut lú? Nungmoq gi, haú Yhumsing má, ngò zui saí é muzó é ashi pé chyat, a nghut kô
² lú? Ngò gi, góbâng chyáng lagyo a nghut kôlhang, nungmoq chyáng gè gè nghut lhê! Hkâsu mù gà le, nungmoq gi, haú Yhumsing má, ngò lagyo nghut é hkyô saksé dizik nghut bum akô.
³ Ngá ahtoq má jéyáng bang lé, ngá
⁴ gûng ngò taí hung kat kôlé. Ngamoq gi, zo râ shuq râ ahko ahkáng a wó é
⁵ bang nghut lhê lú? Gotú lagyo pé eq Yesuq é yhanggu yuqzô pé eq Kehpa kut é su, lumjîng sù nghut é yhumsing myhí shuí chûng râ, ngamoq, ahko
⁶ ahkáng a wó é nghut lhê lú? Ngò eq Barnaba baú za, asak dui hkyô é matú mú zui ra râ lú?
⁷ Ó yuq wá, yhumsing zoshuq wùn luí, gye mú wùn waq râ lú? Ó yuq wá, tsibiyiq hkyâm saí mù, haú mâ é tsibiyiq shí a zo kut râ lú? Ó yuq wá, sau rém mù, sau naú a shuq kut râ
⁸ lú? Ngò gi, shí hkyô pé lé xângzo hkyam đông za taí é nghut lhê lú? Haú tarâ má le, rajung za taí tô lhê, a

- ⁹ nghut lú? Hkâsu mù gà le, haû Mo-sheq é tarâ má, “Guq nâng nyi é no lé nhuttsung hkâ-tsûng to byi.”^a ga kâ tô ri. Garai Gasang gi, no eq séng
- ¹⁰ luí za chiq é nghut lhê lú? Gè gè yhang, yhang gi, nga-nhûng é matú taí é a nghut kô lú? Nghut lhê, haû gi, nga-nhûng é matú kâ to byí é nghut lhê. Haí mù gà le, yò hpuq sù, yò hpuq é eq, guq bat sù, guq bat é gi, kyô chòm shù yù râ lé myoqbyù luí,
- ¹¹ kut kô é nghut lhê. Ngamoq gi, nungmoq chyáng woi-nyí amyui sân kat bê nghut mù, nungmoq chyáng mâ é mingkan zè lé shù yu é nghut jáng,
- ¹² lûm myô é dut byuq bekô lú? Gó-bang gi, nungmoq chyáng mai garúm é ahko ahkáng wó kô é nghut jáng, ngamoq gi, haú lé je wó râ lhê a nghut kô lú?
- Nghut kôlhang, ngamoq gi, ahko ahkáng haú lé a yu é nghut lhê. Haû yù râ malaí, Hkrisduq é gabú danglù gi, hkûm zing pyâm é a hui râ matú sheq, jung hkangmó lé ngamoq hkam
- ¹³ jân nyi lhê. Haû noqkuq yhûm má mù zuí é bang gi, yhangmoq é zoshuq lé haû noqkuq yhûm mai wó é hkyô eq, hkungga gyap má dojaú é bang gi, hkungga gyap má nhông byí é ra-am lé myàng zô é hkyô lé, nungmoq a sé
- ¹⁴ kô lú? Haû eq rajung za, gabú danglù hko kyô é bang gi, gabú danglù hkyô mai yhangmoq é asak baú râ lhê ga, haû Yhumsing hkunmó hkyô to bê nghut ri.
- ¹⁵ Nghut kôlhang, ngò gi, ahko ahkáng haú pé haí lé le a yu é nghut lhê. Nungmoq, ngo lé haú su lhom kut byi râ lé myoqbyù mù, ngò, shí hkyô lé kâ é a nghut. Hkâsu mù gà le, ngò haû su gumrong é hkyô lé, rayuq yuq lhoq htên pyám byi râ htoq má, ngò
- ¹⁶ shi byuq le lhang je ge ri. Nghut kô-lhang, gabú danglù lé ngò hko kyô é hkûn, ngò gumrong jang a joq; hkâsu mù gà le, haû gi, ngò a kut a ge é ngá wô nghut lhê. Haû gabú danglù lé ngò a hko kyô é nghut le gi, ngò
- ¹⁷ dingnyé wó râ nghut lhê. Yhumsing nau é myit mai ngò hko é nghut jáng, shigyaú chyunghuq wó râ nghut lhê; yhumsing nau é myit mai a nghut jáng gi, ngo lé lûm luí ap tô é lé, agon za wùn waq nyi é dut râ nghut lhê.
- ¹⁸ Haû mù luí, ngá é shigyaú chyung-huq gi, haí nghut lhê lú ga jang, haû gabú danglù lé hko kyô é hkûn, ngò gi, ahpau a yu é za wó ap nóng luí, gabú danglù hko kyo hkyô mâ é ngá é ahko ahkáng pé lé ngò a yu é amyat nghut lhê.
- ¹⁹ Ngò gi, ó yuq é a-ô má le a nyi é za, lut sù nghut kôle, byù wó myô é myhó shuí lhing yù râ matú, ngá gûng ngò, yuq hkangmó é jùn kut nyi lhê.
- ²⁰ Ngò gi, Yudaq byu pé lé shuí lhing yù râ matú, Yudaq byu pé chyáng nghut nyi é hkûn, Yudaq byù rayuq đông dut nyi lhê. Ngò gi, tarâ hkaú má nyi sù a nghut kôlhang, tarâ hkaú mâ é bang lé shuí lhing yù râ matú, tarâ hkaú má nyi bâng chyáng nghut nyi é hkûn, tarâ hkaú mâ é byù rayuq đông
- ²¹ dut nyi lhê. Ngò gi, tarâ a wó bang lé shuí lhing yù râ matú, tarâ a wó bâng chyáng nghut nyi é hkûn, tarâ a wó sù rayuq đông dut nyi lhê. Nghut kô-lhang, gè gè ga jáng, Garai Gasâng é tarâ mai a lut htoq é za, Hkrisduq é
- ²² tarâ hkaú má nyi sù nghut lhê. Ngò gi, wum nyhóm bang lé shuí lhing yù râ matú, wum nyhóm bâng chyáng nghut nyi é hkûn, wum nyhóm sù rayuq đông dut nyi lhê. Ngò gi, wó dut é hkyô đông mai byù ra-am lé wó hkyí

^a 9:9 Tarâ Pun 25:4

sháng gaq nghû, byù lhunglhang bâng chyáng, byù ajà jà dông nyi nyi lhê.

²³ Ngò gi, gabú danglù mai wó é shimân jeju pé lé wó chôm hkam yù sháng gaq nghû, gabú danglù é yanmai haú pé banshoq lé kut é nghut lhê.

²⁴ Din shingjóng poi má din rã bang banshoq din kôlhang, rayuq za shigyaú chyunghuq wó é hkyô lé, nungmoq a sé kô lú? Chyunghuq wó rã

²⁵ matú din keq. Sup poi má shingjóng lhum é bang yuq hkanmó gi, yhum-sing gùng yhumsing tarã htan é dông lhoq mhân yù rã lhê. Yhangmoq gi, gíng nyi rã a nghut é janmaú wó rã matú, haú su kut é nghut akô; nghut kôlhang, nga-nhúng gi, ahtum abyuq gingtíng nyi rã nghut é janmaú wó rã matú shikut é nghut lhê.

²⁶ Haú mù luí, ngò gi, jum dín din é byù rayuq su dín é sù a nghut. Ngò gi, laí lé bat é byù rayuq su, akôm

²⁷ má bat é sù le a nghut. Ngò gi, gó-bâng chyáng mungdang hko é htàng má, ngá gúng ngò, shigyaú chyunghuq eq a gingdán sù a dut sháng gaq nghû, ngá gúng lé gyai yhang lhoq mhân yù mù, ngá gung lé jùn kut yu nyi lhê.

**Israellaq Pê É Labaú
Mai Sidiq Byí É Hkyô**

10 Gumang wui ê, ngò gi, dut laí lo é hkyô lé, nungmoq lé a sé a dut nhâng nau é nghut lhê; hí hkún, nga-nhúng é íchyí íwa pé banshoq bang gi, mhutdúm ô má nyi mù, Nhong Nè mai wó laí byit kô é

² nghut lhê.^a Yhangmoq banshoq bang gi, mhutdúm eq Nhong Nè má, Mosheq é chángzò pé dông baptisma hkam yu é bang chyat nghut bekô.

³ Yhangmoq banshoq bang gi, rajung

⁴ zã é woi-nyí zang zo kô é eq, rajung zã é woi-nyí wui shuq kô é nghut lhê; hkâsu mù gâ le, yhangmoq eq rahá nghut nyi é woi-nyí eq sêng é luqbum mó mai, yhangmoq shuq kô é nghut lhê; luqbum mó haú gi,

⁵ Hkrisduq nghut bê. Nghut kôlhang, yhangmoq myo hpyang lé, Garai Gasang a nau é nghut mù, yhangmoq é gùng sôm lé yoso pé má myhín so san kut pyâm é hui bekô nghut ri.

⁶ Haú hkyô pé dut htoq é gi, agè ashop hkyô má yhangmoq myit tuí bùm é su, nga-nhúng a myit tuí nyi rã matú nga-nhúng é azông dut bê

⁷ nghut ri. “Byu pé gi, zùng mù, zo luí shuq luí, a lumjíng bang kut é dông, toq mù, ye bum akô.”^b ga kã tô é eq rajung za, yhangmoq mã é ra-am hparà noq é bang dut byuq é su,

⁸ nungmoq hkâkut kó. Yhangmoq mã é ra-am gi, ashop é dông gungsho zùm yap é hkyô shut kômù, ra-nyí má za í mún sum hkyíng yuq shi byuq é su, ashop é dông gungsho zùm yap é hkyô le, nga-nhúng gi, a ge kut shut

⁹ rã nghut lhê. Yhangmoq mã é ra-am gi, haú Yhumsing lé chyâm luí, lhangmuí pê èq hte sat é huí bùm kô é su, haú Yhumsing lé, nga-nhúng gi, a ge

¹⁰ chyâm rã nghut lhê. Yhangmoq mã é ra-am gi, nhutluq shô-myo kôluí, lhoq htên é maumâng èq sat pyâm é hui kô é su, nungmoq gi, nhutluq shô-myo hkâkut kó.

¹¹ Yhangmoq chyáng wú yú rã azông dông haú pé dut htoq luí, ló htàng rã ipyat pé má nyi âng to bang nga-nhúng é matú sidiq byi rã dông

¹² kã to bê nghut ri. Haú mù luí, nungmoq gi, yap gíng nyi bê su ngàm kô

^a 10:1 Bun zo ralhüm mai raxê lhum gi, Htoq Ló Laiká má bo é Mosheq htàng cháng bâng é hkyô lé kã tô é nghut lhê. ^b 10:7 Htoq Ló 32:6

é nghut jáng, a leqbat râ matú sidiq
¹³ nyì keq! Byu chyáng htoq sê é gunglaú
 hkyô za nungmoq hui râ nghut lhê.
 Garai Gasang gi, lhumzui sù nghut
 lhê mù, nungmoq a wó jân é gung-
 laú hkyô lé hui nhâng râ a nghut.
 Nghut kôlhang, nungmoq gunglaú huí
 é hkûn, Yhang gi, haú lé nungmoq wó
 jan râ matú, hkyô htong byi râ nghut
 lhê.

**Hparà Lhô Noq Hkyô
 Lé Koi Pyám Râ Hkyô**

¹⁴ Haú mù luí, ngò chyitdap é luzúm
 wui ê, hparà lhô noq hkyô lé koi pyám
¹⁵ keq. Nhik gying bang lé ngò taí lhê;
 ngò haí taí nyi é hkyô lé nungmoq
¹⁶ gùng myit sôn yù keq. Nga-nhúng,
 jeju bûn nyi é jeju góm lé shuq é
 hkûn, Hkrisduq é sui má chôm zùm
 bê a nghut kó lú? Nga-nhúng, myhik
 hpê é muk lé zô é hkûn, Hkrisduq
 é gungdu má chôm zùm bê a nghut
¹⁷ kó lú? Haí mù gâ le, muk htung ra-
 lum za nghut mù, nga-nhúng gi, myo
 myo nghut kôle ragùng za nghut nyi
 lhê. Hkâsu mù gâ le, nga-nhúng ban-
 shoq bang gi, haú rahtung zâ é muk
 lé chôm gàm zô é bang chyat nghut
 lhê.
¹⁸ Israelaq byu pê é hkyô lé myit wú
 keq. Haú hkungga lé zô é bang gi,
 hkungga gyap má chôm lom é bang
¹⁹ nghut lhê, a nghut kó lú? Hparà lhô,
 a nghut jáng, hparà lhô lé tîng byí
 é hkungga gi, rajung jung nghut lhê
²⁰ nghû, ngò taí é lú? Haú su taí é a
 nghut, a lumjínng bâng é hkungga gi,
 Garai Gasang lé nhông byí é a nghut,
 nat gâng pé lé tîng byí é ru nghut
 lhê. Ngò gi, nungmoq, nat gâng pé eq
 chôm zum nyi bang dut râ lé a ô nau

²¹ é nghut lhê. Nungmoq gi, haú Yhum-
 sing é góm lé le, nat gâng pê é góm
 lé le, ge shuq râ a nghut; nungmoq
 gi, haú Yhumsing é zangbó má le, nat
 gâng pê é zangbó má le, rahá ge bo
²² lòm râ a nghut. Nga-nhúng gi, haú
 Yhumsing lé manôn nhâng nau é bang
 dut râ a nghut kó lú? Nga-nhúng gi,
 Yhâng htoq je wúm bo é bang nghut
 lhê lú?

Lumjínng Su É Luthkyô

²³ “Jung hkanngmó kut râ ahkáng wó
 lhê.” nghut kôlhang, jung hkanngmó
 gi, akyú wó é a nghut. “Jung hkanngmó
 kut râ ahkáng wó lhê.” nghut kôlhang,
 jung hkanngmó gi, byù lé wó kô làm
²⁴ nhang é a nghut. ^a Ó yuq le, yhumsing
 é gè hkyo matú ho é a nghut é za, gó-
 bâng é gè hkyo é matú hô râ dut lhê.
²⁵ Sho ûng gâi má ûng é haí lé lé, úng-
 âng é myit èq a myí gôn é za zo keq.
²⁶ Hkâsu mù gâ le, “Myidàm htoq eq haú
 má joq é jung hkanngmó gi, Yhumsing
 é chyat nghut lhê.” ^b gâ tô ri.
²⁷ A lumjínng bang ra-am, nungmoq lé
 zang zo jì mù, nungmoq ê nau é nghut
 jáng, úng-âng é myit èq a myí gôn
 é za, nungmoq hí má to byí é gû lé
²⁸ zo keq. Nghut kôlhang, rayuq yuq,
 nungmoq lé, “Shí gi, hparà lhô lé tîng
 byi bê nghut lhê.” ga taí kyô é nghut
 jáng, nungmoq lé taí kyo su é yan-
 mai le, myit úng-âng é yanmai le, haú
²⁹ lé hkâzo kó. Úng-âng é myit haú gi,
 nungmoq é a nghut, góyuq é úng-âng
 é myit lé taí nau é ru nghut lhê. Ngá
 é luthkyô lé, haí mù góyuq é úng-âng
 é myit èq jéyáng é huí nhang lhê lú?
³⁰ Ngò jeju bûn é myit mai bo zo bo shuq
 yu é nghut jáng, Garai Gasang lé jeju
 hkya-on bê nghut é zoshuq hau é yan-

^a 10:23 Bun zo 23 mâ é dangngho gi, Korinhtuq byu pé lhaq taí é dang nghut lhê.

^b 10:26 Hkya-on 24:1

mai, haí mù lumu pyâm é ngò hui rà lú?

- ³¹ Haú mù luí, nungmoq zo kôlhang, shuq kôlhang, haí kut kôlhang, Garai Gasâng é hpungwup shingkâng
- ³² é matú chyat kut keq. Ngò gi, yuq hkgangmó lé, hkyô hkgangmó má shikut luí myit ngón nhang é eq rajung za, nungmoq gi, Yudaq byu pé lé nghut nghut, Grik byu pé lé nghut nghut, Garai Gasâng é noqkuq hpúng má é byù lé nghut nghut, ó yuq lé
- ³³ le myit hkâleqbat nhâng kó. Hkâsu mù gâ le, ngò gi, yangmoq hkyi yu é wó hui kó sháng gaq nghú, ngá é gè hkyô ho é a nghut é za, myo myô é matú gè hkyô ho nyi é ru nghut lhê.

11 Ngò gi, Hkrisduq é alik châng é su, nungmoq gi, ngá é alik cháng keq.

Noqkuq É Má Htap Htuk Râ Hkyô

- ² Nungmoq gi, hkyô hkgangmó má ngo lé bún nyi kô é yanmai le, nungmoq lé ngò lai byi bê mhoqshit hkyô pé lé myhik zing nyi kô é yanmai le, ngò, nungmoq lé hkya-ôn lhê.
- ³ Ahkuí, ngò, nungmoq lé sê hkyâng nhâng nau é hkyô gi: yuqgè hkgangmó é ulhum gi, Hkrisduq nghut ri; myiwe hkgangmó é ulhum gi, yuqgè nghut ri; Hkrisduq é ulhum kúm gi, Garai Gasang nghut ri. Yuqgè hkgangmó gi, kyûdûng le nghut nghut, myiqhtoi htoí le nghut nghut, yhâng é ulhum lé nghop tô é nghut jáng, yhâng é ulhûm é aróng lé lhoq hpoí pyâm é nghut
- ⁵ bê. Myiwe hkgangmó gi, kyûdûng le nghut nghut, myiqhtoi htoí le nghut nghut, yhâng é ulhum lé a nghop tô é nghut jáng, yhâng é ulhûm é aróng

- lé lhoq hpoí pyâm é nghut bê. Haú gi, yhâng é ulhum lé wuq pyâm é eq
- ⁶ rajung za nghut ri. Myiwe rayuq gi, yhâng é ulhum lé a nghop pyâm é nghut jáng, yhâng é xâm lé nyhâm pyám ra rà nghut lhê. Nghut kôlhang, xâm nyhâm pyâm é nghut nghut, xâm wuq pyâm é nghut nghut, myiwe rayuq é matú aróng hpoí lhê nghut jáng, yhang gi, yhâng é ulhum lé nghop
- ⁷ to ra rà nghut lhê. Yuqgè gi, Garai Gasâng é azòng isâm eq hpungwup shingkang nghut é yanmai, yhâng é ulhum lé a nghop rà é nghut lhê. Myiwe kúm gi, yuqgè é hpungwup
- ⁸ shingkang nghut ri. Hkâsu mù gâ le, a-nham sâng-hi má, yuqgè gi, myiwe mai lo é a nghut, myiwe sheq yuqgè
- ⁹ mai lo é ru nghut lhê.^a Hau htoq agó, yuqgè lé gi, myiwê é matú hpan tô é a nghut, myiwe lé sheq, yuqgè é matú
- ¹⁰ hpan tô é ru nghut lhê. Haú nghut é yanmai le, maumang lagyo pè é yanmai le, myiwe gi, ahko ahkáng kumhá dông yhâng é ulhum lé nghop rà dut lhê.
- ¹¹ Nghut kôlhang, haú Yhumsing hí má, myiwe gi, yuqgè lé nghehkau é su, yuqgè le, myiwe lé nghehkau é
- ¹² nghut lhê. Hkâsu mù gâ le, myiwe gi, yuqgè mai lo é su, yuqgè le, myiwe mai hku lé é nghut lhê. Nghut kôlhang, jung hkgangmó gi, Garai Gasang mai lo é nghut lhê. Myiwe rayuq, ulhum a nghop é za Garai Gasang lé kyûdûng é gi, htuq kô rà lú? Nungmoq, yhumsing gung é matú doqdân
- ¹⁴ yù keq. Yuqgè xâm hîng tô é nghut jáng, yhâng é matú aróng hpoí é hkyô
- ¹⁵ dut é nghut kôle, myiwe xâm hîng tô é nghut jáng, yhâng é matú hpungwup shingkang nghut é hkyô lé, htunglí èq

^a 11:8 Apûn 2:21-23

nungmoq lé mhoqshit lhê, a nghut kô lú? Hkâsu mù gâ le, xâm hîng tô é gi, nghop râ zè dông yhang lé byî tô¹⁶ é nghut lhê. Rayuq yuq, haú hkyô lé taí dang-rháng nau é nghut jáng, nga-moq chyáng le, Garai Gasâng é noq-kuq hpúng pê chyáng le, gotû htúngli a joq é nghut lhê.

Yhumsing É Myinzang

¹⁷ Nungmoq é zuphpong pé gi, gè hkyô kut râ htoq má akyû a bo é hkyô je kut kô é yanmai, a-ô má hkyô shit tô é pé má, ngò, nungmoq lé hkyâ-ôn é a¹⁸ nghut. Sâng-hi má, noqkuq hpúng ralhúm dông nungmoq zup zîng é hkûn, nungmoq hkaú má gam hkoq hkyô joq é lé wó gyô é nghut luí, têng é le bò râ¹⁹ nghû, ngò lumjîng lhê. Ô pé gi, Garai Gasang o é hkyam shut nghut é lé wó shit râ matú, nungmoq ahkaú má gam²⁰ hkoq lhum hkyô joq râ dut lhê. Nungmoq rahá zup zîng kô é hkûn, nungmoq gi, haú Yhumsing é myinzang zô²¹ é a nghut kó. Hkâsu mù gâ le, nungmoq zô é hkûn, góyuq lé le a lánng é za, ó le ó hí yù zô akô. Haú mù, rayuq gi, zo mut huí nyì, góyuq gi, shuq wut to²² dut akô nghut ri. Nungmoq gi, zo jang shuq jang yhûm a wó bang nghut akô lú? Garai Gasâng é noqkuq hpúng lé wú tiq pyám kô é eq, a wó bang lé hoq hpu nhâng kô é, nghut akô lú? Nungmoq lé ngò hkâsu nghû taí kó râ lú? Haú pé é yanmai, ngò, nungmoq lé hkyâ-on râ lú? Ratsuí lháng a wó dut!²³ Hkâsu mù gâ le, haú Yhumsing chyáng mai ngò wó hap yu é gû lé, nungmoq lé lhai byi bê nghut lhê: Haú Yhumsîng Yesuq gi, Yhang lé ap pyám²⁴ huí é myìn má, muk lé yù mù, jeju hkyâ-ôn é htâng má, haú lé myhik hpé mù, taí é gi, “Shí gi, nungmoq é

matú Ngá é gungsho nghut lhê; Ngo lé bûn nyì râ matú, shî su kut nyì keq.”²⁵ gâ ri. Haú eq rajung za, myinzang bàn zô é htâng má, Yhang gi, góm lé le yù mù, “Góm shî gi, Ngá é sui mâ é dangshikaq asik nghut lhê; hkâ-nhám le, nungmoq shî shuq é hkûn, Ngo lé bûn nyì râ matú shî su kut keq.” gâ²⁶ taí ri. Hkâsu mù gâ le, nungmoq gi, muk shî lé zo luí, góm shî lé shuq é hkgangmó, haú Yhumsîng shî hkâm é hkyô lé, Yhang jé lé shoq, shit kyô nyì râ lhê.²⁷ Haú mù luí, ó yuq nghut kôle, a gingdán é dông Yhumsing é muk haú lé zo mù, góm haú lé shuq é nghut jáng, haú Yhumsing é gungdu eq sui²⁸ lé shut é mara wó bê nghut lhê. Haú mù, ó yuq le, muk zo góm shuq râ hí má, yhumsing gùng yhumsîng jep²⁹ wú ra râ nghut lhê. Hkâsu mù gâ le, ó yuq nghut kôle, haú Yhumsing é gungdu eq sêng é hkyô lé a sê gyô é za muk zo góm shuq é nghut jáng, yhânggùng yhang mara zô bò shuq³⁰ bo yu é nghut lhê. Haú nghut é yanmai, nungmoq mâ é byù myo myo gi, wum nyhôm é, nõhpyo huí é nghut bum akô. Ra-am gi, shi ló byuq bekô³¹ nghut ri. Nghut kôlhang, nga-nhúng gi, yhumsing gùng yhumsîng hí sôn sê yu é nghut jáng tarâ jéyáng é hui³² râ a nghut. Nga-nhúng gi, mingkan eq rahá, mara byî é a hui zo sháng gaq ga, nga-nhúng lé haú Yhumsing èq jéyáng é hkûn, nga-nhúng gi, mhoqshit é huí nyì gù bê nghut lhê.³³ Haú mù luí, ngá é gumang wui ê, nungmoq gi, zo râ nghû rahá zup zîng é hkûn, rayuq eq rayuq lánng lhum keq.³⁴ Nungmoq rahá zup zîng é hkûn, jéyáng é a hui zo kó sháng gaq, rayuq yuq zòmut é nghut jáng, yhûm má zô chûng râ lhê.

Gotû myit tô é hkyô pé gi, ngò jé lé é hkûn sheq shit kyo râ nghut lhê.

Woi-nyí Hkyô Eq Sêng É Chyunghuq Pé

- 12** Gumang wui ê, woi-nyí hkyô eq sêng é chyunghuq pé lé, nungmoq a sê gyo râ lé ngò a ô nau é nghut lhê. Nungmoq gi, a lumjínq bang nghut nyí kô é hkûn lé, dang a nyo é hparâ lhô noq râ matú hkyô shuí nghoq é hui kô é hkyô lé, nungmoq sê lhê. Haû mù luí, “Yesuq gi, nhîng pyâm é hui sháng gaq.” ga, Garai Gasâng é Woi-nyí mai taí é byù ó yuq le a nyi é eq, haû Chyoiyúng Woi-nyí mai za a nghut jáng, “Yesuq gi, Yhum-sîng nghut lhê.” ga, ó yuq le a wó taí é nghut lhê nghû, ngò, nungmoq lé taí kyô é nghut lhê.
- ⁴ Woi-nyí hkyô eq sêng é chyunghuq ajung jung joq lhê; nghut kôlhâng, Chyoiyúng Woi-nyí mai chyat nghut lhê. Dojaú é hkyô ajung jung joq lhê; nghut kôlhâng, Yhum-sîng rayuq lé za dojaú é nghut lhê. Zui saí é hkyô ajung jung joq lhê, nghut kôlhâng, Garai Gasang yhang za, byù lhunglhâng bang má, haû pé banshoq lé kut é nghut lhê.
- ⁷ Woi-nyí é hpông shit hkyô gi, byù pé é gè hkyô matú, yuq hkangmó lé byi bê nghut ri. Rayuq lé gi, Woi-nyí haû mai, hpaqchyí byéng-yá byíng é danglù byí é nghut ri; góyuq lé gi, Woi-nyí hau èq za, sumsé hpaqchyí byíng é danglù byí é nghut ri; góyuq lé gi, Woi-nyí hau èq, lumjínq myit byí é nghut ri; dum góyuq lé gi, Woi-nyí hau èq, nò lhoq ge é chyunghuq byí é nghut ri; dum, góyuq lé gi, hpungwup a-tsam pé; dum, góyuq lé gi, myiqhtoi htoí é ahkáng; dum, góyuq le gi, woi-nyí pé lé sê gam hkoq é ahkáng; dum, góyuq lé gi, laklaí dang ahú hú ge taí é ahkáng;

dum, góyuq lé gi, dang haú pé é lichyúm taí sân kyô é ahkáng, byí é nghut ri. Chyunghuq haú pé banshoq gi, Woi-nyí hau èq za kut é loqmú chyat nghut mù, Yhang myit hpyit é dông yuq hkangmó lé haú pé tsiing gàm byí é nghut ri.

Gungbun Myo Kôlhâng, Ra Gùng Za

- ¹² Gungdu gi, gungsho showui showang pé myo myo lé pong tô é nghut kôlhâng, ragùng za nghut ri; gungsho showui showang pé banshoq myo myo nghut kôlhâng, gungdu ra gùng za dut tô é nghut ri. Haû eq rajung za, Hkrisduq eq le haú dông nghut ri.
- ¹³ Hkâsu mù gâ le, nga-nhúng banshoq bang gi, Yudaq byù nghut nghut, Grik byù nghut nghut, jùn nghut nghut, lut bang nghut nghut, gungdu ra lhum za dut râ matú, Woi-nyí rayuq mai za wui-myhup hkâm yù bê nghut luí, Woi-nyí rayuq lé za chôm shuq yù bê bang nghut lhê.
- ¹⁴ Haû gungdu gi, gungsho showui showang ra bun lé za kut tô é a nghut é za, myo myo lé pong tô é nghut lhê. Haû hkyí gi, “Ngò, loq a nghut é yanmai, gungdu eq a sêng é nghut lhê.” gâ é nghut jáng, hau é yanmai, gungdu eq a séng wó dut é a nghut.
- ¹⁶ Dum, haû nohkyap gi, “Ngò, myoqjí a nghut é yanmai, gungdu eq a sêng é nghut lhê.” gâ é nghut jáng, hau é yanmai, gungdu eq a séng wó dut é a nghut.
- ¹⁷ Ragùng dû é gi, myoqjí za nghut é nghut jáng, gyô é hkyô gi, hkâmá nghut râ lhú? Ragùng du é gi, nohkyap za nghut é nghut jáng, shôm nam é hkyô gi, hkâmá nghut râ lhú? Nghut kôlhâng, Garai Gasang gi, gungsho showui showang hkangmó lé, Yhang dut nhâng nau é eq rajung za, gungdu má kut to bê nghut ri.

¹⁹ Gungsho showui showang gi, ra bun za nghut é nghut jáng, gungdu gi, ²⁰ hkâmá nghut râ lú? Hkyak ga jang, gungsho showui showang pé myo kô-lhang, gungdu gi, ragùng za nghut ri. ²¹ Haû myoqjî gi, loq lé, “Ngò, nang lé a ra!” nghû a ge taí. Haû ulhum gi, hkyî lé, “Ngò, nang lé a ra!” nghû a ²² ge taí. Haû za a nghut, gungdu mâ é gungsho showui showang pé má wum je nyhôm é su dut é pé le, a bò a ge é ²³ chyat nghut lhê. Hau htoq agó, hpau a lúm tap râ su myit ngam é gungsho showui showang pé lé, nga-nhúng je hpautap râ lhê. Haû a shit é jung gungsho pé lé, nga-nhúng hpautap é ²⁴ dông rago nghop râ lhê. Nga-nhúng é wó shit é gungsho pé kúm gi, haû hkyô a ra nghut ri. Nghut kôlháng, Garai Gasang gi, gungdû é gungsho showui showang pé lé pong to mù, aróng nyhum é lé, je riyhang aróng ²⁵ byi bê nghut ri. Haû mù, gungdu má gamhkuî lhúm é hkyô a bo é za, gungsho showui showang pé ralhúm eq ralhúm, rajung za kut wó myit tê byî ²⁶ lhum kó râ nghut lhê. Haû gungsho showui showang ralhúm jamjau huí é nghut jáng, lhum hkgangmó bo jamjau râ nghut lhê. Ralhúm hpautap huí é nghut jáng, lhum hkgangmó bo gabú é nghut lhê. ²⁷ Ahkuî, nungmoq gi, Hkrisduq é gungdu nghut kôluí, nungmoq yuq hkgangmó gi, haû é gungsho showui ²⁸ showang pé nghut akô. Garai Gasang gi, noqkuq hpúng má, sâng-hi lé, lagyô pé, í lhum nghû râ má, myiqhtoî pé, sôm lhum nghû râ má, mhoqshit bang, hau htáng má, laklaí kumlhá pé kut râ bang, nò wó lhoq gê râ chyung-huq wó é bang lé le, góbang lé wó garúm é bang, shuí-u râ chyunghuq wó é bang, laklaí dang ahú hú ge taí

²⁹ é bang lé, masat to bê nghut ri. Banshoq bang gi, lagyô pé nghut lhê lú? Banshoq bang gi, myiqhtoî pé nghut lhê lú? Banshoq bang gi, mhoqshit bang nghut lhê lú? Banshoq bang gi, laklaí kumlhá kut akô lú? Banshoq bang gi, nò lhoq ge é chyung-huq wó é nghut lhê lú? Banshoq bang gi, laklaí dang ahú hú ge taí lhê lú? Banshoq bang gi, dang haû pé é lichyúm ge taí sân kyô lhê lú? ³¹ Nghut kôlháng, nungmoq gi, je gyaú é chyunghuq lé gyai yhang ô nau nyî keq.

Chyitdap Myit

Hau htoq agó, ahkuî, ngò, nungmoq lé, je gyaú dik é hkyô ralhúm shit kôlé.

13 Ngò gi, byu pé é eq maumang lagyô pé é myíng pé lé sê taí é nghut kôlháng, chyitdap myit a bo é nghut jáng, mying hung htê bo é ut eq mying tui htê bo é chapchéng su za ² dut byuq râ nghut lhê. Ngò gi, myiqhtoi htoî é chyunghuq, zaú tô é hkyô pé banshoq lé sê gyô é nyan, sumsé hpaqchyî banshoq lé wó é eq, bùm pé lé wó htot nhang é lumjíng myit bo é nghut kôlháng, chyitdap myit a bo é nghut jáng, ngò haí a nghut sù ³ dut berâ nghut lhê. Ngò gi, wó é sutzè banshoq myùng bang lé byî pyâm é eq, ngá é gungdu lé nyhê pyám râ matú ap pyâm é nghut kôlháng, chyitdap myit a bo é nghut le gi, hai akyû a bò nghut ri. ⁴ Chyitdap myit gi, myit hing lhê, nú-nhâm lhê. Chyitdap myit gi, a manôn, gyáng dang a taí, a nghutbún é nghut ⁵ lhê. Chyitdap myit gi, hpau a dap é hkyô a kut, yhumsing é akyû baú za a hô, lui za nhikjum a yo, shut é mara a ⁶ matsíng é nghut lhê. Chyitdap myit gi, agè ashop é má a gabú é za, haû teng-

- ⁷ mán hkyô má gabú nyi ri. Chyitdap myit gi, hkâ-nhám le wú magum ri, hkâ-nhám le lumhkau ri, hkâ-nhám le myit myoqbyu ri, hkâ-nhám le hkam jân ri.
- ⁸ Chyitdap myit gi, hkâ-nhám le htûm byuq é a nghut. Myiqhtoi htoî é hkyô pé gi, byuq byuq râ nghut lhê; laklaí dang ahú hú ge taí é hkyô gi, zim byuq râ nghut lhê; sumsé hpaqchyí hkyô gi,
- ⁹ lâi lô byuq râ nghut lhê. Hkâsu mù gâ le, nga-nhúng sê é gi, ra-am rahtâng ru nghut lhê. Nga-nhúng myiqhtoi htoî é gi, ra-am rahtâng ru nghut
- ¹⁰ lhê. Nghut kôlhang, gumjup hkyô jé lé é hkûn, a gumjup hkyô gi, byuq byuq
- ¹¹ râ nghut lhê. Ngò, zoshâng nghut ashí hkûn gi, zoshâng dông dang taí, zoshâng dông myit, zoshâng dông myit sôn wú é nghut lhê. Ngò, suwún nghut jáng gi, zoshâng nyi yap hkyô pé lé tô
- ¹² pyám bê nghut lhê. Ahkuí, nga-nhúng gi, myoqjâm hkaú mâ é rago a sân é wupzo lé za myàng é nghut lhê; nghut kôlhang, htâng má, myoqdong hkyûm wó myâng râ nghut lhê. Ahkuí, ngò gi, ra-am rahtâng za sê é ru nghut lhê; nghut kôlhang, Garai Gasang gi, ngo lé gumjup shoq sê é su, ngò le, htâng má, gumjup shoq sé râ nghut lhê.
- ¹³ Ahkuí, lumjáng myit, myit myoqbyù hkyô, chyitdap myit shi sôm lhum myit tô ri. Nghut kôlhang, háu pé mâ é kô dik é gi, chyitdap myit nghut ri.

**Myiqhtoi Htoi É Chyunghuq Pé Eq
Laklaí Dang Nyo É Chyunghuq Pé**

- 14** Chyitdap hkyô má le cháng mù, woi-nyí hkyô eq sêng é chyunghuq lé le gyai yhang myit o nyi keq. Myiqhtoi htoî é chyunghuq
- ² lé je riyhang myit o nyi keq. Hkâsu mù gâ le, laklaí dang ahú hú nyo é sù ó yuq le, byù lé nyo é a nghut é za

- Garai Gasang lé nyo é ru nghut lhê. Yhang lé ó yuq eq le a sê gyo byi, zaú tô é hkyô pé lé háu Woi-nyí eq
- ³ nyo htoq é nghut ri. Nghut kôlhang, myiqhtoi htoî é sù yuq hkangmó gi, byu pé lé wum byi dang eq nhik títng
- ⁴ dang taí ri. Laklaí dang rahú nyo é sù gi, yhumsing gùng lé htuqbang byí ri, nghut kôlhang, myiqhtoi htoî é sù gi, noqkuq hpúng lé htuqbang byí ri.
- ⁵ Ngò gi, nungmoq yuq hkangmó laklaí dang ahú hú pé nyò râ lé ô nau ri, nghut kôlhang, nungmoq myiqhtoi htoî râ lé je ô nau é nghut lhê. Hkâsu mù gâ le, laklaí dang ahú hú nyo é sù gi, háu noqkuq hpúng lé wó htuqbang râ matú, lichyúm lé taí sân kyô é za a nghut jáng, myiqhtoi htoi sù gi, yhang htoq je gyaú é nghut lhê.
- ⁶ Ahkuí, gumang wui ê, ngò gi, nungmoq chyáng lé jé mù, laklaí dang pé nyo é nghut kôle, shing-rán nghut nghut, sumsé hpaqchyí nghut nghut, myiqhtoi dang nghut nghut, mhoqshit dang nghut nghut, nungmoq lé a taí kyô é nghut le gi, nungmoq é matú
- ⁷ ngò hai akyû htoq râ lú? Htê lhoq htoq é asak a bo jung zè pé má lháng gi, sampyí nghut nghut, títng nghut nghut, gam hkoq tô é htê a joq é nghut jáng, mut myhíng bat myhíng é htê haí nghut é lé, hkâsu wó sé
- ⁸ râ lú? Dum, tut htê le gam hkoq é dông a mut kyô é nghut jáng, majan htoq râ rì rì ó yuq wá hên râ lú?
- ⁹ Nungmoq chyáng le háu dông nghut lhê. Nàng, laklaí dang ahú hú nyo le, sê gyô é danghkun mai nyo é za a nghut jáng, nàng haí taí nyi é lé ó yuq wá hkâsu wó sé râ lú? Nungmoq gi, maulat má za taí hâng pyâm
- ¹⁰ nyi kó râ nghut lhê. Mingkan má dang ahú hú yhang joq é nghut lhê, nghut

kòle, dang lichyúm a htoq é dang gi,
¹¹ a joq é nghut lhê. Haû mù luí, rayuq
 yuq haí taí nyi é lichyúm lé ngò a dat
 chyup é nghut jáng, ngò gi, haû dang
 taí su é matú maigan byù dut mù,
 yhang gi, ngá é matú maigan byù dut
¹² é nghut lhê. Nungmoq chyáng le haú
 dông nghut lhê. Nungmoq gi, woi-nyí
 hkyô eq sêng é chyunghuq pé lé gyai
 yhang ô nau nyi bekô nghut mù, haû
 noqkuq hpúng lé kô myhâng nhang
 é chyunghuq pé lé je ho shikut nyi
 keq.
¹³ Haû nghut é yanmai, laklaí dang
 ahú hú taí é sù ó yuq le, yhang haû
 taí é lichyúm wó taí sân kyo sháng
¹⁴ gaq, kyúdung râ dut lhê. Hkâsu mù
 gâ le, laklaí dang ahú hú dông ngò
 kyúdung é nghut jáng, ngá é woi-nyí
 mai dúng é nghut lhê; nghut kôlhang,
 ngá é myitnyân é matú, hai akyû
¹⁵ a wó nghut ri. Haû mù, ngò hkâsu
 kut râ lhú? Ngò gi, ngá é woi-nyí
 mai le kyúdung râ, ngá é myitnyan
 mai le kyúdung râ nghut lhê; ngò gi,
 ngá é woi-nyí mai le mahkôn hkôn
 râ, ngá é myitnyan mai le mahkôn
¹⁶ râ nghut lhê. Nungmoq gi, nungmoq
 é woi-nyí mai za Garai Gasang lé
 hkya-on kô é nghut jáng, a sê gyô
 é bang mâ é rayuq gi, nungmoq haí
 taí é lé a sê é nghut mù, nungmoq
 jeju hkya-ôn é hkûn, “Amen” ga hkâsu
¹⁷ wó taí râ lhú? Nungmoq gi, ge dik
 shoq jeju hkya-on kô é abe, nghut kô-
 lhang, góbang gi, htuqbâng é a hui kó
 nghut ri.
¹⁸ Ngò gi, nungmoq banshoq bâng
 htoq má laklaí dang ahú hú je wó taí
 é yanmai, Garai Gasang lé jeju bûn ri.
¹⁹ Nghut kôlhang, noqkuq hpúng má,
 laklaí dang rahú dông danghkun ra-
 mun ngò taí râ htoq má, góbang lé

mhoqshit râ akyû bo é dang ngo hkun
 taí râ lé ngò je ô nau ri.

²⁰ Gumang wuì ê, zoshâng wuì su myit
 nyi é lé nô pyám keq. Agè ashop hkyô
 eq sêng é má gi, nyheqnú dông kut
 mù, nungmoq myit é hkyô má gi, kô
²¹ bang dông kut keq. Haû jep é tarâ má
 kê tô é gi,

“A wó gyô wú é dang dông mai
 le, góming byu pê é nhutwuí
 dông mai le, byù shí bang lé
 ngò taí râ nghut lhê;
 nghut kôlhang, yhangmoq gi,
 ngá dang gyo kó râ a nghut.’
 ga Yhumsing taí ri.”^a

gâ ri.

²² Haû mù, laklaí dang ahú hú nyo é
 hkyô gi, lumjínng bâng matú kumlhá
 a nghut é za, a lumjínng bâng matú
 sheq ru nghut lhê. Myiqhtoi dang kúm
 gi, a lumjínng bâng matú a nghut é
 za, lumjínng bâng matú sheq ru nghut
²³ lhê. Haû nghut mù, noqkuq hpúng
 gón chôm zing mù, yuq hkangmó lak-
 laí dang ahú hú nyò kô é nghut jáng,
 a sê gyô é bang nghut nghut, a lum-
 jínng é bang nghut nghut, wang lé kô é
 hkûn, yhangmoq gi, nungmoq nâ bùm
 bekô ga a taí kó râ nghut lhê lhú?
²⁴ Nghut kôlhang, yuq hkangmó, myiq-
 htoi dang taí nyi é u má, a lumjínng
 sù nghut nghut, a sê gyô é sù nghut
 nghut, wang lé é nghut jáng, yhang gi,
 yubak dap sù rayuq nghut é lé, ban-
 shoq èq lhoq pûn kyîng é hui râ eq,
 banshoq èq jéyáng é hui râ nghut é
²⁵ htoq agó, yhâng é i-myt má zaú tô é
 hkyô pé lé de de lhoq htoq shit é hui
 râ nghut lhê. Haû mù, yhang gi, ngóm
 gop luí, Garai Gasang lé noqkuq mù,
 “Garai Gasang gi, gè gè yhang, nung-
 moq chyáng rahá nghut nyi ri!” ga taí
 pyo htoq kat râ nghut lhê.

^a 14:21 Esai 28:11-12

**Shuq Shuq Tap Tap
Za Noqkuq Râ Hkyô**

- ²⁶ Haû jáng, gumang wuê ê, nga-nhúng haî taí râ lúhú? Nungmoq rahá lé chôm zîng é hkûn, yuq hkanmó gi, Garai hkya-on mahkôn nghut nghut, mhoqshit é dang nghut nghut, shing-rân nghut nghut, laklaí dang ahú hú nyo é hkyô nghut nghut, taí sân kyô é nghut nghut pé lé, wó le ge ri. Haú pé ban-shoq gi, noqkuq hpúng lé wum-o byi
- ²⁷ râ matú chyat kut é dut râ lhê. Rayuq yuq, laklaí dang ahú hú nyo é nghut jáng, í yuq eq myô htum sum yuq mai a laí é za, rayuq htâng rayuq nyò râ dut é htoq agó, rayuq yuq haû lé taí
- ²⁸ sân kyo ra râ dut lhê. Taí san kyô é sù a nyi é nghut jáng, laklaí dang ahú hú nyo é sù gi, noqkuq hpúng má zim za nyi râ dut mù, yhânggùng yhang eq Garai Gasang lé za nyo râ dut lhê.
- ²⁹ Myiqhtoi í yuq nghut nghut, sum yuq nghut nghut taí kyo râ dut lhê; góbang gi, haî taí é lé rago gyô chyam
- ³⁰ wú râ dut lhê. Nghut kôlháng, zung tô é sù rayuq yuq chyáng shing-rân jé é nghut jáng, hí taí nyi é sù gi, nô
- ³¹ byuq râ dut lhê. Hkâsu mù gà le, yuq hkanmó gi, mhoqshit é eq myit wum byí é wó hui kó sháng gaq, nungmoq banshoq bang gi, rayuq htâng rayuq
- ³² myiqhtoi wó htoí é nghut lhê. Haû myiqhtoi pé é woi-nyí pé gi, myiqhtoi pé upháng é a-ô má nghut nyi ri.
- ³³ Hkâsu mù gà le, Garai Gasang gi, atau ahú dut é Garai Gasang a nghut é za, nguingón hkyo é Garai Gasang ru nghut lhê.
- Sân-yúng bâng zing tô é hpúng ban-shoq mâ é eq rajung za, myiwe wuê gi, noqkuq hpúng pé má zim za nyi râ dut lhê. Yhangmoq gi, dang taí ahkáng a wó é nghut mù, haû jep é tarâ má bo é eq rajung za a-ô má nyi kó sháng

- ³⁵ gaq. Yhangmoq gi, rajung jung sé naû kô é nghut jáng, yhûm má yhangmoq é yhumsîng hpô pé chyáng myi kó sháng gaq; hkâsu mù gà le, myiwe rayuq noqkuq hpúng má dang taí é gi, ahoq ahí hkyô nghut ri.
- ³⁶ Haû Garai Gasâng é mungdang gi, nungmoq chyáng mai htoq lo é nghut lhê lúhú? Haû gi, nungmoq chyáng za
- ³⁷ lé jé bê nghut lhê lúhú? Rayuq yuq, yhang gi, myiqhtoi, a nghut jáng, woi-nyí chyunghuq byí é hui sù nghut lhê ga myit é nghut jáng, ngò, nungmoq lé ká byí é pé gi, haû Yhumsing é hkunmó nghut é lé, yhang sê yù
- ³⁸ sháng gaq. Yhang gi, haû lé haî su a ngàm kut é nghut jáng, yhânggùng le, haî su a ngàm kut é hui zo râ nghut lhê.
- ³⁹ Haû mù luí, ngá é gumang wuê ê, myiqhtoi htoi râ lé ô nau nyi mù, laklaí dang ahú hú nyo é lé hkâ-
- ⁴⁰ hkûm pyám kó. Nghut kôlháng, jung hkanmó gi, htuk é dông eq shuq shuq tap tap zâ é hkyô dông kut é dut râ lhê.

Hkrisduq É Dui Toq Hkyô

- 15** Gumang wuê ê, ngò, nungmoq lé hko kyo bê nghut mù, nungmoq le hap yù luí, nungmoq yap gîng tô é jowò nghut é gabú danglù hkyô lé, ahkuí, ngò, nungmoq lé lhoq pûn
- ² kat nau ri. Ngò, nungmoq lé hko kyo bê é mungdang lé, nungmoq ging ging myhik zing nyi kô é nghut jáng, nungmoq gi, gabú danglù hau é yanmai hkyi yù huí é nghut akô. Haû a nghut jáng, nungmoq lumjîng é gi, akôm dut bê nghut lhê.
- ³ Ngò hap yu tô é pé lé, sânghi ahkyak é dông, ngò, nungmoq lé lhái byi bê nghut lhê. Haú pé gi: Chyúmdang eq rajung za, Hkrisduq gi, nga-nhúng é yubak marâ é matú

⁴ shí hkám byi bê gâ é nghut ri; Yhang gi, myhup yhûm é hui luí, Chyúm-dang eq rajung za sum nyí nghu é nyí má lhoq dui toq é hui bê nghut
⁵ mù, Petruq lé htoq shit luí, haú la-
⁶ gyo raxe í yuq lé le htoq shit ri. Hau htâng má, Yhang gi, ra-u má za, gumang wuì ngo shô yuq chyân lé htoq shit ri. Haú bang mâ é myo hpyang gi, ahkuí jé shoq asak dui nyi bum akô; ra-am kúm gi, shi ló byuq bekô
⁷ nghut ri. Hau htâng, Yhang gi, Yakuq lé htoq shit mù lagyô pé banshoq bang
⁸ lé htoq shit ri. Ló htâng má, Yhang gi, hkû buinyì a jé shí é má hku é dông nghut sù ngo lé le htoq shit bê nghut ri.
⁹ Hkâsu mù gâ le, ngò gi, lagyô pé mâ é tiq dik sù nghut lhê. Haú Garai Gasâng é noqkuq hpúng lé zing-ri sù nghut é yanmai, ngò gi, lagyo rayuq nghû râ lháng a gingdán é sù nghut
¹⁰ lhê. Nghut kôlhang, ngò ahkuí ísu wó nghut nyi é gi, Garai Gasâng jeju mai nghut lhê. Yhâng é jeju gi, ngá chyáng akôm a dut é za, ngò gi, yhangmoq banshoq bâng htoq má je riyhang mù wùn waq shikut lhê. Haú gi, ngò kut é a nghut, ngò eq rahá nghut nyi é Garai Gasâng jeju sheq ru nghut lhê. Haú mù luí, ngò nghut nghut, yhangmoq nghut nghut, ngamoq hko kyô é gi, haú hkyô chyat nghut lui, nungmoq lumjínng é le, haú hkyô nghut ri.

Shi Byuq Bâng É Dui Toq Hkyô

¹² Nghut kôlhang, haú Hkrisduq shi é mai lhoq dui toq é hui bê hkyô lé hko kyô nyi bê nghut mù, nungmoq mâ é ra-am gi, shi byuq bâng é dui toq hkyô a joq nghû, hkâsu wó tái kó râ lúh?
¹³ Shi byuq bâng é dui toq hkyô a joq é ru nghut le gi, Hkrisduq le lhoq dui
¹⁴ toq é hui berâ a nghut. Hau htoq agó,

Hkrisduq gi, lhoq dui toq é a huí é ru nghut le gi, ngamoq hko kyô é hkyô eq, nungmoq é lumjínng hkyô gi, akôm
¹⁵ dut byuq râ nghut lhê. Hau htoq agó, Garai Gasang gi, haú Hkrisduq lé shi é mai lhoq dui toq bê hkyô lé, ngamoq saksé hkám bê nghut é yanmai, ngamoq gi, Garai Gasâng é hkyô má saksé apyoq pé dut byuq râ za nghut lhê. Nghut kôlhang, shi byuq bang lhoq dui toq huí é hkyak a joq é ru nghut le gi, Garai Gasang, Yhang lé lhoq dui
¹⁶ toq kat râ a nghut. Hkâsu mù gâ le, haú shi byuq bang lhoq dui toq é a huí é nghut jáng, Hkrisduq le, lhoq dui toq
¹⁷ é hui berâ a nghut. Hkrisduq gi, lhoq dui toq é a huí é nghut jáng, nungmoq é lumjínng hkyô gi, akôm dut luí, nungmoq gi, nungmoq é yubak mara hkaú má ru nyi nyi shi kó râ nghut lhê.
¹⁸ Haú nghut jáng, Hkrisduq má shi ló byuq bê bang le, htên byoq byuq râ za
¹⁹ nghut lhê. Nga-nhúng gi, shí ipyat lhê é matú za, Hkrisduq má myit myoq-byù hkyô wó é nghut jáng, byù banshoq bâng htoq má shogyo rayhup dut é je hui zo bang dut kó râ nghut lhê.
²⁰ Nghut kôlhang, Hkrisduq gi, gè gè yhang shi é mai lhoq dui toq é hui bê nghut mù, shi ló byuq bâng é
²¹ sâng-hi ashi dut bê nghut ri. Hkâsu mù gâ le, shí-nò hkyô gi, byù rayuq dông mai lò bê nghut é eq rajung za, shi byuq bâng é dui toq hkyô le, byù rayuq dông mai lo é nghut lhê.
²² Hkâsu mù gâ le, lunglhang bang gi, Adam é yanmai shi byuq é su, lunglhang bang gi, Hkrisduq eq rading ralhum za nghut é yanmai lhoq dui
²³ toq é hui râ nghut lhê. Nghut kôlhang, yuq hkanngó gi, ó le ó âng é hkún lhoq dui toq é hui râ nghut lhê: Hkrisduq gi, sâng-hi lhoq dui toq huí é sù nghut lhê. Hau htâng má,

Yhang jé lé é hkûn, Yhang eq sêng é bang lhoq dui toq é hui râ nghut
²⁴ lhê. Hau htâng, jihtûm jé râ nghut lhê; haú hkûn, Yhang gi, up é bang banshoq, ahkáng ayá eq a-tsam pé lé ban lhoq htên pyâm é htâng, haú Íwa nghut sù Garai Gasang lé mingdán ap
²⁵ byi râ nghut lhê. Hkâsu mù gà le, Yhang gi, Yhâng é gye pé banshoq lé, Yhâng é hkyî wang ô má tô pyâm é hkûn jé shoq up nyì ra râ nghut
²⁶ lhê. Haú lhoq htên pyâm é hui râ nghut é ló htâng é gyè gi, shî-nò hkyô
²⁷ nghut ri. Hkâsu mù gà le, “Garai Gasang gi, jung hkgangmó lé, Yhâng é hkyî wang ô má tô pyám bê nghut ri.”^a gà Chyúmdang má kê tô ri. “Jung hkgangmó lé” Yhâng é a-ô má tô pyám bê ga taí é hkûn, jung hkgangmó lé Hkrisduq é a-ô má tô pyám bê sù Garai Gasang yhang kúm a lom
²⁸ é hkyô, san za nghut nyi ri. Yhang gi, haú hkyô ban kut é htâng má, haú Zo yhang le, jung hkgangmó lé Yhâng é a-ô má to byi bê sù Garai Gasâng é a-ô má nyì sù dut nhang é hui râ nghut mù, Garai Gasang gi, lunglhang htoq má gyaú sù nghut luí, lunglhang lé sîng sù nghut râ nghut lhê.
²⁹ Dui toq hkyô a joq é ru nghut le gi, shi byuq bê bâng é matú wui-myhup hkám byí bùm kê é gi, hai akyû bò kó râ lú? Haú shi byuq bang lhoq dui toq é a hui kê é ru nghut le gi, yhangmoq matú haí mù byu pé wui-myhup
³⁰ hkâm yù kó râ lú? Ngamoq gi, ngamoq é matú, hkyíng hkgangmó haí mù
³¹ chiq râ jowò má nyì râ lhê lú? Gumang wui ê, ngò gi, nyí wuí aluq shoí shoí shi é hui zô é nghut lhê. Haú su nghû é gi, nga-nhûng é Yhum-

sîng Hkrisduq Yesuq má, nungmoq é hkyô lé ngò hkyak wó gumrong é yanmai nghut lhê. Ngò gi, xângzo hkyam
³² dông mai za, Ehpesu myuq má tân jung dusak pé lé majan zân nyi é nghut jáng, ngá é matú hai akyû bò râ lú? Shi byuq bang lhoq dui toq é a hui é ru nghut le gi,

“Nga-nhûng gi, napmá shî râ nghut é yanmai, zo sháng, shuq sháng.”^b

³³ nghû râ za nghut lhê.^c “A ge é zùm yap luzúm wui gi, ge é nyì yap sâmlai lé hten nhang é nghut lhê.” gà é sanghkyang eq rajung za, hkyô shuí ngoq
³⁴ é hkâhui zo kó! Nungmoq gi, tau bûn gyíng lò mù, mara hkâkut shut lo kó; hkâsu mù gà le, Garai Gasang lé a sê é byù ra-am nyi akô. Ngò haú su nghû taí é gi, nungmoq hoq bun râ matú nghut lhê.

Dui Toq É Gungdu

³⁵ Nghut kôlháng, rayuq yuq gi, “Haú shi byuq bê bang, hkâsu kut lhoq dui toq é hui kó râ lú? Yhangmoq gi, hkasû é gungdu nghut kó râ lú?” ga
³⁶ myi râ nghut lhê. Haú-í nghâ sù ê! Nàng hô hkyô kat é pé gi, shi byuq é za a nghut jáng, yuq htoq lò râ a nghut
³⁷ mhaí. Nàng, kyô hkyô é hkûn, yuq lò râ nghut é agàm lé hô hkat e a nghut é za, sungso amyui nghut nghut, gotú amyui rajung jung nghut nghut lé za
³⁸ hô kat é ru nghut lhê. Nghut kôlháng, Garai Gasang gi, Yhang myit hpyit to bê eq rajung za haú lé gungdu ralhú byi mù, kyôshi myui hkgangmó
³⁹ lé, ó le ô é gungdu byí ri. Gungsho lunglhang gi, rajung za a nghut. Byù pê é gungsho gi, rajung, dusak pé é gi, gó jung, ngoq pê é gi, gó jung,

^a 15:27 Hkya-on 8:6 ^b 15:32 Esai 22:13 ^c 15:32 Dang ngho shî gi, a lumjîng bang taí é dang nghut lhê.

ngozo pê é gi, gó jung ru nghut lhê.
⁴⁰ Mauhkûng gùng pé le joq é nghut luí, myidam gùng pé le joq ri; nghut kô-lhang, mauhkûng gùng pê é shing-kang gi, rajung, myidam gùng pê é shing-kang gi, gó jung ru nghut lhê.
⁴¹ Haû bùi má bo é shing-kang gi, rajung, lhamó mâ é gi, gó jung, kyí pé mâ é gi, gó jung ru nghut lhê; kyí racham eq rachâm é shing-kang le gotú tû shai lhûm lhê.
⁴² Haû mù, shi byuq bê bang é dui toq hkyô le, haû eq rajung za nghut ri. Haû hô hkyô kat é gungdu gi, htên byoq sê é nghut luí, lhoq dui toq huí é gungdu kúm gi, htên byoq a sê é nghut
⁴³ lhê. Hô hkyô kat é hkûn gi, aróng a bò, lhoq dui toq huí é hkûn gi, hpung-wup shing-kang bo ri. Hô hkyô kat é hkûn gi, wum nyhóm mù, lhoq dui toq
⁴⁴ huí é hkûn gi, a-tsam bo ri. Gungsho gungdu gi, hô hkyô é hui mù, woi-nyí gungdu gi, lhoq dui toq é huí ri.
 Gungsho gungdu joq é nghut le gi, woi-nyí gungdu le joq é nghut lhê.
⁴⁵ Haû nghut mù, “Haû sâng-hi yuq byù Adam gi, asak dui é xângzo dut bê nghut ri.”^a ga kê tô ri. Haû ló htâng é Adam kúm gi, asak byí é woi-nyí
⁴⁶ nghut ri.^b Haû woi-nyí eq sêng é hí lé joq é a nghut é za, gungsho eq sêng é hí lé joq é htâng má sheq, woi-nyí eq sêng é lé joq é ru nghut
⁴⁷ lhê. Haû sâng-hi yuq byù gi, myidàm mâ é tseyún lé saí é nghut mù, htang lhê yuq byù gi, mauhkûng htoq mâ é
⁴⁸ nghut ri. Haû myidàm byù nghut sù su, myidàm eq sêng é bang le nghut nyi akô; haû mauhkûng htoq mâ é byù nghut sù su, mauhkûng eq sêng
⁴⁹ é bang le nghut nyi akô. Nga-nhúng gi, myidàm byù é gunghkyâng isâm

lé hkam yù bê nghut é su, mauhkûng htoq mâ é byu é gunghkyâng isâm lé le myang hkam yù râ nghut lhê.

⁵⁰ Gumang wui ê, ngò, nungmoq lé shit kyo kôlé, gungsho eq sui gi, Garai Gasâng é mingdán é silí wunlí lé wó yù râ a nghut, htên byoq sê é le, htên byoq a sê é silí wunlí lé wó
⁵¹ yù râ a nghut. Gyo to keq, zaú tô é hkyô lé, ngò, nungmoq lé taí kyo kôlé: Nga-nhúng banshoq bang gi, shi byuq râ a nghut é za, htaí lhik é hui râ
⁵² ru nghut lhê. Haû gi, ló htâng é tut htê mying é hkûn, ralháp za, myoq-kuq ralap má dut râ nghut lhê. Hkâsu mù gâ le, tut htê mying râ nghut lhê, haú hkûn, shi byuq bê bang gi, htên byoq a sê é shut lhoq dui toq yu é hui
⁵³ hui râ nghut lhê. Hkâsu mù gâ le, htên byoq sê é gi, htên byoq a sê é lé htaí wut yù mù, shi byuq sê é gi, shi byuq a sê é lé htaí wut yù râ dut é nghut lhê.
⁵⁴ Haû htên byoq sê é gi, htên byoq a sê é lé htaí wut yù mù, shi byuq sê é gi, shi byuq a sê é lé htaí wut yu é hkûn sheq, “Shí-nò hkyô gi, ùng budâng èq myui pyâm é hui bê nghut ri.”^c ga kê tô é eq,
⁵⁵ “Shí-nò hkyô ê, náng é ùng budang gi, hkâmá lhú? Shí-nò hkyô ê, náng é nyin gi, hkâmá lhú?”^d
 gâ tô é sanghkyang gi, dik râ nghut
⁵⁶ lhê. Haû shí-nò hkyô é nyin gi, yubak mara nghut ri; yubak marâ é a-tsam
⁵⁷ gi, jep é tarâ nghut ri. Nghut kô-lhang, Garai Gasang lé jeju hkyâ-ôn lhê! Yhang gi, nga-nhúng é Yhumsíng Yesuq Hkrisduq dòng mai, nga-nhúng lé ùng budang byí é nghut ri.

^a 15:45 Apûn 2:7 ^b 15:45 Ló htâng é Adam gi, Yesuq lé taí nau é nghut lhê. ^c 15:54 Esai 25:8 ^d 15:55 Hos 13:14

⁵⁸ Haû mù luí, ngá é chyitdap gumang wui ê, yap gingtîng nyi keq. Hai êq le, nungmoq lé hkâlhoq dui nún nhâng kó. Nungmoq gi, haû Yhumsîng má nungmoq wùn waq é muzó akôm a nghut é lé sé kô é nghut lhê yanmai, haû Yhumsing é muzó lé ayang wùn waq shikut nyi keq.

Yerusalem Wà Mó Mã É Lumjîng Bàng É Matú Alu Hkyuí Râ Hkyô

16 Ahkuí, Garai Gasâng é byu pê é matú alu hkyuí râ hkyô eq séng luí gi, haû Galatiq mau mã é noqkuq hpûng pé lé ngò kut nhang é su kut ² keq. Ngò jé lé é hkûn, alu hkyuí râ hkyô a kut ra râ dông, bat hkgangmó mã é sâng-hi nyí má, yuq hkgangmó gi, yhumsîng wó ho é má cháng mù, ³ gam tô to láng keq. Ngò jé lé é hkûn, ngò gi, nungmoq hkyin tô é byu pé lé, shit kyô é laiká pé byi mù, nungmoq é chyunghuq lé, Yerusalem wà mó má ⁴ ê dé nhâng râ nghut lhê. Ngò le ê ang râ dut é nghut jáng, yhangmoq gi, ngá é byinzùm kut râ nghut lhê.

Poluq Lum Kat É Hkyô Pé

⁵ Ngò gi, Makedoni mau laí byit é htâng, nungmoq chyáng jé lé râ nghut lhê. Hkâsu mù gâ le, ngò gi, Makedoni mau laí byit râ za nghut lhê. ⁶ Ngò hkâmá ê kôlhang, ngá é hkyo-wui má nungmoq wó garúm kat kó râ matú, ngò gi, rayoq zo nghut nghut, gyoqmyò lháng lai shoq nghut nghut, ⁷ nungmoq eq rahá nyi abe. Ngò gi, laí ló uchyang za nungmoq lé lé kum râ nghut mù, ahkuí wó myâng râ lé a nau é nghut lhê; ngò gi, haû Yhumsîng dóng é nghut jáng, nungmoq eq rahá rayoq nyi râ lé myit myoqbyu ⁸ lhê. Nghut kôlhang, ngò gi, Penteko-ti poí buinyi jé shoq Ehpesu myuq má

⁹ nyi râ nghut lhê. Haî mù gâ le, ngo lé htuq htîng é bang myo myo nyi é nghut kôlhang, akyú htoq é muzó é matú hkum mó ngo lé hpông to byí é yanmai nghut lhê.

¹⁰ Timohti jé lé jáng, yhang, nungmoq eq rahá nyi é u má, gyuq é hkyô haí le a joq râ matú wú byi keq; hkâsu mù gâ le, yhang gi, haû Yhumsing é muzó lé, ngò su wùn waq wún é sù nghut ¹¹ lhê. Haû mù, ó yuq le, yhang lé hkâwú shóm kó. Yhang gi, ngá chyáng wó dum taû jé sháng gaq, yhâng é hkyo-wui má nguingón é dông nhang kat keq. Haû gumang wui eq rahá lò kó râ lé, ngò myit láng nyi lhê.

¹² Ahkuí, nga-nhûng é gumang Apolo é hkyô eq séng luí ga jang: yhang gi, haû gumang wui eq rahá nungmoq chyáng lé râ lé, ngò, gyai yhang wum taí tsuq lhê. Yhang kúm gi, ahkuí lé nau é myit a dê bò shi, nghut kôlhang, yuqyo é ahkyíng wó jáng, yhang lé lô râ nghut lhê.

¹³ Machya nyí keq; lumjîng hkyô má ging ging tîng tîng yap nyi keq; gyuq kyum myit hkâbô kó; wum bo nyi keq. ¹⁴ Jung hkgangmó lé, chyitdap myit eq zui saí keq.

¹⁵ Stehpana eq yhâng é yhumbyù wui gi, Ahkaia ming má sâng-hi hpúng wâng bang nghut luí, yhangmoq gi, yhumsîng gùng lé, haû sân-yúng bâng é dojaú hkyô má ap nóng bekô lé, nungmoq sê akô nghut ri. Gumang wui ê, ngò, nungmoq lé wum taí tsuq ¹⁶ kat kôlé, haû sù é bâng é a-ô má le, haû muzó má bo wang lòm mù, mù zui shikut bang yuq hkgangmó é a-ô má ¹⁷ le, nyi keq. Ngò gi, Stehpana, Hportunatu eq Ahkaiku pé jé lo é hkûn, gyai gabú é nghut lhê, haî mù gâ le, yhangmoq gi, nungmoq a kut byí é hkyô lé, lhoq pyíng byi bekô nghut ri.

¹⁸ Hkâsu mù gâ le, yhangmoq gi, ngá é woi-nyí eq nungmoq é woi-nyí lé lhoq ngón byi bekô nghut ri. Haû sù é bang lé, hpautap nyí keq.

Ló Htâng É Shi-kyám Dang

¹⁹ Asia mau mâ é noqkuq hpúng pé gi, nungmoq lé shi-kyâm kat akô. Akula eq Priskila nhik le, yhangnhik é yhûm má chôm huí é noqkuq hpúng lé, haû Yhumsîng má nungmoq lé gyai yhang
²⁰ shi-kyâm kat akô. Shí má nyi é gumang wuì banshoq bang gi, nungmoq lé shi-kyâm kat akô. Rayuq eq rayuq

chyoiyúng é chyitpuq èq shi-kyâm lhum keq.

²¹ Ngò, Poluq gi, shi-kyám dang shî lé, ngá é loq èq yhang ká é nghut lhê.

²² Rayuq yuq, haû Yhumsîng lé a chyitdap é nghut jáng, haû yuq gi, nhîng pyâm é hui sháng gaq. Yhumsîng ê, jé lé aq hkoi!

²³ Haû Yhumsîng Yesuq é jeju gi, nungmoq eq rahá nghut nyí sháng gaq.

²⁴ Ngá é chyitdap myit gi, Hkrisduq Yesuq má nungmoq banshoq bâng chyáng joq nyí sháng gaq. Amen.

KORINHTUQ

Pê Chyáng Htang Dàm Hun Kat é Laiká (2 Corinthians)

1 Garai Gasang ô nau é eq rajung za, Hkrisduq Yesuq é lagyo rayuq dut sù ngò Poluq gi, nga-nhông é gumang Timohti le kut, Korinhtuq myuq mâ é, Garai Gasang é noqkuq hpúng lé le, Ahkaia mau gón mâ é sên-yúng bang banshoq chyáng le, dang kyô kat lhê: Nga-nhông é Íwa nghut é Garai Gasang eq haû Yhumsîng Yesuq Hkrisduq chyáng mâ é jeju eq nuingón hkyô gi, nungmoq chyáng ru joq nyí sháng gaq.

Nhik tîng hkyô banshoq é Garai Gasang

³ Nga-nhông é Yhumsîng Yesuq Hkrisduq é Yhângwa eq Garai Gasang, shogyo nhikmyin hkyo é Íwa eq nhik tîng hkyô banshoq é Garai Gasang gi, hkya-on kungton é huí nyí sháng gaq. Garai Gasang chyáng mai ngamoq wó yû bê nghut é nhik tîng hkyo èq, hkasû é wuîhke hkyô hui bang lé le nga-nhông wó nhik tîng byí sháng gaq ga, Yhang gi, ngamoq é wuîhke hkyô banshoq má nhik tîng byí ri. Hkâsu mù gâ le, Hkrisduq hui zô é jamjau hkyô myo myo lé ngamoq bo hui zô é su, Hkrisduq dông mai, ngamoq é nhik tîng hkyô le byíng mui ⁶ nyi é nghut lhê. Ngamoq, myit myo uhkyî é huí é nghut jáng, nungmoq é nhik tîng hkyô eq hkyi yû hkyo é matú nghut nyi ri; ngamoq, nhik tîng é huí é nghut jáng, nungmoq é nhik tîng hkyo é matú nghut luí, haû gi, ngamoq jamjaû é eq ra-

jung za nghut é jamjau hkyô lé, myit hing é dông mai wó jân pyám râ a-tsam, nungmoq chyáng lhoq ⁷ htoq byí é nghut lhê. Haû mù, ngamoq é jamjau hkyô pé má nungmoq bo lòm bekô nghut é su, ngamoq é nhik tîng hkyô má le nungmoq bo lòm bekô nghut é hkyô lé, ngamoq sê é yanmai, nungmoq lé ngamoq myit myoqbyu kat é hkyô gi, hkyak wó lum to bê nghut lhê.

⁸ Gumang wuî ê, Asia mau má, wuîhke jamjaû é ngamoq gyai yhang hui zô é hkyô lé, ngamoq gi, nungmoq lé kyô kat nau ri. Ngamoq wó jân é a-tsam lháng htum shoq hpuzô é nghut luí, ngamoq gi, asak duì lo râ lháng a myit myoqbyù lô é nghut ⁹ lhê. Gè gè yhang, ngamoq gi, sat hui berâ nghû, ngamoq é i-myt má lumjîng pyâm é nghut lhê. Nghut kô-lhang, haû gi, ngamoq gùng ngamoq a lumhkau é za, shí bê bang lé lhoq dui toq sù Garai Gasang lé lumhkaû ¹⁰ râ matú dut é nghut lhê. Garai Gasang gi, haû sù é shí râ hkyô mai hkyi yû bê nghut mù, ngamoq lé hkyi yû râ za nghut lhê. Yhang gi, ngamoq é matú nungmoq kyûdung byí nyi é u má, xoq luí ngamoq lé hkyi yû râ za nghut lhê nghû, ngamoq gi, Yhang lé myit myoqbyu to ¹¹ bê nghut luí, myo myo kyûdung byí é lé gyo byí é má ngamoq shimân jeju wó mù, byù myo myo gi, ngamoq wó é shimân jejû é yanmai Garai Gasang lé jeju hkya-on kó râ nghut lhê.

**Poluq, Hen Tô É Muzó Htai
Pyâm É Lé Tai Hung É Hkyô**

- ¹² Ngamoq nghutbun é gi, Garai Gasâng chyáng mâ é chyoiyúng hkyô eq lhumzui hkyô má, mingkan zo wuí eq ngamoq asak duí bê hkyô lé le, je luí nungmoq eq zùm yap é hkyô lé le, ngamoq é myit sôn sê é hkyo èq, saksé hkám byí é hkyô nghut lhê. Ngamoq haú su kut é gi, mingkan hpaqchyí byéng-yá đông mai kut é a nghut é za, Garai Gasâng é jeju đông mai kut é ru
- ¹³ nghut lhê. Hkâsu mù gà le, ngamoq gi, nungmoq a dat nghap é eq a sê gyô é haí le a ká byí kat é nghut lhê. Ngò,
- ¹⁴ myit myoqbyu kat é gi, nungmoq gi, ngamoq é hkyô ra-am lé wó sê gyô yù bê eq rajung za, haú Yhumsing Yesuq é buinỳi má nungmoq é hkyô lé ngamoq nghutbun râ nghut é su, ngamoq é hkyô lé nungmoq wó nghutbun râ matú, nungmoq, banshoq lé sê gyo kó râ nghut lhê.
- ¹⁵ Haú hkyô lé, ngò hkyak myit lum to bê nghut é yanmai, nungmoq gi, akyú í dam wó hkam yù kó sháng gaq nghú, ngò gi, nungmoq chyáng hí lé kum
- ¹⁶ râ matú hen to bê nghut lhê. Ngò gi, Makedoni mau shut e ló é hkyowuì má nungmoq lé hí lé kum mù, Makedoni mau mai nungmoq chyáng dum taú lò luí, Yuda mau shut e é hkyowuì má, nungmoq, ngo lé garúm kat kó râ lé
- ¹⁷ myit lum to bê nghut lhê. Ngò gi, haú hkyô hen é hkûn, agon za hen hkyut é nghut lhê lú? Haú a nghut jáng, ngò hen é pé gi, ra-u má za, “Nghut lhê, nghut lhê.” nghú é eq, “A nghut, a nghut.” nghu é wó tai râ matú, mingkan myit đông hen é nghut lhê lú?
- ¹⁸ Gè gè yang, Garai Gasang gi, lhumzui sù yang nghut é eq rajung za, ngamoq é danglù gi, nungmoq chyáng “Nghut lhê” lé, “A nghut”

- ¹⁹ nghu é a nghut. Hkâsu mù gà le, ngo èq le, Sila èq le, Timohti èq le, nungmoq chyáng hko kyo bê nghut é sù, Garai Gasâng é Yhangzo Yesuq Hkrisduq gi, “Nghut lhê” nghu é eq “A nghut” nghu é sù a nghut é za, Yhang má gi, hkâ-nhám le “Nghut lhê” nghu
- ²⁰ é za joq lhê. Hkâsu mù gà le, Garai Gasang gi, danggidiq hkâ-myhó to kôle, haú pé gi, Hkrisduq má “Nghut lhê” chyat nghut lhê. Haú mù, Garai Gasâng é hpungwup shingkang é matú, Yhâng đông mai, nga-nhúng gi,
- ²¹ “Amen” nghú tai é nghut lhê. Ngamoq eq nungmoq lé Hkrisduq má yap gingtíng nhang é sù gi, Garai Gasang nghut ri. Yhang gi, nga-nhúng lé masat é xú but byi mù, Yhang sing lhê
- ²² gà é dizik, nga-nhúng lé htung tap byi luí, jé lô râ hkyô pé hkyak joq lhê nghu é masat zè đông, Yhâng é Woi-nyí lé nga-nhúng é i-myt ung-hkaú má kat byi bê nghut ri.
- ²³ Ngò gi, nungmoq hkyamsa râ matú, Korinhtuq myuq má a dum taú lé é hkyô têng é lé, ngá é saksé dut râ đông
- ²⁴ Garai Gasang lé wut dúng lhê. Haú gi, nungmoq é lumjíng hkyô lé ngamoq sing pyám byí é a nghut é za, nungmoq é gabú hkyo é matú, nungmoq eq rahá chôm zui sai é ru nghut lhê; haí mù gà le, lumjíng myit mai za nungmoq wó yap gíng nyi bùm kô é ru nghut lhê.
- 2** Haú mù luí, ngò gi, nungmoq lé myit nò nhâng é dut râ đông, lé dum kûm é a kut râ nghú, myit hpyit
- ² to bê nghut lhê. Hkâsu mù gà le, nungmoq lé ngò yón kuq nhang é nghut le gi, ngò yón kuq nhâng bê bang nungmoq mai lai luí, ó yuq wá ngo lé wó
- ³ gabú nhâng râ lú? Ngò jé lé é hkûn, ngo lé gabú nhâng râ âng é bâng èq, ngo lé myit nò nhang é a hui sháng

gaq nghû, ngò gi, ngò kut é eq rajung za laiká kâ kat bê nghut lhê. Ngá é gabú hkyô lé nungmoq banshoq bang wó bo gabú kó râ nghut lhê nghû, nungmoq banshoq bang lé ngò hkyak
⁴ myit lum tô lhê. Hkâsu mù gâ le, ngò gi, nungmoq lé laiká kâ é hkûn, myit myo uhkýí mó èq le, myit má yón kuq é èq le, ngaubyi ngau-nhap é èq le, kâ kat bê nghut lhê. Haû gi, nungmoq lé yón kuq é hui nhâng râ matú a nghut é za, nungmoq lé ngò hkâ-í chytidap é hkyô lé sé nhâng râ matú ru nghut lhê.

Mara Hkyut Byí Lhum Râ Hkyô

- ⁵ Yón kuq hkyô lhoq htoq é sù gi, yhang, nungmoq banshoq bang lé ahkyô hkyô pé má yón kuq nhang é su, ngo lé gyai wá yón kuq nhang é a nghut. Haú hkyô eq séng luí, ngò gyai wá yhang zuq zuq a taí nau é
⁶ nghut lhê. Nungmoq myo hpyâng èq yhang lé mara dam byí é hkyô gi,
⁷ yhâng é matú gé bê nghut ri. Nghut kôlhang, ahkuí, nungmoq gi, yhang a wó jan loshoq myit yón é a hui zo râ matú, yhang lé mara hkyut pyám byi
⁸ mù, nhik tíng byi keq. Haû mù luí, nungmoq é chytidap myit gi, yhang é ahtoq má dum lhoq gîng shit nyí keq nghû, nungmoq lé ngò wum taí tsuq
⁹ kat lhê. Ngò, nungmoq lé haí mù laiká ká byí kat é hkyô gi, nungmoq chyam wú huí é hkyô lé wó jân é hkyô eq jung hkanmó má jìno gyo hkyô bò a bo é lé, wó sé râ matú le nghut lhê.
¹⁰ Nungmoq, rayuq yuq lé mara hkyut byí é nghut le gi, ngò le, haú yuq lé mara hkyut byí lhê. Mara hkyut râ rajung jung joq é nghut jáng, ngò mara hkyut é gi, Tsadán èq nga-nhúng lé a wó ûng râ matú, nungmoq é yanmai, Hkrisduq é myoq hí má ngò mara

- ¹¹ hkyut byi bê nghut lhê. Hkâsu mù gâ le, Tsadán hen é hkyô pé lé nga-nhúng a sê é a nghut.

Dangshikaq Asik Mã É Hpungmû Wùn Bang

- ¹² Ngò gi, Hkrisduq é gabú danglù hko kyo râ matú, Troa myuq má ê jé é hkûn, haû Yhumsîng gi, ngo lé hkum
¹³ hpóng byí é lé, ngò myang ri. Nghut kôlhang, ngò gi, ngá é gumang Tituq lé haú má a myang ho é yanmai, myit myo mù, yhangmoq lé shi-kyâm to luí, Makedoni mau shut xoq e ló é nghut lhê.
¹⁴ Nghut kôlhang, Hkrisduq má, nga-moq lé hkâ-nhám le ûng budang hkyô shut shuí-û yù mù, Hkrisduq lé sê é sumsé hpaqchyi é nam ngón shôm lé, ngamoq đông mai jowò hkanmó má taí pyo é sù, Garai Gasang gi, jeju
¹⁵ hkya-ôn é huí nyí sháng gaq. Hkâsu mù gâ le, ngamoq gi, hkyi yu é huí nyí bâng chyáng le, htên byoq ló é huí nyí bâng chyáng le, Garai Gasâng é matú Hkrisduq é nam ngón shôm nghut nyi
¹⁶ lhê. Ngamoq gi, htên byoq nyí bâng é matú shî-nò hkyo é shôm dut mù, hkyi yù huí nyí bâng é matú nghut jáng, asak hkyo é nam ngón shôm dut é nghut lhê. Haû mù, ó yuq wá muzó
¹⁷ shî eq htuk râ lú? Ngamoq gi, amyat wó râ matú Garai Gasâng é mungdang lé hkat ung zô é byù myo myo su a nghut é za, Garai Gasâng chyáng mai nhang é byu pé su, Garai Gasâng é hí má, Hkrisduq é byu pé đông lhumzui myit mai taí é nghut lhê.
3 Ngamoq gi, yhumsîng gùng yhumsîng dum owaq hi ló é nghut lhê lú? Byù ra-am kut é su, nungmoq chyáng, ngamoq é matú htuqluq htuqbáng laiká ká byi kô é nga-moq ra râ luq, nungmoq yuq ngamoq

² é matú ká byi ra kó râ luq? Nungmoq gùng yhang gi, ngamoq é myit nhik-lhum má kâ tô é, yuq hkanmó èq nghap luí sê yu é laiká gûng pé nghut ³ akô. Nungmoq gi, nungmoq chyáng ngamoq hpungmû wùn waq é yanmai, Hkrisduq chyáng mâ é laiká nghut kô é hkyô lé shit nyi akô. Haû gi, kâ jung chí èq kâ tô é dông a nghut é za, rû dui nyi é Garai Gasâng é Woi-nyí èq kâ tô é nghut é htoq agó, luqlong pé má kâ tô é dông a nghut é za, xângzo byu é myit nhik-lhum long pé má kâ tô é ru nghut lhê.

⁴ Haû su nghû hkyak wó myit lum é hkyô gi, Garai Gasâng é hí má, Hkrisduq dông mai ngamoq wó ⁵ yu é nghut lhê. Ngamoq gi, yhum-sing gùng haí lé le wó kut lhê nghu é a nghut, ngamoq é a-tsam gi, Garai Gasâng chyáng mai lo é nghut ⁶ lhê. Yhang gi, ngamoq lé, dangshikaq asik lé wó wùn waq râ a-tsam byi bê nghut ri. Dangshikaq asik haû gi, tarâ laiká mai lo é a nghut é za, Woi-nyí mai lo é ru nghut lhê. Hkâsu mù gâ le, laiká gi, shí dâm byi lhê, Woi-nyí kúm gi, asak byí é nghut lhê.

Dangshikaq Asik É Hpungwup Shingkang

⁷ Ahkuí, haû Mosheq é myoqdong má é hpungwup shingkang é yanmai, haû Israelaq byu pé gi, yhang é myoqdong lé a wó wú tsuq to kó nghut ri. Hpungwup shingkang haû shûm lo byuq sê é nghut kôlháng, luqlong má dok kâ tô é, shí-nò hkyô lhoq htoq é tarâ muzó gi, hpungwup shingkang eq rahá jé lé ⁸ é nghut lhê. Haû su nghut jáng, haû Woi-nyí é muzó gi, hpungwup shingkang je riyhang dut râ a nghut kó lúh?
⁹ Gè gè yhang, haû byù lé mara byí

é tarâ muzó lháng, hpungwup shingkang bo é nghut le gi, dingmán nhang é hkyô sik gi, je riyhang hpungwup ¹⁰ shingkang bo é nghut lhê ô! Hkâsu mù gâ le, hpungwup shingkang bo é tarâ muzó gi, hpungwup shingkang je bo é dangshikaq asik eq whuí é hkûn, hpungwup shingkang a bò lo dut byuq ¹¹ bê nghut ri. Shum byuq ló é tarâ lháng gi, hpungwup shingkang eq rahá lé jé bê nghut le gi, ru gîng nyi é dangshikaq asik é hpungwup shingkang gi, je riyhang gyaú râ nghut lhê ô!

¹² Haû mù luí, ngamoq gi, haû sù é myoqbyù hkyô wó é yanmai, gyuq kyum myit a bo é hkyô shit é nghut ¹³ lhê. Ngamoq gi, Mosheq su a nghut. Yhang gi, duqbang é hkyô shûm byuq ló é hkûn, haû Israelaq byu pé haú lé a wú tsuq râ matú, yhang é myoqdong lé myoqgo èq nghop pyâm é ¹⁴ sù nghut ri. Nghut kôlháng, yhangmoq é myit gi, lhoq chut byí é hui bekô nghut ri; hkâsu mù gâ le, hkû-nyí jé shoq, dangshikaq axau lé nghap é hkûn, rajung zâ é myoqgò gi, ru nghop to byí ashí nghut ri. Haû gi, huí sêng pyâm é a hui shi, haí mù gâ le, Hkrisduq dông za haû lé wó ¹⁵ yu pyâm é nghut lhê. Hkû-nyí jé shoq lháng, Mosheq é laiká lé nghap é hkûn, yhangmoq é myit nhiklhum má ¹⁶ myoqgò èq nghop tô é nghut ri. Nghut kôlháng, ó yuq le, Yhumsing chyáng hká u lîng lò kôlháng, haú hkûn jáng, myoqgò gi, hí pyâm byí é hui râ ¹⁷ nghut lhê. Yhumsing gi, haû Woi-nyí nghut mù, Yhumsing é Woi-nyí nyi ¹⁸ é jowò má, luthkyô le joq lhê. Haû Yhumsing é hpungwup shingkang lé lhoq htoq shit é bang banshoq nghut é myoqdong má myoqgò a nghop é bang nga-nhúng gi, ru myo jat nyi é hpungwup shingkang lhoq htoq byi

hkyô nghut é, Yhâng é isâm shut htaî lhiik wang é huî nyî bê nghut lhê. Haû hkyô gi, haû Woi-nyî nghut sû Yhumsîng chyáng mai lo é nghut lhê.

Tseyam Pé Má Bo É Sutzè

4 Ngamoq gi, Garai Gasâng jeju mai muzó hkyô haû wó é nghut mù, ² myit wum a gyuí é nghut lhê. Ngamoq gi, zaû tô é eq hoq htoq é hkyô pé lé tô pyám luî, mhaû zô é hkyô le a kut, Garai Gasâng é mungdang lé le ahpuq alhiik a kut é bang nghut lhê. Haû su kut râ malaî, ngamoq gi, haû tengmán hkyô lé san za lhoq htoq shit é dông, Garai Gasâng é hí má yuq hkangmó é myit sôn sê é hkyô má, yhumsîng gùng yhumsîng htuk ³ shoq nyi lhê. Ngamoq é gabú danglù gi, myoqgo èq nghop pyâm é huî é nghut jáng, haû gi, htên byoq nyi bâng chyáng za nghop pyám huî é ru ⁴ nghut lhê. Haû Garai Gasâng é azòng isâm nghut sû, Hkrisduq é hpungwup shingkang bo é gabú danglù é maubó lé, a lumjîng bang a wó myâng kó sháng gaq ga, ipyat shi é garai^a gi, yhangmoq é myit lé lhoq chit byi ⁵ bê nghut ri. Haû nghut é yanmai, ngamoq gi, yhumsîng gùng eq séng luî hko kyô é a nghut é za, Yesuq Hkrisduq gi, Yhumsîng nghut é hkyô lé le, Yesuq é matú, ngamoq gùng yhang gi, nungmoq é jùn pé nghut é hkyô lé le, hko kyô é ru nghut lhê! ⁶ Hkâsu mù gà le, “Mauchut hkaû mai maubó htoq lô sháng gaq.”^b ga taî é Garai Gasang gi, Yesuq Hkrisduq é myoqdong mâ é Garai Gasâng é hpungwup shingkang é maubó lé sê gyô é nyan lé, nga-nhúng lé byî é dông, Yhâng é maubó lé, nga-nhúng

é i-myt unghkaû má duqbó nhâng bê nghut ri.

⁷ Nghut kôlhang, ngamoq gi, sutzè haû bo é tseyam pé^c nghut nyi lhê. Haû gi, gyaú dik é a-tsam mó gi, ngamoq chyáng mâ é a nghut é za Garai Gasâng chyáng mâ é nghut é hkyô ⁸ lé tân shit râ matú nghut lhê. Ngamoq gi, wuîhke hkyo èq lînhghkyuq mai gyai yhang nhê zik é hui kôlhang, a gyop byuq é nghut lhê; myit lhoq nhúng pyâm é hui kôlhang, myit a ⁹ htúm byuq é nghut lhê; zing-rî é hui kôlhang, kâng pyám huî é a nghut; bat lîheng pyâm é hui kôlhang, htên byoq ¹⁰ huî é a nghut. Haû Yesuq é asak duî hkyô le, ngamoq é gungdu má lhoq htoq shit é hui sháng gaq nghû, ngamoq gi, Yesuq shi é hkyô lé, hkâ-nhám le, ngamoq é gungdu má wùn waq ¹¹ wún é nghut lhê. Hkâsu mù gà le, Yesuq é asak duî hkyô gi, nga-nhúng é shî sê é gungdu má lhoq htoq shit é hui sháng gaq nghû, asak duî nyi é bang ngamoq gi, Yesuq é matú é yanmai, hkâ-nhám le, shi byuq hkyô ¹² shut ap pyâm é huî nyi ri. Haû mù luî, shi byuq hkyô gi, ngamoq má mù zuî nyi ri; asak duî hkyô kúm gi, nungmoq má mù zuî nyi é nghut ri. ¹³ “Ngò gi, lumjîng bê nghut lhê, haû mù, ngò taî é nghut lhê.”^d ga kâ tô é eq rajung za, ngamoq le, lumjîng hkyô hau èq yhang, lumjîng bê nghut ¹⁴ mù taî é nghut lhê. Haî mù gà le, haû Yhumsîng Yesuq lé shi é mai lhoq dui toq é Sû gi, ngamoq lé le, Yesuq eq rahá lhoq dui toq mù, nungmoq eq rahá, ngamoq lé Yhâng é hí má shuí jé ¹⁵ râ nghut é lé, ngamoq sê lhê. Haû jeju wó é byu pé gi, je riyhang myô jat lò mù, Garai Gasâng é hpungwup shing-

^a 4:4 Ipyat shi é garai gà é gi, Tsadán lé gà é nghut lhê. ^b 4:6 Apûn 1:3 ^c 4:7 Tseyam pé gà é gi, nga-nhúng é wum nyhôm é gungdu lé gà é nghut lhê. ^d 4:13 Hkya-on 116:10

kâng é matú, jeju hkya-ôn é hkyô gi, byíng mui nyí sháng gaq ga, haú pé banshoq gi, nungmoq é akyu é matú nghut nyi ri.

- ¹⁶ Haú mù luí, ngamoq gi, myit wum a gyuí é nghut lhê. Ngamoq é shing-gan gungdu gi, htên byoq ló nyí kô-lhang, i-myt unghkaú gi, ra-nyí eq ra-nyí asik dut nhang é huí nyi ri.
- ¹⁷ Hkâsu mù gâ le, ngamoq é tiq é eq razup zâ é wúhke hkyô pé gi, ngamoq é matú haú pé htoq gyai hkik é ahtum abyuq é hpungwup shingkang lé, wó
- ¹⁸ yú nhang ri. Haú mù, nga-nhúng é myoq gi, byu-myang é lé wú tsuq nyi é a nghut é za, a byu-myang é lé sheq wú tsuq nyi é ru nghut lhê. Hkâsu mù gâ le, byu-myang é gi, razup rahtâng zâ é nghut mù, a byu-myang é kúm gi, ahtum abyuq é nghut lhê.

Mauhkúng Htoq Mã É Yhúm

- 5** Haú myidàm zúm nghut é nga-nhúng lúng nyi é gungdu gi, htên byoq sê é nghut kôlhâng, byu loq èq saí é a nghut é za, mauhkúng htoq má joq é ahtum abyuq é yhúm^a nghut é, Garai Gasâng chyáng mã é yhúm lé, nga-nhúng wó é
- ² hkyô lé, nga-nhúng sê lhê. Nghut kôlhâng, ahkuí, nga-nhúng gi, nga-nhúng é mauhkúng yhúm lé tú hut byí é lé gyai yhang hui naú mù, nò-
- ³ kying su kyíng nyi lhê. Haí mù gâ le, nga-nhúng gi, hut byí é hui jáng, gungdu a bò bang a dut lo rá nghut
- ⁴ lhê. Hkâsu mù gâ le, nga-nhúng gi, zúm shí má lúng nyi é u lé, wò-lai wùn mù, nò-kyíng su kyíng nyi lhê; haú gi, shí byuq sê é lé, asak dui é èq wó htaí lhik pyám sháng gaq nghú, nga-nhúng gi, a hut byí é hui

râ lé a ô nau é za, nga-nhúng é mauhkúng yhúm lé tú hut byí é hui rá

⁵ lé ô nau é yanmai nghut lhê. Ahkuí kúm, jeju haú hkam yù rá matú, nga-nhúng lé lajâng to byí é sù gi, Garai Gasang nghut mù, jé lô rá hkyô gi, hkyak joq lhê nghú é masat zè dông, nga-nhúng lé haú Woi-nyí byi bê nghut ri.

- ⁶ Haú mù luí, ngamoq gi, hkâ-nhám le hkyak lum tô lhê. Gungdu shí má yhúm dông ru lúng nyi nyí gi, haú Yhumsíng eq wê gâng nyi ashí nghut
- ⁷ é lé ngamoq sê nyi lhê. Ngamoq gi, byu-myang é dông mai a nghut é za, lumjíng myit mai asak dui é ru nghut
- ⁸ lhê. Ngamoq gi, hkyak myit lum tô lhê nghú, ngò taí lhê, haú mù, gungdu shí mai wê gang luí, haú Yhumsíng eq rahá nyi rá lé ngamoq je riyhang
- ⁹ ô nau é nghut lhê. Haú mù, ngamoq gi, gungdu shí má yhúm dông lúng nyi é nghut nghut, haú mai wê gâng é nghut nghut, ngamoq myit myoq-byu tô é jowò gi, Yhang lé gabú nhâng
- ¹⁰ rá matú nghut lhê. Hkâsu mù gâ le, yuq hkangmó gi, gungdu shí má yhúm dông lúng nyi é u lé, ge é nghut nghut, a ge é nghut nghut, kut é eq rajung za hkam yù rá matú, Hkrisduq é tarâ jéyáng tanghkuq hí má, nga-nhúng banshoq bang htoq shit ra rá nghut lhê.

Nguingón Hkyô Xoq É Muzó

- ¹¹ Haú mù, Yhumsíng lé gyuq hkungga rá hkyô haí nghut é lé ngamoq sê é nghut luí, ngamoq gi, byu pé lé taí pún kyíng shikut lhê. Ngamoq haí nghut é gi, Garai Gasâng chyáng san za nghut nyí mù, nungmoq é myit sôn sê é hkyô má le san za nghut rá lé, ngò myit

^a 5:1 *Mauhkúng htoq má joq é ahtum abyuq é yhúm* gâ é gi, nga-nhúng, mauhkúng mingdán má jé é hkún wó rá gungdu asik lé gâ é nghut lhê.

- ¹² lum lhê. Haû myit nhiklhûm má bo é lé gumrông râ malaî, byu-myang é lé gumrong é bang lé, nungmoq wó tû taí kó sháng gaq nghû, ngamoq gi, nungmoq chyáng yhumsing gùng lé dum owaq shikut é a nghut é za, ngamoq é hkyô lé, nungmoq wó gumrông râ ahkáng, nungmoq lé byí é ru
- ¹³ nghut lhê. Ngamoq a gyîng é dông nghut le gi, Garai Gasâng é matú a gyîng é nghut lhê; ngamoq gyîng é dông nghut le gi, nungmoq é matú
- ¹⁴ gyîng é nghut lhê. Hkâsu mù gâ le, Hkrisduq é chyitdap myit èq ngamoq lé kut nhang nyi é nghut lhê. Haû gi, banshoq bâng é matú rayuq shí hkám byi bê nghut mù, banshoq bang shi é dông nghut bê nghû, ngamoq hkyak
- ¹⁵ sê gyô é yanmai nghut lhê. Yhang gi, asak dui nyi é bang, yhangmoq yhum-sing gung é matú a duì lô é za, yhangmoq é matú shí hkám byi luí, lhoq dui toq é huí Su é matú duì kó sháng gaq ga, banshoq bâng é matú shí hkám byi bê nghut ri.
- ¹⁶ Haû mù, ngamoq gi, ahkuí mai, ó yuq eq séng luí le, mingkan hkyam dông mai a wú lô é nghut lhê. Ngamoq gi, hí hkûn Hkrisduq lé haú dông wú é nghut kôlhang, haû su hkâ-nhám
- ¹⁷ le a kut lô é nghut lhê. Haû nghut mù luí, rayuq yuq gi, Hkrisduq má nghut nyi é nghut jáng, yhang gi, asik hpân hui sù dut bê nghut ri; haû axau gi, byuq byuq mù, lhunglhang
- ¹⁸ asik dut bu-nhung! Haú pé banshoq gi, Garai Gasâng chyáng mâ é chyat nghut lhê. Yhang gi, Hkrisduq dông mai nga-nhúng lé Yhânggùng eq ngu-ingón hkyô xoq yû luí, ngu-ingón hkyô xoq é muzó ngamoq lé byi bê nghut ri.
- ¹⁹ Haû gi, Garai Gasang gi, byu pé é mara lé a matsíng byí é za, Hkrisduq

- dông mingkan lé Yhânggùng eq ngu-ingón hkyô xoq yû bê nghut luí, Yhang gi, ngu-ingón hkyô xoq yu é mung-dang haû lé, ngamoq lé ap byí to
- ²⁰ bê nghû nau é nghut lhê. Haû mù luí, ngamoq gi, Hkrisduq é gunglik pé nghut lhê mù, Garai Gasang gi, ngamoq dông mai nungmoq lé lhoq pûn kyîng nyi é nghut lhê. Garai Gasang eq ngu-ingón hkyô xoq yû keq nghû, ngamoq gi, Hkrisduq é gunglik dông nungmoq lé dúng tóngbán nyi lhê.
- ²¹ Nga-nhúng gi, Hkrisduq dông mai Garai Gasâng é dingmán bang wó dut kó sháng gaq ga, Garai Gasang gi, yubak mara a bò Sù lé, nga-nhúng é matú yubak mara hkungga dut nhâng bê nghut ri.

6 Ngamoq gi, Garai Gasâng é mù zui byinzùm wuì nghut nyi é eq rajung za, Garai Gasâng jeju lé akyû a bo é dông hkâhap yû kó nghû, nungmoq lé wum taí tsuq kat lhê. Hkâsu mù gâ le,

“Ngò ô nau é ahkyíng má, nang lé ngò gyo byi bê nghut mù, hkyi yù hui râ buinyì má, nang lé ngò garúm bê nghut lhê.”^a

ga luí, Yhang taí ri. Ngò, nungmoq lé taí kyo kôlé, ahkuí gi, Garai Gasang ô nau é ahkyíng, ahkuí gi, hkyi yu é buinyì nghut ri.

Poluq É Wuíhke Hkyô Pé

- ³ Ngamoq é hpungmû gi, taí hpoí pyâm é a hui sháng gaq nghû, ngamoq gi, ó yuq é hkyô má le, leqbat jung a
- ⁴ to byí é nghut lhê. Haû kut râ malaî, ngamoq gi, Garai Gasâng é dui-nhâng zoshâng wuì nghut é hkyô lé, hkyô hkangmó má yhumsing gùng yhum-síng shit nyi lhê. Gyai hkam jân é hkyô

^a 6:2 Esai 49:8

má le, jamjau hkyô pé má le, wuîhke hkyô pé má le, myit myo uhkyí hkyô

⁵ pé má le shit nyi lhê. Nhuq bat huí é pé má le, htóng lhúng huí é eq toq gabýông é má htím é huí é má le, mú zui shikut é má le, a myang yhup é myín pé má le, zòmut huí é má le, shit nyi

⁶ lhê. Sân-yúng é má le, sê gyô é hkyô má le, myit hing é eq myit ge é má le, Chyoyíyúng Woi-nyí eq chyitdap myit

⁷ akying má le, tengmán é mungdang hko é má le, Garai Gasâng é a-tsam má le, loqyò loqpai má dingmán hkyô nghû é lankak pé dông le, shit nyi

⁸ lhê. Hpungwup shingkang byí é hui kô é dông eq a hkunggâ é hui kô é dông nghut kôle, a ge é luhkyang eq ge é luhkyang taí kôle, shit nyi lhê. Ngamoq gi, tengmán kôlhang, mhaú zo bang dông sôn yu akô nghut ri.

⁹ Ngamoq lé sé kôlhang, a sê é dông kut akô nghut ri; shi ló nyí kôlhang, rû dui nyi é bang nghut lhê; nhuq bat é hui kôlhang, sat pyâm é a hui shí é bang nghut lhê. Yón hkyô byíng nhâng kôlhang, hkâ-nhám le gabú nyi lhê; myùng kôlhang, byù myo myo lé wó sùt nhang nyi lhê; haí le a wó kôlhang, jung hkangmó lé sing é dông nghut lhê.

¹¹ Korinhtuq bang ê, ngamoq gi, nungmoq lé san za taí bê nghut luí, nga-moq é myit nhiklhum lé, nungmoq é matú làm shoq hpông to byi bê nghut

¹² lhê. Ngamoq gi, ngamoq é chyitdap myit lé, nungmoq chyáng mai láng taú yu nyi é a nghut, nungmoq sheq, nga-moq chyáng mai láng taú yu nyi kô é

¹³ ru nghut lhê. Nungmoq le, myit nhiklhum lé làm shoq dum taú hpóng keq nghû, ngò gi, ngá zô pé lé dông taí lhê.

A Lumjúng Bang Eq A Nhunghkut Râ Hkyô

¹⁴ A lumjúng bang eq rahá kandang hkâwaq kó. Hkâsu mù gà le, dingmán é hkyô eq agè ashop é hkyô gi, haí sêng lhum lhê lhú? Maubó eq mau-chut gi, hkâsu wó zùm yap kó râ lhú?

¹⁵ Hkrisduq eq Beliala^a gi, hkâsu kut myit wó huí lhum kó râ lhú? Lum-júng sù rayuq eq a lumjúng sù gi, hkâsu

¹⁶ wó pung lhum kó râ lhú? Garai Gasâng é noqkuq yhúm eq hparà lhô pé gi, hkâsu wó húm râ lhú? Hkâsu mù gà le, nga-nhúng gi, rû dui nyi é Garai Gasâng é noqkuq yhúm nghut lhê. Haú gi, “Ngò gi, yhangmoq eq rahá nyi mù, yhangmoq chyáng sô nyi râ nghut luí, Ngò gi, yhangmoq é Garai Gasang dut mù, yhangmoq gi, Ngá é byu pé dut kó râ nghut lhê.”^b ga Garai Gasang taí tô é eq rajung za nghut ri.

¹⁷ “Haú mù luí, yhangmoq chyáng mai htoq lô mù, gotú san za nyi keq. A sansêng é zè lé hkâzáng kó, haú hkûn, Ngò, nungmoq lé lhom hap yù râ nghut lhê.”^c

ga haú Yhumsíng taí ri.

¹⁸ “Ngò gi, nungmoq é Íwa dut mù, nungmoq gi, Ngá é byizo yuqzô pé dut kó râ nghut lhê.”^d

ga haú wum-o a-tsam dik shoq bò Sù Yhumsíng taí ri.

7 Chyitdap é luzúm wuì ê, nga-nhúng gi, danggidiq haú pé lé wó tô é bang nghut é yanmai, gungdu eq woi-nyí lé agot a-û dut nhang é jung hkangmó mai, yhumsíng gùng yhumsíng lhoq sân-yúng yú luí, Garai Gasang lé gyuq hkunggâ é myit

^a 6:15 *Beliala* gà é gi, Tsadán é myìng rajà nghut lhê. ^b 6:16 *Trong* 26:12; *Yer* 32:38; *Ezk* 37:27 ^c 6:17 *Esai* 52:11; *Ezk* 20:34, 41 ^d 6:18 2 *Sam* 7:14

èq chyoyúng hkyô má lhoq gumjup
yu nyi sháng.

Poluq É Gabú Hkyô

- ² Nungmoq é i-myt unghkaû má nga-
moq lé jowò byi keq. Ngamoq gi, ó
yuq lé le a shut wú, ó yuq lé le a lhoq
htên wú, ó yuq lé le a mhaú zô wú é
³ nghut lhê. Ngò gi, nungmoq lé mara
byi râ matú haû su taí é a nghut. Nga-
moq gi, asak ùi kôle, shî kôle, nung-
moq eq rahá wó dut shoq, nungmoq
gi, ngamoq é i-myt unghkaû má lúng
nyi é nghut lhê nghû, hí hkûn ngò taí
⁴ wú bê nghut lhê. Ngò gi, nungmoq
lé, hkyak yhang myit lum to bê nghut
lhê. Ngò gi, nungmoq é yanmai gyai
yhang gumrong nyi lhê. Ngò gi, myit
wum byí é gyai yhang huí ri; jam-
jau hkyô pé myo myo ngamoq hui kô-
lhang, ngò, gyai yhang gabú nyi lhê.
⁵ Hkâsu mù gâ le, ngamoq gi, Make-
doni mau má jé é hkûn, ngamoq é
gungdu gi, zim za a myang nyi é htoq
agó, hkyô hkangmó má ngamoq wuî-
hke jamjau hui zô é nghut lhê. Shing-
gan má gi, mabyoq htoq, ahkaû má
⁶ gi, gyuq kyum nyi é nghut lhê. Nghut
kôlhang, nhik ngê bang lé nhik tîng é
Garai Gasang gi, Tituq lé jé lé nhang
é dông mai, ngamoq lé nhik tîng byi
⁷ bê nghut ri. Yhang jé lé é dông mai za
a nghut, yhang lé nungmoq nhik tîng
byí é hkyô dông mai le nghut lhê. Ngá
é gabú hkyô gi, gó nám lhê htoq má
je myo sháng gaq ga, yhang gi, nung-
moq ngo lé myit tuí nyi é hkyô, nung-
moq gyai yhang shut bûn é hkyô, ngá
é matú nungmoq gyai myit chiq byí
é hkyô pé lé, ngamoq lé taí kyo bê
nghut ri.
⁸ Ngá é laikâ èq, nungmoq lé yón
nhang é nghut kôle, ngò gi, nung-
nghan wó é a nghut. Sâng-hi le, ngò

- nungnghan wó é nghut kôlhang, ngá
é laiká gi, nungmoq lé rayoq zo za
⁹ lhoq yón nhang é lé, ngò sê lhê. Nghut
kôlhang, ngò gi, ahkuí gabú lhê; haû
gi, nungmoq lé yón hui nhang é yan-
mai a nghut é za, nungmoq é yón hkyo
èq, nungmoq lé myit lhîng nhang é
yanmai ru nghut lhê. Nungmoq gi, Ga-
rai Gasang ô nau é dông yón huí é
bang dut bekô nghut mù, nungmoq
lé, ngamoq èq hai akyû le a lhoq yôm
¹⁰ byí é nghut lhê. Hkâsu mù gâ le, Ga-
rai o é dông yón kuq huí é hkyô gi,
nungnghan wó hkyô a bo é za, hkyi
yù hkyô wó shoq, myit lhîng nhang
é nghut ri. Nghut kôlhang, mingkân
é yón kuq hkyô gi, shi é hkyô lhoq
¹¹ htoq é nghut ri. Garai o é dông, nung-
moq chyáng akyû lhoq htoq byí é
yón kuq hkyô lé wú wú keq! Haû gi,
gyai yhang myit zuq é hkyô, yhum-
sing gùng mara a bo é lé tûn shit râ lé
myit ngui é hkyô, nhikmo-yo é hkyô,
gyuq dan é hkyô, myit ô nau nyi é
hkyô, myit chiq byí é hkyô, tengmán
hkyô kut râ rì rì nghut é hkyô pé nghut
lhê. Nungmoq gi, haû hkyô má mara
a bo é lé hkat hkangmó má saksé tûn
¹² shit bekô nghut ri. Haû mù luí, ngò,
nungmoq lé kê kat é nghut kôlhang,
kut shut su é yanmai le a nghut, kut
shut é hui zo su é yanmai le a nghut é
za, ngamoq lé nungmoq hkâ-í ap nóng
byí é hkyô lé, Garai Gasâng hí má
nungmoq gùng nungmoq wó myâng
râ matú kê kat é sheq ru nghut lhê.
¹³ Haû pé banshoq dông mai, ngamoq gi,
myit wum byí é huí ri.

Ngamoq myit wum byi huí é htoq
agó, Tituq hkâ-í yhang gabú é lé
myàng mù, ngamoq gi, je riyhang
myit gabú é nghut lhê. Haí mù yhang
gabú é gâ lé, nungmoq banshoq bâng
èq yhâng é myit lé lhoq nguingón byi

¹⁴ kô é yanmai nghut ri. Ngò gi, nungmoq eq sêng é hkyô, yhang lé gumrong kyô é nghut kôle, nungmoq é yanmai hoq a hpû é nghut lhê. Nungmoq lé ngamoq taí é lhunglhang gi, têng é eq rajung za, Tituq hí má, nungmoq é hkyô lé ngamoq gumrong é le

¹⁵ têng lhê. Nungmoq banshoq bang jìno gyo kômù, gyuq nán é myit mai yhang lé lhom hap yù kô é lé, yhang myitbùn é hkùn, yhang nungmoq lé chyitdap é

¹⁶ myit gi, je riyhang kô dik nyi ri. Ngò gi, nungmoq lé banshoq wó lum to bê lé sê é yanmai, gabú nyi lhê.

Byí É Hkyô

8 Gumang wuì ê, ahkuí, ngamoq gi, Makedoni mau mâ é noqkuq hpûng pé lé Garai Gasang byí é jeju eq sêng é hkyô, nungmoq lé sé nhâng

² nau ri. Yhangmoq gi, wuìhke jamjau hkyô myo myô èq chyam lik é huí é nghut kôlhang, yhangmoq é a ung taí loshoq gabú é hkyô eq yhangmoq é gyai yhang myung é hkyô gi, agùn agó

³ byí nau é myit bò nhang ri. Hkâsu mù gâ le, yhangmoq gi, yhangmoq wó dut é myhó byi kô é htoq agó, yhangmoq é a-tsam lai shoq lhang byi kô é hkyô lé, ngò saksé hkám lhê. Yhangmoq gi, yhangmoq é myit hkaû mai yhang haû

⁴ su kut kô é nghut ri. Yhangmoq gi, haû sân-yúng bang lé wó bo dojaú rà matú, ngamoq lé gyai yhang ahkáng

⁵ dung kô é nghut ri. Yhangmoq gi, ngamoq myit ngam tô é htoq má lhang lai shoq, Garai Gasang ô nau é hkyô lé châng é dông, yhangmoq gùng lé hí haû Yhumsîng lé ap byí pyám kômù, hau htâng sheq ngamoq lé ap kô é

⁶ nghut ri. Haû mù luí, Tituq yhang hí kut hi nyi bê nghut é yanmai, ngamoq gi, jeju haû lé nungmoq chyáng le shuí lhoq byíng jup byi rà matú,

⁷ yhang lé wum byi bê nghut lhê. Nungmoq gi, lumjîng myit má, dang nyo é hkyô má le, sumsé hpaqchyí hkyô má le, myit zuq hkyô banshoq eq ngamoq lé nungmoq chyitdap é hkyô má le, jung hkgangmó má agùn agó dut bekô eq rajung za, nungmoq gi, byí nau é jeju shí má le agùn agó dut rà lé, bûn nyi keq.

⁸ Ngò gi, nungmoq lé hkunmó hkyô é a nghut, nghut kôlhang, góbâng é myit zuq é hkyô eq whuí wú é dông, nungmoq é chyitdap myit jet é hkyô lé chyam wú naû luí sheq ru

⁹ nghut lhê. Hkâsu mù gâ le, nungmoq gi, nga-nhûng é Yhumsîng Yesuq Hkrisduq é jeju lé sê akò nghut ri. Yhang gi, Yhâng é myùng hkyô dông mai nungmoq wó bang dut kó sháng gaq ga, jung hkgangmó wó sù nghut kôlhang, nungmoq é matú é yanmai, myùng sù dut bê nghut ri.

¹⁰ Shí hkyô eq sêng é má, nungmoq é matú ge dik é hkyô ngò hpaqchyí byi kôlé: A-nhik, nungmoq gi, sâng-hi, byí hí kô é za a nghut, haû su kut nau é

¹¹ myit bo é bang le nghut akò. Nungmoq wó dut é eq rajung za, haû lé lhoq pân é dông nungmoq é gyai yhang kâm kut é myit lé wó lhoq dik ko sháng gaq, ahkuí, muzó haû lhoq pân

¹² keq. Hkâsu mù gâ le, byí nau é myit bo é nghut jáng, chyunghuq haû gi, yhang a wó é má cháng luí a nghut é za, yhang wó é má cháng luí, hap yù gíng é nghut lhê.

¹³ Nungmoq é matú gi, wòlai dut, gó-bang gi, hkyamsâ nyi rà lé, ngamoq ô nau é a nghut, rawuí za wó dut kó rà

¹⁴ lé sheq ô nau é ru nghut lhê. Nungmoq haí rà tô é lé, yhangmoq agùn agó wó é mâ é wó dum taú htuqbang byi kó sháng gaq, ahkui lhê é ahkyíng má, yhangmoq haí rà tô é lé, nungmoq

agùn agó wó é mâ é htuqbang byi keq. Haû jáng sheq, wuí wuí za wó dut kó
¹⁵ rã nghut lhê. Haû gi, “Myo myo tsíng yu é sũ gi, lûm myo shoq wó é a nghut, shau za tsíng yu é sũ gi, lûm shau shoq wó é a nghut.”^a ga kê tô é eq rajung za nghut ri.

**Tituq Lé Korinhtuq Myuq
 Shut Nhang Kat É Hkyô**

¹⁶ Nungmoq é matú ngò myit chiq byí é eq rajung zã é myit lé, Tituq é i-myt má kat byí é Garai Gasang lé, ngò jeju
¹⁷ hkya-ôn lhê. Hkâsu mù gâ le, Tituq gi, ngamoq dúng tóngbán é lé za lhom hap yu é a nghut, gyai yhang myit toq mù, yhanggùng yhang myit hpyit yû luí, nungmoq chyáng lé lô gù za
¹⁸ nghut ri. Ngamoq gi, haû gabú danglù lé dojaú é má noqkuq hpûng pé ban-shoq èq hkya-on huí é gumang hpó haû lé le, yhang eq rahá nhang kat
¹⁹ lhê. Hau htoq agó, ngamoq garúm rã myit bo nyi é hkyô lé tûn shit mù, haû Yhumsíng lé hkungga rã matú ngamoq wú gôn nyi hkyô nghut é, alu lé ngamoq yu chung é hkûn, ngamoq é byinzùm kut rã matú, noqkuq hpûng pé èq hkyin yu é sũ le yhang nghut
²⁰ lhê. Ngamoq gi, myit lòm luí byí é chyunghuq shí lé ngamoq wú gôn nyi é hkyô má, ó yuq èq le mara hô rã
²¹ hkyô a htoq shoq sidiq nyi lhê. Hkâsu mù gâ le, jô é hkyô kut rã matú ngamoq shikut nyi é gi, haû Yhumsing é myoq hí má za a nghut, byu pé é myoq hí má le nghut lhê.
²² Hau htoq agó, ngamoq gi, hkyô myo myo má shirong é myit bo é hkyô le anum num ngamoq chyáng saksé shit é sũ, ngamoq é gotû gumang hpó lé le yhangnhik eq rahá nhang kat lhê.

Yhang gi, ahkuí lháng, nungmoq lé gyai yhang myit lum tô é yanmai, shi-
²³ rông myit je riyhang bo nyi ri. Tituq é hkyô ga jáng, yhang gi, ngá é zùm yap luzúm eq ngò eq rahá nungmoq chyáng mù zui sũ nghut ri. Nga-nhûng é gumâng nhik é hkyô ga jáng, yhang-nhik gi, noqkuq hpûng pé é gunglik eq
²⁴ Hkrisduq é aróng nghut akô. Haû mù luí, haû noqkuq hpûng pé wó myâng kó sháng gaq, nungmoq má ngamoq haû mù gumrong é hkyô eq nungmoq é chyitdap myit é saksé lé, haû bang lé tûn shit keq.

9 Ngò gi, haû sân-yúng bang lé htuqbang rã hkyô eq séng luí, nungmoq lé kê kat rã a ra nghut ri.
² Hkâsu mù gâ le, nungmoq gyai garúm nau é myit lé ngò sê lhê, haû mù, ngò gi, Makedoni mau bang lé, haû hkyô eq séng luí gumrong kyo mù, a-nhik mai yhang, Ahkaia mau má nungmoq byi rã rì rì nghut bê hkyô lé, yhangmoq lé taí kyô é nghut lhê. Nungmoq é gyai yhang myit toq é hkyô gi, yhangmoq myo hpyang lé, htuqbang nau é myit nhaû toq byi bê nghut ri.
³ Nghut kôlhang, shí hkyô má nungmoq eq séng luí ngamoq gumrong é gi, hká dòng le dangsôm a dut byuq sháng gaq, ngò taí bê eq rajung za nungmoq rì rì wó hen to rã matú, ngò gi, gumang wui lé nhang kat é nghut
⁴ lhê. Hkâsu mù gâ le, Makedoni mau bang gi, ngò eq rahá lé mù, nungmoq rì rì a hen tô é lé, lé myang ang kô é nghut jáng, nungmoq za hoq hpu rã a nghut, ngamoq le, nungmoq lé lûm yhang lum pyâm é yanmai, hoq
⁵ bo hpu rã nghut lhê. Haû mù luí, nungmoq danggidiq byí to bê nghut é, chyunghuq lé rago wó lajâng pân to

^a 8:15 Htoq Lô 16:18

râ matú, gumang wuì lé wum taì tsuq mù, nungmoq lé hí, lé kum nhâng râ gi, ra yhang râ lhê nghû ngò wó myit ri. Haú hkûn sheq, a nau é dông byí é a nghut é za, byí nau é chyunghuq dông hen tô é dut râ nghut lhê.

Agùn Agó Byí É Hkyô

- ⁶ Shau za sân hkyó sù gi, shau za shù yù râ nghut mù, agùn agó sân hkyó sù gi, agùn agó shù yù râ nghut lhê
- ⁷ gâ é dang lé, myitbûn nyì keq. Yuq hkanmó gi, a kâm byí é eq byí nhang é dông a nghut é za, yhumsing myit má byí nau é myhó lé myit hpyit yù mù byí é dông dut râ lhê. Hkâsu mù gâ le, Garai Gasang gi, gabú myit èq
- ⁸ byi sù lé chyitdap ri. Haú mù, ahkyíng hkanmó jung hkanmó má, nungmoq râ é banshoq wó mù, ge é muzó hkanmó lé nungmoq je myo wó kut kó sháng gaq ga, Garai Gasang gi, jeju lhungháng lé, nungmoq lé wó byí é sù
- ⁹ nghut lhê. Haú gi,
 “Yhang gi, a ha bûn é za myùng bang lé yhâng é chyunghuq tsing gàm byi bê nghut ri; Yhâng é dingmán hkyô gi, ahtum abyuq gîng nyi ri.”^a
- ¹⁰ ga kâ to eq rajung za nghut ri. Kyô hkyó sù lé kyôshi, zoshuq matú muk byí é Sù gi, nungmoq lé kyôshi byi mù, lhoq myô jat byi râ eq, nungmoq é dingmán hkyo é ashi lé myô lò nhâng
- ¹¹ râ nghut lhê. Nungmoq gi, ayoq abun hkanmó má agùn agó byí é bang wó dut kó râ matú, hkyô hkanmó má sùt wó é bang dut é hui kó râ nghut lhê. Nungmoq agùn agó byí é hkyô lé, ngamoq lhai byi mù, Garai Gasang lé jeju hkyâ-ôn é hkyô dut râ nghut lhê.

- ¹² Nungmoq dojaú é hkyô shí gi, Garai Gasang é byu pé râ é hkyô lé lajang byí é za a nghut, Garai Gasang lé jeju bûn é dang byíng mui nyì nhang é le
- ¹³ nghut lhê. Dojaú hkyô hau é yanmai, nungmoq lhumzui hkyô saksé tûn shit bekô nghut mù, byu pé gi, Hkrisduq é gabú danglù lé nungmoq yín yù luí jîno gyo kô é yanmai le, yhangmoq eq yuq hkanmó lé, nungmoq é a ha bûn é myit mai shuí gam chûng kô é yanmai le, Garai Gasang lé hkyâ-on kó râ
- ¹⁴ nghut lhê. Hau htoq agó, Garai Gasang gi, nungmoq lé jeju lai shoq byí tô é yanmai nungmoq é matú yhangmoq kyúdung byí é u má, yhangmoq é myit nhikhlum gi, nungmoq chyáng
- ¹⁵ htoq jé râ nghut lhê. A ung htoq taì é Garai Gasang é chyunghuq é yanmai, jeju hkyâ-on hkyô gi, Yhâng chyáng ru nghut nyí sháng gaq ô!

Poluq, Yhâng É Hpungmù Lé Taì Hung É Hkyô

- 10** Nungmoq eq myoqdong hkyûm nghut é hkûn gi, gyuq kyûm myit bo ri ga, wê gâng é hkûn gi, a gyuq a wàm dut ri ga kô é sù, ngò Poluq gi, Hkrisduq é nûm é hkyô eq nú-nhâm é hkyô dông mai,
- ² nungmoq lé pying kat lhê. Shí mingkân é nyì yap a-tsang dông ngamoq asak dui ri ga myit ngam é byù ra-am lé, ngò a gyuq a wam é myit lé shit râ dâ tô lhê. Ngò jé lé é hkûn, nungmoq lé haú sù é myit a shit ra sháng gaq, ngò nungmoq lé dúng tôngbán
- ³ kat lhê. Hkâsu mù gâ le, ngamoq gi, mingkan shí má asak dui nyì kô-lhang mingkan byu pé kut é dông
- ⁴ majan zân é a nghut. Ngamoq majan zân é laknak gi, mingkan shi é

^a 9:9 Hkyâ-on 112:9

laknak a nghut é za, shut shai é dōng dang-rháng hkyô nghut é, gingtng é gyedap pé lé lhoq htên pyám râ matú Garaî é a-tsam

⁵ byíng é laknak ru nghut lhê. Nga-moq gi, dang-rháng rhâng lhúm é hkyô pé eq Garai Gasang lé sê é hkyô lé shut shaî shoq yhum-sing gùng yhumsing lhoq myhang mhaû é hkyô hkangmó lé lhoq htên pyám mù, Hkrisduq é jìno gyo râ matú, myit sôn é hkyô hkat hkangmó

⁶ lé shúm kut yu é nghut lhê. Nung-moq é jìno gyo hkyô gi, gumjup é hkûn, jìno a gyô é hkyô hkangmó lé ngamoq dam byi râ rì rì dut râ nghut lhê.

⁷ Nungmoq gi, ahtuq pyâm lé za wú nyi é bang nghut akô. Rayuq yuq gi, Hkrisduq eq sêng é sù hkyak nghut lhê ga myit lum tô é nghut jáng, ngamoq le, yhang eq rajung za, Hkrisduq eq sêng é bang nghut é lé, yhang dum

⁸ bún sê nyi sháng gaq. Hkâsu mù gà le, nungmoq lé lãng hkyó râ nó gi, nung-moq lé kô myhâng nhâng râ matú, ngamoq lé haû Yhumsing byí é ahko ahkáng lé gyai gumrong le lháng, ngò

⁹ gi, hoq hpú é hui râ a nghut. Ngò gi, ngá é laiká pê èq nungmoq lé kyuy é su a dut nhâng nau é nghut lhê. Hkâsu mù gà le, ra-am gi, “Yhâng é laiká pé gi, gàng bo é eq wum-o bo é nghut ri; nghut kôlhang, yhânggùng gi, byu-wup a bo é nghut mù, yhang taî é dang

¹¹ pé gi, haî a nghut.” ga taî akô. Nga-moq gi, wê gâng é hkûn, ngamoq é laiká pé má bo é eq rajung za nghut é hkyô eq, rahá nghut nyi é hkûn, nga-moq zui saî râ nghut é hkyô lé, haû sù é bang sê gyo râ dut lhê.

¹² Ngamoq gi, haû yhumsing gùng yhumsing owaq é bâng é hpúng má

bo lom é hkyô nghut nghut, yhang-moq eq whuí é hkyô nghut nghut, a wám kut é nghut lhê. Yhangmoq gi, yhangmoq gùng yhangmoq chîn lhúm wú é eq yhangmoq gùng yhangmoq whuí lhúm wú kô é hkûn, hpaqchyî a

¹³ bo é bang dut bekô nghut ri. Nghut kôlhang, ngamoq gi, âng é mai lai shoq gumrông râ a nghut é za, nga-moq lé Garai Gasang masat to byí é, nungmoq chyáng lháng hkyit jé shoq nghut é maukyo hkaû má za gum-rông râ nghut lhê. Ngamoq gi, nung-moq chyáng a jé lé wú é dōng mai, gyai yhang gumrong nyi râ a nghut; hkâsu mù gà le, ngamoq gi, Hkrisduq é gabú danglù chûng mù, nungmoq

¹⁵ chyáng lháng lé jé bê nghut lhê. Dum, ngamoq gi, góbang kut é muzó lé le, âng é mai lai luî gumrong lhai é a nghut. Ngamoq myoqbyu é hkyô gi, nungmoq é lumjng myit kô myhang jat nyi jáng sheq, nungmoq chyáng ngamoq zui saî é jowò gyai wó lhoq

¹⁶ lãm râ nghut lhê. Haû gi, nungmoq é mau lháng lai shoq, gabú danglù lé ngamoq wó hko kyo râ matú nghut lhê. Hkâsu mù gà le, ngamoq gi, gó-yuq èq zui saî to bê loqzó eq séng luî,

¹⁷ gumrông nau é a nghut. Nghut kô-lhang, “Gumrong é sù gi, haû Yhum-sing má gumrông sháng gaq.”^a ga kê

¹⁸ tô ri. Hkâsu mù gà le, yhumsing gùng yhumsing owaq é sù gi, hap yù huî é a nghut é za, haû Yhumsing èq owaq byí é sù sheq, hap yù huî é ru nghut lhê.

Lagyo Apyoq Pé Eq Poluq

11 Ngò gi, ngá é ratsuí ngok é dang lé, nungmoq jân pyám byi râ lé myoqbyu é nghut lhê; gè gè yhang, nungmoq gi, haû su kut nyî gù

^a 10:17 Yer 9:24

- ² nghut bekô Haî mù gà le, ngò gi, Garai Gasang mai nungmoq lé magum é myit èq, nungmoq é matú magûm byî lhê. Ngò gi, nungmoq lé, sân-yúng é zomyi gyíng lé su, Hkrisduq chyáng wó shit sháng gaq nghû, Hkrisduq nghut é yhumsîng hpô chyáng za nungmoq lé byi zo râ nghû, danggidiq
- ³ byî to bê nghut lhê. Nghut kôlhang, Ewaq gi, lhangmuì hpaqchyî dâ é èq mhaú zô é huì é su, nungmoq myit é hkyô pé gi, Hkrisduq chyáng nungmoq é lhumzuì é eq sansêng é i-myit ap nóng é hkyô mai shuí nghoq ló byuq é hui râ lé, ngò myit chiq ri.
- ⁴ Hkâsu mù gà le, rayuq yuq gi, nungmoq chyáng lé jé mù, ngamoq hko kyô é Yesuq é hkyô eq shai é đông hko kyô é nghut nghut, nungmoq hap yu to bê Woi-nyí eq a pung é woi-nyí lé nungmoq hap yu é nghut nghut, nungmoq lhom yu to bê gabú danglù eq a pung é danglù lé lhom yu é nghut nghut, nungmoq gi, haú lé lui lui za lhom
- ⁵ hap yu é dut bekô nghut ri. Nghut kôlhang, ngò gi, “Ahkyak-lagyô pé” ga bâng é htoq má ratsuí lháng gyamgyì gyó sù a nghut nghû myit ngam
- ⁶ é nghut lhê. Ngò gi, dang táí hpaqchyî kung sù rayuq a nghut kôlhang, sumsé hpaqchyî bò sù nghut lhê. Ngamoq gi, hkyô hkgangmó má, nungmoq lé haú hkyô hkyâng shoq sé nhâng bê nghut lhê.
- ⁷ Ngò, nungmoq lé, Garai Gasâng é gabú danglù lé ahpau a yu é za hko kyô é đông, nungmoq lé waq toq râ matú, ngá gùng ngò lhoq nyhum é gi,
- ⁸ ngá é mara dut byuq bê lú? Ngò, nungmoq lé dojaú râ matú, gotû noqkuq hpûng pé mai htuqbâng é lé hap yu é gi, haú bâng chyáng mai ngò zik lú yu é đông dut bê nghut lhê.
- ⁹ Ngò gi, nungmoq eq rahá nyì mù, ra-

- jung jung râ é hkûn, ó yuq lé le wòlai a dut nhang é nghut lhê; hkâsu mù gà le, Makedoni mau mai lé jé é gumang wuì gi, ngò haî râ é lé htuqbang byi kô é yanmai nghut lhê. Hká đông nghut kôlhang, ngò gi, ngá gûng lé, nungmoq é matú wòlai a dut nhâng shoq kut bê nghut mù, xoq lui le haú đông kut nyí râ nghut lhê.
- ¹⁰ Haú Hkrisduq é tengmán hkyô gi, ngò má hkyak yhang bo é nghut lhê mù, Ahkaia mau mâ é bang ó yuq lháng, ngò haú su gumrong é hkyô lé wó
- ¹¹ hkûm zìng râ a nghut. Haî mù lú? Ngò, nungmoq lé a chyitdap é yanmai nghut lhê lú? Ngò, nungmoq lé chyitdap é hkyô lé, Garai Gasang sê
- ¹² lhê. Ngò gi, yhangmoq zui saí é lé gumrong é hkyô pé má ngamoq eq rawuì za són byi râ ahko ahkáng ô nau é bang lé ahkáng a byi râ matú, ngò kut nyi é su xoq lui kut shi râ nghut lhê.
- ¹³ Hkâsu mù gà le, haú sù é bang gi, lagyo apyoq pé, mhaú zô é mú zui bang, Hkrisduq é lagyo pé đông kut mhaú é
- ¹⁴ bang nghut akô. Haú gi, maú ra hkyô a joq, hkâsu mù gà le, Tsadán lháng gi, maubó é maumang lagyo rayuq đông
- ¹⁵ kut mhaú é sù nghut lhê. Haú mù, Tsadán é dui-nhâng zoshâng wuì gi, dingmán hkyô é dui-nhâng zoshâng wuì đông kut mhaú é nghut jáng, maú dân râ hkyô a joq é nghut lhê. Yhangmoq é ló htâng má gi, yhangmoq kut é eq rajung za hui zo kó râ nghut lhê.

Yhâng É Wuìhke Jamjau Hkyô Eq Ség Lui, Poluq Gumrong É Hkyô

- ¹⁶ Ngò puq táí kôlé, ó yuq le, ngo lé byù gò đông a sôn yù kó sháng gaq. Nghut kôlhang, nungmoq sôn yu é nghut jáng, ngò ratsuí wó gumrong sháng gaq, byù gò lé nungmoq hap

17 yu é su, ngo lé hap yù kó laq. Ngò, haù su gumrong é hkyô gi, haù Yhum-sîng o é dông ngò taí nyi é a nghut, byù gò rayuq dông taí nyi é ru nghut
 18 lhê. Byù myo myo gi, mingkân é hkyô dông gumrong nyi bum lhê nghut mù,
 19 ngò le gumrông râ nghut lhê. Nungmoq gi, hpaqchyí lûm bo kô é nghut mù, byù go pé lé gabú myit èq jân nyi
 20 akò nhung! Gè gè yhang, nungmoq gi, nungmoq lé jùn kut é sù lé le, nungmoq lé rhoí zô é sù lé le, nungmoq chyáng akyû hô zô yu é sù lé le, yhang gûng yhang owaq é sù lé le, nungmoq lé bo-pyuq pyuq é sù lé le, jân nyi akò
 21 nghut ri. Ngamoq gi, nungmoq lé haù hkyô kut râ má wum gyai nyhôm lhê ngû yín yû râ lé, ngò, hoq ri!

Rayuq yuq, haí lé wám gumrong é nghut jáng, ngò le, haù lé wám gumrong lhê ngû, byù gò rayuq dông
 22 ngò taí nyi é nghut lhê. Yhangmoq gi, Hebre byu pé nghut akò lúhú? Ngò le nghut lhê. Yhangmoq gi, Israelaq byu pé nghut akò lúhú? Ngò le nghut lhê. Yhangmoq gi, Abraham é awut ashîn pé nghut akò lúhú? Ngò le nghut lhê.
 23 Yhangmoq gi, Hkrisduq é dui-nhâng zoshâng wui nghut akò lúhú? (Ngò gi, myit a gyíng é sù dông haù su taí é nghut lhê.) Ngò gi, je nghut lhê. Ngò gi, mù zui je shikut bê, htóng anum num je lúng wú bê, je riyhang bat é huí wú bê, shí râ í é adàm dàm huí wú
 24 bê nghut lhê. Ngò gi, Yudaq byu pé nuichum èq bat é myi xê dàm byíng râ radàm ra ra dut é, ngo lhîng hui zô wú
 25 é nghut lhê. Ngò gi, dumbáng èq nhuq huí é sum dàm, shí sháng gaq ga luq-gok èq dú huí é radàm, wui-sanghpo byoq huí é sum dàm, wuimau má myû byôm é ra-nyí ra-myîn hui zô wú bê
 26 nghut lhê. Ngò gi, xoq xoq hkyowui htoq e ló é hkûn, wui gû é gyuq chiq

jung, damyaq huí é gyuq chiq jung, ngá é amyû wui chyáng mâ é gyuq chiq jung, tûngbaù pé chyáng mâ é gyuq chiq jung, myuq hkaù pé mâ é gyuq chiq jung, yoso pé mâ é gyuq chiq jung, wuimau mâ é gyuq chiq jung eq gumang apyoq pé chyáng mâ é gyuq chiq jung pé hui zô wú bê
 27 nghut lhê. Ngò gi, mù lé zui ngú zui hkyik mù, anum num a myang yhup shoq dut wú bê nghut lhê. Ngò gi, zò-mut wui shit huí é eq zoshuq a wó é anum num huí laí lo wú bê nghut lhê. Ngò gi, gyoq hpû é eq gûngchîn
 28 dut é huí wú bê nghut lhê. Haù pé lhunglhâng htoq má, noqkuq hpûng pé banshoq é matú ngò myit chiq byí é hkyô gi, nyí wui ngò má wòlai dut
 29 nyi ri. Rayuq yuq wum nyhóm le, ngò le wum a nyhóm râ lúhú? Rayuq yuq mara shuí kut shut é hui le, ngò myit a nyé râ lúhú?
 30 Ngò gumrông râ dut é nghut le gi, ngò wum nyhôm é hkyô lé tûn shit
 31 é pé lé gumrông râ nghut lhê. Ngò a mhaù nyi é hkyô lé pyat dedu hkyá-on huí é sù, haù Yhumsîng Yesuq é Íwa eq Garai Gasang sê lhê. Damaskuq myuq má, Hkohlâm Areta é a-ô mâ é mauzau gi, ngo lé chyup râ matú, myuq lé zúng nhang é nghut lhê.
 32 Nghut kôlhâng, ngò gi, manghkoq má lúng mù, myuq xêwâm mâ é hkohot dong mai lhoq hkyô kat é hui luí, yhâng é loq mai wó lut é nghut lhê.

Poluq É Myoqwup Shing-rán Pé

12 Ngò gi, rû gumrông nyi râ za nghut lhê. Akyû wó râ a nghut kôlhâng, haù Yhumsing chyáng mai lo é myoqwup shing-rán pé eq hpông shit é shing-rán pé lé gumrông râ
 2 nghut lhê. Ngò gi, laí lò bê raxe myi zân hkûn, mauhkûng sum tsáng nghu

é má shuí toq yu huí é, Hkrisduq mâ é byù rayuq^a é hkyô lé sê lhê. Yhang gi, gungdu eq nghut é luq, a nghut é luq, ngò a sé, nghut kôlhang, Ga-³rai Gasang gi, sê lhê. Yhang hparadisú má shuí toq yû huí é gi, ngò sê lhê. Yhang gi, gungdu eq nghut lhê luq, a nghut é luq, ngò a sé, nghut kô-⁴lhang, Garai Gasang gi, sê lhê. Yhang gi, byu pé taí kyô htoq râ ahkáng a wó é hkyô pé nghut é, a wó taí sân kyô é⁵ hkyô pé lé wó gyô ri. Ngò gi, haú yuq sù é byu é hkyô eq séng luí gumrông râ nghut lhê; nghut kôlhang, ngò gi, ngá é wum nyhóm hkyô eq séng luí, gumrong é mai lai luí, ngá gûng ngò⁶ gumrông râ a nghut. Ngò gi, gumrông hkyô lé hkyin yù râ dut é nghut jáng lháng, byù gò dut râ a nghut, haí mù gà le, ngò gi, tengmán hkyô taí nyì râ nghut lhê. Nghut kôlhang, ó yuq le, ngò kut é eq ngò taí é mai myit lum to kô é htoq má, ngo lé, je a myit lo ko sháng gaq nghû, ngò a gumrông kut pyâm nyi lhê.

⁷ Haú laklaí dik é dông ngo lé hpông shit é shing-rán mó pè é yanmai, ngò a nghutbûn byuq sháng gaq ga, ngo lé gunjang râ matú, Tsadán é lagyo nghut é zu lé, ngá é gungsho má kat⁸ byí to bê nghut ri. Haú lé ngá chyáng mai yu pyám byi râ matú, ngò, Yhum-sîng lé sum dâm dûng tôngbán wú⁹ bê nghut lhê. Nghut kôlhang, Yhang gi, “Ngá é jeju gi, náng é matú luq-dun é nghut lhê; hkâsu mù gà le, Ngá é a-tsam gi, wum nyhôm é hkyô má lhoq gumjup é hui ri.” ga luí, ngo lé taí ri. Haú mù luí, Hkrisduq é a-tsam gi, ngò má wó joq nyì sháng gaq nghû, ngò gi, ngá é wum nyhôm é hkyô pé eq séng luí, gabú myit mai je riyhang

¹⁰ gumrông râ nghut lhê. Haú nghut mù luí, ngò gi, Hkrisduq é yanmai, wum nyhôm é hkyô pé má le, rhoí huí é hkyô pé má le, wuíhke jamjau huí é hkyô pé má le, zing-ri huí é hkyô pé má le, awui ahke dut é hkyô pé má le, gabú nhik dik nyi lhê. Hkâsu mù gà le, ngò wum nyhôm é hkûn sheq, ngò wúm bo é nghut lhê.

Poluq Chiq Byí É Hkyô

¹¹ Ngò gi, ngá gûng ngò byù gò lhoq kut yû bê nghut ri, nghut kôlhang, haú gi, nungmoq kut nhang é nghut lhê. Ngò gi, nungmoq eq owaq é hui ang sù nghut lhê; hkâsu mù gà le, ngò gi, haí a nghut kôlhang, “Ahkyak lagyo pé” ga bâng é htoq má ratsuí lháng gyam-¹²gyi gyó sù a nghut. Lagyo rayuq é masat kumlhá nghut é, kumlhá pé, mauhpo muzó pé eq laklaí kumlhá pé lé, ngò gi, gyai yhang hkam jan mù nung-¹³moq chyáng kut bê nghut lhê. Ngò gi, nungmoq é matú, hkâ-nhám le wòlai a dut é nhîng, nungmoq gi, hkâsu mù, gotú noqkuq hpûng pé htoq má gyam-¹⁴gyi gyó nyi akò lhú? Ngò, haú hkyô má shut é nghut jáng, mara hkyut pyám byi kó laq!

¹⁴ Ahkuí, ngò gi, nungmoq lé, sum lhîng nghû râ dâm, lé kum râ rì rì nghut bê mù, nungmoq é matú wòlai gi, a dut râ nghut lhê. Hai mù gà le, ngò gi, nungmoq é sutzè lé ô nau é a nghut, nungmoq lé sheq ru nghut lhê. Hká dông nghut kôle, zo wuí gi, mó wui é matú sutzè hkong to byi râ dut é a nghut, mó wuí sheq, zô wuí é matú hkong to byi râ dut é¹⁵ nghut lhê. Haú mù luí, ngò gi, gyai yhang gabú é myit mai, ngò wó é jung hkangmó lé nungmoq é matú chung

^a 12:2 Hkrisduq mâ é byù rayuq ga é gi, Poluq yhanggùng yhang lé taí nyi é nghut lhê.

jai râ nghut mù, ngá gûng lé lhang
 chûng jai râ nghut lâ. Ngò, nung-
 moq lé myô chyitdap é yanmai, nung-
 moq gi, ngo lé shaû chyitdap kó râ
 16 lú? Ngò gi, nungmoq chyáng wò-
 lai a dut é hkyô têng lâ. Nghut kô-
 lhang, ngò gi, hpaqchyí haq da sù dut
 mù, mhaû lhiq é dông nungmoq lé
 chyup yû sù dut byuq bê ga nungmoq
 17 ra-am myit akô myhi-nhung! Ngò gi,
 nungmoq chyáng nhang kat byí é byù
 dông, nungmoq chyáng amyat kut zô
 18 yù bê nghut lâ lú? Ngò gi, Tituq lé
 nungmoq chyáng lé râ matú wum taí
 tsuq mù, ngamoq é gumang lé, yhang
 eq rahá nhang kat bê nghut lâ. Tituq
 gi, nungmoq chyáng amyat kut zô é
 nghut lâ lú? Nga-nhik gi, rajung zâ
 é myit dông chyat kut mù, rajung zâ
 é hkyô lé chyat châng é su nhik nghut
 lâ, a nghut kó lú?
 19 Ngamoq gi, nungmoq hí má nga-
 moq gùng ngamoq taí hung yu nyi
 ri nghû, ahkuí jé shoq myit nyi akô
 lú? Ngamoq gi, Hkrisduq mâ é byu
 pé dông, Garai Gasâng hí má taí nyi é
 nghut lâ. Chyitdap é gumang wui ê,
 ngamoq kut é jung hkangmó gi, nung-
 moq é akyu matú chyat nghut lâ.
 20 Hkâsu mù gâ le, ngo lé jé é hkûn, ngò,
 nungmoq lé dut nhâng nau é su, nung-
 moq a wó dut kó râ eq, nungmoq, ngo
 lé dut nhâng nau é su, ngò a wó dut râ
 lé, ngò myit gyuq ri. Ngò gi, mabyoq
 jishûm htoq é, manon é, nhik-ûn buq
 é, byù hpûng gam é, gansang é, lumu
 é, gyai nghutbûn é eq atau ahû dut é
 21 hkyô pé joq râ lé gyuq ri. Ngò dum
 lé jé é hkûn, ngá é Garai Gasang gi,
 nungmoq é hí má ngo lé myit nyhûm
 nhâng mù, yhangmoq ô nau é myit
 châng é má shut é dông nyi zô lhum
 nau é i-myt, gungsho zùm yap é yu-

bak mara eq a sân-yúng é hkyô kut
 shut é mai myit a lhang bang myo myô
 é yanmai, yón kuq é hui zo râ lé, ngò
 myit chiq ri.

Ló Htáng Má Sidiq Byí É Dang Pé

13 Ahkuí, ngò, nungmoq chyáng
 lé kum râ gi, sum lhang nghû
 râ dâm nghut lâ. Haû gi, “Mara hun
 é hkyô hkangmó lé, í yuq sum yuq
 saksé hkâm é èq lhoq teng ra râ nghut
 lâ.”^a ga kê tô é eq rajung za nghut
 2 lâ. Ngò gi, í lhang nghû râ dâm nung-
 moq eq rahá nyi é hkûn, nungmoq
 lé sidiq byi gû bê nghut lâ. Ahkuí
 le, nungmoq eq wê gâng tô é u lé,
 dum taí kôlé, ngò dum jé lé é hkûn,
 noq mai mara shut tô é bang lé nghut
 nghut, góbang ó yuq lé nghut nghut,
 3 hkyamsa a byi lo râ nghut lâ. Haû
 gi, ngò dông mai Hkrisduq dang taí
 nyi é hkyô saksé shit râ lé, nungmoq
 dúng nyi kômù nghut lâ. Yhang gi,
 nungmoq é hkyô lé hkâsu kut shuí-û é
 hkyô má wum nyhôm é a nghut, nung-
 moq chyáng a-tsam mó shit sù sheq
 4 ru nghut ri. Hkâsu mù gâ le, Yhang
 gi, wum nyhôm é má jén sat é hui bê
 nghut kôlhang, Garai Gasâng é a-tsâm
 èq dui nyi é gi, hkyak têng lâ. Haû
 eq rajung za, ngamoq gi, Yhang su
 wum nyhóm kôlhang, nungmoq lé do-
 jaú râ matú, Garai Gasâng é a-tsâm èq,
 Yhang eq rahá dui nyi râ nghut lâ.
 5 Nungmoq gi, lumjîng hkyô má
 nghut nyi lâ luq, yhumsing gùng
 yhumsîng myí wú keq. Yhumsing
 gùng yhumsîng chyam wú keq. Nung-
 moq gi, chyam é má sùm byuq é
 za a nghut jáng, nungmoq chyáng
 Hkrisduq Yesuq lúng nyí bê hkyô lé
 6 sé kó râ nghut lâ. Ngamoq gi, chyam
 é má a sùm é hkyô lé, nungmoq wó

^a 13:1 Tarâ Pun 19:15

sé kó râ nghut lhê nghû, ngò hkyak
⁷ lum tô lhê. Ahkuî, ngamoq gi, nung-
 moq shut é hkyô haî a kut kó râ
 matú, Garai Gasâng chyáng kyûdung
 byi lhê. Haû gi, ngamoq chyâm hui
 lui wó lut é hkyô lé byu pé myàng
 kó râ matú a nghut é za, ngamoq
 sôm é su dut kôlhang, nungmoq ge
 é hkyô kut kó râ lé myàng râ matú
⁸ nghut lhê. Hkâsu mù gâ le, ngamoq
 gi, haû tengmán hkyô eq shaî é dông
 haî le a ge kut é za, tengmán hkyo
 é matú za kut râ dut é nghut lhê.
⁹ Ngamoq wum nyhóm kôlhang, nung-
 moq wúm bo é hkûn, ngamoq gabú
 é nghut lhê; ngamoq kyûdung é gi,
 nungmoq gumjup râ matú nghut lhê.
¹⁰ Ngò gi, wê gâng tô é hkûn, haû hkyô
 pé lé haî mù kê é gâ le, ngò jé lé é
 hkûn, ahkáng ayá lé ngò chung é má
 htân htân a kut râ matú nghut lhê.
 Ahkáng ayá haû gi, nungmoq lé lhoq
 htên pyám râ matú a nghut, nungmoq

lé kô myhang lo nhâng râ matú, haû
 Yhumsîng ngo lé byî é sheq ru nghut
 lhê.

Ló Htâng É Shi-kyám Dang

- ¹¹ Ló htáng má ngò taî nau é gi, gu-
 mang wui ê, nguingón yuqyo nyî keq.
 Gumjup hkyô shut sô nyî keq, ngò
 dúng tôngbán é dang lé gyo keq, myit
 rahkat za dut nyî keq, nguingón shoq
 asak duì nyî keq. Haû hkûn, chyitdap
 hkyô eq nguingón hkyo é Garai Ga-
 sang gi, nungmoq eq rahá nyi nyî râ
 nghut lhê.
- ¹² Chyoiyúng é bopuq puq é èq, ra-
 yuq eq rayuq shi-kyâm lhum keq.
- ¹³ Sân-yúng bang banshoq gi, nungmoq
 lé shi-kyâm kat akô.
- ¹⁴ Haû Yhumsîng Yesuq Hkrisduq é
 jeju, Garai Gasâng é chyitdap myit eq
 Chyoiyúng Woi-nyí é zùm yap hkyô
 gi, nungmoq banshoq bâng chyáng ru
 joq nyî sháng gaq ô.

GALATIQ

Mau Bâng Chyáng Hun Kat é Laiká (Galatians)

1 Byu pê chyáng mai le a nghut, ó yuq èq nhang é le a nghut e za, haù Yesuq Hkrisduq lé shí bê mai dum lhoq dui toq yu é sù Íwa Garai Gasang eq Yesuq Hkrisduq chyáng mai nhang kat é lagyo rayuq nghut sù, ngò Po-
² luq gi, ngò eq rahá nyi é gumang wùi banshoq bang le mô, Galatiq mau mâ é noqkuq hpûng pê chyáng dang kyô kat lhê.

³ Nga-nhûng é Íwa Garai Gasang eq Yhumsîng Yesuq Hkrisduq chyáng mâ é, jeju eq nguîngón hkyô gi, nungmoq chyáng ru joq nyí sháng gaq ô.

⁴ Haù Hkrisduq gi, nga-nhûng é Íwa Garai Gasang ô nau é eq rajung za, agè ashop é ipyat shí mai, nga-nhûng lé xe yù râ ga, nga-nhûng é yubak marâ é matú yhânggùng lé Yhang byí pyám
⁵ bê nghut ri. Haù hpungwup shing-kang gi, Garai Gasâng chyáng pyat dedu ahtum abyuq ru joq nyí sháng gaq ô. Amen.

Gotú Gabú Danglù A Joq É Hkyô

⁶ Ngò gi, haù Hkrisduq é jeju mai nungmoq lé ji yù Sù lé, nungmoq haù-í han kâng pyâm to kôluí, shaí é gabú danglù shut lhing ló nyí kô é hkyô lé, gyai yhang maú nyi ri.

⁷ Danglù haù gi, gabú danglù ratsuí lháng a nghut. Byù ra-am mai nungmoq lé lhoq shuk byi luí, haù Hkrisduq é gabú danglù lé, shikut luí lhoq shai nhang pyâm nyi kô é
⁸ hkyô za nghut lhê. Nghut kôlhang, nungmoq lé ngamoq hkô kyo bê gabú danglù mai lai luí, ngamoq nghut nghut, mauhkûng htoq mâ é mau-

mang lagyo rayuq nghut nghut, shaí é gabú danglù, nungmoq lé hko kyô é nghut jáng, haù yuq gi, ahtum abyuq
⁹ dam byí é hui zo sháng gaq ô! Ngamoq taí wú bê eq rajung za, ahkuí le, ngò dum taí kôlé: rayuq yuq mai, nungmoq hap yu to bê é gabú danglù mai lai luí, gotú hko nyi e nghut jáng, haù yuq gi, ahtum abyuq dam byí é hui zo sháng gaq ô!

¹⁰ Haù su nghu taí é gi, ahkuí, ngò, byù é hí má myoqdong wó râ matú shikut nyi é nghut lhê lhú? Haù a nghut jáng, Garai Gasâng é hí má myoqdong wó râ matú shikut nyi é nghut lhê lhú? Byù lé gabú nhâng râ matú, ngò shikut nyi é nghut lhê lhú? Ngò gi, byu pé lé za ru gabú nhâng nau nyi é nghut le gi, Hkrisduq é dui-nhâng zoshâng dut râ a nghut.

Poluq Lé, Garai Gasang Ji Yu É Hkyô

¹¹ Gumang wùi ê, ngò hko kyô é gabú danglù haù gi, byu èq kut htoq é hkyô a nghut é lé, ngò, nungmoq lé
¹² sé nhâng nau ri. Ngò gi, haù lé, byu chyáng mai wó yu é le a nghut, góyuq èq mhoq byí é le a nghut e za, Yesuq Hkrisduq èq shing-rán byí é dông wó hap yu é ru nghut lhê.

¹³ Ngò, Yudaq noqkuq htûng má nghut nyi ashí hkûn, Garai Gasâng é noqkuq hpûng lé ladu lai shoq hkâsu kut zing-ri luí, haù lé lhoq htên shikut wún é, ngá é hí hpyang lhê é asak dui hkyô lé, nungmoq wó gyô wú bekô
¹⁴ râ nghut lhê. Ngò gi, ngò eq ra-kyam zâ é Yudaq byu pé myo myô é htoq má, Yudaq noqkuq htûng lé je cháng

sû nghut é htoq agó, ngá é îchýí îwa pê é htungli lé ladu lai shoq myit zìng
¹⁵ zuq sù nghut lhê. Nghut kôlhang, ngá nû é unghkaû mai yang hkyin to luí, Yhang é jeju yanmai ngo lé ji yu é Ga-
¹⁶ rai Gasang gi, haû Yhang Zô é hkyô gabú danglù lé, ngò mai tûngbaù pê chyáng hko kyo sháng gaq ga, Yhang Zo lé ngá chyáng htoq shit nhâng râ matú myit hpyit yu é hkûn, ngò gi, ó
¹⁷ yuq eq le a hpyê yù, Yerusalem wà mó má doq ló luí, ngá hí má lagyo kut é bang lé le a ló huí e za, radá dâm Ara-
 biq mau shut ê luí, Damaskuq myuq má dum taù ló bê nghut lhê.
¹⁸ Sum zân lai é htâng má, ngò gi, Yerusalem wà mó má doq ló mù, Petruq^a lé ló hui luí, yang eq raxe
¹⁹ ngo nyí, ló nyi nyi é nghut lhê. Haû má, Yhumsing é yanggu Yakuq mai lai luí, lagyo góbang lé ngò a myàng
²⁰ nghut ri. Nungmoq lé ngò ká byí kat é má, mhaû é hkyô a bò nghú luí, Garai
²¹ Gasâng hí má, hkyak, ngò taí lhê. Hau htâng má, ngò gi, Suriq mau eq Kiliki
²² mau má ê jé é nghut lhê. Haû hkûn, haû Hkrisduq má nghut é, Yuda mau mâ é noqkuq hpúng byú wuì gi, ngo lé
²³ myoqno a shú kó nghut ri. Yhangmoq gi, “Hí hkûn, nga-nhúng lé zing-ri sù gi, yang mai lhoq hten râ matú ra-
 dàm shikut wú é lumjíng hkyô haû lé, ahkuí hko nyi ri.” gâ é hkyanglù lé wó
²⁴ gyô wú kôluí za, ngá é yanmai, Garai Gasang lé hkyâ-ôn bum akò nghut ri.

**Poluq Lé Lagyô Pé
 Lhom Hap Yu É Hkyô**

2 Raxe myi zân lai é htâng má, ngò gi, Barnaba eq rahá Yerusalem wà mó má dum doq ló é hkûn, Ti-

² tuq lé le shuí chung é nghut lhê. Ga-
 rai Gasang byí é shing-rán eq rajung za doq ló luí, ngò kut wú bê muzó eq ahkuí kut é muzó pé akôm a dut pyám sháng gaq nghú, tûngbaù pê chyáng ngò hko kyô nyi é gabú danglù lé, haû suwún dut bâng é hí má za
³ shap kyô é nghut lhê. Nghut kôlhang, ngò eq rahá nghut é Tituq gi, Grik byù nghut kôle, yang lé ahpyo-kuq
⁴ a hpyit nhâng kó nghut ri. Haû hkaû wang lo é mhaû é gumang wuì gi, Hkrisduq Yesuq má ngamoq wó é lut-hkyô má jowú luí, nga-nhúng lé jùn dut nhâng râ dâ kô é yanmai, haû hkyô gabyông htoq lo é nghut ri.^b
⁵ Nghut kôlhang, haû gabú danglu é tengmán hkyô gi, nungmoq chyáng joq gíng nyi sháng gaq nghú, razup za lháng, yangmoq é dang lé ngamoq gyo byí é a nghut.
⁶ Ahkyak é byù su dut é bang gi, yangmoq haí jung kut kôlhang, ngò eq a séng nghut ri; Garai Gasang gi, du lé wú mù jéyáng é sù a nghut; byù haû bang gi, ngá é mungdang má haí le a
⁷ jat kat e za, Petruq gi, Yudaq byu pé^c lé, haû gabú danglù hko kyo râ mù má lum tô é hui bê eq rajung za, ngò gi, tûngbaù pé^d lé, haû gabú danglù hko kyo râ mù má lum tô é hui bê hkyô lé za, yangmoq myang akò nghut ri.
⁸ Hkâsu mù gâ le, Yudaq byu pé é matú Petruq lé lagyo ayá dâng byí é sù Garai Gasang gi, tûngbaù pê matú ngo lé le lagyo ayá dâng byi bê nghut lhê.
⁹ Haû hkungmó-zíng su ahkyak é, Yakuq, Petruq eq Yohan pé gi, ngo lé byi tô é jeju lé myang sé kôjáng, ngò eq Barnaba lé, zùm yap hkyô gâ é loqyo loq èq shi-kyâm yù kôluí, yangmoq

^a 1:18 Petruq lé Kehpa le gâ lhê. ^b 2:4 Yudaq byu pé ra-am gi, hpúng asik wang é bang lé Yudaq htung tarâ cháng nhâng nau akò nghut ri. ^c 2:7 Grik má ahpyo-kuq hpyit hkam é bang ga bo tô ri. ^d 2:7 Grik má ahpyo-kuq hpyit a hkam é bang ga bo tô ri.

gi, Yudaq byu pê shut, ngá-nhik lé gi, tûngbaù pê shut ê râ lhê ga, myit hui
¹⁰ bekô nghut ri. Yhangmoq gi, ngá-nhik mai myùng bang lé ru bûn nyi râ matú za pying kat akô; haù gi, ngò gyai yhang kut nau nyi é hkyô nghut lhê.

Petruq Lé Poluq Htuq Htîng É Hkyô

¹¹ Antioku wà mó má Petruq jé lé é hkûn, yhang lé mara hûn râ hkyô joq é yanmai, ngò gi, byu hí má yhang, yhang lé lhom htuq htîng é nghut lhê.

¹² Hkâsu mù gà le, Yakuq chyáng mai lé é bang a jé shî é u lé, yhang gi, tûngbaù pé eq rahá chôm zo chôm shuq lhaq kut ri. Nghut kôlhang, haù bang jé é hkûn, yhang gi, ahpyo-kuq hpyit râ lhê gà é hpúng má lom é bang lé gyuq é yanmai, tûngbaù pê chyáng mai htoq gang luí, yhang baù nyi
¹³ tô ri. Yhang, gegùn labyoq kut é hkyô má, gotû Yudaq byu pé le bo châng kut akô nghut mù luí, Barnaba lhang yhangmoq kut é gegùn labyoq hkyô má bo châng nghoq ló bê nghut ri.

¹⁴ Haù gabú danglu é tengmán hkyô eq rajung za, yhangmoq a cháng kô é lé myàng jáng, ngò gi, yhangmoq ban-shoq bâng é hí má, Petruq lé, “Nàng gi, Yudaq byù nghut to mù luí, Yudaq byù rayuq dông a nyi e za, tûngbaù rayuq dông nyi luí nhîng, tûngbaù pé lé Yudaq byu pê é htîngli hkâsu kut wó cháng nhâng râ lhu?

¹⁵ Ngamoq gi, yubak dap bang gà é tûngbaù pé a nghut e za, hkú é buinyi mai yhang, Yudaq byù nghut gû bê

¹⁶ nghut lhê. Byù gi, jep é tarâ lé cháng luí mara hkyut san byi huí é a nghut e za, Yesuq Hkrisduq lé lumjîng é yanmai sheq mara hkyut san byi huí é hkyô lé, ngamoq sê lhê. Haù mù luí, ngamoq gi, jep é tarâ lé cháng luí a nghut e za, Yesuq Hkrisduq lé lumjîng

é yanmai, mara hkyut sân pyám byí é hui sháng gaq nghû, Yesuq Hkrisduq lé lumjîng bê nghut lhê; hkâsu mù gà le, ó yuq le, jep é tarâ lé châng é yanmai, mara hkyut san byí é hui râ a nghut.

¹⁷ Ngamoq gi, Hkrisduq má ngamoq é mara hkyut san byí é hui râ hkyô ho nyi é hkûn, yubak dap é bang ngamoq nghut é lé myang é nghut jáng, mara lé gi, Hkrisduq mai kut nhang é

¹⁸ nghut lhê lhu? Ratsuí le a nghut. Ngò gi, ngò hpyoq pyám bê hkyô lé dum saí kut é nghut jáng, tarâ lu lai é byù

¹⁹ ngò nghut é lé tûn shit ri. Ngò gi, jep é tarâ eq sêng é má, jep é tarâ é yanmai shî jáng sheq, Garai Gasâng é matú wó

²⁰ dui nyi râ nghut lhê. Ngò gi, Hkrisduq eq rahá jén sat é hui bê nghut mù luí, ngá gûng ngò dui nyi é a nghut

lo, Hkrisduq sheq ngò má dui nyi é ru nghut lhê. Ahkuí, ngò gungsho má asak dui nyi é gi, ngo lé chyitdap luí,

ngá é matú yhânggùng lé Yhang byí pyám é, haù Garai Gasâng é Yhangzo
²¹ lé lumjîng é yanmai ru nghut lhê. Ngò gi, Garai Gasâng é jeju lé tô pyám é

a nghut, hkâsu mù gà le, dingmán é hkyô lé, jep é tarâ dông wó yu é ru nghut le gi, Hkrisduq shî hkâm é gi,

akôm dut byuq râ nghut lhê.” nghû taí é nghut ri.

Lumjîng Myit Lhu? Jep É Tarâ Lhu?

3 Galatiq mau mâ é byùbâm pé ê! Yesuq Hkrisduq gi, tapzîng má jén sat hui bê hkyô lé, nungmoq é myoq má bò nhang to bê le nhîng, ó yuq èq wá nungmoq lé llang nghoq yû bekô
² lhu? Nungmoq gi, haù Woi-nyí lé, jep é tarâ cháng luí wó yû kô é nghut lhê lhu? A nghut jáng, nungmoq wó gyô yu é gabú danglù lé lumjîng luí wó yû kô é nghut lhê lhu? Haù ra-

- ³ hkat lé za, ngò sê yû nau ri. Nungmoq gi, haû-í yhang bâm akô lúhú? Haû Woi-nyí lé lumhkaû mù kut hí kôluí nhîng, ahkuí, gungsho wum-o lé lumhkaû mù, yhumsîng myit tô é hkyô lé lhoq pán râ matú shikut nyi
- ⁴ akô lúhú? Nungmoq, myo myo hpuzô pyâm é gi, akôm nghut akô lúhú? Gè gè yhang, haû gi, akôm nghut byuq
- ⁵ bekô lúhú? Garai Gasang, nungmoq lé Yhâng é Woi-nyí byí é htoq agó, nungmoq chyáng laklaí kumlhá kut é gi, jep é tarâ lé nungmoq châng é yanmai nghut akô lúhú? A nghut jáng, nungmoq wó gyô é gabú danglù lé, nungmoq lumjîng é yanmai nghut akô lúhú?
- ⁶ “Abraham gi, Garai Gasang lé lumjîng luí, yhang lé dingmán sù ga sôn yu é hui bê nghut ri.”^a ga, Abraham eq séng luí taí tô é lé myit wú keq.
- ⁷ Haû mù luí, lumjîng myit bo é bang gi, Abraham é yhangzô pé^b yhang dut bê
- ⁸ nghut é hkyô lé sé keq. Lumjîng myit é yanmai, tûngbaù pé lé Garai Gasang mara hkyut san byi râ nghut lhê ga, Chyúmdang mai hí byu-myang to bê nghut mù luí, Abraham lé hí shit kyô tô é gabú danglù gi, “Nang é yanmai, byuhú chângjup gi, shimân jeju wó yû
- ⁹ kó râ nghut lhê.”^c gâ ri. Haû mù luí, lumjîng myit bo é bang gi, lumjîng myit bo é Abraham eq rahá, shimân jeju lé myang hkam yû kó râ nghut lhê.
- ¹⁰ Jep é tarâ châng é hkyô má ngè hkau é lhunglhâng bang gi, nhîng pyâm é hui bang chyat nghut lhê. Hkâsu mù gâ le, “Tarâ laiká má kê tô é lhunglhâng lé a xoq kut é sù, ó yuq nghut kôle, nhîng pyâm é hui

- kó râ nghut lhê.”^d ga luí, kê tô ri.
- ¹¹ Hau htoq agó, “Haû dingmán sù gi, lumjîng myit mai asak duí râ nghut lhê.”^e ga kê tô é yanmai, ó yuq nghut kôle, Garai Gasâng é hí má jep é tarâ lé châng luí, mara hkyut san byí é a huí é hkyô gi, san za nghut bê
- ¹² nghut ri. Haû jep é tarâ gi, lumjîng myit eq haí a sêng é nghut luí, “Haú pé dông châng é sù gi, haú pé mai asak duí râ nghut lhê.”^f ga kê tô ri.
- ¹³ Haû Chyúmdang má, “Sik zîng má jén lhâng to huí é sù ó yuq nghut kôle, nhîng pyâm é hui sù nghut ri.”^g ga kê tô é eq rajung za, Hkrisduq gi, nga-nhûng é matú nhîng pyâm é hui sù dut bê nghut é yanmai, jep é tarâ má é nhîng é hkyô mai nga-nhûng lé
- ¹⁴ hkyi yû bê nghut ri. Haû Abraham lé byí tô é shimân jeju gi, Hkrisduq Yesuq é yanmai tûngbaù pé chyáng le jé sháng gaq ga, Yhang nga-nhûng lé hkyi yu é nghut ri; haû mù, nga-nhûng gi, danggidiq byí tô é Woi-nyí haû lé, lumjîng myit mai wó yû râ nghut lhê.

Jep E Tarâ Eq Danggidiq

- ¹⁵ Gumang wuì ê, nyí wuì é asak duí hkyô má é lé dangtú yû mù, ngò nungmoq lé taí kôlé, byù mai chôm tô tô é dangshikaq lé, ó yuq èq le wó lhoq hpyoq pyám râ a nghut, ó yuq èq le haú má wó jat kat râ a nghut.
- ¹⁶ Abraham eq yhâng é awut ashín lé byi tô é danggidiq le haú eq rajung za nghut ri. “Awut ashín pé lé” gâ é dang gi, byù myo myo lé gâ lhê; nghut kôlhâng, haû Chyúmdang má, haû lé taí nau é a nghut e za, “náng é awut ashín lé”^h ga taí nau é ru nghut

^a 3:6 Apûn 15:6 ^b 3:7 Abraham é yhangzô pé gâ é gi, Garai Gasâng é yhangzô pé lé gâ é nghut lhê. ^c 3:8 Apûn 12:3 ^d 3:10 Tarâ Pun 27:26 ^e 3:11 Hbk 2:4 ^f 3:12 Nhong 18:5
^g 3:13 Tarâ Pun 21:23 ^h 3:16 Apûn 12:7, 13:15, 24:7

- lhê, haû é lichyúm gi, byù rayuq lé za taí é nghut lhê, haû gi, Hkrisduq
- ¹⁷ nghut ri; haû mù luí, ngò taí nau é gi, Garai Gasang, dangshikaq tô tô é htâng, myí sho sum xê zàn má lé joq é tarâ gi, dangshikaq haû lé le wó lhoq hpyoq pyám râ a nghut, dang-gidiq lé le wó lhoq htên pyám râ a
- ¹⁸ nghut. Hkâsu mù gâ le, haû silí wunlí gi, jep é tarâ eq séng lhúm é nghut jáng, danggidiq eq gi, haí le a sêng lhum lo nghut ri; nghut kôlhâng, Garai Gasang gi, Yhâng é jeju yanmai, Abraham lé danggidiq dông silí wunlí haû byí to bê nghut ri.
- ¹⁹ Haû su nghut jáng, haû jep é tarâ gi, hai akyû bò râ lhú? Haû gi, dang-gidiq dông lhoq âng tô é Awut ashín nghut é sù jé lé é hkún jé shoq, mara kut shut nyi bùm kô é yanmai, jat kat tô é nghut lhê; jep é tarâ haû gi, mau-mang lagyô pé mai gyoro sô xoq byi sù^a é loq dông byí tô é ru nghut lhê.
- ²⁰ Gyoro sô xoq byi sù gi, rahkyam shut mâ é bang eq baú sêng é a nghut, nghut kôlhâng, Garai Gasang gi, rayuq za nghut lhê.
- ²¹ Haû mù luí, jep é tarâ gi, Garai Gasâng é danggidiq pé eq htug htíng lhúm lhê lhú? Ratsuí le a nghut. Hkâsu mù gâ le, dui é asak wó byí é jep é tarâ lé byi to bê nghut le gi, gè gè yhang, dingmán hkyô gi, jep é
- ²² tarâ mai lò râ nghut lhê. Nghut kôlhâng, mingkan gón mâ é bang gi, yubak marâ é htongbyu pé chyat nghut akô ga Chyúmdang má bo tô ri; haû mù luí, haû byí to bê danggidiq lé gi, Yesuq Hkrisduq lé lumjínj é bang lé byi râ nghut lhê.
- ²³ Lumjínj hkyô haû a jé shimá, nga-nhúng gi, haû jep é tara èq htong-

- byù dông lhúng tô é hui luí, lumjínj hkyô haû htoq shit é hkún jé shoq myhí lhúng tô é hui wú bê nghut lhê.
- ²⁴ Haû mù luí, nga-nhúng gi, lumjínj é yanmai mara hkyut san byí é hui sháng gaq ga, jep é tarâ gi, nga-nhúng lé Hkrisduq chyáng shuí ê râ matú, nga-nhúng é hkyô-u shê sù dut bê
- ²⁵ nghut ri. Ahkuí kúm gi, haû lumjínj hkyô jé bê nghut é yanmai, nga-nhúng gi, haû jep é tarâ mai hkyô-u shê é loq hkaû má a nghut lo.

Garai Gasâng É Yhangzô Pé

- ²⁶ Nungmoq lhunglhâng bang gi, Hkrisduq Yesuq lé lumjínj é yanmai, Garai Gasâng é yhangzô pé nghut
- ²⁷ bê; Hkrisduq má wui-myhup hkám bê é bang nungmoq banshoq gi, Hkrisduq lé mebu su wut to bekô
- ²⁸ nghut ri. Nungmoq lhunglhâng bang gi, Hkrisduq Yesuq má rading ralhum za nghut é yanmai, Yudaq byù ngú é eq Grik nghu é, jùn nghu é eq lut-hkyô nghu é, yuqgè nghu é eq myiwe
- ²⁹ nghu é, a gam hkoq lo nghut ri. Nungmoq gi, Hkrisduq eq séng bekô nghut jáng, Abraham é awut ashín pé le, haû danggidiq eq rajung za silí wunlí hkam yù bang le, nghut akô nghut ri.
- 4** Ngò taí nau é lichyúm gi, haû amyû hkúng xoq dut râ sù gi, ikun sutzè banshoq lé sîng ang sù nghut kôlhâng, yhang, zoshâng nghut ashí hkún gi, jùn hpó eq haí a shaí
- ² nghut ri. Yhang gi, yhâng wa masat tô é ahkyíng jé shoq, yhang lé zúng é sù eq yhúm lé up su é a-ô
- ³ má ru lúng nyi ashí nghut ri. Haû eq rajung za, nga-nhúng le zoshâng^b nghut é hkún gi, mingkan uphkâng tarâ ô má jùn dut nyi é bang nghut

^a 3:19 Gyoro so xoq byi sù gi, Mosheq nghut ri. Yesuq lé a lumjínj shí é bang lé gâ lhê.

^b 4:3 Bun zo shí má, zoshâng gâ é lichyúm gi,

⁴ lhê. Nghut kôlhang, ahkyíng lo ngap jáng, zo dut râ ahkáng lé byíng shoq, nga-nhúng wó yû sháng gaq ga, Garai Gasang gi, jep é tarâ hkaú má
⁵ é byu pé lé hkyi yù râ matú, jep é tarâ hkaú má, myiwe mai hku kat nhang é Yhang Zo lé, nhang kat byi
⁶ bê nghut ri. Hkâsu mù gà le, nungmoq le, zo wuí nghut bê yanmai, “Aba, Áwa ê.” ga dat wut é, Yhang Zô é Woi-nyí lé, Garai Gasang gi, nga-nhúng é i-myt unghkaú má kat byi
⁷ bê nghut ri. Haú mù luí, nang gi, jùn a nghut lô e za, zo rayuq nghut bê nghut ri; nang gi, zo rayuq nghut é yanmai, Garai Gasang gi, nang lé Yhâng é amyû hkúng xoq dut nhâng bê nghut ri.

**Galatiq Mau Bang Lé Poluq
Myit Chiq Byí É Hkyô**

⁸ Hí hkûn, Garai Gasang lé nungmoq a sé shí é u lé, nungmoq gi, nat hparà lháng a nghut bâng é a-ô má jùn
⁹ dut é bang nghut ri. Ahkuí kúm, Garai Gasang lé nungmoq sé bê nghu é htoq agó, Garai Gasang gi, nungmoq lé sé bê nghut le nhîng, nungmoq gi, hkâsu mù, haú wum nyhôm é eq akyû a byí é, mingkan uphkan é tarâ shut dum lhing taú ló nyi akô lhú? Nungmoq gi, haú pê èq jùn zô
¹⁰ é dum hui zó nau akô lhú? Nungmoq gi, buinyi wú, lhohkyap wú, ahkyíng yam-yoq wú, zanwut wú é hkyô pé lé, ahkyak kut nyi ashí kó
¹¹ nhung! Nungmoq chyáng ngò wum kat pyâm é hkyô gi, akôm dut bê abe nghû, nungmoq é matú ngò myit chiq nyi ri.
¹² Gumang wui ê, ngò gi, nungmoq su dut bê nghut é yanmai, nungmoq le

ngò su dut keq^a nghû, nungmoq lé dúng tôngbán kat lhê. Nungmoq gi, ngo lé haí le a kut shut wú kô é
¹³ nghut lhê. Sâng-hí dàm ngò nungmoq lé gabú danglù hko kyo é hkyô gi, nungmoq sê é eq rajung za, ngò nò-
¹⁴ hpyo huí é yanmai nghut lhê. Ngá é nòhpyo gi, nungmoq é matú wuíhke hkyô dut kôlhang, nungmoq gi, ngo lé a wú tiq pyám kô é htoq agó, a wú chaq pyám kó e za, Garai Gasâng é maumang rayuq lé su le, Hkrisduq Yesuq lé su yhang le, ngo lé lhom hap
¹⁵ yù kô é nghut lhê. Haú sù é nhîng, nungmoq é gabú hkyô banshoq gi, haí dut byuq bekô lhú? Nungmoq gi, ru wó dut é nghut jáng, nungmoq é myoqjí lé choq yû mù, ngo lé wám byí pyám kó râ í dut laí lò bê hkyô
¹⁶ lé, ngò saksé wó hkâm lhê. Ahkuí, ngò gi, nungmoq lé haú tengmán hkyô taí kyô é yanmai, nungmoq é gyè dut to bê nghut lhê lhú?
¹⁷ Haú byù góbang gi, nungmoq lé gyai shirong é hkyô tún shit ri; nghut kôlhang, ge é hkyô haí a bò; yhangmoq ô nau é hkyô gi, yhangmoq lé nungmoq taú shirông kó abe ga, nungmoq lé ngamoq chyáng mai lhoq kâng
¹⁸ yù râ matú ru nghut lhê. Ge é hkyô lé shirong é gi, ge lhê; ngò eq rahá nyi é hkûn za a nghut, hkâ-nhám
¹⁹ le haú su shirong le ge lhê. Ngò chyitdap é zo wuí ê, Hkrisduq é a-kyang nungmoq má gumjup lo é jé shoq, ngò gi, zo hkû nò no é su
²⁰ radàm dum hkâm zô nyi luí, nungmoq é hkyô lé myit wuíhkê tô é yanmai, ahkuí, nungmoq eq rahá myang nyi mù, ngò taí é danghtê wó htaí râ matú, gyai yhang myoqbyu nyi lhê ô.

^a 4:12 Ngò su dut keq gà é lichyúm gi, nungmoq le ngò su jep é tarâ mai lut htoq keq gá nau é nghut lhê.

Hagara eq Sarah Nhik É Hkyô

- ²¹ Haû jep é tarâ ô má nyi nau é bang ê, nungmoq gi, jep é tarâ má taí é hkyô lé a sê gyo kô é nghut lhê lhu? Ngo lé
- ²² taí kyô wú kó laq. Hkâsu mù gà le, Abraham gi, yuqzo í yuq wó ri; rayuq gi, jùn myhí é yhangzo, rayuq gi, jùn myhí a nghut su é yhangzo, ga kâ tô ri.
- ²³ Haû jùn myhí é yhangzo gi, gungsho dông hku lé é sù nghut kôlhang, jùn myhí a nghut su é yhangzo kúm gi, danggidiq eq rajung za hku lé é sù ru nghut lhê.
- ²⁴ Haû hkyô pé gi, dangtú ru nghut lhê, myiwe haû í yuq gi, dangshikaq í lhum eq wuí lhê; dangshikaq ralhumi gi, Sinaq Bùm mâ é^a nghut luí, jùn dut râ nghut é zo wuí lé hku kat é Hagara lé taí nau é nghut ri. Hagara haû gi, Arabiq mau mâ é Sinaq Bùm lé taí nau é nghut luí, ahkui lhê é Yerusalem eq wuí nyi ri. Hkâsu mù gà le, Yerusalem haû gi, yhang zô pé eq rahá, jep é tara é jùn dut nyi kô é yanmai nghut
- ²⁶ lhê. Nghut kôlhang, ahtoq mâ é Yerusalem gi, jùn myhí a nghut sù nghut
- ²⁷ luí, nga-nhúng é ìnu nghut ri. Hkâsu mù gà le,
- “Zoshâng a hku é baùdung myhí ê, gabú nyí aq. Zo hkú nò a no wú shí é myiwe gi, gabú luí, gabú garú nyí aq; hkâsu mù gà le, haû cham-chyuiyui dut é myiwe myhí gi, làng wó é myiwê htoq má zo wuí je myô wó bê nghut ri.”
- ga kâ tô ri.^b
- ²⁸ Gumang wuí ê, ahkuí, nungmoq gi, Isak su, danggidiq byí tô é zo
- ²⁹ wuí nghut bê nghut ri. Haû hkún lé, haû gungsho dông hku lé lo é sù gi,

Woi-nyí wum-o dông hku lé lo é sù lé zing-rí ri. Haû eq rajung za, ahkuí

³⁰ le dut nyi ri. Nghut kôlhang, Chyúmdang má hkâsu ga kâ tô ri lhu gà le, “Haû jùn myhí eq yhangzo yuqzo lé hkat htoq pyám aq; hkâsu mù gà le, haû jùn myhí é yhangzo yuqzo gi, jùn myhí a nghut su é yhangzo yuqzo eq rahá, silí wunlí lé wó chôm hkam yù

³¹ râ a nghut.”^c gà ri. Haû mù luí, gumang wuí ê, nga-nhúng gi, jùn myhí é yhangzô pé a nghut e za, jùn myhí a nghut su é yhangzô pé ru nghut lhê.

Hkrisduq Má É Luthkyô

- 5** Nga-nhúng luthkyô wó râ matú, Hkrisduq gi, nga-nhúng lé lhoq lhut kat bê nghut ri. Haû mù luí, haû má ru gîng nyi mù, yhumsing gùng lé jun é wòlai hkaû má hkâtaû bainai nyi kó.
- ² Ngá dang lé matsîng yù keq! Ngò Poluq, nungmoq lé taí kyo kôlé, nungmoq ahpyo-kuq hpyit hkam yù kô é nghut jáng, Hkrisduq gi, nungmoq é matú hai akyû le bò kó râ a nghut.
- ³ Hau htoq agó, ahpyo-kuq hpyit hkam yu é sù ó yuq lé nghut kôle, ahpyo-kuq hpyit é sù gi, jep é tarâ lhunglhang lé châng kut râ lhê nghû, ngò kyô
- ⁴ kat lhê. Jep é tarâ châng shikut é dông mara hkyut san byí é hui naû bang, nungmoq gi, Hkrisduq eq gâng lhúm to bekô nghut luí, haû Garaí jeju mai le byit gyó byuq bekô nghut ri.
- ⁵ Ngamoq kúm gi, myit myoqbyu tô é dîngmán hkyô lé, haû Woi-nyí é yanmai lumjîng myit èq gyai yhang láng
- ⁶ nyi é bang nghut lhê. Hkâsu mù gà le, Hkrisduq Yesuq má gi, ahpyo-kuq hpyit é nghut nghut, ahpyo-kuq a hpyit é nghut nghut, hai akyû a bò

^a 4:24 Sinaq Bùm mâ é dangshikaq gi, jep é tarâ eq sêng é dangshikaq nghut lhê.

^b 4:27 Esai 54:1 ^c 4:30 Apùn 21:10

nghut ri; chytidap myit mai htoq lo é lumjng myit za sheq, akyû bo lhê.

- ⁷ Nungmoq gi, rago din wú bekô^a nghut é wá, haû tengmán hkyô lé a cháng sháng gaq ga, nungmoq lé ó yuq èq hkûm zing pyám kô é lhú?
- ⁸ Haû su kut mhoq hpyoq yu é hkyô gi, nungmoq lé ji yù Su chyáng mai htoq
- ⁹ lo é a nghut. “Mún ratsuí zo gi, muk long gón lé wó lhoq daû lhê.”^b gâ é
- ¹⁰ dang joq lhê. Nghut kôlhang, nungmoq gi, gotû hkyô dông a lhom yù kó râ nghut lhê nghû, Hkrisduq má hkyak ngò myit lum nyi lhê. Nungmoq lé lhoq byok byí é sù, ó yuq nghut kôle, yhumsing é mara eq rajung za
- ¹¹ dam byí é hui zo râ nghut lhê. Gumang wuì ê, ahpyo-kuq hpyit é hkyô lé, ngò rû hko nyi ashí nghut le gi, haí mù luí, zing-rí é lé ngò hui zô nyi râ lhú? Haû su kut é nghut jáng, haû tapzing eq séng luí, manghkáng
- ¹² joq râ a nghut lo. Nungmoq lé lhoq byok nyi é bang gi, hau htoq chyân luí, yhumsing gùng yhumsing banshoq hpyit pyám kó sháng gaq nghû, ngò wó myit ri.
- ¹³ Gumang wuì ê, nungmoq gi, lut-hkyô wó râ matú ji yù huí é bang nghut akô; nghut kôlhang, nungmoq é luthkyô ahkáng lé, yubak gungsho má hkâcháng nhâng kó, chytidap myit mai kúm gi, rayuq eq rayuq
- ¹⁴ dojaú lhûm nyi keq. Hkâsu mù gâ le, “Náng gûng lé nàng chytidap é su, náng é chyangnâm mâ é bang lé le chytidap aq.”^c gâ é hkunmó má za, jep é tarâ banshoq lo bo to
- ¹⁵ bê nghut lhê. Nungmoq, rayuq eq rayuq ngat lhum myui lhûm nyi kô é

nghut le gi, rayuq eq rayuq lhoq htên pyâm lhum kó râ nghut é lé, sidiq nyi keq.

Woi-nyí Èq Asak Dui Râ Hkyô

- ¹⁶ Nghut kôlhang, ngò taí kôlé, Woi-nyí shuí û é dông asak dui nyi keq; haû hkûn, nungmoq gi, yubak gungsho ô nau é hkyô cháng kó râ a
- ¹⁷ nghut. Hkâsu mù gâ le, yubak gungsho ô nau hkyô gi, Woi-nyí eq shai lhûm nyi; Woi-nyí gi, yubak gungsho ô nau hkyô eq shai lhûm nyi, dut ri. Haû í lhum gi, gyè dut lhûm ri; haû mù, nungmoq gi, yhumsing
- ¹⁸ ô nau é dông hkâkut kó. Nghut kôlhang, nungmoq lé Woi-nyí èq hkyô hí é nghut jáng, nungmoq gi, jep é tarâ ô má a nghut lo nghut ri.
- ¹⁹ Yubak gungsho é muzó gi, de de yhang nghut lhê; haû pé gi, ashop é dông gungsho zùm yap é hkyô, a sân-yúng é hkyô, shut é dông nyi zô
- ²⁰ lhûm nau é myit, hparà noq hkyô, myoqheq mù kut é hkyô, a jú é hkyô, byoq lhûm é hkyô, manon é hkyô, nhiksoq sup é hkyô, yhumsing wuí-zat é hkyô, gâng lhum sê é hkyô,
- ²¹ hpúng gam é hkyô, ningsû é hkyô, í shuq wut é hkyô, zo yê shuq yê mù achayut kut é hkyô pé eq haû pé su kut é gotû hkyô pé nghut ri; haû su kut nyi yap é bang gi, Garai Gasâng mingdán é silí wunlí lé wó hkam yù râ a nghut nghû, ngò, hí hkûn nungmoq lé taí wú bê eq rajung za, ahkuí lé, nungmoq lé ngò sidiq byí nyi lhê.
- ²² Nghut kôlhang, Woi-nyí é ashi gi, chytidap hkyô, gabú hkyô, nguingón hkyô, myit hîng hkyô, nhik-u nú é

^a 5:7 Rago din wú bekô gâ é gi, woi-nyí hkyô má kô myhang laí lò bê lé taí nau é nghut lhê.

^b 5:9 Shut é dông mhoqshit é hkyô ratsuí gi, muk long gón lé mún èq wó lhoq daû é su, nungmoq banshoq lé wó lhoq ngoq yu pyâm lhê. ^c 5:14 Nhung 19:18

²³ hkyô, ge é hkyô, lhumzui hkyô, nûm é hkyô, yhumsing gùng lé wó hkgang é hkyô pé nghut ri. Haú hkyô pé lé hkûm zing pyám rà tarâ haí le a joq
²⁴ nghut ri. Hkrisduq Yesuq eq séng bê bang kúm gi, yubak gungsho ô naù hkyô lé le, hau é yut yut ô naù myit eq shirong é hkyô pé lé le, tapzîng má jén
²⁵ sat pyám bekô nghut ri. Nga-nhúng gi, Woi-nyí mai asak duì bê nghut mù, haù Woi-nyí htâng châng nyí sháng.
²⁶ Nga-nhúng gi, akôm gyáng dang tai luí, rayuq eq rayuq jeq ho lhûm é eq manon lhûm é bang, a dut nyí sháng gaq.

**Lhunglhang Bang Lé, Ge É
Hkyô Kut Byi Râ Hkyô**

6 Gumang wuì ê, rayuq yuq gi, mara záng kut shut é nghut jáng, Woi-nyí wum-o bò bê bang nungmoq gi, nûm é myit èq haù yuq lé lhoq pun lhoq kyîng yù keq. Nghut kôlhang, nàng gi, gunglaù é a hui sháng gaq,
² sidiq nyí aq. Rayuq eq rayuq é wò-lai lé tê byí lhûm nyí keq; haù dông mai, nungmoq gi, Hkrisduq é tarâ lé
³ wó lhoq dik kó rà nghut lhê. Rayuq yuq gi, yhumsing gùng haí le a nghut é wá, ahkyak su ngam é nghut jáng, haù yuq gi, yhumsing gùng lé mhaù
⁴ pyâm é sù nghut ri. Yuq hkgangmó gi, yhumsîng nyí yap é hkyô lé taù myit wú keq; haù hkûn, yhumsing gùng lé góbang eq whuí nó a rà e za, yhum-sing gùng má aróng wó yù rà nghut
⁵ lhê. Hkâsu mù gà le, yuq hkgangmó gi, ó le ô wò lé wùn waq ra rà dut lhê.
⁶ Haù mungdang lé mhoq yu é sù gi, mhoqshit byi sù lé, ge é zè banshoq gàm byi sháng gaq.
⁷ Garai Gasang lé gi, wó rhoí rà a nghut, yhumsing gùng yhumsîng mhauzô é hkâhui nhâng kó; byù gi, hô

kat é eq rajung za, shù yù rà nghut lhê.
⁸ Haù yhumsing é yubak gungsho lé lhoq ngón rà matú hô kat é sù gi, myit haù mai htên byoq é hkyô lé myang hkam yù rà nghut lhê; haù Woi-nyí lé lhoq ngón rà matú hô kat é sù kúm gi, Woi-nyí haù mai ahtum abyuq é asak lé myang hkam yù rà nghut lhê.
⁹ Nga-nhúng gi, ge é hkyô kut é má nú byuq é bang a dut sháng gaq, hkâsu mù gà le, haù lé nga-nhúng a tô pyâm é nghut jáng, ahkyíng yam-yoq jé é hkûn, nga-nhúng gi, akyú myang
¹⁰ hkam yù rà nghut lhê. Haù mù luí, nga-nhúng gi, kut rà ahkyíng wó tô é u lé, byù lunglhang bang lé ge é hkyô kut byi sháng, haù lumjîng hkyô eq séng é ikun byu pé lé, je riyhang kut byi sháng.

**Ahpyo-kuq Hpyit É Hkyô A Nghut E
Za, Byù Sik Hpân Huí É Hkyô**

¹¹ Ngò, nungmoq lé, ngá é loq èq hkâ-í kô é laiká cham kê kat byí é lé, wú wú keq!
¹² Ahtoq pyâm za ge é hkyô lé kut shit nau é bang gi, ahpyo-kuq hpyit kó sháng gaq ga, nungmoq lé zik shikut nyí é bang nghut akô; yhangmoq haù su kut é hkyô gi, Hkrisduq é tapzîng é yanmai zing-ri huí é hkyô lé, koi pyám
¹³ rà matú za nghut ri. Hkâsu mù gà le, haù ahpyo-kuq hpyit é bang lhang jep é tarâ lé a cháng kó nghut ri; nghut kôlhang, yhangmoq gi, nungmoq é gungsho eq séng luí wó gumrông kó sháng gaq ga, nungmoq lé ahpyo-kuq
¹⁴ hpyit nhâng nau akô nghut ri. Ngò kúm gi, nga-nhúng é Yhumsîng Yesuq Hkrisduq é tapzîng eq séng luí gum-rong é mai lai luí, haí má le a gumrông sháng gaq; Yhang é yanmai, mingkan gi, ngá é matú jén sat é hui bê; ngò gi, mingkân é matú jén sat é hui bê

- ¹⁵ nghut lhê. Ahpyo-kuq hpyit é hkyô nghut nghut, a hpyit é nghut nghut, hai akyû a bò; byù sik hpân huí é hkyô
- ¹⁶ za sheq, ahkyak é nghut lhê. Tarâ haù lé châng é lhungháng bâng é ahtoq má le, haù Garai Gasâng é Israelaq byu pé^a é ahtoq má le, nuingón hkyô eq shogyo nhikmyin hkyô gi, ru joq nyí sháng gaq ô.
- ¹⁷ Ahkuí mai gi, ó yuq le ngo lé jam-jau a lhoq htoq byi lo sháng gaq; hkâsu mù gâ le, ngò gi, Hkrisduq é dui-nhâng zoshâng nghut é saksé damhkô lé wun wún lhê.
- ¹⁸ Gumang wuì ê, nga-nhûng é Yhum-sîng Yesuq Hkrisduq é jeju gi, nung-moq é woi-nyí eq ru joq nyí sháng gaq. Amen.

^a 6:16 Bun zo shí lhum mâ é *Israelaq byu pé gâ* é gi, hpúng byû wuì banshoq lé táí nau é nghut lhê.

EHPESU

Pê Chyáng Hun Kat é Laiká

(Ephesians)

1 Garai Gasang ô nau é eq rajung za, Hkrisduq Yesuq é lagyo nghut sù, ngò Poluq gi, Ehpesu myuq má nyi é, Hkrisduq Yesuq má lhumzui bang nghut é, haù sên-yúng bâng chyáng ngingón dang shit kyô kat lhê.

² Nga-nhông é Îwa Garai Gasang eq Yhumsîng Yesuq Hkrisduq chyáng mâ é, jeju eq ngingón hkyô gi, nungmoq chyáng ru joq nyí sháng gaq ô!

Hkrisduq Mã É, Woi-nyí Hkyô Shimân Jeju Pé

³ Mauhkûng htoq tsáng myhâng má, woi-nyí hkyô eq sêng é shimân jeju jung hkgangmó lé, Hkrisduq má nga-nhông lé shimân byi sù, nga-nhông é Yhumsîng Yesuq Hkrisduq é Yhângwa, Garai Gasang ⁴ gi, hkungsô wó nyí sháng gaq. Hkâsu mù gâ le, nga-nhông gi, Garai Gasâng é hí má, chyoiyúng é bang eq mara a bo é bang dut râ matú, Garai Gasang gi, mingkan lé a hpân shi mai, Hkrisduq Yesuq má nga-nhông ⁵ lé hkyin yu to bê nghut ri. Hau htoq agó, Yhang, nga-nhông lé chyt-dap é yanmai, Yhang myit ngui ô nau é eq rajung za, Yesuq Hkrisduq mai yhangzô pé kut yu râ matú, hí mai nga-nhông lé masat to bê ⁶ nghut ri. Haù mù, Yhang chyt-dap é Sù^a má, nga-nhông lé laí laí byi bê nghut é, hpungwup shing-kang bo é jeju chyunghuq lé, chôm ⁷ hkya-on sháng. Garai Gasâng é agùn agó é jeju yanmai, nga-nhông mara

hkyut byí é hui luí, Yhang Zô é sui dông mai, nga-nhông gi, Yhang má hkyi yù hkyô wó yu é ⁸ nghut lhê. Jeju haù lé gi, hpaqchyí byéng-yá eq sê gyô é nyan ban-shoq le kut, Yhang, nga-nhông lé ⁹ agùn agó byi bê nghut lhê. Garai Gasang gi, Yhang myit ngui é eq rajung za, Hkrisduq dông mai kut râ matú hen to bê nghut é, Yhâng é zaú tô é hkyô lé, nga-nhông lé shit ¹⁰ bê nghut ri. Sê gyo wui é hkyô haù gi, lhoq dik râ ahkyíng jé jáng, mauhkûng htoq eq myigùng htoq mâ é lhunglháng lé, Hkrisduq má rading ralhum za kut râ nghut é hkyô nghut lhê.

¹¹ Hkrisduq má sâng-hi myit myoqbyù bang nghut é nga-nhông gi, Yhâng é hpungwup shingkan lé hkya-on ¹² kungtôn sháng gaq ga, Garai Gasang gi, Yhang myit sôn tô é lhunglháng lé ban kut mù, Yhâng ô nau é dông, hí mai myit hpyit doqdân to bê eq rajung za, nga-nhông lé le, Hkrisduq ¹³ má hkyin yu to bê nghut ri. Hau htoq agó, nungmoq le, nungmoq é hkyi yù hkyo é gabú danglù gâ é tengmán mungdang lé wó gyo kô é hkûn, Hkrisduq eq sêng é bang dut bekô nghut ri. Nungmoq gi, Hkrisduq lé lumjín bekô nghut é yanmai, haù gidiq byí tô é Chyoiyúng Woi-nyí dizik ¹⁴ htúng tap byí é hui bekô nghut ri. Garai Gasâng é hpungwup shingkan lé hkya-on râ matú, Yhang eq sêng é byu pé hkyi xe yù huí é hkyíng jé shoq,

^a 1:6 Yhang chyt-dap é Sù gâ é gi, Yesuq lé taí nau é nghut lhê.

Choyiyúng Woi-nyí haû gi, nga-nhûng é muizè lé hkyak wó yû râ nghu é masat nghut ri.

Poluq Kyûdung Byí É Hkyô

- ¹⁵ Haû mù luí, Yhumsíng Yesuq lé nungmoq lumjínng é hkyô eq sân-yúng bang lhungháng lé nungmoq chyt-dap é hkyô lé, ngò wó gyô é yanmai, ¹⁶ ngò gi, ngá é kyûdung dang má nungmoq lé myit bun uchyang, anum yhang, nungmoq é matú jeju hkyá-ôn ¹⁷ nyi lhê. Nga-nhûng é Yhumsíng Yesuq Hkrisduq é Garai Gasang nghut é, hpungwup shingkang bò sù haû Íwa gi, Yhang lé nungmoq je sé râ matú, hpaqchyí byéng-yá wó byí é eq san za wó sé nhang é Woi-nyí, nungmoq lé byi sháng gaq nghû, ngò, ¹⁸ Yhâng chyáng dúng nyi lhê. Hau htoq agó, Yhang, nungmoq lé ji yu é myit myoqbyù hkyô, hkasû é nghut é lé le, Yhâng é hpungwup shingkang bo é muizè gi, sân-yúng bâng chyáng agùn agó joq nyi é hkyô lé le, Yhâng é kô dik é a-tsam mó gi, lumjínng bang nga-nhûng é matú nghut é lé le, ¹⁹ nungmoq wó sé râ matú, nungmoq é myit myoqjí lhoq gyeng byí é hui sháng gaq nghû, ngò kyûdung byí nyi lhê. A-tsam mó haû gi, Garai Gasang, Hkrisduq lé shi é mai lhoq dui toq ²⁰ yû mù, mauhkûng htoq tsáng myhâng má, Yhâng é loqyò hkyam shut zùng nhang é hkûn, chung é wum-o a-tsam ²¹ mó eq rajung za nghut ri. Hkrisduq gi, uphkanng é, ahkáng ayá wó é, a-tsam bo é eq up zô é bang banshoq htoq má le, ahkuí pyat eq htang pyat má myhíng é myíng lhungháng é htoq ²² má le, je gyaú é sù nghut lhê. Hau htoq agó, Garai Gasang gi, lhungháng lé Yhâng é hkyiwa ô má tô to luí, haû noqkuq hpûng é matú,

Yhang lé, jung hkanngmó é ushuq dut ²³ râ dông masat to bê nghut ri. Noqkuq hpúng haû gi, Hkrisduq é gungdu nghut luí, hkyô hkanngmó má jung hkanngmó lhoq byíng jup é Hkrisduq byíng nyi é nghut ri.

Hkrisduq Má Asak Dui É Hkyô

- 2** Laí ló bê hkûn, nungmoq gi, tarâ lu laí é eq mara kut shut é hkyô pé é yanmai, shi tô é bang dut kô é nghut ² lhê. Haû hkûn, nungmoq gi, mingkan ngón hkyô pé má lhaq châng nyi kô é htoq agó, haû tarâ a cháng bâng é myit má ahkuí mù zuí nyi é sobyô nghut é, maulat lé up sù htang châng ³ nyi kô é bang nghut lhê. Nga-nhúng banshoq bang le, yhangmoq su kut nyi laí lo é bang chyat nghut mù, yubak mara byíng é suisho ô naù gadaú hkyô má nyi é bang nghut é htoq agó, gungsho ô nau é hkyô pé eq myit é hkyô pé dông za châng wú é bang nghut lhê. Haû mù, góbang eq rajung za, nga-nhúng gi, Garai Gasang é nhikmo-yo hkyô eq gingdán ⁴ wú é bang chyat nghut lhê. Nghut kô-lhang, shogyo nhikmyin myit gyaí bo é Garai Gasang gi, nga-nhúng, tarâ lu lai luí shi byuq bê bang dut kô-lhang, Yhâng é chyt-dap myit mó eq, nga-nhúng lé chyt-dap luí, Hkrisduq eq rahá asak dui nhâng bê nghut ri. ⁵ Haû mù, nungmoq gi, Garaí jejú eq ⁶ za hkyi yu é hui bekô nghut ri. Garaí Gasang gi, Hkrisduq Yesuq má, nga-nhúng lé, Yhâng é ge é hkyô shit bê nghut mù, a ung taí é Yhâng é jeju lé, htang pyat má wó shit sháng ⁷ gaq ga, nga-nhúng lé, Hkrisduq eq rahá lhoq dui toq yû mù, mauhkûng htoq tsáng myhâng má, Yhang eq rahá ⁸ zùng nhang to bê nghut ri. Hkâsu mù gâ le, nungmoq gi, lumjínng é dông mai

Garai jejú èq za hkyi yu é hui bekô nghut ri. Haú gi, nungmoq chyáng má é a nghut, Garai Gasâng jeju chyung-
 9 huq za ru nghut lhê. Haú gi, yhumsing é muzó mai wó é a nghut é yanmai, ó
 10 yuq le nghutbun râ hkyô a joq. Hkâsu mù gâ le, nga-nhúng gi, Garai Gasâng é loqmú pé nghut mù, nga-nhúng zui saí râ matú, hí hí mai, Garai Gasang hen lajâng tô é ge é muzó pé lé zui saí râ matú, Hkrisduq Yesuq má hpan to hui bê bang nghut lhê.

Hkrisduq Má Rading Ralhum

11 Haú mù luí, nungmoq gi, hí hkûn, hku lé lo é mai yhang tungbaù pé nghut é hkyô lé le, byu loq èq za gungsho má kut é, “ahpyo-kuq hpyit hkâm bang” gâ é bang mai, nungmoq lé, “ahpyo-kuq hpyit a hkâm bang” ga
 12 byi kô é hkyô lé le, myitbun keq. Haú u lé, nungmoq gi, Hkrisduq eq gâng lhúm tô é bang; Israelaq mingbyû a nghut é bang; danggidiq eq sêng é dangshikaq pé má gó ming byù nghut é bang; mingkan htoq má, myoqbyù jowò a joq é eq Garai a wó é bang
 13 nghut é lé, myitbun keq. Nungmoq gi, hí hkûn wê gâng nyi é bang nghut kôlhang, ahkuí kúm, Hkrisduq é sui dông mai Hkrisduq Yesuq má shuí chyâng htep é hui bekô nghut ri.
 14 Hkâsu mù gâ le, Yhânggùng yhang gi, nga-nhúng é nguingón hkyô nghut ri. Yhang gi, gyoro má kyo tô é madin nghut é a naù a wom hkyô lé hpyoq hpyi pyám byi luí, haú í myû^a dut nyi é lé, rahú za dut nhâng bê nghut ri.
 15 Haú hkunmó pé eq hkang tô é tarâ pé bo é jep é tarâ lé, Yhâng é gungsho má lhoq htúm pyám bê nghut ri. Haú mù, Yhang ô nau é hkyô gi, haú í

myû dut tô é lé, Yhânggùng má yhang, byù sik ra-myû za hpan to râ matú nghut ri; haú dông, simsaq hkyô kut
 16 byi bê nghut ri. Yhang gi, a naù a wôm lhúm é hkyô lé, haú tapzîng má lhoq htúm pyám byi mù, haú tapzîng dông mai, byù myu í myu é lé raggùng za kut luí, Garai Gasang eq xoq
 17 byi bê nghut ri. Yhang gi, wê gâng nyi é bang^b nungmoq lé le, chyâng htep nyi é bang^c lé le, simsaq hkyo é
 18 danglù lé hko kyo bê nghut ri. Hkâsu mù gâ le, nga-nhúng í myû gi, Yhang dông mai, Woi-nyí ralhum zâ èq, haú Íwâ chyáng wàng râ hkyô dong bê nghut ri.
 19 Hau é yanmai, nungmoq gi, tungbaù pé eq byù bíng pé a nghut lô é za, Garai é byu pé eq rahá, mingbyû wui eq yhumbyù wui chyat nghut bekô
 20 nghut luí, haú lagyô pé eq myiqhtoí pé, hi tô é apûn awang htoq má xuq tô é bang chyat nghut akô; Hkrisduq Yesuq yhang, haú má é ahkyak é htungchyûn luqgok dut bê nghut ri.
 21 Yhang má, wahpang lhum gón xoq lhúm bùm é nghut mù, haú Yhumsing má chyoiyúng noqkuq yhúm ra-
 22 lhum dut lò bê nghut ri. Woi-nyí dông mai, Garai Gasang nyi râ jang dut râ matú, nungmoq le, Yhang má, wahpang su tsuq é chôm huí nyi bùm bekô nghut ri.

Poluq, Tungbaù Pê É Tarâ Hkô Sará

3 Haú su nghut mù, Hkrisduq Yesuq é hkyô lé, nungmoq tungbaù pé chyáng hko kyô é yanmai, htongbyû dut sù, ngò Poluq gi, nungmoq é matú kyûdung byí lhê.

² Nungmoq lé dojaú râ é matú, ngo lé byí tô é Garai Gasâng jeju ayá shí

^a 2:14 *I myû gâ é gi, Israelaq byu pé eq tungbaù pé lé gâ lhê.* ^b 2:17 *Wê gâng nyi é bang gâ é gi, tungbaù pé lé gâ lhê.* ^c 2:17 *Chyâng htep nyi é bang gâ é gi, Israelaq byu pé lé gâ lhê.*

lé, nungmoq gè gè wó gyô wú bekô râ
³ nghut lhê. Haû gi, hí hkûn, ngò, tot é
 dông kê tô wú bê eq rajung za, haû
 zaú tô é hkyô lé, shing-rán dông ngo
⁴ lé sé nhang é nghut ri. Haû hkyô lé,
 nungmoq nghap wú é hkûn, Hkrisduq
 eq sêng é zaú tô é hkyô, ngò rago
 sê é lé, nungmoq wó sé kó râ nghut
⁵ lhê. Haû lé, laí lò bê ipyat pé mâ é
 byu pé lé a sé nhang é nghut kôlhang,
 ahkuí gi, Garai Gasâng é chyoiyúng
 é, lagyô pé eq myiqhtoí pé lé, haû
 Woi-nyí èq hpông shit bê nghut ri.
⁶ Zaú tô é hkyô haû gi, gabú danglù
 dông mai, Hkrisduq Yesuq má, Isra-
 elaq byu pé eq rahá, tûngbaù pé le,
 hkûng xoq bang wó dut luí, gungdu
 ralhúm é gungsho showui showang pé
 chyat dut é eq, danggidiq byi tô é lé
 wó chôm hkam yu é bang dut é hkyô
 nghut ri.
⁷ Yhâng é hpungwup a-tsam mai, ngo
 lé byí tô é Garai Gasâng jeju chyung-
 huq é yanmai, ngò gi, gabú danglù shí
 taí râ dui-nhâng zoshâng dut é nghut
⁸ lhê. Ngò gi, haû Garai Gasâng é byu
 pé mâ é tiq dik sù htoq má lhang je
 tiq sù nghut kôlhang, haû Hkrisduq é
 a ung htoq taí é wó sùt hkyô lé, tûng-
 baù pé chyáng hko kyo râ matú le,
⁹ haû lhunglhang lé hpan é Garai Ga-
 sang má, laí lò bê ipyat pé má zaú tô
 é, zaú tô é hkyô haû lé hkâsù kut tô é
 lé, yuq hkanmó lé taí sân kyo râ matú
¹⁰ le, jeju shí, ngo lé byi bê nghut ri. Haû
 gi, nga-nhûng é Yhumsîng Hkrisduq
 Yesuq má lhoq pán bê nghut é, Yhang
 ahtum abyuq myit hpyit tô bê eq ra-
¹¹ jung za, haû Garai Gasâng é hpaqchyí
 mó góng lé, noqkuq hpúng dông mau-
 hkûng htoq tsáng myhâng mâ é up-
 hkâng bang eq ahkáng ayá wó bang
 lé, ahkuí sé nhâng râ matú nghut lhê.
¹² Nga-nhúng gi, nga-nhûng é Yhumsîng

Hkrisduq Yesuq eq rading ralhum za
 nghut é yanmai le, Yhang lé lumjîng
 é yanmai le, Garai Gasang chyáng,
 wám é myit eq a gyuq a wàm é myit
¹³ èq wó htep ê é nghut lhê. Haû mù
 luí, ngò, nungmoq lé dúng tôngbán
 nau é gi, nungmoq é matú, ngò wuî-
 hke jamjau hui zô é yanmai, nung-
 moq i-myt hkâgyui kó; haû gi, nung-
 moq é matú akyú bò râ hkyô nghut
 lhê.

Ehpesu Myuq Byu Pé Lé Kyúdung Byí É Hkyô

¹⁴ Haû pé é yanmai, ngò gi, haû Íwâ
 é hí má hkyihput htuq luí kyúdung
¹⁵ é nghut lhê. Mauhkûng eq myigùng
 htoq mâ é Yhâng é ikun byú lhung-
 lhang gi, Yhâng chyáng mai myîng
¹⁶ wó yu é chyat nghut lhê. Nungmoq é
 lumjîng myit mai, nungmoq é i-myt
 unghkaú má Hkrisduq wó nyi nyí
¹⁷ sháng gaq nghû, Yhang é hpungwup
 shingkang bo é agùn agó wó sùt é
 mai, nungmoq é i-myt unghkaú mâ é
 sù lé, Yhâng é Woi-nyí dông, hpung-
 wup a-tsâm èq wum-o lhoq kîng byi
 râ matú, ngò kyúdung byi lhê. Hau
 htoq agó, nungmoq gi, chyitdap myit
 má amyit chin to luí, awang hi to mù,
¹⁸ sân-yúng bang eq rahá, hau é apyí,
 a-tsûng, myhâng, nik, hkâ-í nghut é lé,
¹⁹ rago wó sé kôluí, Garai Gasâng é gum-
 jup é hkyô lhunglhang èq wó lhoq
 gumjup yù kó sháng gaq nghû, sê é
 nyan htoq má gyaú é Hkrisduq é
 chyitdap hkyô lé, nungmoq wó sé râ
 matú, ngò kyúdung byi lhê.
²⁰ Ahkuí, nga-nhûng é hkaú má mù
 zuí nyi é, Yhâng é wum-o a-tsâm é
 yanmai, nga-nhúng dúng é banshoq
 eq myit é hkyô lhunglhang htoq je
²¹ wó kut byí é Su chyáng, haû noqkuq
 hpúng é yanmai le, Hkrisduq Yesuq é

yanmai le, pyat pyat zaí zaí, ahtum abyuq, hpungwup shingkang rû bo nyì sháng gaq ô! Amen.

**Hkrisduq É Gungdu
Má Rading Ralhum Za**

- 4** Haû mù luí, nungmoq gi, nungmoq lé wut yù bê nghut mù, wut yu é hkyô eq gingdán é dông asak duì keq nghû, haû Yhumsing é yanmai, htóng lúng sù ngò Poluq gi, nungmoq lé lhoq pun lhoq kyîng kat lhê.
- ² Hkyô hkat hkanmó má i-myt lhoq nyhum é eq i-myt nú-nhâm nyì keq; myit hing é eq chyitdap myit mai rayuq eq rayuq hkam jân lhûm nyì keq.
- ³ Haû Woi-nyí èq byí é myit hui hkyô lé, nguingón hkyô dông mai châng nyì râ matú, wó dut é í shikut nyì
- ⁴ keq. Nungmoq gi, wut yù hui kô é hkûn, myit myoqbyù hkyô rashut za wut yù hui bekô nghut é eq rajung za, gungdu ralhum eq Woi-nyí ralhum za
- ⁵ nghut nyi ri. Yhumsing rayuq za, lumjîng hkyô rahkat za, baptisma ralhum
- ⁶ za nghut nyi ri. Banshoq bâng é Îwa nghut sù Garai Gasang le, rayuq za nghut nyi ri; Yhang gi, banshoq bâng é ahtoq má nghut luí, lhunglháng dông mai mô kut é eq lhunglhâng é ahkaû má lúng nyí sù nghut ri.
- ⁷ Nghut kôlhâng, nga-nhúng yuq hkanmó gi, jeju chyunghuq lé, Hkrisduq mai ké byí é dông wó yu é
- ⁸ nghut lhê. Hau é yanmai,
“Yhang gi, myhang é jowò shut doq ló é hkûn, shúm zung é bang lé gi, shuí chûng mù, byu pé lé gi, chyunghuq tsing gâm byí ri.”^a
ga, Chyúmdang má tai tô é nghut lhê.
- ⁹ Haû “doq ló” gâ é lichyúm gi, myi-

gùng é a-o tsáng má le, Yhang gyó jé bê nghut lhê, gá naû é a nghut lhi?

- ¹⁰ Haû gyó lé é Sù gi, junghkang jungmó lé lhoq byíng jup râ matú, mauhkûng banshoq é ahtoq má doq ló é Sù yhang
- ¹¹ nghut lhê. Yhang gi, ra-am lé, lagyô pé, ra-am lé, myiqhtoí pé, ra-am lé, gabú danglù hko kyo râ bang, ra-am lé, hpúng-up pé eq sará pé kut tsing
- ¹² byí to bê nghut ri. Haú bang gi, Garai Gasâng é byu pé lé wùn waq âng é muzó pé é matú, hen lajâng é bang nghut ri. Haú hkûn sheq, Hkrisduq é
- ¹³ gungdu gi, haû lumjîng hkyô eq Garai Gasâng é Yhangzo lé sê é hkyô má, nga-nhúng banshoq bang rading ralhum za wó dut mù, kô dîng bang dut luí, Hkrisduq é gumjup é isâm banshoq lé wó yu é hkûn jé shoq, wó kô jat nyì râ nghut lhê.
- ¹⁴ Haû mù, nga-nhúng gi, wuibaù pé èq hí shut htâng shut bat myhû é su dut é eq, byu pé é agè ashop é eq haq dâ é mhoq hpyoq hpaqchyí pé eq mhoqshit hkyô laidun hkanmó eq, shí shut hé shut mut tâng é su dut é lé hui zô é zoshâng wui su a nghut lô é
- ¹⁵ za, chyitdap myit mai tengmán é dang lé tai nyì jáng, Hkrisduq nghu é ulhum má hkyô hkanmó kô myhang lò râ
- ¹⁶ nghut lhê. Yhang dông mai, gungdu gón gi, ralhum eq ralhum htuqbâng é gungsho showui showang pé lé xoq byí to bê nghut mù, gungsho showui showang haú pé gi, yhumsing é muzó lé zui saí nyi é nghut jáng, gungdu haû gi, chyitdap myit má, yhanggùng yhang kô lò myhang lò râ nghut lhê.

Byù Sik Dông Asak Duì Râ Hkyô

- ¹⁷ Haû mù luí, haû Yhumsing é ahko ahkáng mai ngò nungmoq lé tai nau é

^a 4:8 Hkya-on 68:18

hkyô gi, haû tûngbaù pé gi, akyû a bo é lé myit mù, asak ùi kô é su, nungmoq gi, hkâkut kó. Yhangmoq gi, sê gyô é nyan chut byuq bekô nghut é eq yhangmoq myit htan nyi kô é nghut mù, haî le a sé kô é yanmai, Garai Gasang byî é asak eq wê gânq byuq

¹⁸ bekô nghut ri. Yhangmoq gi, gyuq hoq hkyô a bo byuq lo kô é yanmai, myoqnoq myit dông a sansêng é hkyô jung hkangmó lé je wó kut xoq nyi shoq ga, yhumsing gùng lé, gungsho ô naù gadaù é hkyô má ap pyám bekô nghut ri.

²⁰ Nungmoq kúm gi, Hkrisduq é hkyô lé haù dông mhoq yû kô é a nghut.

²¹ Nungmoq gi, Yesuq chyáng mã é tengmán hkyô dông, Yhâng é hkyô lé wó gyô wú é eq mhoq yu wú bekô nghut

²² lhê. Haù mù, nungmoq gi, hí hpyang lhê é nungmoq é nyi yap sâmlai nghut é, ô naù gadaù luí, yhumsing gùng yhumsing mhaù pyâm é dông htên byoq ló nyi é nungmoq é byù xau lé

²³ tô pyám rà matú mhoq yû bê eq rajung za, nungmoq é i-myt lé asik htaî

²⁴ pyám nhâng keq; hau htoq agó, nungmoq gi, tengmán é eq sêng é dingmán hkyô eq chyoiyúng hkyô má, Garai Gasang eq dù shoq hpan to hui bê nghut é byù sik lé, yu wut to keq.

²⁵ Haù mù, nga-nhúng banshoq bang gi, gungdu ralhú é gungsho showui showang pé chyat nghut é yanmai, nungmoq yuq hkangmó gi, mhaù é hkyô lé tô pyám luí, yhumsing é chyangnâm mã é sù lé, tengmán é

²⁶ dang taí ra rà nghut lhê. “Nungmoq nhikjum yô é hkûn, mara hkâkut kó.”^a nungmoq gi, bui wàng shoq

²⁷ nhikjum hkâyô nyi kó. Nat Tsadán lé

²⁸ le, jowò hkâbyi kó. Hkâu sù gi, a dum

hkâu lo sháng gaq; rà nyi é bang lé, rajung jung wó gâm byi shoq, yhumsing é loq èq akyû bo é hkyô pé lé kut nyi luí, muzó zuí shikut ra rà nghut lhê.

²⁹ Nungmoq é nhut mai agè agaú é dang haî le hkâhtoq nhâng kó; wó gyô é bang akyû bò shoq, yhangmoq rà tô é má cháng luí, haù bang kô lam lò rà

³⁰ dang za taí keq. Haù hkyi yù rà buinyi é matú, dizik dông nungmoq lé tap to byî é Garai Gasang é Chyoiyúng

³¹ Woi-nyí lé hkâlhoq yón kó. Haù myit tot é, nhikjum yô é, nhik-yô é, byoq lhum byoq cheq é eq lumù gansang é, agè agaú é hkyô pé banshoq lé, nungmoq tô pyám keq. Nungmoq gi, rayuq eq rayuq, ge é hkyô eq shogyo nhikmyin é hkyô tûn shit lhum luí, Garai Gasang gi, Hkrisduq mã, nungmoq lé mara hkyut byî é su, nungmoq yhangchang le mara hkyut byî lhûm nyi keq.

5 Haù mù, nungmoq gi, chyitdap dik é zoshâng wuì nghut é yanmai, Garai Gasang lé alik yu é bang

² kut keq. Hkrisduq gi, Yhânggùng lé namngón jung hkungga eq shigu hkungga dông, nga-nhúng é matú Garai Gasang chyáng Yhânggùng yhang ap byî pyám shoq, nga-nhúng lé chyitdap é su, nungmoq le chyitdap myit èq asak ùi nyi keq.

³ Hau htoq agó, ashop é dông gungsho zùm yap é hkyô, a sansêng é hkyô hkangmó eq myoqnoq é hkyô pé lé, nungmoq taí lháng hkâtaí kó; hkâsu mù gâ le, nungmoq gi, Garai Gasang

⁴ é chyoiyúng byu pé nghut lhê. Haù eq rajung za, a taí gíng é, ahoq ahí dang, dangsôm eq hkunchoq dông gyâ é dang pé lé a taí é za, jeju hkyá-on

⁵ dang za taí nyi keq. Hkâsu mù gâ le,

^a 4:26 Hkya-on 4:4

- ashop é dōng gungsho zùm yap é hkyô kut shut sū, a sansêng é sū eq hparà noq é sū nghut é myoqnoq sū ó yuq nghut kôlhang, Hkrisduq eq Garai Gasâng é mingdán má muizè a wó é hkyô⁶ lé, nungmoq sê nyi keq. Ó yuq nghut kôle, dangsôm^a dōng mai nungmoq lé a wó mhaú kó sháng gaq; hkâsu mù gâ le, haú hkyô pê é yanmai, Garai Gasâng é nhikmo-yo hkyô gi, haú jìno a gyo bâng é ahtoq má jé râ nghut lhê.
- ⁷ Haú mù luí, haú bâng chyáng hkâbo wang lòm kó.
- ⁸ Hkâsu mù gâ le, nungmoq gi, hí hpyang mauchut tuq dut é bang nghut lhê; nghut kôlhang, ahkuí gi, haú Yhumsîng má maubó pé nghut bekô⁹ nghut ri. Haú Yhumsîng ô nau é hkyô haí nghut é lé ho htoq yû mù, maubó é¹⁰ yhangzô pé dōng asak dui keq. Hkâsu mù gâ le, haú maubó é ashi gi, ge é hkyô banshoq, dingmán é hkyô eq¹¹ tengmán hkyô chyat nghut ri. Haú ashi a zuí é mauchut tuq muzó má a bo wang lom é za, yhangmoq é mara¹² lé tân shit keq. Hkâsu mù gâ le, haú jìno a gyo bang haq zaú kut é hkyô lé gi, taí htoq le lháng hoq hpo nghut ri.
- ¹³ Nghut kôlhang, junghkang jungmó lé, haú maubó èq tân shit jáng gi, wó byu-myang é chyat dut râ nghut lhê.
- ¹⁴ Hkâsu mù gâ le, junghkang jungmó lé byu-myàng nhang é gi, maubó nghut ri. Hau é yanmai,
- “Yhup ngón nyí sū ê, toq aq, haú shi é mai dui toq aq hkoi; haú jáng, Hkrisduq gi, nang lé duqbó byi râ nghut lhê.”^b
- ga luí taí tô é nghut lhê.
- ¹⁵ Haú mù luí, nungmoq hkâsu kut asak dui é hkyô má gyai sidíq nyi keq; hpaqchyí a bò bang su a nghut é za,

- hpaqchyí bò bang su kut nyí keq.
- ¹⁶ Buinyí ahkyíng shí pé gi, agè ashop é yanmai, wó é ahko ahkáng ban-shoq lé ge dik é dōng chung jài keq.
- ¹⁷ Hau é yanmai, byù ngok pé a dut é za, haú Yhumsîng ô nau é hkyô gi, haí nghut é lé, sê gyô yu nyi keq.
- ¹⁸ Haú acháq achyut é yubak hkyô lhoq htoq é í lé hkâshuq wut kó; Woi-nyí¹⁹ lé kúm byíng nhang nyi keq. Nungmoq gi, hkyá-on kungtôn dang dōng le, hkyá-on mahkôn dang dōng le, woi-nyí eq sêng é mahkôn dōng le, rayuq eq rayuq dáng nyo lhum luí, nungmoq é i-myt unghkaú mai, haú Yhumsîng lé mahkôn hkôn mù, lhoq²⁰ ngón nyí keq. Nga-nhûng é Yhumsîng Yesuq Hkrisduq é myíng lé lang luí, jung hkgámó é matú, haú Íwa Garai Gasang lé, hkâ-nhám le jeju hkyá-on nyi keq.
- ²¹ Hkrisduq lé hkungga hpautap é myit èq, rayuq eq rayuq hpautap lhúm nyi keq.

Myi Eq Làng

- ²² Ikun myhí pê ê, haú Yhumsîng up-hkang é dōng châng é su, nungmoq é ikun hpó pé uphkang é dōng châng nyi keq. Hkâsu mù gâ le, Hkrisduq gi, haú noqkuq hpúng é ulhum nghut é su, haú ikun hpó gi, ikun myhí é ulhum nghut nyi ri; Hkrisduq gi, haú Yhâng gungdu nghut é noqkuq hpúng²⁴ lé hkyí yù Sū nghut ri. Haú noqkuq hpúng gi, Hkrisduq uphkang é dōng châng é su, ikun myhí pé le, hkyô hkat hkgámó má, yhangmoq é ikun hpó pé uphkang é dōng châng nyi râ lhê.
- ²⁵ Ikun hpó pé ê, Hkrisduq gi, haú noqkuq hpúng lé chyitdap luí, hau é matú Yhânggùng lé Yhang ap pyâm é su,

^a 5:6 *Dangsôm* gâ é gi, Garai Gasâng é nhikmo-yo hkyô a jé râ ga taí é dang nghut lhê.

^b 5:14 Dang ngho shí gi, hí lhê é noqkuq hpúng pé taí gyó lo é dang nghut lhê.

nungmoq é ikun myhî pé lé chyitdap
²⁶ nyi keq. Yhang haû su kut é gi, haû
 noqkuq hpúng lé, mungdang dông
 wui má chí pyám luí, lhoq sân-yúng
²⁷ yû râ eq, haû noqkuq hpúng gi, agè
 agaú é eq a-ká akông é hkyô haí le a
 bo é za, mara hûn râ hkyô a bo é eq
 chyoiyúng é, hpungwup shingkang bo
 é noqkuq hpúng dông, Yhânggùng lé
²⁸ wó ap byi râ matú nghut lhê. Haû eq
 rajung za, ikun hpô pé gi, yhangmoq
 é ikun myhî pé lé, yhumsing gungdu
 lé su chyitdap râ dut lhê. Yhumsing é
 ikun myhî lé chyitdap é sù gi, yhum-
 sing gùng lé le, chyitdap é sù nghut
²⁹ bê. Ó yuq le, yhumsing gùng lé a
 chyitdap a kut é za, Hkrisduq gi, haû
 noqkuq hpúng lé kut byi nyi é su,
 yhumsing gùng lé byi tso byi huq
 luí, rago wú zúng nyi é nghut lhê.
³⁰ Hkâsu mù gâ le, nga-nhúng gi, Yhâng
 é gungdû é gungsho showui showang
³¹ pé chyat nghut lhê. Haû mù, “Hau é
 yanmai, yuqgè gi, înu îwa eq gang luí,
 yhangmyi eq zùm-yap mù, yhangnhik
 í yuq gi, gungsho ralhum za dut kó râ
³² nghut lhê.”^a gâ tô ri. Haû hkyô gi,
 gyai yhang zaú tô é hkyô nghut ri.
 Nghut kôlhang, ngò gi, haû Hkrisduq
 é hkyô eq noqkuq hpúng é hkyô lé taí
³³ nyi é nghut lhê. Haû mù, nungmoq
 yuq hkangmó gi, yhumsing gùng lé
 chyitdap é su, yhumsing é ikun myhî
 lé le chyitdap râ dut lhê; haû ikun
 myhî le, yhâng é ikun hpó lé hkungga
 râ dut lhê.

Zo Wuí Eq Mó Wui É Hkyô

6 Zoshâng wui ê, haû Yhumsing má,
 nungmoq é mó wui é jìno gyo keq;
 hkâsu mù gâ le, haû gi, kut gíng é
² hkyô nghut ri. “Náng é înu îwa lé

³ hkungga aq. Haû jáng, nàng, nyi ngón
 yuqyò mù, myidàm htoq má náng
 é asak chyungxe hing nyi râ nghut
 lhê.”^b gâ é dang gi, danggidiq lom é
 sâng-hí lhum hkunmó nghut ri.
⁴ Íwa pé ê, nungmoq é zo wui lé nhik-
 jum a lhoq yô é za, haû Yhumsing é
 mhoq kyo hkyô eq mhoqshit lhoq pun
 hkyô dông yhangmoq lé baú kô nyi
 keq.

Jùn Pé Eq Junsing Pê É Hkyô

⁵ Jùn pé ê, nungmoq gi, Hkrisduq é
 jìno gyô é su, gyuq hkunggâ é eq
 lhumzui é myit mai, nungmoq é myi-
 dàm htoq mâ é junsing pê é jìno gyo
⁶ keq. Nungmoq gi, yhangmoq é hí má
 za, myoqdong ho é dông kut é a nghut
 é za, Hkrisduq é jùn pé su, Garai
 Gasang ô nau é hkyô lé, nungmoq
 é i-myit unghkaû mai châng kut nyi
⁷ keq. Byù lé za dojaú é dông a nghut
 é za, haû Yhumsing lé dojaú nyi é
 dông le, shirông myit èq dojaú nyí
⁸ keq. Hkâsu mù gâ le, jùn nghut nghut,
 luthkyô wó sù nghut nghut, ge é hkyô
 kut nyi é nghut jáng, haû Yhumsing
 gi, yuq hkangmó lé shigyaú râ nghut
 é lé, nungmoq sê nyi lhê.
⁹ Junsing pé ê, nungmoq le, nungmoq
 é jùn pé lé haû eq rajung za kut byí
 nyi keq. Yhangmoq lé hkâkyuq zo kó;
 nungmoq sê é eq rajung za, yhangmoq
 eq nungmoq é Yhumsing hpó gi, mau-
 hkûng htoq má nyi é nghut luí, Yhang
 gi, myoqdong hkyin é hkyô a bo é sù
 nghut lhê.

Garai Gasâng É Gyè Hking

¹⁰ Ló htâng má, taí nau é hkyô gi,
 haû Yhumsing eq Yhâng é hpungwup
 a-tsam mó má wum-o bo nyi keq.

^a 5:31 Apûn 2:24 ^b 6:3 Htoq Ló 20:12

- ¹¹ Haû nat Tsadán wá dâ é hpaqchyî pé lé, nungmoq wó he-ngik pyám kó sháng gaq, haû Garai Gasâng é gye
- ¹² hking banshoq lé wut to keq. Hkâsu mù gê le, nga-nhúng gi, gungsho eq sui lé htuo htîng é bang a nghut é za, haû uphkâng bang, ahkáng ayá wó bang, mauchut tuq dut é mingkan shi é a-tsam pé eq mauhkûng htoq tsáng myhâng mâ é agè ashop é byò eq sêng é wum-o pé lé, htuo
- ¹³ htîng é bang ru nghut lhê. Haû mù luí, Garai Gasâng é gye hking banshoq lé wut to keq; haû hkûn sheq, nungmoq gi, agè ashop hkyô jé é buinyî má, yhumsîng jowò má wó yap gîng to mù, hkyô hkat hkanmó lé ban kut jáng, wó yap ging tîng nyî
- ¹⁴ kó râ nghut lhê. Haû mù, nungmoq é hpyidum má tengmán hkyô hpyihit hit mù, dingmán hkyô wànggò-long lé
- ¹⁵ gò luí, nungmoq é hkyî má gi, haû simsaq hkyô byî é gabú danglù hkò râ rì rì kut to mù, ging ging yap nyî
- ¹⁶ keq. Hau htoq agó, haû agè ashop su é myiduoq é myoshi lhunglhang lé wó sat ung pyám râ matú, lumjîng hkyô nghu é golong lé chung to
- ¹⁷ keq. Hkyi yù hkyô shamtoq muq lé tsûng to luí, Garai Gasâng é mungdang nghut é, haû Woi-nyí é sâm
- ¹⁸ lé wun chûng keq. Ahkyíng hkanmó má, kyûdung dang eq dûng tôngbán é dang ajung jûng èq, haû Woi-nyí má kyûdûng nyî luí, machya nyî

uchyang, sân-yúng bang banshoq é matú, hkâ-nhám le, xoq xoq kyûdung byî nyî keq.

- ¹⁹ Haû gabú danglù é yanmai, shamtoq-tui hut huí é lagyo rayuoq ngò nghut nyî kôlhang, haû gabú danglù nghut é zaú tô é hkyô lé, a gyuoq a
- ²⁰ wàm wó taí kyo luí, ngò taí râ dut é lé, a gyuoq a wàm wó taí sân kyo shoq, ngá nhut hpóng hkanmó, ngò taí râ mungdang pé lé byi sháng gaq, ngá é matú le, kyû bo dung byî nyî keq.

Shi-kyám Dang

- ²¹ Haû Yhumsîng má, chyitdap é gumang eq lhumzuí é dui-nhâng zoshâng nghut sù, Tuhkiku gi, nungmoq lé jung hkanmó taí kyo râ nghut luí, ngò hkâsu nghut nyi é hkyô eq haí kut nyi é hkyô lé, nungmoq wó sé kó râ
- ²² nghut lhê. Ngamoq hkâsu nghut nyi é hkyô lé, nungmoq wó sé râ eq, yhang, nungmoq lé myit wum wó byi râ matú za myit myoqbyù luí, yhang lé, ngò, nungmoq chyáng nhang kat é nghut lhê.
- ²³ Íwa Garai Gasang eq Yhumsîng Yesuq Hkrisduq chyáng mâ é lumjîng hkyô má bo é chyitdap myit eq nguínón hkyô gi, haû gumang wui
- ²⁴ chyáng ru joq nyí sháng gaq ô! A dat htûm é chyitdap myit mai, nga-nhûng é Yhumsîng Yesuq Hkrisduq lé chyitdap é lhunglhang bang chyáng, Garaí jeju gi, ru joq nyí sháng gaq ô!

HPILIPI

Pê Chyáng Hun Kat é Laiká (Philippians)

1 Hkrisduq Yesuq é jùn nhik, Poluq eq Timohti gi, Hpilipi wà mó má nyi é, Yesuq Hkrisduq má sân-yúng bang lhunglhang eq, hpúng-up, hpungte pé lé, dang kyô kat lhê.

² Nga-nhûng é Íwa Garai Gasang eq Yhumsîng Yesuq Hkrisduq chyáng mâ é jeju eq nguingón hkyô gi, nungmoq chyáng ru joq nyí sháng gaq ô.

Jeju Hkya-ôn É Hkyô

³ Ngò gi, nungmoq lé myit bûn kat hkanqmó, ngá é Garai Gasang lé jeju

⁴ hkya-ôn nyi lhê. Ngò gi, kyûdung hkanqmó, hkâ-nhám le nungmoq banshoq bâng é matú gabú myit èq dung

⁵ byí nyi lhê. Hkâsu mù gâ le, nungmoq gi, sânghí nyí mai ahkuí jé shoq, gabú danglù má ngò eq chôm zùm yap nyi é

⁶ yanmai nghut lhê. Haû nungmoq má ge é muzó kut hi é sù Garai Gasang gi, Yesuq Hkrisduq é buinyì jé shoq muzó haû lé lhoq pán rà nghut lhê nghû, ngò hkyak myit lum tô lhê.

⁷ Nungmoq banshoq bang gi, ngá é i-myt má bo to bê bang nghut é yanmai, nungmoq banshoq bang eq séng luí, ngò shí dông myit nyi é gi, gíng lhê; hkâsu mù gâ le, ngò kyum hut huí tô é u lé le, haû gabú danglù hkyô lé taí hûng luí, lhoq gîng é u lé le, nungmoq gi, ngò eq rahá Garai Gasâng jeju chôm hkâm yu é bang nghut

⁸ lhê. Hkrisduq Yesuq é chyitdap myit dông, nungmoq banshoq bang lé, ngò hkâ-í myit chyt nyi é hkyô lé, Garai Gasang gi, ngá é saksé nghut lhê.

⁹ Hau htoq agó, nungmoq gi, je ge é hkyô lé dat gam hkoq mù, Hkrisduq é

buinyì má sanséng luí mara a bo é za,

¹⁰ Garai Gasâng é hpungwup shingkang eq hkya-on kungtôn hkyo é matú, Yesuq Hkrisduq é yanmai lo é dingmán hkyo é ashi wó byíng nyí sháng

¹¹ gaq nghû le; nungmoq é chyitdap myit gi, tengmán é hpaqchyí eq wó sê é nyan banshoq má je riyhang kô jat lò sháng gaq nghû le, ngò kyûdung nyi lhê.

Dui Nyi Le Gi, Hkrisduq É Matú

¹² Gumang wuì ê, ahkuí ngò nungmoq lé sé nhâng nau é hkyô gi, ngò má haí dut laí lò bê hkyô pé gi, gè gè yhang gabú danglù rîng jat

¹³ lò rà matú dut lò bê nghut ri. Hau é yanmai, haû hkohkâm-wâng zúng é lhunglhang bang eq gotú banshoq bâng é hí má, Hkrisduq é yanmai ngò

kyum hut huí é hkyô, de de dut htoq

¹⁴ bê nghut ri. Hau htoq agó, ngò htóng lúng é yanmai, haû Yhumsîng Yesuq má gumang wuì nghut é myo mi-myo gi, myit wum wó yú kômù, Garai Gasâng é mungdang lé, je riyhang a gyuq a kyum wám hko kyo bekô nghut ri.

¹⁵ Gè gè yhang byù ra-am gi, Hkrisduq é hkyô lé manon é myit eq lú lhum bat zik é myit mai hko kyô nyi bum akô. Nghut kôlhang, byù ra-am gi, ge é myit mai hko kyô bum akô nghut ri.

¹⁶ Ge é myit mai hko é bang gi, gabú danglù lé hûng rà matú ngo lé hkyin é hkyô lé, yhangmoq sé kômù, chyitdap myit èq hko kyô é bang nghut

¹⁷ akô. Haû góbang chyaú gi, sansêng é i-myt eq a nghut é za, ngò kyum wut é hkyô má wuìhke jamjau jat byi rà

matú, myit nyi bùm kô é nghut mù luí, Hkrisduq é hkyô lé yhumsing é wuí-zat é dông za, hko taí nyi bum akô
¹⁸ nghut ri. Nghut kôlhang, haû gi, haí râ ri lú? Yhumsing wuízat é dông hko é nghut nghut, tengmán é dông hko é nghut nghut, hkyô hkat hkangmó má Hkrisduq é hkyô lé hko pyo kat é nghut mù luí, ngò gi, hau é yanmai, gabú nyi lhê.

Gè gè yhang, ru gabú nyi shirâ
¹⁹ nghut lhê. Hkâsu mù gâ le, nungmoq kyûdung byí é eq Yesuq Hkrisduq é Woi-nyí garúm é yanmai, ngò má dut laí lò bê hkyô gi, ngò wó luthkyô dut
²⁰ râ nghut é lé ngò sê lhê. Ngò myit láng tô é eq myit myoqbyù tô é má, ngò gi, hoq nó haí a râ é za, hí hkun lhê su, ahkuí le, dui nyí kôlhang, shi byuq kô-lhang, gyuq kyum myit a bo é hkyô lé wó yû mù luí, Hkrisduq gi, ngá gûng má hkya-on waq toq é hui râ nghut
²¹ lhê. Hkâsu mù gâ le, ngò, asak dui nyi le gi, Hkrisduq é matú, shí jáng gi, ngá
²² e amyat nghut ri. Nghut kôlhang, ngò gi, gungsho má rû dui nyí mù, ngò kut é muzó má ashi zú lo é nghut le gi, hká lhum lé sheq hkyin yu le gè râ
²³ lú? Ngò gi, hkyô í hkat gyoro má hká hpyang le a hkap dut tô ri; shi ló luí Hkrisduq eq rahá nyí râ lé gi, ngò ô nau ri, hkâsu mù gâ le, haû gi, je ge
²⁴ é hkyô nghut ri. Nghut kôlhang, ngò gungsho má dui nyi le gi, nungmoq
²⁵ é matú akyû je bò râ nghut lhê. Haû mù, ngò gi, shí hkyô lé hkyak myit lum to luí, lumjín hkyô má nungmoq kô jat lo é eq gabú nyí râ matú, nyi gyó luí, nungmoq lhunglhang bang eq
²⁶ nyi nyí râ hkyô lé, ngò sê lhê. Haû mù luí, ngò nungmoq chyáng dum jé lé é hkûn, ngá é yanmai, Hkrisduq Yesuq má nungmoq é gabú hkyô gi, je riyhang jat lò râ nghut lhê.

²⁷ Haí wà dut kôlhang, nungmoq gi, Hkrisduq é gabú danglù eq gingdán é dông nyiyap keq. Haû jáng, ngò, nungmoq chyáng jé mù huí lhûm é hkûn nghut nghut, we gang lhum tô é hkûn nghut nghut, nungmoq gi, woi-nyí ralhummá za yap gîng to mù, haû gabú danglù lé lumjín hkyô má, i-myt rahkat zâ èq shikut nyí kô é
²⁸ hkyô lé le; nungmoq gi, hká hkyô má nghut kôlhang, gyè pè èq kyuq zô é lé a gyuq lò kô é hkyô lé le, ngò sé râ nghut lhê. Haû gi, yhangmoq é matú htên byoq hui râ kumlhá dut lò bê nghut lhê; nghut kôlhang, nungmoq gi, hkyi yù hui râ nghut lhê. Haû gi,
²⁹ Garai Gasang kut é nghut lhê. Hkâsu mù gâ le, Hkrisduq má wó lumjín râ é jeju za a nghut, Yhang é matú wúhke jamjau hui râ jeju le, nungmoq hkam yù bekô nghut ri. Haû gi, hí hpyang nungmoq ngò má myang wú é eq, ahkuí nungmoq ngá é hkyô lé wó gyô wú é, ngò hui zô é jamjau hkyô eq rajung za nghut nyi ri.

Yesuq, Myit Lhoq Nyhum É Hkyô

2 Hkrisduq eq rading ralhummá za nghut nyi é yanmai, myit wum byí é hkyô, Yhâng é chyitdap myit mai nhik tîng é hkyô, Woi-nyí eq zùm yap é hkyô, nú-nhâm é myit eq shogyo nhikmyín é hkyô rajung jung lé, nungmoq wó yu é nghut le gi, nungmoq gi, haû i-myt huí é hkyô rahkat za, chyitdap myit rajung za, myit nhiklhum eq myit é hkyô má ralhummá za kut nyi é dông, ngá é gabú hkyô lé, byíng jup
³ nhâng keq. Yhumsing é wuízat é dông le, akôm gyáng pyâm é dông le, haí le a kut é za, myit lhoq nyhum nyí mù, góbang gi, nungmoq htoq má je gyaú
⁴ lhê nghû myit yu nyí keq. Nungmoq yuq hkangmó gi, yhumsing eq sêng é

- lé za a nghut, góbang eq sêng é lé le, myit byi râ lhê.
- ⁵ Hkrisduq Yesuq má bo é myit yhang, nungmoq chyáng bò râ dut lhê.
- ⁶ Yhang gi, Garai Gasang su roq za nghut nyi kôlhang, Garai Gasang eq rawuí za nghut é hkyô lé lú zing nyi râ matú a myit é za,
- ⁷ Yhânggùng lé lhoq gôm pyám luí, dui-nhâng zôshang é gunghkyâng lé yu chûng mù, xângzo byù gùng roq lé dut bê nghut ri.
- ⁸ Xângzo byù rayuq dông nghut nyi é hkûn, Yhânggùng lé Yhang lhoq nyhum pyám luí, haú tapzîng htoq má lháng tap sat pyâm é hui shoq jîno gyô ri.
- ⁹ Haú mù luí, Garai Gasang gi, Yesuq é myîng lé mauhkûng htoq mâ é hkyihput, myidàm htoq mâ é hkyihput eq moming mâ é hkyihput hkanmó htuq pái luí,
- ¹⁰ haú Íwa Garai Gasâng é hpungwup shingkâng é matú, Yesuq Hkrisduq gi, Yhumsîng nghut lhê nghú, nhut shô hkanmó yín yú sháng gaq ga,
- ¹¹ myhang htâng é jowò má Yhang lé lhoq toq tô é eq, myîng lhunglhâng é htoq má gyaú é myîng haú, Yhang lé byí to bê nghut ri.

Kyí Pé Su Duqbó Nyí Râ Hkyô

- ¹² Haú mù luí, ngò chyitdap é luzúm wuí ê, nungmoq gi, hkâ-nhám le jîno gyô nyi é eq rajung za, ngò, nungmoq

- eq rahá nyi é u lé su za a nghut, ngò eq wê gâng tô é hkûn le, nungmoq hkyi yù hui bê hkyô lé, gyai gyuq hkunggâ é myit eq je riyhang lhoq htoq nyí
- ¹³ keq. Hkâsu mù gâ le, Garai Gasang gi, Yhang ô nau é hkyô lé, kut naú râ myit èq wó kut râ hkyô lé nungmoq má lhoq htoq byí nyi é sù nghut lhê.
- ¹⁴ Haí kut kôlhang, taí put lhûm é dông, haú a nghut jáng, dang jet jet
- ¹⁵ lhûm é dông hkâkut kó. Haú jáng sheq, myit goí é, agè ashop é pyat hkaú má, nungmoq gi, mara a bo é, sâ-n-yúng é, shut hkyô a bo é, Garai Gasâng é yhangzô pé dut kó râ nghut
- ¹⁶ lhê. Hau htoq agó, nungmoq gi, asak mungdang lé chung htoq uchyang, mauhkûng mâ é kyí pé su, yhangmoq chyáng wó duqbó nyí kó râ nghut lhê. Haú hkûn, ngò gi, ajè a din pyâm é, a nghut jáng, muzó lé akôm a zui pyâm é yanmai, Hkrisduq é buinyi má gum-
- ¹⁷ rông jowò wó berâ nghut lhê. Nghut kôlhang, ngò gi, shuq jung hkungga^a ralhum su, nungmoq é lumjîng myit mai nhongjaú byí é shigu hkungga ahtoq má hut gyûn pyâm é hui le lháng, gabú luí, nungmoq banshoq
- ¹⁸ bang eq rahá chôm gabú nyi lhê. Haú eq rajung za, nungmoq le gabú luí, ngò eq rahá chôm gabú nyi râ dut lhê.

**Timohti Eq Epahprodi Nhik
Lé Nhang Kat Râ Gâ É Hkyô**

- ¹⁹ Ngò gi, nungmoq chyáng Timohti lé hân za wó nhang kat râ lé, haú Yhum-sîng Yesuq má myit myoqbyu nyi lhê; haú hkûn sheq, nungmoq eq sêng é ludang lé ngò wó sé jáng, ngò myit
- ²⁰ ngón râ nghut lhê. Nungmoq é hkyô lé, yhang su hkyak za ge myit chiq byí é byù gotú rayuq le ngò a wó.

^a 2:17 *Shuq jung hkungga* gâ é gi, tsibiyiq wing ragóm lé myi htoq má hut pyâm é dông Garai lé gyuq hkunggâ é hkyô lé tân shit é nghut lhê. Bun zo shí má shí hkâm é hkyô lé taí nau é nghut lhê.

- ²¹ Hkâsu mù gà le, yuq du jup gi, Yesuq Hkrisduq eq sêng é hkyô lé a nghut é za, ó le ó eq sêng é hkyô lé za ho
- ²² nyi bum akô nghut ri. Yhang kúm gi, zo rayuq mai îwa lé htuqbâng é su, haû gabú danglù hkyô má ngò eq rahá dojaú é yanmai, yhang lumluq é hkyô
- ²³ tân shit é lé, nungmoq sê nyi lhê. Haû mù luí, ngò gi, ngò má hkâsu dut râ lé sê é hkûn yhang, yhang lé nhang kat râ matú ngò myit myoqbyu nyi lhê.
- ²⁴ Hau htoq agó, hkâ-myháng a myáng má, ngò yhang le nungmoq chyáng wó jé nhâng râ nghut lhê nghû, haû Yhumsîng má hkyak lum nyi lhê.
- ²⁵ Nghut kôlhang, ngò gi, ngá é gumang hpó le nghut mù, mû zui luzúm eq sarhé luzúm nghut é, ngò râ é hkyô má wú gon byi râ matú nungmoq nhang kat é, nungmoq é gunglik le nghut é sù, Epahprodi lé nungmoq chyáng dum nhang taû kat byi râ lhê nghû, ngò myit hpyit to bê nghut lhê.
- ²⁶ Hkâsu mù gà le, yhang gi, nungmoq lhunglhang bang lé myàng nau nyi é za a nghut, yhang no é hkyô lé nungmoq wó gyo bekô nghut é yanmai, gyai yhang myit myo myit chiq nyi ri.
- ²⁷ Gè gè yhang, yhang gi, aluq shoí shí shoq no pyâm é nghut lhê. Nghut kôlhang, Garai Gasang gi, yhang lé shogyo nhikmyîn yu ri; yhang lé baú a nghut, ngò yón htoq yón a dut nyi râ matú, ngo lé le shogyo nhikmyîn yu ri.
- ²⁸ Haû mù luí, yhang lé nungmoq lhom dum myàng jáng, nungmoq myang gabú râ matú le, ngò yón é hkyô yom ló byuq râ matú le, yhang lé ngò hân
- ²⁹ hân nhang kat byí nau ri. Nungmoq gi, gyai yhang gabú é myit èq, haû Yhumsîng má yhang lé lhom hkûlum yù

- mù, yhang su dut é bang lé hkungga
- ³⁰ keq. Hkâsu mù gà le, yhang gi, ngo lé nungmoq a wó garúm é hkyô lé garúm râ matú, yhang é asak lé lhang a ha loshoq kut mù, haû Hkrisduq é muzó é yanmai, aluq shoí shoí shi é hui zô ri.

Gungsho Má Lumhkaû Râ Hkyô A Joq

3 Hau htoq agó, ngá é gumang wui ê, haû Yhumsîng má gabú nyí keq! Rajung zâ é hkyô lé, nungmoq é matú dum puq ká byi râ gi, ngò má wui é hkyô haí a joq, nungmoq é matú akyû dut râ matú sheq ru nghut lhê.

- ² Haû, hkuí pé lé le; agè ashop é muzó jizó kut é bang lé le; gungsho yâm
- ³ é bang lé le; sidiq nyí keq.^a Hkâsu mù gà le, Garai Gasâng é Woi-nyí èq noqkuq é bang, Hkrisduq Yesuq má gabú gumrong nyi é bang, gungsho má a lumhkaû é bang, nga-nhúng gi, ahpyo-kuq hpyit hkam yu é bang
- ⁴ akying^b nghut lhê. Ngò kúm gi, gungsho má lumhkaû râ hkyô wó ang sù nghut lhê.

Góbang rayuq yuq, haû gungsho má lumhkaû râ hkyô wó âng lhê ga myit é nghut le gi, ngò gi, je riyhang wó

⁵ sù nghut lhê. Ngò gi, hkû lé é htâng shit nyí nghû râ nyí má ahpyo-kuq hpyit bê sù; Israelaq amyû mâ é, Ben-yamyin é awut ashín nghut sù, Hebre byù mâ é Hebre rayuq nghut lhê; jep é tarâ dông ga jang, ngò gi,

⁶ Hparishe rayuq nghut lhê; shirong é hkyô eq séng luí ga jang, ngò gi, haû noqkuq hpúng lé zing-rí wú bê nghut lhê; jep é tarâ mâ é dingmán hkyô eq séng luí ga jang, ngò gi, shut é hkyô a bo wú sù nghut lhê.

^a 3:2 Bun zo shi lhum gi, ahpyo-kuq hpyit hkyô má noqzuq nyi é bang lé taí nau é nghut lhê.

^b 3:3 Ahpyo-kuq hpyit hkam yu é bang akying gà é gi, Garai Gasâng é yhangzo hkyak nghut bê bang lé gà lhê.

7 Nghut kôlhang, ngá é amyat nghu é pé lhunglhang gi, ahkuí, Hkrisduq é yanmai sôm byuq é chyat nghut bê
 8 ngû myit yù bê nghut lhê. Hau htoq agó, ngò gi, ngá é Yhumsing Hkrisduq Yesuq lé wó sê é ko dik é jeju lé sôn kat jáng, jung hkanmó lé buzaq dông myit yù bê. Hkâsu mù gâ le, lhunglhang lé ngò tô pyâm é gi, Yhang é
 9 yanmai nghut lhê. Ngò gi, Hkrisduq lé wó yû râ eq, Yhang eq rahá wó nghut nyí râ matú, haú jung hkanmó lé buzaq ngû myit yu pyâm bê. Garai Gasâng chyáng mai lo é dingmán hkyô lé ngò jep é tarâ dông wó ho yu é a nghut, Hkrisduq lé lumjínng é yanmai za wó yu é ru nghut lhê; haú gi, lumjínng myit mai wó é nghut
 10 lhê. Ngò gi, Hkrisduq lé le, Yhang dui toq hkyo é hpungwup a-tsam lé le, Yhang hpuzô é hkyô má wó zùm yap râ lé le, Yhang shí hkâm é hkyô lé
 11 wó cháng râ lé le, sé nau ri. Haú jáng gi, ngò le, shi byuq bê mai dum dui toq é hkyô lé wó myoqbyù râ nghut lhê.

**Myit Myoqbyu Tô É Jowò
Shut Din Nyì Râ Hkyô**

12 Ngò gi, haú pé banshoq lé wó gû bê le a ngû nau, ngò gumjup gù bê le a ngû nau. Nghut kôlhang, Hkrisduq Yesuq gi, ngo lé lhom yù bê eq rajung za, ngò gi, haú lé wó lhom yù sháng gaq ngû, châng hkat nyi lhê.
 13 Gumang wui ê, ngò yhang ngò gi, haú lé wó hap yù bê ngû a myit; nghut kôlhang, ngò kut é muzó ralhüm gi, nunghtáng mã é lé tô-myhí pyám mù, myoq hí mã é lé wó yû shoq ngû shikut luí, Hkrisduq Yesuq má Garai Gasâng èq ngo lé ahtoq shut ji yu é chyunghuq lé wó yû râ matú, myoq-

byu tô é jowò shut châng hkat din nyi lhê.

15 Gumjup bê bang nga-nhúng lhunglhang gi, haú sù é myit bò râ lhê. Rajung jung má nungmoq myit é hkyô shai nyì kô é nghut le gi, haú lé le, Garai Gasang gi, nungmoq lé san za
 16 tân shit râ nghut lhê. Hká dông nghut kôlhang, nga-nhúng gi, ahkuí jé shoq châng nyì bê hkyô eq rajung za châng kut nyí sháng.
 17 Gumang wui ê, nungmoq gi, ngò kut é dông chôm kut nyí keq, nga-moq mai nungmoq lé kut shit é alik eq rajung za châng é bang lé wú yû
 18 keq. Hkâsu mù gâ le, hí hkûn ngò, nungmoq lé anum num taí kyô wú luí, ahkuí lhang, ngaú byí èq dum taí kyô é eq rajung za, Hkrisduq é tapzínng lé gye kut é bang myo myo nyi bum akò
 19 nghut ri. Yhangmoq é jhtâm gi, htên byoq hkyô nghut ri; yhangmoq é garai gi, yhangmoq é wamdau nghut ri; yhangmoq é aróng gi, yhangmoq hoq hpu hkyô nghut ri. Yhangmoq é i-myit gi, mingkan zè htoq má za nghut ri.
 20 Nghut kôlhang, nga-nhúng é yhum-mau gi, mauhkung mingdán má nghut lhê. Nga-nhúng gi, haú mã é Yhumsing Yesuq Hkrisduq gâ é hkyi yù Sù lé, myoqbyu lánng nyi é bang nghut
 21 lhê. Yhang gi, jung hkanmó lé, Yhang uphkanng é a-ô má wó kut tô é Yhâng é a-tsâm èq nga-nhúng é htên byoq sê é gungdu lé htaí lhik pyám byi luí, Yhâng é hpungwup bo é gungdu su dut nhâng râ nghut lhê.
4 Haú mù luí, chyitdap é luzúm wui le nghut mù, ngò chyitdap bün nghâm nyi é, ngá é gabú jowò eq jan-maú nghut nyi é, ngá é gumang wui ê, haú gi, Yhumsing má nungmoq hkâsu kut yap gíng nyì râ hkyô nghut lhê.

Lhoq Pun Lhoq Kyîng É Hkyô

- ² Ngò gi, Uodia eq Suntuki nhik lé, haû Yhumsîng má rayuq eq rayuq myit huí lhûm nyî râ matú, gyai yhang
- ³ pying kat lhê. Ngá é mú wùn luzúm kyîng ê, ngò gi, myiwe shí nhik lé garúm yû laq nghû, nang lé le dúng tóngbán kat lhê; yhangnhik gi, Klemen eq le, asak jihpán laiká buk má myîng bo é, ngá é mú wùn luzúm wuí góbang eq le, haû gabú danglù hkyô má ngò eq rahá gyai shikut wú bê sù nhik nghut lhê.
- ⁴ Haû Yhumsîng má hkâ-nhám le gabú nyî keq! Ngò dum taí lhê,
- ⁵ gabú nyî keq! Nungmoq nú-nhâm é hkyô, byû banshoq bang lé sé nhâng keq. Haû Yhumsîng gi, chyáng bê
- ⁶ nghut ri. Haí eq séng luí le, myit hkâ-myô hkâchíq kó; hkyô hkangmó má jeju hkya-on uchyang, kyûdúng é eq dúng tóngbán é dông, nungmoq dúng é hkyô pé lé, Garai Gasâng chyáng shit kyô nyî keq. Haú hkûn, sé gyô é nyan banshoq htoq má gyaú é, Garai Gasâng é nguínón hkyô gi, nungmoq é myit nhiklhum eq nungmoq myit é hkyô lé, Hkrisduq Yesuq má upzúng byí nyî râ nghut lhê.
- ⁸ Jihtûm má, gumang wuí ê, tengmán é, hpautap gíng é, dingmán é, sansêng é, wó chyitdap é, hkungga gíng é, haí má nghut kôlháng, aróng wó dik é hkyô rajung jung, a nghut jáng, hkya-on gíng é hkyô rajung jung bo é nghut le gi, haû sù é hkyô pé lé myit
- ⁹ nyî keq. Nungmoq gi, ngá chyáng mai wó mhoq hkam yù bê hkyô pé, wó gyo wó myang yù bê hkyô pé, haí lé le châng kut nyî keq. Haú hkûn, nguínón hkyô byí é Garai Gasang gi, nungmoq eq rahá nyi nyî râ nghut lhê.

Jeju Bûn É Hkyô

- ¹⁰ Ahkuí kúm gi, ngá é hkyô lé nungmoq dum myit chiq byi kô é yanmai, ngò gi, haû Yhumsîng má gyai yhang gabú nyi lhê; gè gè yhang, nungmoq myit chiq byí nyî kôlháng, haû lé tûn
- ¹¹ shit râ ahkáng a wó kó nghut ri. Ngò îsu nghû taí nyi é gi, ngò má râ é hkyô bo tô é yanmai taí é a nghut, hkâsu mù gâ le, ngò gi, ngò hui mihui má, nhik dik nyî râ matú mhoq yû bê
- ¹² nghut lhê. Ra châ tô u lé, hkâsu kut râ ngò sê lhê; agùn agó wó u lé, hkâsu kut râ ngò sê lhê; hkyô hkangmó eq dut tô é ahkyo lhum jup má, wam gyi kôlháng, zòmut kôlháng, agùn agó wó tô nyî kôlháng, ra châ to kôlháng, myit dik nyî râ hpaqchyí lé ngò wó
- ¹³ mhoq yû bê nghut lhê. Ngò gi, ngo lé wum-o a-tsam byi sù Hkrisduq é yanmai, hkyô hkat hkangmó wó kut lhê.
- ¹⁴ Nghut kôlháng, ngò wuíhke jamjau huí nyi é hkûn, nungmoq garúm yû kô
- ¹⁵ é gi, ge é hkyô kut bekô nghut ri. Hau htoq agó, Hpilipi byu pé nungmoq sê é eq rajung za, haû gabú danglù lé, ngò hkô mù nungmoq wó gyô yu hi é buinyî pé má, ngò Makedoni mau mai htoq ló râ hkûn, haû byí é hkyô eq lhom yu é hkyô má, nungmoq mai lai luí, noqkuq hpúng gotû ralhum lháng, ngo lé garúm kat é hkyô a bo
- ¹⁶ é nghut lhê. Ngò Htesaloni wà mó má nyi tô é hkûn lé lháng, nungmoq gi, ngò ra châ é hkyô lé adám
- ¹⁷ dâm hûn byi bekô nghut ri. Ngò gi, chyunghuq chyunghtâng lé ho nyi é a nghut, nungmoq mai ashi je myo zuí jat râ matú lé za sheq ho nyi é
- ¹⁸ nghut lhê. Ngò gi, haí le gúm shoq myang yu é htoq agó, chyân shoq lháng nghut bê. Ahkuí, haû nungmoq hun kat é chyunghuq lé, Epahprodi chyáng mai ngò lhom myang yù luí,

ngò má agùn agó nghut nyî bê. Haû pé gi, namngón jung hkungga su, Garai Gasang lé gabú nhang é, hap yù¹⁹ gíng é hkungga ralhum nghut ri. Ngá é Garai Gasang gi, Yhang agùn agó wó sùt nyi é eq rajung za, nungmoq râ é hkyô banshoq lé, Hkrisduq Yesuq má lhoq gúm lhoq jup byi râ nghut lhê.

²⁰ Hpungwup shingkang gi, nga-nhûng é Íwa Garai Gasâng chyáng pyat dedu ahtum abyuq ru joq nyî sháng gaq ô! Amen.

Shi-kyám Dang

²¹ Hkrisduq Yesuq má sân-yúng bê bang banshoq lé bo shi-kyám byi keq. Ngò eq rahá nyi é gumang wuì gi, nungmoq lé shi-kyâm kat akô²² nghut ri. Sân-yúng bang banshoq gi, nungmoq lé shi-kyâm kat akô; Ke-htaq é yhûm mâ é sân-yúng bang gi, je riyhang shi-kyâm kat akô nghut ri.

²³ Yhumsîng Yesuq Hkrisduq é jeju gi, nungmoq banshoq bang eq rahá ru joq nyî sháng gaq ô!

KOLOSE

Pê Chyáng Hun Kat é Laiká (Colossians)

1 Garai Gasâng èq hkyin yù mù, Hkrisduq Yesuq é lagyo dut sù, ngò Poluq eq nga-nhông é gumang
² Timohti gi, Kolose wà mó má nyi bang nghut é, Hkrisduq má chyoiyúng bang nghut é, lhumzuí é gumang wui chyáng dang kyô kat lhê. Nga-nhông é Íwa Garai Gasâng chyáng má é jeju eq ngingón hkyô gi, nungmoq chyáng ru joq nyí sháng gaq.

Jeju Hkya-ôn É Eq Kyûdung É Dang

³ Ngamoq gi, nungmoq é matú kyûdung byí é hkûn, nga-nhông é Yhum-sîng Yesuq Hkrisduq é Íwa nghut é Garai Gasang lé ayang jeju hkya-ôn
⁴ lhê. Haí mù gà le, Hkrisduq Yesuq má nungmoq lumjîng hkyô eq Yhâng é sân-yúng bang banshoq lé nungmoq chyitdap é hkyô lé, ngamoq wó gyô
⁵ é yanmai nghut lhê. Lumjîng myit eq chyitdap myit haú gi, nungmoq é matú mauhkûng htoq má hkong to byí é myit myoqbyù hkyô^a mai lo é nghut lhê. Myit myoqbyù hkyô haú lé gi, nungmoq chyáng jé to bê gabú danglù nghut é tengmán mungdang mai, nungmoq wó gyô to gû nghut
⁶ lhê. Nungmoq gi, gabú danglù haú lé wó gyo luí, Garai Gasâng jeju eq sêng é tengmán hkyô lé sê hkyang é bui-nyí mai, nungmoq chyáng ashi zuí é eq kô myhang nyí bê nghut é eq rajung za, gabú danglù haú gi, mingkan gón má ge é ashi zuí nyí é eq kô
⁷ myhang nyí bê nghut ri. Nungmoq gi, haú hkyô lé, ngamoq é chyitdap byin-

zùm Epahpra chyáng mai mhoq yu é nghut lhê. Yhang gi, ngamoq é gunglik dông, Hkrisduq é lhumzuí é hpúng
⁸ mú wùn sù nghut lhê. Yhang gi, haú Woi-nyí èq nungmoq lé byí tô é chyitdap hkyô lé, ngamoq lé taí kyo sù le nghut ri.

⁹ Haú nghut é yanmai, ngamoq gi, nungmoq eq sêng é hkyô lé wó gyô é nyí mai, nungmoq é matú ayang kyûdung byí nyi lhê. Garai Gasang ô nau é hkyô lé sé râ hpaqchyí lé, woi-nyí eq sêng é hpaqchyí byéng-yá eq sê gyô é nyan banshoq dông mai nungmoq chyáng lhoq pyíng byi sháng gaq nghû, Yhâng chyáng kyûdung byí nyi
¹⁰ lhê. Haú su kut kyûdung byí é gi, haú Yhumsîng ô nau é hkyô eq gingdán é dông nungmoq asak wó duí luí, hkyô hkangmó má Yhang lé wó gabú nhâng râ matú nghut lhê. Hau dông mai, nungmoq gi, ge é muzó hkangmó má ashi zuí nyí luí, Garai Gasang lé sê é hpaqchyí má kô myhang nyí kó râ
¹¹ nghut lhê. Hau htoq agó, nungmoq gi, Yhâng é hpungwup a-tsam dông mai a-tsam banshoq èq wum-o lhoq kîng byí é huí nyí kó râ nghut lhê. Haú mù, nungmoq gi, gyai hkam jân é hkyô eq myit hing é hkyô lé, gabú myit mai wó
¹² yú kó râ nghut lhê. Maubó é mingdán má, sân-yúng bang eq sêng é muizè lé wó bo hkam yù râ matú, nungmoq lé gingdán nhang é sù haú Íwa lé le, jeju
¹³ wó hkya-on kó râ nghut lhê. Hkâsu mù gà le, Íwa haú gi, nga-nhúng lé, mauchut èq up é hkaú mai hkyi htoq

^a 1:5 Bun zo shí má bo é myit myoqbyù hkyô gi, Yesuq lé taí é nghut lhê.

yû luî, Yhang chyitdap é Yhang Zô é mingdán má shuí hâng é Sû nghut
 14 lhê. Nga-nhúng gi, haû Yhang Zo dông mai, hkyi xe yu é hui mù, yubak mara hkyut pyám byî é hui bê nghut lhê.

Jung Hkangmó É Ushuq, Hkrisduq

15 Hkrisduq gi, myoq èq a byu-myàng é Garai Gasâng é gunghkyâng isâm nghut luî, zomún dông hpan tô é lhunglhâng htoq má gyaú é sù
 16 nghut ri. Hkâsu mù gâ le, mauhkûng eq myigùng htoq má joq é azíng zê pé, myoq èq byu-myang é eq a byu-myang é pé nghut kôle, hkohkâm ayá pé, a-tsam pé, uphkâng bang, ahkáng ayá wó bang nghut kôle, lhunglháng gi, Yhâng èq hpan to huí é chyat nghut lhê. Lhunglháng gi, Yhâng é matú, Yhâng èq hpan to huí é chyat nghut ri.
 17 Yhang gi, lhunglhâng é hí mâ é nghut mù, lhunglháng gi, Yhâng é yanmai
 18 joq gíng bum é chyat nghut lhê. Yhang gi, noqkuq hpúng nghu é gungdû é ulhum nghut ri; Yhang gi, jung hkangmó má gyaú dik é ushuq dut sháng gaq ga, sâng-hi awang nghut sù eq shi é bang mâ é hí dui toq é zomún dut sù nghut ri. Hkâsu mù gâ le, Garai Gasang gi, Yhâng é byíng jup hkyô banshoq, Yhang Zo má joq nyi râ lé myit nguî ô nau é nghut mù,
 20 haû tapzíng má htoq byî é Yhang Zô é sui dông mai ngingón hkyô kut byî é èq, myigùng htoq má é azíng zê nghut nghut, mauhkûng mâ é azíng zê nghut nghut, lhunglháng lé, Yhang Zo dông mai, Yhang eq ngingón simsaq hkyô xox yû bê nghut ri.
 21 Nungmoq gi, Garai Gasang eq wê gâng é bang dut wú kôluí, nungmoq é agè ashop nyi yap sâmlaí é yanmai, nungmoq i-myt má, Yhâng é gyè dut
 22 wú bekô nghut lhê. Nghut kôlháng,

ahkuí, Garai Gasang gi, nungmoq lé, râ é hkyô a bo é eq mara hûn râ hkyô a bo é za, chyoiyúng é dông Yhâng é hí má shit râ matú, Hkrisduq é gungsho gungdu shí hkâm é dông, nungmoq eq ngingón simsaq hkyô xox yû bê
 23 nghut ri. Haû gi, gabú danglù mai wó yu tô é myoqbyù hkyô mai a htot byuq é za, kô myhang nyi é eq gíngtíng nyi mù, nungmoq é lumjíng hkyô má xox nyi nyi é nghut jáng sheq dut râ nghut lhê. Gabú danglù shí gi, nungmoq wó gyô wú bê nghut é htoq agó, mauhkûng ô má hpan tô é jung hkangmó lé hko kyô nyi bê nghut lhê. Ngò, Poluq le, gabú danglù hau é dui-nhâng zoshâng dut é nghut lhê.

Noqkuq Hpúng É Matú Poluq Wùn Waq É Hkyô

24 Ahkuí, ngò gi, nungmoq é matú jamjau huí é má gabú lhê; hau htoq agó, Hkrisduq é gungdu nghut é, noqkuq hpúng é matú, râ tô ashí nghut é, Yhang hpuzô é hkyô lé, ngá é gùng má
 25 ngò lhoq gumjup yu nyi lhê. Ngò gi, Garai Gasâng é mungdang lé, nungmoq chyáng gumjup shoq hko kyo râ matú, Garai Gasang, ngo lé hun tô é wò mai, noqkuq hpúng hau é mù
 26 wùn sù dut é nghut lhê. Mungdang haû gi, gohkûn mai apyat pyat haq tô gyó lo é zaú tô é hkyô nghut kôlháng, ahkuí gi, haû sânyúng bang
 27 lé hpông shit bê nghut ri. Garai Gasang, haû su kut é gi, zaú tô é hkyô hau é agùn agó hpungwup shing-kang, tûngbaù pê chyáng hkâsu nghut é hkyô, yhangmoq lé sé nhâng râ matú nghut lhê. Zaú tô é hkyô haû gi, hpungwup shing-kang lé myoqbyù é hkyô nghut é, nungmoq má Hkrisduq dui nyi bê hkyô lé gâ é nghut lhê.

²⁸ Hkrisduq má gumjup é dông, byù yuq hkanmó lé wó shuí jé sháng gaq nghû, ngamoq gi, Hkrisduq é hkyô lé taí pyô luí, yuq hkanmó lé, hpaqchyí byéng-yá banshoq èq taí pun taí kyíng ²⁹ é eq mhoqshit nyi é nghut lhê. Ngò, haû-í yhang wó wùn waq shikut é gi, ngò má wum-o a-tsam byíng byíng mù zuí nyi Su é wum-o banshoq èq wùn waq shikut nyi é ru nghut lhê.

2 Ngò gi, nungmoq é matú le, La-doki wà mó bâng é matú le, ngò eq myoqdong hkyûm a huí wú shí é bang banshoq é matú le, hkâ-í yhang awui ahke shikut nyi é hkyô lé, nungmoq lé sé nhâng nau ri. Haû su awui ahke shikut é hkyô gi, yhangmoq, myit má wum-o byí é hui râ eq chyt-dap myit má rading ralhum za wó dut râ matú nghut lhê. Haú hkûn, yhangmoq gi, Garai Gasâng é zaú tô é hkyô nghut é, Hkrisduq lé wó sé râ matú, sê gyô é nyan lhunglhâng é isut byíng shoq lé wó yú kó râ nghut ³ lhê. Haú Hkrisduq má kúm gi, hpaqchyí byéng-yá eq sumsé hpaqchyí gâ é ⁴ sutzè lhunglháng lé tsíng tô ri. Nungmoq lé ngò haú hkyô taí kyô é gi, ó yuq le, dang ngón dang ngui èq mhoq hpyoq é dông, nungmoq lé a wó mhaú ⁵ zo râ matú nghut lhê. Hkâsu mù gâ le, ngá gungdu nungmoq eq rahá a nyi kôlhang, ngá é myit gi, nungmoq eq rahá nghut nyí luí, nungmoq shuq shuq tap tap za nghut nyí kô é eq Hkrisduq lé lumjíng é má hkâ-í gíng-tíng nyi kô é lé myàng mù, ngò gabú nyi lhê.

**Hkrisduq Dông Mai Wó É
Gumjup É Asak Duì Hkyô**

⁶ Haû mù luí, nungmoq gi, Hkrisduq Yesuq lé Yhumsíng nghû hap yù bekô nghut é eq rajung za, Yhang má asak

⁷ xoq duì nyi keq. Yhang má apùn amyit chîn gíng nyi mù, kô myhang lò luí, nungmoq mhoq yù bê eq rajung za, lumjíng hkyô má wum-o lhoq kíng mù, jeju hkyá-ôn é hkyô byíng zan nyi keq.

⁸ Hkrisduq chyáng mã é a nghut é za, mingkan shí mã é uphkâng tarâ pé eq xângzo wui é htúngli cháng luí, mhaú zô é myit sôn hpaqchyí eq akyú a bo é dang dông, ó yuq èq le, nungmoq lé a wó shuí nghoq yú kó sháng gaq, sidiq nyi keq.

⁹ Hkâsu mù gâ le, Garai Gasâng é gumjup hkyô banshoq gi, Hkrisduq é gungdu hkyangmân má lúng nyí mù, ¹⁰ nungmoq gi, a-tsam bo é banshoq eq ahkáng ayá wó é banshoq é ushuq nghut é Hkrisduq eq sêng é bang nghut kômù, gumjup é bang dut bekô ¹¹ nghut ri. Yhang má, nungmoq gi, byu loq èq kut é ahpyo-kuq hpyit hkyô dông a nghut é za, ahpyo-kuq hpyit é su, Hkrisduq èq yubak gungsho mara lé hkyut sêng pyâm é hkyô lé ¹² hkam yù bekô nghut ri. Nungmoq gi, wui-myhup hkâm é hkûn Hkrisduq eq rahá myhup yhûm é hui bekô nghut mù, Yhang lé shi é mai lhoq duì toq yu é, Garai Gasâng é a-tsam lé nungmoq lumjíng kô é yanmai, Yhang eq rahá lhoq duì toq yu é hui bekô nghut ri.

¹³ Nungmoq é yubak mara pê é yanmai le, nungmoq é yubak gungsho mara lé huí sêng pyâm é a hkam yu é yanmai le, nungmoq shi tô é hkûn, Garai Gasang gi, nungmoq lé, Hkrisduq eq rahá asak duì nhâng bê nghut ri. Yhang gi, nga-nhûng é yubak mara lhunglháng lé hkyut pyám byi ¹⁴ luí, nga-nhúng eq shai lhum mù, nga-nhúng lé htuq htíng é, tarâ pé bo é jéyáng râ jihpán lé huí sêng pyám byi bê nghut ri. Yhang gi, haú lé tap-

zing htoq má dok tap pyâm é đông yu
¹⁵ pyám byi bê nghut lhê.^a Haú đông
 mai, a-tsam bò bang eq ahkáng ayá
 wó bâng a-tsam lé lang hkyut hkyô
 pyám mù, Yhang gi, tapzing eq yhang-
 moq lé ung pyâm é đông, byù pê é
 hí má yhangmoq lé de de kut to bê
 nghut ri.

¹⁶ Haú mù luí, nàng haí zo haí shuq
 é yanmai le, noqkuq htúng eq sêng é
 poí buinyì, Lhoxan Lhosik poí, Bánno
 buinyì eq séng luí le, nungmoq lé,
¹⁷ ó yuq eq le a wó jéyáng kó sháng
 gaq. Haú pé gi, dut lò rã hkyô pê
 é wupzo chyat nghut lhê; haú gùng
 gyíng gi, Hkrisduq yhang nghut nyi ri.
¹⁸ Myit lhoq nyhum mhaú é eq mau-
 mang lagyô pé lé noqkuq é lé myit
 nguì é sù ó yuq eq le, nungmoq lé,
 chyunghuq eq a gingdán rã đông hkâ-
 kut nhâng kó. Haú su é yuq gi, yhum-
 sîng byu-myang é lé^b za taí shikut
 mù, yhumsing é gungsho myit mai,
¹⁹ akôm yhang nghut é lé gyáng dang taí
 é sù nghut ri. Yhang gi, Garai Gasang
 kô myhâng nhang é su, gungdu gón é
 gungsho showui showang pé eq sho-
 gyi pé lé htuqbang byi mù rahá lãng
 tsing tô é haú ulhum nghut é Hkrisduq
 eq xoq é hkyô lé byoq ló nhâng bê
 nghut ri.

²⁰ Nungmoq gi, Hkrisduq eq rahá,
²¹ mingkan shí mâ é tarâ pé eq shi gang
 bekô nghut le nhîng, haí mù, haú eq
 sêng lhum nyi ashí kó lú? “Hkâzui,
 hkâchyâm, hkâzáng.” gã é tarâ ô má
²² nyi nyi ashí kó lú? Haú pé gi, waxâng
 zô wui é hkunmó pé eq mhòqshit hkyô
 pé nghut é yanmai, jai chung é hkûn,

²³ htên byuq rã chyat nghut lhê. Haú
 sù é tarâ pé gi, yhumsîng yhang noq-
 kuq shikut é, myit lhoq nyhum mhaú
 é eq gungdu lé gunjâng é pé nghut
 luí, hpaqchyí byéng-yá bo é su dut kô-
 lhang, gungshô é agè ashop yut yut ô
 nàu hkyô lé wó hkûm zing pyám rã
 má, hai akyú a bò nghut ri.

Chyoiyúng É Đông Asak Dui Rã Hkyô

3 Haú mù luí, nungmoq gi,
 Hkrisduq eq rahá lhoq dui toq é
 hui bekô nghut jáng, Garai Gasâng é
 loqyo hkyam^c má zung tô é Hkrisduq
 é jowò má joq é, ahtoq mâ é azíng
² zê pé lé myit ô nau nyì keq. Nung-
 moq gi, myidàm htoq mâ é azíng zê
 lé myit tuí é a nghut é za, ahtoq
 mâ é azíng zê lé myit tuí nyì keq.
³ Hkâsu mù gã le, nungmoq gi, shí
 bekô nghut luí, ahkuí, nungmoq
 é asak gi, Hkrisduq eq rahá, Ga-
 rai Gasang má haq tô é hui bekô
⁴ nghut ri. Nungmoq é asak nghut sù,
 Hkrisduq htoq shit é hkûn, nungmoq
 le, Yhang eq rahá, hpungwup shing-
 kang hkaú má htoq shit kó rã nghut
 lhê.
⁵ Haú mù luí, nungmoq é mingkan
 hkyô eq sêng é, ashop é đông gung-
 sho zùm yap é hkyô, agot a-û nyì zô
 lhúm é hkyô, ye lhaí nau é hkyô, agè
 ashop yut yut ô nau é hkyô eq, hparà
 noq hkyô nghut é myoqnoq hkyô pé
⁶ haí lé le sat pyám keq. Haú hkyô pê
 é yanmai, Garai Gasâng é nhikmo-yo
 hkyô gi, jìno a gyo bâng é ahtoq má^d
⁷ jé rã za nghut lhê. Láí lò bê hkûn,
 nungmoq le, haú hkyô pé đông sô wú

^a 2:14 Yhang gi, haú lé tapzing htoq má dok tap pyâm é đông yu pyám byi bê nghut lhê gã é gi, Hkrisduq tapzing má shí hkám byí é hkûn, nga-nhúng é yubak mara banshoq lé, Garai Gasâng eq hkyut pyám byí é lé taí nau é nghut lhê. ^b 2:18 Byu-myang é lé gã é gi, yhang myit htoq é shing-rán lé gã lhê. ^c 3:1 Loqyo hkyam nghú é gi, ahko ahkáng wó é jowò lé gã é nghut lhê. ^d 3:6 Jìno a gyo bâng é ahtoq má, gã é dang, chyúmding ra-am má a bò nghut lhê.

- ⁸ kô é nghut lhê. Nghut kôlhang, ahkuî, nungmoq gi, nhikjum yô é, nhikmo-yô é, agè ashop é đông nò shoq kut é, lumù gansang é eq, nungmoq é nhut-wuî mai hkunchiq taí é hkyô shí pé banshoq lé, yhumsing gùng yhumsing
- ⁹ tô pyám rà dut lhê. Rayuq eq rayuq hkâ-mhaû lhum kó; hkâsu mù gâ le, nungmoq gi, nungmoq é byù xau eq byù xaû é nyì yap hkyô lé hkyut pyám
- ¹⁰ mù, byù sik lé tû wut yû kô é nghut lhê; byù sik haû gi, sumsé hpaqchyî đông mai, yhang lé hpân Su é gungdu isâm má asik jat lò nhang é huí nyi ri.
- ¹¹ Byù sik má gi, Grik eq Yudaq byù nghu é, ahpyo-kuq hpyit hkâm bang eq a hkâm bang nghu é, byù bíng eq byù jum nghu é, jùn eq jùn a nghut sù nghu é a nyì lô é za, Hkrisduq gi, banshoq nghut mù, banshoq má nyi nyi ri.
- ¹² Haû mù luí, Garai Gasâng èq hkyin yù huí é bang, Yhâng èq gyai yhang chyitdap é huí é chyoiyúng bang đông, shogyo myit, gè hkyô shit é myit, lhoq nyhum é myit, nú nhâm é myit eq myit hing é hkyô pé lé, yhum-sing gùng yhumsing mebu su wut to
- ¹³ keq. Nungmoq yhangchang mara kut shut é hkyô joq é nghut jáng, hkam jan byì lhum luí, rayuq eq rayuq mara hkyut byì lhum keq. Haû Yhumsing gi, nungmoq é mara hkyut pyám byì é su, nungmoq le mara hkyut byi keq.
- ¹⁴ Haû ge é sâmlai banshoq wó é htoq agó, gumjup é rading ralhum za dut é hkyô má, banshoq lé rahá wó túi zing tô é chyitdap myit lé puq wut to keq.
- ¹⁵ Nungmoq gi, nguínón hkyô wó rà matú ji yu é hui bekò nghut mù, gungdu ralhum mâ é bang chyat nghut bekò yanmai, Hkrisduq é nguínón hkyô lé, nungmoq é myit má up

- nhang nyì keq. Haû mù, jeju hkyá-ôn nyì keq. Nungmoq, rayuq eq rayuq, hpaqchyî byéng-yá banshoq èq mhooq-shit é eq lhoq pun lhoq kyîng lhum é hkûn le, Garai Gasang lé nungmoq jeju bûn é myit mai, jihkyang dang, hkyá-on mahkôn, woi-nyì eq sêng é mahkôn pé hkon é hkûn le, haû Hkrisduq é mungdang lé, nungmoq é myit nhiklhum má agùn agó
- ¹⁶ bò nhang nyì keq. Nungmoq haû wá kut kut, dang đông nghut nghut, zui saí é đông nghut nghut, banshoq lé Yhumsing Yesuq é myîng mai kut é hkûn, haû Íwa nghut é Garai Gasang lé Yhang đông mai jeju hkyá-on keq.

Hkristan Ikun Byu Pé Nyì Yap Râ Hkyô

- ¹⁸ Ikun myhî pé ê, ikun hpô pé uphkan é ahkaû má nyì keq. Haû gi, Yhumsing é hí má kut gíng é hkyô nghut lhê.
- ¹⁹ Ikun hpô pé ê, ikun myhî pé lé chyitdap nyì keq. Yhangmoq lé dang htân hkâ-nyô kó.
- ²⁰ Zo wuî ê, jung hkangmó má nungmoq é mó wui é jìno gyo keq; hkâsu mù gâ le, haû gi, Yhumsing ô nau é hkyô nghut lhê.
- ²¹ Íwâ pé ê, nungmoq é zo wuî lé myit hkâ-nô nhâng kó, nò nhâng jáng gi, yhangmoq, myit wum gyuí byuq kó rà nghut lhê.
- ²² Jùn pé ê, hkyô hkangmó má nungmoq é myidàm htoq mâ é jùn síng bang uphkan é ahkaû má nyì nyì keq; yhangmoq é myoq hí má za zui saí luí, myoqdong ho é đông a nghut é za, haû Yhumsing lé gyuq hkunggâ é eq lhum-zuí é myit mai zui saí nyì keq. Nungmoq haû wá kut kôle, byu é matú kut é a nghut, haû Yhumsing é matú kut nyì é đông, nungmoq é myit nhiklhum

²⁴ banshoq eq zui saî nyî keq. Haî mù gà le, nungmoq gi, haû Yhumsing chyáng mai, muizè lé chyunghuq dông wó yû kó rà nghut é lé, sé kô é yanmai nghut lhê. Nungmoq dojaú nyi é sù gi, Yhumsîng Hkrisduq ru nghut lhê.

²⁵ Kut shut sù gi, yhang kut shut é marâ matú dam byî é hui zo rà nghut lhê, haî mù gà le, Garai Gasang gi, myoq-dong hkyin é hkyô a joq.

4 Jùn sîng bang ê, nungmoq é jùn pé lé, tengmán é eq gîng âng é dông lajang byî nyî keq; haî mù gà le, nungmoq le, mauhkûng htoq má Yhumsîng rayuq wó é lé sé kô é yanmai nghut lhê.

Xoq Lui Pying Kat É Hkyô

- ² Nungmoq gi, kyûdûng é má myit zîng zuq nyî mù, machyâ luí, jeju
- ³ hkyâ-ôn nyî keq. Ngò, shamtoq-tui hut huí nyî shoq dut é, Hkrisduq é zaú tô é hkyô lé ngamoq wó taí pyô sháng gaq, Garai Gasang gi, mung-dang lé ngamoq taí rà hkyô hkum hpóng byi rà matú kyû bo dung byi
- ⁴ kó laq. Haû Hkrisduq é zaú tô é hkyô lé, ngò taí âng é dông san za wó taí pyô sháng gaq, kyû bo dung byi kó
- ⁵ laq. Nungmoq gi, a lumjîng bang eq zùm yap é hkûn hpaqchyî bo nyî keq; wó yu é ahkyíng hkanmó lé
- ⁶ rago yhang chung jai keq. Nungmoq gi, yuq hkanmó lé hkâsu tû taí rà hkyô wó sé kó shoq, dang nyo é má, xô èq nghám nhang é su, hkâ-nhám le jeju byíng é dang bo nyî sháng gaq.

Ló Htâng É Shi-kyám Dang

- ⁷ Tuhkiku gi, ngá hkyô eq sêng é danglù banshoq, nungmoq lé taí kyo rà nghut lhê. Yhang gi, ngá é chyitdap gumang, haû Yhumsîng má, lhum-

zui é hpúng mù wùn sù eq byinzùm
⁸ nghut lhê. Ngò, yhang lé nungmoq chyáng nhang kat é hkyô gi, ngamoq chyáng dut nyi é hkyô lé nungmoq wó sé rà eq, nungmoq lé myit wum
⁹ wó byi rà matú nghut lhê. Yhang gi, nungmoq chyáng mâ é nghut é, ngamoq é lhumzui chyitdap é gumang Onesimu eq rahá lé lo é nghut lhê. Yhangnhik gi, shî má dut nyi é hkyô jung hkanmó lé taí kyo kó rà nghut lhê.

- ¹⁰ Ngò eq rahá htóng lúng sù Aristakuq gi, nungmoq lé shi-kyâm kat ri. Barnaba é yhâng za-aû Markuq le, nungmoq lé shi-kyâm kat ri. (Markuq eq séng luí pying kat é hkyô lé nungmoq wó yù to bê nghut mù, nungmoq chyáng, yhang jé lé é nghut jáng,
¹¹ lhom hkûlum yù keq.) Yustu le gà é Yesuq le, nungmoq lé shi-kyâm kat ri. Garai Gasâng é mingdán matú ngá é byinzùm mù zui bang má, haû bang za Yudaq byu pé nghut kômù, yhangmoq gi, ngo lé nhik tíng byi é bang
¹² nghut akò. Nungmoq chyáng mâ é byù nghut sù eq Hkrisduq Yesuq é mù wùn sù, Epahpra gi, nungmoq lé shi-kyâm kat ri. Nungmoq gi, Garai Gasang ô nau é hkyô lhunglhang má hkyak lùm to mù, gumjup luí wó gíng-tíng nyî sháng gaq ga, Yhang gi, ayang nungmoq é matú kyûdung shikut byi
¹³ nyi ri. Nungmoq é matú le, Ladoki wà mó eq Herapoli wà mó bâng é matú le, yhang gi, gyai yhang mù zui shikut byi é hkyô lé, yhang é matú ngò
¹⁴ saksé hkâm lhê. Ngamoq é chyitdap chi sará Lukaq eq Demaq gi, nungmoq lé shi-kyâm kat akò nghut ri.
¹⁵ Ladoki wà mó mâ é gumang wui lé le, Numhpa eq yhâng yhûm mâ é noqkuq hpúng lé le, bo shi-kyám byi keq.

- ¹⁶ Laiká shí lé, nungmoq lé nghap kyô é htâng má, Ladoki byu pê é noqkuq hpúng má le nghap nhâng mù, Ladoki wà bâng chyáng hùn kat é laiká lé le, nungmoq nghap wú keq.
- ¹⁷ “Haû Yhumsing chyáng mai nàng hap yù to bê é muzó lé rago za lhoq

pán pyám aq.” nghû, Arhkipô lé taî kyo keq.

- ¹⁸ Ngò, Poluq gi, ngá é loq èq yhang shi-kyám dang shí lé kê kat é nghut lhê. Ngò, shamtoq-tui wut tô é lé bûn nyì keq. Jeju gi, nungmoq chyáng ru joq nyí sháng gaq ô.

HTESALONI

Pê Chyáng Hî Dàm Hun Kat é Laiká

(1 Thessalonians)

1 Ngò Poluq, Sila^a eq Timohti pé gi, Íwa Garai Gasang eq Yhumsîng Yesuq Hkrisduq má nghut nyí bê bang, haû Htesaloni wà mó byu pê é noqkuq hpúng lé dang kyô kat lhê. Garaî jeju eq nguingón hkyô gi, nungmoq chyáng ru joq nyí sháng gaq.

Jeju Hkya-ôn É Hkyô

- ² Ngamoq gi, hkâ-nhám le, nungmoq banshoq bâng é matú, Garai Gasang lé jeju hkya-on luí, ngamoq é kyûdung dang má nungmoq lé bo dúng lhôm
- ³ nyi lhê. Nungmoq é lumjîng myit mai zui saí é nungmoq é muzó lé le; chyitdap myit é yanmai, nungmoq shikut é hkyô lé le; nga-nhûng é Yhumsîng Yesuq Hkrisduq má myit myoqbyu tô é yanmai, nungmoq hkam jân é hkyô lé le, nga-nhûng é Íwa Garai Gasâng é hí má, ngamoq ru bûn nyi lhê.
- ⁴ Garai Gasang chyitdap é gumang wui ê, Yhang nungmoq lé hkyin yù
- ⁵ bê lé, ngamoq sê lhê. Hkâsu mù gâ le, ngamoq é gabú danglù gi, nhutdang đông za nungmoq chyáng jé é a nghut, wum-o a-tsam đông le, Chyoiyúng Woi-nyí đông le, tengmán hkyô byíng jup é đông le, jé bê nghut é yanmai nghut lhê. Ngamoq, nungmoq eq rahá nyi é hkûn, nungmoq é matú hkâsu kut laí lo é hkyô lé, nungmoq
- ⁶ sé gù nghut lhê. Nungmoq gi, wuîhke jamjau myo myo hui zo kôlhang, Chyoiyúng Woi-nyí byí é gabú myit mai, danglù haû lé lhom yù kôluí,

- ngamoq lé le, haû Yhumsîng lé le, alik
- ⁷ kut yu é bang dut bekô nghut ri. Haû mù, Makedoni mau eq Ahkaia mau mâ é lumjîng bang banshoq é alik,
- ⁸ nungmoq dut bekô nghut ri. Nungmoq chyáng mai, Makedoni mau eq Ahkaia mau má, haû Yhumsîng é mungdang hû htoq ló e za a nghut, Garaí Gasang má nungmoq lumjîng hkyô gi, jowò hkangmó jàm ló bê nghut luí, ngamoq gi, haí le taí nó a ra lo
- ⁹ nghut ri. Hkâsu mù gâ le, ngamoq lé nungmoq hká đông lhom hkulum yu é hkyô lé, yhangmoq yhang, ngamoq lé shit kyo akô. Nungmoq gi, hparà lhô pé lé tô pyám luí, Garaí Gasang shut hkâsu kut lhing lò mù, rû dui nyi é eq tengmán é Garaí Gasang lé do-
- ¹⁰ jaú nyi é hkyô lé le; mauhkûng mâ é haû Yhang Zo lé lánng nyi é hkyô lé le, yhangmoq taí kyô akô. Yhangzo haû gi, Yhang èq shi é mai lhoq dui toq yu é hui luí, jé lô râ nhikmó yo hkyô mai nga-nhûng lé hkyi yù sù, Yesuq nghut ri.

Poluq, Htesaloni Wà Mó Má Garaí Mû Wùn Waq É Hkyô

- 2** Gumang wui ê, nungmoq chyáng ngamoq lé kûm é hkyô gi, akôm a nghut é lé, nungmoq yhang sê lhê.
- ² Nungmoq sê é eq rajung za, ngamoq gi, hí hkûn, Hpilipi wà mó má wuîhke jamjau eq rhoí é huí wú bê nghut lhê; nghut kôlhang, nga-nhûng é Garaí Gasang garúm é yanmai, gyaí lhom htuq hting é hui kôle, Garaí Gasâng é gabú

^a 1:1 Sila lé gi, Salwanu le gâ lhê.

danglù lé, a gyuq a kyum nungmoq lé
³ wám taí kyô é nghut lhê. Hkâsu mù
 gà le, ngamoq lhoq pun lhoq kyíng é
 hkyô gi, shut é, a nghut jáng, a san-
 sêng é i-myt dông eq nungmoq lé
⁴ mhaú zô é dông a nghut e za, haú
 gabú danglù lé chûng gíng é bang ga,
 Garai Gasâng chyáng mai ahkáng wó
 é dông za, ngamoq taí é nghut lhê.
 Ngamoq gi, byu pé lé gabú nhâng
 râ matú a nghut, ngamoq é myit lé
 chyam wú nyi é Garai Gasang lé, gabú
 nhâng râ matú shikut é ru nghut lhê.
⁵ Hkâsu mù gà le, nungmoq sê é eq ra-
 jung za, ngamoq gi, lhoq ngón mhaú é
 dang le hkâ-nhám a chûng wú, nghop
 tô é myoqnoq myit le hkâ-nhám a
 bò, Garai Gasang gi, ngamoq é saksé
⁶ nghut lhê. Ngamoq gi, byu pé mai
 le, nungmoq mai le, gotú ó yuq mai
 le hkya-on râ lé ho nyi é a nghut,
 Hkrisduq é lagyô pé nghut é eq ra-
 jung za, nungmoq lé wòlai hûn nau
⁷ jáng wó hun lhê; nghut kôlhang, înu
 rayuq, yhang é zoshâng zô pé lé hku
 baú é su, nungmoq chyáng nú-nhâm
⁸ é dông nyi laí lò bê nghut lhê. Nga-
 moq gi, nungmoq lé gyai yhang chyit-
 dap luí, Garai Gasâng é gabú danglù
 za a nghut, ngamoq é asak pé nung-
 moq lé byí pyâm le lháng nhik dik lhê;
 hkâsu mù gà le, nungmoq gi, ngamoq
 chyitdap dik é bang dut bekô nghut
⁹ é yanmai nghut lhê. Gumang wuì ê,
 nungmoq gi, ngamoq gyai yhang mù
 zui shikut é hkyô lé, gè gè bun kó
 râ nghut lhê; Garai Gasâng é gabú
 danglù lé, nungmoq chyáng ngamoq
 hko kyô é u lé, ó yuq lé le, ngamoq
 mai wòlai a byi sháng gaq nghû, nga-
 moq gi, nyí lé, myín lé, mù zui é nghut
 lhê.
¹⁰ Ngamoq gi, lumjínng bê bang nung-
 moq é hí má, hkâsu chyoiyúng é eq

dingmán é, mara hûn râ a bo é bang
 dut laí lo é hkyô lé, nungmoq le, Ga-
 rai Gasang le, saksé nghut lhê. Hkâsu
¹¹ mù gà le, ngamoq gi, îwa rayuq mai
 yhumsing yhangzô pé lé kut byí é su,
 nungmoq yuq hkanmó lé, myit wum
 byí nyi é hkyô lé le, nhik taí tîng nyi
¹² é hkyô lé le, Yhang é mingdán eq
 hpungwup shingkang má, nungmoq
 lé wut yu é Garai Gasang eq gingdán é
 dông, nungmoq asak wó dui nyi sháng
 gaq nghû, nungmoq lé wum byí nyi é
 hkyô lé le, nungmoq yhang sê nyi lhê.
¹³ Ngamoq gi, ngamoq chyáng mai
 nungmoq wó gyô yu é Garai Gasâng
 é mungdang lé, nungmoq lhom yu
 é hkûn, byu é dang lé lhom yu é
 dông a nghut e za, lumjínng é bang
 nungmoq má mù zui nyi é, haú Ga-
 rai Gasâng é mungdang lé yhang,
 lhom yù kô é yanmai, Garai Gasang
¹⁴ lé xoq xoq jeju hkya-ôn nyi lhê. Gu-
 mang wuì ê, nungmoq gi, Hkrisduq
 Yesuq má nghut nyi é, Yuda mau má
 joq é Garai Gasâng é noqkuq hpúng
 pé lé, alik kut yu é bang dut bekô
 nghut ri. Noqkuq hpúng haú pé gi,
 Yudaq byu pé zing-rí é lé hui zô é
 su, nungmoq le, yhumsing mau mâ
 é byu pé zing-rí é lé hui zô akô
¹⁵ nghut ri. Yudaq byu pé gi, haú Yhum-
 sîng Yesuq eq myiqhtoí pé lé sat pyâm
 kôluí, ngamoq lé le hkat htoq akô.
 Yhangmoq gi, Garai Gasang a ô nau
 é hkyô kut é bang, byù lhunglháng
¹⁶ eq gyè dut é bang nghut akô. Tûng-
 bàù pé hkyi yù hui râ matú, nga-
 moq hko kyô é hkyô lé, yhangmoq
 hkûm akô; yhangmoq gi, hkâ-nhám
 le, yhumsing é mara lé dik shoq haú
 dông lhoq jat myô yù akô nghut ri.
 Haú mù, Garai Gasâng é nhikmo-yô
 é hkyô gi, yhangmoq ahtoq má jé bê
 nghut ri.

**Htesaloni Byu Pé Lé Poluq
Huí Nau Nyi É Hkyô**

- ¹⁷ Gumang wuì ê, ngamoq gi, rayoq zo nungmoq eq myoqdong byam gânq to kôle, myit gi, a gânq é nghut lhê; nungmoq lé gyai bun-nghâm nyi luí, wó myang hui shoq nghû, ngamoq
- ¹⁸ gyai yhang shikut nyi lhê. Nungmoq chyáng ngamoq jé lé naù mù luí, ngò Poluq yhang, adàm dàm shikut wú bê; nghut kôlhang, Tsadán gi, ngamoq lé hkûm tang pyâm ri. Hkâsu mù gâ le, nga-nhûng é Yhumsîng Yesuq Hkrisduq é hí má, Yhang jé lé é hkûn, ngamoq é myit myoqbyù hkyô, gabú hkyô eq gumrông rà janmaú gi, hái jung wá nghut lhê gâ le, nungmoq yhang nghut nyi lhê a nghut kó lúh?
- ²⁰ Gè gè yhang, nungmoq gi, ngamoq é gumrông jowò eq gabú hkyô nghut nyi ri.
- 3** Haù mù luí, ngamoq gi, haù lé a wó jân nyi lo jáng, Ahten myuq má ngamoq baú nyi gyò le je gè rà nghut lhê nghû, myit hpyit yù mù,
- ² wuìhke jamjau shí pè é yanmai, ó yuq le, myit a hten kó sháng gaq nghû, nungmoq é lumjîng hkyô má, nungmoq lé wum-o byi rà eq myit wum
- ³ byi rà matú, Hkrisduq é gabú danglù lé hko kyô é hkyô má, ngamoq é gumang eq Garai Gasâng é mù wùn luzúm nghut é Timohti lé, nhang kat é nghut lhê. Nga-nhûng gi, wuìhke jamjau pé hui zo rà matú, hkyin to huí é bang nghut é lé, nungmoq yhang rago
- ⁴ sê nyi lhê. Nga-nhûng gi, zing-ri hui zo rà nghut lhê nghû, ngamoq, nungmoq eq rahá nghut nyi é hkûn, noq mai nungmoq lé ngamoq taí kyô nyi gù nghut bê. Nungmoq rago sê é eq rajuq za, haù dông dut bê nghut ri. Hau é yanmai, ngò a wó jân nyi lo jáng,
- ⁵ haù gunglaú sù mai nungmoq lé gung-

laú yù luí, ngamoq wùn waq bê muzò gi, akôm dut byuq rà lé, myit chiq mù, nungmoq é lumjîng hkyô lé wó sé rà matú, yhang lé ngò nhang kat é nghut lhê. Gunglaú sù gi, nat Tsadán nghut lhê.

Timohti Lo Shit Kyô É Wum Byi Dang

- ⁶ Ahkuí kúm, Timohti gi, nungmoq é lumjîng hkyô eq chyitdap myit eq sêng é gabú danglù pé lé, nungmoq chyáng mai ngamoq chyáng wun jé lô byi bê nghut ri. Nungmoq, hkâ-nhâm le, ngamoq lé rago bûn nyi é hkyô lé le; ngamoq, nungmoq lé myàng nau nyi é eq rajung za, nungmoq, ngamoq lé myàng nau nyi é hkyô lé le,
- ⁷ yhang lo taí kyo bê nghut ri. Haù mù luí, gumang wuì ê, ngamoq myit myo uhkyí é hkyô eq zing-ri huí é hkyô pé banshoq má, nungmoq é lumjîng hkyô é yanmai, nungmoq eq séng luí myit wum byí é hkyô lé ngamoq wó
- ⁸ yù bê nghut lhê. Ahkuí, ngamoq gi, haù Yhumsîng má nungmoq yap gânq nyi kô é yanmai, gè gè nyi ngón bê
- ⁹ nghut lhê. Nga-nhûng é Garai Gasâng hí má, nungmoq é yanmai, ngamoq myang hkam yu é gabú hkyô banshoq lé myit kat wú jáng, ngamoq gi, nungmoq é matú Garai Gasang lé hkâsu
- ¹⁰ kut jeju ûng hkyá-on rà lúh? Ngamoq gi, nungmoq lé dum myàng rà matú eq, nungmoq é lumjîng myit má langhpyut é hkyô lé wó lhoq hkúm byi rà matú, nyí, myín, gyai yhang lhumzui luí kyûdûng nyi lhê.
- ¹¹ Nungmoq chyáng ngamoq lé rà matú, nga-nhûng é Yhumsîng Yesuq eq nga-nhûng é Íwa Garai Gasang yhang ngamoq lé hkyô hpóng byi
- ¹² sháng gaq. Nungmoq lé ngamoq chyitdap nyi é su, haù Yhumsîng gi, nungmoq é chyitdap myit lé, rayuq eq

rayuq é ahtôq má le, yuq hkanmó é ahtôq má le, lhoq kô jat, lhoq pyíng
¹³ byi sháng gaq. Nga-nhông é Yhumsing Yesuq gi, Yhông é chyoiyúng bang banshoq eq rahá lé é hkûn, nga-nhông é Îwa Garai Gasâng é hí má, nungmoq gi, mara hûn jowò a joq é eq chyoiyúng é bang dut râ matú, nungmoq é myit nhiklhum má, haû Yhumsing mai wum-o lhoq kíng byî nyi sháng gaq. Yhông é chyoiyúng bang gâ é gi, byù lé, a nghut jáng, maumang lagyô pé lé, taí záng lhê.

**Garai Gasang Ô Nau
É Đông Asak Duì Râ Hkyô**

4 Xoq luí taí nau é gi, gumang wuì ê, ngamoq gi, ahkuí nungmoq cháng nyi é eq rajung za, nungmoq hká đông nyi yap luí, Garai Gasang lé gabú nhông râ hkyô nungmoq lé mhoqshit byi bê nghut lhê. Ahkuí le, ngamoq gi, shí hkyô lé nungmoq hau htoq je wó châng jat râ matú, Yhumsing Yesuq má nungmoq lé dúng tôngbán luí,
² myit wum byi kat lhê. Hkâsu mù gâ le, nungmoq gi, haû Yhumsing Yesuq é ahko ahkáng đông, ngamoq mai, nungmoq lé mhoqshit to byî é hkyô pé lé, sê akô nghut ri.
³ Garai Gasang ô nau é hkyô gi, haû nungmoq sân-yúng é hui râ matú le, ashop é đông gungsho zùm yap é hkyô
⁴ lé koi pyám râ matú le; nungmoq yuq hkanmó gi, haû Garai Gasang lé a sê é, a lumjíng bang kut é su, gungsho yut yut ô nau é hkyô a châng e za,
⁵ haû chyoiyúng é eq hkungga gíng é sù wó dut shoq, yhumsing gùng lé wó
⁶ hkan é hkyô mhoq yû râ matú le; shí hkyô eq séng luí, ó yuq le, yhumsing é gumang lé, a ge shut, a ge lhúngzo râ matú le nghut lhê. Ngamoq, nungmoq lé taí kyo mù, lhoq pun lhoq kying

gù nghut bê eq rajung za, haû Yhumsing gi, haû hkyô shut é banshoq lé,
⁷ dam byi râ nghut lhê. Hkâsu mù gâ le, Garai Gasang gi, nga-nhông lé a sân-yúng é bang dut râ matú wut yu é a nghut, chyoiyúng é đông asak dui nyi râ matú sheq wut yu é ru nghut
⁸ lhê. Haû mù luí, mhoqshit hkyô shí lé he-ngik pyâm é sù gi, byù lé he-ngik é a nghut, haû nungmoq lé, Yhông é Chyoiyúng Woi-nyí byî tô é sù, Garai Gasang lé he-ngik pyâm é sheq ru nghut lhê.

⁹ Rayuq eq rayuq chyitdap lhum râ matú, nungmoq yhang, Garai Gasâng èq mhoqshit é hui bekô nghut é yan-mai, gumang yhangchang chyitdap lhúm é hkyô eq séng luí, ngamoq gi, nungmoq chyáng kê kat byi a ra lo
¹⁰ nghut ri. Haû eq rajung za, nungmoq gi, Makedoni mau gón mâ é gumang wuì banshoq lé chyitdap nyi akô nghut ri. Nghut kôlháng, gumang wuì ê, haû su je myo kut râ matú nungmoq lé ngamoq wum byî lhê.

¹¹⁻¹² Nungmoq é nyí wui lhê é asak duì hkyô má, gotû byu pê èq hkunggâ é wó yû luí, ó yuq lé le, lumhkaû a ra wó dut sháng gaq, hí hkûn nungmoq lé ngamoq taí kyô tô é eq rajung za, num num byù zè râ hkyô lé le, yhumsing eq a séng é hkyô a kut wún râ lé le, yhumsing loq èq zui saí mù nyi râ lé le, nungmoq é myit myoqbyù jowò kut yû keq.

Haû Yhumsing Gyó Lé Râ Hkyô

¹³ Gumang wuì ê, myit myoqbyù hkyô a wó é byù góbang su, nungmoq, iyon ningtsáng a dut kó sháng gaq, haû yhup ngón byuq é bang eq séng luí, nungmoq a sé râ lé, ngamoq a ô nau é nghut lhê. Yhup ngón byuq é bang gâ é gi, lumjíng luí shi ló byuq é bang

- ¹⁴ lé gâ é nghut lhê. Hkâsu mù gâ le, Yesuq shî luí, dum dui toq bê hkyô lé nga-nhúng lumjíng é yanmai, Garai Gasang gi, Yesuq má yhup ngón byuq é bang lé, Yesuq eq rahá shuí lé râ nghut lhê nghû, nga-nhúng lumjíng é nghut lhê. Haû Yhumsíng taí é dang eq rajung za, nungmoq lé nga-moq taí kyo kôlé, haû Yhumsíng dum lé é hkûn, asak dui nyi é eq myit gyo tô é bang nga-nhúng gi, yhup ngón byuq bê bâng htoq ratsuí le wó hí râ a
- ¹⁵ nghut. Hkâsu mù gâ le, haû Yhumsíng yhang gi, htê mó hkunmó èq le, mau-mang lagyo mó é hte èq le, Garai Gasâng é tutmó mut hte èq le, mauhkûng mai gyó lé lô luí, haû Hkrisduq má shi lô bê bang hí dui toq râ nghut lhê.
- ¹⁶ Hau htâng, asak dui nyi é eq myit gyo tô é bang nga-nhúng gi, yhangmoq eq rahá mhut htoq má shuí toq yu é hui luí, maulat má haû Yhumsíng eq hui râ nghut lhê. Haû hkûn, nga-nhúng gi, haû Yhumsíng eq ahtum abyuq nyi
- ¹⁷ nyi berâ nghut lhê. Haû mù luí, nungmoq gi, dang shí pé mai rayuq eq rayuq myit wum byí lhûm nyi keq.
- 5** Nghut kôlhang, gumang wuì ê, ahkýng buinyì eq séng luí, nungmoq lé ngamoq kê hûn byi a ra lo
- ² nghut ri. Hkâsu mù gâ le, haû Yhumsíng é buinyì gi, myín lé hkau sù wang é su jé lé râ nghut é hkyô lé, nungmoq rago za sê akô nghut ri. Yhumsíng é buinyì gi, Yesuq dum jé lé râ buinyì lé
- ³ taí nau é nghut lhê. Byu pé gi, ‘Nguingón yuqyo ri.’ ga taí nyi bùm kô é u lé, gùng laí é myiwe rayuq zohkû-nò no lo é su, htên byoq hkyô gi, byodàn tung yhangmoq chyáng jé luí, hká đông lé yhangmoq wó hpang lut kó râ a nghut.
- ⁴ Nghut kôlhang, gumang wuì ê, nungmoq gi, mauchut hkaû má nyi é

- bang a nghut é yanmai, buinyì haû gi, hkau sù lé é su, nungmoq é matú
- ⁵ byodàn tung dut râ a nghut. Nungmoq lhunglhang bang gi, maubó é yhangzô pé eq nyí é yhangzô pé nghut lhê. Nga-nhúng gi, myín eq mauchut hkaû
- ⁶ eq sêng é bang a nghut. Haû mù luí, nga-nhúng gi, byù góbang su a yhup nyi e za, machyâ luí, gying gying kut
- ⁷ nyí sháng. Hkâsu mù gâ le, yhup é bang gi, myín lé yhup akô; î shuq wut é bang le, myín lé shuq wut akô.
- ⁸ Nghut kôlhang, nga-nhúng gi, nyí eq sêng lhê nghut é yanmai, gying gying kut nyí luí, lumjíng myit eq chyitdap myit lé gi, wànggò-long lé su gò to, hkyi yù hui râ lé myit myoqbyù tô é hkyô lé gi, shamtoq-muq lé su
- ⁹ tsung to, kut sháng. Hkâsu mù gâ le, Garai Gasang gi, Yhâng nhikmo-yô é hkyô lé hkâm zo râ matú, nga-nhúng lé hkyin tô é a nghut e za, nga-nhúng é Yhumsíng Yesuq Hkrisduq mai, hkyi yù hkyô lé nga-nhúng wó yù râ matú
- ¹⁰ hkyin to bê nghut lhê. Yesuq gi, nga-nhúng yhup bún nyi kôlhang, yhup ngón to kôlhang, Yhang eq rahá wó nyi nyi sháng gaq ga, nga-nhúng
- ¹¹ é matú shí hkám byi bê nghut ri. Haû mù luí, nungmoq gi, ahkuí, nungmoq kut nyi é eq rajung za, rayuq eq rayuq myit wum byí lhûm mù, htuqluq htuqbáng kut lhûm nyi keq.

Ló Htâng Lhê É Mhoqshit Hkyô

- ¹² Gumang wuì ê, nungmoq mâ é muzó shikut luí, haû Yhumsíng má nungmoq lé up nyi é eq lhoq pun lhoq kýng nyi é bang lé, nungmoq
- ¹³ hkungga râ matú le; yhangmoq zui saí é muzó jizó é yanmai, yhangmoq lé chyitdap myit đông gyai yhang hkungga râ matú le, nungmoq lé nga-moq sang kat lhê. Nungmoq le, rayuq

- ¹⁴ eq rayuq nguingón lhûm nyì keq. Gumang wuì ê, nungmoq lé ngamoq wum byî kat nau é gi, lagôn é bang lé lhoq pun lhoq kying keq; nhiknge é bang lé myit wum byi keq; wum nyhôm é bang lé htuqluq htuqbáng kut keq; yuq hkangmó lé, i-myt hîng
- ¹⁵ byî nyì keq; Ó yuq lé nghut kôlhâng, a ge é hkyo é yanmai, a ge é dông a taù kut râ lé lhoq pun lhoq kyîng nyì keq; nungmoq rayuq eq rayuq le, góbang banshoq eq le, shikut luí, hkâ-nhám le, ge é hkyô kut byî lhum nyì keq.
- ¹⁶⁻¹⁸ Hkâ-nhám le, ru gabú nyí keq; abyit alan kyúdûng nyì keq; hkyô hkat hkangmó má jeju hkya-ôn nyì keq, hkâsu mù gâ le, haú pé gi, Hkrisduq Yesuq má, nungmoq é matú Garai Gasang ô nau é hkyô pé nghut lhê.
- ¹⁹ Haù Woi-nyí lé hkâlhoq jôm pyám
- ²⁰ kó; myiqhtoi htoî é lé, haì su a ngàm
- ²¹ hkâkut kó. Jung hkangmó lé, chyam wú luí, ge é hkyô lé zuí zing nyì mù,
- ²² agè ashop é hkyô hkangmó lé, koi pyám keq.
- ²³ Nguingón hkyo é apûn awang nghut é Garai Gasang yhang, nungmoq lé, lunglhang lhoq sân-yúng pyám byi sháng gaq; nga-nhûng é Yhumsîng Yesuq Hkrisduq dum lé é hkûn, nungmoq é woi-nyí, myit nhiklhum, gungdu gi, mara hûn râ hkyô a bò
- ²⁴ sháng gaq. Nungmoq lé ji yu é Sû gi, lhumzuí é Sû nghut lhê mù, Yhang, shí hkyô lé kut râ nghut lhê.
- ²⁵ Gumang wuì ê, ngamoq é matú kyû
- ²⁶ bo dung byi kó laq. Gumang wuì banshoq bang lé, chyoiyúng é chyitpuq puq é dông bo shi-kyám byi kó laq.
- ²⁷ Gumang wuì banshoq bang lé, hun kat é laiká shî nghap kyo râ matú, haù Yhumsing é myìng mai, ngò, nungmoq lé pying kat lhê.
- ²⁸ Nga-nhûng é Yhumsîng Yesuq Hkrisduq é jeju gi, nungmoq chyáng ru joq nyí sháng gaq ô!

HTESALONI

Pê Chyáng Htang Dàm Hun Kat é Laiká (2 Thessalonians)

1 Ngò Poluq eq Sila, Timohti pé gi, nga-nhông é Ìwa Garai Gasang eq Yhumsîng Yesuq Hkrisduq má nghut nyí bê bang, haù Htesaloni wà mó byu pê é noqkuq hpúng lé dang kyô kat lhê.

² Haù Ìwa Garai Gasang eq Yhumsîng Yesuq Hkrisduq chyáng mâ é jeju eq ngingón hkyô gi, nungmoq chyáng ru joq nyí sháng gaq ô!

Jeju Hkya-on É Eq Kyûdung É Hkyô

³ Gumang wuì ê, ngamoq gi, hkâ-nhám le, nungmoq é matú Garai Gasang lé jeju hkya-on rà dut ri; haù gi, gíng lhê; hkâsu mù gà le, nungmoq é lumjîng myit gi, je je kô jat lo nyí luí, nungmoq yuq hkanmó é chyt-dap myit le, rayuq eq rayuq é ahtoq má je myô jat lo nyi é yanmai nghut

⁴ lhê. Haù mù luí, ngamoq gi, nungmoq zing-ri huí é hkyô pé eq wuífke jam-jau huí é hkyô pé banshoq lé, nungmoq wó jân nyí kô é yanmai, nungmoq é hkam jan hkyô eq lumjîng hkyô lé, Garai Gasang é noqkuq hpúng pê é hí má gumrong nyi lhê.

⁵ Shí hkyô banshoq gi, haù Garai Gasang dingmán é dông jéyáng é hkyô lé saksé tân shit é nghut lhê; haù mù luí, nungmoq gi, Garai Gasang é mingdán é matú wuífke jamjau hui zo bekô nghut é yanmai, mingdán haù eq gingdán é bang gà é hui kó

⁶ rà nghut lhê; Garai Gasang gi, tengmán Sû nghut lhê; haù mù, nungmoq lé jamjau byí é bang lé, Yhang mai

⁷ jamjau byi rà eq, jamjau huí nyi é bang nungmoq lé le, ngamoq lé le

lhoq lhut byi rà nghut lhê. Shí hkyô gi, haù Garai Gasang lé a sê é bang eq nga-nhông é Yhumsîng Yesuq eq sêng é gabú danglù lé a gyo a châng é

⁸ bang lé, jéyáng rà matú, haù Yhumsîng Yesuq, wum-o a-tsam byíng é Yhâng é maumang lagyô pé eq rahá, myishâm eq mauhkông mai htoq shit

⁹ é hkún, dut rà nghut lhê. Yesuq jé lé lô mù, Yhâng é chyoiyúng bang má hpungwup shingkan wó yu é eq lumjîng bang banshoq mai mauhong é huí é buinyì má, yhangmoq gi, htên byoq hkyô lé ahtum abyuq jéyáng é

¹⁰ hui zo kó rà nghut lhê. Hau htoq agó, haù Yhumsîng é hí mai le, Yhâng é a-tsam kô làm é mai le, lhoq kâng pyâm é hui kó rà nghut lhê. Nga-moq é saksé dang lé nungmoq lumjîng bekô nghut é yanmai, haù lumjîng bang má nungmoq le lòm bekô nghut lhê.

¹¹ Haù mù luí, nga-nhông é Garai Gasang gi, nungmoq lé, Yhang ji yu é hkyô eq gingdán ri ga rà le, haù Yhang é wum-o a-tsam mai, nungmoq myit tô é ge é hkyô hkanmó eq nungmoq é lumjîng myit eq sêng é muzó lhumjup lé, lhoq dik byi sháng gaq nghù le, nungmoq é matú, hkâ-nhám

¹² le, ngamoq kyûdung byí nyi lhê. Nga-moq haù su dung byí nyi é hkyô gi, nga-nhông é Garai Gasang eq Yhumsîng Yesuq Hkrisduq é jeju yanmai, haù nga-nhông é Yhumsîng Yesuq é myìng gi, nungmoq má hkya-on waq toq é wó hui mù, nungmoq gi, Yhang má hkya-on waq toq é wó hui kó rà matú nghut lhê.

A Tara É Sû

2 Gumang wuì ê, haù nga-nhûng é Yhumsîng Yesuq Hkrisduq dum lé râ hkyô, Yhang eq nga-nhúng rahá zup nyi to râ hkyô eq séng luí, nungmoq lé ngamoq pying kat nau é gi,
² haù Yhumsing é buinyì gi, jé to gù nghut bê gâ é myiqhtoi dang, lu-hkyang, laiká pé rajung jung, ngamoq chyáng mâ é nghut lhê ga nungmoq chyáng jé é nghut jáng, nungmoq é myit luí za hkâduí kó, hkâgyuq dàn
³ kó. Hkâsu mù gâ le, haù htên byoq é yhangzo nghut é a tarâ Sû htoq shit luí, haù gumlau toq é hkyô hí a htoq htoq gi, buinyì haù jé râ a nghut, haù mù luí, nungmoq lé, ó yuq èq, hká dông mai mhaù kôlhang hkâjîng kó.
⁴ Haù yuq gi, Garai ga noqkuq huí é zè lhunglhang lé htuq htíng luí, haù pé banshoq é htoq má yhanggùng yhang lhoq gyaú yû râ nghut lhê; haù mù luí, Garai Gasâng é noqkuq yhûm má zung to luí, yhanggùng yhang Garai Gasang nghut lhê ga taí râ nghut lhê.
⁵ Ngò gi, nungmoq eq rahá nyi tô é hkûn, shí hkyô pé lé lhaq taí kyo kyo kut é hkyô lé, nungmoq a bun lo kó
⁶ lhú? Haù yuq gi, ahkyíng yam-yoq jé jáng sheq htoq shit sháng gaq ga, ahkuí, yhang lé hai èq hkûm zing tô
⁷ é hkyô lé, nungmoq sê lhê. Haù a tara é hkyo é haq dâ é a-tsam gi, mù zui nyì gù nghut bê; nghut kôlhang, haù lé hkûm zing nyì sù gi, hui htot pyám huí é hkûn jé shoq, haù lé hkûm zing nyì shirâ nghut lhê.
⁸ Haù hui htot pyám huí é hkûn, a tarâ Sû htoq shit râ nghut lhê; haù Yhumsîng Yesuq kúm gi, Yhâng nhut mâ é soq èq yhang lé sat pyám râ eq, Yhang gyó lo u lhê é hpungwup mó èq, yhang lé lhoq htên pyám râ nghut
⁹ lhê. Haù a tarâ Sû lé lo é gi, Tsadán

a-tsam dông laklaí kumlhá pé, kumlhá pé, mauhpo muzó pé ajung jung
¹⁰ kut mhaù é eq, htên byoq huí nyi é bang lé mhaù zo râ agè ashop é hkyô jung hkangmó lé tûn shit râ nghut lhê. Yhangmoq htên byoq é gi, haù tengmán hkyô lé chyitdap luí hkyi yù hui râ nghut é hkyô lé he-ngik pyám kô é
¹¹ yanmai nghut ri. Hau é yanmai, Garai Gasang gi, haù tengmán hkyô lé a lumjîng e za agè ashop hkyô má ô nau é lhunglhang bang mara byí é hui kó
¹² sháng gaq ga, mhaù é dang lé jîng kó râ matú, a-tsam mó bo é lum shut râ hkyô lé, yhangmoq chyáng nhâng byi bê nghut ri.

Mhoqshit é hkyô má gîng nyì râ hkyô

¹³ Nghut kôlhang, haù Yhumsîng chyitdap é gumang wuì ê, ngamoq gi, hkâ-nhám le, nungmoq é matú Garai Gasang lé jeju hkya-on râ dut ri. Hkâsu mù gâ le, haù Woi-nyí èq lhoq sân-yúng nyi é muzó dông le, tengmán hkyô lé lumjîng é dông le, hkyi yù hui râ matú, Garai Gasang gi, nungmoq lé, sâng-hi mai hkyin yù
¹⁴ bê nghut ri. Yhang gi, nga-nhûng é Yhumsîng Yesuq Hkrisduq é hpungwup shingkang má, nungmoq wó bo lóm shoq ga, ngamoq é gabú danglù dông nungmoq lé shí hkyô má ji yù bê
¹⁵ nghut lhê. Haù mù luí, gumang wuì ê, nhutdang dông nghut nghut, laiká dông nghut nghut, nungmoq lé ngamoq lai byí é mhoqshit hkyô lé zuí gîng nyì luí, ging ging yap nyì keq.
¹⁶ Yhâng é jeju yanmai, nga-nhúng lé, ahtum abyuq é myit wum byi hkyô eq ge é myit myoqbyù hkyô lé byí é, nga-nhúng lé chyitdap é, nga-nhúng é Íwa Garai Gasang eq nga-nhúng é
¹⁷ Yhumsîng Yesuq Hkrisduq gi, nungmoq é i-myt má wum byi luí, ge

é muzó eq ge é nhutdang lhumjup má, nungmoq lé wum-o lhoq kóng byi sháng gaq ô!

**Kyû Dung Byi Râ Matú
Lung Kat É Hkyô**

3 Gumang wui ê, je htâng má pying kat nau é hkyô gi, nungmoq chyáng dut wú bê eq rajung za, haû Yhumsing é mungdang gi, hân hân byo myín ló mù, lhoq gyaú é hui sháng gaq, ngamoq é matú kyû bo
² dung byi kó laq. Yuq hkanmó gi, lumjóng myit bo é a nghut é yanmai, haû achay agè ashop é byu pê chyáng mai ngamoq wó lut râ matú
³ le, kyû bo dung byi kó laq. Nghut kôlhang, haû Yhumsing gi, lhumzui é sù nghut é yanmai, Yhang nungmoq lé wum-o lhoq kóng byi mù, haû agè ashop su chyáng mai nungmoq
⁴ lé hung yù râ nghut lhê. Nungmoq gi, ngamoq pying tô é dang pé lé kut nyí mù, xoq lui le kut nyí râ nghut lhê nghû, haû Yhumsing má
⁵ ngamoq hkyak myit lum tô lhê. Haû Yhumsing gi, nungmoq lé Garai Gasâng é chyitdap hkyô eq Hkrisduq é hkam jân é hkyô má, shuí wàng sháng gaq ô!

Mû Zui Shikut Râ É Hkyô

⁶ Gumang wui ê, ngamoq gi, ngamoq chyáng mai nungmoq hap yù bê ngamoq mhoqshit é hkyô dông a nyi yap é eq lagôn é gumang ó yuq eq le, we we nyi keq nghû, haû Yhumsing Yesuq Hkrisduq é mying mai nungmoq lé
⁷ hkunmó hkyô kat lhê. Hkâsu mù gâ le, ngamoq kut é alik lé hkâ dông cháng râ dut é gi, nungmoq yhang sê lhê. Ngamoq gi, nungmoq eq rahá nyi tô é hkûn, lagôn é hkyô a bo wú é htoq
⁸ agó, ó yuq é zoshuq lé le, ngùn a byi

a zo wú é nghut lhê. Nungmoq má ó yuq lé le wòlai a byi sháng gaq nghû, ngamoq gi, muzó shikut hkyô eq wui-hke hkyô má, nyi lé, myín lé, zui saí é
⁹ nghut lhê. Ngamoq gi, nungmoq lé garúm nhâng râ ahkáng a wó é a nghut, yhumsing gùng lé nungmoq cháng râ matú alik dut sháng gaq nghû sheq,
¹⁰ haû su kut é ru nghut lhê. Hkâsu mù gâ le, ngamoq, nungmoq eq rahá nyi é hkûn, “Mû a kâm zui sù gi, a zo sháng gaq.” nghû, nungmoq lé ngamoq mai sang to bê nghut lhê.
¹¹ Hkâsu mù gâ le, nungmoq chyáng má é byù ra-am lagon lui, haû mû le a zui e za, mû châng lhoq gyô byí wún akô gâ é hkyô lé, ngamoq wó gyô
¹² é yanmai nghut lhê. Ngamoq gi, haû su kut é bang lé, zim za nyi mù zui saí lui, yhumsing é zoshuq ho nyi kó sháng gaq nghû, haû Yhumsing Yesuq Hkrisduq é mying lé lang lui, hkunmó
¹³ hkyô kat mù, wum byí kat lhê. Gumang wui ê, nungmoq kúm gi, ge é muzó kut é hkyô má, hkâ-nhám le, hkâ-ngú byuq bùm kó.
¹⁴ Byù rayuq yuq gi, laiká shí má ngamoq mhoqshit é hkyô lé, a châng é nghut jáng, haû yuq lé rago chôm matsing yù mù, yhang hoq bun sháng
¹⁵ gaq, yhang eq hkâzûm yap kó. Nghut kôlhang, yhang lé gyè rayuq dông a sôn e za, gumang rayuq dông lhoq pun lhoq kyîng nyi keq.

Ló Htâng Lhê É Shi-kyám Dang

¹⁶ Haû nuingón hkyo é Yhumsing yhang gi, ahkying hkanmó eq hkyô hkat hkanmó má, nungmoq lé nuingón hkyô byí nyi sháng gaq. Haû Yhumsing gi, nungmoq banshoq bang eq ru nyi nyi sháng gaq.
¹⁷ Ngò, Poluq gi, ngá é loq mai yhang shi-kyám dang shí lé kê kat lhê; shí

3:18**2 Htesaloni****399**

gi, ngò kê é laiká banshoq má kumlhá
nghut lhê. Ngò kê é gi, shí dông chyat
nghut lhê.

¹⁸ Nga-nhông é Yhumsîng Yesuq
Hkrisduq é jeju gi, nungmoq banshoq
bâng chyáng ru joq nyî sháng gaq ô!

TIMOHTI

Chyáng Hî Dàm Hun Kat é Laiká

(1 Timothy)

1 Nga-nhûng é hkyi yù Sû Garai Gasang eq nga-nhûng é myit myoqbyù jang nghut é Hkrisduq Yesuq é hkunmó eq rajung za, Hkrisduq Yesuq é lagyo nghut sù, ngò Po-luq gi, haù lumjúng hkyô má ngá zo sîng nghut sù, Timohti lé dang kyô kat lhê; haù Îwa Garai Gasang eq nga-nhûng é Yhumsîng Hkrisduq Yesuq chyáng mâ é, jeju eq shogyo nhikmyin hkyô, nguingón hkyô gi, náng chyáng ru joq nyí sháng gaq ô.

Sará Pyoq Pé Lé Sidiq Râ Hkyô

3 Ngò, Makedoni mau má jé wang ló é hkûn, pying to hkô é eq rajung za, Ehpesu myuq má nyi to shi aq; haù hkûn sheq, nàng gi, shut shai é mhoqshit hkyô lé mhoqshit é bang a **4** mhoq xoq lo râ matú le, myit htoq mhô-myi dang eq a dat htûm é byù xik labaù má yhangmoq a ap nóng râ matú le, haù bang lé hkunmó wó hkyô râ nghut lhê. Haù hkyô pé gi, lumjúng myit mai kut htoq é Garai Gasâng é muzó lé lhoq htoq râ malaî, mabyoq jishûm za sheq lhoq htoq nyi **5** é nghut lhê. Haù hkunmó hkyô luí myit myoqbyu tô é hkyô gi, chyitdap myit yhang nghut ri; chyitdap myit haù gi, sansêng é i-myt, mara a bò bún é myit eq lumjúng myit akying **6** mai lo é nghut lhê. Byù ra-am gi, haù hkyô pé mai htoq ló kôluí, dang-sôm taí é hkyô shut lhing ló byuq **7** bekô nghut ri. Haù bang gi, jep é tarâ sará pé dut naù kôlhang, yhangmoq haù taí nyi é hkyô lé le, hkyak,

haù lé mhoqshit é hkyô lé le, a sé kó nghut ri.

8 Rayuq yuq, jep é tarâ lé rago chung é nghut jáng, jep é tarâ gi, ge é hkyô **9** nghut é lé, nga-nhúng sê lhê. Haù jep é tarâ gi, dingmán bâng é matú tô tô é a nghut e za, tarâ lu laí é bang eq gumlau toq bâng é matú, tarâ a hkunggâ é bang eq mara kut bâng é matú, a choyiyúng é bang eq lumjúng hkyô a cháng bâng é matú, yhangmoq é yhângwa lé nghut nghut, yhângnu lé nghut nghut, sat pyám bâng é matú, **10** byù sat bâng é matú, ashop é dông gungsho zùm yap é bang eq yuqgè yhangchang nyi zo lhum bâng é matú, jùn dông byù ung zo bang, mhaù é bang eq dakam mhaù bâng é matú, tengmán mhoqshit hkyô eq shai lhum é lhunglhang bâng é matú sheq, jep é tarâ tô tô é nghut é lé, nga-nhúng **11** sê lhê. Tengmán mhoqshit hkyô haù gi, hkungsô wó é Garai Gasâng èq ngo lé ap byi bê nghut é, Yhâng é hpungwup bo é gabú danglù eq rajung za nghut ri.

Poluq Chyáng Yhumsîng É Jeju Joq Nyi É Hkyô

12 Ngò gi, ngo lé wum-o byí é, nga-nhûng é Yhumsîng Hkrisduq Yesuq lé jeju hkya-ôn lhê; hkâsu mù gâ le, Yhang gi, ngo lé lhumzui sù rayuq dông sôn yù luí, Yhâng é muzó jizó má hkyin kat yu é yanmai **13** nghut lhê. Hí hkûn, ngò gi, Garai Gasang lé taí hpoi sù, zing-ri sù eq byù rhoí sù nghut wú kôlhang, a sé shi mù lumjúng myit a bo e za kut é yan-

mai, shogyo nhikmyîn yu é hkyô lé
¹⁴ ngò wó yu é nghut lhê. Nga-nhúng é
 Yhumsîng é jeju lé le, Hkrisduq Yesuq
 eq sêng é lumjîng myit eq chyt-
 dap myit lé le, ngá chyáng agùn agó
 hut hkyô kat byi bê nghut ri.

¹⁵ Yubak dap bang lé hkyi yù râ matú,
 Hkrisduq Yesuq gi, mingkan má jé lé
 bê gâ é dang gi, lumjîng é mungdang
 nghut luí, gè gè yhang lhom yù gîng é
 dang nghut lhê. Haú yubak dap bang
 má, ngò gi, yubak je ko sù nghut é

¹⁶ nghut lhê. Nghut kôlhâng, Hkrisduq
 Yesuq gi, Yhang lé lumjîng luí ahtum
 abyuq é asak lé wó yù râ bâng é alik
 dut râ matú, yubak dap bang má yu-
 bak je ko sù nghut é, ngá é ahtoq má,
 Yhâng é hkam jan hkyô lhunglhâng
 wó tûn shit sháng gaq ga, Garai Ga-
 sang gi, ngo lé shogyo nhikmyîn yu ri.

¹⁷ Haú mù, haú aróng eq hpungwup
 shingkang gi, ahtum abyuq é, a dat
 htên byoq é, myoq èq a byu-myang
 é Hkohkâm nghut sù, rayuq zâ é Ga-
 rai Gasâng chyáng pyat dedu ahtum
 abyuq ru joq nyí sháng gaq ô! Amen.

¹⁸ Ngá zo Timohti ê, nàng eq séng luí
 myiqhtoi dang joq wú é eq rajung
 za, ngò gi, nang lé haú dông mhoq-
 shit kat lhê; haú mù, nàng gi, haú
 pé lé chung nyí luí, ge é majan zan

¹⁹ mù, lumjîng myit eq mara a bò bûn
 é myit bo nyí sháng gaq. Byù ra-am
 gi, haú hkyô pé lé he-ngik pyám kô é
 nghut luí, yhangmoq é lumjîng myit
 gi, wui-sanghpo htên byoq ló é su

²⁰ htên byoq byuq bekô nghut ri. Haú
 bang má, Humenu eq Alesander le
 bò kômù, Garai Gasang lé taí hpoí
 é dang a taí râ matú mhoq yù kó
 sháng gaq nghù, ngò, yhangnhik lé
 Tsadán é loq má ap pyám bê nghut
 lhê.

Noqkuq Hkyô Eq Séng Luí Mhoqshit Byí É Hkyô

2 Haú mù luí, ngò, hí pying kat nau
 é gi, tarâ hkunggâ é eq hkungga
 gîng é hkyô banshoq má, nga-nhúng
 wó nguingón yuqyo nyí sháng gaq,
 hkohkâm pé eq ahkáng ayá wó bang
² banshoq é matú le, yuq hkangmó é
 matú le, dúng tóngbán byi, kyúdung
 byi, dúng xoq byi, jeju hkya-on byi,
³ kut aq nghù nau ri. Haú gi, ge é hkyô
 nghut mù, nga-nhúng é hkyi yù Sù
 Garai Gasang ô nau é hkyô nghut ri.
⁴ Yhang gi, byù lhunglhâng bang hkyi
 yu é hui mù, tengmán é mungdang lé
⁵ sê gyo râ lé, ô nau nyi ri. Hkâsu mù
 gâ le, Garai Gasang gi, rayuq za nghut
 luí, Garai Gasang eq byu é gyoro
 má sô xoq byi sù le rayuq za nghut
 lhê; haú yuq gi, xângzo byù nghut é
⁶ Hkrisduq Yesuq nghut ri. Yhang gi,
 byù lhunglhâng bâng é matú shihtáí
 gunglik hkungga dông Yhânggùng lé
 byí pyám bê nghut ri; haú gi, ahkýing
 yam-yoq jé é hkûn, saksé htoq shit
⁷ bê nghut lhê. Ngò gi, tûngbaù pé lé,
 tengmán é lumjîng hkyô mhoqshit râ
 matú, hkô kyo sù rayuq eq lagyo ra-
 yuq dông hkyin tô é hui sù nghut lhê.
 Ngò, haú su taí é gi, mhaú taí é a
 nghut, têng é hkyô lé za taí nyi é ru
 nghut lhê.

⁸ Yuqgè wui gi, nhikjum yô é hkyô eq
 dang htíng htíng lhûm é hkyô a bo e
 za, jowò hkangmó má chyoiyúng é loq
 tû mù kyúdung râ lé, ngò ô nau ri.

⁹ Myiwe wui gi, xâm nik nik é, hîng
 zè, palhé, hpaú jung mebû èq a mhôn
 chung e za, siri bo é mebu wut chûng
 mù, tap tap za, shuq shuq za kut luí,

¹⁰ Garai Gasang lé noqkuq é myiwe wui
 eq gîng shoq, ge é muzó èq yhumsing
 gùng lé mhôn nyí râ lé le, ngò ô nau ri.

- ¹¹ Myiwe gi, uphkanġ tō é dōng chāng nyì mù, zim za mhoq yū kó sháng gaq.
- ¹² Myiwe gi, yuqgè lé mhoqshit rā hkyô lé le, yuqgè lé uphkanġ rā hkyô lé le, ngò ahkáng a byi; myiwe gi, zim za
- ¹³ kut nyì ra rā nghut lhê. Hkâsu mù gâ le, Adam lé hí hpan to mù, Ewaq lé
- ¹⁴ hpan é ru nghut lhê. Hau htoq agó, Adam gi, mhaû é hui zo sū a nghut; haû myiwe sheq mhaû é hui zo luí, mara kut shut é ru nghut lhê. Nghut kôlhāng, myiwe wuì gi, lumjínġ myit, chyitdap myit eq chyoyíung hkyô má, shuq shuq za kut mù, yhangmoq xoq chāng nyì kô é nghut jáng, zoshāng hku é dōng mai hkyi yu é hui kó rā nghut lhê.^a

**Hpúng-up Eq Hpungtê
Kut Rā Bāng É Hkyô**

- 3** Rayuq yuq, hpúng-up ayá lé ô nau nyi é nghut jáng, haû yuq gi, aróng wó é muzó lé ô nau nyi ri gâ é dang gi, lumjínġ é dang nghut nyi ri.
- ² Haû mù luí, hpúng-up rayuq gi, mara hūn rā hkyô a bo é sū, myiwe rayuq za wó é sū, dat sidíq é sū, yhumsing gūng lé wó hkanġ é sū, hkungga gínġ é sū, byù bíng lé dat hkulum é sū,
- ³ dat mhoqshit é sū, íhpê é jùn a dut é sū, byoq lhum byoq cheq a kut e za nūm é sū, mabyoq jishūm a lhoq htoq é sū, ngunzè lé a chyitdap é sū,
- ⁴ nghut rā lhê. Yhang gi, yhāng é ikun lé rago dat uphkanġ luí, yhang zô pé mai hkungga myit bo é èq yhāng dang
- ⁵ lé gyo byí é sū le, nghut rā lhê. Rayuq yuq, yhumsing é ikun lé lhāng a dat uphkanġ é nghut le gi, Garai Gasāng é noqkuq hpúng lé gi, hkâsu kut wó wú
- ⁶ gon rā lhú? Chángzo dut é a myáng shi é sū gi, hpúng-up wó kut rā a nghut,

- kut é nghut jáng, yhang gi, nghutbūn lò luí, jéyáng é hkyô lé nat Tsadán hui
- ⁷ zô é su hui zo abe. Hpúng-up rayuq gi, tūngbaù pé hí má ge é myíng wó é sū le dut rā lhê; haû jáng, yhang gi, taí hpoí pyām é lé le a hui, nat Tsadán é tuihkyô má le a myí, dut rā nghut lhê.
- ⁸ Haû eq rajung za, hpungtê pé gi, hkungga gínġ é bang, shô-kó a xān é bang, íhpê é jùn a dut é bang, a tengmán é amyat lé a ho é bang, nghut rā
- ⁹ lhê. Yhangmoq gi, lumjínġ hkyô má é nik é mauhpo tengmán hkyô pé lé, sansēng é i-myt èq chāng nyì ra rā
- ¹⁰ nghut lhê. Yhangmoq gi, chyam é lé hí huí wú kó sháng gaq, hau htāng, yhangmoq lé mara hūn rā hkyô haí a bò lo jáng, hpungtê mù lé wùn kó sháng gaq.
- ¹¹ Haû eq rajung za, yhangmoq é yhumsing myhí pé le, myit no nhang é dang a taí e za, dat sidíq é eq hkyô hkanġmó má lumjínġ luí, hkungga gínġ é myiwe wuì, nghut ra rā dut lhê.
- ¹² Hpungtê rayuq gi, myiwe rayuq za wó é sū, yhangzô pé eq yhāng ikun lé rago za dat wùn waq é sū, dut ra
- ¹³ rā nghut lhê. Hpungtê mù lé rago za wùn waq bê bang gi, yhumsing é matú aróng lé le, Hkrisduq Yesuq lé yhangmoq lumjínġ hkyô má, gyuq kyum é hkyô a bo é myit mó lé le, hkyak wó yu akò nghut ri.
- ¹⁴ Ngò gi, hkâ-myhāng a myáng má nāng chyáng lé jé rā matú, myit myoq-byu to kôlhāng, ahkyíng du myáng
- ¹⁵ pyām le, Garai Gasāng é ikun hkaû má, byu pé hká dōng nyì yap rā é hkyô lé, nāng sé sháng gaq nghū, pying kat é dang shi pé lé ká byí kat lhê; ikun haû gi, rú dui nyi é Garai Gasāng é noqkuq hpúng nghut luí, tengmán

^a 2:15 Apūn 3:16

hkyo é hkungmó-zîng eq apûn awang
 16 nghut ri. Tarâ hkungga hkyo é zaú tô
 é hkyô gi, ko dik é nghut é lé, ó yuq
 le wó he-ngik pyâm é a nghut;

haû gi, Yhang, byù gungsho má
 htoq shit mù, haû Woi-nyí mai
 Yhang lé saksé hkám byi luí,
 maumang lagyô pé gi, Yhang
 lé myàng bê nghut ri;

byuhú ahú hú má Yhâng é
 hkyô lé hko kyo mù, Yhang
 lé mingkan byu pé lumjîng
 luí, hpungwup shîngkang eq
 Yhang lé mauhkûng shut shuí
 toq yû bê nghut ri.

Timohti Lé Mhoqshit É Hkyô

- 4** Jihtûm buinyì pé má, byù ra-am
 gi, lumjîng hkyô mai htak htoq lô
 luí, mhaú zô é woi-nyí pê htâng cháng
 kó râ eq nat gang mai lo é mhoqshit
 hkyô pé lé gyo byi kó râ nghut lhê ga,
 2 haû Woi-nyí gi, san za taí ri. Haû sù
 é mhoqshit hkyô pé gi, gegùn labyoq
 kut é byù-mhaû pê chyáng mai lo é
 nghut lhê; haû bâng é myit nhiklhum
 gi, nyhê nhe tô é shamtoq èq nyhê
 man tô é su dut byuq bê nghut ri.
 3 Haú bang gi, hâng lhûm é hkyô lé
 hkûm tang é hkyô lé le, haû lumjîng
 luí tengmán hkyô lé sê é bang mai jeju
 hkya-on mù hap yù ge é, Garai Ga-
 sang hpan to byí é zoshuq lé koi pyám
 4 nhang é le, kut akô nghut ri. Garai
 Gasang hpan tô é lhunglháng gi, ge é
 chyat nghut ri; Garai Gasâng é mung-
 dang eq kyúdüng é dang dông haú pé
 lé lhoq sân-yúng nyi é nghut é yan-
 5 mai, jeju hkya-on luí hap yu é nghut
 le gi, haí jung lé lháng he-ngik pyám
 râ hkyô a bò nghut ri.
 6 Haû gumang wui lé, nàng haú hkyô
 pé lhoq pun lhoq kyîng é nghut le
 gi, nàng gi, haû nàng cháng bê ge é

mhoqshit hkyô eq lumjîng hkyô mâ
 é tengmán hkyô má, kô myhâng sù
 nàng nghut râ htoq agó, Hkrisduq
 Yesuq é ge é hpungmû wùn sù le dut
 7 râ nghut lhê. Garai a bo é myit htoq
 mhô-myi dang eq hpô-myhí mâng pê
 é mhô-myi dangsôm lé koi pyám luí,
 tarâ hkunggâ é hkyô má yhumsing
 8 gùng lé lhoq kûng yù aq. Hkâsu mù
 gâ le, gungsho lé lhoq kûng é hkyô gi,
 akyû shau za htoq é nghut lhê; nghut
 kôlhâng, tarâ hkunggâ é hkyô kúm
 gi, jung hkangmó é matú akyû bo lhê
 nghut mù luí, shí ipyat má le, htang
 pyat má le, akyû bo nyi ri.

9 Haû gi, banshoq hap yù gíng é, lum-
 10 gíng é mungdang nghut lhê. Haû mù
 luí, xângzo byù banshoq bâng é hkyi
 yù Sù nghut é, je riyhâng, lumjîng
 bâng é hkyi yù Sù nghut é, rû dui
 nyi é Garai Gasang má, nga-nhúng,
 myit myoqbyu to bê nghut é yanmai,
 nga-nhúng gi, gyai yhang shikut nyi
 lhê.

11 Haú pé lé, hkunmó hkyó luí mhoq-
 12 shit byí nyi aq. Náng é zorâm pyat lé,
 ó yuq èq le a wú tiq pyám sháng gaq,
 dang taí é má le, nyi yap é hkyô má le,
 chyitdap é hkyô má le, lumjîng hkyô
 má le, sansêng é hkyô má le, lumjîng
 13 bâng é matú alik kut shit nyi aq. Náng
 chyáng ngò jé lé é buinyì jé shoq, nàng
 gi, Chyúmdang nghap kyô é má le,
 hko kyô é má le, mhoqshit é má le,
 14 ap nóng nyi aq. Nàng gi, hpúng su-
 wún wui náng é ahtoq má loq ke byí é
 hkûn, myiqhtoi dang dông nang lé Ga-
 rai Gasang byí to bê nghut é, woi-nyí
 hkyô eq sêng é chyunghuq lé, haí su a
 ngàm hkâkut pyám.

15 Haú hkyô pé lé, myit zîng zuq luí zui
 saí nyi aq; nàng kô myhang lo é hkyô
 lé, yuq hkangmó byu-myàng kó sháng
 gaq, náng gûng banshoq haú pé má ap

¹⁶ nong nyi aq. Náng é asak duì hkyô má le, nàng mhoqshit é hkyô má le, rago sidìq nyi aq. Haú pé má ru gíng nyi aq, hkâsu mù gâ le, nàng haú su kut é nghut jáng, náng é asak lé le, náng chyáng mai gyô yu é bang lé le, nàng wó hkyi yù rà nghut lhê.

**Suwún Wuì, Chuimó Pé, Jùn Pé Eq
Séng Luí Hpaqchyí Byí É Hkyô**

5 Asak ko sù lé dang htân a tân e za, yhumsing é îwa lé su, yhang lé lhoq pun lhoq kying aq. Zorâm wuì lé gi, gumang wuì lé su, asak kô é myiwe wuì lé gi, înú pé lé su zùm yap luí, zomyi wuì lé gi, nhammó wuì lé su sansêng é i-myt banshoq èq zùm yap nyi aq.

³ Gè gè yhang garúm rà dut é chuimó
⁴ myhí pé lé, hkunggâ nyi keq. Nghut kôlhang, chuimó myhí rayuq yuq gi, zoshâng nghut nghut, gashu nghut nghut, wó é nghut jáng, haú bang gi, yhumsing é ikun lé wú gon luí, înu îwa eq îchyí îwhoí pé lé jeju taú é dông, yhangmoq é lumjíng hkyô lé, zui saí é má lhoq mhán nhâng rà lé hí mhoq yú ra rà nghut lhê; hkâsu mù gâ le, haú gi, Garai Gasang ô nau
⁵ é hkyô nghut ri. Haú lum rà ó yuq le a wó mù, gè gè yhang rà tô é chuimó myhí gi, Garai Gasâng chyáng myit myoqbyu nyi luí, nyí, myín xoq xoq kyúdung mù, Garai Gasang garúm rà hkyô lé dúng nyi ri. Nghut kôlhang, ngón hkyô za cháng luí asak dui é chuimó myhí gi, asak dui nyi kôlhang, shí gù nghut bê nghut ri.
⁷ Yhangmoq lé, ó yuq èq le mara a hùn kó sháng gaq, haú hkyô pé lé le mhoqshit byí nyi aq. Rayuq yuq, yhâng é buinùm ji-myi wuì lé a baú é htoq agó, je luí yhumsing é ikun byù lé a baú é nghut le gi, haú lumjíng hkyô

lé he-ngik pyám bê nghut luí, a lumjíng su htoq má je ashop é sù dut bê nghut ri.

⁹ Hkyuq xê zàn byíng bê é chuimó myhí za a nghut jáng, chuimó jihpán má wó kat rà a nghut; hau htoq agó, yhang gi, yuqgè rayuq za wó wú é sù;
¹⁰ zoshâng wuì lé hku baú é sù, bíng lé rago dat hkulum é sù, sâñ-yúng bê bang é hkyí lé chi byí é sù, wuì-hke huí tô é bang lé garúm luí, ge é muzó junghkang jungmó má yhum-sing gùng yhang ap nóng nyi ri ga, yhang kut é ge é muzó má myíng hú é sù le, nghut rà lhê.

¹¹ Asak tiq é chuimó myhí pé lé, jihpán haú má hkâkat. Hkâsu mù gâ le, gungsho ô nau é hkyo èq Hkrisduq chyáng yhangmoq ap nóng tô é hkyô lé ung pyâm é hkûn, yhangmoq gi, myi ló
¹² naú kó rà nghut lhê. Haú mù, yhangmoq gi, sâng-hi lé yhangmoq tô tô é danggidiq lé lhoq hpyoq pyám kô é yanmai, tarâ darâ é hui zo kó rà nghut
¹³ lhê. Hau htoq agó, yhangmoq gi, rayhûm htâng rayhûm châng wang wún kômù, lagôn mán byuq kó rà nghut lhê. Lagôn é bang za dut kó rà a nghut, lumù gansang é bang eq yhangmoq taí a ge é pé lé taí kômù, yhumsing eq a sêng é mú má châng wang nyo wún é
¹⁴ bang le, dut kó rà nghut lhê. Haú mù luí, gyè pé mai lumù gansâng dang a wó taí pyám kó sháng gaq, asak tiq é chuimó myhí pé gi, myi ló mù, zoshâng hkû luí, yhangmoq é ikun lé gôn lajang rà matú, ngò, yhangmoq
¹⁵ lé hpaqchyí byí kat lhê. Hkâsu mù gâ le, ra-am gi, lhing taú ló kôluí, Tsadán é htâng châng nyi lugù nghut bekò nghut ri.

¹⁶ Lumjíng é myiwe rayuq yuq gi, yhâng é ikun má chuimó myhí wó é nghut le, haú yuq é matú noqquq

hpúng lé wòlai a hun e za, yhang mai garúm yû ra râ nghut lhê; haú hkûn sheq, noqkuq hpúng gi, gè gè yhang râ tô é chuimó myhî pé lé wó garúm râ nghut lhê.

- ¹⁷ Haú noqkuq hpúng lé rago za shuí û é hpúng suwún wuí gi, akyû í tú hkam yù gíng lhê; haú mungdang hko é hkyô eq mhoqshit é hkyô má shikut é suwún wuí gi, je riyhang hkam
- ¹⁸ yù gíng lhê. Hkâsu mù gâ le, “Guq nâng nyi é no lé, nhuttsung hkâ-tsûng to byi.”^a ga le, “Mû zui sù gi, yhâng é zuihpau wó yû gíng lhê.”^b ga le,
- ¹⁹ Chyúmdang má tai tô ri. Hpúng suwún rayuq lé mara hun é hkyô lé, í yuq sum yuq mai saksé hkâm e za a
- ²⁰ nghut le gi, hkâlhom yù. Nghut kô-lhang, lhoq pun lhoq kyîng é hkyô lé góbang wó yû kó sháng gaq, mara kut shut é bang lé, shiwa byu pê hí má tân mhoqshit aq.
- ²¹ Pying kat é dang shi pé lé, gamhkuí myit a bo e za châng nyi râ eq, myoq-dong hkyîn luí haí le a kut râ matú, Garai Gasang eq Hkrisduq Yesuq é hí má le, hkyin yù huí é maumang lagyô pê é hí má le, ngò, nang lé pying kat lhê.
- ²² Ó yuq é ahtaq má le loq ke^c byi râ lé hkâhân; góbang é mara hkaú má le hkâbo lôm. Yhumsîng yhang yhum-sîng sân-yúng shoq kut nyi aq.
- ²³ Náng é wamdau ra luí, anum num no lò lò dut é yanmai, nang gi, wuí za shuq é hkyô lé nô pyám luí, tsibiyiq wing le ratsuí tsuí shuq byi aq.
- ²⁴ Byù ra-âm é mara pé gi, de de dut é nghut mù luí, tarâ jéyáng é jang má hí ló jé ri; ra-âm é mara kúm gi, hau é
- ²⁵ htâng má châng byông htoq lo ri. Haú eq rajung za, ge é muzó pé gi, de de

nghut nyi luí, haú su de de a nghut é pé lé le, wó zaú to râ a nghut.

- 6** Jùn dut é wòlai hkaú má nyi é lhunglhâng bang gi, yhangmoq é yhumsîng wuí lé gyai yhang hkungga gíng lhê nghû, myit yù râ dut lhê; haú hkûn sheq, Garai Gasâng é myîng eq nga-nhûng é mhoqshit hkyô gi, lumù
- ² gansang é a hui râ nghut lhê. Lumjîng é yhumsîng wuí é jùn gi, gumang wuí nghut é yanmai, yhangmoq lé a wú myuq é za, yhangmoq dojaú luí akyû myang hkâm zô é bang gi, lumjîng bang eq chyitdap gíng é bang nghut é yanmai, yhangmoq lé je ge é dông dojaú râ lhê. Shí hkyô pé lé, nang gi, yhangmoq lé mhoq byî nyi é eq lhoq pun lhoq kying byî nyi aq.

Ngùn Lé Chyitdap É Hkyô

- ³ Rayuq yuq gi, shut é lumjîng hkyô lé mhoqshit luí, nga-nhûng é Yhumsîng Yesuq Hkrisduq é tengmán mhoqshit hkyô eq tarâ hkunggâ é mhoqshit
- ⁴ hkyô lé a myit huí é nghut jáng, haú yuq gi, nghutbûn é sù eq haí lé le a sê gyô é sù nghut ri. Yhang gi, htuq htîng lhúm é hkyô pé lé ô nau é, a ge é myit bò luí, dang eq séng mù mabyoq lhoq htoq ri; haú mai, manon é hkyô, byoq lhum byoq cheq é hkyô, lumù gansang é hkyô, agè ashop é dông myit ngam
- ⁵ pyâm é hkyô eq, haú tengmán hkyô lé lhoq hpyuq pyám mù, tarâ hkungga hkyô gi, ngùn zè wó hkyô za nghut ri ga myit yu é, i-myt lhoq htên pyám bê bâng é gyoro má, byîn a huí é hkyô pé lé, lhoq htoq kat ri.
- ⁶ Nghut kôlhâng, tarâ hkunggâ hkyô má nhik dik é hkyô bo é nghut le gi,
- ⁷ amyat mó nghut nyi ri. Hkâsu mù gâ le, nga-nhúng gi, mingkan htoq má

^a 5:18 Tarâ Pun 25:4 ^b 5:18 Luk 10:7 ^c 5:22 Haú hkun lhê bang gi, hpúng suwún kut râ matú hkyin to bê bang lé, loq ke kyúdung byî é nghut lhê.

haí jung le a yu wang lé, haú mai le
⁸ haí wó yu htoq ló rá a nghut. Haú mù
 luí, nga-nhúng gi, wutbu wutmè eq
 zoshuq wó é nghut jáng, hau èq nhik
⁹ dik nyí sháng. Wó naú sùt nau é byu
 pé gi, gunlaú hkyô eq tuihkyó má
 le, haú byoq yeq hkyô eq htên byoq
 hkyô má, byu pé lé myup shí nhang
 é, nga é hkyô myo myo eq myit nò
 nhâng nau é hkyô má le, byit gyó
¹⁰ wâng kó rá nghut lhê. Hkâsu mù gâ le,
 ngùn lé chyitdap é hkyô gi, agè ashop
 hkyô ajung júng é apùn awang nghut
 nyi ri. Byù ra-am gi, ngùn lé ô nau
 luí, haú lumjínng hkyô mai sô nghoq ló
 mù, yhumsing gùng lé yhumsing, haú
 yón kuq hkyô èq htaú rot pyám bekò
 nghut ri.

Timohti Lé Pying Kat É Dang

¹¹ Nghut kôlhang, Garai Gasâng é byù
 nàng gi, haú pé banshoq lé koi pyám
 luí, dingmán hkyô, tarâ hkungga
 hkyô, lumjínng hkyô, chyitdap hkyô,
 hkam jan hkyô eq nú-nhâm é hkyô pé
¹² lé châng hkat nyí aq. Lumjínng hkyô
 eq sêng é ge é majan le zân nyí aq.
 Hap yù lumjínng bê ga, saksé myo myô
 pé é hí má, ge é đông nàng yín yu é
 hkûn, wut yu é hui luí wó é ahtum
¹³ abyuq é asak lé, zuí zing nyí aq. Haú
 lhunglhang lé asak byí é Garai Gasâng
 é hí má le, Pontu Pilat chyáng saksé
 hkâm nyi é hkûn, ge é đông yín yu é
 Hkrisduq Yesuq é hí má le, ngò, nang
¹⁴ lé pying kat lhê: Yhâng é ahkýing
 yam-yoq jé jáng, Garai Gasang htoq
 shit nhâng rá nghut é sù, nga-nhúng
 é Yhumsing Yesuq Hkrisduq htoq shit
¹⁵ é buinyi jé shoq, nàng gi, agot a-u é

hkyô eq mara hûn rá hkyô a bo e za,
 hkunmó shí lé châng nyí aq. Garai Ga-
 sang gi, hkungsô wó sù, Yhang za up
 sù, hkohkam pé é Hkohkâm, yhum-
¹⁶ sing pé é Yhumsing, Yhang za ahtum
 abyuq dui nyí sù, a ge chyâng htep e
 é maubó má dui nyí sù, ó yuq èq le a
 myang wú é, a wó myang é sù nghut
 nyi ri. Aróng eq hpungwup a-tsam gi,
 Yhâng chyáng ahtum abyuq ru joq nyí
 sháng gaq ô! Amen.

¹⁷ Shí ipyat má wó sùt é bang gi, a
 gumrông rá eq a gíng é sutzè má
 yhangmoq é myit myoqbyù hkyô a tô
 e za, nga-nhúng nguingón yuqyo nyí
 rá matú junghkang jungmó lé agùn
 agó byí é sù, Garai Gasâng chyáng
 za, yhangmoq myit myoqbyu nyí rá
¹⁸ matú, hkunmó hkyó aq. Ge é hkyô
 kut luí, ge é muzó má wó sùt nyí mù,
 a chum e za, gam chûng nau é myit
 bò rá matú, yhangmoq lé hkunmó
¹⁹ hkyó aq. Haú đông mai, yhangmoq
 gi, jé lô rá ipyat é matú gíng é apùn
 awang đông, yhangmoq é matú sutzè
 wó tsíng to kó rá nghut lhê; haú hkûn
 sheq, yhangmoq gi, asak kyíng nghut
 é asak haú le wó zuí zing to kó rá
 nghut lhê.

²⁰ Timohti ê, nang lé ap to bê hkyô
 lé, zúng nyí aq. Tarâ a hkunggâ
 é po-ming ming bâng èq hpaqchyí
 nghut lhê ga myhíng shut é htuq htíng
 lhum lhum kut é hkyô lé, koi pyám
²¹ aq. Byù ra-am gi, haú lé hpaqchyí
 nghut lhê ga yín yú kôluí, haú lum-
 jínng hkyô mai so nghoq htoq ló byuq
 bekò nghut ri.

Jeju gi, nungmoq chyáng ru joq nyí
 sháng gaq ô.

TIMOHTI

Chyáng Htang Dàm Hun Kat é Laiká

(2 Timothy)

1 Hkrisduq Yesuq chyáng mã é asak byi râ gâ é danggidiq eq rajung za, Garai Gasang ô nau é dông, Hkrisduq Yesuq é lagyo nghut sù, ngò, Poluq gi, ngò chyitdap é ngá zo Timohti lé, dang kyô kat lhê.

2 Haû Íwa Garai Gasang eq nga-nhông é Yhumsing Hkrisduq Yesuq chyáng mã é jeju eq shogyo nhikmyin hkyô, nguingón hkyô gi, ru joq nyî sháng gaq ô!

Lumluq Râ Matú Myit Wum Byî É Hkyô

3 Ngò gi, ngá é kyûdung dang má, nyî, myín, abyit alan nang lé bûn nyî uchyang, sân-yúng é i-myyit mai, ngá é îchyî íwâ pé dojaú é su, ngò dojaú nyi é Garai Gasang lé, jeju hkya-ôn

4 nyi lhê. Ngò gi, ngò mã gabú hkyô byíng jup sháng gaq nghû, náng é ngaubyi lé myit bûn nyî mù, nang lé

5 gyai yhang myàng nau nyi ri. Ngò gi, nang é gyíng é lumjíng myit lé lhoq pûn yù mù, náng whoí Lu-i eq náng nu U-ni nhik chyáng mã hí bo é lumjíng myit, ahkuí, náng chyáng le bo ri

6 nghû, hkyak myit lum nyi lhê. Hau é yanmai, ngò loq ke byî é dông, nàng mã bo tô é Garai Gasang é chyunghuq lé, gyúng nhang nyî râ matú, nang lé

7 ngò lhoq pûn kat lhê. Hkâsu mù gâ le, Garai Gasang gi, gyuq sê é myit nga-nhông lé a kat byî e za, a-tsam bo é myit, chyitdap sê é myit, yhumsing gùng lé dat hkang é myit sheq kat byî tô é ru nghut lhê.

8 Haû mù luí, nàng gi, nga-nhông é Yhumsing eq séng luí saksé hkâm é hkyô mã le, Yhông é yanmai htóng

byû dut to sù ngá é hkyô mã le, hoq myit a bo é za, Garai Gasang é wum-o mai, haû gabú danglu é matú, ngò eq rahá wuîhke jamjau chôm hui goq.

9 Garai Gasang gi, nga-nhông zui saí é muzó dông a nghut e za, Yhônggùng yhang myit sôn tô é hkyô eq Yhông é jeju yanmai za, nga-nhông lé, hkyi yù luí chyoiyúng é asak duí hkyô má ji yù bê nghut ri. Ahkyíng nghu é lháng a joq shi mai yhang, jeju haû gi, Hkrisduq Yesuq mã nga-nhông lé

10 byi to gù nghut bê. Nghut kôlhang, nga-nhông é hkyi yù Sù, Hkrisduq Yesuq pô htoq é dông, ahkuí, haû lé lhoq htoq shit bê nghut ri. Yhang gi, shî-nò hkyô lé lhoq htên pyám luí, haû gabú danglù dông mai, asak lé le, a dat htên byoq é hkyô lé le, lhoq

11 htoq shit bê nghut ri. Ngò gi, gabú danglu é matú hko kyo sù, lagyo eq mhoqshit sù dông, hkyin tô é hui sù

12 nghut lhê. Hau é yanmai, ngò gi, wuîhke jamjau shî lé huí nyi é nghut lhê. Nghut kôlhang, ngò gi, ó yuq lé lumjíng bê nghut é hkyô lé, sê é htoq agó, Yhang lé ngò ap tô é pé lé, haû bui-nyî jé shoq, Yhang wó zúng râ nghut lhê nghû hkyak myit lum tô é yanmai, ngò a hoq.

13 Nàng gi, ngá chyáng mai wó gyô yu é tengmán dang pé lé, Hkrisduq Yesuq mã, lumjíng myit eq chyitdap myit mai alik kut yu nyî aq. Nang lé ap byî to bê, haû ge é mungdang lé, nga-nhông chyáng bo tô é Chyoiyúng Woi-nyî é wum-o mai zúng nyî aq.

15 Asia mau mã é bang yuq hkanmó gi, ngo lé pyâm to kô é hkyô lé,

nàng sê lhê; haú bang má, Hpugelw eq Heramoge nhik le bo akô nghut ri.

- ¹⁶ Haú Yhumsîng gi, Onesihpurû é yhumbyù lé shogyo nhikmyîn é hkyô tûn shit sháng gaq; hkâsu mù gâ le, yhang gi, ngo lé anum num myit lhoq ngón é htoq agó, ngò wut é sham-toq-tuî é yanmai, a hoq e za, yhang, Romaq myuq má jé nyi é hkûn, ngo lé myang hui shoq, ho shikut é sù nghut ri. Haú Yhumsîng gi, haú buinyî má, yhang lé haú Yhumsing é shogyo nhikmyin hkyô byi sháng gaq! Ehpesu myuq má, yhang ngo lé hkâ-myhó garúm bê nghut é gi, nàng rago yhang sê lhê.

- 2** Haú mù, ngá zo ê, nàng gi, Hkrisduq Yesuq mâ é jeju hkaú má, wúm bo nyî aq. Nàng gi, saksé myo myô é hí má ngá chyáng mai wó gyô yù bê hkyô pé lé, góbang lé dat mhoqshit é, wó lum é bang lé ap ³ byi aq. Hkrisduq Yesuq é ge é gyezo rayuq su, wuîhke hkyô lé chôm jan ⁴ nyî sháng. Gyezo rayuq dông gyè mù wùn waq nyi é sù, ó yuq nghut kôle, gotû muzó má a bo lom é za, yhang lé hkunmó hkyô nyi é gyezau lé, gabú ⁵ nhâng nau é chyat nghut lhê. Haú eq rajung za, shingjóng é sù rayuq le, shingjóng lhum poî wang é hkûn, tô tô é tarâ dông a châng e nghut le gi, ung é aróng chyunghuq lé wó yû râ a ⁶ nghut. Yo-mû zuî shikut é sù gi, kyôshi lé sâng-hi myang hkam yù râ sù ⁷ nghut lhê. Haú Yhumsîng gi, shí pé banshoq lé wó sê é nyan nang lé byi râ nghut é yanmai, ngò taî é hkyô pé lé myit wú aq; ⁸ Haú Dawi é awut ashín nghut sù, Yesuq Hkrisduq gi, shi é mai dum dui toq bê hkyô lé myit bun aq; haú gi, ⁹ ngá é gabú danglù nghut lhê. Gabú danglù hau é yanmai, mara bò sù ra-

yuq lé su, ngò gi, kyum hut é hui luî, hpuzô nyi é nghut lhê. Nghut kôlhang, Garai Gasâng é mungdang gi, kyum hut huî é a nghut. Haú mù luî, ngò ¹⁰ gi, Hkrisduq Yesuq chyáng mâ é hkyi yù hkyô eq ahtum abyuq é hpungwup shingkang lé wó yû kó sháng gaq nghû, haú hkyin yù hui bâng é matú, jung hkangmó lé hkam jân nyi lhê.

- ¹¹ A-ô mâ é dang gi, lumgíng é dang nghut lhê:
Nga-nhúng gi, Yhang eq rahá shí bê nghut jáng, Yhang eq rahá duî râ nghut lhê.
¹² Nga-nhúng gi, hkam jân é nghut jáng, Yhang eq rahá up râ nghut lhê.
Nga-nhúng gi, Yhang lé he-ngik pyâm é nghut jáng, Yhang le, nga-nhúng lé he-ngik pyâm râ nghut lhê.
¹³ Nga-nhúng gi, lhumzui myit a bò kôlhang, Yhang gi, lhumzuî nyî râ nghut lhê. Hkâsu mù gâ le, Yhang gi, yhânggùng yhang wó he-ngik pyâm é a nghut.

**Garai Gasâng Hí Má
Myoqdong Wó É Mû Zui Sù**

- ¹⁴ Nàng gi, yhangmoq lé, shí hkyô pé xoq luî lhoq pûn nyî aq. Dang pé eq séng luî, a byoq lhúm nyî kó sháng gaq, Garai Gasâng hí má yhangmoq lé sidiq byi aq. Haú gi, akyû a bo é htoq agó, wó gyô é bang lé htên byoq ¹⁵ nhang é hkyô za nghut lhê. Nàng gi, haú tengmán é mungdang lé jo shoq chung jai é eq, hoq nó a râ é mù zui sù rayuq dông Garai Gasâng hí má myoqdong wó shoq, wó dut é myhó shikut ¹⁶ aq. Tarâ a hkunggâ é po-ming ming bang lé koi pyám aq. Hkâsu mù gâ le, haú su kut é bang gi, tarâ a hkunggâ é

hkyô má je riyhang wang nân ló byuq
¹⁷ é bang dut kó râ nghut lhê. Yhangmoq
 é mhoqshit hkyô gi, mong ana su byo
 myín ló râ nghut lhê; haú bang má Hu-
¹⁸ menu eq Hpilitu nhik le bò kôluí, haú
 tengmán hkyô mai sô nghoq ló byuq
 akô. Yhangnhik gi, haú dum dui toq
 hkyô dut lai bê ga taí kômù, ra-âm é
 lumjín hkyô lé lhoq htên pyám byí
¹⁹ akô nghut ri. Nghut kôlhang, “Haú
 Yhumsing gi, Yhang eq sêng é bang lé
 sê lhê.”^a ga luí le, “Haú Yhumsing é
 mying lé yín yu é bang yuq hkgangmó
 gi, agè ashop hkyô mai lhing tau ra
 kó râ nghut lhê.” ga luí le, dizik haú
 htung tap tô é, Garai Gasâng é ging
 tîng é apûn awang gi, gîng nyí ri.
²⁰ Yhûm mó ralhûm má gi, hîng au-
 hkoq zè, ngùn auhkoq zè baú za joq
 é a nghut, sik auhkoq zè, tse auhkoq
 zè le joq lhê; ra-am gi, aróng hkyo é
 matú, ra-am gi, aróng hkyo é matú a
²¹ nghut. Haú mù luí, haú pé mai yhum-
 sing gùng lé lhoq sansêng pyâm é sù
 gi, chyoiyúng luí, haú Yhumsing
 chung jài gíng é sù, ge é muzó hkgang-
 mó kut râ hen tô é sù nghut é yan-
 mai, aróng hkyo é matú chungzè dut
 râ nghut lhê.
²² Zoram é agè ashop é ô naù hkyô
 lé koi pyám mù, haú sân-yúng é myit
 mai, Yhumsing lé wut dúng é bang eq
 rahá, dîngmán hkyô, lhumzui hkyô,
 chyitdap hkyô, nguínón hkyô pé lé,
²³ châng hkat nyí aq. Go é eq ngok é
 dông dang jet jet lhûm é hkyô gi,
 mabyoq lhoq htoq é hkyô nghut é
 lé, nàng sê lhê nghut é yanmai, haú
²⁴ hkyô lé koi pyám aq. Haú Yhum-
 sing é dui-nhâng zoshâng gi, mabyoq
 a lhoq htoq é za, yuq hkgangmó lé
 dat myit tê byí é, wó mhoqshit é, a

dat nhik-yô é su dut ra râ nghut lhê.
²⁵ Yhang gi, yhang lé htuq htîng é bang
 lé, nú-nhâm é dông mhoqshit byi ra
 râ nghut lhê; haú hkûn, Garai Gasang
 gi, yhangmoq lé myit lhing hkyô byi
 mù, tengmán hkyô lé sê gyo nhâng
²⁶ luí, yhangmoq gi, bûn gyîng lò mù,
 nat Tsadán ô nau é hkyô lé kut byi râ
 matú, chyup yú huí é, nat Tsadán é
 tuihkyó mai wó hfang lut ló kó abe
 nghû, myit lum kat lhê.

Jihtûm Buinyì Pé Má Dut Lò Râ Hkyô

3 Jihtûm buinyì pé má, wuîhkê é
 ahkyíng pé joq lò râ nghut é lé,
² nàng matsîng to aq. Hkâsu mù gâ le,
 haú u lé, byu pé gi, yhumsing gùng
 lé za chyitdap é bang, ngùn lé myoq-
 noq é bang, gumrong é bang, nghut-
 bûn é bang, góbang lé taí hpoí é bang,
 înu îwa nyo é lé a gyô é bang, jeju a
 dat bûn é bang, a chyoiyúng é bang,
³ chyitdap myit a bo é bang, mara hkyut
 byi a sê é bang, lumù gansang é bang,
 yhumsing gùng lé hkâng a sê é bang,
 byuwú pé, ge é hkyô lé a ngui é bang,
⁴ haq gumlaú é bang, a bun a so dut
 wún é bang, yhumsing gùng lé za hkik
 bûn é bang, Garai Gasang lé chyit-
 dap é bang dut râ malaí ngón kún
 hkyô lé za chyitdap é bang, dut bùm
⁵ kó râ nghut lhê. Yhangmoq gi, tarâ
 hkunggâ é bang su dut kôlhang, haú
 pê é a-tsam lé he-ngik pyâm akô nghut
 ri; haú sù é bang lé, nàng koi pyâm nyí
 aq.
⁶ Yhangmoq gi, hpaqchyí da mù
 yhûm pé má wàng kôluí, mara wò-
 lai lé wun é, agè ashop é ô naù hkyô
 ajung jung má sô nghoq ló byuq é,
⁷ hkâ-nhám le mhoq yu nyí kôlhang,
 haú tengmán hkyô lé a sê gyô é, myit

^a 2:19 Gyung So 16:5

nyhôm é myiwe wuì lé wó làng nghoq
⁸ yu é bang nghut akô. Yanne eq Yam-
 bre nhik gi, Mosheq lé htuq htíng é
 su, haú bang le, haú tengmán hkyô lé
 htuq htíng akô nghut ri; yhangmoq gi,
 myit é hkyô htên byuq kôluí, haú lum-
⁹ jíng hkyô má lhum a zuí é bang nghut
 akô. Nghut kôlhang, haú nhik é hkyô
 byông htoq lo é su, yuq hkgangmó é
 hí má, yhangmoq ngok é hkyô byông
 htoq lô râ nghut mù, haú mai lai luí
 yhangmoq wó kut jat kó râ a nghut.

Timohti Lé Pying Kat É Dang

¹⁰ Nàng kúm gi, ngá é mhoqshit hkyô,
 ngá é nyiyap hkyô, ngò myit myoq-
 byu tô é hkyô, ngá é lumjíng hkyô,
 myit hîng hkyô, chyitdap hkyô, hkam
¹¹ jan hkyô, zing-ri huí é hkyô eq wuí-
 hke jamjau hkyô pé lé le, Antioku wà
 mó, Ikoni wà mó eq Lustra wà mó pé
 má ngò hui zô é, zing-ri hkyô pé lé,
 ngò hkam jan bê hkyô lé le, nàng rago
 sê lhê. Nghut kôle, haú Yhumsîng gi,
 haú pé banshoq mai ngo lé xe yù bê
¹² nghut ri. Gè gè yhang, agè ashop é
 byu pé eq mhaú kut é bang gi, mhaú
 zô nyi bum é eq mhaú zô é huí nyi
 bùm kôluí, a ge é hkyô shut je riyhang
¹³ myô jat lò kô é hkún, Hkrisduq Yesuq
 má tarâ hkunggâ é asak dông nyiyap
 nau é bang yuq hkgangmó gi, zing-rí é
¹⁴ hui kó râ nghut lhê. Nghut kôlhang,
 nàng gi, ô pé chyáng mai nàng mhoq
 yú bê hkyô lé le, Hkrisduq Yesuq lé
¹⁵ lumjíng jáng hkyi yu é hui shoq, nang
 lé hpaqchyí byéng-yá wó byí é chyoi-
 yúng Chyúmdang pé lé, zoshâng hkún
 mai nàng sê to bê hkyô lé le, nàng sê é
 yanmai, nàng mhoq yu to bê hkyô eq
 hkyak lumjíng to bê hkyô má, xoq kut
¹⁶ nyí aq. Chyúmdang hkgangmó gi, Ga-
 rai Gasâng é soq hâng tô é pé chyat
 nghut é yanmai, mhoqshit é hkyô, tân

mhoq é hkyô, lhoq jo byí é hkyô eq
 dingmán hkyô lé tân shit byí é hkyô
¹⁷ pé é matú, akyú bo ri; haú mù luí, haú
 Garai Gasâng é byú gi, ge é muzó jizó
 hkgangmó lé kut râ matú, wó gumjup
 râ nghut lhê.

4 Garai Gasâng é hí má le, dui nyí
 bang eq shi byuq bang lé tarâ
 dara râ sù Hkrisduq Yesuq é hí má
 le, Yhang htoq shit râ hkyô eq Yhâng
 mingdán é yanmai, ngò, nang lé pying
² kat é gi, haú mungdang lé hko kyo aq;
 ahkyíng yam-yoq ang kôlhang, a ang
 kôlhang, rì rì hen to aq; myit gyai hing
 é eq rago za mhoqshit é dông, lhoq jo
 byi, tân mhoqshit é eq myit wum byi
³ kut nyí aq. Hkâsu mù gâ le, byu pé
 gi, tengmán mhoqshit hkyô lé a kâm
 gyô é ahkyíng jé mù, yhangmoq ô nau
 yut yut é hkyô cháng luí, yhangmoq
 é no yo bui nau é nohkyap gyô nau é
 hkyô tái nhâng râ matú, sará pé rajùm
 rayò lé lhíngkyuq má lhoq tsiing to kó
⁴ râ nghut lhê. Yhangmoq gi, haú teng-
 mán hkyô mai yhangmoq é nohkyap
 lé lhing pyám mù, myit htoq mhô-myi
 dang shut lhing ló kó râ nghut lhê.
⁵ Nghut kôlhang, nàng gi, dut tô é hkyô
 banshoq má rago sidiq nyí aq; wuí-
 hke jamjau hkyô lé hkam jân nyí aq;
 gabú danglù hko kyô é muzó kut nyí
 aq; nàng é hpungmû banshoq lé wùn
 waq nyí aq.
⁶ Hkâsu mù gâ le, ngò gi, shuq jung
 hkungga ralhú dông hut pyám é huí
 nyí gù nghut mù luí, mingkan mai
 ngò htoq ló râ ahkyíng jé bê nghut ri.
⁷ Ngò gi, haú ge é majan le zan bê; din
 shingjóng lhúm é hkyô le bàn bê; haú
 lumjíng hkyô le chang bê nghut lhê.
⁸ Ahkuí, haú tengmán é tarâ Agyí nghut
 sù, Yhumsîng gi, haú buinyí má ngo lé
 ap byi râ nghut é, haú dingmán hkyô é
 janmaú lé, ngá matú tô to byi bê nghut

lhê. Haû gi, ngá é matú za a nghut, Yhang htoq shit râ hkyô lé myit láng nyi é bang banshoq é matú le nghut lhê.

Timohiti Lé Jì Kat É Hkyô

- ⁹ Nàng gi, ngá chyáng wó dut é í hân
¹⁰ hân lé lò aq. Hkâsu mù gâ le, Demaq gi, mingkan shí lé chytidap é yanmai, ngo lé pyám to luí, Htesaloni wà mó shut; Krezen gi, Galatiq mau shut; Tituq gi, Dalamati mau shut, e ló byuq
¹¹ bekô nghut é yanmai nghut lhê. Lukaq za ngò eq rahá nghut nyi lhê. Markuq lé, nàng eq rahá shuí lé lò aq; yhang gi, ngá é hpungmú má wó htuqbáng râ sù nghut lhê. Ngò gi, Tuhkiku lé Ehpesu myuq shut nhang kat bê nghut
¹³ lhê. Nàng gi, lé lo é hkûn, Troa myuq má, Karpu chyáng ngò tô tô é buhîng haû lé le, ngá é chyúmding lé le, je luí eq haû shokuq chyúmding pé lé le, yù lé lò byi aq.
¹⁴ Haû ningdup hpó Alesander gi, ngo lé a ge é myo myo kut bê nghut ri; haû Yhumsîng gi, yhang kut é eq rajung za, yhang lé dam byi râ nghut lhê.
¹⁵ Yhang gi, ngamoq é danglù lé wum kat htúq htíng bê sù nghut é yanmai, nàng le, yhang lé sidiq ra râ nghut lhê.
¹⁶ Sâng-hí dàm, ngá gûng lé ngò tai hung é hkûn, yuq hkangmó gi, ngá é hkyam shut a bo lom e za, ngo lé

pyâm tô akô. Nghut kôlháng, haû gi, yhangmoq ahtoq má mara a dut sháng gaq. Nghut kôlháng, ngò dông mai danglù haû lé rago wó hko pyo kat luí, tûngbaù pé banshoq bang wó gyo kó sháng gaq ga, haû Yhumsîng gi, ngá hkyam shut yap to mù, ngo lé wum-o byí é nghut lhê. Hau htoq agó, ngò gi, hkanghkyí é nhut mai le hkyi
¹⁷ yù hui bê nghut lhê.^a Haû Yhumsîng gi, ngo lé agè ashop é hkyô hkangmó mai hkyi yù luí, Yhang é mauhkûng mingdán má ngón za shuí jé râ nghut lhê. Hpungwup shingkang gi, Yhâng chyáng ahtum abyuq ru joq nyí sháng gaq ô. Amen.

Shi-kyám Dang

- ¹⁹ Priskila eq Akula nhik lé le, Onesihpuru yhumbyù wuì lé le, bo
²⁰ shi-kyám byi laq. Erastu gi, Korinhtuq myuq má nyi gyó to bê; Trohpimu lé gi, nò luí, Melitu wà mó má ngò nyhi
²¹ pyâm to bê nghut lhê. Nàng gi, wó dut é í, gyoqmyò a wàng shi lé, shí má jé lé lò aq. Ubulu gi, nàng lé shi-kyám kat ri; haû eq rajung za, Pudén, Linu, Klodia eq gumang wuì banshoq bang gi, nàng lé shi-kyám kat akô nghut ri.
²² Haû Yhumsîng gi, náng é woi-nyí eq rahá nghut nyí sháng gaq. Jeju gi, nungmoq chyáng ru joq nyí sháng gaq ô.

^a 4:17 Haû hkûn lé, Romaq byu pé, byù sat lé gi, hkanghkyi lé tsô pyâm lhê.

TITUQ

Chyáng Hun Kat é Laiká

(Titus)

1 Garai Gasâng é dui-nhâng zo-shâng eq Yesuq Hkrisduq é lagyo nghut é sù, ngò Poluq gi, haù ahtum abyuq é asak lé chòm myit myoqbyu é yanmai, Garai Gasang hkyin yu to bâng é lumjínng hkyô jat râ eq, tengmán hkyô lé wó sé mù, tarâ hkungga sé nhâng râ matú, hkyin yù huí é sù² nghut lhê. Haù ahtum abyuq é asak hkyô lé, mhaù a sê é Garai Gasang gi, ahkyíng nghu é lháng a joq shi mai danggidiq byi to mù, Yhang masat tô é ahkyíng yam-yoq má sheq mungdang hko kyô é dông lhoq htoq shit³ luí, nga-nhúng é hkyi yù Sù, Garai Gasang hkunmó hkyô tô é eq rajung za, haù mungdang hko é hkyô lé ngá é loq má ap byi bê nghut ri.

⁴ Nga-nhúng chòm lumjínng é hkyô dông mai, ngá zo sítng nghut é Tituq lé laiká kâ kat lhê. Íwa Garai Gasang eq nga-nhúng é hkyi yù Sù Hkrisduq Yesuq chyáng má é jeju eq nguínngón hkyô gi, náng chyáng ru joq nyí sháng gaq ô.

Kreti Zinlóng Má, Tituq Wùn Waq Râ Muzó

⁵ Ngò, nang lé Kreti zinlóng má nyhi hkyô tô é gi, ngò, nang lé pying tô é eq rajung za, ngò a ban zui saí é loqzó pé lé lhoq pán râ matú eq, wà hkgangmó má hpúng suwún ayá dántg⁶ to byi râ matú nghut lhê. Haù hpúng suwún kut râ sù gi, mara hún râ hkyô a bo é sù; yhangmyi rayuq za wó é sù; yhang zô pé le, agè ashop é eq jìno a gyô é ga, mara hún râ jowò a joq é lumjínng bang nghut é sù, nghut râ lhê.

⁷ Hkâsu mù gà le, hpúng-up rayuq gi, Garai Gasâng é sùt zum sù rayuq dông nghut lhê mù, mara hún râ hkyô a bo é sù nghut râ lhê; yhang gi, yhumsing myit a cháng; i-myt a lúm tot; íhpê é jùn a dut; mabyoq jishúm a kut; a sansêng é ngùn hínng lé a myit ô nau é⁸ sù nghut râ lhê. Yhang gi, byù bíng lé dat hkulúm sù; ge é hkyô lé chyitdap sù; núm é sù, dingmán sù; chyoyíung sù; yhumsing gùng lé wó hkgang é sù;⁹ mhoq yu to bê hkyô eq rajung za, lumgínng é mungdang lé ging ging zui zing nyi é sù nghut râ lhê. Haù hkún sheq, yhang gi, góbang lé tengmán é mhoqshit hkyô dông myit wum wó byí é eq, haù eq shai lhum é bang lé, shut é hkyô wó tûn shit râ nghut lhê.

¹⁰ Hkâsu mù gà le, gumlau kut é bang, dangsôm taí é bang eq mhaù zô é bang myo myo nyi ri. Ahpyo-kuq hpyit é¹¹ hpúng bang je riyhang myo akô. Haù bâng é nhut shô lé gi, xaù pyám byi râ lhê. Hkâsu mù gà le, yhangmoq gi, a tengmán é dông sutzè lé wó yù shoq ga luí, mhoqshit a gínng é hkyô pé lé mhoqshit mù, rayhum bang bang lé lhoq hpyoq lhoq htên nyi akô nghut ri.

¹² Kreti byù má é myiqhtoi rayuq lháng gi, “Kreti byu pé gi, ayang mhaù é bang, tân jung yosô dusak pé, lagôn é zo myoqnoq bang nghut akô.” ga¹³ taí wú ri. Saksé shí gi, têng ri. Haù mù luí, yhangmoq gi, Yudaq byu pé é myit htoq mhô-myi dang lé le; tengmán hkyô lé he-ngik pyám é bang pying tô é dang pé lé le, a gyo kô é¹⁴ za, haù lumjínng hkyô má ging títng nyi kó sháng gaq, yhangmoq lé htân htân

¹⁵ tân mhoqshit byî nyî aq. Sân-yúng bâng é matú gi, azíng zê lhunglhang sân-yúng ri; a sân-yúng bang eq a lum-jíng bâng é matú kúm gi, haí le a sân-yúng é chyat nghut nyi ri; hkâsu mù gâ le, yhangmoq é myit nhik-lhum eq myit sôn sê é hkyô pé gi, gè gè yhang, a sân-yúng dut byuq bekô ¹⁶ nghut ri. Yhangmoq gi, Garai Gasang lé sê lhê ga kôlhang, yhumsing zui saí é loq zó dông, Yhang lé he-ngik pyâm é bang nghut akô. Yhangmoq gi, achau achyut é bang, jìno a gyô é bang eq, ge é mù joq mijog eq a htuk é bang nghut akô nghut ri.

Hká Đông Nyî Yap Râ Hkyô

2 Nang kúm gi, tengmán é mhoqshit hkyô eq wuí é dông mhoqshit nyî ² râ dut lhê. Hpô-mâng pé lé gi, i-myyit shirâm sé râ hkyô; hkungga gíng é byù dut râ hkyô; yhumsing gùng lé wó hkâng râ hkyô eq, lumjíng myit ging râ, chyitdap myit ging râ, hkam jan hkyô gíng nyî râ hkyô pé lé, mhoqshit byî nyî aq.

³ Haú eq rajung za, hpô-myhí mâng pé lé gi, hkungga gíng é a-kyang bo nyî râ hkyô; lumù gansâng dang a taí râ hkyô; íhpê é jùn a dut râ hkyô eq ge é hkyô lé za dat mhoqshit é bang ⁴ wó dut râ matú mhoqshit byi aq. Haú hkûn, Garai Gasâng é mungdang gi, lumu pyâm é a hui sháng gaq, yhangmoq gi, hpô-myhí zô pé lé, yhumsing yhanglâng eq, yhangzô pé lé chyitdap ⁵ é, yhumsing gùng lé wó hkang é, siri bo é, ikun lé dat wùn waq é, ge é myit wó tân shit é, yhumsing é yhanglâng uphkang é dông dat châng é bang dut râ matú, ge mhoqshit é hpô-myhí mâng pé dut râ nghut lhê.

⁶ Haú eq rajung za, zorâm wuí lé le, yhumsing gùng lé wó hkang nyî kó

sháng gaq, lhoq pun lhoq kyíng nyî ⁷ aq. Hkyô hkat hkangmó má, yhangmoq lé nang yhang ge é muzó alik tân ⁸ shit nyî aq. Nang lé lhom htuoq htíng é bang gi, nga-nhúng é hkyô má mara a wó hún kômù hoq hpû nyî kó sháng gaq, nang mhoqshit é hkyô má, taí pyám râ hkyô a bò shoq, têng é, siri bo é, eq sansêng é dang taí nyî aq.

⁹ Nga-nhúng é hkyi yù Sû Garai Gasang eq sêng é mhoqshit é hkyô pé hkat hkangmó yúng nyî sháng gaq, hkyô hkat hkangmó má, jun pé lé, yhangmoq é yhumsing wui pé é a-ô má nyî mù, yhumsing wui é i-myyit ngón shoq dang a tu râ; a hkau râ; wó lum tô é bang dut râ hkyô pé lé, mhoqshit byi aq.

¹¹ Hkâsu mù gâ le, hkungsô wó é myit myoqbyù hkyô ga é, nga-nhúng é kô myhang é Garai Gasang eq hkyi yù Sû, Yesuq Hkrisduq gi, hpungwup shingkang eq htoq shit râ hkyô lé ¹² lánng nyi é hkûn, tarâ a hkunggâ é myit eq mingkan myit ô nau é hkyô koi pyám luí, shí ipyat má yhumsing gùng lé wó hkâng râ, dingmán râ eq, tarâ hkunggâ é hkyô wó cháng shoq, ¹³ nga-nhúng lé mhoqshit byi râ matú, Garai Gasâng jeju chyunghuq gi, htoq shit bê nghut mù luí, byù lhunglhang bang lé hkyi yù hkyô hpóng byi bê ¹⁴ nghut ri. Haú Yesuq Hkrisduq gi, agè ashop é hkyô banshoq mai nga-nhúng lé hkyi yù mù, ge é muzó hkangmó lé châng kut nau é, Yhânggùng yhang sing é byuhú rahú dut râ matú wó lhoq sân-yúng yû shoq ga, nga-nhúng é matú Yhânggùng lé ap byí pyám bê nghut ri.

¹⁵ Nang lé ó yuq èq le, a wú shôm pyám kó sháng gaq; nang gi, ahko ahkáng banshoq eq, yhangmoq lé shí hkyô pé mhoqshit nyî aq; myit wum

byí é eq, tân mhoqshit é hkyô lé le kut nyí aq.

Ge É Muzo Zui Saí Râ Hkyô

- 3** Nàng gi, lumjínng bang lé, zau wuí eq ahko ahkáng wó bâng é a-ô má nyí mù, jìno gyô nyí râ eq, hkâ-nhám le ge é muzó hkgangmó zui saí râ lé
- ² hen nyí uchyang, ó yuq lé le lù a mù râ; nguínngon hkyô hô râ; myit tê byí é hkyô tân shit râ eq; byù banshoq lé nûm é i-myt tân shit nyí kó sháng gaq, lhoq pun lhoq kyíng nyí aq.
- ³ Hkâsu mù gâ le, nga-nhúng le, hí hpyang gi, byù ngok pé, jìno a gyô é bang, mhaú zo huí é bang eq, gungsho ô nau é hkyô eq mingkan ngón hkyô ajung jûng èq jùn kut é hui bang, dut mù luí, agè ashop é eq manon lhúm é hkyô kut nyí mù, rayuq eq rayuq a jú lhúm é đông nyí laí lò bê nghut
- ⁴ lhê. Nghut kôlháng, nga-nhúng é hkyi yù Sû Garai Gasâng jeju eq chyt-dap myit htoq shit é hkûn, nga-nhúng yhang kut é dingmán é muzó èq a nghut é za, Yhâng é shogyo nhikmyín é jeju yanmai sheq, Garai Gasang gi, nga-nhúng lé hkyi yù bê nghut ri.
- ⁶ Yhang gi, nga-nhúng é hkyi yù Sû Yesuq Hkrisduq é yanmai, nga-nhúng é ahtoq má agùn agó hut hkyó byí é Chyoiyúng Woi-nyí èq nga-nhúng lé chí san chí sêng pyám byi mù, woi-nyí má dum hku é hui nhâng luí, myit sik htaí byí é hkyô đông nga-nhúng
- ⁷ lé hkyi yù bê nghut ri. Haú mù luí, Yhâng é jeju mai mara hkyut san byí é hui bê nghut é yanmai, ahtum abyuq é asak lé myit myoqbyu nyi é eq rajung za, nga-nhúng gi, silí wunlí wó hkam
- ⁸ yu é bang dut lò râ nghut lhê. Dang shí pé gi, lumjínng é dang nghut lhê mù

luí, Garai Gasang lé lumjínng é bang gi, ge é muzó lé myit lòm luí rago zui saí nyí kó sháng gaq, haú hkyô pé lé nàng wum zuq tung mhoqshit byi râ lé, ngò ô nau nyi lhê. Shí pé gi, byù lhung-lhâng bâng é matú ge é eq, akyú bo é hkyô nghut lhê.

- ⁹ Nghut kôlháng, ana apâ ga luí taí htíng lhúm é hkyô lé le; byùxik labaú gôn é hkyô lé le; nyo byoq lhúm é hkyô lé le; jep é tarâ eq séng mù byoq lhúm é hkyô pé lé le koi pyám nyi aq, hkâsu mù gâ le, haú pé gi, akyú a bo é hkyô eq chûng a ge é hkyô pé nghut ri.
- ¹⁰ Gam hkuí é myit bò sù lé gi, í dâm mhoqshit wú mù, a wó jáng, yhang
- ¹¹ lé baú tô pyám aq. Haú su kut sù gi, yhang kut é muzó má mara wó to bê nghut mù, yhumsing gùng lé yhum-síng mara hun é sù nghut é lé, nàng sê to lo aq.

Je Htâng Má Pying É Dang

- ¹² Ngò gi, Nikopoli wà má gyoqmyò lhoq lhái râ đông myit hpyit tô é yan-mai, Artima lé, a nghut jáng Tuhkiku lé, náng chyáng nhang kat byi râ, jé eq yhang, nàng gi, shikut luí, haú wà
- ¹³ shut ngá chyáng lé lô aq. Nàng gi, tarâ sê é sù Zena eq Apolo nhik lé, yhang-nhik é hkyowuí má râ é hkyô banshoq,
- ¹⁴ shikut luí garúm kat aq. Nga-nhúng é byu pé gi, nyí wuí râ é hkyô lé wó htuq é eq ashi zuí é bang dut kó sháng gaq, ge é muzó lé myit lòm mù zui saí nyí râ hkyô lé mhoq yú râ lhê.
- ¹⁵ Ngò eq rahá nyi é bang yuq hkgang-mó gi, nang lé shi-kyâm kat akò. Lum-jínng hkyô má ngamoq lé chyt-dap é bang lé, bo shi-kyám byi aq.
- Garai é jeju gi, nungmoq eq rahá joq nyí sháng gaq ô!

HPILEMON

Chyáng Hun Kat é Laiká (Philemon)

¹ Hpilemon ê, Hkrisduq Yesuq é yanmai htóng lúng nyí sù, ngò Poluq eq nga-nhùng é gumang Timohti nhik gi, ngá-nhik chyitdap é mô wùn luzúm nghut é sù nang lé le, ngá-nhik é gu-nhá Ahpiaq lé le, ngá-nhik é sarhé luzúm Arhkipò lé le, náng é yhùm má huí lhum lhum kut é noqkuq hpúng lé le, dang kyô kat lhê.

³ Nga-nhùng é Íwa Garai Gasang eq Yhumsîng Yesuq Hkrisduq chyáng mâ é, jeju eq nguingón hkyô gi, nungmoq chyáng ru joq nyí sháng gaq ô!

Jeju Hkya-ôn É Hkyô Eq Kyûdung Dang

⁴ Ngò gi, Yhumsîng Yesuq lé nàng lumjîng é hkyô lé le, sân-yúng bang banshoq lé nàng chyitdap é hkyô lé le, wó gyô é yanmai, ngò kyûdung é hkûn, nang lé myit bûn nyí luí, hkâ-nhám le ngá é Garai Gasang lé jeju ⁶ hkya-ôn nyí lhê. Ngò gi, Hkrisduq é matú nga-nhùng chyáng bo tô é ge é mô lhumjup lé sê gyô é hkyô lé, nàng wó yù sháng gaq nghû, náng é lumjîng hkyô lé, nàng saksé hkâm é má akyû htoq râ matú, kyûdung byí nyí ⁷ lhê. Náng é chyitdap myit gi, ngo lé gyai gabú nhang é eq wum-o wó yù nhang ri; hkâsu mù gâ le, gumang hpó ê, náng é yanmai, sân-yúng bâng é i-myit má nguingón yuqyo é hkyô wó yù bekô nghut ri.

Onesimu É Matú Tôngbán Byí É Hkyô

⁸ Haú su mù, nàng kut gíng é muzô hkyô, ngò, nang lé pying kat lhê. Hkrisduq má, ngò gi, a gyuq a kyum é za nang lé haú wó kut nhang lhê

nghut kôlhang, chyitdap myit dông ⁹ za nang lé pying kat lhê. Ngò, Poluq gi, mang bê htoq agó, ahkuí Hkrisduq Yesuq é yanmai htóng lúng sù le ¹⁰ nghut luí, ngò kyum hut huí nyí é u lé ngá zo dut lo é Onesimu é matú nang ¹¹ lé ngò dông tôngbán kat lhê. Yhang gi, hí hpyang náng é matú akyû a bo é nghut kôlhang, ahkuí gi, náng é matú le, ngá é matú le, akyû bò bê nghut ri.

¹² Ngò nhik htông é Onesimu lé náng ¹³ chyáng dum taú nhang kat lhê. Haú gabú danglu é yanmai, ngò htóng lúng nyí é má náng é malaí ngo lé garúm râ matú, yhang lé ngò shuí nyí ¹⁴ to naú kôlhang, ngò gi, nàng myit a huí le haí le a kâm kut. Hau é yanmai, ngò, nang lé kut nhang é dông a nghut e za, nàng ô nau é dông kut é ¹⁵ san za nghut sháng gaq. Hkâsu mù gâ le, náng chyáng mai yhang rayoq rabun zo gâng nyí é gi, yhang dum taú lò mù hkâ-nhám le nàng eq rahá dum wó nyí nyí râ matú nghut lhê abe.

¹⁶ Yhang gi, htâng hpyang, jùn rayuq dông a nghut e za, jùn htoq má je ge é chyitdap gumang hpó dut râ nghut bê; ngá matú, yhang gi, ngò chyitdap dik é sù nghut lhê; náng matú kúm gi, byù rayuq dông le, Yhumsîng Yesuq má gumang hpó rayuq dông le, je riyhang chyitdap râ sù dut bê nghut ri.

¹⁷ Haú mù luí, nàng, ngo lé luzúm rayuq sù ngam é nghut le gi, ngo lé hap yu é su, Onesimu lé le lom hap yù ¹⁸ aq. Yhang, nang lé rajung jung shut pyâm é nghut le le, chyîn dap tô é nghut le le, haú gi, ngá chyáng dap é

- ¹⁹ chyîn nghû sôn yù aq. Ngò, Poluq gi, chyîn haû xap râ nghû luî, ngá loq èq yhang kê kat kôlhang, nàng yhang lháng, ngo lé asak chyîn xap râ sù
- ²⁰ nghut é lé bûn ngham aq. Nghut bê, gumang hpó ê, nang é yanmai, haû Yhumsîng má ngò gabú é hkyô wó yu nyî sháng gaq, Hkrisduq má ngá é i-myt lé lhoq ngui lhoq ngón byî é dông, shî, ngò pying kat é dang lé
- ²¹ gyo byi laq. Nàng gi, ngò taî kat é htoq má je lhom kut râ nghut é lé, hkyak za sé luî, ngò kê kat é nghut lhê.
- ²² Hau htoq agó, ngá é matú nyî râ gok lajang láng aq. Hkâsu mù gâ le, nungmoq kyûdung byî é yanmai, ngò gi, nungmoq chyáng dum wó jé râ lé myit myoqbyu nyi lhê.
- ²³ Hkrisduq Yesuq é yanmai, ngá é htóng lúng luzúm nghut é sù Epahpra
- ²⁴ gi, nang lé shi-kyâm kat ri. Ngá é htuq luq htuq bang nghut é Markuq, Aristakuq, Demaq, Lukaq pé le, nàng lé shi-kyâm kat akô.
- ²⁵ Yhumsîng Yesuq Hkrisduq é jeju gi, nungmoq é woi-nyí eq rahá za ru joq nyî sháng gaq ô!

HEBRE

Pê Chyang Hun Kat é Laiká

(Hebrews)

**Garai Yhangzo Gi, Maumang
Lagyô Pê Htoq Je Gyaú É Hkyô**

1 Laí ló bê ipyat pé má, Garai Gasang gi, nga-nhông é íchýí îwâ pé lé myiqhtoí pé dông alhông lêng eq adông dông mai dáng nyo wú bê
² nghut lhê. Nghut kôlhâng, ló htâng é buinỳí shí pé má, Yhang gi, Yhâng Zo dông mai nga-nhông lé dang nyô bê nghut ri; Yhang gi, lhunglhang lé sêng sù dut râ matú haú Zo lé masat to mù, Zo dông mai, nyí mi-nyí, joq
³ mijoj lé hpan to bê nghut ri. Haú Zo gi, Garai Gasâng é hpungwup shing-kang duqbó é hkyô eq Yhâng é gung-hkyâng isâm roq nghut nyi mù, lhung-lhang lé Yhâng é a-tsam byíng é dang èq zúí zing tô ri. Yhang gi, yubak mara lé lhoq sân-yúng é hkyô lé ban kut é htâng, mauhkung htoq má Hkikhkam dik Sù Garai Gasâng é loqyo
⁴ hkyam má zung to bê nghut ri. Haú mù luí, Yhang gi, maumang lagyô pé é myíng htoq gyaú é myíng lé wó sing yù bê nghut é eq rajung za, yhang-moj htoq je riyhang gyaú sù dut bê nghut ri.
⁵ Hkâsu mù gâ le, Garai Gasang gi, “Nàng gi, Ngá Zo nghut ri. Hkú-nyí, Ngò gi, Náng Wa dut bê nghut lhê.”^a
 ga le, dum,
 “Ngò gi, Yhâng Wa dut râ nghut mù, Yhang gi, Ngá Zo dut râ nghut lhê.”^b
 ga le, maumang lagyo hká yuq lé hkâ-nhám wá taí wú é nghut lhê lú?

⁶ Dum, Garai Gasang gi, Yhâng é zomún lé mingkan shut nhang hâng kat é hkún,

“Ngá é maumang lagyô pé banshoq gi, Yhang lé noqkuq kó sháng gaq.”^c

⁷ ga taí ri. Maumang pé eq séng luí Garai Gasang taí é má,

“Yhang gi, Yhâng é maumang lagyô pé lé lài su dut nhâng mù, Yhâng é dui-nhâng zoshâng wui lé, myishâm pé su dut nhang é nghut ri.”^d

⁸ gâ ri. Nghut kôlhâng, haú Zo eq séng luí, Yhang gi,

“Garai Gasang ê, Náng é hkohkâm-tanghkuq gi, pyat dedu ahtum abyuq gíng nyí mù,

Náng é dingmán hkyô gi, Náng é mingdán lé uphâng é hkyô dut râ nghut lhê.

⁹ Nàng gi, dingmán hkyô lé chyitdap bê nghut mù, agè ashop é hkyô lé a ngui byuq lô é nghut lhê.

Haú mù luí, Garai Gasang, náng é Garai Gasang gi, Nang lé, gabú nhang é xú but byí é dông, Náng é luzúm wui htoq je lhoq gyaú to bê nghut ri.”^e

¹⁰ ga taí ri. Hau htoq agó, Yhang gi,

“Yhumsing ê, Nàng gi, a-nham sâng-hi má myidàm é apùn awang lé hi tô é nghut mù, mauhkung pé gi, Náng é loqmú chyat nghut ri.

^a 1:5 Hkya-on 2:7 ^b 1:5 2 Sam 7:14 ^c 1:6 Tarâ Pun 32:43 ^d 1:7 Hkya-on 104:4

^e 1:9 Hkya-on 45:6-7

- ¹¹ Haú pé gi, htên byoq byuq râ
nghut lhê; nghut kôlhang,
nàng gi, ru gîng nyi râ nghut
lhê; haú pé banshoq gi, mebu
su xau byuq râ nghut lhê.
- ¹² Nàng gi, haú pé lé, bumó lé su
dîng yup râ nghut lhê; Nàng
gi, haú pé lé, mebu su htaî
pyám râ nghut lhê.
Nghut kôlhang, Nàng gi, rajung
za ru gîng nyi râ nghut
mù, Nàng é zanwut pé gi,
hkâ-nhám le htûm râ a
nghut.”^a
- ¹³ ga le taî ri. Garai Gasang gi,
“Ngò, nàng é gye pé lé, nàng é
hkyî nang tanghkuq kut pyám
byî é hkyíng jé shoq,
Ngá é loqyo hkyam shut zung nyi
shi aq.”^b
- ga maumang lagyo hká yuq lé hkâ-
¹⁴ nhám wá taî wú é l hú? Maumâng pé
banshoq gi, hkyi yù hkyô lé hkam yù
râ nghut é bang lé dojaú râ matú,
nhang kat huí é mú wùn woi-nyí pé
chyat za nghut akô, a nghut kó l hú?

Sadiq Byî É Hkyô

- 2** Haú mù luí, nga-nhúng gi, châng
nghoq ló byuq é a hui zo sháng
gaq, haú nga-nhúng wó gyô yu to bê
hkyô lé je riyhang rago châng nyi râ
² dut lhê. Hkâsu mù gâ le, maumang la-
gyô pê èq taî bê mungdang gi, gîng
nyi mù, shut shaí lu laí é hkyô eq jìno
a gyô é hkyô hkanmó kut é sù gi,
yhumsîng eq gíng é mara dam byî é
³ hui zo kô é nghut le gi, nga-nhúng
gi, haú-í yhang gyaú é hkyi yù hkyô
lé haí su a ngàm kut é nghut jáng,
nga-nhúng hkâsu wó hpang lut râ l hú?
Hkyi yù hkyô haú gi, haú Yhumsing

- èq hí taî pyo htoq é nghut mù, Yhâng
chyáng mai wó gyô yu é bang gi, haú
hkyô têng é lé, ngamoq chyáng saksé
⁴ shit bekô nghut ri. Garai Gasang le,
kumlhá pé, mauhpo muzó pé, laklaí
kumlhá myo myo eq, Yhang ô nau é eq
rajung za Chyoiyúng Woi-nyí chyung-
huq pé lé gàm byî é dông mai, haú
hkyô lé saksé shit bê nghut ri.

Hkyi Yù Hkyô Hpóng Byi Sù

- ⁵ Garai Gasang gi, maumang lagyô pé
lé, ngamoq taî nyi é jé lô râ mingkan
⁶ lé, uphkâng nhâng râ a nghut. Rayuq
yuq mai, rawò má saksé hkâm tô é gi,
“Byù gi, haí wá nghut mù, Nàng,
yang lé bûn nyi lhê l hú?
Byu Yhangzo gi, haí wá nghut
mù, Nàng, yang lé wú gôn nyi
lhê l hú?”
- ⁷ Nàng gi, yang lé, maumang
lagyô pê htoq ratsuí lhoq
nyhum to bê nghut ri.
Nàng gi, yang lé, hpungwup
shingkang eq aróng bò nhâng
mù,
⁸ jung hkanmó lé, yhâng é hkyiwa
ô má tô to bê nghut ri.”^c
- gâ ri. Jung hkanmó lé yhâng é a-ô má
tô to bê gâ é gi, Garai Gasang, haí
lháng a myhit to loshoq yang up-
hkâng é a-ô má tô to bê nghut é lé
gâ lhê. Nghut kôlhang, yang é a-ô
má tô tô é jung hkanmó lé, ahkuí,
nga-nhúng a myàng shí é za nghut lhê.
⁹ Nghut kôlhang, nga-nhúng gi, mau-
mang lagyô pê htoq ratsuí zo lhoq
nyhúm huí é sù Yesuq lé myang é
nghut lhê. Yhang gi, Garai Gasâng jeju
mai, yuq hkanmó é matú shí hkâm
byî é hui zo sháng gaq ga, shí-nò
jamjau hkyô lé hkâm zo bê nghut

^a 1:12 Hkya-on 102:25-27 ^b 1:13 Hkya-on 110:1 ^c 2:8 Hkya-on 8:4-6

é yanmai, ahkuí, Yhang lé hpungwup shingkang eq aróng bò nhâng bê nghut ri.

¹⁰ Zo wuí myo myo lé hpungwup shingkang wó hkam yù nhâng sháng gaq ga, jung hkgangmó lé Yhang é matú chyat eq Yhang đông mai chyat joq nyì nhang é Garai Gasang gi, wuí-hke jamjau hui nhang é đông, yhangmoq é hkyi yù Sù lé lhoq gumjup byi
¹¹ rã matú htuk âng nyi ri. Haù byu pé lé chyoiyúng nhang é Sù eq lhoq chyoiyúng huí é bang gi, ikun ralhùm za mã é bang chyat nghut lhê. Haù mù, Yesuq gi, yhangmoq lé, gumang wùi nghũ rã lé a hoq é nghut lhê.

¹² “Ngò gi, Náng myíng lé, Ngá gumang wui chyáng taí pyô rã nghut lhê;

Ngò gi, shiwa hpông é myoq hí má, Nang lé hkya-on mahkôn hkôn rã nghut lhê.”^a

¹³ ga, Yhang taí ri. Yhang gi, “Ngò gi, Yhang lé lumhkau nyì rã nghut lhê.”^b

ga le dum taí ri. Hau htoq agó,

“Ngò gi, Garai Gasang ngo lé byí é zoshâng wùi eq shí má nyì nyi lhê.”^c

ga, Yhang dum taí ri.

¹⁴ Haù zoshâng wùi gi, sui sho eq nghut é yanmai, Yhang le, yhangmoq é xângzo gùng bo hkam yù bê nghut ri. Hau é yanmai, Yhang gi, Yhâng é shí-nò hkyô đông mai, shí-nò hkyô é a-tsam lé zúí zìng é sù nghut é nat Tsadán lé wó lhoq htên pyám rã eq,
¹⁵ yhangmoq é shí-nò hkyô lé gyuq é èq, yhangmoq é asak gón lé jùn đông zúí zìng to huí é bang lé, wó lhoq
¹⁶ lhut rã nghut lhê. Gè gè yhang, Yhang gi, maumang lagyô pé lé garúm é a

nghut é za, Abraham é awut ashín pé
¹⁷ lé garúm é sheq ru nghut lhê. Haù nghut é yanmai, Yhang gi, Garai Gasang lé dojaú é má shogyo nhikmyín é eq lhumzúí é hkyangjong mó wó dut rã eq, byu pé é yubak marâ é matú shíhtaí gunglik hkungga wó kut rã matú, hkyô hkgangmó má Yhâng é gumang wùi eq dù shoq kut é hui rã dut é
¹⁸ nghut lhê. Yhang gi, gunlaú huí é hkùn, Yhânggùng yhang jamjau hui zo bê nghut é yanmai, gunlaú huí nyi é bang lé wó garúm yu é nghut lhê.

Yesuq Gi, Mosheq Htoq Gyaú É Hkyô

3 Haù mù luí, mauhkúng mai wut yù huí é, chyoiyúng é gumang wùi ê, lagyo eq hkyangjong mó nghũ nga-nhúng yín yu é Yesuq é hkyô lé
² rago myit wú keq. Mosheq, Garai Gasâng é yhùm gón má lhumzúí é su, Yesuq le, Yhang lé masat yù sù Garai Gasâng chyáng lhumzui sù dut bê
³ nghut ri.^d Yhùm kut sù gi, yhùm htoq je gyaú é aróng lé wó é su, Mosheq htoq, Yesuq gi, je gyaú é aróng lé wó
⁴ gíng é lé myàng ri. Hkâsu mù gâ le, yhùm hkgangmó gi, rayuq yuq èq saí é chyat nghut ri. Nghut kôlhang, Garai Gasang gi, jung hkgangmó lé saí é
⁵ sù nghut lhê. Mosheq gi, Garai Gasâng é yhùm gón má dui-nhâng zoshâng rayuq đông lhumzui mù, Garai Gasang taí rã nghut é lé saksé hkám
⁶ bê nghut ri. Nghut kôlhang, Hkrisduq gi, lhumzúí é zo rayuq đông Garai Gasâng é yhùm lé up ri. Nga-nhúng kúm gi, nga-nhúng lé wám é myit bò nhang é hkyô eq nga-nhúng gumrong nyi é myoqbyù hkyô lé myhik zìng nyi é nghut jáng, Yhâng é yhùm nghut nyí bê.

^a 2:12 Hkya-on 22:22 ^b 2:13 Esai 8:17 ^c 2:13 Esai 8:18 ^d 3:2 Bun zo shí eq bun zo 5, 6 lhum mã é Garai Gasâng é yhùm gâ é gi, Garai Gasâng é byu pé lé gâ é nghut lhê.

A Lumj́ing Bang Lé Sidiq Byí É Hkyô

- 7 Haú mù luí, haú Chyoiyúng Woi-nyí taí é eq rajung za,
 “Hkû-nyí, nungmoq gi, Yhâng é danghtê lé wó gyo kô é nghut
- 8 jáng, yoso má Yhang lé chyâm kô é u lé,
 gumlau toq é hkûn nungmoq é îchyí îwâ pé kut kô é su, nungmoq é i-myt lé hkâlhoq htan to kó.
- 9 Nungmoq é îchyí îwâ pé gi, myi xê zàn yhang Ngò kut é muzó lé myàng kôle, yoso haú má Ngo lé chyam lik bekò nghut ri.
- 10 Haú nghut é yanmai, Ngò gi, ipyat haú lé nhikjum yo mù, ‘Yhangmoq é myit nhiklum gi, hkâ-nhám le hkyô nghoq byuq akò;
 yhangmoq gi, ngá é hkyô pé lé a sé kômù nghut ri.’ nghû taí é nghut lhê.
- 11 Haú mù, ‘Ngá é bánno jowò má yhangmoq hkâ-nhám le wó wâng kó râ a nghut.’ nghû, Ngò, nhikjum yô é eq dakâm dang taí bê nghut lhê.”^a
 gâ ri.
- 12 Gumang wuì ê, nungmoq mâ é ó yuq le, haú rû dui nyí é Garai Gasâng chyáng mai, lhing taú ló byuq sê é, yubak mara byíng é, a lumj́ing é i-myt a bò sháng gaq, sidiq nyí keq.
- 13 Nungmoq gi, ó yuq le, yubak marâ é mhaú zô é hkyo èq i-myt lhoq htan pyâm é a hui kó sháng gaq, “hkû-nyí” nghû ru wó taí nyí nyí gi, nyí wuì, rayuq eq rayuq myit wum byí lhúm nyí
- 14 keq. Nga-nhúng gi, sâng-hi mai wó to bê myit lùm hkyô lé, ló htáng shoq

zuí gîng nyí é nghut jáng, Hkrisduq eq chôm zùm yap nyí é bang dut bê
 15 nghut ri. Haú gi,

“Hkû-nyí, nungmoq, Yhâng é danghtê lé wó gyô é nghut jáng, gumlau toq é hkûn, nungmoq é îchyí îwâ pé kut kô é su, nungmoq é i-myt lé hkâlhoq htan to kó.”^b

ga taí é eq rajung za nghut ri.

- 16 Wó gyô yù mù, gumlau toq é bang gi, ô pé nghut akò lhú? Haú bang ban-shoq gi, Egutuq ming mai Mosheq èq shuí htoq lo é bang nghut bum lhê, a
- 17 nghut kó lhú? Myi xê zàn yhang Garai Gasang lé nhikjum yó nhang é bang gi, ô pé nghut akò lhú? Haú bang gi, mara kut shut mù, yoso má shi leq byuq é bang nghut bum lhê, a nghut
- 18 kó lhú? Jîno a gyô bùm kô é nghut jáng, Yhâng é bánno jowò má yhangmoq hkâ-nhám le wó wâng kó râ a nghut ga, Garai Gasâng èq dakam é
- 19 bang gi, ô pé nghut akò lhú? Haú mù, yhangmoq a lumj́ing kô é yanmai, a wó wâng kô é lé, nga-nhúng myang é nghut lhê.

Garai Gasâng É Byu Pê É Matú Bánno Buinyí Đông Nghut É Bánno Jowò

- 4** Haú nghut mù luí, Garai Gasâng é bánno jowò má wàng râ dang-gidiq ru gîng nyí ashí nghut é yanmai, nungmoq mâ é ó yuq le, haú má a hkyit hkap é a dut râ matú,
- 2 nga-nhúng sidiq nyí sháng. Hkâsu mù gâ le, yhangmoq lé gabú danglù haú hko kyo bê su, ngamoq lé le hko kyo bê nghut lhê; nghut kôlhang, yhangmoq wó gyô é mungdang gi, yhangmoq é matú akyú a bò, haí mù gâ le, haú wó gyô é bang gi, lumj́ing

^a 3:11 Hkya-on 95:7-11 ^b 3:15 Hkya-on 95:7-8

myit mai a lhom hap yù kô é yanmai
³ nghut ri. Nga-nhúng lumjúng bê bang
 za, bánno jowò háu má wó wang é
 nghut lhê. Haù hkyô gi,

“Haù mù, ‘Ngá é bánno jowò má
 yhangmoq hkâ-nhám le wó
 wâng ko râ a nghut.’ nghû,
 Ngò, nhikjum yô é èq dakâm
 dang tái bê nghut lhê.”^a

ga Garai Gasang tái bê eq rajung za
 dut é nghut ri. Nghut kôlhang, Yhâng
 é muzó gi, mau htoq xâng hkun mai
⁴ ban kut to bê nghut lhê. Hkâsu mù gâ
 le, “Garai Gasang gi, nyhit nyí nghû
 râ buinyì má Yhâng é muzó banshoq
 mai bánno bê nghut ri.”^b gâ é dang
 pé má, haù nyhit nyí nghû râ buinyì
 eq sêng é hkyô lé rawò má Yhang tái
⁵ tô ri. Bánno jowò joq é eq séng luí,
 Yhang dum tái tô é gi, “Ngá é bánno
 jowò má yhangmoq hkâ-nhám le wó
 wâng kó râ a nghut.”^c gâ ri.

⁶ Bánno jowò háu má wàng râ bang
 ra-am nyi é danggidiq joq tô ashí
 nghut ri; hí hkûn, gabú danglù háu
 wó gyô wú bê bang kúm gi, yhang-
 moq jìno a gyo kô é yanmai, a wàng
⁷ kô é nghut lhê. Haù mù luí,

“Hkû-nyí, nungmoq, Yhâng é
 danghtê lé wó gyo kô é nghut
 jáng, nungmoq é i-myt lé
 hkâlhoq htân kó.”^d

gâ é lé, ngò hí lé tái bê eq rajung
 za, Garai Gasang gi, gyai myáng é
 htâng má Dawiq đông mai tái é hkûn,
 “Hkû-nyí” gâ é buinyì ra-nyí dum ma-
⁸ sat to bê nghut ri. Hkâsu mù gâ le,
 yhangmoq lé, Yoshuq èq bánno jowò
 byi bê ru nghut le gi, Garai Gasang gi,
 htâng má, gotù buinyì eq séng luí tái
⁹ râ a nghut lo. Haù mù luí, Garai Ga-
 sâng é byu pé é matú gi, Bánno bui-

nyì đông nghut é bánno jowò ru joq tô
¹⁰ ashí nghut lhê. Hkâsu mù gâ le, Garai
 Gasang gi, Yhâng é muzó mai bannô
 é su, Garai Gasâng é bánno jowò má
 wàng é sù gi, yhumsing é muzó mai
¹¹ bánno râ nghut lhê. Haù nghut mù,
 yhangmoq é jìno a gyo hkyô é alik
 lé cháng mù leqbat é, ó yuq le a bò
 sháng gaq, nga-nhúng gi, bánno jowò
 háu má wó wâng shoq, a-tsam bo é í
 shikut sháng.

¹² Hkâsu mù gâ le, Garai Gasâng é
 mungdang gi, rû dui nyi é eq a-tsam
 bo é nghut lhê. Haù gi, shamsó íshut
 dap é sham htoq má je htoq é nghut
 mù, myit nhiklum eq woi-nyí lé le,
 wuimyoq pé eq wui-nyún lé le, wó
 gam hkoq hkyang rot é nghut lhê; haù
 gi, nga-nhúng myit é hkyô pé eq myit
 sôn é hkyô pé lé wó jéyáng é nghut
¹³ lhê. Hpan tô é lhunglhang gi, Garai
 Gasâng é hí mai wó haq pyâm é haí
 le a joq é nghut lhê. Jung hkanmó
 gi, nga-nhúng, jihpán shit ra râ Su é
 myoq hí má a wó nghop tô é hkyô, de
 de dut é nghut lhê.

Je Gyaú É Hkyangjong Mó Yesuq

¹⁴ Haù mù luí, nga-nhúng gi, Garai Ga-
 sâng é Yhangzo Yesuq nghut sù, mau-
 hkûng pè shut hkyang doq ló bê nghut
 é gyaú é hkyangjong mó lé wó é nghut
 é yanmai, nga-nhúng yín yu to bê
 lumjúng hkyô lé ging ging myhik zing
¹⁵ nyì sháng. Hkâsu mù gâ le, nga-nhúng
 gi, nga-nhúng wum nyhôm é hkyô pé
 lé a sê gyo byí é hkyangjong mó wó
 é a nghut é za, nga-nhúng su hkyô
 hkanmó má gunlaú é huí wú kô-
 lhang mara a bo é sù hkyangjong mó
¹⁶ lé sheq wó é ru nghut lhê. Haù mù
 luí, nga-nhúng gi, shogyo nhikmyîn é

^a 4:3 Hkya-on 95:11 ^b 4:4 Apùn 2:2 ^c 4:5 Hkya-on 95:11 ^d 4:7 Hkya-on 95:7-8

hkyô wó yû râ eq, nga-nhúng ra châ é u má nga-nhúng le wó garúm râ jeju lé myang hô sháng gaq, hkyak lum é myit mai Garaí jeju tanghkuq shut chyâng htep ê sháng.

5 Hkyangjong mó yuq hkanmó gi, byu pê chyáng mai hkyin htoq yû huí é nghut mù, mara pê é matú, chyunghuq pé eq hkungga pé nhông byi hkyô nghut é, Garaí Gasang eq sêng é muzó pé má, yhangmoq é gunglik dông, hkyin masat to huí é bang nghut akô. Yhânggùng yhang gi, wum nyhóm hkyô é a-ô má nghut nyi é yanmai, yhang gi, bun a bóng é eq hkyô ngoq ló é bang lé nú-nhâm é dông wó shuí-û é nghut lhê. Wum nyhóm é yanmai, yhang gi, byu pê é marâ é matú le, yhânggùng yhâng é marâ é matú le, hkungga nhông byi râ dut é nghut lhê.

⁴ Ó yuq le, yhumsing gùng yhumsing aróng haú lé wó yu é a nghut; Arun lé su, Garaí Gasâng èq wut yu é hui jáng sheq wó é nghut lhê. Haú eq rajung za, Hkrisduq le, hkyangjong mó dut lo é hpungwup shingkang lé, Yhânggùng yhang kut yu é a nghut. Garaí Gasang sheq, Yhang lé,

“Nàng gi, Ngá Zo nghut ri; Ngò, hkû-nyí Náng Wa dut bê nghut lhê.”^a

⁶ ga taí é nghut lhê. Hau htoq agó, “Nàng gi, Melahkizedek wó é hkyangjong ayá hkyô dông mai ahtum abyuq hkyangjong rayuq nghut nyi ri.”^b ga, gó wô má le, Yhang taí to ashí nghut ri.

⁷ Yesuq gi, myidàm htoq má asak dui nyi é buinyì pé má, Yhang lé, shi é mai wó hkyi yù Su chyáng, ngaubyi

ngau-nhap eq wut garû é èq, kyû-dung é eq dung tôngbán bê nghut mù, Yhâng é hkungga gíng é ap nóng hkyo é yanmai, gyo byí é hui bê nghut ri.

⁸ Yhang gi, Zo rayuq nghut to kôle, Yhang hui zô é wuîhke jamjau hkyô mai jìno gyo hkyô wó mhoq yû bê nghut ri. Yhang gi, lhoq gumjup huí é hkûn, Yhang é jìno gyo bang banshoq é matú, ahtum abyuq é hkyi yù hkyo é awang dut byuq bê nghut é eq, Melahkizedek wó é hkyangjong ayá hkyô dông mai hkyangjong mó dut râ matú, Garaí Gasâng èq hkyin masat é hui bê sù nghut ri.

Woi-nyí Má Wáng Ra Bê Hkyô

¹¹ Ngamoq gi, shí hkyô eq séng luí taí râ gyai joq lhê; nghut kôlhang, nungmoq gi, ra lui za a sê gyô é bang nghut kô é yanmai, taí sân kyo wuî ri.

¹² Gè gè ga jáng, ahkui lhê ahkyíng má, nungmoq gi, sará dut gíng bê bang nghut lhê; nghut kôlhang, Garaí Gasâng é mungdang mâ é tengmán hkyo é awang lé, rayuq yuq èq nungmoq lé dum taú mhoq byi râ ru dut nyi akô nghut ri. Nungmoq gi, htan é zoshuq râ é bang a nghut, naú wing râ é bang ru nghut nyi ashí kó myhi-nhung! Naú wing shuq râ é sù ó yuq le, zonú nghut nyi ashí mù, dingmán é hkyô lé mhoqshit é má a mán shi nghut ri. Nghut kôlhang, htan é zoshuq gi, ge é hkyô eq agè ashop é hkyô lé wó sê gam hkoq yû shoq, hkâ-nhám le yhumsing gùng yhumsing lhoq mhân yu nyi é, kô dîng bê bâng é matú ru nghut lhê.

6 Haú mù luí, nga-nhúng gi, Hkrisduq eq sêng é mhoqshit hkyô awang lé tô to mù, myit kô dîng é hkyô shut xoq sô ê sháng.

^a 5:5 Hkya-on 2:7 ^b 5:6 Hkya-on 110:4

- Nga-nhúng gi, shí-nò hkyô shut shuí jé é muzó mai myit lhîng hkyo é,
- ² Garai Gasang lé lumjîng hkyo é, baptisma pé, loq ke byi hkyô, shi é mai dum dui toq hkyô eq ahtum abyuj jé-yáng hkyô eq sêng é mhoqshit hkyo é, apûn awang dum hî nó a ra lô é
- ³ nghut lhê. Garai Gasang gyô é nghut jáng, nga-nhúng gi, myit kô dîng hkyô shut xoq so râ nghut lhê.
- ⁴ Myoq lhoq bóng é radâm hui bê bang, mauhkûng chyunhuq lé myang hap yù bê bang, haû Chyoi-yúng Woi-nyí lé chôm hkam yù bê
- ⁵ bang, Garai Gasâng é mungdâng é gè hkyô eq jé lo nyi é ipyat é a-tsam pé
- ⁶ lé myang chyam wú bê bang, yhangmoq hpuq lhik ló byuq é nghut le gi, hká dông lé myit lhîng dum ge wó râ a nghut lo, haî mù gâ le, yhangmoq gi, Garai Gasâng é Yhangzo lé dum jén sat pyâm é dut mù, Yhang lé de de rhoi pyâm kô é nghut lhê.
- ⁷ Yhâng ahtoq má wo gyûn é mau wuí lé shuq yû mù, yò mù saí bâng é matú akyû bo é hôwa nuqhpyí lhoq htoq byí é maumyî gi, Garai Gasâng é shimân
- ⁸ jeju myang hap yu é nghut ri. Nghut kôlhang, zu gâm eq myoq gâm yuq htoq nhang é maumyî gi, akyû a bò mù, nhîng pyâm é hui zo râ lé chiq râ ri. Haû gi, ló htáng má nyhê hkyô pyâm é hui râ nghut lhê.
- ⁹ Nghut kôlhang, chyitdap é gumang wui ê, ngamoq gi, haû su nghû taí é nghut kôlhang, nungmoq é hkyi yù hkyô eq sêng é je ge é jung pé, nungmoq wó bekô râ nghû hkyak myit lum
- ¹⁰ tô lhê. Garai Gasang gi, a tara é sù a nghut. Yhang gi, nungmoq é muzó lé le, Yhâng é byu pé lé nungmoq garúm bê eq xoq luí garúm nyi é dông, Yhang

lé nungmoq chyitdap é myit shit kô é hkyô lé le, a tô-myhí râ nghut lhê.

- ¹¹ Ngamoq gi, nungmoq é i-myt myoq-byù hkyô wó byíng jup râ matú, nungmoq yuq hkangmó ipyat htum shoq xoq shikut nyi kó râ lé gyai ô nau ri.
- ¹² Ngamoq gi, nungmoq lagon bang dut byuq râ lé a ô nau é za, Garaí dang-gidiq byí to bê é lé, lumjîng myit eq myit hîng hkyô dông mai hkam yu é bang su châng kut kó râ lé ô nau é ru nghut lhê.

Garai Gasâng É Danggidiq Gîng Nyi É Hkyô

- ¹³ Garai Gasang gi, Abraham lé dang-gidiq tô é hkûn, Yhâng htoq gyaú é dakâm myîng lang râ rayuq lháng a nyi é nghut mù, Yhânggûng lé Yhang lang
- ¹⁴ luí dakam é gi, “Ngò gi, nang lé teng yhang shimân byi mù, nang lé awut ashín myo myo byi râ nghut lhê.”^a
- ¹⁵ gâ ri. Haû mù, Abraham gi, myit hîng hîng láng yu é htâng má, byí tô é danggidiq lé wó yù bê nghut ri.
- ¹⁶ Byu pé gi, yhangmoq htoq gyaú su é myîng lé lang luí, dakâm kô é eq, yhangmoq dakam é dang lé saksé kut mù, dang-rháng é hkyô pé banshoq
- ¹⁷ lé lhoq pân pyâm akô nghut ri. Garaí Gasang gi, Yhang myit hpyit tô é hkâ-nhâm le a htaî lhik é hkyô lé, danggidiq byí tô é lé hkam yù râ bâng chyáng san za shit nau ri; haû mù luí, dakâm dang eq lhoq gîng to bê
- ¹⁸ nghut ri. Garaí Gasang gi, mhaú a ge é yanmai, hkâ-nhâm le a htaî lhik é hkyô í hkat nghut é danggidiq eq dakâm dang joq é nghut mù, Yhang haû su kut é gi, nga-nhúng hí má tô to byí é myit myoqbyù hkyô lé myhik zîng râ matú gaû é jowò shut hpang wàng

^a 6:14 Apûn 22:17

bê bang nga-nhúng lé wum mó byî
¹⁹ é dut râ matú nghut lhê. Nga-nhúng
 gi, myit nhiklhûm é shamtoq goknghe
 dông myit myoqbyù hkyô haû lé wó é
 nghut mù, haû gi, gingtîng é eq gaû
 é hkyô nghut ri. Myit myoqbyù hkyô
 haû gi, mauhkûng noqkuq yhûm mâ é
 pân-gyang ahkaû mâ é sân-yúng gok
²⁰ má jé wang é nghut ri. Jowò haû gi,
 nga-nhúng é akyu é matú, nga-nhúng
 é hí má wàng byî é sù Yesuq wang
 jé é jowò nghut ri. Yhang gi, Mela-
 hkizedek wó é hkyangjong ayá hkyô
 dông mai, ahtum abyuq é hkyangjong
 mó dut bê nghut ri.

Hkyangjong Melahkizedek É Hkyô

7 Melahkizedek gi, Salem myuq é
 hkohkâm eq Myhang Htâng é Ga-
 rai Gasâng é hkyangjong nghut ri.
 Yhang gi, hkohkâm pé lé sat ûng
 pyám luí dum taû lo é Abraham lé hui
² mù, shimân byi bê nghut ri. Haû mù,
 Abraham gi, wó lo é jung hkangmó
 mâ é, xê gambùm mâ é ragambùm,
 yhang lé byi bê nghut ri. Sâng-hi
 lhê é Melahkizedek é myîng lichyúm
 gi, “dingmán hkyo é hkohkâm” gâ é
 nghut mù, htâng lhê é “Salem é hko-
 hkâm” gâ é gi, “nguingón hkyo é hko-
³ hkâm” gâ é nghut lhê. Yhâng é înu
 îwa é hkyô eq byùxik labaû le, hi é
 buinyî eq asak htûm é hkyô le a kâ
 to nghut ri. Yhang gi, Garai Gasâng é
 Yhangzo su, ahtum abyuq hkyangjong
 ru nghut nyi ri.
⁴ Yhang hkâ-í hkik lhê nghû é lé,
 myit wú keq. Haû îchyí îwa Abra-
 ham lháng gi, wó lo é mâ é xê gam-
 bùm mâ é ragambùm, yhang lé byi
⁵ ri-nhung! Hkyangjong dut bang Le-
 wiq é awut ashîn pé gi, yhangmoq é
 gumang wuì, Abraham mai nyî gyó
 lo é bang nghut kôle, tarâ má bo é

eq rajung za, haû bâng chyáng mai
 xê gambùm mâ é ragambùm lé hkyui
⁶ yù râ dut é bang nghut akô. Nghut
 kôlhang, Melahkizedek gi, Lewiq mai
 gyó lo é amyû a nghut kôle, danggidiq
 pé wó to sù nghut é Abraham chyáng
 mai xê gambùm mâ é ragambùm hap
⁷ yù mù, shimân byî ri. Shimân byi
 sù gi, shimân byî é lé hkam yù sù
 htoq je gyaú sù nghut é lé, ó yuq le
 úng-áng râ hkyô a joq é nghut lhê.
⁸ Hkyangjong pé eq séng luí ga jang,
 shi byuq sê é byu èq, xê gambùm
 mâ é ragambùm lé hkyui yu é nghut
 lhê; nghut kôlhang, Melahkizedek eq
 séng luí nghut jáng, asak dui nyi é
 ga taí pyò byî é huí su èq hkyui yu
⁹ é nghut lhê. Xê gambùm mâ é ra-
 gambùm hkyui yù sù, Lewiq lháng gi,
 Abraham dông mai xê gambùm mâ é
¹⁰ ragambùm byi bê nghû wó taí ri. Haû
 mù gâ le, Melahkizedek gi, Abraham
 lé huí é hkûn, Lewiq gi, yhâng é îchyí
 îké é gungdu hkaû má ru bo tô ashí
 nghut ri.

Melahkizedek Eq Dù É Yesuq

¹¹ Haû Lewiq hkyangjong amyû pé é
 ipyat má, byu pé gi, jep é tarâ lé wó
 yu bùm kô é nghut mù, hkyangjong
 ayá haû mai gumjup hkyô wó yú kô
 é nghut le gi, haû mù luí, Arun wó
 é hkyangjong ayá hkyo dông a nghut
 é za, Melahkizedek wó é hkyangjong
 ayá hkyo dông lo é sù gotû hkyang-
¹² jong rayuq ra shirâ lhú? Hkâsu mù
 gâ le, hkyangjong amyû htaí é hkûn
 gi, tarâ le htaí yhang htaí râ dut é
¹³ nghut lhê. Haû su nghû taí é hkyô
 pé eq séng é Sù gi, gotû byuhú mâ
 é sù nghut mù, byuhú haû mai gi, ó
 yuq le hkungga gyap má dojaú wú é
¹⁴ a nghut. Hkâsu mù gâ le, nga-nhúng
 é Yhumsîng gi, Yudaq byuhú mai gyó

lo é awut ashín nghut é hkyô, san za nghut nyi ri. Mosheq kúm gi, byuhú haú eq sêng é hkyô má, hkyangjong pé eq séng luí haí lé a taí é
¹⁵ nghut lhê. Melahkizedek eq dù é gotú hkyangjong rayuq pô htoq bê nghú, ngamoq taí bê hkyô gi, je riyhang
¹⁶ san za dut bê nghut ri. Yhang gi, îwa rayuq é awut ashín pé nghut râ lhê gâ é tarâ dông hkyangjong rayuq lé dut é a nghut é za, a wó lhoq htên é asak é a-tsam eq rajung za
¹⁷ lé dut é ru nghut lhê. Hkâsu mù gâ le,

“Nàng gi, Melahkizedek wó é hkyangjong ayá hkyô dông mai, ahtum abyuq hkyangjong rayuq nghut nyi ri.”^a

ga Yhang eq séng luí taí pyo tô é nghut lhê.

¹⁸ Haú hí lhê é cháng râ tarâ gi, wum nyhôm é eq akyú a bo é yanmai, tô
¹⁹ pyám bê nghut lhê. Hkâsu mù gâ le, haú jep é tarâ gi, gumjup hkyô haí a wó kut byí é nghut lhê. Haú mù, je ge é myit myoqbyù hkyô lajang byí é nghut luí, nga-nhúng gi, myit myoqbyù hkyô haú mai Garai Gasâng chyáng wó chyâng htep ê é nghut lhê.

²⁰ Myit myoqbyù hkyô haú gi, dakâm hkyô a bo é a nghut myhi-nhung! Góbang gi, dakâm hkyô a bo é za hkyangjông pé wó dut bekô nghut ri.

²¹ Nghut kôlhang, Yesuq kúm gi,
 “Nàng gi, ahtum abyuq hkyangjong rayuq nghut lhê.’
 ga haú Yhumsing dakâm bê nghut mù, Yhang myit é hkyô htaí râ a nghut.”^b

ga, Yhang eq séng luí Garai Gasang taí é hkún, dakâm dang haú mai hkyang-

²² jong rayuq dut bê nghut ri. Dakâm dang hau é yanmai, Yesuq gi, je ge é dangshikaq é pahkám wò yù sù dut bê nghut ri.

²³ Hkyangjông pé myo myo nyi râ dut é gi, yhangmoq é muzó a wó xoq zui shoq shi byuq hkyô èq hkúm zing

²⁴ pyám kô é yanmai nghut ri. Nghut kô-lhang, Yesuq gi, ahtum abyuq dui nyi sù nghut é yanmai, Yhang gi, hkyangjong mù ayang ru zuí nyi râ nghut lhê.

²⁵ Haú mù luí, Yhang gi, Yhang dông mai Garai Gasâng chyáng lé jé é bang lé, hkâ-nhám le wó hkyi yu é nghut lhê; haí mù gâ le, Yhang gi, yhangmoq é matú dúng tôngbán byi nyi râ matú, rú dui nyi é sù nghut lhê.

²⁶ Yesuq gi, chyoiyúng é sù, mara hún râ hkyô a bo é sù, sân-yúng é sù, yubak dap bang eq rahá a nghut shoq gotú san kut huí é sù, mauhkúng pè ahtoq má lhoq toq lhoq gyaú yu huí é sù nghut ri. Haú sù é hkyangjong mó gi, nga-nhúng râ é lé lajang

²⁷ byi râ htuk ang ri. Nyí nyí bui bui, yhumsing é marâ é matú hí hkungga nhông byi mù, byu pè é mara matú le hkungga nhông byí é gotú hkyangjong mó pé su, Yhang gi, a kut râ é sù nghut lhê. Yhang gi, Yhânggùng lé Yhang nhông byí é hkún, yhangmoq é yubak marâ é matú banshoq radàm za hkungga nhông byi pyám

²⁸ bê nghut ri. Hkâsu mù gâ le, haú jep é tarâ gi, wum nyhôm é byu pé lé hkyangjong mó pé dông masat é nghut ri. Nghut kôlhang, Garai Gasang gi, haú jep é tarâ é htàng má lé jé é dakâm dâng èq, Yhâng é Yuqzo lé masat to bê nghut mù, Yhang gi, ahtum abyuq lhoq gumjup hui bê nghut ri.

^a 7:17 Hkya-on 110:4 ^b 7:21 Hkya-on 110:4

**Dangshikaq Asik É
Hkyangjong Mó Yesuq**

- 8** Ngamoq taí nyi é dangkâng gi, shí dông nghut lhê: Nga-nhúng gi, haû sù é hkyangjong mó lé wó é bang nghut lhê. Yhang gi, mauhkûng htoq má, Hkikhkam dik Sû Garaî é hko-hkâm-tanghkuq é loqyò hkyam shut
- ² zùng to mù, byu èq saí é a nghut é za, haû Yhumsing èq saí é saksé zúm akying hkaû mâ é, sân-yúng dik gok má dojaú é sù nghut ri.
- ³ Hkyangjong mó hkanmó gi, chyunghuq pé eq hkungga pé lé nhông byi râ matú wò hun to huí é chyat nghut lhê. Haû mù luí, hkyangjong mó shí yuq le, rajung jung nhông byi ra râ nghut
- ⁴ lhê. Yhang gi, mingkan htoq má nyi tô é ru nghut le gi, hkyangjong dut râ a nghut; hkâsu mù gà le, jep é tarâ dông ga jang, chyunghuq nhông jaú é byu pé nyi to gù
- ⁵ bê nghut lhê. Yhangmoq, sân-yúng dik gok má dojaú é hkyô gi, mauhkûng htoq má joq é azòng eq wupzo dông nghut ri. Haû nghut é yanmai, Mosheq gi, saksé zúm saí râ nghut é hkûn, “Nang lé, bùm má tân shit é azòng eq rajung za jung hkanmó wó saí shoq kut aq.”^a ga
- ⁶ sidiq byi huí é nghut lhê. Nghut kô-lhang, Yesuq, gyoro sô xoq byí é dangshikaq gi, axaû lhûm htoq má je gyaú é eq rajung za Yhang hap yu tô é dojaú hkyô gi, yhangmoq é dojaú hkyo htoq má je gyaú é nghut lhê. Haû mù, dangshikaq haû gi, je ge é danggidiq pê htoq má awang hi tô é nghut lhê.
- ⁷ Hkâsu mù gà le, sâng-hi lhê é dangshikaq má râ é hkyô haí a bo é ru

- nghut le gi, gotû ra râ a nghut lo.
- ⁸ Nghut kô-lhang, Garai Gasang gi, byu pê chyáng mara bo é myàng mù, taí é gi,
- “Haû Israelaq é yhumbyù wuì eq le, Yudaq é yhumbyù wuì eq le,
- Ngò, dangshikaq asik to râ ahkyíng jé lo nyi ri ga haû Yhumsing taí pyo ri.
- ⁹ Haû gi, Ngò, yhangmoq é íchýí íwâ pé lé loq èq zui mù, Egutuq ming mai shuí htoq lo é hkûn,
- yhangmoq eq tô tô é dangshikaq su dut râ a nghut.
- Haí mù gà le, yhangmoq gi, Ngá é dangshikaq lé a xoq cháng kô é nghut mù,
- Ngò gi, yhangmoq chyáng mai lhing ló byuq é nghut lhê ga haû Yhumsing taí pyo ri.
- ¹⁰ Shí gi, ahkyíng haû laí é htâng má, Israelaq é yhumbyù wuì eq Ngò to râ nghut é dangshikaq nghut lhê ga haû Yhumsing taí pyo ri.
- Ngò gi, Ngá é tarâ pé lé, yhangmoq é i-myt má kat byi mù, yhangmoq é myit nhiklhum má kê to byi râ nghut lhê.
- Ngò gi, yhangmoq é Garai Gasang nghut mù, yhangmoq gi, Ngá é byu pé dut kó râ nghut lhê.
- ¹¹ ‘Haû Yhumsing lé sé keq.’ ga, yhâng é gumang hpó lé nghut nghut,
- yhâng é chyangnâm mâ é sù lé nghut nghut, mhoqshit é byu nyi râ a nghut lo,

^a 8:5 Htoq Ló 25:40

- haî mù gâ lé, yhangmoq
 lhunglhâng bang gi, tiq htáng
 sù mai kô htáng sù jé shoq
 Ngo lé sé kó râ nghut lhê.
- ¹² Hkâsu mù gâ le, Ngò gi,
 yhangmoq é agè ashop hkyô
 lé mara hkyut pyám byi mù,
 yhangmoq é mara pé lé dum a
 bun byi lo râ nghut lhê.”^a
 gâ ri.
- ¹³ Dangshikaq haû lé, Yhang “asik”
 gâ é gi, sâng-hî lhum lé, axau kut
 pyâm é nghut ri; xau ló byuq é haî
 le, hkâ-myháng a myáng má byuq ló
 byuq râ nghut lhê.

Myidàm Saksé Zúm Má Noqkuq É Hkyô

- 9** Sâng-hi lhê é dangshikaq gi, noq-
 kuq râ htúngtarâ pé eq noqkuq
 râ myidàm sân-yúng dik gok bo é
² nghut ri. Saî tô é saksé zúm é sâng-hi
 gok má gi, haû myibung tsúng jang,
 siboî eq haû nhông byî é muk joq
 mù, haû gok lé gi, Chyoiyúng Jowò
³ ga myhîng ri. Í dang nghû râ gok
 pán-gyang é ahkaû mâ é gok lé gi,
 Chyoiyúng Htâng é Jowò gâ é nghut
⁴ lhê. Gok haû má gi, namngón jung
 nyhê é hîng hkungga gyap eq hîng
 shup dangshikaq sidek joq ri. Dang-
 shikaq sidek haû má gi, mannaq muk
 bo é hîng yam, ahaq nyún tô é, Arun
 é dumbáng eq, dangshikaq luqlong pé
⁵ bo tô ri. Dangshikaq sidek é ahtoq má
 gi, shîhtaî gunglik hkungga byi jang
 htoq má wup tô é, Hpungwup shing-
 kang bò Sù é hkerubim^b pé joq tô ri.
 Nghut kôlhang, ngamoq gi, ahkuî haû
 pé lé jikhúm nuqguq a wó taî san kyo
 é nghut lhê.
- ⁶ Haû dông jung hkanmó ban lajang
 tô é hkûn, hkyangjông pé gi, ayang

- sâng-hi gok má wàng mù, yhangmoq é
 dojaú muzó lé wùn waq bekô nghut ri.
- ⁷ Nghut kôlhang, ahkaû gok má gi,
 hkyangjong mó za, yhânggùng é matú
 le, a sê é za byu pé kut shut é marâ
 é matú le, nhông byi râ sui chûng
 mù, razàn má radàm za wang é nghut
⁸ lhê. Haû Chyoiyúng Woi-nyî gi, haû
 pé dông mai, sâng-hi é saksé zúm ru
 joq nyî nyî, haû Chyoiyúng Htâng é
 Jowò wàng hkyô a hpông shit shi é
⁹ lé, tân shit nyi ri. Haû gi, ipyat shi
 é matú tân shit é azông nghut mù,
 nhông byî é chyunghuq pé eq shigu
 hkungga pé gi, dojaú sù é i-myt lé a
 wó lhoq sân-yúng byî é hkyô lé taî nau
¹⁰ é nghut lhê. Haû pé gi, zojung, shuq-
 jung eq chî san chî séng hking ahú hú
 eq za séng é nghut mù, htúngli asik, lé
 joq é ahkýng jé shoq za tô tô é gung-
 sho eq séng é tarâ pé nghut ri.

Hkrisduq É Sui

- ¹¹ Hkrisduq gi, shî má joq to gù nghut
 é gè hkyô pê é hkyangjong mó dông
 lé jé é hkûn, hpan tô é má a lom nghû
 nau é, byu èq saî é a nghut é, je kô é
 eq je gumjup é saksé zúm mai wang
¹² lai bê nghut lhê. Yhang gi, Chyoiyúng
 Htâng é Jowò má wang é hkûn, bai-
 nám eq nojúng zo pê é sui lé chûng
 mù wang é a nghut é za, Yhâng é suí
 èq yhang banshoq é matú radàm za
 ahtum abyuq é hkyi yù hkyô wó yù
¹³ bê nghut ri. Htúngli dông agot a-û dut
 é bang lé lhoq sân-yúng râ matú, bai-
 nám eq nohtó zo pê é sui eq no-pyâ é
 myi-mhop lé, yhangmoq é ahtoq má
 hpyun gyun é hkûn, yhangmoq gi,
 ahtoq gungsho pyâm wó lhoq sansêng
¹⁴ é hui kô é nghut lhê. Haû nghut jáng,
 Garai Gasâng é hí má ra a bo é Yhâng-

^a 8:12 Yer 31:31-34 ^b 9:5 Hkerubim gâ é gi, byù su su, dusak su su dut é, dùng dap é maumang lagyo rahú nghut lhê.

gùng lé, ahtum abyuq é Woi-nyí dông mai không byí é Hkrisduq é sui gi, rû dui nyi é Garai Gasang lé nga-nhúng wó dojaú sháng gaq ga, shi é hkyô shut shuí jé é nyi yap sâmlai mai nga-nhúng é myit sôn sê é hkyô lé, je riyhang wó lhoq sanséng yu ri-nhung mhai!

¹⁵ Haû nghut é yanmai, Hkrisduq gi, danggidiq byi tô é ahtum abyuq é muizé lé, ji yù huí é bang wó hap yù kó sháng gaq ga, dangshikaq asik é gyoro sô xoq byi sù nghut nyi ri. Haû su wó kut é gi, sâng-hi lhê é dangshikaq ahkaû má mara kut shut é bang lé lhoq lhut yû râ matú, yubak chyîn xap zê ralhùm dông, Yhang shí hkám byi yanmai nghut ri.

¹⁶ Madat dang eq séng luí ga jang, madat dang táí sù haû shí bê hkyô saksé

¹⁷ shit râ lhê. Haû mù gâ le, madat dang gi, rayuq yuq shí jáng za sheq lichyúm htoq é nghut lhê. Madat dang táí sù rû dui nyi nyi, haû gi, hkâ-nhám le

¹⁸ lichyúm htoq râ a nghut. Haû nghut é yanmai, sâng-hi lhê é dangshikaq lháng gi, sui a bo lòm jáng lichyúm

¹⁹ a htoq é nghut lhê. Mosheq gi, haû jep é tarâ má bo é hkunmó hkangmó lé, shiwa byù banshoq bang lé ban táí pyo é hkûn, zam zam ne é saumaú eq jàm kyâng lé yù mù, nojúng zô é sui eq bainám sui eq wuì nyhò tô é lé, chyúmding má le, shiwa byù banshoq bang lé le, hpyun gyûn é nghut ri.

²⁰ Yhang gi, “Sui shí gi, nungmoq cháng râ matú, Garai Gasang, hkunmó hkyô to bê nghut é, dangshikaq tô tô é sui

²¹ nghut lhê.”^a ga táí ri. Yhang gi, saksé zúm eq dojaú é má chung é zè pé má le, haû eq rajung za sui haû hpyûn

²² gyûn ri. Gè gè gi, haû jep é tarâ má

bo é dông ga jang, azíng zê aluq ban-shoq gi, suí èq lhoq sân-yúng é hui râ dut é nghut mù, sui htoq hkyô a joq jáng, mara hkyut byi hkyô le joq é a nghut.

²³ Haû mù, mauhkúng zè pé é azòng pé gi, hkungga haú pé èq lhoq sân-yúng é hui râ é nghut lhê. Nghut kôlhang, mauhkúng zè pé yhang gi, haú pé htoq je ge é hkungga pé èq lhoq sân-yúng é hui râ dut é nghut

²⁴ lhê. Hkâsu mù gâ le, akying lhùm é azòng za nghut é, byu èq saí é chyoi-yúng dik é jowò má Hkrisduq wang é a nghut é za, Yhang gi, mauhkúng má yhang wang é nghut mù, ahkuí gi, nga-nhúng é matú Garai Gasang é hí má bo yap byí nyi é nghut lhê.

²⁵ Yhang gi, haû hkyangjong mó mai yhumsíng é sui a nghut é sui lé chùng mù, Chyoiyúng Htâng é Jowò má zàn wuì wàng luí kut é su, yhânggùng lé dum không byi byi kut râ matú mauhkúng má wang é le a nghut.

²⁶ Haú dông ru nghut le gi, Hkrisduq gi, mau htoq xâng hkûn mai shí hkâm é adàm myo myo nghut berâ nghut lhê. Nghut kôlhang, ahkuí, Yhang gi, yubak mara huí sêng pyám byi râ matú, yhânggùng lé hkungga không byi râ ga ipyat pé ló htâng ló nyi é má, banshoq é matú radàm za htoq

²⁷ shit bê nghut ri. Byù gi, radá za shí râ nghut mù, hau htâng má tarâ jé-yáng é hui râ nghut é eq rajung za,

²⁸ Hkrisduq gi, byù myo myô é yubak mara lé yu pyám byi râ matú, radá za hkungga không é hui bê nghut ri. Haû mù, Yhang gi, yubak mara wun pyám byi râ a nghut lo é za, Yhang lé láng nyi é bang lé hkyi yù hkyô yu lé byi râ matú, htâng má í

^a 9:20 Htoq Ló 24:8

dâm nghû râ dâm htoq shit râ nghut lhê.

Hkrisduq É Gùng Lé, Banshoq É Matú Radàm Za Nhông Byî É Hkyô

- 10** Haû jep é tarâ gi, jé lô râ nghut é gè hkyô pè é akyîng a nghut é za, wupzo za nghut ri. Haû nghut é yanmai, jep é tarâ gi, zàn wuì ru nhông byi byi kut nyi é eq rajung zâ é shigu hkungga pé dông mai, noqkuq râ matú chyâng lé é bang lé hkâ-nhám
- ² lé wó lhoq gumjup é a nghut. Tarâ haû wó lhoq gumjup byî é ru nghut le gi, yhangmoq nhông byî é hkyô nô pyám kó râ a nghut lí? Hkâsu mù gâ le, haû noqkuq é bang gi, banshoq é matú radàm za lhoq sanséng huí é nghut jáng, yhangmoq é yubak marâ é matú, hkâ-nhám le mara a bô
- ³ bun lo kó râ nghut lhê. Nghut kô-lhang, shigu hkungga haû pé gi, zàn wuì yubak mara pé lé lhoq pun byî é
- ⁴ zè nghut ri. Haî mù gâ le, nohtó pé eq bainám pè é sui gi, yubak mara lé huí sêng pyâm é hkyô wó dut é a nghut.
- ⁵ Haû mù luí, Hkrisduq, mingkan má lé jé é hkûn, Yhang taí é gi,
 “Shigu hkungga eq hkungga lé
 Nàng a o é nghut mù,
 Nàng kúm gi, Ngá é matú gungdu
 hen to byi bê nghut ri.
- ⁶ Myi nyhé hkungga pé eq mara hkyut hkungga pé gi, Nang lé gabú nhang é a nghut.
- ⁷ Hau htâng, Ngò gi, ‘Garai Gasang ê, Ngò eq séng luí chyúmding má kê tô é eq rajung za,
 Nàng ô nau é hkyô kut râ matú,
 Ngò, shí má nyi lhê.’ nghut taí é.”^a

- ⁸ gâ ri. Sâng-hi má, Yhang gi, “Shigu hkungga eq hkungga pé, myi nyhé hkungga eq mara hkyut hkungga pé lé, Nàng a o é htoq agó, haû pé lé Nàng a gabú é nghut lhê.” ga taí ri. Haû jep é tarâ dông haû pé lé kut râ
- ⁹ dut kôlhàng taí é nghut ri. Hau htâng má, Yhang gi, “Nàng ô nau é hkyô kut râ matú, Ngò, shí má nyi lhê.” ga taí ri. Haû gi, Yhang, htang lhum dangshikaq lé htaí masat to râ matú, sâng-hi lhum lé tô pyâm é nghut ri.
- ¹⁰ Myit ô nau hkyô hau é yanmai, Yesuq Hkrisduq, Yhâng é gungdu lé hkungga dông banshoq é matú radàm za nhông byî é dông mai, nga-nhúng gi, lhoq
- ¹¹ choyiýúng é hui bê nghut ri. Hkyangjong hkangmó gi, nyí nyí bùi bùi, yap mù, yhâng é hkyangjong muzó lé zui saí é nghut lhê. Yhang gi, yubak mara lé hkâ-nhám lháng a wó huí séng pyám byî é, rajung zâ é shigu hkungga lé, dum nhông byi byi kut
- ¹² é nghut lhê. Nghut kôlhàng, hkyangjong mó nghut é Hkrisduq gi, yubak mara hkyut byi râ hkungga ralhúm lé za, ahkyíng banshoq é matú ban nhông byî é hkûn jáng, Garai Gasâng é loqyo hkyam shut zung to bê nghut ri.
- ¹³ Haû hkûn mai, Yhang gi, Yhâng é gyè pé lé, Yhâng é hkyí nang jang kut byi
- ¹⁴ râ lé láng nyi é nghut ri. Haî mù gâ le, Yhang gi, lhoq choyiýúng é huí nyi bang lé, hkungga ralhúm eq za, pyat dedû é matú lhoq gumjup byi bê nghut ri.
- ¹⁵ Haû Choyiýúng Woi-nyí le, haû hkyô eq séng luí nga-nhúng lé saksé hkâm kyô ri. Sâng-hi má, Yhang taí é gi,
- ¹⁶ “Haû Yhumsíng taí ri, shí gi, ahkyíng haû laí htâng má,

^a 10:7 Hkya-on 40:6-8

Ngò, yhangmoq eq to râ dangshikaq nghut lhê.

Ngò gi, Ngá é tarâ pé lé, yhangmoq é myit nhiklhum hkaû má kat byi mù, yhangmoq é i-myt má kê to byi râ nghut lhê.”^a

¹⁷ gâ ri. Hau htâng, Yhang taî jat é gi, “Ngò gi, yhangmoq é yubak mara pé eq tarâ a chung é muzó pé lé, bûn lô râ a nghut.”^b

¹⁸ gâ ri. Haû mù, mara haû pé lé hkyut pyám byi bê nghut jáng, yubak marâ é matú hai hkungga le a ra lo nghut ri.

Hkam Jan Râ Hkyô

¹⁹ Haû mù luí, gumang wui ê, nga-nhúng gi, Yesuq é suí èq, haû Chyoiyúng Htâng é Jowò má wàng râ matú

²⁰ hkyak wó lum to bê nghut lhê. Haû gi, Yesuq é gungdu nghut é pán-gyang dông mai, nga-nhúng é matú hpóng byi bê nghut é asik eq rû dui nyi é

²¹ hkyô nghut lhê. Haû nghut é yanmai le, Garai Gasâng é yhúm lé up é gyaú é hkyangjong lé nga-nhúng

²² wó é yanmai le, nga-nhúng gi, gingtîng é lumjîng hkyô mai sansêng é i-myt èq, Garai Gasâng chyáng ê mù, mara bò bûn é myit sôn sê é hkyô mai, nga-nhúng lé lhoq sansêng râ matú nga-nhúng é i-myt lé hpyun gyûn é hui nhâng luí, nga-nhúng é gungdu gi, sân-yúng wui èq chi byí é hui yù sháng.

²³ Nga-nhúng gi, nga-nhúng yín yu é myit myoqbyù hkyô lé zuí gingtîng nyí sháng; hkâsu mù gâ le, danggidíq byí to bê Sû gi, lhumzui Sû nghut lhê. Chyitdap hkyô eq ge é muzó pé má, nga-nhúng gi, rayuq eq rayuq hkâsu kut myit nhaû

toq byí lhum râ hkyô lé, dat myit nyí sháng. Chôm huí zup lhúm nyi é hkyô lé, ra-am lhaq tô pyâm nyi kô é su, nga-nhúng gi, a tô pyâm é za, haû Buinyí chyâng lò bê nghut é lé nungmoq sê é eq rajung za, rayuq eq rayuq je riyhang myit wum byí lhúm nyí sháng.

²⁵ Nga-nhúng gi, tengmán hkyô lé sê yu é htâng má, shi-ngé ngé mara dum kut shut shut kut é nghut jáng, mara hkyut byi râ hkungga a joq lo. Tarâ jéyáng hkyô eq Garai Gasâng é gyè pé lé nyhê hkyô pyám râ nghut é nhikmo-yô é myi lé za, gyuq chiq myit

²⁶ mai láng nyí râ dut bê nghut lhê. Mosheq é tarâ lé he-ngik é sù ó yuq le, saksé í sum yuq é dâng é yanmai, shogyo nhikmyin a huí é za sat pyâm

²⁷ é hui bê nghut lhê. Haû jáng, Garai Gasâng é Yhangzo lé hkyiwa ô má nâng pyeq bê sù, yhumsîng lé lhoq sân-yúng byi bê nghut é dangshikaq é sui lé a chyoiyúng é zè dông kut pyám bê sù eq, jeju byí é Woi-nyí lé rhoi é sù gi, hkâ-í yhang gyaú é mara dam byí é hui gíng râ nghut lhê nghû,

²⁸ nungmoq wó myit akò lhú? Hkâsu mù gâ le, “Lató hpuq râ gi, Ngò ru nghut lhê; Ngò lató hpuq râ.”^c ga le, “Haû Yhumsîng gi, Yhâng é byu pé lé tarâ jéyáng râ nghut lhê.”^d ga le, taí é Sû

²⁹ lé, nga-nhúng sê lhê. Haû rû dui nyí sù Garai Gasâng é loq hkaû má byit gyó wang é gi, gyuq chiq jung yhang nghut ri.

³⁰ Nungmoq, haû maubó lé hap yu é^e htâng, wuîhke jamjau huí é má gyai yhang shikut kôluí wó jân pyám bê nghut é, hí lhê buinyí pé lé myit bun

³¹ keq. Ra-u u má, nungmoq gi, byu pê hí má de de rhoi shit é eq zing-rí é hui zo

^a 10:16 Yer 31:33 ^b 10:17 Yer 31:34 ^c 10:30 Tarâ Pun 32:35 ^d 10:30 Tarâ Pun 32:36

^e 10:32 Haû maubó lé hap yu é gâ é gi, gabú danglù lé sânghí wó hap yu é lé gâ lhê.

bekô nghut ri; ra-u u má, nungmoq gi, haû su hui zo bang eq rahá bo hui zo
³⁴ bekô nghut ri. Nungmoq yhang, je ge é eq ru gîng nyi é zè pé wó é lé sé kô é yanmai, nungmoq gi, htóng lúng bang lé shogyo nhikmyin bekô eq, nungmoq é sutzè pé lé sing yu pyám byî é bang lé, gabú myit eq jân pyám bekô nghut ri.

³⁵ Haû mù luí, nungmoq é hkyak myit lum tô é hkyô lé hkâdú pyám kó; agùn agó chyunghuq shigyaú é hui kó rá
³⁶ nghut lhê. Nungmoq gi, Garai Gasâng é ô naù hkyô lé kut é hkûn, Yhâng danggidiq byî tô é lé wó hap yù rá matú, nungmoq hkam jan rá dut é
³⁷ nghut lhê. Hkâsu mù gâ le, razup zo nghut jáng,

“Haû lé lô rá Sû gi, jé lé rá nghut mù, ahkyíng lhoq myáng rá a nghut.

³⁸ Nghut kôlhang, Ngá é dingmán sù gi, lumjínq myit mai asak duì rá nghut lhê.

Yhang nungzut zut é nghut le gi, Ngò, Yhang lé myit nguì rá a nghut.”^a

³⁹ ga tô ri. Nghut kôlhang, nga-nhúng gi, nungzut zut mù htên byoq huí é bang a nghut é za, lumjínq mù hkyi yù huí é bang ru nghut lhê.

Lumjínq Myit Mai

11 Lumjínq myit nghu é gi, nga-nhúng myit myoqbyu tô é lé hkyak wó rá nghu é eq nga-nhúng a myàng shî é lé joq lhê nghú hkyak sê
² é hkyô nghut lhê. A-nham lhê bang gi, lumjínq myit haû mai Garaî eq owaq é hui kô é nghut lhê.

³ Lumjínq myit mai, nga-nhúng gi, nyì mi-nyì, joq mijojq lhunglhang lé Garai Gasâng é hkunmó eq hpan tô

é hkyô sê gyô é nghut lhê. Haû mù, myoq eq wó myang é pé gi, byu-myang é pé mai saí htoq tô é a nghut.

⁴ Lumjínq myit mai, Abelaq gi, Ka-in kut é htoq je ge é hkungga, Garai Gasang lé nhông byî é nghut ri. Lumjínq myit mai, yhang gi, yhâng é hkungga eq séng luí Garai Gasang hkya-ôn é hkûn, dingmán sù rayuq dông owaq é hui bê nghut ri. Haû mù, lumjínq myit mai, yhang gi, shi byuq bê nghut kô-lhang, dang rû nyo nyi ashî nghut lhê.

⁵ Lumjínq myit mai, Enuq gi, shi é a hui zo shoq, asak shî mai mauhkúng shut shuí yu é hui bê. Yhang lé, Garai Gasang shuí lô byuq bê nghut é yanmai, yhang lé a wó myâng lo nghut ri. Hkâsu mù gâ le, yhang gi, shuí yu é a hui shî é hí má, Garai Gasang lé nguì nhâng sù rayuq dông owaq é
⁶ hui sù nghut ri. Lumjínq myit a bo é nghut le gi, Garai Gasang lé a wó nguì nhang é nghut lhê. Haí mù gâ le, Yhâng chyáng shikut luí lé jé é sù gi, Yhang nyi é hkyô lé le, lhumzui myit mai Yhang lé hô bang lé, Yhâng eq shigyaú é lé le, lumjínq rá dut é nghut lhê.

⁷ Lumjínq myit mai, Noaq gi, a myang wú shî é hkyô pé eq séng luí si-diq byi huí é hkûn, yhâng é yhumbyù wuì lé hkyî rá matú, gyuq hkunggâ é dông mai wuì-sanghpo saí bê nghut ri. Yhâng é lumjínq myit mai, mingkan lé mara byî é nghut mù, lumjínq myit mai lo é dingmán hkyo é jeju lé hkam yù sù dut bê nghut ri.

⁸ Lumjínq myit mai, Abraham gi, yhâng é muizè dông, htâng má yhang hap yù rá nghut é, Garai Gasang byî é jowò shut e lô rá matú ji yu é huí é hkûn, jìno gyo mù, yhang hká shut e

^a 10:38 Hbk 2:3-4

- ⁹ ló é a sé kôlhang, ê bê nghut ri. Lumjín myit mai, yang gi, gó ming má nyi é byù bíng rayuq su, danggidiq byî tô é mau má nyî bê nghut ri. Yang gi, zúm pé má lúng é nghut mù, rajuq zâ é danggidiq é muizè lé hkam yu é Isak eq Yakup le, zúm pé má lúng
- ¹⁰ bekô nghut ri. Hkâsu mù gà le, Abraham gi, Garai Gasâng èq azòng hên mù saî tô é, gîng é apûn awang pé eq mu é myuq lé myit myoqbyu nyi é nghut ri.
- ¹¹ Lumjín myit mai, Abraham gi, yhang é asak ipyat laî ló byuq é eq, Sarah le baùdung nghut to kôlhang, haù danggidiq byi Sû, lhumzui sù nghut lhê ga myit sôn yu é yanmai, îwa rayuq wó dut é hui bê
- ¹² nghut ri. Haù mù luî, yang gi, shî gùng dông nghut kôle, yang rayuq mai lo é awut ashín pé gi, mauhkûng mâ é kyî pé eq wuimau yàm mâ é a ung nghap é semuî myhó myô lò bê nghut ri.
- ¹³ Byù haù bang banshoq gi, yangmoq shi é hkûn jé shoq lumjín myit mai asak dui nyî kô é nghut lhê. Yangmoq gi, danggidiq byi tô é pé lé a hap yù kó nghut ri; nghut kôlhang, haù pé lé myàng za myàng kômù, we mai te yu akô. Yangmoq gi, myidàm htoq má gó ming byu pé eq byù bíng pé nghut é lé yín yû
- ¹⁴ bekô nghut ri. Haù su yín yu é byu pé gi, yangmoq yhumsing é ming lé ho nyi é bang nghut é lé tân shit é
- ¹⁵ nghut akô. Yangmoq htoq lo é ming lé, yangmoq myit tui nyî kô é ru nghut le gi, dum tau ló râ ahkáng wó
- ¹⁶ kó râ nghut lhê. Ahkuî kúm, yangmoq gi, je ge é ming nghut é, mauhkûng mingdán lé myit tuî nyi akô

nghut ri. Haù mù luî, Garai Gasang gi, yangmoq é Garai Gasang nghu é hui râ lé a hoq é nghut lhê. Hkâsu mù gà le, Yang gi, yangmoq é matú myuq ralhú to byi bê yanmai nghut ri.

- ¹⁷ Lumjín myit mai, Abraham gi, Garai Gasâng èq yang lé chyam é hkûn, Isak lé hkungga ralhú dông nhông byi bê nghut ri. Haù gi, danggidiq pé lé hap yu to bê sù gi, yhang é yuqzo zote lé nhông byi râ dâ
- ¹⁸ é nghut lhê. Garai Gasang gi, “Isak dông mai lo é lé, náng é awut ashín nghû sôn byi râ nghut lhê.”^a ga yang lé danggidiq byî to bê nghut kôle, yang haù su kut é nghut ri.
- ¹⁹ Abraham gi, shi é mai Garai Gasang wó lhoq dui toq lhê ga myit yu ri. Taí sháng ga jáng, Isak lé, shi byuq bê mai, yang dum wó hap yu é nghut ri.
- ²⁰ Lumjín myit mai, Isak gi, Yakup eq Eso nhik é htàngnùng lhê é matú, shimân byi bê nghut ri.
- ²¹ Lumjín myit mai, Yakup gi, yang shi ló râ u má, Yosep é yangzô nhik lé shimân byi mù, yhang é dumbáng-u má nè luî, noqkuq bê nghut ri.
- ²² Lumjín myit mai, Yosep gi, yhang asak htâm ló râ u lé, Israelaq byu pé Egotuq ming mai htoq lò râ eq séng luî taí mù, yhang é showui pé eq séng luî hkâsu kut râ hkyô lé pying to bê nghut ri.
- ²³ Lumjín myit mai, Mosheq é yhangnu eq yhangwâ nhik gi, yang hku lé é htàng má, yang lé lhamó sum hkyap haq to bekô nghut ri. Haù mù gà le, yangnhik gi, zoshâng haù yúng é myàng kômù, hkohkam é mungdang lé a gyuq kó nghut ri.^b

^a 11:18 Apûn 21:12 ^b 11:23 Haù-u lé, hkohkâm hpó gi, Israelaq pê é yuqzo zonú wú lé sat pyám râ hkunmó hkyô tô é nghut lhê.

- ²⁴ Lumj́ng myit mai, Mosheq gi, yhang kô lo é hkûn, Hpara-ug é byizô é yhangzo ga râ lé he-ngik pyâm ri.
- ²⁵ Yhang gi, yubak marâ é ngón hkyô má rayoq zo ngón kún râ malaî Garai Gasâng é byu pé eq rahá hpuzô é hui râ
- ²⁶ lé sheq hkyin yù bê nghut ri. Yhang gi, haû Hkrisduq é matú rhoî huî é lé, Egutuq ming mâ é sutzè htoq má je riyhang hpaudap lhê ga myit sôn yu ri. Haî mù gâ le, yhang gi, yhâng é shigyaú chyunghuq lé myit myoq-
- ²⁷ byu nyì sù nghut ri. Lumj́ng myit mai, yhang gi, hkohkâm hpó nhikjum yô é lé a gyuq é za, Egutuq ming mai htoq ló byuq bê nghut ri. Yhang gi, myoq èq a wó myang é sù Garai lé wó myang
- ²⁸ é sù dông, hkam jân é nghut ri. Lumj́ng myit mai, yhang gi, haû zomún lé sat é maumang lagyô èq Israelaq byu pé é zomún lé a wó záng sháng gaq ga, Lhoqlhai Poî eq sui hpyûn é hkyô le kut hí bê nghut ri.
- ²⁹ Lumj́ng myit mai, haû shiwa byu pé gi, Nhông Nè lé kyuq huî é myigùng htoq mai su laî byit bekô nghut ri; nghut kôlhang, Egutuq byu pé le, haú dông laî shikut wú kô é hkûn, yhangmoq gi, myup shi byuq bekô nghut ri.
- ³⁰ Lumj́ng myit mai, shiwa byu pé, Yerihko myuq xêwâm lé nyhit nyí sô lhing é htâng má, xêwâm haû leq gyop byuq bê nghut ri.
- ³¹ Lumj́ng myit mai, shiwa myhí Rahap gi, haû Israelaq jó wú bang lé nguingón é eq lhom hkulum yu é yanmai, jìno a gyo bang eq rahá sat pyâm é a huî é nghut lhê.
- ³² Haû htoq lai luî, ngò haî taî jat ra shirâ lhú? Gidon, Barak, Samson, Yephhta, Dawiq, Samuelaq pé eq myiqhtoî pé é hkyô lé taî râ ahkyíng ngò a wó.
- ³³ Haú bang gi, lumj́ng myit mai ming-

- dán pé lé wó zân ung yù bekô, tengmán hkyô lé chung jài bekô, danggidiq byî to bê lé wó hap yù bekô, hkanghkyi pê é nhut lé wó myhí
- ³⁴ pyám bekô, myidug myishâm lé wó sat pyám bekô, shamsó mai le wó hpang lut bekô nghut ri. Yhangmoq é wum nyhóm hkyô gi, wum taû bo byuq é dut bekô nghut ri. Yhangmoq gi, majan má a-tsam mó bò bang dut mù, maigan gyè pé lé wó ung
- ³⁵ pyám kô é nghut lhê. Myiwe wuî gi, yhangmoq eq sêng é shi byuq bê bang asak dum lhoq tuî huî é lé, wó yù bekô nghut ri. Góbang gi, je ge é dui toq hkyô wó yû kó sháng gaq ga, lhoq lhut é hui râ lé he-ngik pyám kômù, zing-rî é gyai yhang hui zo
- ³⁶ bekô nghut ri. Ra-am gi, wuizui kut pyám byî é eq nhuq bat é hui bekô, góbang gi, shamtoq kyum hut huî é eq htóng lhung é hui bekô nghut ri.
- ³⁷ Yhangmoq gi, luqgok eq dú sat é, í túm dut shoq yik hpyit é, sham èq sat pyâm é hui bekô nghut ri. Yhangmoq gi, sau-kuq eq bainám-kuq wut mù, htot lhing wún luî, myung kyuq é, zing-rî é eq rhoi pyâm é hui bekô
- ³⁸ nghut ri. Yhangmoq lhumzuî nyì kô é yanmai, mingkan gi, yhangmoq eq a gingdán nghut ri. Yhangmoq gi, yoso pé má, bùm pé má, luqhkyûng pé eq myìdong pé má nyi lhing wún bekô nghut ri.
- ³⁹ Haú bang banshoq gi, yhangmoq é lumj́ng myit é yanmai, owaq é hui bê nghut kôle, yhangmoq ó yuq le, danggidiq byî tô é lé a myang hkam yù
- ⁴⁰ kó nghut ri. Haî mù gâ le, nga-nhúng eq rahá za nghut jáng sheq, yhangmoq lhoq gumjup é wó hui kó sháng gaq ga, Garai Gasang gi, nga-nhúng é matú je ge é hkyô lajâng to byi bê nghut ri.

Garai Gasang, Zo Wuí
Lé Mhoqshit É Hkyô

12 Haû mù luí, nga-nhúng gi, haû myhò é saksé pé mhutdûm su nga-nhúng é lhínghkyuq má joq to bê nghut é yanmai, nga-nhúng lé hkâm tang é hkyô pé jung hkanmó eq, lui za lhoq nhúng byí é yubak mara lé dú pyám mù, nga-nhúng òn rã matú tô tô é hkyô lé, hkam jan lui din e ² ló sháng. Nga-nhúng gi, nga-nhúng é lumjíngh hkyo é apûn awang lé hí sù eq lhoq gumjup byi sù nghut é Yesuq lé wú tsuq nyí sháng. Yhang gi, Yhâng é hí má joq tô é gabú hkyo é yanmai, hoq hpû é hkyô lé haí su a ngam é za, tapzíngh má shí hkâm é hkyô lé jân pyám luí, Garai Gasang é hko-hkâm-tanghkuq é loqyo hkyam shut ³ zung to bê nghut ri. Nungmoq gi, a ngú byuq rã eq myit wum a gyuí byuq kó sháng gaq, yubak dap bângh chyáng mai haû su htuq htíngh é hkyô lé jân pyâm é Yesuq chyáng mai myit wum yù keq.

⁴ Nungmoq gi, yubak mara lé htuq htíngh shikut é hkyô má, nungmoq é sui shun pyám shoq yhang a kut ⁵ shi kó nghut ri. Hau htoq agó, nungmoq gi, zo wuí lé òng Garai Gasang nungmoq lé wum byí é dang lé tô-myhí pyám bekô lhú? Wum byi dang haû gi,

“Ngá zo ê, haû Yhumsíngh
mhoqshit é hkyô lé agya alhá
hkâkut pyám,
Yhang, nang lé tân é hkâm, myit
wum hkâgyui,

⁶ haí mù gâ le, haû Yhumsíngh gi,
Yhang chyitdap é bang lé
mhoqshit mù, zo rayuq lé òng,

Yhang hap yu é bang yuq
hkanmó lé dam byí é nghut
lhê.”^a

gâ é nghut ri.

⁷ Mhoqshit huí é hkyô má, wuíhkê é lé hkam jan keq. Garai Gasang gi, nungmoq lé, zo wuí lé òng kut é ru nghut lhê. Hkâsu mù gâ le, yhumsíngh é yhângwâ èq a mhoq ⁸ zo gi, ó wá nyi lhê lhú? Nungmoq gi, yuq hkanmó huí lai é mhoqshit hkyô lé, a hui kô é nghut jángh, dezô pé òng nghut byuq mù, zo síngh ⁹ wuí a nghut lo kó. Nga-nhúng ban-shoq bang gi, nga-nhúng lé mhoqshit é xângho íwâ pé wó é bang chyat nghut mù, yhangmoq lé hkanghgâ é nghut lhê. Haû nghut jángh, je riyhang, nga-nhúng é woi-nyí eq sêngh é Íwâ é a-ô má nyi mù, asak òn rã dut ¹⁰ ri myhi-nhung! Nga-nhúng é xângho íwâ pé gi, yhangmoq je ge dik bângh é lé, nga-nhúng lé rayoq zo mhoqshit é nghut ri. Nghut kôlhang, Garai Gasang gi, Yhâng é chyoiyúngh hkyô má nga-nhúng wó bo lòm shoq, nga-nhúng é gè hkyô é matú, ¹¹ nga-nhúng lé mhoqshit ri. Mhoqshit é hkyô hkanmó gi, mhoqshit u lé ngón hkyô a nghut é za, òn hkâm hkyô nghut nyi ri. Nghut kôle, mhoqshit hkyô haû lé hkam yù bê bângh é matú gi, htângh má, nguínghón hkyô eq òngmán hkyo é ashi lhoq htoq byí ri.

¹² Haû mù luí, myúngh byuq é nungmoq é loq pé eq wum nyhôm byuq é nungmoq é hkyihput pé lé wum-o ¹³ lhoq kíngh keq. Hkyí hten bang a wó sô é a dut shoq, lhoq gè byí é wó hui kó sháng gaq, nungmoq so rã matú, hkyô lhoq nyhang nyi keq.

^a 12:6 Sânghkyang 3:11-12

**Garai Lé He-ngik Bang
Dàm Byi Hui Râ Hkyô**

- ¹⁴ Byù banshoq bang eq nguingón shoq nyì râ eq chyoiyúng râ matú wó dut é í shikut keq. Hkâsu mù gâ le, ó yuq le, chyoiyúng hkyô a bo é gi, haû Yhumsîng lé myàng râ a nghut.
- ¹⁵ Ó yuq le, Garai Gasâng jeju lé a tô pyám râ matú, sidiq keq. Haû, yuq htoq lô mù, wuîhke hkyô lhoq htoq é eq byù myo myo lé agot a-û dut nhang é nuì hko su, ó yuq lé le hkâ-dut nhâng kó. Ó yuq le, ashop é dông gungsho zùm yap é hkyô nghut nghut, zang radún é matú, yhang wó tô é yuqzo zomún muizè ahko ahkáng lé ung zô pyâm é, Garai a lom é Eso su nghut nghut, a kut râ matú sidiq keq. Nungmoq sê é eq rajung za, Eso gi, htâng má, shimân jeju haû lé hkam yù nau é hkûn, he-ngik pyâm é hui bê. Yhang gi, shimân jeju haû lé ngaubyi ngau-nhap èq hô kôlhâng, yhang kut é hkyô lé a wó htaí byi lo nghut ri.
- ¹⁸ Nungmoq gi, wó záng é eq myi duq nyi é Sinaq Bùm má le, mauchut tuq é, noq-singkyî dut é eq laidun lo é má
- ¹⁹ le, tut htê mying é eq, dang taí htê mying é má le, a jé é kó nghut ri. Dang htê haû lé wó gyô é bang gi, yhangmoq lé, dang a taí jat lo râ matú dung
- ²⁰ tôngbán akô nghut ri. Haî mù gâ le, yhangmoq gi, “Bùm haû má dusak pé záng jáng lháng, luqgok èq dú sat râ dut lhê.”^a ga Garai Gasang hkyô tô é hkunmó lé a wó hkâm kô é yanmai
- ²¹ nghut ri. Haû byu-myàng hkyô gi, lûm wú gyuq hpo dut é yanmai, Mosheq lháng gi, “Ngò, gyuq nán ri.”^b ga taí é nghut ri.

- ²² Nghut kôlhâng, nungmoq gi, Zi-un Bùm eq rû dui nyi é Garai Gasâng é myuq nghut é mauhkûng Yerusalem má, maumang lagyô pé ajùm ayò
- ²³ gabú ratung zup zîng é jang eq, mauhkûng htoq má myîng kê to huí é, zomún pê é noqkuq hpúng joq jang má, jé lé bekô nghut ri. Haû mù, nungmoq gi, byù banshoq é tarâ agyî nghut sù Garai Gasâng chyáng le, lhoq gumjup huí é dingmán bâng é
- ²⁴ woi-nyí pê chyáng le, dangshikaq asik é gyoro so sù Yesuq chyáng le, Abelaq é sui htoq má je ge é danglù taí é, hpyûn gyûn é sui má le, jé lé é nghut bekô.^c
- ²⁵ Nungmoq gi, dang nyô Sù lé a gyo a kut râ matú, sidiq keq. Myidàm htoq má sidiq byí é sù lé he-ngik pyâm é bang, a lut kô é nghut lhê. Haû mù, mauhkûng mai nga-nhúng lé sidiq byí é Su chyáng mai, nga-nhúng lhing ló byuq é ru nghut le gi, je riyhâng nga-nhúng a wó lut râ a nghut
- ²⁶ kó lhí? Haû Garaí dang taí é u má, Yhâng é htê gi, mingkan lé lhoq nhûn kat ri, ahkuí kúm gi, “Ngò, mingkan lé za a nghut, mauhkûng pé lé le radàm dum lhoq nhún râ nghut lhê.”^d ga Yhang danggidiq byí to bê
- ²⁷ nghut ri. “Radàm dum” gâ é dang gi, haû a wó lhoq nhûn é pé wó myit to sháng gaq ga, hpan to huí é zè pé nghut é, wó lhoq nhûn é pé lé huí sêng pyám râ lé gâ é nghut lhê.
- ²⁸ Haû mù luí, nga-nhúng gi, a wó lhoq nhûn é mingdán lé hap yu to bê nghut mù, jeju bun luí, hpautap é eq gyuq hkunggâ é myit mai Garai Gasang hap yù gíng é dông noqkuq

^a 12:20 Htoq Ló 19:12-13 ^b 12:21 Tarâ Pun 9:19 ^c 12:24 Abelaq lé gi, yhangmang Ka-in èq sat é nghut luí, yhâng é sui gi, lató-hpuq râ matú nghut ri; nghut kôlhâng, Hkrisduq é sui kúm gi, hkyi yù hkyô lajang byí ri. ^d 12:26 Hagi 2:6

²⁹ sháng. Hkâsu mù gà le, nga-nhùng é “Garai Gasang gi, nyhê jôm é myi nghut ri”.^a

Ló Htáng Má Lhoq Pun Kyîng É Hkyô

13 Rayuq eq rayuq, gumang yhangchang đông chyitdap

² lhum nyi keq. Byù bíng pé lé hku-lum râ hkâtô-myhí kó, hkâsu mù gà le, ra-am gi, haù su kut nyí kô é yan-mai, a sê é za maumang lagyô pé lé ³ hkulum záng bekô nghut ri. Nungmoq gi, htóng lúng bang eq rahá htóng lúng luzúm wuí đông, htóng lúng bang lé le, nungmoq yhang jam-jau hui zô nyi é đông, hpuzô é bang lé le, myit bun keq.

⁴ Myiháng hkyô gi, lhunglhang bâng èq hpautap é hui râ dut é nghut mù, myiháng yhuphpú gi, sân-yúng râ dut lhê. Hkâsu mù gà le, Garai Gasang gi, su-myi sulàng lú é bang eq ashop é đông gungsho zùm yap é bang ban-shoq lé jéyáng râ nghut lhê. Nungmoq é asak duì hkyô má, ngùn lé chyitdap é myit tô pyám mù, nungmoq wó é lé nhik dik nyi keq, haì mù gà le, Garai Gasang gi,

“Hkâ-nhám le, Ngò, nàng eq a gang râ; hkâ-nhám le, Ngò, nang lé a tô pyám râ.”^b

⁶ ga taí é nghut lhê. Haù mù, nga-nhúng gi, hkyak lum é myit mai,

“Haù Yhumsîng gi, ngo lé garúm sù nghut lhê yanmai, ngò, gyuq râ a nghut. Ó yuq wá, ngo lé haì wó kut râ l hú?”^c

ngô taí é nghut lhê.

⁷ Nungmoq lé Garai Gasâng é mung-dang taí kyô é, nungmoq é hkyô-u shê bang lé, myit bun keq. Yhangmoq asak htum shoq nyi laì lo é sâm-

lai lé myit wú mù, yhangmoq é lum-
⁸ jîng myit lé alik kut yù keq. Yesuq Hkrisduq gi, a-nyí nap, hkû-nyí, htàngnùng pyat dedu rajung za nghut nyi ri.

⁹ Maù nhô zâ é mhoqshit hkyô ajung jung maì èq shuí ngoq huí é bang hkâdut kó. Zo bang lé hai akyû a byí é, htungli zoshuq èq a nghut é za, Garaì jejú èq nga-nhùng é myit nhik-lhum lé wum-o lhoq kîng yu é gi, gè ¹⁰ hkyô nghut lhê. Nga-nhúng gi, saksé zúm má dojaú é hkyangjong pé zo râ ahkáng a wó é hkungga gyap ralhumm wó é nghut lhê.

¹¹ Haù hkyangjong mó gi, dusak pé é sui lé, yubak mara hkungga đông Chyoiyúng Htâng é Jowò má yu wang ri; nghut kôlhang, gungsho pé lé gi, byù nyi jowò shinggan má nyhê

¹² hkyô pyâm ri. Haù eq rajung za, Yesuq le, Yhâng é sui đông mai byu pé lé wó lhoq chyoiyúng râ matú, myuq hkum shinggan má jamjau hpuzo mù

¹³ shí hkám bê nghut ri. Haù mù luí, nga-nhúng gi, byù nyi jowò shinggan má Yhâng chyáng ê mù, Yhang hui zô é rhoí hkyô lé ê bo hui zo

¹⁴ sháng. Hkâsu mù gà le, nga-nhúng gi, mingkan shí má ru gîng nyi é myuq wó bang a nghut é za, jé lé lô râ myuq lé ho nyi é bang ru nghut lhê.

¹⁵ Haù mù luí, nga-nhúng gi, Garaì Gasâng é myìng lé yín yu é nhut-wui é ashi nghut é, hkya-on hkungga lé, Yesuq đông mai, Garaì Gasâng chyáng xoq xoq nhông byí nyi sháng.

¹⁶ Ge é hkyô kut râ eq góbang lé shuí gam chùng râ hkyô lé, hkâtô-myhí kó; hkâsu mù gà le, Garaì Gasang gi, haù sù é hkungga pé lé ô ngui nyi ri.

^a 12:29 Tarâ Pun 4:24 ^b 13:5 Tarâ Pun 31:6 ^c 13:6 Hkya-on 118:6-7

- ¹⁷ Nungmoq é hkyô-u shê bâng é jìno gyo mù, yhangmoq é ahko ahkáng ô má nyì keq. Yhangmoq gi, jihpán shit râ dut é bang dông mai nungmoq lé upzúng nyi é nghut lhê. Yhangmoq é muzó pé gi, nungmoq é matú akyû a bo é wòlai a dut é za, gabú hkyô ralhüm wó dut sháng gaq, yhangmoq é jìno gyô nyì keq.
- ¹⁸ Ngamoq é matú kyûdung byi kó laq. Ngamoq gi, sân-yúng é myit sôn sê é hkyô wó mù, hkyô hkgámó má ge é dông asak duì râ lé ô nau
- ¹⁹ lhê nghû, hkyak wó myit ri. Ngò gi, nungmoq chyáng hân za wó dum jé sháng gaq, hau é matú je riyhang kyûdung byi keq nghû wum taì tsuq kat lhê.
- ²⁰ Sau hpúng pê é sau zúng Sû mó nghut é, nga-nhûng é Yhumsîng Yesuq lé, haù ahtum abyuq é dangshikaq é sui dông, shî bê mai dum lhoq dui toq é sù, nguingón hkyo é Garai Gasang gi, Yhang ô nau é hkyô kut râ matú ge é hkyô jung hkgámó nungmoq lé lhoq gumjup byi mù, Yesuq Hkrisduq dông mai Yhang lé gabú nhang é hkyô lé, nga-nhûng chyáng kut nyì sháng gaq. Hpungwup shing-kang gi, Yesuq Hkrisduq chyáng pyat dedu ahtum abyuq ru joq nyì sháng gaq. Amen.
- ²² Gumang wuì ê, ngò lhoq pûn kyîng é dang lé nungmoq wó hkam jan kó sháng gaq nghû, wum taì tsuq kat lhê; hkâsu mù gâ le, ngò gi, nungmoq lé, laiká ratot za kê kat é nghut lhê.
- ²³ Ngò gi, nga-nhûng é gumang Timohti lhoq lhut kat é hui bê hkyô lé, nungmoq lé sé nhâng nau ri. Yhang shî má myap jé lé é nghut le gi, ngò, yhang eq rahá nungmoq lé, lé hui râ nghut lhê.
- ²⁴ Nungmoq lé shuí-u bang banshoq eq Garai Gasâng é byu pé banshoq lé bo shi-kyám byi keq. Itali ming mâ é gumang wuì gi, nungmoq lé shi-kyâm kat akô nghut ri.
- ²⁵ Jeju gi, nungmoq banshoq bâng chyáng ru joq nyì sháng gaq ô.

YAKUQ

Hun Kat é Laiká

(James)

1 Garai Gasang eq Yhumsîng Yesuq Hkrisduq é jùn, ngò Yakuq gi, byo myín tô é Israelaq raxe í myû lé, ngui-ngón dang shit kyô kat lhê.

Lumjîng Myit Lé Chyam É Hkyô Eq Hpaqchyí Byéng-yá

- ² Ngá gumang wuì ê, nungmoq é lum-jîng myit lé chyam wú é hui jáng, shikut shirâng sê é myit jat nyi é lé, nungmoq sê nyi lhê nghut mù, wuífke jamjau ajung jung lé htûng huí é hkûn, gàu jowò mó nghut nyi lhê nghû luí
- ⁴ myit yù keq. Hau htoq agó, nungmoq banshoq gúm gumjup jup dut mù luí, haí le a langhpyut shoq, shikut shirang é myit gi, yhumsîng kut nyi é muzó lé wó lhoq gumjup nyi sháng
- ⁵ gaq. Nungmoq má rayuq yuq hpaqchyí byéng-yá langhpyut tô é nghut le gi, haû banshoq bang lé, mara a hun é za, agùn agó byí nyi é Garai Gasâng chyáng dúng nyi sháng gaq, haû jáng, Garai gi, yhang lé byi râ nghut lhê.
- ⁶ Nghut kôlhang, lum shut é myit a bo é za, lumjîng é myit èq dúng nyi sháng gaq, hkâsu mù gà le, lum shut é sù gi, laidûn èq hik luí toq lo é nhông mâ é
- ⁷ wuìlhêng eq wuí nyi ri. Haú yuq gi, Yhumsîng Garaí chyáng mâ é haí le wó yû râ su a ngam nyi sháng gaq.
- ⁸ Yhang gi, myit-kó xan sù nghut luí, yhâng é hkyô hkat hkangmó má, mù htâng a nyang é sù nghut nyi ri.

Myùng Sù Eq Wó Sù

- ⁹ Myung é gumang hpó gi, waq toq huí é má, wó sù gi, lhoq nyhûm huí

- é má, gabú gumrong nyi sháng gaq.
- ¹⁰ Hkâsu mù gà le, wó sù gi, wàhu banbó su woí byuq ló râ nghut lhê.
- ¹¹ Bui gi, nyé é lai èq toq lô jáng, haû wàhu nyhuí byuq ló mù, abó le yoq gyó byuq é eq, hau é yúng sâm pé gi, htên byuq é su; wó sù le haû eq rajung za, yhang kut nyi é muzó má woí byuq ló râ nghut lhê.

Gunglaú É Hkyô

- ¹² Wuífke jamjau huí le, wó shikut shirang nyi sù gi, hkungsô wó nyí ri; hkâsu mù gà le, chyam wú é ban hui jáng, yhang gi, Garai Gasang lé chyitdap é bang lé, byí tô é danggidiq asak janmaú lé, wó yû râ nghut lhê.
- ¹³ Gunglaú huí é sù ó yuq nghut kôlhang, gunglaú huí é hkûn lé, “Garai Gasang, ngo lé gunglaú nyi ri.” nghû luí, a taí sháng gaq, hkâsu mù gà le, agè ashop é hkyô gi, Garai Gasang lé wó gunglaú é a nghut, ó yuq lé le Garai Gasang gunglaú râ a
- ¹⁴ nghut. Nghut kôlhang, ó yuq nghut le le, yhumsîng é gungsho ô nau é dông, shuí lêng nghoq ló é nghut
- ¹⁵ le gi, agúng alaú hui bê. Gungsho ô nau é hkyô kúm gi, zogûng dut jáng, mara lé hku htoq lo ri. Mara kô dîng jáng, shi é má jé râ nghut lhê.
- ¹⁶ Ngò chyitdap é gumang wuì ê, i-myt hkyô nghoq hkâ-nghoq nyí kó.
- ¹⁷ Gè réng é eq byíng jup é chyunghuq lhunglhang gi, ahtoq shut mâ é nghut

mù luí, maubó gung pé^a é Yhângwa Garai chyáng mai gyó lo é nghut ri. Yhang gi, ahpuq alik atau ahú dut¹⁸ é buishûm su dut râ a nghut. Yhang hpan tô é amyû pé má, nga-nhúng gi, sâng-hi myhîng é ashi pé dut lo sháng gaq ga, Yhang gi, Yhang ô nau é hkyô cháng luí, haú tengmán é mungdang mai, nga-nhúng lé hkû to bê nghut ri.

Gyo Yu É Eq Cháng Kut É Hkyô

¹⁹ Ngò chyitdap é gumang wuì ê, shí hkyô lé nungmoq sê nyi akô. Byù ó yuq nghut kôlhang, gyô yù râ lé han nyi sháng; dang táí râ lé a hân sháng gaq; nhik-yo râ lé lé hkâhân kó. Hkâsu mù gâ le, byù nhik-yô é hkyô gi, Garai Gasang ô nau é dingmán é dông asak dui hkyô wó lhoq htoq râ a nghut.²¹ Haú mù luí, achâq achyut é banshoq eq ladu laí agè ashop é pé lé lhoq san lhoq sêng pyám luí, nungmoq é i-myyit lé wó hkyi yù râ matú, i-myyit unghkaú má Garai Gasang hô tô é mungdang lé, nú-nhâm é myit èq hkam yu nyi keq.²² Nungmoq gi, yhumsing gùng lé a mhaú pyám sháng gaq, haú mungdang lé wó gyô yu é bang za a nghut, haú dông châng kut é bang le nghut²³ nyi sháng gaq. Mungdang haú lé wó gyô yù mù, a châng kut é sù ó yuq le, yhumsing é gungdu lé myoqjâm má wú sù eq wuí ri. Yhang gi, yhâng é gungdu lé wú yù mù, myoqdong lhik é eq, yhumsing gungdu hkâsu dut é²⁵ lé tô-myhî pyâm ri. Nga-nhúng lé wó lhoq lhut yu é gumjup é tarâ má, rago za wú tsuq nyi sù kúm gi, wó gyô yù mù tô-myhî pyâm é sù a nghut, muzó èq tún shit é sù nghut é yanmai, haú yuq gi, yhang cháng kut é muzó má shimân jeju wó râ nghut lhê.

²⁶ Byù rayuq yuq, “Ngò gi, noqkuq htúng lé lhoq dik sù nghut lhê.” ga luí, myit to kôlhang, yhumsing nhut shô lé a wó hkâng mù, yhumsing myit lé mhaú pyâm é nghut le gi, haú yuq é noqkuq htúng gi, akôm za nghut²⁷ nyi ri. Íwa Garai Gasâng é hí má sâng é eq, râ é hkyô a bo é noqkuq htúng gi, wuìhke jamjau huí é chuimó chuizô pé lé, châng wú garúm é hkyô eq, mingkan htoq mâ é achâq achyut é hkyô lé koi pyâm é hkyô nghut ri.

Myoqdong A Wó Hkyin Lhum

2 Ngá é gumang wuì ê, hpung-wup shingkang bo é nga-nhúng é Yhumsîng Yesuq Hkrisduq lé lumjîng hkyô má, byu é myoqdong lé² hkâhkyin lhum kó. Dangké, hîng loq-chyop chyop luí, réng é mebu wut é sù rayuq eq ajeq amyha é mebu wut é asho awuí é sù rayuq gi, nungmoq é tarajong má wang lò kô é nghut le,³ haú réng é mebu wut é sù lé, nungmoq lhom wú mù je hkunggâ é èq, “Shí aróng wó é jowò má zùng aq.” dum, haú asho awuí é sù lé nghut jáng gi, “Mhó má yap to aq.” haú su a nghut jáng, “Ngá é hkyi htâng má zùng aq.”⁴ ga táí kô é nghut le gi, nungmoq rayuq eq rayuq gamhkuí lhum luí, a ge é i-myyit èq doqdân é bang dut lò bekô a nghut kó lú?⁵ Ngò chyitdap é gumang wuì ê, gyô yù keq, lumjîng hkyô má wó sùt nyi luí, gidiq tô tô é mingdân é síl wunlí lé, Yhang lé chyitdap bang wó hkam yù sháng gaq ga, Garai Gasang gi, myigùng htoq mâ é asho awuí é bang⁶ lé hkyin yù bê a nghut kó lú? Nungmoq kúm gi, asho awuí é sù lé a hpau a yùm kut pyám bekô nhung; wó bang

^a 1:17 Maubó gung pé gâ é gi, bui, kyî, lhamó lé gâ lhê.

sùt bang kúm gi, nungmoq lé zik zo mù luí, yhumsing é loq èq yhang, tarâ tingnyâng shut she hkyut ló bekô, a
⁷ nghut kó lúhú? Nungmoq eq sêng é kô dik é mying lé lhang, yhangmoq yhang rhoi dang tai bum akô, a nghut kó lúhú?

⁸ Haú mù luí, Chyúmdang má, “Náng gung lé nàng chyitdap é su, náng é chyangnâm mâ é bang lé le chyitdap aq.”^a ga luí, tai tô é hkohkam tarâ lé, nungmoq tsuq za châng é nghut le gi, nungmoq ge é hkyô lé kut nyí
⁹ bê. Nghut kôlhang, byu é myoqdong lé nungmoq hkyin nyi kô é nghut le gi, nungmoq mara kut nyí gû nghut bê yanmai, haú tarâ lé shut é bang lé su tarâ jéyáng é huí nyi bekô râ nghut
¹⁰ lhê. Byù ó yuq nghut le le tarâ banshoq lé cháng kôlhang, haú mâ é ralhumm lum lé shut pyám jáng gi, tarâ banshoq lé shut pyám sù dut byuq râ
¹¹ nghut lhê. Hkâsu mù gâ le, “Su-myi sulàng hkâlú.”^b ga luí, hkang tô é sù gi, “Byù lé hkâsat.”^c ga luí le, tai tô ashí. Nàng su-myi sulàng a lú kôlhang, byù sat é sù nghut le gi, tarâ lé shut é sù nghut bê.

¹² Haú su mù luí, nungmoq lé lhoq lhut kat é tarâ dông jéyáng doqdân é hui râ bang su, ru tai nyi keq; ru châng
¹³ kut nyi keq. Hkâsu mù gâ le, shogyo myit a bò sù gi, a shogyô é dông jéyáng doqdân é hui râ nghut lhê. Shogyo nhikmyin é hkyô kúm gi, jéyáng doqdân é hkyô lé wó ông lut râ nghut lhê.

Lumjín Myit Eq Zui Saí É Hkyô

¹⁴ Ngá gumang wui ê, byù rayuq yuq, “Ngò gi, lumjín myit bo lhê.” ga tai nyi kôlhang, muzó a bo lom é nghut le

gi, haí akyû bò râ lúhú? Lumjín myit haú gi, yhang lé wó hkyi yù râ lúhú?

¹⁵ Gumang, gu-nhá rayuq yuq a chin dut nyi é eq, nyí wui é zoshuq langhpyut
¹⁶ tô é nghut le, nungmoq chyáng mâ é rayuq yuq gi, yhangmoq é gungsho má râ é hkyô haí le a byí é za, yhangmoq lé, “Nungmoq wut é gung lum sháng gaq, zô é úng gyi sháng gaq, ngui ngui ngón ngón ló keq.” ga tai é
¹⁷ nghut le gi, hai akyû bò kó râ lúhú? Haú eq rajung za, lumjín myit má muzó a bo é nghut le gi, shi é eq rajung za nghut nyi ri.

¹⁸ Dum rahkyô gi, “Nàng gi, lumjín myit bo ri, ngò gi, muzo bo lhê. Muzó a bo é náng é lumjín myit ngo lé tân shit wú aq, haú hkûn, ngá muzó èq ngá lumjín myit lé, nang lé ngò tân shit râ nghut lhê.” ga luí, rayuq yuq
¹⁹ tai râ nghut lhê. Garai Gasang rayuq za nghut é lé nàng lumjín ri-nhung! Nghut bê, haú gi, jô é hkyô nghut nyi ri, nat gâng pé le haú su yhang lumjín mù gyuq nán nyi akô nghut ri.

²⁰ Kyoq a bo é byù bam ê, lumjín myit má muzó a bo le akôm za nghut é hkyô lé, nàng sé nau lhê a nghut
²¹ lúhú? Nga-nhung é Íwa Abraham gi, hkungga gyap htoq má yhangzo Isak lé shigu hkungga kut é hkûn lé, zui saí é muzó mai dingmán é sù gâ é lé wó
²² yû bê a nghut lúhú? Haú mù luí, yhang é lumjín myit gi, yhang é muzó eq rahá za e ló é yanmai, lumjín myit gi, jup bying lo é lé, nàng wó myâng
²³ bê nghut ri. Haú su mù, “Abraham gi, Garai Gasang lé lumjín é nghut mù luí, yhang lé dingmán sù ga són byi bê.”^d ga luí, kâ tô é Chyúmdang gi, dik to bê. Dum, yhang lé Garai Gasang é buinùm hpó ga luí le myhíng

^a 2:8 Nhung 19:18 ^b 2:11 Htoq Ló 20:14 ^c 2:11 Htoq Ló 20:13 ^d 2:23 Apûn 15:6

²⁴ byi bê. Haû mù luí, byù gi, lumjínj é myit èq baú za a nghut, zui saí é muzó èq mara hkyut san byi huí é lé, nung-moq bûn sê nyi akô.

²⁵ Haû eq rajung za, Rahap gâ é shiwa myhí gi, jowú su nhik lé lhom te yù mù luí, hkyô gó hkat đông nhang kat pyâm é hkûn le, yhang zui saí é muzó mai díngrán é sù gâ é wó yû bê a

²⁶ nghut lú? Haû su mù, gungdu má woi-nyí a bo le gi, shi é eq rajung za, haû lumjínj myit má muzó jizó a bo le gi, shí gû nghut bê nghut ri.

Mhé Wuí É Shô

3 Ngá é gumang wuì ê, byù myo myo sará hkâkut naú kó. Hkâsu mù gâ le, ngamoq sê é eq rajung za, sará pé gi, je riyhang htan é đông jé-yáng doqdân é hui zo râ nghut lê.

² Nga-nhúng banshoq bang gi, hkyô myo myo má myit lingbat é bang chyat nghut ri. Byù rayuq yuq dâng èq a lingbat é nghut le gi, yhang gi, jup byíng sù eq yhumsing é gùng lé wó hkang é sù nghut ri.

³ Nga-nhúng myang lé nhutkyáng kyáng byi jáng, myang hau é gungdu gón lé, nga-nhúng ô nau é đông

⁴ wó cháng nhang lê. Haû mai gotú, wuì-sanghpo pé lé wú wú keq, haû-í kô é sanghpo lé htan é laidûn èq mut é hui kôlhang, sanghpo hkâng sù gi, gyai tiq é sanghpo shap èq za, yhâng ô nau é đông, haû pé lé wó hkang yu ri.

⁵ Haû eq rajung za, shô gi, tiq é gungsho za nghut kôlhang, gyai gumrông nghutbûn nyi ri; wú keq, tiq dik é myizik zo gi, yoso mhanpúng mó lé wó

⁶ nyé gyó nhang ri-nhung. Shô haû gi, myi eq wuì nyi ri. Nga-nhúng é gungsho má, shô haû gi, agè ashop é mingkan dut lò mù, nga-nhúng é gungsho asak lé achâq achyut dut nhâng luí,

gungsho asak lé nyhê tuq kat ri. Haû gi, ngaraí myí èq nyhê tuq kat é nghut bê.

⁷ Dusak ajung jung, nghoq ahú hú, myí má yê é jung eq wuì hkaû má nyi jung banshoq gi, wó mhê yu é jung chyat nghut mù, byu pé gi, haû pé lé

⁸ mhê yu nyi akô. Nghut kôlhang, shô lé kúm gi, byù ó le a wó mhê yù kó nghut ri. Haû gi, apyí abat, agè ashop, uphkâng a wó é eq, shi é jung duq èq byíng tô é jung nghut nyi ri.

⁹ Nga-nhúng gi, shô hau èq nga-nhúng é Yhumsing eq Íwa Garai lé hkya-on nyi lhê; hau èq za, Garai Gasâng é gunglhô đông hpan tô é waxâng zo wuì lé le nhing pyâm nyi ri.

¹⁰ Nhut ralhûm za mai, hkya-ôn é dang eq nhing é dang htoq lo ri. Ngá é gumang wuì ê, haû su kut é gi, a gè.

¹¹ Wuìbúm radong za mai, chuí nghâm é wuì eq hkô é wuì wó htoq râ lú?

¹² Ngá gumang wuì ê, maihpáng gâm mai tsanlun shi, tsibiyiq núf mai maihpáng shi, wó zui râ lú? Haû eq rajung za, xô ngam é wuì gi, chuí nghâm é wuì lé wó lhoq htoq byi râ a nghut.

Ahtoq Mai Lo É Hpaqchyí

¹³ Nungmoq má, hpaqchyí byéng-yá bo é sù eq sê é dat é sù, ó nghut lê lú? Haû yuq gi, yhang hpaqchyí bo é hkyô lé, hpaqchyí mai wó yu é, myit lhoq nyhum é hkyo èq, yhumsing zui saí é ge é muzó đông tân shit

¹⁴ nyí sháng gaq. Nghut kôlhang, nungmoq é myit má ladu laí é manon é i-myt eq, lú lhum bat zik é i-myt bo é nghut le gi, hkâ-nghutbun kó, haû tengmán hkyô lé le hkâ-mhaú pyâm

¹⁵ kó. Haû sù é hpaqchyí byéng-yá kúm gi, mauhkûng htoq mai gyó lo é hpaqchyí byéng-yá a nghut, haû gi, myi-

gùng htoq mâ é, gungsho ô nau é eq, nat é hpaqchyî byéng-yá chyat nghut
¹⁶ nyi ri. Hkâsu mù gà le, manon é eq lú lhum bat zik é dut nyi le gi, ruk ruk rak rak é hkyô eq agè ashop é mú ajung jung jup hkâm nyi ri.

¹⁷ Mauhkûng htoq mâ é hpaqchyî byéng-yá kúm gi, sâng-hi awang má sansêng nyi ri; hau htâng má gi, nguín-gón hkyô lé ô nau é, myit nûm é, jîno gyô é, shogyo nhikmyin sê é eq ge é ashi zuî nyî mù luî, gamhkuî a bò, ahpuq alik a dut é eq, kut mhaú a sê é hpaqchyî byéng-yá nghut nyi ri.

¹⁸ Hau htoq agó, nguín-gón é hkyô dat sô xoq é bang gi, nguín-gón é shijí lé sân kat é bang nghut mù, ge é ashi wó yû kó râ nghut lhê.

Yhumsing Gùng Lé, Garai Gasâng Chyáng Ap To Râ Hkyô

4 Nungmoq má gyè dut lhûm é eq mabyoq jîshûm gi, hkâmai htoq lo é lhú? Nungmoq ahkaú má gungsho ô nau é hkyô pé ngón hkyô hô mù, majan zân lhûm é yanmai, dut htoq
² lo é a nghut kó lhú? Nungmoq yut yut myit ô nau nyî kôlháng, haî le a wó yû kó. Nungmoq sat nyi é eq manon nyî kôlháng, a wó yû kó. Nungmoq byoq lhûm nyi é eq majan htoq lhûm nyî kôlháng, haî le a wó yû kó; hkâsu mù gà le, nungmoq, Garai Gasang lé a dung kô é yanmai nghut ri.

³ Nungmoq dung kôlháng, a myang yû kó nghut ri; hkâsu mù gà le, nungmoq é ngón kún hkyô má jai chûng langsâ pyám râ matú, shut é dông dúng nyî kô é yanmai nghut ri.

⁴ Su-myi sulàng lú é bang su gidîq a gîng é bang ê, mingkan ô nau é hkyô lé buinùm du é myit gi, Garai lé a ngui

é myit nghut é hkyô lé, nungmoq a sé kó lhú? Haú mù luî, mingkan ô nau é hkyô eq buinùm dù nau sô ó nghut kôlháng, Garai Gasâng é gyè nghut
⁵ nyi ri. Dum ralhú, nga-nhúng má Garai Gasang kat lhûng tô é woi-nyî gi, manon é myit lúng nyi ri ga luî, Chyúmdang má taî é gi, akôm nghut ri nghú, nungmoq myit ngam nyi akô
⁶ lhú? Nghut kôlháng, Yhang gi, je kô é jeju ru byî nyi lhê. Haú eq rajung za, Chyúmdang má,

“Garai Gasang gi, nghutbûn é bang lé hkâm zing pyám kôlháng, myit lhoq nyhum é bang lé jeju byî ri.”^a

ga taî tô ri.

⁷ Haú mù, Garai upháng é a-ô má ru nyi nyî keq; Nat Tsadán lé hkâm tang pyám keq; haú hkûn, yhang nungmoq chyáng mai hpang byuq râ nghut lhê.

⁸ Garai Gasâng chyáng huî ê keq, haú hkûn, Yhang, nungmoq chyáng huî lé lô râ nghut lhê. Yubak kut é bang ê, nungmoq é loq pé lé chí san chí sêng pyám keq. Myit koq xân é bang ê, nungmoq é myit nhiklhú lé lhoq chyoî lhoq yúng to keq. Yudaq htúng dông loq lé chí san chí sêng pyám keq gà é lichyúm gi, i-myt, gungdu lé lhoq san lhoq sêng pyám é lé gà lhê.

⁹ Nungmoq gi, myit yón é, iyon yôn é eq ngaubyi ngau-nhap é kut nyî keq. Nungmoq é wuihá é hkyô lé gi, iyon dông, nungmoq é gabú é hkyô lé gi,
¹⁰ yón kuq é dông htaî pyám keq. Haú Yhumsîng Garaî é hí má i-myt lhoq nyhum nyî keq, haú hkûn, Yhang gi, nungmoq lé lhoq toq râ nghut lhê.

¹¹ Gumang wui ê, nungmoq yhangchang a ge é dông hkâtaî hpoî lhum kó. Yhumsing é yhanggu yhangmang

^a 4:6 Sângkyang 3:34

lé a ge é dōng taí hpoí nyi é sū, haū a
 nghut jáng, jéyáng é sū gi, haū tarâ lé
 a ge é dōng taí hpoí nyi mù luí, jéyáng
 é sū nghut nyi ri. Haū tarâ lé nàng jé-
 yáng nyi é nghut le gi, tarâ lé chāng
 é sū a nghut é za, tarâ jéyáng sū nàng
¹² dut nyi ri. Garai Gasang za tarâ byî tô
 é eq tarâ dara sū, wó hkyi yu é sū eq,
 wó lhoq htên é sū nghut nyi lhê. Hau
 é yanmai, náng é yhumkyo hpó lé jé-
 yáng é sū nàng gi, ó yuq wa nghut lhê
 lhú?

Gyáng Dang A Taí Râ Hkyô

¹³ “Ngamoq, hkû-nyî napmá ra-nyî
 nyî, wà rawà wà shut ê mù, haū má
 razàn kô ê nyî luí, hpugá wuiloq gá
 mù amyat wó myang yù râ.” ga taí
¹⁴ nyi é bang ê, gyô wú keq. Napmá
 haí dut lô râ lé lháng, nungmoq gi, a
 sé ko. Nungmoq é asak gi, haí nghut
 nyi lhê lhú? Haū gi, razup rahtāng
 za htoq shit luí dum byuq byuq lô
 mù é, nghansoq eq rajung za nghut
¹⁵ nyi ri. Haū mù luí, nungmoq haū su ga
 taí nyî râ malaí gi, “Yhumsīng Garai
 dōng é nghut le gi, ngamoq le ru wó
 dui nyî mù, shí le, mhô le, wó kut râ
 nghut lhê.” nghū luí, wó taí râ nghut
¹⁶ lhê. Ahkuí kúm gi, nungmoq é gyáng
 é dang dōng gumrong nyi akô; haū
 su gumrong é hkyô banshoq gi, agè
¹⁷ ashop é jung chyat nghut nyi ri. Haū
 mù luí, ge é mù sê kut to luí, a kut é
 sū gi, mara kut sū dut bê nghut ri.

Sùt Wó Bang Lé Sidiq Byî É Dang

5 Sùt wó é bang ê, gyo keq, nung-
 moq chyáng jé lé lô râ é wu-
 hke jamjau hkyo é yanmai, ngau garú
² nyi keq. Nungmoq é sutzè gi, htên
 bup byuq bê nghut ri; nungmoq é

wutbu wutmè le manot èq zô pyám
³ bê nghut ri. Nungmoq é hīng eq ngùn
 má lháng, jogyik zuí byuq mù luí,
 haū jogyik gi, nungmoq é mara hkyam
 shut saksé dut byî é eq, nungmoq é
 gungsho lé myi su zô pyám râ nghut
 lhê. Nungmoq gi, jih̄tūm buinyî shí
 pé má, sutzè lé za hkong to bekô
⁴ nhung! Wú keq, nungmoq é yohtung
 dùng yò yam nhāng mù luí, ahpau
 a byî é za, nungmoq mhaū zô tô é
 ahpau pé garú nyi é htê pé eq, mù zui
 bang garú é htê pé lé gi, haū a-tsam
 dik shoq bo é Garai wó gyo byi bê
⁵ nghut ri. Nungmoq gi, myigūng htoq
 má hkik hkik hkām hkām wó nyi é
 eq, i-myt ô nau é dōng ngón hkyô
 chyat chāng nyi bum akô. Nungmoq
 gi, sat rā buinyi matú yhumsing é
 gūng lé tsô myum to bekô nghut ri.
⁶ Haū dingmán é sū^a lé, nungmoq mara
 hūn mù, sat pyám bekô. Yhang kúm
 gi, nungmoq lé a lhom hkūm zīng
 nghut ri.

Myit Hīng Hīng Hkam Jan Ra Râ Hkyô

⁷ Haū mù luí, gumang wuì ê, haū
 Yhumsīng dum jé lé é buinyî jé shoq
 myit hīng é èq lāng nyî keq ô! Hkyām
 saí sū lé wú wú keq, yhang gi, myi-
 hpún mai ahpau dán é ashi lé wó yū
 shoq ga mau mún eq wò htāng htāng é
 mau wo gyūn é jé shoq myit hīng hīng
⁸ lāng nyi ri. Haū eq rajung za, nung-
 moq le, Yhumsīng Yesuq dum jé lé rā
 gi, chyāng lo nyi bê nghut é yanmai,
 myit hīng é èq, i-myt lé lhoq ging
⁹ lhoq tīng to keq. Gumang wuì ê, nung-
 moq jéyáng a hui sháng gaq, nung-
 moq yhangchang hkā-nyung nyāng
 lhūm nyi ko. Wú keq, Tarâ agyì gi,
 hkúmdong má jé nyi to bê nghut ri.

^a 5:6 *Dingmán* é sū gâ é danghkun lé, Chyúmlaiká ra-am má gi, *dingmán* é bang gâ ri.

¹⁰ Gumang wuì ê, haù Yhumsîng Garai é myîng eq hko kyô é myiqhtoî pé wuîhke jamjau huî é hkûn, jân pyâm é myit lé, nungmoq gi, ge é alik agàn kut yû keq. Wú keq, shikut shirang é bang lé, nga-nhúng gi, hkungsô wó é bang nghu é nghut lhê. Yobaq hkâm jân é yanmai, Yhumsîng Garai gi, yhang lé htâng má myo myo dum shimân byî é hkyô lé, nungmoq wó gyô wú bê nghut lhê. Haî mù gâ le, haù Yhumsîng Garai gi, gyai shogyo nhikmyîn é sù nghut nyi ri.

¹² Ngá é gumang wuì ê, banshoq má ahkyak dik é gi, haî le le hkâdakâm kó. Mauhkûng lé a nghut jáng, myigùng lé lang luí le hkâdakâm kó. Dakam é dang gotú lé le hkâtaî nyi kó. Nungmoq doqdân é a hui sháng gaq, nungmoq gi, nghut é le gi, “nghut lhê”, a nghut é le gi, “a nghut”, nghû za, taí keq.

Lumjîng Myit Eq Kyûdung Râ Hkyô

¹³ Nungmoq má rayuq yuq wuîhke jamjau huî é nghut le gi, kyûdung nyi sháng gaq; rayuq yuq myit ngón nyi é nghut le gi, hkya-on mahkôn ¹⁴ hkôn nyi sháng gaq. Nungmoq má rayuq yuq nõhpyo huî é nghut le gi, noqkuq hpúng mâ é nhik bô suwún wuî lé ji yù mù, haù bang gi, Yhumsîng Yesuq é myîng mai yhang lé xû but byi luí, kyûdung byi kó sháng ¹⁵ gaq. Haù su mù, lumjîng myit eq kyû-

dung é dang gi, haù nõ sù lé lhoq gê luí, Yhumsîng Garai gi, haù yuq lé lhoq toq yû râ nghut lhê. Yhang gi, yubak mara kut shut é nghut kô-lhang, hkyut pyâm byî é hui râ nghut ¹⁶ lhê. Haù mù luí, nungmoq lhoq ge é hui kó sháng gaq, nungmoq é yubak mara lé rayuq eq rayuq yín lhum mù, kyûdung byî lhûm nyi keq. Dingmán su é kyûdung dang gi, wó dut nhâng râ a-tsam wum-o myo myo bo nyi ri.

¹⁷ Eliyaq gi, nga-nhúng su i-myt unghkaù bo é xângzo byù za nghut lhê. Nghut kôlhâng, yhang gi, mau a wò sháng gaq ga, wum kat o kat kyûdung jáng, sùm zan eq lhamó hkyuq hkyap tup myigùng htoq má mau a wò shoq ¹⁸ dut byuq é nghut lhê. Kyû dum dúng kat jáng, mauhkûng gi, maú wo hkyô kat byi mù, myigùng gi, yhâng é kyô shi mui shi lé lhoq htoq byî wú bê nghut lhê.

¹⁹ Ngá é gumang wuì ê, nungmoq chyáng mâ é rayuq yuq, haù tengmán hkyô mai nghoq ló byuq é hkûn, rayuq yuq gi, yhang lé tengmán hkyô shut dum wó shuí taù lo é nghut le kúm ²⁰ gi, haù shuí taù yù sù gi, yubak mara kut é sù lé, shut shai é hkyô mai tengmán hkyô shut shuí taù yù mù, myit woi-nyí lé shi é mai hkyi yù bê nghut é yanmai, yubak mara myo myo lé shuí nghop pyâm byî é sù dut berâ lé, bûn nyi keq ô!

PETRUQ

Hî Dàm Hun Kat é Laiká

(1 Peter)

1 Yesuq Hkrisduq é lagyo nghut sù, ngò Petruq gi, Pontuq, Galatiq, Kapadokia, Asia eq Bihtuni mau pé má byo myín tô bum é, Yesuq Hkrisduq é jìno gyo râ matú le, Yhâng é suí èq hpyûn gyûn é hui^a râ matú le, haú Woi-nyí é lhoq sân-yúng nyi é muzó dông mai, Íwa Garai Gasâng é hî te sê tô é hpaqchyî má cháng luí, ² hkyin yù huí é bang nghut é, Garai Gasâng èq hkyin htoq yù luí, mingkân é byùbúng dut bâng chyáng dang kyô kat lhê. Jeju eq nguingón hkyô gi, nungmoq chyáng agùn agó joq nyi sháng gaq.

Dui Nyi É Myit Myoqbyù Hkyô

³ Hkya-on kungtôn hkyô gi, nga-nhûng é Yhumsing Yesuq Hkrisduq é Yhângwa nghut sù Garai Gasang chyáng nghut nyi sháng gaq! Yhang gi, Yesuq Hkrisduq, shi é mai dum dui toq é hkyô dông, Yhâng é gyai shogyo nhikmyin é yanmai, nga-nhúng lé, asik hku é dum hui nhâng mù, rû dui nyi é myit myoqbyù hkyô lé wó ⁴ nhang é htoq agó, nungmoq é matú mauhkúng htoq má tô to byi bê nghut é, hkâ-nhám le, a hten a byoq é, agot a-û a dut é, a hpoí byuq é muí lé ⁵ le wó nhang é nghut lhê. Nungmoq gi, lumjínng kô é yanmai, ló htâng é ahkyíng má lhoq htoq shit râ rì rì nghut é hkyi yù hkyô jé shoq, Garaí é hpungwup a-tsâm èq upzúng é hui ⁶ bang nghut akô. Haú mù, nungmoq gi, ahkuí razup zo, wuîhke hkyô jung-

hking jungmó má yón hpuzô é hui kó râ nghut kôlháng, gyai yang gabú ⁷ nyí keq. Wuîhke hkyô haú pé mai, nungmoq é lumjínng myit gi, jet é hkyô lé wó chyam htoq mù, myi mai jên yù kôlháng htên byoq sê é hîng htoq je gyaú luí, Yesuq Hkrisduq htoq shit é hkûn, hkya-on kungtôn hkyô, hpungwup shingkang eq aróng sitang lé, ⁸ nungmoq wó kó râ nghut lhê. Nungmoq gi, Yesuq lé a myang wú kôlháng, Yhang lé chyitdap bum akô; Ahkuí, nungmoq, Yhang lé a myàng kôlháng, Yhang lé lumjínng kô é nghut mù, a ung htoq taí é eq hpungwup bo é gabú hkyô gi, nungmoq chyáng byíng jup ⁹ nyi ri. Hkâsu mù gâ le, nungmoq gi, nungmoq é asak woi-nyí lé hkyi yù hkyô nghu é, nungmoq é lumjínng myit é akyú lé wó yu nyi kô é nghut ri. ¹⁰ Hkyi yù hkyô haú eq séng luí, nungmoq chyáng jé bê nghut é jeju hkyô lé taí é myiqhtoí pé gi, gyai yang sidiq myit èq jí jí chyun chyun ho ¹¹ gon wú bekô nghut ri. Yhangmoq gi, Hkrisduq wuîhke jamjau hui luí, hpungwup shingkang wó râ nghut é hkyô lé, yhangmoq má lúng nyi é, Hkrisduq é Woi-nyí mai te taí é hkûn, hkâ-nhám nghut râ eq hkâsú é u má nghut râ hkyô lé ho gôn wú bekô ¹² nghut ri. Mauhkúng mai nhang kat é Chyoiyúng Woi-nyí èq, nungmoq lé gabú danglù hko kyo bê bang mai, ahkuí nungmoq lé taí kyo bê nghut é hkyô pé lé, yhangmoq taí kô é gi, yhumsing matú dojaú é a nghut é

^a 1:1 Yhâng é suí èq hpyûn gyûn é hui gâ é gi, Yhâng é suí èq mara chí sân pyám byí é lé gâ lhê.

za, nungmoq matú nghut é hkyô lé, yhangmoq gi, htoq shit sé nhang é hui bekô nghut ri. Maumang lagyô pé lhang gi, haú hkyô pé lé gyai wú nau bum akô nghut ri.

Chyoiyúng Nyí Râ Hkyô

- ¹³ Haú mù luí, zui saí râ matú nungmoq é i-myt lé hen to keq; yhumsing gùng yhumsing hkang nyí keq; Yesuq Hkrisduq htoq shit é hkûn, nungmoq lé byi râ nghut é jeju lé, hkyak za myit
- ¹⁴ myoqbyu nyí keq. Jino gyô é zoshâng wui su, myoq a bóng shí é pyat má nungmoq nyí tô é hkûn, nungmoq é agè ashop ô nau hkyô lé a châng kut
- ¹⁵ é za, haú nungmoq lé ji yu é Sû gi, chyoiyúng é su, nungmoq zui saí é hkyô banshoq má chyoiyúng nyí keq.
- ¹⁶ Hkâsu mù gâ le, “Ngò gi, chyoiyúng Sû nghut é yanmai, nungmoq le chyoiyúng nyí keq.”^a ga kâ tô ri.
- ¹⁷ Byù yuq hkangmó é muzó lé, myoqdong a hkyin é za tarâ jéyáng é sù Íwa lé, nungmoq wut dung kô é yanmai, byùbíng dông shí má nyi é u lé, Garai lé gyuq hkunggâ é myit mai asak
- ¹⁸ duì keq. Hkâsu mù gâ le, nungmoq gi, nungmoq é íchíy íwâ pê chyáng mai bo gyó lo é hpau a dap é asak duì hkyô mai, htên byoq sê é ngùn, hing èq hkyi yù huí é a nghut é za,
- ¹⁹ gumjup é eq mara a bo é sauzo nghut sù, Hkrisduq é hpau dik é suí èq sheq hkyi yù huí é ru nghut é lé, nungmoq sê lhê. Yhang gi, mau htoq xâng hkun mai hkyin yu é hui bê nghut kôlhang, jhtâm ahkyíng shí pé má sheq, nungmoq é matú htoq shit nhang é
- ²¹ hui bê nghut ri. Yhang lé, shi é mai lhoq dui toq yù mù, hpungwup shing-kang bò nhang é Garai Gasang lé,

nungmoq gi, Hkrisduq dông mai lumjínng kô é nghut luí, nungmoq é lumjínng myit eq myit myoqbyù hkyô gi, Garai Gasâng chyáng nghut nyí bekô nghut ri.

- ²² Ahkuí kúm, nungmoq gi, haú tengmán hkyô lé châng é dông mai, yhum-sing gùng yhumsing lhoq sân-yúng yù bekô nghut mù, nungmoq é gumang wui lé, lhumzui é dông chyitdap bekô nghut luí, myit nhiklhum mai, rayuq eq rayuq gyai yhang chyitdap lhum
- ²³ keq. Hkâsu mù gâ le, nungmoq gi, htên byoq sê é amyui mai dum hkú huí é a nghut é za, Garai Gasâng é, rú dui nyi é eq ru gíng nyi é mungdang dông, htên byoq a sê é amyui mai dum
- ²⁴ hku é hui bang ru nghut lhê. Hkâsu mù gâ le,

“Byù lhunglhang bang gi, wàhu mhan eq pung ri, yhangmoq banshoq bâng é hpungwup shing-kang gi, yò mâ é banbó pé eq pung ri;

wàhu mhan gi, nyhuí kyuq byuq luí, banbó pé gi, yoq gyó byuq lhê;

- ²⁵ nghut kôlhang, haú Yhumsing é mungdang gi, ahtum abyuq gíng nyi lhê.”^b

gâ tô ri. Haú gi, nungmoq lé hko kyo bê mungdang nghut lhê.

2 Haú mù luí, i-myt dũ é hkyô banshoq, gegùn labyoq kut é hkyô, manon é hkyô eq lumù gansang é hkyô jung

² hkangmó pé lé tô pyám keq. Asik hku é zonú pé nau lé ô nau gadaú é su, woi-nyí eq sêng é jet é nau^c lé ô nau gadaú nyí keq, haú jáng, nungmoq gi, hau é yanmai, nungmoq é hkyi yù hkyô má wó kô myhâng kó râ nghut

^a 1:16 Nhong 11:44-45, 19:2, 20:7 ^b 1:25 Esai 40:6-8 ^c 2:2 Woi-nyí eq sêng é jet é nau gâ é gi, Garai Gasâng é mungdang lé tai é nghut lhê.

³ lhê. Hkâsu mù gâ le, haû Yhumsîng gi, gè sù nghut é lé, nungmoq chyam wú bekô nghut ri.

**Rû Dui Nyi É Luqgok Eq
Hkyin Yù Huí É Byù Myû**

⁴ Byu pé mai hkyin htoq pyám kô-lhang, Garai Gasâng é matú hpau-dap luí, Yhâng èq hkyin yù huí é, rû dui nyi é Luqgok nghut sù, haû Yhumsing
⁵ chyáng nungmoq jé lé é hkûn, nungmoq le, rû dui nyi é luqgok pé su, woi-nyí eq sêng é yhûm^a saí nyi é hui luí, Yesuq Hkrisduq dông mai, Garaí èq hap yù gíng é, woi-nyí eq sêng é hkungga nhông byi râ matú, chyoi-yúng é hkyangjong amyû dut bekô
⁶ nghut ri. Hkâsu mù gâ le, Chyúmdang má,

“Wú keq, hkyin yù huí é eq hpau-dap é htungchyûn luqgok racham lé, Zi-un bùm má ngò lheq tô é nghut lhê;
Yhang lé lumhkau é sù gi, hkâ-nhám le hoq hpû é hui râ a nghut.”^b

⁷ ga taí tô ri. Haû mù, lumjíng bang nungmoq é matú gi, luqgok haû hpau-dap é nghut lhê. Nghut kôlhâng, a lumjíng bâng é matú gi,

“Haû yhûm saí bang hkyin htoq pyâm é luqgok gi, htungchyûn mâ é ahkyak dik é luqgok^c dut bê nghut ri.”^d

ga le,

⁸ “Byu pé lé, htûng leng râ luqgok eq myit leqbat nhâng râ luq mó cham dut bê nghut ri.”^e
ga le, taí tô ri. Yhangmoq gi, mung-dang lé a cháng kô é yanmai, myit leqbat kô é nghut lhê. Haû dut râ lé,

yhangmoq é matú masat to gû nghut bê nghut ri.

⁹ Nghut kôlhâng, nungmoq gi, mau-chut hkaû mai Yhâng é mauhpo maubó shut nungmoq lé wut htoq yù Su é mauhpo muzó lé wó taí pyô kó sháng gaq ga, hkyin yù huí é byuhú, hkohkâm hkyangjong amyû, chyoi-yúng é byù myû, Garaí Gasang eq sêng
¹⁰ é byu pé nghut akô nghut ri. Nungmoq gi, hí lé byù ra-myû a nghut wú kôlhâng, ahkuí gi, Garaí Gasâng é byù myû nghut bekô nghut ri; nungmoq gi, hí lé shogyo nhikmyin hkyô lé a wó yu wú kôlhâng, ahkuí gi, shogyo nhikmyin hkyô lé wó yù bekô nghut ri.

¹¹ Chyitdap é luzúm wuí ê, nungmoq é asak woi-nyí lé majan zân nyi é, yubak mara byíng jup é ô nau gadaú hkyô lé koi pyám keq nghú, gó mîng byu pé eq byùbíng pé dông mingkan htoq má nyi é bang nungmoq lé, ngò,
¹² wum taí tsuq kat lhê. Haû a lumjíng shí é byu pé gi, nungmoq shut nyi ri ga, nungmoq lé mara hun bùm kôle, nungmoq é ge é muzó lé myàng kômù, nga-nhúng lé Garaí Gasâng èq lé kûm é buinyì má Garaí lé shigyau kó sháng gaq, a lumjíng shí é byu pé é ahkaû má haû su ge é asak duí hkyô dông nyi yap keq.

**Uphkâng Bang Eq Yhumsîng
Wui É A-ô Má Nyi Râ Hkyô**

¹³ Haû Yhumsing é yanmai, byu pé mâ é ahko ahkáng wó bang banshoq é a-ô má nyi keq: kô dik é ahkáng ayá wó é hkosêng é a-ô má nghut kôle,
¹⁴ shut é hkyô kut bang lé dam byi râ matú eq jô é hkyô kut bang lé shigyau râ matú, hkosêng èq nhang tô

^a 2:5 *Woi-nyí eq sêng é yhûm* gâ é gi, noqkuq hpúng lé taí nau é nghut lhê. ^b 2:6 Esai 28:16

^c 2:7 *Ahkyak é luqgok* gâ é gi, Hkrisduq lé taí é nghut lhê. ^d 2:7 Hkya-on 118:22 ^e 2:8 Esai 8:14

é mauzaû pê é a-ô má nghut kôle,
¹⁵ nyi nyi keq. Hkâsu mù gà le, ge é hkyô kut é dông, byù nâ pê é a sé a dat é dang lé nungmoq lhoq zîm pyâm é gi, Garai Gasang ô nau é hkyô
¹⁶ nghut lhê. Lut bê bang dông nyi keq, nghut kôlhang, agè ashop é hkyô lé nghop pyâm râ matú nungmoq é lut-hkyô lé hkâchûng kó; Garai Gasâng é dui-nhâng zoshâng wui dông nyi keq.
¹⁷ Yuq hkangmó lé rago za hkunggâ é hkyô shit keq; lumjîng é gumang wui lé chyitdap keq; Garai Gasang lé gyuq hkunggâ nyi keq; hkoséng lé hkungga keq.
¹⁸ Dui-nhâng zoshâng wui ê, hkungga myit banshoq èq, nungmoq é yhum-sîng wui é a-ô má nyi keq; ge é eq nú-nhâm bâng é a-ô má za a nghut, byu-wuí pê é a-ô má le nyi keq. Hkâsu mù gà le, byù rayuq gi, Garai Gasang lé bûn nyi sù nghut é yanmai, mara dông a nghut kôlhang, wuîhke jamjau huí é hkyô lé hpuzô é lé, jân pyâm é nghut le gi, hkya-on gîng é
²⁰ sù nghut lhê. Nghut kôlhang, nungmoq gi, mara kut shut é yanmai, nhuq bat é hkâm zo luí, haú lé jân nyi é nghut le gi, hai aróng wó kó râ lú? Nghut kôlhang, nungmoq gi, ge é hkyô kut luí, wuîhke hui zô é lé jân pyâm é nghut jáng, haú gi, Garai Gasâng hí má hkya-on gîng é hkyô nghut
²¹ lhê. Nungmoq gi, haú hkyo é matú ji yù huí é nghut lhê; haí mù gà le, Hkrisduq gi, nungmoq é matú wuîhke hkyô huí é má, nungmoq lé alik dông tô to byi bê nghut mù, nungmoq gi, Yhâng é hkyí-kám pé lé cháng râ dut lhê.
²² “Yhang gi, hai mara le a kut shut, Yhâng é nhut mai mhaú é lé a myàng.”^a

²³ Yhang gi, rhoi é huí é hkûn, yhangmoq lé a dum taû rhoi; wuîhke hkyô huí é hkûn, kyuq é dang a taí. Haú kut râ malaí, tengmán é dông jéyáng é Su chyáng, Yhânggùng lé ap pyâm ri.
²⁴ Nga-nhúng gi, yubak mara eq wó shi gang mù, dingmán hkyo é matú asak wó duí kó sháng gaq ga, Yhang gi, sik zîng má, Yhânggùng èq yhang, nga-nhúng é yubak mara lé Yhânggùng má wun pyâm byi bê nghut ri; Yhâng é dàm pê é yanmai, nungmoq gi, lhoq gê byí é hui bekô nghut ri.
²⁵ Hkâsu mù gà le, nungmoq gi, hkyô nghoq byuq é sau pé su dut wú kôlhang, ahkuí, nungmoq gi, haú sau zúng Sù eq nungmoq é asak woi-nyí lé upzúng Su chyáng lhing taú lò bekô nghut ri.

Ikun Myhí Pé Eq Ikun Hpô Pé

3 Ikun myhí pé ê, haú eq rajung za, yhumsing é ikun hpó uphkang é a-ô má nyi keq; haú hkûn, yhangmoq mâ é rayuq yuq, haú mungdang lé a
² lumjîng kôlhang, yhumsing é asak duí hkyô mâ é sanséng é hkyô eq hkunggâ é hkyô lé myàng kôjáng, dang dông a nghut é za, yhâng é yhumsîng myhí é nyi yap é sâmlai dông mai yhang lé
³ wó lhoq lhiq yû râ nghut lhê. Nungmoq yúng é hkyô gi, ahtoq pyâm za nghut é, xâmban nik é dông, hîng zè mhôn chung é eq réng é mebu wut
⁴ é dông mai lo é a ge nghut. Hau é malaí, haú gi, Garai Gasâng é hí má gù bo é, nú-nhâm é eq zim za dut é woi-nyí é, a dat hpoí é yúng hkyô nghut é nungmoq é i-myit unghkaú mâ é su é yúng hkyô sheq dut râ
⁵ lhê. Hkâsu mù gà le, gó hkûn, Garai Gasâng chyáng myit myoqbyù bang nghut é, chyoiyúng é myiwe wui gi,

^a 2:22 Esai 53:9

yangmoq gùng lé haù dông mhôn yù
⁶ yù kut kô é nghut lhê. Sarah gi, Abraham é jino gyo luí, yang lé yhang é yhumsing ga wut é su, yangmoq gi, ó le ô é yhumsing é ikun hpó uphkang é a-ô má nyi akô nghut ri. Nungmoq gi, jô é hkyô lé kut mù, gyuq é hkyô a bo é nghut jáng, Sarah é byizô pé nghut bê.

⁷ Ikun hpô pé ê, haù eq rajung za, yhumsing é ikun myhí eq rahá nyi yap e ló é hkún, sê gyo byi mù, nungmoq htoq wum nyhôm é bang eq, nungmoq eq rahá asak jeju chyunhuq wunlí wó é bang dông, yangmoq lé hkungga keq. Haù hkún, nungmoq é kyûdung dang lé a he-ngik pyám byi râ nghut lhê.

Ge É Kut Luí, Jamjau Hkam É Hkyô

⁸ Dang htàng sat é má, nungmoq ban-shoq bang gi, rayuq eq rayuq myit huí lhâm nyi keq; myit wú nô mù, gumang nhiktàng wui su chyitdap lhâm nyi keq; shogyo nhikmyin myit bò luí,
⁹ i-myt nyhum nyi keq. Agè ashop é lé, agè ashop é dông lató a hpuq é eq rhoi é lé rhoi é dông lató a hpuq é za, shimân byi keq; haí mù gà le, nungmoq gi, haú pê é matú, shimân jeju mùi wó hkam yù kó sháng gaq ga, ji
¹⁰ yu é hui kô é ru nghut lhê. Hkâsu mù gà le,

“Asak duì râ lé chyitdap é eq ge é buinyi pé lé myàng nau é sù ó yuq le, yhang é shô lé, agè ashop é mai, yhang é nhutwuf lé, mhaú dang taí é mai, lhoq kâng pyám ra râ nghut lhê.

¹¹ Yhang gi, agè ashop hkyô mai lhing tau mù, ge é kut ra râ nghut lhê; yang gi, nguingón

simsaq hkyô lé hô mù, châng hkat nyi ra râ nghut lhê.

¹² Hkâsu mù gà le, haù Yhumsing é myoqjí gi, dingmán bang lé wú nyi é nghut luí, yangmoq é kyûdung dang lé, Yhang é nohkyap èq gyo byí ri; nghut kôlhang, haù Yhumsing é myoqdong gi, agè ashop hkyô kut bang lé gye dông myang pyám ri.”^a

gâ tô ri.

¹³ Ge é hkyô lé, nungmoq gyai yang kut nau nyi é nghut le gi, ó yuq wá
¹⁴ nungmoq lé wó gunjang râ lú? Nghut kôlhang, dingmán hkyo é matú, nungmoq wuífke jamjau huí le lhang, nungmoq gi, hkungsô wó nyi ri. “Yangmoq gyuq é hkyô lé hkâgyuq

¹⁵ kó; hkâgyuq dàn kó.”^b Nungmoq kúm gi, myit nhiklhum má, Hkrisduq lé, Yhumsing dông jowò byi keq. Nàng wó é myit myoqbyù hkyô lé myí é sù yuq hkangmó lé, haí mù wó é hkyô tû taí kyo râ matú, ayang hen to aq. Nghut kôlhang, nú-nhâm é eq hkunggâ é dông haù lé kut nyi aq;

¹⁶ nungmoq é unghkaù myit san za dut nyi keq, haù hkún, Hkrisduq dông mai nungmoq wó é ge é a-kyang lé rhoí dang taí é bang gi, yangmoq lumù gansang é yanmai hoq hpú é hui kó
¹⁷ râ nghut lhê. Garai Gasang ô nau é nghut le gi, agè ashop kut luí jamjau hkâm râ htoq má, ge é kut luí jamjau hkam le gi, je ge é nghut lhê.

¹⁸ Hkâsu mù gà le, nungmoq lé Garai Gâsâng chyáng shuí jé shoq, Hkrisduq gi, byu pê é yubak marâ é yanmai, radàm za shí hkâm pyám bê nghut ri; haù gi, dingmán Sù, a dingmán bâng é matú shí hkâm byí é nghut lhê. Yhang

^a 3:12 Hkya-on 34:12-16 ^b 3:14 Esai 8:12

gi, gungdu shí bê nghut kôlhang, haû Woi-nyí má lhoq dui é hui bê nghut ri.
¹⁹ Yhang gi, Woi-nyí dông, htóng lúng tô
²⁰ é woi-nyí pé lé ê hko kyô ri. Woi-nyí haû pé gi, a-nham lé, Noaq é ipyat má wui-sanghpo lé Noaq tsuq nyi é hkûn Garai Gasang myit hîng hîng lánq nyi é u lé, jîno a gyô é bang nghut akô. Wui-sanghpo má wàng mù, wui mai hkyi yù huí é byù shau luí, shit yuq za
²¹ nghut akô. Wui haû gi, ahkuí nungmoq lé le hkyi yu é nghut é baptisma é azông nghut ri; haû gi, gungdu mâ é agot a-û lé huí sêng pyám byí é a nghut é za, sansêng é unghkaû myit mai Garai Gasâng é hí má gidíq tô é ru nghut lhê. Yesuq Hkrisduq é dum dui toq hkyô dông, nungmoq gi, baptisma hkâm yù luí, hkyi yu é hui kô
²² é nghut lhê. Yesuq Hkrisduq gi, mauhkûng má doq ló luí, Garai Gasâng é loqyò hkyam má nyi tô é nghut mù, maumang lagyô pé, ahkáng ayá pé eq a-tsam pé gi, Yhâng uphkang é a-ô má nghut nyi bum akô.

Garai Gasâng É Matú Asak Dui Râ Hkyô

4 Haû mù luí, Hkrisduq gi, Yhâng é gungdu má hpuzo bê nghut é yanmai, nungmoq le, Yhang i-myt sâmlai hau èq yhumsing gùng má gyehking dông wut to keq, haí mù gâ le, yhâng é gungdu má hpuzo bê sù gi, mara eq
² gang bê nghut ri. Haû nghut é yanmai, yhang gi, yhang nyi tûm tô é mingkan asak dui hkyô má, agè ashop é xângzo byù ô nau é dông a nghut é za, Garai Gasang ô nau é dông asak
³ dui é ru nghut lhê. Hkâsu mù gâ le, nungmoq gi, laí lò bê ahkyíng má, a lumjíng shí é byu pé hkyin kut nau é hkyô nghut é, shut é dông nyi zô lhum nau é i-myt, agè ashop é yut yut ô nau é hkyô, í shuq wut é hkyô, zo yê

shuq yê mù achaq achyut kut é hkyô, ye hai râ wut jung zoshuq lé yut yut ô nau é hkyô, achaq achyut é hparà noq hkyô pé má, ahkyíng luq shoq nyi
⁴ laí lò bê bang nghut akô. Nungmoq gi, ladu lai shoq achaq achyut kut é hkyô má, yhangmoq eq rahá a bo châng kut wún lo kô é nghut mù, yhangmoq gi, maú byuq luí, nungmoq lé lumù gan-
⁵ sang pyám akô nghut ri. Nghut kôlhang, yhangmoq gi, dui nyi é bang eq shí bê bang lé tarâ jéyáng râ rì rì nghut to Sù lé jihpán shit kyo ra kó
⁶ râ nghut lhê. Hau é yanmai, ahkuí shi byuq bê bang lé lháng gabú danglù hko kyô é hui bekô nghut lhê; haû gi, gungdu eq séng luí ga jang, yhangmoq gi, byù dông mai tarâ jéyáng é hui râ eq, woi-nyí eq séng luí ga jang, Garai Gasang dông mai asak wó duí râ matú nghut lhê.

⁷ Lhunglhang htum râ ahkyíng gi, chyáng bê nghut ri. Haû mù luí, nungmoq kyû wó dung kó sháng gaq, bûn gying luí, yhumsing gùng yhum-
⁸ sîng hkang nyi keq. Banshoq htoq má ahkyak é gi, rayuq eq rayuq gyai yhang chyitdap lhûm é hkyô nghut lhê, haí mù gâ le, chyitdap myit gi, yubak mara myo myo lé wó nghop
⁹ pyám é nghut lhê. Rayuq eq rayuq, taí nyung nyâng é hkyô a bo é za, rago
¹⁰ hkulum lhum keq. Yuq hkangmó gi, yhumsîng wó hkam yù bê chyunghuq eq rajung za, góbang lé dojaú râ lhê; Garai Gasâng jeju chyunghuq ajung jung lé, lhumzui é èq rago chung jai
¹¹ râ lhê. Rayuq yuq taí é nghut jáng, Garai Gasâng é mungdang haû eq yhang rajung za taí ra râ nghut lhê. Garai Gasang gi, lhunglhang má Yesuq Hkrisduq é yanmai hkya-ôn é hui sháng gaq, rayuq yuq dojaú é nghut jáng, Garai Gasang byí é wum-ô èq

dojaú ra râ nghut lhê. Haû hpungwup shingkang eq a-tsam gi, Yesuq Hkrisduq chyáng pyat dedu ahtum abyuq joq nyí sháng gaq ô. Amen.

**Hkristan Dut É Yanmai
Jamjau Huí É Hkyô**

- ¹² Chyitdap é luzúm wuí ê, wuíhke hkyô dông chyam é lé nungmoq hkâm zô nyí é hkûn, nungmoq chyáng maú nhô zâ é hkyô dut htoq bê dông, hkâ-gyuq dàn kó. Hkrisduq é jamjau hkyô pé lé bo hui zô é yanmai kúm gi, nungmoq gabú keq, haú hkûn sheq, Yhang é hpungwup shingkang eq rahá Yhang htoq shit é hkûn, nungmoq gi, gabú ¹⁴ dik é hui kó râ nghut lhê. Hkrisduq é myìng yanmai, nungmoq gi, rhoi é hui zô é nghut jáng, hkungsô wó nyí ri; hkâsu mù gà le, hpungwup shingkang bo é Woi-nyí nghu é, Garai Gasâng é Woi-nyí gi, nungmoq chyáng nyí ¹⁵ nyí ri. Nungmoq mâ é rayuq yuq jamjau huí é nghut le gi, byù sat sù, hkau sù, gotú agè ashop kut sù, góbâng é mù má cháng gunjang sù dông jamjau ¹⁶ huí é a dut sháng gaq. Nghut kôlhang, Hkristan rayuq dông nungmoq jamjau huí é nghut le gi, hkâhoq nyí kó, Garai Gasang lé kúm gi, myìng hau é yanmai hkya-ôn nyí keq. Hkâsu mù gà le, tarâ jéyáng râ ahkyíng gi, jé bê nghut luí, Garai Gasâng é ikun byu pé mai hí râ nghut lhê; haú gi, nga-nhúng mai hi é nghut jáng, Garai Gasâng é gabú danglù lé a châng é bang gi, hkâsu wá dut lò râ nghut lhê ¹⁷ lú?
- ¹⁸ “Haú dingmán sù, hkyi yù hui râ wuí é nghut le gi, tarâ a hkunggâ é eq yubak dap é sù gi, hkâsu wá dut râ nghut lhê lú?”^a

gâ tô ri.

- ¹⁹ Haû nghut mù luí, Garai Gasang ô nau é dông jamjau huí é bang gi, yhumsing gùng lé, lhumzúí é Hpân Su chyáng ap byi mù, ge é lé xoq kut nyi ra râ nghut lhê.

Suwún Wuí Éq Zorâm Wui

- 5** Nungmoq mâ é hpúng suwún wuí lé, ngò, nungmoq é byinzùm suwún, Hkrisduq é jamjau hkyô pê é saksé nghut sù eq lhoq htoq shit râ nghut é Yhâng é hpungwup shingkang lé bo hkâm râ nghut sù dông mai sang ² kat kôlé: Nungmoq lé ap to bê nghut é Garai Gasâng é sau hpúng^b lé zúng rém bang dut mù, shuí u bang dông dojaú nyí keq; zúng rém é hkûn, a kut a ge luí kut é a nghut é za, Garai Gasang, nungmoq lé dut nhâng nau é su, yhumsing kâm é myit mai kut é nghut râ lhê; ngunzê lé a myoqnoq é za, shi-³ rông myit mai dojaú râ lhê. Nungmoq é loq má ap byí to bê bang lé a up zô é za, yhangmoq é hí má alik dut ⁴ nyí keq. Haú jáng, Sau zúng Agyí mó^c htoq shit é hkûn, nungmoq gi, hpungwup shingkang bo é, hkâ-nhám le a shum a byuq é janmaú lé myang hap yù kó râ nghut lhê.
- ⁵ Zorâm wuí ê, nungmoq le, nungmoq htoq ipyat ko bâng é a-ô má nyí keq. Nungmoq lhunglhâng bang gi, myit lhoq nyhum é hkyô lé mebu su wut to mù, rayuq eq rayuq dojaú nyí keq, hkâsu mù gà le,
- “Garai Gasang gi, nghutbûn é bang lé hkûm zing pyám kôlhang, myit lhoq nyhum é bang lé jeju byí ri.”^d
- ⁶ ga tô ri. Haû mù luí, ahkyíng jé jáng Garai Gasang nungmoq lé waq

^a 4:18 Sânghkyang 11:31 ^b 5:2 Sau hpúng gà é gi, lumjúng bang lé gà lhê. ^c 5:4 Sau zúng Agyí mó gà é gi, Hkrisduq lé gà é nghut lhê. ^d 5:5 Sânghkyang 3:34

toq sháng gaq, nungmoq gi, Yhâng é hpungwup a-tsam mó bo é loq hkaû má, yhumsing myit lé yhumsîng lhoq
 7 nyhum nyî keq. Nungmoq é myit chiq hkyô banshoq lé, Yhâng htoq má dú kê pyâm to keq, haî mù gâ le, Yhang gi, nungmoq é matú chiq byî nyî sù nghut lhê.

8 Yhumsing gùng lé yhumsîng hkâng mù, machya nyî keq. Nungmoq é gyè nghut é nat Tsadán hpó gi, rayuq yuq lé wó zô myui pyám shoq ga, mying wún é hkanghkyi su hkat gadaú jón
 9 wún ri. Yhang lé htuq htîng pyám mù, lumjîng myit má gingtîng nyî keq, haî mù gâ le, mingkan gón mâ é nungmoq é gumang wuî le, rajung zâ é jamjau hkyô pé hui zô nyî kô é lé, nungmoq sê lhê.

10 Haû mù, jeju banshoq é Garai Gasang gi, Hkrisduq má ahtum abyuq joq nyi é Yhâng é hpungwup shing-kâng matú nungmoq lé ji yù bê nghut luî, nungmoq razup zo jamjau huî é htâng má, Yhang yhang nungmoq lé

gumjup nhâng mù, wum bô nhâng luî, ging ging tíng tíng dut nhâng
 11 râ nghut lhê. Haû hpungwup a-tsam banshoq gi, Yhâng chyáng pyat dedu ahtum abyuq rû joq nyî sháng gaq. Amen.

Ló Htâng É Shi-kyâm Dang

12 Lhumzuî é gumang nghû ngò sôn yu é Sila èq garúm luî, ngò gi, nungmoq lé myit wum byi dang eq, myit wum byi dang haú pé gi, Garai Gasâng é tengmán é jeju nghut é lé saksé hkâm é dang pé lé, tot za kê kat é nghut lhê. Tengmán é jeju haú má yap gîng nyî keq.

13 Babelon má nyi é, nungmoq eq rahá hkyin yù huî é Hpúng gi, nungmoq lé shi-kyâm kat ri; ngá zo dông nghut sù Markuq le, nungmoq lé shi-kyâm
 14 kat ri. Rayuq eq rayuq, chyitdap bo-puq puq é èq shi-kyâm lhum keq.

Nguingón hkyô gi, Hkrisduq má nghut nyi é nungmoq banshoq bâng chyáng ru joq nyî sháng gaq ô.

PETRUQ

Htang Dàm Hun Kat é Laiká

(2 Peter)

1 Yesuq Hkrisduq é dui-nhâng zo-shâng eq lagyo nghut sù, ngò Simun Petruq gi, nga-nhúng é Garai Gasang eq hkyi yù Sù nghut é Yesuq Hkrisduq é dingmán hkyô dông, nga-moq su, hpaû dik é lumjúng hkyô lé hap yù bê bang chyáng dang kyô kat lhê.

² Garai Gasang eq nga-nhúng é Yhumsing Yesuq lé, nungmoq sê jat nyi é hkyô má, jeju eq nguingón hkyô gi, nungmoq chyáng agùn agó ru joq nyi sháng gaq.

Ji Yu É Eq Hkyin Yu É Hkyô Lé Lhoq Ging Lhoq Tíng Râ Hkyô

³ Yhâng é hpungwup shingkang eq ge é hkyô dông nga-nhúng lé ji yù Sù lé nga-nhúng sê é dông mai, Garai Gasang é hpungwup a-tsam gi, asak duì hkyô eq tarâ hkungga hkyo é matú nga-nhúng râ é jung hkangmó lé byi ⁴ bê nghut ri. Haú pé dông mai, Yhang gi, Yhâng é kô dik, hpaû dik é danggidiq pé nga-nhúng lé byi bê nghut ri; haú hkûn, nungmoq gi, haú danggidiq pé dông mai, Garaí é myit sâmlai lé wó bo hkam yù râ eq agè ashop hkyô lé yut yut ô nau é yanmai htoq lo é, mingkan má joq é htên byoq hkyô mai wó lut kô râ nghut lhê.

⁵ Hau é yanmai yhang, nungmoq gyai yhang shikut luí, nungmoq é lumjúng hkyô má ge é hkyô lé jat yù keq; ge é hkyô má sumsé hpaqchyí lé, ⁶ sumsé hpaqchyí má yhumsing gùng yhumsing hkang é hkyô lé, yhumsing gùng yhumsing hkang é hkyô má jân shirang é hkyô lé, jân shi-

rang é hkyô má tarâ hkunggâ é hkyô ⁷ lé, tarâ hkunggâ é hkyô má gumang chyitkang myit lé, gumang chyitkang myit má chyitdap myit lé, jat yù keq.

⁸ Hkâsu mù gâ le, hau pé lé nungmoq wó sing myô jat lo é nghut jáng, hau pé gi, nga-nhúng é Yhumsing Yesuq Hkrisduq lé nungmoq sê é hkyô má, nungmoq lé akôm a dut nhang é htoq agó, ashi a zui le dut ⁹ nhâng râ a nghut. Nghut kôlháng, rayuq yuq gi, hau pé lé a wó é nghut jáng, chyáng é lé za myang é eq myoq-jit é sù nghut luí, laí lò bê yhâng é yubak mara pé mai lhoq sanséng byí é hui bê hkyô lé, tô-myhí pyám bê sù nghut ri.

¹⁰ Haú mù luí, ngá é gumang wui é, nungmoq lé ji yu é hkyô eq hkyin yu é hkyô lé, je riyhang lhoq gingtíng nyi keq. Hkâsu mù gâ le, hau hkyô pé lé nungmoq kut nyi é nghut jáng, hkâ-nhám le nungmoq myit leq- ¹¹ bat kó râ a nghut; hau htoq agó, nga-nhúng é Yhumsing eq hkyi yù Sù nghut é Yesuq Hkrisduq é ahtum abyuq é mingdán má agùn agó lhom pang yu é lé, nungmoq myang hap yù kó râ nghut lhê.

Chyúmdang Mã É Myiqhtoi Dang

¹² Haú mù luí, nungmoq gi, hau pé lé sé kô é htoq agó, nungmoq wó tô é tengmán hkyô má gingtíng nyi kô é nghut kôlháng, ngò, nungmoq lé hkâ-nhám le hau pé lé ru lhoq pún nyi ¹³ râ nghut lhê. Shí gungdu má ngò rú dui nyi nyi gi, nungmoq lé lhoq pún kying byí le ge ri nghú, ngò wó myit

- ¹⁴ ri; haî mù gà le, nga-nhông é Yhum-sîng Yesuq Hkrisduq gi, ngo lé san za sé nhâng bê eq rajung za, hkâ-myháng a myáng má, ngò gi, gungdu shi lé
- ¹⁵ tô pyâm to râ nghut é lé sê lhê. Ngò htoq ló byuq é htâng má, nungmoq, hkâ-nhám le haú pé lé ru wó bûn nyi râ lé myàng nau mù, ngò, wó dut é í shikut nyi râ nghut lhê.
- ¹⁶ Nga-nhông é Yhumsîng Yesuq Hkrisduq é a-tsam eq lé lo é hkyô eq séng luí, nungmoq lé ngamoq taí kyô wú é hkûn, ngamoq gi, kut htoq yu é labyoq mhô-myi lé a châng é za, Yhâng é kô làm hkikhkâm hkyô lé myoq èq myang é saksé pé nghut lhê.
- ¹⁷ Hkâsu mù gà le, haú Kô Làm Hkikhkâm Hkyô é Hpungwup Shingkang mai, “Shí yuq gi, Ngò chyitdap é Ngá zo nghut lhê; Yhang má Ngò nhik dik nyi lhê.”^a ga taí é htê, Yhâng chyáng jé é hkûn, haú Íwa Garai Gasâng chyáng mâ é aróng eq hpungwup shingkang lé Yhang wó hap yù
- ¹⁸ bê nghut ri. Ngamoq yhang, chyoi-yúng bùm má Yhang eq rahá nyi tô é hkûn, htê haú mauhkûng mai htoq lo é lé wó gyô é nghut lhê.
- ¹⁹ Haú mù luí, myiqhtoí pê dang lé je lhoq ging bê hkyô, ngamoq wó é nghut lhê; haú mù, maubó lô luí, nungmoq é myit má bó-myhú htoq lo é hkûn jé shoq, mauchut tuq dut é jowò má duq nyi é myibung lé su, myiqhtoi dang haú lé, nungmoq gyo mù rago châng kut râ dut lhê.
- ²⁰ Banshoq htoq má, Chyúmdang mâ é myiqhtoi dang gi, haú myiqhtoí pé mai ó le ó lichyúm lhoq htoq yu é đông a nghut é lé, nungmoq sê to râ
- ²¹ dut lhê. Hkâsu mù gà le, myiqhtoi dang gi, byù ô nau é đông hkâ-nhám

lé a htoq wú é za, haú Chyoiyúng Woi-nyí èq shuí u huí é bang mai, Garai Gasâng chyáng mâ é dang taí é ru nghut lhê.

Sará Apyoq Pê É Hkyô

- 2** Nghut kôlhang, myiqhtoi pyoq pé gi, Israelaq byù haú bâng é ahkaú má nyi wú bê nghut lhê, haú eq rajung za, nungmoq é ahkaú má le sará apyoq pé nyi râ za nghut lhê. Yhangmoq gi, htên byoq hkyô nghut é byoq gang râ mhoqshit hkyô pé lé, haq lhoq pyo é htoq agó, yhangmoq lé wui yu é, Yhumsîng lé lhang he-ngik pyám kó râ nghut lhê. Haú mù, yhangmoq gi, yhumsing gùng yhumsîng byòdàn tung htên byoq hkyô jé nhâng bekô
- ² râ nghut lhê. Byù myo myo gi, haú bâng é ahoq ahí hkyô má cháng kó râ eq, tengmán hkyô lé taí hpoí pyám
- ³ nhâng kó râ nghut lhê. Sará apyoq haú bang gi, yhangmoq myoqnoq é hkyô má, yhangmoq kut htoq tô é mhô-myi đông nungmoq lé mhaú zo kó râ nghut lhê. Yhangmoq lé mara dam byi hkyô gi, gohkûn mai yhangmoq ahtoq má lhang to gù bê nghut é htoq agó, yhangmoq é htên byoq hkyô gi, yhup myhí tô nyi é a nghut.
- ⁴ Hkâsu mù gà le, Garai Gasang gi, mara kut shut é maumâng pé lé lhang a ha bûn é za, ngaraí ming má hkyô pyám luí, tarâ jéyáng é hui râ hkûn jé shoq, yhangmoq lé tuq tuq chut é dong hkaú má kat tô é nghut lhê.
- ⁵ Yhang gi, tarâ a hkunggâ é byu pé lé dowuí tîng é hkûn, gohkun lhê é mingkan lé a ha bun nghut ri, nghut kôlhang, dingmán é hkyô lé hko kyô é sù Noaq eq gotú nyhit yuq lé hung yu
- ⁶ é nghut ri; Yhang gi, Sodom eq Gomo-

^a 1:17 Mht 17:5; Mrk 9:7; Luk 9:35

raq myuq lé, myi-mhop dut shoq nyhê hkyô pyâm é đông mara dam byi luí, tarâ a hkungga bâng chyáng dut lò râ hkyô é azòng kut tô é nghut ri; ⁷ nghut kôlhang, tarâ a chûng bâng é achâq achyut asak dui hkyo é yanmai myit wui myit hke huí é, haú dingmán sũ Lot lé hkyi htoq yu é nghut ⁸ ri; (hkâsu mù gâ le, dingmán sũ haú gi, nyí hkgámó yhangmoq ahkaú má nyi nyi é nghut luí, tarâ a chûng é muzó hkyô lé, yhang wó myâng wó gyô é yanmai, yhâng é dingmán myit ⁹ má gunjâng é hui sũ nghut ri.) Haú su nghut é nghut jáng, Yhumsing gi, tarâ hkunggâ é byu pé lé, wuîhke hkyô mai hkâsu kut hkyi htoq yû râ eq, a dingmán é bang lé, tarâ jéyáng é buinyì jé shoq, dam byí é hkyô lé xoq kut nyi é u má hkâsu kut zuí zing to râ lé sê ¹⁰ lhê. Haú yubak gungshô é htên byoq sê é yut yut ô nau hkyô châng é eq ahko ahkáng lé wú tiq bâng chyáng, haú hkyô hkyak dut râ nghut lhê.

Byù haú bang gi, ngegáng-htu é eq nghutbûn é bang nghut kôluí, mauhkûng bang lé lumù gansâng râ lé ¹¹ a gyuq kó nghut ri; nghut kôlhang, maumang lagyô pé lháng gi, wum je bo é eq a-tsam je bo é nghut kôle, haú Yhumsing é hí má, haú mauhkûng bang lé mara hun é đông lumù gansâng hkyô a wám kut kó nghut ri. ¹² Nghut kôlhang, haú sará apyoq pé gi, yhumsing a sê gyô é hkyô pé lé rhoí dang taí akô. Yhangmoq gi, haú chyup yu é hui luí, lhoq htên pyâm é hui râ matú za hku lé lo é, nhik a bo é tân jung dusak đông nghut akô; dusak haú pé su, yhangmoq le, htên byoq byuq kó râ nghut lhê. ¹³ Yhangmoq gi, nò shoq kut bekô nghut é yanmai, nò shoq kut é hui zo kó râ nghut lhê. Yhangmoq é ngón

kún nau é myit gi, nyí mó káng lé lháng gungsho yut yut ô nau hkyô lhoq dik râ matú nghut ri. Yhangmoq gi, nungmoq eq rahá zoshuq poí kut kô é hkûn, mhaú é lé yhangmoq é ngón hkyô kut kômù, agè agáu é eq achâq achyut é bang nghut akô.

¹⁴ Yhangmoq é myoqjí pé má gi, su-myi sulàng lú hkyô byíng zan to kômù, mara kut é hkyô lé hkâ-nhám le a hkying kó nghut ri; yhangmoq gi, a gingtíng é bang lé mhoq hpyoq yu akô; yhangmoq gi, myoqnoq é hkyô má kûng é bang nghut kômù, nhíng ¹⁵ pyâm é hui bang nghut akô. Yhangmoq gi, haú dítng é hkyô lé tô pyâm to kômù, Beora é yhangzo nghut é, agè ashop hkyo é ahpau lé chyitdap sũ Balam é hkyô má châng yông wún ¹⁶ bekô nghut ri. Nghut kôlhang, Balam gi, yhang kut shut é hkyo é yanmai, logúng èq tân mhoqshit é hui ri; dang a dat nyo é logúng haú gi, byu é htê đông dang taí lò mù, myiqhtoi hpó a gyíng é hkyô lé hkúm tang pyâm ri.

¹⁷ Byù hau bang gi, wui a bo é wuihtung eq, laidûn èq mut tâng ló é nghansoq eq pûng kômù, yhangmoq é matú gi, tuq tuq chut é mauchut hkaú ¹⁸ lé lajang to bê nghut ri. Hkâsu mù gâ le, yhangmoq gi, asôm gyáng dang lé taí mù, yubak gungshô é yut yut ô nau é hkyô đông mai, haú shut shai é hkyô má asak dui nyi é mai asik za hpang htoq lo é bang lé, mhoq hpyoq ¹⁹ yù akô nghut ri. Yhangmoq gi, haú bang lé luthkyô byi râ gidíq byi kô é nghut kôle, yhangmoq gùng gi, htên byoq hkyô lhoq htoq é gungsho yut yut ô nau hkyo é jùn dut nyi akô; haí mù gâ le, byù rayuq gi, yhumsing lé hai èq up sing le, hai é jùn nghut lhê. ²⁰ Byu pé gi, nga-nhûng é Yhumsing eq hkyi yù Sũ nghut é Yesuq Hkrisduq lé

sê é đông mai, mingkân é agè ashop hkyô mai wó hpan lut htoq bê nghut kôle, yhangmoq lé hau èq tuí yup tô é dum hui luí, ung pyâm é hui kô é nghut jáng, yhangmoq é matú, hí lhê htoq má je wuí byuq kó râ nghut lhê.

- ²¹ Haú dینگmán é hkyô lé yhangmoq sé luí, yhangmoq lé ap byí to bê nghut é chyoiyúng hkunmó lé tô pyâm to mù lhing taú ló byuq kô é htoq má, háu hkyô lé a sê é gi, yhangmoq é ²² matú je gè kó râ nghut lhê. “Hkui gi, yhang hpat tô é lé dum taú zô lhê.” gâ é eq, “Waq gi, chí pyám byí é htàng, yhâng é galhu htum má dum taú lhú lhê.”^a gâ é sanghkyang gi, yhangmoq chyáng dik bê nghut ri.

Haú Yhumsing Jé Lé Râ Buinyì

3 Chyitdap é luzúm wuí ê, shí gi, nungmoq lé ngò í dá nghú râ dàm ká byí kat é laiká nghut lhê. Laiká shí í lhum má, nungmoq é sansêng é i-myt lé lhoq toq râ matú taí pún kat ² é laiká nghut lhê. Haú gi, chyoiyúng myiqhtoí pé mai laí lò bê hkún taí tô é dang pé eq, nga-nhùng é Yhumsing eq hkyi yù Sû mai, nungmoq é lagyô pé đông byí to bê nghut é hkunmó lé, ngò, nungmoq lé bun nhâng nau luí nghut lhê.

- ³ Sâng-hi má, ló htàng é buinyì pé má yhumsing é agè ashop ô nau hkyô má cháng luí taí hpoi bang htoq lô râ nghut é lé, nungmoq sê gyô to ra râ ⁴ nghut lhê. Haú bang gi, “‘Dum jé lé râ’ ga Yhang gidíq byí é gi, hkâmá lhú? Nga-nhùng é íchyí íwâ pé gi, shi byuq ló bekô nghut mù, junghkang jungmó gi, mau htoq xâng hkun mai dut é su roq dut nyi ri.” ga taí kó râ nghut lhê. ⁵ Nghut kôlhang, yhangmoq gi, a-nham

lé, Garai Gasâng é hkunmó mai, mauhkông pé joq é eq, myigùng gi, wuí mai dut htoq nhâng mù, wuí đông hpan tô é hkyô lé, a sé gún kut pyâm ⁶ akô nghut ri. Wuí hau èq sheq, háu hkun lhê é mingkan lé dowuí títg mù, ⁷ lhoq htên pyâm é nghut lhê. Ahkui lhê é mauhkông pé eq myigùng lé gi, tarâ a hkungga bang htên byoq hui râ nghut é, tarâ jéyáng é buinyì jé shoq, myi má nyhé râ matú, hkunmó hau èq Yhang hkong to bê nghut ri.

- ⁸ Nghut kôlhang, chyitdap é luzúm wuí ê, háu Yhumsing é hí má, ra-nyí gi, zanwut rahkyíng đông, zanwut rahkyíng gi, ra-nyí đông nghut é hkyô ⁹ shí lé, hkâtô-myhí kó. Haú Yhumsing gi, Yhâng é danggidíq lé hân a lhoq dik ga byù ra-am myit ngam pyâm é su, nyhâm é Sû a nghut. Yhang gi, ó yuq le htên byoq byuq râ lé a ô nau é yanmai, yuq hkangmó myit lhing râ lé za ô nau mù, nungmoq lé myit hng byí nyi é nghut lhê. ¹⁰ Nghut kôlhang, háu Yhumsing é buinyì gi, hkau sú su a bûn nùng má jé râ nghut lhê. Haú buinyì má, mauhkông pé gi, mying hum htê eq byuq byuq râ nghut lhê, duqbó-gùng pé gi, myí èq lhoq htên pyâm é hui luí, myigùng eq háu má é joq mijoq gi, nyé gyó byuq râ nghut lhê. ^{11:} ¹² Joq mijoq gi, háu hkyô đông lhoq htên pyâm é hui râ nghut é yanmai, nungmoq gi, hkasú é byu pé dut ra râ lhú? Nungmoq gi, háu Garai Gasâng é buinyì lé ho nyi é eq buinyì háu hân za jé râ lé ô nau nyi é hkún, chyoiyúng é eq tarâ hkunggâ é asak duí hkyô đông nyi ra râ nghut lhê. Buinyì háu gi, mauhkông pé lé, myí èq lhoq htên pyám luí, duqbó-gùng pé le, lúm

^a 2:22 Sânghkyang 26:11

nyé luí, nyé yui pyâm é buinyì dut râ
¹³ nghut lhê. Nghut kôlhang, nga-nhúng
 gi, Garaí é danggidiq nghut é, ding-
 mán hkyô é yhûm, mauhkúng asik eq
 myigùng asik lé, myoqbyu nyi é bang
 nghut lhê.

¹⁴ Haú nghut mù luí, chyitdap é lu-
 zúm wuí ê, nungmoq gi, haú hkyô lé
 myoqbyu é bang nghut kô é yanmai,
 Yhang é hí má achag achyut a dut é
 eq mara hûn râ hkyô a bo é za, Yhang
 eq nguingón nyi râ hkyô lé gyai yhang
¹⁵ shikut nyi keq. Nga-nhúng é chyitdap
 gumang Poluq gi, yhang lé, Garaí Ga-
 sang byi tô é hpaqchyí byéng-yá èq,
 nungmoq chyáng ká byi bê eq rajung
 za, nga-nhúng é Yhumsing é myit hîng
 hkyô gi, hkyi yù hkyô nghut é lé ma-
¹⁶ tsîng to keq. Poluq gi, yhang ká é laiká
 pé banshoq má, haú hkyô pé eq séng
 luí rajung za ká shit tô ri. Yhang é

laiká hkaú pé má, ra-am gi, sê gyo wuí
 é hkyô pé bo é yanmai, a mhoq wú
 é bang eq a gingtîng é bang gi, gotú
 Chyúmdang pé lé lichyúm htaí lhik
 pyám kô é su, yhangmoq lichyúm htaí
 lhik pyám kômù, yhumsîng htên byoq
 hkyô kut yu nyi akô nghut ri.

¹⁷ Haú mù luí, chyitdap é luzúm wuí ê,
 nungmoq gi, shí hkyô lé sê to gù nghut
 é yanmai, tarâ a chûng bâng é shut
 shaí hkyo èq nungmoq lé a wó shuí
 nghoq yù râ eq, nungmoq é gaú é jowò
 mai a wó byit gyó byuq sháng gaq,
 yhumsing gùng yhumsîng upzúng nyi
¹⁸ keq. Nga-nhúng é Yhumsîng eq hkyi
 yù Sû nghut é Yesuq Hkrisduq é jeju
 eq hpaqchyí hkyô má, nungmoq kô
 myhang lò kó sháng gaq. Hpungwup
 shingkang gi, Yesuq Hkrisduq chyáng,
 ahkuí le, ahtum abyuq le, ru joq nyi
 sháng gaq ô! Amen.

YOHAN

Hî Dàm Hun Kat é Laiká

(1 John)

Asak Mungdang

1 Ngò gi, haû sâng-hi mai joq nyi mù, ngamoq wó gyô wú bê é, nga-moq é myoq èq myang wú bê é, nga-moq rago za wú wú bê é, ngamoq é loq eq záng wú bê é, asak mung-dang eq sêng é hkyô lé, nungmoq lé ² taí kyô kat lhê. Asak haû gi, htoq shit bê nghut mù, ngamoq gi, haû lé myang wú luí, saksé hkám bê; haû Íwa eq rahá nyi wú é, ngamoq chyáng htoq shit bê nghut ê ahtum abyuq é asak haû lé nungmoq lé taí kyô ³ lhê. Ngamoq eq zùm yap é hkyô lé, nungmoq le wó sháng gaq nghû, nga-moq gi, myang wú bê eq wó gyô wú bê hkyô lé, nungmoq lé taí kyô lhê. Ngamoq gi, haû Íwa eq le, Yhâng zo Yesuq Hkrisduq eq le, zùm yap nyi é ⁴ bang nghut lhê. Ngamoq é gabú hkyô byíng jup sháng gaq nghû, ngamoq gi, nungmoq lé shí hkyô ká byí kat lhê.

Maubó Hkaû Má Sô Nyi Râ Hkyô

⁵ Garai Gasang gi, maubó nghut lhê; Yhâng chyáng mauchut ratsuí lhang a bò nghut ri. Shí hkyô gi, Yhangzô chyáng mai ngamoq wó gyô yù luí, nungmoq lé taí kyô é danglù nghut ⁶ lhê. Nga-nhúng gi, Yhang eq zùm yap nyi lhê nghû taí kôlhang, mauchut hkaû má ru sô nyi bum é nghut jáng, nga-nhúng gi, mhaû é bang dut mù, haû tengmán hkyô dông asak a dui é ⁷ bang nghut ri. Nghut kôlhang, Yhang gi, maubó má nghut nyi é eq rajung za, nga-nhúng le haû maubó má sô nyi é nghut le gi, nga-nhúng rayuq eq ra-

yuq zùm yap nyi bê nghut luí, Yhang zo Yesuq é sui gi, nga-nhúng é mara banshoq lé lhoq sân-yúng pyám byi râ nghut lhê.

- ⁸ Mara a bò nghû nga-nhúng taí é nghut le gi, yhumsing gùng yhumsing mhaû pyám luí, haû tengmán hkyô gi, nga-nhúng chyáng a bò nghut ri. ⁹ Nghut kôlhang, nga-nhúng gi, yhum-sing é mara lé yín yu é nghut jáng, Yhang gi, wó lum é sù eq tengmán é sù nghut é yanmai, nga-nhúng é mara lé hkyut pyám byi luí, a ding a mán é hkyô banshoq mai le, nga-nhúng lé lhoq sân-yúng byi râ nghut lhê. ¹⁰ Nga-nhúng gi, mara a kut shut nghû taí é nghut jáng, nga-nhúng mai Yhang lé mhaû sù nghû chyo pyám é nghut luí, Yhâng é mungdang gi, nga-nhúng má a bò nghut ri.

Hkrisduq Gi, Nga-nhúng Lé Garúm Sù

2 Ngò chyitdap é zo wuí ê, ngò gi, nungmoq mara a kut shut kó sháng gaq nghû, nungmoq lé shí hkyô ká byí kat lhê. Nghut kôlhang, ra-yuq yuq mara kut shut é nghut le gi, nga-nhúng é matú haû Íwâ chyáng bo taí xoq byí é, Yesuq Hkrisduq gâ é Dingmán Sù lé, nga-nhúng wó lhê.

- ² Yhang gi, nga-nhúng é yubak marâ é matú, shíhtaí gunglik hkungga nghut nyi ri. Nga-nhúng é yubak marâ é matú baú za a nghut, mingkan gón mâ é byu pê é yubak marâ é matú le nghut nyi ri. ³ Nga-nhúng gi, Yhang hkyô tô é hkunmó pé lé châng kut é nghut jáng, Yhang lé nga-nhúng rago sé bê nghut

⁴ é hkyô lé, wó sé bê nghut ri. Byù ra-yuq yuq mai, “Ngò gi, Yhang lé rago sê lhê.” ga taí kôlhang, Yhang hkyô tô é hkunmó lé a châng kut é nghut jáng, haú yuq gi, byù mhaú nghut luí, tengmán hkyô gi, yhang má a bò
⁵ nghut ri. Ó yuq nghut kôlhang, Garai Gasâng é mungdang lé châng kut nyi é nghut jáng, Yhang lé chyitdap é myit gi, haú yuq má gè gè byíng jup
⁶ bê nghut ri. Yhang má asak dui nyi lhê ga taí é sù ó yuq nghut kôlhang, Yesuq kut bê eq rajung za, châng kut râ lhê. Haú hkûn sheq, nga-nhúng gi, Yhang má nghut nyi bê hkyô lé, wó sé lhê.

Hkunmó Asik

⁷ Chyitdap é luzúm wuê ê, ngò gi, nungmoq lé hkunmó asik ká byí kat é a nghut é za, haú sâng-hi mai nungmoq wó to bê hkunmó axau sheq ru nghut lhê. Hkunmó axau shí gi, nungmoq wó gyô wú bê mungdang nghut
⁸ nyi ri. Nghut kôlhang, ngò gi, nungmoq lé hkunmó asik ká byí kat lhê; hau é tengmán hkyô lé, Yhang má le, nungmoq má le, byu myàng ri; hkâsu mù gâ le, haú mauchut gi, lai ló byuq luí, haú tengmán é maubó gi, duq nyi gù bê nghut ri.
⁹ Ngò gi, maubó hkaú má nghut nyi lhê ga luí, yhumsing é gumang lé a jú é sù ó yuq nghut kôlhang, haú mauchut hkaú má ru nghut nyi ashí.
¹⁰ Yhumsing é gumang lé chyitdap é sù ó yuq nghut kôlhang, haú maubó má asak dui nyi é nghut mù luí, yhang má myit leqbat nhâng râ hkyô haí le a bò
¹¹ nghut ri. Nghut kôlhang, yhumsing é gumang lé a jú é sù kúm gi, haú mauchut hkaú má nghut nyí luí, haú má sô lhing jón wún ri; haú mauchut gi, yhang lé myoq lhoq chit to byí é yan-

mai, yhang gi, hká shut e ló nyi é hkyô lé a sé nghut ri.

¹² Chyitdap é zo wuê ê, Yhâng mying é yanmai, nungmoq é mara pé hkyut pyám byi hui bekô nghut luí, nungmoq lé ngò kâ kat é nghut lhê.
¹³ Íwâ pé ê, nungmoq gi, haú sâng-hi mai nyi é Sù lé sé bekô nghut é yanmai, nungmoq lé ngò kâ kat é nghut lhê.
 Zorâm wuê ê, nungmoq gi, haú agè ashop sù lé ûng pyám bekô nghut é yanmai, nungmoq lé ngò kâ kat é nghut lhê.
 Chyitdap é zo wuê ê, nungmoq gi, haú Íwâ lé sé bekô nghut é yanmai, nungmoq lé ngò kâ kat é nghut lhê.
¹⁴ Íwâ pé ê, nungmoq gi, haú sâng-hi mai nyi é sù lé sé bekô nghut é yanmai, nungmoq lé ngò kâ kat é nghut lhê.
 Zorâm wuê ê, nungmoq gi, wum-o bo é eq, haú Garai Gasâng é mungdang nungmoq chyáng dui nyi é nghut mù, haú agè ashop sù lé ung pyám bekô nghut é yanmai, nungmoq lé ngò kâ kat é nghut lhê.

Mingkan Lé A Chyitdap Râ Hkyô

¹⁵ Míngkan eq míngkan htoq mâ é haí le lé, hkâchyitdap kó. Byù rayuq yuq, míngkan lé chyitdap é nghut le gi, haú Íwâ lé chyitdap é myit, yhâng
¹⁶ chyáng a bò nghut ri. Hkâsu mù gâ le, míngkan htoq má joq é lhunglhang gi, gungsho ô nau é hkyô, myoqjí yut yut ô nau é hkyô, yhumsing wó é eq kut é hkyô lé gumrong é pé chyat nghut ri. Haú gi, Íwâ chyáng mai htoq lo é a nghut, haú míngkan mai htoq lo é

¹⁷ ru nghut lhê. Mingkan eq mingkan ô naù hkyô pé gi, laí ló byuq râ nghut lhê; nghut kôlhang, haù Garai Gasang ô nau é hkyô lé kut é sù gi, ahtum abyuq dui nyi râ nghut lhê.

Hkrisduq É Gye Pé

¹⁸ Chyitdap é zo wuî ê, shí gi, ló htâng é ahkyíng nghut bê; haù anti-hkrisduq^a gi, lé lo nyi ri gâ é lé, nungmoq wó gyô wú bê eq rajung za, ahkuí lháng, anti-hkrisduq myo myo gi, jé lé bekô nghut ri. Hau é yanmai, nga-nhúng gi, ló htâng é ahkyíng nghut bê hkyô lé wó sé bê
¹⁹ nghut ri. Yhangmoq gi, nga-nhúng é hpúng mai htoq ló byuq bê bang nghut kôle, gè gè ga jang, nga-nhúng eq a sêng é bang nghut akô. Hkâsu mù gâ le, nga-nhúng eq sêng é nghut jáng, yhangmoq gi, nga-nhúng eq nyi to râ nghut lhê, nghut kôlhang, yhangmoq htoq ló byuq bekô nghut é yanmai, yhangmoq rayuq lháng nga-nhúng eq a sêng é hkyô lé tân shit bê nghut ri.
²⁰ Nghut kôlhang, nungmoq gi, haù Chyoiyúng Sù mai xú but byí é hui^b bekô nghut mù luí, nungmoq ban-shoq bang haù tengmán hkyô lé sê akô
²¹ nghut ri. Haù tengmán hkyô lé nungmoq a sé kôluí, nungmoq lé ngò kâ kat é a nghut; haù hkyô lé nungmoq sé gù nghut luí le, haù mhaù é hkyô gi, tengmán hkyô mai lo é a nghut é lé nungmoq sé gù nghut luí le, nungmoq lé ngò kâ kat é nghut lhê. Mhaù é sù gi, ó yuq nghut lhê lhuí? Haù Yesuq gi, Hkrisduq a nghut ga he pyâm é sù nghut ri. Haù Íwa eq Yhangzo lé he-ngik é sù gi, anti-hkrisduq yhang
²³ nghut nyi ri. Haù Yhangzo lé he-ngik sù ó yuq nghut kôle, haù Íwa lé sé sù

a nghut. Haù Yhangzo lé hap yu é sù kúm gi, haù Íwa lé le sé bê sù nghut lhê.

²⁴ Haù sâng-hi mai nungmoq wó gyô wú bê é hkyô pé lé, nungmoq i-myt má ru bo nyi keq. Haù nghut jáng, nungmoq gi, haù Yhangzo eq Íwâ chyáng nyi nyi râ nghut lhê. Haù gi, nga-nhúng lé Yhang byí tô é ahtum abyuq é asak wó yû râ gâ é danggidiq nghut ri.
²⁵ Ngò gi, nungmoq lé hkyô shuí nghoq shikut nyi bâng é hkyô eq séng luí, nungmoq lé shí gú kâ kat é nghut
²⁶ lhê. Nungmoq chyáng kúm gi, Yhâng chyáng mai xú but jeju lé nungmoq wó yù bekô nghut mù luí, mhoqshit râ góyuq a ra lo nghut ri. Nghut kôlhang, haù Yhâng é xú but jeju gi, hkyô hkangmó má nungmoq lé mhoqshit byi mù, haù gi, tengmán nyi é nghut luí, mhaù é hkyô haí le a bo é za, nungmoq lé mhoqshit byí nyi é eq rajung za, Yhâng chyáng nungmoq nyi nyi keq.
²⁷ Chyitdap é zo wuî ê, nga-nhúng gi, Yhang jé lé mù htoq shit é hkún, Yhâng é hí má a gyuq a kyum é, hoq a hpu é, wó dut râ matú Yhâng chyáng ru nyi nyi keq.
²⁸ Yhang gi, dingmán sù nghut é lé, nungmoq sé bê yanmai, dingmán hkyô lé kut é sù ó yuq nghut kôle, Garai Gasang mai hkú kat é sù nghut é hkyô lé, nungmoq sé akô nghut ri.

Garai Gasâng É Yhangzô Pé

3 Nga-nhúng gi, haù Garai Gasâng é yhangzô pé ga wut râ hui bê nghut é yanmai, haù Íwâ é chyitdap myit gi, nga-nhúng ahtoq má hkâ-í yhang ko nyi ri myhi-nhung! Nga-nhúng gi,

^a 2:18 Anti-hkrisduq nghú é lichyúm gi, Hkrisduq lé gye kut é sù lé gâ lhê ^b 2:20 Xú but byí é hui gâ é lichyúm gi, Hkrisduq chyáng mai, Chyoiyúng Woi-nyí lé myang hap yu é lé gâ lhê.

yhangzô pé yhang nghut bu-nhung!
 Mingkan gi, Yhang lé a sê é yanmai,
² nga-nhúng lé le a sé nghut ri. Chyit-
 dap é luzúm wui ê, ahkuî, nga-nhúng
 gi, Garai Gasâng é yhangzô pé nghut
 nyi to kôlhang, nga-nhúng hkâsu dut
 râ hkyô lé, a tûn shit shi nghut ri.
 Nghut kôlhang, Hkrisduq htoq shit é
 hkûn, nga-nhúng gi, Yhang su dut râ
 nghut é hkyô lé, nga-nhúng sê lhê;
 hkâsu mù gâ le, Yhang hkâsu nghut é
 hkyô lé roq yhang, nga-nhúng myàng
³ râ nghut lhê. Myit myoqbyù hkyô shî
 lé, Yhâng chyáng má wó tô é bang ó
 yuq nghut kôle, Yhang sân-yúng é eq
 rajung za, yhumsing gùng lé lhoq san
 lhoq yúng nyi ri.
⁴ Mara kut é sù ó yuq nghut kôle, tarâ
 lu laí é sù nghut ri; gè gè ga jang,
 mara gi, tarâ lu laí é hkyô nghut nyi ri.
⁵ Nghut kôlhang, Yhang gi, nga-nhúng
 é yubak mara lé hkyut pyám byi râ
 matú, pô htoq bê hkyô lé nungmoq
 sé akô; Yhâng chyáng mara a bò
⁶ nghut ri. Yhang má dui nyi é sù ó
 yuq nghut kôle, mara a xoq kut nyî
 nghut ri; mara xoq kut nyî sù ó yuq
 nghut kôle, Yhang lé a myàng, a sé shi
 nghut ri.
⁷ Chyitdap é zo wui ê, nungmoq lé ó
 yuq èq le hkyô a shuí nghoq kó sháng
 gaq; Yhang gi, dingmán é eq rajung
 za, dingmán é hkyô lé kut é sù ó yuq
⁸ nghut kôle, dingmán nyi ri. Mara kut
 nyi é sù gi, nat Tsadán chyáng mâ é
 nghut nyi ri; hkâsu mù gâ le, Tsadán
 haû gi, sân-hi mai yhang mara kut
 nyî bê nghut ri. Haû Garai Gasâng é
 Yhangzo gi, Tsadán é muzó lé lhoq
 hpyoq lhoq hten râ matú pô htoq le é
⁹ nghut lhê. Garai Gasâng chyáng mai
 hku kat é sù ó yuq nghut kôle, Yhâng

é amyui bo to é nghut é yanmai, mara
 a xoq kut lo nghut ri; haû yuq gi, Ga-
 rai Gasang chyáng mai hku kat é hui
 bê nghut é yanmai, mara wó xoq kut
¹⁰ lo râ a nghut. Ó yuq nghut kôle, ding-
 mán é hkyô a kut é eq, yhâng gumang
 lé a chyitdap é sù gi, Garai Gasâng
 yhangzo a nghut. Hau é yanmai, ó pé
 gi, Garai Gasâng é yhangzô pé nghut
 é, ó pé gi, nat Tsadán é yhangzô pé
 nghut é hkyô lé, san za nga-nhúng wó
 sê yu ri.

Rayuq Eq Rayuq
Chyitdap Lhum Râ Hkyô

¹¹ Nga-nhúng rayuq eq rayuq chyitdap
 lhum râ lhê gâ é hkyô haû gi, sân-hi
 mai nungmoq wó gyô yù bê danglù
¹² nghut ri. Haû agè ashop sù eq le sêng
 é, yhanggu lé sat pyâm é Ka-in su a
 ge kut. Yhang gi, haî mù luí yhanggu
 lé sat pyâm lhê lú ga le, yhâng é
 muzó pé gi, agè ashop hkyô, yhanggu
 é muzó pé gi, dingmán é hkyô nghut é
¹³ yanmai nghut ri. ^a Ngá é gumang wui
 ê, nungmoq lé mingkân èq a ngui a jú
¹⁴ kut kôlhang, hkâmaú kó. Nga-nhúng
 gi, nga-nhúng é gumang wui lé chyit-
 dap é yanmai, shi byuq é mai wó lut
 luí asak dui é hkyô lé, wó sê é nghut
 lhê. Chyitdap myit a bò sù gi, shi é
¹⁵ hkyô má lúng tô ashî nghut ri. Yhâng
 é gumang lé a ngui a jú é sù gi, byù
 sat sù dut râ nghut lhê; byù sat sù ó
 yuq chyáng nghut kôle, ahtum abyuq
 é asak a bo é hkyô lé, nungmoq sê nyi
 akô.
¹⁶ Yesuq Hkrisduq gi, nga-nhúng é
 matú Yhâng é asak byî pyám bê
 lé wú jáng, chyitdap myit hkasú é
 nghut é hkyô lé, nga-nhúng wó sê ri.
 Nga-nhúng le, gumang wui é matú,

^a 3:12 Apûn 4:1-6

nga-nhúng é asak lé byî pyám gíng ri.
¹⁷ Ó yuq nghut kôlháng, mingkan sutzè wó to luí, yhâng gumang hpó asho awui dut nyi é lé myàng kôlháng, a shogyô yu é nghut jáng, haú Garai Gasâng é chyitdap myit gi, yhâng chyáng
¹⁸ hkâsu wó bê râ lúhú? Chyitdap é zo wuí ê, nga-nhúng gi, dang nhut shô mai za a nghut, muzó eq tengmán
¹⁹ é dông le chyitdap nyi sháng. Haú hkûn, nga-nhúng gi, tengmán hkyô eq séng bê bang nghut é lé wó sê é eq, nga-nhúng é i-myt mai nga-nhúng lé mara hun lò hkanmó, Garai Gasâng é hí má nga-nhúng i-myt wó ngón nyi
²⁰ bê nghut ri. Hkâsu mù gà le, Garai Gasang gi, nga-nhúng myit é htoq má je kô é sũ nghut mù, jung hkanmó lé sê nyi ri.
²¹ Chyitdap é luzúm wuí ê, nga-nhúng é i-myt mai nga-nhúng lé mara a hun é nghut le gi, Garai Gasâng hí má nga-nhúng gyuq kyûm râ hkyô a joq
²² lo nghut ri. Nga-nhúng gi, Yhang hkyô tô é hkunmó pé lé châng kut é eq Yhang lé gabú nhang é hkyô haí lé le kut é yanmai, nga-nhúng dũng é hkyô lhunglhang lé, Yhâng chyáng mai wó
²³ yû râ nghut lhê. Yhang hkunmó hkyô tô é eq rajung za, Yhâng zo Yesuq Hkrisduq é myìng má lumjìng é eq, rayuq eq rayuq chyitdap lhùm é hkyô gi, Yhang hkyô tô é hkunmó yhang
²⁴ nghut bê. Yhang hkyô tô é hkunmó pé lé, châng kut é bang gi, Yhang má dui nyi bê nghut mù, Yhang le haú bang chyáng dui nyi bê nghut ri. Yhang nga-nhúng chyáng dui nyi bê hkyô lé, nga-nhúng lé Yhang byî tô é Woi-nyí dông nga-nhúng wó sê yu é nghut lhê.

Woi-nyí Pé Lé Gôn Wú Râ Hkyô

4 Chyitdap é luzúm wuí ê, woi-nyí hkanmó lé hkâlumjìng ko, woi-

nyí haú pé gi, Garai Gasâng chyáng mâ é nghut é, a nghut e lé gôn wú keq; hkâsu mù gà le, myiqhtoi pyoq pé myo myo gi, mingkan htoq má jón
² wún bekô nghut ri. Garai Gasâng é Woi-nyí lé nungmoq wó sê yù râ hkyô gi, shí dông nghut lhê: haú Yesuq Hkrisduq gi, gungsho dông jé lé bê ga, yín yu é woi-nyí hkanmó gi, Garai
³ Gasâng chyáng mâ é nghut lhê. Nghut kôlháng, Yesuq Hkrisduq lé a yín yu é woi-nyí hkanmó gi, Garai Gasâng chyáng mâ é a nghut. Woi-nyí haú gi, lé lo nyi ri ga nungmoq wó gyô wú bê; ahkuí lhang mingkan htoq má nyi to gù nghut é anti-hkrisduq é woi-nyí nghut ri.
⁴ Chyitdap é zo wuí ê, nungmoq gi, Garai Gasâng chyáng mâ é nghut mù luí, yhangmoq lé ung pyám bekô nghut ri. Hkâsu mù gà le, nungmoq má lúng to Sũ gi, mingkan má nyi to
⁵ su htoq je kô ri. Yhangmoq gi, mingkan eq séng é bang nghut lhê mù luí, mingkan hkyam dông taí bum akô; mingkan zo wuí le yhangmoq é dang
⁶ lé gyo byî akô nghut ri. Nga-nhúng gi, Garai Gasang eq séng é bang nghut lhê; Garai Gasang lé sê é sũ ó yuq nghut kôle, nga-nhúng é dang lé gyô ri; nghut kôlháng, Garai Gasang eq a séng é sũ gi, ngamoq é dang lé a gyo nghut ri. Shí hkyô lé wú jáng, tengmán hkyô é Woi-nyí eq hkyô shuí nghoq é woi-nyí lé, nga-nhúng sê gam hkoq yû bê nghut ri.

Garai Gasang Gi, Chyitdap Myit

⁷ Chyitdap é luzúm wuí ê, nga-nhúng gi, rayuq eq rayuq chyitdap lhùm nyi sháng; hkâsu mù gà le, chyitdap myit gi, Garai Gasâng chyáng mâ é nghut ri. Chyitdap myit bò sũ ó yuq nghut kôle, Garai Gasâng chyáng mai

- hku kat é hui bê sù nghut luí, Garai Gasang lé sé sù nghut ri. Chyitdap myit a bo é sù ó yuq nghut kôle, Garai Gasang lé a sé sù nghut ri; hkâsu mù gâ le, Garai Gasang gi, chyitdap myit nghut lhê. Garai Gasang gi, Yhang Zô é yanmai nga-nhúng asak wó duí sháng gaq ga, Yhang Zo zote lé mingkan htoq má nhang kat byi bê nghut ri. Haú gi, Garai Gasang mai nga-nhúng lé, Yhâng é chyitdap myit tân shit é hkyô nghut ri.
- ¹⁰ Nga-nhúng gi, Garai Gasang lé chyitdap é a nghut, Garai Gasang sheq nga-nhúng lé chyitdap luí, nga-nhúng é yubak marâ é matú, shíhtaí gunglik hkungga dut sháng gaq ga, Yhang Zo lé nhang kat byí é nghut ri; haú gi, chyitdap myit yhang nghut bê. Chyitdap é luzúm wuí ê, Garai Gasang gi, nga-nhúng lé haú-í yhang chyitdap é nghut jáng, nga-nhúng le rayuq eq rayuq chyitdap lhum râ dut lhê. Garai Gasang lé ó yuq èq le, hkâ-nhám lháng myang wú é a nghut; nghut kôlhang, nga-nhúng rayuq eq rayuq chyitdap lhúm nyi é nghut jáng, Garai Gasang gi, nga-nhúng má nyi nyi bê nghut luí, Yhâng é chyitdap myit gi, nga-nhúng má gumjup râ nghut lhê.
- ¹³ Garai Gasang gi, nga-nhúng lé, Yhâng é Woi-nyí byí to bê nghut é yanmai, Yhâng chyáng nga-nhúng dui nyi bê hkyô lé le, Yhang, nga-nhúng má nyi nyi bê hkyô lé le, nga-nhúng sé bê nghut ri. Haú Íwa gi, Yhang Zo lé mingkân é hkyi yù Sù dut sháng gaq ga nhang kat é hkyô lé, nga-moq myàng luí, saksé hkâm lhê. Ó yuq nghut kôlhang, Yesuq gi, Garai Gasâng é Yhangzo nghut ri ga yín yu é nghut le gi, yhang má Garai Gasang nyi nyi bê nghut luí, yhang le Garai Gasâng chyáng dui nyi bê
- ¹⁶ nghut ri. Nga-nhúng gi, Garai Gasâng èq nga-nhúng lé chyitdap é hkyô lé, sé luí lumjúng nyi lhê; Garai Gasang gi, chyitdap myit nghut lhê; chyitdap myit má nyi nyi é sù ó yuq nghut kôle, Garai Gasâng chyáng dui nyi bê nghut luí, Garai Gasang le haú yuq má nyi nyi bê nghut ri. Haú dông mai, chyitdap myit gi, nga-nhúng chyáng gumjup bê nghut luí, nga-nhúng gi, tarâ jéyáng é buinyi má a gyuq a kyum é myit wó yú râ nghut lhê; hkâsu mù gâ le, nga-nhúng gi, mingkan shí má
- ¹⁷ Yhang su dut nyi bê nghut ri. Chyitdap myit má gyuq é hkyô a bò nghut ri; gyuq é hkyô gi, mara dam byí é hkyô eq sêng é nghut mù luí, gumjup é chyitdap myit gi, gyuq é hkyô lé hkat htoq pyâm ri. Haú gyuq é myit bò sù gi, chyitdap myit má gumjup sù a nghut.
- ¹⁹ Yhang hí nga-nhúng lé chyitdap bê nghut é yanmai, nga-nhúng le chyitdap nyi lhê. Byù rayuq yuq gi, “Ngò, Garai Gasang lé chyitdap lhê.” ga tái kôlhang, yhâng é gumang lé a jú é nghut jáng, haú yuq gi, byù mhaú rayuq nghut ri; hkâsu mù gâ le, yhum-sing byu-myang é gumang lé lháng a chyitdap é sù gi, a byu-myang é Garai Gasang lé wó chyitdap râ a nghut.
- ²⁰ Garai Gasang lé chyitdap é sù ó yuq le, yhum-sing gumang lé le chyitdap râ lhê gâ é dang haú gi, nga-nhúng é matú, Yhang mai hkyô tô é hkunmó nghut lhê.

**Garai Gasâng É Yhangzo
Lé Lumjúng Hkyô**

5 Yesuq gi, haú Hkrisduq nghut ri ga lumjúng é sù ó yuq nghut kôle, Garai Gasâng chyáng mai hku kat bê sù nghut ri; íwa lé chyitdap é sù ó yuq nghut kôle, yhang zo lé le chyit-

- ² dap é nghut bê. Garai Gasang lé chyt-dap nyi mù, Yhang hkyô tô é hkunmó pé lé châng kut nyi é nghut le gi, Garai Gasâng é yhangzô pé lé le, chyt-dap nyi é hkyô lé, nga-nhúng wó sê
- ³ yu é yanmai, Garai Gasang hkyô tô é hkunmó pé lé châng kut é gi, Yhang lé chyt-dap é hkyô nghut ri. Yhang hkyô tô é hkunmó pé gi, wòlai mó
- ⁴ a nghut. Hkâsu mù gâ le, Garai Gasâng chyáng mai hku kat bê sù ó yuq nghut kôle, mingkan lé ung pyám bê nghut ri. Nga-nhúng é lumjín myit gi, mingkan lé nga-nhúng ung pyâm é
- ⁵ ongdang hkyô nghut ri. Yesuq gi, Garai Gasâng é Yhangzo nghut é lé lumjín é sù mai lai luí, mingkan lé wó ung pyâm é sù gi, ó yuq wá nghut lhê lú?
- ⁶ Háu yuq gi, wuì eq sui^a mai lé é sù, Yesuq Hkrisduq yhang nghut nyi ri. Yhang gi, wuì mai za lé é a nghut, wuì mai le, sui mai le, lé é sù nghut lhê. Woi-nyí gi, tengmán hkyô nghut é yanmai, shí hkyô lé saksé hkám byi ri.
- ⁷ Hkâsu mù gâ le, Woi-nyí le, wuì le, sui le, haù sùm lhúm é saksé hkâm
- ⁸ akô nghut ri; haù sùm lhum gi, ra-
- ⁹ jung za nghut akô. Nga-nhúng gi, byu é saksé lé lhom yu lhê; nghut kôlhang, Garai Gasâng é saksé gi, haù htoq je kô nyi ri. Hkâsu mù gâ le, Garai Gasang gi, Yhang Zo eq sêng é hkyô lé saksé byi é yanmai nghut ri.
- ¹⁰ Garai Gasâng é Yhangzo lé lumjín é sù gi, saksé haù lé yhang é i-myt má wó bê nghut ri; Garai Gasang lé a lumjín é sù kúm gi, Yhang lé byù mhaù rayuq ga chyo pyám bê nghut ri; hkâsu mù gâ le, Garai Gasang mai Yhang Zo eq sêng é hkyô saksé hkâm é lé, yhang a lumjín é
- ¹¹ yanmai nghut ri. Nga-nhúng lé, Garai Gasang byi é ahtum abyuq é asak gi, saksé haù nghut nyi ri. Asak haù gi,
- ¹² Yhang Zô chyáng bo ri. Garai Gasâng é Yhangzo lé wó sù gi, asak haù lé wó bê; Yhang Zo lé a wó sù gi, asak haù lé le a wó nghut ri.

Ahtum Abyuq Asak

- ¹³ Garai Gasang é Yhangzô é mying lé lumjín é bang nungmoq gi, ahtum abyuq é asak wó bê hkyô lé, nungmoq sé kó sháng gaq nghû, shí hkyô pé lé
- ¹⁴ ngò ká byi kat é nghut lhê. Nga-nhúng haù dúng le le, Garai Gasang ô nau é dông nghut jáng gi, Yhang gyo byi rã nghut lhê; haù gi, Yhâng é hí má nga-nhúng a gyuq a kyum wó wâng
- ¹⁵ rã matú nghut ri. Haù mù, nga-nhúng haù dung kôlhang, Yhang gyo byi é lé nga-nhúng sê é nghut le gi, Yhâng chyáng nga-nhúng dúng é hkyô lé, nga-nhúng wó yu é lé, nga-nhúng sê lhê.
- ¹⁶ Ó yuq nghut kôle, yhumsing é gumang hpó mai shí a gíng é mara kut shut é lé, myang é nghut le gi, haù yuq é matú kyûdung byi rã lhê. Háu hkûn, Garai Gasang gi, haù yuq lé asak byi rã nghut lhê. Haù gi, shí a gíng é mara wó bâng é matú taí é nghut lhê. Shí gíng é mara le joq lhê; nghut kôlhang, hau é matú dung rã lhê nghû, ngò
- ¹⁷ taí nyi é a nghut. A dingmán é hkyô lunglhang gi, mara nghut lhê; nghut kôlhang, shí a gíng é mara le joq lhê.
- ¹⁸ Garai Gasâng chyáng mai hku kat bê sù ó yuq nghut kôle, mara a xoq kut lô é hkyô lé nga-nhúng sê lhê; hkâsu mù gâ le, haù Garai Gasâng é Yhangzo gi, haù yuq lé wú zúng nyi é nghut mù luí, haù agè ashop

^a 5:6 *Wuì eq sui* nghu é gi, Yesuq baptisma hkam yu é hkyô eq shí hkâm é hkyô lé taí nau é nghut ri.

5:19

1 Yohan

465

sû gi, haû yuq lé wó záng htung râ a
¹⁹ nghut. Nga-nhúng gi, Garai Gasâng é
 yhangzô pé nghut é lé le, mingkan gón
 lé haû agè ashop su èq up tô é hkyô lé
²⁰ le, sê lhê. Hau htoq agó, Garai Gasâng
 é Yhangzo jé lé luí, haû tengmán Sû lé
 sé sháng gaq ga, nga-nhúng lé sê gyô
 é nyan byi bê hkyô lé le, nga-nhúng

sê lhê. Nga-nhúng gi, Yhang Zo Yesuq
 Hkrisduq má nghut nyî bê eq rajung
 za, haû tengmán Sû má le nyi nyî bê
 nghut lhê. Yhang gi, haû tengmán é
 Garai Gasang eq ahtum abyuq é asak
 nghut nyi lhê.

²¹ Chyitdap é zo wuî ê, hparà lhó pé lé
 koi pyâm nyi keq.

YOHAN

Htang Dàm Hun Kat é Laiká

(2 John)

- ¹ Ngò suwún hpó gi, tengmán hkyô má ngò chyttdap é, hkyin yù huí é nàng hpô-myhí eq nung zô pé lé, dang kyô kat lhê; ngò baú za a nghut, haù nga-nhông chyáng lúng to luí,
- ² nga-nhúng eq ahtum abyuq ru joq nyí rã nghut é tengmán hkyô é yan-mai, haù tengmán hkyô lé sê é lhung-lhâng bang le, nungmoq lé chyttdap nyi lhê.
- ³ Haù Íwa Garai Gasang eq Íwã é Yhangzo Yesuq Hkrisduq chyáng mã é jeju, shogyo nhikmyin hkyô eq nguingón hkyô gi, haù tengmán hkyô eq chyttdap hkyô má, nga-nhúng eq rahá joq nyí sháng gaq.
- ⁴ Haù Íwa mai nga-nhúng lé hkunmó hkyô tô é eq rajung za, nung zô pé ram gi, haù tengmán hkyô mã châng nyi é hkyô lé, ngò wó sê é yanmai,
- ⁵ gyai yhang gabú nyi lhê. Chyttdap é hpô-myhí ê, nga-nhúng rayuq eq rayuq chyttdap lhum sháng nghû, ahkuí, ngò, nang lé dúng kat lhê; shí gi, sâng-hi mai nga-nhúng wó gyô yù bê hkunmó lé sheq, nang lé ngò ká byí kat é nghut lhê; hkunmó
- ⁶ sik ralhú a nghut. Yhang hkyô tô é hkunmó eq rajung za, nga-nhông cháng kut é nghut jáng gi, chyttdap é hkyô nghut bê. Sâng-hi mai nungmoq wó gyô yù bê eq rajung za, Yhang hkyô tô é hkunmó gi, nungmoq chyttdap myit bo nyí rã matú nghut lhê.
- ⁷ Hkâsu mù gâ le, Yesuq Hkrisduq gi, gungsho dông jé lé é hkyô lé a yín yu é, mhaú zô é byù myo myo gi, mingkan htoq má jón wún bekô nghut ri; haù sù é byù gi, haù mhaú zo sù eq
- ⁸ anti-hkrisduq dut rã nghut lhê. Nungmoq zui saí bê muzó é akyû lé a lhoq hpyuq é za, gumjup é shigyaú chyunghuq lé, nungmoq wó hkam yù kó sháng gaq, yhumsing gùng sidiq
- ⁹ nyí keq. Hkrisduq mhoqshit é dang lé a châng é za, laí chyan é sù ó yuq nghut kôle, Garai Gasang lé a wó é sù nghut ri; haù mhoqshit é dang lé ru châng nyi é sù kúm gi, haù Íwa lé le, Yhangzo lé le, wó bê sù nghut ri.
- ¹⁰ Mhoqshit é dang haù lé a wun é byù rayuq yuq, nungmoq chyáng jé lé é nghut le gi, haù yuq lé nungmoq é yhúmhaú má hkâwâng nhâng kó;
- ¹¹ yhang lé hkâlhom xoq yù kó. Hkâsu mù gâ le, haù yuq lé lhom xoq yu é sù gi, yhâng é agè ashop é muzó má lòm bê sù nghut ri.
- ¹² Ngò gi, nungmoq lé ká byí kat rã hkyô myo myo joq kôlhang, laiká hkyap eq kajung-chi lé a kâm chông naù. Nga-nhông é gabú hkyô wó gumjup sháng gaq, ngò, nungmoq chyáng tsuq za lé jé mù, nungmoq eq myoqdong hkyûm kut nyo lhum rã lé myit myoqbyu nyi lhê.
- ¹³ Hkyin yù huí é náng nhâ é yhangzô pé gi, nang lé shi-kyâm kat akô nghut ri.

YOHAN

Súm Dam Dàm Hun Kat é Laiká

(3 John)

- ¹ Ngò suwún hpó gi, haù tengmán hkyô má ngò chyitdap é, ngá é chyitdap luzúm Ge-u lé dang kyô kat lhê.
- ² Chyitdap é luzúm hpó ê, ngò gi, haù náng é asak woi-nyí nyì-ngón yuqyo nyi é eq rajung za, nàng nguingón wángzán râ eq hkyô hkat hkangmó má, nyì-ngón yuqyo nyi sháng gaq
- ³ nghû, kyûdung byí kat lhê. Hkâsu mù gâ le, ngò gi, gumang wui ra-am, ngá chyáng lé jé mù, haù tengmán hkyô má nàng lhumzui é hkyô lé le, haù tengmán hkyô má nàng hkâsu kut xoq châng nyi é hkyô lé le, lé taí kyo kô é hkûn, gyai yhang gabú é yanmai
- ⁴ nghut lhê. Haù tengmán hkyô má, ngá zô pé châng nyi é hkyô lé, ngò wó gyô é hkûn gabú é í, gotû gabú hkyô a wó lo nghut ri.
- ⁵ Chyitdap é luzúm hpó ê, haù gumang wui gi, mau we bíng pé nghut to kôlhang, nàng yhangmoq lé lhom garúm yu é hkyô má, nàng gi, lhumzuí nyi ri. Yhangmoq gi, haù noqkuq hpúng mâ é bang lé, náng é chyitdap myit eq séng luí taí kyo bekô nghut ri. Nàng gi, Garai Gasâng hí má gingdán é dông, yhangmoq é hkyowui matú garúm luí, dé kat é nghut jáng, ge é
- ⁷ muzó jizó kut é nghut bê. Hkâsu mù gâ le, yhangmoq gi, Hkrisduq é myìng hau é matú htoq ló kôluí, a lumjìng bâng chyáng mai haí lháng a hap yù
- ⁸ kó nghut ri. Haù mù luí, nga-nhúng gi, haù tengmán hkyô é matú rahá za wó chôm zui saí sháng gaq, haù sù é byu pé lé lhom hkûlum yù râ lhê.
- ⁹ Ngò gi, haù noqkuq hpúng lé laiká ká byí kat bê nghut lhê; nghut kôlhang, haù ushuq kut nau é sù Diotrehpi gi, ngamoq lé a lhom hap yù
- ¹⁰ nghut ri. Haù mù luí, ngò lé jé jáng gi, ngamoq lé a jo a âng é dang taí é eq lumù gansang é, yhang kut é muzó lé, taí hpyí kyo râ nghut lhê; yhang gi, haù hkyô lé myit a dik shí é nghut mù luí, yhang yhang le gumang wui lé a lhom hkûlum yù, lhom hkûlum yù naù bang lé le, yhang mai hkûm zing pyám luí, yhangmoq lé haù noqkuq hpúng mai hkat htoq pyám ri.
- ¹¹ Chyitdap é luzúm hpó ê, agè ashop hkyô lé alik a yu é za, ge é hkyô lé yù aq; ge é hkyô kut é sù gi, Garai Gasâng chyáng mâ é nghut bê; agè ashop é hkyô kut é sù gi, Garai Gasang lé
- ¹² a myàng shí é sù nghut ri. Demetri ge é hkyô lé, yuq hkangmó mai le, haù tengmán hkyô èq le, saksé hkám byí akô nghut ri; ngamoq le, yhang ge é hkyô lé saksé hkám byí lhê; haù ngamoq hkâm é saksé gi, têng é hkyô nghut é lé, nàng sê lhê.
- ¹³ Ngò gi, nang lé kê kat ra hkyô myo myo joq kôlhang, kâjung eq
- ¹⁴ kâjung-chi dông a kê kat naù lo. Ngò gi, a myáng má, nàng eq myang huí lhum râ lé myit myoqbyu tô lhê. Haù hkûn sheq, ngá-nhik myoqdong hkyûm myang nyo lhum râ nghut lhê.
- ¹⁵ Nàng nguingón yuqyo nyi sháng gaq; shí mâ é luzúm wui gi, nang lé shi-kyâm kat akô nghut ri. Nàng le, haù mâ é luzúm wui lé, myìng du htâu luí bo shi-kyám byi laq.

YUDE

Hun Kat é Laiká

(Jude)

- ¹ Yesuq Hkrisduq é dui-nhâng zo-shâng nghut sù eq Yakuq é yhanggu, ngò Yude gi, haù Íwa Garai Gasâng èq ji yù mù, chyitdap é hui luí, Yesuq Hkrisduq èq upzúng é hui bâng chyáng dang kyô kat lhê.
- ² Shogyo nhikmyin hkyô, nuingón hkyô eq chyitdap hkyô gi, nungmoq chyáng agùn agó joq nyì sháng gaq ô!

Garai A Wó Bâng É Yubak Mara

- ³ Chyitdap é luzúm wuí ê, ngò gi, nga-nhúng chôm wó é hkyi yù hkyô haù eq séng luí, nungmoq lé gyai yhang kê kat byí nau é nghut lhê wá, haù sân-yúng bang lé, radá dâm jâng ap byí to bê nghut é lumjínng hkyo é matú nungmoq htuq htíng rã dut é lé, myit wum byi rã hkyô ká rã dut é lé,
- ⁴ ngò byu-myang ri. Hkãsu mù gã le, haù mara dam byí é hui zo rã hkyô lé, a-nham pyat mai kê matsíng tô é hui bê bang ra-am gi, nungmoq chyáng hkaù wang lò bekô nghut ri. Yhangmoq gi, Garai a wó é bang nghut luí, haù nga-nhúng é Garai Gasâng jeju lé, mingkan ngón hkyo èq htaí lhik pyám kô é htoq agó, Yhang za nga-nhúng é Yhumsíng nghut sù eq Ahko ahkáng lhunglhang wó sù, Yesuq Hkrisduq lé he-ngik pyám akô nghut ri.
- ⁵ Nungmoq kúm gi, shí pé banshoq lé sê to gù nghut kôlhang, ngò mai nungmoq lé taí pún nau é hkyô gi, a-ô mã é pé nghut lhê: Haù gi, Yhumsíng Garai mai, Yhâng é byu pé lé, Egututq ming mai hkyi htoq yù kôlhang, a lumjínng

- é bang lé gi, htâng mã dum lhoq htên
- ⁶ pyám é nghut lhê. Hau htoq agó, haù yhumsing é ayá lé tô pyám luí, yhumsing é nyì jowò lé pyám tô é maumâng pé lé, Yhang gi, haù tarã jéyáng é hui rã Buinyì mó jé shoq, ahtum abyuq é toqjâng tuí èq tui luí, mauchut hkaù
- ⁷ mã lhúng tô é nghut lhê. Haù eq rajung za, Sodom eq Gomoraq myuq eq hau é awui ayám mã é wà pé mã é bang gi, ashop é dông gungsho zùm yap é hkyô shut é eq myiwe yhangchang yuqgè yhangchang nyì zô lhúm é hkyô kut kô é nghut mù, yhangmoq gi, ahtum abyuq é myi mã dam byí é hpuzo bâng é alik dut bekô nghut ri.
- ⁸ Haù eq rajung za yhang, yhupmoq moq é byù shí bang gi, yhumsing é gungsho lé agot a-ù kut kômù, ahkáng ayá wó sù lé he-ngik pyám kôluí, mauhkung bang lé lumù gansang akô
- ⁹ nghut ri. Nghut kôlhang, haù mau-mang lagyo agyì Mihkaelaq lhang gi, Mosheq é gùng eq séng luí, haù nat zau eq dang rhâng lhúm é hkún, yhang lé rhoi é dông mara hún dang a wám taí é za, “Nang lé, haù Yhumsíng
- ¹⁰ nhik-yo sháng gaq!” ga za taí ri. Nghut kôlhang, byù haù bang gi, yhangmoq a sê gyô é hkyô pé lé rhoi dang taí pyám akô nghut ri; yhangmoq gi, haù myit woi-nyí a bo é dusak pé su, yhumsing myit mai sê gyô é hkyô pé mã lhang, yhumsing gùng lé lhoq htên yu akô nghut ri.
- ¹¹ Yhangmoq gi, dingnyé wó rã! Hkãsu mù gã le, yhangmoq gi, Ka-in^a

^a 1:11 Ka-in gi, yhanggu lé sat sù nghut lhê. Apùn 4:1-8

kut é agè ashop é hkyô dông cháng kô é yanmai le, akyû wó râ matú, Balam^a shut é dông bo shut kô é yanmai le, Kora^b é gumlau toq hkyô kut kômù, yhang su htên byoq byuq é hui kô é yanmai le nghut ri.

- ¹² Yhangmoq gi, nungmoq é chytđap zoshuq poí má nungmoq lé agot a-û wó dut nhang é bang nghut mù, gyuq hoq a bo é za, nungmoq eq rahá chôm zoshuq kô é hkún, yhumsing gùng lé za yhumsing lhoq gyí yu é sau zúng bang nghut akô; yhangmoq gi, lai èq mut tâng wún é, mau a bo é mhut pé su nghut é htoq agó, ashi a zui mù, amyit eq roq hpún pyám luí, í dâm shi é, xung nám lhê é siggâm pé su
- ¹³ nghut akô. Yhangmoq gi, yhumsing é hoq jung lé, tsû-myup su htoq nhang é, haû wuimau mâ é kô é wuillhêng pé eq, tuq tuq chut é mauchut hkaû má tarâ jéyáng hui râ matú, ahtum abyuq tô to huí é, yông wún é kyí pé su nghut akô.
- ¹⁴ Byù haû bang eq séng luí, Adam mai byùxik nyhit xik má nyí é Eruk, myiqhtoi htoi tô é gi, “Wú keq, haû Yhumsing gi, Yhâng é chyoiyúng bang mun mun sen sen eq rahá gyó lé lo
- ¹⁵ nyí bê nghut ri. Yhang gyó lé lo é gi, yuq hkangmó lé tarâ jéyáng râ matú eq, haû tarâ a hkunggâ é lhunglhâng bang, tarâ a hkunggâ é dông kut é muzó pé banshoq lé le, tarâ a hkunggâ é yubak byu pé, Yhang lé taí shut é dang htân pé banshoq lé le, mara byi
- ¹⁶ râ matú nghut lhê.” gâ ri. Byù haû bang gi, put dang taí é bang eq mara hún dang taí é bang nghut akô; yhangmoq gi, yhumsing ô nau é agè ashop

hkyô cháng kô é htoq agó, yhumsing gùng yhumsing nghutbún é dang taí é eq yhumsing maiwáng zat é dông, gô-bang lé owaq é bang nghut akô.

Hkam Jân Râ Hkyô

- ¹⁷ Nghut kôlhâng, ngò chytđap é luzúm wuí ê, nungmoq gi, haû nganhung é Yhumsing Yesuq Hkrisduq é lagyô pé mai te taí tô é dang lé, bûn
- ¹⁸ nyí keq. Hkâsu mù gâ le, yhangmoq gi, “Haû ló htâng é ahkyíng pé má, tarâ a hkunggâ é yhumsing ô nau é hkyô dông châng é, rhoijap-dap dang taí é byu pé nyí to râ nghut lhê.” ga,
- ¹⁹ nungmoq lé taí wú kô é nghut lhê. Byù haû bang gi, nungmoq lé gam hkoq é bang, mingkan hkyô lé baú za châng é bang, haû Woi-nyí a bo é bang nghut akô.
- ²⁰ Nghut kôlhâng, ngò chytđap é luzúm wuí ê, nungmoq gi, haû Chyoiyúng Woi-nyí má kyûdûng é dông, nungmoq é chyoiyúng é lumjúng hkyô má, yhumsing gùng yhumsing lhoq kô
- ²¹ yu nyí keq. Ahtum abyuq é asak lé wó yû râ matú, haû nga-nhung é Yhumsing Yesuq Hkrisduq é shogyo nhikmyin hkyô lé lánq uchyang, nungmoq gi, Garai Gasâng é chytđap myit má, yhumsing gùng yhumsing nyí nyí keq.
- ²² Lumjúng hkyô má úng-âng é bang
- ²³ lé, shogyo nhikmyin nyí keq; gôbang lé gi, myi mai she htoq yû mù, hkyi yû keq; dum, gôbang lé gi, sidiq myit èq shogyo nhikmyin hkyô tân shit mù, haû gungshô é achâq achyut đap é yhangmoq é mebu lé chaq nyí keq.

^a 1:11 Balam gi, myiqhtoi nghut lhê, nghut kôlhâng, ngunzè lé myoqnoq mù, Garai lé shut sú nghut lhê. Gyung So 22:1-35 ^b 1:11 Kora gi, Garaí byù nghut é hkyô-u shê sú Mosheq lé gumlau toq é hkyangjong nghut lhê. Gyung So 16:1-33

Hkya-on Kungtôn Dang

²⁴⁻
²⁵ Nungmoq lé, a lingbat shoq wó up-
zúng luí, nungmoq lé, mara hún râ
hkyô a bo é za, gabú dik é dông mai
Yhang é hpungwup shingkang bo é
myoq hí má wó shuí shit é, nga-nhông
é hkyi yù Sû, rayuq za nghut é Ga-

rai Gasâng chyáng, hpungwup shing-
kang, hkikhkam hkyô, hpungwup
a-tsam eq ahkáng ayá gi, nga-nhông é
Yhumsîng Yesuq Hkrisduq dông mai,
laí lò bê ipyat pé má le, ahkuí pyat má
le, pyat dedu ahtum abyuq má le, ru-
joq nyí sháng gaq ô! Amen.

YOHAN É SHING-RÁN

Laiká

(Revelation)

Dang-hi Hpóng

1 Yesuq Hkrisduq é shing-rán shí gi, adê myáng má dut lò rã hkyô pé lé, Yhâng é dui-nhâng zoshâng wui lé tân shit nhâng rã matú, Garai Gasâng èq Yesuq Hkrisduq Yhang lé byí tô é nghut lhê. Yhang gi, Yhâng é maumang lagyo lé nhang kat luí, Yhâng é dui-nhâng zoshâng Yohan lé, ² shing-rán haû sé nhang ri. Yohan gi, Garai Gasâng é mungdang eq Yesuq Hkrisduq é saksé lé, yhang myang é gû banshoq eq rajung za saksé ³ hkâm kyô é nghut ri. Haû ahkyíng gi, chyâng lò bê nghut é yanmai, myiq-htoi dang shí pé lé, nghap kyô é sù eq, gyô yù luí, haû má kã tô é gû lé châng kut é bang gi, hkungsô wó nyi akô.

Noqkuq Hpúng Nyhit Lhum Lé Dang Kyô Kat É Hkyô

⁴ Ngò Yohan gi, Asia mau mã é noqkuq hpúng nyhit lhum lé dang kyô kat lhê. Ahkui pyat le, a-nham pyat le, htang pyat má le rû nyi nyi é Su chyáng mai le, Yhâng é hko-hkâm-tanghkuq hí mã é nyhit woi-nyí ⁵ chyáng mai le, lhumzúí é saksé nghut sù, shi byuq é mai sâng-hi dui toq é zomún dut sù, myidàm htoq mã é hkohkam pé lé up sù, Yesuq Hkrisduq chyáng mai le, jeju eq nguingón hkyô gi, nungmoq chyáng joq nyí sháng gaq.

Nga-nhúng lé chyitdap luí, Yhâng é suí èq, nga-nhúng lé, nga-nhúng é ⁶ mara pé mai lhoq lhut byí é eq, Yhâng é Garai Gasang eq Íwa lé dojaú rã matú, nga-nhúng lé, mingdán byu pé eq hkyangjông pé^a dut nhang é Su chyáng, duqwup shingkang eq hpung-wup a-tsam gi, pyat dedu ahtum abyuq ru joq nyí sháng gaq ô! Amen.

⁷ Wú keq, Yhang gi, mhut mai lé lo nyi é nghut luí, myoqjí hkgangmó gi, Yhang lé myàng kó rã nghut lhê; haû Yhang lé htaû rot bang^b lhang, myàng kó rã nghut lhê; haû myidàm htoq mã é byú lhunglhang bang gi, Yhâng é yanmai, yón ngau é hui zo kó rã nghut lhê. Haú dông nghut sháng gaq! Amen.

⁸ “Ngò gi, Alhpa eq Omega^c nghut lhê. Ahkui pyat le, a-nham pyat le, htang pyat má le rû nyi nyi é, wum-o a-tsam dik shoq bò Sù nghut lhê.” ga, haû Yhumsing Garai Gasang taí ri.

Byu Yhangzo Su Dut Su É Hkyô

⁹ Yesuq é, wuîhke jamjau hkyô mã le, mingdán mã le, jân shirang é hkyô mã le, nungmoq é byinzùm nghut sù, ngò nungmoq é gumang hpó, Yohan gi, Garai Gasâng é mungdang eq Yesuq é saksé é yanmai, Patmo zinlóng má ¹⁰ nyi nyi é nghut lhê. Haû Yhumsing

^a 1:6 Htoq Ló 19:6 ^b 1:7 Htaû rot bang gã é gi, Yesuq tapzîng má jén to huí é hkûn, Yhâng é namcham mã lham èq htaû é bang lé gã lhê. ^c 1:8 Alhpa eq Omega gi, Grik laiká myhí mã é sâng-hi cham eq ló htâng cham nghut lhê; haû taí nau é gi, rû dui nyi sù gã é nghut lhê.

é Buinyì^a má, ngò gi, Woi-nyí èq shuí moq byuq ló é nghut mù, “Nàng myang é eq rajung za, chyúmding rahlum má ká luí, Ehpesu, Samurna, Pergamu, Htuatira, Sardi, Hpiladehpi

¹¹ eq Ladoki wà pé má joq é, noqkuq hpúng nyhit lhûm chyáng hun kat aq.” ga, tut htê su gâ é htê mó, ngá é nunghtáng má mying é lé, ngò wó gyô ri.

¹² Haû ngo lé nyo nyi é htê yhumsîng lé wú râ matú, ngò, gùng lhing kat é nghut lhê. Ngò gi, gùng lhing kat é hkûn, hîng myi-kok tsungjang nyhit

¹³ lhum lé le, myi-kok tsungjang haú pé é agùng má, byu yhangzo su dut é Sû rayuq nyi tô é lé le, myang kat ri; haú yuq gi, hkyigoq htoq jé é buhîng wut to luí, wànggàng má hîng wànggò

¹⁴ le wut tô ri. Yhâng é ulhum eq xâm gi, sau hpyû maú eq gyo su hpyu zan tô ri; Yhâng é myoqjî gi, myishâm su

¹⁵ duq nyi ri. Yhâng é hkyî gi, myi bung-hkyûng má jên yu é jet é gyi su dut ri; Yhâng é htê gi, wuì myo myo mying

¹⁶ hûm é htê su gâ ri. Yhâng é loqyo loq má gi, kyî nyhit cham chung tô ri; Yhâng é nhut mai gi, shamsó í shut dap é shâm htoq lo ri. Yhâng é myoq-dong gi, htan dik é nyí gûng buì su tso nyi ri.

¹⁷ Yhang lé myang é hkûn, ngò gi, shí gùng su, Yhâng é hkyî wang má lêng leq tô é nghut lhê. Haú hkûn, Yhang gi, Yhâng é loqyo loq ngá ahtoq má ke byi mù, taí é gi, “Hkâgyuq, Ngò gi,

¹⁸ Sâng-hi eq Jihâm nghut lhê. Ngò gi, dui nyi Sû le nghut lhê; Ngò gi, shí bê nghut kôle, wú keq, pyat dedu ahtum abyuq dui nyi é nghut lhê! Hau htoq agó, Ngò gi, shí hkyô eq momîng é zoqshi pé lé chûng Su nghut lhê.

¹⁹ Haû mù, nàng myang é lé le, ahkui dut é hkyô eq htàngnùng le dut lò râ

²⁰ hkyô lé le, kâ to aq. Nàng myang é, Ngá é loqyo loq má é kyî nyhit cham eq hîng myi-kok tsungjang nyhit lhûm é zaú tô é hkyô é lichyúm gi, isu nghut lhê. Kyî nyhit cham gi, noqkuq hpúng nyhit lhûm é maumang lagyo nyhit yuq nghut ri; myi-kok tsungjang nyhit lhum gi, noqkuq hpúng nyhit lhum nghut ri.

Ehpesu Myuq Mâ É Noqkuq Hpúng Lé Kâ Kat É Laiká

2 Ehpesu myuq mâ é noqkuq hpúng é maumang lagyo lé isu nghû kâ kat aq:

Haû yhâng é loqyo loq má kyî nyhit cham chûng luí, hîng myi-kok tsungjang nyhit lhûm é gyo má sô nyi Su é dang gi,

² ‘Ngò gi, náng é a-kyang, nàng shikut é hkyô, nàng hkam jân é hkyô pé lé, sê lhê. Agè ashop é byu pé lé, nàng a jân pyâm é hkyô lé le, haú lagyo a nghut kôlhang, lagyo pé nghut lhê gâ é bang lé, nàng chyam wú mù, yhangmoq lagyo apyoq pé nghut é lé wó sê yù kô

³ é hkyô lé le, Ngò sê lhê. Nàng gi, shikut shirâng bê nghut é htoq agó, Ngá mying é yanmai, wuîhke hkyô lé hkam jan bê nghut kôle, ngú byuq é hkyô a bò nghut ri.

⁴ Nghut kôlhang, nàng gi, náng é sâng-hi lhê é chyitdap myit lé tô pyâm é yanmai, ngò, nang lé

⁵ mara hûn râ hkyô joq ri. Nàng hká mai byit gyó é lé, myit bun aq! Myit lîng luí, sâng-hi nàng kut é muzó pé lé, kut aq. Nàng myit a lîng é nghut jáng, ngò,

^a 1:10 *Yhumsîng é Buinyì* gâ é gi, yuban nyí lé gâ lhê.

náng chyáng lé jé mù, náng é myi-kok tsungjang lé, hau é jowò mai huí pyám byi rà nghut lhê.

⁶ Nghut kôlhang, Ngò a jú é, Nikola é chángzô pé kut é hkyô lé, nàng le a jú kut é yanmai, náng chyáng ge é hkyô ralhūm bo ashî nghut ri.

⁷ Gyo rà nohkyap dap sū gi, haū Woi-nyí mai noqkuq hpûng pé lé taí é hkyô lé, gyô yù sháng gaq. Wó ung é sū lé gi, haū Garai Gassâng é hparadisu má joq é asak siggâm mâ é ashi zo rà ahkáng, Ngò byi rà nghut lhê.' gâ ri.

**Samurna Myuq Mâ É Noqkuq
Hpúng Lé Kâ Kat É Laiká**

⁸ Samurna myuq mâ é noqkuq hpûng é maumang lagyo lé isu nghū kâ kat aq:

Haū Sâng-hi eq Jihtûm nghut é eq, shi byuq luí, asak dum dui

⁹ Su é dang gi, 'Nàng hui zô é wuîhke jamjau hkyô eq nàng myung é hkyô lé, Ngò sê lhê; nghut kôlhang, nàng gi, wó sū nghut ri! Tsadán é tarajong bang nghut to luí, Yudaq byu pé a nghut kôlhang, Yudaq byù nghut lhê gâ é bang taí hpoí é hkyô lé le, Ngò

¹⁰ sê lhê. Nàng hui zo rà nghut é wuîhke hkyô lé, hkâgyuq. Ngò, nungmoq lé taí kyo kôlé, haū nat Tsadán gi, nungmoq lé chyam wú é dōng, nungmoq chyáng mâ é ra-am lé, htóng má hkyô pyám rà nghut lhê; hau htâng, nungmoq gi, raxê nyí tup zing-rí é hui zo kó rà nghut lhê. Shî shoq lhumzúí nyí aq, haū hkûn, Ngò, nang lé, asak janmaú byi rà nghut lhê.

¹¹ Gyo rà nohkyap dap sū gi, haū Woi-nyí mai noqkuq hpûng pé lé

taí é hkyô lé, gyô yù sháng gaq. Í dâm nghū rà shi é hkyô^a gi, wó ung é sū lé, wó záng htung rà a nghut.' gâ ri.

**Pergamu Myuq Mâ É Noqkuq
Hpúng Lé Kâ Kat É Laiká**

¹² Pergamu myuq mâ é noqkuq hpûng é maumang lagyo lé isu nghū kâ kat aq:

Haū shamsó í shut dap é shâm

¹³ wó Su é dang gi, 'Nàng nyi é jowò lé, Ngò sê lhê; haū gi, Tsadán é hkohkâm-tanghkuq joq é jang nghut ri. Nghut kôlhang, nàng gi, Ngá myíng má lumbkau nyi é nghut luí, Tsadán nyi é jang nghut é nungmoq é myuq má, Ngá é lhumzúí é saksé hpó Antipa sat huí é hkûn lháng, nàng Ngo lé lumjíng é hkyô lé, a he-ngik pyám nghut ri.

¹⁴ Nghut kôlhang, Ngò, nang lé mara hûn rà hkyô ratsuí joq ashî; hkâsu mù gâ le, hparà lhô pé lé tíng byí é zoshuq zô é eq, ashop é dōng gungsho zùm yap é mara kut shut rà matú, Israelaq byu pé lé mhoq hpýoq rà hpaqchyí, Balak lé mhoq byí é Balam é mhoqshit hkyô lé myhik zing é byu pé,

¹⁵ náng chyáng nyi ri. Haū eq rajung za, haū Nikola é chángzô pé mhoqshit é hkyô lé myhik zing é byu pé le, náng chyáng nyi ri.

¹⁶ Haū mù luí, myit lhíng aq! Haū a nghut jáng, Ngò gi, náng chyáng hân jé lé mù, haū Ngá nhut mai htoq é sham èq yhangmoq lé zan rà nghut lhê.

¹⁷ Gyo rà nohkyap dap sū gi, haū Woi-nyí mai noqkuq hpûng pé lé taí é hkyô lé, gyô yù sháng gaq.

^a 2:11 Í dâm nghū rà shi é hkyô gâ é gi, ngaraí ming wang é lé gâ lhê.

Wó ung é sù lé gi, haq tô é man-naq muk lé le, myìng asik kâ tô é luqgok hpyû racham lé le, Ngò byi râ nghut lhê, lhom hap yu é sù za sheq, myìng haû lé sé râ nghut lhê.' gâ ri.

**Htuatira Myuq Mâ É Noqkuq
Hpúng Lé Kâ Kat É Laiká**

¹⁸ Htuatira myuq mâ é noqkuq hpúng é maumang lagyo lé isu nghû kâ kat aq:

Haû myishâm su duq nyi é myoqjí eq jet é gyi su dut é hkyí dap é Sù, Garai Gasâng é Yhangzô é dang gi, 'Náng é a-kyang, chyit-dap myit, lumjìng myit, dojaú é hkyô, hkam jân é hkyô pé lé le, nàng gi, hí lhê htoq má ahkuí je myô zui saí é hkyô lé le, Ngò sê lhê.

²⁰ Nghut kôlháng, yhumsing gùng yhumsìng myiqhtoi myhí nghut lhê gâ é myiwe Yezebulaq lé, nàng nyi nhang tô é yanmai, Ngò, nang lé mara hûn râ hkyô joq ri. Yhang gi, Ngá é dui-nhâng zo-shâng wuì lé, ashop é dông gungsho zùm yap râ eq hparà lhô pé lé tìng byí é zoshuq zo râ hkyô lé mhoqshit luí, yhangmoq lé hkyô

²¹ shuí nghoq ri. Ngò gi, yhang lé, ashop é dông gungsho zùm yap é hkyô mai myit lhìng râ ahkýng byi kôlháng, yhang gi, a myit

²² lhìng naù nghut ri. Haû mù, Ngò gi, yhang lé, jamjau hui râ yhup-chong má dú lheq pyám râ nghut é htoq agó, yhang eq su-myi su-làng lú hkyô kut é bang, yhangmoq kut é hkyô lé myit lhìng kô é za a nghut jáng, wuìhke jamjau mó hui zo nhâng râ nghut lhê.

²³ Ngò gi, yhang zô pé lé sat pyám râ nghut lhê; haû hkûn, Ngò gi, myit nhiklhum eq myit é hkyô lé sé Sù nghut é lé le, nungmoq kut é muzó eq rajung za, nungmoq yuq hkangmó lé, Ngò tau byi râ nghut é lé le, haû noqkuq hpúng pé banshoq wó sé kó râ nghut lhê.

²⁴ Mhoqshit hkyô haû lé a châng é eq Tsadán é nik é hkyô lhaq gâ é lé a mhoq yu é, Htuatira myuq má myit gyó tô é bang nungmoq lé, Ngò taí kôlé, nungmoq lé gotû wòlai Ngò jat byi râ a nghut. Ngò jé lé é jé shoq, nungmoq wó tô é lé za myhik zing nyi keq.

²⁶⁻²⁷ Wó ung é eq Ngò ô nau é hkyô lé jìhtûm jé shoq châng é sù lé gi, "Yhang gi, yhangmoq lé, shamtoq dumbáng èq up^a râ nghut lhê; Yhang gi, tso-au hkoq pé lé su, yhangmoq lé bat hkyop pyám râ nghut lhê."^b

gâ tô é eq rajung za, Ngò, Ngá Wâ chyáng mai ahko ahkáng wó yu é su, mingdán pé lé up râ ahko ahkáng, Ngò byi râ nghut lhê. Ngò gi, yhang lé, haû bó-myhû byi râ nghut lhê. Gyo râ nohkyap dap sù gi, haû Woi-nyí mai noqkuq hpúng pé lé taí é hkyô lé, gyô yù sháng gaq.' gâ ri.

**Sardi Myuq Mâ É Noqkuq
Hpúng Lé Kâ Kat É Laiká**

3 Sardi myuq mâ é noqkuq hpúng é maumang lagyo lé isu nghû kâ kat aq:

Haû Garai Gasâng é woi-nyí nyhit woi-nyí eq kyí nyhit cham lé chùng Su é dang gi, 'Ngò gi, náng é a-kyang lé sê lhê; nàng gi, asak

^a 2:26,27 Shamtoq dumbáng èq up gâ é gi, ahko ahkáng banshoq wó luí, up é lé gâ lhê.

^b 2:26 Hkya-on 2:9

2 dui nyì sù ga kôlhang, shi byuq
 sù nghut ri. Gyîng lò aq! Myit gyó
 tô é, shi byuq râ za nghut é pé
 lé, wum-o lhoq kîng yù aq; hkâsu
 mù gâ le, Ngá é Garai Gasâng é
 3 hí má, náng é a-kyang a gumjup
 é hkyô lé, Ngò myang ri. Haù mù,
 nàng hkâsu kut wó hap yu é eq
 wó gyô yu é hkyô lé, myit bun aq;
 haù dông cháng luí, myit lîng aq.
 Nàng a bûn gyîng é nghut le gi,
 Ngò hkau sù su lé râ nghut luí,
 nàng gi, Ngò hká u lé râ lé, sé râ
 a nghut.

4 Nghut kôlhang, Sardi myuq má,
 yhumsing é mebu lé agot a-û a kut
 é byù ra-am nyi akô. Haù bang gi,
 hpyu é mebu wut luí, Ngò eq rahá
 sô wún kó râ nghut lhê; hkâsu
 mù gâ le, yhangmoq gi, gingdán
 5 é bang nghut akô. Wó ung é sù gi,
 haù bang su, hpyu é mebu myang
 wut râ nghut lhê. Ngò gi, haù yuq
 é myîng lé, hkâ-nhám le, asak ji-
 hpán laiká buk mai yu pyám râ
 a nghut; hau htoq agó, Ngá Wâ
 é hí má le, Yhâng é maumang
 lagyô pê é hí má le, haù yuq é
 myîng lé, Ngò yín yû râ nghut lhê.
 6 Gyo râ nohkyap dap sù gi, haù
 Woi-nyí mai noqkuq hpûng pé lé
 taí é hkyô lé, gyô yù sháng gaq.
 gâ ri.

**Hpiladehpi Myuq Mã É Noqkuq
 Hpúng Lé Kâ Kat É Laiká**

7 Hpiladehpi myuq mã é noqkuq hpûng
 é maumang lagyo lé isu nghû kâ kat
 aq:

Haù chyoyúng é eq tengmán é,
 Dawiq hkohkam é zoqshi chung é,
 ó yuq le a wó myhi loshoq hpông
 é eq, ó yuq le a wó hpóng loshoq

8 myhî é Su é dang gi, 'Nàng kut é
 muzó pé lé, Ngò sê lhê. Wú aq, ó
 yuq le a wó myhî é hkum rallhum,
 Ngò náng hí má hpông to byí lhê.
 Nàng gi, wum-o ratsuí za bò kô-
 lhang, Ngá é dang gyo luí, Ngá é
 myîng lé a he-ngik pyâm é hkyô
 9 lé, Ngò sê lhê. Haù tarajong má
 noqkuq kôlhang, Tsadán lé dojaù
 bang nghut é, Yudaq byù a nghut
 kôlhang, nghut lhê gâ é byù mhaù
 pé lé, Ngò, náng é hkyí wang má,
 lé paí gop nhâng luí, Ngò, nàng
 lé chyitdap é hkyô, yhangmoq lé
 10 sé nhâng râ nghut lhê. Nàng gi,
 myit hîng hîng hkam jan râ é Ngá
 é hkunmó lé châng nyi bê nghut
 é yanmai, myidàm htoq má nyi
 é bang lé chyam lik wú râ matú,
 mingkan gón má jé râ nghut é
 wuîhke jamjau ahkyíng mai, Ngò,
 nang lé lhoq lhut yû râ nghut lhê.

11 Ngò gi, a myáng má jé lé lô
 râ nghut lhê. Náng é janmaù lé,
 ó yuq èq le a wó yu pyám byi
 sháng gaq, nàng wó tô é pé lé
 12 myhik zing nyi aq. Wó ung é sù
 lé gi, Ngá é Garai Gasâng é noq-
 kuq yhûm mã é hkungzing mó dut
 nhâng râ nghut lhê. Haù yuq gi,
 hkâ-nhám le haù mai dum htoq
 ló râ a nghut. Ngò gi, Ngá é Garai
 Gasâng é myîng lé le, Ngá é Ga-
 rai Gasâng chyáng mai htoq luí,
 mauhkûng mai gyó lé lo é, Yeru-
 salem wà mó Asik ga é, Ngá é
 Garai Gasâng é myuq myîng lé
 le, Ngá é myîng sik lé le, yhâng
 chyáng kâ tap byi râ nghut lhê.
 13 Gyo râ nohkyap dap sù gi, haù
 Woi-nyí mai noqkuq hpûng pé lé
 taí é hkyô lé, gyô yù sháng gaq.
 gâ ri.

**Ladoki Myuq Mã É Noqkuq
Hpúng Lé Ká Kat É Laiká**

¹⁴ Ladoki wà mó mã é noqkuq hpúng é maumang lagyo lé isu nghû ká kat aq:

Haû lhumzui é eq tengmán é saksé nghut é, Garai Gasang hpan tô é lé up é, Amen gá Su é dang
¹⁵ gi, ‘Ngò gi, nàng kut é muzó lé sê lhê; nàng gi, gú le a nghut, nye le a nghut dut ri. Nàng gi, gú jáng jáng gú, nye jáng jáng nye
¹⁶ dut rã lé, Ngò ô nau ri. Nghut kôlhàng, nàng gi, gú le a nghut, nye lé a nghut, lumnye nghut é yanmai, Ngò gi, nang lé, Ngá é nhut mai byé htoq pyám rã za
¹⁷ nghut bê. “Ngò gi, wó sũ nghut lhê; ngò gi, sutzè gyai wó bê nghut lui, haû lháng a ra lo.” ga nàng taí ri. Nghut kôlhàng, nàng gi, wuífke jamjau hui sũ, asho awui dut sũ, myùng sũ, myoq-jit sũ eq achin dut sũ nghut é
¹⁸ lé, nàng a sé myhi-nhung. Haû mù lui, nàng gi, wó sũ sùt sũ wó dut sháng gaq, myi má jên yu é hîng lé le, nàng achin dut é hoq hpu hkyô lé, wó nghop pyám sháng gaq, wut rã matú, mebu hpyû lé le, nàng myoq wó myâng sháng gaq, náng é myoqjí má kat rã matú, myoq chi lé le, nàng, Ngá chyáng mai wui yù rã matú, Ngò, nang lé hpaqchyí byí lhê.

¹⁹ Ngò chyitdap é bang lé gi, tan lui, mhoqshit lhê. Haû mù, nàng gi, hân bún gying lui, myit lhîng
²⁰ aq. Wú aq! Ngò gi, hkum yâm má yap to lui, hkum lé kok nyi lhê. Rayuq yuq, Ngá é htê lé wó gyo lui, hkum hpóng byí é nghut jáng, Ngò gi, wàng mù, haû yuq eq rahá zo shuq rã nghut lhê; haû yuq

le, Ngò eq rahá zo shuq rã nghut lhê.

²¹ Ngò gi, ùng lui, Ngá Wa eq rahá Yhâng é hkohkâm-tanghkuq má zung é eq rajung za, wó ung é sũ lé gi, Ngò eq rahá Ngá é hkohkâm-tanghkuq má zùng rã ahkáng, Ngò byi rã nghut lhê.

²² Gyo rã nohkyap dap é sũ gi, haû Woi-nyí mai noqkuq hpúng pé lé taí é hkyô lé, gyo yù sháng gaq.’ gâ é nghut ri.” gâ ri.

**Mauhking Htoq Mã
Hkohkâm-tanghkuq Joq É Hkyô**

4 Hau htâng má, ngò wú kat le, mauhkîng má hkum rallhum bóng tô é lé myang ri. Ngò sâng-hî dàm wó gyo é tut htê su gâ é danghtê ngo lé taí é gi, “Shî má doq lò aq, htàngnùng má dut lò rã hkyô pé lé,
² Ngò, nang lé tûn shit bá.” gâ ri. Haû hkûn jáng yhang, ngò gi, Woi-nyí má moq byuq ló lui, mauhkîng htoq má hkohkâm-tanghkuq rallhum joq é lé myàng ri; tanghkuq haû má, byù ra-
³ yuq zung tô ri. Haû má zung to Su é isâm gi, huhpé eq ne yúng lung-sêng su dut ri. Huí nyuì lungsêng su dut é woqgan síng-yang gi, haû hko-
⁴ hkâm-tanghkuq má hkông lhîng tô ri. Hkohkâm-tanghkuq hau é lhînghkyuq má, hkohkâm-tanghkuq gotû í xe myí lhum le joq to lui, hpyu é mebu wut mù, ulhum má hîng janmaú tsúng tô é suwún í xe myi yuq gi, haû má zung
⁵ tô bum akô. Haû hkohkâm-tanghkuq mai, lhap hpyat é, mying hûm é eq maugum gûm é pé dut htoq lo ri. Haû hkohkâm-tanghkuq hí má, myi-kok nyhit lhum le duq tô ri; haû pé gi, Garai Gasâng é woi-nyí nyhit woi-nyí
⁶ nghut ri. Hau htoq agó, san zã é myoqjàm su dut mã é wuì-nhông le,

haû hkohkâm-tanghkuq hí má dǐng tô ri.

Haû hkohkâm-tanghkuq agùng má le, lhǐnghkyuq má le, hǐ-u nunghtáng lhǐnghkyuq myoqjí dap é dui é dusak
⁷ myí du nyi tô ri. Dui é dusak sâng-hǐ du gi, hkanghkyi su dut ri; í du nghû râ du gi, nohtó su dut ri; sǐm du nghû râ dǔ é myoqdong gi, byu myoqdong su dut ri; myí du nghû râ du gi, dǎng
⁸ wún é zunbung su dut ri. Dui é dusak myí du haû gi, du hkangmó dùng hkyuq lhum lhum dap é htoq agó, lhǐnghkyuq má myoqjí kôm dap luí, dùng hkaû má lháng dap ri. Yhangmoq, nyí myín hkâ-nhám a no loshoq taí nyi kô é gi,

“A-nham pyat le, ahkuí pyat le,
 htang pyat má le, rǔ nyi nyi é,
 haû wum-o a-tsam dik shoq
 bò Sû Yhumsǐng Garai Gasang
 gi,

chyoiyúng, chyoiyúng, chyoiyúng nyi ri.”

⁹ gâ akô. Haû dui é dusak myí du gi, hkohkâm-tanghkuq má zung é, pyat dedu ahtum abyuq dui nyi Su chyáng, hpungwup shingkang, aróng eq jeju
¹⁰ bun hkyô byí é hkangmó, haû suwún í xe myi yuq gi, hkohkâm-tanghkuq má zung é, pyat dedu ahtum abyuq dui nyi Su é hí má, ngóm gop luí, Yhang lé noqkuq akô. Yhangmoq gi, yhangmoq é hkohkâm-janmaú lé, haû hkohkâm-tanghkuq hí má hkyut to mù, taí kô é gi,

¹¹ “Ngamoq é Yhumsǐng eq Garai Gasang ê, nyí mi-nyí, joq mijojq lé, Nàng hpan to bê nghut luí,
 haû pé gi, Nàng ô nau é dōng hpan tô é hui bê nghut mù, nyi to joq tô bùm bê nghut é yanmai,

Nàng gi, hpungwup shingkang,
 aróng eq hpungwup a-tsam lé,
 hap yù gǐng Sû nghut ri.”
 gâ akô.

Chyúmding Eq Sauzo

5 Hau htáng, ngò gi, hkohkâm-tanghkuq má zung to Su é loqyo loq má, í shut é laiká kâ to é, dizik nyhit lhum tap tô é chyúmding le
² myang ri. Hau htoq agó, a-tsam mó bo é maumang lagyo rayuq gi, “Haû dizik pé lé hí pyám râ eq chyúmding lé hpóng râ gi, ó yuq wá gǐngdán lhê lhú?” ga luí, htê mó èq wut
³ taí nyi é lé le, ngò myang ri. Nghut kôlhang, mauhkǔng htoq má le, myigùng htoq má le, myigùng ô má le, haû chyúmding lé wó hpóng râ eq ahkaû má wó wú râ byù rayuq
⁴ lháng a nyí nghut ri. Haû chyúmding lé hpóng mù, ahkaû má wú râ gǐngdán é byù rayuq hkâlháng a nyi é yanmai, ngò gyai yhang ngau
⁵ pyâm é nghut lhê. Haú hkûn, haû suwún wuí mâ é rayuq, ngo lé taí é gi, “Hkâ-ngaú! Wú aq, haû Yudaq byuhú mâ é Hkanghkyi nghu é, haû Dawiq é Amyit nghut Sû gi, ùng bê nghut luí, haû chyúmding eq haú mâ é dizik nyhit lhum lé wó hpóng lhê.” gâ ri.
⁶ Hau htáng, haû dui é dusak myí du eq suwún wui é agùng mâ é, hkohkâm-tanghkuq agùng má, sat hui bê su dut é Sauzo radu yap tô é lé, ngò myang ri. Sauzo haû gi, hkyuí nyhit lhum eq myoqjí nyhit lhum dap ri. Myoqjí haû nyhit lhum gi, myidám htoq gón má nhang htoq kat é, Garai Gasang é woi-nyí nyhit woi-nyí
⁷ nghut ri. Haû Sauzo gi, lé mù, hkohkâm-tanghkuq má zung to Su é loqyo
⁸ mâ é chyúmding lé yu ri. Haû chyúmding lé yu é hkûn jáng, haû dui é du-

- sak myí du eq suwún í xe myi yuq gi, Sauzô é hí má ngóm gop akô. Yhangmoq yuq hkangmó gi, tíng eq sân-yúng bâng é kyûdung dang gâ é namngón jung byíng mui tô é hîng góm pé le chung bum akô nghut ri.
- ⁹ Yhangmoq gi,
 “Nàng gi, haû chyúmding lé yù
 râ eq hau é dizik pé lé hpóng
 râ gingdán Sû nghut ri.
 Haû mù gâ le, Nàng gi, sat hui
 bê nghut luí, byuhú hkangmó
 mai le, myíng hkangmó mai
 le,
 byù myû hkangmó mai le,
 mingdán hkangmó mai le,
 Garai Gasâng é matú,
 Náng é suí èq byù pé lé wui hpyit
 yù bê nghut ri.
- ¹⁰ Nga-nhûng é Garai Gasang lé
 dojaú râ matú, Nàng gi,
 yhangmoq lé, mingdán byu pé
 eq hkyangjông pé dut nhâng
 bê nghut luí,
 yhangmoq gi, myidàm htoq má
 up kó râ nghut lhê.”
 ga luí, mahkôn sik ralhum hkôn akô
 nghut ri.
- ¹¹ Haú hkûn, ngò wú kat le, haû hko-
 hkâm-tanghkuq lhînghkyuq má le,
 dui é dusak pé eq suwún wui é lhîng-
 hkyuq má le, nyi tô bum é mau-
 mang lagyo ajùm ayò mun mun sen
¹² sên é htê lé wó gyô ri. Yhangmoq
 gi,
 “Haû sat hui bê Sauzo gi,
 hpungwup a-tsam, sutzè,
 hpaqchyí byéng-yá, wum-o,
 aróng sitang,
 hpungwup shingakang eq hkya-on
 kungtôn hkyô lé, hap yù gíng
 ri.”
 ga luí, htê mó èq ton bum akô
 nghut ri.
- ¹³ Hau htoq agó, mauhkûng htoq má
 nyi é, myigùng htoq má nyi é, myi-
 gùng ô má nyi é, wuiming má nyi é,
 hpan to huí é lhunglháng gi,
 “Hkya-on kungtôn hkyô, aróng
 sitang, hpungwup shingakang
 eq hpungwup a-tsam gi,
 haû hkohkâm-tanghkuq má zung
 tô é Sû eq Sauzô chyáng,
 pyat dedu ahtum abyuq ru joq
 nyí sháng gaq ô!”
 ga luí, ton nyi bùm kô é lé, ngò wó
 gyô ri. Haû dui é dusak myí du gi,
¹⁴ “Amen” ga taí jang, haû suwún wuí
 gi, ngóm gop luí noqkuq akô nghut ri.
- Dizik Nyhit Lhúm É Hkyô**
- 6** Haû Sauzo gi, dizik nyhit lhum
 mâ é sânghí lhum lé hpông kat
 é hkûn, ngò myang é nghut lhê. Hau
 htâng, haû dui é dusak myí du mâ é
 radu gi, maugum su gâ é htê mó èq,
² “Lé aq.” gâ é lé, ngò wó gyô ri. Ngò
 wú kat é hkûn, ngá é myoq hí má
 myang hpyû radu nyi tô é lé myang ri!
 Haú má jî to sù gi, lai rahpu chung
 tô é htoq agó, yhang lé, janmaú ra-
 lhum tsúng to byí luí, ûng budang wó
 râ matú ûng sù rayuq dông htoq ló ri.
³ Haû Sauzo gi, í lhum nghû râ dizik
 lé hpông kat é hkûn, haû í du nghû râ
 dui é dusak gi, “Lé aq.” ga taí é lé, ngò
⁴ wó gyô ri. Hau htâng, myang nè radu
 htoq lo ri; haú má jî tô é sù gi, myidàm
 htoq mâ é ngingón simsaq hkyô lé
 wup yù râ eq, byù yhangchang rayuq
 eq rayuq sat lhum nhâng râ a-tsam byí
 é hui sù nghut luí, yhang lé shâm mó
 rahkyam le byí to bê nghut ri.
⁵ Haû Sauzo gi, sùm lhum nghû râ di-
 zik lé hpông kat é hkûn, haû sùm du
 nghû râ dui é dusak gi, “Lé aq.” ga taí
 é lé, ngò wó gyô ri. Ngò wú kat le,
 myang noq radu ngá myoq hí má nyi

tô é lé myang ri! Haú má jî tô é sù gi, yhâng é loq má jàng rahpu chung
⁶ to ri. Haú hkûn, “Ra-nyí é zuihpau gi, sungso rabyé, ra-nyí é zuihpau gi, muk-yo guq sum byé nghut lhê; haú tsanlun xû eq tsibiyiq wing lé kúm gi, hkâlhoq hten kó.” gâ é htê, haú dui é dusak myí du hkaú mai htoq lô é su gâ é lé, ngò wó gyô ri.

⁷ Haú Sauzo gi, myí lhum nghû râ dizik lé hpông kat é hkûn, haú myí du nghû râ dui é dusak gi, “Lé aq.” ga

⁸ taí é lé, ngò wó gyô ri. Ngò wú kat é hkûn, ngá é myoq hí má, myang muí radu nyi tô é lé myang ri! Haú má jî to su é mying gi, Shí hkyô gâ ri; Moming le, yhâng é htâng má châng tô ri; yhangnhik gi, sham èq, mutmó gyó é èq, wúm gyó é èq, tân é yosô-ze èq, myidàm htoq myi tú mâ é ratú má nyi é bang lé sat pyám râ ahkáng wó yu to bekô nghut ri.

⁹ Sauzo gi, ngo lhum nghû râ dizik lé hpông kat é hkûn, Garai Gasâng é mungdâng é yanmai le, yhumsing hkâm é saksê é yanmai le, sat hui bâng é sobyô pé gi, hkungga gyap a-ô má nyi tô bùm kô é lé, ngò myang ri.

¹⁰ Yhangmoq gi, “Chyoiyúng é eq tengmán é, ahko ahkáng lunglhang wó é Yhumsing ê, myidàm htoq má nyi é byu pé lé, ngamoq é sui manglat dam a byí é eq tarâ a jéyáng é za, hkâ-myháng jé shoq nyi nyi râ lú?”

¹¹ ga, htê mó èq garu bum akô. Haú hkûn, yhangmoq yuq hkanmó gi, bu hpyû hîng radung dung hut é hui luí, yhangmoq su sat hui râ bang, yhangmoq é byinzùm dui-nhâng zoshâng wuì nghut é gumang wuì sat huí ngap é hkûn jé shoq, razup zim za nyi shi keq ga taí é lé wó gyô akô nghut ri.

¹² Hkyuq lhum nghû râ dizik lé, Yhang hpông kat é hkûn, ngò myang ri; haú

u lé, layàng mó le nún lo ri; haú bui gi, saumaú noq èq woq é pán su noq byuq ri; haú lhamó lhum gón gi, sui su
¹³ ne byuq ri; maihpáng gâm lé, lai mó èq lo mut nhûn kat é hkûn, a myhíng shí é maihpáng-shi yoq gyó é su, mauhkûng mâ é kyî pé gi, myidàm htoq
¹⁴ má byit gyó lo bum ri. Haú mauhkûng gi, laiká lé dîng lhûm é su htot pyâm é hui luí, bùm hkanq bùm mó eq zinlóng lhumjup pé gi, yhâng é jowò mai huí pyâm é huí ri.

¹⁵ Haú hkûn, haú myidàm htoq mâ é hkohkam pé, uphkâng bang, gyezaú pé, sut wó bang, wum-o a-tsam bò bang, jun pé eq luthkyô wó é lunglhâng bang gi, bùm dong pé eq bùm pé mâ é luqgok gyoro pé má haq tô

¹⁶ bùm uchyang, haú bùm pé eq luqgok pé lé, “Ngamoq é gùng htoq má gyó ke kó laq! Haú hkohkâm-tanghkuq má zung to Su é myoq hí mai le, haú Sauzô é nhikmo-yô é hkyô mai le, nga-
¹⁷ moq lé haq pyám kó laq. Hkâsu mù gâ le, haú Yhangnhik nhikmo-yô é buinyi mó gi, jé bê nghut ri; ó yuq wá wó jân yap nyi râ lú?” ga garû taí bum akô nghut ri.

144,000 Yuq Masat Lhô

Tap Hui Kô É Hkyô

7 Hau htâng má, maumang lagyo myi yuq gi, maumyí myi chyûn má yap to mù, myigùng htoq má le, wuì ming htoq má le, siggâm pé má le, lai a hik sháng gaq ga, myi shut mâ é lai lé zú zing to kô é lé, ngò
² myang ri. Haú hkûn, haú dui nyi é Garai Gasâng é masat lô chung é maumang lagyo gotû rayuq gi, buihtoq hkyam mai htoq lé lo é lé, ngò dum myang ri. Yhang gi, haú myigùng eq wuì ming lé lhoq hten râ ahkáng wó tô é maumang lagyo myi

- ³ yuq haú lé, “Nga-nhông é Garai Gasâng dui-nhông zoshâng wui é nge-lang má, ngamoq mai masat lhô a tap byi byi gi, haú myigùng, wui ming eq sikgâm pé lé hkâlhoq hten shi kó.”
- ⁴ ga htê mó èq wut taí kat ri. Haú hkûn, masat lhô tap huí é bang byù hkâ-myhó yuq nghut é lé, ngò wó gyô ri. Israelaq byuhú banshoq mâ é 144,000 yuq nghut ri.
- ⁵ Masat lhô tap huí yu é,
Yudaq up mâ é bang gi,
12,000 yuq,
Rubin up mâ é bang gi,
12,000 yuq,
Gat up mâ é bang gi,
12,000 yuq,
- ⁶ Ashe up mâ é bang gi,
12,000 yuq,
Nahtali up mâ é bang gi,
12,000 yuq,
Manase up mâ é bang gi,
12,000 yuq,
- ⁷ Simeon up mâ é bang gi,
12,000 yuq,
Lewiq up mâ é bang gi,
12,000 yuq,
Yishahka up mâ é bang gi,
12,000 yuq,
- ⁸ Zebulun up mâ é bang gi,
12,000 yuq,
Yosep up mâ é bang gi,
12,000 yuq,
Ben-yamyin up mâ é bang gi,
12,000 yuq,
nghut bum akô.

Bu Hpyû Hing Wut Bang É Hkyô

- ⁹ Hau htâng, ngò wú kat é hkûn, mingdán hkangmó mai le, byuhú hkangmó mai le, byù myû hkangmó mai le, myíng chângjup mai le, lé é bang, ó yuq lháng a ung nghap é byù moq mó gi, haú hkohkâm-tanghkuq é

hí má le, Sauzô é hí má le, yap nyi bùm kô é lé myang ri; yhangmoq gi, bu hpyû hing wut luí, yhangmoq é loq má byùm-haq chung tô bùm kômù,

- ¹⁰ “Hkyi yù hkyô gi, haú hko-hkâm-tanghkuq má zung tô é nga-nhông é Garai Gasang eq Sauzo chyáng mâ é nghut ri ô!”
- ga luí, htê mó èq garû bum akô nghut ri. Haú maumang lagyo lhunglhâng bang gi, haú hkohkâm-tanghkuq é lhinghkyuq má le, suwún wuí eq dui é dusak myí du é lhinghkyuq má le, yap tô akô nghut ri. Yhangmoq gi, hkohkâm-tanghkuq hí má myoq-dong ngóm gop mù, Garai Gasang lé noqkuq uchyang,
- ¹² “Amen! Hkya-on kungton hkyô eq hpungwup shingkaq, hpaqchyí byéng-yá eq jeju bun hkyô, aróng, hpungwup a-tsam eq wum-o gi, nga-nhông é Garai Gasâng chyáng pyat dedu ahtum abyuq ru joq nyí sháng gaq ô! Amen!”
- ga taí bum akô.
- ¹³ Haú hkûn, suwún wuí mâ é rayuq gi, “Shí bu hpyû hing wut é bang gi, ô pé lhú? Yhangmoq gi, hkâmai lé é bang nghut akô lhú?” ga ngo lé myí ri.
- ¹⁴ Ngò gi, “Suwún hpó ê, nàng sê lhê.” nghú tû taí jáng, yang gi, “Shí bang gi, haú wúhke jamjau mó mai wó lut htoq lô luí, yhangmoq é bu hing lé, haú Sauzô é sui má chí
- ¹⁵ hpyû yù bê bang nghut akô. Haú mù, yhangmoq gi, Garai Gasâng é hko-hkâm-tanghkuq hí má nyi mù, Yhâng é noqkuq yhûm má, nyí, myín Yhang lé dojaú nyí kô é nghut lhê; haú hkohkâm-tanghkuq má zùng Sû gi, Yhâng

é jonghpang lé, yhangmoq é ahtoq má
¹⁶ nghop byi râ^a nghut lhê. Yhangmoq
 gi, hkâ-nhám le, zòmut wuìshit hui
 râ a nghut lo; buì lhap é le, hkyíng
 hkyíng nyé é le, yhangmoq lé wó záng
¹⁷ râ a nghut. Hkâsu mù gà le, haù hko-
 hkâm-tanghkuq agùng mà é Sauzo gi,
 yhangmoq é sau-rém sù dut râ nghut
 luí, Yhang gi, yhangmoq lé, asak wuì-
 búm jé shoq shuí ê râ nghut lhê. Hau
 htoq agó, Garai Gasang gi, yhangmoq
 é ngaubyi sháng shoq sut pyám byi râ
 nghut lhê.” ga taí ri.

**Nyhit Lhum Nghû Râ Dizik Eq
 Namngón Jung Nyhê É Hîng Góm**

8 Haù Sauzo gi, nyhit lhum nghû râ
 dizik lé hpông kat é hkûn, mau-
 hkûng htoq má hkyíng hkum rawuí kô
 zîm byuq ri.

² Haù hkûn, Garai Gasâng é hí má
 yap tô é maumang lagyo nyhit yuq lé,
 ngò myang ri; yhangmoq lé, tut nyhit
 lhum byí tô ri.

³ Namngón jung nyhê é hîng góm
 chung é maumang lagyo gotú rayuq
 gi, haù hkungga gyap yàm má lé
 yap tô ri. Haù hkohkâm-tanghkuq hí
 mà é hîng hkungga gyap má, sân-
 yúng bang banshoq é kyúdung dang
 eq rahá nhông byi râ matú, nam-
 ngón jung gyai myo shoq, yhang
⁴ lé byí tô ri. Haù namngón jûng é
 myihkau gi, sân-yúng bâng é kyú-
 dung dangtê eq rahá, maumang la-
 gyo haù yuq é loq mai Garai Gasâng
 chyáng hkyang rot ló bê nghut ri.

⁵ Hau htâng, maumang lagyo haù yuq
 gi, góm lé yù mù, hkungga gyap mà
 é myi lhoq pyíng yù luí, myidàm
 htoq má dú hkyô kat é hkûn, mau-
 gum mó gûm é, mying hûm é, lhap

hpyat é eq layàng nún é pé dut htoq
 lo ri.

Tut Mut É Hkyô

⁶ Hau htâng, tut nyhit lhum wó é
 maumang lagyo nyhit yuq gi, tut mut
 râ hen akô nghut ri.

⁷ Sâng-hî yuq nghû râ maumang la-
 gyo gi, yhâng é tut lé mut kat ri; haù
 hkûn, sui nyó é likwò eq myi htoq
 lô mù, haù lé myidàm htoq má lhoq
 hkyô kat jáng, maumyí sum tú mà é
 ratú eq siggâm sum tú mà é ratú nyé
 gyó byuq é htoq agó, wàhu mhanzo
 banshoq le nyé gyó byuq bê nghut ri.

⁸ Í yuq nghû râ maumang lagyo gi,
 yhâng é tut lé mut kat ri; haù hkûn,
 myi dap tô é bùm mó su é lé, wuìshuq
 lung-aù má dú hkyô kat ri. Wuìshuq
 lung-aù sum tú mà é ratú gi, sui dut
⁹ byuq bê nghut ri; wuìshuq lung-aù mà
 é dui jung sum tú mà é ratú gi, shi
 byuq luí, wuì-sanghpo pé sum tú mà
 é ratú gi, htên byuq bê nghut ri.

¹⁰ Sum yuq nghû râ maumang lagyo
 gi, yhâng é tut lé mut kat ri; haù hkûn,
 myihu dùm su duq é kyí mó racham
 gi, mauhkûng mai byit gyó lô mù,
 wuìlàng sum tú mà é ratú eq wuìbúm
¹¹ pê htoq má lo gyó záng ri. Kyí hau é
 myìng gi, Kyí Kyí Hko gà é nghut ri.
 Wuìlàng sum tú mà é ratú hkô byuq
 luí, wuì haù hkô byuq é yanmai byù
 myo myo shi byuq bekô nghut ri.

¹² Myi yuq nghû râ maumang lagyo gi,
 yhâng é tut lé mut kat ri; haù hkûn,
 buì sum tú ratú, lhamó sum tú ratú,
 kyí sum tú ratú gi, hten luí, haù pé
 é sum tú ratú gi, mauchut byuq bê
 nghut ri. Hau htoq agó, nyí sum tú mà
 é ratú le, myín sum tú mà é ratú le,
 maubó a joq dut byuq ri.

^a 7:15 *Yhâng é jonghpang lé, yhangmoq é ahtoq má nghop byi râ, gà é gi, yhangmoq eq rahá nyi mù, yhangmoq lé upzúng nyí râ gà é nghut lhê.*

¹³ Ngò wú nyi le, zungbu radu gi, maulat má dâng wún mù, “Gotû maumang lagyo sum yuq èq mut râ nghut é, tut hte é yanmai, myidàm htoq má nyi bâng é matú, dingnyé, dingnyé, dingnyé nghut ri.” ga luí, htê mó èq garú taí ri.

9 Ngo yuq nghû râ maumang lagyo gi, yhâng é tut mut kat é hkûn, mauhkûng mai myidàm htoq má byit gyô tô é kyî racham lé, ngò myang ri. Haú nik dik htûm é Lasang-dông é ² zoqshi gi, kyî haú lé byî tô ri. Kyî haú gi, nik dik htûm é Lasang-dong lé hpông kat é hkûn, myi bungghyûng mó mai htoq lo é myihkau dùm sù é myihkau gi, dong haú mai htoq lo ri. Nik dik htûm é Lasang-dong haú mâ é myihkau dum é yanmai, bui eq maulat gi, mauchut byuq bê ³ nghut ri. Myihkau dùm haú mai dinggám pé htoq lô mù, myidàm htoq má gyô lé akô; myidàm htoq mâ é gogok é a-tsam sù é a-tsam le, yhangmoq lé ⁴ byî to bê nghut ri. Myidàm htoq mâ é wàhu pé lé le, mhan-haq hpoqnoq pé lé le, sigâm pé lé le a lhoq htên é za, yhumsing é ngelang má Garai Gasâng é masat lhô a dap é byu pé lé baú zing-ri râ matú, yhangmoq lé ⁵ taí tô ri. Nghut kôlhang, haú bang lé sat pyám râ ahkáng kúm gi, yhangmoq a wó e za, lhamó ngo hkyap tup haú bang lé zing-ri râ ahkáng za ru wó akô nghut ri. Haú bang hui zô é shí-nò jamjau gi, gogok èq pat hkûn ⁶ no hpû é su yang nghut ri. Haú buinyi pé má, byu pé gi, shí hkyô hô kôlhang, myàng kó râ a nghut; shí nau dik kôlhang, haú shí hkyô gi, yhangmoq chyáng mai hpang byuq râ nghut lhê.

⁷ Dinggám haú pé gi, majan zan râ matú buí tô é myang pé su dut akô. Yhangmoq é ulhum má gi, hîng janmaú sù é tsûng tô é htoq agó, yhangmoq é myoqdong gi, byu myoqdong ⁸ su dut bum akô nghut ri. Yhangmoq é xâm gi, myiwe wui é xâm su dut luí, yhangmoq é zuì gi, hkang- ⁹ hkyi zuì su dut ri. Yhangmoq é wànggò-long gi, joqtoq wànggò-long su dut ri; yhangmoq é dùng mying é htê gi, majan pá shut din yán wang ló é myang jûm eq myanglhêng pé ¹⁰ mying hûm é htê su gâ ri. Yhangmoq é sho-myi gi, nyin dap é gogok é sho-myi su dut ri; yhangmoq é sho-myi má, lhamó ngo hkyap tup byu ¹¹ pé lé zing-ri râ a-tsam bo ri. Yhangmoq é hkohkâm gi, nik dik htûm é Lasang-dong mâ é maumang nghut ri; haú é mying gi, Hebre myíng dong Abadon ga, Grik myíng dông Apolion^a gâ ri. ¹² Sâng-hî lhum dingnyé gi, laí ló byuq bê nghut ri; nghut kôlhang, dingnyé í lhum jé lô shirâ nghut lhê. ¹³ Haú hkyuq yuq nghû râ maumang lagyo gi, yhâng é tut mut kat ri. Haú hkûn, Garai Gasâng é hí má joq é hîng hkungga gyap é hkyuí myí lhum mai ¹⁴ htê htoq lo é gi, “Uhprat wui mó láng má tuí lhûng tô é maumang myi yuq lé, nhang pyám aq.” ga tut chung tô é hkyuq yuq nghû râ maumang lagyo ¹⁵ lé taí é lé, ngò wó gyô ri. Haú hkûn, xângzo byù sum tú mâ é ratú lé sat pyám râ matú, ahkyíng, buinyi, lhôhkyap, zanwut lé, rì rì hen to bê nghut é haú maumang myi yuq lé nhang kat ¹⁶ bê nghut ri. Myang ji jí é gyè jum gi, byù du sen í hkyíng bo é hkyô lé, ngò wó gyô ri.

^a 9:11 Apolion gâ é lichyúm gi, lhoq hten lhoq hpyoq sù gâ é nghut ri.

- ¹⁷ Ngò, shing-rán myang é má, myang jûm eq haú pé má ji bâng é wànggò-long pé gi, myi su ne é, shing shing nyui é eq hang su hui é nghut ri. Myáng jum é ulhum gi, hkanghkyî pé é ulhum su dut luí, yhangmoq é nhut mai, myi, myihkau eq hang pé htoq
- ¹⁸ lo ri. Haú yhangmoq é nhut mai htoq lo é myi, myihkau eq hang gâ é wúm ihkyup sîm jûng é yanmai, xângzo byù sum tú ratú gi, sat hui bekô
- ¹⁹ nghut ri. Myang haú jum é sho-myi gi, lhangmuì su dut luí, ulhum dap mù, hte sê é yanmai, yhangmoq é a-tsam gi, nhut eq sho-myi pé má nghut ri.
- ²⁰ Wúm ihkyup haú sîm jung mai wó lut luí, myit gyó tô é xângzo byu pé gi, yhangmoq é loq pê èq zui saí é muzó mai, myit a lhîng shi kô é htoq agó, nat gâng pé lé le, a wó myâng, a wó gyo, a wó sô é, hîng, ngùn, gyi, luqgok, sik pê é alhô lé le, noqkuq é
- ²¹ hkyô lé a tô pyám shi kó nghut ri. Hau htoq agó, yhangmoq gi, byù sat é mú mai le, myoqheq hpaqchyî mú mai le, ashop é dông gungsho zùm yap é hkyô mai le, hkaú é mai le, myit a lhîng shi kó nghut ri.

Maumang Eq Laiká Ding É Hkyô

- 10** Hau htâng, ngò gi, wum-o bo é maumang lagyo gotú rayuq, mauhkûng mai gyó lé lo é lé myang é nghut lhê. Yhang lé gi, mhut èq htop yup to luí, yhâng é u htoq má woqgan síng-yang gyân tô ri; yhâng é myoq-dong gi, buì su dut luí, yhâng é hkyî
- ² gi, myi zîng su dut ri. Yhâng é loq má gi, hpông tô é laiká ding zo r-lhum chung tô ri; yhâng é loqyo hkyî gi, wuìshuq lung-aú má nang, yhâng é loqpaí hkyî gi, myigùng htoq má
- ³ nâng to luí, hkanghkyi mying é htê su ga, htê mó èq garú kat ri. Yhang garu

kat jáng, maugum htê nyhit lhum tô

⁴ gûm kat ri. Haú maugum htê nyhit lhum tô gûm kat é hkûn, ngò ká râ da jáng, “Haú maugum htê nyhit lhum tô gûm é hkyô lé zaú pyám aq; haú pé lé hkâkâ to.” ga, mauhkûng mai danghtê htoq lo é lé ngò wó gyô kat ri.

- ⁵ Haú hkûn, wuìshuq lung-aú eq myigùng htoq má nâng yap tô é lé, ngò myang é maumang lagyo haú gi, yhâng é loqyo loq lé mauhkûng shut
- ⁶ tu toq kat ri. Haú mù, yhang gi, mauhkûng eq haú má nyi é lhunglháng lé le, myidàm htoq eq haú má nyi é lhunglháng lé le, wuìshuq lung-aú eq haú má nyi é lhunglháng lé le, hpan tô é, pyat dedu ahtum abyuq dui nyi Su é mying lé lang luí, dakam é gi, “Ahkyíng ratsuí le, lhoq myáng nyí lo
- ⁷ râ a nghut! Nghut kôlháng, Garai Gasang mai Yhâng é dui-nhâng zoshâng wuì nghut é myiqhtoí pé lé taí to bê é danglù eq rajung za, Yhâng é zaú tô é hkyô gi, nyhit yuq nghú râ maumang lagyo èq yhâng é tut lé mut myhîng é buinyi pé má, shit râ nghut lhê.” gâ ri.
- ⁸ Hau htoq agó, ngò wó gyô wú bê mauhkûng mâ é htê, ngo lé dum taí é gi, “Haú wuìshuq lung-aú eq myidàm htoq má nâng yap tô é maumang lagyo loq má hpông tô é laiká ding lé, é yù aq.” gâ ri.
- ⁹ Haú mù, ngò gi, ê luí, laiká ding zo haú, ngo lé byi râ matú maumang lagyo haú lé ê dung le, yhang gi, “Shí lé yù mù, zo kat aq. Náng é wam má hko râ nghut lhê; nghut kôle, náng é nhut má gi, byo-í su yhang chui râ nghut
- ¹⁰ lhê.” gâ ri. Haú mù, ngò gi, laiká ding zo haú lé, maumang lagyo é loq mai yù mù, zô é nghut lhê; haú hkûn, ngá é nhut má gi, byo-í su yhang chuí nghâm ri; nghut kôle, bàn zô kat é hkûn, ngá é wam hkaú má hkô bê

¹¹ nghut ri. Haú hkûn, “Nàng gi, byù myû myo myo eq séng luí le, mingdán myo myo eq séng luí le, myíng ahú hú eq séng luí le, hkohkam pé myo myo eq séng luí le, myiqhtoi dum htoi ra râ nghut lhê.” ga, ngo lé tai kyô ri.

Saksé Í Yuq É Hkyô

11 Ké râ jung dumbáng su dut é jàm-yang rahkat ngo lé byi luí, ngo lé tai é gi, “Ê mù, haú Garai Gasâng é noqkuq yhûm lé le, hkungga gyap lé le, kê wú luí, haú má noqkuq é bang lé nghap wú aq. Nghut kôlhang, shinggan mâ é wâng lé gi, a kê é za lhai pyâm to aq; hkâsu mù gâ le, haú gi, tûngbau pé lé byí to bê nghut lhê. Yhangmoq gi, haú chyoi-yúng myuq lé, lhamó myixe í hkyap ³ tup chôm nang kó râ nghut lhê. Hau htoq agó, ngò gi, ngá é saksé í yuq lé a-tsam byi râ nghut luí, yhangnhik gi, ji mebu wut^a mù, buinyì 1260 nyí tup myiqhtoi htoi kó râ nghut lhê.” gâ ri.

⁴ Yhangnhik gi, haú myidàm Yhumsing é hí má yuq tô é tsanlun gàm í gâm eq myibung tsungjang í lhum nghut ri.

⁵ Byù rayuq yuq, yhangnhik lé zing-ri nau é nghut jáng, yhangnhik é nhut mai myi htoq lô mù, yhangnhik é gye pé lé nyhê hkyô pyám râ nghut lhê. Yhangnhik lé kâm zing-ri é sù gi, haú su kut sat pyâm é hui zo râ nghut ⁶ lhê. Yhangnhik gi, yhangnhik myiqhtoi htoi nyi é buinyì pé má mau a wò râ matú, mauhkûng lé myhí pyám râ a-tsam wó akò; hau htoq agó, wui pé lé sui dut nhâng râ eq, nau é hkûn, wúm ajung jûng èq myidàm htoq lé ihkyup hkyó byi râ a-tsam le, wó akò nghut ri.

⁷ Yhangnhik gi, saksé ban hkâm é hkûn, haú nik dik htûm é Lasang-dong mai htoq lo é tân jung dusak gi, yhangnhik lé htim mù, ûng luí, sat ⁸ pyám râ nghut lhê. Yhangnhik é mâng lé gi, danghîng dông Sodom eq Egutuq gâ é, yhangnhik é Yhumsîng lé le, tapzîng má jén sat pyâm é myuq mó é hkyô gùng má, leq to râ nghut ⁹ lhê. Haú hkûn, byù myû hkangmó mâ é bang, byuhú hkangmó mâ é bang, myíng hkangmó mâ é bang, mingdán hkangmó mâ é bang gi, yhangnhik é mâng lé myhup pyám râ matú a gyo kô é za, sum nyí èq rahkyuí tup chôm ¹⁰ wú nyí kó râ nghut lhê. Myidàm htoq má nyi é bang gi, yhangnhik shi byuq é yanmai gabú nguingón luí, rayuq eq rayuq chyunghuq byí lhûm é dông ngón poí kut kó râ nghut lhê. Hkâsu mù gâ le, myiqhtoi haú nhik gi, myidàm htoq má nyi nyi é bang lé, wuihke jamjau byí lai bê su nhik nghut akò.

¹¹ Nghut kôlhang, sum nyí èq rahkyuí tup lai é htâng má, Garai Gasâng chyáng mâ é asak soq gi, yhangnhik chyáng wàng mù, yhangnhik gi, toq yap tô kô é nghut luí, yhangnhik lé myang é bang gi, gyai yhang gyuq nán ¹² bûm bekò nghut ri. Haú hkûn, “Shí má doq lò keq.” ga, mauhkûng mai yhangnhik lé wut é htê mó lé wó gyo kômù, yhangnhik é gye pé wú tô é u lé, mhut ji mù mauhkûng shut doq lò bekò nghut ri.

¹³ Haú u lé yang, layàng mó nún lô luí, myuq hkaú raxê tú mâ é ratú gi, htên gyop byuq bê nghut ri. Hau htoq agó, byù nyhit hkyîng yuq shi byuq bê nghut luí, myit gyó tô é bang gi, gyai yhang gyuq nán bûm kômù, mau-

^a 11:3 Ji mebu wut gâ é gi, iyon yôn é lé gâ lhê.

hkûng mâ é Garai Gasang lé hkyá-on shigyaú bum akô nghut ri.

- ¹⁴ Í lhum nghû râ dingnyé gi, laí byuq bê nghut ri; sûm lhum nghû râ dingnyé gi, jé râ za nghut bê.

Nyhit Lhum Nghû Râ Tut Mut É Hkyô

- ¹⁵ Nyhit yuq nghû râ maumang lagyo gi, yhâng é tut mut kat ri; haú hkûn, mauhkûng htoq má htê mó pé htoq lo é gi,

“Mingkan htoq mâ é mingdán gi, nga-nhûng é Yhumsîng eq Yhâng é Hkrisduq é mingdán dut bê nghut luí,

Yhang gi, pyat dedu ahtum abyuq up nyi râ nghut lhê.”

- ¹⁶ gâ ri. Haú hkûn, yhumsîng é hko-hkâm-tanghkuq má zûng mù, Garai Gasâng é hí má nyi tô é suwún í xe myi yuq gi, yhangmoq é myoqdong ngóm gop mù, Garai Gasang lé noqkuq uchyang taí kô é gi,

- ¹⁷ “Ahkuí pyat, a-nham pyat rû dui nyi é, wum-o a-tsam dik shoq bò Sû Yhumsîng Garai Gasang ê!

Nàng gi, hpungwup a-tsam mó chûng mù, up nyi bê nghut é yanmai, ngamoq, Nang lé jeju hkyá-on lhê.

- ¹⁸ Byù myú pé gi, nhikjum yo bùm kôluí, Náng é nhikmo-yo hkyô gi, jé bê nghut ri.

Shí bê bang lé, tarâ jéyáng râ eq, Náng é dui-nhâng zoshâng myiqhtoí pé lé le,

Náng é sân-yúng bang lé le, Náng é myîng lé gyuq hkunggâ é tiq ko lé le,

shigyaú chyunghuq byi râ eq, myidàm htoq lé lhoq hten

bang lé lhoq hten râ, ahkýing gi, jé bê nghut ri.”

gâ akô.

- ¹⁹ Haú hkûn, mauhkûng htoq má, Garai Gasâng é noqkuq yhûm hpông to luí, Yhâng é noqkuq yhúmhkaú má, Yhâng é dangshikaq eq sêng é saksé sidek lé byu-myang ri. Haú hkûn jáng, lhap hpyat é, myîng hûm é, maugum gûm é, layàng nún é, likwò mó gyó é pé dut htoq lo ri.

Myiwe Myhí Eq Manjung É Hkyô

- 12** Hau htoq agó, mauhkûng má limik kumlhá mó htoq shit é gi: myiwe myhí rayuq gi, buí lé wut chûng mù, lhamó má hkyí ke luí, kyí raxe í cham dap é janmaú lé, yhâng é ulhum má tsûng tô ri. Yhang gi, zogûng dut tô é nghut luí, zo hkû râ matú, zohkû-nò no nyi é yanmai, ³ gyai yhang ngau garú nyi ri. Hau htâng, mauhkûng má gotú kumlhá dum htoq shit é gi: gyai kô é manjung nè mó^a radu gi, ulhum nyhit lhum eq hkyuí raxê lhum dap luí, yhâng é ulhum hkangmó má janmaú ⁴ tsûng tô ri. Yhâng é sho-myi gi, mauhkûng mâ é kyí sum tú mâ é ratú lé shûm tsîng yù mù, myidàm htoq má he hpyit hkyô kat ri. Manjung haú gi, zoshâng hku htoq kat eq wó myui hâng kat shoq ga, haú myiwe myhí é ⁵ hí má lánng yap tô ri. Myiwe myhí haú gi, mingdán banshoq lé shamtoq dum-báng èq up râ nghut é yuqzo rayuq lé hkû bê nghut ri; yhâng é zoshâng lé gi, Garai Gasâng é hí má le, Yhâng é hkohkâm-tanghkuq hí má le bún toq ⁶ yú bê nghut ri. Myiwe myhí haú gi, yhâng é matú Garai Gasang lajàng to byí é yoso hkaú má hpang wang é

^a 12:3 *Manjung nè mó gâ é gi*, Tsadán lé taí nau é nghut lhê.

bê nghut ri; haú jowò má, yhang gi, 1260 nyí tup lhom baú é hui râ nghut lhê.

- ⁷ Mauhkûng htoq má majan htoq bê nghut ri. Mihkaelaq eq yhâng é mau-mang lagyô pé gi, manjung lé majan ê zan kôluí, haú manjung eq yhâng é
- ⁸ maumâng pé le, tau zân akô. Nghut kôlhang, yhangmoq gi, a ûng kômù, mauhkûng mâ é yhangmoq nyí jowò
- ⁹ lhoq hpyuq pyám bekô nghut ri. Haú mingkan gón lé hkyô shuí nghoq é, natzau eq Tsadán ga é, a-nham lhê é lhangmuí nghut é manjung mó haú gi, yhâng é maumang pé eq rahá myidàm htoq má dú hkyô pyâm é hui bê nghut ri.
- ¹⁰ Haú hkûn, mauhkûng htoq má htê mó dông taí é lé, ngò wó gyô é gi, “Ahkuí gi, nga-nhûng é Garai Gasâng é hkyi yù hkyô, hpungwup a-tsam eq mingdán le, Yhâng é Hkrisduq é ahko ahkáng le, jé bê nghut ri. Hkâsu mù gà le, nga-nhûng é Garai Gasâng é hí má, nga-nhûng é gumang wuì lé, nyí, myín mara hun nyi é sù gi, dú hkyô pyâm é hui bê nghut ri.
- ¹¹ Yhangmoq gi, haú Sauzô é suí é yanmai le, yhangmoq saksé hkâm é mungdâng é yanmai le, yhang lé ung pyám bekô nghut luí, shi byuq é jé shoq yhumsing asak lé a ha kó nghut ri.
- ¹² Haú mù luí, mauhkûng eq haú má nyi é bang ê, gabú nyí keq!

Nghut kôlhang, myidàm htoq eq wuìshuq lung-aú gi, dingnyé wó ri;

hkâsu mù gà le, haú natzau gi, yhâng é ahkyíng yàm-yoq tot za ru joq alô nghut é lé sê é yanmai,

nhikmo-yô é èq, nungnhik chyáng gyó lé lô bê nghut ri.”

gâ ri.

- ¹³ Haú manjung gi, myidàm htoq má dú hkyô kat huí é lé myàng luí, haú yuqzo hku é myiwe myhí lé zing-rí ri.
- ¹⁴ Myiwe myhí haú gi, lhangmuí chyáng mai wó lut luí, yhang é matú lajàng tô é yoso má wó dang jé mù, ahkyíng ralhum, ahkyíng í lhum, ahkyíng rawuí hkup^a lhom baú nyi é hui sháng gaq ga, zùn mó é dùng í lhum byí é
- ¹⁵ huí ri. Haú hkûn, haú lhangmuí gi, myiwe myhí haú lé wó lhoq myhú pyám shoq ga, myiwe myhí é nunghtáng má, yhâng é nhut mai wuì mó
- ¹⁶ lâng î é wuì lhoq htoq kat ri. Nghut kôlhang, manjung nhut mai lhoq htoq kat é wuì mó lâng haú lé, myigùng gi, yhâng é nhut há mù myui pyám byí é dông, myiwe myhí haú lé garúm yu ri.
- ¹⁷ Haú mù, manjung haú gi, myiwe myhí hau é yanmai, gyai yhang nhikmo-yo luí, Garai Gasâng é jep é tarâ lé châng é bang eq Yesuq é saksé lé myhik zing nyi é bang nghut é, myit gyó tô é, myiwe myhí é awut ashín pé lé, majan
- ¹⁸ zan râ matú htoq e ri. Manjung haú gi, wuìshuq lung-aú yàm má yap tô ri.

Tân Jung Dusak Radu Wuìshuq Lung-aú Mai Htoq Lo É Hkyô

13 Haú hkûn, haú wuìshuq lung-aú mai tân jung dusak radu htoq lo é lé, ngò myàng ri. Dusak haú

^a 12:14 *Ahkyíng ralhum, ahkyíng í lhum, ahkyíng rawuí hkup* gà é gi, “razàn, í zân, lhamó hkyuq hkyap” lé gà é nghut lhê; haú gi, 1260 nyí nghut ri.

má, hkyuî raxê lhum eq ulhum nyhit lhum dap to luí, yhâng é hkyuî pé má gi, janmaú raxê lhum tsúng to mù, ulhum hkangmó má gi, Garaî aróng lhoq hpoi é myìng dap tô bum ri. Ngò myang é tân jung dusak haû gi, bauze-lo su dut ri; nghut kôlhang, hkyî gi, wàm hkyî su dut luí, nhut gi, hkanghkyî nhut su dut ri. Haû manjung gi, yhâng é a-tsam eq yhâng é hkohkâm-tanghkuq lé le, ahko ahkáng mó lé le, tân jung dusak haû lé ap byî ri. Tân jung dusak hau é ulhum ralhumi gi, shî râ í é dàm dap huí é su dut kôlhang, damhkô haû gi, yâ ge pyám bê nghut luí, mingkan gón gi, mauhong byuq kômù, yhâng

⁴ htâng châng bùm bekô nghut ri. Manjung gi, tân jung dusak lé ahko ahkáng ap byî é yanmai, byu pé gi, manjung haû lé noqkuq é htoq agó, tân jung dusak haû lé le, noqkuq kômù, “Ó yuq wá, tân jung dusak shí du su dut ri lú? Ó yuq wá, yhang lé wó zan ùng râ lú?” ga bum akô.

⁵ Gyáng dang tái râ eq Garaî aróng lhoq hpoi dang tái râ nhut gi, tân jung dusak haû lé byi to bê nghut é htoq agó, lhamó myí xe í hkyap tup, yhâng é ahko ahkáng lé chùng

⁶ râ ahkáng wó bê nghut ri. Yhang gi, yhâng nhut hpóng mù, Garaî Gasâng aróng lé lhoq hpoi dang tái é htoq agó, Garaî Gasâng é myìng eq nyì jowò lé le, mauhkúng htoq má nyi é bang lé

⁷ le, lumù gansang é sù nghut ri. Haû sân-yúng bang lé majan zân ung yù râ a-tsam, yhang lé byi bê nghut ri. Hau htoq agó, byuhú hkangmó lé le, byù myú hkangmó lé le, myíng hkangmó lé le, mingdán hkangmó lé le, up râ

⁸ ahkáng, yhang lé byi bê nghut ri. Haû sat hui bê Sauzo eq sêng é asak jìhpán laiká buk má, mau htoq xâng hkun mai, myìng a kê lhom é, myidàm htoq má nyi é lunglhang bang gi, haû tân jung dusak lé noqkuq kó râ nghut lhê.

⁹ Gyo râ nohkyap dap sù gi, gyô yù sháng gaq.

¹⁰ Shúm zung é hui râ sù gi, shúm zung é hui râ za nghut lhê.

Sham èq sat é hui râ sù gi, sham èq sat é hui râ za nghut lhê.^a

Haû mù, sân-yúng bang gi, hkam jân é hkyô eq lhumzui hkyô bò kó râ nghut lhê.

Tân Jung Dusak Radu Myigùng Mai Htoq Lo É Hkyô

¹¹ Hau htâng, ngò gi, tân jung dusak gotû radu^b myigùng mai htoq lo é lé myang ri. Yhang gi, sauzô é hkyuî su dut é hkyuî í lhum yuq ri; nghut kôlhang, yhang gi, manjung su ga dang

¹² nyo ri. Yhang gi, tân jung dusak hí lhê dû é ahko ahkáng lunglhang lé, haú du é hí má chùng mù, shî râ í é damhkô ge byuq é tân jung dusak haû lé, haû mingkan eq mingkan htoq má

¹³ nyi é bang lé noqkuq nhang ri. Hau htoq agó, yhang gi, byu pê é myoq hí má, mauhkúng mai myigùng shut myi lé lhang wó lhoq hkyô é, limik

¹⁴ kumlhá mó kut shit ri. Yhang gi, tân jung dusak hí lhê dû é hí má, kumlhá haú pé kut râ ahkáng wó é yanmai, myidàm htoq má nyi é bang lé mhoq hpyoq yù luí, haû sâm damhkô dap kôlhang, dui nyi é tân jung dusak haû lé, hkunggá é dòng, yhangmoq lé, yhâng é alhò saí nhang ri.

^a 13:10 Chyúmding ra-am má gi, Byù rayuq yuq lé, shúm kut é sù gi, shúm zung é hui râ nghut lhê. Sham èq byù sat é sù gi, sham èq sat é hui râ nghut lhê, ga bo tô ri. ^b 13:11 Tân jung dusak gotû radu gá é shî gi, myiqhtoi pyoq lé gá nau é nghut lhê.

- ¹⁵ Yhang gi, haû tân jung dusak hí lhê dû é alhô lé, soq wó mut kat byî é a-tsam lé wó yû sù nghut ri; haû mù, alhô haû gi, dang wó taí luí, yhang lé a noqkuq é bang lé, sat hui nhang ri.
- ¹⁶ Hau htoq agó, yhang gi, byù mó byù zo, wó sù myùng sù, luthkyô wó bang eq jùn pé, yuq hkanmó lé, yhumsing é loqyo loq má nghut nghut, ngelang má nghut nghut, masat lhô zik tap
- ¹⁷ yû nhang ri. Haû hkûn, haû tân jung dusak é mying, a nghut jáng, yhâng mying é masat námbat dap sù mai lai luí, ûng é, wui é hkyô, ó yuq le wó kut râ a nghut.
- ¹⁸ Hpaqchyî byéng-yá gi, shî má bo râ ri. Hpaqchyî bò sù gi, haû tân jung dusak é námbat lé sôn wú sháng gaq; hkâsu mù gâ le, haû gi, byù rayuq é námbat nghut lhê. Yhâng é námbat gi, 666 nghut ri.

Sauzo Eq 144,000 Yuq É Hkyô

- 14** Hau htâng, ngò wú kat le, haû Sauzo gi, Zi-un bùm má yap tô é lé myang ri; Yhâng mying eq Yhâng Wâ é mying lé, yhumsing é ngelang má kê tap tô é byù 144,000 yuq le,
- ² Yhang eq rahá yap tô bùm ri. Haû hkûn, ngò gi, wui pé mying hûm é htê eq maugum mó gûm é htê su gâ é htê, mauhkûng mai htoq lo é lé wó gyô ri. Ngò wó gyô é htê haû gi, tíng bat bang, yhangmoq é tíng lé bat myhîng
- ³ é htê su gâ ri. Yhangmoq gi, haû hko-hkâm-tanghkuq é hí má le, dui é dusak myí du eq suwún wui pê hí má le, mahkôn sik lé hkon akô nghut ri. Haû myidàm htoq mai hkyi yù huí é
- ⁴ kó nghut ri. Haû bang gi, myiwe wui

eq gungsho a zum é bang nghut luí, yhangmoq gi, zorâm jet pé nghut bum akô. Yhangmoq gi, haû Sauzo hká shut é le hká shut châng é bang nghut akô. Yhangmoq gi, byu pê chyáng mai wui yu é hui luí, sâng-hi myhîng é ashi lé su, haû Garai Gasang eq Sauzo lé ap

⁵ byî é hui akô nghut ri. Yhangmoq é nhut má, mhaû é hkyô haí le a taí kó; yhangmoq chyáng mara hûn râ hkyô le a bò kó nghut ri.

Maumang Sum Yuq É Hkyô

- ⁶ Hau htâng, maumang lagyo gotû rayuq gi, maulat má dang wún é lé ngò myang ri; yhang gi, haû mingkan htoq má nyi é, mingdán hkanmó mâ é bang, byuhú hkanmó mâ é bang, myíng hkanmó mâ é bang, byù myû hkanmó mâ é bang lé, hko kyo râ ahtum abyuq é gabú danglù wó ri.
- ⁷ Yhang gi, “Garai Gasang, tarâ jéyáng râ ahkyíng jé bê nghut é yanmai, Yhang lé gyuq hkungga luí, Yhâng é hpungwup a-tsam lé shigyau keq. Haû mauhkûng eq myigùng, wuishuq lung-aû eq wuíbúm pé hpan tô é Sù lé, noqkuq keq.” ga luí, htê mó èq taí ri.
- ⁸ Í yuq nghû râ maumang lagyo gi, htâng má châng lé mù, “Haû mingdán pé^a lhungláng lé, yhang kut shut é ashop é dông gungsho zùm yap é hkyô, nhik lhoq yô é tsibiyiq wing shuq nhang é, Babelon myuq mó gi, lêng gyop bê! Lêng gyop bê!” ga taí ri.
- ⁹ Sum yuq nghû râ maumang lagyo gi, yhangnhik é htâng má châng lé mù, “Haû tân jung dusak eq yhâng é alhô lé, noqkuq luí, yhumsing é ngelang má nghut nghut, loq má nghut nghut, yhâng é masat lhô lé tap yu
- ¹⁰ é sù, ó yuq nghut kôle, Garai Ga-

^a 14:8 *Mingdán pé gâ é gi, a lumjîng bang lé gâ é nghut lhê.*

sâng é nhikmo-yo nghu é góm má hut kat tô é, nhik-yô é tsibiyiq wing jet lé shuq râ nghut lhê. Hau htoq agó, haû chyoiyúng maumang lagyô pê hí má le, Sauzô é hí má le, yhang gi, duq nyi é myi eq hang èq zing-rî é

¹¹ hui zo râ nghut lhê. Yhangmoq zing-ri huí é myihkau gi, pyat dedu ahtum abyuq htoq nyi râ nghut lhê. Haû tân jung dusak eq yhâng é alhô lé, noqkuq é bang eq yhâng mying é masat lhô tap yû sù é matú gi, nyí, myín, no râ ahkyíng wó râ a nghut.” ga luí, htê

¹² mó èq taí ri. Garai Gasâng é jep é tarâ cháng luí, Yesuq lé lhumzuí nyi é bang nghut é, sâ-n-yúng bang gi, hkam shirang é hkyô bò râ lhê.

¹³ Hau htâng, “Ahkuí mai gi, haû Yhumsîng má shî é sù, hkungsô wó nyi ri nghû kê to aq.” gâ é htê, mauhkûng mai htoq lo é lé, ngò wó gyô ri. Haû hkûn, haû Woi-nyí gi, “Nghut rô, yhangmoq kut é muzó é akyû gi, yhangmoq htâng cháng râ nghut é yanmai, yhangmoq gi, yhumsîng zuí ngú é muzó mai myang hkying bekô râ nghut lhê.” ga taí ri.

Myidàm Htoq Mã É Kyôshi Shû É Hkyô

¹⁴ Ngò dum wú kat le, mhut hpyú rahtui ngá hí má joq tô é lé myang ri; mhut hpyú htoq haû má Byu Yhangzo su dut é byù rayuq zung tô ri; Yhâng é ulhum má gi, hîng janmaú tsûng to luí, Yhâng é loq má gi, htoq é zaiyik

¹⁵ ralhûm chung tô ri. Haû hkûn, gotû maumang lagyo gi, noqkuq yhûm mai htoq lô mù, “Haû myidàm htoq mã é kyôshi gi, myhîng zan to bê nghut luí, kyôshu yoq jé bê nghut é yanmai, náng é zaiyik chûng mù, yik shû yû aq.” ga, haû mhut htoq má zung tô é

¹⁶ Sû lé, htê mó èq taí garû kat ri. Haû mù, mhut htoq má zung tô é Sû gi, Yhâng é zaiyik lé, myigùng htoq má dú hkyô kat luí, myidàm htoq mã é kyôshi lé, ban shû yù bê nghut ri.

¹⁷ Maumang lagyo gotû rayuq gi, mauhkûng htoq mã é noqkuq yhûm mai htoq lo ri; haû yuq le, htoq é zaiyik ralhûm chung tô ri. Haû, myi lé

¹⁸ up é maumang lagyo gotû rayuq gi, hkungga gyap mai htoq lô mù, htoq é zaiyik chûng sù lé, “Myidàm htoq mã é tsibiyiq shi gi, myhîng bê nghut é yanmai, náng é htoq é zaiyik yù mù, tsibiyiq shipaû haû pé lé, yâm tsîng yù aq.” ga, htê mó èq taí garû kat ri.

¹⁹ Maumang lagyo haû gi, yhâng é zaiyik lé, myidàm htoq mã dú hkyô kat mù, haû mã é tsibiyiq shi pé lé yâm tsîng yù luí, Garai Gasang nhikmo-yô é tsibiyiq wing pyik jang mó má hut

²⁰ kat bê nghut ri. Myuq shinggan mã é tsibiyiq wing pyik jang haû má, tsibiyiq shi haû pé lé nâng nyhoq luí, tsibiyiq wing pyik jang haû mai suí yui htoq lo é gi, myang lunghtúng myháng jé shoq jé lô mù, 180 dêng^a kô we shoq yui ló bê nghut ri.

Ló Htâng É Wúm Nyhit Lhum Chung É Maumang Lagyo Nyhit Yuq É Hkyô

15 Ngò gi, mauhkûng má gotû limik kumlhá joq é lé, dum byu-myang ri; haû gi, wúm nyhit lhum chung é maumang lagyo nyhit yuq nghut ri; wúm haû pé gi, ló htâng é wúm pé nghut ri; hkâsu mù gâ le, Garai Gasang nhikmo-yô é hkyô gi,

² haû gû mai bàn râ nghut lhê. Hau htoq agó, myi eq nyhô tô é myoqjàm wui-nhông su dut é lé le, ngò myang ri; haû tân jung dusak eq yhâng é alhô

^a 14:20 180 dêng gi, Grik pê é stadia 1600 kô bo ri.

lé le, yhang mying é námbat lé le, wó ung pyám bê bang gi, wuì-nhông yàm haú má yap tô bum akô; yhangmoq gi, Garai Gasang byî é tíng pé lé chung
 3 to kôluí, Garai Gasâng é dui-nhâng zo-shâng Mosheq é mahkôn eq haú Sauzô é mahkôn lé hkôn kô é gi,

“Wum-o a-tsam dik shoq bò Sû
 Yhumsîng Garai Gasang ê,
 Nàng kut é muzó gi, hkik é eq mauhpo yhang nghut ri.

Pyat pyat zaí zaí é Hkohkâm ê,
 Náng é hkyô gi, dingmán é eq tengmán é nghut ri.

4 Yhumsîng ê, Nàng lé a gyuq a hkungga râ eq Náng myîng lé a lhoq gyaú râ gi, ó yuq wá nyì râ lhú?

Hkâsu mù gà le, Nàng za chyoiyúng é Sû nghut ri.
 Nàng kut é dingmán hkyô gi, tân shit bê nghut é yanmai,
 byù myú lhungháng gi, Náng hí má lé noqkuq kó râ nghut lhê.”

gâ akô nghut ri.

5 Hau htâng, ngò wú kat le, mauhkûng má, saksé zúm joq é noqkuq
 6 yhûm bóng tô é lé, myang ri. Haú wúm nyhit jung chung é maumang lagyo nyhit yuq gi, noqkuq yhûm haú mai htoq lo ri; yhangmoq gi, sân-yúng duqbó é nú nhám mebu wut luí, yhangmoq é wànggàng má hîng
 7 hpyihit baíyup tô akô nghut ri. Haú hkûn, haú dui é dusak myí du má é radu gi, pyat dedu ahtum abyuq dui nyi é Garai Gasâng é nhikmo-yo hkyô byíng tô é hîng góm nyhit lhum, haú maumang lagyo nyhit yuq
 8 lé byî ri. Garai Gasâng é hpungwup shingkang eq hpungwup a-tsâm é yanmai, haú noqkuq yhûm gi, myihkau byíng zan to bê nghut luí, haú mau-

mang lagyo nyhit yuq é wúm nyhit jung za a bàn bàn gi, noqkuq yhûm haú má ó yuq le a wó wâng kó nghut ri.

Garai Gasâng É Nhikmo-yo Hkyô Bo É Góm Nyhit Lhum

16 Hau htâng, maumang lagyo nyhit yuq lé, “Htoq ê mù, haú Garai Gasâng é nhikmo-yo hkyô bo é góm nyhit lhum lé, myigùng htoq má hut hkyô kat keq.” ga, noqkuq yhûm mai htê mó èq taí é lé, ngò wó gyô ri.

2 Haú hkûn, sânghí yuq nghú râ maumang lagyo gi, htoq ê mù, yhang é góm lé, myigùng htoq má hut hkyô kat jáng, haú tân jung dusak é masat lô dap é eq yhang é alhô lé noqkuq é bâng chyáng, achayut é eq hkê-nho dik é, yapjeq ana dap tô bùm bê nghut ri.

3 Í yuq nghú râ maumang lagyo gi, yhang é góm lé, wuìshuq lung-aú má hut hkyô kat ri; haú gi, shí bê byù rayuq é sui su dut byuq é htoq agó, haú má lúng é dui jung lhungháng gi, shi byuq bê nghut ri.

4 Sum yuq nghú râ maumang lagyo gi, yhang é góm lé, wuìlàng pé eq wuìbúm pé má hut hkyô kat jáng, haú pé
 5 gi, sui dut byuq bê nghut ri. Haú hkûn, haú wuì lé upzúng é maumang lagyo taí é lé, ngò wó gyô é gi,

“A-nham pyat le, ahkui pyat le,
 rú nyi nyi é Chyoiyúng Sû ê,
 Nàng haú su kut jéyáng bê nghut é yanmai, Nàng gi, tengmán Sû nghut ri;

6 hkâsu mù gà le, yhangmoq gi, Náng é sân-yúng bang eq myiqhtoí pé é sui lé, lhoq htoq pyám bekô nghut luí,
 Nàng gi, yhangmoq lé sui shuq nhang é nghut ri; haú gi,

yangmoq hui zo gíng é hkyô
nghut ri.”

⁷ gâ ri. Haú hkûn, haú hkungga gyap
mai,

“Nghut rô! Wum-o a-tsam dik
shoq bò Sû Yhumsîng Garai
Gasang ê, Nàng jéyáng é hkyô
pé gi, tengmán é eq dîngmán
é nghut ri.”

ga le, taí kat é htê lé, ngò dum wó
gyô ri.

⁸ Myi yuq nghû râ maumang lagyo
gi, yhâng é góm lé, bui é ahtoq má
hut hkyô kat é hkûn, bui gi, byu pé
lé myí èq nyhê kyuq râ ahkáng wó

⁹ bê nghut ri. Haú mù, yangmoq gi,
nyé dik é èq nyhê kyuq é hui zo luí,
wúm shí pé lé up nyi é Garai Gasâng
é myíng lé nhîng akô; haú-í yang
hpuzo kôlhang, yangmoq gi, myit le
a lhîng kó, Garai Gasang lé le a shi-
gyáu kó nghut ri.

¹⁰ Ngo yuq nghû râ maumang lagyo gi,
yhâng é góm lé, tân jung dusak é hko-
hkâm-tanghkuq htoq má hut hkyô kat
jáng, yhâng é mingdán gi, mauchut
tuq dut byuq bê nghut ri. Mingbyû
wùi gi, yhumsing é shô lé lháng, ngat
tân bùm shoq shî-nò jamjau hui zo kô-
¹¹ luí, yangmoq no hpû é eq jeq é ana
dap é yanmai, mauhkûng mâ é Ga-
rai Gasang lé nhîng akô; haú-í yang
hpuzo kôlhang, yangmoq gi, yang-
moq kut é hkyô mai myit a lhîng shi
kó nghut ri.

¹² Hkyuq yuq nghû râ maumang la-
gyo gi, yhâng é góm lé, Uhprat wùi
mó lãng má hut hkyô kat jáng, wùi-
làng haú gi, kân byuq luí, haú bui-
htoq hkyam mâ é hkohkam pé, lé lô râ
¹³ hkyô dong bê nghut ri. Haú hkûn, po
su dut é, agè ashop é byò sum woi-nyí

lé, ngò myang ri; haú pé gi, manjung,
tân jung dusak, myiqhtoi pyoq pê é
nhut mai htoq lô kô é bang nghut
akô. Woi-nyí haú pé gi, nat gâng pê
¹⁴ é woi-nyí nghut luí, limik kumlhá pé
kut shit kômù, haú wum-o a-tsam dik
shoq bò Sû Garai Gasâng é buinyí mó
má majan zan râ matú, mingkan gón
mâ é hkohkam pé lé lhoq tsîng yù râ
ga, htoq e lô akô nghut ri.

¹⁵ “Wú keq, Ngò gi, hkau sù su jé lé
é nghut lhê! Su hí má gungchîn a
so râ eq hoq hpu hkyô a lhoq htoq
shit sháng gaq ga, yhumsing é wutbu
wutmè lé, zúng nyí luí, gying gying
kut nyi é sù gi, hkungsô wó nyi ri.”^a

¹⁶ Haú mù, nat haú bang gi, hkohkam
pé lé, Hebre myíng dông Armagedon
gâ é jowò má, rahá ji tsîng tô akô
nghut ri.

¹⁷ Nyhit yuq nghû râ maumang lagyo
gi, yhâng é góm lé, maulat má hut
hkyô kat ri; haú hkûn, haú noqkuq
yhûm mâ é hkohkâm-tanghkuq mai,

¹⁸ “Bàn bê!” gâ é htê mó htoq lo ri. Hau
htoq agó, lhaph pyat é, myíng hûm é,
maugum gûm é eq layàng mó nún é
pé dut htoq lo ri. Myidàm htoq má,
xângzo byù lé nyi é hkûn mai, layàng
haú su nún é eq haú-í htan é gi, a

¹⁹ joq wú shí é nghut lhê. Haú mù, haú
myuq mó gi, sûm hkyam byak goq
byuq luí, mingdán pé mâ é myuq pé
le, gyop byuq bê nghut ri. Garai Ga-
sang gi, Babelon myuq mó lé le myit
bun luí, Yhâng é nhikmo-yô é tsibyiq
wing byíng shoq bo é góm lé shuq

²⁰ nhâng bê nghut ri. Zinlóng hkanmó
gi, hpang byuq bê nghut luí, bùm pé
²¹ le byuq byuq bê nghut ri. Haú hkûn,
myi xê jói kô laí é likwò mó gi, mau-
hkûng mai byu pé htoq má wo gyó

^a 16:15 Dang shí hkun gi, Yesuq taí é dang nghut lhê.

gyûn ri; likwò wúm gi, gyai yang wuîhke jamjaû é wúm nghut é yan-mai, byu pé gi, Garai Gasang lé nhing bum akô nghut ri.

Shiwa Myhí Mó É Hkyô

17 Haû góm nyhit lhum chung tô é maumang lagyo nyhit yuq mâ é rayuq gi, lé lô mù, “Lé aq, haû wuî myo myô pê htoq má zung tô é shiwa myhí mó lé dam byi râ hkyô,
² ngò, nang lé tân shit bá. Myidàm htoq mâ é hkohkam pé gi, yang eq rahá ashop é dông gungsho zùm yap é hkyô kut shut kôluî, myidàm htoq má nyi é bang gi, yang kut shut é myiwe yuqgè nyi zô lhúm hkyo é tsibiyiq wing lé shuq wut bùm bekô nghut ri.” ga luî, ngò lé taî ri.

³ Haû mù, maumang lagyo haû gi, Woi-nyí má, ngo lé yoso shut shuí wang e lô ri. Haû ulhum nyhit lhum eq hkyuî raxê lhum dap luî, taî hpoî é mying kôm dap tô é, zam zam ne é tân jung dusak htoq má zung tô é myiwe myhí rayuq lé, ngò myang ri.

⁴ Myiwe myhí haû gi, me me dut é eq zam zam ne é mebu wut luî, hîng, lungsêng, palhé pê èq mhôn chung ri; yhâng é loq má gi, yhâng é myiwe yuqgè nyi zô lhúm hkyo é agot a-û hkyô eq achaq achyut é zè pé byíng tô é hîng góm ralhúm chung tô ri.

⁵ NIK DIK É HKYÔ, MYIDÀM HTOQ MÂ É ACHAQ ACHYUT HKYÔ PÊ EQ SHIWA MYHÍ PÊ É YHÂNGNU, BABELON MYUQ MÓ.

gâ é mying gi, yhâng é ngelang má
⁶ kâ tap tô ri. Myiwe myhí haû gi, sân-yúng bâng é sui eq Yesuq é saksé hkám bâng é sui shuq wut tô é lé, ngò myang ri.

Haû mù, ngò gi, gyai yang maú
⁷ byuq é nghut lhê. Haú hkûn, mau-

mang lagyo haû ngo lé taî é gi, “Nàng, haû mù maú lhê lhú? Myiwe myhí haû eq, yang jî tô é, ulhum nyhit lhum eq hkyuî raxê lhum dap é tân jung dusak é zaú tô é hkyô lé, ngò,
⁸ nàng lé taî kyo râ nghut lhê. Nàng myàng é tân jung dusak haû gi, hí hkûn nyi wú bê, ahkuî a nyi lo, nghut kôlhang, nik dik htûm é Lasang-dong mai htoq lô mù, htên byoq é hui râ nghut lhê. Mau htoq xâng hkun mai, asak jihpán laiká buk má mying a kâ tô é, myidàm htoq má nyi é bang gi, tân jung dusak haû lé myàng kô é hkûn, maú byuq bùm kó râ nghut lhê. Hkâsu mù gâ le, haû gi, nyi wú bê, ahkuî a nyi lo, nghut kôlhang, dum lé râ nghut é yanmai nghut ri.

⁹ Hpaqchyí byéng-yá bo é nyan gi, shí má râ ri. Haû ulhum nyhit lhum gi, myiwe myhí zung é bùm nyhit lhum nghut ri; hau htoq agó, hko-
¹⁰ hkâm nyhit yuq le nghut ri. Ngo yuq gi, byit gyó byuq bê; rayuq gi, ahkuî nyi to ashí; myit tô é rayuq gi, a jé lé shi nghut ri; haú yuq jé lé é hkûn, yang gi, ahkyíng razup zo za wó nyí
¹¹ râ nghut lhê. Hí hkûn nyi wú bê, ahkuî a nyi lo dut é tân jung dusak haû gi, shit yuq nghú râ hkohkâm nghut ri. Yang gi, haû nyhit yuq eq sêng é yan-mai, yhâng é htên byoq hkyô shut e lô râ nghut lhê.

¹² Haû nàng myàng é hkyuî raxê lhum gi, mingdán a myang yù shí é hko-hkâm raxê yuq nghut ri; nghut kô-lhang, yangmoq gi, haû tân jung dusak eq rahá za, hkyíng hkum rahkum kô hkohkâm ayá lé wó yû kó râ
¹³ nghut lhê. Yangmoq gi, myit myoq-byù hkyô ralhúm za nghut kômù, yangmoq é a-tsam eq ahko ahkáng lé, haû tân jung dusak lé byi kó râ

- ¹⁴ nghut lhê. Yhangmoq gi, haû Sauzo lé majan chôm zan kó râ nghut lhê; nghut kôlhang, Sauzo haû gi, yhum-sing pé é Yhumsing eq hkohkam pé é Hkohlâm nghut é yanmai, yhangmoq lé ung pyám râ nghut lhê. Haû Sauzo eq rahá nghut é bang gi, ji yù huí é bang, hkyin yù huí é bang eq lhumzuí é bang nghut akô.” gâ ri.
- ¹⁵ Hau htâng, maumang lagyo haû ngo lé dum taí é gi, “Nàng myang é, shiwa myhí zung tô é wuì pé gi, byù myû pé, byù ajùm ayò pé, mingdán pé eq
- ¹⁶ myíng lhumjup nghut ri. Haû nàng myang é tân jung dusak eq hkyuí raxê lhum gi, shiwa myhí haû lé a jú kut kó râ nghut luí, yhâng é sutzè banshoq shang yu pyám byi mù, mebu lhang a dap loshoq achîndum kut to kó râ nghut lhê; hau htoq agó, yhâng é sho lé zo luí, myí èq nyhê hkyô pyám kó
- ¹⁷ râ nghut lhê. Hkâsu mù gâ le, Garai Gasang gi, haû bang mai, i-myt rahkat zâ èq, yhumsing é a-tsam, haû tân jung dusak lé byi râ myit, yhangmoq lé kat byi Sû nghut ri. Haû mù, yhangmoq gi, Garai Gasâng é mung-dang lhoq dik é hkûn jé shoq, haû su
- ¹⁸ kut kó râ nghut lhê. Nàng myang é myiwe myhí haû gi, myidàm htoq mâ é hkohkam pé lé up zô é myuq mó nghut ri.” gâ ri.

Babelon Lêng Gyop É Hkyô

- 18** Hau htâng, maumang lagyo gotú rayuq mauhkûng mai gyó lo é lé, ngò myang ri. Yhang gi, ahko ahkáng mó wó é nghut luí, haû myidàm htoq lé, yhâng é hpungwup èq
- ² duqbó to byí ri. Yhang, htê mó o mó èq garú taí kat é gi,
 “Babelon myuq mó gi, lêng gyop bê, lêng gyop bê!

Myuq haû gi, nat gâng pé é yhûm eq agè ashop é nat hkangmó é hkyûng dut byuq é htoq agó, a sansêng é eq achaq achyut é ngoq pé nyi é sùt dut byuq bê nghut ri.

- ³ Hkâsu mù gâ le, haû byù myû lunglhang gi, yhang kut shut é ashop é dông gungsho zùm yap é hkyo é nhik lhoq yô é tsibiyiq wing shuq wut bùm bekô nghut ri.

Haû myidàm htoq mâ é hkohkam pé gi, yhang eq myi shut làng shut hkyô kut bekô nghut é htoq agó,
 myidàm htoq mâ é hpugá wuiloq gâ bang gi, yhâng é ladu lai shoq ngón kûn é hkyo é yanmai, sutzè wó bôm bekô nghut ri.”

gâ ri.

- ⁴ Hau htâng, mauhkûng mai htoq lo é htê gotú lé ngò dum wó gyô é gi,
 “Ngá é byu pé ê, myuq hau é mara pé má nungmoq a bo lòm râ matú le,
 yhâng é wúm pé lé nungmoq a hui zo kó râ matú le, haû mai hân hpang htoq lò keq;
- ⁵ hkâsu mù gâ le, yhâng é mara gi, mauhkûng htung shoq bum zang to bê nghut luí,
 Garai Gasang gi, Yhâng é a dingmán é hkyô lé myit bun bê nghut ri.
- ⁶ Yhang kut byí é eq rajung za, yhang lé tau kut byi keq;
 Yhang kut bê muzó eq rajung za, yhang lé í tú taú kut keq.
 Yhang nyhó byí é góm má, í tú taú nyhó byi keq.
- ⁷ Yhang gi, yhumsing gùng lé yhumsing lhoq gyaú yú luí,

- ladu lai shoq ngón kún nhang
é í,
wúhke jamjau hkyô eq iyon
hkyô myo myo, yhang lé taû
byi keq.
Hkâsu mù gâ le, yhang gi, yhang
é myit má,
'Ngò gi, hkohkâm myhí nghut
lhê; ngò gi, chuimó a nghut;
hkâ-nhâm le iyon hui râ a nghut.'
ga gumrong nyi ri.
- ⁸ Haû mù luí, yhang é wúm nghu é
shí hkyô, iyon hkyô eq mutmó
gyó hkyô gi,
ra-nyí bui má za, yhang chyáng
jé râ nghut lhê.
Hau htoq agó, yhang gi, myí èq
nyhê hkyô pyâm é lé hui râ
nghut lhê;
hkâsu mù gâ le, yhang lé jéyáng
é, haû Yhumsîng Garai
Gasang gi, wum-o a-tsam bò
Sû nghut ri.
- ⁹ Haû yhang eq rahá myiwe yuqgè
nyí zò lhum hkyô kut shut é eq yhang
é ladu lai shoq ngón kún hkyô má bo
lom é, haû myidàm htoq mâ é hko-
hkam pé gi, yhang lé nyhê hkyô é
myihkau lé myàng kôjáng, ngaubyi
ngau-nhap eq iyon yôn é huí bùm kó
¹⁰ râ nghut lhê. Yhangmoq gi, yhang no
jamjaû nyi é lé wú gyuq kôluí, we we
má yap to kômù,
'Hkik é myuq mó, a-tsam bo
é Babelon gi, dingnyé wó
ri-nhung!
Dingnyé wó ri-nhung! Hkyíng
hkum ralhum má za, dam byí
é hkyô gi, náng chyáng jé
bu-nhung!'
ga luí, taí garu kó râ nghut lhê.
- ¹¹ Myidàm htoq mâ é hpugá byu pé gi,
yhang é yanmai, ngaubyi ngau-nhap
é eq iyon yôn é hui kó râ nghut lhê;
hkâsu mù gâ le, yhangmoq é gai zè
lé, ó yuq le a wuì byi lo kô é yan-
mai nghut ri. Gai zè haû pé gi, hîng,
ngùn, lungsêng eq palhé, nú-nhâm é
pán, me me dut é pán, laí hkyíng eq
zam zam ne é pán; namngón jung sik
ajung jung, maguí zuí lé saí é, gùloq
hpaû jung sik lé saí é, gyi lé saí é,
shamtoq lé saí é, luq hpyû lé saí é jung
¹² ajà jà nghut ri. Hau htoq agó, chang-
hpyik gâm, xunmân, namngón jung,
mura, loban, tsibiyiq wing, tsanlun xû,
mún eq sungso, nojûng eq sau, myang
eq myanglhêng pé; byù é gungdu eq
asak pé nghut ri.
- ¹³ Yhangmoq gi, 'Nàng myit ô nau nyi
é hkyô pé gi, náng chyáng mai gâng
ló byuq bê nghut ri. Nàng wó é sùt
é hkyô eq hkikhkam é hkyô pé ban-
shoq gi, byuq byuq bê nghut luí,
hkâ-nhâm le dum wó taû yù râ a
¹⁴ nghut.' ga taí kó râ nghut lhê. Gai zè
haû pé lé ung luí, yhang chyáng mai
sutzè wó yu é byù pé gi, yhang hpuzô
é jamjau hkyô lé wú gyuq kô é yan-
mai, we we má yap to kômù,
ngaubyi ngau-nhap eq iyon yon
uchyang,
- ¹⁵ 'Nú-nhâm é pán, me me dut é
pán eq zam zam ne é mebu
wut luí, hîng, lungsêng eq
palhé pé lé
mhôn tô é myuq mó gi, dingnyé
wó ri-nhung! Dingnyé wó
ri-nhung!
- ¹⁶ Hkyíng hkum rahkum má za,
haû-í yhang wó éutzè pé
htên byoq byuq bu-nhung!'
ga taí kó râ nghut lhê.
Wuì-sanghpo agyí yuq hkanmó eq
wuì-sanghpo mai jón wún é bang
banshoq, wuì-sanghpo hkâng bang eq
wuìshuq lung-aû mai wam baú hkyô
wó yu é bang banshoq gi, we we má

18 yap to kômù, myuq haù nyé gyó nyi é myihkau lé myàng kôjáng, ‘Myuq mó shí eq pûng é myuq gi, hkâmá joq shirâ lhú?’ ga taí garu kó râ nghut
 19 lhê. Yhangmoq gi, yhumsing é ulhum má hpuilhup kyaq gyun mù, ngaubyi ngau-nhap eq iyon yon uchyang,

‘Myuq mó gi, dingnyé wó ri-nhung! Dingnyé wó ri-nhung!

Wuìshuq lung-aù má wuì-sanghpo pé wó é bang gi, yhâng é sutzè pé é yanmai, sutzè wó bum akô.

Nghut kôlhang, hkyíng hkum rahkum má za, htên byoq hkyô gi, yhâng chyáng jé bu-nhung!

20 Mauhkûng ê, yhang é yanmai hkye gabú aq! Sân-yúng bang, lagyô pé eq myiqhtoí pé ê, hkye gabú keq!

Hkâsu mù gâ le, yhang, nungmoq lé kut é eq rajung za, Garai Gasang gi, yhang lé jéyáng bê nghut ri.’

ga taí kó râ nghut lhê.” gâ ri.

21 Hau htâng, wum-o a-tsam mó bo é maumang lagyo rayuq gi, luqluí long mó sù é luqgok racham waq toq yû mù, wuìshuq lung-aù má dú hkyô kat luí, taí é gi,

“Haù Babelon myuq mó gi, haù su kut wum kat dú hkyô pyâm é hui râ nghut luí, hkâ-nhám le dum myàng râ a nghut lo.

22 Haù tíng bat é bang, dat gó dat ye é bang, sampyí mut é bang eq tut mut é bâng é htê lé, náng chyáng hkâ-nhám le dum wó gyo lo râ a nghut.

Loq hpaqchyí ajung jung kûng é byù lé, náng chyáng hkâ-nhám le dum myàng lo râ a nghut.

Luqluí luí é htê lé, náng chyáng hkâ-nhám le dum wó gyo lo râ a nghut.

23 Haù myibung duq é myishâm lé, náng chyáng hkâ-nhám le dum wó duq lo râ a nghut.

Myisik lusik é htê lé, náng chyáng hkâ-nhám le dum wó gyo lo râ a nghut.

Náng é hpugá byû pé gi, mingkân é byù mó pé nghut ri.

Náng é myoqheq hpaqchyí èq mingdán banshoq mâ é bang lé, hkyô shuí ngoq bê nghut ri.

24 Haù myiqhtoí pê é sui, sân-yúng bâng é sui eq myidàm htoq má sat hui bang banshoq é sui pé gi,

yhâng chyáng chyat byu-myàng bê nghut ri.”

gâ ri.

Haleluya!

19 Hau htâng, mauhkûng htoq má, byù ajùm ayò garú é htê mó su gâ é lé, ngò wó gyô é gi,

“Haleluya!”^a

Hkyi yù hkyô eq hpungwup shingkang, a-tsam gi, nga-nhûng é Garai Gasang eq sêng é nghut lhê.

2 Hkâsu mù gâ le, Yhang tarâ jéyáng é hkyô gi, tengmán é eq dingmán é yanmai nghut ri.

Yhang gi, myidàm htoq mâ é bang lé, haù yhâng é ashop é dông gungsho zùm yap é hkyo èq mara kut shut nhang

^a 19:1 Haleluya gâ é gi, Hebre myíng dông, “Yhumsîng Garai Gasang lé hkya-on kungton lhê” gâ é dang nghut ri.

- é shiwa myhí mó lé, mara byi luí,
 Yhâng é dui-nhâng zoshâng wuì é sui yuichyín dam byi bu-nhung ô!”
 gâ ri.
- ³ Dum radàm, yhangmoq taí garu kô é gi,
 “Haleluya!
 Myuq hau é myihkau gi, pyat dedu ahtum abyuq ru íng doq nyì sháng gaq ô!”
 gâ bum akô nghut ri.
- ⁴ Haú suwún í xe myi yuq eq dui é dusak myí du gi, haú hkohkâm-tanghkuq má zung tô é Garai Gasang lé paí gop luí, noqkuq uchyang,
 “Amen, Haleluya!”
 ga, taí garú bum akô.
- ⁵ Haú hkûn,
 “Garai Gasâng é dui-nhâng zoshâng wuì nghut é, yhang lé gyuq hkunggâ é tiq ko banshoq bang ê!
 Nga-nhûng é Garai Gasang lé, hkyá-on kungtôn keq ô.”
 gâ é htê, haú hkohkâm-tanghkuq mai htoq lo ri.
- ⁶ Hau htâng, byù ajùm ayo é htê su ga, wuì myo myo mying hûm é htê su ga, maugum mó é htê su ga, taí garú é htê lé ngò wó gyô é gi,
 “Haleluya!
 Hkâsu mù gâ le, wum-o a-tsam dik shoq bò Sû nga-nhûng é Yhumsîng Garai Gasang gi, up nyi ri.
- ⁷ Nga-nhúng gi, ngón gabú luí,
 Yhâng é hpungwup shingkaung lé lhoq gyaú sháng ô!
 Hkâsu mù gâ le, haú Sauzo myiháng poí gi, jé bê nghut luí, Yhâng é myisik gi, rì rì mhôn to bê nghut ri.
- ⁸ Sân-yúng duq wik nú-nhâm é mebu le, wut râ matú, Yhang lé byí to bê nghut ri.”
 gâ ri. (Nú-nhâm é mebu haú gi, sân-yúng bang kut é dingmán é muzó nghut ri.)
- ⁹ Hau htâng, maumang lagyo gi, ngo lé, “Haú Sauzô é myiháng zoshuq poí má ji yu é hui bang gi, hkungsô wó nyi ri.’ ngû ká aq.” ga taí luí, “Dang shí pé gi, Garai Gasâng é tengmán mungdang yhang nghut lhê.” ga xoq taí ri.
- ¹⁰ Haú hkûn, ngò gi, yhang lé noqkuq râ ngû, yhâng é hkyí wang má paí gop kat é nghut lhê. Nghut kô-lhang, yhang gi, “Haú su hkâkut! Ngò gi, nàng eq haú Yesuq é saksé lé hkâm é náng gumang wuì eq rahá, byinzùm dui-nhâng zoshâng ru nghut lhê. Garai Gasang lé noqkuq aq! Hkâsu mù gâ le, Yesuq é hkyô lé saksé hkâm é gi, myiqhtoi htoí é Woi-nyí é myit dông nghut ri.” ga, ngo lé taí hkûn ri.

Myang Hpyû Jí To Su É Hkyô

- ¹¹ Hau htâng, ngò gi, mauhkûng bóng tô é lé le, ngá é myoq hí má myang hpyû radu nyi tô é lé le, myang ri. Myang hpyû haú má jí tô é gi, Lhumzui eq Tengmán gâ é Sû nghut ri. Yhang gi, tengmán é dông tarâ jéyáng
- ¹² luí, majan zan Sû nghut ri. Yhâng é myoqjí gi, myishâm su dut mù, Yhâng é ulhum má gi, janmaú myo myo tsúng tô ri. Yhang mai lai luí, ó yuq le a bo sê é myìng, Yhâng chyáng
- ¹³ kê tap tô ri. Yhang gi, sui má jum yù bê nghut é buhîng radung wut to luí, Yhâng é myìng gi, Garai Gasâng é
- ¹⁴ mungdang gâ ri. Haú mauhkûng gyè pé gi, hpyu é eq sanséng nú-nhâm é mebu wut mù, myang hpyû jí kô-luí, Yhâng htâng má châng bum akô

- ¹⁵ nghut ri. Byù myû haú pé lé zan rá matú, htoq é shâm gi, Yhâng é nhut mai htoq lo ri. Yhang gi, yhangmoq lé, shamtoq dumbáng èq up rá nghut lhê. Yhang gi, wum-o a-tsam dik shoq bò Sû Garai Gasâng é nhikmo-yô é tsibiyiq shi pyik jang má, yhangmoq
- ¹⁶ lé pyik rá nghut lhê. Hkohkam pê é Hkohkâm eq yhumsing pê é Yhum-sîng gâ é myîng gi, Yhâng é bu-hîng eq Yhâng é tangbaú má kê tap tô ri.
- ¹⁷ Dum, maumang lagyo rayuq gi, bui má yap tô é lé ngò myang ri; yhang gi, maulat mâ é nghoqzô pé banshoq lé, “Lé keq, Garai Gasâng é zoshuq poî
- ¹⁸ mó matú, lé zup zing keq; haú hkûn, nungmoq gi, hkohkam pê é, gyezaû pê é, wum-o a-tsam mó bò bâng é, myang jûm eq ji bâng é gungsho, luthkyô wó bang eq jùn pê é, byù mó byù zo pé lhunglhâng é gungsho pé lé, myàng zo kó rá nghut lhê.” ga, htê mó èq wut garû taí ri.
- ¹⁹ Hau htâng, haú tân jung dusak eq myidàm htoq mâ é hkohkâm eq yhangmoq é gyezô pé gi, haú myang htoq má jî to Sû eq Yhâng é gyezô pé lé, majan zan rá matú chôm zîng bùm
- ²⁰ kô é lé, ngò myang ri. Nghut kôlhâng, haú tân jung dusak gi, chyup yu é hui bekô nghut ri; hau htoq agó, haú tân jung dusak é masat lhô lé hkam yù luí, yhâng é alhô lé noqkuq é bang lé, mhaú zo rá matú, tân jung dusak hau é gunglik dông limik kumlhá pé kut shit é myiqhtoi pyoq le, chyup yu é hui bê nghut ri. Yhangnhik gi, hang myi duq nyi é myi nhông má duí gù
- ²¹ dú hkyô kat é hui bekô nghut ri. Haú myit gyó tô é bang gi, myang gûng má jî to Sû é nhut mai htoq lo é sham èq sat pyâm é hui bekô nghut luí, nghoq pé lhunglháng gi, haú bâng é gung-

sho lé, gyi gyi dau dau myàng zô bùm bekô nghut ri.

Rahkyîng Zàn

- 20** Dum, maumang lagyo rayuq gi, nik dik htûm é Lasang-dông é zoqshi eq joqtoq tui mó lé, yhâng é loq má chûng mù, mauhkûng mai
- ² gyó lé lo é lé, ngò myang ri. Yhang gi, natzau eq Tsadán nghut é, a-nham lhê é lhangmuí gâ é manjung lé, zanwut rahkyîng lhûng to rá matú, chyup tuí
- ³ yù bê nghut ri. Haú mù, maumang lagyo haú gi, rahkyîng zàn a byíng shí é gyoro má, manjung haú, byù myû pé lé a wó mhaú zo sháng gaq ga, nik dik htûm é Lasang-dong má yhang lé dú hkyô hâng kat luí, zoq myhî to mù, hau é ahtoq má dizik htûng tô ri. Haú rahkyîng zàn lai eq, yhang lé, ra yoq zo hpông htoq kat ra rá nghut lhê.
- ⁴ Ngò gi, haú tarâ jéyáng rá ahko ahkáng wó é bang zung tô bum é hkohkâm-tanghkuq pé lé, dum myang ri. Hau htoq agó, haú Yesuq é hkyô lé saksé hkâm é yanmai le, Garai Gasâng é mungdâng é yanmai le, ulhum hpyit hui bâng é sobyô pé lé, ngò myang ri. Haú bang gi, haú tân jung dusak eq yhâng é alhô lé a noqkuq é htoq agó, yhumsing é ngelang eq loq má hau é masat lhô lé a htûng tap yù bâng é sobyo pé nghut ri. Yhangmoq gi, dum dui toq mù, zanwut rahkyîng tup Hkrisduq eq rahá up nyi
- ⁵ bekô nghut ri. Haú gi, sâng-hî dàm dum dui toq é hkyô nghut ri. (Shi byuq bê myit gyó tô bang gi, rahkyîng zàn haú a byíng byíng wó dum dui
- ⁶ toq kó rá a nghut.) Sâng-hî dàm dum dui toq é hkyô má lom é bang gi, hkungsô wó bang eq chyoiyúng bang nghut ri. Í dâm nghû rá shi é hkyô gi, haú bang lé up rá ahkáng wó é

a nghut; haú bang gi, Garai Gasang eq Hkrisduq é hkyangjông pé dut rá nghut é htoq agó, Hkrisduq eq rahá zanwut rahkyîng tup up kó rá nghut lhê.

Tsadán Htên Byoq Huí É Hkyô

- ⁷ Rahkyîng zàn haú lai jáng, Tsadán gi, htóng mai nhang htoq kat é hui luí,
⁸ majan zan rá matú, myidàm htoq myi chyûn má nyi é, Goga eq Magoga gâ é byù myù pé lé mhaú shuí tsîng yù rá ga, htoq ê rá nghut lhê. Byù haú bang gi, wuìshuq lung-aú yàm mâ é semuí
⁹ myhó myo kó rá nghut lhê. Yhangmoq gi, maumyí htunghtáng hkap shoq chôm yán doq lò kômù, haú Garai Gasâng é byu pé nyi é dap nghut é, Garai Gasang chyitdap é myuq lhîng-hkyuq má, lé lóm tô bùm bekô. Nghut kôlhang, mauhkûng mai myi gyó lò luí, yhangmoq lé nyhê hkyô pyám bê
¹⁰ nghut ri. Haú tân jung dusak eq myiq-htoi pyoq pé lé dú hkyô kat jang nghut é, hang myi duq nyi é nhông má, yhangmoq lé mhoq hpyoq yu é natzau haú le dú hkyô pyám é hui bê nghut ri. Yhangmoq gi, nyí, myín, pyat dedu ahtum abyuq wuìhke jamjau hui zô nyi kó rá nghut lhê.

Ló Htâng É Tarâ Doqdan Hkyô

- ¹¹ Hau htâng, hkohkâm-tanghkuq hpyù mó ralhum eq haú má zung tô é Sû lé, ngò myang ri. Haú mauhkûng eq myigùng gi, Yhâng é hí mai hfang ló bê nghut mù, yhangnhik é
¹² matú jowò a joq lo nghut ri. Hau htoq agó, shi byuq bê nghut é, tiq é kô é bang gi, hkohkâm-tanghkuq hí má yap tô bum é eq laiká buk pé hpông é lé, ngò myang ri. Asak jihpán laiká buk gâ é gotû laiká buk le, hpông tô ri. Haú shi byuq bê bang gi, yhum-

- sîng kut é eq rajung za, laiká buk pé má kê tô é dông, tarâ doqdan é huí
¹³ bùm bekô nghut ri. Haú hkûn, wuìshuq lung-aú gi, yhang má lúng tô é, shi byuq bê bang lé ap byi luí, haú shi é hkyô eq Moming le, yhangnhik chyáng lúng tô é, shi byuq bê bang lé ap byi akô nghut ri; yuq hkgangmó gi, yhumsîng kut é eq rajung za tarâ doqdan é hui bekô nghut ri. Hau htâng, shi é hkyô eq Moming gi, myi nhông má dú hkyô kat é hui bekô nghut ri. Myi nhông haú gi, î dâm nghû
¹⁵ rá shi é hkyô nghut lhê. Asak jihpán laiká buk má, myìng a bo é sù ó yuq nghut kôle, myi nhông haú má dú hkyô kat é hui bekô nghut ri.

Yerusalem Asik

- 21** Hau htâng, mauhkûng asik eq myigùng asik lé, ngò myang ri; hkâsu mù gâ le, hí lhê é mauhkûng eq myigùng gi, lai ló byuq bê nghut luí, wuìshuq lung-aú le, dum joq rá a
² nghut lo. Haú hkûn, Chyoiyúng Myuq gâ é Yerusalem asik gi, lusik é matú mhôn yúng tô é myisik su, hen lajâng yù luí, Garai Gasâng chyáng mâ é nghut mù, mauhkûng mai gyó lé lo é
³ lé, ngò myang ri. Hau htoq agó, hkohkâm-tanghkuq mai htoq lo é danghtê mó lé, ngò wó gyô é gi, “Ahkuí, Garai Gasâng é nyi jowò gi, xângzo byu pé eq rahá nghut luí, Yhang gi, yhangmoq eq rahá nyi nyi rá nghut lhê. Yhangmoq gi, Yhâng é byu pé dut rá nghut luí, Garai Gasang yhang, yhangmoq eq rahá nyi mù, yhangmoq
⁴ é Garai Gasang dut rá nghut lhê. Garai Gasang gi, yhangmoq é myoq mâ é ngaubyi lhunglhang lé, sut pyám byi rá nghut lhê. Htângnùng má gi, shí-nò hkyô, iyon hkyô, ngaubyi ngau-nhap hkyô eq no hpu hkyô nghû é joq rá a

- nghut lo; hkâsu mù gâ le, hí lhê é hkyô pé gi, lai ló byuq bê nghut ri.” gâ ri.
- ⁵ Haû hkohkâm-tanghkuq má zung to Sû gi, “Wú aq, jung hkangmó lé, Ngò asik kut nyî bê nghut lhê.” ga tai lui, “Shí lé kê to aq, hkâsu mù gâ le, dang shí pé gi, lungíng é dang eq tengmán é dang nghut lhê.” ga tai ri.
- ⁶ Hau htoq agó, Yhang gi, “Haú pé gi, ban kut bê. Ngò gi, Alhpa eq Omega nghut lhê; Sâng-hi Awang eq Ló Htáng Sû le nghut lhê. Wuì shit sù lé gi, ahpau a dúng é za, asak wuìbúm mâ é uchyam lé, Ngò byi huq râ nghut
- ⁷ lhê. Wó ung é sù ó yuq nghut kôle, Garaí é silí wunlí haú pé banshoq lé sîng râ nghut mù, Ngò gi, yhâng é Garaí Gasang dut lui, yhang gi, Ngá
- ⁸ zo dut râ nghut lhê. Nghut kôlhang, gyuq myit bò bang, a lumjîng bang, achau achyut dut bang, byù sat bang, ashop é dông gungsho zùm yap é hkyô shut é bang, myoqheq hpaqchyî kut é bang, hparà noq é bang eq mhaú bang lunglhang é jowò gi, haû hang myi duq nyi é nhông nghut râ nghut lhê. Haû gi, í dâm nghû râ shi é hkyô nghut ri.” ga ngo lé tai ri.
- ⁹ Ló htâng é wúm nyhit jung byíng tô é góm nyhit lhum chung tô é maumang lagyo nyhit yuq mâ é rayuq gi, lé mù, “Lé aq, haû Sauzô é yhangmyi gâ é myisik lé, ngò tân shit râ nghut
- ¹⁰ lhê.” ga ngo lé tai ri. Hau htâng, yhang gi, ngo lé Woi-nyí mai bùm myhâng mó ralhúm má shuí jé lui, Garaí Gasâng chyáng mâ é nghut mù, mauhkûng mai gyó lé lo é, haû Chyoiyúng Myuq gâ é Yerusalem lé tân shit ri.
- ¹¹ Myuq haû gi, Garaí Gasâng é hpungwup shingkang hú é htoq agó, haû maubó gi, hpaú dik é huhpé lungsêng
- su dut lui, myoqjâm su sân-yúng ri.
- ¹² Myuq xêwâm gi, kô myhang é htoq agó, hkum raxe í lhum hpông tô ri; hkum haú pé má, maumang lagyo raxe í yuq zúng tô ri. Hau htoq agó, Israelaq byù myû raxe í hu é myíng lé, hkum haú pé má kê tap to bum ri.
- ¹³ Hkum haú pé gi, buihtoq hkyam shut sîm lhum, buiwàng hkyam shut sîm lhum, maupyî shut sîm lhum, mau-tsûng shut sîm lhum kut hpông tô ri.
- ¹⁴ Myuq xêwâm haû gi, awang raxe í lhúm èq hi tô é nghut lui, awang haú pé má, Sauzô é lagyo raxe í yuq é myíng dap tô bum ri.
- ¹⁵ Haû ngo lé nyo é maumang lagyo gi, myuq lé le, hau é hkum pé lé le, xêwâm pé lé le, ké râ matú, kê é jung hîng jâm-yang ralhúm chung tô ri.
- ¹⁶ Myuq haû gi, myi chyûn dut mâ é nghut lui, hîng hpyang làm hpyang rawuí wuí za dut mâ é nghut ri. Maumang haû gi, myuq lé jâm-yang hau èq kê wú é hkûn, hîng hpyang, làm hpyang, myhâng hpyang banshoq
- ¹⁷ 1400 dêng^a kô bo ri; yhang gi, haû byù kê é jung eq wuí é maumang lagyo é kê jung lé chûng mù, myuq xêwâm lé kê wú é hkûn, rasho myí xê
- ¹⁸ myi dúng bo ri. Myuq xêwâm haû gi, huhpé lungseng èq saí é nghut ri; myuq gi, hîng gyíng èq saí é nghut mù, myoqjâm su yhang sân-yúng ri.
- ¹⁹ Myuq xêwâm haû é awang pé gi, hpau jung lungsêng ajung jûng èq mhôn tô é nghut ri. Sâng-hí lhum gi, huhpé lungseng èq, í lhum nghû râ gi, nila (mauhkûng nyui su dut jung) lungseng èq, sîm lhum nghû râ gi, mahuya (noq é isâm myo jung) lungseng èq, myí lhum nghû râ gi, myaq (huí
- ²⁰ nyui nyui é jung) lungseng èq, ngo

^a 21:16 1400 dêng gi, Grik pê é stadia 12000 kô nghut ri.

lhum nghû râ gi, nyhaú myoqjí su dut jung lungseng èq, hkyuq lhum nghû râ gi, pate-mya (nè é jung) lungseng èq, nyhit lhum nghû râ gi, huí muí muí é su dut jung lungseng èq, shit lhum nghû râ gi, myek-yoi (wuimau nyuì su dut jung) lungseng èq, gaú lhum nghû râ gi, utohpaya (bó huí hui é jung) lungseng èq, raxê lhum nghû râ gi, mahuya nyuì lungsêng èq, raxe rahlhum nghû râ gi, wakintu (mhan-haq nyuì eq mauhkûng nyuì nyhò tô é su dut é jung) lungsêng èq, raxe í lhum nghû râ gi, (me me dut é jung) htihtu-nila lungseng èq mhôn tô ri.

²¹ Haú myuq hkum raxe í lhum gi, palhé raxe í cham nghut ri; hkum rahlhum gi, palhé rachâm èq saí é nghut ri. Haú myuq é hkyô mó gi, hîng jet èq saí é nghut luí, myoqjàm su duq san é hkyô nghut ri.

²² Ngò gi, myuq haú má noqkuq yhûm joq é lé a myàng, hkâsu mù gà le, haú wum-o a-tsam dik shoq bò Sû Yhumsîng Garai Gasang eq Sauzo gi, myuq hau é noqkuq yhûm nghut nyi

²³ é yanmai nghut ri. Haú Garai Gasâng é hpungwup shing kang gi, myuq haú má duqbó byí é htoq agó, Sauzo gi, myuq hau é myibung nghut é yanmai, myuq haú má gi, buì eq lhamó

²⁴ tsò byi a ra nghut ri. Haú byù myú pé gi, myuq haú duqbó é hkaú má hkyô wó so kó râ nghut lhê; haú myidàm htoq mâ é hkohkam pê gi, yhangmoq é hkikhkâm hkyô lé, myuq haú

²⁵ má yù lé kó râ nghut lhê. Myuq haú má gi, myín nghû é a joq é yanmai, myuq hkum myhî é le joq râ a

²⁶ nghut lo. Haú byù myú pê é hpungwup shing kang eq aróng lé, myuq

²⁷ haú má yu lé kó râ nghut lhê. Myuq haú má, a sansêng é hkyô haí le wó wàng râ a nghut é htoq agó, hoq hpu

hkyô eq mhaú zô é hkyô kut é sù ó yuq le wó wàng râ a nghut; haú Sauzô é asak jihpán laiká buk má myìng bo é bang za wó wàng râ nghut lhê.

Asak Wuì Mó Lâng

22 Hau htàng, Garai Gasang eq Sauzô é hkohkâm-tanghkuq mai yui htoq lô luí, myuq hkaú mâ é hkyô mó gûng dông yui lô é, myoqjàm su sân-yúng é asak wuì mó lâng lé, maumang lagyo haú, ngo lé tân

² shit ri. Wuilàng í hpoq é má, ashi raxe í myú zuí é asak shigâm yuq tô é nghut luí, lhohkyap hkangmó ashi zuí ri. Hau htoq agó, shigâm haú pé mâ é ahaq pé gi, byù myú pé lé yâ gè

³ râ matú nghut ri. Nhîng é haí le a joq lo râ nghut lhê. Garai Gasang eq Sauzô é hkohkâm-tanghkuq gi, myuq hkaú haú má joq nyi râ nghut mù, Yhâng é dui-nhâng zoshâng wuì gi, Yhang lé

⁴ noqkuq dojàu kó râ nghut lhê. Yhangmoq gi, Yhâng é myoqdong lé myàng kó râ nghut é htoq agó, yhangmoq é ngelang má, Yhâng é myìng kâ tap

⁵ é hui kó râ nghut lhê. Myín nghû é le joq râ a nghut lo. Myibung duqbó byí é le, buì tsò byí é le, yhangmoq ra kó râ a nghut lo; hkâsu mù gà le, haú Yhumsîng Garai Gasang gi, yhangmoq lé duqbó byí nyi râ nghut lhê. Hau htoq agó, yhangmoq gi, pyat dedu ahtum abyuq up nyi kó râ nghut lhê.

⁶ Maumang haú gi, ngo lé, “Dang shí pé gi, lungíng é dang eq tengmán é dang nghut lhê. Myiqhtoí pé é woi-nyí lé up é Yhumsîng Garai Gasang gi, adé myáng má dut lò râ hkyô pé lé, Yhâng é dui-nhâng zoshâng wuì lé tân shit râ matú, Yhâng é maumang lagyo lé nhang kat é nghut ri.” ga tai ri.

Yesuq Jé Lé Lô Râ Hkyô

- 7 “Wú keq, Ngò gi, a myáng má jé lé lô râ nghut lhê! Laiká shí má bo é myiqhtoi dang pé lé châng kut é sù gi, hkungsô wó nyi ri.”^a gâ é lé, ngò wó gyô ri.
- 8 Háu hkyô pé lé wó myâng wó gyô é sù gi, ngò Yohan nghut lhê. Ngò gi, háu hkyô pé lé wó myâng wó gyô é hkûn, ngo lé, shí hkyô pé tún shit é maumang lagyô é hkyî wang má noqkuq râ matú paî gop é nghut lhê.
- 9 Nghut kôlhang, yhang gi, ngo lé, “Háu su hkâkut! Ngò gi, nàng eq le, náng é gumang myiqhtoi pé eq le, laiká shí mâ é mungdang pé lé châng kut é lhunglhâng bang eq le rahá, byinzùm dui-nhâng zoshâng ru nghut lhê. Garai Gasang lé noqkuq aq!” ga taî ri.
- 10 Hau htâng, yhang gi, “Laiká shí má bo é myiqhtoi dang pé lé, hkâzaú to lo, hkâsu mù gâ le, háu ahkyíng gi, 11 chyâng lò bê nghut ri. A dingmán é sù gi, a dingmán é dông xoq kut nyî sháng gaq; a sansêng é sù gi, a sansêng é dông xoq dut nyî sháng gaq; dingmán é sù gi, dingmán é dông xoq kut nyî sháng gaq; chyoiyúng é sù gi, xoq chyoiyúng nyî sháng gaq.” ga ngo lé taî kyô ri.
- 12 “Wú keq, ngò gi, a myáng má jé lé lô râ nghut lhê! Ngò gi, yuq hkanmó lé, yhumsîng kut é eq rajung za byi râ shigyaú chyunghuq chung tô lhê. Ngò gi, Alhpa eq Omega nghut lhê, Sâng-hi eq Jihâm nghut lhê, Sâng-hi Awang eq Lô Htáng Sù le nghut lhê.
- 14 Asak shigâm má jé râ eq myuq hkaú shut hkúmdong mai wó wang jé râ ahkáng wó yû shoq, yhumsîng é bu hîng lé chí sân é bang gi, hkungsô wó nyi ri. Shinggan má gi, hkui dông nyi é bang, myoqheq hpaqchyî kut é bang, ashop é dông gungsho zùm yap é hkyô shut é bang, byù sat é bang, hpara nõq é bang eq mhaù é hkyô lé ô nàu luí châng kut é bang lhunglhâng nyi bum akô nghut ri.
- 16 Ngò, Yesuq gi, háu noqkuq hpûng pé lé, shí hkyô pé saksé hkâm shit sháng gaq nghû, Ngá é maumang lagyo lé, nungmoq chyáng nhang kat bê nghut lhê. Ngò gi, Dawiq é Amyit eq Awut Ashín le, háu duqbó é Bó-myhû le nghut lhê.”^b gâ é lé, ngò wó gyô ri.
- 17 Háu Woi-nyî eq myisik gi, “Lé aq!” gâ akô. Háu wó gyô é sù gi, “Lé aq!” ga sháng gaq. Wui shit sù ó yuq nghut kôle, lé sháng gaq; shuq nau é sù ó yuq nghut kôle, ahpau byi a ra é asak wui lé, shuq sháng gaq.
- 18 Laiká shí má bo é myiqhtoi dang pé lé wó gyô é bang yuq hkanmó lé, ngò sidiq byî é gi: dang háu pé má, rajung jung kat jat é sù ó yuq chyáng nghut kôle, Garai Gasang gi, laiká shí má kê tô é wúm pé lé jé nhâng râ nghut lhê.
- 19 Myiqhtoi laiká shí má bo é dang pé lé, yu pyâm é sù ó yuq lé nghut kôle, Garai Gasang gi, laiká shí má kê tô é asak shigâm eq chyoiyúng myuq mâ é yhang eq sêng é gû lé, yu pyâm byi râ nghut lhê.
- 20 Shí hkyô pé lé saksé hkâm byî é Sù gi, “Nghut bê, Ngò gi, a myáng má jé lé lô râ nghut lhê.” ga taî ri.
Amen. Yhumsîng Yesuq ê, lé lô aq ô!
- 21 Háu Yhumsîng Yesuq é jeju gi, Garai Gasâng é byu pê chyáng joq nyî sháng gaq ô! Amen.

^a 22:7 Dang shí hkun gi, Yesuq taî é nghut lhê.^b 22:16 Dang shí hkun gi, Yesuq taî é nghut lhê.

